

Semi-  
narium  
Histo-  
ricum

615 / 2 III



BIBLIOTHECA  
UNIV. JAGELL.  
CRACOVENSIS

394172


/ 2

Mag. St. Dr.

III



SEMINARIUM HISTORICUM  
C. R. UNIVERSITATIS IAGELLONICAE  
CRACOVENSIS.  
Coll. *A. b. 10.*  
Inv. vet. N. *844*  
Inv. N. *818. 615*  
(1890)





R E R V M  
**GERMANICARVM**  
SCRIPTORES

varii,

Qui res in Germania & Imperio sub FRIDERICO III.  
MAXIMILIANO I. Impp. memorabiliter gestas  
illo æuo litteris prodiderunt.

**TOMVS SECVNDVS.**

EX BIBLIOTHECA

**MARQVARDI FREHERI,**

Consiliarii Palatini,

*Primum Editus,*

NVNC DENO RECOGNITVS.

*Curante*

**BURCARDO GOTTHELFIO STRUVIO,**

CONSILIARIO ET HISTORICO SAXONICO.



ARGENTORATI,  
Sumptibus **JOHANNIS REINHOLDI DULSSECKERI,**  
ANNO MDCCXVII



GERMANICA  
SERVATORES

in Germania & Imperio sub Frederico III.  
Miliano I. Imp. memorabiliter gestas  
illo suo literis prodiderunt.

TOMVS SECVNDVS

EX BIBLIOTHECA

MAXIMILIANI

Consilium Palatinum

Primum Editionis

HNIC DEVO RECOGNITVS

Carmin

BERNARDVS GOTTFRIEDVS STRUUVIO

CONSILIARIO ET HISTORICO SAXONICO



394172 III 1/2

StDr. 2006.D. 246/192 (275)





*Magnificis, Nobilissimis & Prudentissimis,*  
**DVVMVIRIS, SEPTEMVIRVMQVE**  
**COLLEGIO, ET AMPLISSIMO DECVRIO-**  
**NVM ORDINI REIP. NORIMB.**



Etus querela est, Patres amplissimi, quod non Germaniæ quantum aliis gentibus, Romanæ potissimum, & Græcæ, scriptorum fuerit, quorum opera gesta eius & decora posteritati innotuissent. Vetus: sed nescio an valde mira, vel etiam satis æquo animo accipienda. Quid enim monstri, non suppetere, quæ si etiam aliqua extiterunt, æstimata & conseruata non fuerint? Quod ut de cæcis illis Germaniæ incultæ temporibus non replicemus, an non in superioribus sæculis, quibus accepta Imperii maiestate maximè effloruit, est deplorandum? quibus ut sui subinde scriptores minimè defuerunt, ita nescio quo tunc in precio habiti, certè à posteris velut data opera neglecti planissimè periissent, nisi à paucis demum annis cultissimo hoc æuo, eruditorum patriæque amantium hominum improbo studio velut è rogo & fauilla erutæ reuixissent. Vel sæculum illud patrum memoriam præcedens, quo grauissimi Principes, FRIDERICVS & MAXIMILIANVS imperarunt, considerate: notandum in primis & memorabile, ob multas rerum mirasque vices, quas dudum parturientia fata ad magnam totius prope humani generis mutationem ingenti nisu ediderunt. Dum isthinc capto Byzantio & exciso Orientali imperio, dimidio propemodum Orbi vastitas & barbaries inducitur: hinc nostra Teutonia, totaque ferè Hesperia & Triones, graue Tiberis iugum perosa, conceptos diu gemitus erumpere motusque iustos audere cœpit; quos continuo ingens illa prudentibus dudum præuisa, non nullis etiam prædicta conuersio, quæ non minus verè ac illa olim sub Constantino FELIX TEMPORVM REPARATIO dici possit, est subsecuta: cui mox omnis etiam ciuiliū artium elegantia & commoditas accessit, instauratis linguarum studiis, & Palladiis scholis institutis, typographia quoque & omni mechanica, felici ingeniorum certamine excogitata. Neque ita modò mutata rerum facie, velutique senio exuto mundus renouari visus est: sed & simul magna sui parte subito augeri, longinquis & eatenus ignotis quibusdam insulis, regionibus, imò mundis diuerso Sole calentibus detectis, ditissimaque penu præter omnem opinionem aperta; & commerciorum, nauigationum, expeditionum noua materia data. Planè ut felix illud Augusti sæculum (qui adeo Friderico illo Cæ-




# DEDICATORIA.

fare imperii diuturnitate similiorem non habuit) renatum videretur. Neque verò tum cessabat erudita scriptorum diligentia, non indigenarum tantum, sed exterorum quoque, ad quos tantus rerum nostrarum splendor non diffundere se non poterat: quique adeo ea tempestate ad styli accurationem veterum imitatione primulum conuersi, alii perpetuis annalibus seriem rerum condere, alii singula per partes exequi certabant: nihilo tamen benigniore præ anterioribus fortunâ vsi. Quos ideo nunc demum studiosius conquisitos, & quantum fieri potuit integritati restitutos, cum reipublicæ & posteritatis gratiâ in publicum seu emittere seu remittere pararem; cuius auspiciis tam utile institutum adgrederer, ne semel quidem cum amicis in consilium eundum putavi. Cum enim superiori collectioni nobilissimæ Vindelicum metropoli oblatae, istam iam tum promissam iusta serie adnectere, similibusque patronis commendare par esset; quæ alia occurrebat Respublica illi coniunctior? quæ hac honoris delatione dignior? quæ tantum de patre meo meisque omnibus merita? Planè vt, si à patre patria dicenda est, pro altera patria illam nos habere libenter meritò profiteamur, in qua tot annos honestissima functione ornatus, & in dignatione habitus vir optimus ætatem tranquillam exegit, vitamque clausit. Quem affectum nuper ipsa magis etiam fouit & excitauit, cum ab illius funere me apud vos hospitem nullo non honoris & beneuolentiæ genere prolixè acciperetis. Neque iam hoc loco quis expectet, vt in laudes Urbis vestræ & reipublicæ vela pandam: quæ non tantum fecundiora olim ingenia exercere meruere, & his ipsis in scriptoribus non semel locum inuenere; sed ad remotarum quoque gentium noticiam penetrauere; vt apud Atticos homines vix satis rerum locorumque gnaros, magno & prope inuidendo elogio ΠΟΛΙΣ ΕΤΔΑΙΜΩΝ celebrata legatur. Et ideo æuo, quo si inter cæteras vrbes caput altè efferebat, ad id tamen magnificentiae culmen non excreuerat, quod nunc singulari Superùm fauore obtinens, sapientum virorum iudicio inter prima Germaniæ ornamenta, Imperii robora, artium & omnis elegantiae præsidia habetur. A quo splendore si huic etiam operi (nostro ferè dixissem, quod nos quidem prope sepultum eruimus, disiectum recollegimus, situ squalidum expoliuimus) stricturam aliquam quæram, & vt in visenda illa Bibliotheca vestra asseruatum à secundo deinceps interitu securum degat, procurem; ritè & ordine facere optimo cuique videri poterò, neque ipsi (si prudentiam & humanitatem vestram noui) ausum improbabit scio. Vos itaque, Amplissimi Patres, vt quaecunque mei in vos & ciuitatem vestram cultus & affectus monumentum boni consulatis, vestrumque illum fauorem & beneuolentiam tot argumentis compertam mihi meisque, si meremur, deinceps conseruetis; per ipsum, quod priuata charius vobis esse scio, publicæ rei decus rogo & obtestor. Bene valete. E Plinianis, Non. Mart. Anno Christi MDCII.

MARQVARDVS FREHERVS.

Consiliarius Palatinus.





AD NOBILISSIMUM VIRUM,  
MARQVARDVM FREHERVM,  
CONSILIARIVM PALATINVM,  
GERMANIÆ SVOS SCRIPTORES  
RESTITVENTEM.



*T* non est auro suus usus honorve,  
latente  
Dum terra tegitur sordidior sinu;  
Sed pretii demum tunc nomen &  
omen adimplet,  
Vi venit inque oculos sapius inque manus:  
Sic nulla utilitas, nulla est sua adorea Libris,  
Bibliothecarum quos male carcer habet.  
In penam solum veniunt, si viuere verum est,  
Membratim caries quos edit atque situs:  
Quosque velut geminato hinc blatta hinc tinea  
rodit  
Compede, dum fiant nil nisi nigra cinis.

Ergo tuum meritum quantum est ac quale, tot  
ultrò

Qui simul Auctores luce FREHERE beas?  
Omnimodè magnum. Nam quod Germania, ab  
annis

Mille ferè, propius sit modò nota sibi;  
Cernat & in speculo monumenta forisque domique  
Gesta subinde sago, gesta subinde toga;  
Omne FREHERE tuum est: hoc est, tibi debet,  
in isto

Quæ sit anus senio, ne videatur anus:  
Illo sed, supra Phœnicem, vere virescat,  
Temporis in quam nil iura secunda queant.

IANVS GRVTERVS.



*A*m verò & gerere, & gestas Ger-  
mania nouit  
Scribere res: olim faciens dignif-  
sima scribi,  
Non scribens, breuibus nimirum  
promptior hastis  
Quam calamo, nec Caesar erat, vel Cesare si quis  
Maior, Teutonica genti damnosior hostis,  
Quam tenebrosa fuit gestarum Oblivio rerum.  
Hanc, gentis miserata, procul nostro exigit orbe

Vindex HISTORIA: illa alma sanctissima nutrix  
Mnemosynes, cuius templo tua fama FRE-  
HERE

Aureolis in scripta notis suspenditur, atque  
Mittitur ad seros ceu consecrata nepotes.  
Ipsa tibi laudemque suam titulosque resignat  
HISTORIA: ut qui scripta situ senioque sepulta  
Erui, & Patria manifesta in luce reponis,  
Abstrusi testis veri, lux temporis & dux,  
Vitaque Germanis veniens celebreris in æuum.

BARTHOLOMÆVS KECKERMANNVS,  
Dantiscanus.



*E*VTONICÆ gentis, decus, &  
Mauortia facta,  
Dignaque Germanis libera verba  
viris;  
Et consulta piæ patri gnatoq; duobus  
Caesaribus, vates quos vetuere mori;

Pontificumque artes, pietatis, fallere larvâ  
Mortales solitas, Ausonidumque dolos,  
Erui ex chartis dum culte FREHERE vetustis,  
Et Regum archiuis, autographisque Ducum:  
Rem magnam præstas, pro qua, si cætera desint,  
Non deerit grata posteritatis honos.

SIMON STENIVS,  
Lomacensis.



# AVCTORES HISTORIARVM QVI HOC TOMO SECVNDO CONTINENTVR.

**B**ENEVENTI DE RAMBALDIS Imolensis, Liber Augustalis, vitas Cæsarium à C. Iulio vsque ad Wenceslaum Imp. summarie complectens. Cum supplemento Æneæ Syluii vsque ad Fridericum III. Imp. (*quod tamen quia nondum ad nos peruenit, eius loco Egnatianam Epitomen vsque ad Maximilianum I. Imp. supposuimus.*) Fol. 1.

ÆN. SYLVII ad Alphontum Regem Siciliae super connubio Friderici & Leonoræ, oratio gratulatoria. Fol. 23.

M. IACOBI MOZII, Legati Cæsarei, coram Alphonso Rege Portugalliae pro filia eius Leonora Friderico Cæsari desponsanda: & eodem tempore ad Imperatricem tunc futuram, in praesentia Regis & sui parlamenti, habita oratio. *Ex m. f. nostro.* Fol. 31.

ÆN. SYLVII Oratio pro coronatione Friderici III. Regis Rom. ad Nicolaum V. PP. cum petitione pro congregando Concilio generali. *Ex m. f. Palat.* Fol. 34.

EJ. Oratio suaforia eodem tempore habita ad Nicolaum V. PP. ut Fridericum Cæsarem in Turcos passagium parantem, modis omnibus adiuuare velit. *Ex ms. Palat. multo correctius edita, quam olim inter epistolas Æn. Syluii.* Fol. 38.

THADÆI QVIRINI, Patricii Veneti, ad Fridericum III. Imp. Romæ à coronatione venientem, nomine suæ Reipublicæ oratio gratulatoria. *Ex ms. Palat.* fol. 42.

Alia oratio pro Vicario Cremonæ, ad eundem Imp. Fridericum III. aduentantem, habita penes Lauretum Anno 1452. Fol. 44.

MICHAELIS APOSTOLII, BYZANTINI Oratio panegyrica Græca ad Fridericum Imp. Aristonymi Byzantini nomine scripta, circa annum 1457. *Ex ms. Palat. cum versione Latina Bart. Keckermanni.* Fol. 47.

NICOLAI LANCKMANNI DE FALCKENSTEIN de Friderici III. Imp. & Eleonoræ Portugalliae reginæ desponsatione, benedictione & coronatione: tum de Maximiliani Regis eiusque sororis Kunegundæ natiuitate, historiola ex variis litterarum monumentis & fragmentis concinnata. *Ex ms. primum edita.* Fol. 51.

ÆNEÆ SYLVII, de his quæ Friderico III. Imperante in Germania & per totam Europam memorabiliter gesta sunt, vsque ad annum MCCCCLVIII. commentarius. *Veterum Codicum collatione multo quam antea emendatior, atque etiam auctior.* Fol. 81.

DE SIGISMVNDI Ducis Austriae honorabilissimo aduentu ad Constantiam ciuitatem Alemaniae, anno 1459. epistola Venturæ de Perusio Pontani ad Stephanum de Nardinis Protonotarium &c. *Ex ms. nostro.* Fol. 171.

SIGISMVNDI, Ducis Austriae, eiusque aduocati GREGORII HEIMBURG, appellatio & apologia contra censuram & excommunicationem Pii II. PP. anno 1460. interposita. *Correctiora ex ms. nostris.* Fol. 183.

DE LEODIENSIVM dissidio cum episcopo suo Ludouico Borbonio, & de Leodii ciuitatis excidio lamentabili anno 1468. narratio historica, è Iacobi Picolominei Cardinalis Papiensis Commentariorum libro IV. *Romana editio correctior.* Fol. 261.

DE CAROLI Burgundiae Ducis laudibus & victoriis, nec non Leodiensium clade & excidio, incerti Auctoris epistola, tractatui de custodia Principum, praefixa. *Ex ms. nostro.* Fol. 278.

DE FRIDERICI III. Imp. in Italiam profectio votiua, & honorifico ad Urbem aduentu, quidque ibi cum Paulo II. PP. anno 1469. egerit, narratio elegans è Iacobi Picolominei Cardinalis Papiensis Commentariorum libro VII. *Romana editio correctior.* Fol. 284.

AVGVSTINI PATRICII de Comitibus Imperii sub Friderico Imp. III. apud Ratispo.



AVCTORES HISTORIARVM QVI HOC TOMO SECVNDO.

Ratisponam celebratis anno MCCCCLXXI. commentariolus. Fol. 288. IO. ANTONII CAMPANI ad Iacobum Cardinalem Papiensem, ex eisdem Comitibus, de rebus ibi gestis Epistolæ familiares. *Editio Romana correctior.* Fol. 292.

De Congressu Friderici III. Imp. & Caroli Ducis Burgundiæ apud Treuerin anno 1474. historiola perelegans è Gallico, Rodulpho Agricola Frisio interprete. Fol. 302.

RHODIORVM militum magistri, Petri Danbuffoni, de seruata vrbe præsidioque suo, & insigni contra Turcas victoria, ad Fridericum III. Imp. relatio, Anno 1480. *Ex veteri illius temporis editione, in Bibl. Palat.* Fol. 305.

SIXTI PP. IV. Passagium, siue Bulla exhortans Principes Christianos ad sacram expeditionem in Turcas suscipiendam, missa Philippo Palatino anno 1481. *Ex ms. Palat.* Fol. 310.

MATTHIÆ CORVINI Hungariæ & Bohemiæ Regis Oratorum ad Principes Imperii Noribergæ congregatos; pro auxilio contra Turcas ferendo imploratio, anno 1482. Fol. 315.

Eiusdem de denegata audientia & ope querela, ad Henricum Episcopum Ratisponensem scripta anno 1483. *extat apud Andream Presbyterum Ratispon. in chronico Bauaria, sub illo anno.* Fol. 319.

IO. TRITHEMII Historia Belli Bauarici, ex Annalibus Hirsaugiensibus. Fol. 321.

M. ANTONII TORQVATI Prognosticon de Europæ euerfione: quod Matthiæ Regi Hungariæ direxit anno 1480. vsque ad annum 1538. Euentibus insignioribus, quos ibi prædixit, ad marginem annotatis. Fol. 383.

APOPHTEGMATA Imperatorum Romanorum Rudolphi, Caroli IV. Sigismundi, Alberti, Friderici II. per Poggium Florentinum, Æneam Syluium, & Henricum Bebelium consignata. Fol. 394.

FRIDERICI III. Imp. Epistolæ aliquot. *Quibus cum tempore, & amicorum ope, plures accedere poterunt.* Fol. 402.

Eiusdem Friderici Imp. formula precationis ad Deum, pro Imperii incolumitate. *Extat apud Bruschiū in Monasteriis Germaniæ.* Fol. 404.

HERMOLAI BARBARI, Zachariæ F. legati Veneti, ad Fredericum Imp. & Maximilianum Regem Rom. recens creatum, principes inuictissimos, oratio gratulatoria, habita anno 1486. Fol. 408.

Q. ÆMYLIANI CIMBRIACI Poetæ & comitis Palatini, Encomiasticon ad Diuos Cæs. Fredericum Imp. & Maximilianum Regem Rom. lib. V. Quibus præcipue electio prædicti Regis, resque eorum gestæ apud Brugas Flandrorum anno 1488. celebrantur. *Hæc cum scholiis etiam Iac. Spiegelii excusa audio.* Fol. 415.

D. CONRADI WENGERI Canonici Brixinensis, de bello inter Venetos & Sigismundum Austriæ Archiducem gesto anno 1487. Commentarius. Fol. 445.

PALLANTIS SPANGEL Oratio extemporalis habita ad Maximilianum Rom. Regem, cum anno 1489. apud Philippum Comitem Palatinum Heidelbergæ pernoctaret, nomine Vniuersitatis ibidem. Fol. 459.

VDAL. ZASII ad eundem Oratio habita Vniuersitatis Friburgensis nomine. *Extat inter alias eiusdem orationes, commentario Feudali subiectas.* Fol. 466.

IASOMIS MAYNI I. C. Equitis Romani, Cæsarei & Ducalis Senatoris, ac Ducalem legatum in Germania agentis, ad Sereniss. Maximilianum Rom. Regem, in auspiciatissimis eius & Blanca Mariæ Mediolani Vicecomitis nuptiis, Epithalamion prosa scriptum. Fol. 468.

PANDVLPHI COLLENTII I. C. & Equitis, Ferrariæ Ducis legati, ad Augustissimum Principem Maximilianum Cæs. Rom. regem, Oratio dicta Ispruchis in auditorio Cæsaris. Fol. 476.

HENRICI GLAREANI Heluetii, Poetæ Laureati, ad Maximilianum Imp. Panegyricon. Fol. 481.

LITTERÆ credentiales & instructio Ambasiatoris Regis Poloniæ super irruptione Turcorum in eius dominium ad conuentum Principum sub Maximiliano Rege, in Friburgo exhibitæ & præsentatæ, Anno 1498. *Ex ms. Palat.* Fol. 484.

PRIVILEGIUM & erectio Collegii Poëtarum & Oratorum in Viennensi Gymna-



AVCTORES HISTORIARVM QVI HOC TOMO SECVNDO.

Gymnasio per Maximilianum Imp. anno 1501. cum Panegyrico de eadem re Vincentii Longini Eleutherii Silestani. Fol. 488.

IOH. FRANCISCI PICI MIRANDVLÆ Domini & Concordiæ Comitiss Staurostichon, de mysteriis dominicæ Crucis passim in Germaniam delapsis anno 1503. ad Maximilianum Aug. Fol. 493.

HENRICI BEBELI Ecloga triumphalis de victoria Cæsaris Maximiliani contra Bohemos. Fol. 507.

LYDOVICI HELIANI, Vercellenfis, Regis Francorum Oratoris, in conuentu Germanorum Principum apud Augustam anno 1510. Oratio in Venetos inuectiua perelegans. Ex *Iohannis Trithemii Abbatis Annalium Hirsaugiensium volumine II. desumpta.* Fol. 522.

MICHAELIS COCCINII, Tubingensis, de bello Maximiliani Imp. cum Venetis gesto anno 1511. Commentarius. Fol. 537.

IOH. PIERII VALERIANI, de honoribus D. Matthæo Langio Episcopo Gurcensi, & Cæsareo totius Italiæ vicario, Urbem ingredienti habitis, anno 1512. ad Petrum Crispum epistola. Item Panegyris eidem Episcopo dicata per Ianum Franciscum Vitalem Panormitanum. Fol. 569.

HIERONYMI NOGAROLI Comitiss, ad Maximilianum Aug. pro Vicentinis oratio, habita ad illum pro templi foribus, cum à Patauina obsidione Vicentiam venisset. Fol. 583.

IOHANNIS CVSPINIANI, Præfetti vrbs Viennensis, Diarium de congressu Cæs. Maximiliani Aug. & trium Regum, Vladislai Hungariæ, Ludouici Bohemiæ, & Sigismundi Poloniæ, apud Viennam Austriæ anno 1515. Fol. 587.

RICARDI BARTHOLINI Hodoëporicon siue itinerarum Reuerendiss. D. Matthæi Cardinalis Gurcensis, Coadiutoris Saltzburgensis &c. Quæque in conuentu Maximiliani Cæs. Aug. & Serenissimor. Regum Vladislai, Sigismundi ac Ludouici memoratu digna gesta sunt: multis insignibus Orationibus, Epistolis, Carminibus insertis. Fol. 613.

GRAVAMINA Germanicæ Nationis contra sedem Romanam, cum remediis & auisamentis ad Cæs. Maximilianum, & cum eiusdem edicto. Fol. 673.

IACOBI WIMPHELINGII, Selestadiensis Theologi, de Germanicæ nationis & Imperii grauaminibus contra sedem & curiam Romanam, tractatus Maximiliani Cæs. iussu scriptus. Fol. 684.

Eiusdem super eodem argumento contra Æneæ Syluii Cardinalis Senensis tractatum Replicæ, ad Albertum Archiepiscopum Moguntinum scriptæ anno 1515. Fol. 686.

LEONIS X. PP. Legatorum oratio coram Imp. Maximiliano & ordinibus Imperii, pro colligendis decimis in expeditionem contra Turcas, anno 1519. Et huic opposita viri cuiusdam clarissimi dissuasoria, Ne Principes in decimæ præstationem consentiant. Fol. 698.

IACOBI MANLII, Friburgensis, Cæsarei Historiographi & Consiliarii Epistola duorum actuum anno 1518. in vrbe Augusta celebratorum narrationem continens. I. Inuestituræ Cardinalitiæ dignitatis Alberto Brandenburgico Archiepiscopo Moguntino collatæ. II. Gladii & pilei per Pontificis legatum Maximiliano Imp. oblatis. Fol. 705.

ORATIO funebris in depositione Cæs. Maximiliani in oppido Welfs Austriæ, præsentibus Matthæo Cardinale Saltzburgense, Episcopo Tergestino, aliisque Prælatiss & Nobilibus, per F. Iacobum Fabrum Augustanum Prædicatorem habita 16. Ianuar. anno 1519. Fol. 717.

GEORGII SAVROMANI ad Augustos Principes Carolum V. Imp. electum & Ferdinandum germanum, post Maximiliani Cæs. eorum aui obitum Oratio. Fol. 743.

PETRI ÆGYDII in eundem Threnodiæ, cum scholis Spiegelii, & alia quædam eo pertinentia. Fol. 760.

VDALRICI ZASII I. C. super eodem Oratio funebris, habita Friburgi Id. Febr. Anno eodem. Eiusdem Oratio in funere illustriss. Blancæ Mariæ coniugis Cæs. fareæ. Fol. 770.

E LAONICI



# E LAONICI CALCOCONDYLÆ, ATHENIENSIS, HISTORIA GRÆCA RE- RVM TVRCICARVM, LIB. II. \*

LOCVS INSIGNIS GERMANIÆ DESCRIPTIONEM  
continens.

p. 36. ed.  
Parisien-  
sis.

*Cum Versione recensita, & Commentariolo.*

**Α** Γαλιὰ δὲ ἀφικέτο αὐτῷ, ὡς οἱ Παῖονες  
ἡγουμένου Σιγισμάνδου Ρωμαίων βασι-  
λέως τε καὶ αυτοκράτορος, καὶ Κελτοὶ  
καὶ Γερμανῶν ἐκ ὀλίγοι συνελέγησαν ὡς ἐπ' αὐ-  
τὸν ἐπιόντες καὶ τὸν τε Ἰστρον παρεσκευάζοντο  
Δαβηναι, καὶ Δάκας δὲ γένος ἐκ ἀγενεῖς ἔχοιεν  
μετ' αὐτῶν, τῆς τε οὐδὲ ἡγουμένους, καὶ ἡ ἐσθλὴν  
τὴν στρατὸν ποικίλους. Σιγισμάνδος δὲ ἔτος, ὃ  
ἐπὶ Παλαιστῇ στρατεύομενος, ἡγεμόντες Γερμα-  
νῶν τὴν ἀρχὴν ἐτύγχανεν ὡς καὶ Βιέννην τὴν  
πόλιν τὰ πολλὰ Δαβρίβων, καὶ χώρας τῶν  
ταύτης Γερμανῶν ἀρχῶν ἔφασκεν, Παίωνων με-  
τὰ ταῦτα περὶ αὐτοῦ σφίσι αὐτὸς τε βασι-  
λεὺς αὐτὰ καθεστῆκε Παίωνων, καὶ τῆς Γερμα-  
νῶν χώρας ἡγεμὼν. ἡ δὲ Γερμανία ἀρχεται μὲν  
ἀπὸ τῆς Πυρηνίης ὄρεος, ὅθεν καὶ ὁ Ταρτησὸς ῥέων,  
ἐπὶ τὸν ποταμὸν Εὐσπερίαν ὠκεανόν. καὶ ἐστὶ μὲν ἡ  
ἀνω Γερμανία, ἀφ' ὅσον δὲ περὶ ὀντα καθεστῆκε  
ἐς τὴν Κωλωνίαν καὶ Ἀργεντινὴν, πόλεις ἔτι  
καλούμενας· τὸ δὲ ἐντεῦθεν καθεστῆκε ἐπὶ ὠκεανόν,  
τὴν καὶ Κελτικὴν τε ἐπὶ δεξιᾷ καὶ καὶ ἀριστερᾷ  
ἐπ' ἀριστερᾷ, ὡς ἐπὶ τὰς Βρετανικὰς νήσους.  
Ἐστὶ δὲ καὶ ὑπὸ Ἰστρον Γερμανία ἀπὸ Βιέννης πό-  
λεως, ἐπ' αὐτὸν δὲ ἐς Ταρτησὸν περὶ ὅσον χωρὰ  
καὶ ἐπὶ Βραγαν τὰς πολεμίας. εἴη δὲ ἂν ἀπὸ  
Βιέννης ἐς ὠκεανὸν ἀνδρὶ εὐζώνῳ πέντε καὶ εἰκοσὶν  
ἡμερῶν ἀνύσαι καὶ μήκος· καὶ δὲ πλάτος εἴη ἂν καὶ  
πλεονότων βραχὺ ἀπὸ τῆς Κελτικῆς ἐπὶ τὴν  
Δακίαν χώραν. Εὐνομεῖται δὲ ἡ χώρα αὕτη μά-  
λιστα δὴ τῶν ποταμῶν τε ἀριστερῶν τε καὶ ἐσπερίαν,  
πασῶν τῶν ταύτης χωρῶν ἅμα καὶ ἐθνῶν, ἐς τὴν  
πόλιν καὶ φανερὰ καὶ εὐδαίμονας, καὶ ὑπὸ σφῶν  
αὐτῶν ἐς τὸ ἰσοδίατον εὐθυνομένης διηρημένους,\*  
καὶ ἐς τυραννίδας καὶ ὑπὸ ἀρχιερεῦσι ταύτομενας  
τοῖς ὑπὸ τῆς Ρωμαίων μεγάλης ἀρχιερέως καθε-  
σταμένοις. καὶ πόλεις μὲν ἐς ἰσοδίατον εὐνομε-  
μέναι εἴησαν αὐταὶ ἐν σὲ τῇ ἀνω καὶ τῇ κάτω  
Γερμανίᾳ, Νόβεργον πόλιν εὐδαίμων, καὶ Ἀργεν-  
τινὴν, καὶ Ἀμπεργον, καὶ ἀρχιερεῖς ταύτομενας,  
Κωλωνία, Βιέννη ἡ ἐς τὴν κάτω Γερμανίαν ἰσθμὸς  
καὶ ἄλλαι μὲν ἐκ ὀλίγαι πόλεις, ἀποδόνουσαι τε-  
τῶν ὀλίγων τινὶ, ἀμφὶ τὰς Δακίαν. ἐς δὲ τυ-  
ραννίδας πρὸς μάλιστ' αὖτε διέλοι τίς τῆς Γερμα-  
νίας ἡγεμόνας, τῆς τε Εὐζώνης πόλεως, καὶ  
Αὐστρίας, καὶ Βιέννης, τῆς ἀνω Γερμανίας γένο-  
μένης. ἐστὶ δὲ γένος τετὸ μέγα, καὶ ἐπὶ πολὺ διη-  
κόντων καὶ τὴν οἰκουμένην, μετὰ γὰρ Σκυθῶν τῶν  
Νομάδων δευτέρων. ὡς εἰ ταῦτα φρονεῖ καὶ ὕφ'  
ἐν ἀρχῶν ἡγεμόνι, ἀμάχητόν τε ἂν εἴη καὶ

Tom. II.

**Ι** Nterim autem nunciatum est Paiazeti, Pan-  
nones duce Sigismundo Romanorum Re-  
ge & Imperatore, & Gallos Germanosque  
non paucos in vnum collectos bellum ipsi in-  
ferre decreuisse, iamque Istrum transire parare,  
allectis & Dacis, hominum genere non ignobili,  
qui via sint duces, exercitumque ducant in ho-  
stilem regionem. Sigismundus ille, qui copias  
aduersus Paiazitem ductauit, primò Germano-  
rum fuit Imperator, & plerumque moratus est  
Viennæ, imperitans ibi Germanorum regionem  
haudquaquam malâ. Postea allectis Pannonibus,  
horum Rex, Germanorumq; regionis Dux crea-  
tus est. Germania incipit à monte Pyrenæo, inde  
Tartesus \* fluuius fluit in Oceanum, versus Oc-  
cidentem. Et Germaniæ pars, qua itur versus  
Coloniam, & Argentinam, vrbes sic dictas, su-  
perior Germania nuncupatur. Hinc pergit ad  
Oceanum Gallicum, versus dextram, at versus  
sinistram patet Pyridaltiam \* vsque ad Britannic-  
as insulas. Dicitur quoque Germania ea regio,  
quæ ab Istro procurrit, procedens à Vienna vsque  
ad Tartesum flumen, & ad Pragam Boëmorum.  
Longitudo à Vienna Oceanum vsque, tantum  
spatii complectitur, quantum vir agilis itinere  
viginti quinque dierum conficere potest. Latitudo  
est maior, etiamsi quis ingrediatur iter breuissi-  
mum à Gallia Celtica versus Daciam \* regionem.  
Ista natio gubernatur melioribus legibus, quàm  
vlla earum vel regionum vel gentium, quæ respi-  
ciunt vel Septentrionem vel Occidentem. Discreta  
est in vrbes præclaras & florentes, quæ propriis  
legibus & quàm proximè ad æquitatem acceden-  
tibus reguntur. Diuiditur & in principatus, sub-  
iectaque est sacerdotibus & Episcopis adhaerenti-  
bus Romano Pontifici. Vrbes quàm maximè ad  
æquitatem constitutæ in superiore & inferiore  
Germania sunt, Noreberga vrbs opulenta, Ar-  
gentina, & Ampergum, \* quæ reguntur ab Epi-  
scopis, Coloniaque à Vienna in inferiorem Ger-  
maniam recedens. Sunt & aliæ vrbes non pauca,  
propemodum ducentæ, quæ in paucis quibus-  
dam à prædictis differunt. In tres Principatus quis  
diuidere posset vniuersos totius Germaniæ ducatus,  
videlicet Atzilii vrbes, & Austria, & Blenæ,  
quæ in superiori Germania sita est. Genus hoc  
hominum magnum est, longè latèque per vni-  
uersum orbem imperat; magnitudineque se-  
cundum post Scythas Nomades habetur. Itaque  
si con-

\* f. Rhe-  
nus.

\* Daciam  
vel Da-  
niam.

\* Daciam  
am.

\* f. Ham-  
burgum.



# DESCRIPTIO GERMANIÆ

si concordia studiosi essent, & sub vno degerent Principe, planè essent inuicti, mortaliumque fortissimi. Sunt quantum ad corpora attinet, per quàm sani, vt qui sub Septentrionali atatem agant plaga, & circa mediterraneum isthic mare nullius rei indigentes. Nec est gens (quod sciam) quæ melioribus regatur Legibus. Nec ibi sæuit pestis, quæ ex corrupto nascitur aere, maximeq; infestat Orientales, plurimosque ibi habitantes perdit: neque alii morbi, qui æstiuo autumnalique tempore reliquis mortalibus graues sunt, Germaniæ incolæ lædunt. Terræ motus rari memoratu digni eam regionem quatiant. Pluuia præ cæteris regionibus æstiuo tempore in ista regione vberissima conspicitur. Victu moribusque Romanos imitantur, nec cætera quicquam ab his differunt. Nec est vlla gens quæ superstitionis Romanorum religionem colat, maximè qua Occidenti propinqua est. Monomachia apud eos vel maximè celebris est. Congrediuntur autem non equis insidentes, verum, terræ insistentes. Nec facile inuenias gentem ad machinas reliquaue opera bellica magis idoneam. In artibus omnibus prærogatiua maxima gaudent. Quidam credunt, tormenta bellica & bombardarios ab ista gente initio demonstratos, & hinc totum peruasisse orbem, vt pauca gentes bombardis nunc careant. Reliquorum fructuum, præterquam olei & ficuum, regio ista feracissima perhibetur. Pannonia, quæ & Vngaria, incipit à Vienna Germanorum oppido, & versus Orientem, secundum Istrum procedens attingit Dacas & Triballos: versus Septentrionem excurrit ad Boemos, quos Cechios nuncupant. Habet Pannonia & Principes, verum singuli patrias regunt regiones, subiecti tamen Regi suo certis quibusdam legibus & conditionibus. Regem de suo corpore admodum raro constituunt: verum plerumque accersitur ex Boemorum regia familia, aut petitur à Germanis, aut Polonis, aut ab aliis gentibus finitimis. Germanos moribus armorumque cultu referunt. Cæterum sequuntur victus rationem intemperantiorem quemadmodum Germani & Galli. Religionem sectantur Romanorum. Hoc hominum genus eximia fortitudinis est, mirumque dictu quanta audacia & animositate bella gerant. Creant de sua gente quendam de numero Principum, qui reliquorum primus in regiam ascenderit, eumque œconomum siue procuratorem aut administratorem, nec Principem nominant. Lingua vtuntur quasi peculiari, quæ nihil commercii cum lingua Germanorum & Boemorum Polonorumque habere deprehenditur. Quidam tradunt eos antiquitus Getas extitisse, sedesque habuisse quas infederint, sub monte Hæmo: tandemque pulsos à Scythis concessisse in eam regionem quam nunc tenent. Quidam putant eos quondam Dacos fuisse. Ego autem quænam ipsorum origo sit, dicere non possum. Præterea cum sibi dederint istud nomen, vt Pannonos vocentur, sicque appellentur ab Italis, non

πολλῶν κρήτισον. ὑγιεινότερον δὲ ὄν, ἅτε ὑπὸ τὴν ἀριτῶν μοῖραν τεταγμένον· καὶ ἀπὸ τὴν ταύτῃ μάλιστ' αὐτὴν μεσόγαλον θαλάττῃ οὐ πάνυ τοι περὶσχωμένους. εὐνομεῖται μάλιστ' αὖ ἐθνῶν ὧν ἡμεῖς ἴσμεν, ἕτεροι τοῦ, ὃς δὴ ὑπὸ τῆς τῆς ἀέρος σήψεως ἐπιγενόμενης μάλιστ' ἐπιφοιτῶν τοῖς ἐσθλοῖς ἀπόλοιτο πολὺ τι μέρος τῶν ταύτῃ ὀνείμων· οὐτε ἄλλων δὲ νόσων τῶν ἐς ἡμᾶς πάντοτε εἰσφύοντων, θέρους τε καὶ φθινοπώρου, ἐπιφοιτῶν τῶν χειμαζόντων αὐτοῖς θάλαττα, ὥστε καὶ ἱκανόν τι ἀπογίνεσθαι τῶν γενέων τῶν ἐξ αὐτῆς, ὅτι καὶ ἄξιον λογέειν δὲ θέρους μάλιστ' αὖ ἐν ταύτῃ τῇ χώρᾳ. πολιτεύεται δὲ ἡ ταύτη Ρωμαίοις, ἐς τε δίκαιαν καὶ ἡδὴ τετραμμένον, συμφερόμενον τὰ ἄλλα Ρωμαῖος, καὶ ἐς τὴν θρησκευτικὴν Ρωμαίων, μάλιστ' αὖ τῶν περὶ Ἑσπέρας δεσποδαιμονεῖν. νομίζεται δὲ παρὰ ταῖς καὶ μονομαχίᾳ, μάλιστ' αὖ τῶν ἄλλων ἐθνῶν· ὥστε γῆθεν οὐδ' ἐφ' ἰσχυρῶν ἀλλήλοις μονομαχεῖν. τὸ δὲ γένος τῶν δεξιότατον ἐς τε μηχανὰς ὄν καὶ ἐς τὰ πολεμικὰ ἔργα, καὶ ἐς πάσας τὰς τέχνας πολὺ τι εὐδοκίμει. Φέρει δὲ ἡ χώρα αὐτῇ πλὴν ἐλαίας καὶ ἰσχυρῶν τὰ ἄλλα πάντα ἐκ ἐλάσσων τῶν ἐς τὴν ἄλλην χώραν φερόμενων. οἶονταί δὲ τινες καὶ τηλεβόλους τε καὶ τηλεβολίσκας ὑπὸ Γερμανῶν ἀρχὴν ἀποδεδειγμένους ἐς ἄλλῃλως, ἀφελθεῖν καὶ ἐς τὴν ἄλλην οἰκισμένην. Παιονία δὲ ἀρχεται ἀπὸ Βιέννης τῆς Γερμανίων πόλεως, καὶ ἐπὶ μὲν ἑω τῷ Ἰσθμῷ συμπεσέσθαι, καὶ ἐπὶ δὲ Δανάος τε καὶ Τριβαλλοῦ, ἐπὶ δὲ ἀριτον, ἐπὶ Βοέμης τῆς Κελτικῆς καλεσμένης, καὶ ἐπὶ ἐννεοῖς δὲ ἀρχόντες ταύτῃ τῇ χώρᾳ, ἀρχῶν δὲ ἑκάστος τῆς πατρῴας χώρας καὶ ὑποτασσόμενος τῷ βασιλεῖ αὐτῶν, ἐς ὅσον νομίζεται σφίσι. νομίζεται δὲ ἐπὶ ῥήτοισι. καὶ ἐπὶ χωρίῳ μὲν βασιλεῖς ἐπανύτοι χρωῖνται. ἐπάγονται δὲ ἡ ἀπὸ Βοέμων, τῶν βασιλεῖς οἶκας, ἡ ἀπὸ Γερμανῶν, ἡ Πολόνων, ἡ καὶ ἄλλων τῶν ταύτῃ ἐθνῶν. συμφέρονται δὲ Γερμανοῖς, τὰτε ὅπλα, καὶ τὴν ἐς τὰ ἡδὴ αὐτῶν δίκαιαν. ἐς τὸ ἀβροδίατον ἀποκλίνοντες, ἡ Φασὶ Κελτικῆς καὶ Γερμανικῆς. νομίζεται δὲ ἡ ταύτη Ρωμαίοις τὰ ἐς θρησκευτικὴν γένεσιν δὲ τῶν ἄλλων, καὶ ἐς μάχας τόλμῃ περὶσχωμένον ἐπαινεῖται. ποιεῖνται δὲ καὶ ἐπὶ χωρίῳ τινὰ τῶν ἀρχόντων τὰ πρῶτα ἐς τὴν βασιλείαν ἀνήκοντα, καὶ οἰκονόμον δὲ ὄντα, καὶ μηδὲ ἀρχόντα ὀνομαζοῦσι. Φωνὴ δὲ χρωῖνται ἐδωμῇ παραπλησίᾳ ἑτέρῳ τινὶ τῶν γενέων, ἀλλὰ ἄλλῃ τὸ παραπαν, διενεγκέσθαι τῆς Γερμανῶν τε καὶ Βοέμων, καὶ Πολόνων. οἶονταί δὲ τινες τῶν ἐξ αὐτῶν, οἱ μὲν Γέτας γενέσθαι τὸ παλαιόν, καὶ ἐπὶ τὸν Αἰμὼν οἰκούντας ὑπὸ Σκυθῶν κακισμένους, ἀναχωρεῖν ἐς τὴνδε τὴν χώραν ἣν καὶ νῦν οἰκεῖσιν. οἱ δὲ Φασὶ Δανάος γενέσθαι. ἐγὼ δὲ ὅποιον ἀντιεῖν τὸ γένος τῶν τὴν ἀρχὴν, ἐκ αὐτῶν ἔτιον ῥαδίως εἰπεῖν ἔχοιμι. τὸ γένος μὲν τοι τῶν, ἀπὸ τῶν αὐτῶν καὶ ὑπὸ Ἰταλῶν καλεσμένους, ἐπανύτοι καλῶς ἔχοιμι ἑτέρῳ τινὶ ὀνόματι καλεῖν τῶν. ἐστὶ δὲ αὐτοῖς βασιλεία ἐν Βασίλῃ πόλει εὐδαίμονι παρὰ τὴν Ἰσθμὸν. Σιγισμούνδον δὲ τὸν Βιέννης τῆς Γερμανῶν πόλεως ἡγεμόνα ἐπαγόμενον.



# E LAON. CHALCOCON. EXCERPTA.

νον. οὗτοι δὲ οἱ Παῖονες βασιλεῖα τε σφίσιν αὐ-  
τοῖς καθίστασαν, καὶ αὐτὴν ἀρχὴν ἐπέτρεψαν  
αὐτῷ ἀρξάναι, ὡς ἔχοι ἐπὶ τὸ ἀσφαλές. ἔτος μὲν οὖν ἐπειτὴ τὴν Παϊόνων παρέλαβε βα-  
σιλείαν, διεπρεσβεύετο πρὸς τὸν Ῥωμαίων ἀρ-  
χιερέα, συνήθη τε ὄντα αὐτῷ καὶ ἐπιτηδεῖον  
ὡς τὰ μάλιστα, ὥστε ἐπιψηφισθῆναι αὐτῷ αὐ-  
τοκρατορίαν Ῥωμαίων γενέσθαι. τὸτο μὲν οἱ τῆς  
Ῥώμης ἀρχιερεῖς τοῖς \* κελτῶν βασιλεῦσι τὸ  
πρῶτον ἐπέδωσαν, ἀπὸ τῶν πολέμους, ἃς θα-  
μὰ τε καὶ ἀνδρείοτατα πρὸς τὰς ἀπὸ Λιβύης  
ἀρξάντας ἐπὶ Ἰβηρίαν βαρβάρους καὶ τὰ πολλὰ  
τῆς Ἰβηρίας κατασφραγισμένους αὐτὰς μετὰ δὲ  
ταῦτα ἐπὶ τῶν Γερμανῶν ἡγεμόνας μετενήνευται  
ὁ ψῆφος τῶν Ῥωμαίων ἀρχιερέων. Σιγισμόν-  
δον ὡς ὑπισχνοῖτο ὁ ἀρχιερεὺς τὴν τε ἀξίαν  
ταύτην ἐπιτιθέναι, καὶ δὲ μετεπέμπετο ἐπὶ  
τὸτο, ὡρμητο μὲν ἐπὶ Ἰταλίαν ἀπὸ τῆς Ἑνετῶν  
χωρᾶς. ἔτοι μὲν οὖν ὡς ἐπύδοντο Σιγισμόνδον  
ἀπὸ τῆς χωρᾶς αὐτῶν τὴν πορείαν ποιεῖν, ἐπε-  
μψαν ἀγγέλους προαγορεύοντες αὐτῷ, μὴ  
διέναι ἀπὸ τῆς χωρᾶς αὐτῶν. ὁ δὲ οὐκ ἔφη πεί-  
σεσθαι ἂν μὴ γνῶ αὐτὰς πειρωμένους ἔργῳ ἀρ-  
κωλύσαι ἀπαρνούμενον, παρεσκευάζοντο μὲν  
οὖν οἱ Ἑνετοὶ στρατὸν καὶ διεκώλυνον. ὡς δὲ ἤθε-  
το κωλύμενος, παρετάξατο ἐς μάχην καὶ συν-  
έβαλε τῷ Ἑνετῷ στρατῷ καὶ ἀπεγένετο αὐτῷ  
καὶ ὀλίγα τῶν στρατευμάτων, τραπομένῳ τε ἐς  
φυγὴν, καὶ μόλις ἀφύγοντι τὰς ἐναντίας. ἔτος  
μὲν δὲ ἐπὶ τῶν ἀπέγνω τὴν δι' Ἑνετῶν πορείαν,  
ἀπῆκε ἀπὸ τῆς ἀνω Γερμανίας ἐς τὸν Λιγυρίας  
τύραννον ἀφικόμενος, ἐντεύθεν δὲ ἐς Ῥώμην  
παρεγένετο, καὶ βασιλεὺς τε καθίστηται. μετὰ  
τὰς ἀρχιερέων ἐς τοῦτο ἀποδεχθεὶς μετὰ  
δὲ ταῦτα ἐδίδοτο τῶν ἀρχιερέων συμβαλέσθαι  
ἐς τὴν ἐπὶ τὸν βαρβαρὸν αὐτῷ ἐκστρατεῖαν γινο-  
μένην ἡτέρο δὲ αὐτὸν χεῖρα καὶ ἀνδρᾶς ὁ  
δὲ πρὸς τὸν Κελτῶν βασιλεῖα ἀπαρσβε-  
ύσας καὶ πρὸς τὸν Βεργουνδίας τύραννον, δι-  
επράξατο δοθῆναι ἐς οὐκωκισχίλις καὶ στρατηγὸν  
τῆς Βεργουνδίας ἡγεμόνος ἀδελφόν. παρεσκευά-  
σατο μὲν ἔν τῃ αὐτῷ συλλέξας στρατεύμα  
ἀπὸ Γερμανῶν ὅσον ἡδύνατο μισθωσάμε-  
νος. ὡς ἡδὴ αὐτῷ τε τὰ εἰς τὸν πόλεμον παρ-  
εσκευάστο, ἐξήλαυνε λαβὼν τὰς τε Παϊόνας καὶ  
Δάκιαι τῆς ὁδοῦ ἡγεμόνας ἐνθὺ τῶν Ἰστρον  
Παιαζήτην. διεπρεσβεύσατο δὲ καὶ πρὸς τὰς  
Ἰταλῶν καὶ Ἰβηρίων ἡγεμόνας, χερματίζοντος  
δὲ τὸτο αὐτῷ τῶν ἀρχιερέων, αἰτήμενος χεῖ-  
ρα καὶ ἀνδρᾶς. καὶ χεῖρα καὶ ἀνδρᾶς μὲν ἐπέπομφε  
αὐτῷ ἱκανὸν ὁ ἀρχιερεὺς, ἀνδρᾶς τε. ὁ μὲν οὖν  
Παιαζήτης, ὡς ἐπύθετο ἐπὶ ὄντα οἱ Σιγισμόν-  
δον τὸν Ῥωμαίων αυτοκράτορα, σὺν πολλῷ στρα-  
τεύματι ἐλαύνοντα, ἀπὸ λαβὼν τὸν τῆς Ἑυρω-  
πῆς τε καὶ Ἀσίας στρατὸν ἅπαντα, ἀντεπῆκε ἐπὶ  
Ἰστρον ἡδύνατο ταχίστα πορευόμενος. στρατοπέ-  
δευσάμενος δὲ αὐτὰ ἀπὸ τῶν Ἰστρον, ἐπὶ σαρδίας  
τεσσάρων, οἱ Κελτοὶ αὐθάρεις τε ὄντες καὶ  
ἀγνώμονες ὡς τὰ πολλὰ, ἀξιοῦντες σφῶν αὐ-  
τῶν μόνων τὴν νίκην γενέσθαι, ὀπισσάμενοι  
ἐπήσαν πρῶτοι ὡς ἀναγκασμένοι τὰς βαρ-

decorum fore ratus sum, si aliud iis imposuero  
nomen. Regia eorum est Buda, vrbs florentissi-  
ma, Istro adiacens. Sigismundum autem Ger-  
manorum Imperatorem agentem Viennæ vo-  
cantes Pannonos declarauerunt Regem, eique  
tradiderunt regnum vniuersum, & quæ ad regni  
curam pertinent, vt omnia sic ordinaret, quem-  
admodum putaret ea fore commodissima. Hic  
vt primum regium honorem inuit, legatos misit  
ad Romanum Pontificem, \* iam ante sibi fami- \* *Euge-*  
liatem & necessitudine deuinctum, rogans vt *nium IV.*  
suum consensum præstaret, quo Romanorum  
deklararetur Imperator. Imperatoriam dignita-  
tem Romani Pontifices primò contribuere Gal-  
liarum regibus, propter hostes \* ex Libya in Ibe- \* *Saraceni*  
riam transuectos fortiter caesos, & ob Iberiam à *nos.*  
Barbaricis incurfionibus liberatam. Postmodum  
eligendi Romanum Imperatorem potestas trans-  
lata est à Pontifice ad Germanos. Sigismundus  
cum eam dignitatem se daturum respondisset  
Pontifex, accersitus & vocatus est à Pontifice, vt  
Imperatoriam dignitatem acciperet. Sigismundus  
Romam proficiscens iter faciebat per Veneto-  
rum regionem. Hi, vt primum nunciatum est  
Sigismundum per ipsorum regionem transitum  
facere, miserunt nuncium qui moneret, vt ipso-  
rum regione excederet. Hic nuncio Venetorum  
parere neglexit, nisi cerneret eos re ipsa transitum  
prohibituros. Veneti igitur congregato exercitu  
vim facere parabant Sigismundo, nisi confestim  
sua discessisset regione. Vt cognouit Venetos id  
moliri, copias in aciem eduxit, & cum Veneto-  
rum exercitu prælium commisit. Amisit autem  
in eo prælio non modicam exercitus partem, ipse  
que in fugam compulsus, ægrè quò minus cape-  
retur, fuga euasit. Cum iam planissimè despera-  
ret, se posse per Venetorum regionem adire Ro-  
mam, iter flectit in superiorem Germaniam per-  
uenitque ad Liguriæ \* Principem. Hinc iter Ro- \* *Philip-*  
mam instituit. Quò cum venisset, Imperator à *pum vice-*  
Pontifice Maximo consalutatus est. Postea roga- *com. Me-*  
uit Pontificem Maximum auxilium, quo adiutus, *diolani.*  
expeditionem contra Barbaros susceptam confi-  
cere posset. Flagitabat autem pecuniam, virosque.  
Pontifex legatione missa ad Gallorum Regem  
Burgundiæque Ducem effecit, vt sibi darentur  
octo milia militum: belli autem ducem accepit  
Burgundiæ Ducis fratrem. Sigismundus quoque  
se ad bellum parabat, conscribens exercitum ex  
Germanis, quosunque potuit mercede condu-  
cens. Cum iam ad bellum satis foret instructus,  
assumptis Pannonibus & Dacis, qui itinera mon-  
strarent, rectaque per Istrum contra Paiazitem  
copias duxit. Legatos quoque misit, consulente  
id Pontifice Maximo, ad Hispanorum Italo-  
rumque Principes, petens ad istam expeditionem mi-  
lites & pecuniam. Pontifex quoque mili-  
tes misit, & pecuniam suppeditauit. Paiazites  
quàm primum didicit Sigismundum Romano-  
rum Imperatorem magnis copiis stipatum, ad-  
uersum se pergere; accepto Europæ Asiæque  
exer-



## IN DESCRIPT. GERMANIÆ

exercitus, summa celeritate obuiam profectus est hosti usque ad Istrum, castraque communiuit ab Istro stadiis quasi quadraginta. Galli autem (ut sunt audaces, plerumque verò imprudentes) cum cuperent victoriam suam facere, arma capiunt, barbarosque aggrediuntur, quasi eos primo impetu domituri. Tandem cum prælum utrinque maxima virtute ferueret, Galli fugam ineunt, incitissimoque cursu cum agerentur ad suos, insequentibus Turcis, & Sigismundi militibus admixtis atrox prælum coortum est. Cum acriter instarent Turci, etiam Pannonnes & Germani fugæ Gallorum se sociant. Festinantibus autem iis Istrum transire, maxima pars exercitus flumine absumpta est. Facta est cædes maxima Gallorum & Pannonum pereuntium. Dux Burgundiorum qui totius belli Imperator electus erat, ab hostibus captus est: capti sunt & alii Pannonnes, Gallicque plurimi. At Sigismundus in maximum vitæ discrimen adductus, vixque hostis manus, quo minus caperetur, effugiens, triremem quæ in flumine erat, conscendit, Byzantiumque ad Græcorum Imperatorem nauigauit. Cum plurima cum isto Rege disseuisset, & quæ volebat expediuisset, domum reuersus est.

βάρους, μάχης δὲ κατεργασθενομένης, τρέπονται οἱ Κελτοὶ, καὶ φεύγοντες ἀνακράτος καὶ ἀδενὶ κόσμῳ ὀππότε τῷ σφετέρῳ στρατεύματι ὀπισπώμενων τῶν Τερκίων, ἐνταῦθα ἀναμίζετο γενομένων αὐτῶν, ὡς ἐπέκειντο οἱ βάρεβαροι, τρέπονται ἅμα ταῖς, οἷς Παίονες καὶ οἱ Γερμανοὶ. ἐπειγομένων δὲ εἰς τὴν τῆ Ἰστρού Ἀβασιν, ἀπώλετο πολλὰ τῶν στρατεύματος καὶ τὸν ποταμὸν. ἐγένετο δὲ φόβος πολὺς ὀλυμένων τῶν Κελτῶν καὶ Παίωνων ὑπὸ τῶν ἐναντίων, καὶ ὁ Βουργουνδίων στρατηγὸς ἐάλω, καὶ ἄλλοι ἐκ ὀλίγοι Παίωνων τε καὶ Κελτῶν. ὁ μὲν οὖν Σιγισμουνδος Ἀγκινδυνεύσας τὰ ἔσχατα, καὶ πρὸς βραχὺ ἀλὼναι Ἀξφυγῶν, ἐμβάς εἰς τελευτὴν καὶ τὸν ποταμὸν ἔπλει εἰς Βυζάντιον πρὸς βασιλέα Ἑλλήνων. ἐς λόγους δὲ ἀφικόμενος τῷ Βυζαντίᾳ βασιλεῖ, καὶ χρηματίσας αὐτῷ ὅσα ἐβέλετο, ὥχετο ἀποπλέων ἐπ' οἴκου.

## COMMENTARIUS.



**M**OCUS hicce Laonici Atheniensis ut ad honorem Germanæ gentis insigniter pertinet, ita tot & tam insignibus mendis non tam à librariis (quorum quidem culpa trium Codicum Palatinorum mss. collatione mederi, quantum licuit, annisi sumus) quàm ipso scriptore, homine non in Germania nostra hospite, sed planè ignota loquente, quæ sola auditione nescio vnde accepisset, oppletus est, ut multum dubitarem, an eum licet anxie quæsitus & descriptus in hanc collectionem admittere, nedum in eo scholiis explicando aliquid operæ ponere vellem. Sed utur ipse tanti non videretur, tanti quidem visa est patria Germania, quam neque ista hominis exotici commendatione defraudaremus. In qua quidquid veri est, necesse est à vulgatissima fama rerum plusquam noticiarum (ut vulgo loquuntur) & toto orbe compertarum fuisse profectum. Quo in genere scholia scribenti non difficile fuisset plura etiam congerere, nisi modum tenere præclarius putassemus. Cæterum alicubi etiam in his salubris pedem hæsisse nihil mirum, orbatis præsertim ductore illo, qui solus inde expedire poterat: LEUNCLAVIO inquam nostro, horum scriptorum peritissimo; quique adeo totum istum Laonicum sua manu, dum hîc versaretur, diligenti cura descripserat. Quanto (heu) redimerem, vel horulam vnâ super hoc loco cum eo sermones contulisse! Sed ad rem.

Σιγισμουνδος.) Iam vel hoc miror rectè scriptum, cum apud alios Græcos nomina nostra miris modis lancinata video: Ἀμάριγος, Δολοῖκος, Ρομπέρος, Σφενδοθάβος: in quibus vix recognoscas nostrum Henricum, Lodouicum, Rupertum, Wenceslaum.

Πυρηνία ὄρεος, ὅθεν καὶ ὁ Ταρτησὸς ῥέων.) Ex Pyrenæo sane, Celticæ regionis monte Tartesum defluere auctor est Aristoteles I. Meteor. à quo Tartesum oppidum nomen traxisse, scribit Stephanus de Urbibus. Est id oppidum Hispaniæ non procul Gadibus ad fretum Herculeum, teste Plinio lib. 3. cap. 1. Strab. lib. 3. Liuius lib. 8. Dec. 3. Sed quid huic cum Germania? Quid Laonico in mentem venit, ut Germaniam usque ad Pyrenæos montes extenderet, quos certum est discriminare Galliam ab Hispania, ita ut Alpes Italianâ Germania. Sine ambagibus, Rhenum voluit dicere patrem fluuiorum Germaniæ, quem & pro ipsa Germania ponere solebat antiquitas: cuius propemodum nullus scriptor, qui Germaniæ res attigerit, non meminit: cuius hîc quoque nullam mentionem fieri mirum esset, vbi tamen sit adsiturum urbium, Colonia, Argentinæ. Sed cur pro hoc flumen illud Iberum? Quid mirum in homine Græco, qui totius Hesperiæ vnum tantum montem Pyrenæum, vnum flumen Tartesum putauit. Nimirum & Nonnus, auctor non paulo eruditior, Rhenum nostrum Iberum vocat, duobus Dionysiacorum locis, pag. 397. & 747. quem locum attingi in Originibus. Palatin. cap. 3. Dicet quis: At Rhenum non se infundit Oceano occidentali, (ut hîc de Tarteso dicitur) sed Germanico? Ita quidem, si per Occidentalem intelligas Atlanticum: sed tamen nihil prohibet, quo minus etiam Germanicus dicatur Occidentalis respectu Thraciæ aut vicinarum regionum, vbi egisse videtur Chalcondyles, quantumuis non nihil ad Aquilonem declinet. Imo verò (si rem exactè consideremus) mare Germanicum pars & sinus est Oceani occidentalis, Germaniæ, Britanniæ, & Daniæ littoribus clausus. Sed regeret alius, quid Rheno cum Pyrenæis montibus, à quibus tota Galliarum longitudine distat? Respondeo. Quid Istro cum Pyrenæo Celtico? vade eum oriri non tantum Aristoteles scribit loco predicto, sed etiam Herodotus in Euterpe. Cum tamen utriusque fluuij origo sic

in



# E LAON. CHAL. EXCERP. NOTÆ.

in Alpibus Rhæticiis : quod etiam è Græcis Strabo benè nouerat, & Dionysius Alexandrinus, interprete Prisciano :

*Incipiunt Alpes : quibus exit gurgite vasto  
Oceani rumpens glacialis littora Rhenus.  
Hunc prope consurgit sons Istri flumine longo.*

Néque nescimus, esse etiam Pyrenæos Germaniæ, & summam partem Alpium, qua Oc-  
hiponte Tridentum iter est, montem Pyrenæum dici, vulgo etiamnum *der Brenner*. De quo  
cum plura annotet Ortelius in Thesauro, Bassi tantum epigramma adscribere placet, interprete  
Stuckio nostro :

*Saxa Pyrenæi, & depressa vallibus Alpes,  
Quæ Rhæni fontes haud procul aspiciunt.*

Sed hoc emplastrum neque Aristoteli Herodotoque obduci potest, propter ἐπίθετον Cel-  
tici: neque etiam Laonico nostro, ob Tartesi mentionem, de quo nunquam gustavit hæc Ger-  
mania. Sed fatendum quod res est. Nimirum in omni nomine Germanico mirificè cæcutit,  
hallucinatur, impingit, labitur Græcia. Ut cum Stephanus Byzantius Francos populos facit Ita-  
liæ, auctorem dicti adducens Parthenium: cum Arrianus non procul ab Ionio Germanorum se-  
des designat: quos aliosque lapsus notauit Irenicus lib. 9. Exeg. German. cap. 3. & 4.

Ἡ ἀνω Γερμανία.) Alia diuisio primæ & secundæ Germaniæ in veteri Noticia Imperii: item  
in distributione Metropoleon. Sed iuuat huius locum insignem, quatenus Germaniam concernit,  
apponere ex veteri Cod. S. Galli. *Prima prouincia Germaniæ habet ciuitates numero II. Metropolis ci-  
uitas Agrippina, id est Colonia. Ciuitas Tungris. Secunda prouincia Germaniæ habet ciuitates nume-  
ro VI. Metropolis ciuitas Mogonciacus. Ciuitas Argentoratensis, id est Strasburg. Ciuitas Nemmetis,  
id est Spira. Ciuitas Wangionum, id est Wormatia. Ciuitas Wirtzburgensis. Ciuitas Constantia.  
Castrum Rubilocus, quod Eibsteti dicitur. Ciuitas Augusta Vindelicorum, id est Auuespurch Pro-  
uincia Baioariorum, id est Noricus ripensis super Danubium, siue Noricus mediterranea habet ciuita-  
tes numero VI. Metropolis ciuitas Lunano, id est Salzburg. Ciuitas Regino. Ciuitas Pataua. Ci-  
uitas Frigisensis. Ciuitas Noua. Ciuitas Sabionensis. Prouincia Sequanorum habet ciuitates nu-  
mero VII. Metropolis ciuitas Vezontio. Ciuitas equestris, id est Auenticus. Ciuitas Basiliensis. Ci-  
uitas Vindonensis. Ciuitas Argentariensis. Ciuitas Ebrunensis. Ciuitas Rauracensis.*

Περὶ Δακίαν.) Sic legit ms. vnus: alius vero περὶ Δακίαν, tertius denique περὶ Δακίαν, vn-  
de monstrum regionis interpretis fecit, Pyridastiam. Sed si superior de Tarteso expositio valet,  
legendum videtur Περὶ Δακίαν vel Δακίαν: notum est enim superiori æuo *Daciam* vulgò dictam &  
scriptam (licet malè) quæ hodie Dania. Ut sit sensus, Germaniam inferiorem (cuius tamen  
post superioris factam mentionem expressè hic non meminit) Oceanum attingere: qui ex fini-  
stra quidem parte (nam & hoc emendandum est,) Gallias ex dextra vero Daniam alluat: & ob-  
iectas quasi medio in Oceano Britannicas habere insulas. Et confirmat quod paulo post longitu-  
dinem Germaniæ à Galliarum finibus ad Daniam vsque protendit.

Βραγὺν τὰς πολέμιας.) Sic quidem omnes mss. Palatini. Interpretem apparet legisse  
Βραγὺν τῶν Βορέων vel Πορέων. Sensus erit, iter Vienna facientibus Tartesum (id est Rhenum)  
versus, ostia eius scilicet, Pragam Bohemorum esse transeundam. Caterum Laonicus hic contra  
omnium aliorum auctorum morem, longitudinem Germaniæ à meridie in Septentrionem, à Vien-  
na Austriæ in Oceanum vsque Germanicum protensam facit: latitudinem vero ab extrema ora  
Galliæ in Daniam secundum littora maris Germanici ab Occidente versus Orientem. Nam (vt  
& hoc obiter) vbi duo Codices, alter quidem Δακίαν, alter vero Δακίαν, ibi tertius melius ha-  
bet Δακίαν.

Ἀνδρὶ εὐζώνῳ.) Non nostris iam hominibus, aut vix certe. Nimirum veteres, præser-  
tim Græci, Asiatici, Orientales, agilitate & pernitate pedum excellebant. De quorum etiam  
cursoribus quæ leguntur, fidem nostram hodie ferè superant. Vide Lips. centur. 3. epist. 59.

Ἐυνομεῖται ἡ χώρα αὐτῇ μάλιστα.) Repetit hoc infra mox: εὐνομεῖται μάλιστα διὰ τῶν  
ἔθνων ἡμεῖς ἴσμεν. Aeneas Syluius in Germania cap. 68. *Vidimus iudicia vestra: & conciliis vestris  
quæ republica gerebantur, sæpius interfuius. Omnia & prudenter & grauitè administratis, nec  
facile à recto tramite deflectimini. Nec vobis ciuiles leges, nec iura desunt pontificalia: litteræ quo-  
que & omnia bonarum artium studia apud vos florent. At olim Germaniæ nulla à re minus laudis  
erat, quàm à legibus. Nam quæ super sunt cæcæ majorum nostrorum leges, plane inter prima  
Germanicæ antiquitatis monumenta censendæ, Alemanicæ, Boiaricæ, Saxonica, Francica, & alia;  
præterquam quod verbis asperæ, etiam re ipsa longius à summa illa æquitate re cedunt: tanquam  
à Mauortiis profectæ nationibus, quæ potius manus ferro quàm ex iure conferere, & in castren-  
sibus armis quàm subtili iuris indagatione operam ponere consueuissent, & (vt Enniano verbo  
vtar) *Bellipotentes erant magis quàm sapienti potentes.* Quamquam pro hac legum incuria alia, &  
quidem maior, illis laus succedebat, quod (vt Tacitus ait) *plus apud illos boni mores quàm apud  
alios**



## IN DESCRIPT. GERMANIÆ

*alios ipsa leges valerent.* Donec tandem orbe Romano ad occidentem Solem subacto, cum imperio etiam leges tanquam illius instrumentum accipiendum, eoque ceu freno ad prouincias illas regendas vtendum arbitrati sunt. Vnde in Gothorum primum, dein Longobardorum, tandemque Francorum leges multa ex Romanis translata videmus: quod Carolinarum præsertim legum volumen satis loquitur, neque Ius ipsum Saxonicum dissimulare potest. Iustiniani autem legislationem integram per multa sæcula Germania non agnouit, imo nec habuit aut vidit: vt nec aliæ Occidentis prouinciæ, quod alibi demonstrauimus. Primum Lotharium Saxonem Imp. reperi-  
tis Amalphi vrbe Apuliæ Pandectis, ius illud in lucem & usum reuocasse fama est, Inerio sua-  
fore, cuius Vrpergensis meminit, notatus & ipse à Sigonio libro 14. de regno Ital. De quo etiam nos alibi latius.

Τὰς ἐν τῷ Πρωμαίῳ. ) Hoc ad differentiam Græcæ Ecclesiæ, quæ Papam non agnoscebat. In Germaniæ & Hesperia totius Episcopatus primatum & superioritatem vsurpabat Roma. Hinc illa Diocæseon distributio, taxæ, pallia, &c.

Νότιον, Ἀμπέργον. ) Nomina urbium miserè habita: quippe Græcis hominibus dictu scriptuque planè difficillima. In mentem venit similis locus Beniamini Tudelensis in Itinerario, qua parte Germaniam attingit, quam olim *Aschenaz* dictam apud suos notat, de quo Drus. 1. Animaduers. cap. 41. *Hæ sunt*, inquit ille, *apud Germaniam regiones, in quibus Israelitarum collegia sunt, juxta fluuium Mosellam & Konphilnas* (Confluentiam intelligit) *& Odrancab. & Kuna, & Kotania, & Binga, & Garmezza* (Germersheim puto) *& Mastheran.* Et paulo post: *Sunt præterea Astranburk* (forte Strasburgum) *& Dauirasburk* (quod de Augusta nostra Vindelicæ felicissimè exponit, eximium eius columen & decus M. Vellerus lib. VI. rerum Vindelicæ) *& Mandatrah, & Pessinghes, & Bamburk, & Sar, & Rasenburk, quæ regni etiam finis est.* Inde autem & ulterius regio Bohemest, quæ nunc Praga dicitur, estque Sclauonia terre initium. Forte & populorum ciuitatumque nomina aliquando mutata euariant. Quis populos illos Germaniæ iam nouit, quos enumerat Gregorius PP. III. in quadam epistola: *Vniuersis optimatibus & populo prouinciarum Germaniæ, Thuringis, & Thesis, & Borthacis, & Nistresis, Vnedredis, & Lognais, Sudnodis, & Graffeltis, vel omnibus in Orientali plaga constitutis.* Non iam miror Panegyristæ nauseam, horrentis vel ad nomina nostra: *Quid memorem*, inquit Nazarius, *Bracteros; quid Chamanos, quid Cheruscos, Vangionas, Almanos, Tubantes? Bellicum strepunt nomina, & immanitas barbaria in ipsis vocabulis adhibet horrorem.*

Πόλις εὐδαίμων. ) Magnum elogium, magnum. *Εὐδαίμονας* pagos quosdam in Hyrcania dictos Diodorus scribit, ob ficuum aliorumque fructuum miram abundantiam. *εὐδαίμονες χώραι* sunt apud Appianum in Parthicis. *εὐδαίμονες* insulæ circa Arabiam Felicem sunt Agatharchidi. Sed & Romani Felicem Iuliam, Felicitatem Iuliam; colonias, lacus, legiones Felices suas habuerunt. Hoc epitheti Noribergæ Laonicus tribuit, & soli. Vnde æstimare licet, quæ tunc temporis celebritas & splendor vrbis fuerit: quæ tamen postea multis modis aucta & amplificata est. Proxime huius æuum Aeneas Syluius Cardinalis Senensis ad Martinum Maiorem IC. scribens, non parcis laudibus *εὐδαίμωνιαν* illam nobis explicat: *Noricorum oppidum*, inquit, *flumine Regnisia* (Pegneseo dicendum) *interfectum, nam hodie Franconibus datur, præterire non possumus: Dic rogamus, (nam hinc vxorem duxisti, castissimam æquè ac pulchram) quenam facies huius vrbis? qui splendor, quæ amœnitas, quæ delitæ, quæ forma regiminis? quid illic ad ciuitatem omni ex parte perfectam desiderare quispiam potuerit? Quis venientibus Franconia inferiori & procul spectantibus eius vrbis aspectus, quæ maiestas? quod decus ab extra visentibus, quis intus nitor platearum, quæ domorum munditiæ? Quid S. Sebaldi templo magnificentius, quid splendidius D. Laurentii delubro? Quid arce regia vel superbius vel munitius? quid fossa, quid mœnibus illustrius? Quot ibi ciuium ades inuenias regibus dignas. Cuperent tam egregiè Scotorum reges quàm mediocres Nuringeræ ciues habitare.* Idem in Europa cap. 39. postquam disceptauit, Franconia an Bauaria sit accensenda: *Ipsi Norimbergenses nec Baioarii, nec Francones videri volunt, sed tertium quoddam separatam genus. Vrbs ea nobilis magnificis operibus publicis ac priuatis ornata est: anne Pegnitio interlabente, in agro sterili & arenoso condita: atq; ob eam rem industriofo populo. Omnes enim aut opifices sunt, aut negociatores. Hinc multæ illis diuitiæ, & magnum in Germania nomen. Aptissima Imperatorum sedes, libera vrbs, & in medio fermè Germaniæ sita.* Sed latius eam describit Ioannes Cochlaus Noricus, in de descriptione German. c. 4. & Conradus Celtes Protacius, Heliusque Eobanus Hessus poëta, singularibus libellis, hic versu, ille prosa, celebrandam sibi sumserunt. Sed Iulii Cæsaris Scaligeri, diuini hominis, aureos de ea versus omittere hoc loco non possum. dignos quos vel describendo ediscam. In Urbibus, lemmate Nuremberga.

*Dina mihi extremi da munera sacra laboris,  
Non tamen extremo conspicienda loco.*



ELAON. CHAL. EXCERP. NOTÆ.

*Sed velut abducto veneramur in ordine cœlum,  
Hic ubi natura sine quieuit opus.  
Non potes æthereis deducere sedibus astra :  
Inuenies tibi quæ Norica terra dabit.  
Hunc sibi corruptas terras Astræa relinquens  
Fatali statuit sede tenere locum.  
Quis putet horrifco sociatas Marte Camœnas ?  
Sacra tamen duplex tempora laurus obit.  
Martis habe, & Phœbi felicia tempora laurè :  
Sanctæq; sit valido fœdere iuncta fides.  
Omnibus ex istis ne tu, ne dempseris vnum,  
Addere quin potius omnia magna, tuum est.*

Quod autem Noricæ vrbis ἰσοδίατον εὐνομίαν Laonicus, & reipublicæ formam Syluius commendant, suffragantem ex recentioribus scriptoribus habent Bodinum de Republica libro 2. cap. 6. vbi magistratum & officiorum ordines (quàm liquidò, non dicam) exponit : & Stephanum Pighium elegantissimum scriptorem, in Hercule Prodicio pag. 146. magna magnæ vrbis decora digno calamo exequentem : qui vterque eruditorum manibus teruntur. Neque plures illustrando Soli faces adhibere animus est, aut locus.

Ἀμπεργον.) Ambergæ metropolis est Palatinatus superioris in Bavaria, elegans & ampla ciuitas : sed nullo tamen modo cum Noriberga (quam Codices tres Palatini hoc loco constanter Νόεζεργον scribunt) aut Argentina conferenda : neque par illis, neque secunda. Melius itaque cum interprete Hamburgum intellexerimus, quæ ciuitas est diuitiis splendida, populo potens, & commerciis longinquis celebris : fœderis Hansatici (quod vocatur) ciuitatum hodie caput. Eadem sedes Episcopalis olim fuit, & Ecclesiæ Hamburgensis antiquitus metropolis omnium Aquilonarium : de quo Crantzius in Metropoli. Quod autem Laonicus iis ciuitatibus quæ ἀρχιερεῖς habeant, Noribergam etiam accenset, fallitur : nam Episcopum proprium nunquam habuit, diœcesin Bambergensi inclusa, vt Syluius scribit in Europ. capite 39.

Ἀμφὶ τὰς Μηροσίας.) Vt minimam quidem. Certe prope centenas, saltem imperiales, enumerat Matriçula (quæ vocatur) Imperii. De quibus ita Æneas in Germania : *Ciuitates etiam quas vocant liberas, quod Imperatori solum subiiciuntur, cuius iugum instar est libertatis. Nec profecto usquam gentium tanta libertas est, quanta fruuntur huiusmodi ciuitates. Nam populi quos Itali vocant liberos, hii potissimè seruiunt, siue Venetias spectes, siue Florentiam, aut Senas : in quibus cives, præter paucos qui reliquos ducunt, loco mancipiorum habentur : cum nec rebus suis vt vt libet, vel fari audeant quæ velint, & gravissimis opprimantur pecuniarum exactionibus. Apud Germanos omnia lata sunt, omnia iocunda : nemo suis priuatur bonis : salua cuique sua hereditas est. Nulli nisi nocenti magistratus nocent : nec apud illos factiones, sicut apud Italas vrbes grassantur. Sunt autem supra centum ciuitates hac libertate fruentes : nam & in Rheno, & in Danubio multe sunt : & mari proxime, quas appellant Stagnales : quamplurimæ & in mediterraneis : alie quæ simul federate iniurias principum propriis armis propulsant.* Sed quid de centum vrbibus dicimus ? Cum centum pagos integros Sueuia siue Alemania olim habuerit, Cæsare & Tacito testibus. De quibus scripsimus in Origin. Palatin. cap. 5.

Ἐς τὴν οὐρανίδας τοῖς.) Mira Germaniæ diuissio, quam non credo alibi apud quemquam scriptorem reperiri : & alioquin etiam si non inepta, certè obscura, ipsis Germanis vix intelligenda aut diuinanda. Quæ enim ista Etzilia ? Aquileia enim, & Augusta Acilia, quas Clauferus interpres in margine notauit, vrbes sunt, non præfecturæ aut principatus : sed & huius nomen dudum exoleuit. Si quid coniectare hoc loco licet (vbi autem magis impune licebit) pro Ἐτζιλίης substituere gestiam Ἐλετίης vel Ἐλουετίης. Heluetiorum certè gens ab omni æuo, illa etiam tempestate, robore & virtute inter Germanos faciliè prima.

Ἀυσρίας.) Huius metropolin Viennam iam supra tetigit Laonicus : & ipsa Austria tum florens, plures iam Augustos orbi Christiano tulerat, & tum rerum potentem Sigismundum.

Βλένης ἢ ἄνω Γερμανίας χρομένης.) Quæ ista Blena ? Blennus ipse auctor noster, & si quis ei fidem habet. Et Bavariam quidem (quam Clauferus in margine notat) libenter hinc exsculperem : si satis esset primam & ultimam vtriusque vocis litteram conuenire. Sed & amicos in consilium misi. Alius pro Βλένης mallet Βοῦνης vel Βοῦνίας, quam nescio an Germaniæ adscribere voluisset Laonicus : alius Βελγίης vel Βελγίας, non ablutente Germanico nomine Fleming ab ista Βλένη si illud æque contineret, ἢ ἄνω Γερμανίας χρομένης. Equidem locum conclamatum, quod olim agris desperatis facere solebant, in triuio depono : & publicæ pietati, aut fortunæ suæ committo.

Γένος τῆτο μέγα.) Toti enim Triones (vt Sidonius loquitur) in hanc effusi : verè officinam gentium. Nazarius in panegy. ad Constantinum M. *Iacet in latere Galliarum aut in sinu tuo*



## IN DESCRIPT. GERMANIÆ

*tuo fusa Barbaria, per se ipsa potens natio, & post Romanam magnitudinem in terris secunda.* Loc-  
cus insignis, & ad Germaniæ honorem vnicus, cui secundum Latinus homo locum tribuat à Ro-  
ma cui alius prouincialis nihil simile nihil secundum assentabundus dixerat. Sed vereor lupum  
cauda teneri, & hanc laudem nobis extortam iri à Persis: quibus non paullo promptius hoc elo-  
gium dedisset homo Romanus, quàm Germanis, qui absque iusto principatu distracti in plures  
gentes, interque se discordes. Et si ex animi mei sententia roger, cum postremo editore non hæ-  
rens ita legam: *Iacet in latere Galliarum aut in sinu tuo fusa Barbaria Persæ, ipsa potens natio & post*  
*Romanam magnitudinem in terris secunda, amicitiam tuam, Constantine Maxime non minus trepidè*  
*quam amabiliter petierunt.* Nulla in terris tam ferox natio est, quæ te non metuat aut diligit. Hoc  
modo pulcrè & verborum structura & sensus constant. Sed & Germanicum Parthis aut Persis  
plerunque iungi solent: vtrique hostes populi Romani. *l. hostes. 24. D. de capt. & postlim.* The-  
mistius oratione V. In numis Victoria visitur inscribens clypeo palmæ affixo: VIC. GER. & in  
aliis: VIC. PAR.

Συμβῶν τῶν Νομάδων δευτέρων.) Hisce & Strabo Germanos comparat lib. 7. τρεφὴ δ' ἀπὸ  
τῶν θρεμμάτων ἢ πλείη, καὶ ἀπὸ τοῖς Νόμασι, ὥστ' ἐκείνους μιμνήμενοι &c.

Εἰ ταὐτὸ φρονοίη, καὶ ὅφ' ἐν ἄρχοντι ἡγεμόνι.) Aeneas Syluius in Germania cap. 72. Plura-  
litatem Principum Philosophi abhorrent: vos ea gaudetis. Nam quamuis Imperatorem & regem &  
dominum vestrum esse satemini, precario tamen ille imperare videtur, nulla eius potentia est. Tan-  
tum ei paretis quantum vultis, vultis autem minimum. Libertas omnibus in communi placet, neque  
ciuitates, neque Principes, quod suum est Imperatori præbent: nulla illi vestigalia, nullum ærarium.  
Quisque suæ rei moderator & arbiter esse vult. Hinc discordia inter vos crebra, & assidua bella  
grassantur: ex quibus rapinæ, incendia, cædes, & mille malorum emergunt genera: quemadmo-  
dum ibi intervenire necesse est, ubi plura dominantur capita. Petrus de Andlo lib. 1. de Imper:  
Rom. cap. vlt. Confidenter loquor, si Germani Principes Imperatori, tanquam aduocato Ecclesiæ, fi-  
deliter assisterent, prout temporibus antiquis consueuerunt; omnis profecto potestas contraria videre-  
tur parua. Tunc non solum Græcia, sed Ægyptus & Chaldaea contremisceret, ac vltima regiones Sa-  
racenorum trepidarent. Protendente nempe aquila Romanorum ab Europa alas suas, nec gryphones  
Asia atque Africa satis tutæ erunt.

Οὐτε σείει.) Idem de Gallia scribit Plinius. Terræmotus tamen plurimos Annales subinde  
annotant. Sed nimirum frequentiores & vehementiores in Asia & Oriente, vbi ciuitates etiam  
integras euerterunt.

Πολιτεύεται καὶ ταῦτα Ρωμαίοις.) Ita iamdudum Agathias de Francis: καὶ πολιτεία ὡς τὰ  
πολλὰ χρωμένη ῥωμαϊκῇ καὶ νόμοις τοῖς αὐτοῖς καὶ τὰ ἄλλα ὁμοίως ἀμφὶ τε τὰ συμβόλαια καὶ γάμους  
καὶ τὴν τῆς θεῆς θρησκείαν νομίζουσιν. Et vt altius rem repetamus, Florus lib. 4. cap. 12. Mores no-  
stros magis quam arma sub imperatore Druso susceperant. Et verè ex perpetuis cum Romanis bellis,  
quæque accedunt, legationibus, fœderibus, quin & commerciis, multum subinde & ad lingu-  
am & vitam Germani traxerunt. Quid quod & deductæ in nostras oras Romanorum coloniæ,  
& per connubia mixtus sanguis; & exportati Romam captiui, serui; stipendia apud Romanos  
facientes milites, Principum satellites, communem vtriusque gentis linguam vitamque fecerunt.  
Nec solum in Romanis prouinciis Germani indigenis misceri cœperunt, sed verò in ipsa Germania,  
præsertim circa limites, Romani nostris adsuescere didicerunt. Vnde in vetustissimis legibus pa-  
triis, Salica Tit. 43. §. 7. Si Romanus homo possessor, i. quires in pago vbi commanet, proprias pos-  
sident, occisus fuerit, is qui eum occidisse conuincitur, iiii. den. culpabilis iudicetur. Si quis Roma-  
num tributarium occiderit, &c. & aliis passim: Si Romanus homo &c. Si Francus homo &c. Qui-  
bus ipsis in legibus sane vetustissimis, præter quod Latino vtcunque sermone scriptæ sunt, com-  
plura etiam subinde veluti vestigia & ductus à Romanis deriuatæ iustitiæ obseruare licet. Tandem  
euerfo & direpto per Germanas nationes imperio, Gothi, Longobardi, Franci, Romanorum &  
victores & successores, mores quoque eorum, ritus, ceremonias, formulas, & nil non sibi assum-  
ferunt. Et post hos veri illi Germani, Sueui inquam, & Saxones, cum Reges & Cæsares Roma-  
norum audirent, veterem illam Latialem maiestatem & cothurnum omni studio affectabant: vt  
de Othone III. Imper. Ditmarus scribit lib. 4. antiquas consuetudines Romanorum iam ex parte  
magna deletas reuocantem, pleraque ad veterum Principum imitationem fecisse: adeo vt etiam  
ad mensam in semicirculum formatam (quam Sigma veteres vocabant) & editiore loco positam  
solus sederet. Neque alia causa linguam etiam Latinam in omnibus publicis actibus & tabula-  
rum monumentis conscribendis nostri Cæsares per aliquot sæcula religiose conseruauerunt: & le-  
ges tandem Romanas à Iustiniano compositas in scholas & tribunalia induxerunt: ceu vtrum-  
que certissimum veteris illius Romanitatis signum, & stantis adhuc Imperii argumentum. Si-  
gismundi certe tempore, quo ista Laonicus scripsit, Germania miris modis exculta nihilo Italiæ  
cedebat, συμφερόμενος (vt ipse loquitur) τὰ ἄλλα Ρωμαίοις. Addo & Græcis ipsis, testante  
iam tum Agathia: ἔχουσι ἡ δ' ἀρχοντας ἐν ταῖς πόλεσι, & ἱερεῖς, καὶ τὰς ἐορτὰς ὁμοίως ἡμῖν ὀπι-  
τελῶσι. ὥς ἐν βαρβαρίᾳ γένει ἐμοργε δοκοῦσι σφόδρα εἶναι κοσμιότης & ἀσπιότητος. οὐδέντε ἔχειν  
τὸ



ELAON. CHAL. EXCERP. NOTÆ.

τὸ ἀγαλλῆσθαι ἢ μόνον τὸ βαρβαρικὸν τὴν σοφίαν, ἢ τὸ τὴν φωνὴν ἰσχυρῶς. ἀγαλλῆσθαι γὰρ αὐτοὺς ἐς τὰ μάλιστα ἐγώ γε, τῶν τε ἄλλων ὠνεύχουσιν ἀγαθῶν, ἢ τῆς ἐς ἀδελφὰς δικαιοσύνης τε καὶ ὁμοιότητος.

Καὶ ἐς τὰς θρησκείαν Ῥωμαίων δεσπομονεῖν.) Germania primitus simplice Christi doctrina imbuta temporibus Apostolorum (vt in Irenæo legimus) primam institutionem fideliter seruauit. Vt Hilarius, Ambrosius & Hieronymus testantur. Et iamdudum Agathias de Francis ait : *χριστιανοὶ ἅπαντες τυγχάνουσιν ὄντες, ἢ τῇ ὁρθωτάτῃ χρώμενοι δόξῃ.* Neque verò id beneficium Latinis magis quàm Græcis debuisse, eleganter scribit Walafridus Strabo cap. 7. vbi exponit, vnde Ecclesiam & domum Dei Theotisci Kirche vocent : quem locum tanti est adscribere : *Si autem queritur, inquit, qua occasione ad nos vestigia hec Græcanitatis aduenerint, dicendum est Barbaros in Romana Republica militasse, & multos predicatorum Græca & Latina locutionis peritos, inter has bestias cum erroribus pugnatorios venisse, & eis pro causis multa nostros quæ prius non nouerant, vtilia didicisse : præcipuèque à Gotbis qui & Geta, cum eo tempore quo ad fidem Christi ( licet non recto itinere ) perducti sunt, in Græcorum prouinciis commorantes nostrum, id est, Theotiscum sermonem habuerint ; & ( vt historia testantur ) postmodum studiosi illius gentis diuinos libros in sue locutionis proprietatem transfulerint.* Et fidelium fratrum relatione didicimus, apud quasdam Scytharum gentes, maximè Tomitanos, eadem locutione diuina hætenus celebrari officia. Demum circa annum Domini MCCXXX. Episcopus Romanus istuc misit quendam Winofridum, aliàs Bonifacium, cum mandato introducendi traditiones Ecclesiæ Romanæ, quod conceptis verbis iurauit Gregorio II. ob hoc meritum pallio ab illo remuneratus, vt ex eorum Epistolis cognoscere est, quæ extant Tomo III. Concilior. & can. Antecessor. 101. cum seq. XI. q. III. Inde Apostolum Germaniam illum posteri vocarunt, quod ordinem & ceremonias Romanas, potius quàm Christianismum ( quo iam dudum ante imbuta erat, & tunc Britannis quibusdam doctoribus sinceris utebatur ) illi attulerit : quibus aliquot postea infelicibus & damnatis caligine sæculis estvsa. Neque tamen omnibus θρησκείαις ( vt author noster loquitur ) vel ἐθελθρησκείαις & δεσπομονίαις æquè vt Romani, Germani & Franci sunt delectati : non certè Imaginum cultu, de quo Synodos quasdam, & Caroli M. insigne opus habemus, & locum memorabilem Nicetæ Acominati, cum Fridericus Imp. elusis Græcorum insidiis Philippolin occupasset, Alemannos ab Armeniis, qui soli in vrbe remanserant, non vt hostes, sed vt amicos exceptos : *ἐπειδὴ καὶ ἀντιχρῆνται,* inquit ille abundans in suo sensu, *τοῖς Ἀρμενίοις Ἀλαμαννοὶ καὶ καὶ τῶν αἰρέσεων τὰς πλείους ἀδελφοὶ συμφέρουσι, ἀμφοτέρωθεν γὰρ ἐπίσης ἢ τῶν ἁγίων εἰκόνων πρὸς κύνησις ἀπηγορεύεται, καὶ τοῖς ἄρτομοις καὶ τὰς ἱεροτελεσίας ἀμφοτέρωθεν κέχρηται, καὶ ἄλλα ἅττα ὁρθοδόξοις χρυσωνύμοις ἀπόβλητα εἰσι σφαλιόμενοι τῷ ὁρθοῦ τηροῦσιν ὡς ἐννοεῖται.* Nimirum iam tum magna pars hominum in Germania, de Ecclesiæ Romanæ auctoritate, totoque sacerdotio, de variis dogmatibus ab ea traditis, purgatorii potissimum & transubstantiationis, diuersum liberè sentire cœperat : contra quos sub Cathari simul & Pontificum, Auth. Gazaros. C. de hæretic. & feralium persecutionum pleni sunt Annales. Sed & sub ipso Sigismundi imperio, quo hæc Laonicus scripsit, nutare Cleri & Pontificis auctoritas magnopere visa est, non tantum conciliis Constantiensis & Basiliensis concussa & labefacta, vt ipse Imperator reformationem ingentem pararet, sed maxime Wiclefi & Hussi doctrina sparfa & inualecente. Et iam in Wiclefi articulo ix. ita legitur : *Post Urbanum VI. non est aliquis recipiendus in Papam : sed viuendum est more Græcorum sub legibus propriis.* Vnde factum est, vt seruitutis impatiens, & grauaminum quibus opprimebatur, Germania pertæsa, paulatim colla iugo subduceret : cuius motus initia iam in huius Tomi scriptoribus observare licet.

Μονομαχία.) Velleius Paterculus lib. 2. ibi de Quintilio à Germanis casu, narrat eos simulatè egisse gratias, quod lites ipsorum Romana iustitia finiret, feritasque sua nouitate incognita disciplina mitesceret, & solita armis discerni ( inquit ) iure terminarentur. Idipsum apparet in veteri lege Alemannorum, Tit. 44. §. 1. *liceat illi alii cui crimen imposuit, cum Spada se idoneare contra illum alium.* Et Tit. 56. §. 1. *sequatur eum sacramento cum nominatis v. aut eum Spada tracta pugna duorum : si potest acquirere aut per sacramento aut per pugnam, illa pecunia post mortem mulieris retrò nunquam reuertatur.* Præsertim verò Tit. 84. *Quando parati sunt ad pugnam, tunc ponant ipsam terram in medio, & tangant ipsam cum Spathis suis, cum quibus pugnare debent : & testificentur Deum creatorem, vt cuius sit iustitia, ipsius sit & pugna & victoria.* Donec hoc probationis & purgationis genus per duellum, tam frequens in Longobardicis, Francicis, Saxonibus legibus, per Canones sublatum fuit ; ita vt per constitutiones Principum ludus gladiatorius. Quod cum dudum ante Laonici nostri æuum factum fuerit, existimo eum hoc loco potius de exercitatione illa loqui, qua Germana pubes festiui diebus, per varia armatura genera, hastas, gasta, enses retusos, pugiunculos ligneos, publico spectaculo inseruiens ( neque eo semper innoxio ) decertat. In qua vetus illud propemodum recognoscas Taciti in Germania : *Exercitatio artem parat, ars decorem.* Non in questum tamen & mercedem : quamuis lasciuie precium est voluptas spectantium.



## NI DESCRIPT. GERMANIÆ

Δεξιότατον ἔς τε μηχανὰς) In machinis omnigenis, automatis, graphide, calatura, ingenio & felicitate Germania ceteras nationes præcellit, & in ea ceteras vrbes Noriberga, industrioso populo fata (vt supra ex Ænea Syluio relatum) & ingeniorum parens. *Artificum in ea ingenia, ait Cochleus, nedum Germani, sed Itali quoque ac Galli, extremique mirantur Hispani, eosque persepe requirunt, & eorum opera longissimè mittuntur.* Extollitque Albertum Durerum pictorem incomparabilem, Iohannem Neuschelium tabarum exsculptorem pariter & inflatorem, Petrum Fischerum fusorem & calatorem metallorum, Erhardum Eßlaub & Petrum Hele horologia fabricantes. Sed omittere non possum elegantem locum nobilissimi poetæ Galli, Gulielmi Sallustii Bartasii lib. 6. Hebdomatis.

- - Que dirayie de l'aigle,  
Dont vn docte Alemant honora nostre siecle?  
Aigle qui deslogeant de la maistresse main  
Alla loin au deuant d'vn Empereur Germain:  
Et l'ayant rencontré, soudain d'une aisle accorte  
Se tournant, le suiuit iusqu'au seuil de la porte  
Du fort Norembergeois: que le pilliers dorés  
Les tapissés chemins, les arcs elabouréz,  
Les souldroyans canons, ni la ieunesse isuelle,  
Nile chenu Senat n'honoroient tant comme elle.

Cuius miraculi Petrus etiam Ramus in præfatione libri II. Mathematicæ, meminit, idque Iohanni de Monte regio attribuit.

Πολεμικὰ ἔργα.) Quid Romani arietes machinæque omnes poliorceticæ, aut etiam Græcorum ille ignis marinus (qui Chelandria apud Zonaram & Nicetam vocatur) ad Germanorum fulminea tormenta illa pyrio puluere displosa, murorum turriumque pestem certissimam? De quibus Æn. Sylu. in Germania cap. 67. *Rideant necesse est reliquas armorum officinas, qui publica Teutonicorum armamentaria viderit. Tot ibi maiores balistæ, tot catapultæ, tot arietes, tot insolite magnitudinis ænea tormenta visuntur, quas vocant Bombardas: quorum & ipsi Teutones reperto- res habentur.* Huttenus in eleganti Idyllio De non degeneri Germania:

Nam quæ sidereas vocalis machina turres  
Deiicit, ac solidas impulsu concutit arces  
Mœniaque ac spissos aggesto pondere muros  
Æquat agris, sternitque domos, & destruit vrbes;  
Prodiit à nobis, - - -

Hæc eleganti voce τηλεβόλῃς & τηλεβολίσκος nominat, qua etiam Lascaris utitur: eorumque inuentionem Germanis tribuit Laonicus, quod & pluribus repetit lib. 5. fol. 379. Plura de Bombardis Polydor. Vergilius lib. 2. cap. 11. & lib. 3. cap. 18. Guibert. Costanus in Polyhistore cap. 9. Wimpeling. in epitome German. cap. 64. & Munster. Cosmograph. lib. 3.

Ἐς πᾶσας τὰς τέχνας εὐδοκίμει) Aliò mutata à veteri illa rudique Germania: facile vt appareat (quod Tullius III. Tuscul. de suis hominibus ait) nostros omnia consequi potuisse, simul ut velle cœpissent. De omnium solertissimo & vtilissimo inuento Typographiæ Laonicus mentionem facere non potuit, quod post eius demum ætatem sub Friderici III. imperio natum est, vt annotauit Wimpeling. in Epit. German. cap. 65. & Polydor. lib. 2. cap. 7. Hadrian. Iunius in Batauia.

Φέρει τ' ἄλλα πανύτα) Etiam metalla omne genus, quod olim Tacitus negauit. Sed de his alibi. Illud de volucris noctilucis mirum Dionysio & Solino annotatum, risu dignum est.

Quod pascit volucres (mirum) fulgentibus alis  
Queis ducibus noctu cernuntur flexa viarum.

Ἐπὶ Βοῆμῃς τὰς Κεχίμῃς) Quod Vngariam conterminam facit Bohemiæ, inde est, quod sub Bohemis Morauos etiam comprehendit, qui sub diti regno Bohemiæ Vngariam attingunt. Quod verò ait Bohemos dici Cechos, ab ipsorum & Polonorum lingua est, quibus Bohemus Czech vt Vngarica Czéh appellatur; Czita pronunciato, quomodo Tsch in Tschudus. Quod nomen à Czecho rege primo gentis conditore duxisse feruntur. Quomodo à Lecho primo duce auctoreque suo, Poloni à Ruthenis cæterisque Slauis Lechii & Lechita appellantur, ut Alexander Guaguinus annotauit. Hoc loco præterire non possum Nemitzos, quos Celticam nationem esse & Constantinopoli militasse Zonaras & Glycas scribunt: ἦσαν ὃ ὧν τινὰ πύργον πρὸς τῇ πόλει ἡ πόλεως ἢ χαροία καλεῖται φυλάσσοντες Νέμετσοι (ἔθνος δὲ οἱ Νέμετσοι Κελτικὸν) ἔτοι λάρβαν τοῖς πρὸς τὰς Κομνηνὰς ἐκονοιογῆσαντο πρὸς αὐτοδυσίαν τῇ πόλει. Et statim: ὧν τῶν Νεμίττων. Atque iterum: ὑπὸ τῶν Νεμίττων. Gentem Gallicam interpretes vertit, & tamen in Indice Germanos subodoratus est, adeoque Nemetes Rheni accolæ. Leunclavius autem noster in Glyca  
da



# E LAON. CHAL. EXCERP. NOTÆ.

ad oram annotauit, Teutones Sclauorum lingua *Nemitzos* vocari. Et Ortelius quoque in The-  
sauro pro *Niemechis* id est, Germanis habendos censet.

Συμφέρονται δὲ Γερμανοῖς) Hoc quoque fide Laonici sit, Vngaros cum Germanis iisdem  
armis & moribus uti.

Ἀπὸ τε σφῶν αὐτῶν) Quod hîc scribit, Vngaros sua ipsorum lingua Pannonos dici, ne-  
scio an olim verum fuerit; hodie certe non est. *Magiar* dissyllabam Vngaris Vngarus dicitur :  
*Magiarok*. Vngari.

Ῥωμαίων ὀρχιστέα) Eugenium IV. cuius in Epitaphio idipsum legitur:

*Istius ante sacros se præbuit, alter ab ortu*

*Alter ab occasu, Caesar uterque pedes.*

*Alter ut accipiat fidei documenta Latina,*

*Alter ut aurato cingat honore caput.*

Τοῖς Κελτῶν βασιλεῦσι) Ita omnino legendum: & pro Celtis vel Gallis, Francis potius  
dicendum. Neque id tam merito liberatâ à Saracenis Hispaniâ, (quod putat Laonicus) quàm  
defensâ ipsius Italiâ & Româ. Luitprando enim Longobardorum rege Romam obsidente,  
Gregorius III. PP. non iam ad solitum auxilium Imperatoris Constantinopolitani (quem ob  
eiectas templis imagines communionem & imperio priuauerat) confugit, sed ad principes Fran-  
corum Gallias tenentium, ubi Carolus Martellus Francus palatii magister erat: cuius rogatu  
Luitprandus obsidionem soluit. Pippinus Martelli filius, Childerico domino suo ignauo mo-  
nasterio incluso, anno DCCCLIII. curat se eligi, & ad Zachariam dicti Gregorii successorem mit-  
tit: qui accepti beneficii memor mox annuit, & omnes Childerico fide obstrictos absoluit. c.  
alius. 15. q. 6. Dehinc Carolus M. Pippini filius rogatus ab Hadriano (c. hortatu. 23. q. 8.)  
Desiderium Longobardorum regem insigni bello deuicit, regnumque illud deleuit, anno DCCCLXXVI.  
Deinde post complures annos inuocatus à Leone III. Româ (quod ibi dominatum vsurparet)  
expulso, eum in sedem restituit: à quo vicissim Imperator declaratus est, & coronatus Romæ  
die Natalis Domini anno DCCCi.

Μετ' ἐννεκτοῦ ὁ ψῆφος) A Latinis auditione accepit Laonicus, de translatione imperii,  
& instituto Electorum. Quod non miror: cum etiam Constantini donationem Photius ponat  
in Nomocanone. Fuit autem imperium hereditarium in stirpe Caroli Magni per centum vigin-  
ti annos, vsque ad Conradum primum: qui meriens anno DCCCCXX. ultro detulit imperium  
ad Henricum Aucupem Saxonum Ducem, cum quo bellum iniuste gerebat. In familia huius  
Henrici I. (de quo est c. constitutio. Dist. 63.) hæreditarium fuit imperium vsque ad Ottonem  
III. pronepotem eius: qui carens filiis, in comitiis imperialibus Principum septem Electores  
instituit, & ut Francofordiâ electio fieret: approbante Gregorio V. Papa, natione & ipso Sa-  
xone. Itaque anno MIII. Henricus Baviaræ Dux iuxta illam constitutionem primus, & huius  
nominis secundus electus fuit. Hæc C. M. in addit. gl. ad c. venerabilem. De election. &  
Clem. 1. De iureiur.

Iam verò (lubet enim hanc digressiunculam adnectere) etsi Carolus ille Magnus non  
tantum iure belli, quod cum Longobardis ἀμυνόμενος gesserat, & S. P. Q. R. voluntate, & Pon-  
tificis coronatione verus & legitimus (si quis vnquam alius) effectus esset Imperator; sed trans-  
actione insuper cum Irene Augusta, eamque sequutis Nicephoro & Basilio Imp. interposita,  
certisque terminis Imperii inter eos divisione facta ius suum abunde confirmasset, ideoque legati  
Byzantini eum βασιλεῖα palam salutassent, & omnino ita inter ipsos conuentum diuque observa-  
tum esset, ut æquo iure Byzantini & nostri Augustos adeoque fratres se appellarent: paulatim  
tamen inuida & ambitiosa illa natio nostris Cæsarib. eum titulum detrahare conata est, & suos soles  
βασιλεῖς & αὐτοκράτορας Ῥωμαίων in diplomatis & numismatis proscribere, Dominosque or-  
bis terrarum iactare: nostros autem Latinos tantum, & Alemanos Francofque, & Cæsarem no-  
strum non minus inepto quàm nouo commento ῤῆγα Αλαμανίας ἢ Φραγγίας. Vnde factum  
est, ut à nostris vicissim paria reponentibus non aliter quàm *Græcorum Reges*, & *Constantinopoli-  
tani Imperatores* dicerentur, ut apud Helmoldum. Othonem Frising. Petr. de Vineis & alios vi-  
demus. Et quis sine stomacho legat Græculum Henrico Imp. ita obgannientem: ὡς εἰ κλέω  
κύριος καθεσθῆναι, ὁ βασιλεὺς ἀναδέδεικται βασιλεῶν, ὅπως μοναρχίαν ἀεὶ βαλεῖται; καὶ κύριος  
ἐστίται τῶν κύριω διασείων, τὰς Ἀντωνίνας καὶ Ἀυγούσας τῷ Διγενωτικῷ Φανταζόμενος, καὶ  
ἀπὸς τῶν ἐκείνων δεχθῆναι ἐπτείνων τὴν ἔφεσιν, καὶ μικροῦ φθελγόμενος κατ' Ἀλέξανδρον τὰ τῆδε πάν-  
τα ἐμὰ. Is est Nicetas Choniates. Quid quod Friderico Imp. transitum exercitui suo petenti  
(quod Godefridus noster Colonienfis annotauit sub Anno 1187.) Byzantinus per responsales  
suos demandauit: *Se post Deum esse dominum dominantium. Quod si regnum Romanorum dare  
vellet in manus eius, & ab eo loco dominii recipere, conductum ei daret per terras suas, & mercatum  
sufficiens.* Quali non nostri potius à veteri Roma, quàm illi à Noua sua Constantina (quam  
nec ipsam absque Gothorum ope struendam surrexisse, Iornandes in Geticis autor est) nomen  
Principatus sui & Antoninorum Augustorumque successionem deducerent? & si vel Roma re-



## IN DESCRIPT. GERMANIÆ

lieta ( quod etiam antiqui Principes non raro fecerunt, Mediolanum, Treverin, Lutetiam Romanæ præferentes ) alibi habitare præoptassent ; atque adeò Romam alteri habitandam ultro cef-  
fissent, ut quondam Zeno Imp. Theodorico Gotho ; non potius aula & comitatus Cæsaris, & vbi  
curiam celebrat ( vt nostri scriptores loquuntur ) denique vbi Cæsar est, Roma haberi debuisset.  
Ita enim satis visum est, vt Germania postquam inde ab vrbis auspiciis eius inimica & amula, non  
minus quam Chartago, Romanam virtutem perpetuis bellis exercuisset, & quàm auida à Roma-  
nis expetita, GERMANICI titulum præ aliis à terra triumphata magis quàm victa affectan-  
tibus, tam insuperabilis semper restitisset, limitemque victoriarum quem excedere non magis  
quam Parthicum Persicumque posset, ad Rheni & Danubii fluentia eis præfixisset : tandem versa  
vice ipsa ultro Romaniam immisissis procellæ more immensis populorum millibus adgrederetur :  
neque tantum omnes ad occidentem prouincias Romanis extorqueret, quibus ceu inductis ex se  
colonis in hodiernum diem sub diuersis nominibus Francorum, Longobardorum, Gothorum, An-  
glicorum, Burgundorum, Nortmannorum dominatur ; vt iam tota Europa nil aliud quam magna  
quædam Germania videatur : sed verò Italiam ipsam & urbem dominam Imperii sedem, vi & armis  
non semel occuparet ; tandemque titulo & dignitate Imperii legitime potiretur. Ita vt Imperium  
Romanum, quod Germanos capere non potuit, illorum virtute captum ; & qui hostes olim Ro-  
manis, nunc victores ; quod olim Barbaricum Romanis, vt ipsi præ se ferebant, despiciatui, re  
autem vera formidini fuit, id nunc artibus & moribus cultissimum sedes & arx Imperii factum sit.  
Quod si etiam ditionis vtriusque amplitudinem inspicere libeat, quamuis ea ad hanc quæstionem  
non pertinet ( quid enim ? si vel ad eas angustias Imperium redigatur, non dicam vt Germaniam,  
quam olim solam desiderabat, iam solam habeat : sed vt solum *quantum sub Tatio populus Roma-  
nus arabat* ; eòue minus Romanum foret ? ) certè porrecta Germaniæ vt spatio terræ nulli vn-  
quam regioni cesserunt, ita nec hodie viribus, armis, artibus aut ingeniis cuiquam habitati or-  
bis prouinciæ vel hilum concedant : & Occidentis imperium, si cum Germania sede Principis cæ-  
tera socia regna, quæ ceu coloniæ ex illa gentium officina prodierunt, & alterutris linguæ Teu-  
tonicæ meræ aut Latinæ corruptæ consortio nobiscum tenentur, eodemque iure Romano nobi-  
scum communiter vtuntur, coniungantur ; quantum tandem Graciæ toti imperioque Eoo,  
etiam vbi illud integerrimum & florentissimum fuit, concedet ? Siue autem vtriusque vires &  
potentiam conferamus, an Francorum illis Regibus potentissimis, Carolo præsertim tot popu-  
lorum victori & dominatori fortissimo & sapientissimo, vllus Græcorum par esse potuisset ? Quo-  
ties Germani cum per tanta terræ pelagique interualla bello sacro Saracenos in Asia petere, & ter-  
ram illam ( quam vocant ) sanctam Græcorum ignauia dudum amissam magna ex parte recupera-  
re poterant, vel in transitu Byzantinis Regibus terrori & formidini fuerunt ? Nonne verò illorum  
principatus sub Alexio Angelo Germanis tributarius factus, & vectigal inde *Αλαμανικόν* vocatum  
Græcis hominib. indictum ? ad quod conficiendum nec quidem priorum Imperatorum thesauris  
nec sepulchris parcatum fuit. Cum Henricus Friderici Barbarossæ filius facilibus ad illum missis  
Romanas prouincias omnes ab Epidamno vsque ad Thessalonicam repetens & Germanis in Pa-  
læstina militantibus auxilia naualia mitti iubens, ni imperata facerent, bellum præsens denuntia-  
ret : quod Choniates prolixè describit. Quid quod non multis post annis ipsum Imperium  
eiusque regia sedes Constantinopolis à Germanis Balduino Flandro duce occupatum ; Græcis in-  
terea Niceam & Trapezuntem in angustias coactis ; & plus quinquaginta annis ab illius posteri-  
tate possessum fuit. Non addam, illos imperiis suis, & Niceno, & Trapezuntino, & Byzantino  
tandem à Turcis citius exutos, funditusque excisos & deletos : contra quos Germana virtus ha-  
ctenus inuicta non tantum patriam tutam præstiterit, sed & cæteris Hesperiae prouinciis contra  
immanissimæ gentis eluionem velut muri aggerisque vicem fuerit : quod totum illud non ab  
humanarum virium ostentatione, sed sola diuina ope pendere agnoscamus. Cum autem imperia  
& regna, si non iusta, nil nisi magna sint latrocinia ; in promptu fuerit diiudicare, vter horum  
legitimi principis nomen melius tueretur : illène qui plerumque nulla iusta neque successione  
neque electione, sed aliquando magicis sortibus, aliisque malis artibus affectata tyrannide, vero  
principe ( si vel frater sit ) aut fida venenòue peremto, aut ( vt mitius ) elucificato vel castrato,  
aut ( vt mitissimè ) tonso & in monasterium detruso imperium male arripit, peius gerit, pessi-  
mè & simili exitu rursus amittit : vel forte non dicam foeminarum, sed ( quod indignius ) Eu-  
nuchorum nutu & libidine, aliquando & factionum theatricarum impetu, non nunquam etiam  
iporum hostium & barbarorum atque adeo Turcarum voluntate & minis, ad sceptrum extollit,  
quorum omnium exempla in Græcorum historiis sunt obuia : an verò ille potius, qui sapien-  
tissimo & liberrimo Antistitem principumque summorum consilio, ob virtutis spectatæ meri-  
tum & alti generis indolem electus, sacris cerimoniis & exquisitis solennitatibus more maiorum  
initiatum, conceptis verbis Ecclesiæ & patriæ fidem suam obstringens, populo adclamante rite  
renunciatur, trina coronatione sancitur ; atque ita legitime ceu Dei manu in folio collocatus,  
vt præsens in terris numen colitur pariter & timetur. Iure igitur hoc Germano Romano im-  
perium, tot hæctenus sapientibus, fortibus, moderatis principibus gubernatum, non tantum  
legiti-



## E LAON. CHAL. EXCERP. NOTÆ.

legitimum & iustum, sed verè (quod vocatur) sacrosanctum, ideoque Deo charum & Θεοφιλέστερον censetur: & ab omnibus Christiani orbis populis regibusque huic non grauatim fascis submittentibus honoratur: taleque ad finem mundi duraturum prophetarum oraculis creditur. Cum in altera illa ad Euxinum pontum septicolli Roma, & imperitantes ipsi Neronum potius Claudiorumque quàm Constantini (cuius nomen affectabant) successores variis morum damnis & vitæ flagitiis, in socios perfidia, perniciali inter ipsos discordia, infanda crudelitate, & tragicis sceleribus, adeoque aperta impietate: & eorum exemplo corruptus (ut fit) populus eo dissolutionis, nequitiae, infamiae prolaberetur, ut pro Noua Roma & Sione (nam & hoc titulo sibi blandiebantur) noua potius Sybaris & Sodoma vel ipsis testibus esset dicenda. Quam peruerfionem fatalis eius interitus & excidium iusto Adraſtiæ iudicio est consecuta. Postquam enim cum vicinis omnibus populis, iam velut iuratis & diuinitus immissis hostibus, ab Occidente Vandalis, Gothis, Bulgaris, Valachis, Mysis, Hunnis, Auaribus, Seruiis, Triballis, Patzinacis, Rosfis, Vris; ab Oriente verò Persis, Abasgis, Iberis, Arabibus, Armeniis, tandem Turcis & Saracenis omnium acerrimis, tanquam capitis reus bestiis obiectus diu uaria fortuna fuisset conflatum; plerumque verò aut magna strage attenuatum, aut ad durissimas dependendi tributis condiciones adactam: non tantum fines illos imperii olim latissimi exteriores perpetua quasi alluione arrosos, amissis subinde optimis quibusque prouinciis magis magisque contrahere necesse habuit, sed vix tandem pomœria sua, imo mœnia portasque tutari potuit. Itaque cum aliquot obsidiones Constantinopolis, ab Auaribus, Saracenis, Genuensibus, atque etiam in ciuilibus bellis passa, iusto pœnitendi tempore elapso nihilo interim euaderet melior; sed veluti obligato sibi diuino auxilio inuincibilem se & Θεοφιλέστερον iactaret; tandem a Deo deserta (quod Leo Imp. dudum in quodam vaticinio prælagierat) ut à Constantino primo condita, ita ab ultimo amissa, immanissimæ Turcarum genti pertinaciter obsidionem vrgenti, nunquam satis deplorando orbis Christiani damno concessit. Nobis interea manifesto exemplo, ut dum in illis errorum superstitionumque colluiem, bonarum legum contemptum, disciplinæ dissolutionem, intestinas discordias, aulæque & cleri corruptelas, & perditos denique populi mores notamus; obuia in plerisque nostrorum temporum similitudine, nisi de pœnitentia serio cogitemus, ab eisdem causis pares exitus animo præcipiamus. Quæ quidem hoc loco paullo fufius differere, quando eo ipso æuo cuius hic varios scriptores representamus, ea Byzantini imperii euersio contigit, & à multis illorum annotata reperietur, non alienum putauimus.

## DE NON DEGENERI STATU GERMANORUM.

*Heroicum perelegans*

VLRICI HUTTENI EQ. FRANCI.



**R**ENIGENAS populos, & robustissima mundi  
Pectora, quisquis auis atque à virtute priorum  
Degenerasse putas, non æquo remque diesque  
Arbitrio pendis. Luceat cum tempore præſco  
Præſentem conferre ſtatum. Non ſemper in armis  
Eſſe licet, mollem non ſemper amare quietem.  
Alternas inuat ire vices, belloque remiſſos  
Tuta quies animos, paxque inter poſta reſoluunt.  
Nec tu crede Deos ita nos intendere contra,  
Vt rerum inuideant ſummam, & ſaſtigia nolint  
Germanos, orbisque caput molemque tenere.  
Tunc cum tempus erat gerere arma, & cogere gentes,  
Expugnare vrbes, regumque infringere faſtus;  
Fecimus egregie, motisque indulſimus armis.  
Nunc placidas artes, pacemque admittere curis  
Eſt opus, atque animos tranquillum aduertere in uſum:  
Dum Sophia fruges, cultumque, & quaſlibet artes,  
Poſt tot geſta virum, noſter quoque calleat orbis.  
Ergo adit Italia quiſque loca, ut adferat inde  
Ingenij cultum, & Latia commercia lingua,



Græcorumque artes : nimirum illa ampla parentum  
 Cum satis eniteat gestarum gloria rerum.  
 Nec minus hoc Ducibus curæ est : dant præmia doctis  
 Passim, Academias statuunt, et honoribus augent  
 Altiloquos vates, ac Musica Sacra professos :  
 Ingeniisque fauent mansueta fruge colendis.  
 Sunt tamen interea, si qua intercesserit illis  
 Causa recens studiis, qui prisca negocia tractent.  
 Iamque iterum fines Italarum & Martia regna  
 Cæsar adit, motoque animo sese obtulit armis,  
 Ut Venetum luxus, vanamque ubi presserit iram  
 Ostendat, pacem qui admisserit, arma prærosas  
 Non etiam timuisse minas, potuisse in utramque  
 Esse animo constante vicem. Iam discimus artes,  
 Scribimus, & serum nos commendamus in ævum :  
 Famaque compertum est quantum res adiuvet istas.  
 Quæ cum cura levis nostris maioribus esset,  
 Acta ducum tacuit : nec quid Germania rerum  
 Egerit, inuictæque manu quas ceperit urbes,  
 Quos dederit leto Reges, & vicerit hostes,  
 Scire datur. Neque enim scriptis calamoque vacabant  
 Uttiliora armis corda, & præstantibus actis.  
 Maluit illa ætas, quam scribere, nitier armis  
 Adereque insignis, quas scriberet altera, pugnas.  
 Quod si nostra forent victuris gesta libellis  
 Scripta, velut Latia, velut ampla volumina Graia  
 Cernimus historia; non tantum hæc ultima scirent  
 Sæcula Teutonicas Alpino in vertice pugnas,  
 Cymbrorumque manus, & quas tum scæmina strages  
 Miscuerit, fractumque dolis non viribus hostem,  
 Ter victasque acies Italas, Orbisque retusum  
 Ingenti terrore caput, Romamque timentem,  
 Feralemque urbis planctum; quæ castra cohortes  
 Syllani dederint, quas Cæpio senserit iras,  
 Utque fuga turpi patrias repetiuerit arces  
 Manlius, attrita quæ desperatio Romæ:  
 Quale Dionæo confectum à Cæsare bellum,  
 Quæ vixdum visi fuerit victoria Rheni,  
 Mentitaque fugæ, & cæpti solatia pontis:  
 Vindice ut Arminio celeris prope rura Visurgis  
 Romanas acies miro Germania motu  
 Quintiliumque ducem conciderit : unde birostræ  
 Contigerint Aquilæ traducti insignia regni,  
 Excussumque ingum : non tantum hæc tempora nossent,  
 Quo tum Roma metu nostrorum expauerit iras,  
 Præmia quæ belli nec non quæ laude Cherusci  
 Re bene tum gesta tulerint, & gloria quæ sit  
 Ereptum imperium, compressa superbia fastus  
 Italici, pulsumque nefas, ut libera tandem  
 Teutona gens falsos posset ridere triumphos,  
 Quos egit Caligæ notus cognomine Cæsar,  
 Tunc ubi se rutulis æquabant nigra capillis  
 Tempora, & Ausoniis stridebant barbara linguis



Murmura, ubi currus simulata trophæa pudendi  
 Pone sequebantur, fingentemque ista præbat  
 Plebs sua victorem Germanum imitata susurrum.  
 Non hæc clarorum præter tot millia patrum  
 Cognita facta forent: sciremus ut ordine gesta  
 Et quæ bella sient, nec gens tantum vlla loquacis  
 Scriberet historia. Nunc cum facere incluta nobis,  
 Scribere fors aliis dederit, Germania tantas  
 Perdiderit pugnas, & quæ clarissima quondam  
 Consecit lateant, obscura in nube feratur  
 Quæ patribus virtus fuit aut quæ gloria: nemo  
 Possit ab antiquo Germanam extendere laudem:  
 Attigerint nullos veterum monimenta nepotes,  
 Idque errore patrum. Nos, quo ne obliuio nostræ  
 Temporis obscoret si quid memorabile gestum est,  
 Scribere tentemus, cultumque inhiemus ad istum:  
 Utque hac esse olim possimus laude superbi,  
 Bella remittamus; quantumque à Marte licebit,  
 Ocia Musarum & placidas vigilemus ad artes:  
 Ut non sit mirum, si segnius arma feramus.  
 Nec ferimus segnes: quia iam prudentia maior,  
 At furor est levior: nec qui nos prouocet hostis,  
 Contigit his annis: Si quis volet, inferat ultro  
 His bellum populis, requiem tentetque supinam:  
 Sentiet ultrices in se concurrere vires,  
 Comperietque hanc nos pacem formasse, rudeisque  
 Erudiisse animos, studioque acuisse sequestro.  
 Sentiet horribiles non frustra exire Suevos,  
 Atque etiam lingua Francos verbisque timendos,  
 Terribiles equitum turmas, & fulmina belli,  
 Vindelicasque Aquilas, atque ebrietate feroces  
 Saxonia populos, nec egentem viribus Hessum,  
 Et nunquam domitum Rhenum totiesque petitum,  
 Et medias gentes, quarum nunc gloria maior  
 Quam fuit illa vetus. Cui si quem temporis huius  
 Pœnituit sortisque suæ, præconia laudum  
 Attribuit meliore loco; præsentia sordent  
 Dura quibus Fortuna venit, cui prospera non sunt  
 Tempora, Felices primos vocat, ultima damnat.  
 Si sumus imbelles, priscasque amisimus artes;  
 Cui non nostra venit Romani irrumpere Gallus  
 Aemulus imperii? cur non sese Itala tellus  
 Eripit his titulis, nobisque subesse recusat?  
 Cur non cuncta petens animo Mahumeticus hostis  
 Audet in has vires? Certè haud hoc tempore quisquam  
 Bella gerit, qui non nostris se viribus armet.  
 Nos Asia reges, Tanaisque ferocia regna,  
 Et fera Turcarum manus, Assyriaque tyranni,  
 Sarmata nos Parthique legunt: nos Persia dines.  
 Ante aciem statuit, nos ultima regna sequendis  
 Affeclant castris, nos ultimus appetit orbis.  
 Nos penes est studium armorum: nos ista docemus,  
 Nos facimus: per nos alij faciuntque sciuntque.



Indicunt alii, iurantque in bella vicissim:  
 Nos gerimus. vincit, Germano milite quisquis  
 Bella gerit: nostra est hac gloria, solaque nostra est.  
 Quid dicam mores ita nulla in gente pudicos?  
 Quamquam aliquas dederint, quod nostras polluit urbes  
 Molliculi labes Itali: quamquam improba Roma  
 Venerit in ritus, spurcisque infecerit istud  
 Acre libidinibus, castrum corruerit omne  
 Roma, sacerdotum luxus vitamque supinam  
 Pontificum non tam ipsa ferens, quam semine sparsa  
 Gentibus immittens. Quid dicam ut in urbibus ipsis  
 Tot veniant cultus, tot opes, tam splendida cuncta,  
 Ut nulli nobis ausint certare priores?  
 Nos etiam argentum, nos nobile mittimus aurum,  
 Nos legimus gemmas, & succina prisca recenti  
 Spernimus inuento: tanta est industria, tantum  
 Creuimus ingeniis. Et adhuc quis fingit ab horum  
 Degenerasse patrum virtute illustribus actis.  
 Cum videat cultusque novos, possitque vetustam  
 Barbariem votis odisse, hac tempora votis  
 Omnibus amplecti. Nam quâ non aspera quondam  
 Dicta magis tellus, alia est nunc: omnia gignit,  
 Vina etiam pulchrumque crocum, vestesque superbas,  
 Velleraque & fruges confertim, atque omne metallum.  
 Præterea (ut fingis) donec desedimus isto  
 In torpore pigri, dumque has tractauimus artes;  
 Hac in segnitie interea quadam egimus omni  
 Ingenio veterum maiora ac laude parentum.  
 Obiice desidiâ, torporem, & molle quietum  
 Obiice lior edax. nos quasdam inuenimus artes,  
 Quarum nulla satis laudem celebrauerit ætas.  
 Nam quæ sidereas vocalis machina turreis  
 Delicet, ac solidas impulsa concutit artes,  
 Mœniaque & spissos aggesto pondere muros  
 Æquet agris, sternitque domus, & destruit urbes;  
 Prodiit à nobis. Nos primi excudimus ære,  
 Exsculptis mansura notis tot sæcla, tot annos,  
 Omne genus scripti, Vatum æternosque labores.  
 Quaque diu nemo perituris scribere chartis  
 Posset, & in multas ita passim spargere gentes;  
 Per nos una dies in mille volumina profert.  
 Quod tantum est, ut si cunctas perpenderis artes,  
 Italia quas acies Latiumque exercet. acumen,  
 Inuenias omnes hac utilitate minores.  
 Nunc quisque innumeros etiam de paupere turba  
 Exiguo parat ære libros & munere nostro  
 Consequitur decus ingenium, paruoque labore  
 Omnia vel per se, quæ longo addisceret usu,  
 Et vigili cura somnoque carentibus horis,  
 Imbibit. hoc tantum est, ut quod nunc omnia plenis  
 Sunt congesta libris, ut quod nunc oppida doctos  
 Cuncta viros referunt; quod nulla ita barbara tellus,  
 Quam animum colat, & fecundis artibus ornet;  
 Solis deberi nobis nemo neget usquam.  
 Esse rudes igitur quisquam nos dicat & istam  
 Segniter atatem duci, vel in ocia lapsos;  
 Dum sinat hanc nobis, ubi ademerit omnia laudem.





**BENEVENUTI**  
**DE**  
**RAMBALDIS**  
**LIBER AUGUSTALIS.**



RENEVENTI  
DE  
RAMBALDIS  
LIBER AUGUSTALIS





LECTORI SALVTEM!

BURCARD GOTTHELF STRUVE.

**I**Molensis patria, quod Romaniae oppidum erat, hic Beneuenutus Insignis dicitur Orator, Poëta, atque Historicus idque pro more Italorum. Vixisse illum tempore Wenceslai, certum est, cum quo non solum librum hunc Augustalem finit, sed ipsum etiam hodie, siue suo tempore regnare dicit: Liber hic Augustalis vitas Cæsarum in Compendio exhibet, breuiter quidem, satis tamen accurate, ita, vt Libelli Memorialis instar esse possit. Hunc Francisci Petrarchæ Operibus videmus adnexum, & quidem in Veneta editione sub finem hæc adiiciuntur: *explicit liber Augustalis Beneuenuti de Rambaldis cum pluribus aliis opusculis Francisci Petrarche, Impressis Venetiis impensis Domini Andree Torresani de Asula, per Simonem de Luere: Anno Incarnationis Christi MCCCCCI. die XXVII. Marcii feliciter.* Hinc, reliquis Petrarchæ editionibus eundem æque videmus adiectum. Separatim eundem prodiisse



dicat Vossius, \* & qui eum sequitur Zeilerus, \*\* Beneuenu-  
tus hunc librum ad Wenceslaum saltim perduxit, sub  
quo etiam decessit. Continuauit equidem illum Æneas  
Sylvius, prout ipse in epistola sua ad Antonium Cardina-  
lem Hilensensem ipsius Europæ præmissa testatur. Hoc  
tamen Æneæ supplementum cum ad Freherum non ve-  
nerit, prout ipse in Syllabo Scriptorum Tomo huic se-  
cundo præmissio ait, eius loco ex Io. Baptistæ Egnatii epi-  
tome reliquos Impp. ad Maximilianum I. vsque adiecit.

\* *de Histor. lat. lib. III. c. III. p. 538.*

\*\* *Histor. Celebr. Tom. II. p. 222.*







# BENEVENVTI DE RAMBALDIS IMOLENSIS,

IN

Librum suum Augustalem,

## P R Æ F A C I O

Ad originibus pietateque insignem virum, NICOLAVM  
principem Atestensem.



*P*tas Clarissime Marchio, Heroicarum cultor virtutum, posse faciliter & citò internoscere bona & mala Principum Romanorum, ut utrorumque sine notato cautior fias eminenti in speculo exemplorum. Parebo libens, & calculantis more rem magnam breui ratione summabo. Quia non modicum confert commoditatis, ad cognitionem rerum gestarum, præsertim postquam venit tempus gratiæ, quo Rex uniuersi & Urbem & Orbem totum ad unam voluit redigi Monarchiam, nosse annos quibus quisque Principum imperauit; non per modum narrantis, sed potius numerantis, singulorum tempora breuiter, tñò transcurrenter perstringam lucido cum sermone. Est autem utiliter præsciendum, quòd omnes Historiarum scriptores Catholici, siue in obsequium fidei, siue ob aliam causam sicut Orosius in Ormesta mundi, & alii plures, incipiunt descriptiones à Cæsare Augusto: quia sub eo Christus nasci dignatus est, à quo incepit primitiua Ecclesia, vel quia diutius imperauit, & salubrius Rempublicam gubernauit. Vnde videntur velle, quod C. Iulius Cæsar fuerit potius quidam præcursor Imperii, sicut Baptista fuit præcursor Domini. Omnes verò gentiles Historici incipiunt à Iulio Cæsare, sicut Suetonius & alii multi, quos magis sequi intendo, quia non aliud quàm veritatem tradere posteris curauerunt.





BENEVENVTI DE RAMBALDIS, P. I.  
ORATORIS POETÆ ET HISTORIOGRAPHI  
C. LIBER AVGVSTALIS.

C. IVL. CÆSAR.

**P**RIMVS igitur qui Romanorum arripuit imperium, fuit Iulius Cæsar, Lucii F. valentissimus omnium principum, qui in vigore animi non habuit parem, nec ante se, nec post se. Hic vixit annis LVI. Imperavit autem post finem bellorum suorum annis tribus, & septem mensibus. Interfectus est in medio Senatus, viginti tribus vulneribus.

CÆS. OCT. AVGVSTVS.

CÆS. AVGVSTVS, dictus Octouianus, à natiuitate pronepos Cæs. & filius adoptatiuus, successit illi in Imperio. Hic fuit foelicissimus omnium principum priorum, & posteriorum: nam alta prouidentia sua, imperavit prudenter & laudabiliter, tot annis quot Cæsar vixerat, scilicet LVI. De quibus regnavit XII. cum Antonio & Lepido III. vir, reliquum solus, cum magna pace & tranquillitate orbis, clauso templo Iani, & vixit annis LXXV. XXV. diebus. Mortuus est foeliciter apud Nolam ciuitatem Campaniæ.

TIBERIVS NERO.

TIBERIVS priuignus Augusti ex Liuia, adoptatus ab eo, hæres fuit imperii. Hic (vt ait Plinius) fuit tristissimus hominum, senex foedissimus, omni turpitudine luxuriarum & ebrietatum: fuit tamen strenuus victor in iuuentute, de quo dicit Orosius, quod ex mansuetissimo principe conuersus est in fauissimam bestiam, cum non impetrasset in Senatu, quod ipse pro Deo haberetur. Mortuus est graui morbo vel veneno. Vixit annis LXXVIII. imperauitque XXIII.

C. CÆS. CALIGVLA.

CAIVS CALIGVLA, pronepos Tiberii, natus ex Germanico filio Drusi, qui fuerat frater ipsius Tiberii. Hic fuit iuuenis pessimus omnium (excepto Nerone) omni scelere contaminatus; qui vixit annis viginti & octo, imperauitque annis tribus, mensibus decem, diebus octo. Interfectus coniuratione suorum, triginta vulneribus, & turpiter tractatus.

CLAVDIVS CÆSAR.

CLAVDIVS nepos Tiberii, natus ex Druso, patruus C. Caligulæ, indifferens fuit, & varius multum, qui à prima ætate fuit semper infirmus, vilis & tristis. Vnde cum debuit succedere Tiberio in imperio, Caius fuit sibi prælatus. Fuit tamen satis utilis sed infortunatus in vxoribus, de quarum vna Messalina, scribit Cornelius Tacitus, & Iuuenalis dicentes:

*Et lassata viris nondum satiata recessit.*

Altera vero Agrippina mater Neronis, quæ ipsum Claudium venenauit in fungis. Claudius vixit annis sexaginta quatuor, imperauitque quatuordecim.



*DOMITIVS NERO.*

**N**ERO de gente Domitia, priuignus Claudii, & gener eius, adoptatus fraude Agrippinae. Hic fuit nequissimus omnium, hostis humani generis, & ideo iudicatus est hostis à Senatu. Interfecit se pugione, quarto milliario longe ab Urbe, cum imperasset annis paulo minus quatuordecim. Vixitque annis triginta duo, & familia Caesarum in Nerone defecit.

p. 2.

*SERGIVS GALBA.*

**G**ALBA senex, de nobili stirpe Sulpitiorum, septimus post Neronem, vir vitiosus, commisit se totum regendum vitiosissimis seruis. Vnde omnibus odiosus, occisus est in foro à militibus Otthonis, cum imperasset mensibus septem, vixitque annis septuaginta tribus.

*M. SALVIVS OTTO.*

**O**TTTO octauus Imperator, fuit nobilis homo, natus ex equite Romano: non poterat esse bonus, quia fuerat familiarissimus Neroni: fuit tamen militibus dilectissimus. Qui victus à Vitellio, se occidit pugione, cum imperasset nonaginta diebus, anno ætatis suæ LVII.

*VITELLIVS.*

**V**ITELLIVS nobilis, de gente Vitelliorum, vir profundæ gulæ & crudelis, qui à pueritia fuit educatus inter meretrices Tiberii vituperatissime: occisus in furore populi, inter omnia ludibria & tormenta, Regnavit mensibus octo, vixitque annis LVII. & nota quod Orosius Ottonem, & Vitellium abiicit de numero principum Romanorum.

*VESPASIANVS.*

**V**ESPASIANVS nobilis, de gente Flauia, successit decimus in imperio Vitellio, cum esset dux belli Iudaici pro Nerone. Hic fuit sapiens, senex & utilis Reip. qui vixit annis sexaginta nouem, mensibus tribus, & diebus septem. Imperauit annis decem, & mortuus ex fluxu ventris.

*TITVS VESPASIANVS.*

**T**ITVS Vespasiani filius, clarissimus omni virtute, gloriosissimum triumphum duxit de Iudæis simul cum patre, quia simul ambo imperauerunt, vt dicit Plinius optimus testis, qui ascribit Vespasiano. Et hic amore omnium tenuit imperium solus annis duobus, mensibus duobus, & diebus XX. vixitque annis XLI. & mortuus est febre, cum magno planctu omnium.

*DOMITIANVS.*

**D**OMITIANVS filius Vespasiani, frater Titi, hostis virtutum, patris & fratris; crudelis, sanguinarius; persecutor muscarum, & Christianorum, & Iudæorum, qui vixit annis XLV. imperauit quindecim, occisus à suis in camera.

*COCCEIVS NERVA.*

**N**ERVA senex satis nobilis, honestus & modestus, contrarius Domitiano, factus est Imperator, opera occisorum eius: qui adoptauit Traianum in filium, propter egregiam eius virtutem. Vixit annis septuaginta duobus, imperauit anno vno, & mortuus est morte naturali.

*VLPIVS TRAIANVS.*

**T**RAIANVS ortus Romæ, cuius antiqui fuerunt Hispani, optimus fuit omnium Augustorum, summæ iustitiæ, clementiæ & ciuilitatis, qui vir diuinus, mirabili virtute & foelicitate Romanum imperium satis infirmatum magnifice ampliauit. Hic vixit annis sexaginta octo, mensibus octo, & quatuor diebus, imperauitque annis octodecim, mensibus sex, & mortuus est ex fluxu ventris.

*ÆLIVS ADRIANVS.*

**A**DRIANVS (vt scribit Spartianus) natus ex consobrino Traiani, filius adoptiuus eius, cuius fuerunt maiores in Italia, temporibus Scipionum? vir magnæ scientiæ, maximæ eloquentiæ, nunc crudelis, nunc clemens; qui plus percurrit provincias Romani imperii, quam aliquis alius Imperator. Adrianus vitæ tædio afflatus petebat occidi, & mortuus est anno ætatis LXXII. mense V. cum imperasset annis XXI. mensibus XI.

ANTO-



## ANTONINVS PIVS.

ANTONINVS PIVS, gener Adriani, & filius adoptiuus, vir forma pulcher, insignis ingenio & eloquio, magnæ literaturæ, moderatissimus & benignissimus, qui Romanum imperium plus studuit conseruare, quam ampliare, habens illud in ore Scipionis: *Malo unum cinem seruare, quam mille hostes occidere.* Antoninus periit anno septuagesimo, imperauit annis viginti tribus, mortuus est ex febre, quasi dormiens.

## ANTONINVS VERUS.

p. 3.

ANTONINVS Verus gener Pij, successit ei in imperio, cum Lucio fratre suo. Isti duo fratres primi simul vocati sunt Augusti. Iste Verus sapientissime celauit & supportauit vitia fratris, qui regnauit secum annis vndecim. Fuit enim magnus Philosophus, sanctitate vitæ omnibus præponendus, nunquam mutans vultum: qui vir tantæ virtutis poterat dici felix, si vxorem Faustina & Filium Commodum non habuisset. Imperauit annis XVIII. vixit LXI. & mortuus est à morbo.

## ANTONINVS COMMODVS.

ANTONINVS Commodus, filius Veri, paternarum virtutum hostis, crudelis, luxuriosus, qui à pueritia fuit toto corpore omni turpitudine foedatus, trecentas meretrices, & totidem pulchros pueros habens in palatio, infamator omnium, ac omnibus incommodus: cum imperasset tredecim annis, strangulatus fuit, cum magno commodo omnium.

## HELVIVS PERTINAX.

PERTINAX factus Imperator, mandato Senatus, fuit genere ignobilis, ex patre libertino; sed moribus nobilis, senex venerabilis, temperatus, contrarius Commodo. Reputatus est auarus, dilectus populo, & militibus odiosus. A quibus occisus est in domo sua, opera Iuliani, vixitque annis 60. & mensibus sex, & 25. diebus.

## IULIANVS DIDIVS.

IULIANVS Didius post Pertinacem assumpsit imperium, qui fuit nepos Iuliani Magni iurisconsulti, quod magis nobilitauit eum: cuius antiqui fuerunt de Mediolano. Iulianus fuit parcissimus hominum, miserrime viuens, vnde odiosus populo, desertus ab omnibus, priuatus est imperio, auctoritate Senatus, & in palatio occisus: vixitque annis quadraginta sex, & mensibus quatuor. Imperauit duobus mensibus, & diebus quinque.

## SEPTIMIVS SEVERVS.

SEVERVS solus in numero principum fuit ex Africa; qui vir fortis, magna bella gessit, terribilis S. P. Q. R. sed militibus amabilis, qui maius stipendium dedit, quam aliquis Imperator. Hic tantum annonæ reliquit in morte, quod sufficere poterat vrbi septem annis, dando LXXV. millia modiorum in die. De quo dixit Senatus: *Quod nunquam debuisset nasci, vel nunquam mori.* Vixit annis LXXIX, Mortuus est in Britannia; cum imperasset annis XVIII.

## ANTONIVS CARACALLA, BASSIANVS.

BASSIANVS filius Seueri, dictus Antonius Caracalla, successit patri in imperio, asperior eo, luxuriosus multum, qui Papinianum magnum Iurisconsultum trucidari fecit, quia reprehendebat eum, quod duxerat Iuliam nouercam suam in vxorem. Hic imperauit annis quasi sex, & occisus est apud Charras, insidiis Marini præfecti, anno ætatis suæ XLIII.

## OPILIVS MACRINVS.

MACRINVS occiso Bassiano, arripuit imperium, homo omnium vitiorum, vilissime natus, & vilissimus seruus sub Commodo: fuit crudelis, sanguinarius, inuentor nouarum mortium, sed post annum sui imperii fuit occisus, apud Antiochiam ab Heliogabalo.

## VARIVS HELIOGABALVS.

VARIVS HELIOGABALVS, reputatus filius supra scripti Bassiani, ex Semirama vulgatissima meretrice, ad cuius voluntatem fecit omnia turpia, impiorum omni bestia, occisus est coniuratione militum, & deiectus in cloacam stercoreariam,



Varianam, & mater cum eo, dignissima tali filio luxurioso, prodigo, coenoso; qui non est nominandus homo, sed vpupa foedissima. Imperavit annis tribus.

## ALEXANDER SEVERVS.

ALEXANDER filius Varii Heliogabali, natus ex Mammea Christianissima muliere, accepit imperium ad remedium generis humani, qui iuuenis virtuosissimus, purgatis sordibus Heliogabali, Remp. salubriter gubernavit consilio Vlpiani, qui fuit legalis scientiæ princeps. Habuit iste Alexander omnes dotes naturæ, fortunæ; & vitam bonorum principum metrice scripsit. Vixit annis triginta nouem, mensibus tribus, diebus duodecim. Imperavit annis tredecim. Occisus est in Gallia, à militibus opera Maximini, quod indignissimum visum est. Nam omnes boni principes vt plurimum bene mortui sunt, & mali male.

## MAXIMINVS.

P. 4.

MAXIMINVS natus de origine Thraciæ, ex patre & matre Barbaris, sine auctoritate Senatus, à militibus appellatus est Augustus, qui fuit magnus vt gigas, fortissimus, ferus, asper & superbus, nullum animal eo crudelius fuit in terris: vnde milites in Africa fecerunt Imperatorem Gordianum senem grauisimum, sed Maximinus occiso Gordiano, & filio eius iuvene, veniebat contra Romam fulminans. Senatus vero territus, fecit tres Imperatores contra eum, scilicet Pupienum, Albinum & Gordianum paruulum, nepotem Gordiani senis interfecti. Maximinus vero apud Aquileiam occisus est à militibus, cum filio suo, cum imperasset annis tribus.

## GORDIANVS.

GORDIANVS tertius, qui appellatus fuerat Augustus à Senatu, cum Pupieno & Albino, illis occisis fraude militum, qui iam imperauerant duobus annis, solus tenuit imperium valde puer. Cui nihil deficiebat nisi atas, amabilis & gratus. Hic cum bella foeliciter gereret in Oriente; consilio Mithridatis foeceri sui viri prudentissimi, occisus fuit à militibus fraude Philippi Arabis, dicens: *Quod puer nesciebat regere imperium.* Imperavit annis sex.

## PHILIPPVS.

PHILIPPVS de Arabia, post Gordianum factus imperator, Philippum filium fecit participem regni. Qui de vili genere natus, superbe imperavit annis septem, nihil laudabile fecit, nisi quod fuerit primus Imperator Christianus, & ambo in tumultu militari interfecti sunt, fraude Decii, pater Veronæ, filius Romæ. Et hic nota quod omnis Augustus est Cæsar, sed non è conuerso. Nam Cæsar est electus à principe, vel exercitu; Augustus vero confirmatus à Senatu.

## DECIVS.

DECIVS de Pannonia natus, vir industria militari strenuus, occisis Philippis, inuasit imperium, quod tenuit annis tribus, & ipse cum filio, quem Cæsarem fecerat, occisus est in medio Barbarorum, cum bellum pararet contra Æmilianum, qui in Moesia rebellauerat. Crudelis fuit contra Christianos.

## GALLVS HOSTILIANVS.

GALLVS HOSTILIANVS, post mortem Decii successe in imperio, cum filio suo Volusiano, quod tenuit annis vix duobus, quo tempore persecutionem fecerunt in Christianos, & pestis generaliter fuit vbique.

## LICINIVS VALERIANVS.

VALERIANVS ab exercitu appellatus Augustus, volente populo & gaudente Senatu, quia fuit vir nobilis sanguine, scientia clarus, gloriosus eloquentia. Et hic verificatur dictum Aristotelis, *Vbi plurimum de virtute, ibi minimum de fortuna, & è conuerso.* Sed infelicissimus fuit omnium, nam captus à Rege Persarum, in misera seruitute consenuit: sustinens semper in tergo Regem, cum ascenderet equum. Hic vixit annis LXX. imperavitque annis sex.

## GALLIENVS.

GALLIENVS filius Valeriani, qui iam erat Cæsar, factus est Augustus à Senatu loco patris. Qui luxuriosus marcens otio, se totum dedit voluptatibus, neglecto



glecto patre, & imperio. Vnde 30. Tyranni inuaserunt imperium. Fuit tamen poeta clarus, vnde cum semel celebraret nuptias, tenens sponsum & sponsam per manus, dixit istos mirabiles versus:

*Ite simul pueri, pariter sudate medullis  
Omnibus inter vos, non murmura vestra columbae,  
Brachia non hederæ, non vincant oscula conchæ.*

Imperauitque annis XI.

#### CLAUDIUS.

CLAUDIUS secundus, Imperator factus de voluntate Senatus, dicitur habuisse in se bona omnium principum, sicut virtutem Traiani, pietatem Antonini, prouidentiam Augusti. Hic victis foeliciter Gothis, mortuus est ex infirmitate familiari, virtutibus suis cœlum petiit, cum imperasset quasi duobus annis. Quo mortuo Quintilianus frater eius, vir optimus imperium tenuit solum 17. diebus, & occisus est.

#### AVRELIANVS.

AVRELIANVS natus ex paruis parentibus Barbaris, fuit vir fortissimus, & in omni genere armorum exercitatus à pueritia, qui magna bella gessit in Oriente, & muros Urbis plus ampliavit, quam aliquis alius ante, vel post. Sed clementiam non habuit, quæ est prima virtus principum. Triumphus eius fuit gloriosissimus. Nam Zenobiam magnanimam mulierem, quæ magnifice vendicauerat sibi Syriam, duxit ante curram triumphalem, ligatam multis catenis aureis. Imperauit annis quinque, mensibus VI. occisus fraude notarij sui apud Byzantium.

#### TACITVS.

TACITVS V. Conf. senex & grauis, factus est Imperator cum summa concordia & longa deliberatione militum, Senatus & populi; spatio sex mensium, temperatus, sobrius, lectione librorum delectatus. Non fecit magnifica propter temporis breuitatem, quia tantum sex mensibus imperauit, morbo perijt.

#### FLORIANVS.

FLORIANVS frater eius sibi similis. Imperium tenuit duobus mensibus, & occisus est insidiis militum.

#### PROBVS DE PANNONIA.

PROBVS de Pannonia oriundus, de ciuitate Syrmienfi, nobiliore matre, qui vere probus iudicio omnium bonorum factus imperator, Remp. quietissimam, & securissimam reddidit, nobilissimis virtutibus clarus; sub magnis ducibus Valeriano, Aureliano & Claudio, multa bella gessit foeliciter & probiter, terror Barbarorum. Ideo finaliter occisus est apud Syrmium, quia nimis eos grauabat præliis & laboribus, anno imperij sui V.

#### CARVS.

CARVS Romanus vel Mediolanensis, visus est militibus dignus imperio, post mortem Probi, & tamen medius fuit inter principes bonos & malos. Hic capta ciuitate Carrarum in Persia, longius procedendo cum exercitu fulminatus est, cum imperasset annis duobus. Carus habuit duos filios Cæsares, quorum minor Numerianus, magnus Orator & Poeta, sine pari tempore suo, occisus est prodicione Apri soceri sui, qui volebat occupare imperium. Maior autem nomine Carinus contaminatissimus omnium, victus & occisus est à Diocletiano.

#### DIOCLETIANVS.

DIOCLETIANVS, cum bonus princeps quæreretur, occiso Numeriano, consensu omnium appellatus est Augustus, vir magnanimus, prudens, alti consilij, qui dicebat, *Bonus, cautus, optimus venditur Imperator.* Cum autem solus libere imperaret, subito ortis magnis bellis, Diocletianus fecit Augustum Maximianum, quem à principio fecerat Cæsarem, & elegit Cæsares Constantium patrem Magni Constantini & Galerium. Post multas victorias bellorum, Diocletianus senex reduxit se primum ad vitam priuatam, apud Salonas ciuitatem Dalmatiæ patriam suam. Et Maximianus coactus ab eo, idem fecit apud Mediolanum:



num: & Diocletianus in Oriente, & Maximianus in Occidente crudelius persecuti sunt Christianos, quam Valerianus & Decius, Aurelianus & cæteri. Diocletianus venenum bibit anno ætatis LXVIII. cum imperasset annis decem.

*CONSTANTIVS.*

**C**ONSTANTIUS & Galerius Cæsares, facti Augusti, diuiserunt imperium inter se. Nam Constantius contentus Gallia & Hispania, cæteras prouincias collegæ cessit. Constantius ex patre Eutropio nobili Romano, fuit vir optimæ constantiæ & ciuilitatis, omnibus amabilis & venerabilis: qui mortuus est in Britannia, anno imperij sui XIII. relicto Constantino filio ex Helena.

*GALERIVS.*

**G**ALERIVS cum imperasset Illyrico, milites prætoriani Romæ fecerunt Imperatorem Maxentium, filium Maximiani, contra quem Galerius misit quendam Seuerum, qui cum incredibili multitudine obsedit Romam, & tamen prodicione suorum à Maxentio fugiens occisus est, & Maxentius confirmatus in imperio: factus est sæuissimus tyrannus. Galerius vero post multa mala quæ fecerat in Christianos, dum putaret venire in Italiam; morbo fastidiendo putrefactus, cum vermes incessabiliter emitteret de corpore, cruciatus impatiens, manu sua se interfecit, anno imperij sui X. Imperauit solus annis duobus.

p. 6.

*M. FLAVIVS CONSTANTINVS MAGNVS.*

**C**ONSTANTINVS Magnus Constantij filius, omni virtute refulgens, optimis principibus comparandus, rogatus à S. P. Q. R. vt ciues suos liberaret à feruitute crudelissimæ bestię, Maxentii, conuocatoque Licinio, qui imperabat in Hispania, cum magno apparatu belli venit contra Maxentium; quem magno prælio vicit, & Maxentius fugiens suffocatus est in Tyberi. Constantinus cum magna gloria intrauit Urbem. Postea Licinium sibi rebellem, sæpe victum, tandem occidi fecit. Constantinus itaque omnium victor, Ecclesiam Romanam reformauit, fidem Christianam confirmauit, sedem imperij transtulit in Græciam, vbi fecit secundam Romam. Constantinus cum magna virtute & fortuna prosperrima imperauit XXX. annis, mensibus X. diebus XI. vixitque annis LXVI. & mortuus est feliciter.

*CONSTANS.*

**C**ONSTANS & Constantius filij Constantini occiso fratre eorum Constantino, tenuerunt ambo imperium. Constans prauus Arrianus persecutus est Catholicos, sed post multa prælia gesta contra Persas, factus omnibus intolerabilis, occisus est anno imperij eius XIX. ætatis vero anno XXX.

*CONSTANTIVS.*

**C**ONSTANTIUS post fratrem solus tenuit imperium annis sex, temperans & placidus, quamuis Arrianus. Hic Iulianum consanguineum suum fecit Cæsarem, & sororium suum, & misit in Gallias, qui elatus victoriâ inuasit imperium in Italia, Constantio occupato bellis Parthorum, Constantius vero rediens contra eum mortuus est in via, anno ætatis suæ XLV.

*IULIANVS.*

**I**ULIANVS successit solus in imperio, vir liberalis, literatus, eloquens, memoriosus, cupidus gloriæ. Fuit tamen ingratus contra Constantium, & perfidus contra fidem; vnde vocatus est apostata, quia solus post Constantinum recessit à fide Christiana, & Christianos odio habuit, quibus interdixit officia & studia scientiarum. Iulianus vixit annis XXXII. Imperauit anno vno, mensib. VIII. transfixus telo in deserto Parthiæ, ab vno milite ignoto.

*IOVINIANVS.*

**I**OVINIANVS de Pannonia oriundus, electus est Imperator ab exercitu Iuliani: qui corpore pulcher, lætus animo, exercitum quem Iulianus fecerat paganum, fecit Christianum, & reduxit saluum ex periculo magno. Mortuus octauo mense imperij ætatis eius XXXIII.



## VALENTINIANVS.

**V**ALENTINIANVS de Pannonia, qui recesserat à Iuliano, quia verus Christianus erat, factus est imperator à militibus nolens, vir pulcher, prudens, probus, similis Hadriano, & Aureliano: qui fratrem suum Valentem, & Gratianum filium fecit Augustos. Hic vir perfectus, post multa bella mortuus est, subita sanguinis effusione, anno imperii XI. ætatis vero LV. Quo mortuo Valens tenuit imperium in Oriente, Gratianus in occidente.

## VALENS.

**V**ALENS imperator in Oriente, tanquam Arrianus, persecutus est catholicos Christianos, vnde præcepit vt Monachi militarent. Sed infelicissime bellum gerens cum Gothis, perduto exercitu, ipse vulneratus sagitta, fugiens in vilem casam, viuus crematus est igne, cum imperasset quasi annis IV.

## GRATIANVS.

**G**RATIANVS post mortem patris imperauit annis VI. qui iuuenis gratus, catholicus & fidelis, contra Alemanos foeliciter pugnavit; sub quo Italia tota recessit à perfidia Arrianorum. Gratianus videns multas gentes infestas Romano imperio, elegit in Imperatorem orientis Theodosium nobilissimum Hispanum: qui vir XXXIII. annorum, Tartaros terribiles debellauit, & cæteris hostibus conciliatis, gloriosus fuit apud Constantinopolim.

## VALENTINIANVS II.

**V**ALENTINIANVS secundus, frater Gratiani imperauit in Occidente, Theodosio imperante in Oriente. Iste vir bonus, expulsus de Gallia à Maximo tyranno. Theodosius tyrannum potentem cum paruo apparatu foeliciter vicit apud Aquileiam, & captum decapitavit. Valentinianus ergo restitutus in regno p.7. Occidentis, cum in pace regnaret, strangulatus est apud Viennam, fraude Arbogasti comitis sui, cum imperasset annis VIII.

## THEODOSIVS MAGNVS.

**T**HEODOSIVS Magnus, cum iam imperasset XIII. annis cum Gratiano & Valentiniano fratribus, solus remansit in imperio annis tribus, in Oriente & Occidente. Iste fuit optimus imperator Christianorum, similis Traiano, à quo originem traxit, de quo mirabiles laudes fecit Ambrosius, cuius auxilio expulit Arrianos de Mediolano. Theodosius contra Eugenium, qui vsurpabat imperium in Galliis, confidens virtute CHRISTI, illius auxilio suppliciter inuocato, in Alpibus ruit in prælium, & subito orta vi ventorum cum crudeli tempestate contra hostes, Theodosius victor cum parua cæde suorum, Eugenium captum interfecit. De qua re memoriam facit Claudianus Florentinus poeta paganus, vt refert Augustinus de ciuitate DEI. Theodosius anno ætatis L. foeliciter mortuus est apud Mediolanum, relictis duobus Augustis filiis suis, Arcadio & Honorio.

## ARCADIVS.

**A**RCADIVS successit patri Theodosio in imperio Orientis, & Honorius in imperio Occidentis, ambo viri boni, non degenerantes à patre. Anno vero imperii Rhadagaisus rex Gothorum, cum infinita multitudine Barbarorum miserabiliter victus à Romanis, fame & frigore occisus est, Romæ captiuis more pecudum venditis. Arcadius vero anno imperii eius XIII. mortuus est, apud Constantinopolim, relicto filio suo Theodosio in imperio Orientis.

## HONORIVS.

Alaricus Gothus.

**H**ONORIVS qui iam XIII. annis imperauerat cum fratre suo, postea imperauit cum Theodosio minore annis XV. sub quorum imperio Alaricus Rex Gothorum cepit Romam cum furore, & spoliauit: parcens tamen fugientibus ad templa Sanctorum. Sub isto Honorio multa bella ciuilia, & externa terminata sunt in Occidente, cum immodico sanguine; ipse vero occisus est Romæ sine filiis.

## THEODOSIVS MINOR.

**T**HEODOSIVS MINOR filius Arcadii, mortuo Honorio regnavit in Oriente, annis XXVII. cum iam post mortem patris regnasset annis XIII. & cum patre viuente annis



annis octo. Hic Valentinianum consobrinum suum fecit Augustum, & generum suum, qui in occidentē regnavit XXV. Tempore huius Theodosii Carthago crudelius capta est à Genferico Rege Wandalorum, quam Roma ab Alarico, quia Genfericus non pepercit ecclesiis. Theodosius mortuus est apud Constantinopolim, & sepultus cum patre suo Arcadio.

*VALENTINIANVS III.*

**V**ALENTINIANVS tertius in Occidente tenuit imperium quinque annis, post mortem Theodosii, cum quo imperauerat annis XXV. & Martianus successit Theodosio, tempore isto, quo Attila ille potens & terribilis, cum multis Regibus & gentibus barbaris de Pannonia veniens, Italiam crudeliter afflixit, Venetamque prouinciam, & Lombardiam, Aquileia primo euersa. Tunc autem facta est ciuitas *Venetia.* Venetiarum à fugientibus sauitiam Attilæ. Valentinianus autem timore vel inuidia occidit Elium, ducem bellicosissimum Romani exercitus in Gallia, qui solus erat victor Attilæ, cuius morte ruit imperium & salus occidentis. Ipse quoque Valentinianus anno sequenti occisus est Romæ, ab vno milite Elii, cum iam annis viginti-quinque rexisset imperium.

*FL. VALERIVS MARTIANVS.*

**M**ARTIANVS qui iam quinque annis imperauerat cum Valentiniano, post mortem eius imperauit annis duobus; quo tempore Genfericus rex Wandalorum *Genfericus Vandal.* veniens ex Africa cum Mauris, cepit Romam, & eam rapaciter spoliauit, similiter Capuam, & Campaniam. Martianus vero anno septimo sui imperii, occisus est coniuratione suorum apud Constantinopolim.

*LEO.*

**L**EO in Constantinopoli inuasit imperium, qui Leonem filium suum regni Orientis fecit consortem. Quo tempore imperium Occidentis à multis laceratum est: nam quidam Maiorianus inuasit imperium apud Rauennam, & ita alii multi: Rauenna enim eo tempore Gothorum potentissima erat. Leo vero anno imperii sui XVII. mortuus est in oriente.

*ZENO.*

**Z**ENO imperator Leonis gener, successit illi in imperio. Quo tempore Odoacer *Theodoricus Gothus.* veniens cum forti exercitu, de vltimis finibus Pannoniæ, obtinuit regnum Romæ cum tota Italia. Quod cum tenuisset quatuordecim annis, Theodoricus Rex Gothorum veniens de Græcia cum auctoritate Zenonis, vir strenuissimus, victo Odoacro obtinuit Romam, cum tota Italia. Zeno vero in Græcia cum imperasset annis XVI. mortuus est, Similis Papyrio Cursori in velocitate pedum.

*FL. VALERIVS ANASTASIVS, DICOROS.*

**A**NASTASIVS post Zenonem adeptus est imperium, qui factus hæreticus pertinax, cum non posset reuocari ad fidem sanctam, iusto iudicio Dei fulmine percussus, periit, anno imperii sui XVII. Quo tempore Theodoricus gloriose regnavit in Italia circa annos XL.

*IUSTINVS MAIOR.*

**I**USTINVS MAIOR successit Anastasio, qui vir catholicus & pius, in partibus Orientis omni studio nomen Arrianorum quærebat extinguere. Sed Theodoricus minatus est ei, quod nisi restitueret Arrianos, ipse in Italia omnes populos gladio necaret. Iustinus vero ex compassione Arrianos dimisit in pace. Ipse vero Iustinus cum imperasset annis vndecim, in pace quieuit Constantinopoli.

*IUSTINIANVS.*

**I**USTINIANVS Iustini sororis filius successit illi in imperio, qui iustissimus princeps, Romanum imperium armis & legibus reparauit. Nam per Bellisarium virum bellicosissimum debellauit Persas, qui inuaserant fines Romanos, Africam liberavit de manibus Wandalorum, atque Italiam de manibus Gothorum, ubi Neapolim receptantem Gothos crudelissime exterminauit, nulli parcens. Postea Narses Eunuchus iterum Romam liberavit de manibus Totilæ regis Gothorum, quem

interfe-



interfecit. Iustinianus vero leges Romanas mirabili breuitate reformauit, qui mortuus est foeliciter, cum imperasset annis XXXVIII.

*IUSTINVS MINOR.*

**I**USTINVS MINOR, nepos Iustiniani, successit in imperio, qui fuit homo auarus, rapax, impius & hæreticus. Propter quod Narses, qui per inuidiam fuerat illi falso accusatus, odio & timore Augustæ, quæ minabatur reducere eum inter mulieres, fecit venire Longobardos de Pannonia in Italiam; qui coeperunt Mediolanum, Papiam, & quasi totam Lombardiam. Iustinus cum imperasset annis vndecim, alienatus mente mortuus est, relicto Tiberio Cæsare.

*TIBERIVS II.*

**T**IBERIVS secundus successit in imperio Iustino, qui fuit recte contrarius illi; vir largus in pauperes, Christianus perfectus, sapiens & iustus, qui thesauros Iustini male acquisitos, pauperibus erogauit, & de Persis magnam prædam habuit. Iste Tiberius moriens, reliquit hæredem imperii Mauricium, data sibi filia in uxorem, cum imperasset septem annis.

*MAVRICIVS.*

**M**AVRICIVS gener Tiberii, primus ex Græcis habuit imperium, vir utilis Reipublicæ, cuius tempore magnum diluuium fuit in Italia apud Urbem & Veronam. Mauricius vero anno septimo imperii sui occisus fuit, cum duobus filiis suis à Phoca.

*PHOCAS.*

**P**HOCAS occisor Mauricii & filiorum, obtinuit imperium. Qui prius constituit: *Quod Romana Ecclesia esset caput omnium Ecclesiarum*, cum prius Constantino-politana supremam se nominaret. Phocas vero, cum imperasset quinque annis, priuatus simul vita & imperio ab Heraclio, qui Africam regebat.

*HERACLIVS.*

*Mahometus.* **H**ERACLIVS successit Phocæ in imperio, cum filiis suis Constante & Constantino secundo ex illa familia. Quo tempore Mahometus pestilentissimus draco in Arabia fecit sectam suam, ab Oriente in Occidentem venenum suum disseminans, cum pessima desolatione fidei Christianæ. Iste Heraclius factus hydropicus, mortuus est anno imperii sui XXXI.

*CONSTANTINVS II.*

**C**ONSTANTINVS secundus cum fratre Constante iura suscepit imperii. Qui crudelis raptor, veniens in Italiam, Romam spoliauit omnibus ornamentis suis: deinde in Sicilia fecit inauditas crudelitates, & rapinas. Ibi tandem occisus est à suis in balneo, cum regnasset annis viginti octo. p. 9.

*CONSTANTINVS POGONATVS III.*

**C**ONSTANTINVS tertius superioris filius, successit illi in imperio: qui vir bonus & catholicus, multum confirmauit fidem Christianam contra hæreticos, & mortuus est in pace cum regnasset annis viginti septem.

*IUSTINIANVS II.*

**I**USTINIANVS secundus, filius Constantini tertij, de familia Heracliorum, successit in imperio, qui liberauit Africam de manibus Sarracenorum. Fuit tamen schismaticus, & infestus populo Romano. Imperauit quoque annis decem. Et hic nota, quod omnes Principes post mortem Heraclii vsque ad Carolum Magnum, fuerunt de stirpe eius.

*LEONTIVS.*

**L**EONTIVS expulit Iustinianum prædictum de regno, quem relegauit in Pontum, imperauit annis tribus, deinde regnum perdidit, ut statim dicetur.

*TIBERIVS III. APSIMARVS.*

**T**IBERIVS tertius insurgens contra Leontium arripuit regnum, eumque tenuit in custodia toto tempore sui imperii, qui regnauit annis septem.

*IUSTINIANVS II.*

**I**USTINIANVS secundus prædictus, qui relegatus fuerat à Leontio secundo, recuperat-



cuperauit Imperium ; & continuo iugulari fecit in publico Leontium , qui expulserat eum , & Tyberium qui inuaserat imperium Leontij. Iste quidem multa magnifice fecit , sed contra eum quidam Philippicus ( relegatus ab eo ) creatus Imperator ab exercitu , apud Constannopolim vicit , & occidit ipsum Iustinianum , cum imperasset annis sex cum filio suo Tyberio.

*PHILIPPICVS BARDANES.*

**P**HILIPPICVS dictus Bardanes , succedens Iustiniano à se occiso , priuatus est regno & oculis ab Anastasio , cum imperasset anno vno , & mensibus sex , qui fautor fuit hæreticorum.

*ARTEMIVS, QVI ET ANASTASIVS.*

**A**NASTASIVS secundus ( dictus Artemius ) priuato vita Philippico , tenuit imperium , sed exercitus eius elegit Theodosium imperatorem , licet inuitum , anno tertio imperii eius , cum esset fautor Catholicorum.

*THEODOSIVS ATRAMITENVS.*

**T**HEODOSIVS tertius factus Imperator à militibus , Anastasium graui prælio vicit ; quem captum fieri fecit sacerdotem , ipse vero Catholicorum amicus , anno imperauit vno.

*LEO ISAVRVS SEV CONO.*

**L**EO tertius successit Theodosio in imperio : qui Constantinum filium suum fecit regni consortem , quo tempore fuit Constantinopolis longa obsidione miserabiliter afflicta à Sarracenis. Hic Leo prauus fuit , qui imagines Mariæ & sanctorum in publico fecit igne cremari , & tamen imperauit annis XXV.

*CONSTANTINVS COPRONYMVS.*

**C**ONSTANTINVS quintus prædicti Leonis filius , peior patre , dictus est persecutor Ecclesiæ , qui multos religiosos & vere Catholicos occidit , vacans impie magicis artibus : attamen regnauit annis vigintiquinque. Quo tempore Pipinus pater Caroli Magni vicit in Italia Aistulphum Regem Longobardorum.

*Pipinus Francus.*

*LEO.*

**L**EO quartus filius Constantini quinti , imperauit in Oriente post eum annis quinque , dignus patre suo succedere in vitiis.

*CONSTANTINVS ET HIERENE MATER.*

**C**ONSTANTINVS sextus Leonis filius imperauit cum matre Hirene , qui postea matre priuata , regnauit solus annis quinque. Mater vero cæcauit filium , & sola regnauit quinque annis : & tunc imperium Romanum , quod fuerat in p.10. Oriente à primo Constantino vsque ad istum vltimum , terminatum est. Nam facta est diuisio Imperii , vt imperium Occidentale solum diceretur Romanorum , & Orientale diceretur Græcorum ; & tunc imperium Romanorum transiit ad Francos.

*Imperij diuisio.*

*CAROLVS MAGNVS.*

**C**AROLVS Magnus Pipini filius , victo Desiderio rege Longobardorum in Italia apud Papiam , veniens Romam , electus est Imperator à S.P.Q.R. & confirmatus à summo Pontifice , quia adiutor erat Ecclesiæ. Hic fuit optimus princeps Christianorum , qui terram sanctam occupatam à Sarracenis , & imperium in Oriente & Occidente recuperauit , vbi tunc foemina praua Hyrena regnabat in Oriente , totam Hispaniam liberauit , maximus Romanæ Ecclesiæ pugil , & protector fidei Christianæ. Carolus vixit annis LXXI. & mortuus est foeliciter , cum regnasset annis XLVII. & imperasset annis XIV.

*LVDOVICVS PIVS.*

**L**VDOVICVS PIVS Caroli Magni filius , successit patri in imperio , superatis duobus fratribus suis. Hic fuit vir inuictus , sed plus clemens , sobrius & temperatus , vltra omnes patiens , nullis vincibilis malis : qui & viuentis patre , cum regnaret , & post mortem cum imperaret , magnifica multa gessit. Denotissimus Christianus , non dissimilis patri. Vixit annis sexaginta quatuor , imperauit annis XXV.

*LOTHA-*



## LOTHARIUS.

**L**OTHARIUS Ludouici Pij filius imperium arripuit, non faciens partem regni fratribus suis, secundum ordinatam diuisionem patris: unde contractis virib. inaudita strage Francorum, pace fracta, Lotharius imperauit in Italia. Hic anno quinto decimo imperii sui diuiso filiis regno factus est Monachus, & mortuus est foeliciter, qui fuerat violentus in vita.

## LUDOVICVS II.

**L**VDOVICVS secundus Lotharij monachi filius, imperauit annis XXI. qui siue triste, siue infelix bellum habuit cum Carolo fratre suo, crudeliter regnante super Francos, turpiter victus est, & nihil magnificum gerens, mortuus est in Italia, & in Mediolano videtur sepultus. Dicitur quoque quod Italiam sapienter & pacifice rexit.

## CAROLVS II. CALVVS.

**C**AROLVS secundus dictus Caluus, filius Ludouici Pij, & patruus Ludouici secundi, & frater Lotharii, successit Ludouico secundo in imperio; vir lepore timidior, fugere quam fugare paratior: dictus est Grossus vel Simplex, qui multa monasteria fabricari fecit, ac etiam dotauit. Veneno vero extinctus, cum imperasset anno vno & mensibus nouem.

## CAROLVS CRASSVS III.

**C**AROLVS minor nomine tertius, Ludouici Germanorum regis filius, & nepos eiusdem Caroli Calui, Imperium in Italia tenuit, Galliam & Germaniam possedit pacifice. Robertum ducem Normandiæ victum, de sacro fonte leuauit, & filiam suam dedit illi in vxorem. Hic anno imperii duodecimo deficiens animo & corpore, repudatus est à magnatibus regni, Arnulpho facto imperatore: anno vero sequenti, idem Carolus mortuus est.

## ARNULPHVS.

**A**RNVLPHVS ex Carolorum progenie, hic Normandos mirabili cæde deleuit, Romam cepit; tandem longa ægritudine dissolutus, à pediculis rosus est: sic foelix prælio, infelix morbo periit, anno imperii sui XI.

## LUDOVICVS III.

**L**VDOVICVS tertius Arnulphi filius, successit patri in imperio, quod tenuit annis X. non foeliciore patre: nam sub eo defecit Imperium de progenie Carolorum, cum non iuuaret Ecclesiam more maiorum suorum, contra Longobardos infestantes Ecclesiam. Et tunc diuisum est Imperium, quia aliqui imperauerant in Italia, sicut quatuor Berengarii; aliqui in Alemannia, sicut Conradus & Heinricus vsque ad Ottonem I. qui vtrobique imperauit. Ludouicus persecutus est Berengarium in Italia, captus apud Veronam, cæcatus dicitur, cum imperasset annis X.

## BERENGARIUS.

**B**ERENGARIUS I. imperante Ludouico tertio, imperauit in Italia, tantum quatuor annis. Hic fuit vir prudens, & strenuus in armis, qui & bellum cum Romanis gessit.

## CONRADVS.

**C**ONRADVS Alemanus successit Ludouico tertio in imperio, sed nec ipse peruenit ad benedictionem in Italia, ideo non ponitur inter Principes: vir tamen sapiens, fortis & victor fuit. Hic imperauit annis septem, & moriens coram Principibus regni designauit Regem Heinricum, filium Otthonis ducem Saxonum.

## BERENGARIUS II.

**B**ERENGARIUS secundus, imperauit annis nouem in Italia, cui pauca memoranda ascribuntur.

## HEINRICVS.

**H**EINRICVS post Conradum imperauit in Alemannia, annis XVIII. vir bonus & simplex, qui genuit Otthonem primum. Et iste Heinricus non computatur



tatur inter Imperatores , quia non regnavit in Italia , nec operam dedit vt Italiam de manibus Tyrannorum liberaret.

## BERENGARIUS III.

BERENGARIUS III. tempore præfati Heinrici imperavit Italicis , annis VII. sub quo magnum schisma fuit in Italia : nam Vgo rex Burgundiorum , inuitatus ab Italicis , pugnavit cum Berengario , & victor regnum Italiæ tenuit tribus annis , & relicto Lothario filio redijt in Galliam.

## LOTHARIUS UGONIS.

LOTHARIUS Ugonis Burgundionis filius , imperavit in Italia annis duobus , de quo pauca scribuntur.

## BERENGARIUS IV.

BERENGARIUS IV. post Lotharium regnavit annis XII. cum Alberto filio suo apud Mediolanum. Iste vir ferox , nimium tyrannice premebat Italiam , sed finaliter victus ab Otthone primo ; mortuus est misere in exilio in Alemannia , & Albertus miserrime in Corsica. Et nota quod omnes à Berengario primo usque ad istum ultimum , non videntur posse dici vere nec proprie Imperatores.

## OTTO I.

OTTO I. Heinrici filius , ex Germanorum gente , primus ex Teutonicis solus obtinuit imperium Occidentis ; & post eum soli Teutonici imperaverunt usque ad præsens tempus. Hic vir probus & potens , foeliciter reformavit Italiam , spiritaliter & temporaliter , liberando Ecclesiam à manibus Ioannis Papæ XII. qui turpiter tractabat eam , & Italiam traxit de manibus Berengarij IV. qui impie premebat eam. Otto vero imperavit annis XXXV. secundum Sigisbertum , & secundum alios annis XII. & mortuus est senex valde , relicto eiusdem nominis filio.

## OTTO II.

OTTO secundus filius primi , successit patri in imperio & virtute ; qui vir acer in armis , sagax ingenio , imperium foeliciter confirmavit. Nam Romanos proceres sæpe rebelles vocatos ad conuiuium cinxit armatis , & nocuos securi percussit , reliquos epulari conuiuiuo iussit , imperavit quoque annis IX.

## OTTO III.

OTTO tertius filius secundi , successit patri in imperio. De quo dictum est :  
*Otto, post Otto, regnavit tertius Otto.*

Hic fuit vir iustus & constans , qui Crescentium potentem Romanum in castello sancti Angeli obsessum , diu tandem post multa tormenta fecit decollari , & Antipapam introductum per eum ludibriosè tractavit. Ipse etiam uxorem suam viam fecit igne cremari , quia falso accusauerat militem innocentem , imperavitque annis XIX. & mortuus est sine liberis. Et Imperatores ex post per electionem , & non per successionem creati sunt.

## HEINRICUS. I.

HEINRICVS primus accepit imperium post Ottonem tertium , Bauariæ dux , filius Heinrici ducis , qui fuit natus ex Heinricho fratre primi Ottonis. Hic vir honestissimus , multa bella in Germania prospere gessit , & in Italia contra Ardonium , qui electus erat rex à Longobardis. Stephanum Regem Hungariæ fecit Christianum cum gente sua , opera sororis suæ , quam dedit illi in uxorem , imperavitque p. 12. annis XXII. licet aliqui dicant XII. Aliqui etiam vocant istum Heinrichum secundum , quia habent respectum ad Heinrichum superiorem : sed quo ad Teutonicos , denominatur primus. Hic siquidem finem suum sanctè & foeliciter fecit.

## CONRADUS I.

CONRADVS I. nobilis ex gente Francorum vir , nepos superioris Heinrici , peruenit ad imperium auctoritate ipsius Heinrici , & Electorum opera. Qui vir strenuus , veniens in Italiam , coronatus est apud Mediolanum , & Romam , & siluit terra in conspectu eius. Sed tandem indignatus contra Archiepiscopum , dum impugnaret



pugnaret Mediolanum, mortuus est anno XV. imperii sui. Alij tamen dicunt quod imperavit annis XX.

#### HEINRICUS II.

**H**Einricus II. gener Conradi prædicti, & filius adoptivus fuit, hæres patrimonij & imperii, potius fato quam à proposito. Hic fuit vir aptus imperio, iucundus, lætus, bellator, qui Wandalos subegit, conterminos Suevis Hungaros vicit. Pandulphum principem Capuanum cepit; multa dabat pauperibus; expulsis ioculatoribus à curia sua. Qui charus omnibus cum floreret imperio, migravit à seculo anno XVII. imperij, relicto filio paruulo sui nominis.

#### HEINRICUS III.

**H**Einricus III. secundi filius successit patri in imperio, vir impius, qui imperavit annis quinquaginta, invidens gloriæ proborum virorum, Ecclesiæ hostis: & propter multa mala gesta eius, fuit electus Rodolphus dux Saxonum contra eum, quem tamen Henricus atrocissimo bello vicit, sed infelicem finem habuit. Nam filius eius assumpta corona imperii, insurgens contra eum inuasit ipsum bello; & pater Leodij latens, & pauper mortuus est, & excommunicatus.

#### HEINRICUS IV.

**H**Einricus IV. tertii filius, arripuit patri imperium, sub colore succurrendi Ecclesiæ & imperio, contra iura naturæ & hominum: & tamen ipse fuit hostis Ecclesiæ, licet reconciliatus. Quo tempore claruit inelyta Comitissa Mairildis in Lombardia, & Robertus Guiscardus in Sicilia. Hic Henricus mortuus est sine liberis, cum regnasset annis XV.

#### LOTHARIUS III.

**L**otharius III. (qui & Lutarius dictus est) cum magno consensu, & consilio electus est Imperator, hic dux Saxonum sapiens, & industrius. Fuit amicus & deuotus Ecclesiæ, pollens diuitiis & victoriis magnis, imperavit foeliciter annis XL.

#### CONRADUS II.

**C**onradus secundus, nepos Henrici quarti ex sorore, qui imperium affectauerat ante Lotharium, successit illi in imperio. Hic vir optimus passagium fecit, collecta magna multitudine cruce signatorum; & post aliqua prospere gesta virtute magna, tandem inconsulte pressus inopia victualium, multa millia suorum amisit, & reuersus in regnum, obiit cum imperasset annis XV.

#### FREDERICUS I.

**F**redericus I. nepos Conradi secundi, defuncto patre suo, Romanum suscepit imperium, de nobilissima domo Sueuiæ, vocatus est Barbarossa. Hic vir strenuissimus Mediolanum ciuitatem florentissimam, cum auxilio Papiensium, & multorum Lombardorum euertit. Sæpe fuit infestus Ecclesiæ, & Alexandrum Papam persecutus est: apud Venetias victus, pacem fecit. Tandem cum iuisset in subsidium Terræ sanctæ, suffocatus est in quodam flumine. Imperavit magnifice annis XXXII.

#### HEINRICUS V.

**H**enricus V. filius Barbarossæ imperauit post patrem, qui fuit maritus Constantiæ monachæ, filiæ Guilhelmi optimi regis Siciliæ, sub cuius titulo insulam cepit. Fuit strenuus & asper more patris, & aliquanto infestus Ecclesiæ. Mortuus est in Sicilia, & sepultus apud Panormum; relicto Frederico filio infantulo, & Philippo fratre suo, ad gubernationem regni, cum imperasset annis VII. & mensib. V.

#### OTTO IV.

**O**tto quartus dux Saxonie, defuncto Henrico electus & coronatus est Imperator, cum magno fauore Lombardorum. Sed continuo contra iuramentum iura Ecclesiæ occupauit: contra quem electus est Fridericus secundus iuuenis, p. 13. cum auxilio Philippi tertij Regis Francorum, à quo tandem debellatus, mortuus est Otto misere, cum imperasset annis duobus: ideo non ponitur inter Principes.

FREDE-



## FREDERICUS II.

**F**REDERICVS secundus, natus ex Henrico quinto, & Constantia monacha vetula, fuit potentissimus imperator Italiae, Siciliae, Sardiniae, Hierusalem & Sueviae, quo nullus magnificentior tenuit Romanum imperium, à Carolo magna citra. Fuit armorum strenuus, linguarum peritus, rigorosus, luxuriosus, Epicureus, nihil curans, vel credens nisi temporale. Fuit malleus Romanae Ecclesiae, cum multis pontificibus bellum habuit, praecipue cum Gregorio nono; tandem virtute Innocentii quarti Januensis excommunicatus, victus & fugatus est de Lombardia, nec sibi proficere potuit potentia. Vixit annis LVII. imperavit annis XXX. Male mortuus est in regno Apuliae in oppido Ferentino, praesente solo Manfredi ex filiis suis. Post cuius mortem vacavit imperium circa annos XXIV.

## CONRADUS.

**C**ONRADVS filius Frederici secundi, electus adhuc vivente patre, post mortem eius regnavit annis quasi duobus. Sed Manfredus frater eius naturalis venenato Conrado, tenuit regnum Siciliae magnifice annis XIII. & Carolus senior victor Manfredi & Conradi nepotis eius regnavit annis XVI. Hic Conradus caruit imperiali benedictione, ideo non dicitur Imperator.

## RODULPHUS.

**R**ODVLPHVS comes de Auensperg, genere Germanus, post longam vacationem imperij electus est Rex Romanorum, & confirmatus est à Gregorio X. in fauorem Terrae sanctae. Hic fuit vir prudens in agendis, in armis strenuus, iustus, Deum timens, ciuilis & parcus; & tamen licet regnauerat XX. annis, nunquam visitauit Italiam vt minabatur; implicitus multis agendis in regno Alamanniae. Nam regem Bohemiae Ottacarum diuitem & potentem, dedignantem obedire sibi durissimo praelio vicit; quo occiso, dedit filio pacem, & filiam suam in uxorem.

## ADULPHUS.

**A**DVLPHVS comes de Nassau, genere Germanus, in Romanorum Regem electus est: sed non benedictionem, nec coronationem recepit in Italia. Hic fuit vir magnanimus, contra quem Albertus Rodulphi praedicti filius insurgens, ipsum bello vicit. Nam Adulphus magis viribus, quam consilio vtens occisus est, cum regnasset annis IV.

## ALBERTUS.

**A**LBERTVS dux Austriae, Rodulphi filius, victo & occiso Adulpho, electus est in Romanorum Regem ab Electoribus, & à Bonifacio Papa famoso petiit venire ad benedictionem & Coronationem. Cui Bonifacius magnanimus tyrannus sacerdotum respondit: *Ipsum indignum imperio, quia occiderat proditorem dominum suum Adulphum in praelio*, & tenens coronam in capite, & spatam ad latus dixit: *Ego sum Caesar*. Tamen postea orta grauissima discordia inter Philippum Regem Franciae & se, confirmavit Albertum, & vocauerat eum. Hic Albertus cum regnasset annis X. interfectus est ab vno nepote filio fratris.

## HEINRICUS VI.

**H**EINRICVS hoc nomine sextus, genere Germanus, parui Comes de Luzenburgo; factus est Imperator; & veniens in Italiam, coronatus est Romae cum difficultate, obsistente sibi sapientissimo rege Roberto. Hic vir prudens, iustus, honestus, catholicus, dilectus omnibus, sedatis sollicitè discordiis Alamanniae, alto animo disponebat reformare potentem Italiam, vt sic facilius redimeret Terram sanctam, si fata permisissent; & sperabatur dominus omnium in breui, cum magno fauore Lombardorum & Tuscorum. Sed Bononia & Florentia, cum quibusdam aliis obuiauerunt sibi; vnde opera Florentinorum (vt in fama fuit) venenatus apud Bonconuentum castellum Senarum, \* optimus Imperator, cum imperasset annis IV. mensibus VIII. & diebus XVIII. nunquam elatus prosperitate, nunquam deiectus aduersitate, anno Domini M. CCC. XIII. mortuus est.

\* Hunc locum  
citatur Conrad.  
Vener. in vita  
huius Imp. sub  
fin.



## CAROLUS IV.

CAROLVS quartus de Luzemburgo, nepos suprascripti magni Heinrichi, ex Joanne Bohemiæ Rege factus Imperator, coronatus est Romæ sine resistantia. Hic fuit vir peritus literarum & multarum linguarum, astutus & sagax, qui regnum Bohemiæ optime reformauit. Sed in Italia victrices Harpyias præ se ferens loco aquilarum, & Baccho immolans, nihil memorale gessit. Nam cum maximo potentatu veniens, opera & fauore Urbani quinti, terribilis omnibus primo apparuit; p. 14. sed cito cum magna pecunia, sed maiore infamia reuersus est ad patriam. Humilis Imperator mortuus est senex, cum imperasset annis viginti.

## WENZESLAUS CAROLI FILIUS.

WENZESLAUS suprascripti Caroli filius, viuente adhuc patre electus est Imperator, hodie regnat. Hic iuuenis, robustus venator, quid facturum sit ignoro, cum minatur se venturum ad Italiam. Sed non venias (precamur te) si non vincis laude genitorem tuum: quanquam aliud in te speramus, cum præsentia primi Cæsaris vix sufficeret ad compescenda mala, quibus misera vndique laceratur Italia temporibus tuis. Sed imperium orbis coelum versat, & illud quondam potens veneratum gentibus & Regibus Romanum Imperium, præfiguratum in tibiis ferreis, cui nihil olim defuit, nisi modicum Orientis: nunc (proh dolor) nihil possidet nisi modicum Occidentis.

ADDITIO. *Sequentes Imperatores ad suam usque ætatem continuando adiecerat Æneas Syluius Cardinalis Senensis, ut ex eius epistola ad Antonium Cardinalem Ilerdensensem scripta anno 1458: & Europæ præfixa apparet. Sed quia ea non extant, supplementi loco Egnatii Epitomen (qui etiam non paulo æquior isto Rambaldo noscitur) subiicere visum est.*

## ROBERTUS BAVARUS.

QVVM Wenceslao suffectus esset Robertus Bauariæ Dux, nihil ille antiquius habuit, quam ut Florentino populo gratificaturus ad comprimendam Galeacii Vicecomitis potentiam in Italiam transcenderet. Cæterum ad Benacum Galeacii copiis congressus, facile repellitur: vnde mox ad Venetos deflectens magno ab his honore excipitur: inde soluens, in cassum Florentinis adnitentibus ne Italia excederet, in Germaniam retro abiit, paci religionique vacaturus, vita functus anno Imperii X.

## SIGISMUNDUS.

OPTIMUM haud dubio Principem ac nobilissimum Germania nobis imputet; & qui si ad pacis artes, quibus excelluit, parem belli felicitatem addidisset, Carolis & Othonibus æquari potuit: Nam puer adhuc per Mariam uxorem ad Pannonici regni spem euocatus, mox adolescens Wenceslao fratre (quod parum utilis haberetur) à se capto, Bohemiæ regnum hæreditarium assequitur: sed & Alberto vita functo omnium votis Imperator designatur. Hic igitur Pannonia potitus à Ludouici morte, cui Maria superstes filia fuit, duas ac XXX. Regulas securi percuti iubet, quod regiæ puellæ aduersati essent. Vnde illi tanta mox gentis inuidia conflata, ut post vxoris mortem captus, necandusque magis quam asseruandus, foeminae, cuius maritum ille interfecerat, sit traditus. Ille vero maiestate oris & blanda oratione dimissus, hinc Boëmiam petit, quam non sine labore vix tandem obtinuit, longo ab his bello ac difficili petitus, sæpe etiam acie ab his victus. Nec Italica expeditio vna alteraue in nos Taurisino agro peruaftato felicior: nam Pippus eius dux & ipse mox tota Venetia ac Foroiulio Venetis armis expellitur. Hinc quia grauius periculum à Turcis imminebat, qui iam magnæ Europæ parti sese insinuarant, Gallicis etiam Philippi Burgundi copiis accinctus, ab Amurate Turcarum Principe graui prælio victus, castris exiit. Cæsis magna ex parte ducebus, & Philippo capto, ipse Byzantium fugiens, mox Venetæ classis occurfu, cui

Thomas

*Æn. Syl. Europ. cap. 1.*

*Laon. Chalco- cand. lib. 2.*



Thomas Morenicus præerat, incolumis de fuga vix euasit. Quæ clades ignominiosiorne an funestior fuerit, haud satis explicem. Discordiâ certe nostrâ victor hostis, Adrianopolin se recepit: & hæc foris. Quantum autem pace præstiterit, præter generis nobilitatem (quæ haud dubie clarissima fuit, tot summorum Principum serie) & præter insignem corporis proceritatem ac imperatoriam plane indolem, affuit illi liberalitas ac munificentia, quanta in nullo antea principum, religionis ac pietatis augendæ studium incredibile, multarum etiam linguarum scientia, & in his linguæ Latinæ studium excelluit: quare doctos homines imprimis fouit, & dignitatibus etiam amplis honestauit. Accusauit sæpe Germanos Principes, qui Latinas odissent literas. A quibus reprehensus quandoque, quod doctos homines foueret, sed humiles genere: *Ego, inquit, eos amo quos natura alios antestare facile voluit.* Illud autem nulla vnquam ætas obliuiscatur, quod triennium magnam Europæ partem ipse peragrarit, dum Principes Christianos ac Pontifices adit, quo schisma Christiano nomini calamitosissimum tolleretur. Nec alterius Principis opera magis enituit in vera pietate vindicanda, quare ita effecit, vt reiectis adulterinis tribus, qui Barionæ sedem inuaserant, Oddo Columnius magno omnium consensu pontifex declararetur. Parem operam Eugenio in Basilienfi synodo tollenda præstitit; à quo tamen prius contemptim pene habitus, ac vix post sextum mensem, quam Senis fuerat, imperii corona donatus est. Hic p. 15. vero Princeps egregius quum sine virili prole decessisset, Albertum Austriæ ducem, filiae maritum & vtriusque regni hæredem reliquit, anno imperii XXVII.

## ALBERTUS.

NEMO vnquam maiore spe ad imperium venit. Et sane conceptam animis hominum opinionem haud frustratus esset, siquidem toto biennio quo præfuit, Morauos ac Sarmatas (qui hodie Poloni sunt) intra suos fines quiescere compulit. Ptafconem Boëmum factionis hæreticæ caput, ita attriuit, vt tota Boëmia sibi cederet. In Turcas autem profectus, Synderouiam castellum ad Danubii ripam munitissimum obsidentes, dum copias in itinere maiores expectat, oppidani deditionem fecere; ipse Austriam repetens apud locum cui longa villa est nomen, dysenteriae morbo confectus est, Ladislao filio superstite.

## FRIDERICUS III.

PACIS atque otii studiosissimus Fridericus extitit: quam tenore perpetuo annos quatuor ac quinquaginta (tot enim rerum potitus est) coluit, seu fatum id fuerit, quietiore Germania quam multis retroactis ætatibus; seu prudentia verius id Principis effecit, Ille vero nihil ab initio antiquius habuit, quam tuendæ pacis studio tumultus, qui oriebantur, sedare: quare & seditionem mouentes Austriales facile compescuit, & bellum à Matthia Pannorum Rege illatum composuit. Quin etiam in Flandros mouens, qui Maximilianum Cæsarem asseruarant, recepto filio, paucorum poenâ contentus, omnem discordiarum fomitem sustulit. Ducta igitur Heleonora Lusitanici sanguinis, quam in Italiam transcendisset ad Nicolaum Pontificem profecturus, ab eo nullo non honoris genere excipitur, illi & vxori coronâ Imperii imposita. Hinc Neapolin diuertit in Alphonsi gratiam, cuius Heleonora pernecessaria erat. Nec minore apparatu à Venetis (eius enim vrbis inuisendæ incredibili desiderio flagrabat) obuiam illi itum, quos exinde summa semper amoris ac beneuolentiæ significatione dilexit. Eius etiam opera Amadeus Allobrox, qui se pro Pontifice gerebat, Basilienfi Concilio innixus, in ordinem se redegit. Iterum Paulo pontifice, priuati pene more voti reus Romam petiit: quo damnatus retro ad suos abiens, quiescente Germania, tandem imperii anno quarto ac quinquagesimo naturæ concessit, Maximiliano filio Cæsare prius declarato.



SUPERERAT mihi Maximilianus Imperator, quem pater octavo antequam moreretur anno, Cæsarem designandum curarat: magnus bello princeps, & pace præclarus, cuius eximia bonitas, liberalitas summa, & Christianæ pietatis cultus præcipue commendantur. Accedunt ad hæc animi dotes, oris probitas, statura quadrata (in qua tamen imperatoria maiestas eluceat) corpus validum ac robustum, idemque laboris atque operis patientissimum, par victus frugalitas, & ex eo valetudo prosperrima. De hoc autem cum adhuc viuat, Tranquillum, Plutarchumque ac veteres alios scriptores æmulatus, nihil est quod addam. Deus faxit ut quod illum agitare semper animo Vincentius Quirinus afferebat (qui legatum Venetum egit apud illum) summa cum laude ex sententia conficiat. Neque enim iustius ullum est bellum, quam quod pro religione sumitur: & ea denique vera æternaque gloria Principum nostrorum existimari debet, quam res præclare in hostes fidei gestæ commendant.






**AENEAE SYLVII.  
IACOBI MOTZII**

ALIORUMQUE

ORATIONES AD HISTORIAM

**FRIDERICI III.  
FACIENTES.**





LECTORI SALVEM!  
BURCARD GOTTHELF STRUVE.



**D**iversas hic exhibemus Orationes, Friderici III. Historiam plurimum illustrantes, quas ex MStis Palatinis potissimum hausit Freherus. Has cum sine ordine, nec auctoribus si Motzium excipias, adlegatis inferuerit Freherus, nunc melius ordinamus, atque auctoribus suis vindicamus. Prima quam exhibemus Oratio ÆNEÆ SYLVII est, ad Alphonsum Sapientem, Siciliae, seu potius, Neapolitanum Regem directa, ad quem anno 1458. a Friderico Imp. missus fuerat, pro desponsanda Friderico Eleonora, cuius Avunculus erat, dictus Alphonsus. De hac testis est optimus Io. Gobellinus \* rerum Pii II. vel Æneæ Syluii interpres, dum in Commentariis suis scribit. *Æneas inter hæc ad ecclesiam Tergestinam cum se recepisset, in anno iubilæi reuocatus ad Casarem cum Gregorio de Populosa & Michaele de Plenauilla Alphonsum regem Aragonum & Siciliae iussus est petere matrimonium Caesaris nomine cum Leonora regis Portugallie sorore, ut ibi contraheret: nam legati Portugallenses eo conuenerunt. Quam rem diebus quadraginta tractatam, cum denique conclusissent, coram rege, Cardinale Morinensi apostolico legato, Clinensi, Calabriae, Sueviae, Silesiaeque ducibus, & magna prælatorum, comitumque multitudine, in curia noui castri Neapolitani, de nobilitate, virtuteque, contrahentium Orationem habuit, quæ postmodum a multis conscripta est.* \*\* Hæc igitur illa ipsa est oratio, quam nunc exhibemus, quæ potissimum in laudibus Friderici atque Eleonoræ efferendis consistit.

Altera Oratio est JACOBI MOTZII ad Alphonsum V. Lusitaniæ Regem habita, pro Eleonora, Eduardi Regis filia, Alphonsi sorore, Friderico III. Imp. desponsanda. Postquam enim desponsationis negotium in aula Neapolitana iamdum fuisset decretum, mittebantur, Jacobus Motzius & Nicolaus Longimannus a Falckenstein utrique sacerdotes, ut per verba de præsentis negotium consummarent, prout ipse non solum in hac oratione sua testatur Motzius, sed & Æneas Syluius, Princeps legationis Neapolitanæ in Historia Friderici III. \*\*\* dicens: *quod autem in diem dictam Leonora mare non intrauit, in causa fuerunt Jacobus Motius & Nicolaus*

\* *Comment. Pii II. lib. I. Cap. XVI.*

\*\* De eadem legatione agit etiam ipse Æneas Syluius in Historia Friderici III. p. 39. scribens: *Fridericus quoque Eneam Episcopum Tergistinum, qui illo in itinere ad Senensem Ecclesiam patriamque sedem translatus est, ac Georgium Volkestorfum, de quo supra retulimus, & Michaelem Eulendorfum Secretarium, eo direxit; ut & matrimonium suo nomine cum regia Virgine contraherent, & iter sibi ad coronam suscipiendam in Italia prepararent. Atque in Oratione sua ad Nicolaum V. Papam, eadem narrat. Idem dicit Fugger Lib. V. Cap. VII. n. 1.*

\*\*\* *Pag. 65.*



colaus, Sacerdotes: qui ad dandum sibi annulum missi; cum inter eundem latrones incidissent, in præfixo tempore Portugalliam, attingere nequiverunt. Eundem nominat Gerhardus a Roo. dum ait: \* inter hæc sponsa ipsius Eleonora, post longam maris iactationem ex Hispania aduecta, ad Liburnum Hetruriæ portum appulerat; unde Nicolaum Longimannum a Falckensteiu sacerdotem, qui cum Iacobo Motzio legatus ad ipsam venerat, Cæsari obuiam mittit. Id quod etiam Fuggerus \*\* confirmat & quam infra ex MSto exhibemus, Historia desponsationis Friderici cum Eleonora, Cæsareæ quoque legationis mentionem facit, Ioannes Mariana, \*\*\* legatorum vero nomina retinet. Quod autem sacerdotes missi fuerant, rationem etiam reddit Motzium, eo quod ex mente Papalium, inter sacramenta referendum sit matrimonium, quorum sacerdotes saltem putat esse participes. In hac autem Oratione & Regem Alphonsum, ipsamque adloquitur Eleonoram. Inter singularia Orationis est referendum, quod virginem regiam adpellat *Super-Illustrem*, regi titulum Maiestatis tribuit. Immo ipsa hæc desponsatio per procuratorem, nouo mihi videtur facta fuisse exemplo.

Tertia Oratio iterum est ÆNEÆ SYLVII pro Coronatione Friderici III. Romana & celebratione Concilii Generalis in Germania ad Nicolaum I. directæ. Hanc Gobellinus \*\*\*\* explicat, de Ænea dicens: hinc ad summum pontificem reuersus circa finem iubilæi, (1450.) in consistorio publico contractum coniugium manifestauit: sequenti anno Cæsarem ad coronationem venturum dixit: Concilium quod Galli petebant in Francia, dissuasit. Singulas has partes complectitur hæc oratio, quam etiam Theatro Comitiorum sub Friderico III. inseruit Müllerus \*\*\*\*\*.

Quarta Oratio iterum est ÆNEÆ SYLVII, quam etiam, nomine non adiecto, inseruerat Freherus. De hac ipse Æneas auctor est, dum in Historia Friderici III. \*\*\*\*\* ait: Æneas deinde commisit, in publico consistorio ut statum Christianorum, qui per Syriam, Ægyptum, Asiam, Græciamque sub Soldani magnique Turci imperio opprimuntur, exponeret; utque Hungari proximis annis horrendas clades perpeffi essent. Timendum esse Constantinopoli, cæterisque Ciuitatibus Græciæ Christianam fidem habentibus, succurrendum oppressis, diceret, Passagium suaderet, operas atque vires Imperii in ipsum negotium offerret. Quibus de rebus adeo efficaciter Æneas verba facit, ut pluribus circumstantibus lacrimas extorserit. Cuius orationis, quoniam futuri præscia fuisse videtur, inserere hæc loco tenorem, non alienum putauit. Sequitur inde ipsa oratio. De eadem dicit Io. Gobellinus: \*\*\*\*\* Redeunte Cæsare, conspectuique Maximi Præsulis, ac sacri senatus, se restituyente, vice sua Æneas duas orationes in auditorio publico recitauit; in altera gratias egit summo sacerdoti atque Cardinalibus pro maximis, quæ Cæsari præstiterant beneficiis, in altera, ut generale passagium aduersus Christiani nominis inimicos indiceretur, atque instrueretur; Papam hortatus est, ne Christicolæ per Græciam, & Orientem amplius vexarentur. Quale etiam Nicolaus responsum dederit, ipse exhibet Æneas scribens: \*\*\*\*\* Nicolaus ubi responsum dedit, primum quæ facta essent in honorem Cæsaris, & digna & bene merenti præstita, minora

Tom. II.

D

tamen

\* Hist. Austr. libr. V. p. 115.

\*\* Libr. V. cap. VII. p. 574.

\*\*\* Hist. Hispan. lib. XXII. cap. X. Friderico Cæsari per legatos expetenti Eleonora Lusitani Regis soror promissa coniux, data sponsalia Olisipone quinto Idus Augusti, die Luna, mox puella nauibus missa longa & difficili navigatione Pisas Senasque in Hetruriam peruenit.

\*\*\*\* Lib. pag. 17.

\*\*\*\*\* Lib. II. cap. I.

\*\*\*\*\* Pag. 86.

\*\*\*\*\* Lib. I. pag. 21.

\*\*\*\*\* Hist. Friderici III. pag. 90.



tamen fuisse, quam merita, dixit. Ecclesiam nunquam Imperio sacro tam gratam esse posse, quam debeat, passagium, de quo locutus esset Æneas, laudandum opus, dignumque Cæsare multum præ se ferre pietatem eius rei Apostolicæ sedi maximam curam esse: se verbis Æneæ veluti quibusdam stimulis vehementer commotum in ea re minime torpere. Consulendos tamen esse cæteros Christianæ Religionis Principes, eorumque auxilia in tantum opus quærenda: quos si benevolentes inuenerit, relaturum se Cæsari, atque tum sanctum negotium summo conatu aggressurum. Reperitur eadem hæc Oratio inter Æneæ Syluii epistolas \* eodem tenore, ac Freherus eandem expressit. Reperitur quoque ista inter Nicolai Reusneri Orationes Turcicas. \*\* Ast, dum ipse Æneas in historia Friderici III. \*\*\* eandem paullo immutatam exhibuerit, ipsum hic loci secuti sumus.

Quinta Oratio THADEI QUINNI est, Patricii Veneti, habita ad Fridericum III. Imp. antequam Venetorum urbem ingrederetur. Post coronationem enim Romæ an. 1452. peractam, Fridericus, dum in Germaniam redire pararet, Venetias venit, dum, præmissis XX. Senatoribus, in Venetorum finibus hac ipsa oratione fuit exceptus, quod ex ipsius verbis patet: *huius igitur communis gaudii & publicæ letitiæ nuntii ex Senatorum numero XX. ad Imperatoriam Maiestatem tuam præmissi sumus, tibi que & fortunæ ac Serenitati tuæ non solum pro confirmato & aucto Imperio publice congratulamur, sed omni laude prosequendum putamus.* Ast dum propius ad urbem accederet Fridericus, ab ipso Duce cum flore nobilitatis fuit exceptus. Sic enim Gerhardus a Roo. \*\*\*\* nos docet: *his peractis, Fridericus Sueuorum ac Imperii ciuitatum comitatu abs se dimisso, ipse cum reliquo secundo Erydani fluuio Venetias nauigauit. Cum propius ad urbem venisset, obuiam habuit Franciscum Foscarum, Venetorum principem, Bucentauro inuedum cum trecentis senataribus & flore nobilitatis.* Idem in Historia Friderici latius adhuc exponit Æneas Syluius, \*\*\*\*\* & Fuggerus, \*\*\*\*\* Præmissum autem Venetias fuisse Augustum ex ipsa hac oratione discimus: Scripta autem ea est magna erga Imp. reuerentia, magna verborum grauitate. \*\*\*\*\*

Sexta Oratio nomine Vicarii Cremonensis ad Imp. aduentantem, penes Lauretum fuit habita. Auctorem cum Frehero ignoramus, rector vero Cremonæ illo tempore dicitur Ioannes Tolentinus. \*\*\*\*\* Prædicat Orator virtutes Friderici, nec tamen adeo graui vel iucundo utitur sermone.

Septima Oratio MICHAELIS APOSTOLII est; rogatu Aristonymi Byzantini ad Fridericum III. Imp. scripta. Erat hic Apostolius Byzantinus Orator illorum temporum, cuius præter alia, extant Paroemiæ, cum Petri Pantini versione & notis editæ. Missus autem circa annum 1457. fuerat ab Aristonymo Byzantio, Megadis filio, vno ex Græcorum Proceribus, qui Fridericum animaret ad eripiendam e Græcorum manibus Græciam. Potissimum autem in laudibus Friderici nimis, potentia Turcarum euehenda, & Græcorum clade & vastitate a Turcis accepta versatur.

ORA-

\* Inter opera Basileæ 1551. f. Coniunctim impressa num. 399. pag. 928.

\*\* Vol. II. pag. I.

\*\*\* Pag. 86.

\*\*\*\* Hist. Austr. lib. V. exente.

\*\*\*\*\* Pag. 96.

\*\*\*\*\* Lib. V. c. VIII.

\*\*\*\*\* Reperitur ista etiam in Goldasti Politicis Imperialibus cap. XXI. pag. 972.

\*\*\*\*\* Prout discimus ex Ludouici Cautellii Annalibus Cremonensibus ad annum 1451.



## ORATIO I.

*ÆNEÆ SYLVII AD ALPHONSVM, SAPIEN-  
TEM SICILIÆ REGEM SVPER CONNVBIO FRIDERICI ET  
ELEONORÆ ORATIO GRATVLATORIA.*



VAMVIS grandes materias (vt inquit Ieronymus) ingenia parua non sufferant, conandum tamen est mihi, serenissime Princeps rexque victoriosissime, quæ per hos dies tuæ Maiestatis auctoritate sponsalia sunt conclusa, his qui adsunt exponere. Cum de rebus ad Imperatoriam sublimitatem pertinentibus loqui nulli magis incumbat, quam legatis imperatoriis. Audiat igitur tua Serenitas, oro, audiant & circumstantes, precor; etsi non mihi (neque enim mereor) rei saltem de qua sermo fiet, aures accommodent, quæ magna est, admirabilis, rara, honestissima. De nobilissimo namque matrimonio loquar, altissimo, potentissimo, incomparabili. Regia virgo Romano Imperatori promissa, Leonora infans Portugalie, excellentissima nobilium puel- larum, neptis tua charissima, diuo Cæsari Friderico Romanorum regi Augusto, pio, felici atque triumphatori desponsata est. Ingens affinitas, potentissima parentela, generosissima coniunctio, ob quam causam diuina res agitur, Deo nostro gratias reddimus, festam haud iniuria ducimus diem, exultamus, hilares omnes sumus, nec tantam amicitiam sine magno Christianæ religionis fructu conflatam esse puta- mus, in qua non solum res ipsa matrimonii commendanda est, sed personæ quo- que contrahentes ingentibus extollendæ laudibus sese offerunt. De his ergo duo- bus dicendum est mihi, etsi rerum dignitatem mea magis attenuabit, quam expli- cabit oratio. Dicturus autem de bono coniugii, necessarium arbitror eos prius refel- lere qui genus omne feminarum maledictis compellationibusque probrosis insecta- ri non desinunt. Namque cum matrimonium ex maris atque feminae coniuga- tione consistat, quæ poterit laus illi competere, si vna ex parte mancum claudum- que fuerit. Non est hæc Danielis statua, cuius pedum pars quedam ferrea, pars fictilis erat. Nec bestiam contuemur Horatii, quæ mulier formosa superne in atrum fingitur piscem desinere: sed rem veluti sacram sic ex partibus suis integram ac perfectam prosequimur. Audiamus tamen, quid aduersus feminas afferatur; po- stea iudicemus. Aiunt equidem in sacris eloquiis complurima esse testimonia, quæ mulieribus aduersantur. Rugire contra feminas Augustinum, Ambrosium, Hieronymum, Gregorium, ceterosque Doctores Ecclesiæ duos in eas: Virgilius, Iuuenalis, totusque Poëtarum cuneus asper, Cato sæuissimus commemoratur: auar- ras, instabiles, crudeles feminas esse affirmant. Adducunt exempla malarum, at- que ab his clades exortas in medio proponunt. Post hæc Philosophos citant, qui de vxore ducenda consulti aut suadere non præsumpserunt, cum huic orbi tan- tas inde molestias formidarent. Metelli quoque Numidici mentionem efficiunt, qui (vt est apud Gellium de noctibus Atticis) *si sine, inquit, vxoribus possemus Quirites esse, omnes ea molestia careremus: sed quoniam ita natura tradidit, vt nec cum illis satis commode, nec sine illis vlllo modo viuere possit, saluti perpetuæ potius quam breui voluptati consulendum.* Atque hæc fere sunt, quæ contra femineum sexum, contra matrimonium, non iusti astimatores adducere consueuerunt. Sed sunt hæc omnia (nisi fallor) confutati facilia, inprimis enim quod in sacris literis aduer- sus foeminas traditur, de quibusdam peruersis accipimus. Fatemur enim, vt in sexu femineo malitiam reperiri, \*videlicet vniuersaliter recipimus, alioquin & vi- ros omnes damnare oporteret. Nam & si de feminis scriptum est; *Vnam de mil- libus non inueniri*, de viris quoque in Psalmis legimus; *Non est qui faciat bonum, non est vsque ad vnum.* Et apud Satyricum:

*Rari quippe boni, vix sunt numero totidem, quot*

*Thebarum porte, vel diuitis ostia Nili.*

Et amplius sese cohærens: \*

*Egregium, ait, sanctumque virum si cerno, bimbri*

Tom. II.

D 2

\* f. Corrigens.

Hoc



*Hoc monstrum puero, & miranti iam sub aratro.*

*Piscibus inuentis, & facta comparo mule.*

Sancti vero Doctores dum foeminas detestantur, aut malas quasdam iure condemnant, aut castitatis promissores alloquuntur, quos fugere mulieres abhorrereque suadent. Idem virginibus sacris DEo dicatis atque nuptis de virili sexu & sæpe dictum est, & sæpius esset dicendum. Continentiam namque professis viris feminae, & feminis viri formidandi sunt hostes. Poëtas nihil mirum est in feminas debachari, nam viris quoque non parcant. Catoni Magno satis apud Liuium respondit L. Valerius, qui legem Oppiam iniquam mulieribus obtinuit abrogari. De criminibus nihil attinet disputare: quando hæc eadem & multo peiora in nostro sexu reperiantur. Nec malarum exempla me mouent, aut antiquæ clades humano generi per mulieres illatæ. Namque si mulierum virorumque turpia facta repetere, & à primo proditore Cain vsque ad sceleratissimum Judam, & in hanc vsque diem sceleratas vtriusque sexus actiones comparare voluerimus; innocentes re-<sup>p. 19.</sup> spectu virorum feminas ostendemus. Sed obstant angustiae temporis, indulgeo breuitati. Ad Philosophos venio, quorum nullus (teste Lactantio) sic vixit vt scripsit. Quis fontem eorum ac verticem, & Apollinis testimonio sapientissimum Socratem coniugio detrahentem æquis auribus audiet? cum Xantippe non contentus vna, duabus sese vxoribus commiscuerit. Melius quippe (me iudice) filerent obrectatores feminarum, quam sine fundamento loquerentur; qui dum Metelli auctoritate se iuuant, nesciunt illum doctorum virorum iudicio damnatum, vt qui nec vere, nec ad suadendum apte sit orsus. Existimauerunt enim prudentiores; contra potius orationem debuisse sumi, vt nullas plerumque esse in matrimoniis molestias asseueraret, & si tamen accedere nonnunquam viderentur, paruas ac leues, facilesque esse toleratu diceret, maioribusque eas emolumentis ac voluptatibus obliterari; easdemque ipsas neque omnibus, neque naturæ vitio, sed quorundam maritorum culpa & iniustitia euenire. Sed facio verbis modum quando res nota est, & viros bonos, & mulieres inueniri probas, ex quibus esse iusta, sancta & honestissima coniugia possint.

Nunc de bono matrimonij perpauca libanda sunt, in quo tria mihi præcipue commendanda videntur, honesta dignitas, grandis vtilitas, dulcis iucunditas, insunt enim hæc omnia matrimonio, quæramus hæc tria. Illa meo iudicio digniora videntur quæ sunt antiquiora, quæque præstantiores inueniuntur auctores habere. Matrimonium vero & antiquissimum est, quippe quod in primis parentibus cœpit, ac nobilissimum habet auctorem, DEum patrem omnipotentem totamque Trinitatem, cum (teste Hieronymo) matrimonium tunc sit institutum, cum dominus ait, *Crescite & multiplicamini, & replete terram.* Neque enim, vt Athenienses arbitrati sunt, eorum vetustissimum Regem inuentorem nuptiarum dicimus esse Cecropem, quem propterea bimembrem figurauit antiquitas, quia primus omnium marem feminae legitime coniunxit. Longe ante conditas Athenas in ipso mundi nascentis initio, non homo, sed DEus; non creatura, sed creator; rector & conditor orbis matrimonium consecrauit. Cuius tanta dignitas est, vt semel coniunctum dirimi nequeat, dicente scriptura: *Quod DEus coniunxit, homo non separet.* Coniuncti namque diuino nutu creduntur, quicumque matrimonium rite contraxerunt. Hinc mater Ecclesia dux morum, magistra vitæ, nuntia veritatis, inter maxima sacramenta, quibus vtitur veluti diuinitus reuelatis, matrimonium reuelauit. Hinc dominus & saluator DEus homo Christus IESUS & nasci ex nupta, & interesse nuptiis voluit, ac primo quod fertur patrasse, miraculo coniugium honorare. Dignitatem tenemus: inuestigemus vtilitatem: sed hæc intellectu quam dictu facilius. Nam quæ res est, quæ ciuitates, quæ prouincias, quæ regna, quæ genus humanum conseruat, nisi matrimonium? Quid sunt aliud nuptiæ, nisi seminarium Reipublicæ? Quis familias iungit? quis gentes propagat? quis populis aternitatem nisi matrimonia largiuntur? Quæ pax, quæ fides, quæ charitas inter mortales esset, si more Platonis absque legitimis nuptiis viueremus,



mus passim feminis abutentes? Omitto infinitas vtilitates, quas priuata domus ex matrimoniis elicit. Ad iocunditatem festino. Nunquid iocunditas in matrimonio reperitur? Aristoteles philosophorum acutissimus non solum in Politicis, sed in Ethicis quoque iocundam inter coniuges amicitiam esse testatur. Ab vrbe condita vsque ad D. siue (vt Tertulianus ait) vsque ad DC. fere annos nullum diuortium intercessit, tanta coniugiorum iocunditas fuit. An suauius quicquam, dulcius, iucundius esse potest illius vita, qui morigeram ac foecundam sortitus vxorem, si quando ex fori rumoribus, ex curiae tediis, ex Reip. laboribus domum se confert, veram consolationem reperit, veram amatorem, diuinæ domus humanæque sociam reperit, dulces liberos, sibi matrique blandientes videt, quibus laborat, quibus congregat, quibus viuit, in quibus etiam post mortem victurus sit. Non carabo testes humanos, vbi diuina intonuit auctoritas. *Propter hoc*, inquit oraculum Genesis, *relinquet vir patrem & matrem suam, & adhærebit uxori suæ & erunt duo in carne vna.* Magna vis delectationis, magna iocunditas, quæ duobus ex corporibus vnā carnem facit. Aristophanes in duobus corporibus vnā esse animam consensit. Sed hæc satis de bono matrimonij dicta. Jam postremo loco quales quantæque sint personæ contrahentes intuendum est, præsentique concioni breuissime referendum. Neque enim de plebe sunt, neque de \* fortuna, sed de sublimi celsoque statu, quæ contrahunt. Regius sanguis & Imperatorius in coniugium venit. Attenuabitur rerum dignitas, si meis verbis personarum excellentiam conabor explicare; longe melius eas ipsas audiemus de se suisque meritis differentes. Fingamus enim præsentem qui nuptias celebraturi sunt, loquatur de se regia virgo, loquatur & Cæsar, suasque dignitates enumerent: Dic tu Leonora quæ nubis, quid dotis affers, quid expedibile tuum narras, quo pacto

p. 20. diuo Cæsari complacuiſti? audire te cupimus, non sine causa tantus te Princeps adamauit, audite procures, audite omnes. Jam virgo loquitur. Ego, inquit Leonora, ex alta Portugalix domo sum nata, ex antiquissima Regum stirpe, patre rege, matre regina, clarissimum genus est meum, siue temporis vetustatem, siue maiorum gesta requiris; infinitis iam seculis sanguis meus regnat; inuicta virtute progenitores fuere belli domique. Testis victoriarum est Hispania tota, in qua nullus est angulus, quem nostri maiores armis non penetrauerint, siue dum Barbaros insequuntur, siue dum Christianos domo propulsant iniusta bella mouentes. Recens adhuc est memoria classis illius, cum qua meus auus in Africam transiens felici magnoque prælio exturbauit Saracenos, urbem captam expugnauit, ac nostris fidelibus Coloniam deduxit, vbi adhuc inuitis freudentibusque Barbaris salutiferæ crucis obiecta sunt signa. Hæc est paterna hæreditas omni patrimonio præstantior. Si melius est (vt inquit Sapiens) nomen bonum quam diuitiæ multæ. Fuerunt & genitori meo cum potentissimis Castellæ atque Angliæ Regibus consanguinitatis strictissima vincula. Idem vt erat fama potens, virtute potentior, amitam meam cordatissimam & sapientissimam principem famosissimo Burgundiorum Duci in matrimonium collocauit. Sed accipe nunc maternam gloriam, duo mihi ex matre sunt auunculi, Reges ambo. Sed qui reges? alter Nauarræ præfidet, virtute ac nomine clarus, alterum Archiregem melius appellauerim, cum non solum apud Hispanos, sed apud Italos, Siculos, Sardos, Maioricos, Minoricos regna possideat. Prætereo vetustos domus Arragonum procures in omne seculum fama colendos. Vnus nobis ad gloriam satis Alfonsus erit, cuius inuicta virtus, insuperabilis constantia, nouercentem sibi fortunam non solum vicit sed amicam blandientemque reddidit. Quos portus, quas insulas, quas terræ, quas maris oras hic non armatus, non victor adiit? Quæ regio in terris Alfonsi nomen ignorat? Quis belli, quis pacis artes melius nouit? Quis ciuibus, quis peregrinis dilectior est? Quis nostro seculo præter hunc vnum fauet ingeniis? quis iustior, quis liberalior, quis animo maiori regnat? An solus hic ex principatibus est, qui neque secundis rebus intumescit, neque destituitur aduersis? verus fortunæ nitor & nostri gloria seculi, qui non minori perseuerantia Neapolim cepit, quam Græci

Leonore Lusitanae elogium.



Friderici Aus-  
triaci elogium.

duces Troiam expugnauerunt. Ostendi tibi, domine, meam ex paterna materna-  
que domo non paruam gloriam. Quod si meam formam, meosque mores nosse  
cupis, malim alios de me loqui. Qua sum tum facie, quæ statura, quis lineamen-  
tis, oratores Cæsarei qui ante biennium me viderunt, non est putandum suo Prin-  
cipi retinuisse. Nisi placuisssem, non essem prorogata. Ego inter matronas mo-  
destia & auctoritate graues sum nutrita, nec puto me vlla ex parte vel à maioribus  
degenerasse, vel magistris displicuisse. Quibus ex rebus sum (mihi videtur) ad nuptias  
nemo minime contemnenda: quæ paternis maternisque titulis illustrata, pudicitiam  
virginis, formam egregiam, probos mores, cum ingenti gloria mecum afferro no-  
bilitatissimæ domus. Audiuimus regiam virginem (vt mea fert opinio) dotes egre-  
gias afferentem: audiamus, si placet sponsum. Dic tu Friderice, quibus rebus  
nuptias exornabis, vnde tibi regiam virginem postules, tam generosam, tam for-  
mosam, tot dotibus eminentem? Magnum esse oportet, quem tali matrimonio  
dignemur, attendite Præsules, adhibete aures viri præstantes. Jam Cæsar, fateor,  
inquit, vera esse quæ sponsa narrauit, maioraque mihi de suo genere persuadeo,  
quam dicta sint, formam eius, quantum relatu didici, complector & amo: mores  
eius accepi regios esse, dignosque sanguine suo. Cæterum nec ego inglorius vxor-  
em ducam. De meis moribus aliorum esse non meum iudicium volo: vixisse  
tamen me sic hætenus arbitror, vt meis progenitoribus inferior videri non de-  
beam, sed malo de illis quam de me verba facere. Stirps mea vetustior est quam  
repeti possit, Ducalis, Regia, Imperatoria: ex qua viri fortes quam plurimi, bel-  
licosi Duces, iustissimi Reges, magnanimi Cæsares prodierunt. His Austria pa-  
ruit, florentissima regio, cuius principatus & à Sabaudia in Pannoniam, & ab Illy-  
rico in Burgundiam protenduntur. His Bohemiæ nobilissimum dignissimum &  
aureum olim regnum obediuit: ab his ferox viroque Polonia regnata est. Ab  
his septem illæ populosæ, latissimæ, & opulentissimæ Vngariæ ditiones gubernatæ  
fuerunt. Ab his Romanum Imperium, non sine magna nostræ familiæ laude, se-  
culo administratum est. Ab his Ottacarus Rex diues ac potentissimus, qui ab  
Adriatico sinu vsque ad Oceanum Septentrionalem, quidquid obuium fuerat, suæ  
ditioni ius fasque subegerat, ac Romano imperio insultabat, Deo atque homini-  
bus infestus, magno prælio victus, profligatus, atque occisus est. Rodolphus no-  
stræ domus Princeps, qui primus in possessionem Austriæ venit, tantæ modera-  
tionis famæque fuit, vt Romanorum creatus Imperator solo suæ virtutis nomine  
fregerit, quicunque per Germaniam aduersus imperium res novas moliebantur.  
Nec minor eo fuit Albertus prior, qui cum plerique Germaniæ Principes Adol-  
phum ex domo de Nassau imperare vellent, nostramque domum calumniose præ-  
terirent, non est passus extra familiam Imperium esse, sed bello indicto ad con-  
stitutam diem armatus venit, collatisque signis in aciem prodiit, & atroci pugna  
vrsurpatorem imperii vicit, fudit, occidit, ac domum Austriæ pristinae dignitati re-  
stituit. Transeo Fridericum Cæsarem, & auum meum Leopaldum, duo fulmina  
belli. Ernestum qui me genuit, non laudabo: quamuis subditis dilectissimus es-  
set, inimicis formidatissimus, patruus meus Albertus Cæsar, qui Bohemiam, Vn-  
gariam regnauit, non solum Hussitas infligit hæreticos, sed Turcorum rabiem  
Christianis ceruicibus imminentem magna virtute compescuit. Non est otium  
modo referre, quæ mei maiores nunc pro Catholica fide, nunc pro Romano im-  
perio tuendo, propagando terra marique gesserint; nec narranti mihi dies suffice-  
ret. Cum Romanæ Reipublicæ curam ab annis iam trecentis nostra domus ha-  
buerit, forsitan degenerasse nos hodie, solisque titulis & imaginibus niti maio-  
rum quispiam existimauerit. Scimus quam miserum est *aliena incumbere fama*:

*Ne collapsa ruant subductis tecta columnis.*

Dabimus igitur & aliquid nostrum. Quatuor hodie sumus in Austriæ domo,  
me nati maiorem Principes Electores Romano Imperio præfecerunt, cui annis  
iam vndecim latantibus subditis præfui, parco de me plura dicere. Ladislaum  
patruelem, Alberti filium, Sigismundique Cæsaris ex filia nepotem, quem propter  
impube-



impuerem ætatem domi nostræ gubernamus, & Bohemorum & Vngarorum cum plebs cum optimates suum Regem esse fatentur. Albertus frater inuictus armis Sueuiam Alsatiæque gubernat; Suuientis populi frenum metusque. Sigismundus alter patruelis expectatæ indolis adolescens, Enum atque Athesin regit; cuius ætatem quamuis facies prodit, tamen virtus ementitur. Nostra sunt hæc, sine maioribus laudanda. Quis consanguineos affinesque nostros enumeret? Nulla Germaniæ domus illustris est, quæ nostram familiam sanguine non attingat.

Maiores nostri ex Francia, ex Arragonia, ex Vngaria, ex Neapoli, ex Anglia, ex Polonia, ex omnibus Christiani populi celsis domibus vxores duxere. Cum his ego prærogatiuis nuptiarum sacris initiandus prodeo, qui cum domo Portugaliæ atque Arragonum matrimonium contrahens non partium regnum aut vnā prouinciam sed Alemanniam, ingenti populorum, Principum, prælatorum multitudine redundantem, quin & Germaniam totam regnis grauidam, quæ Christianitatis plus *Germaniæ.* media parte complectitur, diues viris & armis, in affinitatem mecum adduco.

Accepisti Rex amplissime, quæ sponsus & sponsa dixerunt. Intellexerunt (vt arbitror) omnes qui adsunt præsentēs, matrimonij dignitatem, quo certe neque nobilius, neque Christianitati vtilius inter mortales vllum contrahi potest: quando & virtus virtuti, & nobilitas nobilitati, ac potentia potentia, & magna magnis, & summa summis adduntur: hinc Germanis Principibus, Hispanis inde proceribus in affinitatem, beneuolentiam, amicitiam occurrentibus. Ob quas res nihil aliud modo restat agendum, nisi vt de tanto bono, sicut facimus, Diuinæ pietati, quæ omnia mouet, & tuæ maiestati, quæ huius rei auctrix est, immortales gratias referamus, superos omnes orantes, vt hoc matrimonium & contrahentibus secundum diuturnumque sit, & Christianæ Reipublicæ felix. Laus DEO Jesu Christo.

## II.

p. 15. *M. JACOBI MOTZII THEOLOGI, LEGATI CÆSAREI CORAM SERENISSIMO ALPHONSO REGE PORTUGALIÆ ORATIO, PRO SORORE EJUS LIONORA FRIDERICO CÆSARI DESPONSANDA.*

**I**NCUMBERET mihi hodie, Serenissime Rex, excellentissime Princeps, quæ sunt tuæ virtuti; meo sermone complecti; laudare clarissimum genus tuum, efferre *Anno 1451* regni tui, tuæque potentia magnitudinem. Sic enim mos esse solet eorum qui legatione funguntur, quando primum in conspectu veniunt. Sed dabit veniam tua Regia mansuetudo, si res meis humeris nimium graues aggredi recuso. Tot enim sunt tuæ serenitatis præcipue dotes, tam splendida maiorum tuorum nomina: tanta est regni tui gloria, potestas, & excellentia, vt verbis meis exprimi nequeant, magnum oratorem, singularem eloquentiam, facundiam exuberantem hæc requirerent, si exprimi pro suo merito deberent. Abest enim à me dicendi facultas, qui sacris literis non eloquentia meam sacraui ætatem. Nec detrimentum tua patitur sublimitas, si tenui & rauco organo meo non extollitur, quæ nota est vbique terrarum, & à præclarissimis ingeniis celebrata. Quibus ex rebus quæ minus rite à me perfici possunt, ad ea veniam quæ nostra legatio requirit. In his sunt duæ partes, in alterâ continetur expositio beneuolentia: In alterâ coeptorum negotiorum executio. Fateor, potentissime Rex, me adhuc minus idoneum. Nec enim in me est vis sermonis vt possem ad vnguem exponere, quæ beneuolentiâ, dilectione & caritate serenissimus atque inuictissimus princeps, Diuus Cæsar Fredericus, Romanorum rex semper Augustus, tuam domum, tuamque maiestatem prosequitur. Sed neque hic verbis opus est, vbi facta mentem demonstrant. Ex hac enim dilectione factum est, vt clarissimam atque superillustrem dominam Leonoram, sororem tuam in matrimonium sibi copulari Cæsar petierit. Quoniam enim tuæ sublimitati, tuo generi affectuosissima est Imperatoria celsitudo, idcirco in hanc affinitatem aspirauit. Et ego illud addicere possum, adeo tibi Cæsar fauet, adeo tuam Maiestatem obseruat, vt tuis desideriis omni conatu studeat morem



morem gerere: qui etsi plus faceret erga te tuosque omnes, minus tamen sibi fecisse videbitur quam decebat. Sed veniam ad secundam partem nostræ legationis nobis commissæ. Nouit tua Maiestas (antequam loquar quæ sit nostri causa aduentus) apud Neapolim quæ gesta sunt inter tuos & Cæsareos Oratores. Jam diu tibi relatum est ex his quæ illic conclusa sunt. Hoc supererat, ut ad contrahendum matrimonium per verba de præsentî, cum præfatâ sorore tuâ suos procuratores Cæsar transmitteret. His ergo satisfactorius conuentionibus & pactis, ad rem hanc nos (quamuis minimos) misit. Misit autem serenissimus Imperator sacerdotes: quia in omni diuino opere, tam in veteri, quam in nouâ lege ita dispositum est fieri. Vnde in opere incarnationis prophetice dictum est: *Mitto angelum meum ante te*: id est, sacerdotem. Et rursum: *Ipse præbit ante illum in spiritu & in virtute Elia*. Et iterum, quia solis sacerdotibus Christus in vltimâ coena Sacramenta statuit cæteris communicanda. Inter quæ Sacramentum Matrimonii ratione prioritatis dignissimum habet locum. Volens autem serenissimus Rex Romanorum sequi normam & regulam Prophetarum & Euangelistarum, misit binos, ut gaudia renunciarent; misit duos, ut veritatem testarentur: misit duos, ut si vnus in viâ deficeret, alter inceptum opus gloriose terminaret. Sors igitur super nos cecidit, qui cum plenâ potestate missi sumus ad ea gerenda quæ restant. Et quando tuæ Maiestati placebit, nos promptos & paratos habebis. Neque enim in tantâ temporis breuitate, tantaque rerum festinatione, ad iter tam longum, tum periculosum, & æstiuo tempore tam feruidum suos proceres Cæsar mittere potuit. Hortatur autem tuam Maiestatem Cæsarea sublimitas, ut quæ culmini tuo incumbant, in suis temporibus agat, quemadmodum conuentum est. Nam quæ ad se pertinent, omnia sine dolo complebuntur, quemadmodum suis ex literis, quibus approbantur, ratificantur conuenta, manifestius instrueris.

*Eodem tempore ad Imperatricem tunc futuram Oratio facta, in præsentia Regis, & sui parlamenti.*

SERMO meus, Rex serenissime inuictissimeque Princeps, colendi Præsules, proceresque nobilissimi, doctores eximii, ceterique domini (quibus titulus dignitatum ignoti) prædigni; in hoc actu præsentî, quantam mea fert opinio, ad præclarissimam atque superillustrem virginem dominam Leonoram, hîc præsentem, & hunc cœtum suo splendore ornantem, vobis omiſſis conuertetur. Sua est enim hæc dies, sua est hæc solennitas: sua est hæc celebritas. Audi ergo, nobilissima atque excellentissima virgo, inclina aurem tuam mihi. Accipe quæ dicam verba. Non vtor multis, paucis opus est. Nam quid sit matrimonium? quia insolubile vinculum mariti & foeminæ; *Quos Deus coniunxit, homo non separet*; Quâ ratione institutum est? quia causa prolis procreandæ; *Crescite & multiplicamini*. Quâ firmatum auctoritate? quia à Deo patre, *hoc nunc os ex ossibus meis*. Quâ deuotione colendum? quia Christus nuptiis interfuit, & suâ præsentia matrimonium consecrauit, & miraculis approbavit. Quam vtile, ut lubricitas carnis vitetur; *Cum nullus immundus & fornicator regnum Dei possidere possit*. Quam necessarium, ut caritas in orbe terrarum seruetur, sine quâ nihil potest fieri. *Non enim bonum est hominem esse solum*. Non dubito te dudum ac sapius Christianissime instructam. Per hoc enim videlicet matrimonium amici amiciores efficiuntur, per hoc inimici placantur, per hoc regna in pace conseruantur, per hoc homines vitæ se politice vniunt; per hoc ordo naturæ bene regitur: per hoc tandem lapsus Angelorum redintegratur? Non paruum, neque vulgare coniugium est, de quo nunc agitur: in quo Regius sanguis Imperatorio coniungendus est. Inter te hodie, regio sanguine, ac serenissimum ac gloriosissimum principem, Diuum Cæsarem Fridericum, Romanorum regem, pium, felicem, ac triumphatorem, matrimonium contrahendum est. Egoque, si annuis, si tibi Cæsar placet, si nubere domino meo Regi Friderico, in animo tuo est, si virum accipere cupis, legitimoque thoro iungi, annulo te subarrabo: dominum meum, & corpus suum (nam sic p. 16. facultas



facultas est mihi) perpetuo tibi dicabo, ac te, si corpus tuum accipiam insolubilis matrimonii nexu iungendam. Quod antequam facio, precor adorna thalamum tuum, & suscipe Regem. Moueat te, inducat te ad suscipiendum amorem, ut si colloquatur tibi, blandiatur, si enim susceperis Regem in thalamum cordis, cordialissime diligendo, ipse te suscipiet in palatio suo gloriosissime coronandam. Dico autem adorna, non emunda, cum de tua vlllo modo phas sit dubitare castitate, probitate, aliisque insignibus virtutibus, humilitate pedissequa virginis benedictæ singularissima. Adorna thalamum quaterno redimitum ornatu. Ab ortu Solis frontem erigendo, summum bonum super omnia, & præ omnibus diligendo. Ab occasu frontem erige vnanimi consensu, sacramentali fide in intimo Regem suscipiendo. Sintque tibi latera contra Aquilonem, & Meridiem; firmitas in blandis, & firmitas in duris. Quia ubi spiritus sapientiæ & scientiæ præest immutatio rerum non perturbat. In te enim dependet à fronte Orientali cortina Prudentiæ: quia homo nisi prudentia regatur, in errorem vadit. Sic enim in Occidentali fronte in te relucet, cortina fortitudinis; fortem enim animum non emolliunt blandimenta bonorum, immo neque sublime, neque profundum separat à caritate. Super has cortinas generalis & sericeus dependet in te ornatus, Justitia; quæ reddit Cæsari quæ Cæsaris sunt, & Deo quæ Dei sunt. Tota igitur pulchra es, intus pulchra, pulchra foris; intus in corde, foris in corpore. Intus rubicunda, foris candida, utrobique composita. Rubicunda per caritatem, candida per castitatem: composita per humilitatem. In toto grata, in nullo ingrata, in toto places, in nullo displices. Tota pulchra es per naturam, pulchrior per virtutes, pulchrior per gratiam desuper datam. Tu es regis Assueri puella, ad thalamum Imperatoris ducenda, ingenti diligentia comparata, gloriosissime vestita varietate virtutum, annulo ornatissimo subarranda. Non pensanda pretiositas, sed rei significatio acceptanda, & aspicienda est. Hortor igitur ô te virgo nobilissima, vna ex omnibus electissima, ut in hoc annulo, quo subarrari debes, duo quam breuiter animaduertas, materiam, atque formam. Est quidem materia aurea, forma circularis. En quam pulchre apteque matrimonio (de quo nunc agimus) hæc duo consonant. Sicut enim aurum præstat metallis, sic tua excellens & admirabilis forma omnes superat virgines quæ nostrâ ætate speciosæ dicuntur. Neque ab ortu in Occasum virgo vlla est, quæ tibi vel decore, vel moribus, vel prudentiâ possit æquari. Recte ergo tibi conuenit aurum: sed nec Cæsarem dedecet, qui dignitate sublimis Imperatoria, ut Sol inter sidera, sic inter cæteras potestates altior asurgit, atque sublimior, virtute insignis & potentia gloriosus, ætate mediâ, celso corpore, lætis oculis, copiosa cæsarie, nullâ ex parte mendosus, simillimus auro. Quid forma? quid sibi vult circulus? Equidem sicut circuli forma finem habet nullum, semper in se reflexa: Sic & amorem sine fine conjugalem esse oportet ardentem, castissimum, solidum, semper in se reflexum: vxor virum amet, alium nesciat. Vir vxorem diligat, nulli alteri afficiatur. Sic amor interminabilis sine fine, & viro in vxorem, & ab vxore in virum perpetuo & inuiolabili modo reuolutus. Possem de naturâ lucidissimi lapidis aliquid dicere, quia solidissimus (ut ferrum) cæteras gemmas penetret, ut solo plumbo hircinoque mollescit sanguine, infantiæ resistit, hostes superat, feras & feroces homines mitigat, iurgia tollit, phantasmata & incubos fugat: quæ omnia ad proprietatem matrimonii reduci possunt. Sed obstant angustiae temporis, cedo priori sermoni, ad finem festinat oratio. Dixi quæ sum facturus, si accipis gloriosissimum dominum meum, Dominum Fredericum Romanorum regem, virum tuum legitimum ex ordine ritumque sacrosanctæ Romanæ & vniuersalis Ecclesiæ. Quinimo quem iam te dicis accipere, utrumque hunc optare atque amplecti mente. Sic dic: *Ego infantula domina Leonora recipio Fredericum regem Romanorum, in meum maritum bonum & legitimum, sicut mandat Sancta Ecclesia Romana, in personâ tui magistri Jacobi Motz, sui sufficientis procuratoris ad hunc actum.* Et ego prænominatus M. Iacob M. nomine præfati Frederici Regis Romanorum, tanquam procurator eius ad hunc actum legitime



constitutus, recipio te infantissam Dominam Leonoram, in suam legitimam vxorem, sicut mandat sacra Ecclesia Romana; atque te hoc anulo subarrabo, ad laudem & gloriam omnipotentis Dei, & ad felicem vtriusque partis statum & optimam consolationem: ut duo in carne vnâ longo tempore simul viuatis, generetisque filios & filias, qui Deo & hominibus sint accepti, vobisque senibus superuiuant. Repleantur & benedictionibus omnium bene viuentium, fruanturque pace aternâ. In nomine patris & Filii & Spiritus sancti. Amen.

## III.

ÆNEÆ SYLVII ORATIO PRO CORONATIONE  
FRIDERICI REGIS ROMANORVM, AD NICOLAVM V. PP.  
CVM PETITIONE AD EVNDEM, PRO CONGREGANDO CONCILIO GENERALI.

PATER beatissime, maxime Pontifex. Eum qui coram tua sanctitate loquitur, non immerito commoueri, cum propter celsitudinem throni tui, quo nullus est in terris altior, tum propter ingenium tuum diuino dono aureum & omni doctrinarum genere fecundum. In cuius præsentia qui verba facit nisi iuxta præceptum Apostoli sermonem habuerit sale conditum, illius notam Pisonis incurrat, de quo scribit Hieronymus, qui cum loqui nesciret, tacere non potuit. In hoc enim orbis terræ primo maximoque auditorio non fuitiles & importuni locutores, sed facundi oratores audiendi sunt, Vlyssi pares, quem sapienti facundia præditum vocem ait Homerus non ex ore mittere sed ex pectore. Quibus ex rebus nihil mirandum esset, si nunc ego, cui nec sententiæ suppetunt, nec verba quibus adiri tanta maiestas debeat, sic turbarer ac pallerem, ut olim *Lugdunensem Rhetor dicturus ad aram*. Sed adiicit animum mihi tuæ S. tis immensa benignitas, atque indicibilis humanitas; quæ non solum magnos discretosque viros, sed humiles ac indoctos aure inoffensa audire consuevit: morisque semper huius sacri consistorii fuit, non tantum verba loquentis quantum mittentis personam existimare. His accedit nobilis orationis materia, quæ dubium est petenti vtilior, an concedenti gratior sit futura: cuius tanta honestas est, tanta vtilitas, ut absque oratoris adminiculo persuadere se ipsam facile queat. De coronatione namque Cæsarea futurus est sermo, quæ res semper maxima & honestissima fuit, postquam sancta sedes Apostolica Imperatoriam dignitatem ex Græcorum gente in persona magnifici Caroli M. transtulit ad Germanos. Cupiens enim serenissimus & inuictissimus Princeps, diuus Cæsar Fridericus Romanorum Rex Augustus, tuæ S. ti obsequentissimus filius, more maiorum in hac vrbe Roma suæ coronationis solennia celebrare; hos præstabiles viros, & me pusillum tuam clementiam iussit accedere, rogaturos atque obsecratos, ut ingenti eius desiderio, pio, iusto atque honestissimo mos geratur. Namque si tua S. tas eius coronationi nauare operas voluerit, nihil morabitur Cæsari sed aliis omnibus sine dilatione superatis tuam præsentiam festinus adibit, quæ sunt consuetudinis faciet, imperiales insulas ex tua sacra manu recipiet, festos dies lætamque solennitatem tecum aget, de rebus Ecclesiæ atque imperii salubriter dirigendis, tuis consiliis auscultabit, teque sequetur: fauentibusque denique superis coronatus, alacer ac tibi plurimum obligatus in patriam reuertetur. Hæc est nostræ legationis summa, ac totius orationis materia. Circa quam tria nobis videntur altius attingenda declarandaque esse, non ut tuæ S. tis mentem instruamus, cui nihil est dubium; sed ut plerisque satisfaciamus, qui nostris expeditionibus admirari possent si nihil amplius dicemus. Primum est cur tantopere maiestas Imperatoria coronam cupiat. Alterum cur tam diu hanc rem distulit. Tertium concedendum ne sit quod de coronatione requiritur. Quibus absolutis oratio modum haberet, nisi pauca referre oporteret, quæ apud Neapolin nuper egimus. Sed illis breuiter enarratis, & vnica precatiuncula pro Concilio generali subiecta, finem dicendi faciemus. Adgrediamur igitur quod primo quæsitum est,



est, cur tam propense Regia maiestas coronationem efflagitat. Quid vrget? Quid est quod tantum Principem exire paternam domum, magnis & ambiguis itineribus se committere, graues subire sumptus coronationis causa compellit? Tria sunt B. P. quæ Cæsarem mouent, deuotio, consuetudo, debitum. Possem complura in medium afferre, quibus religio nostri Principis, & pietas ac deuotio in tuam S. tem tuumque prædecessorem hætenus non vulgariter patuerunt. Sed scienti omnia B. tuæ superfluo narrarentur, & Regio culmini ea vulgari non placet, quæ pro sui animi magnitudine minima censet. Nam etsi omni officio ac potius pietate erga Romanam Ecclesiam tuamque S. tem omnibus satisfaciat, deuotioni tamen suæ nunquam satisfacit. Ex hoc pietatis deuotionisque fonte prorumpit tam propensa coronationis cupido atque petitio. Arbitratur enim Regia sublimitas opus esse diuinæ pietati acceptum, si quemadmodum in veteri testamento nunc Prophetæ, nunc summi Sacerdotes, nunc simul ambo inungebant, qui regeret Israël & Judam; & sic in tempore gratiæ nouaque lege Romani Pontifices Christianos Imperatores inungant, atque his diademata largiantur, qui plebem Catholicam legibus tueantur & armis. Cuius rei non paruum signum esse videtur, quod ex Germanis Cæsaribus, qui per manus primi pastoris inuncti Romæ coronatique sunt, nullum comperimus violenta morte periisse: cum tamen ex Italis & Græcis Imperatoribus maxima pars, sic in orbem obierint, vt verum esse firmauerint quod Satyrico carmine expressum est:

*Ad generum Cereris sine cæde & sanguine pauci,  
Descendunt Reges, & sicca morte Tyranni.*

Est itaque deuotio Cæsaris non paruis instructa firmataque rationibus, quæ coronationis insignia poscit. Sed hanc deuotionem vetus consuetudo præmuniuit. Tria sunt enim Romani imperii tempora, ex quo Julius Cæsar rem populi vertit ad vnum, Italarum, Græcorum, Germanorum. Prætereo Berengarium & alios, qui apud Longobardos imperitarunt: neque enim tantum ditionis habuerunt tantumque iuris, vt Imperatoriæ dignitatis deberent titulis illustrari. Priores Imperatores contenti purpura perraro diadematis vtebantur: habentesque regiæ potestatis arbitrium, inuisæ dignitatis nomen & insignia postponebant, ne cum corona simul & Tarquinii superbiam quasi iure postliminii in urbem reducere viderentur. Ex Græcis vero Cæsaribus non est dubium, quin plerosque Constantinopolitani præfules coronis ornauerint. Ex qua re (sicut scribit Otto Frisingensis Antistes, non inutilis auctor) vsque adeo Constantinopolitana sedes intumuit, vt non

p. 23. solum Alexandriam, sed Romanam quoque cathedram, vsque ad Phocam Cæsarem & Bonifacium Papam, contenderit antecedere. At postquam Germani Principes victis ac domitis Longobardis, qui Romanam Ecclesiam laceßebant, imperare coeperunt; irrefragabilis consuetudo coronationis inoleuit, quam seruare nunc Cæsarem permaxime decet. Cumque Germana nobilitas, ex Apostolicæ sedis beneficentia, suaque diligentia & humilitate Imperatoriam dignitatem obtinuerit, quam Græci superbia & ignauia ac forsitan hæresi perdiderunt, non solum debitum, sed necessarium esse videtur à Romano Pontifice coronam expetere, vt illi perpetua reddatur reuerentia, à quo præcipua recepta est eminentia. Cum nihil ex tota philosophia sit debitum, quam gratitudo. Ex quo fit vt non solum deuotione, sed consuetudine ac iure debito maiestas Imperatoria coronam deponat. Coniungitur & hisce causis publicæ utilitatis ratio. Multa enim inter nos simul conuenientes, tractari concludique poterunt Christiano populo salubria; quæ per legatos inter absentes difficile peragerentur. Absoluta est iam prima quæstio: & quid Cæsarem moueat diadema poscere, satis intelligimus.

Videamus modo quamobrem coronatio tam diu protelata sit. Duorum hic temporum, postquam Cæsar acceptauit imperium, habenda est ratio, alterum sub Eugenio lapsum est: alterum te Pontifice. Optauit Cæsar coronam sub Eugenio recipere, nec Eugenius erat auersus: namque qui Sigismundi caput ornat, Friderici quoque verticem gemmis & auro redimere percupidus erat, vt sic duorum



Cæsarum pater maximus diceretur, quod hactenus contigisse reperio nemini: Sed viguit illius tempore Ecclesiastica diuissio, neutralitatisque nouitas Germaniam occupauit: nec Cæsari, nec papæ ex usu fuit, ut nosti rem iam vetustam ac multis quæstuosam relinquere, sed cum vicisset perseverantia Cæsaris (quid enim perseveranti non demum parer?) cumque restituta fuisset obedientia Ecclesiæ Romanæ, iamque tractandum de coronatione videretur, mox Eugenius diem clausit, speratamque Cæsari coronationem ademit; atque sic primum tempus sine culpa refluxit. Neque secundum arguendum est, namque ut primum tua S. tas diui Petri cathedram ascendit, missi sunt oratores, qui te iussu Cæsaris in orbe Christiano Pontificem Maximum salutarent, obedientiam tibi præberent. Sed cum spes esset te suadente quam celerrime Cæsarem aduentare; exorta extemplo sæua belli tempestas, quæ non solum diuites Austriæ principatus, sed Bauariam, Sueuiam, Franconiæ, Rhenique florentissimas regiones, atque ipsum Christianitatis cor, cædibus, rapinis, incendiis atque omni calamitatis genere vexauit, nobilissimos Principes & potentissimas ciuitates, dirâ, nouâ, inaudita discordiarum feritate concussit. Ad quas res sedandas necessarium fuit Imperatoriam maiestatem in partibus Alemanniæ remanere: quia non tam dispendiosa coronationis, quam pacis dilatio videbatur. Atque sic coronationis solennitas dilata est. Cui iam dari opera potest; quando qui diffidebant, omnes arbitrio Cæsaris pace facta se commiserunt. Atque hoc satis de coronationis dilatione sit dictum.

Nunc tertio loco pensandum est, quod Cæsar exquirat, tuane sit S. tis annuere. Plerique mortales si rem hanc suam venissent, omnes orationis neruos circa gloriam collocassent. Dixissent enim (ut arbitror) cum diuisam Ecclesiam, Pater sanctissime, multis magnisque curis ad vniionem redegeris, cum plurimas hæreses extirpaueris, cum pacem inter Christi fideles summo studio seruaueris, cum fana & Vrbs disiecta moenia grandi sumptu reparaueris, cum patrimonium Ecclesiæ vndique direptum dissipatumque vendicaueris, cum remissionis annum Christiano populo dulcissimum expectatissimumque concesseris; quid amplius ad cumulum tuæ gloriæ quærendum est, quam ut Cæsareo capiti coronam imponas? Tua est hæc gloria magis quam Cæsaris. Apostolicæ sedis hic honor est, B. Petro hæc dignitas reseruatur. Audi Cæsarem, fac quod petitur, sic:

*Semper bonos nomenque tuum, laudesque manebunt.*

Alii ad vtilitatem conuersi (quæ plurimum suadet) ex omnibus rebus, dicerent; Quas sanctissime Pater fecisti, quasque facturus es, nulla potest, vtilior esse coronatione Cæsarea. Veniet ad te diuus Cæsar primus omnium Principum, te Patrem appellabit, tibi filium se præbebit, tuis manibus coronabitur, iusiurandum præstabit, Germaniam regnis grauidam, ingenti populorum, Principum ac Prælatorum multitudine abundantem, tibi & Apostolicæ sedi beneuolam parentemque retinebit. Contemnat quicumque velit coronas, gemmas, aurum, purpuras, pomum, gladium, vñtionem, consecrationem, ceremonias, pompas; is certe quamuis subagrestis est, inficiari tamen non potest, quin tuæ S. ti & Apostolicæ maiestati conducatur, coronatum Cæsarem in amicitias foedusque tuum esse receptum. Namque si vetera meminerimus, tunc Ecclesiam floruisse, tunc imperium viguisse constabit, cum Romani Pontifices atque Cæsares vnanimes extiterunt. Essent fortasse nonnulli, qui diuerso calle procedentes, soliusque boni & æqui iuribus videntes, minime negandum dicerent moderno Principi, quod priscis Cæsaribus vltro fuisset oblatum: seruandas esse consuetudines; quod semel promissum esset, rebus immutatis minime violandum; benemeritum de Romana Ecclesia Cæsarem omnibus beneficiis atque honoribus cumulandum. At nos qua via incedemus? Illosne sequi libet qui gloriæ cupiditatem ingerunt? nihil minus absit à nobis initium \* gentilitatis, quæ ut laudis animalis ac ventosæ gloriæ mancipium nisi ad populares auras & inanes rumusculos recte facere nihil nouit. Nos qui Christiani sumus, ac non solum apud Christianos agimus, sed coram omnium Christianorum capite, duce, magistro, rectoreque stamus, non Oratorem, qui dixit, Ho-

\* f. vitium.



*nos alit artes, omnesque incendimur ad studia gloria, sed Apostolum potius imitari debemus, qui ait: Gloria nostra hæc est, testimonium conscientie nostræ.* Nec nos latet tuam S.tem diuina sapientia præditam, Bonum solum non populari rumore sed conscientie veritate metiri. Quid igitur ab utilitate arguamus? An ex debito, quia consuetum, iustum, promissum? Equidem licet his potentissimis fundamentis suadere res soleat, non tamen hæc omnia relinquenda videntur. Frustra enim suasis vtitur, qui supplicat sapienti. Nouit suopte ingenio sapiens, concessu an refutatu digna sint quæ petuntur, nec verborum falli lenocinio potest. Nos igitur qui coram sapientissimo Principe, coram prudentissimo orbis terræ fenatu, coram luminibus & intellectu Mundi, coram tanta maiestate, tanta doctrina, tanta rerum peritia sermonem habemus, satis esse putamus nudis verbis Imperatorie sublimitatis petitionem exposuisse. Scimus enim, si recta petimus, nihil nobis negatum iri: sin minus, fascinare verbis summæ prudentiæ oculos, aut oratione verum peruertere non valemus. In hac igitur parte quæ tuæ S. tis examinanda iudicio est, nullas suasiones adhibemus; sed arbitrio tuo totum relinquimus, ex quo nec iusta diffidimus obtinere, nec speramus iniusta. Effet iam peroratum, beatissime Pater, nisi (vt ante diximus) in calce verborum iussi essemus adiungere. Alterum est vt de concilio generali, quid sit Regis inde desiderium, intelligas. Ambo hæc paucis absoluemus.

Apud Neapolin conuenimus victoriosissimum Principem, Arragonum atque Sicilia Regem, & cum eo nepotis sui Serenissimi Portugaliæ Regis Legatum. Cum hisce diebus plusculis in tractatu fuimus, ac demum inter maiestatem Cæsaream & illustrem virginem Leonoram infantem Portugaliæ, Regina sororem sponsaliorum foedera percussimus, matrimoniumque conclusimus, quo nec nobilius, nec potentius, nec honorabilius, nec Christianitati utilius inter Christianos vllum contrahi potest. Quando & nobilitas nobilitati, & virtus virtuti, & potentia potentia, & magna magnis, & summa summis addita sunt: hinc Germanis Principibus, inde Hispanis proceribus in affinitatem, beneuolentiam, amicitiamque concurrentibus. Quod idcirco tuæ S. narramus, vt qui contrahendum coniugium hoc sciebas, iam contractum esse, vt patrem decet, cum filio lateris.

Sed venio ad secundum, quod addere promisi, idque finem orationi præbebit. Quæ hætenus dicta sunt, Beatissime Pater, commisit nobis Imperatoria maiestas, priusquam suo ex conspectu recederemus: quæ nunc dicturi sumus, per nouas & vrgentes literas in mandatis accepimus. Ea nec parua, nec contemnenda sunt sed digna tuis auribus, & hoc facerrimo coetu. De Concilio namque generali, deque loco conuentus habendi dicendum est nobis, ex quibus rebus magna potest utilitas redundare. Licet enim sub te vero capite, veroque Jesu Christi vicario vnita sit Ecclesia; plurima tamen sunt, propter quæ necessaria videtur conuentio Episcoporum generalis. Dissident Christiani Principes quam multi: concordia quærenda est. Labascunt cleri & populi mores: inuestiganda modestia, oppressam Ecclesiam quamplurimi lacesunt: recuperanda libertas. Ad quas res licet tua satis sit auctoritas, non tamen executio sine conuentu Prælatorum, consensusque Principum facile potest haberi. Cupit igitur generale concilium Cæsar vt hæc fiant. Sed quod generale concilium? Verum generale concilium, non abortiuum, non adulterinum, non contentiosum, non ambitiosum. Concilium in quo minora membra maioribus pareant, in quo nullum sit membrum, quod suo capiti non consentiat. Concilium (inquam) quod non de clauibus summi pastoris disputet, sed pro communi utilitate inuigilet. Summa est Romani præfulis auctoritas; quid attinet disputare? Omnis potestas Ecclesiæ à Christo principe per Romanum Pontificem veluti caput in cætera mystica corporis membra deriuatur, atque diffunditur. Hæc professio Cæsaris, hæc fides est, Euangelio credit, & oraculis Jesu Christi: scit Petro & successoribus suis dictum esse à domino:

p. 25. *Tu es Petrus, & super hanc petram edificabo Ecclesiam meam, & porta inferni non praualebunt aduersus eam: & tibi dabo clauis regni cælorum; & quodcunque ligaueris*



*super terram, erit ligatum & in cælis: & tu vocaberis Cephas. Pasce oves meas, & duc in altum rete; & eiusmodi, quibus referti sunt Euangeliorum codices. Ultra quem quisquis alium quærit; tenebras quærit, non lucem; stultior eo qui aperto feruentique Sole commentitium lumen accendit. Caterum quia maiestas Imperatoria non ad potentiam exercendam, sed ad fidem tuendam; commune bonumque promouendum, tibi que assistendum interesse decreuit; coronam prius accipere cupit, quàm Concilium conuocetur: indici antequam coronetur, neque petit, neque suadet, neque gratum haberet. Expedit enim admodum rebus agendis coronatum Cæsarem ac tibi iuratum in Concilio penes te sedere, tibi assistere, tuisque decretis fauorem impendere. Cumque sit Cæsar aduocatus Ecclesiæ, protector, defensor; adiutor, ac nullibi melius officium suum quàm in prouincia sibi parente valeat exercere; locum celebrandi Synodi in Alemania sub Romano Imperio petit: in alia Prouincia nec potest, nec intendit consensum præbere. Est enim Alemania locus ex tota Christianitate commodior: in qua (si quis rectè prospexerit) intra Rhenum & Austriam - Christianitatis umbilicum ad centrum reperiet: vbi exiuit ad Occidentem, sunt Hispani: ad Orientem, Græci; ad Septentrionem, Norwegii; ad Meridiem, vltimi Siciliæ populi. Cumque iam Græci in his quæ fidei sunt cum Latina Ecclesia sapiant, oportet & his locum concilii conuenientem nominare: fouendi enim iam sunt, & omni fauore amplexandi. At hi ad Alemaniæ partes per Vngariam breuem habent & facilem transitum. Vrbes præterea in Alemania sunt amplissimæ, & splendidissimæ, mansiones accommodæ, victui necessaria comparatu facilia, pax optima, pulcherrima quies, dulcissima libertas, saluberrimus aer; Principes ac populi promissorum ac iusti tenaces, mori quam deierare aut fallere malunt: nemo est qui de loco Alemaniæ iure conqueri possit. Nam qui medium Christianitatis & tot commoditates Alemaniæ dedit Deus, is quoque velle videtur, vt ibi nostro tempore generale concilium celebretur. Habes, Sanctissime Pater, quæ sit petitio Cæsaris: nobis & admodum iusta videtur, & utilis; Namque si pacem inter Christi fideles componere, si frugilitatem bonosque mores serere, si libertatem Ecclesiasticam vindicare, si partam vnionem seruare cupis (vt certissimi sumus) generale concilium non alibi conuocabis, quàm eo in loco in quo tibi Cæsar & possit & velit assistere. Pleraque alia, cum tuæ sanctitati libuerit, semotis arbitris referemus.*

## IV.

*ÆNEÆ SYLVII ORATIO SVASORIA AD NICOLAVM V. PP. VT CÆSAREM FRIDERICVM IN TVRCOS PASSAGIVM PARANTEM, MODIS OMNIBVS ADJUVARE VELIT.*

**M**OISES Vir DEI, Beatissime Maxime Pontifex, cum sibi successorem ordinaret Josue filium Nun, diuinam vocem ad se dicentem audiuit: *pro hoc, si quid agendum erit, Eleazar Sacerdos consulat dominum; ad verbum eius egredietur & ingredietur, ipse & omnes filii Israel cum eo, & cætera multitudo.* Quibus verbis non populi solum sed Reges & Principes admonentur, magnis in rebus, etiam bellicis, summi Sacerdotis, & consilium quærere & imperium sequi. Quod postmodum in nouo Testamento & in tempore gratiæ, multis exemplis & auctoribus est firmatum. Sicut & Constantini Magni & Theodosii, & Justiniani & aliorum Christianorum Cæsarum gesta testantur. Eam ob causam cupidus atque auidissimus diuus Cæsar Dominus Fridericus Romanorum Imperator Augustus, filius tuus obsequentissimus, suis diebus aduersus impios Mahumeti cultores generale passagium fieri, atque in illud suum studium, suas curas, suasque vires omnes conuertere; Te prius, magni DEI Vicarium, Christianæ plebis sacratum caput, perfectum ducem, optimum rectorem, veracem magistrum consulendum & audiendum & sequendum existimauit, cuius prouidentia noscere, auctoritas monere, potestas implere possit, quid sit agendum. Venit igitur ad te hodie,

tuum-



tuumque grauem & ornatissimum sacratissimum senatum, Cæsar, super uniuersali passagio cum tua beatitudine tractaturus. Coronatus enim iam triplici corona, eiusque regni beneficentia Rex confirmatus, cuius potentiam Daniel ferro comparauit, cuius limites solus claudit Oceanus, cuius fundator Octauianus, confirmator Dominus Hiesus fuit, quod Romana semper Ecclesia magni fecit, extulit, honorauit; cuius auctoritas in terris nisi tua cedit nulli: cuius officium est patrocinari Ecclesiæ, tueri religionem, parcere subiectis, & debellare superbos. Huius, inquam, Regni solium adeptus Cæsar, quid aliud cogitet quam Passagium, per quod & Christiani fortiores, & hostes fidei reddantur imbecilliores? Principes, inquit Sapiens, quæ sunt digna Principe cogitabunt. Reges apud Medos, ut Herodotus; apud omnes ut Cicero sensit, Iustitiæ fruendæ causâ sunt creati, iniuriarum propulsatores; qui si Platoni magno voluerint auscultare, cæterisque Philosophis recta monentibus obedire, procurationem Rei publicæ non ad suam, sed ad eorum qui sibi commissi sunt utilitatem, conuertere conabuntur. Atque hoc est, quod de Passagio Cæsarem & sollicitum & anxium facit. Super qua re dicturus, quæ sua mihi Maiestas imperat, oratiunculam meam tres in partes ego diuidam. In prima dicam, quid sit Passagium quod petitur. In secunda, cur petatur. In tertia, facillene Passagium fructuosumque sit futurum. Quibus in rebus si longior fuero, cum rerum magnitudine verba comparentur. Sic fortasse breuior apparebo; Imo ero reuera breuis. Nam docti dicere multa possunt: sola breuitas, ut Ennodius ait, commendat indoctos. Sed iam primum absoluamus. Passagii vocabulo nihil aliud designamus, quam militarem expeditionem numerosissimam aduersus infideles, per Romanum Pontificem indictam: quam qui sequuntur cruce signati plenariam peccatorum remissionem & merentur & assequuntur. Appellaturque Passagium, sermone Italico, quasi transitus. Nam sicut aues quædam certis anni temporibus de regione in regiones transeunt, dicunturque Passagium facere: Sic & Christiani nonnunquam armis sumptis trans mare incedentes, atque in hostes fidei ex Apostolicæ sedis iussione, prosilientes, & visi & dicti sunt Passagium habuisse. Nunquam tamen verum Passagium dici potest, nisi multorum fuerit populorum, qui migrare magis nouas sedes quæsitura, quam bellaturi videantur. Qualis Gallorum, Cimbrorum, Hunnorum in Italiam inundatio fuit. Intelligunt iam omnes, nisi fallor, quid sit Passagium quod petitur. Nunc petitionis causas exponamus, quas tres esse comperio: commiserationem, utilitatem & honestatem. Unde vero commiseratio prodeat, paucis aduerte docebo. *Quis infirmatur*, inquit Apostolus, *& ego non infirmor?* pulchre, recte, religiose, sancte dictum. Nam cuius pectus adeo durum est, ut dolentibus non condoleat, gementibus non congemat, tristantibus non contristetur? Cæsar quidem, postquam discretionis attigit annos, coepitque noscere fidei nostræ sacramenta, mox religionis induit Zelum rebus omnibus Diuini cultus præposuit augmentum. Sic enim & suæ naturæ bonitas, & sanguinis nobilitas exposcebat. Nam sublimis Domus Austriæ Principes, inter quos plures Reges & Imperatores claruerunt, tunc sibi prospere succedere sperauerunt, cum diuino numini bene & constanter famulati fuissent. Quorum vestigia sectatus Fridericus, defunctis Parentibus, ut primum tutelam exiuit, admodum adolescens trans mare nauigauit, contemnensque pelagus & tempestatum minas digitis a morte remotus quatuor aut septem, cupidus osculari locum, ubi fuerunt pedes eius, qui nos redemit, medio terræ salutem operatus, Hierosolymam perrexit, sepulchrum Domini visitauit, Caluariæ locum inspexit, montem ascendit Oliueti, vidit coenaculum grande stratum, & Pilati prætorium, intrauit desertum, transiuit Jordanem, Bethleem accessit, & vallem Josaphat penetrauit. Mirabilem sibi ac incredibilem deuotionem, sanctorum locorum uisio suggerebat. At cum spurcidos illic Sarracenos, immundos, horridos, sceleratos dominari videret, veniebat in mentem; tactus dolore cordis intrinsecus, nil aliud dicere potuit, quam Propheticum illud: *O Deus venerunt gentes in hereditatem tuam, polluerunt templum sanctum*



*Etum tuum, posuerunt Hierusalem in pomorum custodiam; & iterum sicut alius Prophetam clamat: Quomodo sedet sola, Civitas plena populo facta est vidua, Domina gentium, Princeps Prouinciarum est sub tributo.* Proh quantum urgebat angebatque Fridericum illius sanctæ Ciuitatis indigna seruitus, & illorum, qui trans mare sunt, Christianorum oppressio? sed quid Græcia? literarum mater, inuentrix legum, cultrix morum, atque omnium bonarum & optimarum artium magistra. Quem non misereat illius gentis afflictæ, conculcatæ, pessundatæ? cuius imperium non solum sub Alexandro Macedone suisque successoribus, sed sub Atheniensibus, Spartanis, olim florentissimum & potentissimum fuit, nunc vilibus effoeminatisque Turcis cogitur obedire. Quid Regnum illud Hungariæ nobilissimum, terra antiqua potens armis atque ubere glebæ? Heu quanta passi sunt Hungari diebus nostris, qui dum nostrum seruant sanguinem, fundunt suum, quorum pectora nostri sunt muri? Obligamur certe omnes Christiani Magnatibus & populis Vngariæ, qui pro nobis mortificantur tota die & facti sunt sicut oues occisionis. Ecce tibi præsentem illorum Regem puellum, pupillum, orphanum, Ladislaum; clarissimam & Regum & Imperatorum sobolem; qui dum suo regno suisque opem orat afferri, toti Christianismo consulit. Utinam tam tuam sanctitatem quam Cæsaris Maiestatem suæ lacrymæ moueant! Nam illi genti postulat auxilium quæ suis armis nobis omnibus affert præsidium. Accidit & alia calamitas Prouinciarum. Massagetæ, & alii Scytharum quam plures populi, nunc Liunioniam nunc Lituaniam vexant. Mauri non paruum Hispaniarum occupant regnum; Jonii, Carphatii, Ægyptii nostrique maris Insulas. Cyprum, Rhodum, Cretam, Siciliam. Quin & ipsa Italiæ littora Barbarorum sæpe classes inuadunt, asportantque Christianos. O nostram maximam negligentiam! O tempora! O mores! proh pudor! maior est Sarracenorum in sua perfidia, quam noster in fide Zelus. Dum gentiles fuerunt Cæsares, Idolorum cultores, augebatur in dies credentium numerus: nunc dum Christiani sunt Imperatores, Reges, Duces, Christi cultus, qui totum fere orbem opleuerat, in angulum Europæ reductus est. Africam & Asiam amisimus, Europæ vix partem tenemus. Mouetur super his Cæsar, compatitur afflictis fratribus, commiseretur iniuriam patientium, cupit laborantibus subuenire. Nam qui non defendit indigna ferentes neque obsistit, si potest iniuriæ, tam est in vitio sicut Philosophis placet, quam si parentes aut amicos aut patriam deserat. Quod ne sibi, neue tibi, quisquam imputet, Passagium petitur. Sed accipe nunc utilitatem, quam parere passagium poterit. Subueniemus laborantibus Hungaris; auferemus iugum seruitutis ex collo Græcorum; recuperabimus sanctam terram, exterminabimus idolum, monstrum illud pessimum, horrendum, ingens Mahumeti; & Christianæ religionis fines super & Garamantes & Indos proferemus. Jacet extra sidera tellus, extra anni solisque uias, ubi coelifer Atlas axem humero premit stellis ardentibus aptum! En magnam utilitatem! nam sic agentes, aut agere temptantes, incorruptibilem coelestis Regni coronam adipiscemur; quem reddet nobis in illam diem iustus iudex. Sed quid de honestate gloriaque dicemus, quam vel tuæ beatitudini vel Cæsaris altitudini accumulatum cernimus esse passagium? bellorum æquitatem maiores nostri sanctissime feciali iure perscripserant, denunciata indictaque bella iusta esse censebant. In quibus qui uiriliter pugnavissent, non vincentes modo sed occumbentes quoque dignos honore gloriososque iudicabant, atque his statuas dicabant & triumphales arcus. Quid nos de hoc bello dicemus? quod non terrenus sed coelestis Imperator indicit; in quo non Pomperii sed fidei propagatio quæritur; in quo non paternæ domus, sed fides Catholica defenditur, & honor Saluatoris nostri, qui cum in forma DEI esset, non rapinam arbitratus est, esse se æqualem DEO: sed semet ipsum exinaniuit, formam serui accipiens, in similitudinem hominum factus obediens usque ad mortem, mortem autem crucis, ut nos ex Diabolica seruitute redimeret. En gloriosum atque honestissimum bellum, quod tanti beneficii memores suscepimus, in quo Redemptoris nostri, in quo magni DEI causam tue-

bimur,



bimur, in quo qui uitam temporalem amittet, acquirat æternam, & famam clarumque nomen adipiscetur sempiternum. Ac tantum de secunda parte sit dictum, in qua, cur passagium quæreretur, monstrandum fuit. Supererat nunc de possibilitate congregandi passagii, deque spe fructus dicere. Plurimi sunt, beatissime Pater, qui cum nominari passagium audiunt, ecce vetus somnium, inquit, vetus deliramentum, veteres atque inanes fabulas. At Vrbanus antecessor tuus, cum vexaretur a Paganis Orientalis Ecclesia, Sarracenique terram sanctam inuasissent, motus Alexii, qui Constantinopolim tenebat, precibus & aliorum Christianorum, qui sub tributo Turcorum vitam agebant, rogatibus, excitatus, graui & laborioso itinere in Galliam profectus, maximum exercitum comparauit, quibus nullæ Sarracenorum copiae, nullæ vires obsistere potuerunt, quin & Antiochiam expugnarent & Hierosolymam obtinerent. Vnde adhuc & Urbani qui conuocauit Passagium, & Gothfridi, qui duxit, illustre nomen habetur: quamuis quinquaginta & trecenti ab illo tempore fluxerint anni. Quid tua sanctitas faciat, quo pro similibus ac maioribus causis verus Imperator totaque Christianitas orat Passagium convocare? Pensandum est, inquires, an hodie Spes bona sit habendi Passagii: quia nemo sciens, impossibilia temptat, neque aggreditur quisquam quod assequi desperat. Magnum facinus Spes enutrit. Sunt ergo duo considerata, sanctissime Pater: unum, an Christiani facile in Passagium trahi possint; Alterum an coacto Passagio Spes sit magna vincendi. Nam quamuis dubius est omnium bellorum eventus, nunquam committendum est prælium sine spe quadam & argumento victoriae. Ne, sicut Augusti Prouerbum, aureo piscantes hamo videamur; quorum damni maior quam lucri ratio possit haberi. Difficile quippe primum videtur, Christianos, qui sunt inter se discordantes, apertisque flagrant odiis, in unam Passagii ducere sententiam. Verum quod multi putant obstare Passagio, Sapientia Cæsaris conducere iudicat. Namque si Pax Christianos haberet, incassum quietos Principes atque otio torpentes populos excitaremus; neque utiles bello manus inuenirentur; horrerent inertes ferrum, neque signum neque tubam ferre valerent. At nunc exercitati bellis populi ultro sese offerrent, facilius ex bello vocatur in bellum miles, quam ex otio. Bonum est viro, sicut Propheta testatur, qui portauerit iugum ab adolescentia sua. Quis Christianorum est, postquam pugnare oportet, qui non potius in hostes, quam in domesticos fidei gladium striget? placebit omnibus, arma in Turcos vertere, patriam ut quietam relinquunt. Et fortasse unica pacandi Christianos via est, passagii conuocatio. Martiales enim & feroces Europæ populi, nescientes quiescere, nisi aduersus externos præliantur, in sese ruunt. Qua ratione ductus olim vir Senatorius quidam, excidi Kartaginem prohibebat; ne pacem habentes in circuitu Romani, manus in se verterent: sicut Reges Israel fecisse constat, qui victis hostibus mutuis cecidere vulneribus. Pacem ergo ut habeant Christiani, bellum est in externos transferendum. Ad quam rem neque Germanorum illustris animus, neque cor nobile Gallorum, neque sublimis mens Hispanorum, neque gloriæ cupidus Italicorum Spiritus deerit. Omnes, quod tua videbit sanctitas, corde magno & animo volenti suscipient. Quis dubitet, cogi posse passagium, quod Romani Pontificis auctoritate decretum, & Imperatoris voluntate fuerit ordinatum. Sed dicit fortasse quispiam, quod Bractius olim, quamuis hostis Ecclesiæ tamen alioquin homo sensatus, frequenti sermone usurpare solebat: *Qui bellum gerat, tribus potissime rebus indigere & has tres unam esse pecuniam.* Vnde igitur aurum corrademus, ad tantum & tam remotum bellum necessarium? Sunt in promptu modi, Præsul maxime, quibus inueniri pecunia poterit, sumptusque necessarii ministrari. Sed hos vulgare modo non est ex usu. Illud tamen dicere possum, Ciuitates, quæ propter perpetuo bello fatigantur, libenter Passagio contribuent, ut pacis tandem compotes fiant. Non est igitur desperata res passagii conuocatio nec rursus spes magna victoriae deerit. Nouit Imperatoria sublimitas, Assyriorum, Turcorum, Ægyptiorumque gentes imbelles, inermes, viles, effœ-



minatæque sunt, neque animo neque consilio martiali. Quis aut tunicatos mitratosque Turcos, aut braccatos Ægyptios timeat? quos Rapsaces ad Ezechiam Regem loquens baculo arundineo contractoque comparavit. Sarmatica erunt spolia sine sudore & sanguine. Multa notavit Cæsarea Maiestas, cum transmarinas partes lustraret, quæ spem certissimam victoriæ præbent, suoque tempore patefient. Nec moveri debemus, quia nostri nonnunquam exercitus ab illis victi deletique sunt. Nam neque viribus eorum, neque rei militaris peritia, sed nostris peccatis ascribendum est. Quod si emandati fuerimus, rectaque mente Christi causam defensori bellum susceperimus, nihil de victoria fuerit hæsitandum: quia non relinquet Dominus virgam peccatorum super sortem iustorum. Juvabunt & nos tum divisiones illorum, tum odia, quæ cum Tartaris habent assiduaque certamina: iuvabit & gentis illius desperatio. Nam Mahumetum, cui maxime credunt, sectam suam in Octingentos usque annos augendam, exinde minuendam, astruunt prophetasse. Is autem sub Eraclio Cæsare malignari occepit, post quem supputantur anni quadraginta & octingenti. Quæ res terrorem non parvum Turcis, spem Christianis adiicit, nam etsi pseudopropheta Mahumetus est, non tamen falsum vaticinium dici potest, quod sacris Hieremiæ sermonibus quadrare videmus. Hieremias enim primo & quinquagesimo capitulo, quasi tuam sanctitatem & Cæsaris Maiestatem aduersus Mahumetum suscipere bellum hortatur; *Nolite, tacere inquit, super iniquitatem eius: quoniam tempus ultionis est Domino: vicissitudinem ipse tribuit ei.* Possemus ad hanc rem plura deducere: sed neque doctissimis tuis auribus, neque præclaris sapientissimisque patribus, qui assident, quique astant, donanda sunt verba. Satis est nobis absoluisse, quæ promissimus, & quæ Cæsarea sublimitas mandauerat, exposuisse. Intellexisti desiderium suum, sanctum propositum, integram mentem. Verum quamvis examen Imperatorium sic de Passagio sentiat, totum tamen & consilio & iudicio tuo relinquitur, qui ligandi solvendique claves accepisti, qui Petri & Pauli locum tenes iam cum Christo regnantium; cuius est inter sanguinem & sanguinem, inter causam & causam, inter lepram & lepram iudicare. Cæsar cum esset, hac vice apud tuam Beatitudinem, noluit hanc rem intactam relinquere; quæ sibi adhuc in minoribus constituto atque ab ineunte adolescentia semper cordi curæque fuit. Alius fortasse vel Generale Concilium, vel Reformationis decreta petiisset, sed quod maius Concilium potest, quam tuæ Sanctitatis tuique sancti Senatus præsentia: frustra Concilium petit, qui Romani Pontificis mandata, non recipit. Vbi tua sanctitas est ibi Concilium, ibi Reges, ibi mores, ibi decreta salubrisque Reformatio. Cæsari susceptis Imperialibus infulis, tuaque sacra manu coronata, nihil hoc tempore visum est antiquius, quam de Passagio, tecum agere. Quod si fortasse prima fronte videtur arduum, nihil est tam difficile, quod querendo non fiat facile. Asperis in rebus, & vir noscitur, & gloria quaeritur. Quæ magno animo fortiter excellenterque geruntur, nisi quodammodo pleniori bucca laudare solemus? difficiles aditus virtus appetit. Clari & illustres sunt tituli tui, gloriosissime Præsul; qui unionem feceris, Jubilæum indulseris, Cæsarem coronaveris. Passagii tamen titulus, & dignior & diuturnior omnibus erit. Quem ne Successori relinquo & Cæsarea pietas suadet, & omnis Christianitas orat. Nam tibi iam coronato Cæsare, quamvis multa incumbant magna & alta negotia, nihil tamen est, de quo vel utilius agere vel gloriosius, quam de Passagio, valeas. Amen.

## V.

THADEI QVIRINI, PATRICII VENETI, AD P. 28.  
FRIDERICVM III. ROM. IMP. NOMINE SUE REIPUBLICÆ, ORATIO GRATULATORIA.

CVM multa sint, gloriosissime Cæsar Auguste, quæ ab immortali DEo nostra Resp. summis assiduisque precibus ac votis sibi dari optasset, nihil profecto maius-



maius, nihil optabilius ei contingere posse existimauit, nihil ardentius expetiuit, p. 29. quàm vt tu & Augustissima Imperatrix vxor tua eam inuiferetis, & vestri nominis splendore ornare ac illustrare dignaremini. Dicit enim non potest, quantopere non modò senatus ipse ac Princeps, sed omnis sexus, omnes ordines vos intueri, suscipere, cum cultu & obseruantia prosequi concupiscat, vt ad declarandam animi lætitiā non satis vultus, non oculi, non notæ sufficiant vires. Nam cum suapte natura nostra Resp. omne hominum genus, tum imprimis Principes & Reges munificentia, humanitate & amore prosequuta sit; vos qui principum principes & Christiani nominis splendor estis, quibus honoribus, quibus lætitiæ signis, quibus humanitatis & munificentiae modis prosequetur, complectetur, extollet? Quod cum ita sit, serenissime Imperator, quo gaudio, qua lætitiā aduentum hunc vestrum expectasse nos existimatis? qui honores, quæ dona, quæ munera Principum, Regum, populorum cum hoc nostro studio comparari possunt? Nam si superioribus temporibus, prima illa tua ætate (quod meminisse debes) libentissimè te vidimus, cum in Syriam euntem omni indulgentia & honore prosequuti sumus; quo studio videndi tui ciuitatem flagrare existimas, cum eundem te insignibus Imperii ornatum ac condecoratum, & tanta affinitate auctum, Principem Christianæ religionis, ac defensorem huius nostræ ciuitatis à stirpe antiquissima amicissimum, non solum visura, sed etiam acceptura sit. Sed cum omnibus de causis nostra ciuitas meritò exulteret, ac lætitiā diffuset, (auide enim, quæ summa sunt, ab omnibus expectantur: nihil autem maius humanis in rebus tua Maiestate omnes existimant?) tum verò nulla re tantopore commouetur ac studio tui incenditur, quam quod summam tuam ergo Remp. nostram voluntatem ac propensissimum studium recognoscit. Vidit enim ac intelligit, intuentissime Cæsar, te cætera Italiæ loca, vrbes, regiones necessariò accessisse; in hanc tantum Urbem studiosè ac libenter diuertisse: & cum alia via in patriam redire posses, indignum vetere necessitudine & antiquissima amicitia existimasse, conspectus ac regiæ Maiestatis tuæ fructum, quem libenter omnibus impartisses, illis potissimum denegare, qui laudis, decoris, honoris, gloriæ, magnitudinis, amplitudinis, maiestatis tuæ cupidi fautores semper extitissent. Quod quidem tuum erga Remp. nostram studium, animum, voluntatem quanti eum ab omnibus, tum verò à Senatu atque ipso Principe fieri putas? DEum quendam mihi crede è cœlo hodie delapsum & ad se demissum nostra Resp. arbitratur. Quid quod augustissimam vxorem tuam, quam tecum per ea quæ adieras Italiæ loca semper duxisti, separatim ad nos præmittere studuisti. Quod illud & quantum amoris, fidei erga nos signum? Maiorum tuorum constantiæ, beneuolentiæ, fidei erga hanc Remp. permulta monumentis atque animis nostris signa & documenta reposita & consignata habemus: sed hoc certè maximum, quo cætera confirmata sunt, quod quos principes tui in Italiam aduentus exceptores habuisti, eosdem gloriæ, splendoris, ornamentorum tuorum, & consummatæ felicitatis spectatores, & congratulatores postremos esse voluisti. Huius igitur communis gaudii & publicæ lætitiæ nuntii ex senatorum numero xx. ad Imperatoriam Maiestatem tuam præmissi sumus, tibi & fortunæ ac serenitati tuæ non solum pro confirmato & aucto Imperio publicè congratulamur, sed omni laude prosequendum putamus. Quod enim seculum, quæ posteritas non celebrabit, non recordabitur Fridericum tertium Imperatorem maximum ita in Italiam descendisse, vt cum omnis Italia discordia & bello flagraret, adeo tranquillè, adeo quietè atque amice ab omnibus populis, Principibus, Regibus acceptaretur, vt non Rex externæ gentis ac nationis, sed eiusdem regionis dominus, & quodammodo communis quidam omnium gubernator ac rector charus acceptusque venisse videretur? Atque hoc non eò dico, quod non ita fieri debuerit (nam Imperium Romanum tuum est, aut quorum maiores tui, aut tu esse voluisti) sed quod rarò superioribus temporibus, memoria certè nostra & parentum nostrorum nunquam accidit. Nam ceteri Reges cum in Italiam venissent exercitu adducto aut quasi ho-



stes eam diripuerunt atque incenderunt, aut discordia flagrantibus rebus cum alteri parti se adiunxissent, seditionem potius in Italiam attulisse quam communi otio & Imperii saluti consuluisse viderentur. Quod cum abs te secus factum sit, serenissime Imperator, quis vel non sapientiam tuam laudabit, vel fortunam admirabitur? Equidem sic censeo, atque adeo censeant ciuitatis nostræ Principes religionis tuæ conscii & prædicatores, factum hoc fuisse diuinitus, ut qui tantam animi pietatem ab initio ætatis præ te tulisses, qui religionis studio cursus ac nauigationis periculum, tot discrimina hominum locorumque sponte excepisses, ei potissimum Imperio præficere, quod nominis Christiani salutem ac magnitudinem, cultum, religionemque tueretur: & cum tranquille ac leuiter nomen tuum constituisses, tum si quid rerum humanarum vitio, aut temporis vetustate prolapsum esset, quiete ac sine ullo belli strepitu, Christianeque (ut ita dicam) restitueres. Nihil enim Christianum non modo Imperatorem, sed hominem magis decet, quam huma- p. 30.  
nitas, lenitas, clementia, pietas, fides, caritas: quæ omnia quum ita in te eluceant, ut à natura insita atque innata esse videantur, quis te, nisi fortè inuidus & obtricator, summis laudibus non efferat? quis non admiretur? Quis (si fieri posset) non modo perpetuo videre, sed in Italia retinere cupiat otii, quietis, tranquillitatis studiosissimum, improborum, irreligiosorum, seditionum inimicum? Nos vero non solum te laudamus, sed vehementius admiramur, nec hoc fortunæ tuæ tribuimus, sed diuinæ prouidentiae assignamus, quæ talem te esse voluit, ita instituit, eum delegit, qui & communi Christianorum saluti & decori consulere, & eius honorem ac cultum tueri ac conseruare velles ac posses. Sed ne multus sim atque aliquando concludam, sacratissime Imperator, ita tibi persuadeto, quod ab initio dixi, lætum ac faustum hunc diem huic ciuitati illuxisse, quo te ab omnibus infimis, mediocribus, summis sic celebrari, sic videri, sic accipi cernes, ut non aliàs te vidisse, sed DEum quendam in Urbem nostram accessisse putent, atque omnes ita iudicent, te cum cæteras Italiæ ciuitates libenter adieris, huic uni potissimum ac maximè indulsisse, quam duplici lætitiæ genere afficere volueris, & augustissimo vxoris aduentu, qui nobis optatissimus est, & tuo. Veni igitur, serenissime Imperator, læto animo in eam Urbem, quæ etsi amplitudinem tuam capere vix potest, ac certe voluntate complecti potest. Vbi si quid desideraueris, si non omnia quæ Maiestas tua meretur, suppeditata esse videbuntur; id non voluntati, sed imbecillitati nostræ assignabis. Omnia certe quæ nostra sunt, summa, parua, mediocria, tua esse volumus: hæc tibi publice offerimus, atque omnia deferimus. Vnum illud certè persuasum tibi esse volumus, quod minimè dubitamus, cæteris rebus fortasse ab aliis non potuisse vinci, studio certè erga te, animo, voluntate, non modò cæteris non cecisse, sed cum tuis etiam contendisse.

## VI.

*ALIA ORATIO, PRO VICARIO CREMONÆ N.  
AD EUNDEM IMP. FRIDERICUM ADVENTANTEM HABITA, PENES LAURETUM, XIII. KAL.  
JUN. MCCCC LII.*

**S**VMAM Deam atque virginem Mariam, ex qua Christus mirificè natus est, \* ab his opem expostulo, fer opem summe rerum, fauete superi reliqui, ut quæ mente concepì, dicturus ad summum terrarum Principem, gratè possim in hac corona exprimere. Tuque Cæsar annue, & benigna fronte exhibe te nobis, ut quod rei magnitudine efficere non confido, instante tua benignitate ac clementia audeam. Dicam ergo, clementiæ tuæ iudicio conseruati sumus, enarrabo etiam clementiam tuam ac virtutes, quæ te ad tantam altitudinem euexere: subinde perditionem ac schisma fermè totius populi Christiani, à quibus subtraxisti & conseruasti nos: Demum singularem tuam victoriam. Dabo tibi præterea verbis eius honorem hunc quem flexum vides, pro quo siquidem iussus ad te oro. Cuius  
quanta



quanta sit virtus ac præstantia, cum tamen ex plerisque aliis illud intueri liceat, tu tamen perpalam omnibus id notum fecisti, exornans virum pulcherrima dignitate Marchionatus, atque comitatus, vicarium tuum præterea vrbi præclarissimæ Cremonæ præficiens, luce tamen clarius me verissima loqui apparebit. Et has quidem laudes tuas oro, vt ita grato atque beneuolo animo excipias, quemadmodum pure ego offero. Gratias ago præterea immortalī DĒo & summo, quod datum sit mihi hisce oculis te intueri posse, quem mentis acie millies conspicatus sum. Quanquam enim etsi oblectat me Principem videre, vt tu es, & membris formosissimum, proceritatis Heroicæ, gratissimi coloris, pugnacitate ac robore singulari, oblectat me tamen vltra modum contemplari ac prædicare laudes tuas. Prætereo admirationem diuitiarum tuarum; ac regiones, quæ multæ atque amplissimæ sunt, taceo. Attingam ea duntaxat quæ viris optimis ac diuinis conueniunt, quæ nunquam mortales deserunt, vel post mortem quoque. Solæ igitur virtutes atque animi possessiones, quæ sunt, verè & insigniter ditant homines; quemadmodum sunt religio & Deorum cultus, iustitia, fortitudo, temperantia, liberalitas, clementia, prudentia, caritas, & talia animorum munera. Primum verò quantum mortalibus præstes fide ac religione, cottidie licet intueri, qui te audimus in cunctis operibus tuis DĒum anteponere, suffragiisque accersere ea quæ tandem prodire ex te opera videmus, vt cum humanis viribus maximè grata sint, tum & diuinis maximè consentiant. Siue fidem quæ est rerum sperandarum credulitas, quasi sequela veritatis, & fiendarum constantia. Nam & religionem tuam & cor piissimum cum ex multis præclarissimis indiciis, tum ex eo intueri licet, quod in sacro pectore tuo sæpe infixum gestas. Sunt profectò signa illa hæc lucu-

p. 31. lentissima optimæ mentis tuæ, tuique humanissimi cordis ac sanctissimi. Iustitia autem quantum polleas, absque caligine videmus, cum iustitia sit constans \* tu non solum id perpetuò cupis atque vis, imo & opere exequeris, continuò afflictos subleuando, colligendo dispersos, spoliatos restituendo, pulsosque iniuria ad lares proprios reducendo. Quem sanè te non vt virum ex terris profectum, sed vt \* lapsum de coelis intuemur. Temperans verò quantum sis, & castitas tua, & vitæ moderatio, abstinentiaque à rebus & iuribus alienis, maximo documento orbi terrarum est. Quid dicam de fortitudine non corporis verum animi, quo in animo præclarissima illa virtus residet. Nunquam fuit te quisquam infractor aut validior, honorem atque veram gloriam spretis reliquis semper anteponens. Docuit id permaximè dimicatio olim quædam cum Teucris habita, in qua etsi aliquorum petulantia ac superbia (quos nunc taceo) qui aduenerant præsidio, multa corpora tuorum deuicta fuerint, tu tamen inuicti animi extitisti, vt victores ipso bello superaueris. Quis enim famis & sitis, cum est opus, tolerantior te vbilibi reperiri potest? Quis gelu pari animo te magis exuperat? & humi iacere seis, ac loricatus dormire, montes superare, Marti te opponere, ac dura tandem quæque diuincere. O quàm dignè ac Cæsariè! honos enim ipse & vera laus vtcunque rebus caris anteponendus est! De liberalitate autem tua ac munificentia, plenus est terrarum orbis, plenissimi mortales. Nihil in pectore illo sacro malæ cupiditatis est. Cupis enim (vt par est, ac Cæsare inuicto dignum) non nummis, sed possidentibus nummos imperare; non auri pompa, sed virtutis cuspide hostes terrefacere ac deuincere. Caritate vero ita in Christum ardes, vt non publicam ac superbientem personam, sed priuatam atque humanissimam suo loco videamus. Quam autem clementiam tuam dicemus, qua te cunctos præstare mortales, & qui sint, & qui fuerint, & qui dici aut imaginari possint, clarissima luce conspicamur. Si enim intacto honore tuo potes, nullo infestiore telo ad vltiones vteris quàm clementia; ignoscens cunctis offensoribus, admonitionis Senecæ perdoctissimus; *Maximum vindictæ genus esse posse parcere.* Prudentia verò tibi in cæteris rebus ac virtutibus vteris, vt nihil exeat de te, cuius probabilis non possit reddi ratio. Hæc sunt diuina tua opera; hæc tuæ inuictæ atque benignissimæ mentis diuitiæ, quibus ab religiosissimis atque illustrissimis diuinæque prudentiæ viris sacri Romanorum



Imperii collectoribus magno omnium consensu ac discrepante nemine (inauditum iam multis seculis) Mundi gubernator & Romanorum Rex promptissime dictus & declaratus es. Considerant hi se verissime ad te posse dicere, quod ait supremus Poëtarum ex Latinis ad Octavianum?

*Hæ tibi erunt artes, pacique imponere morem:*

*Parcere subiectis, & debellare superbos.*

Tunc existimo \* ante nostris temporibus plurifariam calamitatem, schisma, & totius Christianitatis scissuram ac diuisionem, quibus, infirmitatibus medicamina illa, quæ veri Principis diximus, magna acclamantibus voce tu peropportune vindiquaque illa compares. Opus erat pace illam expostulantibus tu illa dignis quibuscunque tribuis. Opus veniâ multis peccantibus & noxiis. Tu poenitentibus & aberratis discedentibus affluenter donas. Opus erat asperiori correctione, & virga ferrea grassatoribus ac superbis pertinacibus. Tu, si poenitere nolint, potentissime ac victoriosissime debellasti. O singularem victoriam ac sanctissimam! Ipsam Victoriâ vincere est, se ipsum vincere, atque ea illa agere quæ victores communiter non efficiunt, neque sciunt efficere. Solent namque insolentia quadam & elatione nimia de victoria aut sæuire, & sæpe insanire, aut acrius sanguinem contrectare, recordarique vehementius iniurias. Tu autem nihil minus: humanior ac benignior victoriosus, quàm victi reliqui. Omni itaque præclarissima regnandi arte non solum doctus, sed doctor admirabilis atque abundantissimus valde es, & ita reputatus, summa de te præstans omnia. Æquum enim est, qui sibi omnia deberi volunt, debere & ea summa omnia de se præstare. Nec ulla est certior aut stabilior regnandi ratio, quàm si qui regna obtinent, ab omnibus dignissimi omni regno iudicentur. Audi Rex clementissime Xenophontem in quodam eius opere dicentem: *Dita amicos; te ipsum ditabis. Auge civitatem* (id est, Imperium) *tibi enim ipsi comparabis potentiam. Quære illi amicos atque socios, puta civitatem quidem propriam domum, ciues verò propinquos, amicos autem filios, filios velut propriam animam: & hoc omnes vincere coneris officio. Si enim amicos complectere, nihil tibi inimici obesse possunt. Quæ omnia si tu feceris, cunctarum quæ in humana sunt vita, pulcherrimam ac beatissimam rem possidebis. Felix enim cum sis, nemo tibi inuidebit.* Hæc ille. Tibi igitur omnium virtutum perpolitio, tibi iustitiæ pleno, temperantiæ, fortitudinis, prudentiæ, religionis, ac similibus, tibi omnium bonarum artium regnandi refertissimo, tibi & pacis, & p. 32. belli, & ignoscentiæ potentissimo, tibi victoriosissimo singulari, ex qua \* inuictissimo, tibi Sigismundo, tibi sublatori tandem omnium malorum nostri seculi, vna cum Virgilio verbis Anchisiadæ ita aio: *Æn. i.*

*Dii tibi, si qua pios respectant numina, si quid,*

*Usquam iustitiæ est, & mens tibi conscia recti,*

*Premia digna ferant. Quæ te tam læta tulerunt*

*Sæcula? qui tanti talem genuere parentes?*

*In freta dum fluvii current, dum montibus umbræ*

*Lustrabunt conuexa, polus dum sidera pascet,*

*Semper honos nomenque tuum laudesque manebunt.*

Quibus ex omnibus id tandem plus quàm satis intueri licet atque intelligere, quod tuæ antea proposui Maiestati. Demum clementiæ tuæ iudicio quod seruati sumus. Rectè igitur vnus inuictus es à quo & victoriæ ipsius conditio visque deuicta est.

Restat nunc tuæ offerre Maiestati (quod tamen tuum, & diu etiam valde est) Heroem hunc cuius verbo ad te gratias acturus sum, suæ nouæ dignitatis ob clementiam tuam atque abundantem gratiam; Quem quidem etsi non multum oratione mea in præsentiarum tibi collaudabo, collaudabit maximè id tamen, quod tibi carus, & honoratus & acceptus sit. Non potest namque non illustris esse, qui ab illustribus clarus habetur, cuiusque præterea antiquam gentilitatem & à Romano prisco ortum sanguine paucis edocebo. Constat enim ex Chronicis T. Liuii, urbem Cremonam



monam coloniam fuisse Romanorum. Ex quibus satis intueri liquet, & non leuibus quidem coniecturis, hunc praesentem Romanae & antiquae familiae fuisse. Verum liquet ex alio capite id luculentius conspici, quoniam non nisi acta Romana atque magnificentissima ab hoc exeunt. Non credit hic gratias posse ad te referre tot tuis in se gratiis, totque beneficiis. Non confidit enim, non dicam remunerare, sed ne numerare quidem tua in se vberissima atque amplissima beneficia. Orat igitur multum & summa prece, ut summus ille Deus qui in coelis est, ac potentissimus retributor, sua in te ostendat de his rebus munera. Ipse autem quae potest offert, Urbem videlicet, quam tuo gubernat imperio, se, ciues, moenia, rura, castella, amicos, clientes, natos & omnem animam. Pro equidem ultimo ita iussus ad te dico, quod Volscorum oratores in deditione urbis ad Romanos, mira Camilli probitate ac iustitia: *Mittite qui arma, qui obsides, qui urbem patentibus portis accipiant. Nec vos fidei nostrae, nec nos imperii vestri paenitebit.*

## VII.

## P. 33. ΜΙΧΑΗΛΟΥ ΑΠΟ-

## ΣΤΟΛΙΟΥ ΤΟΥ ΒΥΖΑΝΤΙΟΥ

πρὸς τὸν εὐσεβέστατον καὶ γαληνότατον βασιλέα Ῥωμαίων καὶ πάντων Χριστιανῶν κύριον, κύριον ΦΡΙΔΕΡΙΚΟΝ, λόγος πρὸς Φωνηματικούς, αἰτῆσαι ἄριστον ἡμῶν τῶν Βυζαντινῶν.

ΕΔΕΙ τὸν ἐπιβαλλόμενον, γαληνότερον βασιλέα, ἔχ' ὅπως πάνθ' ὑμνήσῃ τὰ σὰ γενναῖα καὶ φανότατ' ἀνδραγαθήματα, ἀλλ' ἐν γέ τι καὶ ὅτι οὖν τῶν σωτῆ, τῶν τε ἄλλων ἡσσαν ὑπάρχον κατὰ πάρεσιν, εἶναι μετὰ ἁξιοῦσιν τὴν φιλοσοφίαν, Ἀριστοτέλην, ἢ Πλάτων' αὐτῇ ῥητορίᾳ δ' αὖ πάλιν, Ἰσοκράτην, ἢ Δημοσθένην. Στισηχορον δὲ ἢ Ὀμηρον καὶ ποιῆσιν. μόλις γὰρ ἀνέτως ἀφικέσθαι τὰ πρὸς ἡμῶν τῶν διωκθῆναι. ἐμοὶ δ' ὀλίγω πρὸς ἡμῶν γενναίᾳ φιλοσοφίας, καὶ μήτ' ἐν ποιήσει μήτ' ἐν ῥητορικῇ τῶν θεράπωνισιν αὐτῆς ἐγγχερόνισαντι, διὰ τε τὴν ἀπεικονιστὴν ἄλλωσιν τῆς πατρίδος, καὶ τὰς μὲν αὐτῇ ζωτικῆς, τίς ἂν ὀφείλῃ πρὸς αὐτῆς ἔχειν; ἢ τίς οὖν ἂν δικαίως γελοιοῦσθαι το βελομένῳ πρὸς ἀλλήλων τοιστονὶ βασιλείᾳ, οὐκ ἀθεῖ κατὸντα τὰς τῆς βασιλείας ἡνίας. καὶ ταῦθ' ἔτω φύσεως τῶν ἀνθρώπων ἐχόντων, ὁξυδερκεῖν μὲν πρὸς τοῖς καὶ ὀτιοῦν ἐπτακότας, πρὸς δ' τοῖς σπουδαῖον τι κατωρθευκότας ἀμβλύωπειν. τό, τε μὲν ἀγαθὸν κερύπτειν, τό, τε δ' φαῦλον ἀνακηρύττειν. ἀλλ' ἐπεὶ περ μὲν εἰκόνας ἄλλας πολλὰς τε καὶ ἀγαθὰς ὑπερεκείμενας καὶ ὑφειμένους, μανθάνομεν καὶ τὸ πάντων τῶν ὄντων ὑπερεπέκεινα θεῶν, τὸ ἐντε καὶ αὐτὸ ἐν, τὸ ὄντε καὶ αὐτὸ ὄν, ταῖς παρ' ἡμῶν εὐλογίαις ἢ δυσφημίαις, εὔτε καὶ ἄλλως ὡς φασὶ ἀγασθῆσθαι, ἢ πρὸς καὶ σοὶ θεοτάτε βασιλεῦ, πρὸς αὐτὸν ἂν εἴη τὸ παρ' ἡμῶν ἐφύμνιον καὶ λογύδιον. ἔχ' ὅσον ἀφ' αὐτῶν κινουμένων, ἀλλὰ καὶ ἀπὸ θεράποντων οἰκείου τῶν κρατῶν τῆς βασιλείας σου, ἀνδρὸς Βυζαντίου, υἱέως πατρὸς, εὔτε γυροῖς καὶ πλούτου καὶ φρονήσεως ἔχοντες, πρώτου μοι τῶν φίλων τῶν καταλόγου, γνωρίμου τοῖς ἄρχοις καὶ σπουδαῖοις, τοῦ κίρην τῶν σῶν

## MICHAELIS APOSTOLII BYZANTINI ORATIO

acclamatoria, ad Religiosissimum & Serenissimum Romanorum Imperatorem, & omnium Christianorum Dominum, Dn. FRIDERICVM III. rogatu Aristonymi Byzantini.

OPORTEBAT eum, qui tua, Serenissime Imperator, non quidem omnia illa generosa & illustria facinora, sed vnum tantum, idque ceterorum comparatione minimum celebrare aggreditur, exoptare sibi Philosophicum quidem acumen Aristotelis, aut Platonis, dicendi vero facultatem Isaei aut Demosthenis, vim denique poeticam Stesichori aut Homeri: Et ne ita quidem facile possit id, quod conueniebat; consequi. Mihi vero qui vix dum Philosophiam degustavi, & nec in Poesi, nec in Rethorica (quae eius pedissequae sunt) temporis ullam confirmationem habeo, propter nimirum abominandam patriae expugnationem, & eos qui inde secuti sunt, casus; quae venia speranda? aut quis non merito opprobret audendi interpellare tantum Imperatorem, non sine numine diuino capeffentem has imperii habenas? praesertim cum ita a naturâ comparati homines sint, ut vel leuiter impingentes perspicacissime aduertant; excutiant contra ad eos, qui pro virili officium faciunt: atque ita quae bona sunt, occultent; quae mala, praconis quasi voce traducant. Quia tamen inter varias sublimes & humiles similitudines hanc quoque didicimus, Numen illud diuinum super omnia eminens, quod & vnum est, imo ipsa vnitas, & verè Ens, imò ipsa essentia, ad nostras laudes & vituperia perinde (ut dici solet) se habere: ad te quoque, diue Imperator, nostra haec similiter attinebit celebratio & oratiuncula. Ad quam ego non tam per me profilio, quam compellor per proprium famulum potentissimae Maiestatis tuae, hominem Byzantium; qui patre natus est nobili, diuite ac pruden-

ANN.  
1457.



prudente, in amicorum meorum censu facile primus, virisque adeo principibus ac præstantibus non ignotus, quin & præco virtutum tuarum (quamvis alieno præconio nil egeas, ipse tui per prudentiam, regiminiſque formam, & complures virtutes abundè præco) sapientiæ nimirum, bonitatis, iuſtitia, temperantiæ, omnium denique (vt verbo dicam) quæ vidit & quæ audiuit. Etenim ſi non obſequar amico, & quidem huic amico me ad huiusmodi inſtitutum inſtiganti; equidem & ſocium hunc violem, & amicis aliis homo nihil cenſebor. Quamobrem, ſereniſſime Imperator, ſi orationem meam ſenſeris rei dignitati minime parem, ignoſces mihi per benignam indulgentiam, & tanquam mitis pater (vt Homerus loquitur) gratam habebis non filij, ſed ſerui tui Michaelis Byzantii balbutiem. Vnde autem ordiendum?

*Dicite nunc mihi Muſa, cœleſtes domos inhabitantes:  
Vos etenim ſapientiæ amabilis dona datis.*

neque enim id mihi vitio vertetur, ſi ad hanc orationis meæ partem Homerum citem:

*Inde, vnde maiestas inclyti Regis  
Si poteſt, vnde inimitabilia opera virtutum.*

Euge Muſa, maximi illius Regis DE I propago & ſemen, per quas quibus vult largitur intelligentiam, ingenii perſpicacitatem & virtutem; vobis ego gratias ago, quod orationis meæ mihi modum & ordinem commonſtraveritis. Ac principio ſummum hoc decus eſt potentiſſimi & diui Imperatoris noſtri, quod regnum & potentiam hanc virtute, & imperium ſine ſanguine & bello ſit adeptus (quod quidem multis ſolet contingere, ſed non tam Regibus, quam priuatis, aut inferioris gradus principibus) & acceptum idem ille maximus Rex noſter auget atque amplificat vndique, tum animi præſtantia ac magnitudine, tum rebus præclare geſtis. Sed forſan ii qui me penitiùs norunt, & ipſa etiam ratio monet, vt hac orationis parte relictâ ad id me conuertam, quod propriè eſt huius inſtituti. Hoc ergo faciendum & pergendum porro. Maieſtas ergo imperii tui, FRIDERICE Imperator quæ & quanta ſit, manuſtatum reddunt Europæi remoti ſimul ac propinqui: tam ii qui foris verſantur, quam qui domi: quin imò & ii qui Aſiam incolunt, aut eidem contermini ſunt: ii inprimis, quibus ſato conſeſſum eſt diuini capitis tui diadema intueri. Inter quos quidem (prout vt nunc res noſtræ ferunt) primum pariter ac poſtremum locum tenet Ariſtonymus hic Byzantius Megacis filius, qui mihi huius Orationis autor extitit, quique adeo eſt bonorum & honoratorum virorum amator, ac præco virtutum diæ Maieſtatis tuæ: prædicant autem magis (tanquam ſcilicet magis conſcij) quotquot imperio tuo parent, Reges, Duces, exercitum ac prouinciarum præfecti, é quibus nemo (quantum æſtimare poſſum) Aſiaticis cedit vel autoritate, vel virtute. Quod ſi igitur tam beata eſt imperii

*Ariſtonymus  
Byzantius.*

ἀρετῶν· εἰ καὶ μὴ κηρύξῃς δέη, αὐτοκίρως γε  
ὦν, τῇ φρονήσει καὶ βασιλείᾳ, καὶ ταῖς ἀλ-  
λας δῆπουθεν ἀρεταῖς· τῆς σοφίας, τῆς ἀγαθό-  
τητος, τῆς δικαιοσύνης καὶ σωφροσύνης, πάντων,  
ὡς ἐπὶ εἰπεῖν, ὅσα τε εἶδεν, ὅσων τε ἤκα-  
σεν. εἰ γὰρ ἐκείνου φίλῳ καὶ τοιῷ τῶν φί-  
λων, περὶ τοιαύτην ὑπόθεσιν ἐπεγείροντι, εἰ  
καὶ οἷα ἔσα καὶ ὅση τύχῃ αἶναι, καὶ τὸν ἐταῖρον  
ἠδικοῦν ἂν, καὶ τοῖς φίλοις ἂν οὐδενὸς ἄξιον  
ἐχθρόμην. Ἀλλὰ ταῦτα γαλῆνόντα βασιλεῶν,  
εἴπου μετῶν λόγων οὐχ ἄπτεσθαι τῆς ἀξίας φω-  
ράσεως, σύγγνωθί μοι τῇ μετ' εὐμυθείας σύγ-  
γνώμῃ καὶ ἡ πατὴρ ἡπιότης, ὡς φῶσιν Ομή-  
ρῳ, δέξατο ἐκ υἱέως, ἀλλὰ δούλου σὲ βύ-  
ζαντιον Μιχαῆλ ψαλλίσματα πόθεν ἐν  
ἀρετέων.

*ἔσπετε νῦν μοι μέσαι ὀλύμπια δώματ' ἔχουσαι·  
Ἵμεις γὰρ σοφίης ἐρατεινῆς δῶρα δίδοιτε.*

ἔδε γὰρ ἐδὲ οἱ μάγνησσητόν ἐνθαδὶ τὸ λόγου ῥυα-  
μένῳ καθομνήσαι.

*κείθεν θέν μεγαλεῖον κῦδάλιμοιο ἀνακτὸς  
ἢν ὃ δύναται καὶ θέν ἀσπετα ἔργ' ἀρετῶν.*

Ἐγὼ ὦ μέσαι τῶ μεγίστου Βασιλέως θεῶ  
ἀπόρροα τε καὶ σπέρματα, δι' ὑμῶν, οἷς ἂν ἐθέ-  
λοι χορηγοῦντ' ἡ σύνεσιν, ἡ παιδείαν, τὴν  
ἀρετὴν, καὶ χάριτας ὑμῖν ἄγω μετὰ θεόν τ' ἀκο-  
λασίαν τὸ λόγε καὶ μέθοδον ὑψηλοτάτης μοι. P. 34.  
μεγαλοπρέπεια μετὰ οὐδ' τῷ κρατίστῳ καὶ θειο-  
τάτῳ ἡμῶν βασιλεῖ, ἥτ' ἐξ ἀρετῶν βασιλείᾳ καὶ  
δύναμει, καὶ τῷ γε αἵματος ἀνευ καὶ μάχης τὴν βα-  
σιλείαν ἀνέλαβεν· ἃ δὲ πολλὰ καὶ εἰσὶν οὐκ ἐπι-  
τείν πολλοῖς, μὴ ὅτι γε βασιλεύουσιν, ἀλλ' ἰδιώ-  
της καὶ ἀρχοῖσιν, ἣν ἐξ ὅτου περ αὐτὴν ὁ μέ-  
γιστος ἡμῶν διεδέξατο Βασιλεὺς, ὅτι τὸ αὐξεί  
καὶ πρᾶγαι ἀπὸ παντὸς μεγαλονοῖα καὶ βίῃ  
καὶ πράξει φανερὰ τοῖς. ἐμοὶ πολλῶ τῷ μέσῳ  
γινώσκοντες κάλλιον, φησὶ ἂν οἱ μάγνησση-  
τον, τοῦτ' ἐπὶ τῷ λόγῳ καταλιπόντα,  
τραπὴν περὶ τὸ πρᾶγμα. αὐτὸ δὲ τοῦτο  
καὶ ποιητόν, καὶ ἱτητόν γε περὶ αὐτῶν. τὸ μὲν  
δὲ μεγαλεῖον τῆς βασιλείας σου ἀναξ ἀνδρῶν,  
ΦΡΙΔΕΡΙΚΕ, οἷτ' ἐξέ καὶ ὅσον τύχῃ αἶ-  
νον, δηλοῦσι μὲν Εὐρωπαίων, οἷτ' ἐγγύς, οἷτ' ἐπὶ  
πόρρω, οἷτ' ἐν θύραθεν, οἷτ' ἐν οἴκῳ. δηλοῦσι  
δὲ αὐτὸ πάλιν καὶ τῆς Αἰτίας οἱ πρῶτοι καὶ καὶ  
ἀρχιτέκτονες, οἷς γε διδόνει εἰμαρτο τὴν ἐλ-  
τιμονταρίαν τῆς θειοτάτης σου κεφαλῆς. τού-  
των ὃ πρῶτος καὶ τελευταῖος, ὅσα γε εἰς ἡμᾶς  
τὸ νῦν ἔχον, Αἰριώνυμος ὁ τοῦ Μεγακλεῖος  
Βυζάντιος, τοῦ παρόντος μοι λόγον τὸ αἴτιον,  
ὁ τῶν καλῶν ἐραστὴς καὶ τιμίῳ, ὁ κηρύξ τῶν  
ἀρετῶν τῆς θειοτάτης σου βασιλείας· κηρύττουσι  
δὲ μάλλον, ὡς καὶ μάλλον εἰδότες, ὅσοι τε κα-  
θίσαντα ῥήγες ὑπὸ τὴν σὴν ἐξουσίαν, ὅσοι τε  
αὐτὸ πάλιν δοῦντες, ὅσοι τε ἡγεμόνες, ὅσοι τε  
ὑπαρχοῖ. οὐδένων, ὡς ἐγὼ ὡμαι, τῶν ἐν Αἰσίᾳ  
διωνάμει τε ὄντες ἡσσοῖς, καὶ ταῖς ἀλλὰς γε  
ἀρεταῖς. ἦν οὐκ οἱ τοιαῦτα σοὶ τύχῃ αἶναι τὸ μακά-  
ριον σύστημα, τῶν ῥυαμοτάτων μετὰ ἡγεμό-  
νων, ἀνδρῶν ὃ λογάδων καὶ φαντάων, ὑπὲρ  
κόων



κόων δ' ἐόντων καὶ πιστοτάτων τῇ βασι-  
λείᾳ σου, ὡς γε ἡμῖν Ἀριστὼν μὲν εἶπε, καὶ  
τῆς φήμης συμμαρτυρούσης, τί χρὴ νομίσαι τὸν  
εὐσεβέστατον βασιλέα; τί δ' ἄλλο, ἢ μέγιστον  
βασιλέα τῶν ἐπὶ γῆς βασιλέων, τῶν μὲν πίσει  
τῶν δ' αὖ δυνάμει. τῶν δ' αὖ πάλιν σοφία καὶ  
ἀρετὴ καὶ φρονήσει, πάντων τε τῶν ἄλλων τοῖς  
πᾶσιν, ἵνα μὴ καθ' ἑκάστα λέγοιμι βασιλεύοντα,  
μὲν τοί γε καὶ αὐτὸν βασιλεύοντα μὲν ὑπὸ τοῦ  
μεγίστου καὶ πρώτου βασιλέως τῶν βασιλέων, οὗ  
τῆς περὶ τοῦ οὐκ ἀνευ ἡζιώθης τῆς βασιλείας, καὶ  
ὅς σε τῶν ὀρεσίων ἀνευ οὐκ ἂν ἡζίωσε τοῦ τοιού-  
του βασιλεύοντα δὲ ἀπάντων, ὅσοι τὸ τρίπο-  
δον ἔχουσιν ὄνομα τοῦ Χριστοῦ βασιλεύοντα δὲ  
τῶν παθῶν, τῶν τε θύραθεν καὶ τῶν ἐνδον· ὃ  
αὐτὸς ἐαυτοῦ βασιλεύετε· ἂν ἐκόντως κληθεῖς,  
εἰ γὰρ τις, ὃ βασιλεῦ, ἄλλων μὲν ὅτων κροτοῖ,  
αὐτὸς δ' ἢ μὴ, καὶ τῶν σφετέρων παθῶν, εἴη ἂν  
οὐκ ἔστι καὶ λέγοι τ' ἂν ἄξιός ἢ μετελὴς βασιλεὺς.  
ὅς δ' ἂν ἐκατέρων τούτων ἐξέσται τρέπαμα, καὶ  
μὴτ' ἐκείθεν, μὴτ' ἐντεῦθεν ἀλλοίη, τοῦτον ἐγὼ  
δ' πάντες βασιλεῖα καλοῦμαι. τῆτον δὲ βασι-  
λεύειν τῶν ἐπὶ γῆς ἡγεμόνων· τοῦτον σέφει μὲν  
ὁ θεός, ἀνθρώποι δὲ περὶ σκυννοῦσιν, ἀσκητοὶ καὶ  
γόνυ πετοῦντες, ὡς περ αὐτὸν ἀμέλει τὸν σεφα-  
νίστην θεόν. ἐπεὶ δ' οὐκ ἔστι ὑπάρχεις αὐτός, ἐν  
ἐὺπνοσά τῷ λόγῳ, Θεοῦ βασιλεῦ, καὶ καθά-  
περ Ἀριστὼν μὲν εἶπε, καὶ τῆς φήμης συμμαρ-  
τυρούσης, βασιλεύσεις, ἂν ἐγὼ γε θαρρύνω  
ἐλπίσω, καὶ τὰ τῶν Τευκρῶν μὲν ἡγεμόνων,  
φθορέως δ' τῆς Ἑλλάδος, καὶ τοιοῦτου φθορέως,  
καὶ τοῖς πᾶσι δραστηρίῳ, ὡς τ' αὐτὸς τῶν  
περγονίων ἀπάντων ἐν τοῖς τοιοῦτοις ἀγῶσι τοὺς  
σεφάνους ἀνήμερον, τῆς Θρακίας καὶ Χερσονή-  
σου, Μακεδονίας τε καὶ Ἐπείρου, Μυσίας τῆς  
κάτω καὶ Ἀχαιῆς, Ἀττικῆς τε καὶ Θετταλίας,  
Πλαταιῶν τε καὶ Βοιωτίας, Πελοποννήσου τε  
τῆς πολυῦμνητου καὶ θείας· ἣν ὀφθαλμὸν οἰκ-  
μένης καλέσας, ἐκ ἂν ἀμαρτοίμι τὰ πρὸς ἡ-  
κοντῶν.

p. 35. Ἐγὼ τὸ νῦν ἔχον, Λακεδαιμονίαν καὶ Ἀρκαδίαν,  
Μαντινείαν καὶ Μεσσηνίαν, πᾶσας τε ἄλλας πό-  
λεις καὶ ταύτας γε μητροπόλεις, ἃς ποτ' εἶχεν  
ἐν ἅπασιν δέξας ἢ πολυῦμνητῶν, Πελοπόν-  
νησος, μὴ ὅσον ἔσας θαύματα τῆς Ἑλλάδος, ἀλ-  
λά καὶ αὐτῆς γε δὴ τὸ οἰκζμένης ἀπάσης· Ἀμ-  
περακίας καὶ Ἰλυρίδος, Λευκαδίας καὶ Θεσπρω-  
τιδος, Ταυραντίας δ' ἀπάσης καὶ μέρος γε Δαλ-  
ματίας, Δακίας καὶ Τρυβαλλίας, καὶ τὴν ἄνω Μυ-  
σίας. ἀλλ' αὐτὰ μὲν ἐπαρχίαι τῶν ἐν Εὐρώπῃ,  
ὧν τὰς πλείους ἔτ' αὐτὸς ὁ μέγιστος Τευκρῶν  
βασιλεὺς τε καὶ κηδεμὼν, ἐχ' οἱ πρὸς ὅνοι κατε-  
στέφοντο. μὲν καὶ ταύτας ἐς τὴν Ἀσίαν χωροῦν-  
τι, Προποντίδος καὶ Βιθυνίας, Ἀσίας τε καὶ Φρυ-  
γίας, Πόντος τε καὶ Λυκίας, Παφλαγονίας καὶ  
Παμφυλίας, Καππαδοκίας καὶ Κιλικίας, Κολχί-  
δος καὶ Γαλατίας, Σαρματίας δ' ἐν Ἀσίᾳ, καὶ μέ-  
ρους δ' Ἰβηρίας, πολλῶν τε ἄλλων ἐπαρχιών, ἃς  
τῷ βουλομένῳ ἡγεσθῆναι, γεωγραφικῆς ὑψηλῆς  
σεως δεῖ. ἀλλὰ γὰρ ἴσως ἂν ταχὺ, πόθεν ἂν γνοίης  
τῆτο πύθοιό μου μέγιστος βασιλεῦ; πόθεν; εἰς τὴν

tui constitutio, ut duces quidem generosissi-  
mos habeas, & viros præterea sapientes ac cla-  
rissimos, subditos præterea obsequentes ac fi-  
dissimos tuæ maiestati, ut quidem mihi Ari-  
stonymus confirmavit, & communis etiam fa-  
ma attestatur: quemnam te æstimare oportebit,  
religiosissime Imperator? quem alium,  
quam Regem omnium orbis terrarum Regum  
maximum? quorum alios fide, alios potentia,  
alios sapientia, virtute, ac prudentiâ, omnes  
denique omnibus (ne singula persequar) ve-  
lut quidam omnium Rex antecellis. Rege-  
ris quidem & tu imperio maximi illius & pri-  
mi Regum Regis: utpote cuius providentia  
dignum te hoc Regni fastigio iudicavit; quique  
te, absque virtutibus his tuis foret, nunquam  
fuisse hoc imperio dignatus. At imperas in-  
terim omnibus, qui illud ter maximè deside-  
rabile Christi nomen profitentur: imperas &  
affectibus tuis, siue externâ, siue internâ ali-  
qua causa subortis; quo nomine vel teipso  
maior Rex convenienter possis appellari. Si  
quis enim, Cæsar, aliis quidem imperat, sibi  
verò & affectibus suis minime; is profectò ex  
dimidiato tantum Rex & est, & meritò dice-  
tur: qui autem de ambobus tropæa ponit, &  
nec hinc nec illinc capitur, hunc demum &  
ego & mecum alii omnes Regem salutabimus:  
hunc Regem esse oportebat Orbis Terræ prin-  
cipum; hunc Deus ipse coronat; hunc homi-  
nes nudati capita & in genua prouoluti adorant,  
tanquam scilicet ipsum, qui diademata impo-  
nit, DEum. Quando ergo talis es, diue Im-  
perator, qualem oratione adumbravi, & qua-  
lem Aristonymus, contestante famâ, perhibet;  
imperabis tu olim (quod ausim confidenter  
sperare) Duci illi Teucrorum, id est, Turco-  
rum, Græciæ euerfori; imò huic qui nunc re-  
rum potitur, euerfori omnium maxime stre-  
nuo, quique facile palmam maioribus suis in  
hoc certaminis genere præripit. Euerfori (in-  
quam) Thraciæ, & Chersonesi, Macedoniæ,  
Epiri, Mysiæ inferioris, Achaiæ, Atticæ, Thes-  
salicæ, Plataearum, Bæoticiæ, Peloponnesi illius lau-  
dum plenissimæ, imò diuinæ; quam si oculum

Peloponnesi  
laus.

Tacebo in præsentia de Lacedæmone, Arcadia,  
Mantinea, Messinea, deque aliis illis urbibus,  
imò metropolibus, quas olim habuit celeberrima  
Peloponnesus, omnium rerum abundan-  
tia felices, ita quidem ut miracula qua-  
dam non Græciæ tantum, sed vniuersi etiam  
orbis extiterint; Ambraciam tantam nomina-  
bo, Illyriam, Leucadiam, Thesprotidem, Tau-  
lantiam etiam vniuersam, cum parte Dalma-  
tiæ, Daciæ, Triballiæ, & Mysiæ superioris.  
Atque has quidem prouincias, quæ in Euro-  
pa sitæ sunt, maximus ille Teucrorum Rex &  
moderator, non autem ipsius maiores subuer-  
terunt. Exinde si in Asiam transeamus, repe-  
riemus illic vastatorem Propontidis, Bithyniæ,  
Asiæ & Phrygiæ, Ponti, Lyciæ, Paphlagoniæ,  
Pamphy-

Turcorum  
potentia.



Pamphylia, Cappadocia, Cilicia, Colchidis, Galatia, Sarmatia Asiatica, partis etiam Iberia & plurium aliarum regionum; quas qui enumerare velit, cum necesse fuerit Geographicas Tabulas consulere. Sed quares forte, Maxime Imperator, unde id ego norim, (te scilicet olim dominaturum) unde? Ex ipso illo inevitabili fato, quod Adrastium Philosophi nominant; atque ex conversione ac vicissitudine rerum humanarum, quæ & instabiles & perpetuo volubiles: imò (quod magis est) ex ipsis oraculis, quorum nulla unquam, aut certe per pauca, fefellerunt. Te ipsum appello testem horum, Divæ Imperator, sapientissimum virum, & rei Astronomicæ (nam & huius virtutis tuæ fama Græciam peruasit) peritissimum; quique cæli motum ad vnguem calles, atque ætheris vires, nec non & orbium, & virtusque poli arctici & antarctici, Solis item defectus & Lunæ facies, stellasque alias tam fixas quam erraticas, faces item cælestes & traiectiones, quidve portendant cometae, quid foueæ, aut trabes; quid item hoc vel illud elementum prædominans, quando imbres continui aut siccitas, quando pestis aut aeris salubritas futura sit; quid quando omitendum, quando tractandum sit. Quis ergo non miretur sublimem illam tuam mentem, quæ primæ illi Mundi animæ & Sphæris cælestibus commiscetur; à quibus nimirum & per quas ille cogitationum efformator spiritus, & quoddam velut simulacrum nobis insinuat, legibus factorum demissum: sic Plato, sic Pythagoras senserunt, & hos secuti Stoici Pythagorizantes, simul & Platonizantes. Nec tamen (ut omnino existimo) talis, nec eodem etiam modo Spiritus ille sapientissimæ animæ tuæ immittitur, ut nobis: sed purus per omnia sincerus & illustris, id quod manifestum est ex animæ functionibus & viribus, quæ interiorem diæ illius animæ operationem arguunt. Quorum enim facultates differunt (inquiunt Philosophi) horum quoque diversus est Spiritus ille imaginum in mente efformator, perpetuo agirans, continuo efficax, & semper lucens, etiam supra Solem: hunc enim nobis modo nubes, modo oblectata vela, terræ etiam positus & aeris mutationes, velut impedimenta interiecta, admittunt. Tu verò quidquid sub Sole est, undique irradias, tam noctu quam interdiu, cum sensibus & mente, tum etiam imaginatione, & istis infamiorum virtutibus: nam tunc divina illa vis nobiscum familiariter habitat, cum sensus lumen illud splendidissimum nequeant intueri. Virtutibus ergo tuis dignam orationem quæ reperiam? Ecquid non ea in te virtus est, quæ Physica dicitur? ecquid non ea quæ Ethica appellatur? an non & Politica, per quam aiunt res cum ratione ac prudentia feliciter geri? num non & illa purgatrix, per quam ab animi affectibus emundamur? an non & Theoretica illa, quæ mentem istam summam contempletur? an non & illa quæ animam (divinissimam nostri partem) excitat, atque ad diuinum Numen abripit, illique similem efficit diuinorum operatrix? Ecquid non fontem in te habes virtutum omnium absolutissimum, qui tum communicabitur iis qui digni sunt, quando deposita hac separabili mente omnes simul virtutes efficaciter exercebimus; Denique an non Maiestas illa tua Imperatoria, quicquid præclarum ac præstans nominari potest, id omne in se vna ad magnam usque abundantiam complectitur? Quæ cum ita sint, & accedant præterea plura; quis neget te, ô Maiestatis verè Regiæ diuinitus expressum exemplar, rerum futurarum exitus liquidissime prædicere? Non est, inquis, hoc tempus bello aut pugnae, sed rerum superarum contemplationi opportunum.

Hic ms. exemplar Bibliothecæ Palat. nos destituit. Quo si quis aut plenius, aut etiam correctius habet: ut vel nobiscum vel cum publico communicet, admodum rogamus. Ceterum probabile est, Apostolum illum, cum hanc orationem scriberet, iuuenem fuisse: habet enim affectationes modò Demosthenicas in connexis particulis, modò Platonicas in doctrina de Anima & virtute; luxuriam præterea, & hyperbolas penè plus quam Græcas, supra etiam Panegyristarum cæterorum licentiam. Apparet etiam hanc orationem post expugnatam Constantinopolin, circa annum M CCCC LVII scriptam, quo tempore Peloponnesum (quam tantopere extollit) à Turcis (quos more eius anni Teucros & ipse vocat) captam & vastam scriptores produnt.

ἀναγκῆς αὐτῆς, ἣν ἀδράσειαν ἐκάλεισαν οἱ φιλόσοφοι, καὶ τὸ πρᾶγμα τῶν ἀποφρογῶν τε καὶ παλιν-  
ροίας, ἀσάτων γε ὄντων καὶ ἐσαεὶ κινεμένων. καὶ τὸ  
δὴ μείζον ἐξ αὐτῶν τῶν χρησμάτων, ὧν ἀδένες, ἢ πανύ-  
τοι οὐλίγοι, τὴν ἀληθείαν ἐξημαρτήκασι. σὲ καλῶ  
μάρτυρα τῶν τοιούτων, θεοὶ αἱ βασιλεῖς, τὸ ἀστρονο-  
μικῶς καὶ σοφῶς καὶ ταύτης γὰρ σου τὸ ἀρε-  
τῆς φῆμη τὴν Ἑλλάδα διέδραμε· τὴν τε κίνησιν  
εὐ μάλα εἰδὼς τῶν οὐρανῶν, τὰς τε τῶν ἀθέρων  
διώμας καὶ τῶν σφαιρῶν, ἐκατέρωθεν τε τῶν πόλων  
ἀρκιτικοῦ καὶ ἀνταρκτικοῦ, τὴν δὲ ἡλίαν τὰς ἐκλεί-  
ψεις, καὶ τῆς σελήνης τὰς φάσεις, τὰ τῶν ἀστρον-  
ομικῶν καὶ κινουμένων, τὰ πυρσὺ καὶ ἀστέρων  
σημαίνουσιν οἱ κομήται, οἷτε βόθριοι καὶ δοκίμοι  
τί τοδὶ τὸ σοιχεῖον, καὶ τί θάλλει, πλεονάζον ποτ'  
ἐπομβεῖα καὶ πῶτ' αὐχμοί, ποτὲ λοιμοί, πῶτ'  
ὑγεία. πῶς τοδὶ ὁπώσῃ, καὶ πῶς ἐκείνο ἀεθ-  
σευκτέον ὃ τίς οὐκ ἂν σου θαυμάσειε τὴν μετέωρον  
νοῦν, ὃς τῇ πρώτῃ ψυχῇ καὶ ταῖς σφαῖραις συγ-  
καταμίγνυται; ἐξ ὧν καὶ ὅθεν ἡμῖν τὸ φανταστικόν  
πνεῦμα καὶ εἰδωλὸν ὀνομιζέται, νόμοις ἀδράσειας  
καταπεμπόμενον. πλάτων ἔγω καὶ πυθαγόρας  
ἐδοξασάτην, καὶ σὺ τοῦτοιν ἤδη καὶ μέγα τοῦτοιν  
οἱ σῶντοί, πυθαγορίζοντες τε ὅμα καὶ πλατωνί-  
ζοντες, πλην ἁπλῶς οὐ τοσοῦτον ὁ ἡμῶν καὶ οὕτως ὅσον  
καὶ ὡς περ, ἡμῖν, τῇ σοφωτάτῃ σου ψυχῇ κατα-  
πέμπεται. ἀλλ' ἀκρατὸν ὅλως, ἀμυγῆς καὶ ἀγ-  
φανές, καὶ τοῦτο δὴλον ἐστὶν ἐκ τῶν ψυχικῶν  
ἐνεργειῶν καὶ δυνάμεων, ὃ τῆς θεοστατίας σου  
ψυχῆς ὁσημέρᾳ δεικνύουσι τὴν ἐνεργεῖαν.  
ὧν γὰρ φασὶν αἱ δυνάμεις διάφοροι, τέτων καὶ τὸ φανταστικόν  
πνεῦμα διάφορον, αἱ κινεῖν, αἱ ἐνεργεῖν, αἱ λαμβάνειν ὑπὲρ τὸν  
ἥλιον. εἴπερ ἐκείνῃ μὲν καθίστανται ἐμποδῶν, νῦν μὲν νεφέλαι  
νῦν καὶ καλύφει, γῆς τε θέσεις καὶ ἀέρας μεταβολαί. σὺ καὶ  
μετὰ πολλοῦ τὸ τοῦ αἰθέρος πᾶσι δὴ καὶ καταναρτᾷς, νῦν  
ταῖς τε καὶ ἡμέταις πάντα, τῇ μὲν ταῖς ἀειδίκοις καὶ τῇ γῇ.  
τῇ δὲ, φαντασίᾳ καὶ ταῖς δι' οὐρανῶν δυνάμεσιν, ἢ μάλλον ἡμῖν  
τὸ θεῖον συγγίνεται, τῆς ἀειδύσεως μὴ δυνάμεως δοξαζέμεν  
ὡς τὸ φανότατον, καὶ ταῦτα μὲν ταῦτα. ἀρετῶν δὲ ὡς, πᾶς  
ἂν εἴποιμι κατ' ἀξίαν οὐχ ἢ φυσικῇ τῶν ἀρετῶν εἰς σοί; οὐκ  
ἔχεις πᾶσι ἡδικῶς λογιμένῃ; ἢ περὶ σοῦ ἢ πολιτικῇ, ἢ φασὶ  
μὲν λόγον καὶ φρονήσεως κατορθοῦσθαι; οὐχ ἢ καθαρτικῇ, ὃ  
ἢ τῶν παθῶν δοξαζομένη; οὐχ ἢ θεωροῦσα τὸν νοῦν;  
βιωρητικῇ; οὐχ ἢ τὸ θεῖον ἡμῶν πᾶσι ψυχῇ ἀνεγείρουσα,  
καὶ ὡς αὐτὸ τὸ θεῖον ἀνάγουσα καὶ ὁμοῖον αὐτῷ ποιούμενη  
θεωρητικῇ; ἐπὶ τῇ τῶν ἀρετῶν ἔχεις, ἢ ἀπασάν πᾶσι τε-  
λειοτάτῃ, ἢ τότε μέτεσι τοῖς ἀξίοις, ὅταν αὐτῇ πᾶσι ἀρε-  
τῇ ἐνεργήσωμεν ζῆμπασαν, νόστον ἀρίστης πᾶσι μερίτῃ, ἐχ-  
ὸ, τι ἂν εἴποι τις τῶν καλῶν ἢ τιμίων, πέτο μὲν πολλὰ τῶν  
αἰθέρων τῇ βασιλείᾳ σου ὡς σοῦ; διὰ δὲ ταῦτα καὶ ἐπὶ  
καλῶν τε τῶν ὅ τ' βασιλείας διότυκτον ἐμμελῆσαι ἢ τῶν  
ἰσομένων ὡς ἐλέγεις τὰς ἐμβάσεις ἀειδιδοτάτα; ἢ ἐπὶ, λόγον,  
ἢ δὴ καιρὸς, πολέμῳ δηλονότι ἢ μάχῃ; ὡς ἢ τὸ νῦν ἔχον;  
ἢ τῶν μετὰ τῶν ἀειφρονήσεως.

p. 36.



NICOLAI LANCKMANNI  
de FALCKENSTEIN,

HISTORIA DESPONSATIONIS

FRIDERICI III.

CUM

ELEONORA  
LUSITANICA.





LECTORI SALVTEM!

BURCARD GOTTHELF STRUVE.



Vllabo equidem Scriptorum huic Tomo II. præmisso, hunc librum inseruerat Freherus, atque Nicolao Hipponensi Episcopo tribuerat. Sic etiam Subscriptio huius libri in fine subiecta, quæ ex Germanico translata videtur, Nicolao Hipponensi hunc libellum tribuit. Verum, Nicolaus Hipponensis non auctor est libelli, sed eiusdem editor, prout ex epistola dedicatoria ad Maximilianum scripta, adparet, dum ait: *ideo sacratissime rex, dum pridem iuventutis meæ scripta reuiderem, occurrit in sexternis per Nicolaum Lanckmann de Valckenstein \* Cæsareum Capellanium scriptis vestræ sacratissimæ Maiestatis genitoris ac genetricis clarissimæ & beatæ memoriæ desponsatio eorumque coronatio.* Neque hoc saltim habemus testimonium, sed in eodem hoc scripto, ipse auctor sæpius de se loquitur. Sic ubi aduentum Augustæ in urbem Septam narrat, addit: *ego Nicolaus Lanckmann de Valckenstein in eius præsentia missam legi.* Dum Aduentum Augusti ad montem S. Angeli describit, dicit: *& ego Nicolaus missam legi, & locum Ecclesiæ conspexi.* De ciuitate Sadres: *& ibidem per tres dies pausam & quietem habuimus.* Et ego fui debilis & vix attraxi Spiritum. Vnam tamen Missam in nomine Domini & sancti Nicolai legi. Eundem auctorem nominat Petrus Lambecius. Sic, ubi de Maximiliani I. natiuitate agit, addit: *\*\* testatur hoc coætaneus auctor Nicolaus Lanckmannus in hætenus inedita Historia Latina MSCta: Desponsationis & Coronationis Imp. Friderici V. & Coniugis ipsius Eleonoræ.* Inde locum adducit, qui in hac ipsa historia de Maximiliani natiuitate continetur. \*\*\*

Extat hæc ipsa historia in Bibliotheca Cæsarea Vindobonensi adhuc manuscripta, quem Codicem plenius describit \*\*\*\* Lambecius, cuius verba, cum ad libri huius Historiam plurimum conducant, hic integra inferemus. Volumen chartaceum in octauo, quæ continetur, *Historia Desponsationis & Coronationis Imp. Friderici V. & Coniugis ipsius Eleonoræ*, composita & propria manuscripta a Nicolao Lanckmanno de Valckenstein, qui vnus fuit ex duobus Sacerdotibus ac Sacellanis, quos iam memoratus Imperator Anno 1451. tanquam Legatos & Oratores suos, annulli pronubæ Sponsæ offerendi causa misit in Lusitaniam. Titulus & principium Operis istius hætenus, quod sciam inediti sic habeat.

Despon-

\* Lambecius Comment. de Biblioth. Cæs. Vindob. L. II. p. 1012. *Quamuis in Codice illo MSCpro, propria ipsius Nicolai Langmanni manu exarato nomen Valckenstein scriptum sit litera V. minime tamen dubium est, quin reuera scribendum sit Valckenstein litera F. Falconibus enim nomen inditum est, a falce, quoniam ungues instar falcis habent intro curuatos siue introrsum flexos ut testatur Sextus Pompeius Festus de Verborum Significationibus.*

\*\* Commentar. de Bibl. Cæs. Vindob. Lib. II. cap. VIII. pag. 698. \*\*\* Lib. II. cap. VIII. p. 715.

\*\*\*\* Commentar. de Bibl. Cæsarea Vind. Lib. II. cap. VIII. Cod. CCC XXXVII. pag. 971.



## Desponsatio &amp; Coronatio Serenissimi Domini, Domini Imperatoris FRIDERICI III. &amp; eius Augustæ Dominae LEONORÆ.

Fridericus DEI gratia Romanorum Imperator semper Augustus, Austriæ Stiria, Carinthia, Carniola Dux, Comes Tirolis, anno Domini millesimo quadringentesimo quinquagesimo primo, in Martio, ex Noua Ciuitate Salzburgen-sis dioceseos misit suos Oratores, Procuratores & Mandatarios Speciales cum pleno mandato ad Regnum Portugallia ad desponsandam sibi præclarissimam virginem & inlytissimam Dominam LEONORAM Infantissam Portugallia, quæ erat Serenissimi EDVARDI Regis & Illustrissimæ Dominae Leonoræ Regina Portugallia bonæ memoriæ filia legitima. Venerunt prædicti Oratores per Alemaniam ad Ducatum Sabaudia ad Ciuitatem Geneff sub Gallicâ linguâ, & consequenter per fluvium Rhodanum ad Delphinatum, &c.

Meminit Autoris huius Historiæ, ut & collegæ ipsius Jacobi Motzii, Maria Regina Aragoniæ in Diplomate salui conductus, utrique concessio & eidem Historiæ inserto, his verbis: *Ad vestri & cuiuslibet vestrum notitiam deducimus per præsentis, cum dilecti deuotique nostri Magister JACOBVS (1.) MOTZ in Sacra Theologiâ Baccalarius & NICOLAVS (2.) LANCKMANN de VALCKENSTEIN, Capellani & Nuncii Illustrissimi Friderici, Regis Romanorum, fratris nostri charissimi, ad Regnum Portugallia aliasque Mundi oras se conferant pro negotiis dicti Illustrissimi Regis Romanorum, ut totius iter eorum pergant, &c.* Prodit etiam ipse Autor nomen suum & conditionem vitæ in eadem Historia his verbis: *Die quintâ mensis Maij, Domina Imperatrix cum suâ Curia venit peregrinatum ad Montem Sancti Angeli in Monte Gargano ad Ecclesiam Sancti Michaelis, non per manus hominum constructam aut consecratam, sed mirabiliter repertam, ut in Historia de Apparitione S. Michaelis in Monte Gargano. Et Domina Imperatrix fecit fieri magnum festum cum Cæremoniis, Missis & Oblationibus, & Dn. Doctor Magister Joannes Hynderbach Cancellarius & Magister Curia & alii Officiales Suae Maiestatis in his solliciti fuerunt; & EGO NICOLAVS ibidem legi Missam, & eundem locum diligenter conspexi.* Mentionem quoque eorundem duorum Legatorum facit Aeneas Sylvius, siue Papa Pius II. in Historiæ Austriacæ opere imperfecto, quod propria ipsius manu exaratum bis extat in Augustissimâ Bibliothecâ Cæsarea. Quandoquidem autem duo illa exemplaria multis locis non mediocriter à se invicem discrepant, exhibebo hic iam memoratum locum, quemadmodum is in utroque legitur exemplari. In uno igitur eorum reperi eum scriptum hoc modo: *Leonora vero, quæ in Kalendis Nouembris Thalamonis portum appellere debuit, dum hæc aguntur, aliquanto tardius, quam promissum erat, ingressa pelagus, cuiusdam negotiatoris Januensis nauem ascendit, felicique vento Ceptam venit, quæ urbs magna est in littore Africa, per avum eius Regem Portugallia multa vi quondam expugnata, & in hanc usque diem in solo barbarico contra potentiam omnium Africanorum retenta. Quod autem in diem dictam Leonora mare non intrauit, in causa fuerunt JACOBVS MOTIVS & NICOLAS Sacerdotes sibi annulum missi, cum inter eundem in latrones incidissent, ut supra monstrauimus, in præfixo tempore Portugalliam attingere nequiverunt.* In altero autem eiusdem Historiæ exemplari authographo extat idem locus hoc modo: *Interea Legati Cæsaris, cum Dominabus ad suscipiendam Imperatricem, ut supra diximus, in portu Thalamonis magno affecti tædio præstolabantur.*

(1.) Gerardus de Roo. *Annalium Austriacorum libro quinto p. 203. minus recte vocat eum JACOBUM MEZIVM.*

(2.) Gerardus de Roo, iam citato loco appellat eum NICOLAVM LONGIMANNVM de Falckensteino: sed rectius eum latine vocasset NICOLAVM LONGVRIONEM. Longurio enim re vera idem est ac germanicè Langmann.



bantur. Imperatrix autem cum debuisset in Kalendis Nouembris applicuisse portum atque nauigationem finiuisse, nondum eo tempore nauem intrauerat. Neque id culpæ sibi fuit adscribendum, sed Oratoribus Cæsaris, qui missi ad contrahendum matrimonium per verba, ut ajunt, de præsentī, non venerant in tempore: Neque hi sua sponte deliquerant, quippe qui latrones inciderant, atque spoliati, vix tandem euaserant. Oratores fuere minores, quam mitti a Cæsare in tanto negotio debuissent, **JACOBVS MOTZ & NICOLAVS** Sacerdotes, quibus vix habita fides fuit. Contracto igitur matrimonio secundo Nonas Martias ingressa est in nauē cuiusdam negotiatoris Januensis; neque enim Portugallenses magnis utuntur nauibus, sed mediocribus, quas Garauellas appellant, in quibus haud tuti esse possunt a barbaris, quorum littora vicina sunt. Imperatrix ergo, ubi pelagus ingressa est, felici nauigatione ad Septam venit; quæ urbs magna in littore Africæ per avum eius Regem Portugalliæ magna vi expugnata fuit, atque in hunc diem, exterminatis barbaris, a Christianis tenetur. Ibi Leonora dies tres morata, &c. Hæc Æneas Sylvius siue Papa Pius II. Cæterum quamuis supra memoratam Nicolai Lanckmanni Historiam alio posthac commodiori tempore & loco integram publicaturus sim, interim tamen obiter atque in antecessum hic moneo, eandem in Catalogo Auctorum, qui Marquardi Freheri, Tomo secundo Scriptorum Rerum Germanicarum præfixus est, significari his verbis: Nicolai Episcopi Hipponensis de Friderici III. Imperatoris & Leonoræ Portugalliæ Reginæ desponsatione, benedictione & coronatione, tum de Maximiliani Regis eiusque Sororis Kunigundæ natiuitate, Historiola, ex variis litterarum monumentis & fragmentis concinnata. Hunc libellum non nisi germanice editum Augustæ Anno 1503. habuimus, nec scimus, an latino prodierit. In eodem Freheri Tomo secundo, & quidem pag. 15, 16, & 17. extat Oratio Jacobi Motzii, cuius principium: Incumberet mihi hodie, serenissime Rex, Excellentissime Princeps, quæ sunt tuæ virtutis, meo sermone complecti; laudare clarissimum Genus tuum, efferre Regni tui tuæque potentiæ magnitudinem. Sic enim mos esse solet; &c. Sed in titulo eiusdem Orationis perperam & falsò ibidem legitur, Imperatricem Eleonoram fuisse filiam Alphonsi Regis Portugalliæ, coram quo ea Oratio habita est. Certò enim constat, Alphonsum hunc non fuisse patrem Eleonoræ Vxoris Imp. Friderici, sed fratrem; utpote quod ipse Legatus in eadem Oratione fatis manifeste indicat his verbis: Sed neque hic verbis opus est, ubi facta mentem demonstrant. Ex hac enim dilectione factum est, ut clarissimam atque super illustrem Dominam **LEONORAM SOROREM TVAM** in Matrimonium sibi copulari Cæsar petierit; &c. Alium etiam æque grauem errorem committit idem Freherus, dum aliam quandam Orationem, quæ ad easdem pertinet nuptias, & sic incipit; Quamuis grandes materias, &c. falsò tradit esse habitam ad eundem supra memoratum Lusitaniæ Regem Alphonsum! Imperatricis Eleonoræ fratrem, cum tamen ea re verâ sit habita ad Alphonsum Regem Aragoniæ, qui Imperatricis Eleonoræ fuit avunculus. Autor autem eiusdem Orationis, quem Freherus appellat Incertum, absque dubio est Æneas Sylvius, utpote quem Imp. Fridericus de eodem connubio suo tanquam primarium Legatum misit Neapolim ad Alphonsum Regem Aragoniæ.

In fine eiusdem Voluminis extant duo Diplomata, quasi Appendix præcedentis Historiæ, quorum primum, nempe Papæ Pii II. ad Imperatricem Eleonoram, datum est Senis An. 1459. alterum autem, nempe Imperatricis Eleonoræ pro Nicolao Lanckmanno de Valckenstein, datum est Neapoli Austriæ Anno 1464. Hucusque Lambecius.

Describit igitur Iter ac nauigationem, factam desponsationem, solennitates in aula Lusitanica factas maximas, iter Eleonoræ versus Italiam, copulationem cum Imperatore Romæ factam, atque insecutam coronationem Romanam, benignam illorum exceptionem ab Alphonsò Neapolitano rege, aliisque Italiæ Principibus, reditum denique in Germaniam. Claudat demum cum natiuitate librorum ex Eleonora quam accurate recenset.

Sacra-





**Sacratissimi & Invictissimi Romanorum Imperatoris  
FRIDERICI III. Ac conthoralis ipsius LEONORÆ**

Disponfatio ac ipsorum Coronatio. Simulque Serenissimi & invictissimi Do-  
mini, Domini MAXIMILIANI Romanorum regis semper  
AUGUSTI. Ac suæ Germanæ KUNIGUNDIS  
gloriosissima generatio.

*Diuo Romanorum Cesari Maximiliano Augusto, Vngarie. Croa-  
tia. Dalmatieque Regi. Austria, Burgundia, Carinthia, Styria, ac Carnio-  
la Duci, &c.*

**N**icolaus Episcopus Ypponensis Orationes ad DEum  
devotas. Et fidelia seruitia omni tempore cum sincero affectu atque  
læto animo offerenda. Cum sacratissime rex, animadverterem plu-  
rimos in veterum gestis adeo delectari, ut dies cum noctibus ducant  
insomnes: Quæ tamen aliquæ tantæ veritatis continent, quantæ creduntur vel  
æstimantur. Quot certæ veterum gesta ac Poëtarum figmenta suis phaleris sic  
stringunt, ut non solum tempora in eis trivisse velint sciri; Imò etiam & in hoc  
plurimum gloriari: Sed præsentium & temporum nostrorum acta quibus veritas  
sensibus nostris patuit seu patere potest: De quibus clariores laudes resonare debe-  
rent, ut audientes & videntes opera bona glorificarent patrem qui in cœlis est,  
ac excitarentur cæteri ad similia; sic posterguntur & subterruntur, ut parva & pau-  
ca de eis habeatur memoria. Cum utique virtuti comes existere debet gloria, sic  
benè nostris auiis, sicut priscis temporibus: & ita benè in vita, sicut in morte:  
virtus enim laudata crescit, & virtuti certissimè ut virtuti vitium non valet inesse.  
Et cum virtuosum laudamus, id quod sibi debetur damus & reddimus. Atque  
bonorum & virtuosorum virorum laudes tacuisse tempore commendationis. Sa-  
pientis viri nescio fore iudicium. Quapropter invictissime & illustrissime princeps,  
cum mihi constet sic aliquos vestræ maiestatis laudes edidisse. Ut ab Herculis tem-  
poribus atque Aventinis Romanis Petroniisque hæredibus descendisse fatentur. In  
Rudolphum Comitem de Auensperg vulgari nostro primum huius nominis Ro-  
manorum Regem & cæteros usque cæteræ maiestatis soboles. Paucos tamen us-  
que modò vidi libros vel scriptorum codices, quibus acta vestræ maiestatis pa-  
trum, nullo dubitante, commendatione dignissima, pluribus fuissent communica-  
ta, licet codicum scriptores & libri sint. Et sciam apud vestram maiestatem fore  
quosdam. Non solum de progenie vestræ maiestatis, sed & ex paganismo pro-  
genies status acta & arma diuersa continentes totius domus nunc Austriæ nomina-  
tæ. Scio etiam commenta & vestræ maiestatis fore & quotidie fieri. Sed quid  
afferunt utilitatis dum armariis clauduntur, quid valet thesaurus terræ reconditus,  
pauci sciunt. Sed si in lucem ponerentur laudes & commendationes ipsorum vir-  
tuosorum, afferrent actuum darent bonum posteris sequendi exemplum. Et eò  
obedien-



obediendi inducerent animos, quò diuturnior nata in progenie fuisset virtus. Quoniam si veterum paganorum & alienigenarum acta & Poëtarum aliqua figmenta legentibus afferunt solatia, quorum progenies non vidimus, quorum semina in puluerem sunt redacta. Quantò magis illorum actus quos vidimus, de quibus bona recepimus, quos exinde merito diligere debemus. Quos gubernatores, reges & principes habuimus etiam habemus. Ideò sacratissimè rex, dum pridem iuventutis meæ scripta reuiderem, occurrit in sexternis per Nicolaum Lanckmann de Valckenstein Cæsareum Capellanium scriptis vestræ sacratissimæ maiestatis genitoris ac genetricis clarissimæ & beatæ memoriæ desponsatio. Eorumque Coronatio. Ac ipsius vestræ maiestatis germanæque illustrissimæ Domina Domina Kuni-gundis. Illustrissimi principis & Domini, Domini Alberti Comitis Palatini, ac superioris & inferioris Baviaræ Ducis Conthoralis gloriosissima & laudabilis generatio. Quas eandem vestram maiestatem diligentibus & amatoribus decreui communicare. Et ut plures noscere valerent, vulgari sermone interpretari, & per impressores multiplicari. Ac sic pro gloria & laude progeniei vestræ maiestatis in lucem deducere. Vt ceteri ac alii vestræ maiestatis ac progenitorum acta virtutibus decorata libris inserta. Sed armariis recondita. Et occultata exemplum haberent, imitationem faciant. Et eadem patulo deducant. Ac luci commendent, vt glorificetur pater qui in coelis, à quo omne datum optimum & donum perfectum. Cum his vestra eadem sacratissima maiestas me confessorem genitoris eiusdem vestræ sacratissimæ maiestatis clarissimæ memoriæ suscipiat commendatum.

FRIDERICVS DEI GRATIA ROMANORVM IMPERATOR  
semper Augustus, ac Austriae, Stiriae, Carinthiae, Carniolæ Dux. Comes Tirolis, &c. Anno Domini millesimo quadringentesimo quinquagesimo primo, in Martio ex noua ciuitate Saltzburgensis diocesis misit duos Oratores Procuratores ac mandatores speciales, cum pleno mandato ad Regnum Portugaliæ, ad desponsandam sibi præclarissimam Virginem & inclytissimam Dominam Leonoram infantissimam Portugaliæ, quæ erat serenissimi Eduardi regis, & illustrissimæ Dominae Leonoræ Reginae Portugaliæ bonæ memoriæ filia legitima. Venerunt prædicti Oratores per Almaniam, ad ducatum Sabaudia, ad Ciuitatem Geneff, sub Gallica lingua. Et consequenter per fluuium Rodanum, ad Delphinatum, quam terram Delphinus filius primogenitus regis Franciæ regebat, ibi accipiendo saluum conductum, & deinde ad Carthusiam & ad sanctum Anthonium, ibique videndo miracula sancti Anthonii, deinde ad Langendoeh, quæ est terra bona, & ad montem Pessulanum, ibi est notabilis vniuersitas, maximè Dominorum medicorum. Et ulterius proficiscendo, venerunt via recta versus ciuitatem Tolosam, & Runcuallem, vbi Carolus rex & Rolandus contra Paganos & regem Granati pugnando victoriam obtinuerunt. Sed propter discrimina viarum, & periculum gentis de Armenia, declinauerunt à via recta, & venerunt versus Cathaloniam, ad ciuitatem Narbonam, & Parpinonam, ibi venduntur ligna & stramina in pondere. Consequenter venerunt ad Jerundam, ibi viderunt corpus sancti Narcissi. Postea ad Cathaloniam, ad civitatem Capitaalem Barsilonæ, quæ est magna ciuitas, hominis bonum, portus maris: ibi venduntur homines ut bestia: ibi est Ecclesia Cathedralis, & Collegium legum & Pallatium ducale pulcherrimum, in quo illustrissima Regina Aragonum pro tunc residentiam fecit, quæ prædictis Oratoribus saluum conductum & literam passus dedit, in hæc verba. *Maria DEi gratia, Regina Arragonum, Sicilia citra & ultra Farum, Valentia. Jerusalem, Vngaria, Maioricarum, Sardinia & Corsica, ducissa Barchione, Athenarum, & Neopatria Aceciam comitissa Rossilionis & Ceritonia, locum tenens generalis serenissimi Domini Regis viri, & Domini nostri Charismi; nobilibus, & dilectis, & fidelibus, deuotisque nostris, vniuersis & singulis gubernatoribus baiulis, & procuratoribus generalibus, vicariis, calmedinis aliisque officialibus regis, nec non Alcadis, reconcantoribus, vniuersitatibus, collegiis portuum & passuum rerumque prohibitarum tam in finibus regnorum & terrarum*



dicti serenissimi Domini regis viri & Domini nostri charissimi, quam etiam serenissimi regis Castelle charissimi fratris nostri constitutis eorumque locatis, presentibus & futuris, salutem & dilectionem. Ad vestri & cuiuslibet vestram notitiam deducimus, per presentes quod dilecti deuotique nostri, Magister Jacobus Motz, in sacra Theologia Baccularius, & Nicolaus Lanckmann de Valckenstein Capellani & nuncii illustrissimi Friderici regis Romanorum, fratris nostri charissimi, ad regnum Portugalia aliasque mundi oras se conferunt, pro negotiis dicti illustrissimi regis Romanorum, ut tutius iter eorum peragant, requirendos ex vobis requirimus & rogamus ex corde, aliis vero officialibus & subditis predicti Serenissimi Domini regis viri & Domini nostri charissimi, strictè precipiendo mandamus, quatenus intuitu & amore nostri dictos nuncios & Capellanos dicti illustrissimi regis Romanorum cum eorum comitiua, equitibus, bonis, & rebus transire, ire & regredi, per regna & terras vestris iurisdictionibus submissis liberè, saluè, paciter & secure permittatis, non permittendo eis vel alicui de eorum comitiua, iniuriam, molestiam aut offensam inferri. Quin immò eos cum eorum comitiua honorabiliter fauorabiliterque recipiatis, admittatis, & tractetis eisque prouideatis de securo transitu, & saluo conductu, quotiens opus fuerit, & fueritis requisiti, pro quanto vos Domino nostro charissimo, & nobis non subditi complacentiam, vos verò sui ac nostri subditi, obedire & nostram indignationem vitare peroptatis. Datum Barchinonæ, nona die Junii, anno Domini à natiuitate, millesimo quadringentesimo quinquagesimo primo, regniue dicti Domini regis Sicilia, citra Farum anno decimo septimo, aliorum verò regnorum, anno tricesimo septimo. Deindè prædicti Oratores venerunt equitando per totam Cathaloniam, quæ est bona terra, & fructuosa, habens bona vina & pomaria, sed gens ad bella & rapinas inclinata. Et venerunt ad regnum Arragonum, per plures villas & hospitia Sarracenorum, ad ciuitatem capitalem prædicti regni Arragoniæ, nomine Arragosa, ibidem est magna vniuersitas. In eadem ciuitate sunt tres Ecclesiæ Sarracenorum, & habent vnam Scholam pro iuuenibus Sarracenis. Et in eadem ciuitate singulis septimanis habentur tria festa. Quia feria sexta pro Sarracenis. Sabbato pro Judæis. Dominica die Christianis. Et eodem anno in eadem ciuitate fuit perlamentum celebratum per sanctam iustitiam. Et hoc regnum Arragonum pro tunc à quodam generoso & famoso doctore utriusque iuris, qui appellabatur sancta iustitia, propter absentiam Domini Regis Alfonsi regebatur: qui rex in Sicilia & in Neapoli residentiam habuit. Ab eodem Doctore & capitaneo maiori regni Arragoniæ saluum conductum receperunt, veneruntque per ciuitates & castra ad quandam ciuitatem nomine Lereida, circa quendam fluvium magnum. Ibi est vniuersitas & studium generale. Et intrauerunt regnum Naverræ, per ciuitates & castella. In eodem regno mulieres gerunt cornua in frontibus eorum, cum pluribus ornamentis. Et sic itinerando venerunt ad quandam ciuitatem, ad sanctum Dominicum. Ibi est sedes episcopalis. Et in ecclesia penes altare sunt gallinæ viuæ in signum cuiusdam miraculi. Quia extra muros prædictæ ciuitatis quondam quidam peregrinus fuit innocenter suspensus, ut tunc legitur in passionali die Sancti Jacobi. Ibique isto anno millesimo & quinquagesimo primo fuit quædam secta magna extirpata: Et uno die quinquaginta tres personæ utriusque sexus fuerunt combustæ, quia dixerunt se vitam communem & vitam Christi ducere, & unus ex eis erat Christus nuncupatus, & aliqui Apostoli, aliqui verò discipuli, & pulcherrimas habuerunt mulieres. Et circuibant per villas & castella prædicando. Et postea Oratores ad regnum Castellæ venerunt, ad ciuitatem magnam Burgus. Ibique Archiepiscopatus & Vniuersitas, ibique à Capitaneo maiori acceperunt saluum conductum, & venerunt via recta versus regnum Leonis. Sed à casu venerunt plures armigeri, qui prædictos Oratores per fort duxerunt ad præsentiam regis Hispaniæ, qui pro tunc cum magno exercitu erat in campis, & castrametatus fuit contra regem Granati, qui est paganus. Rexque Hispaniæ Oratoribus prædictis saluum conductum & litteram passus iuxta linguam suam dedit, & sic venerunt ad regnum Leonis. Et Leon est magna ciuitas, ibique est Archiepiscopatus & vniuersitas. Et consequenter ve-



nerunt ad prouinciam Sturgus, ibi Oratores fuerunt auisati, eò quod essent aduenæ de longinquis regionibus, & pausauerunt. Quia quidam potens Baro & miles de Sibilia inuasit Dominum Alforum de luna, ducem Gallicia, per ignem & gladium. Alia autem die prædicti Oratores more peregrinorum cum aliis peregrinis de diuersis regionibus congregati, continuauerunt viam versus Galiciam, in monte Rabanel. Venerunt hostes cum trecentis equestribus & pedestribus, cum magna rapina hominum & bestiarum, & primo impetu percusserunt & caperunt omnes, qui erant in comitiua, spoliauerunt eos Oratores vestibus, pecuniis, & uno equo. Superuenit capitaneus eorum quidam miles, cui prostrati in terram ad oscula pedum flexis genibus reuerentiam metu mortis fecerunt, & literas ac saluum conductum à regibus & principibus ostendentes. Sed capitaneus non aduertit. Et multiplicatis vicibus erectis manibus in cœlum, petierunt ob amorem fidei Christianæ & sanctorum Jacobi & Georgii, & propter intuitum serenissimi Domini Romanorum Regis, ostendentes literas. Idem Capitaneus misericordia motus recepit ad se literas passus serenissimi Imperatoris Domini Friderici, omni cum reuerentia. Et sic gratiam obtinuerunt. Et eandem literam passus idem Capitaneus pro se in memoriam seruauit, & restituere recusauit. Raptoribus sic recedentibus, prædicti Oratores cum aliis peregrinis, cum dolore, cum patientia & angustia venerunt eadem nocte ad vnā villam, per præfatos raptos & hostes spoliata & exusta: ubi neque pro se cum aliis peregrinis vulneratis & cæsis, neque pro equituris habere poterant aliquid alimentorum: nec vinum, nec oleum, pro vulneratis. Altera secuta die sancti Vdalrici venerunt ad Galiciam, & ad unam ciuitatem Ponteferrada: ibidem habitat quidam Comes natus, qui Oratoribus prædictis Chirographo certas pecunias accommodabat, quas tunc in Compostella ad sanctum Jacobum persoluerunt: quod ibidem cambium in paucā Cosme de medicis in florentia habebant. Et consequenter itinerando venerunt per loca & castella eiusdem terræ, usque in locum sancti Jacobi. Et eadem ciuitas dicitur Compostella, ibidem pro quiete & deuotione usque ad tertium diem moras fecerunt, & missas legerunt. Deinde venerunt per sex miliaria ad Patran, in quo loco sanctus Jacobus prædicauit, & signa fecit. Et de Judæa mortuus, in quadam naui lapidea ad eundem locum per mare venit. Quæ naus hodierna die in aquis videtur & peregrinis monstratur. Deinde propter metum raptorum cum peregrinis qui erant de Hibernia, venerunt ad fines terræ, ad quandam Capellam sanctæ Mariæ, & dicitur in monte Sinai: ibi sunt certa hospitia pro peregrinis: Et declinauerunt per multa deuia horrenda loca, & cum magno timore, & uenerunt ad quendam fluvium magnum, & ad ciuitatem more paganorum benè constructam, & munitam nomine Tunii: ibidem à Capitaneo saluum conductum obtinendo, vnus Oratorum cum duobus famulis & equituris per fluvium nauigando qui statim dum terram attingeret captus est, nisi diceret causam veniendi ad hoc regnum Portugaliæ. Qui respondit vltra prædictum fluvium habere socium, cum certis famulis & equituris, ut darent cautionem & saluum conductum eidem, vt simul convenirent; quod factum est, & introduxerunt prædictos Oratores tanquam peregrinos ad primam ciuitatem regni Portugaliæ Valentz: quæ fuit quondam ciuitas Paganorum & est ciuitas benè munita & magnis & altis turribus constructa. Hoc regnum Portugaliæ est in magna custodia propter fines terræ. Quæ pluribus Insulis maris occupari posset. Et venerunt per villas & loca eiusdem regni ad quendam ducem de Porcellis. Deinde ad ciuitatem port ibidem est Archiepiscopus, & est fortissima & magna ciuitas. Deinde nauigando per fluvium venerunt de die in diem ad ciuitatem Corymbria, ibi est Ecclesia Cathedralis, ibidemque circum & circa in uno & eodem anno crescit binies in uno agro frumentum maturum. Et ibi crescunt optima vina, & Zuccarum in Cannis. Die verò sancti Jacobi prædicti Oratores venerunt ad quoddam monasterium ordinis sancti Augustini, ad sanctam Mariam de Batallo, in eodem monasterio est sepultura serenissimi ac triumphantissimi Domini, Domini Eduardi Regis, & Domina Leonoræ Reginae.



ginæ Portugalliæ. Et omnium regum & reginarum Portugalliæ, & Algarbi regnorum. Deinde venerunt rectâ viâ ad quoddam monasterium magnum ordinis sancti Benedicti, nomine Alkabassâ. Ibi quondam rex Granati fuit à rege Portugalliæ postratus & interfectus. Et Oratores fecerunt sibi vestes & alia pro honore necessaria. In eodem loco venerunt nuncii à Domino Rege Portugalliæ, conducendo Prælibatos Oratores ad quoddam Castellum, tribus miliaribus distans ab Vlixbanna, ibi Oratores moram fecerunt quo usque Dominus Rex Portugalliæ mandaret eos venire. Vlixbanna est una notabilis ciuitas, multò maiorque Wienna in Austria, habens in se magnum & altum montem, cum fortissimo castro, vt Gretz in Styria. Ibique est Archiepiscopatus, & collegium legum & plura monasteria. Quam ciuitatem Vlixes construxit, ad honorem Vxoris suæ, quæ vocabatur Banna: & est nomen compositum ex Banna & Vlixes, & dicitur Vlixbanna. Hæc ciuitas habet bonum & magnum portum maris. Altera autem die ad mandatum Domini Regis Portugalliæ venerunt equestres Domini, Episcopi, Prælati, Comites, Barones, milites, & nobiles Christiani. Deindè Sarraceni cum magno comitatu, iuxta ordinem deputatum, & Consulatus prædictæ ciuitatis cum magno populo obuiam, & prædictos Oratores honorificè suscipiendo, & ad Vlixbannam ad castrum in alto monte positum ad aspectum & præsentiam Serenissimi Domini Regis Portugalliæ conducendo, & immediatè præsentando Dominus Rex Portugalliæ sedebat in solio suo in corona, cinctus generosis & nobilibus militibus suis, iuxta ordinem preciosè ornatis, qui cum gaudio prædictos Oratores vidit & recepit, & ab eis salutationes & omne bonum nomine Serenissimi Domini, Domini Friderici Romanorum Regis audiuit. Qui surgens de solio quemlibet Oratorum per manus suas trahendo, & ex compassione cum eis loquendo, de tanta fatigata tali tempore æstiuo, & discrimine viarum, consolandoque eos, & ad hospitia eis deputata ad ciuitatem in equis regalibus & ornamentis samadinis magnifice conducere mandauit, in eodem hospitio sic quiescendo, Serenissimus Rex Portugalliæ congregauit suos maiores & consilium, & prima die mensis Augusti vocauit prædictos Oratores per duos Doctores legum, & per duos milites ad se, & personaliter duxit eos primò ad illustrissimam Dominam Reginam Portugaliæ Conthoralem eius, quæ in eius Palatio ornatissimè cum suis nobilissimis virginibus decorissimè ornatis sedebat more suo in solio. Quæ cum reuerentia prædictos oratores recepit, & audiuit; & interlocutoria cum eis habuit. Secundò Dominus Rex Portugalliæ duxit eos ad aliud palatium, ornatissimè præparatum, in quo sedebant tres sorores virgines, quæ erant speciosissimè ornatae; sc. Serenissima Domina & virgo Leonora, Katharina, & Johanna, Serenissimi Domini Eduardi Regis & Illustrissimæ Dominae Leonoræ Reginae Portugalliæ bonæ memoriæ filia legitimæ, quæ prædictos Oratores viderunt & audierunt. Tertiò eodem in die in Palatio Regio fuit chorea facta à prædictis præclarissimis virginibus ac aliis generosis ad hæc deputatis. Et interlocutoria cum Oratoribus hinc inde facta. Postea immediatè post horam vespertinam fuit audientia data. Sic Serenissimus Rex Portugaliæ Dominus Alfonsus, cum fratre suo infante Domino Ferdinando, & Domino Heinricho patruo eorumque, & Domino Marchione de Valentia de sanguine regio & Archiepiscopis, Comitibus, Baronibus. Et quam plures generosi ad hæc vocati audierunt legationem Serenissimi Domini, &c. Romanorum Regis per dictos suos Oratores: quæ erat ad concludendum & contrahendum matrimonium per verba de præsentia, cum præclarissima virgine & Domina Leonora, &c. Juxta capitula & compactata alias in Neapoli facta & conclusa: ostendentes super his mandatum plenum, cum imperiali Majestate roboratum & munitum. Altera autem die fuit matrimonium, de quo supra in præsentia Serenissimi Regis ac Reginae Portugaliæ sororum, &c. principum, Comitum, Baronum, &c. Generosorum & utriusque sexus nobilium, &c. per verba de præsentia cum Arenga certa: Adorna thalamum, &c. more solito per oris osculum, & annuli immiessionem, eandem clarissimam virginem infantissimam Dominam Leonoram, &c. Serenissimo Domino, Domino Fri-



derico Romanorum Regi per libatos suos Oratores subarrando desponsata matrimonio, conclusum. Et iste actus solennis solenniter fuit finitus. At statim clangor tubarum & iubilatio hominum in eodem Palatio insonuit. Et quasi ex eadem hora inclytissima virgo Domina Leonora iam nunc ab omnibus Romanorum Regina vocata & proclamata, cum magna solennitate ad aliud Palatium magnum specialiter ad hoc deputatum & ornatum ducta fuit. Ibi ad honorem Serenissimi Romanorum Regis, &c. eius sponsi Charissimi, primam Choream cum Domina Regina Portugalliae multum curiosè fecit. Et post choream factam super omnem eius generationem in eminentiori & digniori loco collocata fuit. In eadem ciuitate Vlixbannensi, in omnibus monasteriis & aliis ecclesiis ad mandatum Regium & Domini Archiepiscopi fuit laus DEI publicata, & solennes præcationes cum processionibus & oblationibus factæ, in perpetuam rei memoriam, eo quod prædicta virgo & sponsa Domina Leonora Anno Domini Millesimo quadringentesimo tricesimo septimo, octaua die mensis Septembris in prædicta ciuitate nata fuit, quæ iam ab omnibus proclamata fuit, qualibet lingua sua per ciuitatem, viuat imperatrix Domina Leonora, &c. Et in eadem ciuitate Oratores moram fecerunt. Quia multi erant debilitati & febribus vexati propter inusitatum aërem marinum. Miserunt tamen nuncium cum literis ad Serenissimum Dominum Imperatorem, &c. Domina sponsa coepit studere linguam almanicam, sed paucum capere, potuit. Quia aliis negotiis perpedita fuit, proposuit quomodo per viam nauigando DEo prosperante per mare diligentiam adhibere vellet. Et peregrinationes diuersas in Portugallia & Algarbi Regnis cum Oratoribus fecit. Oratores verò diligenter sollicitauerunt negotia, vt ante Hyemen ad urbem Romanorum, aut ad portum Thalamonis sub dominio Dominorum Senensium peruenire valerent. Rex verò Portugalliae in singulis pro expeditione diligentiam fecit.

Die sancti Cholomanni, quæ est tredecima mensis Octobris Domina Leonora sponsa ab omnibus Domina Imperatrix vocata, à Domino Rege Portugalliae Domino Alfonso & fratre suo Domino Fernando infante, Heinricho patruo eorum, cum duabus Dominae Imperatricis sororibus infantissis, fuit solenniter ducta à Palatio, quod erat in ciuitate ad regale castrum, intra muros ciuitatis in alto monte positum, ibi cenam fecit in una parte, & Oratores in alia parte declinatorii. Et cæna facta per totam noctem Choreæ & ludi diuersi & preciosi fuerunt. Primò coram Serenissima Domina Leonora Imperatrice venerunt Reges armorum & Heroldi, præsentantes de singulis Reginis totius Christianitatis quilibet Epistolam scriptam Dominae Imperatrici præsentando. Deindè venerunt Æthiopes & Mauri, cum quadam factura ad modum Draconis, cum Choreis & apparatibus more eorum, reuerentiam Dominae Imperatrici exhibendo. Postea venit Dominus Ferdinandus infans cum sua societate vno colore ornatissimè, omnes benè vestiti; habens epistolam in manu sua, annuncians aduentum suum cum milicia, ad hæc festa nuptialia venisse. Postea venerunt homines syluestres in quodam angulo mundi, in longinquis insulis marinis, tamen sub Serenissimo Portugalliae Rege modo constituti, dicentes à nostris superioribus ad hæc festa nuptialia missi fuimus. Et speciali Choreæ & mirabili vsu sunt ad modum eorum; Eò quod in eadem Insula nomine Camaria fuerunt homines utriusque sexus nudi, quam Insulam Dominus Rex Portugalliae Dominus Eduardus, &c. casu inuenit, &c. Postea Serenissimus Dominus Alfonso & Algarbi Rex Captaeque Dominus frater senior Dominae imperatricis venit cum sua milicia, specialiter ad hoc vocatis & electis, preciosis vestibus, aureis, samedinis ornatissimè indutis: porrigens Dominae Imperatrici sorori suæ Epistolam, asserens se ex longinquis partibus terræ suos commilitones & fortissimos bellatores ad hæc festa nuptialia vocasse, & venisse, actusque militares cupiens. Postea venerunt generosi Almanorum, cum crinibus crispatis, usque ad scapulas, cum epistola eorum. Et coram Domina Imperatrice protestati sunt, de Almania electi ad hæc festa nuptialia venisse, omnibus aliis nationibus opponere se volentes, obtulerunt.



Die quarta decima mensis Octobris Domina Leonora sponsa & Imperatrix fuit cum magno decore & apparatu à regali castro deorsum ad ciuitatem Vlixbanensem ad quoddam Palatium in medio ciuitatis deputatum, ducta; ludis hinc diuersis ordinatis: in porta eiusdem castri sedebant ornatissimè septem electores sacri Romani Imperii, &c. Qui elegerunt cum eorum epistolis concorditer Serenissimum Dominum, Dominum Fridericum Romanorum Regem in Imperatorem dignissimum. In secundo loco sedebat Dominus Episcopus Colonienfis, cum electoribus ipsum Dominum Imperatorem nominando. In tertio loco ex opposito, & erat primus locus, sedebat summus pontifex Dominus Papa, cum Dominis Cardinalibus, Dominum Regem Romanorum Fridericum & eius sponsam Dominam & virginem Leonoram Infulis & coronis imperialibus coronando, semper cum Arengis & epistolis. Deindè in quarto loco scilicet ante Ecclesiam Metropolitanam ubi requiescit corpus sancti Vincentii, sedebat Dominus Reuerendissimus, Dominus Episcopus cum canonicis suis, & aliis Clericis, in ornatibus eorum, vocans Dominam sponsam Imperatricem, Dominam Leonoram, quæ equestribus cum fratribus & sororibus & Oratores erat præsens. Cui prælibatus Dominus Episcopus Benedictionem dedit, dicens: *Crescat, & floreat & multiplicetur nomen & semen tuum ut arena maris. Et benedictio DEI omnipotentis sit super te, & semen tuum sit longævum, & benedictum, & seruiant omnes populi Christiani.* Interim venit quidam iuuenis ad modum angeli ornatus de alta turri prædictæ ecclesiæ per ingenium hominum, portans Dominae Imperatrici sponsæ coronam auream, & cantans in aëre. *Accipe coronam hinc in terra, ut in cælo coroneris à DEO super omnia elementa.* Ibique, fuit locus dispositus ad modum Paradisii, à quo quidam iuuenis angelicus in altitudine per quandam fenestram turris in aëre venit, portans in pelvi deaurata rosas, projiciendo eas super caput Dominae Imperatricis cantando. *Accipe flores & rosas, ut tu & semen tuum floreatis in terris: Et cum flore virtutum, post longum tempus in terra, merearis florem æternæ beatitudinis recipere in cælis.* In quinto loco propè præfatam Ecclesiam Cathedralem versus occidentem fuit statio facta. Ibique, erat magnus populus congregatus, quasi viginti millia hominum utriusque sexus, & à quodam notabili Doctore fuit Arenga facta, quasi ad mediam horam, ad honorem & laudem Domini Imperatoris, eius sponsæ laudem & omnem honorem pronuncians. In eodem loco fuerunt constitutæ tot regales personæ in vestibus & armis, & coronis regalibus, quot tunc Reges Portugaliæ & Algarbi regnorum, ab initio usque ad præsentem Regem Dominum Alfonsum fuerunt. Ibidemque alius famosus Doctor eorum strenuus, actus pro fide Christiana & republica factos, ornatissimè declarauit quomodo & quotiens contra Paganos & infideles se exposuissent, & victoriam obtinuissent. Et sanctæ Romanæ Ecclesiæ adfidentiam fecissent, & obedientiam semper obseruassent, Affricos eis subiugassent, fidemque, Catholicam in pluribus locis plantassent. Ibi audiui constantiam fidei Christianæ in Regno Portugaliæ. Quomodo Reges Portugalliæ exposuerunt se morti contra Barbaros, & Affricos, ut docet experientia in magno & lato Dominio Ceptensi in Affrica. Quomodo Dominus Fernandus patruus Dominae Imperatricis pro republica & liberatione populi sui in Affrica dedit se in mortem, & in pronuntiatione eiusdem mortis omnis populus flere cepit. Et altus & magnus clamor populi erat ad DEum pro anima prædicti regis Fernandi, sic in Affrica defuncti, quem credo pie de Canonizandis esse: absque lachrymis nunquam poterit istam historiam narrare. In sexto loco coram Domina Imperatrice venerunt tres iuvenes angelico more. Primus angelus portans crucifixum, & præsentans fidem quæ est virtus theologialis. Secundus angelus portans ramum viridem, qui angelus dictus est spes. Tertius angelus in manu gerens columbam viuam, qui angelus dicebatur Charitas. Alloquentes Dominam Imperatricem Leonoram rhythmis eorum, ut ipsa Domina Imperatrix apud Dominum Imperatorem sponsum eius amantissimum habeat spem firmam, omnium virtutum ornamentum fidem rectam, ut in columnam fidei Christianæ



immobilem. Charitatemque, perfectam, ut plus quam in patrem & matrem & in eius omnem generationem confidat. In septimo loco descendendo versus plateam ciuitatis fuit quidam fons artificialis, fundens aquam rosaceam, pro recreatione hominum. Ibique erat hortus cum diversis brutis animalibus syluestribus. In octauo loco coram Domina Imperatrice sedebant tredecim Prophetæ, in habitibus eorum, more prophetarum, quilibet librum in manu tenens, prophetantes multa bona & prospera de sponso & sponsa, & sponsam dignè esse electam. Et sic Domina Imperatrix venit cum Rege & Regina sororibus & fratribus, & omni militia de loco ad locum, quam sequebatur omnis populus, hæc videndo & audiendo. Ità quod plus quam viginti millia hominum erant in comitiua & congregatione. Et hæc processio durabat à mane usque ad serò.

Die quinta decima mensis Octobris Serenissimus Dominus Rex Portugalliæ in platea ante Palatium Domina Imperatricis disposuit plures choreas. Et hora meridiei misit Rex sex tauros sylvestres, ante omnem populum venerunt Sarraceni utriusque sexus cum Choreis & tripudiis eorum. Et ceperunt duos tauros viuos, quos occiderunt, & in partes diuiserunt, & ad usum eorum distribuerunt.

Sedecima autem die mensis Octobris Dominus Rex Portugalliæ de Palatio suo regio ad sororem suam Dominam Imperatricem cum magna reuerentia veniebat hoc modo. Primò quidem parvus juvenis miræ pulchritudinis & multum ornatus sedens in magno equo, panno aureo tectus quem sequebatur currus ornatissimus, Galeas, scuta, & hastas pro hastiludio portans. In medio autem galearum aquila suum locum habuit. Deindè veniebant duodecim milites in armis & equis eorum, & magno decore. Et quilibet miles habuit quinque famulos decenter ornatos, in equis portantes hastas & ornamenta quo ad actus militares. Postea venerunt duodecim Heroldi in habitibus & armis eorum in equis benè dispositis. Postea tubicinatores & trumpetæ miro modo ornati & ordinati. Postea venit Serenissimus Dominus Rex Portugalliæ in armis suis gloriosissime, nunquam similem vidi incedere ita, quem sequebantur sex iuvenes in auro & argento & omni decore vestiti, in equis pulcherrimis. Et venerunt sic per ciuitatem processionaliter ad vnum palatium magnum, ex lignis & asseribus ad hoc constructum, cum duabus turribus altis. Turres & tecturæ palatii erant coopertæ cum bono panno griseo & nigro, intinctis auro & argento, in quo Palatio Rex habitabat.

Die autem septima decima mensis Octobris, manè ante ortum solis venerunt Christiani ex una parte. Sarraceni in alia parte. Homines sylvestres, etiam in una parte. Iterum in alia parte Judæi, quilibet iuxta linguam suam canens, clamans, & tripudians. Hora autem prima huius diei venit generosus vir, nomine Lemerent, Capitaneus maior totius maris in Regno Portugalliæ ipsemet quintus, ornatu magno & precioso in equis. Accedens ad Palatium ubi Dominus Rex Portugalliæ cum sua militia habitabat, vociferans per Heroldum, suum, Dominum Regem Portugalliæ vocans, & omnem eius militiam ad exercendum actus militares. Attestatus Rex Portugalliæ se velle venire & in omnibus se opponere insinuauit. Et eadem hora venit quædam factura serpentis horribilis erecto collo, in qua sedebat quidam miles pulcherrimè armatus, postulans & requirens Dominum Regem Portugalliæ ad luctandum, duellandum, & hastiludendum. Interim Dominus Rex Portugalliæ cum electis suis duodecim precioso & magno ornatu venit in equis, tectis pannis deauratis usque ad terram. Heroldis & tubicinatoribus trumpetis præcedentibus ad magnam plateam in una parte. In altera verò, parte plateæ venit Dominus Infans, Dominus Fernandus frater Domini Regis Portugalliæ, preciosè & ornatissimè cum Heroldis & trumpetis, cum duodecim militibus ornatis. Opponere se volens Domino Regi, & suis. Et ista platea erat magna & lata. Et in medio eiusdem plateæ per longum quidam paries ex lignis & asseribus factus, diuidens hasti ludentes. Et iste paries per totum erat cum panno bono, griseo colore coopertus. Deindè venit Elephas magnæ stature, fuit una factura, gerens super se turrim cum fortificiis de lignis constructa in quo steterunt quatuor



tuor tubicinatores, & quatuor parui Æthiopes cum lanceolis & arundinibus magnis, qui proiecerunt ad populum cum pomis pommeranzen. Erat ibi autem parvus & iuuenis Æthiops, nomine Peroblanco, quem Dux Sibilie Domino Christophoro Vngenad, militi propinauit & dedit. Eo quod idem miles Dominus Christophorus Vngenad, de Ducatu Charinthie pro tunc militandi causa de regno Granati ad Regnum Portugallie venit, qui etiam fuit unus inter hastiludentes, contra Regem Portugallie. Et interfuit istis festis nuptialibus, eò quod propter discrimina viarum & pericula non poterat venire ad Galiciam, trahebant autem prædictum Elephantem plus quàm octuaginta viri, quem sequebantur octo milites ornati, in equis diuersarum figurarum & colorum. Primus equus gerebat figuram & colorem veri cerui, tectus panno famedino.

Secundus equus gerebat figuram Vnicornis, tectus panno famedino usque ad terram. Tertius equus gerebat figuram unius bouis, tectus panno Samedino. Quartus equus gerebat formam leonis, tectus panno famedino. Quintus equus gerebat figuram capricorni, tectus panno famedino. Sextus equus gerebat figuram unius ursi syluestris, tectus panno famedino. Et sic de aliis figuris equorum. Et milites insedentes multum politè & ornatissimè suo ordine procedebant. Ecce magnificentia & preciositas, omnia ad honorem regni sponsi & sponsæ. Venit autem Rex Portugallie ornatissimè armatus in equo, cum sua hasta qui super galea sua gerebat Basiliscum aureum. Frater autem Domini Regis, Dominus Fernandus gerebat super galea sua faciem auream leonis.

Die decima octaua mensis Octobris continuatis Gaudiis & tripudiis veniebat antè Palatium Domine Imperatricis sponsæ quoddam animal horribile, ad modum Draconis, quod portabant viri quadraginta. Cui infedebat quidam miles splendè armatus, gerens diadema in capite suo. Veniebant autem antè Hospitium Oratorum Domini Imperatoris, quasi quotidie tubicinatores & trumpetæ cum diuersis ludis. Et hastiludentes erant ex utraque parte triginta duo. Et primus hastiludens primatum tenens habuit à Domina Regina Regni Portugallie quæ pro tunc erat impugnata scyphum argentum deauratum. Secunda die tenens victoriam hastiludendo habuit fusorium deauratum. Tertia die triumphanti dabatur annulus cum lapide precioso. Et sic quarta die similiter. Oratores non cessabant sollicitare negotia apud Dominum Regem. Et iterum miserunt nuntium ad Imperatorem.

Die decima nona mensis Octobris fuerunt iterum hastiludia & tripudia ut supra. Et eodem die de serò de mandato Domini Regis Portugallie omnes panni in parietibus tempore hastiludii affixi & extenti fuerunt à communi populo recepti. Quilibet sicut rapere potuit ad usum suum.

Vicesima die mensis Octobris ante ortum solis venerunt ad plateam turbæ utriusque sexus diuersarum linguarum & nationum, cum iubilo & choreis diuersis. Interim Venatores cum magnis canibus venerunt qui duxerunt Leonem, ursum, & porcum magnum syluestrem, & mirabilem fecerunt venationem. Hora autem secunda post meridiem venerunt viri in armis, mutuo luctantes & duellantes. Et postea duo parui pigmæi adulti luctantes.

Vicesima prima die mensis Octobris hastiludia fuerunt continuata, & panni boni diuersorum colorum parieti ex utraque parte pro hastiludio affixi & extenti: venerunt duodecim comites & milites in magnis equis, tecti pannis aureis quasi ad terram pulcherrimè in armis eorum. Et quilibet habuit familiarem in equo, eum cum hasta præcedentem. Et quilibet familiaris erat pulcherrimè indutus, ut angeli solent depingi. Istis sic hastiludentibus ad tres aut quatuor horas & recedentibus, venit quidam in magno ornatu, habens magnam comitiuam cum magnis mirabilibus equis vocans se Regem Troie, habens secum tres filios. Primus filius vocabatur Hector. Secundus Priamus. Tertius vocabatur Ajax, in habitibus regalibus & fulgenti apparatu. Appropinquant ad aulam regiam ac palatium, vbi pro tunc Domina sponsa Leonora Imperatrix erat. Et Dominus Rex Portugallie cum



cum vxore & duabus sororibus dominæ Imperatricis, & oratores ac maiores nobiles erant in congregatione & merenda. Qui rex Troiæ per Heroldum suum clamans & vociferans, quomodo in longinquis partibus ultra-marinis & principaliter in regno suo Troiæ percepisset: quod Dominus Rex Portugalliæ & Algarbi, &c. regnorum, qui esset vicinus suus in Affrica, germanam suam seniore dominam Leonoram gloriosissimo Domino, Domino Friderico Imperatori, &c. desponsauerit. Et ad laudem & honorem coronæ Imperialis & Regni sui magnifica quo ad actus bellicos & militares in regnis suis facere & exercere proposuerit. Ea propter ipse Rex Troiæ cum filiis & principibus suis, in bellicis actibus peritis, ad hæc festa nuptialia venisset. Contra quoscunque cuiuscunque nationis aut linguæ essent, se opponere velle. Hoc Dominus Rex Portugalliæ cum suis commilitonibus audiens, de Palatio suo egrediens, cum suis ad hæc deputatis benè & ornatissimè armatis, cum clamore & iubilo & tubarum clangore ad plateam venit. Ibi coram domina Imperatrice, & sororibus, & Regina Portugalliæ, &c. ita splendida & ornata hastiludia facta sunt, quæ nulli visa sunt similia. Quia in istis fuerunt magni nobiles de Anglia, Scotia, Hibernia, & Sibia, & quilibet voluit apparere splendide. Et circa occasum solis domina sponsa sc. domina Imperatrix, cum domina Regina Portugalliæ per quandam comitissam virginem dedit triumphanti annulum aureum, cum gemmis. Et his finitis, de mandato regio panni in parietibus extenti & affixi, à vulgo communi sunt recepti, quilibet ut rapere potuit, ad vsum suum. Ecce magnificentia.

Die Vicesima secunda mensis Octobris manè venit quidam Dominus multum splendide in equis, cum sua comitiua; dicens, per Heroldum suum proclamans, se esse regem in Europa, & populus suus processit eum: qui per Heroldum suum vocauit ad se omnes Reges & principes, dicens. Vos qui præsidetis & habitatis orbem: Ecce mala quæ crescunt & super nos veniunt, & aperuit magnum librum, & clamans; ait. Iuste iudicate filii hominum, & quod iustum est exequeris, & multa de iustitia. Hora autem meridiei venerunt equestres armati, more Paganorum & Sarracenorum, mutuò pugnantes cum clypeis, lanceolis, & doriculis. Et habebant equos velocissimos, & saltantes ut capreæ hinnulorum, nomine *genetten*. Et sunt in magno præcio.

Vicesima tertia die mensis Octobris venit magnus populus coram palatio dominæ sponsæ, scilicet Imperatricis; cum diuersis instrumentis musicalibus, tubis, buccinis, &c. Et fecerunt quatuor turmas. Primò Christiani utriusque sexus ad modum eorum cum choreis. Secundò Sarraceni utriusque sexus, ad modum eorum. Tertiò Judæi utriusque sexus ad modum eorum plus quàm mille. Quarto Æthiopes Mauri & syluestres homines de Insula Carmaria, in qua homines habitabant utriusque sexus nudi: Æstimantes se solummodò esse & fuisse in mundo, &c. Et est longa historia quomodo à casu inuenti sunt. In eadem Insula fides Christiana est inchoata & plantata. Hora autem secunda post meridiem venerunt sex milites splendide & benè armati, de consulatu eiusdem ciuitatis Vlixbannensis: quos totus consulatus, & maiores natu sequebantur. Et omnes erant vno colore scarlaco rubeo ornatissimè vestiti. Qui milites per Heroldum eorum vocauerunt. Si essent incolæ aut aduenæ cuiuscunque conditionis aut status essent, qui hastiludia aut alios actus militares exercere vellent, ad hanc horam, & ad hanc plateam apti venirent. Statim aliqui milites de palatio regio, & dominæ Reginae, & plures hospites & terrigenæ ornatissimè venerunt, opposcentes se viriliter. Et triumphatori dabantur duo lapidi preciosi, in auro positi.

Die Vicesima quarta mensis Octobris Dominus Rex Portugalliæ fecit grande conuiuium, in quodam palatio, specialiter illo tempore constructo, quod palatium tapetis diuersorum colorum & imaginibus diuersarum figurarum & historiarum intextis, pulchertimè ornatum erat. In prima mensa & tabula coram multis & magnis clenodiis, & magnificis argentereis, regali modo positis, & custodibus præmunitis sedebant hæ personæ. In primo loco sub pannis aureis multum fulgentibus



gentibus sedebat. Domina sponsa Leonora Imperatrix. In secundo loco eiusdem tabulae sedebat Dominus Rex Portugalliae frater senior dominae Imperatricis. In tertio loco ex altero latere sedebat domina Katharina soror dominae Imperatricis. Et in eius latere in quarto loco sedebat Dominus infans Fernandus frater iunior dominae Imperatricis. In quinto loco sedebat domina Johanna soror iunior dominae Imperatricis. In sexto loco sedebant Oratores domini Imperatoris. Et omnes istae personae utebantur pura aqua ad mensam & conuiuium, dempto Domino Fernando fratre Domini Regis Portugalliae, & Oratoribus Domini Imperatoris, qui vsi sunt vino bene lymphato. In aliis autem tabulis descendendo sedebat primo Dominus Marchio, Comites, Barones, Milites, Maiores iuxta ordinem. Ex altera parte ex opposito illorum sedebant comitissae, baronissae, generosae domicellae, & omnes in fulgore & ornatibus. Et multae petantiae fuerunt pro aduenis missae; quis videbit talia? Et conuiuium factum surrexit magna latitia in omni populo, in Choreis, & tripudiis. Veniebant suauissimi cantores, canentes carmina musicalia, ad duas horas. Postea venit magnus populus sc. Christiani, Sarraceni, Mauri, Judaei, homines syluestres, iubilantes & cantantes per totam noctem. Et multa & maxima lumina per totam ciuitatem ante aedes sub & supra, iuxta structuras domorum.

Die vicesima quinta mensis Octobris domina sponsa Leonora cum magna solennitate gloriosè ducebatur ad Ecclesiam Cathedralem eiusdem ciuitatis, vbi corpus sancti Vincentii quiescit. In eadem Ecclesia domina sponsa baptisata fuit, infantibus diebus, post partum ut fieri solet. Ibi solenniter celebratum fuit officium diuinum de Epiphania Domini. Et ceremonialia in offerendo ad summum altare ornatissimè, cum oblationibus veniendo reges & principes iuxta ordinem. Serenissima domina sponsa, sorores: &c. etiam iuxta ordinem cum magno decore, &c. Reuerendissimus Dominus Episcopus de Affrica officium fecit: dansque omnibus suam sanctam benedictionem & pacem, finitis ceremoniis, magnus populus erat ante praedictam Ecclesiam congregatus, expectans egressum dominae sponsae, quae egrediens, & ante fores Ecclesiae, vertebat se & flexis genibus in terram recepit in nomine Domini licentiam à sancto Vincentio, & ab eius Ecclesia parochiali. Et à domina Regina, quae tum sequebatur dominam sponsam, ad certum spatium extra ciuitatem. Quia grauida & vicina partui erat. Et sic processionaliter domina sponsa per fratres & sorores, cognatos & amicos, & principes & omnem populum extra ciuitatem usque ad portum maris cum magno gaudio ducta fuit. In portu maris erat naus magna disposita, nomine Carrata. Sed in Venetiis nominatur propriè Gocken. Ibique domina sponsa cum suis cognatis & virginibus & Oratoribus Domini Imperatoris & ceteris deputatis nauim intrauit, & fecit coenam. O quantus planctus & fletus populi in littore maris erat! Quia domina sponsa ab omnibus amabatur, propter eius innatam bonitatem & virtutem. Stetit autem domina sponsa cum deputatis in portu maris per aliquot dies & noctes, propter ordinationem aliarum nauium, & armigerorum & necessariorum: & quotidie veniebat Dominus Rex Portugalliae ad consolandum suam germanam dominam sponsam. Nauibus verò omnibus pro comitiua ordinatis, & singulis necessariis, bombardis, buxidibus, fundis, Basilistis. Pro usu & defensione aptis, etiam Capitaneis, armigeris in bellicis actibus & maxime in mari expertis, ac patronis, gubernatoribus nauium, & Magistris Astrologis, iuxta stellas & polum viarum bene doctis. Istis ornamentis ad naues deputatas congregatis, venit Rex Portugalliae cum suo Consilio Regio, ad praesentiam dominae sponsae vocando omnes Capitaneos, milites, armigeros, officiales, & maiores de nauibus: ad praestandum de nouo iuramentum, quod velint fideliter agere, & in casu se in mortem dare: Et Domino Marchioni de Valentia, Capitaneo maiori in mari & in terra eundo & redeundo sub poena mortis obedire strictissimè omnes Capitaneos & officiales mandando & amonendo, &c. Et sic istis peractis Dominus Rex Portugalliae plura interlocutoria cum Oratoribus Domini Imperatoris habendo, de tanta expeditione & comitiua, suam germanam sponsam per potentiam per



mare præsentando, & singula pro meliori recommendando. Et cum amplexibus valedicens Oratores. O Portugallia, ô Portugallia bona regio; ibi est abundantia panis, vini, & olei boni; & multi fructus arborum, larenges, citran, mala granata, ficus, Pomerentz, Lemoni, pecora campi, carnes & pisces, mel, Zuckarum, in pluribus locis in cannis crescit. Osintia amanissimus locus & hortus regius, cum paruo fluvio, cum bonis truttis. Et deuoti fratres ibidem in monasterio sancti Hieronymi, sub regula eius degentes. Portugallia & Algarbi regna reguntur, per amministrationem iustitiæ, quæ facit & obseruat obedientiam, & populo pacem, & competentem in istis regnis monetam.

QUARTA die mensis Nouembris domina Imperatrix cum domina Curia, aut magistra curia eius, quæ erat multum generosa comitissa, vidua, & aliis virginibus generosis vocatis, & deputatis, ac Oratoribus Domini Imperatoris & cæteris aliis utriusque sexus personis, in una barca nauigando, venit ad terram, ad quendam Heremitam, qui habuit vnam capellam in honore Mariæ virginis constructam & dedicatam. Et est vltima Capella in finibus terræ, sicut in Galicia. In eadem capella audiendo missam, quæ cum cæteris personis deuota mente confessionem fecit. Et corpus Domini cum percepit, & deuotionibus peractis, se & totam comitiuam huic Heremita, cum oblationibus deuotè recommendauit; & in eodem loco cum suis prælibationem de Zuckaro & pisciculis cum pane fecit, & ad Carracam serò reuersa est, ibi canam fecit.

Die quinta mensis Nouembris venit in vna nauicula quidam sacerdos, portans sacramentum eucharistæ in quadam pixide, pendenti in collo; & omnibus in Carraca existentibus causâ deuotionis corpus dominicum monstrauit. Et ibidem missam siccam absque canone legit, & benedictionem dedit. Numerus nauium erat: primò magna carraca, quæ est naus magna, habens duo forticia pro armigeris, ad pugnandum in mari, in qua naui erat domina Imperatrix, cum palatio suo, scilicet tres comitissæ. Vna erat de sanguine regio dominæ Imperatrici coniuncta, Domina Maria multum speciosa, sed iuuenis: & Viginti quatuor virgines electæ. Et tres viduæ cum cæteris famulabus. Et una virgo quasi virago fortis & laboriosa, & sollicita, Maria Pasana. Oratores Domini Imperatoris, & Dominus Christophorus Vngenad miles, qui per Dominum Regem Portugalliæ Oratoribus fuit associatus. Dominus Marchio de Valentia supremus Capitaneus: duo Doctores, vnus in sacra Theologia Magister, Laurentius; & alter medicus: & octo milites cum aliis nobilibus & familia. Ita quod in eadem naui fuerunt quingenti homines cum multis attinentiis & aliis necessariis. Et homines erant diuisi in tres partes. Vna pars hominum quæ erat ad nauim gubernandum, solebat de mane circa ortum solis cibum sumere. Alia pars hominum quæ erat ad protegendum & pugnandum, scilicet Dominus Marchio, cum militibus & armigeris, &c. Cibum ante meridiem cepit. Tertia pars hominum scilicet domina Imperatrix cum palatio suo, & Oratores Domini Imperatoris cum eorum, &c. tempore meridiei cibum receperunt. Ita in singulis nauibus fuit ordinatum. Et de sero dabantur electuaria, aut de pisciculis falsatis, cum pane bis cocto: nisi quis de propriis aliquid habuit, vsus fuit ad placitum absque igne. Alia erat carraca, in qua erat Dominus Reuerendissimus, Dominus Episcopus Coymbriensis, & quidam miles eiusdem Carracæ; & naus cum aliis militibus & armigeris. Ità quod quælibet naus in ista profectioe & comitiua habuit, specialem Capitaneum & ordinationem & administrationem. Ità quod erant duæ Carracæ magnæ, & tres naues magnæ, & duæ naues minores, & duæ grabellæ. Et duæ naues ante mensem præcesserunt istam expeditionem, cum equis, mulis, & familia. Numerus verò hominum ad conducendum Dominam sponsam Dominam Imperatricem per mare usque ad portum thalamonis, propè Romam & armatam manu erant tria millia hominum. Eccè potentiam.



Die duodecima mensis Nouembris attractis anchoris omnes naues cum bono vento exierunt portum, cum volantibus velis. Venit Serenissimus Dominus Rex Portugalliae propè & alongè cum quibusdam nauibus in mari, conducens suam germanam Dominam sponsam ad tria aut quatuor miliaria. Et valedicens eam, & totam comitiuam, reuersus est ad palatium suum, quem DEus omnipotens cum omni sua generatione semper protegat & benedicat. Eccè qualis diuisio erat: serenissima Domina sponsa, & virgo reliquit proprium regnum, omnem generationem eius, modum viuendi, &c. Et dedit se ad tam longam distantiam per magna pericula maris. Et sic in nomine Domini DEI nostri, & in nomine sancti Jacobi cum bono vento diebus ac noctibus sine mora nauigando venimus ad regnum Granati, propè castrum fortissimum Paganorum, nomine Gibalter. Ibi Dominus Capitaneus noster, Dominus, Marchio misit vnam grabellam cum armigeris ad explorandum; & nos consequenter diebus ac noctibus venimus nauigando ad Barbariam, propè quendam montem magnum, qui dicitur mons Simiarum. Ibi habitabant leones, & multae simiae, à quibus iste mons nomen accepit. Videntes hoc Barbari & Pagani, fecerunt in montibus altis de die fumigationes, & de nocte ignem flammantem, designantes aliis Paganis per hoc, & Barbaris, ut essent cauti: quia Christiani cum potentia venirent ad terras eorum. Ibi in timore & ordinatione magna fuimus.

Vicesima secunda die mensis Nouembris, scilicet die sanctae Katharinae circa ortum solis nauigando fuimus in Affrica, vltra mare propè Ceptam. Et omnes homines flexis genibus susceperunt & orauerunt, vt DEus daret nobis portum salutis. Et ibi recepimus primum portum, ab exitu, de Regno Portugalliae. Et eodem die fuit ordinatum, quod Domina sponsa & virgo Imperatrix, cum certis personis utriusque sexus, & Oratores Domini Imperatoris Dominus Christophorus Vngnad, & de aliis nauibus etiam certae personae, caperent terram. Et sic post meridiem domina sponsa cum trecentis personis ex tota comitiua ciuitatem Ceptensem, cum trumpetis & buccinis intrauit; venerunt de eadem ciuitate obuiam Capitanei, milites, nobiles, armigeri, in armis militaribus & mirabilibus. Et totus populus cum gaudio ad suscipiendum Dominam Imperatricem cum suis, quia pauci ex comitiua tota viderunt istam ciuitatem: quia in eadem ciuitate Dominus Rex Affricae residentiam habuit. Et Hannibal ibidem grande palatium miro modo construxit. Sed Serenissimus Dominus Rex Portugalliae Dominus Eduardus, pater Dominae sponsae, grauib; & magnis expensis eandem ciuitatem obtinuit, & Affricanos expugnauit. O magna palatia, & magnae, & fortes & mirabiles structurae in turribus & fortificiis. In eadem ciuitate Domina Imperatrix ad tres dies moram fecit. Quia multum debilitata fuit, sic vltra mare veniendo. Et erat tunc temporis magnus calor, & aestus solis, & aeris in eadem terra. Eò quod homines pro tunc plantauerunt olera & semina in agris & hortis, quemadmodum citra festum Viti in Styria, in Gretz, & in noua ciuitate vltra montem Semericum fieri solet. Cepta est magna ciuitas, in duplo maior quam Vienna in ducatu Austriae. In ista ciuitate Ceptensi fuerunt multa Oratoria Sarracenorum, quò ad Machometum DEum eorum. Et maior Ecclesia ibidem quae quondam fuit Paganorum iuxta morem eorum constructa, habens columnas erectas in altum, usque ad testitudinem centum & octoginta de diuerso marmore diuersorum colorum. Et propè summum altare sunt duae statuae de nobili lapide, quasi viridis coloris, de lapide serpentino. Jam est Ecclesia Christianorum Cathedralis in honore beatae Mariae virginis consecrata. Ibi dantur signa peregrinis. Sed rarò adveniunt propter magnam distantiam. Alia est Ecclesia extra muros maiores praedictae ciuitatis, etiam in honore sanctae Mariae virginis de gratia, in qua multa signa fiunt. In eadem Ecclesia ad mandatum dominae nostrae Reginae & sponsae dominae Leonorae; Ego Nicolaus Lanckmann de Valckenstein in eius praesentia missam legi. Tertia Ecclesia in eadem ciuitate habet magnas structuras & aedificia. Et est consecrata in honore sancti Jacobi Apostoli. Ibi fratres minores habent conuentum. In eodem



conuentu reperi deuotum fratrem prædicti ordinis, qui in die sanctæ Margrethæ fuit mecum ad sanctum Jacobum in Galacia, qui duxit me ad plura loca illius ciuitatis. Ibi in Cepta est vnus fons communis sub alta testudine ad modum cuiusdam magnæ Ecclesiæ. Ibi in Cepta est grande Palatium, in quo quondam Rex Affricæ & Hannibal habitabant. Et idem palatium habet partes ex opposito distantes, parietes & pauimenta miræ pulchritudinis, cum diuersis lapillis politis, diuersorum colorum, sicut parietes Ecclesiæ sancti Marci in Venetiis. In eodem palatio domina nostra domina sponsa Imperatrix Leonora habitabat. In eodem Castro Regio sunt tria balnea pulcherrima, miro modo disposita & delectabilia. Et propè est hortus Regius, & pulcherrimus, ac diuersis & nobis Christianis alienis arboribus & plantis ignotis. In quo horto Imperatrix cum suis merendam fecit. Et per manus proprias quendam hortulum in memoriam plantauit, & pro arra eidem vnum ducatum dedit. Ibique erat pomus, quæ habuit ita longa & folia lata, quod Domina Imperatrix cuidam puero sex annorum ex duobus foliis pallium quasi ad terram fecit. Istis verò diebus Dominus Comes, scilicet Capitaneus eiusdem ciuitatis, & Dominii, cum mille armigeris iuit contra Paganos, ad quandam ciuitatem Paganorum, sex miliaribus distans nomine Tangere. Et reuersus est cum gaudio, portans captiuos certos Paganos, asinos, mulos, vaccas, &c. Domina Imperatrix mandauit, ut Pagani, nomine eius liberti abirent. In eadem ciuitate Ceptensi habuerunt Pagani alta & magna Oratoria, & preciosa, pro idolis eorum constructa. In eodem Dominio omnes Christiani habent à sede apostolica plenariam absolutionem & remissionem omnium peccatorum, iuxta tenorem bullæ, quod quotidiana pugna & bella contra Affricanos & Paganos in mari & in terra gerunt. Paucis annis elapsis Rex Tunes in Affrica captivum duxit Dominum Fernandum, filium Regis Portugalliæ, fratrem fratris Imperatricis, ad quandam ciuitatem nomine Fees, ibi propè fuit Ecclesia Cathedralis Ypponensis, ubi sanctus Augustinus fuit Episcopus, qui natus est in vna ciuitate, quæ vocatur arabicè Daga, &c. & propè est ciuitas magna Carthago, in qua Hannibal & Hastibal fortissima Castra, habebant, quem Romani prostrauerunt. A multis Affricanis audiui, quem circa sepulchrum bonæ memoriæ ipsius Domini Fernandi Portugalliæ Regis in Affrica, ubi pro fide Christiana & liberatione populi sui defuncti multa signa fierent. O bona & fertilis terra Affrica. Sed paucissimi Christiani.

Penultima die mensis Nouémbris de mane post missam Domina Imperatrix cum suis naues intrauit. Et eodem die cum bono vento nauigando diebus & noctibus venimus per diuersa regna maris, & declinauimus versus regnum Valentia. Ibi Dominus Marchio Capitaneus, misit vnā grabellam cum certis armigeris ad terram, pro carnibus & fructibus & aquis dulcibus, quia in mari cito putrescit. Similiter & panes statim putrescunt nisi bis coctus. Et sic continuò nauigando non quiescendo die noctuque venimus propè quandam Insulam magnam, habens magnas ciuitates & castra. Et est regnum Maioricarum. Hæc Insula fuit quondam Barbarorum, tunc autem Domini Regis Arragoniæ, qui miserunt ad nos quis aut vnde essemus.

Sed non fuit eis dictum propter reversionem nauium. Sed in die sancti Nicolai venimus ad magnum & altum mare Hispanicum, per gulfum Leonis. Ibi mare per maximè perturbat & resoluit se. Et dicitur Syrtis. Et ille gulfus & Syrtis durauit per diem & noctem. O mirabiles elationes maris: & omnis homo fuit debilitatus, & maximè Imperatrix cum delicatis suis virginibus. Et postea venit nobis ventus contrarius, & valdè timuimus retrò nos gulfum & Syrtim Leonis. Ibi vidimus multa & diuersa monstra maris. Et sic necessitati per ventum contrarium venimus cum magna difficultate propè Insulam scilicet Marsiliam. Et ibi erant piratæ, & raptores, cum tribus nauibus & cum duabus galeis. Nostræ naues erant dispersæ. Sed ad signa & sonitus bombardarum, & ad sonitum buccinarum venerunt naues nostræ, & inuasimus in aquis istos raptores & piratas, qui magna damna in pluribus prouinciis marinis mercatoribus & aliis Christianis intule-



intulerunt. Et nostræ naues erant magnæ, & non statim per anchoras fundum receperunt. Conuertimus eos in fugam & maiora bona quæ ipsi in nauibus eorum habebant, detulerunt ad galeas eorum. Nostri armigeri & bellatores cum duabus grabellis inuasērunt unam nauim, quam per ignem & picem combusserunt. Aliam nauim cum instrumentis ad hoc aptatis perforauerunt, & in profundum maris demerserunt. Duæ verò galeæ cum raptoribus & maioribus bonis eorum in fugam contra ventum venerunt. Tertiā nauim nostri receperunt, sed pauca bona invenerunt, nisi certos raptores, pannos, & anchoras, catts, vtenfilia, vnam campanam, & bonum vinum: de quo usus sum. Et sic totum diem cum istis raptoribus conclusimus. Et omnes naues nostræ miserunt anchoras, & steti-  
mus in eadem Insula Marsilia per duas dies. Et hic recepimus secundum portum ab exitu de regno Portugalliæ. De eadem Insula venerunt Capitanei maiores, cum potentibus mercatoribus illius Insulæ, cum propinis diuersis, perdicibus, regulis, mutonibus, panibus, vino, & fructibus: cupientes scire unde aut quis essemus; cum tali potentia tempore interdicto in mari. Fuit eis dictum nos esse Christianos, & amicos & non plus. Sed aliqui ex nobis vellent videre loca sancta, scilicet speluncam & sepulchrum sanctæ Mariæ Magdalenæ, sanctæ Marthæ, sancti Lazari, & sancti Maximini. Vidimus Capitaneum Insulæ in timore, de tanta potentia nauium & armigerorum. Et reuersus est de mane cum uno magno boue, & aliis optimis carnibus illius Insulæ, & bono vino, & piscatis, speciali propina. Et valde desiderabat scire, & fuit sibi ad partem dictum, qui multum gaudebat, qui & auxit propinas.

Die octaua mensis Decembris in portu Marsiliæ venit tempestas magna, & eleuauerunt flumina fluctus suos, & procellæ magnæ; Ita vt naues nostræ saltabant in anchoras ut canes in cathenis. Carraca scilicet nauis nostra, in qua erat Domina Imperatrix sponsa, cum suis; fregit omnes funes anchorarum & fuimus in puncto mortis. Omnis homo confitebatur, & commendabat se DEO. Patronus & gubernator nauis huius non habuit nisi unam anchoram magnam & grauem, cum uno magno & longo fune, de puro serico; nomine Saluator, quasi vita nostra & salus staret in ista anchora & fune. O quantus labor erat omnium, per medium diem & totam noctem, cum fune & anchora. O quanta lamenta omnium hominum. Et multa vota fuerunt DEO facta. Speciositas virginum & mulierum immutata fuit. Ista tenella comitissa de sanguine regio Domina Maria virgo, quasi agonizando attraxit spiritum. Et de consilio Dominae sponsæ Imperatricis, & maiorum utriusque sexus, vouimus unanimi consensu de propriis nostris omnium expensis dirigere duos peregrinos ad sanctum Jacobum in Gallicia, & verè statim tempestas & ventus mitior erant. Aliæ naues nostræ iuerunt in dispersionem. Et ad statim dum ventus erat pro nobis bonus, Patronus nauis nostræ extraxit unam magnam barcam, quæ erat in Carraca nostra, & misit quadraginta octo famulos marinos, ad quærendum anchoras, & de mane reuenerunt cum duabus magnis anchoris. O magnus labor est cum anchoris attrahendis.

Die duodecima mensis Decembris iterum nauigando venimus in altitudinem maris, propter naues nostras dispersas, quæ successiue venerunt ad nos, allegantes maxima pericula maris, & dixerunt; se vidisse aliquas naues insequentes nos de Barbaria. Dominus Marchio Capitaneus misit retrò nos unam grabellam, cum peritis armigeris, pro custodia, & nos simul in ordine congregati venimus diebus & noctibus nauigando, & declinauimus ad portum Grimaldo, quæ est una Insula. Sed nullum hominem vidimus. Et fuit in vigilia natiuitatis Domini: & inuenimus bonam aquam ad potandum. Et ibi vidimus multa & mirabilia monstra marina. Ecce ibi tertius portus ab egressu de regno Portugalliæ.

Die natiuitatis Domini nostri Iesu Christi steti in eodem portu. Ibi quidam religiosus de nostra comitiua legit in naui coram Domina Imperatrice & suis missam perfectam. Et fecimus grande festum, & iuxta votum factum deputati sunt tres, qui collegerunt pecunias, pro duobus peregrinis mittendis ad sanctum



Jacobum ad Galliciam; & misimus duos. Etiam Oratores Domini Imperatoris ex eodem portu miserunt nuncium cum literis suam maiestatem auisando.

Die altera scilicet die sancti Stephani, scilicet anno Domini millesimo quadringentesimo quinquagesimo secundo, recepimus viam, & venimus diebus & noctibus nauigando, & declinauimus versus Delphinatum; ibi pramissit Dominus Marchio Capitaneus noster vnā grabellam cum armigeris, pro custodia nostra qui altera die reuersi sunt, dicentes: Quod multi raptores & piratæ essent congregati in quodam portu maris, penes quandam ciuitatem Nicia, qui essent dispositi ad iuandum nos. Dominus Marchio adiunxit eis plures armigeros bellicosos cum necessariis. Itā ut benè erant trecenti qui se occultauerunt in grabella. Et misit eos ad portum raptorum. Et patronus grabellæ erat absque armis, qui instanter pacificè in dolo petiuit à Capitaneo saluum conductum, qui dare recusauit. Et potenter plus quàm centum raptores & piratæ armata manu grabellam nostram intrauerunt. Nostri armigeri occultati profluentes, & cum raptoribus magnum conflictum habuerunt. Aliquos occiderunt, aliquos foras ad mare viuos proiecerunt. Alii verò raptores sociis eorum in auxilium venire voluerunt. Viderunt naues nostras eis appropinquare, venerunt cum bombardis & iaculis contra nos. Estimantes nos esse mercatores. Nos uerò simul quasi per cordam cum nostris bombardis & iaculis & sagittis venimus, quasi ad portum eorum, ubi erat ciuitas quæ una cum Raptoribus & piratis hostiliter venit contra nos, in mari & in terra impetuosè irruendo in nos. Et non habuimus ventum pro nobis. Nostri vero armigeri & bellatores, cum armis eorum quasi quadringenti venerunt ad terram, per quos hostes fugam dederunt ad ciuitatem. Et ista nocte stetimus in mari cum magna custodia & ordinatione. Quia non habuimus ventum qui extra portum duxisset nos.

Nostri tamen eadem nocte receperunt piratis vnā nauim, satis ornatam & pulchram, quæ fuit cuiusdam mercatoris potentis venientis de Alkeyra qui & incidit inter latrones. Et de nostris fuerunt interfecti unus miles, & octo armigeri, qui sepulti sunt in mari. Et sedecim vulnerati. O quanta pericula in mari. Et periculosus modus pugnandi in mari. Altera verò die antè ortum solis Dominus Marchio ordinauit quadringentos armigeros & bellatores bonos ad terram. Et trecentos penes portum in mari, ad explorandum & custodiendum. Sed nemo de hostibus comparuit. Nostri autem reperierunt fontem scaturientem dulcem, qui nunciauerunt nobis. Statim cum lætitia misimus vnā magnā barcam, cum paruis vasis & aliis haustoriis aquam ad potandum. Magnum enim defectum in aquis dulcibus ad potandum habuimus, præsertim pro Domina nostra sponsa Imperatrice, quæ non bibebat vinum. Et circa meridiem huius diei venit magnus populus congregatus in terra contra nos, cum panneriis, trumpetis & armis. Volens utique scire potentiam tantarum navium maris, cum armis bellicis tempore Hyemali. Et miserunt suā honestam legationem ad nos, scilicet duos milites, dicentes. Vos qui aut unde venitis ita potenter, aut quæ est intentio vestra. Isti in terra de nostris nolebant dare responsum, nisi prius facerent, vt esset pax inter partes. Et miserunt ad Dominum Marchionem Capitaneum; qui respondit eis. Pax sit inter nos & vos. Nos sumus Christiani, & venimus de ultimis finibus terræ, & cupimus videre Romam. Et in loquela cognouerunt Dominum Marchionem Portugallensem esse, & dixerunt. Nos sumus sub primogenito filio serenissimi & Christianissimi Domini, Domini Franciæ, qui est amicus Domini Regis Portugalliæ. Si possumus aliquid boni vobis facere, parati sumus nos offerendo. Sed de raptoribus & piratis maris nihil ad nos, quia aduenæ sunt. Et habuerunt multa interrogatoria ex parte raptorum, sed Delphinistæ dolosi erant.

Die alia venit ventus pro nobis, & omnes naues nostræ receperunt viam, nauigando diebus ac noctibus. Et venimus prope quandam Insulam quæ dicitur Corsica. Et est quoddam regnum Domini regis Arragoniæ, ubi crescit bonum vinum. Dominus Christophorus Vngnad incepit debilitari. Et consequenter nauigando



gando venimus ad Dominum Dominorum Januensium. O Januenses habent bonum portum maris, ex eo potentes sunt in mari, qui miserunt ad nos; Quis aut unde essemus. Sed non fuit eis dictum. Et habuimus bonum ventum pro nobis & declinauimus ad Italiam. Et sic diebus ac noctibus venimus in die purificationis sanctæ Mariæ versus ciuitatem Pisānam, & ibi recepimus quintum portum ab exitu de Regno Portugalliæ. Et isto die sancto purificationis quievimus in portu Leonora, distans duobus miliaribus à ciuitate Pisāna. Et nullus hominum exiuit naues. Quia iuxta compactata debebamus, ad portum Thalamonis sub Domino Dominorum Senensium portum cepisse. Et ibidem alios Oratores Serenissimi Domini Imperatoris inuenire. Sed ventus fuit contrarius nobis. Et omnis homo debilitatus fuit, maximè virgines, & verè multi utriusque sexus infirmi erant.

Die tertia mensis Februarii scilicet die sancti Blasii, domina sponsa Imperatrix nostra cum Domino Marchione conuocauit consilium. Et ibidem fuit decretum. Quod vnus Oratorum Domini Imperatoris qui singula tractasset, & vidisset, ea quæ facta fuerunt, deberet quærere Serenissimum Dominum Imperatorem; si ni aut ubi esset, & suam maiestatem de singulis informare. Et quare cum tot navigiis & populo non posset ad portum Thalamonis venire. Vnus Oratorum scilicet Magister Jacobus Motz, erat per turbationem maris infirmus, & contractus, & non voluit. Alter Oratorum Nicolaus Lanckmann, qui erat etiam debilis. Non obstante tamen idem recepit onus in se, iuxta suam possibilitatem, & fuit ductus cum uno famulo ad portum sc. Leonoram. Ibi conuenit duos equos usque ad ciuitatem Pisānam. Ibi dem comparauit sibi duos equos. Et potestas prædictæ ciuitatis ordinauit sibi fidelem viatorem in equo, cum prædicto Oratore die & nocte non quiescendo, verè cum magna debilitate & patientia venit ad Florentiam, scilicet die sanctæ Agathæ. Quando Dominus Serenissimus Dominus Imperator, Dominus Ladislaus Vngariæ & Bohemiæ Rex, &c. Dominus Albertus Dux Austriæ Comites & Barones de Vngaria N. De Pösing de Crabatia Yban de Austria verè N. de Maidburg. N. de Schaunberg, &c. Infra nonam & decimam horas ante meridiem, quando in Florentia volebant audire missam ad sanctam Mariam ad annunciatam. Idem Orator Nicolaus in Platea obuius fuit. Qui (ut de cuit) de equo ad terram & flexis genibus, Dominum Serenissimum, Dominum Imperatorem, &c. cum gaudio vidit. Quem Dominus Imperator gaudenter suscepit. Et finito officio diuino & consilio congregato, prædictum suum Oratorem Nicolaum audiuit. Ad statim Dominus Imperator misit literas suas ad sponsam prælectam. Et sicut fieri mandauit, factum est. Nauibus tamen omnibus in portu Leonæ cum armigeris & aliis necessariis benè prouisis.

Die septima mensis Februarii Serenissimus Dominus Imperator ex Florentia misit suum solennem ambasciatorem, & legationem ad suscipiendam dominam sponsam, dominam Leonoram virginem in Pisana ciuitate, scilicet Ducem de Teschyn. Cornites de Maidburg, Schaunburg quàm plures generosos. Ex alia parte de portu Thalamonis nomine Domini Imperatoris venerunt: Reuerendissimus in Christo pater & Dominus, Dominus Æneas Senensis Episcopus. Dominus Albertus de Portendorff, baro, cum uxore sua quæ fuit de genere Lichtenstein, de Murau. Dominus Georgius de Volkenstorff Baro. Dominus Bernhardus Tehensteiner, cum vxore sua. Dominus Waltsar Rattenberger, miles, & plures nobiles. Et generosæ virgines de Austria, Margaretha Zinckendorfferin, virgines & baronissæ. Et Vrsula Neydeckerin, Virgines generosæ, cum nobilibus dominabus scilicet Pellendorfferin, &c. Et quam plures generosi & nobiles utriusque sexus, plus quam quingentæ personæ conuenerunt ad Pisānam ciuitatem, nomine Domini Imperatoris, ad suscipiendam suam sponsam prælectam. Ad mandatum verò Imperatoris reuersus est Nicolaus Lanckmann cum prædictis Dominis & generosis ex Florentia, ad Dominam sponsam virginem Leonoram, quæ diligentissimè & confidenter à prædicto Nicolao quæsiuit de valetudine Domini Imperatoris sponsi, & Domi-



& Domini eius. Si de singulis quæ in Regno Portugalliae in Affrica citra & ultra mare ac in mari in ista profectioe contigissent Domino Serenissimo Domino Imperatori narrasset ac declarasset. Si sua Maiestas compassionem habuisset aut aliqua placuissent. Et istis ac pluribus aliis hinc inde narrantibus præ magnitudine amoris erumpebant lachrymæ eius. Et maiestas sua non poterat se à fletu continere. Quieuitque in eadem ciuitate Pisana domina sponsa per aliquot dies, gaudia & inter locutoria Portugallenses & Almani simul facientes. Pisana est ciuitas magna, quam aqua fluens per longum diuidit, quæ quondam terram sanctam regebat. In cuius obedientiæ signum terra sancta habuit mittere singulis annis unam propinam ad Pisanam ciuitatem: Sicut ibidem in maiori Ecclesia factum fore videtur. In eadem ciuitate in monasterio sancti Francisci sepultus est quidam Dux Austriæ, Dominus Joannes, qui fratrem suum regentem interfecit. Qui tunc sepultus fuit in Kunigsfeldt in Suetia.

Die decima nona mensis Februarii Domina Leonora sponsa cum Domino Marchione de Valentia cum certis terrigenis utriusque sexus Regni Portugalliae & Australes cum eorum comitiua iuxta ordinem factum & ordinatum venerunt per aliquot dies per ciuitatem & castella versus ciuitatem Senensem, in qua ciuitate Serenissimus Dominus Imperator, & Dominus Ladislaus Vngariæ & Bohemiæ Rex, &c. Dominus Albertus Dux Austriæ germanus Domini Imperatoris, cum eorum principibus. Comitibus, Baronibus, militibus etiam de sacro imperio, &c. Nec non sedis Apostolicæ, Cardinales, Legati, &c. Et Domini Veneciani, Florentini, Bononienses, ac plures Italici generosi & nobiles, qui ibidem congregati fuerunt, expectantes præsentiam dominæ Augustæ sponsæ, qui cum magna ordinatione solennitate & honore venerunt dominæ sponsæ in campis obuiam. Eius Maiestatem & omnes in eius præfectione veniendo, gratè suscipiendo. Serenissimus Dominus Imperator, Dominus Fridericus videns suam sponsam virginem, & electam appropinquare, venerunt pedestres mutuò, & cum gaudio amplexus est eam. Et eius totam comitiuam gratissimè suscepit. Et in perpetuam rei memoriam in eodem loco ante portas statua lapidea est erecta. Vt patet intuentibus. In eadem ciuitate Senensi sic moram & quietem ac interlocutoria & consilia habuerunt. Et sic singulis diebus Domini Senenses propinas ac reverentias tam Domino Imperatori quàm suæ sponsæ electæ fecerunt. Serenissimus Dominus Imperator, & Dominus Rex Vngariæ, ac de sacro Romano Imperio nobiles & communitates, & cum eorum comitiua cum exercitibus venerunt per ciuitates & castella versus urbem Romanam, secuta est domina sponsa domina Leonora cum suis deputatis iuxta ordinem factum. Et ante urbem Romanam more prædecessorum Dominorum Imperatorum Romanorum cum omni populo in campis castrametati sunt tentoria erigentes. Et ibidem in campis per noctantes.

Die verò octaua mensis Marci in campis ante urbem Romanam per illustrem principem Dominum Albertum Ducem Austriæ. Qui erat totius populi supremus Capitaneus, fuit ordinatio facta; Tam in populo Almanorum, quàm Portugallensium utriusque sexus, quod omnes sub pannerio sancti Georgii & pannerio sacri Romani imperii deberent Romam intrare. Et quilibet ordinem & locum suum immutabiliter obseruare. Quia plus quàm quinque millia hominum utriusque sexus equestrium cum magno splendore & apparatu in illa profectioe erant. O quis vidit unquam huiusmodi processionem pensando personas & dignitates personarum, intrando ad portas urbis; Et obuiam veniendo cum tanto clangore tubarum ac cantantium & cum iubilo clamantium. Senatus populusque Romanus, & de regali stirpe & principis Romani cum Dominis Patriarchis. Cardinalibus, Archiepiscopis, Episcopis, &c. Et ex omni natione quasi quæ sub coelo est Serenissimo Domino Imperatori & eius sponsæ electæ cum magna reuerentia obuiam venerunt. Et sic infra octauam & nonam horas antè meridiem intrauerunt portas urbis, penes castrum sancti Angeli. Et venerunt quilibet in ordine suo ad gradum & ascensum Ecclesiæ sancti Petri, ubi supra gradum summus Pontifex Dominus



nus Papa, dominum Imperatorem & eius Augustam sponsam, ac dominum Ladislaum Vngariæ & Bohemiæ regem, dominum Albertum Austriæ ducem cum benedictione gaudenter suscepit. Ac eis manus suas sacras & pedem solito more ad osculandum antè fores Ecclesiæ sancti Petri præbuit. Et ibidem arenga facta est. Et ad manus trahendo ad Ecclesiam sancti Petri intrando pulsando, sonando. Buccinando organisando. Et cum iubilo cantando ad summum altare & sanctæ Veronicæ. Et ad alia sancta loca prædicta Ecclesiæ cum gratiarum actione duxit. Et magnus populus sequebatur & eorum orationibus & devotionibus ad DEum & sanctos eius. Hac vice completis serenissimum dominum Imperatorem & eius cognatum Ladislaum regem, &c. Ad unam partem, & dominam Imperatricem sponsam cum suis virginibus ad aliam partem ad deputata palatia dominus Papa personaliter cum suis Cardinalibus conduxit. Omnisque populus ad hospitia deputata declinavit.

Die nona mensis Martii & diebus sequentibus dominus Imperator & eius sponsa virgo. Dominus Rex Ladislaus. Dominus Albertus dux Austriæ. Dominus Marchio de Portugallia cum eorum militibus nobilibus utriusque sexus, &c. Limina sanctorum Petri & Pauli & sancti Johannis, & alia sacra loca intra & extra muros urbis devota mente visitauerunt. Ordinem seruando propter tumultum populi ac de eorum peccatis & criminibus puram confessionem & poenitentiam condignam perfecerunt. Etenim serenissima domina sponsa & virgo domina Leonora gratiam & indultum speciale pro se & pro omnibus utriusque sexus qui in huiusmodi processione ad urbem venissent, &c. a summo Pontifice tunc impetrauit.

Die decima sexta mensis Martii sc. feria quinta qua canitur; Salus populi ego sum. Sanctissimus dominus Papa dominum Imperatorem dominum Fridericum & eius Augustam dominam Leonoram virginem, &c. ad sanctum Petrum in facie Ecclesiæ copulauit & coniunxit. Summus Pontifex pro omnibus largas expensas in urbe fecit.

Die Dominica in media quadragesima qua in Ecclesia DEI canitur. Latrare Ierusalem. Anno Domini millesimo quadragentesimo quinquagesimo secundo die mensis Martii decima nona sanctissimus Dominus Papa Nicolaus quintus more solito in Ecclesia sancti solenniter diuinum officium cum ceremoniis canere incepit. Ac Serenissimum Dominum Dominum Fridericum pro tunc Romanorum Regem, &c. & eius sponsam dominam & virginem Leonoram ante altare cum magna solennitate in præsentia Dominorum Patriarchæ Aquilegensis. Cardinalium, Archiepiscoporum. Vngariæ Regis Domini Alberti Austriæ Ducis. Domini Marchionis de Valentia. Comitum baronum utriusque sexus nobilium, &c. In nomine sanctæ & indiuiduæ trinitatis benedixit consecrauit vnxit ac infulis Imperialibus magnificè coronauit. Et eis beneficientibus ac benedicientibus benedixit. Eis verò maledicentibus ac malefacientibus Dominus Papa maledixit. Ecce Monarcha hic est primus Imperator & Cæsar de domo Austriæ. Qui summum terrenum honorem ducatu Austriæ per suam personam sc. dignitatem imperialis celsitudinis attulit. Caveat ergo unusquisque ne offendatur ne ex huiusmodi offensione crimen læsæ maiestatis usque ad tertiam generationem incurrat. O quanta iubilatio & suavis cantus cantorum & sonitus Campanarum ac canentium. Et variis linguis DEum laudantium. Et te DEum laudamus usque ad finem cantantium cum certis adaptatis obsecrationibus & collectis pro his personis sic coronatis. Officium isto die fuit solenniter conclusum. Ille est multum magnus & solennis & solennis actus cum iuramento præstico, &c. Quis unquam audiuit aut legit simile. Quod virgo ante carnalem copulam terrena & imperiali infula ita Deificæ dignæ & magnificæ Roma sit coronata vncta & consecrata ac benedicta nisi præsens regia virgo Domina Leonora de sublimi celsò statuque Regni Portugalliæ clarissima, &c. Istis sic solennitatibus peractis gloriosissimus Dominus Imperator



cum cognato suo Domino Ladislao Vngariæ & Bohemiæ Rege. Et eorum Principibus Comitibus. Baronibus generosis, &c. cum magno gaudio & ordinatione ad castrum sancti Angeli ad portum Tiberinum venit. Ibi more suorum procedessorum Dominorum Imperatorum multos novos milites creauit. Et ulterius per urbem proficiscendo ad sanctum Johannem & ad Palatium Lateranense. Ibi more solito gratiarum actiones & deuotionem suam habuit ac se DEO commendauit. Et in reuersione iterum novos milites creauit. Et ad Palatium suum propè sanctum Petrum redit. Et post coronationem propria negotia & sacri Romani imperii ac totius Christianitatis cum summo Pontifice & suis Cardinalibus videlicet ut decuit tractauit. Et per aliquos dies in urbe permansit.

Die vicesima quinta mensis Martii gloriosissimus Dominus, Dominus Imperator, Dominus Fridericus tertius Serenissimum Dominum Dominum Ladislaum Vngariæ & Bohemiæ Regem, &c. cognatum suum summo Pontifice atque reuerendissimis Dominis Cardinalibus & totam eius curiam omni cum diligentia commendauit. Solicitatores in causis constituit usque ad reditum de Neapoli. Et profectus est cum suis Principibus, Comitibus, Baronibus, militibus nobilibus versus Regnum Siciliae & Napulie aciem vertit. Et profectus est per ciuitates, castella, oppida. Per aliquos dies venit Serenissimus Dominus, Dominus Alfonsus Arragoniæ Siciliae citra & ultra factum Valentiae Ierusalem Vngariæ Maioricorum Sardiniae & Corsicae Rex. Barchionensium Athenarum & Neopatriæ Dux. Bessitionis & Ceritaniæ Comes, &c. Gloriosissimo Domino Imperatori, Domino Friderico potenter & magnificè cum omni honore obuiam venit & cum omni sua comitiua gaudenter suscepit & recepit. Et ad ciuitatem Neapolitanam ad Palatium deputatum cum omni honore & gaudio conduxit. Et quem secuta est Serenissima Domina Imperatrix sponsa & virgo de Vrbe Romana cum suis utriusque sexus deputatis valedicens Dominum Papam sanctissimum qui suae Maiestati suam sanctam benedictionem dedit. Quam Dominus Ladislaus Vngariæ & Bohemiæ Rex cum suis Comitibus, Baronibus. Militibus ac aliis suis nobilibus. Et quasi tota curia Domini Papae extra portas ciuitatis honorificè conduxerunt. Qui reuersi sunt ad urbem domina Imperatrix Domina sponsa cum suis utriusque sexus nobilibus venit per terram Dietim per ciuitates, Castella & oppida usque ad metas Neapolitanæ ciuitatis. Cui praelibatus Serenissimus Arragonum & Siciliae Rex multum splendide & politè cum suis Principibus, Comitibus utriusque sexus nobilibus obuiam venit. Et prædictam dominam Imperatricem dominam Leonoram, &c. tanquam Charissimam filiam gaudiose in campis suscepit & accepit. Et eius totam comitiuam, quia filia sororis prædicti domini regis, &c. fuit. Et de finibus terræ & remoratissimis regnis Christianitatis sequendo dominum & sponsum eius dominum Imperatorem ad cognatum suum dominum regem declinauit. Quam honorificè ut decuit cum tubis, buccinis, Cytharis & cantoribus semper in latere per maiores plateas prædictæ ciuitatis cum omni honore & gaudio usque ad castrum & palatium in parte superiori ciuitatis ad serenissimum dominum Imperatorem eius sponsum duxit qui suae sponsae prædilectæ obuiam venit. Nunquam dominus dominus Rex Arragonum. Dominus Alfonsus, &c. habuit ira dignos & charos hospites in suis regnis pro tunc in eadem ciuitate Neapolitana sic quietem habuerunt. In die canæ in Ecclesia maiori scilicet metropolitana dominus Imperator & dominus Rex Alfonsus & dominus Albertus Dux Austriæ & dominus Fernandus Dux Calabriae filius regis processionaliter cum corpore dominico sub coelo artificiali ad summum altare deuota mente venerunt. Et istis sacris diebus solito more deuotiones suas habuerunt.

Die sancto Paschæ quæ erat nona die mensis Aprilis officiis diuinis completis tot gaudia fuerunt facta ad laudem DEI & resurrectionem Domini nostri Iesu Christi. Et cantus diuersarum linguarum & tot reuerentiæ cum agnis pascalibus artificii coquorum. De palatio domini Imperatoris agnum pascalem. De palatio



tio domini Arragoniæ regis. De palatio domini Ducis Austriæ Alberti. De Palatio domini Ducis Calabriæ, &c. Omnes agni tales sine fractione venerunt ad mensam serenissimæ dominæ Imperatricis sponsæ. Et fuerunt ibi multæ curialitates commissæ, &c.

Altera die sancto Paschæ in monasterio monialium in parte inferiori prædictæ ciuitatis in præsentia domini Imperatoris & eius sponsæ regum & principum, &c. ac aliorum fuit quidam ludus ordinatus & dispositus qui totam passionem Domini nostri Iesu Christi continebat. Similem nullus hominum vidit. Altera autem die Dominus Imperator eius sponsa, Dominus Rex Arragoniæ. Principes utriusque sexus nobiles ac magnus populus per unum foramen cuiusdam alti & magni montis de die cum luminibus lucernis, &c. facibus equitando venerunt ad lacum spatiosum ac amænum campum & sylvam. Ibique in sylva & nemore fuerunt congregata multa animalia bruta seu bestię & feræ scilicet cerui. Hinnuli, Vrsi, porci, linceæ, leopardi, reguli, vulpes, lepores, &c. Ibi coram omnibus plus quàm quatuor millibus hominum utriusque sexus equestres & multi pedestres aderant. Fuit venatio facta cum canibus fortissimis & miræ magnitudinis & canibus minoribus velocissimis indutis coppulis bissinis & sericis diuersorum colorum. Et in collis eorum ligamenta & funes auro & argento & Margaritis ornata. Nullus hominum similem venationem vidit. Ibidemque fuit artificialis fons cum bono vino scaturiens pro recreatione hominum dispositus. Et panes polenta confectiones de Zuckaro quod ad usum fuit. Et hastiludia & plura magnificentia & spectacula facta. Hæc omnia Dominus Rex Arragoniæ, &c. Ad honorem imperialis celsitudinis sponsi & sponsæ fieri disposuit. Ibique vidimus montes ardentes in Regno Cecilie ollam Vulcani. Dicitur quod ibidem sit purgatorium. Neapolis est famosa ciuitas & magna & Archiepiscopatus. Et plura monasteria. Et præsertim Cathuniensis in monte. Sed etiam ibi duo magna castra & Palatia superius in quo habitabat Dominus Imperator eius sponsa virgo Leonora. Et Dominus Alfonsus Dominus Rex. Aliud castrum in parte inferiori in littore maris. Et dicitur castella noua. Ibique pro tunc fuerunt duæ magnæ naues nouæ in terra. Vna pro mille armigeris bellatoribus cum omnibus attinentiis & necessitatibus per integrum annum capax, &c.

Die dominica scilicet in octaua Paschæ qua canitur quasi modo geniti. Et erat decima sexta dies mensis Aprilis Serenissimus Dominus Alfonsus Rex Arragoniæ, &c. fecit grande conuiuium cunctis Principibus & populis. Et erat gaudium & lætitia magna per totam ciuitatem. Et de fero thalamo pro Domino Serenissimo Imperatore & eius dominæ sponsæ & virgini ornatissime aptato convenerunt simul. Quas personas DEus Omnipotens custodiat & benedicat & fructuose crescere concedat & semen eorum cum prosperitate longæum fiat. Amen.

Die sequenti more solito gratiarum actiones cum diuino cultu officio & missis ac oblationibus fuit facta. Et mensa posita ac completa fuit gaudium omni populo. Et Dominus Rex Alfonsus uno cum filio suo Domino Fernando Duce Calabriæ sollicitus fuit vt in singulis imperiali Maiestati & eius angustæ bonam complacentiam exhiberet. Sic altera die fuit similiter factum. Iterum tertia die similiter venit. Tamen quidam nuncius ex Roma ex parte Domini Ladislai Vngariæ & Bohemiæ Regis, &c. Dominus Imperator hoc intelligens ordinem suæ Augustæ dominæ Leonoræ charissimæ dedit. Et Dominum Regem Arragoniæ, &c. ac Dominum Ducem Calabriæ, ac alios valedicens. Et in galeis per mare cum suis Romam venit. Et suum cognatum charissimum Dominum Regem Ladislaum accessit quem sanum & beneualentem cum sua curia reperit. Et cum summo Pontifice & Dominis Cardinalibus ac Romanis consilia & interlocutoria habuit. Ac Serenissimum Dominum & cognatum suum Dominum Dominum Ladislaum



Regem regna & terras suas fideliter commendauit. Et sua Maiestas ac prædictus Rex Dominus Ladislaus cum eorum principibus comitibus summum Pontificem ac Dominos Cardinales ac senatores & potestates vrbis Romanæ Ecclesiæ valedixerunt, (Ut decuit.) Quibus summus Pontifex Nicolaus quintus omnibus suam sanctam benedictionem dedit. Et magnificè conducere mandauit. Et sic Cæsarea Maiestas cum Domino Rege Ladislao & aliis venerunt per Biteruiam Senensem, Florentiam Bononiam, &c. usque ad Venetias.

Ibi domini Venetiani magnam reuerentiam domino Imperatori & suis (ut decuit,) exhibuerunt. Ibidemque sua Maiestas suam dominam Augustam Leonoram quam in Neapoli reliquerat expectauit. Illustrissima domina Imperatrix post recessum domini Imperatoris à Neapoli cum suis Comitibus. Baronibus, militibus utriusque sexus nobilibus usque ad diem sancti Marci in Neapoli cum cognato suo domino rege Arragoniæ qui frater matris dominæ Imperatricis erat, permansit.

Die sancti Marci domina Imperatrix à Neapoli recessit. Et per terram cum suis utriusque sexus per plures ciuitates Castella & loca venit penes regnum Siciliae usque ad fines Campaniæ ad Manfredoniam in qua ciuitate die Inuentionis sanctæ crucis quæ est tertia die mensis Maij pausam fecit. Manfredonia est ciuitas magna propè Sipontum habens portum maris. Ibique est magna campana in quadam turri locata. Nullus hominum maiorem vidit. Sed non pulsatur. In eadem ciuitate morantur certi scismatici Nicolaitarum.

Die quinta mensis Maij domina Imperatrix cum suis baronibus militibus ac utriusque sexus nobilibus. Venit peregrinatum ad montem sancti Angeli in monte Gargano ad Ecclesiam sancti Michaelis. Non per manus hominum constructam aut consecratam. Sed mirabiliter reperiunt. Vt patet de Historia de apparitione sancti Michaelis in monte Gargano. Et domina Imperatrix fecit fieri magnum festum cum ceremoniis. Missis & oblationibus. Dominus Doctor Magister Joannes Hynderbach Cancellarius Magister curiæ & alii officiales suæ Maiestatis in his solliciti fuerunt. Et ego Nicolaus missam legi, & locum Ecclesiæ conspexi. Est ibi magnus calix de puro auro & pluribus lapidibus preciosis quem in memoriam dominus Alfonsus Rex Arragoniæ, &c. In honorem sancti Michaelis obtulit. Ibi eodem die habuimus cerusam & merusam & nouos fructus de agris & propè eundem montem quasi in valle versus occidentem habitabat quidam senex devotus pater Heremita. Ad quem accessi & locum habitationis suæ conspexi. Et eius sanctam vitam Hereticam intellexi & vidi cum quo de pluribus contuli. Qui narrauit quod regna Siciliae, Napoliæ & ducatus Calabriae, &c. Hereditario iure non attinerent domino regi Arragoniæ. Sed una pars Romanæ Ecclesiæ. Alia pars regi Frantiæ. Quia ante ducentos annos Rex Arragonum commisit bellum cum rege Siciliae sc. Carolo fratre domini Ludouici quondam regis Frantiæ ex utraque parte multi fuerunt interempti tandem rex Arragonum Carolum de bello in fugam conuertit. Postea iterum principes Frantiæ Siciliam & Apuliam possiderunt. Vt Reinherus de Luttingia de sanguine regum Frantiæ. Quem dominus Alfonsus præfens Rex Arragonum per fort expulit & debellauit & subiunxit. Est una constellatio & influenza cœli quo ad situm regni Arragoniæ quod frequenter principes de regio sanguine regum Arragoniæ nati cum magna fortuna prosperabuntur. Et quia domina Imperatrix domina Leonora est filia legitima fororis domini Alfonsi Arragoniæ regis ut famatur. Absque dubio in se & in semine eius multum prosperabitur. Et plura mutuo loquebantur serenissima domina Imperatrix cum sua curia quieuit in Manfredonia per aliquot dies; & dominus Alfonsus Arragoniæ rex in omnibus terris suis pro omnibus longas expensas fecit. Et idem dominus Rex duas naues cum equis & mulis & necessariis & familia ad Venetias per mare præmisit.



Die ascensionis Jesu Christi erant in Manfredonia duæ magnæ naues galeæ cum omnibus necessariis dispositæ. Ad quas iuxta ordinationem domina Imperatrix cum suis utriusque sexus intrauit. Et iterum nauigando diebus ac noctibus ad regnum Dalmatiæ non longè à Ragusio venimus. Ibiq̃ue tantum per unam noctem pausam fecimus.

Alterà verò die consequenter die noctuque nauigando venimus ad ciuitatem Sadres. Ibiq̃ue domina Augusta cum cæteris personis utriusque sexus intrauit ciuitatem & ad Ecclesiam maiorem, ibi audiuit officium diuinum & cæteras missas. Ad quas oblationes fecit. Vidimusque in eadem Ecclesia corpus sancti Simeonis qui Christum in ulnas accepit dicens. Nunc dimittis seruum tuum Domine secundum verbum tuum in pace, &c. cui domina Imperatrix aureum annulum digito immisit. Et in eadem Ecclesia plura corpora sanctorum requiescunt. Et in galeis fecimus prandium. Et consequenter iterum nauigando diebus ac noctibus venimus in mari propè Venetias portum. Accipiendo propè monasterium sancti Nicolai in eodem monasterio domina Imperatrix cum suis utriusque sexus hospitium accepit. In eodem monasterio est una hydria in qua vinum ex aqua factum est ad nuptias. Et ibidem per tres dies pausam & quietem habuimus. Et ego fui debilis & vix attraxi spiritum. Vnam tamen missam in nomine domini & sancti Nicolai legi.

Die verò sancto Pentecostes scilicet decima octaua mensis Maij venit illustribus Venetorum dux cum nobilibus maioribus & senioribus prædictæ ciuitatis ad serenissimam dominam Imperatricem eandem & eius comitiuam cum omni honore & reuerentia suscipiendo & ad alias galeas & naues ornatas conducendo. Cui serenissimus dominus Imperator dominus, Ladislaus Vngariæ Rex dominus Albertus Dux Austriæ & populus dominorum Venetorum & multi aduenæ uenerunt in aquis cum quinque millibus nauium, galearum. Classium, fustium, barcarum de omni genere nauium prædictæ serenissimæ dominæ Imperatrici obuiam cum diuersis apparatus, & suam maiestatem omni cum reuerentia & honore gratissimè suscipiendo & accipiendo & ad ciuitatem ad Palatium suæ maiestati deputatum conducendo. Et in omnibus turribus erat clangor buccinarum tubarum & in nauibus maris. Et in omnibus Ecclesiis pulsus campanarum & iubilatio omnium hominum. Et verè magna solennitas fuit facta. Et puto si dominus Jesus Christus cum sancto Marco veniret ad terras dominorum Venetorum forte vix tantam reuerentiam & honorem impenderent ei. Et sic in Venetiis per aliquot dies simul quiescendo manserunt. Ibiq̃ue thesaurum ad sanctum Marcum & magnificentiam Venetorum viderunt & intellexerunt qui etiam largas expensas pro omnibus fecerunt. Consequenter dominus Imperator eius domina Augusta Vngariæ rex, &c. cum eorum comitibus venerunt per terram ad dominum Portunonis quæ est terra dominorum ducum Styriæ ibidem pausam faciendo. Et ulterius itinerando per Patriarchatum forum Julii. Et per aquam fluentem propriè Tulment est malus fluuius. Et postea veniendo ad ducatum Styriæ ad Judenburgam ibidem pausando.

Die decima nona mensis Junii domina Imperatrix & serenissimus dominus Ladislaus Vngariæ Rex cum eorum nobilibus & comitiua utriusque sexus venerunt cum gaudio ad nouam ciuitatem. Et populus prædictæ ciuitatis & circum circa simul congregatus venit obuiam dominam Imperatricem & serenissimum dominum Ladislaum Regem, &c. cum omni honore, & reuerentia (ut decuit,) suscipiendo.

In eadem ciuitate sic moram & quietem non diu simul habuerunt propter hostiles incurfus à Vienna & Austria. Et domina Augusta qui in fuga secessit à domino Imperatore ad partes Styriæ. Quousque imperialis maiestas eam vocaret.



Die vicesima septima mensis Augusti eiusdem anni venerunt diffidati generosi & nobiles Domini Dominus Vdalricus comes de Cilia. Dominus Vdalricus Eytzinger Australes Wiennenses, &c. Qui intelligentiam mutuo & ligam cum nationibus alienis & treugas utpote Vngaris Bohemis morauis fecerunt qui ut frequenter plures principes domus Austriae occupauerunt & Austriam destruxerunt. Isti cum Liga eorum ut fortiores essent cum magno exercitu venerunt & castrametati sunt ante nouam ciuitatem tentoria erigentes cum machinis, bombardis, hostiliter contra praedictum Dominum Imperatorem venerunt & cognatum Serenissimi Domini Imperatoris Regem Ladislaum, &c. Qui nondum quartum decimum annum aetatis suae compleuerat. De manibus praelibati Domini Imperatoris ad regendum sua regna ducatus & terras postulauerunt. Non fuisset necessarium huiusmodi intelligentiam & ligam contra serenissimum Dominum Imperatorem. Ita in viridi facere pensando priora facta. Cum idem Dominus Ladislaus Rex mammas suae nutricis in Vngaria suggeret & incunabilis sacra corona sancti Stephani Vngariae regni coronatus fuisset ad petitionem serenissimae dominae Elisabeth Vngariae Reginae, &c. Matris praelibati Domini Ladislai Regis maturo consilio ac providentia Domini Imperatoris eandem sacram coronam cum Domino Ladislao incunabilis & nutricem eius ac dominam & virginem Elisabeth sororem praedicti, Ladislai regis de manibus hostium & Vngarorum cum magnis & grauibus damnis & expensis praelibati Domini Imperatoris ad Gretz & ad nouam ciuitatem sanum & incolumem adduxit quem sic & eius sororem Elisabeth in magna custodia & administratione singulorum & ferventi dilectione ut decuit tenuit ducatum Austriae ut fidelis tutor sui cognati in pace protexit nil sibi usurpando neminem iniuste offendendo. O inuidia aliquorum induxistis & inuitastis ad Austriam capitales inimicos domus Austriae de aliis nationibus quos vi expellere debuistis ne dominarentur vobis & bona vestra deuorarent & fieret bellum intestinum in tota Austria: Vtique occultum odium seduxit vos ut ea faceretis. Innocens Serenissimus Dominus Ladislaus Rex vidit & audiuit quae vos non audiulistis nec vidistis sed videbitis in arido quid fiet de vobis.

Serenissimus Dominus Imperator ut Rex pacificus obseruauit mansuetudinem Regis David. Eundem cognatum suum Dominum Ladislaum, &c. Regem & Austriae ducem per reuerendissimos Patres & Dominos. Enim Saltzburg. & Frisingen Episcopos ac magnificos ac generosos. N. Comites de Maydburg de Schaumburg ac alios generosos per imperialem maiestatem deputatos honorifice ut decuit cum suis Curialibus ad manus praedictorum diffidatorum in liga pendentium extra nouam ciuitatem sanum & latum praesentauit quem praedicti Australes & Wiennenses cum eorum complicitibus ad Wiennam duxerunt. Puto quod ibi fuerit malum nuncium non aduertendo non curando altitudinem tantae dignitatis imperialis celsitudinis & domus Austriae.

Anno Domini millesimo quadringentesimo quinquagesimo quinto sedecima die mensis Nouembris ante ortum solis natus est Serenissimo Domino Imperatori primogenitus filius Dominus Christophorus in Noua ciuitate. Saltzburgensis diocesis. Et idem primogenitus Anno Domini millesimo quadringentesimo quinquagesimo sexto vicesima prima die mensis Martii in Noua ciuitate mortuus. Et in monasterio nouo ordinis Cisterciensis in choro ante summum altare sepultus est.

Item mortuo Domino Serenissimo Rege Ladislao cognato Domini Imperatoris quem maiestas Imperialis à cunabilis cum magna diligentia custodiuit, &c. Die sancti Clementis misere in Praga sepultus est iuxta metrum. Peior praga cibus scindis heu Casta Clementis. Non tantum Austria dolebat sed tota Vngaria. Conuenerunt in unum omnes Archiepiscopi. Episcopi, Praelati, Comites, Barones, milites, ac nobiles Ciuitatenfes Regni Vngariae ad instituendum & celebrandum



dum more solito dictam in prædicto regno. Vngariæ pro electione alterius regis qui dignus tali corona sacra & huiusmodi usurparet & sacra corona quæ dicitur corona sancti Stephani minus digna aut intruso daretur eo quod pro tunc eadem sacra corona esset in manibus Domini Imperatoris Friderici tertii. Et elegerunt concorditer in verum & indubitatum Vngariæ: Dalmatiæ, Croatia, &c. Regem multis respectibus & necessitatibus prælibatum Serenissimum Dominum Imperatorem Fridericum Austriæ Styriæ, &c. ducem natum. Et miserunt solennem ambasiatam cum auctoritate & mandato cum literis & Sigillis eorum roboratis ad imperialem celsitudinem offerendo se & insinuando suæ maiestati huiusmodi electionem concorditer & canonice factam & finaliter conclusam. Dominus Serenissimus Dominus Imperator qui erat pro tunc in Gretz. Conuocauit suos terrigenos ad se & constituit terminum & locum pro huiusmodi audientia ad nouam ciuitatem ut eius Augusta Domina Leonora etiam huic audientiæ electionis cum aliis terrigenis & aliis interesset quæ fuit grauida & vicina partui. Ibi in noua ciuitate quadragesimali tempore.

Anno Domini millesimo quadragesimo quinquagesimo nono, dominica qua canitur Lætare Ierusalem in Ecclesia maiori prædictæ nouæ ciuitatis in præsentia Domini Imperatoris & eius augustæ principum & comitum baronum & utriusque sexus nobilium, &c. Dum Reuerendissimus Dominus Saltzburgerensis, Archiepiscopus Dominus Sigismundus natus de Volckenstarff, officium diuinum perageret. Supra dicta electio in Vngaria facta fuit per prælibatos ambasiatores regni Vngariæ ostensa & coram omni populo lecta publicata & proclamata cum magna & solenni protestatione consummata, &c.

Item eodem anno tempore quadragesimali scilicet Anno Domini Millesimo quadragesimo quinquagesimo nono Vicefima secunda die mensis Martij post meridiem infra quintam & sextam horas. Domina Imperatrix & iam Vngariæ, Dalmatiæ, Croatia, Regina, &c. In noua ciuitate peperit in lucem filium quem Reuerendissimus Dominus Archiepiscopus Saltzburgerensis baptisauit & de fonte sacro baptismatis leuauit & ei nomen proprium imposuit Maximilianus quem Dominus altissimus protegat, custodiat, & defendat, eumque magnificè & prosperè crescere concedat. AMEN.

ANNO Domini Millesimo quadringentesimo sexagesimo die tertia mensis Nouembris in Wienna Pataniensis Diocesis ante ortum solis nata est Domina Helena prædicti Domini Imperatoris filia quæ anno Domini Millesimo quadringentesimo sexagesimo primo ultima die mensis Februarii in Wienna mortua est. Et in noua ciuitate in monasterio Cistercium Ordinis in choro sepulta est.

Anno Domini Millesimo quadringentesimo sexagesimo quinto sedecima die mensis Martij in noua ciuitate Saltzburgerensis Diocesis nata est Kunegundis Domina Domini Imperatoris Vngariæ; Dalmatiæ, Croatia, &c. Regis filia quam Dominus DEus custodiat. Et cum facunditate suo tempore viuere prospere concedat.

Anno Domini Millesimo quadringentesimo sexagesimo sexto in noua ciuitate in Vigilia sancti Laurentii natus est Dominus Johannes filius Domini Imperatoris qui sequenti anno quindecima die Februarii mortuus est. Et in prædicto monasterio nouo sepultus est.

Anno Domini Millesimo quadringentesimo sexagesimo septimo Domina Leonora Imperatrix Serenissima Vngariæ, Dalmatiæ, Croatia, &c. Regina. Austriæ Styriæ, &c. Ducissa cuius laudabilis præfulgida ac honesta vita & morum dignitas status sublimitas patientia ac humilitas citra & ultra mare ac sacro Romano Imperio



perio & in extremis terræ cum omni laude resplenderunt eiusque naturalis facunditas & innata largitas in eius nobilissimo semine & fructu magis ac magis adiutorio DEI cum magna prosperitate & salute elucescent & resplendebunt. Quæ fuit bonorum operum sectatrix super afflictos pia gestans viscera totius honestatis & mansuetudinis amatrix cœlesti se induens armatura spem ponens in DEum bona ratione & felici agone soluit debitum naturæ humanæ cui constitutum est semel mori tertia die mensis Septembris vocante Domino feliciter migravit ad Dominum. Et in Noua ciuitate Saltzburgensis Diocesis in monasterio nouo Cisterciacum Ordinis in choro penes locum ubi corpus dominicum reconditur esse sepulta. Et sicut ipsa in mense Septembri nata est sic in tricesimo suæ ætatis anno in Septembri mortua est, cuius anima requiescat in sancta pace. Amen.

Valdè rogo orate pro ea. Reliquit enim filium post se dominum Maximilianum & filiam dominam Kunegundem virginem in puerili tamen ætate quibus & per quos nobis Omnipotens DEus pacifica tempora & aurea secula concedere dignetur Amen cum recordatione semper Amen.

De nuptiis Inuictissimi Friderici Imperatoris tertii, ac Leonoræ Vxoris. Deque eorundem coronatione ac prolium propagatione à Reuerendissimo Domino Nicolao Episcopo Ypponen. compilatus libellus feliciter finit; Impensis prouidi viri Jacobi Wacker de Saltzburga Augustæ impressus. Anno Domini M. CCCC III. sexto idus Decembris.





**AENEAE SYLVII**  
DE  
**STATU EUROPÆ**  
SUB  
**FRIDERICO III.**  
**LIBER.**



## LECTORI SALVTEM!

## BURCARD GOTTHELF STRUVE.



Magnum nomen Friderico III. imperante, erat Æneæ Sylvii, qui publicis plerisque negotiis illorum temporum & civilibus interfuit & ecclesiasticis. Interfuit iste Concilio Basileensi, cuius gesta etiam singulari scripto exposuit, & licet in eodem contra Eugenium IV. Papam faceret, cum Basileensibus patribus sentiens, qui ipsum deponi volebant, nihilominus ipsum ad se venientem Eugenius postea benigne recepit, inter Secretarios collocavit, subdiaconatus & Tergestini Episcopatus honore donavit, prout ipse de se testatur. \* Fridericus vero Imp. ipsius Consilio & ope non in Papali solum schismate, sed in Negotiis etiam Germanicis, dum Principes in diuersis Comitibus, ad subsidia contra Turcas non solum, sed etiam Matthiam Vngariæ Regem vellet concitare, usus fuit, eundem etiam ad excipiendam sponfam suam Elconoram ex Lusitania venientem, atque sæpius legatum ad aulam Papalem misit: Dum igitur studiis, prudentia, & longo negotiorum usu multum prævaleret, post Calixti III. mortem, sub Pii II. nomine Papalem dignitatem fuit adeptus. Hinc vitam ipsius in Compendio exhibet Trithemius, \*\* dicens: *Pius Papa secundus, natione Tuscus, patria Senensis, Æneas Sylvius antea vocatus, sedit in pontificatu maximo post Calixtum tertium annis sex, vir undecunque doctissimus, Philosophus, Orator & Poëta insignis, multa ingenii sui monumenta posteris reliquit. Hic quondam in Concilio Basiliensi cuidam prælato servivit pauper. Deinde in scribam Cancellariæ Frederici imperatoris tertii assumptus, & poëta ab eo laurea recepta creatus, primo episcopus Tergestinensis, postea Senensis, exinde Cardinalis, & novissime Papa omnium suffragis electus est.* Plures tamen fuerunt, qui ipsius vitam gestaue exponerent. Præter Platinam enim, communem vitarum Papalium scriptorem, aliam habemus a Jo. Stella descriptam, sed perbreuem. Prolixior est ipsius vita a Jo. Antonio Campano perscripta. Singulas hæc editioni operum Basileensi per Henricum Petrum anno 1551. facta videmus præmissas. Publica vero eiusdem potissimum negotia in Commentariis suis Pii II. exposuit Joannes Gobellinus Bonnenfis Vicarius. \*\*\* Hic quem exhibemus, liber, prout præmissa ab ipso præfatio docet ad Antonium Cardinalem Ilerdensensem fuit scripta, Romæ IV. Kl. Aprilis anno Domini millesimo quadringentesimo quinquagesimo octavo, quæ ipsa præfatio etiam docet, quid Æneæ ansam dederit, hanc scribendi historiam. Docet autem sub initium statim Operis, se ea scribere, quæ ipsi essent cognita. Quid in hoc libro contineatur non titulus saltim libri docet, sed etiam Cuspinianus breuiter explicat, dicens: *quæcunque vero sub Friderico gesta sunt in uniuersis pene regnis, Æneas Sylvius expressit in libro, cui fecit inscriptionem, Europam.* Extat ista inter alia eiusdem Opera ante iamdum memorata, ex quibus inserta fuit, Eiusdem Operibus Geographicis & Historicis. *Helmstadii* 1699. 4. editis. Licet in utraque hac editione & prima ad Antonium præmissa præfatio desit, & capita aliter sint diuisa, quæ in Basileensi LXV. in Helmstadiensi LXVI. constituuntur. Geographica quidem potissimum sunt, quæ refert, ita tamen, ut dum Regnum vel provinciam quandam describeret, singularia quædam, quæ ad Historiam, Regimen & Statum Politicum illorum temporum faciunt immisceant. Lucem itaque adfert Historiæ seculi decimi quinti Commentariis.

ÆNEÆ

\* *Infra cap. LIV.*\*\* *In Catal. Script. Eccles. p. 361.*\*\*\* *Prodiere à Francisco Bandino Sicolorineo Senensi Archiepiscopo recogniti Francosurti 1614. f.*





P. 37. **ÆNEÆ PICOLOMINEI SENENSIS CARDINALIS, DE HIS QUÆ FRIDERICO III. IMPERANTE IN GERMANIA ET PER TOTAM EVROPAM GESTA SUNT, VSQUE AD ANNUM M CCCC LVIII.**

### COMMENTARIUS.

*VETERVM CODICVM COLLATIONE MVLTQ VAM ANTEA EMENDATIOR, ATQVE ETIAM AUCTIOR:*

**ÆNEÆ PICOLOMINEI SENENSIS CARDINALIS AD ANTONIVM CARDINALEM HILERDENSEM.**

### PRÆFATIO.



ANTONIO Sacrosanctæ Romanæ Ecclesiæ presbytero cardinali Hilerdensi appellato, patri suo colendissimo, Æneas eiusdem ordinis non eiusdem meriti Cardinalis Senensis S. P. dicit. Podagrantem me nuper, & arthreticis doloribus (ut soleo) laborantem librarius quidam Teutonicus adiit libellum afferens, in quo Romanorum Caesarum non tam gesta quam nomina, & pauca de moribus continebantur, vsque ad Wenceslaum Caroli quarti filium. Cumque illi opusculo quatuor Imperatores deesse viderentur (nam Beneuenutus Imolensis eius operis auctor sub Wenceslao decesserat) rogauit me librarius, ut adjicerem libello quid deerat. Nolui turbare hominem. Compleui ad ætatem nostram Imperatorum numerum: breuitatem illius qui præcesserat imitatus. At cum subiret mentem, multa & magna inter Christianos gesta esse ab eo tempore, quo Fridericus imperium accepit vsque in hanc diem; opusculum seorsum edere statui, in quo singulæ quadam eius temporis sub compendio ad posteritatis memoriam transmitterem, digna memoratu. Edidi igitur breuem historiam, tuoque nomini dedicavi: qui cum pari morbo mecum labores facile inter podagrandum scripta mea & leges, & iudicabis. Fuiſſet fateor operæ præcium ab initio potius ætatis nostræ in hoc ævum vsque rerum gestarum historiam texere: quemadmodum menti meæ sæpe insedit. Sed ea non erat vnius podagationis, & præsertim ieiunio Quadragesimali occurrentis lucubratio. Amat ades nostras ipsa podagra: nec tam recedit quam reuertitur libens, fortasse & huic intentioni aliquando subseruiet. Tu vale, & si quid acerbius in quenquam scriptum offenderis, non tam meæ naturæ quam stimulis podagræ urgentis adscribe. Et quicquid inscite, inepte, absurde occurrerit, sumpto calamo dele. Ex urbe Roma, quarto Kal. Aprilis, anno Domini millesimo quadringentesimo quinquagesimo octauo.





VÆ sub Friderico tertio eius nominis Imperatore apud Europeos, & qui nomine Christiano censentur insulares homines, gesta feruntur memoratu digna, mihi que cognita, tradere posteris quam breuissime libet, commiscebimus aliqua interdum altius repetita, quemadmodum locorum rerumque ratio exposulare videbitur.

## CAPUT I.

p. 38.

## DE HVNGARIA, SIVE PANNONIA.

*Hungaria  
Pannonia Au-  
stria.*

**H**VNGARIA, quæ Austria Friderici patriæ contermina est, & in orientem vergit, principium narrationis præstabit. Hanc prouinciam nonnulli Pannoniam vocant: tanquam Hungari Pannoniorum loco successerint. Verum neque Hungaria Pannoniæ terminos implet, neque illa tam lata olim fuit quam nostra ætate Hungaria. Intra Danubium; Enum & alpes, qui ad Italiam & Adriaticum respiciunt mare, Pannonia continebatur, ab occasu Noricum, Enumque amnem, ab ortu Myfos ac Triballos & flumen Savum contingens. Intra quos limites Austria magna portio clauditur, & à Teutonibus incolitur. Stiria quoque iisdem terminis continetur, Valeria quondam appellata. Hungaria vero quamuis inferiorem Pannoniam à fluvio Leytha vsque Savum complexa est, Danubium tamen transgressa ad Polonos vsque protenditur, & quæ quondam arua tenuere Gepidæ Dacique possident. Imperium gentis Hungariæ multo latius est quam ipsa Hungaria.

Nam & Dalmatæ, quos Sclauos; & Illystrij quos Bosnenses; Triballi seu Myfi, quos tum Seruios, tum Rascianos appellant; & Gethæ, quos partim Valachos, partim Transiluanos nominant, Hungarorum imperium subierunt: & si nonnulli æuo nostro Turcorum armis euiæti defecerunt. Hanc prouinciam quatenus citra Istrum extenditur, sub Octauiano Cæsare Romani primum obtinuerunt, Barchone Pannoniorum rege subacta, & Amantinis inter Savum & Drauum fluvios prostratis. Daciam vero trans Danubium, quæ nunc Hungariæ portio est, Traianus Imperator edomuit, & in solo Barbarico prouinciam fecit. Sed amissa sub Galieno per Aurelium recuperata est. Post Romanos aliquando Hunni Scythica gens, aliquando Gothi ex insulis Balthei maris populi, deinde Longobardi ex Germania profecti Pannoniam occupauerunt. Postremo Hungarorum natio ex ultimis Scytharum finibus inundauit: quæ vsque in hanc diem regno potitur, & ultra citraque Istrum late dominatur. Extat adhuc non longe ab ortu Tanais altera Hungaria, nostræ huius de qua sermo est mater, lingua & moribus pene similis: quamuis nostra ciuilius est Christi cultrix. Illa ritu barbarico viuens seruit idolis. In Hungaria quam Danubius interlabitur, tempestate nostra Sigismundus Caroli quarti Romanorum Imperatoris filius, natione Bohemus, origine Teutonicus, varia fortuna annos supra quinquaginta regnauit: princeps singulari prudentia, magnitudine animi, beneficentia & liberalitate insignis, corporis quoque maiestate ac decore illustris: cæterum bello prorsus infelix. Quem non Turci duntaxat, sed Bohemi quoque sæpe acie fuderunt. Vxor ei prima fuit Maria Ludouici Regis filia, cum qua regnum accepit. Illius causa duos & triginta regulos in Hungaria primarios, qui aliquando rebellassent, gladio percussit, ob quam rem & ipse paulo post, Regina fati functa, in vincula coniectus est: mulierique viduæ cuius virum interfecerat, in custodiam traditus, donec regni proceres supplicium decernerent. Sed non defuit capto in extremis rebus prouidentia: qui (vt erat facundia potens) mulieri longe melius esse ostendit, regium sanguinem conseruare quam fundere. Dimissus ab ea, Barbaram Hermannii comitis Ciliæ filiam duxit uxorem, nec diu postea comparatis auxiliis regnum vendicauit: de proditoribus supplicium sumpsit: mulieris viduæ filios & honoribus & opibus inter primos regni proceres cumulauit.

*Sigismundus  
Imp.*

*Sigismundus  
capit.*

*Constantiense  
concilium.*

Quorum adhuc alterius viuit filius Ladislaus Garius comes regni palatinus. Multa huius Sigismundi egregia facinora memoriæ prodita sunt: inter quæ illud præcla-



præclarissimum, quod ecclesiam catholicam in tres partes diuisam, coacto apud Constantiam generali concilio, ad unitatem redegit; Italiam, Galliam, Hispaniam, Angliam, huius rei causa peragrans. Vitoldo Lituaniæ duci, ut se Regem appelleret, missa corona indulgit. Prius tamen ille vita decessit, quam solennia coronationis expleret. Prussiam, quam Rex Poloniæ fratribus beatæ Mariæ Teutonicorum armis ademerat, restitui iussit. Cum Venetis duce Pipone Florentino grauius bella gessit: Venceslaum Bohemiæ Regem germanum suum, quod regno inutilis esset, coniecit in vincula: quamuis negligenter custoditum, magno Reipublicæ malo, quidam Bohemi e carceribus surripuerint, coronam imperii ab Eugenio quarto Pontifice Maximo Romæ accepit. Bohemia post multas calamitates vix tandem potitus est: Marchiam Brandeburgensem Friderico Burgraffio Nurembergensi dono dedit filiam Elisabeth ex Barbara natam Alberto Duci Austriæ in matrimonium copulauit: Illique demum apud Znoymam Morauici ciuitatem moriens, regna quibus præfuerat vltima voluntate reliquit, ossa eius in Veradino iacent. Albertus apud Albam regalem cum coniuge coronatus, Bohemiæ quoque diadema suscepit. Cuius felicitatem admirati Germani principes, & ipsi suum sanguinem extollere decreuerunt, Romanum ei committentes imperium. Id Alberto suscipere non licebat, nisi primores Hungariæ indulgerent. Quibus haud ex usu videbatur suum Regem Theutonibus imperare, atque ob eam causam iureiurando Albertum obligauerunt, ne suo iniussu Imperium acceptaret. Vocati tamen ad Regem, qui tum Viennæ fuit, victique precibus præbuere consensum. Ille imperio auctus \* ad Hungariam rediit aduersus Turcos, qui tunc Rasciam inuasent, arma moturus.

Albertus  
Imp.

\* al. Imperium nactus.

Sed dum Budæ moram facit (ea est Regum sedes\*) Iudex ciuitatis natione Teutonicus Hungarum quempiam ob delictum fluuio demersit. Id Hungari molestissime tulerunt: quibus Teutonicum nomen exosum est. Excitatur e uestigio tumultus: Hungari arma capeunt, obuios Teutones passim trucidant. Fit fuga in arcem, qua Rex se continebat. Diripiuntur negociatorum domus, quorum pars maior Teutonica fuit.

\* Vide auctor. epist. 313.

Euangelizabat eo tempore Budensibus Jacobus Marchianus, ordinis Minorum professor, doctrina literarum, & vitæ sanctimonia clarus: qui sedaturus tumultum simulacrum Saluatoris crucifixi manu gestans; furenti armatoque populo obuiam factus, ut cædi parcant, ut rapinis abstineant, ut arma deponant, supplex orat. Illi verba eius minime intelligentes (neque enim tempus ferebat interpretem) bene sibi futurum autumant, qui Christum suis coeptis ducem habeant: sublimemque Jacobum, simulque crucifixum in vlnis attollunt: ac bachati per urbem nunc istam, nunc illam domum compilant. Fiunt tamen aliquanto minora spolia: & à cædibus temperatum est ob præsentiam Jacobi, qui modo precibus, modo lachrymis furorem incensæ plebis lenire conatus est. Sedato tumultu Georgius Palocius Strigoniensis ecclesiæ pontifex moritur apud quem preciosa regni suppellex in custodia fuit. Rex Strigonium petit, & Regina cum eo, aperiantur archæ in quibus thesaurus obseruabatur, coram Regina & selectis regni Baronibus. Illa clam subtracta corona (quam sacram appellant) fidelique anui tradita, archas claudit atque obsignat. Albertus paulo post Dravum usque fluvium proficiscitur, ibique castra metatus maiores copias expectat, cum quibus Turcos invadere possit, Sindronium \* urbem Rasciæ obsidentes, prius tamen expugnatum est oppidum quam auxilia venirent.

\* al. Smederom.

Ipse Budam reuersus, cum dysenteria laboraret, Viennam repetere statuit, siue moriturus inter suos, siue quod aërem in quo fuerat enutritus, conferre aliquid ad sanitatem sperabat. Sed in itinere magis ac magis morbo affectus, relicta vxore prægnante, obsignatoque testamento in villa quæ longa dicitur, VI. Kalen. Nouembris e vita decessit. Religiosus princeps, & qui liberalitate simul iustitiæque præstaret: fuit quoque in bellis audax & manu promptus. Moruos ac Bohemos armis subegit: Polonos late vagantes intra regnum suum coercuit. Ma-

gna



gna de se Christianæ Reipublicæ promittere videbatur, nec minora populi de sua virtute conceperant: pulcherrimæ spei satisfieri breuitas vitæ non fuit. Repente occidit, quæ breui ad summum potentia creuerat: neque enim biennio toto imperauit.

Statura eius procera fuit, neruosum & validum corpus, facies terrificæ, more gentis erasa barba, superius labium intonsum: vestem haud splendidam, baltheus auro grauis cinxit: nec vnquam lateri defuit ensis. Corpus eius in Alba reconditum est. Cognita Regis morte conuenientes Hungari, indignum ac periculosum existimantes, tantum regnum vnius foeminæ iudicio subiacere, Reginam magnis precibus hortantur Vladislaum Poloniæ Regem, qui populum armis tuetur, sibi vt virum asciscat. Consentit mulier ea conditione adiecta, ne quod filio præiudicium fiat, si masculum pariat, legantur in Poloniam prælati Ecclesiarum & Principes regni natu & auctoritate maiores: quibus iter agentibus, Vladislaus posthumus nascitur: qui mox vt in lucem prodiit, apud Albam regalem & baptismum Christianæ fidei signaculum, & militiæ cingulum, & sacram Vngariæ coronam (quam mater penes se habuit) eadem die accepit. Inde sublatus in tutela Friderici Cæsaris duodecim ferme \* annis fuit: cui mater & ipsum & coronam commendauit. Legati, quamuis prohibente regina, Vladislaum adire: quem magnis pollicitis oneratum in Hungariam traxerunt, & imposito diademate Regem p. 40. salutauere quo cum diu Ladislai mater vario euentu armis contendit: Hungaris in duas partes diuisis. Vlricus comes Ciliæ, dum consobrinæ studet, Ladislaoque regnum defendit; captus à Polonis diu in carcere maceratus est. Dionysius archiepiscopus Strigoniensis (qui postea cardinalatus honore donatus est) genere ac moribus illustis, vtrique Regi diadema imposuit: alteri volens, alteri coactus. Vocatus enim ad Polonum, quamuis publica fide accepta Budam petiuisset, non prius libertati suæ redditus est, quam Vladislaum in Alba coronauit. Ipse quam primum potuit domum reuersus, Polonorum conatibus summo studio aduersatus est.

Julianus cardinalis sancti Angeli ab Eugenio pontifice Maximo in Hungariam missus, vir summo ingenio, singulari facundia, excellenti doctrina: quamuis inducias belli inter Vladislaum & Elisabeth ad certum tempus composuerit, pacem tamen efficere non valuit. Regina mortua, omnes pene Hungariæ optimates ad Polonos defecere, solus Gischra Boemus rei bellicæ peritissimus, & manu promptus, Ladislai partes in Hungaria tutatus est: qui sæpe cum parua militum manu ingentes Hungarorum Polonorumque copias vicit, fudit, deleuit bisque Johannem Huniadem magnis exercitibus cinctum castris exiit, hic Johannes natione Valachus fuit, haud altis natalibus ortus: sed ingenio dextro, & animo sublimi, & virtutis amator: multa cum Turcis secunda prælia fecit, & hostium spoliis Hungarica templa ditauit, primusque omnium apud Hungaros Turcorum acies & frangi & vinci posse monstrauit.

Quibus ex rebus excitatus Vladislaus & ipse prælium cum Amurate Turcorum imperatore committere non dubitauit, de quo postea suo loco dicemus. Fœdus inter Fridericum Imperatorem, & Vladislaum qui se Regem Hungariæ appellauit, Julianus cardinalis ea lege composuit: vt liceret Imperatori Hungaros coercere, si quid in Austria Stiriaue damnum inferrent. Idem permissum Vladislao est in Friderici subditos, Hungariam infestantes.

Guncium oppidum in Hungaria est, Stiriaæ atque Austriae proximum: hoc latrones occupare, & pleraque circumiecta castella: ex quibus in Austriam profecti, magnam vim pecorum atque hominum abegerunt. Motus ea re Fridericus, comparato raptim exercitu in Hungariam traiecit, munimenta expugnauit, ex latronibus octoginta furca suspendit. Cum cecidisset in bello Vladislaus, conuentus Hungarorum apud Pestam \* habitus est: locus hic trans Danubium Budæ opponitur, neque muris cinctus, neque magnificis domibus exædificatus, villæ speciem gerit. Hic Ladislaus Alberti filius communi procerum consensu Rex designatur:

\* huc vide  
auctoris epist.  
78. & 81.  
& 93. & 95.  
& 136.

Vladislaus R.  
Vngar.

\* vide Aucto-  
ris epist. 13.  
& 118.

Julianus Car-  
dinal.

Gischra.

Johannes Hu-  
niades.



signatur : suisque deinceps auspiciis in Turcos pugnare cepit , nec tamen felicio-  
ra eius prælia quam Poloni fuerunt. Johannes Huniades regni gubernator assum-  
ptus , absente Rege prouinciam ( vt aiunt ) in virga ferrea gubernauit : nec dum  
Rex affuit , minor eo habitus est. Hic prostratis apud Albam Turcis ( quemadmo-  
dum in rebus Rascianis referemus ) breui tempore superviuens , morbo extinctus  
est , ferunt eum cum ægrotaret , noluisse Dominicum ad se corpus deferri , in-  
dignum esse aientem, *Serui domum intrare Regem* : iussisse sese, quamuis deficienti-  
bus viribus , in templum vehi : ibique de more Christiano confessum , diuinam  
Eucharistiam suscepisse , atque inter sacerdotum manus DEo animam reddidisse.

Felix spiritus qui tantæ rei , quanta gesta est apud Albam , nuncius atque au-  
ctor migravit in cælum. Ladislaus qui ex tutela iampridem Imperatoris emissus,  
& in paterna regna receptus, Turcorum metu ex Hungaria in Austriam se contu-  
lerat , audita Turcorum strage , & gubernatoris morte ( quo cum Cilie comes  
apertum gerebat odium ) impellente ipso comite , qui veluti sublato æmulo læta-  
bundus id nuncii audiuerat , rursus in Hungariam rediit : sed dum apud Albam  
spolia Turcorum & interremptorum hostium cadauera inspicit , comes ipse ( cu-  
ius caput erat à Rege secundum , & qui iam solus tanquam Regis avunculus le-  
ges Hungaris præscribebat ) à Ladislao Huniadis filio in castro Regio obtruncatur :  
inde necem consecutus , vnde sperauit imperium. Offensus ea re mirum in mo-  
dum regius animus , dolorem tamen suppressit : nec dubitauit avunculum iure  
cæsum fateri. Cadaver defuncti in Ciliam missum est : Rex Budam se contulit :  
vbi secutos curiam Huniadis filios in carcerem rapi iussit , percussoremque comi-  
tis Ladislauum natu maiorem capite plecti. Matthiam captivum duxit in Austriam,  
& profectus in Bohemiam , eum pone sequi mandauit. Ipse paucos dies Pragæ  
moratus , siue morbo pestifero \* ( vt plerique tradiderunt ) seu veneno ( vt alii af-  
firmant ) obiit diem : nobilissimus sanguis paterna origine ac materna ex impera-  
toribus ortus. Matthias qua die Rex clausit oculos , eadem Pragam applicuit :  
quem Georgius gubernator in custodiam suam recepit. Corpus Ladislai apud pro-  
avum Carolum quartum Romanorum Imperatorem in arce Pragensi atque in æde  
sancti Viti reconditum est. Defuncto Ladislao Rege , Hungari ad eligendum suc-  
cessorem ad Kal. Januarias diem constituunt. Proceres apud Budam frequentes  
conueniunt. Inter quos Michael Rylagi \* magna militum stipatus caterua præsto  
adeft, XIII. millia equitum , peditum. VII. millia eum secuta feruntur : quibus  
statua in Pesta fuerunt. Michael frater coniugis Huniadis & Matthiæ avunculus  
fuit : cui propter necem Ladislai nepotis cum plerisque regni Baronibus accerri-  
mæ simultates erant. His potentia eius haud paruum ingessit terrorem : nec iam  
perculsa metu concio , liberam Regis electionem futuram arbitrabatur. Michael  
vero conuentum adiens , non se idcirco armatos adduxisse ait , vt vim congrega-  
tis inferat ; sed vt eos deterreat , si qui sint qui libertatem Principum ac popula-  
rium in assumendo Rege perturbare conentur. Illud tantum se veluti vnum ex  
regni accolis monere , vt Johannis Huniadis beneficia meminerint , qui vnus  
omnium Turcorum arma ab Hungarico regno depulerit , claraque genti victo-  
rias pepererit. Indigna suis meritis præmia reddita. Ex filiis eius alterum crude-  
liter occisum , alterum in Boemia captum seruari : posse Barones memoriam Jo-  
hannis extollere , Matthiam ex captiuitate redimere , atque in eius regni fastigio  
collocare , quid pater sua virtute seruassæt : neque ferendum , vt ad externos ea po-  
testas deferatur , parcere se omnibus , qui nepoti fuissent insidiati : Regni salutem  
ante oculos ponere : si quem provinciæ vtiliorem esse arbitrentur , nihil obstare,  
quo minus melior eligatur. Fuit res aliquamdiu anceps , cum Baronum sibi quis-  
que timeret. Postremo reconciliatione inter proceres facta ( cuius auctorem Jo-  
annem sancti Angeli cardinalem , virum doctrina & moribus excellentem , qui  
tum Legatum agebat Apostolicum , tradidere ) Matthias octo & decem natus annos  
nono Calen. Februarii inter XL. millia virorum , qui medio in Danubio tum gla-  
cie constructo impatientes magni secreti electionis exitum expectabant , Rex accla-  
matus ;

\* vide Au-  
tor. epist. 324.

Matthias  
Corvinus R.  
Vng.

\* Zylage.



matus; Nunc quisquis hæc legis, & futura prædico: singulare prorsus humanæ inconstantia documentum ex duobus adolescentulis ætate moribusque pene paribus. Alter ex regio folio, dum nouæ nuptæ thalamum exornat, defertur ad tumulum: alter dum capitale iudicium trepidus manet, ex carcere vocatur ad regnum. Libertas eius ex gubernatore Bohemiæ sponsaliciis atque aliis pactionibus empta refertur. Mirabile, quod matrem repentina lætitia non exanimauerit, cum tot cladibus afflicta prius Regem appellatum audiuerit, quam vinculis exemptum.

*Sepusium Examites latro. Vid. auctor. epist. 162.*

In parte Hungariæ quæ trans Danubium in Septentrionem porrigitur, & nunc Sepusium vocant, olim Gepidæ confedere. Insignis latro Examites, natione Bohemus, Hussitarum pestifera labe infectus, milites prædandi cupidus vndecunque ad se venientes, benigne collegit, eosque fratres appellauit: vniuersam regionem illam tributariam sibi reddidit, exadificatis munitionibus locis oportunis, ex quibus modo in vnam, modo in alteram partem discurrere posset: prædas in fine cuiusque mensis viritim diuisit. Ex quibus non plus accepit, qui totum mensem, quam qui diem vnam ante diuisionem in castris fuit numero fratrū ascriptus. Id sibi ex Euangelio præceptum affirmavit, quod in vinea Domini laborantibus, & qui prima hora, & qui XI. venerant, æquam mercedem promittit. Hæc societas cum longe lateque rapinas ageret, & iam quinque millia pugnatorum in armis haberet, indiesque cresceret, non aliter dissipari potuit quam duce ipso Axamite ad stipendia Ladislai Regis vocato.

## C A P U T II.

### DE TRANSILVANIA, ET WALACHIA.

TRANSILVANA regio est vltra Danubium sita: quam Daci quondam incolere, feroces populi, & multis Romanorum cladibus insignes, nostra ætate tres incolunt gentes, Teutones, Siculi & Valachi. Teutones è Saxonia originem habent, viri fortes & bello exercitati: à septem ciuitatibus quas inhabitant, Siebenburgenfes patrio sermone appellati. Siculi Hungarorum vetustissimi creduntur, primi omnium, qui ex Hungaria veteri in hanc prouinciā venerint. Eam ob causam, quamuis agros suis colunt manibus, ac rure viuentes greges pecorum pascunt, nobiles tamen appellantur. Et concurrentes inuicem alter alterum *Generosum dominum* salutant. Nec tributa pendunt, nisi quo anno Rex Hungariæ coronatur. Tunc quot sunt patresfamilias, tot boues Regi tradunt: quorum numerum supra LX. millium esse ferunt. Iussi vero in bellum exire, nisi pareant, capitali poena plectuntur: bona fisco applicantur. Walachi genus Italicum sunt: quemadmodum paulo post referemus, paucos tamen apud Transiluanos inuenias viros exercitados, Hungariæ linguæ nescios. In hac prouincia oppidum fuit, quod Bistricium vocauere, regiæ coronæ subiectum.

*Siebenburgenfes.*

*Walachi.*

*Bistricium.*

Id Ladislaus Rex cum Viennæ ageret, Joanni Huniadi dono dedit. Tulerunt id ægre oppidani, diuque restiterunt: coacti tamen imperata fecerunt, at mortuo Joanne, eiusque filio Ladislao Budæ occiso, Michaelē Rylagi, \* qui pro Matthia altero Joannis filio regnum petebat, turpiter reiecerunt. Ille indignatus quamprimum Ladislai regis mortem accepit, eo cum exercitu rediit, vi oppidum expugnauit, rebellium ciuium aliis oculos eruit, aliis manus amputauit, aliis necem gladio intulit, oppidum incendio deleuit. Ingressi sunt paulo post Transilvaniam Turcorum circiter tria millia, prædamque magnam abegerunt pecorum atque hominum. Quos infecuti Sibinienses, & ipsi Teutones, ad internitionem vsque deleuerunt; victoresque præda recuperata domum rediere. Vix ciuitatem introierant, cum Michael ex alia parte haud paruas ducens copias affuit, ciuitati exitium parans, quæ Bistricensibus aduersum se opem tulisset. Sed cum Sibinienses intra munitissimam urbem se continerent, frustratus desiderio suo minabundus recessit. Apud Hungaros obiit ætate nostra Paulus Vergerius Justinopolitanus, græcis ac latinis literis apprime instructus: cuius plura extant opera ab eruditis probata.

*Paul. Vergerius.*

Arrianus,



Arrianus, qui Alexandri Magni gesta græco sermone conscripsit, latinus ab eo redditus est, hortatu Sigismundi Cæsaris. Scripsit de ingenuis moribus, græcas ac barbaras amicitias comparauit aduersus Malatestam, qui Maronis statuam in foro Mantuano dejici iusserat, nobilem inuectiuam edidit, ex Hungaris, qui studia humanitatis secuti æuo nostro claruerunt, duos nouimus: Joannem episcopum Varadiensem, qui regni cancellariam obtinuit: & alterum Joannem eius ex sorore nepotem, qui sub Guarino Veronenſi græcas ac latinas literas didicit: nec minus versu quam soluta valet oratione, horum tamen originem Sclauonicam ferunt. Scientiam iuris plurimi professi sunt: inter quos Dionysius excelluit gente Canysia natus, qui Strigoniensem sortitus ecclesiam, honorem quoque cardinalatus (vt ante diximus) emeruit. In re militari Nicolaus Wayuota Transiluanus, Michael Vrsatius, & qui Calisium inuasit, Pangracius nomen adepti sunt. Nunc clarus habetur Michael Rilagi, \* ex aliena ruina magnus. Joannes Huniadis, cuius nomen cæteros obnubilat, non tam Hungaris quam Valachis, ex quibus natus erat, gloriam auxit. Walachiam perquam lata regio est, à Transsiluanis incipiens, vsque in Euxinum protensa pelagus, plana ferme tota, & aquarum indiga. Cuius meridiem Hister fluuius excipit, septentrionem Roxani occupant, quos nostra ætas Ruthenos appellat: & versus fluvium Thiram Nomades Scytharum genus, quos Tartaros hodie vocitamus.

\* Zylagi.

Hanc terram incoluerunt quondam Gethæ: qui & Darium Histaspis filium turpi fuga repulerunt, & Lyſimachum regem vivum in potestatem pertraxerunt, & Thraciam pluribus cladibus affecerunt. Postremo Romanis armis subacti ac deleti sunt: & Colonia Romanorum quæ Dacos coherceret, eo deducta duce quodam Flacco, à quo Flaccia nuncupata: exin longo temporis tractu corrupto (vt fit) vocabulo Valachia dicta, & pro Flacciis Valachi appellati, sermo adhuc genti Romanus est, quamuis magna ex parte mutatus, & homini Italico vix intelligibilis. Inter Valachos tempestate nostra duæ factiones fuere: altera Danorum, altera Dragularum: sed hi cum Danis impares essent, atque ab illis multifariam opprimerentur, Turcos in auxilium vocauere: quorum armis adiuti Danos pene ad internitionem deleuerunt. Danis vero Joannes Huniades Hungarorum imperio fretus opem ferens, non tam illos restituit, quam sibi ipsi claritatem & opes acquisiuit. Quippe qui Danorum agros ex potestate Turcorum ereptos, & sibi & posteris perpetua possessione retinendos occupauit. Valachi & insulas Histri accollunt: inter quas Peucen apud veteres fama notam, & in Thracia quoque sedes p. 43. habent. Valachorum pars Turcorum imperio, pars Hungaris paret. Non me latet difficillimam esse prouinciarum descriptionem, quando & auctores ipsi, quos imitari oportet non solum varii, verum & inter se contrarii ac magnopere dissidentes inueniuntur, & ipsarum prouinciarum limites pro dominantium auctoritate ac potentia sæpe numero commutantur. Nam quæ prouincia latissima quondam fuit, ætate nostra aut extincta est, aut permodica. Contra vero quæ nulla vel minima extitit, nunc latissimam florentissimamque videmus. Longobardiam ac Roman-diolum non cognouere maiores: nostra tempora Insubriam, Emiliam, ac Flaminiam prorsus ignorant. Macedoniam sub Æmathione Rege (à quo Æmathia cognominata) perangusti clauſerunt termini. Virtus postea Regum & gentis industria, subtractis finitimis populis longe ac late protendit. Dent igitur veniam (æquum cenſeo) si qui mea scripta legentes non eos locorum terminos offenderint, quos ipsi vel mente sua conceperunt, vel apud alios inuenerunt, quæ ab aliis accepimus, seu antiquis seu nouis autoribus incorrupta referimus: quamvis non est propositi nostri geographiam edere, licet aliquando historia ipsa quam scribimus, locorum aliquam significationem requirit: sic enim clarior redditur.



ÆNEÆ SYLVII DE STATU EUROPÆ  
CAPUT III.

DE THRACIA, ET INEA BYZANTIO.

POST Valachos igitur & Hungaros, de quibus sermo habitus est: Thracien-  
sium res gestæ sese offerunt. Thracia vero (vt plerique autores tradunt, ipsi-  
que præstantiores) amplissima prouincia est, longe lateque patens. Cui ab Orien-  
te Euxinum pelagus ac propontis occurrit, à meridie Ægeum mare, & Strimon  
fluvius, simulque Macedonicus ager. Septentrionem Hister claudit, occidentis  
oram cum Peoniae montes, tum Pannonia, & Savus excipit amnis, in qua senten-  
tia & Plinium Veronensem fuisse video, & Strabonem ipsum, qui iuga montis  
Hæmi-Thraciam diuidere mediam affirmat. Idemque Dardanos, Triballos, My-  
sos incolere Thraciam non ambigit. Triballos autem eos coluisse campos, in quis  
vel Rastiani modo vel Servii sedes habent, nemo negabit, qui scripta veterum  
præsenti rerum statui coaptauerit. Mysi vero post Triballos ad orientem vsque in  
Euxinum protenduntur, inter Histrum & Hæmum montem habitacula sortiti, hos  
hodie Bulgaros appellant. Post quos maritima loca versus meridiem ad Helleston-  
tum vsque Romania est, natio græca, quamuis olim barbara fuerit: & iterum  
nostro tempore deleta Græcorum imperio, dominantibus Turcis in barbariam re-  
dit. Huius prouinciæ metropolis est Bizantium, Agios prius appellata. Lacedæ-  
monii eam condidere duce Pausania, quibus Apollinem consulentibus, vbinam  
sedes quærerent, mandasse oraculum memoriæ proditum est, vt contra cæcos ha-  
bitationem locarent. Cæcos autem Megarenses appellauit Calcedonis conditores.  
Qui cum prius in Thraciam nauigassent, situmque vbi postea Bizantium ædifica-  
tum est, conspexissent; omiſsa tam locuplete ripa, tenuiorem è regione in Asia  
delegissent. Hæc Strabo. Constantinum vero Imperatorem cognomine Magnum,  
cum statuisset imperii sedem ex vrbe Roma in Orientem transferre, quo facilius  
Parthorum excursiones compesceret, tradunt Ecclesiastici autores in Troadem pro-  
fectum, ibi regiæ vrbis fundamenta iecisse, vbi quondam Agamemnon cæterique  
græcorum principes aduersus Priamum regem fixere tentoria. Sed admonitum in  
somnia à Christo saluatore, locum alium designante, captum opus, cuius diu  
mansere vestigia infectum reliquisse: atque in Thraciam nauigantem Bizantium  
petiuisse: eumque sibi locum diuinitus ostensum dixisse: mox urbem ampliassse,  
noua moenia erexisse, sublimes excitasse turres, magnificentissimis tum priuatis,  
tum publicis operibus exornasse, tantumque illi decoris adiecisse, vt altera Roma  
non immerito dici posset. Scriptores, qui florentem videre, Deorum potius in  
terris habitaculum quam Imperatorum putauere. Nomen vrbi nouam Romam  
imperator indidit sed vicit obstinatio vulgi, vt à conditore potius Constantinopo-  
lis vocaretur. In hac vrbe multa sub Imperatoribus Episcoporum concilia cele-  
brata, multæ suppressæ in Christiana religione surgentes hæreses, multæ etiam in-  
uentæ. Inter quas ea diutius mansit, quæ de processione sancti Spiritus, quam-  
vis in pluribus agitata ac reiecta conciliis, ad nostram ætatem vsque perveniens,  
denique sub Eugenio quarto Pontifice Maximo in Florentina Synodo (quemadmo-  
dum suo loco dicitur) non solum à Latinis, sed ab ipsis etiam Græcis damnata  
explosaque est. Verum quamquam Joseph Patriarcha & Joannes Imperator gen-  
tis eiusce cum Latina Ecclesia concordibus animis fidei symbolum decantauerint, p.44.  
Constantinopolitana tamen Ecclesia credere, quod Romana sentiret, velut nephas  
duxit. Obierat in Florentia Patriarcha, qui vnioni consenserat: nec imperator  
domum reuersus diu superuixerat. Constantinus qui ei successit, siue deceptus,  
siue sponte sua insaniens, haudquaquam vnioni consentiens videbatur: Et iam Gre-  
gorium patriarcham priori suffectum, quod ad veritatem fidei ambularet domo  
pepulerat, ecclesiastica bona inuadens. Miserrat eo Nicolaus pontifex Romanus  
Isidorum episcopum Sabinensem vniuersalis Ecclesiæ cardinalem, virum industrium,  
& qui Ruthenorum Ecclesiam iamdudum rexerat; percontatum quam ratione  
Græcanica natio legatorum suorum conuenta rejiceret, cum Latinis Florentiæ ha-  
bita.

Bizantium.

Constantino-  
polis.



bita. Jam ille imperatorem eiusque Senatum in rectam viam pellexerat : cum Turcorum bellum duce & autore Mahomete veluti repentina tempestas in Constantinopolitanos emerfit , de quo paulo post suo loco dicitur.

## CAPUT IV.

## DE TURCORUM ORIGINE, ET BELLIS IN HUNGARIA: ET OCCUPATA PER EOS CONSTANTINOPOLI.

VIDEO complures ætatis nostræ non autores aut poëtas duntaxat, verum etiam historicos eo errore teneri, ut Teucrorum nomine Turcos appellent. Credo eos id circo motos, quoniam Turci Troiam possident, quam Teucris coluere. Sed illorum origo ex Creta atque Italia fuit! Turcorum gens Scythica & barbara est: de cuius origine atque progressu quamvis propositum egredi videar, dicere haud alienum existimo: quando sub ævo nostro in tantum hoc genus hominum auctum est, ut Asiam Græciamque tenens, Latinum Christianumque nomen late perterreat.

Ea narratio res quoque Thracienses aperiet, de quibus institutus est sermo. Turci (ut Ethicus philosophus tradit) ultra Pirricheos \* montes & Tarachontas insulas contra aquilonis \* vbera, id est ad septentrionalem oceanum, fedes patrias habuere: gens truculenta, ignominiosa, & in cunctis stupris ac lupanaribus fornicaria. Comedit quæ cæteri abominantur, iumentorum, luporum, & vulturum carnes: nec abortiuis hominum abstinet, diem festum nullum colit, nisi mense Augusto Saturnalia. Romanorum Imperium audiuit magis quam sensit: quamvis Octauiano Augusto in Auro littorio, \* censum dedit, & id quidem sponte. Nam tum vicinas undique regiones annua illi tributa reddere animaduertisset, novum dierum ac temporum DEUM exortum esse arbitrata, munera ei quotannis transmisit. Hæc gens (teste Othone historico & Imperatoris Friderici patruo) regnante apud Francos Pipino, à Caspiis portis egressa, cum Auaribus (quos Hungaros nostra vocat ætas) feroci pugna, multis utrobique desideratis confligit. Exin Pontum, Capadociamque transgressa, ad reliquas inde finitimas gentes sensim dilapsa, more latronum clandestinis quibusdam excursionibus vires sibi vendicans, occupatis quibusdam montibus & claustris oportunis, unde per occasiones facile irruptiones fieri possent, usque adeo emerfit ac sublata est animis, ut palam iam & pari Marte aduersum finitimos de agri possessione certaret: & denique procedendi tempore non solum Pontum & Capadociam, verum Galaciam, Bithyniam, Pamphiliam; Pysidiam, utramque Phrygiam, Cilices, Cares, & eam Asiam quæ minor vocatur, ad oras usque Jonii & littora Græci maris occupauerit: non vnum quendam principem, sed alios alii duces & varia auspicia quasi per factiones secuti.

Ex hac gente (quemadmodum Nicolaus Sagundinus, vir Græcæ ac latinæ historiæ peritissimus, ad nos scripsit) vigesimum ab hinc & centesimum circiter annum, Otomanus exigui tum census & obscuri inter priuatos nominis, ex collectio milite non parua manu per seditionem conflata, grassari passim, ac non solum reliquias Christianas vexare, verum etiam homines suæ gentis armis infestis petere, & sibi subdere cœpit. Cuius conatibus orta inter Turcorum principes seditio facilem cursum præbuit. Nam illi dum sæpe inuicem laniant, accitis undique omnibus qui pro ingenio prædæ rapinæque percupidi essent, auctoritatem breui & nomen adeptus est: oppida non pauca partim vi, partim deditione in potestatem accepit. Otomano filius successit Orcanes, qui rem inchoatam à patre commode prosecutus, admodum propagauit. Eum Amurates filius subsecutus est. Qui duobus de Græcorum imperio disceptantibus, ab altero qui superari timebat, in auxilium accersitus, Turcorum primus transiit in Græciam: vbi consulto bellum protrahens, postquam ambos eneruatis consumptisque viribus fractos ac defessos animaduertit, versis, (ut aiunt) prorsus, arma in eos sine vlllo discrimine per occasionem

Teucris,  
pro Turcis.

\* al. Pir-  
cheos.  
\* al. Babylo-  
nis.

\* al. litoneo.

Otomanus.

Orchanes.  
Amurates.



tionem conuertit. Et occupato Callipoli oppido, peropportune in Cherfonneso ad Hellepontum fretum sito, cetera Græca oppida aperte petere bello, palamque sibi & posteris Græcorum polliceri imperium non dubitauit: magnamque Thraciæ partem, nullis ferme obsistere audentibus, ditioni suæ subiecit. Is vita functus duos reliquit filios Solmanem & Pazaitem. Solmano breui è vita subtracto, res vniuersa ad Pazaitem deducta est. Qui prosperos fortunæ adeptus afflatus, usque adeo nouelli regni fines extulit, ut Thraciam pene vniuersam, excepta Constantinopoli ac Pera, Thessaliam, Macedoniam, Phocidem, Boetiam, Atticam maiori ex parte occupauerit: Myfos quoque, Illyrios, Triballos crebris excursionibus infirmauerit. Constantinopolim vero tum omni agro, suburbanisque ac delitiis spoliavit: tum longa & perdifficili obsidione vexauit, ut ciues desperata salute de ditione agere cœperint: periissentque proculdubio, & in hostis sæuissimi potestate venissent, ni Tamerlanes ille Scytharum præpotens Rex, instar torrentis ipso incursum atque impetu cuncta prosterndo ac vastando, Pazaitem ipsum occurrere ac reluctari conantem magno proelio & ingenti strage superatum in Asia cepisset. Hic est ille Tamerlanes, terror gentium, in cuius exercitu duodecies centena millia hominum fuisse traduntur: Xerse ac Dario maior, quorum copiis siccata flumina prodiderunt. *Iram* ipse se *DEI* vocitauit: nec nomini crudelitas defuit. Multas ac præclaras Asiæ vrbes deleuit, homines tanquam pecora trucidauit, non ætati, non sexui pepercit: Damascum nobilissimam Syriæ urbem diripuit atque incendit: Pazaitem catena vinctum prandens quasi canem sub mensa sua comedere iussit: ascensurus equum eo tanquam scabello usus est. Post cladem Pazaitæ filii eius, qui complures erant, in potestatem venere Græcorum, cum periculum euasuri in Thraciam traicere contenderent. Calapinus autem natus maior emissus à Græcis, tandem patrium regnum obtinuit. Aduersus quem Sigismundus Rex Hungariæ collatis signis proelium iniens, tumultuose fusus, castra & impedimenta reliquit. Christianorum ingens occisio facta. Joannes dux Burgundiæ in eo prælio captus, multo auro libertatem redemit. Calapino mortuo Orchan eius filio tenella ætate adolescentulo Moyses patruus & regnum & vitam eripuit. Qui paulo post sine filio desiderato, Mahometem fratrem reliquit hæredem. Is Valachis fortissimis & bellicosissimis nationibus trans Danubium (ut ante diximus) late dominantibus, bello attritis tributa graua imperauit. Nonnullos in Asia Turcorum regulos armis oppressos regnis penitus spoliavit: Christianos sub imperio suo degentes, quam durissime afflixit. Mahomete mortuo Amuratem eius filium, qui per id tempus in Asia morabatur, audita patris morte in Thraciam trajicere conantem, Imperator Græcorum diu prohibuit: Mustaphamque reliquum ex Pazaitæ filiis, ut rerum potiretur emisit, & summa ope persecutus est. Sed Mustapha pugna superato & interempto, Amurates victor vniuersum regnum, consecutus, Thessalonicam illustrem Græciæ urbem (quam tum Veneti possidebant) vi captam pugnatamque penitus diripuit: eaque victoria auctus, Epirum atque Etholiam, non obscuras prouincias, reliquo regno adiecit. Illyriorum agros vastans, oppida multa vi cepit, diripuit atque incendit.

Vxoribus more gentis quamplurimis iunctus est: inter quas Georgii Seruiæ Despoti filiam duxit: nec diu postimmemor affinitatis, aduersus eum duxit exercitum. Georgius impar Generi potentiæ, furentem veritus hostem, relicto vno ex filiis, qui cum præsidio Synderonia tueretur, cum coniuge cæterisque liberis ac gentis suæ sacerdotibus in Hungariam profugit. Expugnata est tamen Synderonia ac direpta; Despoti filio lumen ademptum. Georgius patria expulsus, diu apud Hungaros exulauit. Joannes Huniades iam per arma clarus, sæpe cum exercitu Seruiam ingressus, plurimis cladibus Turcos affecit, eorumque duces acie confixit. Verum quamuis Seruiæ magnam partem recuperauit, non tamen Georgio cuncta restituit: multa sibi ipsi retinuit, multa dedit amicis. Neque iniuria: cum & ipse sua virtute repulisset hostes, & Georgii suspecta fides esset; qui mediis inter Hungaros ac Turcos, nunc hos, nunc illos fefellisset: in his vero quæ religio.

\* al. Synderonia.



religionis essent, neque Romanæ Ecclesiæ auscultaret, neque Mahometis legem sequeretur. Libet (quoniam huc ventum est) huius opera ad finem prosequi. Cum male pugnatum esset in prælio Varnensi (de quo paulo post dicemus) fugiens Huniades, in Seruiam se recepit. Sensit aduentum eius Georgius: atque obuiam factus venientem interceptit, & quasi hostem coniecit in vincula: nec prius dimisit, Georgius De-  
spotæ Seruiæ. quam oppida suæ ditionis ab eo pridem occupata recepit. Nec multo postea, cum Joannes versus Sophiam copias duceret, videreturque non parua Turcis illaturus damna, Amurati omnia Hungarorum consilia patefecit. Vnde ille admonitus maximam Christianis intulit cladem: quemadmodum suo loco referetur. Cum vero Turci Constantinopolim euicissent, atque in Seruiam ducere exercitum minarentur; secundo auxilia petens ad Hungaros transiit: & in Austriam usque profectus Ladislaum adiit regem: grandæus iam senex, dignus veneratu, si recta de religione sensisset: ea in eo sermonis auctoritas, ea corporis maiestas fuit. Accessit hunc Joannes Capistranus ordinis Minorum professor, vitæ mundicia, & inter prædicatores Euangelii nostro tempore insignis. Quæsiuit, *An audire se vellet.* Annuenti, quod Romana Ecclesia credit & docet exposuit. Diu secum per interpretem de sacris eloquiis disputauit; ut errorem suæ gentis relinqueret, magno opere cohortatus est. Ille hoc denique responsum dedit: *Annis nonaginta vitam produxi: nec aliam religionem, quam suscepi à patribus, noui, sapientem me ciues mei, quamuis infelicem, hætenus putauere. Tu nunc, quod sæpe agitant, senem delirum efficere cupis: laqueo vitam finire malim, quam patrum traditiones relinquere:* atque his dictis è conspectu abiit, tam periculosum est religionem imbuisse damnatam. Reuersus domum cum accepisset Michaellem Zilagi, qui tum Albæ cum præsidio præerat, fratremque eius Ladislaum quadrigis vectos urbem exisse, milites misit, qui eos vel comprehenderent vel occiderent. Michael ubi adesse hostes animadvertit, curru desiliens, equum qui pone ducebatur ascendens, veloci fuga saluatus est. Ladislaus in quadriga repertus, multis vulneribus confossus ac discerptus interiit. Sed non impune id Georgio cessit. Cognouit & Michael paucis post diebus, illum prope Danubii ripam iter habere: aggressusque cum armatis, captivum obduxit: cui dextræ manus duos digitos amputauit, cum se gladio defenderet. Redemptus est Georgius magno auri pondere: atque hic perfidi hominis exitus fuit. Lazarus filius post eum gubernationem suscepit, excluso fratre nomine Georgio: quem quondam Amurates excæcauerat. Is cum sorore (quam nupsisse Amurati diximus) ad opem Mahometis confugiens, frustra eius auxilium implorauit.

\*al. Gregorio.

Obiit deinde Lazarus: de cuius hæreditate non parua contentio exorta est. Gregorius Turcorum auxilio paternum regnum vindicare nititur. Vxor Lazari relicta Hungaricas opes implorat: nec Catecuzina Vlrici comitis Ciliæ quondam vxor, ac Georgii filia, portionem hæreditatis desperat. Joannes Cardinalis Sancti Angeli ab Hungaris inuitatus, eo profectus ut arces Rascianas, quæ Turcis in Hungariam aditum præcludunt, aut Apostolicæ sedis nomine recipiat, aut Hungaris tradi curet, rebus infectis non sine graui periculo (vix enim Turcorum manus euasit) Budam rediit. Nos Amuratis opera, quæ medio cursu reliquimus prosequamur. Magnus hic vir fuit domi bellicue, tam suis amatus quam nostris odiosus: cum centum millibus pugnatorum intrauit Hungariam, late populatus prouinciam. Sterilis annus impedimento fuit, ne regno potiretur. Commeatus penuria compulsus rediit.

Julianus Cardinalis sancti Angeli ab Eugenio Pontifice Maximo aduersus eum missus, Hungarorum extulit animos, & arma sumere persuasit. Exercitus Christianus usque Sophiam ad Artum magnum profectus est. Sæpe cum Turcis prospere dimicatum, non sine Joannis Huniadis ingenti laude, qui tum copias ductavit. Cuius nomen apud hostes adeo terrificum fuit, ut plorantibus pueris matres familias taciturnitatem non aliter imperarent, quam Joannis præsentiam minitantes. Congregati tamen non paruo numero Turci, cum Christianis configere non dubita-

vide auctoris  
epist. 44. § 1.



dubitarunt. Sed non tam felix eis pugna quam fortis animus fuit. Superari virtute Hungarica, multis casis terga dedere. Hungari qui bello interfuere, cupiditate gloriæ res suas ampliantes, ac de magnis maiora tradentes, Imperatori Frederico superatos bello Turcos scripsere, triginta millia hostium cæsa, captaque multo plura. Cardinalis sancti Angeli sex millia duntaxat hostium in eo prælio cecidisse, suis literis affirmavit, signa militaria nouem capta; Joannem Huniadem non ducis tantum, sed militis quoque singulari virtute usum. Eique fides habita. Turcis & Christianorum victoria plus pavoris quam damni attulit, non Hungaricas tantum vires, sed Germanicas quoque in se commotas arbitrantibus.

Consternati ergo ac perculsi metu, perinde ac totus Occidens coniurasset, pacem petiere. Hungari qui suas vires non ignorarent, nec tam potentiæ suæ quam casui victoriam imputarent, periculosum existimantes sæpius tentare fortunam, oblatas ultro conditiones pacis non recusarunt. Induciæ belli in decem annos dictæ, iusiurandum per sua sacra ambæ partes præstitere. Despoto Seruiæ, quæ bello amiserat, reddita. Molesta ea res Juliano Cardinali fuit: cui prosequenda victoria videbatur. Eugenio quoque Romano Pontifici nihil molestius nunciari potuit. Cuius menti nulla maior cura infedit, quam Christianæ fidei propagandæ.

Scripsit igitur Cardinali, nullum valere foedus, quod se in consulto cum hostibus religionis percussum esset. Vladislao Regi Poloniæ: qui eo tempore Hungariam occupabat, vti conuenta dissolueret, imperavit: iuramenta remisit. Nouum instaurari bellum cum precibus, tum minis extorsit. Ex Christianis principibus auxilia petiit: præter Philippum tamen Burgundiæ ducem neminem Christianæ religionis zelus commouit. Hic solus classẽ instruxit: quæ usque in Hellespontum profecta, Turcis ex illa transitum prohibere in Europam conata est. Franciscus Cardinalis Venetiarum, Eugenii nepos, cum pluribus triremibus eo missus classi præfuit. Vladislao, qui alienum regnum inuasisset, è re sua visum est, sollicitudinem belli provincialibus non deesse. Accersitis igitur ex Polonia ac Boemia cæterisque vicinis gentibus auxiliis, coactis ex Hungaria copiis, Turcorum agros inuadere statuit. Joanni Huniadi castrorum cura commissã, quadraginta circiter equitum millia fuisse traduntur: plerique dimidio minorem numerum prodidere. Reguli Hungariæ pontificesque quamplurimi interfuere. Julianus sancti Angeli Cardinalis milites cruce signatos non paucos secum duxit. Iter per Valachiam receptum: deinde transito Danubio in Mysiam ventum; vt per plana & campestria loca in Romaniam transirent. Amurates hostium cognito aduentu, cum Græcis ac Turcis in Europa manentibus non satis confideret, exercitum ex Asianis militibus comparavit. Sed augebat animum trajiciendi freti non mediocris cura, qui classẽ Apostolicam obtinere pelagus non ignorabat. Anxio (vt aiunt) & multa voluenti animo, Genuenses quidam curas ademere: qui suis nauibus accepta pecunia transportare copias permiserunt. Locus est vbi non amplius quam stadia quinque latitudo freti continet, inter Propontidem & Euxinum pelagus: tantum est spatium, quod Europam Asiamque determinat. Bosphorum Thracium dixere maiores, à Bizantium cornu sexaginta ferme stadiis distantem. Hic Amuratis exercitus transuectus est, aureo nummo vectoribus per capita tradita: quæ (si vera est fama) centum millia fuisse feruntur. Jam Christiani locum attigerant, cui Varna est nomen, cum aduentare innumerabiles hostium copias nunciatum est. Cedendum Vladislao Cardinalique videbatur: & ne circumueniri ab hoste possent, munitum montanumque locum petendum. Huniades aduersari ac resistere: Turcorum se nosse vires dicere; *Famam semper maiorem esse. Quod si Turci omnes adsint, Hungaris tamen impares fore. Illos aurea & discolori veste, Hungaros ferro atque ære fulgere. Christianum agmen & stare paratum & sequi, nec turba nec sarcinis prægrauare, intentum quo dux non modo signet, sed etiam innuat. Contra si Turcorum mores inspiciantur, feminas magis existimari debere quam viros. Si fugiat exercitus Christianus, quem Rex Hungaria ducit, in quo Legatus Apostolicus adest, in quo tot nobilissimi procures militant,*  
nunquam



*nunquam deinceps Hungaris contra Turcos futurum animum.* Vicit Huniadis sententia: expectati hostes. Postera die visi maioris exercitus speciem præbuere, quam fama ipsa vulgauerat, siue quod metuentibus omnia vero maiora videntur, siue quod Amurates in cogendo milite vulgatæ opinioni haudquaue defuerat. Tertius Huniades eo conspectu, tum primum periculi magnitudinem animo voluens, de fuga Regem admonuit. Ille serum consilium arguens, perniciosam magis fugam quam pugnam dixit: *Commisso prælio sperari victoriam posse: sæpe minoribus exercitibus cessisse maiores. Nec tam multitudinem bellatorum, quam audaciam & ordinem præstare victoriam.* DEum quoque respicere meliorem causam: *præstantioremque se paucis (si modo audeant) exhibere, fugientes victoriam hosti tradere, feriendaque terga, & multam suorum cadem.* Magnifica quoque verba Joannis pridie dicta plenus irarum Rex exprobrauit: iussisque omnibus arma capeßere prælium expectauit. Amurates in proximo colle confederat, ex quo suos pariter atque hostes spectare potuit. Dato belli signo, quindecim millia equitum, qui pugnam provocarent, facto globo in Christianos impetum fecere. Singulis albæ super loricas vestes fuere, quæ vento agitatae instar alarum præ se ferebant: totidem viridibus induti sagulis sequebantur. Aurea equorum frena multorum visa: & multis galearum argenti atque gemmarum nitor. Ipsas quoque gladiatorum vaginas prægrandes vniones ornabant. Non detrectauere Christiani certamen: itum est ferocibus in pugnam animis. Superior acies nostra Turcos in fugam vertit, quam-

p. 48. plurimis primo impetu prostratis; perculit ea res magno metu Amuratem, nihil tale verentem: fugissetque protinus prodito exercitu, nisi circumstantes Satrapæ comprehenso eius equi freno, ignauiam eius increpassent, fugientique comminati necem fuissent. Perstitit ergo vel inuitus, iussisque fortissimis arma sumere, prælium instaurauit. Pugnatum est summa contentione pluribus horis, nunc Christianis, nunc Turcis propinquiorem victoria sese præbente; Cadebant hinc atque inde quamplurimi, plures ex Turcis; quorum corpora parum tecta facile sagittæ ensesque penetrabant. Postremo cum novus in hora hostis incedere, & fauciorum loca integri occuparent; non tam virtute, quam numero superati Hungari paulatim referre pedem cepere. Tum Vladislaus cum globo suorum, quos erga se non minus fortes, quam fidos habuit, ex Polonia, ut hostes ex acie victores diuerteret, Christianisque animum redderet; in tumultum (quem teneri Amurate diximus) circumiectosque vndique currus impetum fecit. Ibi noua pugna commissa: novus iniectus Amurati pauor. Trepidatum totis castris: nec iam consistendi animus aderat, quod si Huniadi par animus ac Regi fuisset, & arridenti fortunæ dedisset manus; haud dubium quin ea dies & Amurati vitam, & posteris eius imperium Græciæ abstulisset. Verum ipse ut primum cedere Christiana signa conspexit, cum decem millibus Hungaris ac Valachis ex acie se subtraxit, atque infalutato Rege, nutante adhuc victoria, fugam arripuit. Fortasse rei militaris perito nulla in pugna salus visa: & saluare aliquos, quam perire omnes maluit. Poloni acceptam eo prælio cladem, Huniadis vecordia atque ignauia tradiderunt: ipse sua consilia spreta conquestus est. Vladislaus suæ sorti dimissus, dum fortiter circa munimenta hostium pugnat, quo deiectus obruncatus est. Caput eius hastæ infixum per Græciam atque Asiam in signum victoriæ populis ostentatum: Poloni ad vnum cæsi omnes, direpta castra, & qui munitiones curruum tuebantur, necati. Episcopi & proceres Hungariæ qui aderant, eadem calamitate oppressi. Julianus Cardinalis dum fugit amisso prælio, cum iam hostes euasisset, Hungarorum perfidiam euadere non potuit. Potum equo dantem apud stagnum forte repertum, latrunculi quidam nouere: & arbitrati pecuniam apud eum esse, dejectum equo necauerunt, & ablatis vestimentis nudum cadauer feris ac volucris dimisere. Hic exitus viri fuit, magni certe & admirabilis: in quo nescias doctrina maior, an eloquentia fuerit: gratia hominis præsentia, blandi mores, vita in omni ætate nitida, religionis zelus, qui omnia pro Christo & mortem ipsam ferre suaserit. Huniadem (ut ante diximus) fugientem Despotus Seruiæ cepit.

Warnensis  
clades.  
Vide etiam  
Auctoris epist.  
52. 81.



cepit. Poloni Regem suum iam peracto bello pluribus annis viuere crediderunt: captum non interfectum arbitrati. Cardinali Venetiarum eius culpa cladis magna in parte imputata est: qui neque fretum (vti par fuerat) custodiuit, neque transuectos hostes Christianis ducibus (quod secundum fuerat eius officium) nunciavit, de numero cæforum minime constat. Illud exploratum est, longe plures ex Turcorum acie cecidisse: cæterum pro numero copiarum longe maius damnum Christianis illatum. Victor Amurates neque fugientes hostes infecutus est, neque gloriabundus inter suos magnifica verba iactauit, neque (vt ante asueuerat) hilarem vultum ostendit. Interrogatus quidnam tristior esset, & cur non victis hostibus exultaret: *Nollem, inquit, hoc modo sæpius vincere.* Jubensque vasa colligi, copias quæ superfuerant domum remisit. Ipse Adrianopolim reuersus DEO suo, quæ pro victoria fecerat, vota persoluit. Exin voluens animo regni curas veræ felicitatis expertes esse, inconstantiam quoque fortunæ veritus (quæ nulli perpetuo bona est) accersitis prouinciarum maioribus: Mahometem ex liberis suis natu maiorem pro se Regem constituit. Ipse priuatam deligens vitam, in Asiam profectus cum paucis otii sui comitibus, religioni cuidam solitariae sese addixit. Calibassa inter Satrapas Turcorum opibus & auctoritate maior, Mahometi qui nondum per ætatem aptus esset imperio, gubernator datus: reliqui regis filii, ne quas regno turbas excitarent, more gentis necati sunt. Felicius apud Turcos priuatis quam Regibus liberi nascuntur. Effluxit deinde non paruum tempus, in quo nec Hungari Turcos, nec Turci Hungaros armis laceßere præsumpserunt. Sua quemque calamitas domi attonitum tenuit. Cruentissima Varnensis pugna vires vtriusque partis eliserat. Nec Turcis, neque Hungaris rex bello idoneus erat: Hos Huniades, illos Calibassa alieno numine gubernauit: ferocior Huniades, rei que militaris peritior, ignominiam Varnæ acceptam obliuisci non poterat. Vnde dies noctesque meditabatur, quonam pacto abolere infamiam, & refarcire damna maxime posset. Spem bene gerendæ rei Turcorum quies præbuit: qui iam pridem nullum belli apparatus ostenderant; vires illis atque animos defuisse ratus, tempus idoneum existimauit, in quo pristinam recuperare gloriam posset, Turcosque pessundare: quibus si adsint exercitus, imperatorem tamen prorsus defuturum arbitrabatur. Nec magis existimandum exercitum sine duce, quam ducem exercitu carentem. Coactis itaque repente copiis ex Hungaria, accersitis Bohemorum auxiliis, mercenariorum quoque militum non parua manu coacta, ducere exercitum in Turcos statuit, quos prius aggredi ac conficere credidit, quam nouissime ex Hungaria nunciaretur. Eam rebus gerendis solertiam ac celeritatem adhibuit. Consilium eius Gregorius Despotus Seruiæ (vt ante diximus) Turcorum ducibus patefecit: Magnumque genti periculum imminens, maius ostendit. Perculsi eo nuncio Turci, quid agerent, non satis intelligebant. Amurates iam senior religioni addictus, regni curas abiecerat. Mahometes ætate minor, tantam belli molem ferre posse non credebatur. Callibassæ defuturam obedientiam putabant: qua nihil est in bello magis necessarium. Trepidare igitur, ac æstare, modo huc modo illuc mentem conuertere: nullum consilium satis placere. Hærentibus in deliberatione Satrapis, nihil tandem salubrius visum, quam reuocare ab ocio Amuratem, neque enim veterani militaturi sub alio credebantur, nec fortunam belli sub alio cunctandam arbitrabantur, quam sub eo vincere consueffet. Calibassa eius sententiæ auctor fuit: in qua re Mahometis animum vehementer offendit, cupientis in ea expeditione sese virum ostendere, verentisque ne imperium amitteret, si pater iterum regnum assumeret: vt sunt hominum mutabiles voluntates. Missi ergo legati Amuratem reuocare: qui comparato mox exercitu in hostem profectus, non aliter quam si ad prædam pergerent, alacres milites duxit. Jam Huniades cum copiis Sophiam transierat: prostratisque qui occurrerant locorum præfectis, hostiles agros late populatus, loco qui Basilia vocatur, castra posuerat: cum aduentarent Amuratis copię nunciantur. Non expectauit Huniades prouocari: prior ipse pugnam iniit.



iniit. Commissio praelio anceps diu certamen mansit. Qua parte pugnauit Huniades, fusi hostes terga dedere, nec parua strages edita: pari modo & Amurates in cornu suo victor Hungaros fudit.

Postremo cum victor victorem incurreret, non tulerunt Christiani Turcorum impetum: qui quanquam virtute praestarent, numero tamen superati, non tam victi quam fessi compulsi sunt cedere. Huniades postquam suos neque minis, neque precibus sistere potest, cum paucis ex bello profugit. Multi Hungariae proceres, & nonnulli Ecclesiarum Episcopi in eo proelio cecidere. Gregorius miles ad internitionem casus: nec tamen pauciores ex Turcis interiere. Emptam multo sanguine victoriam Amurates domum retulit: nec diu postea relicto Mahometi regno (quemadmodum prius destinauerat) mortem obiit. Corpus eius more maiorum in Prusa sepultum. Ea est Bithyniae ciuitas, & Asiatici regni caput. Paulo antequam obiisset, Amurates uxorem duxerat filiam Sponderbei \* nobilis in Penderacia satrapis: ex qua natum filium nomine Chialapium \* sextum agentem mensem Calibassae moriens commendauit. Ille Mahometis gratiam initurus, & matrem & puerum ei prodidit. Mahometes accersitis triginta (vt aiunt) matronis, quae puerum recognoscerent, postquam certam Amuratis sobolem esse constitit, strangulatum matri filium reddidit, funusque regio more fratrum duxit: auspicio regni parricidio consecrans. Sunt qui Calibassam alienum puerum Chialopini nomine supposituisse ferunt; illumque pro filio Amuratis necatum: Chialapinum vero apud Constantinopolim clam educatum, post capturam vero urbis inde subtractum, ac Venetias ductum: & hunc esse quem Calixtus pont. Max. pro fratre Mahometis in palatio custodiri iubet. Nos vero periculum ad Graecos remittimus: quamuis multa in hisce rebus figmenta interuenire non ignoramus, & saepe tonforis filios regio defungi honore viderimus. Mahometes igitur defuncto Amurate gubernacula regni ex voto adeptus, instituta maiorum pro ingenio correxit, leges ipse suas domi forisque tulit: ararium locupletauit, noua vectigalia excogitauit, copias auxit, in proceres aut aulicos saeuire contumeliariue coepit. Hic est ille Mahometes qui Constantinopolitanis (vt supra innuimus) bellum intulit: de quo nunc referre quae accepimus, haud alienum fuerit. Voluerat iam pridem animo Mahometes, quonam modo Constantinopolim sibi subigere posset: neque ad suam gloriam pertinere arbitrabatur, vrbe in medio Turcorum sitam esse, quae suo imperio non pareret. Tantoque maius inde nomini suo decus accedere, si eam urbem expugnaret, quanto progenitores sui idem conati, turpius a coeptis destitissent. Cum paucis igitur participato consilio, castellum iuxta litus ad ostium Bosphori paulo ab vrbe remotius, aliud dissimulans, incredibili celeritate extruxit atque muniuit: bellum deinde vrbi non modo indixit: sed contra inita foedera, contra iusiurandum intulit simul & gerere coepit. Senferant eius animum Graeci, diffidentesque suis viribus ad Latinorum opes confugerant, lachrimis ac fletibus auxilia expetentes. Surdae (proh pudor) nostrorum Principum aures fuere, caeci oculi, qui cadente Graecia, ruituram Christianae religionis reliquam partem non viderunt:

p. 50. quamuis priuatis quemque aut odiis aut commoditatibus occupatum, salutem publicam neglexisse magis crediderim. Mahometes interea coactis vndique copiis, mirabili apparatu, formidando impetu terra marique regiam urbem aggressus, cuniculis ac latentibus fossis altissime actis, aggere late edito, ponte, qua Peram oppidum versus mare muros alluit urbis, longitudinis ad duo millia passuum raptim extructo, turribus ligneis eo vsque erectis, vt muros quamuis altissimos excederent, machinamentorum tormentorumque multiplici adhibito genere, oppugnata est vrbs, defensivaque summis vtrinque viribus. Non paucis diebus ad extremum voce praekonis totis castris inclimatum est: *Quinto Kal. Maii milites omnes ieiunium sanctificent, sequenti die in armis adsint Urbem extremis viribus oppugnaturi: triduo ciuitatem militum direptioni futuram.* Constituta die ieiunium ad noctem vsque seruatum. Exin lucentibus stellis inuitationes ac conuiuia passim habita, & quisque amicum, propinquum, notumque habuit, cum eo hilaris epulatus est, atque

\* al. Scanderberg.  
\* al. Chialpinum.

Mahometes III.

Constantinopolis obsidio & expugnatio.  
Vide Auctoris epist. 130. & seqq.



vbi satis est bibitum, tanquam se deinceps nunquam visuri essent amplexari ex-  
sculatique simul vltimum valedixerunt. In vrbe autem Sacerdotes sacras ferentes  
imagines, sequente populo, urbem lustrare; auxilium de coelo petere affligere  
corpora ieiuniis, atque orationibus vniuersi ciues intendere. Subsecuta nocte ad  
sua quisque loca defendenda redire. Erant muri vrbs & altitudine & crassitudine  
toto orbe celebres: sed ob vetustatem & Græcorum incuriam pinnis ac propugna-  
culis nudi: antemuralia vero opportune communita. In his Græci salutem posue-  
re. Armati milites inter muros & Antemuralia pugnam sustinere decreuerunt.  
Triangularem pene Urbis formam fuisse tradunt, duas partes alluit mare, nec mu-  
ri desunt ad pulsandos nauales impetus idonei. Quod reliquum est, ad terram  
vergens post alta moenia & antemuralia (quæ annotauimus) ingenti clauditur fossa.

Ceptum est prælium paululum ante lucem: cum miles Turcus periculi quam  
moræ patientior esset, ac vulnera & sanguinem prædarum dulcedine pensaret: Pu-  
gnatum est in tenebris, maiore Turcorum pernitie, in quos tela superne librabantur.  
At postquam dies illuxit, dato signo vndique non solum Constantinopolis, sed  
etiam ipsa quoque Pera, ne quid auxilii Græcis præstaret, oppugnari coepta est.  
Sua cuique legioni murorum pars, ac portarum attributa: vt discretus labor for-  
tes atque ignauos distingueret, & ipsa contentione decoris militum virtus magis ac  
magis accenderetur, pari modo & nauales socii attributas partes inuadere iussi.  
Admouentur vrbi lignæ turrets, conuectant milites dolabras, falces, scalasque. Et  
jam elatis super capita scutis, densa testudine succedunt. Græci saxorum pondere  
prouoluunt, disiectam fluitantemque testudinem lanceis contisque perscrutantur:  
donec soluta compage scutorum exangues lacerosque prosternunt. Fit strages:  
& jam Turci deficientibus animis languidius pugnant. Sed adest Mahometes, for-  
tissimum quemque nominatim vocitans, vtque in prælium redeant, adhortatur.  
Hos præmiis allicit: illos minis deterret. Instauratur ex integro certamen. Tur-  
ci rursus subruere murum, portas quater, innixi humeris & super iteratam testu-  
dinem scandentes, præhensare hostium tela brachiaque nituntur. Iterum integri  
cum sauciis, semianimes cum expirantibus euolvuntur. Cernitur varia pereun-  
tium forma, & plurima mortis imago. Joannes Justinianus apud Genuam Ligu-  
rum metropolim nobili loco natus (qui superioribus diebus solus urbem defendisse  
videbatur) in hoc certamine vulneratus, vbi fluitare sanguinem suum animad-  
vertit, ne ceteros deterreret, medicum quærens clam sese pugnae subtraxit. Sed  
Imperator vt abesse Justinianum cognouit, quo ierit percontatur: Inuentumque  
rogat, ne pugnam deferat. Ille nihilo magis flexus, aperiri portam iubet, qua  
curaturus in urbem redeat. Erant enim obseratae vrbs janua, quibus ad antemu-  
ralia patebat iter, ne qua fugiendi facultas militi esset: ac propterea fortius hosti  
resisteret, sit interea remissior defensio. Quod Turci aduertentes, acrius incum-  
bunt. Et quoniam pars muri iam tormentis æneis disiecta, fossam magna ex par-  
te oppleuerat, per ruinas ipsas scandentes, antemurale conscendunt, Græcosque  
loco deturbant. Porta quæ Joanni patuerat, omnibus aperta fugam profusorem  
reddit. Tunc Imperator, non vt regem decuit pugnando, sed fugiens in ipsis por-  
tæ angustiis cum cecidisset, oppressus calcatusque obiit. In tanta multitudine  
pugnatorum duo tantum reperti sunt, qui se viros ostenderint, alter Græcus, al-  
ter Dalmata: Theophilus Paleologus, & Joannes Sclavus: qui fugere turpe pu-  
tantes, cum diu Turcorum impetum sustinuissent, multosque obtruncassent, de-  
nique non tam victi, quam vincendo fatigati inter cadauera hostium occubere.  
Justinianus in Peram cum diuertisset, inde Chium nauigauit, ibique seu vulnere,  
seu mæstitia morbum incidens, inglorius vitam finiuit, felix si in ipsis Bizantii mœ-  
nibus animam exhalasset. In ingressu portæ octingenti circiter milites ex Latinis  
Græcisque periire, partim vulneribus à tergo confossi, partim concursione oppressi. p. 51.  
Et iam hostis superiorem murum tenebat, saxaque in ciues de volvens ingredientibus  
suo auxilio erat. Tum subito capta vrbe, cæsis omnibus qui resistere ausi  
sunt, in rapinas est itum. Erat victorum infinitus numerus, in libidinem, in sæ-  
vitiam



vitiam corruptior. Non dignitas, non ætas, non sexus quemquam protegebat. Stupra cædibus, cædes stupris miscebantur. Senes exacta ætate, fæminas viles ad prædam in ludibrium trahebant, vbi adulta virgo, aut quis forma conspicuus incidisset in manus rapientium, divulsus, ipsos postremo direptores in mutuam perniciem agebat. Dum pecuniam vel grauiam templorum dona sibi quisque traherent, maiore aliorum vi truncabantur. Cumque in exercitu maximo ac dissono, ex ciuibz focis atque externis conflato, diuersæ linguæ, varii mores atque cupidines essent, & aliud cuique fas: nihil illicitum toto triduo in Constantinopoli fuit. Templum Sophiæ, Justiniani Cæsaris opus, toto orbe famosum, & cui comparati alterum nequeat, nudatum sacra suppellectile ad omnes spurcicias patuit. Ossa Martyrum, quæ fuerant illa in vrbe preciosissima; canibus obiecta & suis. Sanctorum imagines aut luto fœdatæ aut ferro deletæ. Altaria diruta. In templis ipsis aut lupanaria meretricum facta; aut equorum stabula. Coacti sunt serui verberibus ac tormentis, dominorum abdita scrutari ac eruere. Inuenti non pauci thesauri, quos in ipso belli principio infelices suffoderunt ciues. Quibus si pro defensione vrbs vti fuissent, suam fortasse vitam, & patriæ libertatem seruassent. Sed auaro in aurum nulla potestas, captiui omnes in castra deducti, pudet dicere Christianorum dedecus: dicam tamen, & posteritati tradere non verebor: quando persuasum mihi est futuros aliquando, & fortasse antequam moriar, qui tantam Saluatori nostro illatam ignominiam vliscantur. Simulachrum crucifixi quem colimus, & verum DEum esse fatemur tubis ac tympanis præeuntibus, raptum ex vrbe hostes ad tentoria referunt, sputo ludoque fædant, & ad nostræ religionis irrisum iterum cruci affigunt. Ex in pileo (quem Sarcolum vocant) capiti eius imposito; corona vndique facta, *hic est*, inquit, *Christianorum DEus*. Tum lapides lutumque iactantes, miris dehonestant modis. Sed nihil hæc obsunt DEo nostro, cælum tenenti; nec maiestatem eius quoquo modo imminuere possunt: cuius ea gloria, ea sublimitas est, ea beatitudinis perfectio, vt nec laudibus humanis extolli, nec humiliari vituperiis ullis possit. Nos ista lædunt atque confundunt: qui per ignauiam atque desidiam, dum veri DEI cultum perire sinimus, & in hoc sæculo bonum nomen, & in altero spem salutis amittimus. Post hæc conuiuatus Mahometes, cum forte plus solito adbibisset, vt sanguinem mero adderet, principes optimatesque ciuitatis captos crudelis & sanguinarius carnifex fæde misereque jugulari iussit. Rirelucas \* qui apud Imperatorem plurimum poterat, cæso ante oculos maiori filio, altero ad illicitos vsus reseruato, securi percussus est: duo alii eius filii occiderant in bello. Isidorus Cardinalis in eo tumultu captus, cum veste mutata non fuisset cognitus, trecentis asperis sese redemit: id est genus pecuniæ admodum leuis. Multi & Veneti, & Ianuenses, & Latinorum alii gladio cæsi sunt: quidam multo redempti auro. Insignis hic annus fuit expugnatione Constantinopolitana, tam Christiano populo fœdus ac lugubris, quam Turcorum gentifautus lætusque: qui ab ortu saluatoris Christi secundus & quinquagesimus supra millenum quadragesimus cucurrit. Perenses vetus colonia <sup>1452.</sup> <sup>al. 1454.</sup> <sup>Guid. Pap.</sup> <sup>decif. 84.</sup> Genuensium (qui & Galathæ nuncupantur) cognita Bizantium clade, priusquam rogarentur, Mahometi deditionem fecere. Muri vrbs diruti, multorum bona contra fœdus direpta: fœminæ puerique ludibrio habiti. Calibassæ, qui ad eum diem non sine Mahometis displicentia vixerat, tanquam Constantino Imperatori Turcorum consilia prodidisset, per miseros cruciatus vita erepta: ingentes quas cumulauerat opes, exitio ei fuisse traduntur, & quod Amuratem dimisso imperio ex priuata vita reuocauit ad regnum. Auctus eius pecunia Mahometes, tanto rerum successu tumens, in Hungaros, expeditionem parare coepit, quæ per triennium circiter instructa, accersitis ex omni regno proceribus, penetratis Thraciæ montibus, cum maximis atque infestissimis copiis ad Savum vsque flumen peruenit: centum quinquaginta millia hominum in eius exercitu fuisse traduntur: plerique tertiam partem huic numero subtrahere. Calistus tertius, qui per idem tempus Romanam cathedram sortitus erat, Joannem Cardinalem sancti Angeli



(cuius supra meminimus) præstanti virtute virum, qui Germanos in arma continet, Turcorumque compesceret impetum, ad eas partes Legatum misit. Is promissa peccatorum indulgentia, cunctis qui contra Turcos militare vellent, adiuvante Joanne Capistrano (qui per idem tempus Hungaris euangelizabat) cruce signatorum haud parvum congregavit exercitum, non diuitum ac nobilium, sed inopis atque incompositi vulgi. Surdæ opulentorum aures Euangelio, nec diuinus sermo principibus auditus. Contenti præsentis rerum statu potentes, futurum Christi regnum nonnisi morientes inquirunt, credula paupertas facile prædicatoribus obedit. Supra quadraginta millia signum crucis acceperunt, tecta magis fide, quam ferro acies Huniades quoque non paruas copias in armis habuit. Appropinquabat spe plenus, & incredibili superbia tumens Mahometes: nec iam sibi vel montes, vel flumina obstare putabat: gloriari inter suos, Hungariam iam pene victam asserere, Latinorum Imperatorem in propinquo esse dicere, deleto Græcorum Imperio, Latinorum instare finem, Turcis omnia paritura: spolia ingentia promittere, Germaniam atque Italiam militum direptioni offerre: peruia cuncta Turcorum armis jactare. Sed quam gloriosus eius aduentus tam turpis atque infamis recessus fuit. Albam ad confluentes Danubii Sauis quesitam, parvam urbem, oppugnare adorsus obtinere nequaquam potuit, perfregit machinis priores muros: irrupere in urbem eius acies, pugnatum est interdum noctuque: Nunc victi, nunc victores visi hostes: ad extremum vulneratus sub papilla Mahometes, relictis impedimentis per noctem trepidus aufugit. Huius pugnae seriem in historia Bohemica \* comprehendimus: non est cur hoc loco latius insistamus. Auctores victoriae tres Joannes habiti, Legatus Cardinalis; cuius auspicio res gesta est: Huniades, & Capistranus, qui prælio interfuere. Verum neque Capistranus Huniadis, neque item Capistrani Huniades mentionem fecere in eis litteris, quas de obtenta victoria, siue ad Romanum pontificem, siue ad amicos scripsere: per suum quisquam ministerium Deum dedisse Christianis victoriam affirmavit. Auarissima honoris humana mens, facilius regnum & opes quam gloriam partitur. Potuit Capistranus patrimonium contemnere, voluptates calcare, libidinem subigere, gloriam vero spernere non potuit. Dicat forsitan aliquis, non suum illi honorem curæ fuisse, sed DEI, qui per pauperes & inermes rem Christianam salvare voluerit. Credimus huic assertioni: quamvis & Huniades ministrum se victoriae, non auctorem dixerit. Ferunt Maometem ab eo tempore nunquam postea eius cladis meminisse, quin mentum barbamque manu demulcens, quassansque caput, ei dici maledixerit qua pugnam ad Albam conferuit.

## CAPUT V.

## DE MACEDONIA.

PROXIMA Thraciæ ad occidentem ac meridiem coniungitur Macedonia, terrarum imperio quondam potita: quæ inter duo maria protenditur. Ægeum & Adriaticum, latus eius meridionale Thessaliæ atque Magnesiæ terga protegi, partem septentrionalem Peonia & Paphlagonia excipit: quamvis & ipse regiones in Macedonum postea iura concesserint, Macedoniae additæ: Epirus quoque Macedoniam attingit ex Illyrica terra, altera meridiem, septentrionem altera excipiens. In Adriatico littore Dyrachium vetus ciuitas jacet, ab Chersoneso ubi sita est, nacta vocabulum: Epidamus antea dicta, & à Corcyreis olim condita. Nec procul infra Apollonia fuit, optimis instituta legibus & Augusti Cæsaris qui Græcas ibi litteras didicit, studio memorabilis. In altero littore Thessalonica est, potens quondam ciuitas: quam cum epistolæ Pauli Apostoli, tum Magni Theodosii præceps atque implacabilis ira famosam reddidere. Indignatus enim ob casus in ea Iudices, alioquin clementissimus Imperator, vniuersum urbis populum trucidari mandauit: vndecim millia virorum cæsa traduntur. Non tulit Ambrosius Mediolanensium pontifex tam immane facinus incorruptum, Imperatorem ab ingressu Ecclesiæ



clesiæ prohibitum subire poenitentiam compulit : nec maximus princeps pastoris subire iudicium recusavit. Hinc lex \* promulgata , vt lata super morte hominis sententia ante dies triginta non exequatur. Hanc urbem liberæ conditionis fuisse Plinius tradit. Strabo conditorem eius Philippum Alexandri patrem affirmat : ambo eam attribuunt Macedoniae. Andronicus Emanuelis Imperatoris Constantinopolitani filius , hanc in partem hæreditatis accepit : demumque Joannis fratris sui odio , qui patri successit in imperio , Venetis tradidit : Amurates Turcorum ( vt ante diximus ) Imperator eripuit. Hic reliquam Macedoniam vsque ad montes Peoniæ , & quam modo Albaniam vocant , imperio suo subiecit. Mira rerum mutatio , & fluxa humani imperii gloria. Hæc est Macedonia , quæ duobus inclita regibus Philippo & Alexandro , Græcia Thraciaque subacta , imperium protendit in Asiam , Armeniam , Hiberiam , Albaniam , Cappadociam , Syriam , Ægyptum , Taurum , Caucasum subiugavit , hæc in Bactris , Medis , Persis dominata , toto Oriente possessa , Indiæ quoque victrix per vestigia Liberi patris atque Herculis signa circumtulit. Hæc eadem nostra ætate spurcissimæ Turcorum genti subiecta , tributum pendere , jugum ferre miserrimum cogitur. Magnesiæ quoque ac Thessaliæ nostro tempore Turcorum arma inuasit. Nobilissimi montes Olympus , Pieris , & Ossa. Pyndus insuper , & Othris Laphitarum quondam sedes , Turcorum imperio parent , penes quos quinque & septuaginta vrbes fuisse olim Plinius affirmat. Totum Peneum Turci possident , inter flumina Thessaliæ clarissimum , juxta Gomphos hic fluuius oritur , inter Ossam & Olympum nemorosa conualle defluens : quingenta ferme stadia percurrit , dimidio eius spatii nauigabilis. In eo cursu Tempe vocant : quinque millia passuum longitudine ultra visum hominis attollentibus se dextra læuaque leniter connexis jugis , intus sua luce viridante ac labitur Peneus , viridis calculo , amœnus circa ripas gramine , canorus auium concentu , accipit amnem Euroton , nec recipit : sed olei modo supernatantem , ( vt dictum est ab Homero ) breui spatio portatum abdicat : pænales aquas , dirasque guttas argenteis suis miscere recusans. Hæc Plinius de Peneo \*. Tot Christianis bona Turcorum arma eripuerunt : quamuis nostram magis desidiæ inculcauerim. In Thessalia Regem fuisse tradunt nomine Græcum , à quo Græcia dicta sit : Helenum quoque in eodem loco regnasse , à quo Helena nuncupata est. Homerus tribus nominibus Thessalos appellauit , Myrmidonas , Helenas , & Acheos. Hic Termopilarum angustia , Persarum cæde insignes. Quæ licet olim Xerxis impetum tenere , Turcorum tamen armis claudere transitum minime potuere.

## DE BOEOTIA.

POST Thessaliæ Boeotia succedit ab ortu in occasum porrecta : Euboicum mare , Criseumque sinum contingens , Thebarum claritate apud omnes ferme historicos nominata , hæc Musis natale in Eliconis nemore : hic saltus Cytheron , & Hysmenus amnis & fontis Dirce , Arethusa , & Aganyppe. Quæ patria quondam Liberi patris atque Herculis fuit , quæ fortem produxit Epaminondam , non cedens Athenis claritate ciuitas. Ea nostra ætate exiguum castellum Thebarum est , & à Turcis proximis annis cum reliqua Boeotia occupatum.

## CAPUT VI.

## DE HELLENIA.

SEQUITUR Hellas quæ à nostris appellata Græcia : Athen , id est , littus prisca vocauere. Mutato deinde nomine Atticam dixere. Homerus cunctos Atticam incolentes appellauit Athenienses : tum nondum ædificata forent Megara , protenditur autem Attica ex Boeotia vsque Isthmum Corinthiacum , parte sui quæ appellatur Megaris. Circa Isthmum vero vbi columna fuit : in qua hic inerat titulus in parte Peloponnesum spectante : *Hæc Peloponnesus : at non Ionia.* In parte vero Megara intente : *Hæc non Peloponnesus est , sed Ionia.* Idem enim At-



*Athene.* tici & Jones fuere : qui cum de finibus cum Peloponnesiacis sapissime disceptassent, hanc tandem communi consensu columnam erigi obtinuerunt. Atticam quamvis saxosam & sterilem, plerique tamen mirificis laudibus extulerunt, Deorumque domicilium esse dixerunt, loca ipsa possidentium & parentum Heroum. In hac ciuitas Atheniensis quondam nobilissima fuit, nullius indigna præconii: tanta eius superfluit claritas. Eadem nostro tempore parui oppidi speciem gerit. In eo tamen saxo, quo vetustum Mineruæ templum fuit, Arx est per omnem Græciam nominata, cum operis magnitudine, tum difficultate oppugnationis: hanc Florentinus quidam Mahometi tradidit, cum imploratis Latinorum auxiliis nullius opem inueniret. Rura ei ob eam rem tradita, in quibus ævum ignobile ducat.

## CAPUT VII.

## DE PELOPONNESO, ET ATTICA.

*Isthmus.* PELOPONNESVS Atticæ jungitur totius Græciæ arx quondam dicta. Nam præter habitantium in ea gentium nobilitatem atque potentiam, ipse locorum situs principatum designat & imperium. Multi sinus insunt & promotoria multa. Insignes etiam & permagnæ Chersonesi, ipsa locorum varietate jocundæ, formam eius platani folio simillimam dixere, longitudine ac latitudine ferme parem. Ab P. 54. occasu in ortum stadiorum mille 400. perimetros siue ambitus omiſſis finibus (vt Polybio placet) stadia quatuor millia continet. Arthemidorus 400. superaddit: cui & Plinius consentire videtur, Isidorum autorem secutus. Idem duo maria terram ambire dicit, Jonium & Ægeum angustiae vnde protendit, Isthmos appellantur: quinque millia passuum latitudinis continentes, has angustias perfodere Demetrius Rex, dictator Cæsar, Caius princeps, Domicius Nero, infauſto (vt omnium exitu patuit) incepto tentauerunt. Hic Corinthus nobilis Colonia fuit. Græci principes postquam Turcorum potentia in Europam penetrauit, ex mari ad mare producto per angustias muro Peloponnesum à reliqua Græcia distinxerunt. Murum Examilium appellauere, hanc prouinciam hodie Moream latini vocant. In ea Achaia continetur, Messenia, Laconia, Argolis, & Arcadia, quæ medium peninsulæ obtinet. Amurathes expugnata Theſſalonica, subacta Boeotia, & Attica, præter Athenas, ad Examilium vsque profectus, perterritis Græcis diruit Murum, tributumque annuum deditibus se Peloponnesibus imperauit. At cum Hungari instante Juliano Cardinali sancti Angeli aduersus Turcos arma sumpsissent, confectisque nonnullis feliciter præliis amplius instarent, vrgerentque hostes, Constantinus qui postea apud Constantinopolim imperauit ibique necatus est (vt ante diximus) huius prouinciæ Despotus animo auctus, & negare Turcis tributum, & Examilium instaurare non dubitauit. Ob quam rem magna deinde pecunia mulctatus est, Examilium denuo destructum, cum victor Amurates apud Varnam Hungaros deleuisset. Deuicta Constantinopoli Albani, qui plures Peloponnesum incolebant, sumptis armis Demetrium & Thomam Constantini fratres regno deicere annexi sunt, nobilem quendam Græculum ad regium fastigium assumentes. Vtraque pars Mahometis auxilium implorauit. Illi nobilior pars visa iustior: auxilia aduersus Albanos Demetrio fratrique tradita: Albani subacti, prioribus dominis paruere Mahometi 15. millium aureorum tributum pensum. Thomas quamvis hæreditario iure Imperatorem se dicere posset, cuius maiores longa serie Græcorum nomini imperauerant, metu tamen Mahometis titulo abstinuit. Cum Calixtus pont. max. Christianos principes in sui pontificatus initio aduersus Turcos inuitaret, existimauit Thomas Turcorum imperium procul dubio ruiturum; Mahometique tributum negauit. Cum vero non tam magnifica facta quam verba esse animaduertit, persoluto tributo & adiectis donis Mahometi reconciliatus est. Nunc vero (si vera est fama, quæ per hos dies allata est) violatæ fidei maiorem subire poenam compulsus, Mahometi prorsus subiectus est, Peloponnesus tota Turcorum imperio adiecta. Egredienti Peloponnesum per angustias Isthmi ad reliquam



liquam Græciam, Strabo & Plinius occurrere Atticam tradunt, Ptolomeus Achaïam: cuius fines hoc modo describit, ab occasu Epyrum, à septentrione Macedoniam & partem Ægei pelagi collocat, ad orientem eiusdem maris terminos ponit usque ad Sunium promontorium, ad meridiem Adriaticum pelagus iuxta littus, quod Achelous amnis irrumpit in Corinthiaco sinu. Quod si ita est, Atticam, Bœotiam, Phocidem, Thessaliam, Magnesium, Ætholiam, & Acarnaniam Achaia ipsa complectitur. Idem tamen Ptolomæus alio loco mediterraneas Peloponnesi ciuitates enumerans, Elicem, Buram, Helenam, Pheream in Achaia esse dicit: & propriam esse Achaïam intra Peloponnesum affirmat. Nobis qui pro nostri operis instituto res Peloponnesiacas & Atticas breuiter absoluiamus, & ad occidentem festinamus, Acarnania prior occurrit inter Epyrum Bœotiamque protensa: cui Ætholia vel coniuncta vel commixta esse videtur, hæc hodie Ducatus appellatur. Acarnania.  
Ducatus. Johannes Vintimilius natione Siculus filiam suam Despoto Acarnaniæ in matrimonium dedit, exin vexantibus Acarnaniam Turcis, ac generum obsidentibus, cum paruo equitatu mare traiecit, obsessores inuasit, stragemque memoratu dignam edidit, nam parua manu ingentes fugauit copias, salutemque genero peperit. Qui tamen paulo postea per insidias captus à Turcis regnum amisit: Epyrum tamen adhuc eius nomine teneri ferunt.

## CAPUT VIII.

## DE EPYRO.

**E**PYRVS in occidua parte ab Acrocerauniis montibus incipit, protenditurque versus orientem usque ad Ambracium sinum per stadia 1300. Septentrionalem eius partem Ptolomæus Macedoniæ coniungi tradit. Orientale Achaïæ usque ad hostia fluminis Acheloi, occidentale latus Jonico excipi pelago asserit. Strabo p. 55. Ausonium hoc idem mare appellauit. In Epyro XIV. fuisse gentes Theopompus tradidit, quarum celebratissimæ Chaones & Molossi: Regnum enim quandoque tenere prius quidem Chaones, posterius Molossi: qui propter Regum cognationem, ex Æacidarum sanguine prognati mirum in modum amplificati fuerunt, penes quos Dodonæ vetus oraculum ac nobile viguit. Oram huius terræ maritimam felicem atque vberem tradidere, multæque olim vrbes & oppida munitissima in Epyro fuere. Sed propter populorum rebelliones, qui cum Romanis contenderunt, prouincia vastata est, septuaginta enim Epirotarum vrbes à Paulo Æmilio imperatore funditus euerfas esse, auctor est Polybius, victis Macedonibus & Perse rege superato: Ex quibus maximum numerum viris Molossorum extitisse, & mortalium CL. millia in seruitutem redacta. Plinius Veronensis hanc cladem Macedonibus attribuit, duasque vrbes ruinæ adiecit. Credo quia Macedones Epyrotarum imperium obtinebant, vtramque gentem vno nomine Plinium comprehensisse. Apud Epyrum Ætiaca pugna late memorabilis commissæ est, in qua Cæsar Augustus Marcum Antonium nauali prælio vicit, & simul Ægypti reginam Cleopatram (nam & ipsa huic certamini præsens interfuit) ob quam rem victor Augustus in Ambracio sinu urbem condidit, eique vocabulum indidit Nicopolim, id est, victoriæ ciuitatem. Ambrachii sinus ostium pauloquam stadia quatuor maius est. Circuitus stadia CCC. amplectitur: optima omni ex eius parte statio. Ingredientibus occurrebant olim à dextra habitantes græci Acarnanes, & Apollinis Actii templum quodam in tumultu ad hostium eminens, cui campus subiucuit, lucumque habens & naualia, in quibus Cæsar vnde viginti naues decimarum nomine reposuit ab vno remorum ordine usque triremes \* adiungens. Sinistra vero Nicopolis est, & Epyrotarum Colonia Cassiope: nostra ætas Epyrum Artam appellat. Circa littus eius paucis ante annis præfectus regiæ classis nomine Villamarina \* triremes Venetorum infecutus comprehendit, atque incendit. In eodem littore apud Acrocærauneos montes finiri Adriæ vel Adriatici maris nauigationem, & Jonium incipere

\* al. deciremes.

\* al. Wilbelmus Marinus.



incipere pelagus, Straboni visum est: apud quem mare Ausonium idem quod Jonium esse apparet, cum Epyri oram Ausonio ablui pelago affirmet.

## CAPUT IX.

## DE ALBANIA.

*Camusa.* **Q**UÆ nunc Albania dicitur, olim Macedoniae portio fuit, ad occidentem versa, in qua Dyrachium & Apoloniam fuisse prodidimus, non incelebres prisco sæculo ciuitates. Sermo genti neque Græcis neque Illyricis notus. Credimus hoc genus hominum ex Albania quondam venisse, quæ vicina Colchidi in Asiatica Scythia memoratur: ut sæpe Barbarorum inundatio nationum Græciæ atque Italiae prouincias occupauit. In hac terra potens Camusa fuit: qui Christianis parentibus ortus, parum tenax catholici fidei, ad Mahometis insaniam declinauit. Sed quam leuiter Christum deseruit, tam facile Mahometis sacra contempsit. Rediit enim ad paternam legem, & quamuis vtramque religionem contempserit, neutri fidus; Christianus tamen mori quam Turcus maluit, paulo post Constantinopolitanam cladem morbo extinctus. *Scanderberg.* Georgius Scanderbechius eius hæreditatem accepit, nobili loco natus, qui ætatem pene omnem in armis pro Christi nomine pugnando consumpsit, multas & magnas Turcorum turmas bello vicit atque deleuit, solusque quodammodo regionem illam in Euangelio Christi continuit: quamuis hodie totiens hostili ferro petita magna ex parte deferta feratur. Rex Alfonso sæpe milites in Albaniam misit, & Troiam urbem in potestatem receptam à Turcis defendit. Nepos Scanderbechi ex fratre, cum Turcorum patri fauens insidias patruo moliretur, ab eo captus, & ad Alfonso missus in carcerem coniectus est. *Valonia.* Calistus quoque Romanus pontifex in auxilia pecuniaria Scanderbechio non pauca misit. Valonia in Albania non magna ciuitas est, in portu maris sita: qua breuissimus est in Italiam tractus. Hanc Baiazetes primus ex Turcis occupauit, rebellantem Amurates recuperauit. Nescio quod malum minatur Italiae.

## CAPUT X.

## DE ILLYRICO.

**P**OST Albaniam Illyricæ sequuntur gentes ad occidentem septentrionemque versæ: hoc genus hominum nostra ætas Sclauos appellat, & alii Bosnenses, alii Dalmatæ, alii Croatii. Histri, Carnique nuncupantur. Bosnenses introrsus ad Pannoniam vergunt, septentrioni expositi. Reliqui adiacentes mari ad Timauum vsque fontes protenduntur, hinc Ausonium, illinc Pannoniam intuentes. Timauus p. 56. autem in intimum Adriatici maris sinum excurrit: cuius fontem matrem appellari maris Strabo prodidit. In Bosna rex gentis Dispotus Stephanus nomine (sic enim Reges appellare suos consueuere) quamuis Christi religionem sectaretur, diu tamen Baptismi Sacramento abstinuit. Sed anno superiore vocato ad se Joanne Cardinali sancti Angeli (cuius sæpe meminimus) ab eo baptismatis vnda perfusus, & sacris nostris rite initiatus, Turcis, quibus tum fœdere iunctus erat, bellum indixit. Nunc paululum nutare affirmatur. In hac regione quamplurimum Hæretici possunt, quos vocant Manichæos: pessimum genus hominum, qui duo principia rerum produnt, alterum malorum, alterum bonorum. Nec primatum Romanæ Ecclesiæ tenent, neque Christum æqualem consubstantialemque patri esse fatentur. Horum cœnobita in abditis montium conuallibus sita feruntur: in quibus ægrotantes matronæ seruituras sanctis viris, si euaserint, ad certum tempus DEo vouent: redditæ sanitati, permittentibus viris, vota persolvunt, promiscue inter monachos præfinito tempore viuentes. Hanc labem nulla sedis Apostolicæ decreta, nulla Christianorum arma delere potuerunt. Sinit ad nostram exercitationem regnare Hæreticos DEus.



## CAPUT XI.

## DE DALMATIA, CROATIA, LIBURNIA.

**I**N Dalmatia Ragusæos magnis affecit cladibus Stephanus, inter Bosnenses & Dalmatas ducatum possidens, & Manichæorum veneno infectus: qui & si Christianos per insidias captos sæpe Turcis venundauerit, mittere tamen oratores Romam, & auxilia sedis Apostolicæ petere non erubuit: eius belli sumptus ex Christianis petens, quod gesserat in Christianos. Nec defuere, qui tam impiis verbis aures accommodarent.

In Croacia mulier Australis, quæ nuptias Comitis, cum esset inferior sanguine, morum præstantia & formæ elegantia meruit; dum laxandi animi gratia ex castello in castellum obequitat; subito Turcorum interuentu capta, & apud eos aliquamdiu detenta, impatientia tandem mariti non paruo auro redempta est.

Quærat fortasse aliquis, vbinam Liburniam dimiserimus, quam permeasse Anthenorem Italiam petentem insignis poeta commemorat. Confusi sunt admodum prouinciarum fines, nec expedire noua facile est: nedum quis vetustissima possit absolvere. Plinius Liburniæ finem initium esse Dalmatiæ dixit, & Tragurum marmore notum in ea esse. Salonam quoque Coloniam, quæ ab Iadera C. & XII. milibus passuum abfuit: Iaderam vero C. LX. à Pola distare. Ex quo fit vt inter Croatinos & Dalmatas Liburni sedes habuerint, forsitan & Croatini novum gentis nomen, Liburnorum loca inuaserunt. Nobis hæc indicasse sufficiat. Si quis certiora desiderat, priscos euoluat auctores. Ptolemæus Liburniam & Dalmatiam atque Illyridem simul confundit: & Illyridi quidem à septentrionali plaga Pannoniam occurrere dixit, ab ortu superiorem Mysiam, ab occasu Histriam, à meridie Macedoniam & Adriaticum littus.

## CAPUT XII.

## DE HISTRIA SIVE SCLAVONIA.

**H**ISTRIAM veteres Italię partem tradiderunt: in qua Parentium & Pola est, & Iustinopolis, quam caput Histri vocant. Inconuenienter Italię tamen iungitur, Adriatico sinu disiecta, & in peninsulæ modum circumdata mari, qua continenti applicatur à tergo, lapidea est & montanea regio, quam prisca Albiam <sup>\* al. Albaniam.</sup> vocauerunt. Plinius Histriam adhærere Liburniæ dixit. Ex quo palam fit Croatinos Liburnorum loco succedere. Histriam ab Histro amne dictam ferunt; quem à Danubio in Hadriam fluere falso credidere. Cui errori & Pomponius Mela & Nepos Padi accola aures adhibuit. Nullus enim ex Danubio amnis in Adriaticum effunditur mare. Argonautarum eos fabula decepit: quos per Histrum ex mari Pontico in Histriam vectos memoriæ proditum est. Sed constat eos ex Histro in Sauum aduerso flumine nauigasse: deinde Nauportum, quem Labacum hodie appellari putauerim: cuius paludem Lugeum Strabo appellat. Ex Nauporto veto per montes humeris vecta nauis in Adriaticum peruenit. Histri hodie Sclauī sunt: quamuis maritimę vrbes Italico sermone vtuntur, vtriusque linguę peritiā habentes, pars prouinciæ melior ea, quæ maritima Venetorum imperio subiecta est: mediterraneam domus Austriæ possidet. Oppidum sancti Viti, quod ad flumen Titum <sup>\* al. Titum.</sup> situm est, Valenses habent: ex quo loco ad Aquilegiā M. stadia esse Tuditanus, qui domuit Histros, tradidit, finem Italiæ Musiæ fluvium tradidere. In hac terra nihil ætate nostra memoria dignum gestum esse accepimus: quam quod Australes & Venetos magna de finibus contentio agitauerit, & vtriusque partis subditi armis contenderint: ad quas lites componendas nos aliquando ab Imperatore missi, quamuis inducias belli fecimus, & novos terminos constituimus, vniuersam tamen litem amputare nequiuimus.



## CAPUT XIII.

## DE CARNIS.

CARNI, inter quos lapides enumerantur, Histros sequuntur. Sclavi tamen, quorum sermo regionem obtinet, Carnes bifariam diuidunt, duplicem Carniolam esse dicentes. Alteram siccā & aquarum indigam, in qua Histros ponunt & Tarsos, qui medios inter Labacum & Tergestum incolunt montes, & ad Timavum vsque proferuntur: Alteram irriguam, in qua flumen Savus ortum habet, & Nauportus (qui Labacus hodie appellatur) & alii plures fluvii. In hac prouincia dum Fridericus Imperator coronam regni Teutonici apud Aquensem ciuitatem peteret; Vlricus comes Ciliæ, & Albertus Imperatoris frater, coniunctis viribus Labacum insigne oppidum, ex flumine cui adiacet dictum, obsidione cinxere, diuque machinis omnis generis oppugnauere: sed à Friderici militibus non sine clade repulsi, & castris exuti, diuitem suppellectilem perdere, hoc oppidum Sclavi & Itali Lublanam vocant, ex Lugea palude sumpto vocabulo.

## CAPUT XIV.

## DE CARINTHIA.

Archidux  
Austria.  
Dux Carinthia.

CARINTHIA montana & ipsa regio, Carnis applicatur, ad ortum ac septentrionem Stiriaë juncta, ad occasum ac meridiem alpes Italas & Forum Iulii contingit. Multæ in ea vallis collesque feraces tritici, multi lacus multi amnes, quorum præcipuus Davus: qui per Stiriam ac Pannoniam in Danubium fertur, haud inferior Sauo, imperium prouinciæ Australes obtinent, & Archiducem appellant, cui ea regio paret. Quotiens novus princeps reipublicæ gubernationem init, solennitatem nusquam alibi auditam observant. Non longe ab oppido sancti Viti in valle speciosa vetustæ ciuitatis reliquiæ visuntur: cuius nomen temporis aboleuit antiquitas. Juxta in pratis late patentibus marmoreus lapis erectus est, hunc rusticus ascendit, cui per successionem stirpis id officium hæreditario jure debetur. Ad dexteram bos macer nigri coloris adstat: ad sinistram pari macie deformis equa, frequens circa eum populus & omnis rustica turba. Tum Princeps ex aduersa pratorum parte procedit: purpurati circum proceres ambiunt. Vexillum ante ipsum, & insignia principatus. Comes Goritiæ, qui palatii curam gerit, inter duodecim minora vexilla præcurrit: reliqui magistratus sequuntur. Nemo in eo comitatu non dignus honore videtur, nisi princeps ipse præ se rustici speciem ferens. Agrestis ei vestis, agrestis ei pileus, calceusque & baculus in manu gestatus pastorem ostendit, quem postquam rusticus ex lapide venientem conspicatus est, sermone Sclauonico (sunt enim & ipsi Carinthiani Sclavi.) *Quis hic est, in- clamat, cuius tam superbum incessum video.* Respondent circumstantes, *Principem terra aduentare.* Tum ille: *Iustus ne iudex est, salutem patriæ querens, liberæ conditionis dignus honore? est ne Christianæ cultor fidei ac defensor.* Respondent omnes: *Est & erit.* Rursus ille: *Quæro igitur, quo me jure ab hac sede dimoveat.* Ait Goritiæ comes LX. *denariis abs te hic locus emitur: Jumenta hæc tua erunt, bouem atque equam ostendens. Vestimenta quoque principis, quæ paulo ante exiit, accipies: eritque domus tua libera & absque tributo.* Quibus dictis rusticus leui alapa principi data bonum iudicem esse jubet: & surgens jumenta que secum ducens, loco cedit. Princeps vero consensu lapide; nudum gladium manu fibrans ad omnem se partem convertit, æquum iudicium populo promittens. Ferunt & aquam frigidam rustico allatam pileo bibere, tanquam vini vsum damnet. Deinde ad ecclesiam Solennensem \* pergit: quæ in propinquo tumulo sita est, sanctæ Mariæ vocabulum habens, & olim pontificalis fuisse traditur: vbi peractis sacrificiis Princeps rustica indumenta deponit, paludamentumque induit: Conuiuatusque splendide cum proceribus in prata reuertitur, ibique pro tribunali sedens jus petentibus dicit & feuda confert. Fama est anno DCC. nonagesimo post Christi Saluatoris

\* al. Solien-  
sem.



p. 58. vatoris ortum, imperante Carolo Magno ducem gentis Ingonem \* nomine ingens \* al. Igonie.  
 conuiuium prouincialibus præparasse, & agrestibus quidem ad conspectum suum  
 intromissis in vasis aureis atque argenteis, nobilibus vero ac magistratibus \* procul \* al. magna-  
 ab oculis collocatis fictilibus ministrarunt iussisse. Interrogatum cur ita faceret, <sup>tibus. Vide</sup>  
 respondisse; *Non tam mundos esse, qui vrbes & alia palatia, quam qui agros & hu- fragmentum*  
*miles casas colerent. Rusticis qui Christi euangelium acceperant, baptismatis unda historie vetus,*  
*purificatis; candidas & nitidas esse animas: nobiles ac potentes, qui spurcicias Idolo- apud Fluc. in*  
*rum sequerentur, sordidas ac nigerrimas. Se vero pro animarum qualitatibus instru- catal. test. verti.*  
*xisse conuiuium.* Castigatosque ea re nobiles, cateruatim sacri baptismatis undam fol. 122.  
 quærentes, breui tempore sub Virgilio & Arone Juvauiensibus episcopis vniuer-  
 sos Christi fidem acceperant. Hic honos inuestiendi principis rusticitati datus. Fuit  
 autem Dux Carinthiæ venator Imperii, ad quem lites venatorum omnium defere-  
 bantur. Vocatus in iudicio coram Imperatore, querelantibus non nisi Sclauo-  
 nica lingua respondere tenebatur. Multa huius Prouinciæ ornamenta fuisse com-  
 memorant, multa priuilegia. Facile id creditum est: quando Imperatorem Lu-  
 douicum eius terræ ducatum filio suo Arnolpho primogenito contulisse non est  
 ambiguum. Est & alia prouinciæ huius consuetudo in oppido quod Clagesfurtium <sup>Clagesfurt.</sup>  
 appellant contra fures durissima. Si quis in furti suspicionem inciderit, mox ca-  
 ptus laqueo suspensus vitam finit. Sumpto supplicio post triduum de suspicionem ju-  
 dicant, si reum fuisse necatum inueniunt, pendere cadauer infame sinunt, donec  
 sua sponte consumptum decidat: sin vero, depositum in cœmiterio condunt, ju-  
 stumque funus è publico faciunt: & animæ gratas exequias. In hac prouincia Comes  
 Goritiæ Henricus, \* vir muliere corruptior, impuberes filios media nocte ad po- \* al. Vlricus.  
 tum surgere compulit, increpitans qui sine siti somnum agerent. Cum pastori-  
 bus ac rusticis sæpius quam cum nobilibus diuersatus est, senex super glacie cum  
 pueris lusit. Inter vulgata scœrta frequentissime lauit: raro in aula præsumptus est:  
 solus coquum adiens offulas in ipsa popina \* vorauit. Vestes induit viles ac per- \* al. coquina.  
 unctas: pectus nudum & apertum ostendit, oculi semper lachrimantes fuere.  
 Quem cum aliquando ad se venientem Fridericus Imperator ex fenestra intuitus es-  
 set, me vocitans, age, inquit, *Ænea principem qui ad nos properat contemplare, si*  
*quem mundior pulchrioremque videris aliquando, effare.* Mihi cum satis princi-  
 pem comitesque considerassem, foeda rusticitas visâ est, quæ dominatum assécu-  
 ta egregiam nobilitatem seruitio premeret. Huic vxor natione Hungara, forma  
 præstanti, \* & audita plusquam viri vincula indidit: mox Vlrici comitis Ciliæ au- \* vide auctor.  
 xilio liberatus, vxorem domo pepulit. Nec diu post vita functus, filios bonæ in- epist. 54.  
 dolis adolescentes & matri quam sibi similes reliquit hæredes.

## CAPUT XV.

## DE STIRIA.

STIRIA, quam quondam Valeriam inuenio nuncupatam, ad orientem Pannoniae jungitur: latus eius septentrionale Austriam respicit, ad occidentem ac meridiem Carnis ac Carinthianis occurrit. Eadem quoque montana prouincia est, quamuis in orientem porrecta planities non paruas habeat. Dravus ac Mura insignes fluvii terram irrigant: Mura in Dravum exoneratur, ille in Danubium. Urbium populi plerumque Teutones, Sclavi qui citra Dravum rura colunt. Imperium Australis familiæ est, in ea vetus oppidum, quod Ciliam vocant. Nonnulli Syllacem \* appellatum quondam existimant, & opus fuisse L. \* al. Sillarium.  
 Syllæ, de qua re nihil nobis exploratum est. Multæ ibi vetustatis reliquiæ visuntur, & Romanorum nomina principum sepulchralia marmora referunt, in eo præfuit ætate nostra Fridericus comes: qui cum esset in libidinem pronissimus, <sup>Cilia comi-</sup>  
 & olim Veronicæ concubinæ incensus amore, legitimam coniugem ex comitibus <sup>tatus.</sup>  
 Croatiæ natam sua manu interemisset, concubinam vero pater eius Hermannus  
 (vt est potentum iustitia) in profluentem demersisset; vxores passim maritis ab-  
 stulit,



Vide huc au-  
thoris epist.  
253.

stulit, puellarum greges in palatium rapuit, provinciales pro mancipiis habuit, Ecclesiarum bona diripuit, monetarum falsatores, veneficos, ariolos, nigromantas undique ad se concivit: & quamvis anno Iubilei iam nonagenarius indulgentiarum causam Romam petisset, reuersustamen nihilo melior visus est. Interrogatus, qui sibi Roma profuisset in pristinos mores relapso: *Et Calceator meus*, inquit, *ad consueudas ocreas post visam Romam rediit.* Huic victa functo Vlricus filius successit per cætera similis, ingenio tantum & eloquentia maior. Quo (sicut dictum est interfecto) quatuor & viginti competitores hæreditatis fuere: ut qui viuens undique bella conciuerat, moriens quoque seditiones excitaret. Sed optimates terræ possessionem Friderico Imperatori tradendam censuerunt, ea lege ut competitoribus secundum provinciae consuetudinem in iudicio responderet. Relicta Vlrici armis defendere quæ possidebat, decreuit. Fridericus manu potenti quum plura castella obtinuisset, in Cilia tandem receptus est, arces loci tradente Ioanne Viconitio natione Bohemo: qui cum fuisset magister militiæ comitis, accepta Cæsaris pecunia, à coniuge eius defecit. Sed mox poenitentia ductus, grande ausus & inexpiable facinus tanquam scelus scelere redempturus, Impetorem iam sibi securum, & cum paucis Ciliæ morantem, nocte concubia intercipere aggressus est. Corruptis namque oppidanorum plerisque, qui sibi aduenienti partem oppidi traderent, hora constituta cum octingentis equitibus intromissus cuncta miscere armis cepit. Affuit diuina pietas Friderico, quæ illi præter consuetudinem in arce superiore, & natura & humano opere munitissima, ea nocte dormiendum suaserat, proceres qui remanserant in oppido, capti omnes: inter quos & Iohannes Vngnadius, cunctis Stiriensibus opulentior, cum Georgio fratre abductus est: nec Vlrico Austriæ cancellario, quamvis esset Episcopus, & ad ecclesiam confugisset, parsum est, Usque adeo apud homines nostri sæculi diuina & humana iura perierunt. Traditori Bohemo, diuiti spolio locupletato, non defuerunt ex illo tempore adiutores. Fama est, eaque celebris, inter Stirienfes nobilem quempiam fuisse, cui sæpe in animum ceciderit, seipsum laqueo suspendere. Id ægre ferentem ex docto quodam viro remedium petiuisse aduersus eam tentationem. Consilium datum, proprium uti sacerdotem conduceret, qui sibi manenti in arce quadam solitaria singulis diebus rem diuinam faceret: paruisse nobilem atque in annum ferme continuasse, nulla suspendii cogitatione interueniente. Postremo rogatum à Sacerdote, ut presbytero vicino, qui dedicationem Ecclesiæ in proximo monte habiturus esset, auxilio esse posset: licentiam dedisse: proponentem in animo paulo post sequi, & sacris interesse. Stetisse diu postea, nunc una, nunc altera causa retentum. Denique circa meridiem profectum, agresti cuidam in nemore occurrisse, qui rem diuinam in monte peractam esse, & populum omnem abiisse diceret. Contristatum eo nuncio nobilem, infœlicemque se esse dicentem, qui eo die sacrum Christi corpus non vidisset, agrestem consolari coepisse: *Venditurum, si vellet nobilis emere, premium quod interessendo diuinis meruisset*: Sagumque nobilis petiuisse precii nomine. Venditione facta, nobilem nihilominus montem ascendisse, atque orasse in templo. Reuersum autem, in proxima arbore suspensum agrestem inuenisse: sed postea diris cogitationibus haudquaquam vexatum fuisse. In hac provincia decoctum sal ad vicinas regiones importatur. Ea & ferri mineras locupletes habet, & argenti fodinas non ignobiles: quamvis incuria Principum argentum haud multum effodiatur.

## CAPUT XVI.

## DE AVSTRIA ET IN EIVS VIENNA.

*\* Vide au-  
thor. epist. 565.* AVSTRIAM describere hoc loco necessarium existimamus, de qua propriam historiam \* edidimus. Breuibis tamen situs eius absoluetur: hoc enim tempore diuisa est terra limitibus. Austria olim Pannonia superior dicta, ab Oriente habet



habet Hungariam, ab occidente Bauariam; septentrionem eius Bohemia & Morauia terminant: ad Austrum vero montes Stiriae, qui longo tractu ab Alpibus deriuantur. Latitudo eius trium aut paulo minus diatarum: longitudo vero duplo maior. Terra nobilis, aquis irrigua; vitibus confita, ligni copiosa, agro feraci, piscibus plena: vino adeo exuberat, ut Bohemis, Morauis, Slesiis, Bauaris in dando vino satisficiat, exindeque quam maximas opes colligit. Danubius eam mediam secat fluuius omnium Europae maximus, inter praecipuas eius civitates est Vienna Pannoniorum maximum emporium, olim Flavium appellata, ambitu murorum duum millium passuum: cingitur fossatis, propugnaculis, turribusque, & maximis suburbiis decorata, principum Austriae praecipua & dignissima sedes. In ea provinciales post obitum Alberti Caesaris Friderico se commiserunt, ea lege, ut si masculum praegnans regina pareret, tutor eius esset: si foeminam, terrae dominus. Nato (ut praedictum est) Ladislao tutelam eius Fridericus accepit. Milites qui sub Alberto meruerant, cum stipendio se fraudatos dicerent provinciam latrocinis ac incendiis vastauere. Eorum vexatio lxx. millib. aureis à Friderico redempta est, cum Bohemi & Hungari excursiones in Austriam facerent. Ex fororib. Ladislai senior Wilhelmo duci Saxoniae nupsit. Ioannes Huniades cum regni Hungariae coronam à Friderico frustra repetisset, cum duodecim millib. equitum ingressus Austriam, omnem agrum inter Viennam & Stiriae montes diripuit atque incendit. Petentem Italiam Caesarem rogaverunt Austriales, uti Ladislaum qui iam propemodum adoleuisset, in paterna hereditate apud se dimitteret. Reiecta petitione, auctoribus duobus Vlriscis, altero Ciliae comite altero Eyzingero, sumptis armis rebellauere. Redeuntem ex Italia Fridericum apud novam civitatem obsidione cinxere: quibus & Henricus Rosensis natione Bohemus cum cc. equitibus & mille peditibus sese adiunxit. Et quamuis à Nicolao Pont. Max. iussi essent, ne tutelam Caesaris impedirent; contemptis Apostolicae sedis mandatis, & tantae maiestatis auctoritate derisa, sceleratum propositum tenuere. Docta eo tempore Viennensis schola indoctam sententiam protulit: *que per appellationem ad futurum Concilium interponendam, suspendi posse Romani praefulis mandata rescipit.* Civitas Viennensis, & omnis Austria ex eo tempore semper in armis fuit, temeratae religionis poenas pendens. Cessit furenti populo Fridericus pupillumque adhuc tenerum ea lege in manus Comitis Ciliae tradidit, ut conuocatis ad urbem Viennam vtriusque partis consanguineis & amicis, de tutela, de oppidis, deque caeteris contentionebus, principum qui vocati convenissent, arbitrium diffiniret. Ladislaus summa populorum alacritate apud Viennenses exceptus, cuncta ex voluntate Comitis administravit. Ad constitutum diem concilii Ludouicus Bauariae, & Wilhelmus Saxoniae duces, Albertus quoque Brandenburgensis, Carolus Badensis marchiones conuenere. Tum multi ex Bohemia, plures ex Hungaria barones Imperator legatos misit: quibus & nos adiuncti fuimus, diu de iure partium disceptatum. Sed cum omnia ex arbitrio victoris agerentur, nec leges defenderent, quem arma non protexissent, infectis rebus discessum est. Negata sunt omnia quae promiserant Austriales Imperatori: dictum omne indictum fuit: neque literis neque sigillis auctoritas habita, barbara fide actum. In eo conuentu Ladislaus Ioannem Huniadem, qui sibi regnum à Turcorum inuasionem seruasset, ad principatus honorem euexit: qui suggesto in magno foro apud carmelitas erecto, sede sedens aurea, regali paludamento ac diademate ornatus comitatum ei Bistricensem commisit: quod eo in loco minime licuit. Neque enim Regi Hungariae sub Imperio Romano maiestatem gerere ius est: sed tanta reuerentia Regum, quanta eis per arma siue datur, siue relinquitur. Comes Ciliae, cum Regem quolibet impellit, & ad se cuncta rapiens Eyzingerum Viennensesque contemnit, concubinam quam viro interfecto sustulerat, reginali pene honore dignatur; ex fauore tandem regio cadit, & annitente Eyzingero e curia pellitur: quem in exilium proficiscentem quatuor tantum equites comitati sunt, Alberto marchione Brandenburgensi, ne per contemptum

\* non extat.



à populo lapidaretur, ad portam usque urbis securitatem præbente. Sed quam foeda & miserabilis eius fuga, tam superbus & fauorabilis reditus fuit. Nam post annum cum iam ex Bohemia Rex redisset, suadentibus primoribus Austriæ Baronibus reuocatus, cum mille equitibus argento & auro fulgentibus Viennam repetiit: cui extra portas urbis & Rex ad mille ferme passus exiit obviam, & omnis nobilitas redeunti gratulata est: plebs quoque quæ paulo ante lutum ac lapides in fugientem iactare tentauit, sternere viam floribus, qua redeunti transitus fuit, minime dubitauit. Vt est in vtramque partem immodica, siue amauerit, siue oderit, mira rerum mutatio & ludentis fortunæ iocus. Eyzingerus extra gratiam Regis factus, in Castella sua recedens, Imperatori quem grauiter offenderat, reconciliatus est, nec diu postea adeo superbi erant, qui Ladislai Regis partes sequebantur, ut Nouæ ciuitatis suburbia, in qua Cæsare absente iacebat puerpera Imperatrix, intrare præsumserunt, & urbem expugnare contenderint. Quod ubi non successit, exustis quæ obtinuerant locis abierunt. Fuit sæpe inter Cæsarem & Regem incassum tractata concordia, neque enim comes Ciliæ dum vixit, ex re sua existimauit, vnanimes esse Austriæ principes: at eo mortuo cum Eyzingerus è Boëmia missus ad Cæsarem leges pacis vtrique parti gratas dixisset, & iam quietura propediem Austria videretur: interitus Regis subito nunciatus, non solum concordiam perturbauit, sed magnarum rerum & reipublicæ Christianæ salutarium exorientem spem prorsus abrupit. Australes & à Cæsare & ab Alberto fratre de tradenda gubernatione requisiti, prouincialium conventum habuere: in quo legati Cæsaris seniori Austriæ principi (is erat Imperator) deberi prouinciam dixere. Albertus suo & Sigismundi patruelis nomine regiæ partem hæreditatis exposcens, suasque calamitates & inopiam tanto sanguini alienam referens, commiserationem inducere conatus est. Conventus responsio fuit, *Facturos prouinciales, quod ius equitasque diceret, postquam fratres inter se conuenissent.* Interea latrones trans Danubium in Austriam ad Morauia fluminis ripam munitum locum occupauere, omnemque circa regionem rapinis atque incendiis vexare cœperunt. Aduersus quos profectus Albertus, latrones vi cepit: interfectisque pugnando compluribus, quingentos & quinquata captiuos abduxit, ex quibus LXXX. furca suspendit. Quæ p. 61. res magnum ei apud Australes & nomen peperit & fauorem. Vlricus vero Eyzingerus, cum visitato apud Novam civitatem Friderico Imperatore (cuius parti studebat) Viennam repetisset; vocatus ab Alberto, nihil mali suspicans, fidenter eum adiit. A quo mox captus, in vincula coniectus est, & in privato carcere clausus. Indigna res visa ciuibz: murmurare, damnare omnes factum: nemo tamen auxilium misero afferre voluit. Imperator sæpe rogatus Viennam petere, aliquandiu distulit, veritus ne qua fraus inesset. Interim Sigismundus ex Athesi ad Viennam descendit: deinde ad Novam civitatem profectus, principatus insignia ab Imperatore accipiens, pro veteri consuetudine in eius verba iuravit. In qua solennitate & Albertus affuit. Qui paulo post cum Sigismundo Viennam repetiit. Et ambo aduersus Imperatorem conspirantes, Austriam sibi subigere conati sunt, quorum studia sentiens Imperator, Viennam petere statuit: & accersito Ludovico Bauariæ duce magni nominis principe, eo se contulit, Imperatrice sequente. Appropinquanti urbanus populus obviam perrexerit: Albertus quoque & Sigismundus nobili comitatu extra urbem Imperatorem salutauere. Habebat Albertus tria circiter equitum millia in armis expedita: quæ non longe à Vienna in quodam tumultu Imperatori se ostentauerunt; magnumque metum venienti incussere. Suspicionem auxit Albertus, qui sæpe ad eos profectus ac seorsum locutus, insidias apparasse Cæsari videbatur. Ferunt eius militiæ ducem Alberto dixisse: *Facile, si libet, hodie Vienna te dominum atque Austria facio.* Nam quis prohibet, quo minus Fridericum Imperatorem eiusque comites intercipiam. Innue tantum soluta deinceps hæreditatis quæstio erit. Victori leges atque homines fauent. Subdubitaſſe Albertum aliquantisper, demumque respondiſſe. Poteram ignoscere, si quod ais, me ignorante feciſſes. At mandare turpia non possum. Postquam



quam introgressi urbem sunt Albertus & Sigismundus, in domo quæ Pragensis appellatur, simul habitauere. Imperator priuatas ciuium ædes incoluit. Arx prouincialium nomine custodiebatur. Conspirauere Sigismundus & Albertus, eam noctu aggredi atque irrumpere. Armataque militum manu iter ingressi iureiurando se astrinxere, *Non redituros domum, nisi arcem intrassent.* Sensere ciues: moxque arma fumentes, præsidium in arce maius collocauere. Instabat ciuile bellum, & atrox pugna pro arce. Nec dubium videbatur, quin magno suo malo principes commissuri prælium essent. Stetit diu res in ancipite. Ciuibus tueri arcem stabile propositum erat: ducibus (qui arcem intrare iurassent) turpe videbatur, infecta re domum reuerti. Et vim inferre plenum periculi erat. Postremo conuentum est, ut ingressi Principes arcem, paululum immorati, potato vino exirent: atque ita delusa magis quam impleta religio est. Postridie arx consensu prouincialium in tres partes diuisa: duas accepere Albertus & Sigismundus, reliquam Imperator. Delectique prouinciales sunt, qui lites fraternas dirimant, & summa illis potestas data, sed graue iudicium contra potentes est. Nobilitas & Ecclesiarum principes Imperatori fauentiores sunt: plebs Albertum præfert: *magno se iudice quisque tuetur.* Multa sunt in hoc Cæsare, quæ laudare possis. Corpus egregium, & species Imperatore digna animus sedatus ac tranquillus, ingenium perspicax, memoria tenacior, religionis ardens zelus, ingens cupiditas pacis & ocii. Singularem virtutem in quouis homine diligit dignamque præmio ducit. Ædificat splendide: hortos tamen ac gemmas plus æquo admiratur & amat. Et in rebus gerendis tardior ac remissior est. Tenacem plerique accusauerunt, & ad rem nimis attentum. Id fecere proximi antecessores, Sigismundus atque Albertus Cæsares; quorum prodigalitati cuiusvis comparata liberalitas videri auaritia potest. Cæterum Fridericus nec sua profundit, nec aliena diripit. Verbis factisque temperans. Albertus Frater eius longe dissimilis: celer in aggrendendis rebus, belli ac gloriæ appetens, periculi contemptor, audax, laboris patiens, manu atque ingenio promptus: pecunias inter amicos partitur, ac profundit. Inter opes pauper, in paupertate diues, nullius rei magis quam famæ auarus.

Fridericus III.  
Imp.

## CAPUT XVII.

## DE MORAVIA.

PROCEDENTI per Austriam in Aquilonem Morauæ occurrunt, gens ferox, & rapinarum audax, inter Hungaros Boemosque trans Danubium sita. Hanc prouinciam auo nostro Sigismundus Imperator Alberto genero suo, qui postea imperauit, dono dedit. Rebellantem & imperata facere recusantem Albertus magnis affecit cladibus. Nam supra quingentas villas vna excursione combussit: mortales multos neci dedit, pecus pene omne abegit, iugumque ferre perfidam gentem coegit. In hac prouincia ciuitates & oppida Romanæ Ecclesiæ ritum tenent, & Catholicæ fidei consentiunt. Barones ferme omnes Hussitarum labe infecti sunt. Hic cum verbum Dei prædicaret Iohannes Capistranus, & in errores Hussitarum vehementius inueheretur: Baronis non parui nominis (quem Ezeriah <sup>Exornahora,</sup> horam vocant) secuta conuersio est: qui relicta priore perfidia, cum duobus milibus subditorum, veritatem Romanæ sedis amplexus est. Protasius filius eius doctrina & moribus clarus, non diu postea Olomucensis ecclesiæ pontificatum obtinuit. Ea est unica ciuitas Morauorum Episcopalis. Regnum inter Moravos aliquando fuit latissimum ac potentissimum: quod usque ad filium Suatocopi durauit, cuius fortunam in Bohemica \* conscripsimus historia. At cum filius Suato- <sup>\* Cap. 13.</sup> copi ecclesiam Dei spernere coepit, regnum genti ademptum est: quod postea Romani Cæsares in Boemiam transtulerunt. In hac prouincia cum plura sunt oppida plena populo, & opibus abundantia: inter quæ Prui- <sup>\* al. Prumma,</sup> na \* principatum obtinet, & Znoyma Sigismundi obitu memorabilis. Hac nul- <sup>li tran-</sup>



li transitus patet, nisi armato potentiorique, latronibus omnes aditus obsidentibus, sermo genti mixtus est Teutonicus ac Bohemicus : superant tamen Bohemi, quorum est regionis imperium. Quæ gentes olim Moraviam incoluerint, non facile dixerim. Quantum vero ex lectione Pholomei accipere licet, Marcomanni & Sudini, Candique \* Moraviam & Austriam quæ trans Danubium iacet, incoluisse videtur.

\* Quadique.

## CAPUT XVIII.

## DE SILESIA.

**S**ILESIA post Moraviam sequitur, haud ignobilis provincia, quam fluvius Oderā perlabitur, inter amnēs Germaniæ late cognitus, fontes eius in Hungaria quæ Silesiæ ad orientem iungitur. Mare Baltheum cursum terminat : longitudo regionis c.c. ferme passuum millia continet : latitudo circiter LXXX. stadia ; caput gentis Vratislavia est, amplissima ciuitas, ad ripam Oderæ sita, priuatis ac publicis ædificiis magnifice ornata. Cuius episcopatum maiores nostri aureum vocauere, Hussitarum bella luteum reddidere. In hac urbe, regnante apud Bohemos Wenceslao, orta seditione, Consules (quorum prima potestas est) per fenestras ex prætorio in forum præcipitati, gladiis ac lanceis iratæ plebis excepti, dirum spectaculum præbuere. Cuius rei auctores Sigismundus Imperator paucis post annis securi percussit. Duces Silesiæ multi numero : inter quos paterna hæreditas per capita diuiditur. Hinc scissa multas in partes provincia, frequentes calamitates incurrit, crebris exposita latrociniiis. Inter hos duces unum esse ferunt nomine Bulconem, quem Opoliensem appellant, qui Glogouiæ residens deliciis ac voluptatibus deditus usque adeo insaniuit, vt neque inferos neque superiores esse diceret, animasque cum corporibus simul prorsus interire putaret. Ecclesiam vel nunquam vel raro ingressus est : sacramentis Christianis prorsus abstinuit : nisi quod abusus matrimonio, vxore quæ sibi ingrata esset, relicta, alteram superduxit : quæ ne pellex appellari posset, non nisi per solennia matrimonii coniungi voluit. Silesiæ sub imperio Bohemorum constituti sunt : nunc tamen imperata facere detrectant, Georgium novum Regem admittere recusantes. Wilhelmum Saxonie ducem secuti qui regnum Bohemie ad se pertinere affirmat propter coniugem, quæ Ladislai Hungariæ atque Bohemie Regis soror fuit. Gladius eius litis arbiter erit. Sermo gentis maiori ex parte Teutonicus est, quamuis trans Oderam Polonica lingua prævalet : ob quam rem non immerito quidam hoc in loco Germaniæ terminum esse Oderam putauere, quamuis idem fluvius in Septentrionem vergens Germanicas gentes ripis ambabus alluit. Libet in hac parte Germaniæ linquere fines, & ad orientem ac septentrionem Sarmaticas inuisere gentes.

Vratislavia.

## CAPUT XIX.

## DE POLONIA.

**P**OLONIA vasta regio est : quæ Silesiæ ad occidentem proximat, Hungaris, Lituaniis, ac Prutenis contermina, hic Cracouia est præcipua regni ciuitas : in qua liberalium artium schola floret. Sbigneus huic vrbi præfuit Episcopus, literarum doctrina & morum suauitate insignis : à quo plurimas accepimus epistolas, multo sale & Romana elegantia conditas : cui ob singulares virtutes Romana Ecclesia insigne Cardinalatus honoris, rubentem pileum misit. Ciuitates Poloniæ præter Cracouiam parum nitidæ : ex maceria \* domos ferme omnes componunt, plerasque luto linunt. Plaga regionis nemorosa est, potus genti ceruisia, ex tritico atque humulo factus. Vini rarissimus vsus, p. 63. nec vineæ cultura cognita, ager Cereris ferax, multa genti armenta, multa ferarum venatio : equum siluestrem præter cornua ceruo similem edunt, ferros

Cracouia.

\* al materia lignea.



ros quoque boues venantur, quos prisca Vros vocauere. Pisce ac volucribus abundant: argenti atque auri inops terra: vectigalia Regi parua. Regnum in quatuor partes diuisere maiores; has cum per circulum anni Rex ambit, quælibet pars tribus mensibus Regem ac curiam pascit, quibus exactis ad alteram partem fit transitus. Statuta sunt, quæ præstare prouinciales oportet. Si manserit ultra præfinitum tempus, Rex suo viuere sumptu cogitur. Cum rex gentis patrum nostrorum tempestate obisset, relictam filiam Wilhelmus dux Austriæ in matrimonium accepit, illique regno præfectus est. Non placuit Polonis rex Teutonicus, Vladislaum ex Lituania vocauerunt: eiectoque Wilhelmo coniugem eius & regnum nouo regi tradidere. Gentilis fuerat Vladislaus, & idola coluerat: sed Baptismum cum regno suscipere non recusauit. Conuersus ad Christum, religiosum se principem gessit: multos ex Lituaniis ad Euangelium traxit: Pontificales ecclesias nonnullas erexit: Episcopos magno honore prosecutus est. Inter equitandum quotienscunque tures Ecclesiarum inspexit, detracto pileo caput inclinavit: DEum (qui coleretur in ecclesia) veneratus. Cum Tartaris regni limites infestantibus feliciter dimicauit. Prutenos maximo bello vicit: de quo inter res Prutenicas memorabimus. Ex priore coniuge prolem non sustulit, cum qua matrimonium laud legitimum fuit. Ex secunda jam ferme nonagenaria duo nati sunt filii, Vladislaus & Casimirus. Eo mortuo Vladislaus regnum Poloniæ accepit: Casimirus Lituaniæ ducatum consecutus est: prior patri in regno Poloniæ succedens, ad Hungariæ quoque regnum accersitus, in bello Turcorum (vt ante narratum est) cecidit. Qua re cognita solliciti Poloniæ procures de successore, Fridericum Marchionem Brandenburgensem, qui pueritiam in regno transegerat, linguamque gentis & mores tenebat, vt regnum acciperet rogauerunt. Responsum datum est, *Casimirum Lituaniæ ducem, qui frater esset, defuncti heredem extare. Sciscitari eius animum oportere, cui fraternum, paternumque regnum capiendi impedimentum asserre è dignitate sua Fridericus non duceret*, pari moderatione & Albertus Bauariæ dux erga Ladislaum Alberti filium vsus est, qui Bohemiæ regnum sibi oblatum recusauit. Fridericus quoque Imperator & ab Hungaris & à Bohemis ad hæreditatem Ladislai vocatus, nunquam audire sustinuit: quæ patrueli præiudicium faceret. Ingens laus nostræ ætatis, & magnum decus Germanici nominis: quamuis non ambigo esse aliquos, qui non tam iustitiæ quam ignauiæ tradunt, alienis regnis quempiam abstinere. Ego quod boni speciem habet, non laudare non possum. Casimirus autem & si difficile à Lituaniis dimitteretur, qui suum apud se principem retinere cupiebant; in Poloniam veniens, pacificam regni gubernationem accepit, nec diu postea sororem Ladislai Regis duxit uxorem. Multa ei aduersus fratres Teutonicos, qui sanctæ Mariæ appellantur bella fuere: de quibus in rebus Prutenis referemus.

\* vid. *Auctor. epist. 101.*

*Vladislaus  
R. Polon.*

## CAPUT XX.

## DE LITVANIA.

LITVANIA & ipsa late patens regio, Polonis ad orientem connexa est: palustris ferme omnis ac nemorosa. Witoldus huic præfuit Vladislai frater: qui relicto idolorum cultu, cum regno Poloniæ Christi Sacramentum accepit. Magni Witoldi nomen sua tempestate fuit: quem subditi adeo timuerunt, vt iussu laqueo se suspendere, parere potius quam principis indignationem incidere voluerint, detrectantes imperium insutos vrsina pelle viuentibus vrsis (quos eam ob causam nutriebat) dilaniandos obiecit, crudeliusque aliis affecit suppliciis. Equitans arcum semper tensum gestauit. Si quem conspicatus est aliter incedere quam voluit, confestim sagitta confodit: multos quoque per ludum interemit, sanguinarius carnifex. Vt esset inter populares & ipsum principem certum faciei discrimen, radere barbam omnibus imperauit. Id vbi non successit (facilius enim ceruicis quam barbæ iacturam Lituani ferebant) tonsus ipse mentum & caput produxit:

*Witoldus.*



diit : capitale interminatus supplicium , si quis prouincialium pilos faciei capitisue deponeret. Rex à Sigismundo Cæsare Lituanorum appellatus prius obiit , quam legati diadema ferentes se conuenirent. Successor Suidrigal vrsam nutriuit : quæ sueta ex manibus eius panem accipere , sæpe in filuas vagabat. Redeunti vsque ad thalamum principis ostia quæque patebant. Ibi confricare ac pulsare pedibus ostium , cum fames affuit , consuevit : cui princeps aperiens cibum præbuit. Conspirauere nobiles aliquot adolescentes aduersus principem , atque vrsæ modum secuti , sumptis armis cubiculi principalis januam confricauere. Credit Suidrigal \* vrsam adesse ostiumque aperuit. Ibiq; mox ab insidiantibus confossus interiit. p. 64. Prouinciæ deinde gubernatio ad Casimirum peruenit. Ad Lituanos æstiuo tempore difficilis transitus est , palustribus aquis cuncta ferme obsidentibus : hyems præbet aditum , astrictis gelu lacunis. Mercatores super glaciem ac niuem iter faciunt , plurium dierum cibaria in vehiculo ferentes , nulla certa via : meatus (sicut in mari) siderum cursus ostendit. Rara inter Lituanos oppida , neque frequentes villæ , opes apud eos præcipuæ animalium pelles , quibus nostra ætas Zibellinis Armellinisque nomina indidit. Vñs pecuniæ ignotus : locum eius pelles obtinent : viliores cupri atque argenti vices implent , pro auro signato preciosiores accipiuntur. Matronæ nobiles publice concubinos habent , permittentibus viris : quos *matrimonii adiutores* vocant. Viris turpe est ad legitimam coniugem pellicem adiicere. Solvuntur tamen facile matrimonia mutuo consensu , & iterum atque iterum nubunt. Multum his ceræ ac mellis est , quod siluestres in siluis apes conficiunt. Vini rarissimus vsus , & panis nigerrimus. Armenta victum præbent , multo lacte vtentibus , Sermo gentis Sclauonicus est : latissima est enim hæc lingua , & in varias diuisa sectas. Ex Sclauis enim alii Romanam ecclesiam sequuntur ; vt Dalmatæ , Croatini , Carni , ac Poloni : alii Græcorum sequuntur errores , vt Bulgari , Rutheni , & multi ex Lituanis : alii proprias hæreses inuenere ; vt Bohemi , Morau , & Bosnenses , quorum magna pars Manicheorum imitatur insaniam : alii gentili adhuc cæcitate tenentur ; quemadmodum multi ex Lituanis , idola colentes. Horum magna pars æuo nostro ad Christum conuersa est , postquam Vladislaus ex ea gente Polonia regnum accepit.

\* al. Suidrigal.

Hieronymus Pragensis.

Superstitiones veterum Lituanorum.

Novi ego Hieronymum Pragensem sacris literis apprime eruditum , vitæ mundicia & facundia singulari clarum : qui annos supra viginti in heremo Camalduensium in Apennino Etrusco poenitentiam egit. Hic oriente apud Bohemos Hussitarum hæresi , fugiens pestiferum virus , in Poloniam transiit. Vbi acceptis litteris ab Vladislao rege commendaticiis , prædicaturus Euangelium Christi ad Witoldum principem in Lituaniam penetrauit : multosque populos Witoldi fauore fretus ad salutiferam DEi nostri fidem conuertit. Venitque tandem ad synodum Basilensem , vocatus à Juliano sancti Angeli Cardinali , cum de rebus Bohemicis ageretur : narrabat hic multa de Lituanis , quæ pene incredibilia videbantur. Audiebam ego ex aliis eius dicta , nec mouebam vt crederem , libuit audire hominem , atque ab eius ore lata cognoscere : comites mei fuerunt Nicolaus Castellanus , qui tum Cardinalis Juliani domum regebat ; Bartholomeus Lutimianus Archiepiscopi Mediolanensis scriba ; & Petrus Noxetanus Cardinalis Firmiani secretarius : viri graues & docti. Hominem in cella sua trans Rhenum apud Carthusienses conuenimus : cuius hæc narratio fuit. Primi quos adiit ex Lituanis , serpentes colebant : patresfamilias suum quisque in angulo domus serpentem habuit , cui cibum dedit , ac sacrificium fecit in foeno jacenti , hos Hieronymus iussit omnes interfici , & in foro adductos publice cremari. Inter quos vnus inuentus est maior ceteris , quem sæpe admotum ignis consumere nullo pacto valuit. Post hos gentem reperit , quæ sacrum colebat ignem , eumque perpetuum appellabat. Sacerdotes templi materiam , ne deficeret , ministrabant : hos super vita agrotantium amici consulebant. Illi noctu ad ignem accedebant : mane vero consulentibus responsa dantes , vmbra ægroti apud ignem sacrum se vidisse aiebant , quæ cum se calefaceret , signa vel mortis vel vitæ ostendisset ; victurum ægrotum



ægrotum facies ostensa igni; contra si dorsum ostentasset, moriturum portendit. Testari igitur & rebus suis consulere suadebant, delusionem hanc esse Hieronymus ostendit, & persuaso populo, deleto templo, ignem dissipavit, Christianosque mores induxit. Profectus introrsus aliam gentem reperit, quæ Solem colebat, & malleum ferreum raræ magnitudinis singulari cultu venerabatur. Interrogati sacerdotes, quid ea sibi veneratio vellet; responderunt olim pluribus mensibus non fuisse visum Solem, quem Rex quidam potentissimus captum reclusisset in carcere munitissimæ turris: Gigantem deinde opem tulisse Soli, ingentique malleo perfregisse turrin, Solemque liberatam hominibus restituisse. Dignum itaque veneratu instrumentum esse, quo mortales lucem receperant. Risit eorum simplicitatem Hieronymus, inanemque fabulam esse monstravit. Solem vero & Lunam, & stellas creaturas esse ostendit, quibus maximus Deus ornauit cœlos, & ad utilitatem hominum perpetuo iussit igne lucere. Postremo alios populos adiit, qui siluas Dæmonibus consecratas \* venerabantur, & inter alias unam cultu dignorem putauere. Prædicauit huic genti pluribus diebus, fidei nostræ aperiens Sacramenta: denique ut siluam succenderet, imperauit. Vbi populus cum securibus affuit, nemo erat qui sacrum lignum ferro contingere auderet. Prior itaque Hieronymus assumpta bipenni excellentem quandam arborem detruncavit. Tum p. 66. secuta multitudo alacri certamine, alii ferris, alii dolabris, alii securibus siluam deiiciebant. Ventum erat ad medium nemoris: ubi quercum vetustissimam, & ante omnes arbores religione sacram, & quam potissime Dei sedem esse putabant, percutere aliquandiu nullus præsumpsit. Postremo (ut est alter altero audacior) increpans quidam socios, qui lignum rem insensatam percutere formidarent; eleuata bipenni magno ictu cum arborem cadere arbitraretur, tibiam suam percussit, atque in terram semianimus cecidit. Attonita circum turba flere, conqueri: Hieronymum accusare, qui sacram Dei domum violari suasisset, neque jam quisquam erat, qui ferrum exercere auderet. Tum Hieronymus illusiones Dæmonum esse affirmans, qui deceptæ plebis oculos fascinent, surgere (quem cecidisse vulneratum diximus) imperauit, & nulla in parte læsum ostendit: & mox ad arborem adacto ferro, adiuuante multitudine, ingens onus cum magno fragore prostravit, totumque nemus succidit. Erant in ea regione plures silvæ pari religione sacræ: ad quas dum Hieronymus amputandas pergit, mulierum ingens numerus plorans atque eiulans Witoldum adit, sacrum lucum succisum queritur, & domum Dei ademptam, in qua diuinam opem petere consueverant: inde pluias, inde soles obtinuisse. Nescire jam quo in loco Deum quærant, cum domicilium abstulerint. Esse aliquos minores lucos, in quibus Dii respondere soleant: eos quoque delere Hieronymum velle, qui noua quædam sacra introducens partium morem extirpet. Rogare igitur atque obtestari, ne maiorum religionem & ceremonias auferri sinant. Sequuntur & viri & mulieres, nec se ferre posse novum cultum asserunt: relinquere potius terram & patrios lares, quam religionem a maioribus acceptam dicunt. Motus ea re Witoldus, veritusque populorum tumultum, Christo potius quam sibi deesse plebem voluit. Reuocatisque literis, quas Præsidibus prouinciarum dederat, iubens parere Hieronymo, hominem ex prouincia decedere iussit. Hæc nobis Hieronymus constanti vultu nihil hæsitans, ac per iuramentum affirmavit: dignum fide & grauitas sermonis, & doctrina ostendit, & viri religio. Nos quæ accepimus, immutata retulimus, veri periculum non assumimus: persuasi tamen & nos, & comites ab eo recessimus.

\* al. qui sacram coluere siluam, & quo arbor procerior fuit, eo cultu digniorem putauere.

Luci sacri.

## CAPUT XXI.

## DE RUSSIA.

**R**VTHENI (quos appellare Rosanos Strabo videtur) Lituani contermini sunt: gens barbara, incompta: apud quam opulentam ecclesiam obtinuit Isidorus Cardinalis Sabinensis, cuius supra mentionem fecimus. In hac gente ciuitatem



per maximam esse tradunt, Nogardiam adpellatam : ad quam Teutonici mercatores magno labore perueniunt. Magnas ibi esse opes fama est, & multum argenti pellesque preciosas. Videntesque atque ementes ponderato argento, non signato vtuntur, lapis in medio fori quadratus est, quem qui ascendere potuerit, neque deiectus fuerit, principatum vrbis assequitur, pro ea re in armis dimicant, sæpeque vna die plures conscendisse ferunt : vnde sæpe seditiones in populo emerfere.

## DE LIVONIA.

**L**IVONIA deinde Christianorum vltima prouinciarum, ad Septentrionem Ruthenis iungitur. Tartari eam sæpe incurrunt : in qua nostra ætate magnas acceperunt strages. <sup>Frates Teuto-</sup> Fratres Teutonici ( qui beatæ Mariæ vocantur ) hanc armis <sup>nici.</sup> quasiuere, & Christi sacra suscipere coegerunt, cum esset antea gentilis & Idola coleret. Eam alluit ab occidenti mare Balthicum, quod plerique veterum Oceanum esse putauerunt. Nondum septentrio ( ut hodie ) cognitus Græcis atque Italis fuit. Christiana religio hanc orbis partem nostro generi aperuit : quæ à fortissimis gentibus detersâ barbariâ, mitioris vitæ cultum ostendit. <sup>Balthicum</sup> Balthicus sinus <sup>mare.</sup> adeo late patet, vt incomptæ magnitudinis apud aliquos esse videatur. Origo eius ex Britannico mari ducitur, quod Germanicum appellari potest : nam & Germaniæ magnam partem alluit, ostium eius in occidenti est, non longe à Chersoneso Cimbrica quam Daciam \* hodie vocant. Excurrrens autem in orientem, in septentrionem panditur, Insulasque magnas ambit, occidentale littus Noruegi occupant : ad Septentrionem semiferos homines esse tradunt, cum quibus nullum linguæ commercium nauigantes habent : signis tantum & nutibus commutare merces feruntur. Meridionale littus Saxonibus ac Prutenis traditur : orientale ( vt diximus ) Livones tenent. Inter Liuoniam & Prussiam paruam terram esse ferunt, vnius ferme diei latam itinere, sed longissimam à Prutenis ad Liuones, quam Magassætæ colunt, gens neque gentilis, neque vere Christiana : Polonorum imperio parens. Atque hinc regnum Poloniæ ad mare protenditur, & Balthicum ( quem diximus ) sinum.

## CAPUT XXII.

p.66.

## DE PRUSSIA.

**R**EDEVNTI ex Liuonia in Germaniam per littus Balthi maris, post Massagetæ Pruteni sese obiciunt, qui ripas vtrasque Vistulæ amnis accolunt. Is est Sarmatiæ ac Germaniæ terminus : qui exoriens in montibus, qui Poloniam Hungariamque dirimunt, partem Poloniæ irrigat, Prussiam vero, quam longa est, percurrit ab oppido Torni vsque Gedanum \* : quo in loco Balthicum influit. Hunc fluvium alii Vistulam ( vt diximus ) quibus ætatis nostræ sermo congruit, alii Istulam, quidam Istulam vocare, quod ultra fluvium est, Sarmatici iuris fuit ; quod citra, Germanici : ad orientem ac meridiem Masoniæ, Polonique rura colunt : occidentem Saxones occupant : A quilonem Balthi maris excipit littus. Frumenti ferax regio est, aquis irrigua, & plena colonis, multa ambitiosa oppida, multi maris sinuosi reflexus amœnam efficiunt. Pecorum ingens vis, multa venatio, piscatio diues. Vlmerigos olim hanc terram incoluisse Iordanes tradidit : quo tempore Gothi ab insula Scandauia in continentem descendere. Qui per Istulam ( vt ille ait ) Vlmerigorum terras inuasere. Ptolemæus autem Amaxobios, & Alaunos, Venedes, ac Githones penes Istulam fluvium habitare affirmat. Barbara hæc gens, & Idolorum cultrix usque ad Fridericum Imperatorem eius nominis secundum fuit. Sub eius vero imperio, cum amisissent Christiani Ptolomaidem Syriæ ciuitatem, fratres Teutones ( quos sanctæ Mariæ diximus appellari ) inde fugati in Germaniam redire, viri nobiles, & rei militaris periti : qui ne per ocium marcerent, Fridericum accedentes Prussiam Germaniæ conterminam Christi cultum spernere dixerunt ; sæpe illius gentis homines in Saxones ceterosque vicinos



vicinos excurrere ; ingentem vim pecorum atque hominum abigere ; esse in animo sibi compescere barbaram gentem, annuat tantum Imperator, prouinci- amque Fratribus perpetuo iure possidendam tradat, si eam armis acquirant. Iam enim Masouia Duces, qui eius se terræ dominos affirmabant, ius suum fratribus concefferant. Grata oblatio Friderico fuit : qui collaudato proposito, quas vol- uere fratres, sub aurea bulla literas concessit. Illi sumptis armis, breui tempore quicquid Prutenici iuris citra Vistulam fuit, occupauere. Exin tranato fluuio, vetustam & late patulam quercum in castelli modum erectis propugnaculis iuxta ripam munierunt : ubi collocato præsidio vltiores Prutenos vexare coeperunt. Pugnatum est sæpe pro quercu, & ingentes Paganorum copiae fugatæ ac deletæ sunt : bellum pluribus annis productum est. Ad extremum fortuna Fratrum im- perio arridens, omnem eis Prussiam subiecit : victæ Barbaræ nationes iugum su- biere. Ex illo tempore lingua Teutonica introducta est, & cultus Christi genti- bus imperatus. Ecclesiæ quoque Pontificales erectæ trans Vistulam Pomesanien- sis, Culmenfis, Sambienfis & Warmienfis : ad quam defuncto Francisco episcopo *Warmienfis* paruitatem nostram postulauere canonici. Calixtus Pontifex Maximus eam no- *episcopatus.* bis annuente Senatu Apostolico commendauit. Quæ vna est illis in partibus iure suo vtens nec subiecta fratribus : reliquos Episcopos religionis habitum gestare oportet. Quo in loco munitam quercum diximus fuisse, nobile oppidum ædifi- catum est, quod Marieburgum vocant : & arx nobilis atque amplissima. Hic se- *Teutonici or-* des magni Magistri, qui cunctis fratribus præest Prussiam incolentibus. Sunt & *dinis Magistri.* alii duo in eadem religione magistri, alter Liunioniam regit, alter conuentus Ala- manniæ gubernat. Teutones huius religionis inuentoress fuere : ac propterea ne- mo recipitur ad eam, nisi Teutonicus, nobilibus ortus parentibus, & cui propo- situm sit pro tuendo Christi Euangelio aduersus salutiferæ Crucis inimicos armis depugnare, ob eam rem vestimentis albis vtuntur, nigra cruce insuta. Barbam omnes nutriunt : exceptis qui sacris altaribus feruiunt. Pro canonicis horis Do- minicam orationem vsurpant, neque literas discunt. Magnæ his opes, nec mi- nor potentia quam Regibus, sæpe cum Polonis de regni limitibus, acceptis atque illatis cladibus contendere, nec totis viribus belli fortunam experiri recusarunt. Cum Vladislao Casimiri (qui modo regnat) patre contraxerant ambæ partes vali- dissimas atque ingentes copias Polonis Lituani & Tartari adiuncti erant, quos du- xerat Vitoldus : Teutonici fratres ex tota Germania vires conciuerant, postquam prope ad viginti ferme stadia vterque confedit exercitus, spe plenus & impatiens moræ, Prutenorum magister caduceatorem, qui bellum Regi denunciaret, & duos enses, in quis staret victoria, misit : facta potestate, vt quem vellet hostis eligeret alterum sibi remitti iussit. Accepit Vladislaus alacer nuncium : donatoque cadu- ceatore, vno retento gladio, remisit alterum. Mox iussi milites arma induere : bellique signum datum : LX. millia equitum in ambobus castris fuisse proditum

p. 67. inuenio. Vladislaus Tartaros ac Lituanos primum inire certamen iussit, ex Po- lonis subsidiarias acies elegit, contra Prutenos auxilia in postremis habuit, floren- tem ordinis sui militiam in exercitus fronte collocauit. Commissio prælio iner- mes quodammodo Tartari ac Lituani magna strage cæsi sunt. Vrgebat tamen multitudo, nec terga dare Polonus metuens audebat, atrox pugna super cadauera occisorum edebatur. Nec tam vulnerare Prutenus alacer, quam vulnera accipe- re Tartarus videbatur, protractum est diu certamen : peracta ingens occisio.

Lituani Tartarique veluti pecudes mactabantur, at cum novus semper ho- stis emergeret, defessi tanta cæde peracta Teutones, versare ferrum vix poterant, & iam remissius pugnabant. Quod ubi Vladislaus animaduertit ; tum primum Polonorum aciem validam ac ferro rigentem immittit. Fit subito irruptio in- stauraturque prælium. Non tulere Teutones recentis agminis impetum : impar pugna recentis ac fatigati militis fuit. Oritur mox fuga ex parte fratrum : ferit terga Polonus. Magister ordinis vbi suos cedere videt, nec iam vllam in auxiliis spem esse animaduertit, collecta militum manu hosti sese obiectans, occiditur.



Fit foedior fuga : nec prius Teutonicus fugere quam Polonus persequi destitit. Perierunt in eo bello ex parte Fratrum multa hominum millia : inter quos viri primarii, quos vocant Commendatores, equestri dignitate insignes, cum ipso Magistro circiter sexcenti : nec Polonis incruenta victoria cessit, Tartaris ac Lituaniis magna ex parte cæsis. Bellum hoc anno decimo & quadringentesimo supra millesimum gestum est, post Christi Saluatoris ortum. Prussia fortunam regis secuta omnis, excepto Burgo Mariæ, ad victorem defecit. Sed interueniente Sigismundo Cæsare pax inter fratres & Polonum constituta est, percussum foedus, pecunia Polono data, Prussia reddita fratribus : nec deinde usque ad Friderici tempora (qui modo imperat) in possessione agri sui turbata religio est. Sub eius vero imperio cum populares graue sibi iugum fratrum existimarent, foedus inter se inire in hunc ferme modum : ut quindecim viri singulis certis in locis conuenirent, qui prouincialium querelas aduersus fratres audirent : nec sinerent quempiam indigne vexari. Ex his quatuor ex religione viros assumi voluere, quatuor ex prelatibus ecclesiarum, parique numero ex nobilibus ac ciuitatibus : hisque parere omnes voluere. Per idem tempus diuisa inter se religio fuit, alii magnum Magistrum sequebantur, alii quosdam commendatores, qui magistri regimen improbant. Magister ut populares sibi alliceret, foedus ipsum inconsulto fratrum conuentu approbavit. Fridericus quoque Imperator eidem foederi robur adiecit, cautione tamen inserta, ne per suas literas ius religionis læderetur. Mortuo deinde Magistro, qui foedus acceperat, & altero in eius locum suffecto. Nicolaus Pont. Max. legatum misit, qui prouinciam Prusiæ inspiceret. Cognitoque rerum statu, quantum Legatus retulit, popularium foedus damnauit : utque ab eo discederent, anathema interminatus acriter imperauit : quibus pertinacius in eorum sententia perseverantibus, ex consensu partium lis ad Fridericum Imperatorem deducta est. Apud quem rursus causa cognita, damnato eorum foedere iussi Pruteni sunt ad obedientiam fratrum redire, qui eam prouinciam è manibus infidelium suis armis vendicassent, multosque sanguine coemissent. Qua re ciuitatibus nunciata, mox arma in fratres populariter accepta sunt : ex quibus plures capti atque occisi, castella eorum euersa, arces à fundamentis eiectæ, quinque & quinquaginta oppida in eam rebellionem conspirauere. Sed cum non satis rem suam contra religionem sine externa ope tutam putarent. Casimirum Poloniæ Regem sibi dominum asciuerunt, deuotum fratribus sanguinem, qui fortunam patris eius experti fuissent.

Ille cum exercitu prouinciam ingressus, dedentes sese ciuitates in potestatem accepit : cum quo fratres diu varia victoria dimicarunt. Plures fuere congressus : inter quos memorabilior, qui apud Conitium \* oppidum habitus est, octodecim millia Polonorum obsidionem in eo loco tenebant, in quis & Rex ipse Casimirus fuit. Oppugnabatur oppidum dies noctesque machinis admotis. Rudolphus princeps Sagoriæ \* vnus ex Slesiae ducibus tum religionis ductabat exercitum : qui laturus obsessis opem, cum septem milibus militum aggredi Regem non dubitavit. Commissum est prælium in conspectu oppidanorum, summa vtriusque contentione atque ardore, cæsis hinc atque inde compluribus. Cum suos referre pedem Rudolphus animaduertit, increpans ignauiam fugientium, interminatusque necem, aciem sistit : & progressus in medium cum recenti pugnantium manu, acre certamen instaurat : hos sternit, illos confodit, fit subita rerum mutatio.

Vrgente Rudolpho cedit Polonis. Rursusque Casimirus suos retinet, pugnae se ipsum miscet & tanquam ex integro pertinaci contentione certatur, occiditur in pugna Rudolphus. Rex vero equo deiecit : meliores ex vtraque parte p. 68. occumbunt. Postremo cæsum credentes Poloni suum Regem, desperata victoria fugam arripiunt. Rex ab amicis adiutus, vix ex clade ereptus est. Rudolphus morte sua victoriam religioni peperit. Ex Polonis supra sex millia cecidisse feruntur : ex Teutonibus quoque non pauci periere. Post eam cladem res Polonica nutare apud Prutenos cepit, eo inclinantibus populis, quo belli fortuna quaeritur. Stat tamen adhuc anceps exitus, & alterius Martis iudicium moratur. Ferunt inter



ter hos Fratres, olim mortuo magistro, cum de successione ageretur; vnum fuisse, quam rogatus eligere, quem putaret religioni vtiliorem, seipsum elegisse, dicentem, *Nolle deierare. Scire se cogitationes suas, aliorum corda ignorare. Si magistratus sibi committatur, non dubitare quin reipublica bene consultum eat.* Motos eius verbis reliquos administrationem illi credidisse, quæ saluberrima deinde fuerit.

## CAPUT XXIII.

## DE SAXONIA.

POST Prutenos Saxonicum nomen incipit, gens valida & latissima: cui ab occidenti Viscera \* fluuius terminum facit: plerique vsque ad Rhenum protendi Saxones arbitrati sunt. Aquilonarem plagam Dani obtinent, & mare Baltheum ad meridiem Francones, Baioarii, & Bohemi siti sunt, orientalem plagam Slesitæ simul ac Pruteni obtinent. In his terminis inclusi sunt, Turingi, Brandeburgenses, Maxinenses, Lusacii, Pomeranique: quos omnes Saxonici iuris esse volunt, priores tamen Turingos in ea terra consedissee, quam Saxones aiunt, hos enim Græcam sobolem esse affirmant, ex Macedonia classibus aduectam, quæ Turingos multis bellis defatigatos paternis agris eiecerit: quod mihi non fit verisimile. Est enim vetustissimum in Germanica terra Saxonicum nomen, cuius omnes veteres meminere: Turingos nemo antiquorum nominat, qui Germanicas gentes enumerant. In aduentu primo Francorum, (qui tempore Valentiniani Cæsaris Germaniam intravere) Turingos nominari reperio: ob quam rem male quadrat historia veritati, quæ Turingos priores Saxonib. in Germania fuisse contendit, fatebor tamen, Saxoniarum limites aliquando minores fuisse, aliquando maiores. Nam sicut imperia, ita & prouinciarum limites ex tempore variantur. Carolus M. imperator multa cum Saxonibus bella gessit, priusquam Christi cultum reciperent: eosque magnis afflixit cladibus. Postquam vero deficiente apud Francos Caroli Magni genealogia, Romanum imperium ad Teutones Orientales rediit, Saxonum aucta dignitas est: inter quos plures Imperatores fuere, singulari prouidentia & rerum gestarum magnitudine clari: maxime verò tres Othones, qui sibi inuicem succedere, de Romana Ecclesia optime meriti: quorum virtute prolatos Saxoniarum fines minime dubitarem. Inter Pomeranos, qui orientem Saxoniarum incolunt, oppida sunt digna nomine, Wismaria, & Sundis, Gripshaldia, Stetininium, & Rostochium: in quo schola liberalium artium haud contemnenda. Et hæc quidem mari proxima, multis ac diuitibus negociatoribus habitata est: & in mediterraneis Caminum pontificalis ciuitas, cuius diocesis latissima est, nec minor Maguntina creditur. Episcopus loci Romano duntaxat præfili subest. Brandeburgenses in duas Marchias diuiduntur: quarum altera vetus, altera noua vocatur. Veterem Marchiam perlabitur Albis fluuius, in cuius littore Stendalum est oppidum, & Gardelevum, & Soltuedelum, & Osterburgium. Nouam Marchiam intersecat fluuius Odera, haud multo inferior Albi: in cuius ripa Francofordia est, diues emporium, & Lubecensis ciuitas. Spreua quoque fluuius eandem prouinciā irrigat, æquandus Tiberi. Berlinum in eius littore oppidum iacet. Est & aliud flumen Houela \* nuncupatum, quod Brandenburgum (ex quo Marchia nomen habet) in duas partes diuidit, veterem ac nouam ciuitatem efficiens. Ibi episcopalis sedes est, & Marchionum tribunal. Ad eiusdem fluminis ripam Habeburgium quoque situm est, pontificalis ciuitas: & circum nobile territorium, cui Prigeniza est nomen, multis refertum oppidis, & Martiali populo plenum. Caput Misnensium ciuitas Misna est, vnde nomen regioni datum: hanc quoque Albis alluit fluuius, hic valida arx, & in ea cathedralis Ecclesia. In ea quoque prouincia multa sunt oppida, Martiali populo plena; & Martinopolis in honorem Martis à veteribus condita; Mersburgium hodie vocant. Similiter Lipzig vrbs, diues mercatorum emporium, præclaroque studio insignitum.

\* al. *Wesera*,  
apud antiquos  
*Wesernas*.

*Caminensis Epi.*  
*scopatus.*

\* al. *Hortelun*



## CAPUT XXIV.

## DE THVRINGIA.

**I**N Thuringia nobile oppidum, & caput gentis Herfordia, Maguntino subiecta pontifici, studiis liberalium artium insignis. Nuenburgensis quoque ciuitas duci Saxoniae parens. Hæc omnia jure Saxonum vtuntur, & lingua iisdem moribusque freti. Cæterum veri Saxones Magdeburgenses nullo dubitante habentur: Bremenses quoque Alberstatenses, Hildesinenses, Verdenſes, Brunſuicenses, Hamburgenses, Luneburgenses, & Lubecenses. In Madeburga Archiepiscopalis sedes habetur, & inhonore sancti Mauriti ex quadrato lapide diues templum, Othonum nobile opus: & in eo Sancti Florentii corpus. Credunt quoque vnam esse hydriis ibi esse, in quibus vinum ex aqua factum à domino Salvatore Euangelistarum tradit historia: hanc plebibus ostendunt, materia marmorea est, ac perlucida vini capax quantum equus ferre possit. Alteram ac minorem apud Hildesinenses esse affirmant; vexillum quoque sancti Mauriti hic quotannis ostenditur. Magistratus vrbs jus ciuile Romanorum abbreviatum & Saxonica lingua conscriptum, non sine reuerentia custodit: quod Magni Caroli auctoritate firmatum tradunt, eoque in decisione causarum circumuicinæ gentes recurrunt, magna & venerabilis earum legum auctoritas habetur. Bremenses gloriam suam ducunt, Danorum gentem ad Christum esse conuersam. Non est omittendum, quod de Alberstadio traditur, hanc ciuitatem Oltemia perlabitur fluuius. In medio ferme tumulus assurgit, in cuius cacumine planities est, duorum ferme stadiorum contingens longitudinem: In cuius extremis angulis duo templa sita sunt, alterum pontificale, alterum quod Beatæ Virginis appellant. In medio late patet forum magnificis Canonorum ædibus vndique cinctum. Vrbs hæc vocatur: quod sub tumulo jacet, suburbium appellant. In monte nulla laicorum habitatio. Carolus magnus huius Ecclesiæ fundator habetur, cuius festiuitas quotannis celebratur. Duodecim hic dignitates, 24. præbendæ, Archidiaconatus supra viginti esse feruntur. In hac Ecclesia singulis annis vnus ex populo deligitur, quem peccatis grauioribus inquinatum putant: hunc veste lugubri induunt, & voluto capite prima ieiunii die ad ecclesiam ducunt, indeque peractis diuinis officiis eiiciunt. Is quadraginta \* diebus nudis pedibus perambulat urbem, & Ecclesias circuit neque ingreditur, neque quenquam alloquitur. Inuitatus à Canonicis, per vices quod apponitur, comedit. Somnus ei post medium noctis in plateis permittitur: die Jouis sancta post consecrationem olei, rursus ad Ecclesiam introducit, & oratione facta à peccatis absoluitur: pecuniasque ei populus offert, quæ tamen Ecclesiæ dimittuntur. Hunc Adam vocant, & omni crimine liberum putant. Circa Alberstadium ager optimus, ferax tritici, matureſcentibus frugibus, culmorum altitudinem equo infedentem hominem ferunt excedere. Brunſuica oppidum tota Germania memorabile, magnum & populosum, munitum mœnibus ac fossatis, turres quoque & propugnacula excellunt, magnificæ domus, perpolitæ plateæ, ampla & ornatissima templa. Quinque hic fora, quinque prætoria, & totidem consularis jura ciuib. dicunt. Hinc appellari Duces Brunſuicenses, tota Germania nobilissimos, Othonum soboles: quorum claritas cum potentia labente tempore defluit. Lubicensium ciuitas potentissima est: sine cuius auxilio vix vnquam Daciæ Reges continere suos subditos valere. Duodecim viri reipublicæ præſunt, quos consules appellant, quorum perpetua potestas est: & in equestri dignitate constituti sunt. Popularibus, nisi vocentur, nulla de regimine vrbs consulendi facultas: nec tamen seruire plebs videtur. Sua cuique substantia tuta est, & libertas saluis legibus, vt velint viuere. Æquum iudicium Consules agunt: ab his Cæsar, si exceſſerint, appellatur. Saxoniæ nostra ætate Duces habentur, Fride-ricus & Wilhelmus fratres: quorum alter Electorem Imperii gerit, alter regnum Bohemiæ debitum sibi aſſerit, vt supra retulimus. Fuit cum Brunſuicensibus de electo-

Magdeburg.

Brem.

\* al. singulis  
quadraginta  
dieb.

Halberstad.

Brunſuica.

Lubeca.



electoratu dissensio. Sigismundus Imperator litem diremit: sententia (vt sæpe fit) potentiori allusit. Alter horum fratrum natu senior robustissimus venator fuit: junior alter belli appetens, & in armis exercitatus. Crudelia inter eos diu bella exarserunt hæreditatis paternæ causâ: & quamuis de pace sæpe mentio fieret, impeditibus tamen Apollonio (quem Vicedominum appellant) & aliis plerisque potentibus, quibus ea discordia quæsti erat, frustra omnis tractatus abiit. Sed cum vastatis jam agris, tota provincia pessum iret, Apollonius vero fraternalium incensor discordiarum per annum Jubilæum Romam petisset: rogauit Fridericus p. 70. Germanum suum, uti ad se Libecam \* veniret, secum de pace acturus. Annuit Wilhelmus, iter ingressus dixere Consilarii, *paratas sibi, & qui cum eo irent, insidias esse, cauere ne se perditum iret, neque suos ad necem traderet.* Quibus ille: *At ego, inquit, libens moriar, si vos prius necatos videro, qui fraternas contentiones alitis.* Atque ita locutus, sequi iussis qui se amarent, vrgensque calcaribus equum festino cursu fratrem adiit: quo cum semotis arbitris euestigio pacem composuit, foedusque pepigit. Magnus vir, qui se tam liberaliter in potestatem dederit hostis. Magnus & alter, qui hostem ex fratre factum, rursus fratrem atque amicum reddiderit. Apollonius interim Roma reuersus, & qui cum eo sentiebant, ex Turingia (vbi plurima oppida possidebant) exterminati sunt. Apollonius in Coburga, quod est Franconiæ oppidum, aliquandiu se defendit: sed cum salutem in eo loco desperaret, nullius auxilio fretus, cum thesauris suis clam fugiens ad Bohemos migravit. Ex illo tempore quietem habuere Saxones, quamuis Bohemi castella quædam ab eis repetentes, sæpe bellum minati fuerint. Induciæ in hanc usque diem arma partium tenuere. Lis maior nunc oritura videtur, quando Wilhelmus regiæ sororis maritus ad Bohemiæ regnum aspirare fertur, quamuis terræ proceres alium sibi regem assumpserint.

Apollonius  
vicedominus.

\* al. Lipzig.

Libet hoc loco audax priuati hominis inferere facinus. Conradus Raufes \* nobili loco apud Saxones natus, bellicæ rei peritus, manu promptus, & animo imperterritus, cum se patria pulsus & paterna hæreditate priuatus per iniuriam Friderici Ducis existimaret, scelus incredibile nostra ætate perpetravit. Arx est in Misnia in alto monte, & abruptis vndique rupibus sita, \*\* Altumburgum prouinciales vocant: ad radices montis oppidum egregie munitum, & populo plenum jacet. In arce duo Friderici adolescentes Ernestus & Albertus educabantur. Huc Conradus intempesta nocte magnis itineribus, cum paucis comitibus contendit: & admotis scalis, prodente pædagogo, arcem ingressus, dormientes adolescentes in cubili comprehendit, interminatusque mortem, si vocem emitterent, funibus colligatos extraxit: haud dubius, quin perductos in Bohemiam magno precio venderet, suasque contumelias eo pacto magnifice vltus videretur. Jam filiam Herciniam, quæ Bohemiam à Saxonia diuidit, ingressus erat. Jamque periculum omne transmissum putabat: cum junior captiuorum labore ac fame deficiens, & quietem simul & cibum poposcit. Cuius precibus commotus prædo ad carbonarium diuertit quendam, afferrique panem & cereuisiam iussit. Inter ea apud Altemburgum, cognita tanta rei nouitate, clamor exoritur. Attoniti oppidani raptim arma capeffunt, & pretiosam vendicaturi prædam præcipiti cursu prædonis vestigia insectantur. Siluam ingressis fortuna blanditur: quæ inter multos tramites eum teneri suavit, qui recta duxit ad carbonarium. Ibi Conradus, dum puero cibum ministrat, ex improviso capitur: & oblatus Principi, audacissimi sceleris capite poenas soluit. Federicus eodem pene nuncio, quo captos atque adductos filios audiuerat, recuperatos & domum reductos didicit. Saxoniæ Ducibus parua veræ Saxonie portio paret.

\* Ponendum  
de Kauffun-  
gen. Princi-  
pum hunc ra-  
prim plenius,  
& mutatis  
paullo cir-  
cumstantiis  
enarrat Georg.  
Fabricius,  
Orig. Saxon.  
lib. VII. p. 770.  
Spangenberg.  
Chron. Mans-  
feld. Cap. CCC  
XX XVIII.  
Müller. Ann.  
Saxonie ad  
An. 1455.  
Adamus Re-  
chenbergius  
singulari dis-  
sertatione de  
Raptu Ernesti  
atque Alberti.  
\*\* Altemburg.

Sunt enim in ea prouincia multi alii principes, multæ ciuitates quæ vocantur imperiales: multi episcopi proprium territorium habentes. Misnia vero & Turingiæ maior pars, & Lusatiæ, & Franconiæ pleraque oppida his ducibus parent. Jus autem eligendi Romanorum Imperatorem Saxoniæ Ducibus ex paruo quodam



Wittenberg.

principatu competere afferunt, inter Misniam Slesiamque jacente: cuius caput oppidum est Wittenberg vulgariter appellatum, id est, mons albus.

Luneburg.

In Saxonia argenti mineras apud Goslarum Otho primus Imperator inuenit, quarum magni fuerunt reditus: ibi & palacium nobilis operis ædificatum, habet & fontes amarus Saxonia: ex quibus sal coquitur album, quod ad vicinas gentes defertur. Salinae vberriam atque ditissimam apud Luneburgium habentur: ex quibus multi monasteriorum Abbates, & multi Ecclesiarum Prælati vitam ducere consueuerunt, fuit enim quæstus salis vberrius. Has salinas Luneburgenses violenter vsurpauere: ob quam rem & à Nicolao Pont. Max. & à Friderico Imperatore augusto damnati sunt. Consulatus, qui eius rei auctor habebatur, auctoritate Apostolica deiectus est: sed fauore Bernardi Ducis Brunsvicensis paulo postea in pristinum statum rediit. Et qui nouiter consulatum adierant, in carcerem coniiciuntur, ciuitati rebeli & ecclesiasticorum bonorum rapaci sacris interdictum est: non tamen desunt qui rem diuinam apud eos faciant. Tanta est æuo nostro & in populo & in clero auctoritatis ecclesiasticæ contemptus.

\* al. nominis.

\* al. Wilsnach.

Est in Marchia Brandenburgensi non magni momenti \* ciuitas, aquis circumdata, Habelbergam vocant: in eius diocesis loco aspero ac deserto paruum oppidum est nomine Vilsnacum \*. Hic tres hostiæ habentur, ex quibus cruorem sua sponte manasse tradunt: ob eam rem magnus populorum huc concursus, & nautarum p. 71. vota huc soluuntur: vulgo locum ad sanctum Cruorem vocant. Excessimus scribendi modum Saxoniarum ciuitates nominatim commemorantes. Id fecimus, quia veteres scriptores parum de Germania locuti sunt, & tanquam extra orbem ea natio jaceret, somniantes quodammodo res Germanicas attingunt: Ob eam rem dabitur mihi venia, fortasse & aliquis gratiam habebit, si Germanicas describentes prouincias, vt res oculis subiciamus, paulo prolixiores fuerimus, propositi nostri metas egressi.

## CAPUT XXV.

## DE DANIA, SVECIA, NORVEGIA.

Cymbri.

\* al. Scandia.

Gothi.

\* Dannemarc.

**H**OC loco quoniam Saxonia Dania iungitur, priusquam Germaniarum reliquas partes absoluo, de ipso Dania regno vicinisque regionibus in Aquilonem versus aliqua referre institui, non indigna cognitu. Tria sunt in septentrionem vergentia regna sibi inuicem cohærentia, Danorum (quod hodie Daciam appellant) Suetiorum, ac Noruegiorum. Dania siue Daciam dicere volumus consuetudini feruientes, Germaniarum portio est Chersonnesi habens formam.

Hanc quondam Cymbri tenuere, inde illa inundatio Barbarorum emerfit, quam Marius Arpinas Italiam petentem, & res Romanas euertere minitantem, ad internecionem deleuit. Possidonius (vt Strabo refert) coniecturam facit, quod Cymbri latrocinando incertis errabundi sedibus ad paludem usque Meotim militiam agitarint: ab eis enim Cymerium vocari Bosphorum arbitratur, quasi Cymbricum, cum Græcorum lingua Cymeros Cymbros nominet. Suetia cincta vndique mari plures Insulas continet: in quibus Scandia \* est, apud veteres late memorabilis. Hinc quoque populorum innumerabilis multitudo egressa, omnem olim Europam armorum turbine ac procella inuoluit. Nam Gothorum, qui Hunnos bello vincere, Pannoniam, Mysiam, Macedoniam, & omnem Illyridem occupauere, Germaniam, Italiam, ac Galliam vastauere, & demum in Hispania confedere, hinc fuit origo. Noruegia, quæ de ipso septentrione sortita est nomen, continenti per Ruthenos iungitur, & in Arcton protensa incognita terræ, seu stricto glacie Oceano (vt plerique fabulantur) contermina est. Ad orientis partem ac meridiem Baltheo mari alluitur: ad occidentem Britannici finit Oceanus. Daciam Teutonnes hodie Danorum appellant Marchiam \* cuius lingua Germanis incognita est: Ex Noruegia venisse putant, qui Cymbrorum occupauerint loca. In hac terra patrum nostrorum memoria Voldimarum regnavit, in Suetia Magnus, Aquinus in Noruegia:



Noruegia : quem ferunt diuinum fuisse hominem miro prouincialium amore atque obsequio cultum, huic coniux Margarita fuit, Voldimari filia, ex qua natus *Margarita Regina.* Olaus patri succedens, breui tempore vita functus, regnum matri reliquit. Ea & paternum adepta est, extincto Voldimaro ; at Magno in Suetia hominem exuente, Albertus dux Monipolensis vocatu populi diadema suscepit : qui dominatum vicinæ foeminæ contemnens, bello Daciam Noruegiamque laceffere coepit, occurrit ei Margarita coactis copiis, in campis late patentibus pugnatum est : tanquam ipsa viri, hostis foeminæ animum induisset. *\* al. Naupolensis, lege Me-galopolensis.* Victus Albertus, captusque & in triumphum ductus regnum amisit : dimissus tandem infame senium in paterna domo finiuit. Margarita clarissima mulier tribus imperans Regnis, ad senectutem usque magnifice ac religiose subditos gubernauit : demum senio confecta, cum tantum per se ferre nequiret imperium, Henricum Pomeraniæ Ducem quatuor & decem annos natum sibi filium adoptavit, regnaque illi commisit, & Philippam regis Angliæ filiam dedit vxorem. Is cum coniuge sine prole defuncta, nubere ulterius nollet, iamque quinque & quinquaginta regnasset annos, ad extremum sub imperio Friderici populari tumultu ex regio solio deturbatus est ; & Christophorus Dux Baioariæ sibi ex sorore nepos in eius locum suffectus : qui avunculum suum decem annis quibus ipse imperauit in insula Gothica regnare permisit. Christophoro autem ex hoc seculo abeunte. Daciæ ac Noruegiæ coronam Christigernus accepit. Sueci vero in electione Regis discordantes, alii Carolum equestri dignitate insignem, alii Canutum eius fratrem natu minorem regno præficiunt.

Pendente adhuc electionis negotio, Carolus immisiss militib. Scoltoniæ (quam hodie Stockholm) oppidum clam occupat : in quo regia sedes habetur. *p. 72.* Canutus per amicos arcem inuadit. Hinc bellum inter fratres de regno ortum, & pugna diu anceps, occisis vtrinque pluribus : ea demum lege induciæ pactæ, ut potestas eligendi Regem exclusa nobilitate plebi fieret. In qua cum Carolus gratiosior esset, maiestas regni ad eum defertur : Canutus priuatam vitam degit. Carolus vero nouo regno tumidus atque insolens, armatis nauibus Henricum ætate confectum, nulli noxium, sibi ipsi viuentem, è Gothia propulsauit. Qui etiam hodie in humanis agens apud Pomeraneos (vnde illi origo fuit) paruo contentus vitam agere fertur. Quam sint incerta mortalia, & quam inania, suo exemplo docens : qui tribus potentissimis regnis exutus, nec paruam insulam, in qua decem annis delituerat, usque ad mortem retinere potuit, ætate plenissimus. Sed neque Carolo scelera sua impunita fuere : qui dum Christi Ecclesias persequitur, religionem contemnit, sacerdotes dispoliat, festos dies obseruari prohibet, iura diuina & humana confundit ; à Ioanne Benedicti filio Vrsalensium præsule, viro cordato & impigro, à quo nobilitas regni excitata est, magno prælio superatus est, ac regno propulsus in parua insula non longe ab ostio Vistulæ prope Prussiam exilium agit. Christigernus in locum eius assumptus, pietate ac iustitia melior, iterum tria regna nostro tempore in vnum redegit : cui & Gothia paret, Gothorum quondam sedes ac patria.

## CAPUT XXVI.

## DE BOHEMIA.

Bohemorum modo res gestas attingere, ac situm referre locorum ratio exiget : qui Saxonibus ad meridiem iuncti sunt. Bohemia enim intra limites Germaniæ inclusa, tota Aquilonibus exposita est, habens ad orientem Morauos, & Slesitarum partem, ad Aquilonem Saxones & Misnenses, ad occidentem agrum Noricum, ad meridiem Austriam & Bauariam, vndique Germaniæ populis cincta. Latitudo longitudoque eius pene par, trium fortasse dietarum. Sylua Hercinia vniuersam cingit, Albis vero præclarior eius amnis eam mediam irrigat, aliosque non pauci nominis fluuios excipiens, ut Multauiam, quæ pene Pragam mediam



scindit, tandem per conualles & abrupta montium nemorososque saltus Herciniæ sylvæ præceps labitur, per Misnensem provinciam fluens, prope Hamburg urbem Saxoniam in Germanicum mare absorbetur. Oppida regni memorabilia sunt Praga Regum Bohemiæ dignissima sedes, Cadanum, Bruxia, Schlakerwerdum, Cutionum cupri argentique mineris celebratissimum. Regio prorsus frigida; armenis tamen, feris, ac piscibus abundans. Ager ei optimus, frumenti & hordei feracissimus.

\* Vide Pogg.  
epist. 3.

Multa apud eos ætate nostra memoratu digna emerferunt, multa prælia gesta sunt, multus ibi sanguis effusus, deletæ funditus ciuitates, spreta & conculcata religio. Exorta est Hussitarum hæresis: Adamitarum pullulavit insania: debacchati sunt Thaboritarum & Orphanorum exercitus: duo fulmina belli, Zysca & Procopius, provinciam ex arbitrio suo diripuerunt: Joannes ac Hieronymus\* populum decipere, in Constantienfi magna Synodo demum combusti: Jacobellus, Conradus Rocazana, & Petrus Anglicus, Euangelii corruptores tanquam magistri veritatis habiti. Quatuor Reges extirpare pestiferum virus non potuerunt, Wenceslaus, Sigismundus, Albertus, & Vladislaus, qui apud eos veneno extinctus creditus est. Postremo Georgius Rex creatus est, qui Hussitarum labe infectus putatur: magnus vir alioquin, & rebus bellicis clarus. Sed omnia hæc in historia, quam de Bohemis his diebus edidimus, conscripta sunt. Ibi quoque de situ regionis, & gentis moribus, pro captu nostro mentionem fecimus. Inde igitur assumendum erit, quicquid huic operi de rebus Bohemicis deesse videbitur. Nos coeptum sequentes iter, inferioris Germaniæ provincias absoluemus: deinde ad superiores reuertemur partes.

## CAPUT XXVII.

### DE FRISIA.

Phrisones ad Oceanum siti, ab Oriente Saxoniam contingunt, ad meridiem Westfalos, ad occidentem Traiectensium terræ junguntur: quanquam & ipsos Traiectenses plerique Phrisones esse volunt. Inter quos Othonem inuenio Phrisingenfis Ecclesiæ præfulem, qui res Germanicas haud imperite conscripsit. Albertus Episcopus Moguntinus, qui Fuldense monasterium erexit, cum religionem Christi persuadere Phrisiis niteretur, ab eis interfectus, & martyrio coronatus est. Gens eadem ferox, & armis excitata, robusti & proceri corporis, securi atque intrepidi animi, liberam se esse gloriatur: quamvis Philippus Burgundiæ princeps eius se terræ dominum vocet. Reuera libera Phrisia est, suis utens moribus: exteris nec parere sustinet, neque dominari cupit, haud inuitus Phriso pro libertate mortem appetit. Dignitas in hac gente militaris inuisa. Sublimem virum, qui se cæteris efferat, non ferunt. Magistratus annuos eligunt, qui rem publicam æquo iure disponant, foeminarum impudicitiam seuerius puniunt. Sacerdotes, ne aliena cubilia polluant, sine coniuge non facile admittunt. Vix enim continere hominem posse, & super naturam arbitrantur. In pecoribus omnis eorum substantia est: ager planus ac palustris est, multo gramine foecundus, ligno caret; bituminoso cespite & sicco stercore bouum ignes fouent. Ex hac gente tradit Cornelius Tacitus imperante Nerone duos legatos Romam venisse, Veritum ac Malorigem: qui Pompeii theatrum intrantes, cum vidissent quosdam cultu externo inter senatores sedere, & intellexissent id honoris earum gentium legatis dari, quæ virtute & amicitia Romana præcellerent; *Nullos mortalium aut armis, aut fide, ante Germanos esse*, exclamauerunt: ac digredientes inter Patres confedere, ob quam rem ambos Nero ciuitate donauit.



## CAPUT XXVIII.

## DE HOLLANDIA, ET SELANDIA.

**H**ollandia quoque prouincia Germaniæ ad septentrionem Oceano alluitur mari: quod reliquum est, Rheni fluminis brachia intercipiunt, insulamque conficiunt, palustris, pascuosa, pluribus stagnis ac maris interfusa finibus. Nec desunt, qui Traiectum nobilem urbem in Hollandia sitam dicant, nobis haud alienum esse videtur, aliquando Phrysiæ Traiectenses, aliquando Hollandiæ traditos esse: ut saepe regionum terminos dominantium imperia mutant, nostra quidem ætate neque Phrysiæ neque Hollandiæ dantur. Principatus Ecclesiæ Traiectensis Imperatori tantum subiicitur, latamque possidet terram, diuersis Rheni meatibus interclusam, cui ab oriente Phrysia, à meridie Westfali iunguntur, Hollandia Septentrionem excipit, ab occidente ducatus Geldriæ (de quo suo loco dicemus) Rheno flumine disiungitur. Imperitissime vero (ne dicam fallacissime) nonnulli ætate nostra Traiectum Galliæ nationis ciuitatem esse dixerunt, cum de Pontificis ageretur electione. Nam quo pacto Traiectum Galliæ dabimus, trans duo Rheni brachia situm? quando & qui cis Rhenum habitant, Colonienſes, Cliuenſesque, constat esse Germanos. Traiectensium quippe situs, mos, fermoque Germanicus est. Traiectum diues & populosa ciuitas est. Episcopus urbis quadraginta millia pugnatorum, si quando necessitas ingruit, educit ab bellum, forma viris ac mulieribus egregia. Ab exterorum incurſu & aquarum inundatione, & propria virtute defenduntur: potus genti cereuisia, vinum mercatores afferunt. In ea ciuitate memoria nostra multæ seditiones fuere, cum Episcopum vni parti acceptum, altera recuset. Desiderius aliquando quietum Episcopatum tenuit, deinde à ciuibus eiectus, Romani Pontificis & vicinorum Principum aduersus rebelles subditos auxilia implorauit, illi Diefoldium quendam contra ius fasque sibi præfulem assumpsere, Martinus Pontifex Maximus anathema in eos promulgauit. Contempſere Ecclesiasticum gladium obstinati homines: experiri arma oportuit: ingentes Burgundorum ducis vicinorumque Principum copiæ aduersus Traiectenses ductæ infelicitè puguauere. Victor contumax populus septem annis Ecclesiæ mandata contempſit. Desiderius in exilio obiit. Canonici qui propter eum patria pulsi fuerant, Walramum Morsensem, archiepiscopi Colonienſis germanum, successorem elegerunt. Agitata in Concilio Basiliensi causa, confirmata electio: iterum damnata in synodo Traiectensium rebellio: iterum frustra pugnatum. Postremo missus ab Eugenio legatus Joannes Cosoronensis \* episcopus: qui postea ad Cardinalatus honorem vocatus, Morinenſis appellatus est. Cum retulisset vnicam pacandæ prouinciæ viam esse, Diefoldio ignosci, eique gentis præfultum committi, excuso Walramo, rebeli populo satisfactum est, pulchre sane nullæ victis leges fauent, sacrosque Canones potentia vincit. Voluerunt Calisti quoque imperium eludere Traiectenses, qui mortuo Diefoldio, Episcopum ab eo datum recipere recusarunt. Sed apparatibus Philippi Burgundiæ Ducis ac potentia territi, & primis conatibus infelicitè nisi, furore deposito paruerunt.

P. 74.

Vltimi Germanorum ad Septentrionem & occidentem versi Hollandini \* sunt, insulares populi, Rheni ostiis obiecti: inter quos præcipue Dordracenses \* habentur. Ea ciuitas est egregie munita, diues opum, negotiationique maxime accommoda: cuius haud paruum annum superiore incendium absumpsisse relatum est. Incuriâ ciuium id euenisse constat: quanquam pleraque miracula referuntur, quæ prætereo, quia non satis digno testimonio comprobantur. Est & Brielum oppidum non ignobile, aquis circumdatum: in quod etiam mercatores multi nauibus applicant.

\* al. Casariensis.

\* Sic ex Basileensi editione Operum Syluii emendans, cum antea legeretur Selandrini, ad quos neque Dordracum neque Brielum quadrat.

\* al. Middeldorps.

## CAPUT XXIX.

## DE WESTPHALIA.

**N**ON transibo nunc Rhenum, Germanicas, quæ ibi habitant gentes, commemoraturus: Dabitur suo loco de his quoque dicendi facultas. Prosequar



veteris accertæ Germaniæ populos : & qui iunguntur vel Traiectensibus, vel Phrisiis ad meridiem, expediam. Westphalia Rheno fluuiio ab occidenti clauditur, Vîlurgi ab oriente, quem Vesperam hodie vocant : à Septentrione Phrisiam habet & Traiectensium terram ; meridiem Hassiæ montes excipiunt, quos Abnobos Ptolemæus appellare videtur : ex quibus Amasis fluuius oritur, qui Padeburnam & Monasterium non ignobiles ciuitates alluens, mediam ferme prouinciam intersecat, & per Phrisiam defluens fertur in mare. Sala quoque fluuius Westfaliam irrigat : inter quem & Rhenum, cum Drusus Germanicus belligeraret, domitis hostibus victor oppetiit. Quomodo autem cultores huius terræ vocauerit antiquitas, difficile dictu est, discordantibus auctoribus. Strabo vicinos Rheni accolæ hoc loco Sycambros appellare videtur : qui duce Milone cum Romanis bella gessere, victique datis obsidibus pacem obtinere, quamuis calcata fide ac proditis obsidibus rebellarunt. Ptolemæus quoque à parte primum septentrionali Germaniæ circa Rhenum fluuium Buffactores habitare tradit, Paruos appellatos, Sicambros, Oquenos, & Longobardos, inuenio apud Strabonem circa Amasim fluuium Bructeros habitasse, quos Drusus nauali proelio superauit. Bructeros autem bello victos ab Austro in Aquilonem, & Oceanum dilapsos, ob quam rem coniecturam capere possumus hos esse, qui hodie Pruteni appellantur, Aquilonares populi : de quibus supra diximus, facile namque Bructeros in Prutenos sermo conuertit. Carolus Magnus multa cum Westfalis prælia gessit, eosque magnis affecit cladibus, coegitque Christi religionem amplecti, relicto idolorum cultu : quam quum sæpius abnegassent, nec iusiurandum aduerterent, ut metu poenæ rebellionem compesceret ; occultos instituit Iudices, quibus potestatem dedit, vt quamprimum deierasse aliquem comperissent, aut fregisse fidem aut aliquod aliud flagitium commississe, mox illum supplicio afficerent, vbi primum comprehendo posset, nulla citatione præuia, aut defensione præmissa. Elegit viros graues, & recti amantes, quos plectere innocentes haud verisimile fuit. Terruit ea res Westfalos, ac demum in fide continuit : cum sæpe in nemoribus & proceres & mediocres viri laqueo suspensi inuenirentur, nulla accusatione prius audita. Quærentibus tamen causam, constabat fregisse fidem, aut magnum aliquod scelus commississe, qui necati reperiabantur. Id iudicium vsque ad nostram perdurat ætatem, vocaturque vetitum. Qui ei præsunt, Scabini appellantur : quorum ea præsumptio est, vt per totam Germaniam iurisdictionem extendere velint. Secretos habent ritus, & arcana quædam, quibus malefactores iudicant. Ea nondum quisquam reperi- tus est, qui vel precio vel metu reuelauerit. Ipsorum quoque Scabinorum magna pars occulta est : qui per prouincias discurrentes criminosos notant, & referentes iudicio occusant, probantque vt eis mos est, damnati describuntur in libro & minoribus Scabinis committitur executio. Reus ignarus suæ damnationis, vbicunque repertus fuerit, supplicio afficitur. Degenerauit autem hoc iudicium : nam & viles aliquæ personæ admittuntur, & ciuilia negocia tractare audent, quibus erat solum de criminalibus permissa potestas. In hac prouincia nostro tempore Susatenses ab Ecclesia Colonienfi descivere : nec diutino vexati bello, multisque cladibus affecti, & obsidione pertinacissima oppugnati, ad obedientiam rediere. Cuius rei causa & Theodoricus Colonienfis antistes ( qui Westfalorum princeps habetur ) & Ioannes Dux Cliuensis, non paruis inter se odiis contendere : cum Susatenses ad Cliuensium opem confugissent, Colonienfis Saxoniae duces & non paruam Bohemorum manum in auxilium accersisset. Apud Monasterium quoque eiusdem prouinciæ ciuitatem, propter Ecclesiam quam Valramus Theodorici frater sibi debitam existimabat, acriter dimicatum est, in quo bello p. 75. multis hostium cæsis, vnus ex principibus Brunsvicensibus, qui dux copiarum fuit, interceptus est & in potestate Colonienfis antistitis factus. Est autem Westphalia regio admodum frigida, neque frumenti abundans : pane vtuntur nigro, cereuisia potus est. Vinum quod Rheno vehitur, magno emitur pretio : opulenti tantum eo vtuntur, idque raro, populus Martialis est, & ingeniosus : de quo prouer-

Pruteni.

Westphalica  
iudicia.

Susatum.



uerbium esse dicunt, *Vitiosos ac fallaces Westfaliam facilius quam stultos gignere.* Hic quoniam Theodoricus mentio incidit, non est ab re pauca de eo referre, cui <sup>Theodoricus archiepisc. Colon.</sup> inter viros Illustres nostri sæculi nemo locum negauerit. Origo eius ex familia Morsensi, apud Germanos principes honoratissima. Fratres tres habuit; qui omnes supra sexagesimum annum vixere. Henricus natu maior paternum principatum gubernauit: Ioannes Monasteriensem Ecclesiam multis annis, usque ad exitum vitæ summa cum laude administravit: Walranus & ad Traiectensem Ecclesiam & ad Monasteriensem defuncto fratre nequicquam aspiravit: quamuis ad Traiectum concilii Basiliensis fauore, & ad Monasteriensem Nicolai pontificis institutione vteretur. Theodoricus ipse cum Bononiæ iuri pontificio operam daret, à Ioanne 23. summo pontifice Coloniensem ecclesiam obtinuit: cui iam 17. annos non sine plebis ac nobilitatis magno favore præfuit. Qui & si plurima pro defensione Ecclesiæ suæ vario eventu bella gessit, in quis modo strenui militis, modo fortissimi ducis officium impleuit, nunquam tamen domi aut sacerdotalia munia aut ciuilem administrationem neglexit. Corpore pulchro, & supra communem staturam eminenti, animo magno & perliberali: cuius palatium illustribus semper hospitibus patuit.

## CAPUT XXX.

## DE HASSIA.

**I**NTER Westfalos ac Francones Hassia iacet, montana regio: quæ à Rheno in Septentrionem porrecta Thuringiæ iungitur. Princeps gentis Ludouicus Landgravius ætate nostra ad imperium vocatus, *Imparem se esse dixit, qui tantæ rei molem sustinere posset.* Maluitque paruo imperio à parentibus sibi relicto vtiliter præesse, quam magnum accipiens dissipare. Id quoque sibi obstare ad rem Christianam gerendam dixit, quod literas ignoraret. Fuit tamen legum cultor, quas sibi proprio sermone exponi iussit, quotiens coram eo causa ventilata est: nec vnquam compertus est iniquam tulisse sententiam. Hic dum reformaturus monasterium quoddam suæ ditionis ingreditur, & inuitatus cum Monachis edit, venenum procibo inter edendum sumpsisse creditus est. Nam & ipse & Abbas, qui reformationem petierat; paulo post extincti fuerunt.

## CAPUT XXXI.

## DE FRANCORUM ORIGINE ET FRANCONIA.

**F**RANCONIA \* huic succedit, nobilis sane prouincia, & admodum potens: ab <sup>\* al. Franconia.</sup> incolatu Francorum sic appellata. Franci quidem Troiani ob origine fuerunt: qui deleta Illo duce Priamo magni Priami ex sorore nepote, per pontum Euxinum & Meotidas paludes in Scythiam peruenere, ibique ciuitatem ædificauerunt, quam vocauere Sycambriam: ex qua dicti Sycambri. Constat enim, post euictam incensamque Troiam qui superfuerunt excidio, in tres turmas diuisos in exilium profugisse & alios quidem Ænea duce Italiam petiuisse, à quibus Albani prodierunt, & deinde Romani, qui orbis imperio potiti sunt. Alii sub Anthenore per medios Achiuos elapsi, Illyricos penetrare sinus, & regna Liburnorum ad intimum Hadriaticum pelagus accessere, Urbemque condidere Patauium: vbi sepultum Anthenorem tradunt, qui Henetam fugas \* secum duxit, à quibus postea dicti Veneti, quorum est hodie ingens potestas terra marique. Terti (vt diximus) in Scythiam penetrarunt. quo in loco in magnam gentem coaluerunt. Cumque Scythiarum multi Romano imperio subiecti essent, & ipsi quoque tributa penderent, manseruntque vectigales vsque ad tempora Valentiniani Cæsaris. Quo imperante Alani Imperium vexare coeperunt. Imperator vero proposito edicto libertatem in decennium eis promisit, qui Alanorum ferocitatem compescerent. Allecti eo præmio



mio Sycambri arma sumpturunt, Alanosque bello victos deleuere. Ob quam rem libertate in decennium ab Imperatore donati sunt, & mutato nomine Franci appellati: quod Artica lingua siue feroces, siue nobiles sonat. Itali Francos liberos vocant. Exacto decennio, cum Romani solita tributa repeterent, Franci ob ipsam libertatem effrenes facti, parere recusauerunt. p. 76.

Principes eo tempore Francis fuere Priamus, & Anthenor, antiqui nominis ac virtutis, quibus copias ductantibus, prælum cum Romanis confertum est; in quo Priamus ipse cum fortissimis suæ gentis cecidit. Qui cladi superfuerunt, ex Scythia digressi sunt, & in Germaniam profecti in partibus Thuringiæ confederunt, cum principibus suis Priami & Anthenoris filiis Marcomede scilicet & Sunone. Suno sine liberis decessit. Marcomedi filius fuit Faramundus, quem sibi Franci Regem creauerunt: & hic primus inter Francos regnavit. Huic fuit filius Clodius \* Crinitus, à quo Francorum Reges Criniti sunt appellati. Per idem tempus Gothi, qui iam urbem Romanam irruerant, ultra Ligerim fluvium in Gallia sedes inuaserunt. Burgundiones quoque iuxta Rhodanum habitabant, qui & ipsi paulo post reges habere coeperunt. Franci vero transmissis Rheno Romanos, qui ea loca tenebant, fugauerunt: paulatimque aucti potentia, Maguntinam, Treuerim, Agrippinam hodie Coloniam, super Rheno fluuio, Tornacum, Cameracum, Remos, Suesonam, Aurelianum inuasere: ita ut ab Aquitania usque in Baioariam imperium extenderent. Clodoueo autem mortuo Meroueus successit filius, à quo Franci Merouingi dicti sunt. Post Merouem Hildericus regnum adeptus, dum luxuriose viueret, à suis pulsus est Egidio Romano in eius locum suffecto. Hildericus regno priuatus, ad Bisinam Thuringiæ regem confugit, cuius coniugem per adulterium polluit, post octo autem annos reuocatus, Agrippinam inuadens, eiectis inde Romanis magnam regni sui partem recuperavit. Mortuo autem Egidio filius eius Syagrius in ciuitate Suesona regnavit. Bisina autem regina cum accepisset, Hildericum regnum recuperasse, relicto viro ad eum confugit: à quo recepta, & pro coniuge habita, Clodoueo ei peperit. Qui postea regnum adeptus primus Francorum Regum Christi religionem accepit, à beato Remigio episcopo baptizatus. Illud autem veritate caret, quod plerique tradunt, Agrippinam ab incolatu Francorum vocatam Coloniam.

Nam priusquam Franci Germaniam intrarent, Colonia Romanorum appellata est, à Claudio Cæsare condita, & ab eius coniuge Agrippina nuncupata. Fuerunt inter Clodoueo ac Syagrium aliquot bella: postremo victus Syagrius, ad Alaricum Gothorum regem confugit, qui nonus à magno Alarico regnabat. Reposcitur à Clodoueo Syagrius, atque obtentus occiditur: Romani quoque reliqui per Galliam habitantes exterminantur. Clodoueus Alemanos sibi subiecit: Gothi quoque & Aquitanis bellum indixit, eosque superauit, occiso Alarico Rege. Fertur cum ad bellum progredieretur, si victor euaderet, equum beato Martino vouisse, qui duodecim & centum annis ante id tempus vita excefferat. Victoria potius equum tradidisse, eumque centum solidis redimere voluisse. Stetisse equum immobilem, donec precium duplicaretur. Qua ex re dixisse Regem ferunt: *Martinum bonum auxiliatorem esse, negotiatorem carum.* Hic Clodoueus uxorem duxit Clodosindam filiam Regis Burgundionum: quæ cum esset Christiana, adhuc ei pagano iuncta est, magnisque precibus virum orabat, ut baptizaretur: natosque filios clanculum baptizabat. Causa autem quæ Clodoueo Christianum fecit, esse fertur; quia quum pugnaret contra Sueuos, & pene victus esset, votum vouit, *Christianum se facturum, si ex prælio euaderet*, ob quam rem mutata fortuna, ex victo victor factus, subactis Sueuis Christianæ religioni se credidit. Cuius posterum in Francia usque ad Pipinum nonum patrem Caroli magni regnauerunt. Tunc vero Hildericum secundo per ignauiam regnum ademptum est: detonso enim eo, & in monasterium recluso Pipinus regnum accepit. Erant tunc in Francia Maiores domus, qui regnum gubernabant. Anno Domini septingentesimo decimo, mortuo Dagoberto minore Francorum Rege, filius eius paruulus in

\* al. Clodoueus.

Colonia Agrippina.



in tutela Pipini grossi (quem alii Ansgisi filium dicunt) in tutela fuit, & per insidias periit. Tunc Grimoaldus filius legitimus Pipini grossi, regnum vsurpans, à consanguineis Dagoberti Regis defuncti captus, in custodia obiit. Per idem tempus Galli, qui intra Sequanam & Ligerim fluuium habitabant, aduersus Francos bella mouere: & usque Magunciam excurrentes, eam ciuitatem obsederunt.

Franci Rege carentes Carolum Martellum ad regnum sublimare voluerunt. Qui regnum renuens, Ducatum accepit: Gallosque bello repressit. Prouinciam vero inter Ligerim & Sequanam, quæ tunc Gaudina vocabatur, à se Carlingam vocari iussit: quod postea apud Teutonicos diu seruatum est. Hic Carolus ex  
 P. 77. Adelheida \* nobili concubina Pipini grossi filius fuit, inclutus vir & bello potens: <sup>\* al. Alpheida.</sup> qui multa Sarracenorum millia gladio interemit, & pater fuit Pipini Nani, qui Carolum magnum genuit Imperatorem toti orbi cognitum, ex coniuge Berta, quam duxit ex Græcia. Hoc ergo Francorum genus, cum è Scythia in Germaniam venisset, ibique diu confedisset, Germanicum effectum est, & terram ipsam primo à se habitatam Franciam appellauit. Verum cum reseret imperium, ita & Francia aucta est, adeo vt tota ferme Gallia, & magna Germaniæ pars, à montibus Pyrenæis vsque ad Pannoniæ terminos Francia diceretur. Nam quicquid suberat, Francia vocabatur. Ea in duas partes diuisa fuit. Nam quod est Galliæ occidentalis Francia dicebatur: quod est Germaniæ, orientalis. Et Germaniam quidem eatenus extenderunt, quatenus sermo Germanicus protenditur.

Hæc gens sub Carolo Magno Romanum Imperium meruit: qui afflictam Longobardico bello sedem Apostolicam consolatus est. Carolus enim quamuis Galliæ potiretur imperio, Germanus tamen fuit in Germania natus alitusque. Cuius sedes plerumque in Aquisgrano fuit, quæ ciuitas Teutonica est: ibi palacium eius & caput ostenditur. Eius posterii imperium tenentes in Gallia & in Germania regnauerunt. Deficiente autem masculina linea, imperium ad Germanos, id est ad Francos orientales rediit: inter quos primus habitus est Otho. Est autem Imperium apud Germanos non eo modo, vt nemo imperare possit nisi Germanus: sed quoniam eligendi Imperatorem auctoritas Germanis tradita est, plerumque Germanus eligitur. Eam ob causam cum vacasset Imperium per obitum Ludouici Bosonis filii, Germani, quorum ea potestas erat, Germanum elegerunt; & Francum ex orientali Francia. Hæc præmisisse voluimus, quoniam de Franconia sermo incidit. Sunt enim multi, qui Francos eos solummodo esse volunt, qui circa Parisios habitant, & illis datum Imperium esse volunt: quos rectius Francigenas quis appellauerit.

*Francigena.*

Franconia vero, vt nostra ætate recipitur, à meridie Sueuis & Baioariis iungitur, ab occasu Rheno, ab ortu Bohemis ac Thuringis: Septentrionem iidem Thuringi Hassique excipiunt.

Prouinciam perlabitur haud ignobilis amnis, quem Moganum vocant. Ptolemaeus hunc fluuium Obrineam appellare videtur: qui superiores Germanos ab inferioribus eundem diuidere affirmat: neque enim alius fluuius est, qui eam diuisionem aptius quam Moganus efficere possit. Et hodie quidem inferiores Germani vsque ad Maguntiam procedunt: abinde superiores vocantur. Moganus vero ex montibus Bohemiæ ortus à regione Maguntiae in Rhenum exoneratur: ob quam rem non defuerunt, qui Maguntiam Moguntiam à Mogano fluuiio dici crederent. Perlabitur idem fluuius non paucas ciuitates: quarum illustriores sunt Herbipolis, Francofordia. In Herbipoli nobilis Episcopi sedes est qui & Francorum Dux habetur, & cum rem diuinam facit, gladium in altari nudum ante se habet. Francofordia nobile emporium est. In quo superi cum inferis Germani conueniunt, bis singulis annis. Ibi quoque Imperator eligitur ex veteri consuetudine: ob quam rem palam est, Imperium datum esse Germanis, quando inter eos eligitur, & coronatur, & si demum ad culmen gloriæ Romæ quoque diadema suscipit. Est & in Franconia nobilis ecclesia Bambergensis, ad Pognitium

*Mænus.*

*Herbipolis  
Francoford.*

\* annem sita: quam fundauit Henricus secundus Imperator, quem accolæ reli-

<sup>\* al. Regnitum.</sup>



Bamberg.

gioſe colunt & ſanctum habent. Ibi quoque Berengarius ſepultus eſt : qui regnum Italiae uſurpauit, & ab Othone primo captus, in Germaniam ductus, illic exulans obiit. Supra ciuitatem in ædito monte Arx eſt, & natura & arte munita, in qua nos aliquando cum Epifcopo loci prandium fecimus. Albertus nobiliſſimus Francorum Comes, & Othonis Saxoniae Ducis ex filia nepos, cum Conradum comitem occidiſſet, qui Ludouici Regis fuiſſe filius dicebatur; in hanc ſe arcem contulit, & aliquandiu Regis obſidionem pertulit. Difficilis expugnatio loci videbatur: ob quam rem ad dolos recurſum eſt. Otho Epifcopus Moguntinus miniſter ſcleris inuentus eſt: qui proſectus ad Albertum, litis arbitrum ſe dixit. Rogauitque Albertum, ad imperatorem in caſtra deſcenderet: quia vel pacem ei daret, vel in arcem reduceret incolumem. Credidit Albertus, & accepta iuriurandi religione Othonem ſecutus eſt.

Vix arcem egreſſi erant, cum Otho, *Vereor*, inquit, *ne diu apud Imperatorem morari oporteat. Vtilius fortasse conſilium erat, prius ſumpſiſſe cibum.* Laudauit Albertus verba præſulis, & in caſtellum rediens Othoni prandium dedit.

Norimberga.

Quo ſumpto ad Imperatorem cum eo perrexit: vbi mox captus eſt, & capitali ſententia damnatus. Cui Archiepiſcopi fidem imploranti, reſpondit parum religioſus pontifex, *ſe fidei ſatiſfeciffe: qui ſemel reduxiſſet incolumem, cum ad prandium introiuit. Bis reducere non promiſiſſe*, infelix Albertus gladio obtruncatus eſt. Melius Romani, qui pari fraude uſum vnum ex captiuis ab Hannibale Romam miſſis, victum remiſere, fraus enim (vt inquit Maximus orator) aſtringit periurium, non ſoluit. Prædia quæ Albertus habuit, Eccleſiæ Bambergensi poſtea ceſſerunt. Eſt autem Franconia partim plana, partim montoſa, montes ipſi haud difficiles ſunt, ager non admodum pinguis: nam plerumque arenofus eſt, multis in locis conſiti colles vineis, gratum producunt vinum: maxime vero apud Herbipolim. multæ ſyluæ, & multa venatio eſt. Terra in multos partita eſt dominos. Quamuis Epifcopum Herbipolenſem Ducem Franconiae dicant (vt ante relatum eſt) Moguntina eccleſia, & Bambergensis plurima obtinent loca: Palatinus quoque Comes haud paruam occupat partem. Marchiones potentes in ea ſunt. Multæ præterea ciuitates Imperiales apud Francones florent. De Norimberga dubium eſt, Franconiae an Baioariae cedat. Ipſum nomen indicat ad Baioarios urbem pertinere: Norimberga enim Noricum montem ſignificat, ob quam rem patet Noricorum ciuitatem fuiſſe. Norici autem Baioarii ſucceſſere: & nunc ea portio terræ Baioariae, quæ inter Danubium & Norimbergam iacet, Noricum appellatur.

Forchem.

Ciuitas tamen in parochia Bambergensi eſt, quæ ad Francones pertinet. Ipſi Norimbergenses nec Baioarii, nec Francones videri volunt, ſed tertium quoddam ſeparatum genus. Vrbs ea nobilis, magnificis operibus, publicis ac priuatis ornata eſt, amne Pegnitio interlabitur, in agro ſterili & arenoso condita: atque ob eam rem induſtrioſo populo. Omnes enim aut opifices ſunt, aut negotiatores. Hinc multæ illis diuitiæ, & magnum in Germania nomen.

Apertiſſima Imperatorum ſedes, libera vrbs, & in medio ferme Germaniae ſita. Inter Bambergam & Norimbergam Forchem iacet, famoſum niueo pane oppidum: incolæ patriam fuiſſe Pilati falſo putant, in hac prouincia Fridericus Marchio Brandenburgensis potentiffimus fuit. Imperatori Sigismundo inter caros amicos habitus: ei quatuor filii fuerunt, Joannes, Fridericus, Albertus, & alter Fridericus. Joanni, qui primogenitus eſſet, Electoratus Imperii debebatur: ſed iudicium patris Fridericum prætulit, qui ſecundogenitus erat & aptior ad obeunda Imperii munera videbatur; prius itaque quam moreretur hæreditatem ſuam inter filios diuiſit, Fridericum Electorem inſtituit: neque male iudicauit. Nam Fridericus inter principes Germaniae ſapientia clarus habitus eſt, cuius conſilio multæ ſæpe prouinciæ pacatæ ſunt: Juſti quoque ac honeſti tenax habetur. Qui cum poſſet regnum Poloniae conſequi per electionem Baronum, recuſauit (vt ante diximus) ne vero hæredi iniuriam faceret. Albertus vero germanus eius cum Norimbergensibus bellum intuliſſet omnes ferme Teutonicæ principes ad ſe traxit: ciuitates ve-



ro Norimbergenſibus ſuppetias miſere. Graue id & atrox bellum fuit: in quo tot potentiae concurrentes, infenſiſſimis odiis biennio certauere. Nouem praelia commiſſa feruntur: ex quibus octo victor Albertus confecit, in vno tantum victus ſuccubuit: nec de pace conuenit, niſi poſtquam exuſtis agris, attritis villis, abactis pecoribus, ruricolis interfectis, commeatus ac pecuniae contententibus defuere.

Tum quoque pax ex Alberti ſententia magis dicta. Hic Albertus ab ipſa pueritia ac teneris (vt aiunt) vnguiculis educatus in armis, pluribus interfuit praeliis, quam alii ſui temporis Duces aut viderint aut legerint. Militauit in Polonia, pugnavit in Sleſia, Caſtra poſuit in Pruſſia, hoſtes in Bohemia fudit, ſtipendia in Auſtria fecit, praedas ex Vngaria tulit. Nullus in Germania terrae angulus, quem non calcarit armatus: duxit exercitus innumerabiles, proſtrauit ferociſſimos hoſtes, expugnauit munitiſſimas vrbes. In congreſſibus pugnam prior iniit, victor à praelio exceſſit vltimus, in oppugnationibus oppidorum ſæpe murum primus aſcendit. Ad ſingulare certamen crebris vicibus inuitatus nunquam detreſtauit: nec vnquam non ſtrauit hoſtem. In militaribus ludis, quibus haſta contenditur, vnus omnium repertus eſt, qui nunquam equo deiectus ſit, & omnes in ſe currentes deiecerit.

Ex torneamentis nunquam non victor exiuit. Septies ac decies ſolo teſtus clipeo ac galea, cætera nudus (vt eſt apud Teutonicos duelli quædam ſpecies) in prouocatores pariter armatos, acuta lancea cucurrit: nullo vnquam damno affectus, cum aduerſarios nunquam ipſe non equo deturbauerit. Quibus ex rebus non iniuria Teutonicus ACHILLES appellatus eſt: in quo non ſolum militares artes, & imperatoriae virtutes ſingulari quadam gratia reluxere; ſed nobilitas quo-

Teutonicus  
Achilles.

P. 79. que generis, proceritas corporis, ac venuſtas, & virium robur, ac ſacundia linguæ, admirabilem eum ac pene diuinum reddidere.

## CAPUT XXXII.

## DE BAVARIA.

BAIOARIA ad ortum æſtium, ac meridiei partem Franconiae proximat. Ea quoque perlata & diues terra eſt. Cui ad meridiem alpes Italiae iunguntur, Sueui decidentem eius Solem recipiunt. Auſtrales orientem, ac Bohemi Septentrionem. Danubius mediam ferme perlabitur inter Auſtriam ac Baioariam: alii Anaſum, \* alii Enum terminum poſuere: Sueuos à Baioariis Lycus diſterminat amnis, hanc olim regionem Norici tenuere, cuius adhuc portio media inter Ratiſponam & Norimbergam trans Danubium ſita (vt ante diximus) Noricum appellatur. Baioarii autem vnde dicti ſint, & vnde originem traxerint, non facile dixerim. Verum cum reperiam vetuſtiſſimos codices Baioariam appellare, quam moderni Bauariam dicunt; non difficile trahor, vt Baioarios à Bois dictos, & Gallicam fuiſſe olim gentem credam, huic opinioni Strabo v. commentarior. vires adhibet, ita inquit: *Præcis igitur (vt dixit) temporibus plurimæ Gallorum gentes fluuium incolebant* (de Pado loquitur) *è quibus ampliſſimi fuerant Boy, Iſubres, & qui olim cum Geſatis Senones Romana per impetum potiti ſunt vrbe.* Hos Romani poſterioribus annis funditus deletos perdiderunt: Boios vero è finibus eiecerunt, idem migrantes circumadiacentes Hiſtro locos cum Tauriſcis habitauerunt, bellum aſſidue contra Dacos agentes. Conſtat igitur Boios in Pannonia conſeſſiſſe: quo ex loco facile ſucceſſu temporis in Noricum, conterminam regionem, migrare potuerunt. Idem quoque Strabo lacum, qui modo Conſtantiensis appellatur, designans, paululum ab eo diſtare Rhætos ait, amplius Heluetios, & Vindelicos: Poſt Vindelicos autem deſertam Boiorum regionem eſſe affirmat vsque Pannonios: ob quam rem ſatis indicat Baioariorum terram à Boiis cultam fuiſſe.

\* al. Iſaram.



Idem Strabo Germaniam describens, Boios prius Herciniam habitasse siluam asserit; & Cymbros agmine facto eorum inuasisse locum, atque à Boiis reiectos fuisse. Itaque satis persuasum esse potest, Baioaricum nomen ex Bois descendere, ager enim eorum trans Danubium Herciniam siluam non parua ex parte occupat. Ea nunc Germanica gens est sermone vtens Teutonico: neque deserta regio (vt Strabo tradit; quod suo fortasse tempore fuit) nunc cultissima est, magnas ac ambitiosas ciuitates habens, & oppida nobilissima, quorum splendorem nescimus totâ Europâ, quæ vincere possint. Pontificales vrbes quinque in ea sunt: quarum vna metropolitana est, Saltzburgam vocant ex flumine Salza cui adiacet. Veteres Juuauiam vocauere. In Baioaria Ludouicus Ludouici filius, gibbo & struma deformis, impia contra patrem bella suscepit: venerandumque senem; & auctoritate insignem, qui quondam regnum Franciæ gubernasset, in arce munitissima obsedit: sed superis ultionem tanti sceleris petentibus, prius febre percussus occubuit, quam patris animum in suam traheret sententiam. Ille in potestatem Henrici eiusdem familiæ ducis postea factus, breui tempore vitam finiuit. Nec Henricus diu superuixit: qui cum prohibuisset subditos in anno Jubileo Romam petere, veritus ne prouincia pecuniis exhauriretur; eodem modo\* ad patres suos additus est. Successit ei Ludouicus filius ex sorore Alberti Cæsaris natus, magni animi adolescens, gloriæ cupidus, & pecuniarum contemptor: qui Judæos omnes publice positis edictis à suis dominiis exterminauit; vxorem de Saxonia duxit; neptem Friderici Cæsaris. Multas Germaniæ lites auctoritate sua composuit: quamuis sæpe & multum conatus reconciliare Cæsari Ladislaum Regem nequiuert. Albertus eius terræ ac familiæ princeps; postquam pater eius Ernestus puellam balnei custodem ab eo perditæ amatam, & in spem matrimonii susceptam, apud Straubingam Danubii fluentis demersit; cum diu vitam in mærore peregisset, tandem luctu peracto vxorem de domo Brunsvicensi duxit: ex qua sobolem pulcherrimam sustulit. Sub imperio Friderici podagra laborans, sepositis cæteris curis, sectatus musicam assiduus cantibus ac sonis animam oblectauit: interdum & venationi operam dedit. In Saltzburga (quam Metropolitam in Baioaria sedem obtinere diximus) tres Archiepiscopi fuere: quorum vltimus Sigismundus nomine, dum schismatis procella defauit, cum esset adhuc Præpositus, Romanam Ecclesiam magnifice iuuit. Sed Archiepiscopus à Nicolao pontifice creatus, literas Apostolicas quibus censura in Australes Imperatori rebelles fulminabatur, in Ecclesia sua publicari non fuit: siue metu potentiæ illorum, siue quod anathemate suspensio pacem melius inueniri putauit. Ad quam componendam & ipse descendens in Austriam, non paruam operam impendit.

\* al. anno.

Saltzburg.

## CAPUT XXXIII.

p. 80.

## DE RHENI TRACTV.

CIRCA Rhenum, qua flos Germaniæ nostro tempore visitur, inter Theodoricum Maguntinensis ecclesiæ præfulem, & Ludouicum comitem Palatinum Rheni crebræ dissensiones fuere: & sæpius ad arma ventum est, totaque circum regio rapinis atque incendiis vastata. Cum Maguntino Marchiones Badenses ac Brandeburgenses opem ferrent, Palatino Jacobus Treuerensis antistes, & nonnullæ ciuitates assisterent. Mortuo Ludouico Palatino, qui relictam Ludouici regis Cypri\* vxorem duxerat, filium ex ea natum infantem adhuc Fridericus frater eius, consentientibus terræ optimatibus arrogauit, gubernationem prouinciæ tanquam dominus accepit. Electorem Imperii se dixit, cælibatum perpetuum promisit, ne arrogato filio, vxorem ducens, præiudicium faceret. Rogatus Nicolaus Pontifex quintus id genus adoptionis confirmauit: recusauit Fridericus Imperator, sæpe multumque requisitus.

\* al. Sicilie.  
Fridericus Palatinus.



## CAPUT XXXIV.

## DE SVEVIA, ET MARCHIONATU BADENSI.

**I**N Sueuia Albertus Friderici frater Imperatoris, cum pluribus ciuitatibus variante victoria bellum gessit. Ab Ulmenfibus ciuitatem Rotemburgensem litigando per sententiam obtinuit.

In Marchionatu Badensi princeps Jacobus, iustitiæ ac prudentiæ fama inter Germanos clarissimus, cum sibi ad humanam felicitatem solam literaturæ peritiâ deesse angeretur, quos ex coniuge legitima liberos subtulit, ediscere literas compulit: inter quos diuiso patrimonio, cum Carolo primogenito singularis industriæ iuueni Imperatoris Friderici sororem matrimonio collocasset, plenus annis haud inuitus è vita decessit. Tyrolenses qui valles Eni & Athesis fluminis incolunt, cum Sigismundum principem suum in tutela Friderici Cæsaris existentem, iam grandiusculum ad se remitti frustra petiuissent, sumptis armis præfectos prouinciæ, quos Cæsar instituerat, deiecerunt. Et cum Tridentini iussu episcopi, cuius erant subditi, in fide Cæsaris perseuerarent, cum exercitu eo peruenere: ciuitatemque metu perculsam proditione ceperunt, & arcem oppugnatione fatigatam ad deditionem compulere. Exin pactiõibus cum Cæsare conuenientes, minori quam crediderant felicitate suum dominum obtinere.

## CAPUT XXXV.

## DE HELVETIA.

**S**VITENSES montani & feroces populi, cum Turicenses ex foedere, quod cum eis pepigerunt, descivissent; comparato exercitu in eorum agrum cuncta vastantes exire: quibus cum Turicenses prælio congredi præsumpsissent, usque ad internitionem cæsi sunt: tantaque Suitsensium in victos hostes crudelitas ac rabies fuit, ut eo ipso in loco parte victoriæ epulantes, congestis necatorum corporibus, & mensalia & sedilia ex illis apparauerint, & aperientes hostium cadauera cruorem biberint, corda dentibus lanauerunt.

## CAPUT XXXVI.

## DE ALSATIA.

**I**N Alsatia, cui quondam Heluetia nomen fuit, tunc Gallici, nunc Germanici iuris prouincia, cum Ludouicus Delphinus Viennensis in agrum Basiliensem omnem ferme militiam Gallicam eduxisset, ingentemque metum Basiliensibus incussisset, Suitsenses ex foedere sociæ ciuitati quatuor millia militum lectissimæ iuuentutis auxilio misere. Quos cum Delphinus appropinquare animaduertisset, *Vide Auctoris epist. 87.* medium inter Basileam & Suitsenses cum toto exercitu se opposuit, nec detrectare illi certamen: quamuis pedibus pugnaturo, xxx. millia equitum stare contra se aciem cernerent, pugnatum est summis vtrinque viribus: ad extremum non tam victi, quam vincendo fessi Suitsenses, nimis audaces præsumpti facinoris poenas dedere. Nam paucis fuga dilapsis, obtruncati omnes in campo iacuere. Rarus tamen ex Suitsensibus inultus interiit: ex quibus plures Gallorum reperti sunt, qui lanceis Suitsensium perforati, ad obtruncandum hostem per medias hastas dilapsi, vindictam accepti vulneris expetiere.

p. 81.

## CAPUT XXXVII.

## DE OTHLANDIA.

**I**N Othlandia nobile oppidum, Friburgium vocant, in potestate domus Austriæ multis seculis fuit, sed cum Ludovico Sabaudia Duci tantam pecuniam deberet, quam nec priuatim nec publice dissoluere ciues possent;



nostra demum ætate, & dum Fridericus imperat, in jus Sabaudienſium factum eſt. Quo in loco & ſermo Germanicus terminatur.

### ADDITIO EX VETERI CODICE.

**P**romiſit Pius Æneas multarum rerum doctrina illuſtriſſimus, in exordio huius operis, ſe in lucem ponere res Europeas. Cumque dirimendas ſuis limitibus Germania terras abſolvere nititur, ipſius Germania ſuperioris & inferioris florem omiſit. Nihil enim de Sueuorum antiquiſſimis Germania populis ſcripſit, quos Strabo, Iuliusque Caſar in ſuis commentariis, in re bellica miris extollit laudibus: quorum terra hodie multis Eccleſiis Pontificalibus, celebratiſſimisque urbibus eſt reſerta: Multi in ea amnes clariffimi, Lycus, Neccarus, Argos, fontesque Danubii. Terra ferax tritici, vinetis ditiffima, ingenioſiſſimo Martialique populo exuberans. Omiſit item utraſque ripas Rheni, à fontibus ſuis uſque ad Coloniam Aggrippinam verſus: ripas (inquam) omni ex parte utrimque habitatas, maximis Pontificalium urbium, Imperialiumque & Principum oppidis habitatas. Vbi terra uberi gleba reſerta, frumenti, tritici, & multorum fructuum ſacundiſſima, vino adeo exuberat, ut cuncta pene interranea, Germania etiam inferior, & totus pene occidentalis Septentrio Rhenenſi vino ſe reficiat. Pontificales urbes ſunt Conſtantia, celebratiſſimo Martini V. Concilio illuſtrata, Baſilea, Argentina, Spira, Wormatia, (quæ olim Vangiones) Moguntia, Conſluentia, omnes ciuitates celebratiſſimæ, ante muralibus, pinnis, foſſatis, propugnaculis ſuperbæ. Populus humaniſſimus partim ſuæ uberi terra, partim negotiationibus; Nobilitas vero venationibus intenta, in delitiis & voluptate maiorem vitæ partem agit. Præterit vero eam Alemannia partem, quam Limagus fluuius (vulgo Lintmag dictus à quo Alemanni proprie dicti, cuius fontes in montibus Alpium Glareſis lacum Thuricenſem influunt, in Rhenumque exonerant. Terra hæc non ſolum Limago, immo aliis celebratiſſimis fluuiis, ut Ruſſa, Arari irrigatur; oppidis, caſtellisque fortiſſimis exuberans, quarum Berna, Lucerna, Duregum, Solodorum, præcipuas credimus; bellicoſiſſimus populus, quem hodie ligam Suitenſium vocant, quæ terrori eſt vniuerſis circumiacentibus regnis, breuique ſuum imperium mirum in modum dilatauit. Omiſit item Flandriam, Hannoniam, Brabantiam, terras diuitiarum negotiationumque celebritate perſpicuas: in quibus Brugis, Gandauum, Mechlinia, Antuerpia; quæ licet olim Gallia Belgicæ annumerata ſint, tamen Germanorum imperio dilatato, omnes Germanica lingua loquuntur, propter viciniam cæteras linguas etiam perita. Quod ſi cuncta ſuperioris inferioriſque Germania famoſiora loca deſcribere niterer, magnitudine operis legentes tadio afficerem, quapropter breuitati inſiſtens, ſtudioſo cuique, quæ animum ſuum oblectant, legenda committo.

### CAPUT XXXVIII.

#### DE SABAUDIA, EIVSQUE DUCE AMADEO.

*Amadeus  
Sabaudus.*

**A**MEDEUS in Sabaudia dux primus eius gentis, cum annis ferme XL. poſt patris obitum prouinciæ gubernacula tenuiſſet; & admirandus adaucto paterno imperio, parta undique pace formidandus, cumulatis opibus, ſapientia plenus vicinis populis ac principibus videretur; ac demum relictis principatus gloriæ faſcibus in heremum ſe recepiſſet; & ſumpta penula, ac retorto baculo, cum ſex viris equeſtris ordinis ætate etiam prouectis, mundo & pompis eius renunciaſſet: ad extremum ſummi Pontificatus honorem, ex Baſilienſi congregatione ſibi delatum in Eccleſiæ diuiſione, ſuperis parum fauentibus accepit, barbam totondit quam promiſſam nutriuerat: ducatum primogenito ſuo tradidit, Eccleſiaſticas ceremonias & orandi morem repente didicit: ſtipatusque magna nobilium caterua, & illuſtri comitatu circumdatus, Baſileam perrexit: ubi ab iis, qui generale Concilium facere arbitrantur, in maxima populi multitudine, quæ undique ad ſpectaculum tantæ rei confluxerat, inter duos filios egregia facie adoleſcentes, alterum Sabaudia ducem, alterum Gebennarum comitem, ſolennibus pro more ſeruatis,



seruatis, tanquam Romanæ præful Ecclesiæ coronatus est. Celebrauit sæpe diuina, benedixit plebibus, officia curiæ ordinauit, Cardinales doctrina & auctoritate præstantes assumpsit. Fuerunt ei cum Rege Franciæ Carolo, cum Alfonso rege Aragonum (qui tum hostis Eugenii papæ fuit) cum Philippo duce Mediolani, cum pluribus aliis de recipienda eius auctoritate tractatus: qui omnes in cassum abi-

p. 82. re. Fuit & Fridericus Imperator apud eum in Basilea: sed clam nocte intempesta, ne adorasse idolum videretur, abiit. Reuerentiam ei, tanquam vicario Iesu Christi subditi eius tantum & Suitenses populi, & Basileses, & Argentinenses, & qui Alberto parebant Baioariæ duci, præbuerunt. Fuit enim magna spes obtinendæ Germaniæ: cum sex principes Electores in eam sententiam fœdus inissent, *Felix V. PP.* vt nisi Eugenius postulatis eorum annueret (postulabant autem res prorsus negandas) in Amedei, quem Felicem quintum appellauerunt, obedientiam transfirent. Sed cum illorum consilia Fridericus peruertisset, & qui sub nomine Synodi Basileæ degebant, abire iussisset; desperato meliori successu, interueniente per legatos suos Carolo Franciæ Rege Ecclesiæ pacem dedit: & Nicolao pontifici maximo reconciliatus, relicto nomine Papæ, Cardinalatus honorem retinuit, in quo paulo postea non sine boni viri opinione decessit, felix princeps & nimium felix, si senium suum ecclesiasticis titulis non fœdasset. Bolomerus, qui eius quondam & primus & dilectissimus consiliorum particeps fuerat, ingentesque opes apud eum cumulauerat, cum nobilitatis odium incidisset, proditoris reus factus mortis sententiam tulit, & in Lacum Lemani circa Gebennam præcipitatus, magno saxo ad collum suspenso demersus est. Nobilitas exinde noui Ducis indignationem subiens, ad Regem Franciæ confugit: cuius opibus adiuta in patriam rediit. *Io. Segobienfis* Ioannes Segobienfis homo Hispanus, moribus & doctrina illustris, qui cum summos Theologiæ præceptores doctrina æquaret, ab Amedeo dum se Papam dixit, Cardinalatus eminentiam acceperat, & deinde vnioni consentiens, à Nicolao pon. max. Cardinalatus dimisso titulo, Cæsariensi ecclesiæ præfectus fuerat; in altissimis reconditus montibus paruo monasteriolo contentus, vocatis ex Hispania legis Arabicæ magistris, librum quem vocant Alchoranum, & in quo Maomethis Pseudopropheta non tam mysteria quam deliramenta continentur, in nostram linguam de nouo conuertit, & ineptias\* eius veris ac viuis rationibus & argum-

\* al. mendacia.

tis explodit. In Arelatæ ad sepulchrum Ludouici Cardinalis sanctæ Cecilie eius vrbs Episcopi, quem Basileæ in consessu patrum præidentem vidimus, magna miraculorum opinio orta est, & inualidorum frequens vndique concursus spe sanitatis factus.

## CAPUT XXXIX.

## DE FRANCIE REGNO.

JOHANNES comes Armeniaci incesto Germanæ sororis amore percussus, nuptias *Iohanna virgo.* eius tentare conatus, haud indignus existimatus est, quem paterna hæreditate Carolus rex Franciæ armis eiiceret. In regno ipso Franciæ, quod nostra ætate Joanna virgo Lotharingensis diuinitus (vt credunt) admonita, virilibus indumentis & armis induta, Gallicas ducens acies, ex Anglicorum manibus magna ex parte (mirabile dictu) prima inter primos pugnans, eripuit: cum iam Philippus Burgundiæ dux paternæ necis iniuria remissa, relictis Anglis ad Francos defecisset; ingentes inter Carolum Regem & filium eius Ludouicum Delphinum Viennensem contentiones atque inimiciæ succreuerunt. Carolus Andegauensis eo tempore Delphini auunculus, apud Regem plurimum poterat, cuius potentiam cum Johannes Alanconii\* dux ferre non posset, Borbonii quoque princeps, & frater eius *\* al. Aluer-nie.* spurius Andegauensem gubernationem ægris animis intuerentur; Delphino vti à patre discederet suaserunt: sic enim fieri posse, vt Rex desiderio filii Carolum à se reiiceret, regnumque quod in eius manibus pessum ire videbatur, meliori consilio regeretur. Quibus permotus Delphinus insalutato patre ad Niuernenses disces-



discessit : qua re comperta Rex comparato raptim exercitu in Alconium duxit, & expugnatis non magno negotio plerisque munitionibus, ducem in deditionem accepit. Exin contra filium profectus, cum ciuitates Niuerniæ Delphinum aduersus patris imperium tueri non auderent, eum vt à se abiret rogauerunt : ille in Borbonium se recepit, nec diu post metuens dux Borbonii Regis iram, filium patri reconciliauit, quæ res fratri suo spurio haud bene cessit. Nam is paruo post tempore captus, in profluentem demersus, violati paterni iuris in filium poenas dedit. Interiecta deinde non longa temporis mora, Renatus à regno Siciliæ propulsatus, filiam suam Henrico Regi Angliæ in matrimonium collocauit : haud abnuente Francorum Rege, qui eo coniugio inducias belli sibi ac regno suo salutaris cum Anglicis plurimum annorum obtinuit. Quibus conclusis securus iam domi Rex, ut Franciam militaribus spoliis atque incendiis diu agitatam tantisper fineret requiescere, Delphinum cum magna parte copiarum ad Heluetinos ( vt est supra relatum ) dimisit, ipse cum reliquo exercitu in Lotharingos profectus Metensem Tulensemque agrum vexauit, oppidumque non parui momenti, quod Spinale vocant, deditibus oppidanis ab Ecclesia Metensi abstulit. Exin p. 83.

\* al. Doforfi.

Franciscus Aragonensis capto furtim oppido Fofersî, \* quod in Normandia situm in potestate ducis Britanniae fuit, duorum potentissimorum Franciæ ac Angliæ regum interrupisse pacem visus est. De qua re dum missis vltroque legationibus contenditur, Flochetus non paucis equitibus à Rege Franciæ profectus, quadrigas foeno oneratas, in quo milites armati laterent, pontem arcis, quo Sequana fluius iungitur ( qui Normanos à Francia dirimit ) edoctos rusticos educere iubet, atque in medio pontis portæ arcis subsistere. Ipse in insidiis cum cohortibus signum expectauit : quo recepto, cum milites è foeno dilapsi portam inuasissent, trucidatis custodibus tam diu locum tenere, donec Flochetus aduolans & pontem & arcem in potestatem recepit. Cuius rei percepto nuntio, & Rex ipse per eundem pontem in Nortmanniam copias traiecit, & ex alia parte Franciscus Britanniae princeps exercitum duxit. Dux Somerseti eam prouinciam pro Rege Angliæ cum imperio tenebat. Qui postquam tanti belli molem in se verti cognouit ; Talbotum copiarum ducem fama clarum, & rebus gestis insignem, Rothomagi apud se esse iussit, sperans eius consilio atque armis ciuitatem, cuius nutare animos animaduertat, in fide continere. Sed frustra eius consilium fuit. Nam Rothomagenses, post quam Regem appropinquare didicerunt, missis ad eum legatis, suam ac fortunarum suarum pacti salutem, exercitum intra urbem recipere, & imperata facere promiserunt. Quibus à Rege collaudatis, & domum cum præsidio militum remissis, vrbs Regi dedita est. Talbotus cum Duce suisque omnibus in arcem sese recepit : quæ cum oppugnari cœpta esset, interuentu Renati regis ea compositio facta est, vt Anglici quæ in Nortmannia retinebant, oppidis excederent : Dux ac Talbotus cum suis liberi essent. Sed cum præfecti oppidorum non parerent ; Dux Somerseti dimissis in arce Talboto, & duobus priuignis suis, clam recessit in Angliam. Arx postea dedita est, & priuigni ducis cum Talboto in potestatem Regis facti sunt. Talbotus vero cum esset clara apud omnes fama, quam non malis artibus sed robore corporis & ingenii dexteritate in aperto Marte quæsiuisset, data fide quod aduersus Francos deinceps arma non gereret, libere dimissus est. Hic anno Iubilæi indulgentiæ causâ Romam venit ( vt quidam putant ) absolutionem quæsiturus eius promissi, quod Regi Franciæ fecerat, mihi hoc minime compertum est : illud constat, Talbotum cum in Angliam redisset, iamque Rex Franciæ victa omni Normannia Burdegalam quoque armis subegisset ; à Regè suo non sine magis copiis in Gasconiam cum imperio missum, & Burdegalam recuperasse, & alia pleraque castella, quæ ab imperio Anglicano descuerant, partim vi expugnasse, partim deditione voluntaria recepisse. Quæ cum Rex Franciæ rescuisset, è vestigio duos exercitus instruxit : quorum alterum, cuius præfectus erat gener suus comes Clarimontis ac ducis Borbonii filius, cum quindecim millibus pugnatorum ( in quibus totius militiæ robor fuit ) ad urbem

Talbotus.



bem Burdegalam recto itinere contendere iussit: alterum quem ipse duxit, ex purpuratis suis conscripsit, quibus & comes de Schampis annumeratus est: quem lecti iuvenes octingenti equites ex Britannia sequebantur. Iussit & hunc exercitum retento apud se comite Rex præire: qui cum septem (ut aiunt) leucis à Burdegala constitissent, paruum quoddam castellum oppugnare coeperunt, turri quadam inter Burdegalam & castellum ipsum occupata, ac sagittariorum præsidio munita. Talbotus vero postquam sibi cum duob. exercitibus pugnandum esse intellexit, eum prius aggrediendum censuit, quem minori negotio superari posse confidebat. Egressus igitur cum robore sui exercitus iam vespere ad turrim (quam diximus occupatam) peruenit: qua primo impetu expugnata, sagittarios omnes ibi captos circiter quinquaginta interemit. Exin mane profectus, cum accepisset regium exercitum fugam parare, veritus tanquam sibi è manib. præda elaberetur iussis aliis sequi cum quingentis galeatis militib. dccc. sagittariis propere hostes aduolans tumultuarium prælium iniit. Consultauerant aliquamdiu inter se hostes, an retro pedem fugiendo referrent. Sed pudore propinqui Regis experiri belli fortunam decreuerant. Erant eis trecenta circiter tormenta aenea (id est bombardæ) quæ curribus aduexerant: ea viæ per quam Talbotus aduenturus erat, opposuerunt: multas præterea machinas hinc atque inde collocauerunt, quibus ignari hostes confici possent. Ut ergo furentes Talboti milites itinere, quod vnum patebat, in castra hostium nescius machinarum procurrit, dato tormentis igne, primo congressu trecenti ferme milites ictu lapidum ex Anglicis perire. Quod ubi Talbotus animaduertit, filium qui se sequebatur, ut abiret & ad meliora tempora se referuaret, admonuit. At cum filius diceret, non esse sibi ex eo prælio fugiendum in quo pater periclitatus esset, *Ego, inquit, fili, multis rebus clarissime gestis, nec mori sine gloria, nec fugere sine dedecore possum: te nunc militare incipientem nec fuga infamem, nec mors clarum faciet.* Sed cum filium plus pietas quam commonitio paterna moueret: cohortatis sociis, ut forti animo pugnam redintegrarent, testudine suorum facta in hostes, qui nunquam munitiones castrorum exire præsumpserant, audacibus inuectus animis, haud paruum illorum stragem edidit. Sed cum hostes partim tormentis ac numero militum superiores essent, & iam crus Talboto lapis è tormento missus arripuisset; cæsis maiori ex parte suis, & ipse tandem cum duobus filiis, altero legitimo, altero extra matrimonium nato, & vno genero, procumbens cecidit. Hic post tot sumptas ex hoste victorias clarissimi viri exitus fuit: quem Britonum potissimum constantia & audacia prostravit, Burdegala iterum in potestate Regis facta est. Britanniae ducem eius germanum, qui nunc rerum potitur, cum diu sobole caruisset, votum vouisse ferunt, liberos (si superi darent) priores duos alterum Minorum, alterum prædicatorum religione consecraturum. Exin voti compotem primum qui sibi natus est, Franciscum appellauit, secundum Dominicum. Natus est ei & tertius filius, quem in Angliam nutriendum misit. Is cum mortuo patre in Britanniam Francisco regnante redisset, ab eo captus & in carcere necatus est. Fama est eum, cum neci traderetur, impietatem fratris accusando; qui non contentus regnum sibi debitum occupasset, sed animam quoque sibi nepharius auferret: Franciscum coram diuino iudicio de patricidio responsurum infra Annum citasse. Ob quam rem, cum infra præfinitum tempus Franciscus hydro-pisi laborans obiisset (ut est religiosa Gallorum natio) correptum diuina censura vulgo creditum est. Dominicus ei successit: qui cum hoc anno sine liberis decessisset, Arturum Francorum militiae principem patrum suum successorem habuit non minus prudentia quam annis grauem. Carolus dux Aurelianensis, qui magno quondam prælio ab Anglicis captus fuerat, iam senex in patriam dimissus, defuncto Philippo Maria Mediolanensis ducatus, tanquam sibi ex successione dediti, sese titulis adornauit.



## CAPUT XL.

## DE FLANDRIA.

**I**N Flandria Gandauenses aduersus Philippum Burgundiæ ducem rebellantes, pluribus præliis victi, ad extremum supra viginti millibus ciuium vna pugna amissis, confessi errorem; Philippo manus dedere: legesque victoris acceperunt. Idem Philippus & oppidum Lucenburgenſe maximum ac munitissimum, quod in Saxonum potestatem dotis nomine venerat, non sine indignatione Ladislai Regis armis accepit. Delphinus Viennensis, cum mulierem quandam nomine Agnetem forma præstantem, ac patri dilectam occidere tentasset, iterum Regis odium incurrit, cumque nusquam alibi se tutum arbitraretur, ad florentes Philippi opes confugiens, vt primum eum conuenit; *Miserto mei, consanguinee*, inquit, *qui sine terra sum filius Regis.* Ad quem Philippus: *Dum terra mihi est*, ait, *caue te sine terra dixeris.* Nam quæ mihi prouincia parent, eadem tuæ sunt: nec minus tibi quam mihi obediunt volo. Post hæc ei & Brabantia florentissima oppida, & ambitiosas Flandriæ ciuitates ostendit, Dominum eum & Principem in conspectu suo nuncupari iubens.

## CAPUT XLI.

## DE ANGLIÆ REGNO.

**V**ENTUM modo est in eum locum, de quo breuissimus est in Angliam traiectus: neque enim plusquam xxx. millibus passuum id mare latum est, quod Flandriam atque Angliam interluit. Absolutis Gallia rebus, haud inconueniens fuerit transmissio Pelago Angliæ (cui quondam Britannia nomen fuit) quam breuissime mutationes sub Friderico factas commemorare. In Anglia, quam tum Albion tum Britanniam veteres vocare, rex Henricus solitudinis & ocii cupidus, alieno magis quam suo iudicio regnum gubernauit. Potens apud eum & in primis auditus Dux Sofulsi fuit: qui leges pro suo arbitratu & populis & principibus dixit; suppressit quos odiuit, & iterum quos amauit, erexit. Sed cum res Anglica apud Francos imminui cœpisset, & iam imperium Gallicum in pristinam gloriam emergeret: Dux Eboracensis coactis non paruis copiis, nec paucis stipatus Baronibus Lundonias venit, Regis consilium mutaturus, atque (vt ipse dicebat) Regis & regni saluti consulturus. Non expectauit eius aduentum dux Sofulsi: sed nauigio raptim correpto per Themisiam \* fluuium saluti suæ fuga consulere adorsus est. Sed destinatam quis mortem fugiat? Missi qui eum comprehenderent, per compendia itinerum cursum eius præuenere: ipsumque mox interceptum in prora naui, qua vehebatur, obtruncauerunt. Dux quoque Somerseti, qui perdita Normannia in Angliam remeauerat, potensque apud Regem credebatur, in carcerem coniectus est. Nobiles viri complures necati, nec sacerdotio præditi p. 84. parum est: inter quos & amicus noster Adam Molines secreti Regis signaculi custos, & litterarum cultor, amisso capite truncus iacuit. Nec diu postea, cum dux Eboracensis domum redisset, Somerseti princeps è carcere missus, permittente Rege gubernare regnum incepit: quæ res supremæ sibi cladis causa fuit, irritatus enim ob eam causam princeps Eboracensis, cum maioribus copiis quam prius Lundanias properauit: cui cum Rex obuiam vna cum duce Somerseti exiisset, putans illum aut verborum lenocinio placare, aut regia maiestatis auctoritate deterrere; nihil profecit. Eboracensis enim, cum esset longe potentior, iussu Rege vt in partem se reciperet; in Somerseti ducem ac eius equitatum irrupit, eumque mox captum: detruncato capite interfecit.

\* Tamesin.



## CAPUT XLII.

## DE SCOTIA ET HIBERNIA.

SCOTIA eius insulæ in qua est Anglia suprema, portio est in Aquilonem versa: fluminibus haud magnis, & monte quodam ab Anglia discreta, hic nos brumali tempore fuimus, cum Sol paulo amplius quam tres horas terram illuminaret. Jacobus eo tempore regnabat, quadratus & multo abdomine grauis: qui cum olim in Anglia captus vndecim annis in custodia fuisset, ac dimissus tandem suscepta ex Anglicis coniuge domum reuersus, complures regulos gladio percussisset, & ipse tandem à suis domesticis interfectus est. In quos ultione peracta filius eius regnum suscepit. Audiueramus nos olim arborem esse in Scotia, quæ supra ripam fluminis enata fructus produceret anatarum formam habentes: & eos quidem cum maturitati proximi essent, sponte sua decidere, alios in terram, alios in aquam: & in terram deiectos putrescere, in aquam vero demersos mox animatos enatare sub aquis, & in aere plumis pennisque è vestigio euolare, de qua re cum auidius inuestigaremus, didicimus miracula semper remotius fugere: famosamque arborem non in Scotia, sed apud Orcades insulas inueniri. Illud tamen nobis in Scôtia miraculum representatum est: nam pauperes pene nudos ad Ecclesias mendicantes, acceptis lapidibus eleemosynæ gratia datis latos abiisse conspeximus: id genus lapidis siue sulphurea siue alia pingui materia præditum, pro ligno, quo regio nuda est, comburitur.

Hibernia nunc nobis absoluenda esset: quæ paruo à Britannia disiuncta fretto, partim libera Scotorum amicitia & societate gaudet, partim Anglicano patet imperio. Sed quoniam nihil dignum memoria per hoc tempus, de quo scriptio est, gestum accepimus, ad res Hispanicas festinamus.

## CAPUT XLIII.

## DE HISPANIA.

LATISSIMA regio Hispania, & terra optimis comparanda, viris armisque potens; Hoc æuo nostro in quinque reges diuisa est. Primum ac maximum Castellæ regem appellant: proximum ei Aragonum: tertio Portugalsensem, quarto Nauarræ, quinto Granatæ, quod ab euangelio Christi alienum est, de ritu Mahometi. In Castella prænobili ac late dominante regno, cuius Reges Gothorum sanguine creti, nunquam genus variarunt; Aluarus de Luna natione Aragonensis, nobili genere, quamuis extra matrimonium natus, cum olim Joanni Regi adeo se insinuasset, ut vnus omnium regni regique potens videretur; Johannemque Nauarræ regem & Henricum magistrum militiæ sancti Jacobi potentia sua opprimere, ac regnum gubernare conatos armis deturbasset; postea tamen aduersante sibi Regina, redeuntibus illis, ac Regem in potestatem suam recipientibus, è curia pulsus, in possessionibus suis aliquamdiu priuatus vixit: felix, si concessio frui ocio nouisset. Sed nulla est regno deiectis quies: dum ergo sublimem locum, de quo rursus maiori cum ruina præcipitetur, vindicare conatur, Regi clam suadet, uti per speciem venationis in saltus sibi propinquos egrediatur: se cum potenti manu futurum obuiam: nec dubium, quin regni optimates libertatem Regi asserant. Non fuit difficilis persuasio. Rex cum paucis egressus, parum custoditus (nam Aluari iam pene nomen extinctum erat) ubi ad insidiarum locum peruenit, mox clamore edito Aluarus inter lectos exultans milites, *liberum Regem saluere* dixit, eumque secum adduxit. Qua re vulgata confestim mira inclinatio \* regni facta est, & iterum ad Aluarum regni gubernatio deuoluta, nec diu post cum eisdem Joanne atque Henrico atrox prælium commissum est, in quo plures vtrinque cecidere: victoria penes Aluarum fuit. Henricus non multis post diebus ex vulnere manus, quod in ea pugna receperat, mortem obiit. Magistratum

*Aluarus de Luna.*

*\* ab Inno-  
tio.*



\* *al. Discre-*  
*tanus.*

tum eius Alvarus obtinuit, & aliquamdiu postea Regis pariter & regni moderator est habitus: ad extremum tamen potenti invidia succubuit. Nam cum nobilem quempiam iussu Regis ingrata sibi quædam renunciantem, à fenestra suæ domus præcipitari iussisset, mox captus, & in medio foro capitali sententia damnatus est, non tamen ut ignavus occubuit; sed numeratis suis in Regem regnumque meritis, non lachrimas aut eiulans, sed alacri vultu & quasi ad epulas invitatus, cervicem gladio præbuit: vir alti spiritus, non minus domi quam belli clarus, & cui magna semper in mente sederint. Joannes deinde aliquot annis per se regnum administravit: quo vita functo, filius eius Henricus regnum accepit, adolescens animo plenus, & recti cupidus: qui relicta priori coniuge velut infœcunda, alteram ex Portugalia duxit Imperatricis sororem: & in regnum Granatæ cum exercitu profectus magnam hostibus terræ partem diripuit atque protriivit. Joannes Cardinalis Hostiensis, summa vir integritate, & scientia iuris eminens (cui iuuenis in dictandis epistolis servitui) senio confectus in eo regno, unde illi origo erat, animam Deo dedit. In regno Navarra & filius in patrem, & pater in filium arma suscepit: filiusque tandem regno pulsus ad Alfonso patrum Aragonum Siciliaque regem, peragrata prius Gallia, confugit. Nunc Ludovicus Montefia magister & Joannes Deseritanus\* viri præstabiles, ab Alfonso missi, reconciliare patri filium student. Joanna Alfonsi & soror & coniunx absente viro multis annis Arragonum & Valentia regnis, tot potentia ciuitatibus, tot nobilissimis principibus iura dixit: casta & sancta mulier, & digna quæ prolem peperisset Alfonso. Anno autem ab incarnatione Domini MCCCCXCI. totum regnum Betica (quod hodie Granata vocitatur) victis barbaris, Regeque eorum capto, ciuitateque Granata populosissima armis fameque durissimaque obsidione obtenta, à Christianis crucem Domini adorantibus pacifice hodie possidetur.

## CAPUT XLIV.

## DE PORTUGALIA, ET NOVO ORBE.

IN Portugalia Petrus cognomine infans (sic enim filii Regis, antequam regnent, appellantur) magni nominis princeps, qui totam ferme Europam peragravit, suæ virtutis documenta demonstrans, cum regnum tutorio nomine aliquamdiu summa cum laude administrasset, nec minori fide Alfonso ex fratre nepoti simul & genero suo restituisset, tandem subortis vtrunque dissensionibus, cum odio crescente ad prælium ventum esset, sagitta in incertum missa transfossus interiit vir magnorum operum, & qui olim sub Cæsare Sigismundo stipendia faciens, non parvam sibi gloriam in Turcos pugnando parauerat. Alfonso exinde mansuetissimus princeps, alti cordis & prudentia singulari præditus (neque enim in stultos vnquam regius Portugaliæ sanguis deriuatus est) post regnum quiete tenuit: cui cum obiisset dilectissima coniunx, eademque soror patruelis, hortatu ut aliam superduceret non suaderi potuit, sed omnis eius cura eo conuersa est, ut aliquid agat quod sibi laudem & Christianæ religioni fructum pariat. Quapropter inuitatis regni proceribus, suscepto publicæ crucis signo, classem in Turcos & expeditionem promissit.

*Hæc e Norico*  
*Cod. non sunt*  
*Æneæ: sed*  
*postea ab ali-*  
*quo addita.*

Annis vero sequentibus Henricus infans videns regni Portugaliæ fines paruis limitibus contineri, cupiens regnum ampliare, Oceanum Hispanicum summis viribus ingreditur, suasu & doctrina Cosmographorum situs terræ & maris noscentium. Inuentisque multis & variis insulis ab hominibus nunquam habitatis, inter cæteras præclaram insulam non sine suorum lætitia adnauigat, non tamen hominibus habitatam, sed fontibus irriguam, pingui gleba refertam, nemorosam, incolendis hominibus aptam: ad quam diuersa hominum genera colendam immisit. Inter tamen cæteros fructus aptissima est ad procreandum Zuccarum, quod tanto fœnore ibi nunc conficitur, ut vniuersa Europa zuccaro plus solito abundet. Nomen insulæ Madera est: inde zuccarum de Medera. Inuenit & alias insulas



fulas quam plures, quas habitari hominibus, baptisarique nominibus fecit, ut insulam S. Georii, Feyal de Pico : quarum vnam hominibus Alemanis ex Flandria habitandam concessit feracem tritici. Annis vero posterioribus, ut anno Domini MCCCCLXXXIII. Ioannes secundus Portugaliæ Rex, altissimi vir cordis, certas galeas omnibus ad victum necessariis instruxit : easque ultra columnas Herculis ad meridiem versus Æthiopiam inuestigaturos misit. Præfecit autem his patronos duos, Iacobum Canum Portugalem, & Martinum \* Bohemum hominem Ger-

\* Huic Mar-  
tino Behaim  
Noribergenses  
inuentum no-  
uum orbem tri-  
buunt, prout de-  
monstrare vo-  
luit Io. Christo-  
phorus Wagen-  
seil. in oratione  
parentuli Geor-  
gio Friderico  
Behaim No-  
ribergæ 1682.  
dicata.

p. 87.

Hi duo bono Deorum auspicio Mare meridionale sulcantes à littore non longe euagantes, superato circulo Æquinoctiali, in alterum orbem excepti sunt : ubi ipsis stantibus Orientem versus vmbra ad meridiem & dexteram proiiciebatur. Aperuere igitur sua industria alium Orbem hætenus nobis incognitum, & multis annis à nullis quam Ianuensibus (licet frustra) tentatum. Peracta autem huiusmodi nauigatione, vicesimo sexto mense reuersi sunt Portugaliæ, pluribus ob calidissimis aeris impatientiam mortuis. In signum autem portauere piper, grana paradisi, multaque alia quæ longum esset recensere. Aperto illo orbe magna piperis quantitas Flandriam versus vehitur ; & licet non sit adeo rugosum ut orientale, tamen acumen formam, & omnia ut verum piper præ se fert. Multa de ea re scribenda forent, quæ ne tædii arguar, bono respectu omisi.

## CAPUT XLV.

## DE ITALIA.

VLTIMIS Europæ finibus peragratis, & quantum propositi nostri fuit Septentrione decurso, in patriam tandem reuersus nouitates Italiæ cum iam referendæ occurrant, ab ea nimirum vrbe incipiendum esse arbitror, cuius creberrimas mutationes & Oriens simul & Occidens admiratur. Ea est Genua Ligurum domina ac regina : quæ ciuilibus agitata discordiis, memoria nostra imperium maris amisit. In ea cum excluso Philippo Maria Mediolanensium duce, eiusque prætor Opicino Olgate \* necato, auctore Francisco Spinola octo libertatis capitanei creati essent, eisque paulo post sublata libertate exactis, Isnardus Guarro \* ducatum accepisset annos supra septuaginta natus, auctore Thoma Fregoso (qui & ipse olim ante Philippî dominium ducali honore functus fuerat) cum homo grandæuus ad gubernationem inutilis videretur, vix septem diebus regnare permissus est, Thoma eius honorem surripiente. Quem cum quatuor gubernasset annis, germanus eius Baptista ad sedecim circiter horas regno expulit. Nam Thomam re- sumptis viribus, confestim fratrem palatio deturbauit : tres annos postea & nonnullis mensibus urbem regens, donec auctore Iohanne Antonio Flisco iterum ciuitas libertatem asseruit, delectis octo capitaneis priori ex more rempublicam administraturis, qui Thomam Fregosum in carcerem coniecerunt, cum iam ter patriæ suæ ducem gessisset. Horum principes fuere Iohannes Antonius (quem prænominauimus) miles equestri ordinis, & Raphael Aduanus \* iuris interpres. Sed hæc quoque paucorum mensium libertas fuit, cum Raphaeli non tam capitanei quam Ducis nomen placeret. Is enim gentilibus suis ac Spinularum primoribus in suam sententiam tractis, collegas suos magistratu abdicauit, ducalesque fasces assumpsit : quibus paulo supra duos annos est usus, à Barbana \* gentili & patruale suo à republica deiectus, Barbanam vero nondum mense toto principatu potitum, Ianus Fregosius Iohanni Antonio Flisco & Aurianis fauentibus regno pepulit. Qui paulo post Antonio pro suscepto beneficio necem parauit ; interposito Iohanne Philippo eius gentili, qui eum percuteret : cui & castella defuncti condonauit.

Genua.

\* al. Elcaco.

\* al. Suardus  
Smardoris.\* al. Ador-  
nus.

\* al. Barnaba



Iano vero cum rexisset annis paulo amplius duobus, in magistratu satis functo frater eius Ludouicus successit : qui à Petro patruele suo è dignitatis culmine deiectus est. <sup>Petrus Fre-  
sius.</sup> Is est Petrus Fregosius, qui modo regnat multa vi animi & corporis : sed optimatibus ciuitatis & omni ferme nobilitati odio habitus : qui & gentilem & patruelem suum Nicolaum Fregosium honestis moribus præditum, & philosophiæ studiis insignem, ob suspicionem affectati dominii vocatum ad se in palatium, paratis percussoribus interemit. Hunc cum regnasset annis quatuor, tam suæ quam aliarum nobilium familiarum principes vrbe deiecerunt ; Ludouico patruele suo (quem ipse ante deposuerat) in eius locum suffecto. Qui cum se parum gratum magnatibus esse intellexisset, eundem Petrum quem regno deturbauerat, in auxilium accersuit. Ille tertia post exilium die reuersus, & patruelem ducatu amouit, & omnes aduersarios vrbe pepulit. Quorum principes ad florentes Alfonsi Aragonum & Sicilia Regis opes conuersi, magnam & formidabilem classem ab eo impetrauerunt : cum qua iam ferme duobus annis terra marique Genuam oppresserunt. Ventum est sæpe ad mœnia ciuitatis, & aliquando intra ipsa suburbia pugnatum. Hoc autem anno, cum signo dato & in ipso portu & pro mœnibus vrbs vndique pugnaretur, ingressi sunt Aragonenses, ducisque milites ad magnam vrbs partem fugauerunt, passim cædibus, passim rapinis ciuitatem fadantes, sed adfuit præsto cum delecta iuuentute Petrus, qui fugientes suos sistere compulit, & in Aragonenses dilapsus ingenti edita strage urbem iam pene captam recuperauit. Actum tamen de eo fuerat, si portam quam ceperant hostes ita communissent, ne concludi superne potuisset, & aditum sequentibus noualibus fociis potentem retinuissent. Nunc ambæ partes quasi ex integro ad bellum se parant : quamuis fama est Petrum animo fractum Gallorum implorare auxilia, eorum Regi patriæ suæ principatum quem retinere non potest, pecunia venditurum. p. 88.

## CAPUT XLVI.

## DE MEDIOLANI DVCIBVS.

<sup>Philippus Ma-  
ria dux Mediol.</sup>

APUD Insuæ vrbemque tota famosam orbe Mediolanum, Philippus Maria dux gentis, qui Genuam ditioni suæ quondam subegerat ; Amedei Sabaudia ducis filiam matrimonio sibi coniunxerat ; Alfonsum potentissimum regem cum duobus fratribus, altero Rege Nauarra, altero militia Compostellanæ magistroque, multisque Regulis nauali prælio victum, captum, à Ianuensibus, & sibi a Iacobo Spinula Ianuensium tunc præfecto oblatum, & ad se vsque deductum, insolita vsus liberalitate, magnificentissime donatum libertati dimiserat ; Sigismundum Cæsarem Romam petentem, cum Mediolani ageret, visitare contemserat ; Bononiam, Forliuium, Imolam è manibus Tyrannorum armis creptas, sacro sanctæ Romanæ Ecclesiæ restituerat ; atrocem Suitensium gentem bello domuerat ; de Florentinis ac Venetis per suos duces sæpius triumphauerat ; totamque quondam Italiam tremefecerat : iam recedente fortuna, perdita Genua, Nicolao Piccinino ( in quo maxime fidebat ) defuncto, exercitui suo ad Casale maius iuxta flumen Padum duce Micheleto Carimiola ab Hostibus prælio fuso & castris exuto, magno numero equitum peditumque capto, eo deductus erat vt non modo Venetis, sed omnibus per circuitum populis ac principibus contemptui esset. Et Veneti quidem Abdua flumine transmissi, in agro Mediolanensi castra metati, tantum ei terrorem incussere, vt de relinquendo imperio cogitauerit : quæ sunt ultra & citra montes auxilia Regum deposcens. Sed quem fortunatum atque hostibus insultantem omnes honore ac fauore dignum existimauere, idem in calamitate constitutus ab omnibus tanquam odio dignus relictus est. Vnus tamen omnium Alfonsus accepti beneficii memor, ad opem ferendam sese accinxit : Sed cum serius iter agit, interim Philippus primum ob aduersam valetudinem oculis captus, deinde ex ipsa arce hostilium armorum fragore audito vehementer commotus, vitæ radio simul & lan-



languore mortem obiit: ipso Alfonso hærede instituto. Fuit autem Philippus ingenti corpore, in iuuentute macer, in senectute pinguiſſimus: deformi facie ac terribili, inſtabilibus ac prægnantibus oculis, ingenio peracri & callido; in largiendo profuſus, in parcendo facilis, in audiendo difficilis, at ubi in colloquium veniſſet mitis ac placidus, cultus corporis ac mundiciarum omniſque lenocinii negligens, venandi cupidus, equorum ſtudioſus: cæterum quietis impatiens, atque imperitandi audus: in pace bellum, in bello pacem quaſiuit: ſimulandi atque diſſimulandi egregius artiſex: in milites quam in ciues indulgentior, raro in publicum prodiit, delatoriſus facile credidit; in ſuſpiciones adeo pronus, ut ſæpe fidiffimos à ſe amicos leuiſſimis de cauſis alienauerit. Pulchris \* indutos veſtibus ægre ad ſe venire permifit: ſermonem de morte audiuit inuitus. Tonitrua ac fulmina mirum in modum expauit, tabifica lue percuffos ex urbibus migrare in agros iuſſit, eorumque domos incendio tolli: qua cura innumerabilem illum Mediolani populum multis annis intactum quodammodo ab ea peſte ſeruauit. Huic cum vita deceſſiſſet, funus nec tanto principe dignum, nec ſuis maioribus ductum eſt, nec ſepulchri decus additum. Populus cognita Ducis morte in libertatem ſeſe proclamauit, duodecim viris electis qui Rempubicam adminiſtrarent. Caſtrum portæ Jouis inſtar excellentiſſimæ Regiæ, captum ac dirutum eſt, & teſtamentum Philippi dilaniatum. At dominium Mediolanenſe multi aſpirauere: ſed qui coloratis vterentur titulis, quatuor tantum fuere. Fridericus Imperator deuolutum ad ſe principatum, Philippo ſine liberis legitimis vita ſubtracto, contendebat. Alſonſus ex teſtamento hæreditatem petebat. Carolus dux Aurelianenſis ex ſanguine Vicecomitum natus ab inteſtato ſibi deberi ducatum aiebat. Franciſcus Sforcia Vicecomes coniugem ſuam, quæ Philippi filia fuerat, hæredem patri ſuſcipiendam aſfirmabat. Auditæ ſunt legationes omniū in ſenatu Mediolanenſi: quarum aliqua ſermone directo dominium petiere, aliqua per ſimulationem oblato contra Venetos auxilii inſinuare ſe populo, atque inde paulatim vendicare dominium ſatagebant. Sed ciuitati, quæ iam libertate gauderet, & imperandi cupiditate demortui Principis militiam conduxiffet, nulla conditio placuit, quo iugum quouis pacto in capita ciuium videretur inferre. Obtulit tamen Imperatori cenſum quotannis, aureum poculum, ſi libera ſuis

P. 89. legibus dimitteretur. Dilaniabatur interea vndique Philippi hæreditas; Veneri Placentiam, Cremam, Laudam occupauere, & multa præterea minora oppida. Dux Sabaudia Ludouicus Valentiam & Confluentiam inuaſit. Aſtenses ad ducem Aurelianenſem Carolum defecere: qui ſuſceptis à Rege Francia non paruis auxiliis, Alexandrinorum agros vexare cœperunt. Papienſes inteſtinis agitati diſcordiis, diu ancipites fuere, quibus ſe potiſſimum partibus iungerent. Nouarienſes, Comenſes, Alexandrini, ac Terdonenſes, Mediolanenſium imperium ſubiere. Parmenſes in ſocietatem quodammodo recepti ſunt. Franciſcus Sfortia per idem tempus in Piceno agebat, quamuis maiorem eius prouinciæ partem iam amiſſiſſet, cum Philippus non multo antequam moreretur, ſibi per communes amicos reconciliatum, vt ad ſe rediret in Venetos pugnaturus, accerſuerat: rogato Alſonſo rege, ſibi vt ſeptuaginta millia auri nummum ſuo nomine numeraret; quo facto iam paratis atque inſtructis copiis itinere ſe accinxerat: cum mors Philippi enunciata, eum qui longo tempore ad Mediolanenſes opes inhiſſet magis ac magis properare compulit. Quem vt Lombardiam primum ingreſſus eſt, Mediolanenſes incerti, quo mens eius inclinaret, ne vel per ſeipſum vel coniunctus Venetis ſuis cœptis obuiam iret; miſſis oratoribus, & oblatiſ non paruis ſtipendiis conduxere: moxque duce ſui exercitus facto, vt Placentiam omnibus copiis obſideret, imperauerunt. Ipſe dicto parens, dum ad Placentiam in obſidione ſedet, Papienſes (qui iam Mediolanenſe imperium tanquam ſatiſidioſum & inſolens detraxerunt) ſeſe ſibi dedentes accepit, quæ res Mediolanenſium animos haud mediocriter conturbauit: qui per conuentiones inſubitum Franciſco dicebant, quampiā ex urbibus, quam olim Philippus tenuiſſet, occupare. Franciſcus



ciscus vero non se occupasse, sed dedentem & ultro se offerentem ciuitatem recepisse aiebat. At Mediolanenses cum eius potentiam vererentur, dissimulandum potius statuere. Ille continuata apud Placentiam obsidione, tandem summa vi oppugnare adorsus urbem, quamuis magna & forti militum manu munitam, armis tamen expugnauit ac diripuit. Mediolanense regimen per id tempus penes nobiles fuit, & apud eos qui Philippi quondam consilium direxere. Itaque res prosperæ sapientum ductu cedebant: etiam non parua Gallorum manus\*. Nam circiter tria millia equitum delecti roboris, quæ alpes transierat, apud Alexandriam profligata deletaque fuerat: & Veneti apud Carauagium magno prælio superati, omnes pene copias amiserant: & Lauda ab eorum imperio erepta, in potestatem Mediolanensium redierat. Cum Franciscus Sfortia ad infestandum Brixienses missus, siue quod principatum Mediolanensem (cuius opinionem sibi iam pridem finxerat) alio modo consequi non posse sperabat, siue quod Mediolanenses cum Venetis amicitiam societatemque clam sequentes, ne solus vtriusque populi præda relinqueretur, præueniendos censuit; prior cum Venetis foedus iniit. In quo cum multa hinc atque inde promissa essent, illud inter cætera conuenit, ut ad urbem Mediolani ditionemque eius obtinendam Francisco cum copiis proficiscenti, senatus Venetus & pecuniis & armis auxilio esset: qua re firmata mox in Mediolanensem duxit. Militabant eo tempore apud Mediolanenses Bracciani: qui cum Ludouicum de Verme, ac nonnullas alias Francisci copias apud Modoetiam fudissent, tandem relictis Mediolanensibus ad eum defecere. Franciscus filiam suam Iacobo Picinino uxorem despondit. Carolus vero Gonzaga haud ignotus copiarum ductor, qui paulo ante à Mediolanensibus deficiens ad Franciscum venerat, postquam desertos eosdem Mediolanenses, & sine ullo duce relictos animaduertit: iterum ad Mediolanenses relicto Francisco transiuit. Erat hic vasto corpore, formaque pene gigantea, viribus vero quæ magnitudini responderent; dicendi copia clarus, literis græcis ac latinis instructus: sed animo inconstanti, & ingenio ad omne facinus siue honestum siue nefarium parato: cui non parua spes fuit, oppressa in Mediolano libertate, dominium urbis arripere: sed fortuna iam Mediolanensibus nouercante, Placentini, Therdonenses, Nouariensesque populi ab eis deficientes, Francisci præsidia receperunt. Alexandrini cum nullam in eis spem sitam esse contuerentur, Wilhelmi Montisferrati principis fratris imperio se commiserunt. Respublica medio tempore ex nobilitate in plebem defluxerat: lectique viri duodecim, qui vrbi de more præessent, ex fece populari ignobiles, atque incogniti \* magistratum gerebant. Hi cum ignobilitatem, quam multis modis offenderant, suspectam haberent, neue cum Francisco sentirent; suadente Gonzaga (qui eam viam ad principatum urbis arripendum commodissimam existimauit) septem primarios ciues, genere nobiles, & opibus abundantes raptim interceptos per noctem obtruncare: ac deinde info-

p. 90.

ro plebi spectaculum obiecerunt. Inter quos Iacobinus Bossius egregius adolescens, placidus moribus, & literis eruditus, & nobis amicitia iunctus, prorsus innocens, supinus truncusque iacuit. Nec diu post Iohannem Caynum venerabilem senem, & filium eius Franciscum egregia forma iuuenem, non alio crimine irretitos, nisi quod illustrissimæ Blanca Mariæ Francisci coniugi sanguine iuncti erant, crudelibus affectos cruciatibus necare. Exin Georgius Lampugnanius \* iuris interpres sub specie legationis, tanquam ad Imperatorem mitteretur, in Modoetia captus atque interfectus est; magnus libertatis assertor, & qui testamentum olim Philippi (populari fauens regimini) laniasset. Nec Theodoro Bossio, admodum in ciuitate gratiofo, pepercerunt: quem cum diu in vinculis tenuissent, tandem interemerunt. Galeothus quoque Tuscanus, & ipse natus nobilis, atque opulentus ciuis, interciscus occubuit. Quibus ex rebus cum iam nulla libertatis forma relicta esset, & duodecim viri ausu tyrannico urbem cadibus ac rapinis faderent, successorumque comitia prohibentes inuito populo sibi ipsis imperium prorogarent; commota denique atque incensa ciuitas, correptis armis, nouo magistratu

\* al. ignauus.

\* al. Lampugnanius.



stratu ex nobilitate creato, Tyrannos è republica eiectos in carcerem coniecit. At cum neque hoc modo respirare populus posset (nam perditis omnibus, excepta ciuitate Comensi ac Parmensi, quæ in officio ad vltimum perstiterat; Franciscus dura obsidione ciuitatem premebat) iterum plebs incensa nobilitatem è palatio pepulit, Tyrannos demptis vinculis, tanquam libertatis amatores & optime de republica meritos, in priorem locum restituit. Illi ad priores artes reuersi, cum satellites magno numero sibi assumpsissent, multaque suadente Carolo spolia perpetrarent, nobilitatemque prorsus opprimerent; non tamen ei viam ad inuadendum principatum permisere. Quod cum ipse animaduertisset, & iam sibi periculosam apud Mediolanenses moram intellexisset, per internuncios Francisco reconciliatus, ac magnis allectus præmiis Laudam illi prodidit: tertioque iam fidem fallens, non sine magno Mediolanensium damno, ac plebis consternatione, ad eum transiuit. Non tamen defuit Tyrannis animus, quin postulatis vndique subsidiis, Francisci iugum iam prope ceruicibus imminens excutere conarentur. Sed cum alios frustra rogassent, Venetos tandem ne se delinquerent, peruicerunt. Nam neque illis ex usu videbatur, Franciscum ætate florentem, rei bellicæ peritissimum, cuius iam vires atque arma non sine graui iactura sensissent, eo imperio potiri, quod suo par tandem videretur, percusserunt igitur foedus Veneti cum Mediolanensibus, legesque quas tota citerior Gallia sequi deberet, præscripserunt: mandantes Sfortiæ, vt certis contentus vrbibus ac terminis, Mediolanenses in pace dimitteret. Ille haud ignarus, se breui periturum vbi Venetis paruisset, imperium eorum contempsit: & quamuis desertus ab omnibus videretur (nam soli Florentini, & hi quidem parce opem ferebant) in obsidione tamen perseuerare decreuit. Iam mortuo Francisco Picinino, frater eius Iacobus cum Brachianis ad Venetos transierat: iam Leonardus Venereus à Senatu Veneto missus, Mediolanum ingressus, auxilia & commeatus magnam copiam, quibus ciuitas indigebat, propediem affore pollicebatur. Erat & in exercitu & in ciuitate summa omnium rerum indigentia: ita vt dubium videri posset, an obsidens Franciscus, an obsessus dici deberet. Vix ei bis mille equi supererant, qui ferre sessorem possent: & milites stipendio fraudati, pro cibis sese armis exuerant: neque tum Francisco argentum erat, quo stipendari militi posset. Sed inter spem metumque dubius, obsidionem de die in diem, verba pro factis ostentans, producebat. In ciuitate vero cum iam frumentum omne absumptum esset, nec aliud genus edulii restaret: & iam canes, equi, ceteraque id generis animalia manderentur, nec ferre amplius famem multitudo posset: collecti in unum apud portam Vercellinam, correptis armis in forum prorumpunt, obuiumque Leonardum Venetorum legatum gladiis confodiunt: ac discerpunt: exin palatium fufis Tyrannorum satellitibus aggrediuntur: quo sine resistentia occupato, quos inuenerunt Tyrannos, in vincula coniecere. Exin missis ad Franciscum legatis, principatum ei ciuitatis obtulerunt: qui mox ingressus dominium vrbis accepit, & deinde non multis interiectis diebus cum liberis ac coniuge reuersus ducalibus insignibus exornatus, in triumphantis modum urbem intrauit, qui cum iam Comum Parmamque in deditionem accepisset: Wilhelmoque Monteferratensi Alexandriam ademisset, non paruum deinde bellum Florentinis sociis cum Venetis & Alfonso Rege diutius gessit: in quo cum acrius premeretur (neque enim tantæ potentia par esse poterat) Renatum Regem fortissimis equitum cohortibus cinctum, ex ulteriori Gallia magnis stipendiis ac promissis allectum, in auxilium accersiuit. Qui cum superatis montibus in Italiam descendisset, ac Wilhelmum è Monteferrato arma ponere per amicitiam ac necessitudinem compulisset, & iam castra Francisci castris coniungens in hostilem agrum descendisset, expugnatisque raptim nonnullis castellis (more Gallico) mortales omnes in eis comprehensos trucidasset, tantus mox terror Venetos inuasit, vt iam castra castris conferre amplius nullo pacto præsumerent: nec iam retinere posse vel Brixiam, vel Bergomum, agris amissis confiderent. Cumque Turcorum bellum res eorum maritimas infestaret, repente



præter omnium opinionem pax, quæ diu in Senatu Apostolico frustra fuerat agitata; denique apud Laudam interuentu cuiusdam incogniti, sed probatæ & integræ vitæ Monachi \* inter Venetos & ipsum Franciscum clam Rege facta est, quæ res ut Regi molesta, ita Francisco utilis, Venetis necessaria fuit. Arcem deinde Mediolani infanientis populi furore dirutam, Franciscus breui restaurauit: mira Fortunæ siue cuncta regentis Dei prouidentia, nobile ac magnificum opus hisdem manibus subito reffectum est, quibus fuerat paulo ante reiectum. Franciscus Philéphus nobilis Satyrarum scriptor, per idem tempus ad heroicum carmen conuersus, res Sfortiæ scribere cæpit: Leodisius Cribellus \* soluta oratione ac metro clarus haberi cœpit.

\* vide auctoris epist. 172.  
\* al. Trebellus ad hunc auct. epist. 230. & 291.

## CAPUT XLVII.

## DE VENETORUM REPVBLICA.

**A**Pud Venetos terra marique potentissimos, quæ nomen Italicum apud Barbaras nationes longe lateque clarum fecere, Filius Francisci Foscaris ducis veluti quippiam in rempublicam molitus esset, in exilium actus, deinde reuocatus, & iterum in suspicionem criminis adductus, & crudelissime tortus, cum nihil mali confiteretur, relegatus in Peloponnesum, miseram ibi vitam finiuit. Gener eiusdem ducis Andreas Donatus, dum Cretam insulam pro Veneto imperio gubernat, Dux insulæ appellatus: reuocatus domum honore priuatur, & magna multatus pecunia, in exilium mittitur. Armilaus inter Venetos dignitate & auctoritate potens, dum ex consilio ad multam noctem domum reuertitur, iaculo transossus occiditur: nec qui tantum scelus patrauerit, inuentus est: quamuis id filio Ducis crimini dederint. Franciscus Barbarus studiis humanitatis excellens, editis non paucis neque illaudatis opusculis, senio confectus, non sine celebri nomine vita decessit. Imperator Fridericus, cum Roma rediens, eo se cum coniuge & Rege Hungariæ Ladislao, totoque comitatu recepisset, libenter & amice visus incredibilibus honoribus cumulatus est. Franciscus Dux gentis qui annos quinque & triginta summa cum laude ciuitatem rexerat, Philippo Mediolanensium duci Brixiam Bergomumque ademerat, copias eius pluribus in locis fuderat, Franciscum Carminiolam clarum ducem copiarum de prodicione suspectum securi percusserat; Marsilium Cararium (cuius maiores diu Patauium per tyrannidem tenuissent) dum paternam hæreditatem vendicare conatur, interceptum necauerat; pacem cum Turcis non tam honestam quam necessariam fecerat, imperiumque Venetum terra marique longe amplificauerat; gubernationi tandem cedere compulsus est: tanquam præ senio reipublicæ videretur inutilis. Ille veluti contumelia affectus, ingrata Patriæ aspectum non ferens, eamque vitam recusans quæ careret imperio, è publico palatio in priuatam domum se recepit: vbi cum principatum suis ciuibus reddidisset, ægram quoque confestim animam naturæ restituit. Cuius casum tanquam præuidisset, Baptista Blasius Cremonensis astronomus pluribus antea mensibus prædixerat. Erat autem Franciscus cum moreretur, non longe ab anno suæ vitæ, nonagesimo, venerabilis senex, præcipua corporis maiestate decorus, memor omnium quæ post infantiam aut vidisset aut audiuiisset; facundia copiosus, ac ingenio prompto, ac opere impiger ac dexterrimus, & qui moderari frena Senatus optime nosset. Eius pater in Ægypto negociatus, cum prophetam regionis illius quempiam de futuris interrogaret, responsum ab illo accepit, *Filium sibi esse, qui aliquando suæ ciuitatis principatum assequeretur.* Francisco suffectus Paschalis, vir singulari prudentia, & moribus humanissimis: cuius ducatum nulla putant bella suscepturum, nisi vel necessaria vel admodum gloriosa.

Franciscus aux Venet.



## CAPUT XLVIII.

## DE MANTUA.

**L**udouicus Marchio Mantuanus inter principes nostri sæculi famæ non medio-  
 cris, litteris eruditus, & rebus militaribus exercitatus, in eo bello quam Ve-  
 neti cum Francisco Sfortia post dominium Mediolani ab eo captum gessere partes  
 p. 92. illius secutus, magnum momentum rebus eius accessit. Carolus frater eius, qui  
 fidem Francisco fefellerat, in vincula coniectus, sub eius fideiussione dimissus;  
 cum neque sic promissioni suæ faceret satis, omnibus quæ in Mantuano agro te-  
 nebat, oppidis priuatus est. Sed cum stipendia Venetis faceret, non paruæ eorum  
 copias in Mantuanum duxit: vbi vastatis late atque incensis agris, cum fortuna  
 principium eius belli secundum fecisset, & iam Mantuani metu perculsi rebus suis  
 diffidere viderentur; Ludouicus accersitis ex Mediolano auxiliis milites suos in  
 aciem producens, fratri copiam pugnæ fecit: nec ille certamen detrectauit.  
 Commissum est atrox prælium, in quo duo fratres, ambo ætate florentes, ambo  
 rei militaris periti, ambo corporis atque animi viribus præstantes, de gloria, de  
 imperio, de vita summis conatibus contendere. Denique victor Ludouicus fuso  
 fugatoque Carolo, omnes eius copiarum Duces ac primores equitum, cæsis plu-  
 rimis intercept. Ille deinde patria extorris atque egenus, morbo confectus in-  
 teriit.

## CAPUT XLIX.

## DE FERRARIA.

**A**puD Ferrariam mortuo Nicolao Estensi, principe omnium nostri sæculi fortu-  
 natissimo, nisi coniugis adulterium & in ea & filio dilectissimo vindicare olim  
 coactus fuisset; Leonellus dominatum suscepit, princeps pacificus, literarum pe-  
 ritus, & musicæ cultor. Quo decedente Borsius frater eius, & ipse Nicolai filius  
 ex concubina Ptolomea Senensi, ad principatum vocatus est: egregia forma iu-  
 uenis, & in armis cum laude versatus, dicendi & agendi peritus: qui cum Cæsa-  
 rem Fridericum Romam petentem, & inde reuersum magnificentissime accepis-  
 set: super Mutinam & Regium ciuitates ducatus honorem accepit: primusque  
 omnium in Estensi familia dux appellatus est. Eugenius Pontifex dum Ferrariæ  
 cum Græcis consilium ageret; Hugo Senensis, qui per id tempus medicorum  
 princeps habitus est, omnes qui ex Græcis studiosi philosophiæ eo conuenisse cre-  
 diti sunt, apud se inuitauit: quos cum opipare magnificeque pauisset, finito pran-  
 dio epulis mensisque remotis, eos in disputationem pedetentim placideque pelle-  
 xit. Cum iam Marchio Nicolaus adesset, & multi in Synodo excellentes philo-  
 sophi aduentassent; cunctos in medium philosophiæ locos adduxit, de quibus in-  
 ter se Plato & Aristoteles in suis operibus contendere ac magnopere dissentire vi-  
 dentur, edicens eam se partem defensurum, quam Græci oppugnandam ducerent,  
 siue Platonem illi, siue Aristotelem sequendum arbitrarentur. Cum Græci cer-  
 tamen minime recusassent, protracta est ad multas horas disputatio: postremo  
 cum rex conuiuii \* Hugo Græcorum philosophos alterum post alterum argumen-  
 tis & dicendi copia victos tacere compulisset; palam factum est Latinos homines,  
 qui iam pridem bellicis artibus & armorum gloria Græcos superauerant, ætate  
 nostra etiam literis & omnium doctrinarum genere anteire. Fuit autem domus  
 Estensis viris semper doctis amica: nostra ætate non solum Hugonem (de quo  
 præfati sumus) magnis ad se præmiis traxit, sed multos in iure ciuili, plures in  
 cæteris facultatibus honorauit. In studiis vero eloquentiæ Ioannem Aurispam Si-  
 culum græcis ac latinis edoctum, & qui versu prosæque claruit, inter familiares  
 habitum, ditem beatumque fecit. Guarinus autem Veronensis omnium ferme  
 pater ac magister qui nostra ætate Græcas literas didicere, admirabilis & omni

Hugo Senensis.

\* al. ex con-  
 uuii sententia  
 H.

Guarinus Ve-

ron.



honore dignus senex, qui omnem ætatem suam legendo, docendo, scribendoque percurrisset; vnicum senectutis suæ refugium, & illud quidem honestum, dignumque suis exercitiis ac virtutibus inuenit.

## CAPUT L.

## DE BONONIA.

*Formicarum  
pugna.*

IN agro Bononiensi pirum quandam aridam ex minoribus formicis pastus causa complures ascenderant, superuenere maiores non paruo numero, quæ illas partim occiderunt, partim deiecerunt. Post duas ferme horas tanta minorum formicarum vis exorta est, ut totus ager nigro tectus agmine videretur, accessere stipatæ omnes, & arboribus vndique stipitem circundantes, paulatim ascendere ceperunt. Maiores formicæ ubi hostes adesse animaduenterunt, conglobatæ superne pugnam expectauerunt. Postquam simul acies conuenere, commissio prælio maiores morsu rabido, modo illas, modo istas è minoribus interemere, totoque breui spacio confecerunt: ut cadentium morientiumque cumulus ad piri radices non paruus in terra succreuerit. Sed cum pertinacius instarent minores semperque acies aciem premeret, vigintique aut plures vnam ex hostibus circum-<sup>p. 93.</sup> darent, & à tergo & à fronte pugnantes vndeque latera confoderent, victæ tandem maiusculæ, & ad vnum omnes necatæ, illati prius temere proelii poenas dedere. Hæc acta sunt; spectantibus Romanæ Ecclesiæ copiis, cum Petri cathedram Eugenius quartus teneret: ea nobis qui se vidisse ait, vir fide dignus & auctoritate retulit, Nicolaus Pistoriensis utroque iure consultus: qui tum in castris Apostolicis Nerii Senensis Episcopi vices agebat. Simile hoc illi est, quod in Gallia Belgica non longe ab vrbe Leodio constanti fama gestum ferunt. Nidum siue in arbore, siue in rupe falco sibi parauerat: ouaque fouens pullos auidus expectabat. Hunc corui superuenientes loco deturbauere, ouis eius effractis ac voratis. Spectauerunt id è proximo bubulci: fugientemque trepidum falconem annotauere.

*Falconum &  
coruorum pu-  
gna.*

Postridie (mirabile dictu) falcones coruique quasi ex toto orbe ad pugnam vocati, isti septentrionem, illi meridionalem partem tenentes, ordinatis aciebus, & tanquam rationis capaces essent, aliis qui cornua obseruarent, aliis qui media ducerent agmina dispositis, atrox ac ferocissimum proelium in aere commiserunt. In quo cum modo corui, modo falcones cederent, & iterum resumptis viribus certamen instaurarent; totus vndique subiectus ager & pennis & cadaueribus obiectus est; ad extremum victoria penes falcones fuit: qui non solum rostris, sed etiam vnguibus acerrime decertantes, coruos omnes ad internitionem deleuere. Exin paruo tempore interiecto cum duo de Leodiensi ecclesia contententes, alter à Gregorio tertio decimo, alter à Benedicto duodecimo in Episcopum electus (erat enim inter illos de Romano Pontificio disceptatio) ambo cum copiis in eundem locum pugnaturo venerunt. Ioannes dux Burgundiæ alterum armis iuuat, alterum Leodiensis populus sequebatur. Pugnatum est collatis signis; summa utrinque contentione, horrendum cruentumque prælium factum. In quo tandem victor Ioannes Dux triginta millia hostium cecidit, memorabile eius rei fanum conditum est: quod nos illac postea transeuntes, caesorum ossibus plenum vidimus. Sed de illo falconum atque coruorum suam cuique opinionem relinquimus, veri periculo penes famam dimisso.

*Leodiense  
schisma.*

Bononia quæ non tam studiorum mater, quam seditionum alitrix appellari potest, soror & ipsa ciuitatis Genuæ, ac solius inconstantia constans, cum factionem lambecariam non sine cæde, multosque ciues domo pepulisset communi Conetulorum ac Bentiuolorum consilio regi cepit: Principes factionum Baptista Connetulus, & Hanibal Bentiuolus fuere ambo sanguinarii, ambo patris cædibus insignes: qui licet simul compatratus sacramento inuncti essent, nihil tamen

inter



inter se meliores fuere. nam Hanibal dum leuato de sacro fonte Baptistæ filio, vi-  
 furus puerperam compatrem sequitur, eique manu pressa pro nouo nato congra-  
 tulatur; ab irruentibus ex improviso Baptistæ satellitibus obtruncatur: vt manife-  
 ste apparuerit, Baptismi sacramentum non tam foederis retinendi, quam cædis  
 patranda causa à Baptista quæsitum fuisse. Sed non inulta mors Hannibalis fuit:  
 nam qui partes eius sequebantur, sumptis paulo post armis, fugatis aduersariis,  
 plateam obtinuerunt. Baptista indicio tandem puerili, in specu quodam subterraneo  
 cum plerisque complicibus suis latitans, repertus & fumo compulsus exire, mox  
 pluribus vulneribus confossus est. Cadauer eius in forum tractum, & diu ludi-  
 brio habitum, cum plerique more ferarum cor eius dentibus laniassent, cruorem-  
 que bibere non horruissent, tandem exustum est. Apud Florentiam per id tem-  
 pus Xanthus latebat Herculis Bentiuolii (quem quondam Eugenius pont. max. in-  
 terfici siue iusserat, siue permiserat) filius extra matrimonium natus, pauperem  
 vitam in lanificii exercitio ducens, nec satis gnarus, quo patre genitus esset: Hunc  
 Bononienses è vestigio vocant, recusantem & quodammodo inuitum in patriam  
 ducunt, equitem ex lanifice faciunt, tutorem Hannibalis filio reipub. principem  
 tradunt. Cuius ea in rebus aduersis fortitudo, ea in secundis moderatio hacten-  
 us ostensa est, vt Herculis filium omnes norint. Qui cum exules per proditio-  
 nem nocte quadam urbem intrassent, ac excitato rumore quasi victores insultas-  
 sent; haudquaquam destitutus animo, excitis amicis, correptis armis in eos pro-  
 filiit: nec mora, victos cæsis captisque pluribus ex ciuitate deturbauit. Bessarion <sup>Bessarion Car-  
din.</sup>  
 eo tempore Cardinalis Nicænus, natione Græcus, prudentia singulari, & nostra  
 suæque lingua peritissimus, Nicolai quinti pont. max. in ea vrbe vices gerebat:  
 qui vsque ad ipsius Pontificis obitum legatione functus, nobilitati plebique iuxta  
 carus fuit: quamuis eo deducta ciuitas est, vt legati Papæ rogare magis quam  
 imperare queant. quod plane nunc experitur Ludouicus sanctorum quatuor coro-  
 natorum Cardinalis legatus: qui quamuis ingenio valet, & eapraditus est aucto-  
 ritate, quæ summi Sacerdotis nepoti deberetur, non plus tamen in vrbe potest  
 quam Senatui placet & Xantho Bononiensi viro.

p. 94.

## CAPUT LI.

## DE FLORENTIA.

**FLORENTIAM** urbem in Fesulanis ruinis ad ripas Arni fluuii conditam, prisca  
 homines Fluentiam vocauere, quæ cum auspiciis fundata felicibus, vicinas per  
 circuitum ciuitates excellere, mirisque modis imperium propugnare cepisset; Flo-  
 rentia longe melius quam fluentia dicta est. In hac vrbe Pontifex Maximus Eu-  
 genius quartus id concilium quod Ferrariæ cum Græcis coeperat, magnifice con-  
 summauit. Erant plures inter Græcos ac Latinos super arcanis orthodoxæ fidei  
 contentiones: quarum maxima & difficillima fuit de sancti Spiritus processione:  
 cum Græci paraclitum ex patre duntaxat, nostri ex patre filioque procedentem af-  
 fererent. Post multas ac diuersas disputationes (in quibus tanquam interpres Ni-  
 colaus Saguntinus vtraque lingua disertissimus, ingenio facundiaque iuxta prom-  
 ptus, illustre nomen adeptus est) tandem cum Latina Ecclesia in vno fidei sym-  
 bolo consensere. Ciuitas in imperatorem Græcorum, & Patriarcham Constan-  
 tinopolitanum, & omnes eorum comites abunde lauteque patuit: Patriarcha il-  
 lic senio confectus decessit, & apud Prædicatores intra Ecclesiam humatus est:  
 cui Maffæus Vegius poeta Laudensis non ignobilis epitaphium versibus imparibus  
 edidit. Nicolaus Picinius illustris copiarum ductor, ab exilibus Florentinis inui-  
 tatus, Fesulanum ingressus agrum, qui à Florentia decem millibus passuum ab-  
 est, hostiliter cuncta diripuit: nec diu postea in agro Aretino, cum Eugenio  
 simul & Florentinis bellum intulisset, apud Angleria \* magno proelio victus &  
 profligatus est. Ludouicus Archiepiscopus Florentinus apostolicis tunc copiis præ-  
 erat: qui ea victoria nobilitatus, ad cardinalatum paulo postea prouectus est. Eu-  
 geni-

\* al. Anglia-  
riam.



genius enim & vnione Græcorum facta, & Picinini metu deposito, mente atque animo auctus, septem & decem cardinales creauit: viros aut genere illustres, aut virtute præstantes, aut vitæ sanctitate conspicuos. Inter quos & duo Græci assumpti sunt, Isidorus Archiepiscopus Ruthenorum, & Bessarion Nicenorum pontifex: quorum supra meminimus. Alphonsus rex Aragonum rogatus à Philippo Maria (vt antea dictum est) sibi aduersus Venetorum potentiam opem ferret, coacto non paruo exercitu profecturus in Galliam iter ingressus est. Sed ante Philippus obiit, quam ipse Tiburi, quo iam epulerat, digrederetur: audita vero amici morte, & quod ab eo nuncupatus hæres esset, & in Sabinos profectus, magnificentissimo illi funere iusta perfoluit, deinde transmissio Tiberi recta via in Florentinum duxit, eo (vt aiebat) animo vt Florentinos reuocare suas copias ex Gallia cogeret, atque ita per Tusciam pacatam & sibi amicam ad opem Mediolanensibus ferendam, quos Veneti bello premebant, proficisceretur. Noluerant Florentini ab Alfonso Rege rogati Venetorum societatem deserere.

Quapropter Alphonsus in agrum Volaterranum profectus, Pomeratium haud ignobile oppidum, portas claudere ausum eo ipso quo venerat die copiis circumpositis vi cepit, ac diripuit: deinde ad Castrum nouum in agro eodem situm mouit. Cuius incolæ audita Pomeracii clade confestim absque certamine in deditionem venerunt. Idem fecere aliquot castella circumiecta. Exin Montecastellum natura & opere munitum obsedit: quo tempore ea imbrum magnitudo, eaque vis ventorum exorta est, vt neque extra tentoria quiescere milites possent, multis eorum discerptis per inane raptatis: quibus ex rebus & quod annonæ inopia laborabat, mouens inde Alphonsus Campiliam duxit: sed quoniam Florentini id oppidum præsidio & annona firmauerant, frustra ibi contendit. Castella tamen aliquot finitima in Gerardisca (id ei regioni nomen est) recepit, atque illis restituit, quibus Florentini prius ademerant. Erat in comitatu Regis Simonetus, mille ducens equites, qui finito Florentinorum stipendio ad eum transuerat. Sigismundus autem Malatesta (quem rex antequam Tusciam ingrederetur, cum equitibus mille & octingentis Peditibus conduxerat) cum ab eo indies expectaretur, ad Florentinos transiit. Fridericus quoque Vrbinatium princeps, notus & clarus in armis, Florentinorum stipendia faciebat, qui cum essent equitatu peditatuque haud inferiores Rege, omnemque illi expugnandorum oppidorum facultatem præriperent, non fuit Regi consilium in obsidione Campillæ perseuerare, & præsertim quod in montibus commeatus penuria premebatur. Diuertitur igitur ad loca maritima, & apud Populoniam, olim fama celebrem, nunc dirutam urbem consedit: quo in loco facile sibi ex regno Neapolitano & frumenta & bellica tormenta nauibus afferri poterant. Abest inde tribus ferme millibus passuum Plumbinum, nobile oppidum. In cuius obsidione (de qua postea dicemus) laboranti Regi Castilionum, & ipsum non parui momenti oppidum, prodente Florentinorum præsidio traditum est, præter arcem: quam cum Simonetus obsedisset, paucis post diebus per deditionem accepit. Dum vero Rex paulo ante apud aquam viuam in hibernis ageret, à legatis Mediolanensibus aditus est: qui opem eius implorantes, in eo loco decerni bellum aduersus Venetum senatum obtinere: Iam enim Franciscus Sfortia Mediolanensi populo indignatus, Venetorum auxilio fretus, eos subigere sibi summis conatibus nitebatur, quorum paulo ante fines & arma promouerat. Cum vero Rex soluta Plumbini obsidione Neapolim redisset, & deinde in Pelignos decessisset, Florentini legatos ad eum misere, pacem petentes. Quibus accepta fide in castra profectis, postquam mandata exposuerunt, bellumque recusarunt, Antonii Cardinalis Hilerdensis nominati inter primos theologi opera, qui id negotii de Pontificis voluntate susceperat, paucis post diebus ea lege pax Florentino populo reddita est, vt Castilionum & insula Gilii, \* quæ ipsius belli tempore Florentinis erepta fuerant, in potestate Regis remanerent. Sed cum Franciscus Sfortia Mediolano potitus esset, omnesque pontes & arces apud amnem Abduam tanquam Mediolanensis agri à Venetis repeteret, Alphonsus (qui cum Francisco esset infensus,

è re

\* al. Eulii.



è re sua esse ratus illum, ne radices in tanto imperio ageret, impedire) per Leonellum Marchionem Estensem reconciliatus Venetis, & cum eis amicitia societateque facta, Florentinis qui Francisci fortunam secuti & armis & pecunia eum iuabant, secundo bellum indixit: Ferdinandumque filium in expeditionem contra eos mittendum duxit. Erat is eo tempore admodum adolescens, ingenio eximio, & ad cunctas optimas artes docili ac parato, liberalibus disciplinis institutus, armorum tractandorum scientia edoctus, gloriæ cupidus, inediæ ac laboris patiens: cui pater sex millia equitum, duo millia peditum commisit, fuerunt & in exercitu eius comes Euerfus & Vrsinus Neapoleos haud contemnendi copiarum Duces: Fridericus quoque Vrbinas, qui superiori bello Florentinorum arma secutus erat, in eius exercitu militauit. Florentini vero postquam imminere sibi belli tempestatem senserunt, Estorem Fauentinum Symonetum (quem supra nominauimus) ac Sigismundum Malatestam, postremoque Alexandrum Sfortiam conducere: qui simul iuncti supra decem millia equitum, peditum vero magnum numerum in castris habuerunt. Ferdinandus tamen per agrum Crotonensem in Aretinum copias duxit: vbi castellis aliquibus non magni nominis vi captis atque direptis, Folianum non parui momenti oppidum cum oppugnare coepisset, nec hostes auxilium ferrent, post dies octo per deditionem accepit: equitatum Estoris apud montem Politianum, pluribus captis, nonnullis occisis, fudit ac fugauit. Recinium in agro Florentino vi expugnauit: Castellinam vero cum obsedisset, hyberno rigore inualecente recessit: & in maritima loca ad Aquam viuam patris exemplo sese recepit, quo tempore & Antonius Olzina Vadam in littore maris sitam nauibus occupauit, & ampliori fossa à terra communiuit: quo ex loco Pisani & Volaterranum agrum infestum reddidit. Cunque interea Florentinorum Duces ad Folianum castra mouissent; velletque Ferdinandus auxilium obsessis ferre, iamque itineri se commisisset: tanta in castra lues consecuta est, ut praelanguentium numero non modo ad rem gerendam, sed vix ad mouenda castra satis esset. Ob quam rem Folianum interea summa vi expugnatum, nec minori virtute defensum, tandem ab oppidanis clam presidio traditum est: qui tamen paulo post & ipsi victorum præda fuere: oppidum incensum ac solo æquatum.

Per idem quoque tempus Gerardus Gambacurta, dum castella quatuor, quæ pater à Florentinis acceperat, intra Apenninum sita, Ferdinando tradere vult, ab vno à suis proditus, castellis amissis, diu Regem mendicando secutus est. Exin pace apud Laudam (ut diximus) facta, reuocatur à patre Ferdinandus in regnum concessit. Florentini quæ amiserant, cuncta receperunt. Baldatus pedestrium copiarum haud ignobilis ductor, manu promptus & audax, cum diu Florentinorum stipendia meruisset; in palatium tandem accersitus, dum magistratui contumaciter respondet; captus, ex altissimis fenestris in forum præcipitatur: cui quamuis magno casu iam expirasset, securi tamen ceruix abscissa est. Inter Florentinos omnes, qui nostra ætate floruerunt, Cosmus cognomine Medicus & prudentia & auctoritate eminuit, is princeps vrbis habitus, Senatui quo voluit, impulit: ciuitati leges ex arbitrio dixit, inopes ciues complurimos ditauit, matrimonia constitutis ex argento suo dotibus multa coniunxit, illas magnificentissime exædificauit, in Ecclesias ditissima dona contulit, monasterium sancti Marci & amplum & nitidum à fundamentis erexit; parochiæ suæ templum, cum sibi parum placeret, prorsus diruit: Exin structuram admirandi operis ex lapide Fesulano suscitauit: ædes suas quamuis ornatissimas erexisset, amplius tamen meditatus opus, palatium & altum & ingens ex quadratis lapidib. insigni urbis loco adeo pulchrum, adeo amplum construxit, ut ei alterum æquari tota ciuitate non possit. Commendanda est multis in rebus Florentinorum prudentia: tum maxime quod in legendis cancellariis non iuris scientiam (ut pleræque ciuitates) sed oratoriam spectant, & quæ vocant humanitatis studia.

Norunt enim recte scribendi dicendique artem non Bartolum aut Innocentium, sed Tullium Quintilianumque tradere. Nos tres in ea vrbe cognovimus, græ-

Cosmus me-  
dices.



græcis & latinis libris & conditorum operum fama illustres, qui cancellariam alius post alium tenere: Leonardum & Carolum Aretinos, & Pogium eiusdem rei publicæ ciuem, qui secretarius Apostolicus tribus quondam Romanis Pontificibus dictarat epistolas. Illos præcesserat Colucius, cuius ea dicendi vis fuit, ut Galeacius Mediolanensium princeps, qui patrum nostrorum memoria grauissimum Florentinis bellum intulit, crebro dicere sit auditus. *Non tam sibi mille Florentinorum equites quam Colucii scripta nocere.* Disceptatum est diu inter Florentinos ob pecuniarum exactiones, quæ tenuiores ciues magis quam opulentos vrgebant. His diebus, consentiente Cosmo noua Catastri, id est fortunarum cuiusque ciuis descriptio cœpta est: quam raro facta sine tumultu motuque populi ferunt. At tunc quiete tranquilleque transiit.

\* al. sanctum  
Cassianum.

Lucenses qui nostra memoria bis Florentinorum obsidionem perpeffi, bis Philippi Mediolanensium Ducis auxilio suam libertatem defendere, ad extremum cum vicinis viribus pares esse non possent, nec facile inuenirent, qui quotiens hostis premeret, totiens ferret opem, foedus in quinquaginta annos cum eis percussere: eas leges subeuntes, quas dixere potentiores. Inter Florentiam & Senam apud oppidum quod Cassiam \* appellant, anno post Iubilæum sexto visæ sunt nubes viginti (ut ferunt) cubitis à terra sublimiores, inter se mirabili ventorum impetu agitare ac depugnare, & alteræ alteras pellere, & mutatis sæpe vicibus pelli quæ pepulerant. Interea summa atque incredibili spiritus violentia domorum tecta per inane iactari, muros deiici, & saxa ingentia loco moueri, vetustissimas oliuas & antiquissima quercuum robora radicitus conuelli atque confringi, homines ac iumenta non paruis spatiis per cœlum ferri ac raptari, hæc nobis, qui se vidisse aiebant, retulere. Sed magis nos ut crederemus, epistolæ à grauissimis viris de his rebus Alfonso Regi dum apud eum ageremus, scriptæ & in præsentia nostra lectæ commouere.

## CAPUT LII.

### DE SENENSIBVS.

**V**RBS Sena, unde mihi origo est, secundum hodie locum in Etruria obtinet: amœnissimo sita loco, & (si mihi fides habenda est) populo neque rudi neque inurbano. Huius rectores, qui nobilitate postposita (quæ fuit in ea ciuitate tota Italia memorabilis) & parte populi quam duodecim appellant, prorsus conculcata, multis annis in pace quieuerant, inter se tandem duas factiones habere cœperunt, quæ prout suæ rei conducere arbitratae sunt, ita se vel populis vel Italiae principibus coniungere. Cum vero Rex Alfonsus in Florentinos (ut antea relatum est) duceret exercitum, factiones ipsæ manifestius patefactæ. Altera regium bellum contra Florentinos iuuandum esse consuluit, altera cum Florentinis auxilium dandum esse suadere non auderet, dissimulandum esse censuit. Vicerunt primo Regis amici, & in eius castra commeatus misere, sed cum Rex ad sextum lapidem vrbi proximus castramentatus esset, disseminantibus in plebe qui Florentinis studebant, Alfonsum non tam Florentiæ quam Senæ dominium quærere; tota vrbe trepidatum est, & armati ad portas dispositi, haud aliter Alfonsi milites, quam libertati suæ insidiantes obseruariere. Comminuit aliquantisper ea populi suspicionem Franciscus Martorellus, præstanti vir ingenio, & quo Rex libenter vteretur, legatus ad eos missus: Sed cum non tam Regis amore aut odio, quam priuatis ciuium contentionebus reipublicæ consilia turbarentur; adeo tenuiter annona in castra Regis deportari permissa est, ut Florentinis simul & Regi videretur illudum. Idem factum, cum Ferdinandus Regis filius alio postea tempore in eosdem Florentinos duxisset: neque enim principio eius aduentus satis ei fauentes fuere. Sed Veneti, cum Senensibus ac Regi foedere iuncti essent, vsque adeo Senenses legationibus agitarunt, ut & ipsi societatem tandem Regis inierint, bellumque Florentinis publice indixerint: quod breui sopitum est, Venetis apud Laudam in-



consulto Rege pacem recipientibus. Post hæc Senensibus aliud è vestigio bellum exortum est aduersus Hildebrandinum Pitiliani comitem : in quo ducibus vñ sunt Sigismundo Malatesta, & Gisberto Corrigiensi : quorum potentia non tantum hostibus quantum ipsis Senensibus formidanda fuit. Suborta autem inter Sigismundum & Senenses discordia, cum sese ille suspectum esse animaduerneret, non sine suo & Senensium damno recessit : Gisbertus cum Senensibus perseuerauit. Interea Comes Iacobus Picininus (qui iam pridem apud Venetos stipendia faciens non sine laude rerum gestarum eorum copias duxerat) cum pace vbique parta stipendio careret, in Hetruriam properans ; Senenses iure paternæ amicitiae, vt sibi auri viginti millia mutuo dent, missis legatis expetiit. quod cum frustra fuisset, acies in eos conuertit ; & ingressus Senensem agrum, pleraque oppida partim vi, partim proditione recepta diripit. Calixtus tertius qui recens pontificatum inierat, copias suas Senensi auxilio mittit. Idem Franciscus Sfortia, idem Florentini faciunt. Veneti quoque per foedus requisiti auxilium, quamuis tenue, præbent, committitur ex improviso prælium : ex quo sine magno partium damno discessum est. Iacobus cum exercitu coactus est Castilionum sese recipere, quod Regis oppidum esse diximus à Florentinis priori bello receptum : vbi quamuis acriter oppugnaretur, expugnari tamen non valuit. Inter hæc Gisbertus in suspitionem actus, tanquam cum Picinino sentiret ; cum eius rei cum parua extarent iudicia, vocatus ad urbem in senatu Senensi trucidatus est, & per fenestram in forum proiectus. Picininus Paulo post Vrbetellum, natura loci munitissimum oppidum, per proditionem obtinuit : vna enim tantummodo via, eaque arctissima & arcis oppositione defensa potest adiri ; reliquas partes stagnum claudit, paruis duntaxat leuib<sup>s</sup> \* cimbis nauigabile : vbi cum frumenti vinique copiam Picininus reperisset, tandiu, se continuit, donec pace apud Regem Aragonum firmata, in regnum sese recepit : sed ea pax externo bello Senenses soluit, interno magis ac magis implicuit. Nam regis amici tanquam bellorum causa fuissent, Picinique studia fouissent, partim securi percussi sunt, partim relegati : multi cum sibi periculum in patria imminere cernerent, sponte in exilium abiire. adeoque in eos qui suspecti habiti sunt, seueritas exercita est, vt etiam Florentinis videatur esse fauitem. nec dum malorum finis, quando in ciuitate parum pacata nouæ indies machinationes aut finguntur, aut inueniuntur, & sanguis ciuilis forum dispergitur. hoc fortasse malum equulus ille prænuñciauit, qui anno Iubileo ante portam eius urbis quæ Romam vergit, prægnans frequenti astante populo, dum pareret, expirauit : erat enim hermaphroditus, quamuis foeminei sexus nullum in eo vestigium cerneretur. Inter alios, quos vrbe relegatos haud nocentes ciuitas existimauit, duo fuere ab ipsa pueritia focii, & studiorum communione coniuncti : quamuis alter iuris ciuilis scientiam profiteretur, alter poeticam : Gregorius Lollius, & Franciscus Patricius, cuius plura extant poemata, quæ doctissimi probant, & quæ sibi vitam retinuisse creduntur. Marianus Socinus per idem tempus scientia iuris non solum apud Senenses, sed tota Italia late clarus habitus est.

\* al. leuib<sup>s</sup>.  
cimbisque.

vide auct.  
epist. 227. &  
seqq.

## CAPUT LIII.

## DE PLUMBINO ET VITERBIO.

PLUMBINUM nobile oppidum ex Populoniæ ruinis ædificatum existimatur, nonnulli Populinum appellandum putant. Id est in littore Tusci maris situm, illæ insulæ oppositum, quæ ferri venis inexhausta magnum quotannis vectigal Plumbini domino præbet. Huic oppido præfuit Iacobus Appianus ex Paula nobilissima foemina Martini quinti Romani pontificis sorore natus ; pacificus quidem princeps & à vicinis amatus. Qui cum ex coniuge virilem sobolem non susciperet, extra matrimonium hæredem quærens, concubinam quandam amare coepit : cuius cum venter intumuisset, & iam pariendi prope tempus adesset, incredibili gaudio gestiens,



stiens, Florentinos ac Senenses, legatos ut ad se mitterent, ac partum de sacro fonte leuarent, futuros compadres magnis precibus inuitavit. Paritum est.

Venere ad diem dictam legati. *mulier inter obstetricum manus diu laborans, athiopem tandem peperit: quæ res ut risum in populo cachinnumque excitavit, ita & p. 98.* compaternitates & læticiam Principis interrupit. Tibicen tum forte Maurus in familia eius erat, ex quo natum puerum credidere: qui mox ubi detectum flagitium intellexit, salutis suæ fuga consuluit. Mortuo Iacobo Rainaldus Vrsinus, peracri vir ingenio & rei militaris peritus, in eius locum suffectus est: non suo iure, sed coniugis, quæ Iacobi filia fuisset. Hunc Alfonsus cum in Tuscia Florentinorum bello distineretur, fauentem hostibus reperit. Quapropter castris Plumbino admoti, eum intra mœnia clausum, terra marique summis viribus oppugnauit. Sed non minori virtute ipse ab interiore parte ciues suos defendit, quam Regis miles ab exteriori muros inuasit: pugnatum est diu acri contentione, ita ut multi utrinque ceciderint; complures vulnerati in hostium manus peruenierint. In eo prælio multorum virtus enituit. Inter quos duo Antonii, alter Fuxanus, \* alter Candola ad muros pariter vadentes inter ceteros pugnare fortiter animaduersi sunt. Sed omnibus prælatus est Galeatius Baldaſinus, natione Siculus: qui ter muri fastigio apprehenso, quæ prius tormenta disiecerant, conatus est oppidum irruere. ceterum feruentis aquæ viuæque calcis (quæ inter arma ingesta ubi ad corpus penetrauerat, perurebat artus) vi deterritus, grauisque saxi ictu, cum reuulsa aggeris parte deturbatus est. Fuit autem Galeatius statura quæ mediocrem excederet: robustis ac teretibus membris, corporis magnitudinî vires respondebant: lucta, iactu, saltuque nulli hominum cessit, membrorum robori par animus erat: equo ac pede iuxta bellator acerrimus: armatura graui armatus, galeatusque, humi stans sinistra sellam, dextra hastam equestrem tenens, strenuo saltu grandi statura equum insiliebat. Singulari certamine quater præliatus, bis in Italia, bis in Gallia transalpina totiens victor euasit. A tribus hostium equitibus eo ipso Florentino bello petitus, vnum ex his gladii capulo seminecem equo decussit, alium citato equo medium amplexus è sella extractum humi strauit, tertium cubito grauius percussum in fugam vertit. Tanta porro modestia, ut nunquam ipse de sese vel rogantibus amicis diceret: vitæ cultu, morumque elegantia omnibus præterea gratus dilectusque. Perstitit autem pluribus diebus ad Plumbinum Alfonsus: Sed cum oppidi expugnatio difficilis videretur, neque iam commeatus in castris esset, & equi consumptis arborum foliis fame perirent, dissoluta obsidione recessit. Nec diu postea Rainaldus morbo interiit: vxor eius Catherina verita, ne Rex in se viri delictum puniret, missis ad eum oratoribus tributum ei quotannis, dum viueret, aureum poculum quingentorum aureorum daturam promisit. Ea mortua sollicitis oppidanis, quem sibi potissime dominum legerent, vicini vero potentatus eum variis artibus ad se trahere conarentur, renunciatum est Manuelem Appianum adhuc è principum suorum prosapia superesse, cui se committere possent. Hic multos annos in militia versatus, nec tamen aut opes congefserat, aut egregio aliquo facinore nomen quæsierat: ob quam rem dimissis iam armis vxorem Troiæ inter Apulos ceperat, ibique tenuiter vitam agebat, nihil minus quam dominandi sollicitus, cum à Plumbicensibus publice vocatus est: quod ei primo nuncio velut somnium visum est. Exin Fortunæ ludum libenter amplexus, tanquam vitæ reliquum dormiuiſſet, in alterum virum mutatus, quamuis senex principatum iniit, rexitque postea plerisque annis ciuibus suis gratus, & vicinis amicus. Alfonsus vero, qui ei fautor fuisset, & stipendium fecit, & censum dedit, decessit autem ex duobus filiis extra legitimum coniugium sibi natis, minore (quod eum ciuitas seniori præferret) hærede instituto.

In Viterbio vero non parui motus fuere: sedente namque Nicolao quinto Princiualles Gattus eius vrbs princeps, dum Roma redit, apud lacum Vicensẽ ab inimicis inuasus obtruncatus est. Exin sedente Calisto tertio, Wilhelmus eius nepos noctu domi necatus. ob quam rem ciuitas in ultionem sollicita, dum malefactores

\* al. Rixi-  
nus.



lesactores inquiruntur, dum isti fugiunt, illi plectuntur, magnas calamitates per-  
pessa est.

p. 99.

## CAPUT LIV.

DE VRBE ROMA, ET APVD EAM PONTIFICIBVS EVGENIO  
NICOLAO V. CALIXTO III. ALIIS QVE VIRIS  
CELEBRIBVS.

VRbis Romæ iam tandem nobis sese res offerunt: quibus suam narrationem  
petentibus, seruatō breuitatis instituto satisfacere pergimus. hic Ioannes Vi-  
tellicus Alexandrinus patriarcha, & cardinalis, & legatus, & patrimonii beati Pe-  
tri gubernator & ductor Apostolici exercitus: qui Fulginates, qui Camerinos ty-  
rannos, qui præfectum vrbis, qui Comitem Antonium Piscinum, \* qui plures *\* al. Pisanum.*  
alios ecclesiæ insultantes bello victos neci dederat, dum pontem Tyberis (quem  
sancti Angeli vocant) transire nititur, in Etruriam copias traducturus, ab his qui  
molem Adriani custodiebant, repente inuasus, vulneratus, captusque in arcem ra-  
pitur: vbi paucis post diebus siue hausto veneno, siue ex vulnere vitam finiuit.

Prouinciam deinde suam sortitus est Ludouicus & ipse Cardinalis, Aquile-  
giensis patriarcha: iam rebus gestis, & amicitia Pontificis late cognitus, qui pa-  
catis in Vrbe rebus Eugenio reditum præparauit. Comprehenderant Romani Eu-  
genium, ac libertatem asserentes, apud sanctam Mariam in Transtiberina regio-  
ne custodiebant: eumque cum deceptis custodibus per Tyberim nauigio fuge-  
ret, iaculis ac sagittis petierant. Fremebat enim populus, cum externus miles  
infectis armis Romanos vastaret agros, homines atque armenta surripiens. Sed  
cum pluribus annis Eugenius absuisset, intellexerant & opulenti ciues & inopes,  
Romam sine Pontificis curia, non tam Urbem quam vastam ac desertam spelun-  
cam videri: quibus ex rebus missis ad eum legatis, vt in urbem suam rediret,  
magnis precibus rogauere. Rediit ille nono postquam effugerat anno: nec tam  
ignominiose pulsus fuerat, quam exceptus est gloriose. Fuit cum Francisco Sfor-  
tia, & in Piceno (de quo postea dicemus) & in aliis locis periculosum bellum,  
quod per Ludouicum Cardinalem, & Nicolaum Picenium iam sibi reconcilia-  
tum confecit, Alfonso rege opem ferente. Cogitauerat Franciscus Sfortia Tuder-  
tinam urbem sibi amicam (nam eius aliquando potitus, clementi ciues imperio re-  
xerat) deinde Romam cum exercitu petere. Erant enim inter Cardinales nonnul-  
li, qui Ludovici potentiam indignantes, Franciscum non quasi aduersus Eugenium  
sed contra eius consilium inuitabant: inter quos Nicolaum Capuensem in vrbe  
gratosum ac potentem fuisse commemorant. Nam Eugenius per id tempus  
eum de ipsa re suspectum Roma amouendum curauit. Sed cum auxilia Ecclesiæ  
propere aduenissent, Franciscus irritō proposito retrocessit. Eugenius vero, qui  
quondam Veneris ac Florentinis studiosissimus fuisset, cum illi hostem suum Franci-  
scum aduersus Ecclesiam armis pecuniisque iuuarent, & ipse ad eorum hostes decli-  
nauit, Alfonso Regem ac Mediolanensem principem. Et Rex quidem eius sua-  
su vsque Tiburem venerat, Philippo cuius opes iam pene collapsæ videbantur, la-  
turus opem aut in Tusciam contra Florentinos, aut in Galliam contra Venetos  
profecturus. Sed Eugenius cum quatuor Cardinales creasset, ex quibus successorem  
suum assumendum esse prædixerat, in lectulo agitudoinis iacens, paucis post die-  
bus migravit ad patres, & in Basilica beati Petri apud Eugenium tertium sepultus  
est. Prius tamen quam obiret, Germani (qui postquam duos de pontifice con-  
tendere animaduenterant; neutralitate quadam vtentes vtrique recusauerant obe-  
dire) destinatis Romam legatis, inter quos & ego vnus eram à Friderico Impera-  
tore missus, obedientiam ei iamiam morituro restituerunt. Ipse vero Theodo-  
ricum Colonensem & Iacobum Treuerensem archiepiscopos, quos pontificali di-  
gnitate priuauerat, mutata sententia ad pristinos reduxit honores. Magnus pro-  
fecto & clarus pontifex fuit Eugenius: contempsit pecunias, virtutem apprime di-

*Eugenius, pp.*



lexit, neque secundis rebus intumuit, neque succubuit aduersis: neque metus tristitiam auxit: sedatus animus eundem semper eius vultum ostendit, sermone breui, eoque grauissimo usus est: durus & asper in hostes, propitius in fidem receptis. Ad hæc proceritas corporis, oris decor, & veneranda in sene maiestas: quidem fidem adhibuit, plus aliquanto credidit, & maius imperium quam par fuerat, commisit. Huius pater cum in Ægypto negociaretur cum patre Francisci Foscarei (de quo iam mentio facta est) ab Heremita, quem pariter sciscitandum adorati sunt, non minus lætum vaticinium, quam ille accepit. Ille enim filium quem habebat, futurum patriæ principem, hic futum inter sacerdotes ad summum euisurum didicerat. Eugenio vero Gabrieli nomen in baptismo inditum fuit, qui

\* *al. defunctis.* cum adoleuisset, conditis \* parentibus, Euangelii non surdus auditor, patrimonium quod ab illis non tenue acceperat, inter Christi pauperes erogauit. Exin p. 100

Antonio Corario comite, eiusdem feruoris adolescente, religionem intrauit: in qua summa cum laude versatus tam diu cum illo vixit, donec Angelus Corario Gregorius tertiusdecimus appellatus, sedem Petri fortitus, cum alter ab altero separari non posset, ambos ad se vocans Senensi eum, Bononiensi Antonium præfecit ecclesiæ. Nec diu moratus, vtrunque cardinalatus honore dignatus est: in quo ambo claruerunt. Sed hic summum pontificatum adeptus, magis enituit: qui & si oriente schismate in principio sui pontificatus usque ad obitum cum Basiliensibus contenderit, coronato tamen Sigismundo Cæsare Græcorum & Armeniorum peracta cum Ecclesia Latina vnione, ciuitatibus Ecclesiæ quas amiserat recuperatis, tyrannis per circuitum deletis, contumaciâ Romanorum edomita, victor inclitus hominem exiit. Hic me, quamuis aliquando aduersus eum existimans Deo sacri-

\* *Vide auct. epist. 25.*

ficiū facere cum Basiliensibus sensissem \* (nam meo tempore tota nutabat Ecclesia) venientem ad se benigne recepit, inter secretarios collocauit, & apostolici subdiaconatus honore donauit, Ecclesiam quoque Tergestinam paucis diebus antequam moreretur, cum falso rumore vacantem audisset, multis illam petentibus, mihi vni ex omnibus destinauit, quod postea successor eius impleuit.

*Nicolaus V. pp.*

Nicolaus quintus natione Tuscius ex oppido Sarzana, patre medico, Theologica doctrina illustris, & omni ferme scientiarum genere insignis, post Eugenium in Petri cathedra suffectus est: qui paucis ante mensibus Cardinalatum ab eo, cum felicem apud Germanos legationem obisset, nec diu prius episcopatum Bononiensem acceperat. Hic urbem Romam multis ac maximis ædificiis mirum in modum exornauit: cuius opera si compleri potuissent, nulli veterum Imperatorum magnificentia cessura videbatur: sed iacent adhuc ædificia interrupta, ruinæque murorum ingentes. Schisma quod apud Sabaudenses adhuc in ecclesia vigeat, explosit: Amadeum papatui renunciantem in gratiam recepit, Cardinalatus honorem & in paterno dominio legationem reliquit. Cardinalibus aliquot ab eo creatis dignitatem dimisit: Romanos longa pace ditauit, Iubileum feliciter gessit, nisi quod in ponte sancti Angeli ex concursione populorum improuide facta ducentos circiter homines aut conculcatos aut in flumine eiectiones periisse constat. Bernardinum Senensem ordinis Minorum professorem, qui paulo ante obierat, in numerum Sanctorum retulit: Fridericum tertium Imperatorem & Leonoram Augustam matrimonio iunxit, ac de more inunctos coronauit, eorum familias abunde & multa cum lauticia pascens. bis cardinales creauit: & primo quidem vnum tantum Antonium natione Maioricensem ad titulum sancti Chrysogoni, quem sibi philosophiæ studiis & arcanorum sacre Theologiæ cognitione ex omnibus parem eligeret. Secundo sex creauit, aut doctrina percelebres; aut generis claritate insignes, inter quos & germanum suum Philippum sanctæ Susannæ Cardinalem assumpsit, placidis moribus & incorruptæ fidei virum. Libros ex tota Græcia perquisitos ad se iussit afferri, & in Latinam conuerti linguam curauit, magna præmia translatoribus præbens. acceptissimi ei fuerunt in transferendis operibus Georgius Trapezuntius, Laurentius Valla, Petrus Candidus Decembrius, & Gregorius Castellanus, item Demetrius natione Græcus, qui soluta oratione yntes, cum Pontificis



ficis aures mirifice oblectarent, nihil ex eo quod peterent non abstulerunt. In Homeri vero poemate quod ab Heroico carmine latinum fieri magnopere cupiebat, cum plurimi morem ei gerere conarentur, vnus tantum inuentus est, qui acri eius iudicio satisfaceret. Oratius Romanus, qui scribatum apostolicum ea de re consecutus magnisque pollicitationibus illectus, Iliadem aggressus, nonnullos ex ea libros latinos fecit, dignos quos nostra miraretur, prisca non implorasset ætas. Nicolaus quoque Perotus, Polibio è Græcis commode atque ornate ad nos traducto, Joannes Tortellius Aretinus libro de Orthographia peritissime conscripto; Albertus Florentinus conditis de Architectura egregiis voluminibus; alique pene innumerabiles noua cudentes opera, eius Pontificis gratiam meruere. Adeo enim ingenia excitauit fouitque Nicolaus, vt vix æuum inueniri possit, quo magis humanitatis & eloquentiæ cæterarumque bonarum artium studia, quam suo tempore floruerint. Illud certe nemo negauerit, tot ei à doctissimis viris inscripta esse volumina, quot neque suorum prædecessorum neque Imperatorum cuiuspiam nomini dicata comperimus. Vnum tamen à doctis ab eo neglectum miramur, Blondum Flauium Foroliuensem; qui res à declinatione Romani imperii vsque ad ætatem nostram toto orbe patratas mirabili ordine in tres digessit decadas, Romam describendo instaurauit, Italiam illustrauit, deinde triumphantem Urbem scribere adorsus, omnem nobis

P. 101 vetustatem aperuit. Sed ita fuerunt hominum mores, perraro quemquam extollit Pontifex, quem præcessor amauit. Cæterum Nicolaus & veteribus & nouis codicibus ornatissimam Bibliothecam instruxit, in qua circiter tria millia librorum volumina condidit. Sacrarium apostolicum vasis aureis atque argenteis, sacerdotalium indumentis mirifice decorauit: altaris ornamenta, aulea quoque ex auro contexta mirandi operis coenit, supellectilem toto palatio necessariam magnificentissime comparatam duplicauit triplicauitque legationibus quas publice audiuit ita respondit, vt dubium esset, sapientiam eius aut eloquentiam magis admirere. Si quos esse in Vrbe peregrinos existimatione dignos accepit, confestim eos missis xeniiis honorauit: nobiles domo sua extorres, qui ad se venerant, benigne confouit: pauperib. Christi largas eleemosynas dedit: religiosi mendicantibus nihil ad necessitatem deesse sustinuit. In Ecclesias vrbs plurima dona contulit. In patrimonio beati Petri plurimas ac munitissimas arces oportunis locis erexit. Huius tamen tam admirabilis tam expetendi Pontificis vitæ non defuerunt insidiatores: Stephanus enim Romanus familia Porcaria, tenui censu eques, res nouas sæpe in Vrbe molitus, ac propterea Bononiæ relegatus, clam inde excedens magnis itineribus Romam rediit, conuocatisque mox amicis mentem suam exposuit: *Turpe esse dictitans, eam Urbem quæ totum sibi subiecerit orbem, nunc sacerdotum imperio subiaccere, quos rectius foeminas quam viros quis appellauerit. Venisse se paratum patriæ iugum excutere. rem factu facilem, si viri fuerint: Nicolaum Pontificem celebri Epiphaniarum die in ade beati Pauli \* sacra facturum, haud magno negotio comprehendi posse: populum libertatis amore, quam proclamari audierit, mox opem audientibus daturum.*

\* al. Petri.

Ad colligandum autem præfulem, catenam auream secum attulit, à se iam pridem paratam, quam congregatis ostendit. Neque enim mox occidendum præfulem ex usu esse dicebat: sed obseruandum, donec arcem sancti Angeli per eum recuperaret: atque (vt erat homo facundus) facile in suam sententiam congregatos traxit: atque eo facilius, quod inopes ære alieno grauatos, & ob patrata scelera iudicium formidantes ad se vocauerat, quibus nihil erat in pace sperandum. Sed præsensit insidias Nicolaus, missisque militibus comprehendi hominem iussit. Illi eum iam animo fractum, & apud sororem in arcæ latentem inuenerunt. Complices eius in domo qua conuenerant, expugnati captique sunt: è quibus vnus Baptista Sciarra manu promptus, & animo intrepido, per medias Pontificis cohortes viam gladio sibi aperiens effugit. Stephanus in arce sancti Angeli, alii in capitolio suspensi vitam finire: atque ita Pontifex Maximus ingenti periculo liberatus, Romanæ sedis dignitatem imperiumque seruauit. felix



\* vide aucto-  
ris epist. 162.

pontifex, & omnium iudicio beatissimus nisi \* eo sedente Turci (vt ante diximus) Constantinopolim expugnassent, Christianorum desidia atque ignauia memorabile perpetuum.

\* vide aucto-  
ris epist. 172.

Accessit & aliud, quod non parum eius gloriam imminuit. Nam cum pacis Italiae, quæ tum vehementer ferro vastabatur & igne, ipse reparator & arbiter concordii partium voto delectus esset, dum diem ex die in deliberationem ducit, suspectus esse Francisco Sfortia iam Mediolanensium principi ac Venetis coepit: tanquam eam sententiam promere noller, quæ aliis pacem, Ecclesiæ bellum allatura videretur. ob quam rem intercedente Simoneto Monacho \* ordinis Heremitarum sancti Augustini professore, obscuri antea hominis & prorsus ignoti, sed vitæ integritate probato, Veneti cum Francisco Duce conuenientes inter se concordia leges dixere: præstituta die, intra quam bello socii pacem ratam haberent.

Visum est id omnibus monstri simile, humilem & incognitum monachum Italiam pacauisse. Sed recusante Alfonso pacem (quæ sibi inscio dicta erat) vanam esse Nicolaus, quæ de se habita fuerat, suspitionem ostendit: missò ad Alfonso legato Dominico sanctæ crucis Cardinali, prudentia singulari & vitæ integritate conspicuo. Qui cum Caietam, deinde Neapolim peruenisset, interuenientibus Venetorum & aliarum partium legatis, differentiisque omnibus tanquam ex integro discussis, Alfonso Regi non solum pacem suasit, sed fœdus in annos quinque & viginti inter omnes Italiae potentatus percussit: cuius Romanus Pontifex & conseruator & iudex dictus est, Sed cum doloribus arthriticis per omnem ferme pontificatum suum Nicolaus vehementer laborans, indies magis ac magis opprimeretur, nec iam amplius mortalem pollutumque comitatum candidior anima dignaretur, è vita decessit. Ab eo, quæ mihi pontifex Eugenius munera crediderat, non solum confirmata sunt, sed amplius pontificalis dignitas adiecta: Tergestinaque primum Ecclesia, deinde Senensis commissa.

Calixtus pp.  
III.

Calixtus tertius post eum beati Petri cathedram obtinuit, natione Hispanus, p. 102 ex regno Valentia nobili genere natus, vnus omnium qui suo tempore scientiam iuris profiterentur, eminentissimus: & qui consilium regis Alfonsi (in quo multis annis præsiderat) illiusque artes ac cautiones præ se ferret. Is ut primum Pontificatus apicem adeptus est, mox animum ad delendam Turcorum & legem & gentem conuertit, votumque vouit: ad eam rem Solennes misit in Germaniam, in Galliam, in Hungariam, in Orientem legatos, primarios S. Romanæ Ecclesiæ Cardinales: è quibus nullus adhuc rediit: Alanum tamen cardinalem sanctæ Braxedis, magno ingenio virum, & animo securo & potenti propediem è Gallia reuersurum putant. Naualia (quod antea inauditum fuerat) Romæ constituit: triremes quas plures ad ripam Tiberis in ciuitate Leonina parauit, & in Turcos misit. Comitem Iacobum Picininum Senensibus (vt dictum est) armis insultantem missò milite suo repressit. Regi Alfonso querenti ex eo, quo pacto inuicem victuri essent: *regna sua, respondit, ipse regat, mihi summi Apostolatus gubernationem relinquat.* Veras eorum multis de rebus dissensiones, magna pars Italiae simultates confictas esse credidit: qui fidem dedere contentioni, alii Calixtum, alii Alfonso, alii vtrumque accusauere. Quorum alter Regem, sub quo natus esset; alter suum sacerdotem, cui tanquam vicario Dei parendum est, ferre non posset. Bis cardinales à Calixto creati sunt, primo tres, ex quibus duo nepotes eius fuere: quorum & si fuit ætas aliquanto minor, quam tanta dignitas videretur exposcere, doctrina tamen & circumspectio, & morum suauitas id honoris haud iniuria consecuta censetur. Tertius fuit Iacobus de Portugalia, regio sanguine natus: in quo ea modestia, ea grauitas, id acumen ingenii, id studium literarum, is amor virtutis emicuit, vt quamuis iuuenis adhuc, tardius tamen opinione omnium ad eam dignitatem ascenderit. Secundo loco sex assumpti sunt, haud profecto indignissime vnum \* demas) tanto munere: meo tamen iudicio nulli dignius id honoris obuenerit, quam Ioanni episcopo Zamorensi, ciuilibus sapientia cognitione subli-

\* vide huc  
auct. epist. 188



sublimi : qui vno de quadraginta annis Romanam secutus curiam, per omnia ferme officia castus innoxius transierat : Cancellariam vero quæ à tempore Nicolai vacauerat, Calixtus nepoti suo sancti Nicolai in carcere Tulliano cardinali ac Marchiæ legato commisit. Germanum eius Petrum Borgiam egregia specie atque indole iuuenem, Ecclesiasticæ militiæ ducem præfecit : exin præfecturam vrbs ei commisit, Ludovico Cardinali sanctorum quatuor Coronatorum, & ipsi quoque nepoti, legationem Bononiensem demandavit. Vincentium natione Hispanum, & Osmundum Anglicum, miraculorum fama illustres, inter sanctos redegit. Legatos in Scythiam, & Persidem, in Æthiopiam misit, qui Christianos per orientem in fide continerent, & aduersus religionis hostes armarent. Scanderbechio in Albania, multisque aliis per Græciam Turcorum bello laborantibus, pecuniaria subsidia largitus est. Transfigurationis Dominicæ festum instituit, & celebrari publice iussit. Assumptionem suam, priusquam pontifex maximus eligeretur, pluribus annis prædixit. cladem quoque, quam Turci apud Albam in Hungaria sustinuerunt, antequam fieret, vaticinatus est. Nunc quoque de futuris multa & magna promittit : quæ diuina pietas non abnuat velim.

Mortuo Ioanne comite Taliacotio, qui è prosapia Vrsinorum fuit, cum mascula ei soboles nulla esset, Vrsini hæreditatem eius propinquitatis iure ad se traxerunt. Id ægre tulit comes Euerfusus, cuius filio nupta esset vnica Ioannis filia : ventum est ad arma : Columnenses Comiti Euerfo auxilium præbuere. deinde hortante pontifice Prosper Cardinalis, Martini quinti Romani quondam sapientissimi & felicissimi Papæ nepos, eius gentis honoratissimus, & litterarum studio late clarus, cognitionem suam bello subtraxit. Inter Vrsinos & Euerfum usque hodie impacatae durant inimicitiae. \* Latinus sanctorum Ioannis & Pauli Cardinalis, il-

\* vide auct.  
epist. 176. 294

lustris Vrsinorum familiæ princeps, dexterrimo vir ingenio, iuris scientia, & animo qui alta curet, parua despiciat, insignis ; ex Vrbe profectus ad oppida sua concessit, tanquam Romæ non se satis tutum existimaret : siue Comitibus insidias veritus, siue Pontificis indignatione commotus : nec reuocatus in hanc usque diem reuerti voluit. Calixto inter omnes Cardinales duo ad hoc usque tempus in primis auditi atque accepti fuerunt : Wilhelmus Rothomagensis, amœno ingenio, & affinitate \* sanguinis clarus, ac Petrus sancti Marci Eugenii quarti nepos, patricia apud Venetos gente natus, & industria potens : siue quod eorum consiliis multum inesse crederet, siue quod alterum Franciæ regnum, alterum Venetorum Rempublicam ducere posse arbitratus est. Symonem Romanum, philosophiæ studiis & arte medica excellentem, adeo dilexit, vt fratrem eius Iacobum Episco-

\* al. origine.

p. 103 pum Ferretanum, quamquam virtute præstantem, sua potissimum consideratione rubeo galero donauerit. In audiendis legationibus priuatorumque hominum causis, antecessorum suorum facilitatem longe superauit, epistolas & Regibus & amicis per seipsum dictauit. In signandis supplicationibus libens & hilaris tempus absumpsit : de iure interrogatus percipide respondit, leges & canones tam ei fuerunt in promptu, quam si heri aut nudius tertius scholam iuris primum exiisset, nihil enim memoria sua excidit, quod retinendum existimauit. Cæterum nulla facultas ei iuris cognitione potior visa est : in qua ipse ita excelluit, vt suorum prædecessorum, qui sibi possit æquari, vix vnus aut alter inueniatur. Hic postquam ordini Cardinalium se inscripsit, Varmiensensem quoque Ecclesiam \* ad mare Balticum inter Sarmathas sitam postulantibus canonicis commendauit : cuius possessionem, frementibus ea in regione crudelibus & atrocissimis bellis, nondum assequi potui.

\* vide Auctor  
epist. 275. 280.  
281. 283.  
296. 313.  
326. 332.

## CAPUT LV.

## DE VMBRIA, ET PICENO.

IN Umbria, quæ hoc tempore sub Ducatu Spoletano continetur, paucae ciuitates intestinis seditionibus caruerunt. Nursia, Quinti Sertorii quondam patria, Guel-



\* Horat.

\* al. ample-  
ctitur, se procel-  
lis fortunæ qua-  
tiendam prosti-  
tuit Marchia.

Guelfarum partium insidiis sapius agitata, vix tandem respirare potuit. Narnia, quam sulphureo gurgite candidus amnis circuit, ancipiti vix adeunda iugo, \* Gibellinorum factione depressa, Guelforum consilio ducta quiescit, non Amerinis, non Reatinis, non Fulginatibus, non Ortanis, non ipsis denique Spoletanis suæ calamitates defuerunt. Sed Asifina ciuitas omnium miserior inuenta est: quæ dummodo Brachianam: modo Sfortianam factionem admittit; & nunc partem, quæ superior, modo alteram, quæ inferior est, expellit, \* eo deducta est, ut iam ciues vniuersi non solum inferiores, sed nulli potius vrbe iam pene deserta dici possint.

Picentium regionem (quam nostra ætas Marchiam vocat) Franciscus Sfortia Vicecomes Eugenio quarto Pontifice maximo tum rebus Basiliensibus occupato, ac non solum Philippi Mariæ, sed Alfonso quoque Regis inimicitii implicito, vna quodammodo excursionem ademit: nonnullisque post annis continuata possessione retinuit. Interim captus amore puellæ, quæ inter virgines coniugi suæ seruebat, & sibi multarum molestiarum & illi necis causa fuit. Perpetua ea vocata est, apud Nouarienses honestis parentibus orta, forma egregia, & ingenuis moribus: nisi potentis domini decepta blanditiis, virginitatem cum adulterio permittasset. Hæc cum iam paulatim intumesceret vterus, ad tegendum facinus quasi-to, qui eam duceret, viro despondetur. Constituta nuptiarum die vocatis amicis, apparato grandi conuiuio, sponsus in oppido, quod à Francisci curia non longe inhabitabat, lætus aduentum nouæ nuptæ præstolabatur, ducitur illa multis comitata nobilibus. Sed ingressa oppidum, cum descendere in domo sponsi crederetur, iussu vltius pergere, in arcem rapta est: nec vltius infelici viro videndæ sponsæ copia fuit. Quod cum Blanca Francisci coniunx cordatissima mulier cognouisset; nunquam deinde quieuit, dimissis percussoribus puellam quamuis diligenter custoditam interfecit. Franciscus quamuis ea re valde commotus, vxoris tamen iusto dolori censuit ignoscendum. Exin pontifex Eugenius iam Philippo Regique conciliatus, Nicolaum Picininum cum exercitu aduersus Franciscum misit, Regemque vt iter in Marchiam duceret, adhortatus est, annuit Alfonso, delectuque militum habito cum florentissimis equitum peditumque copiis in Picenum peruenit. Iunctisque apud Bisum cum Picinino castris, eoque totius exercitus duce constituto, conterritos oppidanos in deditionem Ecclesiæ compulit, quorum exemplum & sancti Seuerini incolæ secuti, clauis portarum misere. Quæ cum Franciscus accepisset, copiis suis per munitiora prouinciæ oppida distributis, protrahere bellum è re sua arbitratus est. Exin cum Petrus Brunorus vnus è copiarum suarum ductoribus cum octingentis equitibus ad Regem transisset; Macerateses vero ac Colentinales deditionem Ecclesiæ fecissent: consentientibus Venetis ac Florentinis redire se in gratiam Philippi ducis Mediolani, vt Regis impetum euaderet, amicis interpositis simulauit. Credidit Philippus: literisque ac nunciis vt copias in regnum reduceret, Alfonso frustra rogauit. Turpe enim Regi videbatur, inuito Eugenio rem infectam relinqui, perseuerauit igitur, atque acrius instans Cingulum oppidum in deditionem Ecclesiæ recepit. castrum planum vi captum militi diripiendum dedit: nec territus est, quamuis Philippus ea re commotus pacem cum Venetis ac Florentinis fecisset. Sed Aesim cum exercitu petens, Troilum copiarum ducem, cui Franciscus maxime fidebat (nam & multos p. 104 annos in equitatu suo primos ordines duxerat, & sororem eius in vxorem acceperat) tradita ciuitate sese dedentem, in comitatum suum recepit: deinde Rocham Contratam, cum defendente Ruberto Francisci nepote pluribus diebus frustra oppugnasse, ad Metaurum amnem supra Fortunæ Fanum, quo se Franciscus cum reliquo equitatu receperat, continuato itinere duxit. Ibi ad Alfonso tubicen quidam à Francisco in castra venit, impetrataque à Rege pro sui ordinis more liberius loquendi venia, multa nefaria in Nicolaum præsentem Francisci nomine probra congeffit; *proditorem ac perfidum* appellans, Regemque admonens, *ne illi se credat, cui fallere potissimum sit.* Postremo Nicolaum Francisci ver-

bis



bis ad duellum prouocauit. In quo duces ipsi, eorumque copiarum de gloria, de dignitate certarent: apparituram quidam uno praelio ducum simul atque equitum virtutem; simul à Rege petiit, ut æquus spectator pugnae adesset. Nicolaus iam inde ab initio ea audiens, commotus haud leuioribus conuiciis in Franciscum absentem coniectis; fidem suam multis exemplis comprobans, *egre sibi esse respondit: corpus suum vulnere in ceruice recepto debilitatum fuisse: ostensurum se singulari certamine uter eorum prodicionis infamia censendus esset, nisi hanc fortuna sibi facultatem abstulisset: oblatam tamen pugnandi cum exercitibus conditionem lato se animo, cum bona Regis venia, accipere: postero die cum copiis suis sub ipsam urbem Fanum patenti campo futurum.* Quod cum à se postulare Nicolaum decoris tuendi causa Rex animaduerneret, utriusque patris securitati sese consulturum recepit. Sed cum dicta die Nicolaus in campum cum suis processisset, atque insultans urbis moenibus usque ad portas cucurrisset: Rex vero procul inde ad mille passus cum exercitu consedisset, liberum utrique parti præstaturus campum. Franciscus siue Regi parum fidens, siue gloriam suam (de qua per id tempus haud dubie iactabatur) in discrimen adducere veritus, intra urbem suos continuit. Magna inter Franciscum & Nicolaum non æmulatio modo viguit ob rei militaris gloriam, cuius primas partes sibi uterque arrogabat: verum & similtas ingens ob veteres inimicitias, quæ olim inter Brachium & Sfortiam fuerant. Quorum alter Francisco pater, alter Nicolao magister ac dux fuerat: atque idcirco non tantum hostes, sed ut inimici inter se bellum gerebant: nec sub vno eodemque principe ut militarent, adduci poterant. Nicolaus ex corporis breuitate Picinini nomen (quod Italica lingua paruum sonat) accepit: sed quanto mediocritate statura eius inferior, tanto animi magnitudo superior, pauca ei verba fuerunt, atque parum comprehensa: sed quæ multarum ac magnarum rerum sententiam comprehenderent. In milites suos indulgens, in amicos liberalis, in hostes durus & asper, dimicandi cupidus, quietis impatiens, gloriæ auidus, & in periculis obeundis promptus ac securus, praelium ex occasione protinus sumpsit, hostem celeritate præuenit excursionem fatigauit: levis armaturæ equite magis quam pedite utebatur, fortes atque asperos milites amauit, hostium numero deterreri non potuit. Quibus rebus cum plurimos & in Gallia Cisalpina, & in reliqua Italia triumphos ex hoste duxisset; haud dubie rerum gestarum magnitudine & gloria magistro suo Brachio maior euasit. Franciscus autem honesto corpore fuit, & quod mediocritatem non parum excederet, amplo pectore, robustis membris & apte dispositis, facie grata, incundis oculis, caluicie venerabilis, facundia copiosus, ingenio peracri, animo rerum magnarum cupido, solers in administrandis rebus, in laboribus perferendis infatigabilis, in occasionibus prospiciendis acutus & sagax, in hostibus fallendis versutus & vafer, in præfagiendis euitandisque dolis ac hostium consiliis præuertendis cautus atque prouidus. Raro nisi ex destinato confligit, hostem sæpius obsidendo quam decertando confregit. Peditatum magno in precio habuit. Argento atque auro cultos esse milites voluit: in exequendis consiliis celer ac perseverans: in omni re nouanda præsentia animi, laborum tollerantia, usu, exercitatione, consilio mirifice instructus: quibus artibus breui adeo magnus effectus est, ut vnus ex omnibus copiarum ducibus inuentus sit qui cum Nicolao de rei militaris principatu concertare possit. Nam cum scientia rei militaris atque auctoritate pares viderentur, diu dubium fuit, uter alteri anteposendus esset. Sed hanc litem fugatus paulo post Nicolai exercitus, & ingens victoriarum Francisci cursus, & Mediolanensium fortuna in eum pleno cornu translata, prorsus diremit. Cæterum Fani expugnationem cum Rex difficillimam intelligeret, non Francisci solum magni & peritissimi ducis præsentia defensi; verumetiam quod urbs mari adiacens claudi, necomeatus intrarent, haud quaquā potuit, inde abiens in Firmanum duxit. Quo in loco cum Alexander Francisci frater eruptione facta postremum agmen eius inuaderet, conuersus in eum signis hostem intra urbem repulit, atroci pugna pro muris facta, & antemurali quod pro vallo stabat, vi capto. Deinde ad turrim palmarum

Picininus.



composito agmine peruenienti Francisci epistola reddita est nuncio intercepta, quæ Troilo ac Petro Brunoro inscripta, inter cætera ea verba continebat: *ne amplius p. 107*  
*differentes, iam tandem cogitata mutarent.* Quapropter ambos de prodicione suspectos armis equisque & omni suppellectile priuatos in vincula coniectos in Aragoniam misit, & in arce Satabiæ Valentini agri custodiri mandauit. Nec diu postea cum Temaritani deditionem fecissent, in regnum suum diuertit: duobus millibus equitum ad Picinum, qui ad montem aureum cum exercitu subsisterat, transmissis. Sed priusquam illi aduentassent, Picinus repentino Francisci aduentu inuasus, prælio fusus pulsusque fuerat. Cuius in quo castra posita erant, & oppidum proximum dissipatos fuga seruauit. Franciscus ea victoria simul & protectione Regis elatus, Picenum vndique veluti victor percurrere & infestare coepit. Rogatus ab Eugenio Alfonsus eo reuerti, cum iam se itineri accinxisset, nouis regni motibus domi retentus, Lupum Virreum, Vrsinum, Carsiamque cum non paruis copiis aduersus Sfortiam misit. Interea Nicolaus Picinus à Philippo in Galliam reuocatus, Franciscum filium cum parte copiarum in Piceno dimiserat; quem Sfortias ad montem Vlinum prius pugna superatum interceptit, quam Regis auxilia ei aduenissent. Post hæc Ludouicus Aquilegiensis patriarcha eam provinciam ab Eugenio fortitus, Ioannem Vintimilium inter belli duces fama præstantem, cum magna equitum peditumque manu à Rege missum, omnibus copiis suis præfecit: Cuius industria Aufidam oppidum obsidione clausum in deditionem accepit. Erant eo tempore non parua Philippi copiae apud Cingulum oppidum, contra Franciscum missæ. Nam Philippus cum Francisci reconciliationem iam tandem simulatam \* intellexisset, Italianum Forlanum in rebus bellicis late cognitum, qui Pontificis partes adiuuaret, eo transmiserat: cui cum patriarcha & Vintimilius per rectam viam coniungi non possent (nam media loca Franciscus obtinebat) magnis itineribus per montana ad eum peruenere. Quo cognito Franciscus è Piceno discedens, in Vrbinate agrum sese recepit. Patriarcha Montem Melonem obsedit atque obtinuit: deinde oppidum sancti Angeli vi expugnans, diripiendum militi dedit. Vintimilius paulo plus ab eo in regnum ad hiberna recedens, per agrum Firmianum non procul à Monte Sancto constitit. Cuius aduentu conterriti oppidani, emissis oratoribus deditionem fecerunt: similiter circumiecta castella deinde ad montem altum profectus, dies aliquot ibi mansit. Interim Firmani coniuratione facta, spe propinqui auxilii à Francisco defecerunt, Alexandro fratre cum magna equitatus parte in arcem compulso: quibus & Vintimilius & Pontificis copiae mox auxilium præbuere. Sed cum arx eiusmodi esset, ut sola fame vinci posset; præmunitis vrbis partibus, ne descensus ex arce fieret, Vintimilius (uti constituerat) in hiberna concessit. Sequenti anno Alfonsus Remundum Buillum, & cum eo mille equites, & totidem pedites ad Patriarcham in Picenum misit. Qui ubi cum Iacobo Caynano in Ecclesiæ castra peruenit, mox Italianus Forlanus mandante Philippo Maria comprehensus est, ac postmodum iussu patriarchæ apud Roccam Contratam securi percussus. Montem fabrum deinde cepere; & aliquot Castella Friderico Vrbinate principis eripuerunt. Sed cum iam duo millia equitum à Florentinis ac Venetis missa Francisci exercitum auxissent, Philippus vero exercitu suo ad Casale maius iuxta flumen Padum à Venetis pugna fuso ac castris exuto copias suas è Piceno reuocasset, & amplius Eugenio ac Regis auxilia postulasset: ad quem duo millia & quingenti equites ex castris Ecclesiæ iubente pontifice transierunt; Franciscus iam bello superior, Montem Aureum & alterum ei proximum castellum Sigismundi Malatestæ (qui iam ab eo defecerat, Ecclesiæ fortunam secutus) expugnauit, & eiusdem oppidum Gradariam obsedit. Interim Rex alia Patriarchæ auxilia misit: cum quibus in Picenum reuersus Iacobum Caynarium prodicionis suspectum apud Roccam Contratam (ubi & Italianum Forlanum interfici iusserat) capitali supplicio affecerat. Exin nihil memoria dignum ab eo gestum, donec Franciscus Philippo reconciliatus, illius stipendia facturum, & iam dux contra Venetos designatus, ex Piceno recessit.

\* al. *mutata*  
*iam.*



cessit. Nam postea non solum arx Firmana, sed omnis ferme prouincia in eius potestatem facta est.

## CAPUT LVI.

## DE ASCULO.

**I**N Asculo Iosias nobilibus ortus parentibus admodum adolescens, Iohannem Francisci Sforcie fratrem magno animo iuuenem, & qui eam urbem per omne belli tempus egregie defendisset, conspiratione cum paucis inita incautum obtrun-  
p. 106 cavit. Sed cum & ipse tyrannum in patria gereret, in exilium actus est. Ciui-  
tas deinde sub Ecclesia quieuit: quamuis anno ab hinc superiore idem Iosias ar-  
cem quandam naturali situ munitam & urbi propinquam, cum plerisque latroni-  
bus occupans, non paruas curas illi populo ingesserat: quæ res ei parum prospe-  
re cessit. Nam Rodericus sancti Nicolai Cardinalis, eius prouincie legatus, obsi-  
dionem loco admoens, postquam arce potitus est; captum ipsum vinctumque  
Romam misit.

## CAPUT LVII.

## DE VRBINO.

**I**N Urbino dux gentis Oddo, matre Columnensi nobilissima natus, cum per libi-  
dinem in matronas nobiles debaccharetur, nec modum licentie faceret; popu-  
lari tumultu interfectus est. Incentor nequitie & adolescentie sue corruptor,  
Prothonotarius Carpenfis nobili genere ortus, sed ingenio pessimo: qui nuptis ac  
virginibus quamplurimis vim intulerat, qui per omnia scelera ad summum vitio-  
rum peruenerat; eadem nocte cum discipulo suo necatus, inexhaustæ libidinis  
poenas dedit. Cadaver eius in forum delatum, defecta virilia in ore mordicus  
tenuit. Guido pater Oddonis prius quam coniugem ex Columnensi familia du-  
ceret, cum proles ei nulla virilis esset, anxius quonam pacto in gente sua impe-  
rium propagaret, concubinam ex se pregnantem assimulauit. Exin Bernardini  
Cardensis agnati sui; præclari copiarum ducis, filium tunc forte natum supponi  
pro suo, nutririque iussit, Friderici nomine indito. Sed coniugio deinde contra-  
cto, cum filium legitimum sustulisset, conuersa in eum cura Fridericum adhuc  
puerum militie tradidit: in qua ille ad ætatem usque virilem perseuerauit.  
Deinde Oddone mortuo, vocatus à populo Urbinatium factus est princeps. Cla-  
rus vir, & Castrensibus disciplinis apprime institutus: cui nec in administrandis rebus  
bellicis consilium, nec in capeendis periculis animus vnquam defuit: nec vero  
factis quam fide clarior: quæ quidem vel maxime patuit, cum bello Picenti  
Franciscum Sfortiam (qui ad eum se receperat) fortunæ afflatu iam pene defer-  
tum, constantissime iuuit ac fouit. Indignus profecto qui militari ludo dextrum  
perdiderit oculum.

## CAPUT LVIII.

## DE ARIMINO.

**A**PUD Ariminum Æmilie urbem Sigismundus Malatesta sceleribus insignis im-  
perium tenuit: qui cum Sfortie filiam matrimonio sibi adiunxisset, partes  
eius in Picenti bello aliquamdiu secutus est: deinde sub Ecclesia stipendia fecit,  
militauit in Gallia contra Venetos, & in Tuscia contra Regem Aragonum: quæ  
res postea magno sibi detrimento fuit. Nam cum de pace Italie apud Neapolim  
ageretur, Rex huius iniurie memor, eum qui sibi fidem non seruasset, extra com-  
munem pacem esse voluit: deinde comitem Iacobum Picininum, & Fridericum  
Urbinatium principem cum copiis in eum misit: qui aliquot ei non parui nomi-  
nis oppida abstulerunt, eiusque agrum ferro & igne vastarunt. Ipse cum auxilia



vndique frustra implorasset, ad extremum (quod vnum salutis erat remedium) Alfonso misso ad eum reconciliare constituit: cuius nondum preces exaudita sunt, quamvis spem concordia Regis clementia non parvam effecit.

## CAPUT LIX.

## DE FAVENTIA, ET AQUILA.

*\* al. Hector.* IN Fauentia mortuo Guidone Antonio (cuius multa in rebus bellicis clara facinora referuntur) principatum frater eius Nestor *\* arripuit*, & ipse in armis cognitus, qui Florentinis contra Regem militans, haud alia ratione quam Sigismundus ab Alfonso declaratus hostis, extra communem pacem factus est.

Fabrianenses qui dudum tyrannide oppressi, necatis tandem quindecim ex familia quæ principatum inuaserat, fugientibus reliquis ad Ecclesiæ imperium re-<sup>p. 107</sup> dierant, multisque post annis in pace quieuerant, hoc anno de rebellione tentatos, seu consentientes, seu suspectos ciues aliquos in vincula adiecere. Exin tormentis ac quæstionibus prodito expresso crimine, vltimo supplicio affecerunt.

*D. Bernardinus.* In Aquila Marforum vrbe, apud quam memoria nostra Brachius Perusinus dux belli formidatissimus, dum per anni temporis obsidionem tenuissent, Martini quinti Pont. Maxim. ab felicissimi armis victus interiit. Diuus Bernardinus Senensis, postquam Italiam omnem Christi nomen predicando peragrasset, vitæ cursum peregit, eo in loco sepultus clarere miraculis affirmatur. Fuit autem Bernardino clara inter Senenses origo: nec vera est assertio eorum, qui patriam illi Massam fuisse tradunt, quamvis pueritiæ suæ ibidem nonnulla rudimenta peregerit, cum esset mater eius Massana: cæterum pater ac maiores sui longa serie inter nobiles Senenses habiti sunt: vbi & ipse natus, & maiori ex parte educatus cum adoleuisset, iuri pontificio ediscendo operam dedit. Sed cum sepultis parentibus fallaces huius mundi blandicias, & inania eius esse promissa animaduertisset; distributa inter Christi pauperes substantia, diui Francisci religionem ingressus, traditam sibi regulam exactissime obseruauit: declinansque maiores conuentus, eorum ductor ac magister effectus est, qui fratres Obseruantes appellantur. Maximum autem ei studium in edocendis populis fuit: qui cum esset facundia copiosus, & doctrina insignis, incredibili omnium attentione audiebatur, & quasi alter Paulus esset, vas electionis, in admiratione ac reuerentia habitus. Tres cum populi sibi pontificem elegerunt: Vrbinate, Ferrarienses, Senenses. Sed non fuit ei consilium linguam, quæ toti posset Italiæ consulere, vnam intra urbem concludere.

## CAPUT LX.

## DE REGNO NEAPOLITANO.

REGNUM iam Neapolitanum ingressi, ad felices Alfonsi mirabilesque rerum cursus stylum conuertimus. Post bellum nauale quod ipse cum Genuensibus infeliciter gessit, tanquam cognorit Fortuna suum errorem, quæ tanto principi molesta fuisset, nouerca odium in maternum mutauit affectum; & quæ illi aduersissima fuerat, secundissima facta est. Nam Philippus Mediolanensium princeps, vbi captiuum Regem ad se ductum, & se victorem longè minorem victo animaduertit, mox ex hoste factus amicus, liberum esse iussit; societateque secum æquis conditionibus facta, magnis muneribus donatum à se dimisit. Isabel la interea coniux Renati Lotharingia ducis, qui cum Alfonso de regno contendebat, & per id tempus in captiuitate Philippi Burgundia Ducis detinebatur, cum duobus paruis filiis Caietam venerat: eaque præsidio firmata, Neapolim se contulerat. Sed Petrus Arrago frater Alfonsi, qui ex bello nauali cum paucis triremibus



mibus euaserat, reparata in Sicilia classe, præter spem inuitatus ab altera factione Caietanorum, nocte profectus ea, Caietam obtinuit: & expulso hostium præsidio, suum imposuit, missis ad Alfonsum nauibus quæ illum ex portu Venerii adueherent. Appulit paulo post Caietam in eisdem nauibus Alfonsus: deinde Capuam petiit. Quæ licet medio tempore ab Isabella & Iacobutio Candola acriter oppugnata fuisset, virtute tamen Iohannis Vintimilii eius loci præfecti in fide perstiterat. Ibi Remundus Nolanus Regulus Alfonso reconciliatus est: & mox Scaphatum in insula Sarni situm, castrumque maris in deditionem acceptum. Isabella ubi se viribus Alfonsi imparem esse cognouit, ab Eugenio Romano Pontifice auxilium petiit: qui Ioannem Virelliscum patriarcham Alexandrinum cum tribus millibus equitum ac pari numero peditum ad eam misit, profectus in agrum Campanum Patriarcha aliquot castella vi cepit: obsedissetque Capuam, nisi Ioannes Vintimilius octingentos equites, quos Regina ad eum transmiserat, ex improviso inuadens fudisset cepissetque. Aggressus est tamen idem Patriarcha Ioannem Antonium principem Tarentinum ad montem Fusculum: ac eum expugnatu vi castris captiuum abduxit; eaque demum lege dimisit, *ut frater eius quingentis equitibus stipendia Pontifici faceret.* Gerebant Patriarcha & Iacobus Candola communi consilio & amicis animis pro Regina bellum: sed interuenientibus simulatibus, copias separarunt. Interea duorum mensium induciæ inter Patriarcham & Alfonsum factæ: quibus durantibus Patriarcha Iacobutio reconciliatus iunctis cum eo viribus prius opprimere Alfonsum statuit, quam reconciliationis ad eum notitia perueniret. Erat Alfonsus apud vicum Iulianum, tribus milliaribus ab Auerfa, securus in castris: cum sibi nunciatum est, hostes rupto induciarum fœdere aduentare, sibi minime tutum expectare impetum. Ob quam rem sublatis signis, mox Capuam se recepit: non tamen absque damno suorum, qui postremum agmen duxere. Exin cum Patriarcha Auerfam sibi ad inhabitandum tradi ab Isabella peteret, Iacobus impediret; rursus inimicitia inter eos suborta sunt.

p.108 Sed cum Trameses, excepta arce, Alfonsum dominum appellassent, & arx oppugnari cœpisset, Patriarcha cum exercitu eo profectus obsidionem firmavit: cui & Iacobus Candola ab Isabella rogatus, & Ioannes Antonius Ursinus, & multi alii se coniunxerunt, firmata obsidione cum Ioannes Antonius haud ex animo bellum gerere crederetur, & naues regis aduentare Tranensibus auxilio narraretur; veritus Patriarcha ne intercluderetur, cum paruo nauigio ingressus mare, tanquam pecunias ab Eugenio petiturus, in Picenum adnauigauit, deinde Romam se contulit. Milites eius sine duce relictæ, ad Candolam se contulerunt. Arx deinde Alfonso dedita est, & Ioannes Antonius ad eum rediit. Inter hæc renatus è captiuitate dimissus, cum decem triremibus Neapolim venit: & vocato ad se Iacobo Candola ex eius consilio Scaphatum petens, in deditionem accepit. Deinde in Sulmonensem profectus cum frustra urbem obsedisset, agrum vastauit incendio. Nec Alfonsus interea quiescebat: sed Albano ac Celano agro subactæ, ad Castrum vetus peruenerat, in valle Subletia situm: cui Renatus oblata pro militari more chirotheca prælium indixit, accepit Alfonsus, sed quæsiuit, *singulari ne certamine, an collatis signis cum toto exercitu dimicandum esset: se ad utrumque paratum esse.* Cumque Renatus respondisset, *uniuersi certaminis cum toto exercitu fortunam se velle subire,* Renato renunciauit, *placere id quidem.* Sed quoniam veteri more eius fuerit, qui prouocetur, diem ac locum prælii dicere, se cum exercitu inter Acerras ac Nolam proficisci, qui campus lata planitie utrisque idoneus esset, ibique eum ad diem octauam præstolaturum. Hinc orta dissensione, cum Renatus locum in quo Alfonsus esset, constituendum diceret, prælium impeditum est. Alfonsus in Nolanum perrexit: Renatus in eum locum, ubi Alfonsi fuerant castra, duxit exercitum: atque ita suo satis honori vter factum putauit. Exin Renatus in Pelignos ducens, Castrum vetus subegit. Alfonsus in Vallem Cardinam profectus Arparium oppidum vi cepit, & Marinum Boffam vallis dominum captiuauit, Casertinum regulum in fidem recepit. In Lucaniam ducens, oppidum Anglum ob-



fidione fatigatum obtinuit : Nuceriam deditibus oppidanis accepit. Iam quindecim millia equitum in castris eius erant : quibus fretus absente Renato Neapolim petens, cum Petro patre binis castris urbem obsedit, decem triremibus in portu collocatis, oppugnatur urbs magnis viribus, nec ciues seipsos negligunt. Sed dum Petrus paululum à castris speculandi gratia in littore vagatur, è Carmelitano templo caput tormento ictus repente occubuit. Vir apud omnes ordines gratus, ad rem militarem natus, animi magnitudine & corporis robore excellens, ad subeunda pericula impavidus, acer & manu promptus : cuius interitu consternato exercitu eius diei dimissa est oppugnatio. Alfonsus ubi germani iacere truncum cadauer inspexit, *Adhuc*, inquit, *ego te frater stipendia duxi, ut esses qui mihi tuo sanguine, tuaque nece Regnum pacares* : recondique loculo corpus iussit, & in arcem maritimam deportari : cui post tempora nactus idonea dignum suo genere funus duceret. Sequentibus vero diebus cum oppugnatio repeteretur, tanta vis imbrium cecidit, ut necessario ab obsidione discessum, & res in religionem sit versa. Exin Caynanum oppidum, tradente quodam milite, multis oppidanis occisis, ab Alfonso receptum est ; & arx fame coacta in deditionem venit. Renatus interea ex Pelignis reuersus Neapolim, ubi quæ acta fuerant didicit ; turrin sancti Vincentii oportune in mari sitam ad tutelam regie arcis vi expugnauit : deinde arcem ipsam pluribus diebus oppugnans, dedente præfecto, cui annona prorsus deerat, in potestatem suam accepit. Alfonsus vero cum frustra obsessis auxilium ferre conatus esset, in Lucanos traiciens, Salernitanos, totamque ferme prouinciam & Brutiorum multos in deditionem accepit. Iacobus autem Candola, præstanti vir ingenio, & à literarum studiis non abhorrens, atque in primis rei militaris peritus, qui sub Bracchio stipendia fecerat ; dum castellum quoddam Iacobi Lagunissæ oppugnare nititur, catarri profluvio correptus occidit : clarus profecto regulus, & ingenti laude dignus, si quanta industria & rei bellicæ cognitio, tanta illi fides & in promisso constantia fuisset. Ioannes Vintimilius & ipse per idem tempus Acerras prodentibus oppidanis, & arcem fame laborantem in potestatem recepit. Auerfani quoque à Renato deficientes, Alfonsum intromiserunt : qui arcem apprimè munitam, & forti præsidio defensam, cum expugnare facile non posset, fossatis ingentibus exclusit, & oppugnari quotidie iussit. Renatus ad Antonium Candolæ filium in Apuliam est profectus, cum nihil propterea ab oppugnatione arcis Auerfæ cessari animaduerneret ; per Candimā vallem, & deinde ab Alfonso qui occurrerat impeditus, per transversos montes sequente Antonio in Nolanum descendit : nec tamen obsessis apud Auerfam opem ferre præsumpsit ; cum Alfonsus in castris illic potentior videretur. Sed reuersus Neapolim Antonium Candolam de proditione suspectum, comprehendit & in carcerem retrudi iussit : quæ res magno ei detrimento fuit. Nam cum castra illius sub urbem posita tumultuarentur, ducemque suum p.109 reposcerent, Antonius dimissus est : qui contumeliam sibi arrogatam iniquo ferens animo, mox ad Alfonsum transiit, & arcem Auerfinam septimo iam mense obsessam ei tradi curauit, persuaso per epistolam Xanto, qui cum patre suo militauerat, præfectusque ibi præsidii erat. Desciuit tamen paulo post Antonius ab Alfonso : deinde apud Beneuentum ei reconciliatus est, cum arce per proditionem tradita, ciues quoque consternati in Alfonsi potestatem venissent. Quo tempore & Calathini adactis machinis ab Alfonso expugnati sunt, & castellum Padula, & ante Vrsariam castra posita. Franciscus Sfortia Renato amicus Arrianum, Troiam, Manfredoniam, Nuceriam, & alia pleraque oppida per idem tempus in Apulia obtinebat : quorum custodiam Cæsari Martinengo cum non paruo equitatu commiserat, ipse in Piceno agens. Cæsar cum esset Alfonsus infestus, bis extra mœnia Troiæ pugnare ausus, bis ab Alfonso acie fusus, turpi fuga in urbem se recepit. Nec multo post Vicarum oppidum resistentibus oppidanis vi captum, præda militi permissa, foeminarum decus regio more seruatum. Alexander autem Francisci Sforcie frater sub urbem Thetini Remundum Candolam, ac Ricciū, & Iosiam cum copiis ad Alfonsum euntes, repente aggressus leui certamine fudit : Ric-



Riccium & Iosiam præceps fuga saltavit ; Remundus interceptus est : qui cum esset Antonii Candolæ patruus, illum secundo ab Alfonso alienavit. Venit & Iohannes Cardinalis Tarentinus in regnum aduersus Franciscum Aquinianum Eugenii copias ducens. Sed occurrens Alfonso retro eum repulit. Exin rupem Vilhelmam in alto monte sitam, castellis circa occupatis, fame coactam obtinuit : & paulo post Caprea oppidum in insula eiusdem nominis situm, Tyberii quondam Cæsaris siue delitias, siue latebras dicere malis, tradentibus oppidanorum quibusdam recepit. Nec moratus castra ad Neapolim posuit, simulque Puteolos obsedit : qui aliquamdiu fortiter resistentes, tandem rei frumentariæ inopia, defectione Regi portas aperuerunt. Turris quoque quam vocant Octatii \* recepta est. Vrgebantur interea rei frumentariæ inopia Neapolitani : nec spem aliam habebant, quam vel Genuenses mari, vel Franciscum Sfortiam cum Antonio Candola auxilium terrestri itinere allaturos esse. Anellus interea faber quidam cæmentarius, quem fames Neapoli exire compulerat ad Alfonso profectus, si præmium adsit, Urbem paruo militum periculo capi posse demonstrat. Deliguntur viri fortes ducenti, qui cum Anello, eiusque fratre per ostensum aquæ ductum nocte urbem ingressi, moenia occupant. Rex cum exercitu paratus signum certaminis audaciter expectat. Illi in domum quandam perueniunt, in qua vnica erat anus, & adulta cum ea virgo : mater quum exclamare cepisset, celeriter oppressa vocem emittere inhibita est : filia sua sponte conticuit. Etiam Sol exortus erat, nec amplius quam viri quadraginta ex omni numero puteum inuaserant : qui nunciare ingressum Regi debuerant, siue negligentia, siue aliam ob causam nihil Regi significarunt. Existimabat Alfonso aut cæcos esse qui missi fuerant, aut metu exilire non ausos : profectusque propius urbem, ab ea parte quæ occupanda erat, inuadit. Renatus cum ea manu, quam ad subitos inopinatosque casus parauerat, citato equo ad muros contendit : hostesque procul amouit. Ingens vero pauor & consternatio eos cepit, qui è puteo euaserant : nec regredi in puteum ( ne armorum strepitu proderentur ) nec erumpere propter paucitatem audebant. Alfonso vt vidit nihil à suis intus misceri, desperatis rebus in castra rediit. Renatus tanquam periculum depulisset, relictis custodibus, & ipse in Regiam concessit. Nec mora, nuncius ad Alfonso currens multos è puteo prodisse, atque in domo tacitos ob metum latere nunciat. Iterum igitur ad moenia succeditur, instauraturque prælium : vt erumpendi animus latentibus acuatur. Interea filius eius (quam nominauimus) aniculæ, à statione sua domum veniens, pulsatis foribus aperiri sibi expetit. Mater & qui intus erant, exanimati quid agant nesciunt. Vincit tandem ea sententia, vt referatis paululum foribus, manus ei iniiciant, eumque comprehensum tacere iubeant. Sed ille repente vt armatos vidit, trepidus refugit ; hostesque intra urbem esse vociferat, ad Renatum vero subito peruat, quæque viderit refert. At qui intus erant, uno agmine raptim è domo profiliunt ; primoque impetu moenia propinqua, vno tantum vigile ibi reperto, turrimque occupant. Renatus eo nuncio ac tumultu excitatus, ad moenia celerime reuersus, impetum in hostes facit. Alfonso quo suis animos addat, scalas admoueri imperat. Sed oppidani eam muri partem facile tuebantur ; & qui per

\* al. Oceanii.

P.110 scalas in captam turrim euaderent, grauium faxorum deiectu obsistebant, dum pugnatur acriter, obequitans moenia Alfonso, locum quendam vrbis neglectum esse animaduertit : eoque celeriter scalas admoueri iubens, murum obtinuit. Iam vero qui turrim occupant, partim grauius sauciati pugnam remiserant, partim præcipientes è muro se dederant. Eratque Renatus eam turrim recepturus, nisi à tergo subito cum ingenti clamore hostes inuecti terrorem intulissent. Auxit & trepidationem oppidanorum, unus ex Alfonsi militibus : qui per moenia urbem ingressus, consensu equo, quem vacuum forte inuenit, in hostem acerrime inuectus, opinionem præbuit proximæ portæ captæ atque infractæ. Non tamen Renato defuit animus, sed cohortatus, qui aderant, in hostes fortiter irruens, eorum impetum paululum coercuit atque repressit. Mox vero vt crescente hostium

stium



Neapolis ca-  
pta.

1440.

stium numero, suos exterritos animaduertit, sensim referre pedem cœpit : atque ingressis per diui Ianuarii portam hostium compluribus, in arcem regiam cum paucis se recepit. Tum & à fori Boarii porta, & ab diuersis aliis muri partibus irruptio facta, atque ad prædas discursum est : à cædibus tamen temperatum. Mox vero ingressò Rege & prædæ quoque finis factus. Insignis huius anni memoria expugnatione tantæ vrbs, quæ eo modo capta est, quo annis antea mille per Belisarium è Gothorum manibus erepta fuerat, quadragesimo & quadringentesimo supra millesimum ab ortu saluatoris Christi. Is annus erat ab inito capti belli vnus & vigesimus. Postridie duæ ingentes onerariæ naues à Genuensibus missæ cum frumento applicuerunt, quæ cognita vrbs captura sub arcem concesserunt, Renatumque omnium spe recuperandæ vrbs abiecta, inde auexerunt. Tres adhuc arces in fide Renati perseuerabant, Capuana, Montana, Regia. Sed Capuana pactis paucorum dierum induciis, ante Renati abitum se dedit : Regia aliquanto postea, & Montana tardius receptæ sunt. Renatus ad Eugenium Florentiæ morantem sese contulit, exin in Galliam vltiorem abiit. Alfonso munita Neapoli aduersus Antonium Candolam ducens, ad Carpenonum castra posuit : vbi cum facta pugnandi ab Antonio copia ineundum certamen reguli dicerent, nisi princeps adesset : Ergo, inquit Alfonso, *qui militi animum addere consueui, iam præsentia mea terrorem adhibebo. Absit à nostro sanguine ea recordia.* moxque galeam induit, signumque pugnæ dedit. Certatum est aliquamdiu nutante victoria. Postremo fuso hostili exercitu Antonius ipse captus est : cui erroris veniam postulanti, non modo ignouit Alfonso, verum etiam oppida, quæ à patre accepta hæreditario iure possidebat, reliquit ; cæteris captiuis perhumaniter habitis : nec quidquam ex Antonii suppellectile, quæ ingens erat, præter cristallinum calicem cepit. Posthæc Pelignos Marfosque subegit. Manfredoniam, & Subindæ arcem in potestatem recepit, omnesque belli reliquias in Apulia extinxit : ac pacato vbique regno Neapolim rediens, in triumphantis morem, exultante populo magnificentissimis apparatibus ingressus est urbem. Post hæc de pace inter Alfonso & Eugenium actum. Ludouicus Cardinalis Aquilegiensis, & sua virtute & Pontificis auctoritate potens, idcirco ad Regem missus, eam confecit, leges pacis in hunc modum dictæ : *Eugenius pontifex Alfonso Regem Neapolitanum decernat appelletque : Ferdinando Regis filio, cui Rex post mortem regnum destinauerat, potestatem succedendi faciat ; Terracinaque regno adiiciat. Alfonso contra Eugenii auctoritati se subiiciat : atque opituletur ad agrum Picenum, quem Sfortia occupauerat, vendicandum, si quando pontifex aduersus Turcos aut Afros bellum suscipiat, Rex cum classe adiuet. Sacerdotes regnorum suorum sub Concilii prætextu Basileam profectos reuocet \* nec patiatur tres ex suis, qui Cardinales sub Amedeo Sabaudiensi creati fuerant, reuertentes pro Cardinalibus suscipi haberive. Matricem ciuitatem ducalem, atque Acumulum in Marsis oppida, Romanæ ecclesiæ tradat.* Traiecit deinde in Picenum Alfonso, & quæ supra relata sunt, felici cursu pertexit. Exin domum rediens cum Genuensibus duce Raphaelè Adurno ea lege pacem fecit, *ut bello ablata nemini petendi ius esset. Nec Regis hostes Genuensis populus : nec Rex Genuensium reciperet, illosve commeatu adiunaret. Genuenses Regi quotannis, dum viueret, honoris gratia pateram auream dono darent, ac Neapolim mitterent.* Post hæc Antonius paterna stirpe Gentilia, per matrem Vintimilius, qui multa in Apulis egregia facinora Alfonso gratia fecisset, ad fontem populi non procul à Theano, quo iussi erant regni principes conuenire, cum equitibus trecentis profectus, tanquam vnus ex purpuratis auctoritate maioribus, interficere constituisset, apud Regem accusatus, clam fugiens Cantanzanum ditioris suæ oppidum repetiit : extinctasque regni lites excitare conatus, non solum vicinos procures, sed Venetos & alios Italiæ potentatus, vt in Regem armâ susciperent & litteris &, nunciis inuitauit : sed frustra illi cuncta succedere. Nam Rex cum copiis aduersus eum profectus, & Crotonam urbem & monem ei reliquum agrum ademit : ipsumque in Catanciano reclusum ad deditionem nulla conditio-  
ne interueniente compulit : Iohannem vero Nuceum, qui contumaciæ Antonii sua-

\* vide Aucto-  
ris epist. 3.



suasor fuerat, oppidis omnibus exutum, regno excedere iussit. Secuta est paulo post profectio Regis Tusciam: de qua suo loco relatum est. Vnde reuersus non multo tempore interiecto Fridericum Imperatorem, & Leonoram imperatricem ex sorore sua neptem, ad se venientes tanto honore excepit, quantum referre vix oratori maximo facundia suppetat: donatosque magnifice ambos à se remisit. Exin quamuis pacem (vt prædictum est) Florentinis petentibus dedisset, cum tamen capta Mediolanensi vrbe à Francisco Sfortia, Leonelli marchionis Estensis interuentu cum Venetis positis inimicitiis foedus iniisset; alterum tamen in Tuscia bellum gessit, missio in eam expeditionem Ferdinando filio: de quo satis inter res Etruscas commemoratum est. Soluta est & pax cum Genuensibus, capta naue, quæ de Chio insula Genua petebat, vt postea referemus. Ob quam rem commota Reipublica Genuensi Ioannes Philippus Flisca gente prognatus, cum quatuordecim altissimis nauibus in portum vsque Neapolitanum adnauigauit, ibi vt Regis triremes onerariasque naues incenderet: sed repulsus tormentis æneis inglorius abiit, nec multis post diebus classis regia ad montem Cyrceum sex Genuensium naues infecuta cum homines effugissent, demersit diuiti præda in eis recepta. Quibus ex rebus, quanquam de pace tota ferme Italia conuenisset, inter Genuenses tamen & Regem concordia fieri non potuit. Sed cum Genuenses exules ad Regis opes confugissent, classis ei concessa est, quæ Ligusticum vexans littus, etiam urbem ipsam (vt relatum est) oppugnare non dubitauit: & nunc maioribus viribus idem bellum repetitur. Fuit autem Alfonso, cum Fridericus Imperator ad eum venit, annos circiter octo & quinquaginta natus: corpore gracili, vultu pallido. sed aspectu læto, naso aquilino, & illustribus oculis, crine nigro, & iam albicanti, ad aures vsque protenso, statura mediocri, cibi potusque temperans: nec vino vsus, nisi aqua multa perdomito, literis per omnem ætatem operam dedit: Grammaticæ apprimè peritus, quamuis latine perraro loqueretur: Historias omnes coluit, nec poetas aut oratores ignorauit, dialecticos nodos facile soluit, nihil ei abditum in Philosophia, arcana Theologiæ perscrutatus omnia, de præscientia Dei, de libero hominis arbitrio, de incarnatione Verbi, de sacramento altaris, de Trinitate, de difficillimis quæstionibus percontanti & præsto & sapienter occurrit. In responsionibus dandis quamuis brevis & circumfusus, nunquam tamen diminutus. Sermone blandus, tersusque. Summa ei cura, ne quispiam ab se abiret, ingratas petitiones differre maluit quam negare, fauit religioni: rem diuinam diligenter curauit. Sacerdotalia indumenta, & altaris ornamenta ea parauit, quibus comparari alia nulla queant. Sacram ac domesticam suppellectilem auream & argenteam admirabilem & incredibilem composuit: margaritas, vniones, adamantes, cæterosque lapides preciosos toto orbe quæsitos coemit: facelli in quo sacris interfuit, & aularum quas incoluit, parietes diuitibus atque aureis pannis ornauit. Vestiuit seipsum nitide magis quam preciose. Serico raro vsus aut ostreo paludamento. Venationi magnam vitæ suæ partem consecrauit: in bello seuerus & asper, in pace clemens ac mansuetus, pepercit facile his qui contra se armatulerant: humanum sanguinem inuitus fudit. Scelera tamen odit, nec impune subditos derelinquere passus est. Regnum, quod multis ante seculis spelunca latronum fuerat, adeo pacatum securumque reddidit, aut quacunque iter habeas, nullus prædonum metus adsit. Legatis omnibus ad se venientibus sumptus opipare præbuit. Apostolicis qui cardinales essent, obuiam extra urbem profectus, quasi patres honorauit. Naues insolitæ magnitudinis fecit, & quas qui procul inspiciat, sublimes esse arces per mare videntes arbitretur. Ædificauit pluribus in locis: sed Neapoli supra quam dici possit, splendide ac magnifice arcem regiam (cui Nouo Castro fuit nomen) à fundamentis electam, iterum erexit: tum opere mirabilem inexpugnabilemque, tum sumptu magnificentissimamque turribus orbiculari forma ex lapide quadrato, mirifica structura atque artificio, muri que crassitudine inaudita, & ingenti arcu triumphali ex marmore candidissimo excitatis. Reformauit & Arcem sancti Saluatoris in mari Exono nuncupatam, cuius inexpugnabi-



*Terræmotus  
vide Auct. v.  
epist. 207.*

*\* Auct. v.  
epist. 265. Al-  
fonsi Regis ge-  
sta.*

lis situs ad vsum magnificentissimæ regiae redactus est. Ampliavit & vrbis portum, obiecta in profundum maris altissima mole, crassissimo muro, turribus munita. Salubritatem vrbi exiccatis paludibus dedit. Magnus profecto princeps, & in utramque fortunæ partem probatus: qui inter cetera sibi aduersantia etiam terræmotum anno ab hinc secundo passus est, toto ferme regno, qualem nec nostra nec patrum nostrorum memoria visum auditumve ferunt. Nam & multa regni oppida funditus corruere: inter quæ Arrianum ita absorptum est, tanquam p. 112 Casmate perisset. Rara ciuitas absque insigni ruina superfuit: circiter triginta millia hominum inter cadentia tecta perisse feruntur. Neapolitanorum nobiliores ædes discissæ disiectæque sunt: nec templum in ea vrbe læsionem non sensit. Sed hodie iam ciuitas ferme resecta est, & ciuium diligentia, & Regis liberalitate. Cæterum clarissimi Regis, qui seculum nostrum veluti sidus quoddam præfulgidum illustravit, \* haud ab re fuerit quam breuissime velut in epilogo præclara facinora percurrere, quamuis temporis à nobis recepti pleraque modum excedant: ex quibus illustriora huiuscemodo sunt. Adolescens mortuo Ferdinando patre Aragoniam, & quæ ab illo in Hispania regna suscepit, cum aliquamdiu sapienter administrasset, adoptatus in filium à Ioanna Neapolitanorum regina, dissuadentibus amicis expeditionem in Italiam suscepit, Regina opem tulit. Ludouicum ducem Andegauensem, qui regnum sibi hæreditario iure debitum arffimabat, pluribus præliis afflictum expulit. Reginam, quæ malo vfa consilio ab se defecerat, non tam puniuit, quam coercuit. Renatum alterum regni æmulum, armis victum cedere compulit. Ioannem Vitelliscum Alexandria patriarcham magnis copiis insultantem, regno fugauit. Caietam bis cepit, semel acri pugna deuictam, & iterum ciuitatis parte vocante, cum defecisset. Neapolim, quamuis Renatus & magnus inesset populus, expugnauit. Ioannem fratrem Nauarræ Regem in Hispania laborantem, armis adiuuit. Massiliam insignem Prouinciæ ciuitatem, noctu adorsus obtinuit ac diripuit. Ad insulam Gerbini (quam veteres Lotophagiten appellauerunt) à continenti Africæ quatuor millia passuum distantem obsidione admouit. Bosporium Prouinciæ Regem cum copiis aduentantem, in proximo littore victum, ex minoribus castris ad maiora fugere compulit: nec diu post ab eisdem Barbaris tributa suscepit. Ab Eugenio Pontifice maximo, qui sibi de regno contrarius esset, quas tandem voluit leges pacis accepit. Franciscum Sfortiam ex agro Piceno armis deturbauit: & in Albania & in Oriente per suos duces Turcis infestus, non parua eis damna intulit. Bis Florentinos ob res Gallicas armis afflixit. Bis eis pacem petentibus dedit. Sed maius omnibus est, & admiratione stuporeque dignius, quod proelio nauali à Genuensibus (vt ante diximus) superatus, & in Philippi Mediolanensium ducis captiuitatem adductus, mox liberatus, potentissimo regno potitus est; & à victoribus victor tributum accepit: & adeo erga Philippum gratus inuentus est, vt ab illo suprema voluntate hæres sit nuncupatus. Vera Gothorum soboles: ex quibus deriuatum esse regium Hispaniæ sanguinem, vnde Alfonsi origo est, haudquam ambigunt: illis & prælio vincere, & regna sibi subiicere proprium fuit. Quorum vestigia Ferdinandus imitatus, haud dissimilem filium genuit: quando & ipse Aragoniam, Cathaloniam, Valentiam, Siciliam; Alfonsus vero eam Italiæ partem, quæ olim magna Græcia dicta est, pugnando, instando, vincendo sibi subiecit: & magister Italicæ pacis factus, Hispanicarum quoque rerum moderator & arbiter esse videtur.



P.112

**SIGISMUNDI**  
**AUSTRIACI,**  
ADVENTUS CONSTANTIAM  
ET  
**ADPELLATIO à PIO**  
**II. PAPA.**





LECTORI SALVTEM!

## BURCARD GOTTHELF STRUVE.



**A**duentum Sigismundi Austriae Ducis Constantiam hic exhibemus, de quo nihil, quod dicamus, habemus, nisi quod Gabriel Bucelinus \* eiusdem historiae faciat mentionem, dicens, ipso anno (1459.) Archidux Sigismundus Constantiam venit, magno plausu civium exceptus, quam pompam prolixè describit Ventura de Perusio Pontanus, ad Stephanum de Nardinis & civium militarem generositatem mirifice commendat, ut & matronarum honestatem. Refert etiam in occursum Archiducis Viros Sacros venisse (Cathedralis procul dubio templi) cum SS. Reliquiis, e cuius verbis, quae subiicere visum est, colligas, necesse est, quantus Ecclesia Constantiensis splendor fuerit, priusquam Hereticus furor, omnia auita pietatis monimenta sacrilega licentia dissipasset, & dum in usus proprios suae fortunae perniciem conuertisset. Dolendum tamen, quod mancum hoc scriptum sit, cui Freherus binas Aeneae Syluii adiecit epistolas controuersias Heluotorum cum Sigismundo concernentes.

Subiunctae sunt Sigismundi Austriaci & Gregorii Hamburgi adpellationes a Pio II. Papa ad Concilium. Illustris anno 1450. oriebatur controuersia in Brixinensi Episcopatu, quae scriptis hisce ansam dedit. Causam exponit Gerhardus a Roo. \*\* dicens: Anno quinquagesimo Brixinenses, adstipulante Sigismundo, episcopum creauerunt, Leonardum Wismaierum, Parochum Tirolensem; hunc confirmare nolens summus pontifex, Nicolaum Cusanum virum eximie doctum substituit. Huic Sigismundus, circa annum sextum & quinquagesimum, arcem Taufen cum subiecta ditione oppignorauerat.

Petebat etiam episcopus vicum Mantem telonium Luegensè, Salinarum domum Hallensem, vna cum argentifodinis Tirolensibus tanquam ad Episcopatum Brixinensem spectantia, quae tamen plane denegabant Sigismundi Consilarii. \*\*\* Ad conuentum igitur Mantuanum, a Pio II. 1459. institutum, causam deferrebat Episcopus ad quem etiam Sigismundus inuitatus veniebat, ibidemque magno cum honore exceptus causam per Consiliarium suum Gregorium Hamburgensem bene egit, uti nos docet Gobellinus \*\*\*\*: dum haec aguntur, Sigismundus Austria Dux, qui se venturum saepe promiserat, cum quadringentis equitibus, multaque nobilitate, & splendido apparatu. Mantuam venit: obuiam iere duo Cardinales & omnis ordo Curie,

\* Chronologia Constantiensis ad an. 1459. p. 325. 326.

\*\* Libro sexto exeunte. Eadem ratione negotium hocce prolixius paullo exponit Fugger. im Spiegel der. Ebrn. lib. V. cap. XIII. n. 10.

\*\*\* Fugger. c. l.

\*\*\*\* Comment. Pii II. lib. III. p. 90.



ria, exceptus est in auditorio publico; verba eius nomine fecit Gregorius Hamburgensis, qui multa de domo Austria commemoravit, digna relatu, & principis animum in Turcas accensum dixit, qui nationis oblata quantum ad se pertinerent, præsens confirmaret. Pontifex, qui Sigismundum a teneris novisset vnguiculis, pueritiam, & adolescentiam eius, summa cum laude peractum ostendit, reliquam aetatem præterit. Laudes familiae a Gregorio explicatas & probavit & auxit: auxilia contra Turcas receptavit. Inter cetera dixerat Gregorius, Sigismundum Pii, cum in minoribus ageret fuisse discipulum, qui suas epistolas avide legisset, quarum volumen apud se haberet. & aliqua illarum Sigismundo essent scriptæ; quod verum inveniet, si quis epistolas seculares legerit, quas Pius nondum sacris initiatus scripsit. Verum Sigismundi multo melior pueritia fuit, Quam adolescentia, cuius ingenii mores, cum aetate ut paulo post dicemus perierunt. Tentabatur in eodem conuentu concordia, sed incassum, prout idem tradit Gobellinus\*: vigeant per idem tempus inter Sigismundum & Nicolaum sancti Petri Cardinalem, graues inimicitiae de feudis, & iurisdictione diu contenderant; tentatum est, si quo pacto reconciliari possent; sed cum frustra diebus aliquot cardinales, & ipse Pontifex concordia operam nauassent, discessit Sigismundus. Insequenti anno 1460. Sigismundus Nicolaum episcopum in arcem suam Brunegga obsidet, eundemque cum arce capit, prout ex eodem Gobellino\*\* discimus: inter hæc Sigismundus Austria Dux cum accepisset, Nicolaum de Casa episcopum Brixionensem Cardinalem sancti Petri ad ecclesiam suam profectum esse, ira impatiens ac furoris, coactis ut potuit raptim copiis, quæ sufficere videbantur, Bernecham petit, id est oppidum Brixionensis ecclesiae, in cuius arcem cardinalis secesserat, atque in ipso Resurrectionis Dominicæ sacratissimo die, oppidum expugnat, & arcem aggressus, omni genere machinarum oppugnat. Cardinalis veritus suorum cadem (iam enim plerique vulnerati fuerunt) arcem, & seipsum tradidit, & in custodia retentus, tandem iuratus absolutionem Sigismundo procurare, iniuriasque nullo unquam tempore vindicare, dimissus est. Hanc ob causam banno notabatur Sigismundus, prout tradit Gerhardus a Roo.\*\*\* cum vero, se inuito, factum esse Episcopum princeps non concoqueret, ac alia item offensiones quotidie orirentur, erupit tandem in apertum odium simulatas, & Sigismundus captum, in oppido Brunegga, episcopum aliquamdiu in custodia habuit, ob quam rem, Pontifex illi sacrorum usu interdixit. Is erat Aeneas Syluius Piccolomineus, qui Calixto successus Pii Secundi nomen acceperat. Multa ex eo turba exitere. Eandem hanc excommunicationem Augustanis\*\*\*\* Noribergensibus, \*\*\*\*\* aliisque Papa significabat. Idem fatum experiebatur Gregorius Haimburgius de quo Gobellinus: \*\*\*\*\* in quinta vero feria, in loco ad id electo Pontifex cum cardinalibus, & omni clero, consuetum promulgauit anathema, & homines quatuor perditionis filios nominatim excommunicauit, atque extra Ecclesiam Christi fecit; Sigismundum ex Austria Principibus, qui violentas manus in cardinalem sancti Petri episcopum suum Brixinensem iniecerat ipsa die sacra, & magna Dominicæ resurrectionis: ac Gregorium Hamburgensem cognomento Erroneum, qui paulo ante velut hereticus fuerat condemnatus, ut qui auctoritatem Ecclesiae parui faceret, contemneretque censuras & damnatos dogmatizaret errores. Sigismundus vero publico Instrumento, a Papa adpellabat ad Concilium, Gregorius Heimburgius etiam a Papa ad futurum concilium adpellat, & ad diuersa crimina ipsi obiecta respondet. Licet eiusmodi adpellationes a Papa ad Concilium iam ante in conuentu Mantuano publico decreto Papa

Y 3

prohi.

\* Pag. 91. Eadem dicit Fuggerus, hoc addens. Sigismundum hoc negotium decreto Conuentus Mantuani ideo subiicere noluisse, quod hunc suspectum iudicaret.

\*\* Pag. 102.

\*\*\* C. l. Idem dicit Fuggerus, c. l.

\*\*\*\* Prout Fuggerus testatur c. l.

\*\*\*\*\* Prout Aeneæ Syluii epistola testatur infra inserta. De eodem testatur Sleidanus lib. II.

pag. 48.

\*\*\*\*\* Lib. VIII. p. 28.



prohibuisset \*. Concitabat idem contra Sigismundum Heluetos, cum quibus tamen interueniente Ludovico Palatino, pacem fecit in annos quindecim. Sic enim Gerhardus Roo. \*\* Pontifex Maximus hoc anno (1460.) Heluetios, in arma, contra ipsum (Sigismundum) sacris prohibitum, excitauerat. Hi nulla priuata causa irritati, segnius negotium administrabant. Soli Bernhardus ac Vigilius Graderi, tunc temporis Eglisouii Domini, antequam cum eo similitudinem habebant, a quo pulsi, Tigurinorum patrocinio erant, ius ciuitatis apud eos adepti. Igitur ab ipsis adiuti, Fussatum arcem expugnarunt. Cumque Vitodurum oppidum frustra tentassent, Tigurini, maiore cum militum manu, urbe egressi, eo profecti oppidum obsidione cinxere, aduenientibus caterorum quoque Heluetiorum auxiliis: in oppido erant duo & quinquaginta viri nobiles, cum praesidio militum haud contemnendo. Hi strenue se gerendo, difficilem Tigurinibus obsidionem faciebant. Tandem Ludouico Palatino medium se interponente, pax fit in annos quindecim. De eodem bello Heluetico Bilibaldus Birkheimerus \*\*\* sic loquitur: nec longe inde cum Sigismundus Austriae Dux Brixinensem cepisset Episcopum, qui & Romanae Ecclesiae Cardinalis erat, Suitenses Pontificis moti precibus, pleraque duci abstulere, inter quae fuere Diersenhofen, & Fraxenfeld. Cum vero Dux maius quam cui resistere posset, periculum sibi imminere cerneret, pacis accepit condiciones. Suitenses vero retinere permisit, quidquid in eorum peruenerat potestatem. Qua ratione vero Sigismundo cum Papa an. 1464. iterum conuenerit, idem Gerhardus a Roo. \*\*\*\* narrat, dicens: circa hac tempora, Fridericus Caesar diligentem nauabunt operam, uti Pontificem & Sigismundum patrialem conciliaret eumque ab Ecclesiastica censura solutum redderet, sua interesse ratus videret, ne quid ex tam longa simultate Austriae domus detrimenti patiatur id quod Friderici Senioris, patris sui temporibus, accidisse sciebat. De censura illa, deque dissidio cum Nicolao Cusano superiore libro meminimus. Sigismundus vero, etsi a multis admonitus nihil tamen de suo iure remittere, neque Pontifici supplicare fieri volebat, sed ab eo, ad generale concilium prouocabat, & causam suam, ab omnibus Christianis principibus, cognosci & diiudicari cupiebat. Pontifex contra, & praeter maiorum instituta, & infra dignitatem suam esse contendebat, non agnoscentem crimen, nec veniam eblandientem, censura nexibus exoluere. Id tum ex Pii ad Caesarem, quam huius ad Sigismundum literis, quae habentur constat. Ne igitur maius aliquod incommodum, ex ea re oriretur, Fridericus intercedens, eo negotium adduxit, uti Sigismundus, cum Cusano prius in gratiam rediret, eoque non multo post Tuderti in Umbria uita sumpta, Pontifex Rudolpho Episcopo Laurentino negotium daret Sigismundum absoluen-  
do.

Hac ipsam Historiam concernunt, quam etiam Scriptorum quaedam loca, quae Freherus hic praefixit, illustrant, quibus insignem Naucleri locum adiecimus. Ipsa vero scripta, circa hanc adpellationem publicata, vix dimidiam partem exhibuit Freherus, quae ex Goldasti Monarchia S. R. Imperii \*\*\*\*\* suppleuimus & textum Freheri admodum corruptum emendauimus, ut integra nunc exhibeamus adpellationis Acta. Vfus autem fuit Sigismundus Gregorio de Heimburg, Confiliario

\* De hoc Gobellinus p. 91. irrepsit iam pridem in Ecclesia Dei exitialis consuetudo aduersus Romani Pontificis censuras, victi enim damnatique Apostolica sententia ad futurum Concilium appellabant. Iudicem qui non erat, & superiorem Romano Praesuli dabant, qui non inuenitur in terris, & cum ipsi a suis sententiis appellari non snerent, a Christi Vicario appellandum esse consentiebant. Consuluit Pius in ea re patres, qui aderant in conuentu, quod censerent. Illi concordi voto responderunt, appellationes huiusmodi cum suis auctoribus, damandas esse; atque ita decretum editum est, quod appellantes a Romano Praesule ad futurum Concilium tamquam haereticos fautores, & lese maiestatis reos plectendos esse statuit. Exhibet decretum hoc Millerus im Reichs-Tags Theatro unter Kayser Fridrichs des V. Regierung p. III. c. XXII.

\*\* Lib. VII. p. 116. Eadem habet Fugger. c. I. & Christoph. Hartmann. Amalibus Heremi Deipurae Mariae p. 422.

\*\*\* De bello Heluetico. lib. I. p. 29.

\*\*\*\* Lib. VII. p. 161. Eadem habet Fugger. lib. V. Cap. XVIII. num. 5.

\*\*\*\*\* Tom. II. p. 1576. seqq.



liario suo de quo ita loquitur Henricus Whartonus \* : Gregorius de Heimburg, natione Germanus Iuris utriusque Doctor, & Ænea Sylvio \*\* iudice, inter Germanos scientia iuris ac facundia facile princeps; authoritatis Pontificiæ, si quis unquam alius, hostis iuratissimus. In Concilio Basileensi præsens, Papæ primatum viriliter oppugnavit: summamque cum Ænea Sylvio amicitiam contraxit. Mox Noribergam a civibus accitus, Syndicatus munere per triginta annos summa cum laude perfungebatur. Anno 1460. Sigismundo Austriæ Duci a pontifice recens excommunicato Aduocati vices obiit: illiusque nomine ad proximum Concilium Generale appellavit: nec his contentus ipsam Romanam sedem e fundamentis conuellere, editisque libellis, Synagogam, Babylonem & Meretricem Babylonicam appellare non ueretur. Hinc in rabiem actus Pius Pontifex, veteris amicitia obliuiscitur, & exeunte anno Gregorium diris deuouet: scriptaque ad Norimbergenses epistola, ipsum ciuitate eiici, bonaque eius in fiscum redigi iubet. Gregorius a Pontifice ad Concilium appellat, & in Bobemiam se recipiens, Pii minas ridet. Postea a Dithero Archiepiscopo Moguntino in Germaniam reuocatus, diem in pace obiit, illudque Paullinum \*\*\* tumulo suo inscribi iussit, non indicabit me humana res Scripta. Admonitio de iniustis usurpationibus Paparum Romanorum ad Imperatorem, Reges, & Principes Christianos, siue Confutatio Primatus Papæ. Extat apud Goldastum Monarch. Tom. I. p. 557. Appellatio Sigismundi Ducis ab excommunicatione Pii II. Papæ ad Concilium generale & liberum, cum Scholiis in Pii II. Breue de excommunicatione Sigismundi, & sui: seu Sigismundi Ducis processus contra Papam. Tom. 2. p. 1526. Appellatio ad Concilium generale a Bulla Pii II. Papæ contra se emissâ. ibid. p. 1592. Apologia contra detractiones & blasphemias Theodori Leli Feltrensis Episcopi ibid. pag. 1604. Inuectiua in Nicolaum Cusanum Cardinalem Papalis plenitudinis defensorem ibid. p. 1626. Prodierunt seorsim Opuscula ista Francofurti 1608. 4. tria priora in Antilogia Papæ Basil. 1553. 8. & in Appendice ad Fasciculum Rerum Expetend. Londini 1688. f. p. 114. Sequitur eundem plane Io. Gotfried Olearius in Bibliotheca Scriptorum Ecclesiasticorum \*\*\*\*. Quanti autem Sigismundum olim fecerit Syluius testatur ipsius epistola ad ipsum scripta. \*\*\*\*\*

Efflagitasti modeste a me pridie tibi ut amatoriam alicuius epistolam mitterem, qua suadere posses virgini, quam diligis, ut amare te sineret. Alius fortasse tibi hoc negasset, timens ne prolabereris. Ego annuendum duxi. Scio namque humana vitæ conditionem. Nam qui non amat in adolescentia, in senio postmodum amat, quo tempore derisui est & vulgi fit fabula: quoniam ætas illa amoris inepta est. Nosco præterea amoris consuetudinem, qui in iuvene torpentes virtutes excitat. Hunc in armis exercet, illum in literis. Et studet quisque id agere propter quod amica placeat. Et quia virtutes nomen bonum faciunt, virtuti dat operam, qui amat, ut ante puellæ faciem laudetur. Et quanquam hoc ineptum virtutis præmium sit, probabile tamen est quacunque ratione virtutes adipiscaris. Adolescentes insuper non sunt nimium cobibendi, ne languidi & interres fiant, permittendusque his est aliquis ludus, indulgendum est aliquantisper voluptati eorum ut animum & cor sumant, ut sciant bonum & malum: ut versutias mundi noscant, illasque cum uiri facti fuerint euitare sciant. Hac de causa gessi morem uoluntati tuæ, & optatam epistolam, hac conditione tibi transmittito, ut amans non negligas studia literarum. Sed quemadmodum apes ex floribus mella decerpunt, sic tu ex amoris blanditiis virtutem veneris. Vale.

Addimus aliam, quæ de eodem testatur. \*\*\*\*\*

Cicero cum adhuc iuuenis apud Græcos mirificam orationem habuisset, admirabantur qui aderant omnes, mirisque laudibus nomine Oratorem efferebant. Senex autem

\* Append. ad. Caue. Hist. Litter. p. 98.

\*\* Comment. in dicta & facta Alphonsi lib. III. §. 5.

\*\*\* I. Cor. IV. 3.

\*\*\*\* Tom. I. p. 293.

\*\*\*\*\* Ep. CXXII.

\*\*\*\*\* Ep. CXX.



tem quidam amantissimus patria, inter omnium letitiam atque tripudium solus flebat. Mirati circumstantes, Quid est, inquiunt, quod te letantibus ceteris mœrore conficit. Tum ille, omnes, inquit Græcorum artes in Latinum migrarunt, unica nobis & familiaris & charissima remanserat eloquentia. Sed hanc etiam Cicero nobis auferet, atque in Italiam secum ducit, num quid iusta est causa lachrymarum? Sic mihi hodie de Te visum est, cum in regia de studiis, quæ uocant humanitatis dissertares. Nam & Legistam & Theutonem superabas, & Italicam redolebas Oratoriam facundiamque. Sed quod fuit mœrore Græco, mihi letitiam præbuit. Neque enim si Theutonia literis claret, quæ illas tradit Italia, minus habet literarum. Sunt scientiæ sicut & lumina, qui de suo lumine lumen accendit, sed sibi retinet lucem & accipienti tenebras aufert. Inueni apud sanctum Gallum, quod sueuorum est oppidum, in ueteri monasterio Bibliothecam peruetustam, ubi & libros reperi ornatissime conscriptos, quorum autores fuerunt Theutones: Mirabar cur hodie nihil eloquentiæ his in regionibus eluceret. Sed uenit in mentem apud Italos quoque tempus fuisse, quo sepulta dicendi facultate Barbarorum iusticia dominabatur. Ante centum ferme annos & ante trecentis quadringentisque non inuenies qui per Italiam sermonem habuerit tersum & lucidum. Sic pingendi sculpendique accidit arti. Si ducentorum trecentorumque annorum aut sculpturas intueberis aut picturas, inuenies non hominum sed monstrorum portentorumque facies. Priscis vero sæculis Appellem atque zeusim, Polycletum, Phidiam & Praxitelem, magnos fuisse comperimus. Et de statuariis quidem ipsi videmus, & Vergilio fidem habemus dum ait: Credo equidem uiuos facient de marmore uultus. De pictoribus uero testimonia sunt clarissimorum virorum, qui profecto minime tantis eos præconiis extulissent si picturam non aspexissent, sculpturam, vel similem vel illa pulchriorem. Sed ecce iam reuixerunt sculpendi pingendique disciplina. Reuixit etiam eloquentia, & nostro quidem sæculo apud Italos maxime floret. Spero idem in Theutonia futurum, si tu tuique similes continuare & amplecti totis conatibus Oratoriam decreueritis. Accepi apud Nurenbergam plebanum sancti Sebaldi virum grauem tua permotum suafione multis lucubrationibus historiam atque Rhetoricam persequi. Dili- go ego vos ambos, qui patriam moribus ornantes etiam literis munire studetis. Ceterumque de Nilo fuit hodie nobis sermo: non video quo pacto ex Paradisi monte progredi possit. Paradisum namque terrestrem, quam deliciarum uocant, in Oriente positam volunt, atque ex ipsa Eufraten fluere, quem scriptura Tigrim appellat: quamuis & Tigris alius in Armenia regione caput tollat, qui solino teste, Eufratem fluium in Persicum defert sinum. Nilus uero a monte inferioris Mauritanie, qui oceano propinquat, originem habet. Sic affirmare feruntur Punicii libri & iuba Regis scripta. Si Solino credimus, & hinc nunc latens nunc apparens diuersis argumentis depræhenditur is esse qui irrigat Aegyptum, & terminus est Affricæ atque Asiæ. Licet Lucano huius origo fluminis incognita uideatur dum ait: Egens si qua iacet nascenti conscia Nilo. Vale & quod uerbis fieri debuisset, scriptis accipe.

Ex Noua ciuitate pridie Calendas  
Februarii.





P.113 DE ADVENTV HONORABILIS-  
SIMI DVCIS SIGISMVNDI AV-  
STRIÆ, AD CONSTANTIAM CIVI-  
TATEM ALEMANIÆ, ANNO  
MCCCCLIX.

*VENTVRE DE PERVSIO PONTANI, AD STE-  
PHANVM DE NARDINIS DE FORLIVIO, I.V.D. SEDIS APOSTO-  
LICÆ PROTONOTARIVM ET REFERENDARIVM, CANONICVM  
BASILICÆ PRINCIPIS APOSTOLORVM DE VRBE, CAMERÆ  
APOSTOLICÆ CLERICVM, LITERARVM QVE APO-  
STOLICARVM SCRIPTOREM ET ABBRE-  
VIATOREM.*

EPISTOLA.

**P**ATER reuerendissime, dum animi relaxandi gratia hanc urbem visi-  
rem, deambularem sublicium pontem, qui Rheni vndis inclyti flumi-  
nis alluitur, exemplo nuncius occurrit, aduentum Sigismundi Austriæ  
Ducis significans. Quem ut exploratum habui, illic sum paululum de  
industria commoratus, vt ingrediendi ordinem, simulque Ducem ipsum plane  
conspicerem: quæ vbi cuncta obseruau, contendi domum, & ea omnia tuæ do-  
minationi significau: mirifice (quantum colligere potui) placuerunt iussisti vt il-  
la literis mandarem, quoniam quæ verbo perceperas, maiorem animo volupta-  
tem, si scripta legeres, te dicebas adhibiturum, & id à me conuicio quasi quodam  
efflagitasti sapius: quod libens renuissẽm propter meum dicendi genus obscurum  
atque abiectum. Non putabam enim vllam tua excellentia dignam posse confi-  
cere; veruntamen velim potius rem ipsam, quam propensam animi voluntatem  
abs te accusatum iri. Summæ igitur humanitatis erit, T. R. D. quid qualecunque  
est, ferre æquo animo. Sed maiorem profecto (vt arbitror) iocunditatem ce-  
pisses, si id oneris Nicolao tuo demandasses, maiore enim ille dicendi copia & ele-  
gantia sermonis: quam ipse respondisset, propter eius summam & præclaram eru-  
ditionem. Tamen quod ipsi vidimus notauimusque, quantulacunque nostra po-  
terimus facultate ad te scribam: sed accipe paucis: nam vereor, si longior fierem,  
ne hac mea barbarie doctas aures tuas obtundam nimis.

Vniuersam cohortem classicum cum tibia anteibat, pares deinde reliqui obe-  
quitabant, leui induta armatura: credo vt expeditiores sint, si foret opus, ad in-



sultum faciendum. Tunicas more patrio breues habebant, vix enim inguen ipsum operiebant, rostratis calceis calcaria inhærebant connexa paululum, quibus equos concitabant. Verum illi obæsi, ceruice ardua, pedibus confodientes humum tam exacte succussabant, uti in prælium atque in mediam aciem prodire viderentur. Medium fecerant Ducem ipsum, ante quem ingenuus miles ensẽ thecâ tota argentanea deferebat. Pectore quoque gestabat pretiosum lapillum auro circum ligatum, quem nullo mercari thesauro posse aiebant insigne imperatorium. Plerique vero militari ornamento induti eum comitabantur, simulque etiam ferme omnes balistam portabant & pharetram sagittis refertam. Postremum vero equi sex ligneam arculam opertam corio curru trahebant, argento, vestibus, & rebus aliis ad usum plenam, vndique ramusculis arborum cinctam: aurigæ qui eam sequebantur cantu & clamore replebant omnia: spectaculum erat perquam egregium tum viri ac mulieres ipsæ è fenestris prospectantes, sua lingua interrogabant: *Was volck ist das?* hoc est, quinam mortales essent. Io etiam triumphantis more exclamantes. Demum splendide ab hac Repub. magnificeque, quam pro viribus potuerunt, susceptus est. Quod si Reuerendissime domine, vidisses (ut reliqua præteream) eos superimpositis equis, maxima adductus esses admiratione: tam enim concinne tamque pulchre illis insidebant, ut (si fabulari voluerimus) Centauros existimare haud dubie potuisses. Natio est hæc Germana in bello firmissima, ad arma capienda præ cæteris promptissima. Quod si paulo consultius in prælium prodirent, arma caperent, non tanta temeritate in hostes impetum facerent; consilio, prudentia (pace aliorum dictum velim) nulla nunc Hercle esset gens toto terrarum orbe, quæ cum hac posset comparari. Quotiens cum Romanis acriter conflixere? Quotiens de sola vita certarunt? Sed positi in hac plaga gelida, pertinenti ad septentrionem alacriori consilio esse non possunt. Nam axis hic gelidus nimium obtundit ingenia, adeo ut quæ magna sunt, & cognitione dignissima, ipsi capere non possint: acria ac robusta habent corpora, gelu, niuib. & leno durata aquilino, qui vero regionem calidam incolunt, enerues ac molles sunt, propter maximam ipsius solis fortitudinem & vim; nam trahitur sanguis ipso æstu in superficie, quo magnopere vires corporis debilitantur. Ad arma nequaquam idonei, sed excogitata quadam sunt præditi sapientia, nec non prudentia. Mediam qui inhabitant, quoniam neque æstu nimio, neque frigore vexantur, beatiore dici possunt: nam & virtute animi & corporis maxime excellent, ut in ipsa Italia, qui cæteris vniuersi orbis gentibus consilio, prudentia, ingenio & experientia rerum omnium facillime sunt anteposendi. De quorum laude & excellentia duxi in præsentia satius prætereundum esse, nam neque hos laudare nimium, neque illos probro afficere consilium, de re tamen luce ipsa clariore differere absurdum videtur. Sed iam ad nostra redeo.

Germanorum  
laus.

p. 114

Postridie vero, reuerende domine mi, dominatio tua nouisse potuit, cum sacra Diis ceremoniæque persoluerentur, vrbsque tota lustrata esset, quanta animi magnitudine, quanta prudentia, quanta morum facultate inclytus ac magnificus, magnanimus hic Dux esset ornatus. Adeo enim comis est, adeo vrbanus, adeo omni re benignus, ut vltro omnes ad sese amandum allicere videatur. Præfert quandam præ se animi mansuetudinem singularem, ab omnibus veneratur, obseruatur, diligiturque. Nihil enim præstantius magno viro esse potest, quam omni in beneuolentiam opere consequi; sic nec calamitosius quam ab omnibus odio haberi, sed ab his præsertim à quibus coli & amari debuissent. Nam scimus Imperatorem illum Romanum dum totos pene dies recenseret, eum diem solitum dicere perdidisse, in quo amicum nullum sibi asciuisset. Nam misera solet esse plerumque Principum vita, quorum calamitati haud vnquam creditur, nisi dum penitus humi prostrati ac deiecti semianimes iacent. Curandum est igitur, ut in omni vita quam cautissime simulque sapientissime viuant. Quod ex eo magnam capere voluptatem potuisti inter deambulandum, sed enim præsertim illecebris illecti fuissetis pro-



propter ciuitatis apparatus. Omnia fere loca ornata erant per quæ patebat incessus, vbique passim humi iacebant virentes herbæ, spirantesque in plerisque locis odorem suauissimum, inhærebant & domibus atque pendebant è fenestris earum densi arborum ramusculi; vt iam non per ciuitatem, sed per prata & nemora deambulare videremur, nusquam enim domus ipsæ apparebant. Nam tum vt pompam transeuntem viri pariter ac mulieres intuerentur è fenestris, ramos atque arbores ipsas conscendisse profecto videbantur. Erat transeuntibus spectaculum quam gratissimum. Sed nec dearet ad id virorum ac mulierum ornatus, quantum pro more & consuetudine patriæ, nam ibi latis nimium ac splendidis vestibus vti non solent; magis enim in victu & suis balneis, quam in cæteris rebus pecunias erogant atque effundunt.

Iuuentuti quæ pompam sequebatur, ornamentum erat manica auro atque argento interrexta; plerique vero quibus hic ornatus non erat, vestem breuiusculam illam diuersi ac varii habebant coloris. Sed omnes fere comam muliebri more promissam habentes, ferto duntaxat ornarant multis ac variis distincto floribus, quo vti fere semper solent diebus festis, vel ramusculum arboris fronte tectum in ambitu circumductum capiti præponunt, qui profecto mos & consuetudo placere debuit magnopere. Maioribus etiam ætate prouectis, à quibus hæc prorsus videntur abhorre, toga erat tenuis crurum, capiti pileum, manibus vero (vt vetus est ritus) tritas verunt ephemeridas, ad persoluendum die credo quodiamnam precem. Nam hoc nocis videntur præstare, quod religiosiores sunt, atque ad omnem cultum diuinum quam nos propensiores. Puellæ quoque innuptæ & ipsæ suum seruant vestiendi morem, veste linea vtuntur, quæ & ceruici & manibus nitentissimis contenta, rugis tum paululum conglobata speciem præbet folium. Satis me hercule concinne hæret, sed hoc ad decorem earum non parum facit; nam insurgunt pectori sub tenui illa veste mammillæ orbiculatæ in modum mali Punici, quod nescio quid istic lateat Dea Cypriæ, capiti mollam floridam & ipsæ imponunt, sparsis per humeros bipartito crinibus, inter quos pendent mappæ sericæ colore diuersæ, venustæ satis, sed hoc nostris præstant, quod ora fuco de cerussa non linunt, quales namque natura progenuit eas, tales sese vulgo effecerunt, quod non parua profecto ex hoc viderentur dignæ laude, calceos etiam habent duplici corio ex albo & nigro confectos: & sublati paulisper crura ambiunt, colligati vnica fibula, tum vero supra paululum ligulis frequentissimis. Sed ausculta (quæso) paucis earum nubendi consuetudinem: nam ab re nostra alienum non est, quam ipsi cognouimus, dum apud Arbonam templum intraremus, missæ audiendæ gratia, Oppidum situm est in ripa lacus, dictans hinc millibus passuum p. 115 ferme quindecim. Orante me illic confluit inopinate multitudo quædam oppidanorum, putabam primo ea de causâ se quoque eo conuenisse. Sed dum omnes aram circuirent, rem ego quasi nouam facturos cupide obseruaui, singulorum ora sacerdos aræ assideas manipulo verberabat, tum viro & vxori flexis genibus ante aram stantibus manu capiti imposita auribus submurmurauit, post voce altiori quiddam sermone patrio prædixit, quæ ipsi propter huius linguæ ignorantiam percipere non potuimus, sed credo Deos imprecatum iri, id connubium felix faustumque eis futurum.

Arbona.

Demum quibusdam dictis Euangelis eos signo crucis signauit. Surrexerunt illi his peractis deuote vt abirent, tum extemplo accurrunt omnes eorum quanta maxima potuerunt vi capillos trahentes. Paulisper extimui rem antea nunquam visam, neque auditam, putabam vero in proelium incidisse, cum viderem tumultum illum atque concertationem, sed vbi rem omnem plane cognoui, risum mehercule continere non potui, Germanus est hic mos, quem si probas, ego laudo: magnam tamen hæc nobis voluptatem exhibuit. Sed iam ad nostra redeo.



Matronæ quoque pompam sequebantur, pallio oblongo, capite gestantes lineum pannum, ferunt præ se cum venustate dignitatem quandam non mediocre. Tum omnes lustratione peracta ad templum rediimus, comitantes tot præclaras reliquias Deorum quas per urbem portauerant. Ignoro an usquam terrarum res tam sumptuosa, tamque præclare & magnifica possit inueniri. Tot enim vasa argentea, tot tabulæ aureæ, atque Deorum simulacra, tot arculæ reliquis plenæ elaboratæque, ut Polycleto ac Phidiæ non cedant, quibus tot infixæ sunt amethysti, adamantes, berylli, smaragdi, ut non ignotis modo, sed notissimis summam pariant admirationem. Obstupuimus tum primum, cum thesaurum illum & suppellectilem tam insignem conspeximus, admirantes quodammodo, unde nam tantum auri atque argenti & pretiosarum gemmarum cogi potuerit.

Celeberrima profecto res est, & prædicatione dignissima. Quæ omnia quantum nobis iocunditatis attulerint, nec lingua quidem possit explicari. Demum his omnibus visis Principem hunc illustrissimum conuenisti, qui iuncta dextera perhumane tecum locutus est, in quem ob eius tantam mansuetudinem amorem quendam præcipuum ac beneuolentiam conlasti singularem. Quantopete quoque ipse te amet, iam plane constat.

Dictis deinde paucis, de rebus nris Germanis componendis, qua gratia huc à summo Pontifice delegatus erat, quisque in suum concessit domicilium. Postero vero die eodem in templo venistis omnes ubi in maxima Principum frequentia ac præstantissimorum virorum coetu orationem habuisti de laude Pacis adeo summam atque præclaram, ut in maximam quandam admirationem facile omnes adduxeris: summis illi quidem te in coelum usque laudibus extulerunt. Qui si tibi obsequuntur, si tuis parebunt edictis, nil eis salubrius, nihil omni vita gloriosius contingere poterit. Quid enim præclarius atque optabilius, quam se inuicem colere? quid perniciosius, quam inueteratis odiis sibi insidias parare, incendiis & rapinis sese palam obicere? Nam nisi inter mortales coniunctio quædam animorum, nisi mutua quædam esset inseruiendi voluntas, omnia certe ruerent, interirentque penitus.

Nam si manus ori cibum denegarent, si pedes deambulandi officium corpori non subministrarent; corpus vnum amplius dicendum non esset. Ita nec ciuitates, nec Respublica diutius esse possent, si amore mutuo & beneficiis non tuerentur, Quid concordia sanctius? Nam (inquit Historicus iste) concordia res parue crescunt, discordia vero maximæ dilabuntur. Quot oppida, quot ciuitates, quot regna, quot imperia, solo æquata iacent?

\* Deesse ali-  
quid videtur.

Nam (ut reliqua prætereamus, quæ ante oculos esse debent) quid Roma ipsa olim caput vniuersi orbis, si repetere vetustiora volumus, nonne propter ipsam discordiam, tot tantasque subiit calamitates? \* Ut ignorem an prouincia vlla eligi possit, quo nescio profecto cui dignius ipse pene hanc prouinciā delegare potuisset, qui tanta prudentia, tanta animi magnitudine, tanta magnarum rerum experientia præditus ita esset, sanius profecto sibi consuluit. Quod nisi hanc rem ar-  
p. 116  
duam, & tanti ponderis tibi credidisset, expectare potuisset extemplo iacturam magnam ac calamitatem in omnes impetus quam maxime irruituram. Eamque ob rem si contemplabuntur quantum calamitatis hæ dissensiones & schismata afferant populis faciliores erunt ac promptiores ad omnem concordiam, si fugere, si euitare tot incendia, tot rapinas voluerint, alter alterum hortabitur ad deponenda odia: si exhorruerint stupra virginum, & suorum parentum, affinium, propinquorum & amicorum cædes, ultro ipsi exoptabunt, postulabuntque hoc sanctissimum foedus. Erigant proinde animos eorum ad hæc imminencia mala, ante oculos suos ponant hanc rem horrendam ac nefandam, quod si fecerint, beati pro-



profecto dici poterint, tum euitabunt hanc pernitiem & internecionem omnium. Quod secus eos facere non arbitror, tum te dignissimum virum habeant, oratorem, consulentemque eorum vitæ serenissime. Quod profecto imprimis Diis, tum vero summo pontifici magnopere debebunt, talem qui delegerit ad hanc Germaniam componendam. Sed tu maximam ex hoc, vbi id effeceris, gloriam in Italiam reportabis.

*RELIQUA DESIDERANTVR: QUORUM LOCO DUAS HASCE  
PII PAPÆ II. EPISTOLAS HOC TEMPORE DE EADEM RE-  
SCRIPTAS, IN VULGATIS EDITIONIBUS NON  
EXTANTES, APPONEMUS.*

**P**IVS Episcopus servus servorum Dei, dilectis filiis officialibus, & communitati ciuitatis Constantiensis, salutem & apostolicam benedictionem. Quanto studio cupiamus extingui nonnullas discordias, quas de nouo suscitari proxime intelleximus inter dilectos filios, nobilem virum Sigismundum Ducem Austriae, & confœderatos ex aduerso, intelliget deuotio vestra ex literis, quas ad dilectos filios, Magistrum ciuium & consulum ciuitatis Basiliensis scripsimus, quarum copiam mittimus præsentibus inclusam. Quapropter deuotionem ipsam, quanto possumus efficacius exhortamur, vt causam tam piam extinguendorum scandalorum, & conseruandæ pacis inter partes præmissas totis viribus amplectamini, & iuxta rei portantiam, seu à dictis magistro ciuium & consulu requisiti fueritis, seu vos videritis expedire (vt decet veros filios sedis Apostolicæ, & pacis ac vnionis amatores) partes vestras pro votiua tam salutaris rei conclusione interponatis. Pro quo facto & meritum apud Deum, & in hoc sæculo gloriam immortalem cum gratia & amore nostro assequemini. Cæterum cum tempus appropinquet celebrandæ diætæ quam in Mantuana ciuitate diximus, requirimus affectuose deuotionem vestram, vt oratores vestros viros præstantes, & plenis mandatis suffultos, iuxta alias requisitiones nostras, illuc transmittere velitis. Datum Senis, anno incarnationis Dominicæ 1459. Idus Aprilis. Pontificatus nostri anno primo.

**P**IVS Episcopus dilectis filiis, magistro ciuium & consulu ciuitatis Basiliensis salutem. Venit nobis nouissime ad notitiam inter dilectos filios, nobilem virum Sigismundum Ducem Austriae, & nonnullos ex aduerso confœderatos, graues suscitari dissensionum causas, & adeo vtrinque animos incitari, vt nisi antequam odia inualescant, salubri remedio orientibus malis occurratur, dubitetur, ne iterato partes non sine mutuis calamitatibus ad aperta bella deueniant: Quæ si fierent quantorum malorum daretur occasio, deuotio vestra abunde potest intelligere; quæ ex præteritis guerris quot redundauerint scandala, cognouerunt.

Nos igitur, qui ex pastoralis officio inter vniuersos Christi fideles vnionem & concordiam conseruare desideramus, eo magis hoc tempore id facere exoptamus, quo cernimus maiorem instare Reipublicæ Christianæ necessitatem, nihilque perniciosius accidere posse, quam dum fides ipsi vicissim domesticis inuoluntur concertationibus, hostis Christiani nominis perfidus Turcus vehementius in maligno proposito proculcandæ fidei orthodoxæ animatur, viamque sibi munit ad id detestabile conceptum suum exequendum. Hæc non dubitamus, pro vestra prudentia deuotioni vestræ non esse incognita. Quocirca eam hortamur, vt tanquam veri Catholici, ac pacis amatores, in tempore adesse velint, & ne nouum incendium suscitetur omni studio & industria procurare, partes ipsas efficacibus mediis, & oportunis rationibus ad pacem & concordiam, aut si id ita celeriter fieri non posset, saltem ad treugas inducendo. Itaque à vi facti omnino vtrinque absteineatur. Nos enim hoc oneris pro singulari nostra in vos affectione, confidenter deuotio-



uotioni vestræ imponimus, nec dubitamus studium & diligentiam vestram in hoc salubri negotio plurimum profutura.

Quantum vero in nobis erit, pro his conficiendis nec oratores mittere si (necesse fuerit) recusabimus, nec quicquam prætermitemus eorum, quæ ad conducendum votiue hoc factum cognoscemus. Vos modo magno animo hoc laudabile opus amplectamini, & vobiscum excogitetis vias & rationes, quibus desiderium nostrum adimpleri possit. Aduocando in hoc subsidium & fauorem dilectorum filiorum, officialium, & communis ciuitatis Constantiensis, & adiungendo vobis eas personas, quas ad conclusionem votiue cognoueritis opportunas. Cæterum mittimus vobis literas, quas ad dictos confœderatos scribimus, quas eisdem eo tempore & modo, quibus melius & vtilius iudicabitis, facietis præsentari.

Datum, &c.







p. 118 SIGISMVNDI DVCIS AVSTRIÆ,  
APPELLATIO A CENSURA  
PII PP. II.

Item:

GREGORII HEIMBURG. D. APPEL-  
LATIO AB EODEM AD CONCILIVM FVTV-  
RVM, ET AD CRIMINA OBIECTA RESPENSIO.  
ANNO M. CCCC. LX.

ARGVMENTVM.

*Ex Alberto Grantzio, Lib. XII. Wandalie, Cap. XXIV.*

**N**ICOLAUS de Cusa per ea tempora Cardinalis, Teutonicus, (quod est monstrum coruo rarius albo) vir doctissimus, legatione fungitur summi Pontificis per Germaniam: quod Pius pontifex Germanis, quam à multa memoria vllus Pontifex, affectior esset: quia Germaniam ille Germanicus nosset, diu versatus in eius prouinciis. Multa vir religiosissimus legatus constituit in prouinciis, quæ apud Metropoles seruantur. Peruenit Magdeburgum, & vsque Hildesheim: citra descendere non potuit, quod concitus in Italiam reuocaretur. Quum venisset ad ecclesiam suam Brixinensem in Alpibus, deque illa disponere voluisset, pro veteri Pontificum iure: non est passus Sigismundus dux Austriæ, vt ea in Germaniam tenderetur consuetudo, quod Romani Cardinales ecclesias Germaniæ haberent in comendis, quomodo Abbatias & monasteria Italiæ, Galliarum, Hispaniæ, Angliæ: quæ vna causa est in eis prouinciis creari Cardinales, non in Germania. Graue oritur dissidium inter Cardinalem & Ducem: vterque suum gladium distringit in alterum. Captus Cardinalis, custodiæ mancipatur. Pontifex execratione & maledictis insectatur Ducem. Mittit ille in urbem pro se oratorem, qui pontifici reddat sui facti rationem. Erat homo quidem doctus, sed pertinax, qui venerat orator, & qui Pontificem in minoribus se minorem cognouisset: audentius tuetur causam commendatam. Vbi non profecit appellationem interponit, quæ extat: eamque in Vrbe publicat. Interim Papa & Ducem & nuncium eius execrationibus diris insequitur. Fugit Gregorius (hoc enim illi nomen erat) in Bohemiam: ibi ducta vxore contemnit Pontificis execrationes. Interim omnis ducatus parens Sigismundo, ecclesiastico supponitur interdicto, vetitis omnibus vllam habere communionem cum incolis: neque



neque terram illam pertransire fas sit peregrino. Sed facile Principi cum principe conuenit, vbi Chrysostomus venit in medium.

*ALIUD, EX IOANNIS TRITHEMII ABBATIS SPANHEMENS.  
CHRONICORUM HIRSAUGIENSIIUM VOLUMINE II.  
SUB ANNO DOMINI M. CCCC. LX.*

**A**NNO etiam præsignato cum Nicolaus de Cusa Episcopus Brixinensis in Bauaria, & sacrosanctæ Ecclesiæ Romanæ tituli sancti Petri ad Vincula presbyter Cardinalis iura memoratæ ecclesiæ suæ Brixinensis acrius tueretur, à Sigismundo archiduce Austriæ capitur, & honestæ custodiæ mancipatur. Vnde Pontifex max. Pius secundus indignatione commotus contra Sigismundum, eum excommunicauit: & terram eius Ecclesiastico interdicto supposuit. Cardinalis autem fuga tandem lapsus, Romam peruenit, & Papam grauius contra Ducem incitauit. Factum est ergo ad ipsius Cardinalis instantiam, ut Papa in Ducem multiplicaret censuras: & quantum in ipso erat, neminem exterorum per eius terram, id est Comitatum Thirolis impune transire permittebat. Cuius rei occasione pauperes terræ dicti comitatus grauius affligebantur. Habebat eo tempore Dux Sigismundus à secretis Doctorem quendam in iure peritissimum, nomine Gregorium Heimburgum, patria Francum Orientalem. Is cum esset Latine Simul & Teutonice omnium suo tempore facundissimus, multa scripsit, dixit & fecit pro eo, Appellationem à sententia summi Pontificis, ad Futurum Concilium pro Sigismundo conscripsit admirabilem, & pro eius absolutione petenda Romam in persona propria perrexit, sed pontifex ducem absolueri non voluit, nisi prius Cardinali satisfaceret pro contumelia quam intulerat. Postremo tamen Dux humiliatus, veniam & absolutionem à Papa impetrauit.

*ARGUMENTVM SEQUENTIVM LIBELLORVM PER W. W.*

**C**VM Æneas Syluius, Pius II. Pontifex factus sub triplici corona rerum potiretur, Nicolao de Cusa creato Cardinali Brixiniensem episcopatum addidit: non (quod boni pastoris erat) vt pasceret & regeret commissam Ecclesiam, quod potuisset sane præstare si tam fuisset pius quam fuit doctus: sed vt Romano more in commendis (vt vocant) haberet, hoc est, vt deglubatis & depilatis ouibus, ex eo prouentu ditesceret, nec quicquam curaret aliud, quam vt à Romana non deficerent obedientia. Quod cum Sigismundus Dux Austriæ non ferendum esse putaret (graue enim videbatur sibi in Germania fieri, quod Galli & Itali, cæteræque nationes non pauca magna cum iactura & rerum & animarum experiuntur) suæ præsertim ditioni, Cardinali sese opponit. Crudescente itaque dissidio, ad arma ventum est. Cardinalis captus custodiæ mancipatur. Pontifex ob læsam maiestatem in sua creatura valde commotus, Sigismundum fulmine fecit. Dux grauiissima censura, & quæ non modo principi, verum etiam toti mundo, eo tempore erat formidabilis, constrictus solutionem meditatur. Quam cum à nemine, nisi ipsomet pontifice, posse impetrari non ignoraret, Gregorium Heimburgensem iure consultissimum virum, oratorem & legatum suum ad Pium pontificem mittit, vt eius facti rationem redderet, ac si fieri posset, iusta excusatione illi satisfaceret. Orator autem cum vidisset Papam nulla satisfactione posse moueri, causa fortassis bonitate fretus, & quod magna familiaritate aliquando \* Æneæ Syluii in Aula Friderici Imperatoris esset vsus, vehementius instabat, absolutionem sui principis vrgendo. Tandem cum intelligeret, Pontificis pertinaciam nulla æquitate posse frangi, hanc Principis sui interposuit appellationem, atque ad valuas ecclesiæ Florentinæ publicauit. Verum mox Pontifex concitator factus, non modo in Ducem, verum etiam in ipsum Oratorem, ceu exagitata quadam vipera, virus suæ maledictionis effudit: quem tum temporis Reipublicæ Noribergensis Syndicum, fulminationis suæ literis ita persequitur, vt Bohemiam (quæ tunc sola

\* vide Æn.  
Sylu. epist. 12.

Catal. test.  
verit. ex Cran-  
zio.



ex toto orbe Christiano Papæ minas contemnere sciebat) patriam sibi quærere cogeretur. Ex qua aliquot postea annis accersitus est à Dietero Moguntino archiepiscopo, quem idem Pius secundus persequebatur. Heimburgensis igitur, cum aliud non haberet, quo suæ consuleret famæ, ac nomen quod semper habuerat bonum, tueretur; à dicta pontificis sententia ad futurum prouocat Concilium: non quod speraret, papam mutaturum sententiam, aut prouocationem eam recepturum; quem non ignorabat iam antea collecta Synodo Mantuæ illiusmodi appellationes damnauisse, & ita appellantes, notarios ac testes, & adhærentes omnes excommunicasse: sed ut tam suæ ætatis hominibus, quam toti posteritati suam testatam faceret innocentiam, quoque in veritatem & esset & fuisset animo, declararet. Quo etiam animo libellum contra primatum Papæ, breuem quidem, sed acrem & cruditum, in eundem Pium composuit.

Catal. test. ve-  
rit. ex Crantzio.

JAC. WINPHELINGS IN PROSTHESI SVA AD ILLVSRES VI-  
ROS GERMANIÆ, JOANNIS TRITHEMII ABBATIS.

GREGORIUS HEIMBURGIUS non mediocris iureconsultus & orator, nec ab Italis (maxime Venetis) sine laude orationum suarum abscessit. Quanquam admirabile eius ingenium non sola quidem inani verborum ventositate, sed etiam sacratissimis legibus probe institutum, aliorum inuidiam sibi comparauit. Summa enim petit liuor, persflant altissima venti. Orationes & epistolas varias scripsit, pro defensione Sigismundi Ducis Austriæ, & appellationem à sententia summi pontificis, & alia. (in quibus extat etiam eius confutatio primatus Papæ, excusa Basilea 1555. in Antilogia Papæ.

p. 120 ÆNEAS SYLVIVS PICCOLOMINEVS, INDICTA ALFONSI  
REGIS COMMENTARIOR. LIB. III.

GREGORIUS Heimburgensis, scientia iuris ac facundia inter omnes Germanos facile princeps, cum domum ex curia Cæsaris, in qua diu fuerat versatus, reuertisset; atque non longe ab oppido Nurenbergensi amicum offendisset, qui uxorem suam viuere & bene valere diceret, si viuit vxor, inquit, ego obii.

IDEM SYLVIVS AD ILLVM, EPISTOLA CXX. POST ALIA:

Sic mihi hodie de te visum est: cum in Regia de studiis (quæ vocant) humanitatis differtares. Nam & Legistam, & Teutonem superabas, & Italicam redolebas oratoriam facundiamque.

PIVS PAPA II. VENERABILI FRATRI  
NOSTRO, N. EPISCOPO BASILIENSI.

Venerabilis frater, Salutem & apostolicam benedictionem. Intelleximus displicenter, quomodo non obstante, quod Sigismundus ex Austria principibus propter infandum & notorium sacrilegium in personam dilecti filii nostri N. tituli S. Petri ad vincula S. Romanæ Ecclesiæ presbyteri Cardinalis, Episcopi Brixinensis commissum in excommunicationis & alias iuris horribiles ac satis declaratas pœnas, cum complicibus & satellitibus suis inciderit, per nosque talis (ut nosse debuisti) declaratus existat, posito, ut oportuit, Ecclesiastico interdicto omni in loco ad quem accesserint: Tua tamen fraternitas eundem Sigismundum & suos (ut præfertur) sicut tenetur, non deuitet, nec etiam (proh dolor) interdictum seruet, ipsosque innodatos tremendis censuris non solum non denunciet, quin imo se ad tractandum inter ipsum & dilectos filios confæderatos intromittat, non aduertens quod per hoc maxime Deum offendis, censurasque & huius Apostolicæ sedis auctoritatem contemnis, libertatem Ecclesiasticam parui pendis, & contra præstitum per te consecrationis tempore iuramentum venis, proprio honori non parcis, clerusque tuus profanans irregularis existens diuinis contra Ecclesiæ ordinationem se temere immiscet. Quam grauius quidem ista sint non ignoras. Mandamus igitur per præsentem

Tom. II.

Aa

tue



tua fraternitati, & districte per præstitum iuramentum requirimus, quatenus ab omni dicti Sigismundi & suorum conuersatione; atque tractatu inter ipsum & dictos confederatos, prorsus abstineas: Interdictum autem iuxtastrarum superinde literarum continentiam, inuiolabiliter teneas, & teneri facias. Secus faciendo contra tuam fraternitatem, tanquam fautricem dictorum sacrilegorum, & Apostolica sedis, ac nostri, imo Dei contemtricem, nos iuste sentias prouocatos. Datum Romæ, apud sanctum Petrum, sub annulo piscatoris, die X. Ianuarii M. CCCC. LXI. Pontificatus nostri anno III.

NAUCLERUS Vol. II. Gen. XLIX. pag. 1090.

PER hæc tempora Pius Papa Sigismundum Austriæ Ducem diris execrationibus persecutus est, causa fuit: Ecclesiam Brixensem sub Callisto tenebat Nicolaus Cusanus Cardinalis ad Vincula S. Petri, cuius Ecclesiæ aduocatus est comes Tirolis ab imperatore constitutus, hunc Nicolaum Cardinal. vacanti Ecclesiæ Nicolaus quintus episcopum præfecit, reluctante Sigismundo, quietam tamen possessionem postea obtinuit. Verum cum idem Cardinalis monasterium quoddam in Sonenbergo reformare uoluit, restitit illi Sigismundus Dux Austriæ & Comes Tirolis. Adhæc cum inuenisset cardinalis ducem & comitem quadam feuda ab ecclesia Brixiens. tenere, quæ non recognouisset, hortabatur eundem Sigismundum Spiritualem iurisdictionem suam ne perturbaret, & quod nouam reciperet de feudis inuestituram, iusque iurandum præstaret. Ex quo mox dissensiones ortæ sunt & odia, surrexeruntque maligni homines clerici & laici nonnulli una cum prædicto duce, reformationem episcopi impediētes: sed & monialium monasterii supradicti, ne reformarentur, protector factus est Sigismundus. Inualuere odia, ut cardinalis in Episcopatu manere non posset, unde uenit ad Callistum Papam, qui monitione præmissa, Sigismundum & complices execrari, & interdictum in terram ipsius ferri mandauit. Mortuo Callisto, Pius successit, qui uocatum Sigismundum cum prædicto cardinali concordare uoluit, sed incassum. postea uero ad iussu Pii pontificis idem cardinalis in episcopatum rediit, Brunecam oppidum ecclesiæ Brixiens. peruenit, literis maxime fretus, quibus ipse Sigismundus suo signo obsignatis, bona fide promisit ecclesiam Brixensem & cardinal. quoad uiueret se protecturum. tractabatur inter ducem & cardinalem, ac tractatu durante, Sigismundus in sacra hebdomada copias eduxit, & iter faciens, ipsa die Paschæ ante Brunecam armatas militum acies collocauit, machinas admouit, oppidum cepit. nec moratus, arcem quoque summa vi oppugnare aggressus est, in qua cardinalis erat. Interuenientibus mediatoribus, certis conditionibus conclusa est pax: in quibus non erat dictum, quod nec arx, nec cardinalis in potestatem ducis ueniret. nihilominus dux clauēs arcis extorquens cardinalem arctissima custodia seruari iussit, & sic aliquo tempore cum summa ignominia tentus est, nec libertatem obtinere potuit, nisi remissis iniuriis, quodam ecclesiæ castro tradito, magno auri pondere soluto, cum pluribus aliis conditionibus, omnibus denique ecclesiæ priuilegiis & iuribus ereptis. Nec his contentus Sigismundus, cum Sacerdotes a diuinis cessarent, non ueritus est necem cardinal. denunciare, nisi ad prophanationem sacrorum illos compelleret. De singulis affirmat se Pius informatum fuisse, admonuisseque ducem ut respiceret, altera vice: & cum ad sanitatem redire non uellet, eum anathemate notauit dirissimo.





SIGISMUNDI ARCHIDVCIS  
AVSTRIÆ, &c.

APPELLATIO

ABVLLA EXCOMMUNICATIONIS  
PII PAPÆ II. AD CONCILIUM GE-  
NERALE ET LIBERVM.

NARRATIO PAPÆ PII DE GESTIS SIGISMUN-  
DI AVSTRIÆ DVCIS CONTRA DOMINVM CARDINA-  
LEM DE CVSA.

**R**IUS Episcopus seruus seruorum Dei uniuersis Christi fidelibus ad quos hæc literæ peruenerint, salutem & Apostolicam benedictionem. Iustissima quamuis iudicia & honestissima sint quæuis Apostolicæ sedis Decreta, & opera eius mortalis arguere nemo potest, quia tamen multi reperiuntur iniquæ mentis homines, qui erecto supercilio tollere os in cœlum non uerentur, & gradiente lingua eorum super terram in Christi vicarium iactantes opprobria, facta eius damnare sæpenumero audent, & nitidam ueritatis faciem, confictis mendaciorum tenebris obnubilare conantur, operæ precium esse censemus, quæ per hos dies aduersus Sigismundum ex Principibus Austriæ, sua contumacia & iniquitate requirente, per nos & sacrum collegium nostrum, statuta, ordinata & iudicata sunt, ad notitiam uestram his scriptis perducere, ne fama uelox præcurrens, falsa pro ueris persuadere, & suo more, aut addens gestis, aut adimens fallere possit. Rem igitur, sicut gesta est, ante oculos uestre mentis ponemus, vos beneuolas aures adhibete, & boni consulentes, matris uestre & omnium fidelium nostræ sacro sanctæ Romanæ Ecclesiæ, primæque sedis, digna & solita reuerentia, Decretum sententiamque suscipite. Ecclesia Brixinensis quæ olim Sabienensis, & aliquando Brixinensis est appellata, in Alpibus sita est, quæ Germaniam ab Italia seiungunt, admodum insignis. Siquidem Romanorum Pontificum priuilegiis quampluribus honestata, & Imperatorum largitate donata, non solum prædia sed arces & oppida munitissima possidet, & ipsius Brixinensis urbis ciuile Dominum habet, diocesis eius ad Enum fluuium protenditur, qui Danubio in Bauaria apud Patauiam miscetur, & in Athesim respicit, qui Tridentum Veronamque præterfluens insignes urbes, in Adriaticum exoneratur pelagus. Episcopus eius inter principes Imperii collocatur, & ab Imperatore absque medio in feudum recipit principatum ac regalia. In ecclesiasticis negotiis ecclesiæ Salzburgenensis suffraganeus est, & metropolitico iure illi subiectus. Aduocatus eius in temporalibus



bus causis, si quid aduersipatiatur Comes Tyrolis ab Imperatoribus constitutus est, qui tueatur Ecclesiam, non qui impugnet: ob eam rem non parum utilitatis quotannis accipiens. Nam feuda opulenta & amplissima, ab ipsa Brixinensi Ecclesia noscitur obtinere. Principium autem aduocationis in Comite Alberto fuit, qui primo per Conradum ipsius Ecclesiae Pontificem, non sine pluribus conditionibus assumptus, & de ipsa aduocata, quae feudum est ecclesiae, inuestitus, ab Imperatore confirmationem obtinuit. Vacante autem hac ecclesia, sedente Nicolao V. praedecessore nostro, Nicolaus ipse de fratrum consilio, dilectum filium nostrum Nicolaum tituli S. Petri ad vincula Presbyterum Cardinalem, in episcopum & pastorem praefecit. Qui etsi diu contradicente & reluctante Sigismundo, possessionem tamen pacificam & quietam ecclesiae suae denique consecutus est, & utiliter plebi per plures annos praedicando, monendo, hortando, & pontificale officium exercendo praefuit. Sed cum sedente Calixto III. qui noster fuit immediatus praedecessor, Cardinalis, ipse atque Episcopus Brixinensis, more boni patrisfamilias & diligentis atque attenti praelati, pia loca reformans, & iura ecclesiae suae exacte perquirens, inuenisset Sigismundum emendationi monasterii in Sonneberg ex eo aduersum, quod nihil sine eius assensu fiendum praesumeret, ac eum Tyrolensem Comitem pleraque magni momenti feuda, ab ecclesia sua obtinere, quae minime ut moris est recognouisset, hortareturque spirituales iurisdictionem ne perturbaret, & nouam reciperet inuestituram, iusque iurandum praestaret, mox dissensiones ortae sunt, & ipsius Sigismundi grande odium aduersus Cardinalem excitatur. Propter quod cum statuisset Cardinalis, ut fidelis archimandrita, suas oues diligentius respicere, & a noxiis itineribus retrahere, cunctosque malos mores eradicare & plantare bonos, eliminare vitia & seminare virtutes, surrexissentque propterea maligni quidam homines, tam clerici quam laici, quibus amara erant praecipua iustitiae, & aduersus salutiferam Cardinalis reformationem contumaciae & rebellionis cornua erigerent, cepit Sigismundus malignantium patrocinium. Et quamuis esset ipse quoque ex ouibus, Cardinali tanquam Episcopo Brixinensi commissis, in pastorem tamen & patrem ac magistrum animae suae, sese extollere non expauit, sed omni studio atque conatu adorsus est, ne salutifera morum reformatio, aut in clero aut in populo Brixinensi locum haberet, adeoque bonis actibus ipsius Cardinalis obicem se praebuit ut Monialium quoque, quarum supra meminimus, dissolute & turpissime uiuentium, ne recludi reformarique possent, protectionem & tutelam aduersus Cardinalem acceperit, adeoque ab honestate procul abiit, ut Cardinalem ipsum, neque in sua dioecesi, neque in ciuitate tutum esse, aut pontificale munus exercere posse permetteret, introductis & persuasis sicariis, qui vitae eius insidiarentur. Quod cum Calixtus antedictus accepisset, mox literas monitorii aduersus Sigismundum decreuit, praecipiens ei, ne Cardinalem in Ecclesia sua, in qua Pontificio fungeretur, ab executione sui officii quoquo pacto deterreret, eumue suum munus exercentem impediret. Si secus ageret, anathema esset, poenas laesae maiestatis incurreret, & omni territorio suo sacrum interdictum ipso facto intelligeret. Obaudiuit Sigismundus Pontificis maximi vocem atque contempsit, & interposita quadam appellatione, malo deceptus consilio a Romano throno (quod nulli permisum est) contra ius fasque prouocauit, & in rebellionem perseverans, nouis dictum contumeliis Cardinalem affecit. Creuere supra modum Sigismundi odia aduersus Cardinalem, nec poterat ei quicquam pacifice loqui. Ob quas res cum tuto sibi esse in ecclesia sua non posse Cardinalis animaduerneret, ad nos confugit. Per idem tempus iam propemodum accincti eramus recedere, Mantuanum conuentum petitori, quem pro tuitione fidei aduersus Turcas indixeramus. Eum igitur ab Ecclesia sua, quemadmodum profugum coepimus benigne, & pro tempore consolari, Legatum de Latere, qui vicem nostram in urbe Romana & circumiacenti regione impleveret, consulentibus fratribus & cohortantibus reliquimus; Ipsi Mantuam pro communi salute, cum Romana curia petimus. Vbi cum aliqui-



quibus mensibus commorati essemus, & Sigismundum ad nos venientem intellexissemus, ut componere inter eos concordiam & tam atroces inimicitias amputare possemus, Cardinalem accersimus, quo veniente, & Sigismundo praesente, pluribus diebus modo per Cardinales & alias interpositas etiam illustrium personas principum, modo per nos ipsos reconciliare alterum alteri conati sumus, atque huic pacis negotio, summo nisu operam dedimus; sed nihil profecimus, incassum abiire studia nostra, irriti omnes labores fuerunt; quamvis Cardinalis iudicio nostro se submittens, & arbitros non suspectos accepturum se dicens, viam iuris nunquam recusauerit nec refugerit. Abiit ex Mantua Sigismundus in patriam suam infecta pace, minarum plenus & iræ, & cum paulo post, nos quoque translato conuentu, domum repetere statuissemus Cardinalis ex permissu nostro ad Dioecesim suam se transtulit, asserentibus amicis adhuc pacem inueniri posse, nec Brixinam petiit: nihil enim tutum ibi esse sciebat, sed in arcem quandam sui episcopatus munitissimam se recepit. Vbi cum aliquamdiu confedisset, hortantibus nonnullis non paruae auctoritatis viris, qui se partibus ambabus amicos ostendebant, & nihil periculi, nihil insidiarum timendum esse dicentibus, ad Brunekam se contulit, quod & ipsius Ecclesiae Brixinensis non parui momenti oppidum, literis maxime fretus, quibus idem Sigismundus suo signo obsignatis, bona fide promittit, ecclesiam Brixinensem & Cardinalem quoad vixerit se protecturum, ad quem locum misit mox Sigismundus unum ex consilio suo Nobilem Virum, inter aulicos suos primarium, qui Cardinalem in suam traheret voluntatem, sed is multa cum Cardinale prolocutus, cum nihil posset ei iniustum suadere, quia iura ecclesiae suae nollet proicere, concordia tamen in omnibus reperta est, unico excepto articulo, qui regalia concernebat, & cum in eo aliter conueniri non posset, de suspensione temporali actum est. In qua cum Orator biennales, Cardinalis vero metuens moram tam diuturnam ecclesiae suae periculosam esse, semestres tantum treugas offerret, tandemque interueniente capitulo etiam biennales admissurus esset; pendente adhuc tractatu, & oratore non a Brunegka digresso Sigismundus non tam concordiam, ut opere comprobauit, quam confusionem Cardinalis, & furoris sui cursum quaerens, turgidus & nimium tumens non iracundiam cohibere, non se ullo pacto vincere potuit, cessit audaciae, occubuit temeritati, rancori atque odio paruit, iussit accerfiri milites, exercitum congregari, belli machinam apparari, quibus expeditis, misso caduceatore, qui bellum Cardinali indiceret, quamvis esset maior & sacra hebdomada; & tempus poenitentiae datum, copias eduxit, & iter faciens ipsa die paschae, ante Brunegkam armatas militum manus collocauit, machinas admouit, insultum fecit, oppidum cepit. Non moratus arcem quoque summa vi oppugnare aggressus est, in qua cum familia Cardinalis secefferat. Pugnatum est aliquandiu non parua contentione, sed cum persuasum esset Cardinali, arcem diu defendi non posse, & pereundum omnibus esse, nisi se dederint, interuenientibus mediatoribus, certis conditionibus conclusa est pax; in quibus erat comminatum, quod vel arx vel Cardinalis in potestatem Sigismundi venirent: Et nihilominus cum iussisset pacem & securitatem publicari, clauis arcis extorquens, & munitionem ac Cardinalem arctissima custodia feruari iussit, sicque per aliquot dies cum summo probro & ignominia, & omni contumeliarum genere, Cardinalis in potestate Sigismundi retentus est, nec libertatem obtinere potuit, nisi remissis iniuriis, castro quodam ecclesiae tradito, magno auri pondere soluto, restituto creditorum chirographo, compluribus aliis extortis conditionibus, praeter eas quibus pax antea fuerat publicata, omnibus denique ecclesiae iuribus & priuilegiis ereptis. Neque his contentus, sed iniquitatem iniquitati congemians, cum sacerdotes ob piaculum commissum iuri parentes, a sacris abstinere, non veritus est, necem Cardinali denunciare, nisi ad prophanationem sacrorum illos compelleret. Temerarius atque infelix, qui talia gerens, nihilominus protectorem se iactat, cuius est euerfor inuentus, quae singula cum nobis ex ordine renunciata essent, mirum in modum



horruimus, congelatum est illico pectus & in stuporem sumus conuersi, nec satis detestari aut abominari facinus tam horribile poteramus, in sacerdotem, in pastorem, in episcopum suum, in Cardinalem ecclesiæ Romanæ, in fratrem nostrum, in excellens Apostolicæ sedis membrum violentas manus Sigismundi temeritas, non exhorruit, & quo tempore anni patrata sunt, nempe in die Pasce, in die illa maxima & sanctissima, in die qua victor mortis, & inferni triumphator, Christus resurrexit, in die qua Christiani singuli, redemptori gratias agunt, & expurgato veteri fermento, sacratissimo Christi corpori & sanguini communicant, in qua die nemo tam sceleratus est, tam impius, tam immanis, si modo Christianus est, qui non sacerdotibus se subiiciat, eosque summis prosequatur honoribus. Sed qua die suarum rectoribus animarum cæteri præcipue student, ea die sacerdotem suum Sigismundus inuasit, coepit, in carcerem coniecit, inhonestauit, spreuit, turpiter habuit. Fuimus diu anxii & admodum dubii his cognitis, nec satis tenebamus, quid esset agendum, quamuis non dubius rumor, sed certissimus nuncius perpetrati sceleris ad nos pervenisset.

Nam huius atrocissimi sceleris notorium factum, ad exigendum ultionem poenamque inuitabat. Inde vetus beneuolentia, qua quondam Sigismundo coniuncti fuimus, ad clementiam & misericordiam prouocabat. Nos enim, cum in minoribus ageremus, apud Fridericum Romanum Imperatorem tunc Dominum, nunc filium charissimum, diu conuersati fuimus, ac consiliarius munere honestati, multisque gratiis & fauoribus cumulati, plurimos annos in eius curia atque familia mansimus, nec unquam indignatum aut nubilosum erga nos ipsius Imperatoris vultum inuenimus, semper læta, semper blanda nobis eius facies fuit, semper benigna & affecta mens, & nostri honoris percupida. Sigismundus, cum primo Imperatorem adiuimus, puer bonæ admodum indolis erat, & sub tutela patruelis sui degens, modestis imbutus moribus, amorem in se omnino alliciebat. Alloquebatur nos sæpe blando sermone, quærebat nostras epistolas & legebat, ut qui tam bene viuendi cupidus & literarum cultor & nostri amans videbatur, dimissus extra tutelam, & in adolescentia sua, ad regendam patris prouinciam profectus, sæpe ad nos literas dedit, & nostras accepit, sæpe sua negotia apud Imperatorem iuimus, cum eo nonnunquam, domi suæ fuimus, neque sine honore & singulari gratia ab eo recessimus. Et cum gesta eius in Cardinalem, nondum cognita nobis essent, ad conuentum usque Mantuanum, continuata est, ut antea, semper caritas nostra; ad quem Sigismundus ipse, splendidum & magnificum duxit comitatum, ut qui gratias nobis referre statuerat, pro pace Suitensium, bellicosarum & fortissimarum gentium, quos sibi missis legatis, apud Constantiam reconciliauimus. Verteabantur hæc omnia in mente nostra, & tanquam recentem gesta essent, ante cordis oculos voluebantur.

Suadebant imperatoris infinita erga nos beneficia, ut patrueli & sanguini suo ignosceremus, exposcebat ipsius Sigismundi, qua nos longo tempore complexus est, ingens beneuolentia, ut hanc sibi culpam condonaremus. Urgebant inclitæ domus Austriæ, quæ hunc Sigismundum genuit, ingentia in nos & diu continuata merita, ut sublimi & alto sanguini veniam largiremur. Instare & Albertus videbatur, alter Sigismundi patruelis, & ipse Dux Austriæ, atque Imperatoris germanus, & cum eo pariter illustri memoria Ladislai Vngariæ & Bohemiæ regis, paulo ante vita defuncti, proximi eius consanguinei petere vehementer ac rogare, per veterem amicitiam (ambo enim aliquando nos dilexerunt, & verbis & factis ornarunt) ne sua ex familia vindictam exigeremus, occurrebant infinitæ regum & magnorum principum facies, qui Australi domui coniuncti sanguine hanc nobis profapiam summis precibus commendaturi offerebant.

Sed cum hæc iam pene victi consentientes, animo voluimus, & ad ueniam tracti iam iam misericordiæ iustitiam cedere mandaturi fuimus, excitata in aduersum conscientia nostra, & miris calefacta modis: Quid tu (inquit) Pie Pontifex agis? An ignoras quem tenes locum, quam geris personam? Non tu modo



do ille Æneas es, qui Syluio quondam genitus patre, Friderico Imperatori seruiuisti. Mutata est conditio tua, mutata persona, nosce te ipsum, Tu Pius es Romanæ Præsul ecclesiæ, Christi vicarium & Petri successorem geris, te caput ecclesiæ militantis, te ducem, te magistrum, te Doctorem, te iudicem Christiani populi constituit Dominus, & clauis tibi regni cælorum tradidit. *Noli quære fieri Iudex* inquit sapiens, *nisi valeas virtute irrumpere iniquitates, ne forte extimescas faciem potentis, & ponas scandalum in agilitate tua.* Super gentes & regna moderator cæli, & mundi Dominus te Christus ordinauit, ut destruas & euellas, ædifices & plantes. Et quid agis? quid dubitas malas euellere plantas? Nemo iuste iudicat, qui vel odio vel gratia vel metu flectitur. An ignoras, Sigismundus, quam scelestum, quam atrox, quam tetrum ac horrendum admisit facinus? In Episcopum, in Cardinalem, in te ipsum, si tui Corporis Cardinales, ut iura volunt, partes habentur, iniurius & improbus fuit? Non Presbyteratui, non Episcopatui, non Cardinalatui, non Papatui, non Christo pepercit, cuius sacratissimum diem, pugna iniqua & Cardinalis captiuitate foedauit.

Ecquis clericorum posthæc tutus habebitur? si episcopi, si Cardinales armis atque insidiis capiuntur? & qui deinceps vindictam timebit, si violatores tantarum dignitatum impune abeant? Actum de omni clero deque omni religione fuerit, si qui tecum unum sunt, absque ultionis periculo uiolantur. Summa Sacerdotalis dignitas, B. Petri auctoritas, Jesu Christi maiestas, palam in hoc scelere læsa est; & tu tanti piaculi vindictam assumere dubitas, putasque Imperatorem vel alium quemuis principem ægre laturum, si iudicium feceris.

Absit a te hic metus, nihil est cur hæc nomina timeas. Iustus est Imperator & honesti tenax, iustus Albertus, iusti & ceteri principes, qui non consanguineos solum, sed ipsos quoque filios ex se genitos legum vinculis coerceri, plectique si peccauerunt non indigne ferent, magna vis iustitiæ est, quæ vel damnatum, iure se passum esse fateri cogit. Nihil imperatori magis cordi est, quam iustitia, communis & sanctissima virtus. Scit sua mansuetudo, quia iustitia pacem quærit, gentem eleuat, solium & regnum confirmat, lætitiâ gignit, & amatores suos beatos & immortales efficit, utilius Imperatori uidebitur, instructuosum palmitem amputari, quam in perniciem bonæ vitis retineri. Nec propterea Domus Austriæ gloria interibit, quia unus aut alter ex principibus eius damnatur, quæ Rudolphos, Albertos, Fridericos, Leopoldos, Ernestos, Wilhelmos & alios quam plures illustres animas peperit, non Austriæ solum ac Sueuiæ, sed Hungariæ, Bohemiæ & ipsius Romani Imperii Gubernatores. Æacidarum quippe decus, Orestis infamia non extinxit, nec splendorum Iuliæ gentis Neronis turpitudine deleuit; nec Francorum lucem Hilderici obfuscauit ignauia, nec senatus Apostolici puritatem atque nitorem impurus ac foetidus Judas commaculare potuit, illustrium familiarum non texisse, sed non habuisse maleficium vera est & solida laus. Rara prosapia est, quæ non aliquando monstra pepererit. In omni gente & in omni domo Catilinam inuenies & Cethegum.

**CITATUR SIGISMUNDUS DUX AD RESPONDENDUM  
DE FIDE.**

**P** IUS Episcopus, seruus seruorum Dei, uniuersis & singulis Christi fidelibus salutem & Apostolicam benedictionem: contra Sathanæ, aduersarii Christi domini & saluatoris nostri, indeficientes insidias, quas in sua membra tendere non desistit, ut Christianorum improvidas animas maculet, nos qui licet immeriti pastorale tenemus officium, vigili oportet sollicitudine speculari.

Nam ex quo Sathanæ ipsius membrum principale, impius Sigismundus ex Austriæ principibus, qui aliquando nobiscum Christi & Ecclesiæ membrum fuerat, in sacratissima Paschalis festi celebritate, in sathanicam se a catholicorum cœtu abscessus præcipitavit ingluuiem, & ab Apostolica ecclesia transfuga effectus, sub Diaboli cœpit vexillo militare, anathema pro dolor incurrit & demum infamias



famias cumulando, & sese apostatare superbiendo facto quoque se unitatis ecclesiae fidem auctoritatisque eius rationem per censurarum contemptum non habere palam demonstravit, & demum ut eum in malorum omnium profundum peruenisse omnibus certum foret, eadem iactat temeritate, nec sacro sanctos canones, nec Apostolica praecepta iustissima nec iudicia ex canonicis sanctionibus facta solenissime, eum in ullo posse contingere, quanquam ipse Dei nefarius derisor & ecclesiae contemptor, de Christiano adhuc non erubescat nomine gloriari, ob quas res tametsi propter facti notorietatem, unusquisque ipsum rectissime haereticum iudicavit, ut tamen ex suo ore iudicium prodeat, habentes priores nostros processus, in quibus anathematis, criminis laesae maiestatis, & fautoriae heresis declaratus est, poenas incurrisse, in his literis pro inuiolatis & expressis, quo constare ualeat, non solum ex operum improbitate scelestorum, sed sua etiam propria confessione an sit hereticus vel non, nouum denuo processum inchoauimus aduersus dictum Sigismundum; tanquam de damnatissima haeresi, quae est omnium haesum haeresis, non solum suspectum notorie sed sensibilibus maculatum, tanquam sanctae fidei non recipientem articulum, quem per haec symboli Apostolici verba, fidelium exprimit unusquisque: *Credo in unam sanctam catholicam & Apostolicam ecclesiam*. Nam cum ipsius ecclesiae Romanus Pontifex caput sit, canonesque & censurae sic sint ecclesiae, quod quisque in ecclesia positus est, & credens capiti, canonicis & eius censuris teneatur obedire.

Dictus quidem Sigismundus non solum illis non obedit, sed praedicat insuper, quod minime obedire teneatur, atque in suam proteruam sententiam, tam subditos quam quoscunque potest, accedere compellit, & haec ubique sunt notoria, nec hodieque cessat per se & suos hanc suam perfidiam diuulgare, quae cum ad uehementissimam suspicionem plusquam satis sint aperta, idcirco ipsum Sigismundum notorie de haeresi suspectum per praesentes auctoritate Apostolica peremptorie citamus & requirimus, ut sexagesima die ab hac die data, quae & affixionis huius, ad ualvas ecclesiae principis Apostolorum de urbe, & ut sequitur successiue computanda, personaliter coram nobis compareat, & de fide catholica, praesertim in praetacto articulo unitatis ecclesiae, & quae ad ipsum ex sanctorum doctorum doctrina sequuntur respondeat, & verbo & facto se purget de suspicionem, sub confessi & conuicti criminis haeresis poena, alioquin nos contra ipsum, tanquam confessum & conuictum Dei omnipotentis nomine ad diffinitiuam sententiam, iustitia mediantem procedamus.

Similiter etiam Georgium pro Tridentinense Episcopo se gerentem, ob notoriam eius adhaesionem, quam facto quotidie Sigismundo ostendit, cum quo & idem sentire videtur censuras contemnendo, & ideo de fide catholica vehementer suspectum, nec non Gregorium de Heimburg, Laurentium Glömenow erroneos Doctores, Parcifalum de Annenberg, Iacobum Traff, Balthasarum de Welschberg & Osualdum Wolckensteiner, aliosque omnes ipsius Sigismundi consiliarios & domesticos, atque etiam oppidanos & incolas oppidorum de Meran, Curientium, Halis, Inspruck & Stetzingen Brixinensis dioecesis, omnesque etiam ipsius Sigismundi subditos Curientis, Tridentinensis & Brixinensis Dioecesis, ciuesque Brixinenses, & illius ecclesiae subditos, qui interdictum ecclesiasticum, & ecclesiasticas vilipendunt censuras, ac Wolfgangum Nidlinger, Stephanum Steinhorn assertos canonicos Brixinenses; Georgium in Stams, Ingeminum in Wiltina, Iohannem in Monte sancti Georgii Abbates; Casparem Praepositum Nouae cellensem, & Barbarum assertam Abbatissam in Sonneburg, monasteriorum dictae Brixinensis dioecesis, atque etiam uniuersos & singulos canonicos ipsius Ecclesiae Brixinensis, plebanos quoque siue vicarios ecclesiarum Parochialium ciuitatum & dioeceseon praedictarum, ac cunctos Presbyteros etiam Religiosos exemptos & non exemptos, qui temere prophanando, Apostolicum Interdictum non obseruare, & se per sedem Apostolicam & nos prohibitis diuinis intromittere non uerentur, quorum omnium ac singulorum nomina ac cognomina ac si de uerbo ad uerbum exprimerentur, praesentibus



sentibus habere volumus pro sufficienter expressis, quos omnes censurarum & Apostolicorum mandatorum contemptores, de hæresi vehementer non inmerito suspectos reputamus, ut die & sub pœna prædictis compareant personaliter coram nobis, de ipsa fide catholica, & præsertim articulo prædicto legitime responsuri, & se modo prædicto purgaturi.

Cum certificatione modoque & forma præmissis citamus etiam per præsentis. Volumus autem ex dicta auctoritate tenore præsentium decernimus, quod hæ nostræ literæ, sicut præmittitur, affixæ & executæ, prædictos omnes & singulos sic arceant & astringant, ac si eis omnibus & singulis in specie & ingenere ac præsentialiter lectæ & insinuatæ fuissent, cum non sit verisimile apud eos remanere incognitum, quod tam patenter omnibus extitit publicatum. Datum Romæ apud sanctum Petrum Anno Incarnationis Dominicæ Millesimo, quadringentesimo sexagesimo, 10. Calen. Februarii, Pontificatus nostri Anno tertio.

*A CITATIONE PRÆSCRIPTA APPELLAT SIGISMUNDUS.*

**C**UM in grauatorum atque læsorum, nec non lædi, & opprimi timentium subsidium, appellationis remedium sit adinuentum: Quare nos Sigismundus Dei gratia Austriæ, Stiria, Carinthia, Carniolæ Dux, Comes Tyrolis, &c. Vniuersis iustitiæ cultoribus, fautoribus innocentia, ceterisque quos virtus humanitatis ad compassionem oppressorum adhortatur, notum esse cupimus, quod Romanus Pontifex nondum satiatus iniuriis suis, quibus nos ac subditos nostros affecit, audientiam nobis denegando, defensiones auferendo, legatum nostrum minis ac terrore carceris differendo, & sacra violando (siquidem legati iure publico inter sacra referuntur) ecclesiasticæ censuræ pœnas in nos pro libito plus euomendo quam edicendo, noua nunc in nos nostrosque molimina parat.

Quippe relatum est nobis, qualiter Romanus Pontifex, nos omnesque subditos nostros fingat, de hæresi sibi suspectos, quod nemo unquam de nobis neque de subditis nostris principatus Tyrolis suspicatus est. Suspicio autem non fingi, sed indiciis non quidem æmulorum aut suspectorum, sed fide dignorum & honestorum virorum apparere debet, antequam prælatus odorem bonæ famæ comaculet, aut sinceritatem fidei Christianæ & subditorum simplicitatem perturbet. Sed dicit Papa, nos esse contemptores censurarum atque de hæresi suspectos. Nos vero iam dudum respondimus, nulla censura nos ligatos, quos Papa contempsit audire. Auditus est Adam præuaricator, Cain fratricida, Sodomitæ visitati sunt post clamorem, qui ab eis in cœlum ascenderat, dicente Domino; *descendam & uidebo an clamorem qui ad me peruenit, opere compleuerunt.* Nobis audientia negata & defensio ablata est: hanc negamus esse censuram, quam Papa pro libito & contra legem naturæ aduersum nos eflauit. Hanc primum iustificet, antequam nos arguat de contemptu censurarum. Ipse vero Pontifex, nos omnesque subditos nostros nuper apud Roberetum velut in albo prætoris edicto affixo ad urbem Romanam dicitur euocasse, quatenus super articulis fidei personaliter respondeamus. O perfunctoriam citationem absque discretionem sexus, ætatis, valetudinis, infantia, pubertatis, sanæ mentis, vel amentia! O confusam plusquam centum millium personarum euocationem, & undè ememus panes ut manducent? Quis baiulabit infantulos & lactantes? quis gestabit valetudinarios? quis cœcos ducet? quis prægnantibus & parturientibus obstetricabit? at omnes illos sine delectu personaliter euocauit. Oportet autem superioris præcepta possibilia iusta & honesta, factuque facilia esse. Quis vero domum seruabit? quis arces tutabitur? quis patriam defendet? si nos cum subditis nostris emigrabimus. Hoc ergo Papale mandatum, quid aliud in se habet, nisi quod præcipere uidetur, quatenus relictis sedibus nostris, cum coniugibus & liberis nostris exulemus? quod nulla unquam barbara potestas postulauit, nullus tam crudelis post victoriam a uictis ex-



petiuit, hoc ipse pater spiritualis a nobis requirit, qui virtutibus nostris inuidet; quod in saluatore nostro Iesu gloriamur, dum de nobis loquens dicit: *De Christiano adhuc non erubescit nomine gloriari, propter quod unusquisque ipsum rectissime hereticum indicabit.* Et infra subdit: *suis literis prioribus læsæ maiestatis & fautoria hæresis pœnas incurrisse declaratum esse.* Hæc sunt ex quibus hæresis suspicionem Papa de nobis sibi fingit. Quorum alterum semet utique iustificat, eo quod quisque Christianus, in Christo rite gloriatur, cuius nomen gestat, & nomen eius in se sanctificari deprecatur. Alterum vero a suspecto Pontifice contra indefensum emanauit.

Non possumus autem hoc loco præterire, quin illorum ineptiam perstringamus. Inquit Papa, se Mantuæ statuisse, nequis ad futurum concilium appellet, quod nusquam est, contrafaciendes anathematizari læsæ maiestatis hæresisque crimine mulctari, ac reos esse decreuerit, Sigismundus ex Austriæ Ducibus, duobus postea mensibus elapsis, quod est tempus nouis constitutionibus præfinitum, contrauenit, ergo est læsæ maiestatis hæresisque reus. Nos autem edocti sumus, quod magna Synodus Constantiensis decreuit, uniuersale Concilium a Christo immediate potestatem habere super Papam, in his quæ fidei, reformationis & pacis esse dignoscuntur, quæ etiam sacra Basiliensis Synodus innouauit, & Eugenius ac Nicolaus Romani Pontifices recognouerunt. Vnde ergo Papa Pius auctoritatem usurpauit, ut superiori suo, scilicet uniuersali Concilio, manum clauderet, cui & ipse tenetur obedire? nec quisquam miretur, si ad concilium, quod nondum congregatum, appellatur, quoniam auctoritas ecclesiæ, quæ immortalis est firma persistit, & quæ nunc existit in ecclesia toto orbe dispersa, tunc erit in illa ipsa legitime congregata. Quod vero nescitur, quando congregabitur, hoc ipsum non est impedimento, quominus illuc appelletur. Hoc enim scitur, quod ex decretis magnæ Synodi Constantiensis de decennio in decennium perpetuis temporibus concilia habent celebrari, & nunc tempus interpellat obligationis, dies cessit, sed cuius culpa impeditur, vel differtur executio, illi imputetur in pœnam, nam qui vetat iudicium fieri, is utique de sua iustitia diffidere conuincitur.

Transgrediamur nunc ad circumstantias citationis, & quidem coram se mandat Papa compareri, qui legationis sacra violauit, tunc Senis agens, nunc Romæ manens. Quam securitatem nobis aut nostris polliceri potest, qui publici iuris fidem fecit irritam, & per prædecessores suos aliquando dictum est, fauore Roberti Regis Siciliæ, contra Henricum Imperatorem, non teneri ipsum sese in manibus inimici credere, etiam sub fide salui conductus. Papa vero iam quidem nos diffidauit, & antea legatum nostrum iusto metu perculsum persequutus est, fugientem, cui si tertio credamus, nosmet ipsos decepisse videbimur, quippe qui fallenti fidem accommodat si rursus fallatur, iam se ipsum fefellit. Nunc descendamus ad causam. Ait Papa, *Nouum processum inchoamus aduersus Sigismundum, tanquam sanæ fidei non recipientem Articulum quem per hæc symboli Apostolici verba, fidelium exprimit unusquisque: Credo in unam sanctam catholicam & Apostolicam Ecclesiam.* Nos profecto didicimus a patre nostro, *Credo in Deum Patrem omnipotentem creatorem cæli & terræ, & in Iesum Christum filium eius unicum: Dominum nostrum, & in spiritum sanctum:* non autem in ecclesiam, neque hoc habet symbolum Apostolorum, ut credamus in Dei creaturam.

Hoc nempe Symbolum, quod Apostoli, quod milites Christi ad bellum diuinum profecturi, quo cum idololatriis, quod cum omni gentilitate gesturi erant, concordi animo, & uno spiritu assumpserunt, cuius armati clypeo, cuneos hostium penetrarunt, hæc verba continet; *Credo in Spiritum sanctum, sanctam ecclesiam catholicam;* non autem, *in ecclesiam.* In qua fide perstamus cum Apostolis, postquam adoleuimus, & ad cultum diuinum, prout ecclesiæ sanctæ catholicæ doctrinis institutus est, animaduertimus, ex Symbolo Niceni concilii didicimus credere *in unum Deum Patrem omnipotentem, factorem cæli & terræ, visibilibus omnium & inuisibilibus, & in unum Dominum nostrum Iesum Christum filium Dei unigenitum.*



*genitum.* Et infra; *Et in Spiritum sanctum Dominum Et viuificantem*; Et infra; *Et unam sanctam catholicam Et Apostolicam ecclesiam*, non autem, *in ecclesiam*. Quia & factura Dei est factoris omnium visibilibus & inuisibilibus. Pergit propterea dicens: *Nunc ergo canonibus Et censuris eius obedire tenetur.* Scimus quod canonum statuta ab omnibus sunt custodienda, & honesta praecepta superiorum a subditis reuerenter suscipienda: At non ita, ut iubeamur credere in ecclesiam, aut ullam Dei creaturam seu facturam, sed nec ut credamus, nos rite neque iuste, sed nec ullo modo putemus excommunicatos, qui nec auditi quidem sumus, quin etiam nec vim, vel iniuriam ullam intulerimus Cardinali, cuius iniurias crudelesque factiones a nobis & subditis nostris, naturæ gentium iure propulsamus, quod nemo nobis prohibere potest, nec a nobis auferre: quia natura nobis instinxit, & nobiscum natum est, ipsaque pietatis & æquitatis naturalis ratio, nullius exteri iuris aut institutionis indiga firmavit.

Hoc quippe ius solidum iniuriæ propulsandæ nascitur, non fingitur. Et idcirco apud omnes gentes & nationes æque colitur & obseruatur. Ex quo & bella tum publica tum etiam priuata iustificatur, nonnunquam vero consecrantur & sanctificantur; & pro ipsis aternæ vitæ præmia conceduntur.

Quid ergo aliud videtur egisse Papa, aut quid aliud quæri videtur Cardinalis, quam quod nos homicidia in nostros admittenda, turbationes metallarum per ipsum nobis illatas non volumus sustinere, neque expectare donec ipse alienigenas, qui in comitatu Goritiæ siue militabant, siue grassabantur, in suas fortias introduxisset, quippe qui treugas annuales iniuste recusauit. Nonne satis ostendit, qualis animus sibi esset? maxime autem imminente sibi occasione tam optata, & opportunitate tam sperata, Comitum de Posingen, Johannis de Rein de Wittwis & aliorum, qui comitatum Goritiæ in confiniis principatus nostri situm populerentur, castra, terras, fortias eius subigendo. At quis tam hebetis sensus, tam obtusi cordis, qui suam negligens opportunitatem atque impendentem necessitatem, belligerandi opportunitatem concedat aduersario, eum scilicet quasi dubius, *mediis Mars errat in armis*? In his quæ violentiæ Martis committuntur propter periculi grauitatem, turpe est dicere: *non putaram.* O quantum cachinnum excitasset sacerdos ille, si nos oscitantes aut dormientes præuenisset.

Nos vero subito restitimus factionibus suis, & parua manu impetus & incursiones alienigenarum cohibuimus, ut absque ulla cæde pacem restitueremus. Laudine vel vituperiendæ hæc opera, omnium bonorum virorum sit arbitrium. Sequitur in hoc erroneo citatorio; *Citamus Sigismundum ut compareat de fide Catholica, præsertim de prædicto articulo unitatis ecclesiæ, Et quæ ad ipsum ex sanctorum doctorum doctrina sequuntur, respondeat.* Jam satis respondimus, nos credere unam sanctam catholicam & Apostolicam Ecclesiam; non autem in illam, ne latrariam soli Deo debitam creaturæ & facturæ impendamus. Quod vero subiicit; *Et quæ ad ipsum ex sanctorum patrum doctrina sequuntur.* O copiosum verbum & infinitam habens indaginem. O ridiculosum, a seculari principe requirere, quæ Doctores & scholastici viri disceptant, pro quibus eis insignia & præclari scientiarum tituli decernuntur. Satis est nobis, expresse credere, quæ Apostoli crediderunt, quæque Patres Niceni Concilii declarauerunt; cætera sub generali fide sanctæ matris Ecclesiæ credere, eiusque fidem una tenere, imitantes Apostoli Doctrinam, ne scilicet plus sapere uelimus quam oportet. O quot Sancti iam triumphant in cœlis, qui sanguinem suum pro Christi nomine fuderunt, qui illas doctorum scientias nunquam audierunt neque cogitarunt, profecto maxima pars cœli, illorum scilicet qui a seculo migrauerunt, eorum est qui caritate arserunt; scripturarum autem arcana minime inuestigarunt. Ideo propheta non ex hoc beatos ait eos, qui scrutantur testimonia Domini, quod & superbi faciunt & impugnatores & qui contra talia nituntur, approbant ut reprobant; sed ita demum beatos ait si in toto corde Deum exquirant. Hunc sincero corde libet exquirere, absque Scripturarum profunditate, quæ nostrum superat sensum. Nostrum est, patriam



nostram tutare alacriter, quod seruando, iuuando, rite ac fideliter adaugendo, sub fide Christi & Apostolorum eius, etiam in Niceno Concilio declarata, quam expresse credimus & explicite, cætera quæ ad finem pertinent, cum ecclesia teneamus, speramus æternæ retributionis præmia promoueri. Sed neque contentus mansit, nos modo præmissis citasse, quin etiam ad consiliarios atque omnes omnino subditos digressus est dicens: *Similiter etiam, & infra: aliosque omnes ipsius Sigismundi consiliarios, domesticos, oppidanos, & infra: omnes etiam ipsius Sigismundus subditos Curiensis, Tridentinensis, & Brixinensis dioceseon, qui ecclesiasticas censuras vilipendunt, &c.* Certe nemo vilipendit censuras, quia nullæ adhuc rite emanarunt, sed pro libito Cardinalis, conuitia multa, contumeliæ, iniuriæ & calumniæ in nos dictæ & factæ sunt contra nos & nostros inauditos, quæ potius expiandæ forent quam exaggerandæ ut prædiximus & iure cautum est, quæ poena debetur illis, qui censuras efflant, irritè abutentes concessa sibi potestate. Est tamen in hoc ineptia illius præsumptionis expugnanda & euacuanda, quod omnes subditos examinari cupit, super articulo fidei, & quæ ex sanctorum doctrina sequuntur ad illum, nam hoc est de fide vulgo disputare, quod lege vetitum est. Siquidem id publice fit, quod ducentis millibus marium, foeminarum & puerorum agitur? Quid dicet agricola interrogatus, quid sit ecclesia, aut in quo sustentetur, Papa errante: & an Græcus sit Pars Ecclesiæ, vel Judæus, vel alius Christianus habitans in extremis terræ? in quo differat verum caput Ecclesiæ a ministeriali? Quam auctoritatem dederit scripturis, & qualem receperit ab illis? Tantum certe studium fuit maioribus nostris, arcana scripturarum custodiendi, ne vulgo tractarentur, ut maxime reprehenderent, qui Bibliam ex lingua Latina in Teutonicam traduxerunt. Nunc vero Cardinalis ille rusticos vult interrogare, de his, quæ ex sanctorum doctrina sequuntur ad ipsum fidei articulum. Hanc disceptationem scholasticis permittamus; Agricolis & vinitoribus arua colenda & pastinanda sunt, quibus satis est Symbolum Apostolorum recitare: discussionem vero unionis collectiue mysticæ, aut quot modis plures sint unum, non est disputatio laicorum. Sed si placet Cardinali rusticam gentem ex sententiis doctorum expolire, poterit (si velit) erigere scholas quo diebus feriatis confluant, ita scilicet ne cultum aruorum omittant. Sed non sic docuit beatissimus Papa Gregorius in *Pastoralibus*, ut tacenda pro loco & persona proferantur, & sine delectu, quod est ante porcos mittere margaritas, scilicet arcana scripturarum vulgo tractare. Si Papa putaret nos minus doctum in fide, & hoc ex sincero corde manaret, facile hoc resciscere posset ex summis viris ac principibus, qui nobiscum versantur, absque contumeliis, quibus se contra nos oblectat. Si de subditis nostris ecclesiasticis vel secularibus, aliqua talis disputatio esset, id facile rescisceret absque tot personarum commotione. Postulauit autem impossibilia, ut occasionem sibi confingeret sæuendi. Quis oro gentilium seu Idololatrarum in Christianos tantam mouit persecutionem, ut tot Christianorum animas, una sententia condemnaret, quot ille Papa iam euocauit, ut occasionem condemnationis inueniret? quippe qui legationis sancta prophanauit. Profecto quid de sua clementia vel crudelitate sentiendum sit, satis abundeque monstrauit. Nos vero apud illum comparcamus nostriue subditi Clerici siue Laici, & illi fidem habeamus, qui nos audire contempsit, absit a nobis hæc insania, sed fidem nostram tum scilicet Apostolorum, tum etiam Patrum Niceni Concilii apud omnes principes palam faciemus, ut nemo de sinceritate fidei nostræ valeat hæsitare. Clerum & sacra loca præcipua veneratione prosequimur, temporalia eorum sincera protectione custodimus, nec ullus episcoporum aut prælatorum, qui sub temporali ditione Papæ consistit, personæ aut rerum tanta libertate potitur. Hæc certe non possunt esse hæresis aut fidei suspecta indicia, sed bonorum morum exemplaria inuitabilia.

Idcirco ab illis suis iniuriis, conuitiis & contumeliis, ab illa erronea citatione, & illa iniuriosa comminatione appellamus & prouocamus pro nobis & subditis nostris, ecclesiasticis & secularibus, salua tamen nullitate ipsius, & permanentibus



mentibus erroribus eius tam in fide quam in iure, quibus per hoc nullatenus assentimus, sed Christi fidem & Apostolorum eius in Nicena etiam Synodo declaratam profiteamur, etiam si Papa & Cardinalis Cusa aliter sentirent. Est enim fides ipsa uniuersalis & omnium communis, quæ non solum ad clericos, verum etiam ad laicos, & omnes omnino pertinet Christianos.

Appellationis vero nostræ gradus facimus. Primo, si Papa causam, quam ipse & Cardinalis contra nos præsumunt, voluerit viro non suspecto delegare. Sunt enim plurimi prælati principes integerrimi per Germaniam, quibus status & conditio Brixinensis Ecclesiæ, simul ac nostri ac ipsius Cardinalis mores & vita innotescunt: quorum arbitrium qui detrectauerit, suo se indicat iuri minime confidere, Alioquin ad futurum concilium, cuius præfinitum tempus, scilicet decennium, iamdudum elapsum est prouocamus, cum stet per Papam, quominus celebretur. Similiter ad Romanum futurum Pontificem, absque omnibus modis & gradibus, prout in priori nostra appellatione in valuis ecclesiæ Florentinæ affixa continetur, quam Papa profitemur ad sui peruenisse notitiam, cum petitione Apostolorum, & protestationibus inibi comprehensis & contentis.

*DECLARATIO APOSTOLICA POENALIS CONTRA SIGISMUNDUM DUCEM.*

**P**IVS Episcopus seruus seruorum Dei, ad futuram rei memoriam: Ineffabilis summi prouidentia Patris super gentes & regna, iuxta prophetæ verbum, licet insufficientibus meritis constituti, officii nostri debitum ut tenemur exequimur, de vinea Domini Sabaoth euellenda euellimus, in eaque plantanda plantamus, ac recta regimus, & dirigimus indirecta, perfidosque ac facinorosos quosque, cum scandalo corpori ecclesiæ sint, a fidelium coetu præscindimus. Nam sacro testante Euangelio, inutilibus membris a corporis compage diuisis, eis carere magis proficiat ad salutem, quam cum illis æterna supplicia introire. Nuper siquidem postquam nobis innotuerat, quod dilectus filius noster Nicolaus tituli sancti Petri ad vincula presbyter Cardinalis, & ex dispensatione sedis Apostolicæ Episcopus Brixinensis, dum curæ dictæ suæ ecclesiæ Brixinensis intenderet, & in castro Brunegk, suæ Brixinensis diocesis, ad ecclesiam curandam pleno iure spectantem resideret, per Sigismundum tunc Austriæ Ducem hostiliter primo per suos in aurora diei Paschæ in dicto castro obsessus fuerat; & quod castro ipso per eosdem nomine ipsius Sigismundi recepto, idem Sigismundus die sequente præfatum Cardinalem missis ad eum duobus tubicinis, suo & omnium subditorum suorum nomine publice diffidauerat, atque cum magna armatorum copia, bombardis & aliis instrumentis bellicis, eundem Cardinalem, tunc in arce dicti Castri existentem, minaciter valde & hostiliter fuerat persecutus, quousque ipsius Cardinalis personam in suam redegisset potestatem, & sic diebus multis tenuisset, & quod infra dies illos, quoddam castrum nomine Taufers, nec non notabilem quantitatem pecuniarum, obligationesque & literas plures ab eodem Cardinale & Capitulo Brixinensi extorsisset, ac damna multa sibi & suis intulisset, quæ summam triginta quinque millium florenorum transcendere, ac in enervationem ecclesiasticæ libertatis, totalemque exinanitionem priuilegiorum dictæ ecclesiæ vergere dicebantur. Et postquam præmissa & etiam certa alia ea concernentia in consistorio generali, promouente dilecto filio Michaeli de Prato causarum cameræ Apostolicæ procuratore, per dilectum filium Andream de sancta Cruce, utriusque Juris Doctorem, dictique consistorii & fisci nostri aduocatum, petendo Sigismundum ipsum, & alios culpabiles in præmissis etiam omnes & singulos, sententias ac poenas in constitutione felicitis recordationis Bonifacii Papæ VIII. prædecessoris nostri, quæ incipit, Felicitis, contentas, & alias in tales, a iure inflictas & promulgatas incidisse declarari, & contra eos procedi, aliasque & alia fieri & decerni, prout in commissione tunc publice exposita continetur, nos tunc facinoris huiusmodi (quod adeo notorium erat, ut nulla posset tergiuersatione celari) enormitatem, & grauitatem



causæ pensantes, antequam in ea quicquam ageremus, ad maiorem rei certitudinem & nostram informationem dicto procuratore ex suo officio promouente, dilecto Filio nostro Johanni tituli sanctæ Priscæ Presbytero Cardinali, ac venerabilibus Fratribus nostris Johanni Attrebatensi & Dominico Torcellanensi episcopis, viuæ vocis oraculo commisimus, ut se super expositis huiusmodi informarent, & nobis quæ reperirent veritate subniti referrent. Postmodum vero facta per eosdem nobis relatione fideli, inuenimus quod dolenter referimus, præmissa & alia tunc exposita veritate fulciri, habito tunc per nos cum eisdem commissariis ac aliis venerabilibus fratribus nostris sanctæ Romanæ ecclesiæ Cardinalibus, super his maturo consilio, tantam DEI & ecclesiæ offensam, tantamque temeritatis audaciam, inultam & sub dissimulatione pertransire nequeunt, ipsum Sigismundum, ac omnes alios & singulos cuiuscunque, etiam pontificalis, dignitatis, status, gradus, ordinis vel conditionis forent ecclesiasticæ vel mundanæ, qui eidem Sigismundo in præmissis consilium, auxilium vel fauorem dederant, arma contra dictum Cardinalem susceperant, huiusmodique nefandum facinus facto reatum habuerant, seu Sigismundum & alios prædictos postea receptauerant, seu defensionauerant, eosdem & eos qui diffidationi per ipsum Sigismundum eidem Cardinali factæ adhæserant, aut Cardinalem ipsum per suas litteras diffidauerant, aut in diffidatione ipsius Ducis comprehensi erant, ac eos qui eidem Cardinali defece- rant, atque ipsum Sigismundum & suos contra eundem Cardinalem hostiliter venientes in castris & locis etiam ad præfatam ecclesiam Brixinensem, spectantibus admiserant; ecclesiasticos & seculares, eorum nomina & cognomina pro expressis habenda, per edictum publicum Apostolica auctoritate, per alias nostras certi tenoris litteras ex abundanti moneri fecimus peremptorie & requiri, ut certa die per nos eis præfixa in consistorio generali, coram nobis personaliter comparerent, allegaturi causas si quas haberent rationes, cur ad declarationem poenarum tam in constitutione ipsâ, quam dictis nostris literis monitorialibus contentarum, procedere non deberemus.

Aliquin quod tam ad declarationem ipsam, irritationemque omnium & singulorum vt & metu sic per ipsum Cardinalem gestorum, & ab eo extortorum huius modi, etiam iuramento vallatorum, nec non restitutionem tam mobilium quam immobilium sic ab eodem Cardinale ablatorum, interdicti ecclesiastici in locis, in quibus præmissa commissâ fuere, & omnibus aliis locis, ipsis Sigismundo & aliis præfatis subiectis etiam nouam positionem, atque ad ulteriora, & ad omnia ea procedemus, quæ nobis iuxta tanti excessus exigentiam, & rei notorietatem iusta uiderentur fieri & decerni, prout hæc & alia, litteris nostris aliis desuper emanatis, quarum tenores, ac si de verbo ad verbum insererentur præsentibus, haberi volumus pro sufficienter expressis, plenius continentur. Verum etsi dictum Sigismundum, quem antea semper speciali fauore fuimus profecuti, & in visceribus dileximus caritatis, cuiusque disideria quantum cum Deo licuisset fuimus exaudire parati, & etiam alios prædictos speraremus pendente termino dicti monitorii ad cor redire, & tam grauem eorum reatum recognoscere, seque nobis tanquam Christi vicario, cuius vices quamuis immeriti in terris gerimus, totaliter submittere debuisset; ipsi tamen (de quo ab intimis dolemus præcordiis) diabolica fraude seducti, in profundum malorum se præcipitantes, animarum suarum salutem negligentes, & honorem suum pro nihilo habentes, in sathanica superbia perseuerauerunt. Sicque adueniente termino in ipso nostro monitorio expresso, & eis non comparentibus, comparuit dictus Michael de Prato, Procurator noster fiscalis, & eo nomine in consistorio publico, per nos propterea celebrato, litterasque monitoriales nostras antedictas, una cum earum executionibus in locis assignatis legitime factis, scripto producens, monitorum eorundem contumaciam accusauit, & eos contumaces reputari ac omnes & singulas poenas prædictas incurrisse ac incidisse, ac alias iuxta monitorii illius contumaciam declarari, ulteriusque contra eosdem monitos, prout iuris esset, procedi per nos, debita cum in-



instantia postulavit. Eoque facto, comparuit ibidem quidam, Laurentius nomine, qui se Doctorem & dicti Sigismundi nuncium asseruit, ac eiusdem Sigismundi ex parte audiri petiit, quem etiam alias ad partem super his extense satis & sapius audiueramus, quam plura minus vera dicti Sigismundi & suorum complicum parte, nobis referentem; a quo tunc, ut mandatum, si quod in hac causa haberet, produceret, requisivimus, & cum is nullum haberet mandatum, ad termino monitionis satisfaciendum, quoddam procuratorium ad nobis insinuandam quandam prætentam appellationem, tanquam à nobis male informato ad nos melius informandum exhibuit. Considerantes autem quod Sigismundus ipse & alii prædicti ex abundanti, & de mera nostra gratia moniti fuerunt, ut si quid dicere vellet, cur iuxta monitorium per nos emissum declarari non debeant, tunc die lunæ quarta Augusti coram nobis personaliter comparerent, id quod per aliud id facere eis concessum non fuerat; ut tamen omnis nostra mansuetudo appareret, procuratorium illud audire decrevimus, si forte ipse Sigismundus cum suis complicibus, per procuratorem idoneum se nobis personaliter submittere & absolutionem a sententiis, censuris & poenis incurfis petere, aliasque iuxta canonicas sanctiones facere vellet; quo casu eundem Laurentium libenter utique audivissemus, sed cum audito procuratorio illo, quod ibidem publice alta & intelligibili voce legi fecimus, considerare etiam, quod ipse Laurentius solum ad nos illudendum, & obedientiam & correctionem fugiendum advenerat, ad idque mandatum haberet; quodque opus non erat, nos qui iam de notorietate commissi sacrilegii, & tam nefando actu huiusmodi, plene & plenius essemus informati, ita quod amplius nos informari opus non erat, prætentam & ineptam appellationem illam, de qua in dicto procuratorio mentio fiebat, ac quamcunque aliam contra præmissa interpositam forsan ac interponendam, friuolam & non admittendam, sed tanquam iniustam, reiiciendam esse decrevimus & reiecimus, ipsi Laurentio silentium imponentes. Venerabilibus vero Fratribus nostris Clusensi & Ortonensi Episcopis mandavimus, ut ad portas ecclesiæ Senensis cum nunciis ad hoc deputatis accederent, & per eosdem nuncios alta voce vicibus tribus ibidem vocari facerent, si adesset ipse Sigismundus aut alii prædicti per se aut procuratores legitimos, & iuxta dicti monitorii nostri continentiam aliquid dicere vellent, nam eos benigne audire parati eramus. Cumque episcopi ipsi mandatum nostrum huiusmodi exequentes, ad nos in eodem consistorio redissent, retulerunt, nec Sigismundum ipsum nec complices suos seu monitos huiusmodi aut eorum nomine aliquem procuratorem comparuisse seu advenisse. Idcirco nos ad dicti procuratoris fiscalis instantiam Sigismundum, & alios monitos præfatos non comparentes reputavimus merito, prout erant quoad actum & terminum huiusmodi iustitia id exigente contumaces. Et licet tunc contra monitos ipsos ad declarationem huiusmodi & alias, prout petatum fuerat, procedere potuissemus & debuissimus: Nos tamen, qui præmissa ea molestius fecimus quo ipsum Sigismundum ab ineunte eius ætate dileximus ad omnem nostram, ob eius specialem dilectionem, quæ claræ & omni laude dignæ domui Austriæ, ex qua ipse Sigismundus originem traxit, coniungimur: mansuetudinem ostendendam, utque ipsi moniti penitus convincerentur, dictum terminum usque in præsens continuavimus, mandantes ad ipsius Sigismundi & aliorum prædictorum malitiam, & cordis ipsorum duritiam convincendum, eosdem iterum per edictum publicum in valuis dictæ Senensis Ecclesiæ affigendum vocari; quatenus die datæ præsentium coram nobis in consistorio publico, quod etiam propterea tenere decrevimus, personaliter comparerent, ad audiendum se poenas, sententias & censuras in dicto monitorio nostro contentas incidisse declarari, vel causas cur id fieri non deberet, si quas haberent rationabiles allegandum. Cum autem facta executione huiusmodi nostræ vocationis, indictis valuis, eaque reproducta hodie coram nobis; tanta fuerit ipsius Sigismundi & aliorum monitorum & vocatorum rebellio atque protervia, ut nec hodierna die nefandissimum eorum excessum huiusmodi piis acti-




actibus humiliter recognoscere & expiare, nec se excusare, nec creatori omnium & Ecclesiae sanctae Dei satisfacere nec alias iuxta canonicas sanctiones & sanctorum Patrum & praedecessorum nostrorum Romanorum Pontificum instituta agere curarunt, cuncta interne rimantes, censuimus non dedecori, sed maximae gloriae & honori esse, ipsi inclitae Domui Austriae, si contra dictum Sigismundum, eiusdem atque progenitorum suorum splendorem & famam denigrantem & scandalisantem, qui etiam honoris & dignitatis tam praeclarae domus, eius demeritis indignum se reddidit, armis iustitiae insurgamus, ipsum tanquam palmitem, fructum non ferentem & membrum putridum ab eadem domo reseceamus. Ad Dei igitur laudem & gloriam, hac nostra summa in perpetuum valitura, de consilio eorundem fratrum decernimus ac auctoritate Apostolica tenore praesentium declaramus, dictum Sigismundum ac eos omnes & singulos, qui dictum Cardinalem & Episcopum diffidarunt expresse, & ceteros quosque cuiuscunque etiam pontificalis dignitatis, status, gradus, ordinis, vel conditionis forent, ecclesiasticae vel mundanae, qui eidem Sigismundo & aliis praedictis in praemissis praebuerunt auxilium, consilium vel fauorem, & qui arma contra dictum Cardinalem susceperunt, huiusmodi quoque nefandum facinus ratum habuerunt, seu Sigismundum aliosque praedictos postea receperunt, aut defenserunt, nec non eos, qui diffidationi ipsius Sigismundi huiusmodi adhaeserunt, aut in diffidationibus eiusdem Sigismundi & diffidantium aliorum praedictorum comprehensi sunt, atque eos qui dicto Cardinali infidelitate & auxilio, cum potuerunt, eo tempore defecerunt, ipsumque Sigismundum & alios praedictos contra praefatum Cardinalem hostiliter venientes in castris & locis etiam ad ipsam Ecclesiam Brixinensem spectantibus, & specialiter dictum castrum Brunegk & eius inhabitatores, qui ipsum Sigismundum & suos sic admiserunt, & eos qui praefata facinora rata habuerunt, ecclesiasticos & seculares, eorum omnium ac singulorum nomina & cognomina, ac si de verbo ad verbum infererentur praesentibus, pro sufficienter expressis habentes, ob praemissa sicut reos criminis laesae maiestatis, anathematizatos, perpetuo infames, diffidatos, bannitos & intestabiles, atque ab omni successione expulsos, aedificia etiam eorum in ruinam danda, & eis de nullo debito respondendum seu responderi debere, omnia pacta promissa etiam Sacramenti firmata, & quaecunque foedera etiam pacis seruandae cum dictis, Sigismundo, & aliis praefatis, inita fore irrita & inania, dictorumque Sigismundi & aliorum declaratorum huiusmodi bona quaecunque mobilia & immobilia fisco nostro & Romanae Ecclesiae, cui in Persona & Cardinalis Episcopi iniuriatum existit, penitus applicanda, & nostrae & Apostolicae sedis dispositioni totaliter reservanda, ita ut nihil de illis transmittatur ad posteros: ac eos omnesque & singulos in praemissis culpabiles, siue Episcopi, Abbates, Praepositi, Decani, aut etiam Canonici Brixinensis, aut cuiuscunque alterius Ecclesiae fuerint, in specie & in genere, omni honore & dignitate ecclesiastica seu seculari, omni feudo, locatione, officioque ac beneficio quocunque spirituali aut temporali, quae a quacunque Ecclesia, monasterio siue Praelato obtinent, priuatos. Quoniam Feudorum ad Ecclesiam devolutorum collationem & ordinationem ex certis causis animam nostram mouentibus, nostrae & Apostolicae sedis dispositioni similiter reservamus. Eorundem etiam filios & nepotes per rectam lineam descendentes, beneficiatos, quouis beneficio ecclesiastico, etiam pontificali dignitate priuatos, eisque omnis promotionis spem sublatam. Nobis etiam ipsorum filiorum atque nepotum ex virili sexu descendentium ab eisdem, alicuius dignitatis aut honoris ecclesiastici vel mundani, aut alicuius loci regiminis ianuam aperiendam, ac eis quodlibet officium publicum seu ministerium interdictum, atque in iudiciis eorum dictis & depositionibus nihil fidei aut credulitatis contra quemcunque adhibendum, & ad testimonia perhibenda esse indignos; eisque ad beneficium aut officium ecclesiasticum & ordines sacros negatum ascensum, & ad actus legitimos nullum eis patere aditum, absque omni spe dispensationis super aliquo praemissorum. Nec non omnes & singulos praefatos



ros excommunicationis maioris sententiam aliasque sententias, censuras & poenas in tales a iure latas, inflictas ac promulgatas damnabiliter incidisse. Eosdem quoque Sigismundum & alios supradictos excommunicationis sententia innodamus, anathematizamus, bannimus: Infames, bannitos, intestabiles, honore & bonis ac successione priuatos esse ac aliis omnibus poenis supradictis cum terris per eos possessis siue occupatis subiacere decernimus per presentes. Terras quoque & dominia per ipsum Sigismundum & alios prædictos occupata & possessa quæcunque, ubicunque & in quibuscunque diocesisbus consistant, ac omnia alia loca, ad quæ eos aut eorum aliquem declinare & quamdiu ibi moram trahere contigerit, ecclesiastico & strictissimo interdicto fore supposita declaramus & etiam ipsum interdictum in prædictis locis Apostolica auctoritate de nouo ponimus. Mandantes omnibus & singulis Episcopis, Abbatibus, Prioribus, Præpositis, Decanis, Prouincialium, Ecclesiarum Rectoribus & Presbyteris aliis, ut ipsum Sigismundum & alios prædictos etiam nominatim singulis Diebus Dominicis & festiuis in diuinis, sic excommunicatos, anathematizatos, infames, diffidatos, priuatos & alias ut perfertur per nos declaratos, in eorum ecclesiis denuncient, & denunciari faciant, uniuerfis & singulis Christi fidelibus districtius iniungentes, ut dictos excommunicatos, anathematizatos & declaratos vbilibet evitent & faciant euitari, nec cum eis aut eorum aliquo post spatium unius mensis a data præsentium computando, quæuis commercia siue salis siue mineræ argenti aut alterius generis cuiuscunque emendo vel vendendo quodlibet habeant, aut eis communicent, nec ipsis aliquod humanitatis opus aut solatium exhibeant, seu etiam victualia aut merces alias eis uendant, aut ab ipsis emanant sed eos omnes & singulos pro excommunicatis & anathematizatis ac pro diffidatis habeant inimicis. Et quoniam firmum esse nequit, quod vi & metu constat esse factum, harum serie dicta apostolica auctoritate similiter pronunciamus, decernimus & declaramus, extorsionem & traditionem dicti castri *Taufers*/cum suis adhærentiis, nec non sex millia florenorum Rhenensium dicto Sigismundo per ipsum Cardinalem prompto & dicto tempore solutorum, promissionemque de soluendo per eundem Cardinalem quatuor millium florenorum similium, ipsi olim Duci in terminis duobus; nec non quantitatem de tribus millibus florenorum eorundem eidem olim Duci per ipsum Cardinalem prius amicabiliter mutuatorum. Ac quod ipse Cardinalis Capitulum Brixinense ad regimen ciuitatis Brixinensis, castrorumque & oppidorum Ecclesiæ suæ Brixinensis ponere castellanosque nonnullos ipsi Cardinali & dictæ suæ Ecclesiæ fideles amouere. Et quod ipsum Brixinense Capitulum dicto olim Duci omnia castra & oppida Ecclesiæ præfatæ aperta tenere, nec in eis alios quam eidem Sigismundo gratos castellanos seu officiales instituere debeant seu teneantur, ac alia quæcunque à dicto Cardinale, dum in ipsius Sigismundi potestate, ac ut præmittatur, detinebatur, atque etiam, quæ tunc a dicto Capitulo per præfatum Sigismundum aut suos extorta, ac per ipsum Cardinalem seu etiam Capitulum antedictos tunc promissa seu literaliter facta, nec non sigillationem eiusdem literæ inter alia continentis, quod ipse Cardinalis eidem Capitulo omne regimen ciuitatis, castrorum & oppidorum suæ Ecclesiæ committeret, quam eodem tempore quidam se nominantes dictum Capitulum a præfato Cardinale eorum Episcopo tum angustiato & oppresso similiter extorserunt. Omnia quoque alia etiam inde secuta, cum non solum sint violenta & iniustissima, sed & contra omnem honorem & honestatem damnabiliter extorsa, fuisse & esse nulla, irrita & inualida, nulliusque efficaciæ roboris vel momenti: Ipsumque Cardinalem ad ea obseruandum nunquam fuisse obligatum neque se sic in præiudicium Ecclesiæ obligare potuisse, eademque omnia & singula ad cautelam cassamus, irritamus & annullamus ac ipsum Cardinalem ad ea obseruandum nullatenus obligatum fore, ac ipsum castrum *Taufers*/cum suis adhærentiis uniuerfis, & inde perceptis ab eodem tempore fructibus, ac sex millia florenorum prædicta & damna illata alia, nec non literas sic extortas, tam per olim Ducem quam Capitulum præfatos, nobis aut nostro Commis-



fario infra duorum mensium spatium a die datæ præsentium computando, sub poenis antedictis libere restitui debere decernimus. Quodque nisi ipsum Capitulum infra dictum spatium literas per ipsum à dicto Cardinale & Episcopo eorum sic extortas, ciuitatemque Brixinensem castra & oppida eiusdem Ecclesiæ amotis inde nouis iam positis castellanis & repositis inibi illis, quos ipse Cardinalis ibidem posuerat, nobis aut nostro Commissario plene restituerunt, & tunc lapso duorum mensium spatio huiusmodi omnes incorporationes quarumcunque provincialium Ecclesiarum, quas ipsum Capitulum obtinere dignoscitur, ad mensam episcopalem Brixinensem eo ipso revertantur & Capitulum ipsum huiusmodi incorporationibus Ecclesiarum omnesque & singulas personas eiusdem capituli in prædictis culpabiles, quorum nomina & cognomina præsentibus habere volumus pro expressis, ultra poenas iam dictas, omnibus & singulis eorum beneficiis ecclesiasticis cum cura vel sine cura, canonicatibus & Præbendis, dignitatibus, personalibus, officiis seu administrationibus absque alia declaratione, quacunque priuatos esse volumus, atque priuamus per præsentis, eaque sic vacare decernimus. Per præmissa tamen, tam carissimo in Christo filio nostro, Friderico Romanorum Imperatori, quam dilecto filio, nobili viro Alberto Duci eius germano, ex eadem domo Austriæ, oriundis, & etiam omnibus iuribus, nec non etiam doti aut donationi propter nuptias dilectæ in Christo filiæ Eleonoræ de Scotia, dicti Sigismundi conthoralis, quæ ut veridice accepimus, præfatis facinoribus & nefandis nequaquam consensit, nolumus in aliquo præiudicare, sed ea sua bona sibi quoad vixerit illæsa remanere. Nulli ergo omnium hominum, liceat tam paginam nostræ reservationis, innodationis, anathematis, bannimenti, constitutionis, positionis, mandati, iniunctionis, pronuntiationis, declarationis, cassationis, irritationis, annulationis, voluntatis, priuationis & decreti infringere vel ei ausu temerario contrauenire: si quis autem hoc attemptose præsumserit, indignationem omnipotentis Dei & beatorum Petri & Pauli Apostolorum eius se noverit incursum. Datum Senis Anno incarnationis Dominicæ M. CCCC. LX. sexto Idus Augusti, Pontificatus nostri anno secundo.







P. 121. **APPELLATIO A CENSURA**  
**P. P. II. INTERPOSITA PRO PATRE**  
**DOMINI SIGISMUNDI DVCIS**  
**AUSTRIÆ, &c.**

**I**N NOMINE DOMINI, Amen. Per hoc præsens publicum instrumentum cunctis pateat euidenter, quod Anno à natiuitate Domini M. CCCC. LX. Indictione octaua, die vero Mercurii, XIII. mensis Augusti, hora meridiei, vel quasi, pontificatus sanctissimi in CHRISTO patris ac domini, domini Pii, diuina prouidentia Papæ II. anno eius secundo, in oppido Isbruck, in mei notarii publici testiumque infra scriptorum ad hoc specialiter vocatorum, rogatorum & requisitorum præsentia personaliter constitutus, illustrissimus Princeps & dominus, dominus Sigismundus Dux Austriæ, animo & intentione prouocandi seu appellandi, quandam papyrum, schedam, notam prouocatoriam seu appellatoriam in se continentem, quam ibidem in manibus suis tenebat, & in medium produxit, mihi assignauit, nec non per me publice legi fecit, ac sibi apostolos seu literas testimoniales per me dari petiit, & postulauit, nec non alia fecit, ut in prædicta prouocationis seu appellationis schedula continebatur, cuius tenor de verbo ad verbum sequitur, & est talis.

Cum æterni tribunal iudicis eum reum non habeat, quem iudex humanus inique condemnat, eo quod eius iudicium infallibili innititur veritati: humanum vero iudicium tum falsis suggestionibus, tum errore aut fragilitate, nonnunquam vero gratia & fauore peruertitur: Et idcirco prouocationis & varii recursus ac refugii remedia à maioribus nostris in subsidium oppressorum salubriter sunt inuenta.

Nos itaque Sigismundus Dei gratia Austriæ, Stiriæ, Carinthiæ & Carniolæ Dux, Comesque Tirolis, &c. oppressionem nostram cunctis CHRISTI fidelibus, præcipue vero Principibus secularibus, aduocatis & protectiones Ecclesiarum & prælatorum habentibus, innotescere cupientes, hinc ordimur, quod principatus noster vetustissimus & solidissimus Comitatus Tirolis, ab antiquissimis annis, etiam antequam in nostrum & inclytæ stirpis Austriæ dominium seu ditionem peruenisset, inter varias suas aduocatas, hæreditario ac perpetuo iure sibi affixam habuit aduocatiam Ecclesiæ Brixinensis, cuius vigore potestatem habuerunt singuli Comites Tirolis pro tempore in omnes fortias, castra, terras & homines ipsius Ecclesiæ, in dicto Comitatu, & eius confiniis situatas, quantum ad ciuile dominium attinet, scil. tuitionis & protectionis omnium hominum ad Comitatum ipsum pertinentium, siue ipsi Comiti & Principi subiacciant immediate, siue aliis personis ecclesiasticis vel secularibus ad ipsum Comitatum spectantibus, coloniæ vel emphyteoseos, vel alio quouis iure attineatur. Ipse quoque Episcopus Brixinensis, nunc existens Cardinalis tituli sancti Petri ad vincula, in exordio introitus sui in Ecclesiam Brixinensem, interueniente domino Friderico, Archiepiscopo Saltzburgensi, Metropolitano suo, nobis huiusce aduocatiæ ius recognouit, despons sese erga nos gerere velle per omnia; sicuti prædecessores sui erga nos & antecessores



nostros haftenus tenuissent. Quin etiam, ut ipsa aduocata circa nos & principatum nostrum syncerius & solidius firmaretur, inter nos actum & conditum est, quod nos omnia Episcopalia & capitularia ipsius Ecclesiae castra, terras atque iura sub protectionis nostrae clypeo diligenter conseruare debemus: exceptis illis, quae sub alieno, & non principatu nostro consistunt.

Sed etsi inter nos similitudines & differentiae suscitarentur, forma data est, quibus cognitoribus illae discutiantur, ne alter alterum coercitiua interdictione distringere cogatur, sed coram arbitris receptis iuxta formam compromissi omnia determinentur. Cardinalis vero quietem publicam ipsius Principatus ac propriam ferre non valens (quo spiritu ductus, nescimus) nulla causa urgente, sed nec vlla suspitione praevia, contra nos confinxit, qualiter vitae suae insidiari simus, & in quandam fortiam Ecclesiae Brixinensis secessit, suggerens se inibi metu potentiae nostrae latitare, & ob id Ecclesiasticum interdictum fulminandum esse censuit.

Deinde Papa Calixtus suis delationibus permotus, edicta poenalia contra nos emisit: à quibus cum prouocaremus ad eundem syncerius informandum, & tota prouincia Comitatus nostri Tirolis status utriusque scilicet Ecclesiastici & secularis, nobis adhereret: & interim annus, qui appellationi prosequendae à iure praefixus est, laberetur. Papa ipse ex hac vita migravit. Succedens postea Papa Pius, ipse nobis alterum fatale concessit, appellationem nostram per hoc tacite admittendo.

Deinde Cardinalis ipse prioribus iniuriis in nos renouatis, nouas accumulauit, deferens nos, qualiter castra nostra, quae in feudum ab Ecclesia Brixinensi dependerent, recognoscere nollemus, & metallarias seu mineras & salinas ad se spectantes detineremus, Item nos Mantuam applicuimus, Apostolico conspectui nos praesentantes, ubi ipsi Cardinali obtulimus omnia illa feuda recognoscere & suscipere, ac fidelitatis debitum inde praestare, prout quondam genitor noster fecisset erga praedecessores suos, cum adiectione clausulae, quod si qua plura feuda teneremus, illa ipsa etiam suscepta & recognita habeantur: cumque feuda huiusmodi particulatim fuerint declarata, nos etiam illa singulatim & expresse in feudum accipere vellemus: & de aliis simultatibus, si forent, iuxta compromissi formam iam dudum inter nos conuenti, omni cunctatione semota, experiri.

Porro, si quid differentiarum subesset, quae per viam compromissi decidi non possent seu deberent, illae per compromissarios ad competentem iudicem remitterentur. Quae omnia Cardinalis ipse refutauit, contra foedus pactum & conuentum, ut praefertur. Insuper aliarum prouinciarum principes in nostrum principatum accersere tentauit, offerens illis spontaneam inuestituram feudorum nostrorum. Sed (Deo propitio) neminem inuenit, qui sibi tantae factionis adiutor esse vellet.

Ex aduerso autem innocentiam nostram super criminationibus ipsius Cardinalis ostendimus, quia constabat, Cardinalem ipsum tempore conficti metus sui in monasterio Wisten, iuxta locum nostrae Ducalis residentiae, & aliis patulis locis, officium Pontificale palam exercuisse, ubi nemo inuitis nobis, ne momento quidem securus persistere posset. Et alias tam clare deteximus, quod Cardinalis ipse suam contra nos infamationem tam petulantem subterfugere volens, dixit se nostram praesentiam non deuittasse.

Nos autem illico literam manu sua scriptam produximus, in qua nos palam nuncupauit: nec tamen in ea correptus fuit, nec reprehensus. Suam vero in nos sentiens audaciam impunitam, maiora molimina continuo in nos & subditos nostros saeuendo est ausus, & fortias Ecclesiae variis machinis bellicis instruxit, arcibus suis custodes praefecit externos, audaciae plerumque assuetos, victualia ingessit, quorum usus in pace minime consuetus, sed obsidionis tempore plurimum aptus, & urgente fame gratissimus est obsessis, quanquam nulla tunc esset hostilis incursionis suspicio, sed omnia tranquilla, praeter illa, quae inter nos, & ipsum tunc amicabiliter tractabantur, quibus adhuc vehementius inhaerentes, mili-



misimus fidelem nostrum Barzefalem de Annenberg Consiliarum nostrum hortantes, ne ullam nouitatem attentaret, sed viam amicabilis tractatus amplecteretur. & omnia prius per nos oblata renouauimus.

Omni tandem via concordiae deficiente, obtulit idem Consiliarius noster trengas biennales, ad ultimum saltem annales, ut interea differentiae illae aut amicabili concordia terminarentur, aut saltem per viam compromissi arbitrari iudicio subiicerentur, quae omnia Cardinalis ipse refutauit, spem ponens (ut creditur) in certis armigeris, qui tunc Comitatum Goriciae nobis finitimum inuaserrunt. Et cum ipse Cardinalis à suis admoneretur, ne ullum adparatum hostilem ostenderet, ne publicam pacem perturbaret, contra iura prouinciae Comitatus Tirolis, alioquin sibi exitium immineret, siquidem hostis patriae iudicaretur, Respondit, *nihil vereri, oportere sibi esse armigeros & homines qui nedum unam sed plures valles replere valerent.*

Cum ergo ipse Cardinalis patientia nostra tam insolenter abuteretur, totusque populus Comitatus nostri audaciam eius fastidiret, ac nonnulli populi pararent ausus ipsius vi propria comprimere: nos ueriti, ne furor popularis in ipsum indiscretius irruens, maioris mali periculum afferret, tandem via regia & subordinaria disciplina, cohortes & turmas instructas misimus, ad haec omnia compescenda. Quibus applicantibus, subito Cardinalis ipse de capituli Brixinensis Ecclesiae gremio, & alios de latero suo ad nos misit, pacem postulans. Illico pacis tractatores deputauimus, & pax subito conclusa est. Videns quippe Cardinalis, neminem audaciae suae fauere, nec quenquam à fide nostra deficere, spe sua frustratus, omnia in manibus nostris reposuit. Sed absit à nobis, ut propter audaciam Praelati, bona Ecclesiae usurpemus. Omnia etenim castra ad manus capituli tradidimus, ea lege, ut talibus rectoribus tutanda committantur, qui ecclesiae, nobis & principatui vniuerso grati ac fideles conspicerentur, ut ita pax, tranquillitas, & unanimis concordia per uniuersum principatum, omnesque populos eius, in utroque statu Ecclesiastico & seculari conseruaretur, vitaretur seditio, & omnis tumultuationis suspitio caueretur: pro damnis autem & interesse nostro, castrum nostrum Transfers, (al. Tamfers) quod ipse à nobis pro certa Florenorum summa tenuit pignorat, cum tenuissimis pecuniarum summulis retinemus in recompensam: quae tamen omnia usque medietatem expensarum, damnorum & interesse huiusmodi non attingunt. Hanc compositionem, nedum ipse Cardinalis emologauit: verum etiam postea extra territoria nostra, & in urbibus amplissimis degens ratificauit.

Post haec omnia Dominus noster sanctissimus Papa, monitorium poenale contra nos emisit, quo praecipit, haec omnia rescindi, & in eum statum reponi singula, quo fuisset in vigilia Paschae.

Nos rati sanctitatem suam male informatam, ad ipsum melius informandum, misimus alioquin ad prouocandum potestatem dedimus egregio utriusque iuris doctore Laurentio de Blumenau, consiliario nostro: quem sanctitas sua recusauit audire, ipsumque iterum audientiam postulantem: tandem prouocare volentem, minis affecit, carcerem comminando sibi pro apostolis: ipsumque ad nos redire parantem, arrestari fecit, haerese suspicione ipsum innocentissime maculare volens, eo quod sanctitatem suam de facti qualitate (in qua etiam Romanus Pontifex saepe fallitur) de mandato nostro voluit informare.

Demum ad nos proficiscentem persequi fecit: hodieque nobis incertum est, an persequentium manus aufugerit, aut insidiatoris dicti laqueos inciderit. Hoc vero certum est, quod securitas experiendi, de iure, nobis & nostris in curia papali penitus adempta est. Cum itaque sanctitas sua omnem spem consequendi iustitiam sustulerit à nobis, ideoque ad ipsum melius informandum prouocare non possumus, quia aures eius in nos obsurduerunt, & indignatio pro libitu succensa est: ideoque ad futurum Romanum Pontificem appellamus,



qui de gestis antecessoris sui de iure habet cognoscere. Item ad generale Concilium instituendum, vel institutum prout ex forma sanctorum & Catholicorum decretorum sacri Constantiensis Concilii, innouatorum per sanctissimum Basiliense Concilium, de tempore in tempus præfinitum iure celebrari debet. Et ne quisquam putet, nos hanc nostram appellationem subterfugendi iuris causa interposuisse: offerimus & protestamur, quod vias naturalis iuris nullo pacto volumus declinare. Et in primis, si sanctissimus Dominus noster causam nostram, in qua se suspectum reddidit notorie, alteri non suspecto velit delegare, nos illius delegati instituendi iudicium subire non detrahimus, uti vetustissima iuris civilis tradidit doctrina.

Et hoc modo sedis Apostolicæ illibata manebit auctoritas. Quia illius auctoritate manente, sola personæ suspicione submota, causa terminabitur. Item, si sanctitas sua se putaret non esse suspectam, nos super hac differentia compromittere parati sumus, ut iuris canonici traditio docet. Sed & cum ipso Cardinali simili via experiri offerimus, ne quis putet nos translatiuam submittere constitutionem. Insuper ad ipsum eundem Romanum pontificem, si adiungere sibi velit personas nobis non suspectas, quorum consilio causam agat, prouocamus: ipsiusque iudicium, si in uniuersali concilio præfederit, non declinamus.

Postremo quascunque vias, quibus nobis & nostris securitas causæ prosequendæ dabitur, & suspicionis metus auferetur, in huiusmodi causæ prosecutione amplectemur. Quæ omnia si nobis denegabuntur, tandem ad uniuersum Saluatoris & Domini nostri Iesu Christi populum, \* & quicumque nostræ oppressioni misereri velit, aut iustitiam inferioris etiam contra superiores in ipsum incandescentes ament, omnesque iustitiæ & innocentiae fautores appellamus & prouocamus, ac ad ipsos concurrimus, apostolosque primo, secundo & tertio instantes, instantius & instantissime petimus, si quis sit, qui dare velit, aut possit: & à te notario publico saltem testimoniales, pro nobis & subditis nostris, Ecclesiasticis & secularibus, ac adhærentibus & fautoribus nostris: subiicientes nos & illos iurisdictioni & cognitioni illorum quos supra nominauimus: & promittentes nos iuri modo præmissis parere. Quæ si nobis denegata fuerint, Deum æternum iudicem, & omnes iustitiæ ac innocentiae fautores contestamur, per nos non stare, quo minus iustitia reddatur: nos vero oppressos esse. De quibus prosequendis protestamur cessante, etiam coram Romano Pontifice, & ubi opus erit, & iuris ordo deposcit, vel persuadet æquitas rationis: saluo iure addendi, minuendi, mutandi, corrigendi, & aliam vel alias appellationem siue appellationes interponendi, & quolibet iuris, beneficio: & protestamur prout fuit & est moris atque styli.

Qua quidem schedula per me expresse lecta præfato Illustrissimo Principi sic appellanti & prouocanti, ac apostolos petendi in quantum de iure potui & debui, has literas testimoniales dedi & concessi. Acta sunt hæc anno &c. præsentibus ibidem egregiis & honorabilibus viris, Dominis Georgio Heimbürg utriusque juris Doctore, &c. *Martinus Marquarti Notarius, &c.*

**MANDAT PAPA DENUNTIARI DV-  
CEM SIGISMUNDVM, ET CERTOS SVOS  
ADHÆRENTES, PER BREVE  
APOSTOLICVM.**

**PIUS** Papa Dilecto Filio N. Plebano Ecclesiæ S. Stephani Constantiensis. Dilecto filio salutem & Apostolicam benedictionem. Præsentium tibi tenore. Sub excommunicationis & depositionis ab ordine & officio latæ sententiæ poenis, districte præcipimus & mandamus, quatinus his litteris acceptis & continue in posterum, donec aliud tibi mandauerimus in contrarium, Sigismundum ex Austria



ſtriæ Principibus cum Satellitibus ſuis , omnibus diebus feſtis , congregato populo ita denuncies , ut in forma introcluſa , quam tibi ſpecialiter ad hoc mittimus cernis contineri. Datum Romæ apud ſanctum Petrum , ſub annulo Piſcatoris, die 22. Januarii , M. CCCC LXI. Pontificatus noſtri anno tertio.

*COPIA FORMÆ INTROCLUSÆ PRÆTACTÆ.*

**D**E ſpeciali diſtricto & expreſſo mandato ſanctiſſimi Domini noſtri Papæ , Sigismundum ex Auſtriæ Principibus , ob hoſtilem inſecutionem & ſacrilegium in Perſonam Reuerendiſſimi in Chriſto Patris & Domini , Domini Nicolai tituli S. Petri ad Vincula ſanctæ Romanæ Eccleſiæ Presbyteri Cardinalis , Episcopi Brixinensis , in Paſchalibus feſtiuitatibus perpetratum , vobis omnibus , cum adhærentibus & fautoribus ſuis, denuncio excommunicatum maiori excommunicatione, ac poenis criminis læſæ maiestatis & perpetuæ infamiæ innodatum , bannitum diffidatum , & bonis & honore priuatum. Et cum hoc etiam iterum de nouo , ob damnatam ſuam appellationem ad futurum Concilium , denuncio ipſum eſſe anathematizatum , crimine læſæ maiestatis & fautoriæ hæreſis irretitum : eſſeque etiam in omnibus dominiis , quæ occupat , & ad quæ ipſe aut aliquis de ſuis adhærentibus accedit , poſitum Apoſtolica auctoritate ſtriſtiſſimum interdictum. Mandoque vobis , ut ipſum cum adhærentibus , ſatellitibus & fautoribus ſuis , ut præfertur , vitetis , & pro talibus habeatis. Simili modo denuntio excommunicatos & eiſdem ſupraſcriptis poenis irretitos , omnes & ſingulos , quos ſanctiſſimus Dominus noſter in ſuis Bullis tales eſſe exprimit : ex quibus ſunt nominatim iſti , qui ſequentur , ſcilicet Wolfgangus Neydinger , Stephanus Steynhorn , aſſerti Canonici Brixinenses : Gregorius de Heymburg & Laurentius Blomenow , erronei Doctores : Parcifal Annenberger , Jacobus Traff , Turingus de Halwil , Baltazar de Weltzſperg , Chriſtophorus Voxs , & Caſpar Loubenberg , aſſerti milites : Happpo Hacke , Leonardus Weynecker , Oſwaldus , Eghardus , Berchtoldus condicti Wolckenſteyner , Caſpar Trautſon , Jacobus Tonner , Johannes Kripp , Rolandus Glandensperger , Waltherus de Monthein , Leopoldus Spiels , Joannes de Friberg de Aſtetten , Joannes de Friberg de Pfaffenhuſen , Georgius Burggraue , Georgius de Annenberg , Dionyſius Heidelberger , Georgius Diepoltzkirchen , Caſpar Spiels , Caſpar Raminger , Paulus Rentel , Conradus Clammer , Wilhelmus Baldlouff , Vlricus Hont , Barbara de Sonnenberg , Georgius Ragant , Ioannes Rummer , Iacobus Fieger , Guntherus de Inſpruck , Auguſtinus Teutſch cum illorum ſociis & adhærentibus , in Apoſtolicis literis in ſpecie , genere aut quocunque modo nominatis & comprehenſis.

Intimo etiam , quòd quicunque uadit per patriam illam Atheſim ſeu vallis Eni , aut emit ſal , argentum vinum , aut alia de illis partibus , ſiue uendit illis quicquam , cadit in excommunicationem & perditionem bonorum ſecundum continentiam Apoſtolicarum Bullarum ſuper hoc editarum.

Simile Breue diuerſis Plebanis  
per diocœſim Conſtantienſem directum eſt.

QVOD



*QUOD EPISCOPUS BASILIENSIS,  
CONTEMPTA PAPALI BVLLA, ET INTERDI-  
CTO EXCOMMUNICATORIO NON CURATO, SEMPER SI-  
GISMUNDUM DUCEM FOVERIT, EX SEQUENTI  
PATET EPISTOLA.*

**PIUS PAPA II.**

*Venerabili Fratri N. Episcopo Basiliensi.*

**V**enerabilis Frater, salutem & apostolicam benedictionem. Intelleximus displicenter, quomodo non obstante, quod Sigismundus ex Austriae Principibus propter infandum & notorium sacrilegium in personam dilecti Fratris nostri Nicolai tituli S. Petri ad vincula S. Romanae Ecclesiae Presbyteri Cardinalis, Episcopi Brixinensis, commissum in excommunicationis & alias iuris horribiles ac satis declaratas poenas, cum complicitibus & satellitibus suis inciderit, per nosque talis (ut nosse debuisti) declaratus existat, posito, ut oportuit, Ecclesiastico interdicto omni in loco, ad quem accesserint: Tua tamen fraternitas eundem Sigismundum & suos (ut praefertur) sicut tenetur, non deuitet, nec etiam (proh dolor) interdictum seruet, ipsosque innodatos tremendis censuris non solum non denuntiet, quin imo se ad tractandum inter ipsum & dilectos filios confederatos intromittat: non aduertens, quod per hoc maximè Deum offendis, censurasque & huius Apostolicae Sedis auctoritatem contemnis, libertatem Ecclesiasticam paruipendis, & contra praestitum per te consecrationis tempore iuramentum venis, proprio honori non parcis, clerusque tuus profanans irregularis existens, diuinis contra Ecclesiae ordinationem se temerè immiscet. Quàm grauiam quidem ista sint, non ignoras.

Mandamus igitur per praesentes Tuae fraternitati, & districtè per praestitum iuramentum requirimus, quatenus ab omni dicti Sigismundi & suorum conuersatione, atque tractatu inter ipsum & dictos confederatos, prorsus abstineas. Interdictum autem iuxta nostrarum superinde literarum continentiam, inuiolabiliter teneas, & teneri facias. Secus faciendo contra Tuam fraternitatem, tanquam fautricem dictorum, sacrilegorum, & Apostolicae Sedis ac nostri, imò Dei contemptricem, nos iustè sentias prouocatos. Datum Romae apud S. Petrum sub annulo Piscatoris, die X. Ian. M. CCCC. LXI. Pontificatus nostri anno III.

*Iacob. Papiensis*

**PII II. PAPAE EPISTOLA AD NORI-  
BERGENSES, QVA GREGORIUS HEIM-  
BURG, DENVNCIATUR EXCOMMUNICATUS.**

**P**ius Papa secundus, dilectis filiis, Burgimagistris & senatui oppidi Nurnberg, salutem, & Apostolicam benedictionem. Saluator humani generis in hunc veniens mundum, ut ex mortalibus genitos DEI filios, & sibi ipsi in summi Patris sui regno cohaeredes efficeret, unum ex omnibus fidelibus in eum credentibus regnum constituit, idque unam ipsius Ecclesiam nuncupauit, cuius ipse caput esset, & regnator sempiternus. Visibilem vero humanis oculis praesentiam sui per admirabilem ad patrem omnipotentem ascensum mundo subtracturus, Petrum Apostolorum principem, eiusque legi-  
timos



timos successores, vicarios sibi cum plenitudine potestatis, ad propria gubernationem Ecclesie substituit, tribuens omnimodam per temporalem successionem vicariis ipsis in terris & in cœlis omnia ligandi soluendique potestatem: precipiensque districte ipsos audiri, & in eorum iussionibus permorari. Quia si qui transgressores veneno imbuti, eos non audirent; huiusmodi omnes pro exclusis à suo regno, eiectisque à sancta Ecclesia, inter ethnicos & publicanos, cum perditionis & mortis filiis voluit computari. Cum enim nullum regnum (ut ipsius domini nostri verbis didicimus) in se diuisum stare possit: quo nam modo sacrosanctum stabit Ecclesie regnum, si illi, qui Christi supremi Regis vicario parere contemnunt, de regni non valeant sorte depelli? Aduersus hoc iniquissimum fundamentum, & Ecclesie firmam petram, hæresis quadam à paruo tempore citra sensum visa suboriri pullulauit: quæ sub ouium vestibus lupos rapaces intrinsecus celans, sub appellationis specie Ecclesie satagit unitatem conuellere. Nam si quæ Christi unicus vicarius, canonibus sacris etiam & iuri scripto inherendo decreuit, statuitque, & seruari (ut dignum est) præcepit, calumniatores maleuoli & peruersi subterfugere iustitiam præsumentes, per ludibria friuolarum appellationum ad futurum Concilium (ceu ad id, quod nusquam est, ac super CHRISTI vicarium esse aut reperiri nequit) obedientiam qua est de necessitate Ecclesie & salutis vniuersorum, improbe declinant, ac temere.

Hanc igitur Diabolico spiritu & instinctu nouitatem exortam considerantes, in totius Ecclesie catholica non tantum eneruationem, sed euerfionem, in Mantuano conuentu sæpe & multum discussam, de venerabilium fratrum nostrorum sanctæ Romanæ Ecclesie Cardinalium, pluriumque aliorum præsulum & peritorum qui aderant, maturo consilio & consensu, illiusmodi appellationes damnauimus: atque ita appellantes, notariosque ac testes, & adherentes omnes excommunicauimus, læsæque maiestatis hærescos crimina & pœnas, eo ipso illos diffiniuimus incidisse, prout in Apostolicis literis superinde confectis plenius continetur. Caterum his omnibus non obstantibus, quidam ex patre Diabolo mendaciorum artifice natus, Gregorius de Heimbürg nomine, auaritiæ contaminatus illuue, & superatus ardoribus, quæ est seruitus idolorum, de mense Augusti proxime præterito, à nostra solenni declaratoria sententia, qua Senis existentes, impium Sigismundum ex principibus Austria, ob notorium sacrilegium propter hostilem persecutionem in personam dilecti filii nostri Nicolai tit. sancti Petri ad vincula, sanctæ Romanæ Ecclesie Presbyteri, Cardinalis, & Episcopi Brixinensis, & rapinam bonorum ecclesie illius, perpetratum. iuris scripti pœnas declarauimus incurrisse, à nobis ad futurum Concilium improbam, nefariam, temerariam, seditiosam denique appellationem dictauit: & illius interpositionis per dictum Sigismundum factæ, ipse dictator in originali instrumento Florentiæ ad valuas Ecclesie affixo, testis inscribitur. Quod quia loquax ille, præsumptuosus & præceps, mendax atque turbulentus, temerarius, ob istud facinus communicatus existit, criminaque & pœnas incidit læsæ maiestatis atque hæresis, adeo ut ultra execrationem honore omni & bonis iure sit priuatus:

P. 125 Deuotiones vestras in Domino requirentes admonemus, huiusmodi pestiferum hominem pro tali excommunicato habeatis, & priuato, ab vestrisque ciuibus omnibus haberi mandetis: ipsumque non solum vitetis, sed procul eiiciatis ab oppido & dominio vestro: & bona quæcunque habet apud vos, tam mobilia, quam immobilia fisco vestro applicetis: & alia omnia faciatis, quæ contra hæreticos de iure canonico fieri mandantur. In quo vos nobis ostendetis, exhibebitisque catholicos (sicut plene confidimus) & Deo gratos ciues, in talem perniciosum Ecclesie Christi persecutorem vos fideles, & sanctæ Romanæ Ecclesie obedientes ostendendo. Nobisque in hoc eo magis deuotiones vestra complacent, quanto scimus plurimum esse Deo carum, eo Ecclesie suæ perutile, ac in primis necessarium, quod profugus iste pestiferque sacrorum contemptor, ab omni expellatur conuersatione & consortio Christianorum. Facite nobis, quid egeritis, per literas vestras rescribatur. Datum Romæ apud sanctum Petrum, sub annulo piscatoris, die XVIII. octobris. M. CCCC. LX. pontificatus nostri anno tertio.

Tom. II.

Dd

SCHOLIA

\* Extat ista inter alias Syluii Epistolæ editionis Basileensis 1481. Ep. CCCCXV. In Basileensi vero de anno 1551. Ep. CCCC.



210 SIGISMUNDI AUSTRIACI ADVENTUS CONSTANTIAM,  
SCHOLIA GREGORII HEIMBURG,  
IN BREVE PAPALE.

*Petrum Apostolorum Principem, eiusque legitimos successores]* Non sacrilegos, avaros & amatores bastardorum.

*Vicariis ipsis in terris ac in cælis omnia ligandi]* Claue non errante.

Non enim pro libito, sed pro ratione.

*Eos non audirent]* iusta iubentes.

*Vicario parere contemnunt]* Dicit Gregorius: *Nolite obedire Prælati, ut eorum scelera approbetis.*

*Christi unicus Vicarius, canonibus sacris]* Non dicunt sacri Canones, quod Episcopus debeat sibi usurpare potestatem gladii contra Principem suum uniuersalem, ratione sui domini particularis.

*Supra Christi Vicarium esse aut reperiri nequit]* Hæc est hæresis in sacro Concilio Constantiensi & Basiliensi reprobata, tunc quando erat indubitatum.

*Illiusmodi appellationes damnauimus]* Tanto fuisti stultior, quia admonuisti nos quid timeres, & voluisti viam præcludere ad refugium, ratione oppressorum, quibus pro libito illusisti.

*Plenius continetur]* Immò sacrilegius.

*Natus Gregorius de Heimburg]* Probè & legitimè natus, qui non fovet adulterina conjugia, sicut Papa facit, qui fouet Fernandum bastardum contra heredem legitimum.

*Avaritiæ contaminatus illunie]* Parum recepi pro patrocinio iustitiæ; sed Papa plurimum recepit pro fomento bastardiæ, & nondum contentus quærit talliam sub colore Turchino.

*Impium Sigismundum]* Magnificum, qui ausus fuit corripere factiones improbas Cardinalis.

*Ob notorium sacrilegium]* Ob magnificum & animosum factum.

*Furis scripti poenas declarauimus incurrisse]* Non auditum contra jus naturæ, & obsurduerunt aures Papæ tanquam aspidis, ita fuit incantatus amore Cæsaris, cui vilissimè seruit.

*Seditiosam denique appellationem]* O quantum times, miserrime Papa, qui non audes in publicum prodire, ne cognoscatur temeritas tua.

*Et quia loquax ille]* Quis te loquacior, qui tribus horis loquacitatem tuam protelasti pro bastardo Aragoniæ arrogantissimè.

*Læxæ Majestatis]* Læxæ Majestatis Papalis.

*Fisco vestro applicetis]* Ita si vultis perdere mercantias vestras.

*Quanto scimus plurimum esse Deo carum]* Jam fingit se in consilio DEI veri fuisse, ac si conscripsisset decreta DEI, & se reponit in numero sacrilegus ille, fingens se socium, qui præter sacra & aniles fabulas nil habet doctrinarum.



GREGORII HEIMBURCH APPELLATIO A PAPA VARIIS MODIS AD CONCILIUM FUTURUM: SIMULQUE RESPONSIO AD CRIMINA SIBI MODO OBIECTA.

*VIS* consilii expers mole ruit sua. Vim temperatam in sublime provehit Deus. Papa Pius iam pridem per breue Apostolicum non testatum, sed annulo piscatoris obsignatum, fertur excommunicasse Gregorium Heimburg, nunquam euocatum, contra legem Dei, qui damnaturus protoplastum præuaricatorem, præmisit vocationem dicens: *Adam ubi es*: Similiter & Cain, fraterno adhuc sanguine madentem, interrogans dixit: *Vbi est Abel frater tuus?* Sodomorum quoque flagitia, antequam sulphuris exureret igne: *Descendam*, inquit, *& videbo, an clamorem, qui ad me peruenit, opere compleuerint.* Papa vero Pius, visola fretus, omni consilio neglecto, quam tenuem \* telam orsus, quam debilem textit rationem quæso videte. *Saluator* (inquit) *noster Petrum Apostolorum principem ad gubernationem Ecclesie substituit.* \* al. temere.

Quis ignorat omnibus Apostolis a Jesu esse præceptum, ut eant in orbem prædicaturi fidem, baptismum & salutem? Quis nescit passim omnibus esse promissum, ligatum esse in cælis, quod ipsi ligarent in terris: & solutum esse, quod soluerent? sed quod Cephæ singulariter dictum est, *Tibi dabo, &c.*

Hoc ait Hieronymus, esse factum, ut schismatis tolleretur occasio, & Ambrosius in Pastoralis suo dicit, quod ne dum Petro trina rogatione interrogato, an amaret? ac terna responsione subsequente, amare se, teste ipso interrogatore Jesu, traditas sibi esse claves, sed & omnibus Apostolis una contraditas.

Apostoli quoque post ascensionem Domini convenisse, ac Petrum sibi principem constituisse, & Antiochiæ in cathedram collocasse referuntur: nihil tamen de potestate vniuersis Apostolis à Salvatore data, & ipsorum omnium vniuersali missione diminuerunt. Ergo & hodie Catholica exorat Ecclesia, sese per Apostolos ipsos continua protectione custodiri, quos Saluator ipse vicarios tanti operis constituit præesse pastores.

Horum legitimos successores constat esse vniuersalia Concilia, Christianæ fidei firmamenta, quæ Pontificum actiones pro tempore saluberrimis doctrinis instruxerunt, errores emendarunt. De quibus summus ille Pontifex Gregorius scribit: *Quisquis illa destruere tentauerit, seipsum destruit.* Sed quorsum hæc? Eo certe pertingunt, ut conuellatur illa superstitio, in qua Papa pius factionibus Cardinalis Cusani astruit, Concilium supra Papam non esse, dum dicit (ut eius verbis utar) *ad futurum Concilium, quod supra Christi vicarium esse nequit.*

Videte ergo, quam vim omnis consilii expertem Papa inferre tentauit. Nam si omnes Apostoli missi sunt à Domino Jesu, dicente illis; *Ite in orbem, &c.* Quodcumque ligaueritis, &c. quos constat conciliariter postea esse congregatos, ac ipsum Cephæ in messem Domini misisse: quis dubitat, Concilia sacra vicem Christi gerere, quæ & cœtui Apostolico successisse comprobantur? siquidem Orbis maior est Vrbe. Subdit Papa Pius *Rem illam in conuentu Mantuano sæpe & multum esse discussam*: quasi concilium habuerit procerum, uti sacræ leges iubent in rebus nouis constituendis: quas tamen pro nudo libitu plus euomit, quam edixit. P. 126 Profecto siquidem ipse conuentum Mantuanum nuncupat conuentum Regalium & Principalium oratorum, illuc transmissorum, in illo certe nihil de hoc ne cogitatum quidem extat.

Dicitur autem Papa Pius cum Cardinalibus suis ita decreuisse. Cur hoc? Nisi quia voluit Papa ipse abuti potestate sua, talliam \* imponendo, & sub velamento militaris expeditionis in Turcam instaurandæ, facultates Germaniæ illius, quæ est inter Coloniam Agrippinam & Austriam, ac rursus inter Daciam & Alpes, quæ Germaniam ab Italia discriminant, medullitus exhaurire. Nam ex illis solis finibus oratores Mantuæ ad tractandum conuenere. Illi quippe soli videbantur apti



Papæ, quos luderet: Brabantia, Hollandia, Gelria, cum circumiacentibus reclamarunt, clam illis quos supra nominaui. Vt cumque res acta sit, nullus illorum interfuit tractatibus nostris, ergo vim suam exortem esse voluit à sensu illorum, quorum æra concupiuit. Hinc profecto non inepte, nec supine, Papa ipse negatis sibi pecuniis, quas solas ardebat, suam ratus lædi maiestatem, vim astu conceptam, totius Concilii expertem adhibuit: ac imprimis suam dimensus potestatem, simul & Imperatoris nostri splendorem ante oculos ponens, putauit neminem resistere posse, vel audere, conatibus eorum.

Veruntamen suam potestatem stupendo, quæ latior est quam hodie sit Imperii gloria Romani (quæ quondam Caucaſi montis limite coartata, de hinc fracto Caucaſi limite per totum orbem vires suas terra marique exporrexit: nunc autem Augustorum desidia angusto limite cingitur) nihil profecto suis machinationibus in hisce partibus, quas Imperialis tituli splendor illustrat, obstare posse rebatur, nisi fortasse totius Orbis Christiani conuentus ciceretur, quod uniuersale Concilium nuncupamus.

Hanc sanctissimam Christianorum conuentionem, libertatis alumnam, Papa velut Iliacam horrens passionem, illam prauenerit credens, vanissimo decreto, antequam nasceretur, condemnauit, sed condemnando potius indicauit. Cum enim sedulo vetat, profecto magis timere deprehenditur. Nam quod veteri silentio restinxit litura, hoc totum inuida damnatio viuificauit: non aliter quam qui latentes vires calcis, aquæ rigentis & gelidæ superfusione obruere cupiens, inuitus ac nolens exuscitauit.

Prudentius Solon ille Atheniensis, legibus ordinatissime compositis, interrogatus, *Cur nihil seuerius in parricidas statuisse, qui tamen sicariis longe immiores essent?* respondisse fertur: *Ideo se reticuisse, ne vetando admonuisse videretur.* Hunc locum Prælati capeſſite, qui libertatis vestræ certissimum est refugium, dignitatisque firmamentum, infirmos rumpite casses & inanes laqueos dissipate, qui scholasticis datis operam disciplinis. Seculis vero Principes, & viri militares, ad bellaque doctiores, quibus est disciplina, si quando proficiſcimini, editiora loca hostibus intercipere, hunc eminentissimum locum Vniuersalis Concilii quæſo ante capite, vnde vobis sit prospectus liberior, fortior & intentior propugnatio, tutelaque securior. Quod si Papa hoc tale tantumque asyllum interceperit, hoc roboris vallum fortasse demolitus fuerit seu obruerit, antequam emineat seu oriatur, vos abiecto clypeo exarmati tandem, precii venalitate, hoc est tributorum pensitatione, animas vestras cogemini redimere: pecuniaque vestra, sub velamento militaris expeditionis aduersus Turcas instaurandæ, in damnatum & scelestum vsum conuertetur, scilicet in subsidium Fernandi, ex damnato complexu quondam Alfonsi regis Aragonum, connixi contra Renatum regni Sicilia hæredem legitimum, & inclytum Joannem Calabria Principem, Christianæ nobilitatis ac militaris gloriæ decus & ornamentum & exemplar imitabile. Et idcirco dicit Papa, *Gregorium Heimburch ex diabolo natum*: quia non ex damnato coitu, sed legitimo coniugio progenitus: quorum osor est Papa, fautor bastardorum, pro quibus longissimam, & fere quasi trium horarum prolixam fecit orationem, dum Fernandi Basthardi laudes Mantuæ personaret.

Quod vero subdit Papa, *Gregorium Heimburch auarum, mendacem, & turbulentum* nuncupando, benedictis si certaret bona audiret: sed cum certet maledictis, alium quærat qui respondeat. Ego ex illo grege non sum, quippe cui facultates pro meritis minime respondent, qui plura suffragia liberaliter impendi, quam honoraria susceperim: & libertatis amator plus semper fui quam blandi-  
p.127

tiarum, quæ mendaciis & auaritiæ minime conuenire possunt: sed ipse aliquando audiet, quid geſſerit, qualem vitam egerit, & quid apud Cumas. Sed reprimam me, pergens ad illius decreti vanitatem, in quo vetantur oppressi, vel opprimendi, ad Concilium prouocare, *quod non est, & quod* (ut ait) *supra papam esse nequit.* Iam supra ostensum est coetum Apostolicum fuisse supra Petrum: &

nunc



nunc affirmo, quod sicut ad sedem Apostolicam vacantem appellari potest, sic ad Concilium quod nondum est congregatum, rite appellatur. Quia potestas Ecclesiæ immortalis est, quemadmodum ipsa Ecclesia: quæ etsi nunc dispersa est, aliquando habet congregari: & hoc nunc maxime opus esse, nemo dubitat, qui calamitates Ecclesiæ intelligit & cognoscit: cuius si se Papa partem esse fateatur, se utique minorem illa fateri necesse est: siquidem Orbis est maior Vrbe. Papa autem hoc vetando, quid aliud agit, quam quod causatur aduersus nos, quod eius imperium truculentissimum non sustinemus: quod facultates nostras, tam nostro quam maiorum nostrorum sudore & sanguine partas, in suas delicias effundere negamus: velut ille, qui ex vulneribus à se iniectis recreatum accusauit, quod telum parcens corpore suscepisset. Hoc dominicum in seruos extat imperium, quod in nos exercere cupit. Hoc est seruile seruitium, quod à nobis exigit: non filialis reuerentia; quibus certe nec peculium relinquere curat. Nemo sanæ mentis hoc non percipit, nullus emunctæ naris homo non olfacit, quorsum tendat hæc tam grauis exactio.

Quod uero me *loquacem* facit, vir omni picâ dicatior, quid dixerim? nisi Horatii verbo respondisse velim, dicentis: *Ignoras te, an ignotum dare nobis verba putas? Cum tua peruideas oculis mala lippus inunctis, cur in aliorum vitiis tam cernis acutum, quam aut aquila, aut serpens Epidaurius? hinc tibi contra venit, inquirant vitia ut tua rursus & illi.* Fateor quippe, me ventositati verborum pro tempore operam dedisse: at non ita, ut ciuilis & Canonica traditionis præcepta contempserim: quæ ille ne unquam quidem olfecit, nuda verbositate contentus. Porro si quod tale vitium apud me deprehendit, inepte tamen id ipsum mihi exprobrauit, quo & ipse potissimum turget. Mihi satis est, didicisse ciuiles sententias: & quicquid præcipuum habet ratio & industria, & quicquid sacra tradunt vtriusque iuris instituta, hisce literis & floribus exornare posse, & in illo grege me esse profiteor. Ipse in numero sit illorum, qui putant hæc omnia vi & artificio Rhetorum contineri. Ergo si Papa ob id facinus me excommunicatum dicit, quis erit eieciior ipso, qui præter verbositatem nihil habet in se virtutis? Subdit, *& lese maiestatis crimine me irretitum*: Credo eum culicibus & muscis has leges edidisse, aut animalibus quæ in tabidis corporibus nasci solent: vti araneorum telas in occursum fragiles, legis consilii exsortis æquauit: quas si culex, aut quod imbecillius animantium inciderit, euoluere se nescit, si quis autem validiorum animantium incurrerit, penetrat atque disrumpit. Neque enim rete ficedulis aut coturnicibus contextum, aptum est vincire vulturem vel aquilam. Irretiat ipse Reatinos suos, & eos quos seruili metu constrictos habet: mecum erit (Deo duce) libertas Diogenis & Catonis. Nec satiatus est Papa conuiciis vulgaribus: quin etiam *Hereticum* me audeat nuncupare. Siquidem hæresim voluit sectam vel sententiam nuncupare, ut Cicero noster Catonem recte appellat: hæreticus sum ego, qui aio; *Concilium orbis Christiani fore supra Papam*: hæreticus est Papa, qui contrariam sectam fouet. Videte quod nihil grauius in eum dico, qui tamen abiecta rationis & concilii moderatione, cuncta in me pro libitu iussit scribi. Postremo nec adhuc satiatus Papa conuiciis, *mandat bona mea confiscari*: quæ utinam tanta essent, quod rapacibus viris hiatum pandere possent. Ego inter bonos conuersari volo, qui uirtutes meas opibus suis foueant, & pluris faciant suffragia mea, quam locupletiam, quam ex mea ruina sperare possent. Maiori enim utentur consilio, quam Papa fretus est in procacitate sua. Pollicetur tandem eis Papa, qui res meas inuaserint, *Catholicorum hominum operas impendisse*. Maxime ridiculosum esset hoc verbum, nisi ipsius Papæ ineptia iam antea vobis comprobata esset; dum ipse incestuosos complexus, & vitia honestati publicæ inimica, Mantuæ tam copiose & loquaciter personauit.

Expugnatis nunc araneorum telis, & infirmorum retium vinculis nodisque dissolutis, ad remedium moribus introductum, quo aduersus superiorem truculentiam & amarissimas leges se tuetur innocentia, stylum conuertere depropero.



Et in primis plane constat, semper & ubique ab inferiore ad superiorem rite prouocari. Nemo enim tam obtusi cordis est, qui non in seipso periculum fecerit, p. 128 à sensualitatis fragilitate ad intellectualis potentiae discursum prouocando. Sed & qui morbo aut vitio animi tenetur, ut nesciat cernere verum, si lapsus fuerit in vitium, defecato tandem animo ad se rediens, ad animum irâ, odio, gratiaque vacuum prouocat, quo certius de rebus dubiis consultet atque decernat, & vim suam grauitate consilii moderetur. Ideo laudata est illa mulier, quæ à temulento Rege Philippo, ad eundem sobrium prouocauit. Sit ergo mihi gradus primus, ab irato Papa, qui me laceffit, ad eundem mitem factum appellare: & ab oratore topico ad eundem, si ventositate abdicata, si Musis relegatis, ad sacras leges se conuerterit: vbi discet, *Neminem indemnatum rebus aut fama spoliare, nec quenquam inauditum condemnare*. Deinde qui scriptum est, *Papam omnes iudicare ipsum autem à nemine iudicandum*: quod & ego fateor verum, quantum attinet ad sedis ipsius & Papalis potestatis plenitudinem: sed non ita, ut sub inimico & suspecto iudice quisquam cogatur famam aut res suas decertare. Ad eundem itaque prouoco, si se iuxta boni viri arbitrium astrinxerit iudicaturum. Et is sit appellationis meæ gradus secundus. Si vero causam delegare malit viro non suspecto, rursus ad eundem Papam, seu quem deligit, prouoco & appello, & hunc tertium appellationis meæ modum offero, meque tali iudicio sisto. Et in summa, Papali cognitioni ea lege me submitto, si suspicionis causa tollatur è medio. Et hic quartus ordo, omnem tollit tergiuersationis notam, quam mihi iniicere possit Cusana procacitas, cuius ductu hæc omnia diriguntur. Quæ omnia si Papa contemserit, quid restat, nisi ad uniuersalem Ecclesiam prouocare, prout à Senatu ad populum Romanum sæpe reperimus appellatum? Nec obiciat mihi Papa, *Ecclesiam non esse congregatam*: quoniam id ipsum factionibus suis impeditur & disturbatur. Apud me nulla mora, culpa nusquam, cum non per me, sed per ipsum stet, quo minus fiat. Siquis enim in ius vocatum vi eximat, contumaciam remouet citato, sed omne vitium & crimen in se transfert. Papa metum intulit mihi, ipse sibi iustitiam indixit: qui se conuiciis suis aduersus me suspectum reddidit, qui se sapientis arbitrio astringere declinauit. De suspicionem experiri recusat, ne iudicem suspicionem carentem delegare dignatur: quique Vniuersale Concilium conciere negat, hic si aduersum me quicquam attentauerit, aduersus ipsum prouoco, gradatim atque alternatim, vt præmisi: & testimonium eius rei postulo, & de metu iusto protestor coram vicinis. Quo cessante, prosequor, si opuserit, & opportunitas concedatur, prout iuris publici ratio poscit saluo iure addendi, omnibusque remediis, moribus & lege introductis.

\* Ista Appellatio est interposita per doctorem Gregorium Heimburg. de mense Ianuar. anno M. CCCC. LXI.

**REPLICA THEODORI LÆLII EPS-  
SCOPI FELTRENSIS, PRO PIO PAPA II.  
ET SEDE ROMANA, AD SUPERIUS SCRIPTUM  
GREGORII HEIMBURG.**

Oblatrantem te, Gregori, aduersus Christum Domini ore sacrilego, & impiis vocibus obstrepentem, Pius Pontifex Maximus iure contempsit: non quod garrulitati tuæ atque blasphemix disertissimus virorum respondere non posset, sed quia æterni Pastoris, cuius vices gerit, qui cum malediceretur non maledicebat, cum pateretur, non comminabatur, imitandum humilitatis exemplum putauit. Meminerat quippe & Christum Dominum à Phariseis, quorum tu perfidiam imitaris, crebris conuiciis laceffitum, & nunc voracem, nunc vini potato-rem, nunc Samariten & Dæmoniacum appellatum: & patientiæ ipsius documenta suscipiens, illud dominicum arcano voluebat in pectore; *Non est seruus maior Domino suo, nec discipulus eo qui misit illum*. Quoniam si Patrem familias Beelzebub vocaue-



*vocauerunt, quanto magis domesticos eius.* Sic illi non quod tu merebaris, sed quid se deceret, attendit. Verum & plurimi & magno atque excellenti ingenio viri tuis blasphemiiis respondere potuissent, si vel ad illos maledicta illa sacrilega peruenissent, vel ineptissimum, atque perditissimum hominem coinquinationis & maculae voluptatibus fluentem, & tanquam bestiam inter luxum semper epulasque sudantem, dignum responso putauissent: quorum plerique insaniam indicentem, atque iuxta Sapientis eloquium in ore stulti esse baculum contumeliae agnoscences, illud ex Sapiente proferebant: *Noli respondere stulto secundum stultitiam suam, ne forte similis fias ei.*

Ineptum sane existimabant congregi tecum, cum nec docere indocibilem, nec reducere pertinacem, nec cohibere furem posse confiderent. Ac talia cogitantes errantem perfidum hactenus silentio contempsere. Sed cum patientia illorum abutens contra lenitatem odio & adversus Pontificis mansuetudinem furore & insania bacchari coepisses, & blasphemiarum tuarum exempla per Italiam Germaniamque dispergere, me unum ex pusillis Curiae & Apostolicae sedis ministris domus Dei zelus accendit, ut diutius me continere non possem, quin uolantia iam pene toto orbe iacula falsitatis, clypeo veritatis exciperem. Verebar enim, ne si nullus tuis calumniis responderet, iam patientia diffidentiae inciperet imputari, ut vel saltem iniustae damnationis tuae Apostolica sedes uideretur crimen agnoscere. Licet enim apud ipsius sedis Pontificem iusti iudicii conscientia sola sufficeret: non incongruum tamen uisum est, & reliquis, si qui forte quasi de iniusto anathemate tuo uiderentur offensi, congrue satisfacere. Sic quondam Gelasius ac Nicolaus sanctissimi disertissimique Pontifices, alter de Achatii, alter de Photii Pseudo episcoporum damnatione, Anastasio Michaelique Principibus & Orientalibus populis tomos scribentes satisfecerunt. In quo genere illud aureum Pii Pontificis flumen eloquentiae omnes facile superasset, nisi illum vel indignitas tua, vel criminis euidencia, vel forsitan remaledicendi apud quosdam suspicio retraxissent. Mouit nos praeterea & Catholicae fidei ratio, contra quam cum multa in ipsis tuis blasphemiiis haeretice impieque prolata legissem, & scandalo & periculo verebar amplius esse silentium, ac proinde populare quasi apud Christianos tuendae fidei officium arbitrabar. Nam etsi caetera crimina silentio praeteriri queant, hoc tamen in fide si fiat, & scandalum & periculum generat. Licet apud te casso labore desudem, apud ceteros tamen, quos tuis blasphemiiis forsitan concitasti, atque impia & maledicta seminando tui erroris comites effecisti, speramus Deo propitio aliquid profuturos. Nam qui per errorem moti sunt tuo mendacio fallente, facilius ueritatem admittent ratione cogente. Respondemus ergo licet incompositis uerbis, ueniam à legentibus rudioris styli facile praesumentes: quoniam contra impias blasphemias iustitia ac fidei patrocinium suscepturi non nitori sermonis, sed ueritati studemus. Ante tamen quam tuis maledictis respondeam, abs te postulare libet, Doctorum eximie & Iurisconsultorum disertissime, qui tibi utriusque Iuris scientiam vendicas, & (ut tuis uerbis utar) qui te *quicquid ratio & industria praecipuum habet, & quidquid tradunt utriusque iuris instituta*, percepisse gloriaris; hoc ne in legibus aut Canonibus, aut in moralibus disciplinis didicisti, ut contra Pontificem summum, Ecclesiae caput & Principem, & miserae animae tuae Episcopum atque Pastorem, vel quomodo libet laesus inueheres? Hominum perditissime, quis unquam haeticorum, qui à Romana damnati sunt sede, in illius antistitem talia maledicta conegit? Lege Nestorium, Macedonium, Eutychen, Coelestinum atque Pelagium, Macarium atque Dioscorum, & caeteras haedicorum pestes: quis unquam tam turpiter oralaxauit? Qui licet damnationem suam grauiter tulerint, tamen à talibus blasphemiiis temperarunt. Unus inuentus est Dioscorus, qui pro eo solo, quod Anathema dicere in sanctum & venerabilem Leonem ausus est, in chalcedonensi Synodo siue ulla fuit restitutione damnatus. Cuius praesumptionem ob hoc potissimum sancti Patres detestati sunt, quia ponens os in coelum, & lingua eius transeunte

super



super terram, inferior maiorem, iniuriis laceffere ausus est. Et hoc noscens Concilii fuisse statutum, adhuc Conciliorum audes mentionem facere, nec revereris illorum pro minori culpa censuram. Miserrimè Hominum, non te terruit Evangelica illa tuba, quod *qui scandalizaverit unum ex pusillis illis minimis, qui in me credunt, expedit ei, ut suspendatur mola asinaria in collo eius, & demergatur in profundum.* Quod si scandalizandi unumquemque pusillum in Christum credentem talem uindictam comminatur; qua ultione plectendus eris, qui totum corpus scandalizas Ecclesiæ, qui Ecclesiarum omnium Patrem & Pastorem, hæreticum, garrulum, insanum, & quicquid turpitudinis tuæ immunditiæque foetor ingerit, in illum causaris? Nec mirum quidem, quoniam non potest nisi spurce loqui, qui consuevit spurca committere. Ex abundantia enim cordis os loquitur, & malus homo de malo cordis thesauro non potest nisi mala proferre. An verò quanti sacrilegii sit Principi populi maledicere, ex lege discere non potuisti? quæ maledictio æterna morte condemnat. Cuius uerba non modo in Romani, sed omnium Episcoporum inunctione solemni, inter ipsa sacra terribiliter intonantur, pronuntiant Episcopo & conformantibus cæteris: *Qui maledixerit tibi, sit ille maledictus, & qui benedixit, ipse benedictionibus repleatur.* Quod si de probis non de reprobis Principibus ac Sacerdotibus dictum esse contendis, audias Paulum Apostolorum, qui cum iussu Principis Sacerdotum iniuste cæsus, illi diuinam ultionem precaretur, atque astantes dicerent: *summum Sacerdotem Dei maledicis?* mox terribus lege diuina se purgans, ait: *Nesciebam, fratres, quia Princeps esset Sacerdotum.* Scriptum est enim, *Principem populi tui non maledices.* An forte iuste homini iniquo, sacrilego, & contra legem agenti se maledixisse contendit, & non potius errati veniam petiit, & nefas Principi Sacerdotum maledicere legis auctoritate professus est? Sed quid ego Paulum memoro? Ipse Dominus noster Iesus Christus, summus Sacerdos, Rex & Iudex, usque ad passionis suæ diem non solum bonis & piis, sed etiam indignis & reprobis detulit Sacerdotibus: quamuis illi nec timorem Dei, nec agnitionem Christi seruassent. Ut enim alia omittamus, ipse subditus passioni cum alapam accepisset, & ei diceretur, *sic respondes Pontifici?* nihil contumeliose in personam locutus est, quem sciebat esse sacrilegum, sed magis innocentiam suam tutatus est, dicens: *Si male locutus sum, testimonium perhibe de malo: si autem bene, cur me cadis?* Quod idem beato Cypriano teste & Canone attestante factum est, ut humilitatis & patientiæ ipsius haberemus exemplum. Docuit enim Sacerdotes ueros plenius honorandos, dum ipse circa falsos talis extiterit. At verò Gregorius contra legem se asserens iniuste communione deiectum, non solum in verba contumeliæ iniuriæque prorupit, sed famosum libellum totam scandalizantem Ecclesiam blasphemans evomuit: nec illi satis est deliquisse, nisi de malitia gloriabundus exemplaria congreget, & publicè legenda dispergat. Leges ciuiles, quarum se Professorem uaniloquus temerator gloriatur, cum qui libellum famosum in iniuriam alicuius ediderit, vel ab alio editum non cælauerit, capitali sententia damnant. Et tamen audet leges appellare, qui tam sacrilege committit in legem. Præuaricator legis legem attende, quoniam non in unumquemque priuatum, sed Dei vicarium atque legatum gregis dominici directorem, Ecclesiarum omnium Patrem, sed & miseræ animæ tuæ & cunctorum fidelium Episcopum atque Pastorem parricidali furore bacharis, lingua interficis, maledictis discerpis, blasphemias laceras, & quantum ad reatum tuum attinet, tanquam truculentus homicida transfodis ac iugulas. Homicidam rectè appellauerim: cum ex Canone tria homicidiorum genera, & poenam eorum parilem cognoscamus: inter quæ detractores linguis proximos confodientes constat esse deterrima. Impudentissime hominum, non te diuina terruerunt exempla, cum legas Mariam sororem Aaron, quæ prima post transitum maris rubri in tympano hymnum cantare meruerat, eò quod murmurasset in Moysen, lepra fuisse percussam. Ecce tu non solum murmurasti, sed publicè blasphemasti, certe non Moysen, (qui & ipse inter Sacerdotes inscribitur, Psalmista testante at-



que dicente : *Moyſes & Aaron in Sacerdotibus eius* ) ſed Moyſe non merito , ſed auctoritate maiorem. Oziam audiſti pro eo, quod Sacerdotes contemnens ſacrorum præſumptor extiterit, ſimili plaga percuſſum eſſe. Bethleemiticos pueros ob deriſionem Prophetæ morte damnatos. Ecce autem plusquam Moyſes aut aliquis Prophetarum , quem tu impie blaſphemās, niſi forte mentitus ſit Bernhardus Doct̃or illuſtris, qui Eugenium Papam ad conſiderationem ſuæ auctoritatis adducens, atque oſtendens, qualem in Dei Eccleſia Romanus Pontifex perſonam gerat : *Attende, inquit, quis ſis, & quam videlicet pro tempore in Eccleſia Dei perſonam geras. Sacerdos magnus es, ſummus Pontifex, Princeps Episcoporum, tu heres Apoſtolorum, tu primatu Abel, gubernatione Noab, patriarchatu Abraham, ordine Melchizedech, dignitate Aaron, auctoritate Moyſes, indicatu Samuel, poteſtate Petrus, unct̃ione Chriſtus. Tu es cui claues traditæ, cui oves creditæ ſunt.* Hunc ergo perfidiſſime blaſphemare non veritus es : ſaltem illud conſideraſſes arcanum, quod in Epiſtola Clementis habetur, quæ aliàs Petri dicitur in ordinatione Clementis, cuius plurima in Decretis & Conciliorum geſtis propter auctoritatem habentur excerpta : ubi claviger regni cœleſtis Clementem ſibi ordinans ſucceſſorem, poſtquam illius Eccleſiaſtici Principatus miniſterium multis verbis extulerat, cunctos fideles quanta reuerentia illum obſervare, quo timore reuereri quo affectu complecti deberent, admonuit. Ubi inter reliqua : *Vos, inquit, fratres & conſerui mei, huic, qui præſidet vobis, in omnibus obedire oportet, atque ſummo ſtudio niti, ut omni erga eum vinculo amoris innexi, pleniffimo erga eum inhæreatis affectu. Rurſus ſi inimicus fuerit Clemens iſte alicui, pro actibus ſuis, nolite vos exſpectare, ut ipſe vobis dicat : Illi nolite amici eſſe, ſed prudenter obſervare debetis, & voluntati eius abſque commonitione obſecundare.* Et paulò poſt in tui ſimiles maledictionem terribilem comminatur, quæ tuæ iniquitatis merito iam interiora tua intrauit, ut ſubter te ſcateat : *Scientes, inquit, quod ſi quis hunc contriſtauerit, Chriſtum, qui ei credidit cathedram, non recipit ; & tanquam qui Chriſtum non ſuſcepit, non ſuſcipietur in regnum cœlorum.* Et iterum terribilius inſonat : *Quicumque contriſtauerit Doct̃orem veritatis, peccat in Chriſtum, & patrem omnium exacerbat Deum, propter quod & vita carebit.* Hæc tu inde excerpta in Canonibus legere debuiffes.

Verùm non uno tantùm blaſphemiae ſacrilegio contentus, ne aliquid intantum relinqueres, etiam in alterum Monarcham maledicta depromis, Cæſarem vœcordiæ ignaviæque condemnas, ut utramque poteſtatem, quibus principaliter hic mundus regitur, blaſphemares, Senatū quoque Eccleſiæ, videlicet Cardinalium cœtum, tanquam Conſilii expertem & temerarium, tu totius orbis cenſor notas & arguis : in unum, contra quem commiſſum nefarium ſacrilegium defendis, plus cæteris debaccharis, & virum ſanctiſſimum, vita & religione, doctrina & integritate incomparabilem, Cardinalem S. Petri ad vincula, infamia conaris aſpergere. Et cū nihil comperias, quo innocentiam vitæ etiam inimicis percognitam obſcureſcere queas, tu omnium factioſiſſimus & procaciſſimus ipſum modo factionis, modo procacitatis accuſas. O linguam maledicam & radicitus præcidendam ! Nonne licet cum Propheta clamare : *Diſperdat Dominus labia dolosa, & linguam magniloquam.* Nempe ex illis es, qui dixerunt : *Linguam noſtram magnificabimus, labia noſtra à nobis ſunt.* Quibus noſter Dominus verè inquit : Tu ex illis es inflatus ſenſu carnis, nullum in terris agnoſcens caput, qui ordinatas à Deo poteſtates blaſphemare te putas impunè.

Cæterùm ne putes, me execrationibus blaſphemiæ tuarum detrectare pugnam, & manum non audere conferre, vel tuos inextricabiles nodos non poſſe diſſolvere, ecce iam ad ſingula feſtinat oratio. Poſtquam noſter Demotheſtes altius quædam de vi conſilii experte ac moderata exorſus, cauæ verba in modum veſicarum tumentia buccis ebuccinauit inflatis, primum accuſationis caput intendit, queſtus ſe contra diuinam & humanam legem non vocatum damnatum. Quod indignum facinus eſſe proclamans exempla producit primi parentis & Cain, quo-



rum alter propter præuaricationem, alter propter homicidium non nisi vocati damnati fuere. Subdens ipsum Deum, cui aperta sunt omnia, ut nos à præcipitante sententiæ temeritate compesceret, Sodomos prius perdere noluisse, quam eorum scelera manifeste cognosceret. Sicque trifaria exemplorum compage, quasi phalange quadam aciem struit. Verum nos invalidam struem uno possemus arietis ictu concutere, & paria referendo exemplorum sylvam obicere. Sed ut ex multis pauca proferamus, Moysen legimus comperto populi scelere, quod palam contra DEUM commissum erat, nulla accusatione vel cognitione prævia vindicasse, & immane idololatriæ crimen plurima populi strage expiasse. Phinees accepimus ultionem non præmissa sententia, cum agentes contra legem & edictum ante prolato propria manu transfoderet. Nouimus, Heliam Sacerdotes Balaam prius ad supplicium quam ad iudicium produxisse. Eundem scimus, Ochoziæ Regis nuntios igne de cælo impetrato cremasse. Par zelus in Scripturis Eleazari commendatur. Et ut ad recentiora veniamus, constat, Petrum Apostolorum Principem mox prolato mendacio Ananiam & Saphiram morte multasse. Paulum vero Coapostolum eius Cliniam magum resistentem Spiritui sancto subita coecitate damnasse. Et ut efficacius aliquid proferamus, Apostolus absens corpore, spiritu præsens, Corinthium excommunicauit, tradens in interitum carnis, ut saluus fieret Spiritus, nullus adhibitus strepitus fori, nullus iudiciarius ordo, nulla tela iudicii. Nunquid Prophetæ Domini, nunquid Apostoli perperam aliquid egerunt? Nunquid præcones legis legem transgressi sunt, vel nuntii potuerunt his, quæ à Spiritu Sancto edocti erant, aduersa docere? Sunt ergo iudicia Domini vera, justificata in semetipsa: quoniam ea quæ ulta & vindicata præscripsimus, ita clara & aperta erant, ut ad tenorem cæterorum & ædificationem nascentis Ecclesiæ plectenda magis quam discutienda viderentur. Hoc est quod Canones sæpe proclamant, *Quod nota & manifesta inquisitione non indigent.* Talibus sanctionibus referti sunt Codices: & tu id simulas ignorare. Satis ad excommunicationem tuam Ambrosius in Epistolæ Pauli sufficiebat auctoritas, dicentis: *Licet iudicis non sit sine accusatione damnare, quia Dominus Judam cum fur esset, non eiecit: Apostolus tamen cognito Cerinthi opere, eum de cætu fraternitatis eiecit. Omnes enim sciebant, crimen eius, publicè nouercam loco uxoris habebat: in qua re nec opus erat testibus, nec aliqua tergiversatione tegi poterat crimen.* Vides quantum inter occultum, quale Judæ fuit, & manifestum quale Cerinthi, crimen interfit. An verò inficiari poteris crimen tuum non fuisse notorium? qui palam criminofum & sacrilegum Sigismundum in crimen confovebas, qui in elusionem Ecclesiasticæ distictionis daninatam appellationem emiseras, qui eam ipsam per urbes, oppida, plateas & vicos palam iactitabas. Nec verò calumnieris, id non permanentis facti fuisse notorium. Non enim distat evidentia facti ab eo, qui in publico opere, & quidem participatione continua criminis suum etiam reatum publicè confitetur, & (quod deterius est) Dæmonum imitando duritiem iure factum esse contendit, quod publicis sanctionibus nouerit esse damnatum. Verum ut intelligas te omnino non sapere, & vix prima legum & Canonum rudimenta gustasse, intellige quæ vel, omnino nescis, vel te scire dissimulas. Inter modernos veteresque juris interpretes fuit sæpe tractatum, an in re notoria, de qua Canones, loquuntur, sit præmittenda citatio? In quo quidem inter notorium & manifestum iuris, & notorium facti distinxerunt: Omnes tamen in eam sententiam conueniunt, ut si tale sit factum & tam manifestum, ut nulla ad eius probationem indagine opus esse videatur, nec possit aliqua tergiversatione cælari, contra quod nec ulla competere possit defensio, quia id criminofus agat, quod iam constat esse damnatum, nullam exigi citationem. Pro quo expressi Canones allegantur, quos tu nisi inscitiam tuam fateri volueris, ipse comperies. Rursus & id conuenit inter eos, quod ubi apud iudicem & in iudicis conspectu delinquitur, potest is quidem id mox damnare, ac plectere delinquentem minimè citatum. At in te quis negare potest utrumque concurrere, qui non solum factum dam-



damnatum vetitæ appellationis palam admiseras, verum in iudicem & iudicis præsentiam plus quàm notoriè deliqueras; qui in Pontificis curia funestas schedulas appellationum in basilicarum foribus platearumque porticibus appendi curaveras?

Verum ne tibi inter opinionum varietatem contentionis relinquatur occasio, aliud tuæ garrulitati responsum opponamus, quod te scio toruo oculo & elato supercilio auditurum. Disce miser, inter principalem & priuatum multum distare iudicandi potestatem. Formam iudiciorum cæteris esse præfixam, ad temeraria coercenda iudicia. Principem verò legibus solutum formæ non subiici: atque proinde quicquid censeatur in aliis, tamen liberè atque intrepidè confitendum processum atque sententiam Pontificis summi in notoriis absque citatione valere, præsertim ubi notorietas ipsa resurgit ex his, quæ acta sunt coram eo. Hac non nostra, sed probatissimorum Jurisconsultorum verba sunt, quorum in scholis & iudiis grauissima fuit auctoritas atque sententia. Attende simile aliquid in iure scripto, reperiēs testamentum, quod exactam scrupulosamque sollemnitate exigit, ex Principis præsentia sine ulla obseruatione vires assumere, propter principalem præsentiam cuncta suppletent, quæ formæ à lege introductæ non subditur. Ex hac quidem auctoritate Gelasius Papa Silla nos in ius non vocatos, ob notorium proprii antistitis parricidium damnauit. Innocentius III. electionem Philippi ad imperium, Henrici persecutoris Ecclesiæ stirpe progeniti, licet non citati, ob notorium defectum iure dicit improbatam. Innocentius IV. Clericos, qui Friderico fatali Ecclesiæ hosti adhæserant. Clemens IV. auctores cædis Silvani Episcopi, & idem eos, qui Conradino paruerunt, anathematis mucrone & temporalium multatione damnauit: sicut nos vel ex Canonibus, vel ex Pontificum gestis agnouimus, quæ si quis curiosius perscrutetur, exempla plura reperiet. Scio te in clamaturum, & more, quo soles cuncta censere, dicturum, *ad adulationem Pontificum ista præscripta.* Verum quis loquacitati tuæ plura tribuet, quàm probatissimis Juris consultis?

At nunc missa omnia priora faciamus. Tu qui tibi utriusque iuris vendicæ principatum, tuam aliquando inscitiam (ne dicam ruditatem) agnosce, atque intellige, te aristas tantum in studiis messuisse. Nonne intelligis permagni referre, an de crimine contra quempiam inquiratur, ut damnetur, vel tantum declaratur, aliquem sub facto damnatum in poenam à jure aut statuto promulgatam incidisse. Non enim aliquid noui facit, qui declarat, non damnat, non pronuntiat, sed aliquem in poenam iam legis constitutione irrogatam incidisse denuntiat. In quo casu constat, non exigere citationem, cum non sententiam ferre, sed magis sententiam à iure latam iudex exequi videatur. Quod usque adeo tenuere Doctores, ut censuerint excommunicatum siue monitioni subditum eo casu, quo à jure vel statuto excommunicatus apparet, non incurrere poenam à Canonibus inflictam. Hoc iuris interpretes constanter affirmant: quos si forte non legeris, tuam ignorantiam fateare; si verò legisti, dolum atque perfidiam confiteri necesse est, qui generalibus vulgatisque etiam apud pueros diuini testimonii exemplis odium & inuidiam Romano Pontifici concitare voluisti. Jam igitur obtrektor absolue te ab hoc nexu, si potes. Pridem fuerat generali constitutione sancitum, & quidem æquissimè, ut infra subdemus: *Ne quis in elusionem ecclesiastica censura ad futurum Concilium, sub poena anathematis & læsæ Maiestatis, appellaret.* Appellasti, & quidem notoriè, & appellationem etiam palam non tam insinuare quam inculcare curasti. Declarat te Pontifex pro eo, quod damnatum iam facinus admisisti, in spirituales ac temporales poenas à lege inflictas incidisse. Quid habes, quod conqueraris? quid quod detesteris, quid quod inclames diuina & humana iura violata? te non citatum, ob illa quæ non solum publicè confiteris, sed tumentibus buccis in cœtu Principum te fecisse gloriaris. Satis superque, satis te blasphemix & procacitatis arguimus, & obiectam diuini iuris violati calumniam confutauimus utriusque Testamenti exemplis. Ostendimus facinorosos homines pro manifestis criminibus sine ullo iudiciario ordine potuisse damnari. & probauimus,



mus, delictum tuum omnibus fuisse notorium in conspectu summi iudicis & contemptum Apostolicæ Maiestatis admissum: ab eo prolatum esse iudicium, qui supra ius constitutus iuris ordini & formæ non subditur. Postremò, non ab homine neque per hominem, sed ex lege & per legem, merito tuæ iniquitatis te fuisse damnatum. Superest, ut reliquas inuectivarum tuarum partes percurrentes, non solum procacem te atque maledicum, sed etiam hæreticum & infidelem, ex ipsis tuis sermonibus conuincamus.

Prosequamur igitur reliqua, & ne nos carpendi studio aliquid confingere suspicetur, ipsa prout locutus es, verba proponamus. *Quam tenuem, inquit, telam exorsus, quam debilem textit rationem, queso videte. Saluator, inquit, noster Petrum Apostolorum principem ad gubernationem Ecclesiæ substituit, &c. Quis ignorat omnibus Apostolis à Jesu esse præceptum, ut eant in orbem prædicaturi fidem, baptismum & salutem? Quis nescit passim omnibus esse promissum, ligatum in cælis quod ipsi ligarent in terris, & solutum esse quod soluerent. Sed quod Cephæ singulariter dictum est, Tibi dabo claves cælorum, hoc ait Hieronymus esse factum, ut schismatis tolleretur occasio. Et Ambrosius in suo Pastoralis dicit: Quod ne dum Petro trina rogatione interrogato, an amaret, ac trina responsione subsequente, amare se teste ipso interrogatore Jesu, traditas sibi esse claves, sed omnibus ipsis contraditas, Apostolosque post ascensionem Domini conuenisse, ac Petrum sibi Principem constituisse, & Antiochiæ in cathedra collocasse referuntur. Nihil tamen de potestate uniuersis Apostolis à Salvatore data, ipsorum omnium uniuersali missione diminuerunt. Ergo & hodie exorat Ecclesia Catholica, sese per Apostolos ipsos continua protectione custodiri, quos Saluator ipse vicarios tanti operis constituit præesse Pastores. Horum legitimos successores constat esse uniuersalia Concilia, Christianæ fidei fundamenta, quæ Pontificum actiones pro tempore saluberrimis doctrinis instruxerunt, errores emendarunt. De quibus summus ille Pontifex Gregorius scribit: Quisquis illa destruere tentaret, seipsum destruit. Sed quorsum hæc? Eo certè pertingunt, ut conuellatur illa superstitio, in qua Pius Papa factionibus Cardinalis Cusani astruit, Concilium supra Papam non esse, dum dicit, (ut eius verbis utar) ad futurum Concilium appellari non posse, quod supra Christi vicarium esse nequit. Videte ergo quam vim consilii exsortem Papa inferre tentauit. Nam si omnes Apostoli sunt missi à Domino Jesu, dicente illis; ite in orbem, quodcumque ligaueritis &c. quos constat postea conciliariter congregatos, ac ipsum Cephæ in messem Domini misisse, quis dubitat Concilia sacra vicem Christi gerere, quæ cæui Apostolico successisse comprobantur, siquidem orbis maior est urbe. Hæc sunt illius portenta verborum. Miror profectò, cum apud Aurelium Augustinum legerim, nullam falsam esse doctrinam, quæ non aliqua vera permisceat, Gregorium in tantam prolapsum esse vāsaniam, ut breui verborum serie pene quasi plura expresse-rit vitia, quàm verba: sicut quisque facile percipere potest. In ipso namque sermonis huius exordio pariter Apostolis Ecclesiam fuisse commissam, ex missionis, Baptismi ac prædicationis communione coniecat, ipsosque in traditione clauium parem potestatem accepisse profitetur. Tum verò ob hoc uni singulariter claves esse permissas, ut schismatis tollatur occasio, Apostolum Petrum apostolica & humana institutione Cathedram & prælationem accepisse. Et ne dubium relinqueretur ex præmissis, primatum Petri negasse, etiam veterum hæreticorum ab arcanis usque depromptum de missione Petri argumentum inducit, innuens maiorem misso esse mittentem. Inde transuolans ad alia, ut quem singulis æquauerat Apostolis, in unum collectis ostenderet fuisse minorem, uniuersalia Concilia (ut ineptiis suis utar) Apostolorum dicit legitimos successores. Quorum auctoritatem extollens tria planè infert ridicula: Concilia Christianæ fidei fundamenta, Pontificum actiones instruxisse, & errata correxisse, eadem vicem Christi gerere, & ab illo potestatem accipere, ac propterea Petro illiusque successoribus superiora esse contendit.*

Sequamur ordinem propositionum suarum, veniam (ut opinamur) à legentibus impetraturi, si paulò altius principia repetentes, sermonem longius protendamus.



mus. Neceſſe eſt enim, ut vana procacitas, quæ ſibi non legum tantum & Canonum, ſed omnium diuinarum atque humanarum rerum arrogat ſapientiam, non diuinis ſolum atque humanis testimoniis, ſed ex ipsis quoque naturæ principiis reuincatur, ut iuxta Apoſtolum ſe euanuiſſe in cogitationibus ſuis & obſeruatum inſipiens cor eius agnoſcat, qui cum dixerit ſe ſapientem, ſtultum ſe factum intelligat. Credere te Gregori arbitramur, Eccleſiam Chriſti, quæ in hoc mundo peregrinatur ex fide uiuens, aliquo ordine eſſe diſtinctam, utpote ab eo conſtitutam, cuius perfectæ ſunt opera, quique hanc legem naturæ indidit, ut infima ſummis, ſumma infimis per media copulentur, qui ordinem coelis ac terris dedit. Nam cum dicat Apoſtolus; *Quæ à Deo ſunt eſſe ordinata*, aut Eccleſiam ex Deo non eſſe, aut ab illo ordinatam eſſe oportet: præſertim cum illam Spiritus ſanctus vocet in Canticis, *Caſtrorum aciem ordinatam*, & ſuperiori Hierarchiæ dicatur exemplata diuinitus, in qua (ut ſcribit Gregorius,) cœleſtium militiarum exempla nos inſtruunt. Quia dum ſunt Angeli & Archangeli, liquet non eſſe æquales, ſed ordine & poteſtate diſcretos. Nec enim uniuerſitas poſſet alia ratione ſubſiſtere, niſi huiusmodi magnus eam talis, qua totum corpus ſanum ſit, & quæque organa ſuis fungantur officiis, differentiæ ordo ſeruaret. Porro ſi ordinem non diſſiteris, magis ex naturæ principiis, quibus tamen per omnia non in uno ſolo, quod præoptas, non ſolum ex diuina inſtitutione, ſed ex ipsis quoque naturæ principiis, cuiusvis politiæ recto regimine unum caput, unius eccleſiaſtici corporis, unum Principem ſanctæ ciuitatis, unum Monarcham eccleſiaſtica Hierarchiæ, unum Paſtorem dominici gregis atque ovilis in terris fateare neceſſe eſt. Nam cum omnis ordo ſit multorum in gradibus differentium, & id ipſum ſit ſecundum prælationem & ſubiectionem, ad unum tantum deueniri neceſſe eſt, in quo finis ſtatusque conſiſtat, ut euitetur infinitas: quem ſupremum in Eccleſia Principem atque Rectorem eſſe conſtat, in quo & ex quo totius Eccleſiæ poteſtas & ſtatus. Ubi enim unitas, ibi perfectio: reliqui numeri perfectionem non habent, ſed diuiſiones ab unitate recedentes. Porro ut Aurelius Auguſt: ait, *Multis præponitur unum. Non enim à multis unum, ſed multa ab uno.* Cæterum nemo tam iniquus exiſtimator eſſe poteſt, ut regimen Eccleſiæ minus ordinatum eſſe credat, quàm naturæ: cum gratia ſupergrediatur ſuperetque naturam. Quod ſi in his, quæ à natura ſunt, omne regimen naturale ad unum dirigitur principale, quod regit, ut in corpore multa membra uarietate compacta unius capitis ſumunt influxum, & de fonte uno riui plurimi deſluunt, & multi arboris rami ad unum ſtipitem reducuntur, & multi ſtipites una radice figuntur, & inferioris corporis motus uno primo mobili mouetur & regitur, quis non credat, Eccleſiam diuerſis gradibus in unum Chriſti corpus unitam, uno in terris capite gubernari? Præſertim cum dicat Propheta: *Congregabuntur filii Judæ & filii Iſraël pariter, ut ponant ſibi caput unum.* Probat autem ratio finis, qui pax eſt, & unitas ſubditorum, quæ quidem niſi ab uno & per unum conſiſtere rectè non poſſet. Ad hoc enim diuina prouidentia gradus & ordines conſtituit eſſe diſtinctos, ut ex reuerentia inferioris ad caput, vera concordia fieret, & ex diuerſitate contextio, & rectè officiorum gereretur adminiſtratio ſingulorum. Quod etiam Philoſophorum Princeps in Metaphyſicis recognouit, dicens: *Entia nolle male diſponi. Pluralitatem principatum malam.* Neceſſario igitur unum Principem eſſe, fatendum. *Natura enim principiorum amat ſingularitatem*, ut beatus Auguſtinus ait: Ita ut ipſius ſingularis principatus bonum etiam quibusdam ingerat animantibus, ut in apibus unus principetur. Et ſicut beatus quoque Hieronymus ait, grues unam ſequuntur ordine literario. Hoc nobis repræſentat ad Moysen de figura cœleſtis hierarchiæ diuina præceptio dicens: *Omnia fac ſecundum exemplar tibi in monte monſtratum.* Et viſio Ioannis in Apocalypſi reuelata, qui ciuitatem ſanctam Ieruſalem nouam deſcendentem de cœlo ſe vidiffe perhibuit: quam figuram clarus ille Doctör, Claræuallis Abbas eximius Bernardus exponit, dicens: *Non uilis putanda eſt forma terreſtris Ieruſalem, quæ formam habet à cœlo, ut ſicut*



ibi Seraphim & Cherubin & ceteri ordines sub uno capite Deo, ita & hic Patriarchæ, Archiepiscopi & reliqui sub uno summo Pontifice. Hoc denique ratio unitatis insinuat, ut unius corporis unum caput necessario prædicetur. Nam si secundum Apostolum unum corpus multi sumus, & unam esse Ecclesiam Spiritus sancti in Canticis, consequens est, quod beatus ac facundissimus Martyr Cyprianus ait, cuius verba tuam de parilitate Apostolorum hæresin transfodiunt atque confundunt: Inquit Dominus ad Petrum: Ego dico tibi quia tu es Petrus, & super hanc petram edificabo Ecclesiam meam. Super unum edificabo Ecclesiam. Et quamvis omnibus Apostolis post resurrectionem parem potestatem tribuat, dicens: Sicut me misit Pater, & ego mitto vos, accipite Spiritum sanctum. Tamen ut unitatem manifestaret, unitatis eiusdem originem ab uno incipientem sua auctoritate disposuit. Et post pauca: Exordium ab unitate proficiscitur, ut Ecclesia Christi una monstraretur, quoniam unam Ecclesiam Spiritus sanctus in Cantico Canticorum ex persona Christi designat, & dicit: Una est columba mea, perfecta mea, una est matris sue filia, electa genitricis. Hoc denique Christi institutio nobis insinuat, qui velut pastor bonus oves errantes collecturus aduenerat, & unitatem nobis ostendens de diuina auctoritate venientem, ait: Ego & Pater secundum diuinitatem unum sumus. Ad quam unitatem redigens Ecclesiam suam, dicit: Erit unum ovile & unus pastor. Qui cum in tantum dilexisset Ecclesiam, ut propter nimiam charitatem sanguinem suum profuderit, nusquam putandus est illi in necessariis defuisse. Cum & de Synagoga per Isaiam ipse prædixisset: Quid ultra facere debui vinea mea, & non feci? de fuisset utique, si ascensurus ad Patrem, & corporalem præsentiam suis fidelibus subtrahatur aliquem non substituisset, qui vice sua uniuersali Ecclesiæ præsideret, & cum illa visibiliter versaretur, ac uniuersa Rectoris impleveret officia. Ne ergo ullo munere illi deesset, ipsius curam Apostolorum Principi Petro commisit, qui suæ fidei stabilitate cæteros in Christiana religione firmaret. Propter quod illum ante passionem gregem sibi commendans: Pasce, inquit, oves meas. Quæ uerba exponens Bernhardus præclarus Doctor Ecclesiæ, in opere insigni, quod ad Eugenium Papam de consideratione conscripsit: Sunt inquit, quidam & alii cælijanitores, & gregum pastores: sed tu tanto gloriosius, quanto & differentius præ cæteris nomen hereditasti. Habent illi sibi assignatos greges, singuli singulos, tibi uniuersi assignantur. Nec modo ovium, sed & Pastorum tu unus omnium Pastor. Unde probem quæris? Si me amas, Petre, pasce oves meas. Quas? Illius vel illius populi, ciuitatis, aut regionis, aut certi regni? Oves meas, inquit. Cui non planum est, non designasse aliquas, sed designasse omnes. Nihil excipitur, ubi distinguitur nihil. Et forte præsentibus & cæteri discipuli erant, cum committens uni unitatem omnibus commendaret in uno grege & uno pastore, secundum illud: Una est columba mea, formosa mea, perfecta mea. Ubi unitas, ibi perfectio. Et post pauca: Inde est, quod alii singuli singulas sortiti sunt plebes, scientes Sacramentum. Denique Jacobus, qui videbatur columna Ecclesiæ, una contentus est Hierosolyma, Petro uniuersitatem credens. Pulchrè verò ibi positus est suscitare semen fratris defuncti, ubi occisus est ille: nam dictus est frater Domini. Petro cedente Domini fratre, quis se alter ingerat Petri prerogative? Ergo (juxta Canones tuos) alii in partem sollicitudinis, tu in plenitudinem vocatus es potestatis. Aliorum potestas certis arctatur limitibus, tua extenditur & in ipsos, qui super alios potestatem acceperunt. Audis igitur, quæ Doctor eximius loquitur, ex quo discere potuisti, Petri potestatem à cæteris Apostolis & uniuersitate & prælatione discretam: cum illi singulis, iste uniuersis plebibus & ipsis quoque Apostolis, (quos ex ovibus Christi, & Petro commendatas fuisse nemo ambigit, prælatus extiterit. Scio te frontem contracturum, & (sicut assoles) nos Horatiano sale decifurum atque dicturum: Troianum gemino bellum ordiris ab ovo.

Sed tua nos coëgit impudentia, qui coruscante Evangelio, & totiens in confortibus tuis damnatis hæreticis, singularem Petri in uniuersalem Ecclesiam potestatem diffitentibus, tu eandem palam ingerere & refutare curasti. Audi igitur vel inuitus, quos prædictus Doctor ex Evangelio typos annectit, quos recensendos



fendos existimo, quo magis confutetur tua insania. Accipe, (inquam) illud, quod nihil ominis id ipsum confirmatur. *Discipuli navigabant, & Dominus apparebat in littore, quodque jucundius erat in corpore rediit.* Sciens Petrus quia Dominus est, in mare se misit, & sic venit ad ipsum, aliis nauigio peruenientibus. Quid istud? Nempe signum singulorum Pontificatus Petri, per quod non nauim unam, ut ceteri quisque suam, sed seculum ipsum suscepit gubernandum. Mare enim seculum, & naues Ecclesie. Inde est, quam altera vice instar Domini gradientis super aquas, unicum se Christi vicarium designauit, qui non uni populo, sed cunctis præesse debet. Siquidem aquæ multæ populi multi. Ita cum quisque ceterorum habeat suam, tibi una commissæ est grandissima nauis, facta ex omnibus ipsa uniuersalis Ecclesia toto orbe diffusa.

Cum igitur superiorum omnium ratio deducta concludat singularem Petri in uniuersalem Ecclesiam potestatem, quæ & in naturis ostenditur, in cælo exemplificatur, in operibus typicè demonstratur, & in toto corpore mystico obseruatur, & in lege diuina ac Euangelio commendatur: Tu tamen, uirorum acutissime, ausus es quibusdam uerborum strophis illam parilem ceteris Apostolis iudicare, atque ex humana magis quam diuina institutione, vel ab Apostolis sine imminutione propriæ potestatis, vel consensu Ecclesiæ in remedium schismatis, attributam asserere: illud in tui erroris argumentum adducens, quod ceteris quoque Apostolis clauæ, (ut tuis utar uerbis) *contradite fuerint.* Ad quod licet per superiora monstraui, ita reliquis traditas clauæ, ut tamen Petro præ omnibus, & pro omnibus ante tradiderit, ita à se petra Petri nomen indicens, & in illo huius muneris Sacramentum imponens, ut non nisi per Petrum uelut à capite in eos sit deriuata potestas, eaque non uniuersaliter sed certis coartata limitibus, trium tamen sanctorum Patrum super ea re visum est tibi explicare sententias, ut eorum mentes ædificent, quos forte uerborum tuorum virus infecit. Possemus quidem infinita congerere; sed cui pauca non sufficiunt, nec multa proficiunt. Primus igitur excitetur beatus Martyr Anacletus, vicinus Apostolorum, atque ipsius Petri successor: qui tuæ respondens insaniæ, in decretali Epistola ita præfatur: *Sacrosancta Romana Ecclesia & Apostolica, non ab Apostolis, sed ab ipso Salvatore primatum obtinuit, sicut beato Apostolo dixit: Tu es Petrus.* Et post aliqua: *Inter beatos Apostolos quedam fuit discretio potestatis, & licet omnes essent Apostoli, Petro tamen concessum est à Domino, & ipsi inter se uoluerunt id ipsum, ut reliquis omnibus præesset Apostolis, & Cephas, id est, caput & principium teneret Apostolatus.* Exsurgat & Canonis lator, ueritatis præco, Leo Papa in Canone dicens: *Ita Dominus noster Iesus Christus humani generis Saluator instituit, ut ueritas, quæ antea legis & Prophetarum præconio continebatur, per Apostolicam tubam in salutem uniuersitatis exiret, sicut scriptum est: In omnem terram exiuit sonus eorum, & in fines terræ uerba eorum.* Sed huius muneris Sacramentum ita Dominus ad omnium Apostolorum officium pertinere uoluit, ut in beatissimo Petro Apostolorum omnium summum principatum collocaret, ut ab ipso quasi quodam capite dona sua uelut in corpus omne diffunderet, ut exsortem se ministerii intelligeret esse diuini, qui ausus fuisset à Petri soliditate recedere. Hunc enim in consortium indiuiduæ unitatis assumptum, quod erat ipse, Dominus uoluit nominari, dicendo: *Tu es Petrus, & super hanc petram ædificabo Ecclesiam meam, ut æterni templi ædificatio mirabili munere gratiæ Dei in Petri soliditate existeret, hanc Ecclesiam suam etiam corroborans firmitate, ut illam nec humana temeritas posset appetere, nec portæ inferi contra illam præualerent.* Et continuo, quasi Gregorium hæreticum & blasphemum spiritu præuidens, adiecit: *Verum hanc petram istius sacratissimæ firmitatem Deo (ut diximus) ædificante constructam, nimis impia uult præsumptione violare, quisquis eius potestatem tentat infringere, id quod accepit à ueteribus non sequendo.* Clangat nunc tuba Euangelii, tuba (inquam) sacerdotalis, qua clangente sicut olim muri Hiericho, ita Nestoriana atque Eutychiana propugnacula corruerunt. Magnus ille Leo, quem Chalcedonensis Synodus columnam fidei, Oecumenicum atque Apostolicum acclamauit, cuius auctoritati Canon



tantum attribuit, ut si quis eius dicta usque ad iotam scrutari voluerit, & non in omnibus reuerenter receperit, anathema sit: is ergo in sermone de ordinatione sua, de primatu Petri sic loquitur: *Utile ac dignum est, ad beatissimi Apostoli Petri gloriam contemplandam aciem mentis attollere, qui ab ipso omnium Chrismatum fonte tam copiosis est irrigationibus inundatus, ut cum multa solus acceperit, nihil iniquumquam sine illius participatione transierit.* Et iterum in eadem: *De toto mundo unus Petrus eligitur, qui & uniuersarum gentium vocationi, & omnibus Apostolis, cunctisque Ecclesie partibus preponatur; ut quamuis in populo DEI multi Sacerdotes sunt, multique Pastores, omnes tamen regat Petrus, quos principaliter regit Christus.* Magnum & mirabile huic viro consortium potentie sue tribuit diuina dignatio, ut sic quod cum eo commune ceteris voluit esse Principibus, nunquam nisi per ipsum dedit, quicumque aliis non negauit. Et post pauca: *Ego dico tibi, quia tu es Petrus: hoc est, sicut tibi Pater meus manifestauit diuinitatem meam, ita & ego tibi notam facio excellentiam tuam, quia tu es Petrus, id est, cum ego sim immobilis petra, ego lapis angularis, qui facio utraque unum, ego fundamentum prater quod nemo potest aliud ponere: tum tu quoque petra es, quia mea virtute solidaris, ut quae mihi potestate sunt propria, sint tibi participatione communia.* Et alibi: *Tibi dabo clauces regni caelorum, & quaecumque ligaueris &c.* Transiit quidem & in alios Apostolos ius potestatis istius, & ad omnes Ecclesie principes decreti huius constitutio commigravit. Sed non frustra uni commendatur, quod omnibus intimatur. Petro ideo singulariter hoc creditur, quia cunctis Ecclesie Relectoribus Petri forma proponitur. Quid ergo hoc testimonio firmitus, quid hac assertione stabilius esse potest? Et post haec tanta testimonia non erubescit insaniens, paritatem in Apostolis potestatis atque iurisdictionis asserere, & in augmentum sui erroris etiam impia veterum haereticorum argumenta non veretur congerere. Sic enim in superioribus dixit: *Apostolos conciliariter congregatos, & ipsum Cepham in messem Domini transmississe, quasi superioritatem ex missionis autoritate pronuntians.* Hoc idem pronuntians argumentabatur impius Arrius, adstruens in diuinis personis inaequalitatem subesse, pro eo quod *Filius & Spiritus sanctus mitti dicuntur.* Ignorabat quippe, quod tu quoque ignoras, aut ignorare te simulas, triplicem missionis modum, vel secundum autoritatis imperium, prout Dominus seruum emittit, vel secundum originem, prout florem arbor producit (ex quo sensu *missio* licet sublimius atque ineffabilius dicitur in diuinis) vel secundum consilium, prout Consilarii Regem mittere dicuntur ad bellum, cum tamen cunctorum ipse sit Dominus. Adicere nos possumus missionem secundum amorem. His duobus extremis modis Samariam ab Apostolis missus est Petrus, consilio quidem illorum atque suasu, & amore eorum, ad quos mittebatur impulsus, cum inter Apostolos maiori auctoritate atque miraculorum gratia coruscaret. Haec quidem dicimus damnantes sermones tuos: neque enim aliam Petri in messem Domini legimus missionem. Nam si forte Romam Petrum ex Antiochia a reliquis Apostolis asseris transmissum fuisse, quam te continuo mendacii falsitatisque conuincat Eusebius Caesariensis historiae Ecclesiasticae scriptor illustris, Marcellus Papa ac Martyr insignis, & magnus ille Leo vir autoritatis incomparabilis qui diuina reuelatione & Dei instinctu ad oppugnandum Simonem Magum testantur esse profectum. Sic namque secundo Ecclesiasticae historiae libro testatur: *In ipsis Claudii temporibus diuinam clementiam probatissimum omnium Apostolorum, & maximum fidei magnificentia meritoque virtutis Principem, Petrum ad urbem Romam velut aduersum humani generis perniciem communem deduxisse.* Marcellus quoque beatissimus, scribens uniuersis Episcopis per Antiochiae constitutis prouinciam, in haec verba consentit: *Rogamus vos dilectissimi, ut non aliud doceatis, quam quod a beato Petro & a reliquis Apostolis accepistis.* Ipse enim est caput totius Ecclesiae, cuius sedes primitus apud vos fuit, quae postea iubente Domino Romam translata est. Leo quoque ad Petrum dirigens sermonem ita testatur: *Jam Antiochenam Ecclesiam (ubi primum Christiani nominis dignitas exorta) fundaueras, iam Pontum, Galatiam, Cappadociam, Asiam atque Bithyniam legibus Euangelicae praedicationis*



cationis impleueras. Nec aut dubius de prouentu operum, aut de spatio tua ignarus etatis, trophæum crucis Christi Romanis arcibus inferebas. Quodque diuinis præparationibus anteibant & honor potestatis & gloria passionis, meritò dixit, diuina præordinatione id ante fuisse statutum, in quantum per Isaïam antea fuerat prophetatum, urbem Romam orbis caput iugo Christi per Apostolorum Petri & Pauli prædicationem subigendam. Sic enim prophetauerat: *Ciuitatem sublimem humiliabit & conculcabit eam pes pauperum*, scilicet Christi, & egenorum, id est Apostolorum Petri & Pauli, ut sacri exposuere Doctores. Cui sententiæ adstipulatur & beatus Ambrosius Doctor, diuinitus institutum fuisse confirmans, *ut in urbe Romana, que caput obtinet Nationum, uno die & sub uno persecutore Apostolorum Principes paterentur, & ubi erat caput superstitionis, illic caput quiesceret Sanctitatis: & ubi gentilium principes habitabant, illic Ecclesiæ principes morarentur.*

Vides ergo, qui aliis obiiciebas, *tenuem telam esse contextam*, te nec tenuem quidem vanissimis argumentationibus texere potuisse, sed cum ad huc ordiretur, præcisam esse. Somniasti namque Petrum conciliariter fuisse transmissum: cum in Apostolico Concilio Petrus primus sententiam tulisse legatur: nec ipsum ab Apostolis & senioribus tunc convenientibus Antiochiam missum, sed Barnabam & Sillam sacra Apostolorum actuum testetur historia. Ex Chrysippi aut Theophrasti te credo acumine argumenta talia mutuatum: ex quo genere illud dici potest, ut arguas Ecclesiam non uni capiti, sed omnibus pariter Apostolis fuisse commissam, pro eo quod *hodie usque oret Ecclesia, eorum protectione defendi.* Quod si ita est, nullum ordinem mansionum, nullam graduum differentiam arguamus in cœlis: cum Ecclesia per singulas horas in communi commemoratione Dominum deprecetur, ut *quorum merita recolit, eorum sentiat patrocinia.* Ergo iam stella à stella non differet in claritate, & falsa diuersitas mansionum in cœlo in Euangelio repromittitur. Illud verò qualis impudentiæ? ut beatum Petrum ab Apostolis Principem constitutum sine propriæ imminutione potestatis asseueret, ex ipso constitutionis verbo Petri primatum ex Apostolica magis quàm diuina institutione manasse significat? ac si coetus aliquis aut collegium Prælatus sibi præficeret. Improbissimè hæreticorum, quis ista te docuit? Cum omnes verè Euangelii textus Apostolorum electione, inter quos Petrus non uocatione, sed dignitate dictus est primus, usque ad ascensum Domini Saluatoris, Petri principatum aut promissum, aut figuratum, aut redditum eloquatur, ubi omnium cura immediate committitur, *Pasce oues meas.* Quo verbo, ut beatus Chrysostomus scribit, signanter expressit, *Loco mei præpositus, & caput esto fratrum tuorum.* Nonne hæresin tuam disertissime Nicolaus confutat in Canone dicens: *Non qualibet terrena sapientia, sed illud verbum, quo constructum est cœlum & terra, per quod omnia condita sunt elementa, Romanam fundauit Ecclesiam, cuius priuilegium ab ipso summo capite Ecclesiarum traditum, qui auferre conatur, hic procul dubio in hæresin labitur.* Et eadem de Conciliis, à quibus quidam temere prælationem Ecclesiæ Romanæ concessam asseuerabant, testatur beatus Pelagius dicens: *Quamuis uniuersæ per orbem Catholice institutæ Ecclesiæ unius thalamus Christi sunt, tamen sancta Romana Ecclesia Catholica Apostolica nullis Synodicis constitutis cæteris Ecclesiis prælata est, sed Euangelica voce Domini & Saluatoris primatum obtinuit.*

Patet igitur, Apostolos non instituisse Petri primatum, sed Dominicæ atque Evangelicæ institutionis, quam noverant executos, illi humiliter detulisse. Sicut beatus Anacletus in Canone, *Licet, inquit, omnes essent Apostoli, Petro tamen concessum est à Domino, & ipsi inter se voluerunt id ipsum, ut reliquis omnibus præset Apostolis.* Notandum verò, quam fallaciter beati Hieronymi testimonium inducat, ut asserat uni ad schisma submovendum singulariter clauis Ecclesiæ permissas, id est, quasi hæc sola fuerit diuini altitudo consilii, Petrum præficere, ut scandala submoueret. Non illi satis est hæreticum esse, nisi probatissimo omnium Catholicorum tractatorum similem notam, infligat. Audi miser, quid Hieronymus sentiat,



hoc nempe quod cæteri, & quod ex illius auctoritate Glossa ordinaria scribit super Matthæum : *Specialiter Petro claves concessit, ut ad unitatem nos inuitaret. Ideo enim Principem Apostolorum constituit, ut Ecclesia haberet unum principalem Christi vicarium, ad quem diversa Christi membra recurrerent, si fortè inter se dissentirent. Quod si diversa forent in Ecclesia capita, unitatis vincula rumperentur.* Nonne & tibi videtur, & unitatis causam, & fidei conuenientiam, & in vicariatu Christi plenitudinem potestatis & mystici corporis caput contra caput schismatis breui verborum serie coniunxisse? Si id tibi non sufficit, & Hieronymi de primatu Petri vis plenius nosse sententiam, ex aliis mutuare codicibus. Sed videbis in Commentariis super Matthæum dicentem; *Simonem propter fidem in petram Christum, Petri sortitum esse vocabulum: ac secundum metaphoram illi dictum, Ædificabo Ecclesiam meam: in quo manifestè primatus ipsius super totam Ecclesiam designatur.* Intuere eundem scribentem ad Terentium, de vera circumcissione, & Noui Testamenti Patres Patribus veteribus comparantem, Petrum Apostolum Abrahæ præferentem, ut sicut illi generatio larga promittitur, ita huic generatio pascenda traditur, & cum ab illo iustificando procedant, in hoc iustificato fundantur. Et multa percurrens, Petrum dominici gregis Pastorem, Ecclesiæ fundamentum, Apostolorum verticem clarissimè profitetur. Lege rursus hæretice, quemadmodum apud Petri successorem Damasum fidem exponat? Ego: inquit, nullum primum nisi Petrum sequens, beatitudini tuæ, id est, cathedræ Petri communicando consortio, super illam petram fundatam Ecclesiam scio. Quicumque extra hanc domum agnum comederit prophanus est à lege. Iterum cum in libro Virorum illustrium tantum auctoritatis Petro attribueret, ut ab eo consummatum Evangelium esset testetur, scripsit, inquit, Marcus Evangelium Romanis, rogatus à fratribus: quod cum Petrus audisset, probavit, & Ecclesiæ legendum sua auctoritate dedit. Ad quod Clementis etiam Papæ inducit testimonium. Audi denique illum ad Augustinum de Cap. ad Galatas differentem, tantum Petro tribuere, ut super illo, *Ascendi autem secundum revelationem & exposui eis Evangelium*, dicat, Paulum hisce ipsis verbis ostendere, non habuisse securitatem Evangelii prædicandi, nisi Petri & eorum, qui cum eo erant, fuisset sententia roboratum? Talia legens aut audiens de fine Catholico, desine hæreticorum prosecutioni tuæ participationis inferre calumniam. Quæ est enim societas lucis & tenebrarum, conuentio Christi ad Belial, quæ pars fidelis tecum, hominum perfidissime? Alterum rectius Hieronymum pro simili errore Constantiæ damnatum allegare debueras, si tibi credi volebas. Nam de beatissimo viro, quod minus recte de Ecclesiæ institutione senserit, refugiunt aures Catholicorum audire.

Et quoniam beato quoque Ambrosio similem tentasti inferre calumniam, cum illum Pastoralis dixisse refert, *omnibus Apostolis claves una fuisse contraditas*, disce miser illum ita affirmare claves Apostolis pariter esse contraditas, ut tamen intelligat Petrum præ omnibus & pro omnibus claves regni cælorum accepisse: ut & unitas & prælatio demonstraretur in Petro. Quod ex ipsius scriptis in pluribus licet cognoscere, quibus illum fundamentum Ecclesiæ, totius dominici gregis pastorem esse commemorat: cuius prælatio typicè figuratur, cui naus regendi committitur, ut totius corporis Christianitatis compagem molemque contineat. Cogis nos de multis pauca proferre. Illustris ille Doctor in Commentariis super Lucam exponens eum locum, in quo Dominus in nauiculam Petri conscendisse perhibetur. *Non turbatur, inquit, naus quæ Petrum habet: turbatur illa quæ Judam habet.* Et post pauca: *Quemadmodum enim turbari poterit, cui præerat is, in quo fundamentum Ecclesiæ est.* Et deinde illius primatum in agnitione ac determinatione fidei attollens, ait: *Denique & aliis imperatur, ut laxent retia in capturam. Soli tamen Petro dicitur, dux in altum, hoc est, in profundum disputationum.* Quid enim tam altum, quam altitudinem diuinitatis videre, id est, scire Dei filium, & professionem diuinæ generationis assumere? Idem quoque de Apostolorum principibus Petro & Paulo, quod emineant inter uniuersos Apostolos, & peculiari quadam virtute præcellant, satis euidenter profert & omnibus notum testimonium, in quo-



rum Martyrio Romanæ Ecclesiæ primatum ac singularem indicat dignitatem, uno loco illos occubuisse perhibens, *ne alteri Roma deesset, atque in urbe quæ principatum & caput obtinet nationum, ut illic caput quiesceret sanctitatis.* Et reliqua leguntur in Canone, quæ principatum Apostolicæ sedis insinuant. De cuius principatus mystica in Evangelio figura alio loco sic loquitur: *Est aliud piscandi genus, quo genere solum Petrum dominus piscari iubet, dicens; mitte hamum, & eum piscem, qui primum ascenderit, tolle.* Ubi satis aperte demonstrat, per hamum intelligi iurisdictionem, qua Petrus præfuit uniuerfis. Denique ut nulla tibi relinquatur tergiversandi occasio, ac fatearis Ambrosium publicè esse testatum, Petrum totius fuisse gregis pastorem, qui firmamentum sit Ecclesiæ institutum, & non unius tantum partis, sed totius Christianitatis uelut mystici corporis compagem molemque continere, audi mihi hunc ipsum in Homilia apertius protestantem: *Maiorem, inquit, gratiam Petrus reperit, postquam fidem se perdidisse deflevit. Tanquam bonus enim pastor tuendum gregem accepit; ut is, qui sibi ante infirmus fuerat, fieret omnibus firmamentum, & qui interrogationis tentatione nutauerat, cæteros fidei stabilitate fundaret.* Denique pro soliditate elevationis Ecclesiarum Petra dicitur, eo quod prius in nationibus fidei fundamenta posuerit, & tanquam saxum immobile totius corporis Christianitatis compagem molemque contineat. Desine hæreticorum more truncata verba proferendo, tanti Præsulis calumniari sententias. Desine fidei ipsius puritati inferre calumniam: cuius omnes sententiæ (beato teste Hieronymo) fidei Ecclesiæ, & omnium virtutum firmæ sunt columnæ. Possẽ & aliorum sanctorum Patrum testimonia infinita congerere. Sed nimis præposterum videretur, in re tam perspicua, quam totus orbis profitetur & noscit, quasi in recenti controuersia exquirere testimonia: ut cum secundum humanas leges triginta annis præscribatur, primatus Petri post tot sæcula disputatione temeraria ventiletur. At Hieronymi & Ambrosii non alia de causa subiecimur, nisi ut eorum rectam Catholicamque sententiam proferentes, ad tuæ prauitatis robur de illorum auctoritate tibi non blandireris, & simpliciores quosque eorum consideratione non falleres.

Liquet igitur, te Orientalibus atque Bohemicis venenis imbutum talia protulisse, quæ Petri primatum eiusque super omnem Ecclesiam principatum negarunt. Qui quidem error tam detestabilis atque grauis est, ut eos sanctus Doctor Thomas de Aquino illis hæreticis comparauerit, qui Spiritum sanctum negant à Patre Filioque procedere. Quoniam sicut Christus Dei Filius Ecclesiam suam consecrat & consignat Spiritu sancto, quasi suo charactere & sigillo; ita Christi vicarius suo primatu uniuersalem Ecclesiam, tanquam fidelis minister. Nec mirum quidem. Tales enim grauissimum schismatis reatum incurrunt, cuius tam immanis est culpa, ut (Augustino & Cypriano testibus) illam nec eleemosyna redimere, nec Baptismus abluere, nec pro Christi nomine sanguis effusus valeat expiare. Hanc igitur tuam, quam sub verborum præstigiis contra Primatum Petri declarasti sententiam, ex Venenis Orientalis erroris procedentem, quidam ante te apud occiduas partes astruere conati sunt. Marsilius Patauinus & Iohannes de lauduno, non ueriti dicere, *Apostolorum Principem Petrum, nec plus auctoritatis accepisse, nec pro reliquis Apostolis caput Ecclesiæ diuinitus institutum.* Hi quidem à Ioanne XXII. Pontifice iusto anathemate damnati sunt. Sed & Iohannem Wickleff, & sectatorem eius hæreseos Iohannem Huf, eadem disseminantes magna Constantiensis Synodus condemnauit. Tu verò post damnationem eorum eandem hæresin instaurare moliris, & Catholicorum Principum auribus inculcare. Mirum profectò est, te, quorum actus imitaris, eorum exitus non perhorrescere. Quid ergò restat, nisi, ut sancti illi beatissimique Pontifices excitentur, Felix, atque Gelasius, hæreticorum expugnatores acerrimi? quorum alter si uiueret, nunc contra te ut quondam contra Achatium inclamaret: *Gregorius non est factus erroris novi inventor, sed veteris imitator, atque ideo non est necesse, ut aduersus eum nova sententia prodeat, sed vetus tantummodò renouetur.* Quicumque enim in hæresin semel damnatam labitur, eius damnationi se inuoluit. Alter verò te Perpetui anathematis mucrone



feriret ac diceret : *Habeto cum his, quos libenter amplecteris, portionem, non cum honore & communione Catholica; nec non etiam à fidelium numero segregatus, sublatum tibi nomen, & inimicus Christianæ religionis agnosce, sancti Spiritus iudicio & Apostolica auctoritate damnatus, nunquam ab anathematis vinculis excipiendus.*

**APOLOGIA GREGORII HEIMBURG,  
CONTRA DETRACTIONES ET BLASPHE-  
MIAS THEODORI LÆLII FELTREN-  
SIS EPISCOPI.**

**A** Pud Ciceronem in *Officialibus* suis duo iniustitiæ genera leguntur, unum scilicet eorum, qui inferunt, alterum eorum, qui ab his quibus inferuntur, dum possunt, non propulsant. Læli Theodore, canis aduersum lupos ignaue, quid dente cruento clandestina fundis opprobria, me fortè remorsurum suspicans si resciscam, quid tu furtim aduersum me fabricasti. Ut enim molossus pastorum amicus, & tutator gregum, per altas niues agere non desinam, quæcunque fera dabit. Ac tu dente me petisti: vicissim attollo cornua, nec inultus flebo, tanquam puer laceffit. Duas ignominiosorum calumniatorum esse conditiones quisque facile apprehendit, quem nutantis mundi liuor malignitatisque tentauit peruersitas. Quidam enim apertam leuitatem ostendere non erubescunt his, apud quos se primos omnium esse putant: qualem te Læli esse iudico. Alii verò grauitatem simulantes, clam sunt factiosi: quales assero eos, qui te subornarunt, vanitates tuas suggerentes, ut eorum errores in te transferens retorcutiois iacula pro iis excipias. Neuter verò vestrum in campum descendens palam audet occurrere.

Primum me calumniaris blasphemiarum pontificalis. Deinde Pontificem in meritum iaculatum esse mentiris. Tertio me reum hæreseos mendacissimè criminaris. Hæc certè propulsare in animo est: sed prius te ineptum & perplexum ostendere, qui quod in me arguis, flagitiosissimè admittis, quin absque conuicio, blasphemias & contumelias nec verbum profers ullum. Tanta animo tuo criminandi libido incessit, uti gloriæ cupido tenet eos, qui humilitatem simulantes de gloria contemnenda scribendo illis ipsis tabellis sua nomina ob gloriam inscripserunt: illicò prodentes sese criminum reos, quæ ipsi alios accusando committunt. Sic Pseudosacerdotes, amicti pallio, pileoque operti, aliorum vitia foecundissimè accusantes, intercutibus vitiis ipsi madentes. Cum itaque vim & iniuriam propulsare, ac illatam referre, omnemque iniquitatem retorquere fas & iura sinant, & lex planè permittat, arguere mendacii eum, qui alium falso criminatur; huc totius simultatis summa redit, uter utri prior iniuriam irrogauerit. Et hoc nunc tecum expostulare iuuat, de qua re sic accipe.

Ab Archiduce Austria missus patruelem eius Sigismundum accessi, hortator pacis, totiusque mansuetudinis persuasor sollicitus, ne quidquam seuerius victor in uictum statueret, nec fautores quondam victæ partis inclementius pertractaret. Illic et mihi relatum est Cardinalem illum, quem tu laudibus effers, honorem Principis sui suggillasse, Ecclesiastica censura pro libito abusum, metallarias mineras, salinas inhiasse, & in summa statui principis insidiatum esse. Quam coniecturam temporis suspicio exaggerabat, quo confinia illius principatus truculentus hostis inuaserat, partim verò nuper occuparat. Tunc ego animum meum paulisper



paulisper suspendi, versans, volutans & cogitans, Cardinalem esse durum hominem & rigidum, acrem, immitem, inexorabilem, aliis persuasivorem vehementem, & acutum inuentorem eorum, quæ utriusque dissidentium prodesse vel minus obesse videantur, suis tamen rebus afflictis minus consulentem, suisque motibus seu pathiis minimè temperantem. Erat autem adhuc ira recens, ut non sperarem inflammata pridem pectora restinguere, animosque utrimque induratos permolliri posse. Memè continui, diem tempusque forsitan ipsum ratum lenituum iras. Cumque diutius cogitationis me fatigatio tenuisset, venit ecce familia Laurentii Blumenaw profuga, insidiis Pontificis clam elapsa, Laurentium Principis legatum apud Senas contra ius revocandi domum vetusto iure gentium introductum nuncians arrestatum esse, & idcirco fugam adornasse: fugeritne an comprehensus sit, parum sibi constare. Igitur ab omni spe pacis & concordie seiectus, nil præter refugium oppressorum habens, illud amplexus cum omni veneratione Pontificis reverenter appellaui, id est, appellandum esse persuasi. Recensè iam, Læli, si quid habes quod arguas. Missio quidem officiosa, paritio reverentialis & obedientiaria, profecto honesta, adhortatio ac persuasio mansuetudine pietateque plenissima, remansio verò cum operarum exhibitione necessitatem habuit evidentem, etiam si manus conferendæ & gladio decertandum fuisset. Nam cuius officii susceptio honesta, etiam si spontanea fuisset, eius impletio inevitabilem affert necessitatem. Hoc, Læli, iunior didicisti & in negotiorum gestione, & in comodato rerum vel operarum optimo iure sancitum. Quid vero oro gratæ medicus referret, qui latentem morbi materiam movendo torpentem naturam excitaret, febrem prouocando; tumque secedens nullum æstuanti præberet antidotum, dicens se perfunctum opera medicantis: æger è contra quereretur se derelictum, ac satius se naturæ sagacissimæ potestati relictum esse. Rursus si quis rei militaris scientia peritus instruxisset aciem, militum ordines explicasset, præfectos in utrumque cornu consistere iussisset, primipilum pila emittere signo dato monuisset, pugna verò iam in manus, iam ad gladios, ubi Mars est atrocissimus, veniente discedat, prætendens se Imperatoris vel Ducis opera defunctum: nam si turbatis ordinibus nemo restituat, rem deficientem nemo sufficiat, labentem nullus erigat vel inclinantem sustineat, speculator alta rupe confidens, vel Tiburno littus oberrans; Gnatonicus rite conclamet: *Ita Pyrrhus sæpè factitavit.* Nunc contra hæc quid Pontifex, vel (quod ego verisimilius duco) Cardinalis tuus machinatus est, aspice. Nam qualis Pleiadum choro stridente nubes Auster exercet undas indomitas, tales ductu Cusani contra me fulminavit epistolas, quibus & me comprehendit, bona mea confiscari, ac in me velut hæreticum animaduerti iussit; & hæc omnia me clam ferocissimis hostibus meis proditorie demandata sunt: quasi me uno intercepto à ceruicibus suis periculum omne depulissent, suæque machinamenta in tuto collocassent. Quod hinc conicere licet. Est mihi rus quoddam vinetis fœcundum, fontium eruptione salubre, decursu insuper amnis ac rubetis littoreisque hortulis amoenum, quo me vindemiæ tempore conferre solebam. Ibi me coniux operiebatur. Expectatus adveni, deliciis autumnalibus cum fructu dulcis musti potiturus: iam etenim gravidis Autumnus fluxerat uvis. Æstatis verò suauitatem negotiorum præfatorum functio præoccuparat: Illicet mihi structæ sunt insidiæ. Foelix & fatale negotium emerfit, quod me à deliciis ad partes Rheni auocauit, simulque insidiarum molimina dissoluit. Namque (ut fieri assolet) negotium aliud ex alio partum inibi me detinuit, donec hyemis asperitas solum omne frigoribus, niuib. rigentique pruina confunderet. Mirati sunt insidiatores mei, tam breui velut puncto temporis sua destinationis certissimæ versa esse momenta. Postquam enim horrida tempestas coelum contraxerat, sylvarumque Threicio Aquilone personarent, satius duxi foco iunctis ulmis curas domi resolvere, quam stridentibus campis aut ruri incumbere glaciali; neque aliud oravi, quam ut perennia hæc mihi munera stabiliret Deus. Erant insidiæ non satis cautè creditæ, sed partim in aure rimosa depositæ, hinc effluentes meas usque man-



runt aures. Egomet mecum sic cogitaui: Insidias mihi paratas fors disturbauit: Posthac abeuntem me negotia vexant aliena: centum per caput & circum latus saluunt quietis impedimenta: labuntur misero dies inter vota clamanti! O! rus dulce, an nunquam te aspiciam, salictis, corylis vitibusque redimitum! O quando licebit sub alta pinu aut inter densas corylos somno vacare, & inertibus horis iucunda obliuia fouere sollicitæ vitæ! O stultas preces meas! Nam si Deus votis meis annuisset, insidias incidissem exitiales. Quam porro prudenter Socrates nil certum à superis postulandum esse monuit. Nam qui facile bona dare solet, ipse nouit precanti quid expediret. Ergo qui ueris iucundi, mollis ætatis, autumnique patris dulces illecebras concedere noluit, genialis hyemis quietem propicie concessit. Iam etenim frustratis insidiatorum concinnamentis, hostes ab omni mei persecutione disterritos esse rebar, ut me uelut numine diuino defensum pertinacius à modo persequi sacrilegium esse ducerent. Curas abieci, conuiuia lætus instauro, ceu nautæ, qui per saxa & per scopulos, æstuosæ Syrtis varie diuque iactati, optatum tandem portum saluis attingere carinis. Tanto vero amplius gaudendum mihi esse duxi, quod expers omnis curæ tantorum hostium dolos & astutias inscius euasi. At cum insidiatores iam desperassent me personaliter comprehendere, uirus iamdiu retentum passim effudere, breuia illa virulenta circumquaque dispergendo, si quem fortè fortunis meis inuidem vel auentem res meas excitare, vel aduersum me prouocare possent. Hæc tamen palam ad me, dulci fortuna plusquam Falerno bacchatum, perlata rursus commouerunt. Et quis, inquam, finis insidiarum? quid peccaui, quid commerui? Vah mihi uni tot laqueos tendi aliud profectò agitur, aliud verò prætenditur. Repetebam ergo mecum nuper æui gesta præteriti, dum Pontifex apud Mantuam bellum in Turcos appararet, vel (si vera potius quam dictu speciosa dicenda sunt) pecuniam ex omni Germanicæ nationis statu sub prætextu belli apparandi elicere cogitaret. Cuius doli suspicionem peperit Cardinalis tui, quem Pontifex tractatui adhibuit, astutia iam dudum per Germaniam longe lateque recognita. Omni quippe succo iam pridem per Jubilæum exhausto, Cardinalis ipse velut non missura cutem, nisi plena cruoris hirundo, tenaciter hæsit, auarior psyllo vel sanguisuga: Nouis enim ac supererogatiuis indulgentiis, tosta post iecora medullas ex ossibus suxit. Verumtamen ne uana suspitione aut opinione temeraria spectatam aliis fortasse uirtutem uiolasse criminarer, certius experimentum censui esse faciendum, an reuera esset in Pontifice Turci nedum inuadendi, sed efficaciter oppugnandi ardor, an Pontifex & Cardinales composito niterentur. Est autem modus experientiæ sumendæ non vilis, nec infimis solum, sed & summis quoque conueniens, præcipue autem audaciæ plenis uiris, quem ego statim adueniens sensi & in Pontifice & Cardinali facile euenire posse. Ostensum est enim illis, qui rem dubiam aggredi se uelle afferunt, permagnum esse negotium, magnorumque laborum ac difficultatum, & periculosa plenum opus alex, in quo etiam aliqua nedum pusilla, sed etiam mediocris victoria explicata parum boni, parum fructus sit allatura: at ex diuerso plurimum mali res quantulumque addubitat. Id ego proceribus primo persuasis, ad Pontificem detuli, adjiciens alia plura, quæ introducendis & pabulandis exercitibus castrisque locandis, impedimentis bellicis euehendis, trajiciendis fluminibus, & receptationi militum potissime sunt prouidenda. Maxime autem illud commemorauit, quod scriptores rei militaris præcipue admonuerunt, quo pacto militum concordia foueatur. In cuius considerationis pondere præcipue versatur, Imperatorem Romanorum (qui capitis occupat locum) & Hunnorum Regem super Hungariæ regno dissidentes in gratiam reducere. Et hic labor, hoc opus, si nobilis exercitus regionibus illis concedi debeat? Neque enim Hunnorum Rex Imperialem exercitum receptet, neque enim Christi hostes oppugnet, nisi statui suo prius cauto. Et hoc idem circa plerosque alios Imperii proceres conditio temporis adhortatur. Parum enim sunt bella foris, nisi est consilium domi: pulcherrimorum exemplorum est plena uetustas, sed ea prolixa nec satis opportuna relatu.

Nostræ



Nostræ autem ætatis referre libet exemplum familiare, quo inclita Elisabeta Ungariæ regina cum recolendæ memoriæ Uladislao Rege Poloniæ inducias depacisci maluit, ne priuata contentio vniuersæ Christianæ Reipublicæ pareret detrimenta. Porro si sit alicubi huius rei iudicium, etiam alia dicerem clariora iis, quæ dixi, probaremque manifeste me suasisse, Papam verò recusasse ea, in quibus si mihi paritum esset, longe melius & honestius omnia (ut mea fert opinio) processissent. Sed verba mortuo feci, narraui furdo fabulam. Aliud nempe animum eius sollicitauit, qui de belli administratione ne verbum quidem facere vel audire sustinuit: Sed pecuniæ per Clericos & Laicos, sed etiam Hebræos conferendæ sollicitior fuit. Cardinalis verò tuus palam censuit *his omnibus posthabitis in DEO spem nudam esse ponendam*. Quod nil aliud est, quam rem omnem nullo consilio administrare, sed temeritati audaciæque permittere. Non tamen adeo spem firmam in DEO reposuit, quin in exigenda pecunia remorari vellet, qui nusquam virtuti vel gratiæ locum esse putat, nisi effusæ affluant opes. E contra verò & proceres, & ego una rati, non esse audendum vel experiendum facinus, cuius tota salus ex euentu fortunæ penderet: summi Scipionis auctoritate, eiusque disciplinæ testis adprime idonei consentis, nullam esse negligentiam ignauio-rem, quam eam quæ violentiæ Martis permittitur: neque enim sarciri, purgari vel emendari potest eiusce iactura, & accepta clade turpe est dicere; *Non putaram*. Hæc dum ipse tacitus mente agitarem, illamque truculentam epistolam seu breue Papale legendo repeterem, qua summa crudelitas in me fortunasque meas proditorie conflata videbatur, & ne gratuita crudelitas esset, bona mea in precium concedebantur quibusque violentis, (hæc sunt enim illius epistolæ verba: *Et bona quacunque habet apud vos, tam mobilia quam etiam immobilia, fisco vestro applicetis, &c.* rursus ad appellationem, libertatis & innocentiae tutamen præsidiumque, aduersus furorem Pontificis scutum & clypeum, sed Mantuæ jampridem euersum, animum aduertere. Cumque in illa nil impium, nil despicabile, nil contumeliosum inuenissem, mirabar quid tantam iracundiam tantumque furorem in animo Pontificis excitasset, quid commouisset bilem, ut tam felleos humores euomuerit, aut fortasse ipsa ultionis & iræ satiandæ dulcedo animum fragilem distendisset. Inter cogitandum autem Oratores Principum nostrorum à Cæsare dimissi redierunt, omnia inibi dicta factaque referentes, maxime autem illius appellationis notam, quæ contra Pontificis auaritiam & Imperatoris astutiam ad uniuersale Concilium postea interiecta fuit, recitantes. Et quia eundem ludum continuo luserat Pontifex, eandem cecinit cantilenam, videlicet machinationem eliciendæ pecuniæ cum suis censuris, cum Cæsaris auctoritate pertinacissime prosequendo: illic pedum visa est via, illic & Pontificis detecta versutia. Hæc illa hæresis Gregorii, strenuitas in repugnando, constantia in resistendo auaritiæ Pontificali, & in consulendo dirigendoque perseverantia. Hoc sacrilegium Gregorii, libertatis fomentum & eleuamen oppressorum, ac defensio sacrorum Conciliorum, quorum auctoritas per constitutionem Mantuanam euertebatur. Hæc læsa Maiestatis noxa, exigendæ per Germaniam grauis collectæ molimina disturbata. Hinc vulnus sub pectore Papæ seruatum intumuisse, aut cicatrix obducta putruisse comperta est, ira in me Pontificis Mantuæ cælata & compressa, tam crudeliter aduersus me erumpente, ut absque ulla vocatione bona mea concederet in precium crudelitatis. Cense nunc, Læli, si quid moderationis habes, an hoc sit iudicare, an potius sæuire pro libitu. Numquid iustus fuit Zelus in me, qui me in fauorem miræ nationis accendit, ut exclamarem: *Vis consilii experts*, & iniuriam meam retorquerem. Frustra ergo, Læli, me criminaris (sibilans anguis) blasphemix pontificalis: quia à Pontifice dolose potitus, persona rebusque pulsatus iniurias structas propulsaui.

Assentando verò Pontifici, ô vulpes ganniens, ais, *illum imitari Christum, qui cum malediceretur, non maledicebat*. Si Christum imitatus ipse fuisset, nullas mihi personales aut reales struxisset insidias, neque Monachum scurram elegisset, qui

vanita-



vanitates eius per orbem disseminasset. Subdis Læli procacissime, nuncupando me *bestiam inter luxum epulasque sudantem*. Miror si in capri pedes Satyros aures acueris, qui jam saliaribus dapibus habebis assuescere pontificatus. Teque bis stulte facere dico, qui Pontifex ipse Pontificum arguis coenas, summosque viros accusas, ex quibus Coruinus, quanquam Socraticis madens sermonibus, Masticum lectum vinaque promere iussit languidiora: Sed & prisca Catonis vigor legitur mero caluisse: quod lene tormentum adhibet ingenio plerumque duro. Sed ne me putes nocturno certare mero, putere diurno, nimium læue mancoque tempore nobis exprobras voluptatem. Non est nobis suauium rerum suppetentia, nonnunquam aper Austro leui, putidus, lardumue rancidum prima iratum ventrem esca pacauit. Deinde Chiam vel Mareoticum, sed maris experts, me potauit sitientem. Optassem fauces obsuruisse, naresque obturatas, ne gustus vel odoratus compaterentur. Posthac rescisces singula, cum mansuescet utrinque animus rancore iraque defæcatus.

Quosdam Pontifices ais *in plagam Orientis contra accusatores suos Tomos scribentes satisfecisse*. Id certè ualere sino, tuis Satyris tragicisue scriptis hanc apologiam objicio. Subnectis, *Pium Pontificem eloquentia flumine manantem, omnes facile superare*. Hic pol rectè sapis, siquidem est sapere, summos viros assentationum laqueis infascinare. Unde certè tibi non minima merces rei speique refulsit. Satis caute scisti uti foro. Quisquis enim Regibus uti scierit, holus fastidiet pauone rhomboque satiandus. Non cuius homini contingit pontificari. Sed missam faciamus ironiam. Iamdudum ego conspexi, perditissime Læli, & nunc etiam prospicio, opes & priuatorum & dominantium quanto maiores sunt, tanto magis obrectatores adultoresque ac turpium voluptatum machinatores nutrire: quo nil, perniciosius gignit opulentia atque potestas. Nosti voces Sirenium & pocula Circes: quæ si bibisset dux Ithacus, turpis certè vixisset & excors. Optarem ergo, Pontificem aduersus huiusmodi blanditias aures pice obdurare, quam adulationibus se sinere capi.

Postea certas maledictis, homo mendacissime, donec veniam petas *styli rudioris*: quasi nos nitori plus quam veritati studeamus, quod mihi super omnia visum est impudentissimum. Nisi, fortè *nitorem sermonem* vocas verum dicere, quod si facis, profiteor me nitoris & expolitionis peritissimum esse. Nam qui meam iuuentutem diligentius obseruauit, facile coniiciet mihi quandam dicendi facultatem à natura profectam inesse: quisquis studia mea considerauit, mihi testis erit, quia vere hospes & aduena sum rhetoricæ adulationis: qui etiam in Physicis, Ethicis, Metaphysicis disciplinis adolescentiam consumpsi meamque iuuentam.

Pergis in nugis, vir impudens, quasi ego mihi *utriusque iuris arrogassem instituta*. Calumniator fraudulentissime, hic veritas pro me loquitur. Hæc sunt enim verba defensionis meæ: *Mibi satis est didicisse ciuiles sententias, & quidquid præcipuum habet ratio vel industria, quidquid sacra tradunt utriusque iuris instituta, hisce literis & floribus exornari posse*. Hoc & tu minimè inficiaberis, nisi id agas ut cum ratione insanias. Nam hac arte, quæ à dicendi copia nomen traxit, suadentes ad legendum ad hortamur, & quidquid legendo hauseris, ea ipsa arte potentius persuadebis. Apud Socratem habes Gorgiam, (quem Isidorus Principem eius artis facit, Cicero verò Lysiam inuentorem vocat) ita loquentem: *Sape iam cum fratre meo, & cum aliis medicis ad aliquem agrotum ingressus, cum ille vel pharmacum potare nollit, vel secundum urendumque se medico non permetteret, nec valeret medicus suadere, ego persuasi, non alia arte quam rhetorica*. Rursus si aliquam urbem adueniat Rhetor & Medicus, & in concione alioue coetu inter ipsos certaretur, uter sit pro medico eligendus; Medicum quidem nusquam comparere sed illum electum iri, qui dicendi peritiam facultatemque habebit. Potentia quidem huius artis tanta & talis est. Sed quid multa; in re non dubia Hieronymum habes dicentem, *beatum Iob artis eius summam esse complexum, cum scilicet cum Deo disputans*



*tans ipsum tanquam admonens fragilitatis humanae naturae tributa, secum expostulat, non equum esse ab homine infirmo tam fortem & perseverantem exigere patientiam.* Aspice hymnos nedum Prudentii, sed & illos vulgares, qui in laudem Dei vulgo decantantur: & certe videbis etiam divinas laudes floribus ipsius artis illustrari. Apud Ciceronem habes, *Nil tam horridum, aut tam incultum, quod non splendescat oratione.* Et alibi è contra: *Nil tam simplex aut sincerum, quin dicendo possit depravari.* Potens est vis eloquentiae, magnum est momentum in ea, quam si à Pontifice sustuleris, parum reliquabis quod laudes.

Sed rogationem tuam, qua rogas, ubi lege permissum compererim, licere Pontificem laceßere maledictis? contraria quaestione vacuabo. Ubinam didicisti, Pontificem iustum insidiis proditoriis persecutum esse quemquam propter appellationem reuerenter cum ad se, tum ad superiorem suum, sacrum scilicet Concilium, interpositam? De quibus beatus Gregorius scribens ait, *Quod quisquis ea destruere temptet, seipsum destruit.* Quod & Eugenius nouissimus, ac post ipsum Nicolaus sub bulla recognouerunt. Legisti autem Innocentium quartum Pontificem se arbitrio Concilii instituendi submisisse. Illi verò quos tu commemoras haereseos damnatos, in fide Christi pertinaciter errauerunt, nulli Concilio sese submittentibus iudicandos. Quod si nescis, & scire cupis, non est difficile Pontifices enarrare, qui culpis suis exigentibus nedum maledicta, sed depositionem, castigationem, mortem quoque meritam exceperunt. Id certè iustissimum censeo, quod in Dioscorum impium animaduersum est. Sed quid putas? si venerabilis Leo Pontifex Dioscorum inauditum capi ac spoliari iussisset, quia à se ad Concilium Chalcedonense appellasset, nullum autem erroneum dogma seminaisset, vir doctissimus & perfectus, quemadmodum tale nefas non iussisset, ita & si errore lapsus fortè proripuisset, ratione tandem duce potius lapsum & errorem restituisset ac reuocasset.

Procedis longa verbositate execrando vitium scandali, quo tu me calumniaris, homo vanissime: qui non cernis scandalum Pontificis, prodicionem insidiosam aduersum me conflantis. Audi Socratem contra Anitum & Melitum se defendentem: *Non est, inquit, iudices tam opus mihi defensionem meditari, quam vobis, ne delinquatis me condemnantes.* Et lex ait, Evangeliorum Codicem iudici propositum esse, ut se DEO inspectore sciat iudicare. At si Pontifici Ptolomæi bibliothecam proponas, & Demetrium Phalereum praeficias, non eum reuocabis à Piccolominum & Corfiniani consideratione. Sed lenonem imitaris Terentianum, quem non puduit uanitatis, dum ob rem, &c. Nam si ceterae vanitates pari voto successerint tibi, breui temporis spacio rubescet uertex capitis tui, cum incedes capillo rubeo pileatus.

Ritum & cerimonias consecrationis pontificalis adducis, quod inibi pronunciat, qui maledixerit tibi, sit ille maledictus. Sanioso vulneri callum superducis tumidum. Urendus certè callus & secandus est, ut purgato intus vulnere caro solidetur & pellis. Si malefacta Pontificum benefacta nuncupabimus, eosque fecerimus licentiosos, ministerium sibi commissum vertemus in tyrannidem. Audi ergò beatum Gregorium dicentem, *Non oportere Praelatos adeò reuereri, ut ipsorum vitia foveamus.* Quod autem Apostolus ait: *Nesciebam quia Princeps Sacerdotum esset:* porro Saluator non maledixit colaphisantes (quod tamen non ad Pontifices modò, sed ad cunctos milites crucifixores aequè spectat) ô Læli procacissime, quanto conamine perurgeris, quanto flagras ardore, qui quo tendis adeò festinas, ut obuia non cernas, sed raperis per inuia, tandemque praecipitas in scenam Comicam, personis aut inepte distribuis actus. Prospice, circumspice, retrospice, quid aliud paraueris, quam ut Gregorius personam Christi gerens, iniurias Papæ sustineat, cuius typum esse facis Annam, Caipham, Pilatum ac Herodem. Attamen quantum ad patientiam sub iure districtiuo vel coercitiuo reductam, aut perfectionis doctrina persuasam attinere videtur, hæc & talia sic enodabo. Et quod maximum est, quod à me postulas, quod nunquam ipse præsta-



res, maledicendi benedicere, quin & insidianti Pontifici vitæque meæ persecutori, quique de rebus sanguine meo sudoreque partis crudelitatis in me precium statueret approprianti; hoc certè summæ perfectionis opus mihi non arrego. Nec satis exploratum habeo, si persequenti me occidendum præbuissem, an sæuitia satiatus tandem mansueuisset, an potius maiori ferocia frenduisset: quippe qui non contentus me perdidisse, in coniugem & liberos meos bonorum meorum ademptione sæuire cupiebat. *Nec enim semel ore receptus polluto sanguis patitur mansuescere fauces.* Ut ergo scias, in quo philosophantium grege meme profitear, altius ordiri iuuat intentum. Vitæ Philosophia Dux, rationis interpres, virtutum cultrix, & expultrix vitiorum, duas partes habere perhibetur: quas qui confundit, aut minus caute secernit, labyrinthum inextricabilem texit. Hanc veteres eius professores in summa perfectione posteris tradiderunt, ut illi septem per septem urbes Graciæ dispersi. Biantem certe Prienæum, cum patriam eius hostis adeò pressisset, ut cuncti ciues emigrarent plaustris onusti, ipseque liber & expeditus commigrans interrogaretur, cur non aliquid rerum euexisset, respondisse ferunt; *Ego verò omnia mea mecum porto.* Nos non sic: quia aliter interpretamur, *Rem in bonis esse.* Milesium Thalen alterum ex ipsis septem, qui primus cœli causas atque vim rerum naturalium contemplatiua ratione suspexit, tantæ moderationis fuisse proditum est literis, ut auream mensam in Milefia repertam, & sapientiori Delphico debitam responso, ideoque sibi delatam, alteri cesserit: quo pari moderatione freto, mensa per sapientum ordinem ad Solonem vicaria cessione peruenit. Uter materia est, qua patientia, humilitate, qua etiam abstinentia & continentia sui, ac moderatione & paupertate summi viri pro tempore vixerunt, quasque virtutes præceperunt docendo, viuendoque docuerunt, quas neque tu imitaris, neque nos imitati sumus. Quid Socrates? nonne coram iudicibus capitaliter accusatus, *non rectè*, inquit, *putare, qui existimet magnam vitæ mortisue habendam esse rationem.* Quid, quod nec carceris infortunium ipsum disterrere, nec Critonis persuasio, qui corruptis custodibus in ipso carcere cum morituro disputauit: nec ille aut sua, aut Simiæ Thebani, aut Cebetis & aliorum pecunia liberaliter oblata, illum inducere potuit virum perfectum, ut euaderet, seu furtim migraret, aut latitaret? Quod tamen hodie lege probatur, quæ euasorem à transfuga secernit, & captiuum precio redimere finit. Cuius hæc erat sententia: *Ego is sum, qui non modo nunc, sed semper, meorum nulli paruerim alteri quam rationi.* Sed hæc sunt altissimæ Philosophiæ summa consilia, & præcepta salutaria, ac saluberrima instituta, ad extremam tendentia perfectionem: non autem communi hominum statui vitæque doctrinalis, cuius auctores plurimum repudiati, quandoque damnati & addicti supplicio, tanquam Reipublicæ damnosissimi. Zenonis, Socratis, & aliorum innocentissimorum apud Græcos abundant exempla. Nam & diuinus ille Plato apud Dionysium Siciliæ tyrannum commanens, perfectæ cultor virtutis, in tale periculum incidit, ut postea Principibus Syracusanis scribens sic enarraret: *Hucusque igitur mihi & philosophia & amicis auxiliatum est; posthac autem ita uiximus ego & Dionysius, ut ego quidem semper extra spectarem, quasi avis quædam evolare cupiens.* Successit proinde alia, docens & inter sceleratos innoxie viuere, multa quidem tolerans, ne lolium extirpando uberem segetem necet. Porro autem astutiam contrahentium dissimulatione præteriens, ea demum castigans, quibus Reipublicæ status labefactari, aut humanæ societatis commercia periclitari possent, ut Juris consultorum traditiones ac præcepta Catonis & Ciceronis volunt, apud quem Diogenes & Antipater disputant, *Num vir bonus vendens rem vitiosam, satisfecerit ea demum explicando vitia, quæ legibus sunt definita?* Ac rursus apud Flaccum contra Aristippum Diogenes disputans, omnem sæculi vitam mordere videtur. Sexcenta sunt quæ memorem. Sed ea tam breui responso Tullius absoluit: *Aliter leges, aliter Philosophi tollunt astutias.* Leges certæ coercitionis præcepta vocans, ut verba sequentia clare demonstrant, dum dicit: *Leges quantum manu tenere possunt.* Prima ergo



gò Philosophia coercitionem districtiuam non habet, habet verò doctrinam salutarem. Ipse enim Cicero officia hominum præclare distribuens secundum illius secundæ philosophiæ traditionem. *Boni viri, inquit, officium est omnibus velle prodesse, ut obesse nemini, nisi laceffit.* Hoc postremum Lactantius mordens inquit: O quam iustam sanctamque sententiam duorum uerborum adiectione corripit. Unde hæc tantorum virorum controuersia? nisi quod alter secundum philosophiam mediam, alter verò secundum perfectam doctrinam locutus est: iuxta quam & Cicero Fimbriam Consularem virum laudat, volentem probatum hominem *bonum virum* iudicare, quum ea res infinitis virtutibus & meritis contineatur. Idem in Paradoxis neminem bonum censet, cui quid desit: *In qua consideratione parua, inquit, est et magna culpa; quamquam alio loco dicatur esse distorto distortius.* Nam etsi peccatum est transire lineam rationis, alter tamen altero plus aberat, tardius reuocatur. Noli ergò mihi obiectare Dominum & Saluatorem nostrum Iesum Christum, consubstantialem & coæternum patri, per quem omnia facta sunt, de cælo descendentem, in summa humilitate & huiusce mundi contemptu natum, pannis inuolutum, in præsepio reclinatum, Doctorem patientiæ & altissimæ paupertatis, nec habentem ubi caput reclinet secundum carnem. Nec discipulos eius, quibus dixit: *Omnis ex vobis, qui non renuntiat omnibus que possidet, non potest meus esse discipulus.* Hoc enim perfectionis statum innuit, ipso dicente: *Si vis perfectus esse, omnia quæcunque habes, vende & da pauperibus, & habebis thesaurum in cælo. Atque ei qui aufert tibi vestimentum, & tunicam noli prohibere, & qui vult tecum in iudicio contendere, & tunicam tuam tollere, remitte ei & pallium.* Hæc si mihi esset perfectio, fortasse nedum re familiari adempta, sed & vita iam fugiente, necdum indignatus essem, nisi forte Laurentium imitatus dixissem, *Immanissime Tyranne, &c.* Apostolus quoque summæ perfectionis imitator Corinthios increpans, *Iam quidem, inquit, omnino delictum est in nobis, habere iudicia. Quare non magis iniuriam accipitis, fraudemque patimini.* Ergò perfectus discipulus perfecti magistri perfectionem, quam verbo doctrinæ persuasit, etiam exemplo vitæ docuit. Hanc perfectionem si tu vel Pontifex aut quisquam illi commanens, verbis sibi arrogat, sese fallit, sibi que falso blanditur. Utinam mihi ad vitam ingredi Dominus concedat. Nosti, Læli, aliud respondisse Dominum volenti ad vitam ingredi, aliam vero perfectionis legem docuisse. Vas autem electionis, Apostolorum Chrysostomo teste perfectissimus (qui Job Apostolis præferens, Paulum æquauit) si super erogauit, non est idcirco talis imitatio ab aliis exigenda, & per illum qui nunquam ipse præstaret. Putasne, si tempus efflasset, Paulusque respondisset; Nonne Christus verus Deus, cuius Evangelium prædicamus, maior est Pontifice, sed & ipso legislatore, vel Aaron sacerdote, num peccasset? Minime. Sicut nec peccauit, dum Cephæ restitit in faciem, quia reprehensibilis erat. Nonne didicisti, ea quæ Spiritu Dei per quosdam singulari gratia & nutu quodam aguntur, sub humanis legibus non esse redigenda? Neque enim humana priuilegia in consequentiam trahi debent. Erat autem ipse spiritus Dei plenus.

Habes nunc, Læli Theodore, discretionem summæ & extremæ philosophiæ, quæ iniuriam referre vetat, seu retorquere, & alterius philosophiæ, tolerantis ea, quæ sunt humanæ conditionis. Pergens nunc ad ea, quæ lex statuit de criminibus seu libellis Fescenninis, legem Digesti iuris, quæ blasphemos aut falsos obrectatores mendacii redarguere sinat, nostin? Eam Flaccus naturæ atque institutionis legem esse probat, Stertiniusque (quem septem Sapientibus æquando facit octauum) hæc arma sibi contra vaniloquos Musam dedisse gloriatur, ne compelleretur inultus in hunc modum comminando:

*Dixerit insanum qui me, totidem audiet, atque  
Respicere ignoto discet pendentia tergo.*



Nec tamen inficiabor, rebus inesse mensuram & certos denique fines, & quadamtenus prodeundum sistendumque. Sic enim composita est Fescennina licentia, quæ latis agricolarum post condita frumenta cum fociis operum pueris & coniuge fida; conuiuiis alternatim opprobria fundit. Sublato autem iure nocendi, chorus obticuit. Quin etiam lex poenaeque lata veterem lasciuia verit formidine fustis, & infamiam irrogat ei, qui ob carmen famosum condemnatus. Postremo lex capitalis sancita, cuius tu siliquas ingerens vim legis minime ponderasti. An tu famosum carmen seu libellum recte nuncupes, cuius auctor non clam, sed palam (quod tu culpas) pro sua ac Reipublicæ tutela dictasse fatetur, ipse videris. De hinc ipsam legis animam, hoc est, sanctionis rationem contemplare: scilicet ne quis sibi ius dicat, neu se præter iudicem vindicet; quin tramite legitimo & auctoritate iudiciaria prosequatur, quod sibi debetur, aut accusando præmia ferat vel denunciando: alioquin neque nocentem laceffat, nisi Reipublicæ intersit nocentis noscere crimen. Si in orientis aut obeuntis Solis ultimis oris, si denique in torridis Libyæ arenis, aut qua pruina rigens Pontum Scythicum glaciali frigore stringit, arbiter federet iudicare dignus & potens, an Sigismundus post legatum suum violatum, & tam varias iuris experiundi vias refutatas, ad sacrum Concilium ritè appellasset, an Gregorius appellans idcirco hæreticus iure habeatur, profecto aliquid rationis haberes. Sed cum nec rimam neque porum aut porisma, per quæ aditus ad iustitiam pateret, aperire possis; vacuatam, tene legem, cuius rationem Papa submouit. Non est hoc meum inuentum sed magnæ Synodi Constantiensis excogitatum, statuentis *decennio in decennium universale Concilium celebrari*, ut sit quo oppressi confugiant, sitque quod Pontifex metuat ac reuereatur. Sed est vetus querela: *Papam voluntate pro lege abuti*. Hoc Bernardus Claravallensis ad Eugenium scribens conqueritur, ac pie admonet; Quomodo non indecens tibi voluntate pro lege uti? & quia non est ad quem appelleris, potestatem excercere, negligere rationem? & cætera, quæ latius exequar, cum tuis nugis candorem veritatis opponam, quam tu Lucifuga horres aspicere, in tenebris oberrans. Contritusque est laqueus tuus de Maria, Aaron, Osia & pueris Bethleemiticis: quia neuter horum fuit prouocatus, nec vitæ suæ per Sacerdotes insidiatum.

Quod vero Papalem dignitatem ex verbis Bernardi Claravallensis, & epistola Clementis sublimius effers, hoc ad rem nihil attinere recognoscis: quia neutrobi Papa rem seu facultates subditorum in precium crudelitatis cuiuspiam ausus est concedere. Sed te assentandi studio illac euectum esse conjicio, teque assuefacere, ut iisdem rebus gaudeas, iisdemque doleas, quibus ipse dominans: postremo te ita compares, ut illi quam maximè placeas. Thrafonis siquidem & Gnathonis abs te non multum abludit imago. Ac ne putes hanc fuisse Bernardi sententiam, ut Episcopus Romanus propter suæ auctoritatis amplitudinem prohibito agere possit impune, ipsum in eisdem libris arguentem excessus eius tu vicissim audi. Verba eius, quæ tu dolosè truncasti, fideliter repetam, addens illa quæ tu calumniosè suppressisti. Inquit Bernardus ad Eugenium de consideratione libro II. *Sacerdos magnus es, Summus Pontifex, Princeps Episcoporum, Tu heres Apostolorum, Tu primatu Abel, Gubernatu Noë, Patriarchatu Abraham, Ordine Melchisedech, Dignitate Aaron, Auctoritate Moyses, Judicatu Samuel, Potestate Petrus, Unctione Christus, Tibi clauis tradita, Tibi oues credita*. Beasti me, Theodore, Bernhardum proferendo, quem aduersus Pontificis calumnias obijcere verebar, ne rejiceres illum velut contemplatiuum virum actiue vitæ leges horruisse. Nunc ergo lex prodeat, cuius in agendo iudicium elegisti. Eiusdem Bernardi jaculis feriendus eris, eiusque scuto protegendus. Ergo huius tu spiculis calumniosè quidem elicitis me confodere, nec apud improvidas mentes parasti præoccupando commaculare? O vanissime Theodore, quasi Bernardus ille in vanam gloriam Eugenii blandas effuderit laudes: ac ob id Pontifici liceat pro sua libidine, dominatum imò verò tyrannidem exercere, gloriabundus exclamasti:

Sacer-



*Sacerdos magnus es.* Id certe Christianorum nemo negat. Sed quod tu magnum Sacerdotem hisce delinimentis circumscribis, arma crudelitatis in me acuendo, hinc contra eiusdem Bernhardi dogma, ipsum etiam Papam alloquentis, oppono: *Facilitas*, inquit, *crudelitas hæc est, cuius callidissima vulpecula magnorum neminem comperi cauisse versutias.* Inde enim ipsis pro nihilo magna mulcta, inde innocentium frequens addictio, inde præiudicia in absentes, &c. Miror quod non dixisti, *Maximus*: quia nec id quidem inficiatus essem. Nam & omnes Episcopos magnos constat esse Sacerdotes: sicut Imperatores, Duces, tribunos, præfectos, centurionesque *magnos milites* vocare solemus, quod gregarii milites ab illis vel arma suscipiunt, vel in ordines iubentur consistere: sicut Presbyteri, (quod *Seniores* interpretatur) à superintendentibus (quod *Episcopi* dicitur) noui ritus instrumenta suscipiunt, & per limites ritè distribuuntur. At quæ sit hæc magnitudo, eundem audi. *Præes & singulariter. Ad quid? eget (tibi dico) consideratione. Numquid ut de subditis crescas? nequaquam. Sed ut ipsi de te. Principem sibi te constituerunt; sed sibi, non tibi. Alioquin quo pacto te reputas superiorem iis, à quibus beneficium mendicas. Audi dominum: Qui potestatem habent super eos. Benefici vocantur. At istud de iis qui foris sunt, quid ad nos? Tu id mendaciter dicis, si non tam beneficus esse, quam beneficiis præesse intendas.* Nunc quomodo summus Pontifex sit, rursus audi, quid idem dicat: *Dele fucum fucati honoris, & male coloratæ nitorem gloriae. Salubris copula, ut cogitans te summum Pontificem, attendas pariter utilissimum cinerem.* Et idem alio loco: *Non est quod blandiatur celsitudo. Sollicitudo maior, illa discrimen intendit, hæc animum probat, huic accingamur, si nolumus tandem cum rubore nouissimum locum tenere.* Disce sarculo tibi opus esse, non sceptro. Sequitur Princeps Episcoporum. Eundem Bernhardum audi contra Satrapas (qualis tu es) loquentem, plus Maiestati quam veritati fauentes: *Vides omnem Ecclesiasticum zelum feruere, sola pro dignitate tuenda. Honori totum datur, Sanctitati nihil vel parum, si socialius te habere tentaueris; Absit, inquiunt, non decet, tempori non congruit, Maiestati non conuenit. Quod sublime, hoc salutare dicamus, & quod gloriam redolet, hoc iustum. Omne humile probro ducitur inter Palatinos. Ergo Principatus illius naturam vir sanctus explicauit his verbis: Consideres ante omnia Romanam, & cui de auctore præes, Ecclesiam matrem esse, non dominam: Te verò nec Dominum Episcoporum, sed unum ex ipsis, porro fratrem diligentium Deum, & participem timentium eum.* Et alio loco idem Bernhardus: *Tibi urbem Romam pro Episcopo deputat dicens clerus & populus tui, ac per hoc specialis cura teneris debitor. Ubi dicit, Romam Papæ domesticam esse Ecclesiam.* Ac nisi iam solius Bernhardi doctrinis tecum certarem, perfacile probarem, Episcoporum Principem non decere Episcopia confundere, de omnibus disponendo, quæ sunt per Metropoles & dioeceses ordinatissime distributa. Hoc beatissimus Papa Gregorius considerans noluit universalis Ecclesiæ Pontifex nuncupari.

Sequitur ergo, *Tu heres Apostolorum.* In hac hereditate messis quidem multa, operarii verò pauci. *Paternam tibi vendicato, inquit, hereditatem. Quid stas ociosus, quid resupinus pompis. Nil horum tabule testatoris tibi assignant: quarum si tenore contenteris, curam potius hereditatis & operam, quam diuitias & gloriam. Aut Fernandi Regis affinitatem. Blanditur cathedra? Specula est. Inde tibi Episcopi nomen, non dominium sonans, sed officium. Quid Petrus tibi reliquit? Quod habeo, inquit, hoc tibi do. Argentum & aurum non est mihi, &c. Esto ut alia quacunque ratione hæc tibi vendices, sed non Apostolico jure. Nec enim Apostoli quod non habuerunt, tibi reliquerunt. Audi ipsum: Non dominantes, inquit, in clero, sed forma facti gregis, &c. Apostolis interdicitur dominatus. Ergo tu & usurpare aude, aut dominantem Apostolatam aut Apostolicum dominatum, plane ab alterutro prohiberis, si utrumque simul habere voles, perdes utrumque, ne ex illis habearis, de quibus Veritas conqueritur: Ipsi regnauerunt, & non ex me: Principes extiterunt, & ego non cognoui eos. Agnosce hereditatem tuam in cruce Christi. Exi in agrum Domini tui, non tanquam Dominus, sed tanquam villicus.*



Pergis dicens, *Tu primatu Abel*. Si filius, si successor Abel vis haberi, ipsum imiteris. Erat enim Abel pastor, Cain autem agricola. Sacrificauit ille de primogenitis, Cain excussas obtulit spicas, fraudis sacrificium, non autem amoris holocaustum. Cain ergo magis æquare videris, qui spolia Ecclesiarum in Pientiam, imò in affinitatem Fernandi prodegisti: filiquas vix Deo sacrificasti. Num tibi quadrat hoc verbum Bernardi, quo libellum suum tertium claudit ad Eugenium: *O miserandam sponsam talibus creditam Paranympis, qui assignata cultui eius proprio retinere quæstui non verentur, non amici profecto sponsi sed amuli sunt*. Rursus in quarto: *Quale est quod de spoliis Ecclesiarum emuntur, qui dicunt tibi, Euge, euge. Pauperum vita in plateis diuitum seminatur. Argentum micat in luto, tollit non pauperior, sed fortior. Primatum tuum certe nemo negat. At tu videris, ne juxta parabolam Nathan centum oves habens, unicam pauperis concupiscas*. Eundem Clarevallensem in tertio loquentem audi: *Quid item tam indignum tibi, quam ut totum tenens non sis contentus toto, nisi minutias quasdam atque exiguas portiones ipsius tibi credita uniuersitatis, tanquam non sint tua, satagas nescio quo modo adhuc facere tuas*. Erras, si ut summam, ita & solam institutam à Deo Apostolicam potestatem existimas. Si hoc sentis, dissentis ab eo, qui dixit: *Non est potestas, nisi à Deo, & qui potestati resistit, Dei ordinationi resistit*. Et si principaliter pro te facit, non tamen singulariter. Rursus, *omnis anima potestatibus sublimioribus subdita sit*. Non dixit, sublimiori: Subnectis dicens, *Gubernatu Noe*; Illi archa extruenda, & palatiis ac stegis distinguenda mandatur. Tibi corpus Christi mysticum delegatur ædificandum. Justum exemplar, sed usus longè dispar. Quod Noe discreuit subordinando, tu confundis permiscendo. Hoc idem Bernardus queritur in hunc modum: *Monstrum facis, si manui submoues digitum. Tale est, si in corpore Christi membra locas aliter, quam disposuit ipse. Nisi tu putas alium esse, qui posuit in Ecclesia quosdam Apostolos, quosdam autem Prophetas, alios verò Evangelistas, alios Doctores & Pastores, in ædificationem corporis Christi*. Atque hoc corpus, quod ipse Paulus suo Apostolico figurans eloquio & capiti coaptans totum ex eo compactum, prohibet per omnem iuncturam subministrationis secundum operationem in mensuram uniuscuiusque membri, augmentum corporis faciens in ædificationem sui in charitate, non dixit, in Petro, nec imperio.

Subsequeris dicens, *Patriarchatu Abraham* Abrahæ summi Patriarchæ fides inprimis effertur, quia eius virtutis opus præcipue executus est. Nam secundum rationem actuum exteriorum alios alia virtute pollere dicimus, seu præcellere in aliorum hominum comparatione. Neque nunc id agimus, quomodo virtutes pares sunt, vel connexæ. Sed si quid in operibus Pontificis emicat operationis virtuosæ, id si nossem, testificarer. Sed si patriarchali vel dignitati vel auctoritati hoc tribuis, ut illi omnia singulaque licere, expedireque contenderis, fallis, & falleris, plurimumque deciperis, eodem Bernardo testante; *quod sicut Cherubin & Seraphin, ac ceteri, qui ad Archangelos & Angelos ordinantur, sub uno capite Deo, ita sub uno Pontifice summo Primates vel Patriarcha, Archiepiscopi, Episcopi, Presbyteri, &c. Quid si dicat Episcopus, Nolo esse sub Archiepiscopo. Hoc de cælo non est, nisi tu forte Angelorum quempiam dicentem audisti, Nolo sub Archangelis esse, aut ex alio quolibet inferiorum ordinum aliquem non ferentem cuiquam subesse, nisi Deo*. Romanus verò Patriarcha suæ dispositioni cuncta referuat.

Nunc quid sibi velit, *Ordine Melchisedech*, commemoremus, siue ille fuerit Sem filius Noë, primus post cataclysmum Deo sacrificans, sicut Abel protoplasti primogenitus, siue alius Rex Salem, qui obuiavit Abrahæ regresso à cæde Regum, qui interpretatur Rex iustitiæ, Rex pacis; Christus certe Dominus Sacerdos in æternum secundum ordinem Melchisedech; & ideò Aaron, ille mediator DEI & hominum, secundum humanitatem in illo figuratur. Et quia submittitur *Unctione Christus*, illic adiiciemus, quæ hic dici à me potuissent.

Porro quod dixisti, *Dignitate Aaron*, is Moyfi viro Dei, Duci Israël, paruifse traditur cum uniuerso ordine Leuitico. Præcepit quippe Dominus Moyfi, ut post



post ordinationem Aaron & filiorum eius, prorsus tribus Leui ad diuini cultus ministeria ordinaretur & consecraretur Domino, & seruirent pro Israel coram Aaron & filiis eius in tabernaculo. Hos duos ordines veteris legis fuisse, nemo tibi negat. Alios quoque novo ritu Ecclesia introduxit, quorum omnium officia caput nostrum Iesus Christus in semetipso exhibuit, & corpori suo (quod est Ecclesia) eosdem ordines instar septiformis gratiae Spiritus reliquit obseruandos. Ergo & hunc passum unctioni Christi referuamus. Quod autem subdis *Authoritate Moyses*, id eò spectat, quod idem Bernardus admonet in quarto: *Tuum est unumquemque evocare & adsciscere tibi, exemplo Moysi senes & iuvenes: sed senes, non tam atate quàm moribus, quos tu nosti, quia senes populi sunt, &c. Consilio non prece agendam est.* Id certe quomodo seruetur, ipse iudicatio. Sed pergamus ultra.

*Judicatu Samuel.* Caveat ergo ne dicatur sibi, ditavimus Abraham. Sed ut cum eodem Samuele libere ad populum concionari sibi liceat: *Loquimini de me coram Domino, & coram Christo eius, utrum bovem cuiuspiam tulerim, aut asinum; si quempiam calumniatus sum, si oppressi aliquem, si de manu cuiusquam munus accepi: & contempnam illud hodie, vobisque restituam.* His enarratis subdit Bernardus: *Osi daretur talium copia virorum, quales perstrinximus nunc, quid illo iucundius seculo. Nonne secunda ab aternitate illorum tibi temporum beatitudo videretur, &c. Et nunc reduc oculos, mi Eugeni, ad eum qui nunc tuae curiae seu Ecclesiae est, statum, & studia Pralatorum, eorum praesertim, qui in circuitu tuo sunt.* Sed de his hactenus, ego palpaui non fodi parietem.

Nunc sequitur, *Potestate Petrus.* Sed Bernardum tuum rursus audi: Tu pastor procedis deauratus, tam multa circumdatus varietate. *Oves quid capiunt? si auderem dicere, demonum magis quàm ovium pascua haec, &c. Scio ubi habitas, increduli & subversores sunt tecum. Lupi, non oves sunt. Scilicet sic factitabat Petrus, sic Paulus ludebat, &c. Petrus hic est, qui nescitur processisse aliquando vel gemmis ornatus, vel sericis, non tectus auro, non vectus equo albo, nec stipatus milite, nec constrepentibus septus ministris. Absque his tamen credidit satis adimpleri posse salutare mandatum: si amas me, pascue oves meas. In hiis successisti non Petro, sed Constantino, &c. Opus fac Evangelistae, & pastorum opus implesti. Dracones (inquis) me pascere & scorpiones, non oves. Propter hoc (inquam) magis aggredere eos: sed verbo, non ferro: Quid tu denuo usurpare gladium tentas, qui semel iussus es reponere in vaginam, &c.* Quod sequitur de gladio bifario, id certè prætereo & ad Monarchiam Dantis Aligherii remitto, transcurrentes usque illac.

*Unctione Christus.* Siue dixeris, chrismate unctus, seu unctione chrismatus, utrumque tibi conceditur. Dixeris fortasse regium nomen Christus est, sed eius regnum secundum carnem non est de hoc mundo. Eundem Bernardum lege dicentem: *Non tu ille de quo Propheta: Et erit omnis terra possessio eius. Christus hic est, qui possessionem sibi vendicat, & iure creationis, & merito redemptionis, & dono Patris. Cui enim alteri dictum est: Postula à me, & dabo tibi gentes hereditatem tuam, & possessionem tuam terminos terrae. Possessionem & dominium cede huic. Tu curam illius habes, pars tua haec, ultra ne extendas manum tuam. Nunquid non & villa villico, & parvulus Dominus subiectus est pedagogo? Nec tamen is villa, nec iste Domini sui Dominus est. Praesens ut fidelis servus, quem constituit Dominus super familiam suam. Nullum tibi venenum, nullum gladium plus formido, quam libidinem dominandi.*

Sed prosequamur illud, *Tibi claves traditae.* Magna est clauium significantia materialium. Clavium in conspectu rei traditio, siquidem accessus patet non impeditus, facit possessorem accipientem, si adfuit animus transferendi: alioquin custodia commendatur, quia deponere est commendare non imperium concedere. Hæ vero claves regni cœlorum non adimunt carnis fragilitatem, facultatemque peccandi. Ideo secundum eundem Bernardum sollicitudinem tibi iniunctam intellige evangelizandi, ac non potestatem imperandi. Quod hiis verbis innuit: *Non est sapiens inter vos, ait ille, qui iudicet inter fratrem & fratrem?*

Ad



*Ad ignominiam vobis dico, contemptibiliores, qui sunt in Ecclesia, illos constituite ad iudicium.* Ita secundum Apostolum indigne tibi usurpas officium vile, gradum contemptibilem. Et ne dicas Apostolum pro tempore locutum, subiicit Bernardus: *Putasne hæc tempora sustinerent, si hominibus litigantibus pro terrena hereditate more Domini responderes. Quis me constituit iudicem super vos, &c. Nisi aliquando quispiam Apostolorum iudex sederit hominum. Stetisse denique lego Apostolos iudicandos, sedisse iudicantes non lego. Erit illud, non fuit.* Bernhardum tuum tibi retorqueo, meam sententiam comprimo, quia nimietatem meo iudicio damnam ego, ut idem ait, ne assiduo coram te resonent leges Iustiniani, non Domini. Oppressis succurrere minime vitupero, ambitionem autem præcipue condemno.

Postremo dicis, *Tibi oves credite.* Si amas me, pascere oves meas, dixit Dominus, ubi Bernardus ait: *Donabis lupos, sed ouibus non dominaberis. Pascendas utique, non premendas suscepisti.* Neque exploratum habes, an tunc præsto fuerint cæteri discipuli, sicut dum omnes misit in orbem. At ne Bernardum egrediamur, eundem in tertio sic ordientem legito: *Parentes tui destinati sunt, non ad aliquas regiones, sed ipsum orbem debellaturi. Ite in orbem uniuersum, dictum est illis. Ipsi vero vendentes tunicas, emerunt gladios, ignitum eloquium spiritum vehementem, arma potentia Deo. Quo non pervenere victores incliti filii excussorum? Quo non sagittæ potentis arcus, &c. Et quidem in omnem terram exiit sonus eorum, & in fines orbis terræ virtus eorum. Nimis confortatus est principatus eorum. Vide, Læli, si hæc soli Cephæ digne deferas, quod olim Dominus per Prophetas de omnibus præconisavit, nouissime per filium suum dixit ad omnes. Hoc Bernardus intelligens subdit eis, *Tu successisti in hereditatem, non ergo soli Petro.* Et nisi me intra Bernardi dogma continerem, jam decertarem, an quadrans an dodrans hereditatis Christi ad Papam aut Episcopos per eum, cui creditum est præputium, an per eum qui circumcisis euangelisavit, deriuatus sit. Sed quartam vel solidum sibi deferamus, dummodo meminerimus eiusdem Bernardi dicentis: *Præsis ut fidelis seruus, ad quid? Ut des illis escam in tempore, hoc est, ut dispenses non imperes. Recordare vocis illius: Sapientibus & insipientibus debitor sum. Ergo & infidelibus debitor es. Qua fiducia, qua conscientia Christum non offerimus eis, qui non habent? Expectamus ut fides incidat in gentes. At cui casu credere contigit? quomodo credent sine prædicante? Petrus ad Cornelium, Philippus ad Eunuchum missi sunt. Augustinus à Gregorio destinatus formam fidei tradidit Anglis, &c. An non limina Apostolorum plus jam ambitio, quam deuotio erit? an non vocibus eius tota die vestrum resultat palatium? an non spoliis eius omnis Italica inhiat inexplebili auiditate rapacitas? Et rursus in quarto: *Fuerunt ante te, qui se totos pascendis ouibus exponerent, pastoris opere & nomine gloriantes, nil sibi reputantes indignum, nisi quod saluti omnium obesse putarent, impendebant substantiam, impendentes & semetipsos, ut is qui ait: Et ego superimpendor pro animabus vestris, ponebant quoties oportuisset sine sumptu Evangelium.***

Hæc super pastura pompaque pontificali ex Claræuallensi dixisse sufficiat. Me verò quoddam Concilium memini legisse, ubi super inuestitura Ecclesiasticorum beneficiorum Clericis restituenda, & è contra de regalia secularibus restituenda Principibus disceptabatur: qua & prisca mores patrum præsentis Prælatorum pompæ conferebantur, & quod secularia sine lictoribus & apparitoribus & ornatus luxu vix administrari possunt. Talis tandem incidit consideratio, quod sicut sponsæ vel nouæ nuptæ primum solis ornantur, ut sponsis placeant, deinde sponsi adornant ipsas, ut & coram uniuerso mundo gloria Christi ornamentis sponsæ suæ refulgeat: Habeat igitur regalias, & quæ duntaxat Ecclesiam fuisse \* quam vidit ille ciuitatem sanctam Jerusalem nouam descendentem de cælo, à DEO paratam, velut sponsam ornatam viro suo: cum utique nos sumus, in quos fines seculi deueniunt, nullam aliam expectantes præter aduentum in gloria filii DEI. Sed neque fatis parabola quadrat. Quippe apud Comicum Clitipho Cliniam Zelotypia



pia languentem solatur ex eo, quod amica eius humili veste amicta, non alieno sed proprio, uti quæ sibi ornantur foeminae, sit ornata. Est ergo fornicaria sponsa, quæ ornatur alteri quàm Christo. In gentilitate fateor turpe reputatum esse absque ornatu sacerdotium. Nam cum tribunitiis, maxime Syllanis, factionibus nedum consulatus, sed & triumphus ac quæstura plebi cum patribus esset communicata, & (ut Liuius ait in quarto) *Quæsturam namque eam non honoris ipsius sine æstimabant, sed patefactus ad Consulatum ac triumphos locus nouis hominibus esse videbatur: Patres contra non pro communicatis, sed pro amissis honoribus fremere, negare, si ea ita sint, liberos tollendos esse, qui pulsi maiorum loco, cernentesque alios in possessione dignitatis suæ, Salii Flaminesque nusquam alio quam ad sacrificandum pro populo sine imperiis ac potestatibus relinquuntur.* Satis palpauit, non fodi parietem; Fodiat, cuius est fodere. Ideò autem extendimus sermonem nostrum, ut intelligas quam vane linguam tuam in me acuiisti.

Transgrediamur ad illam epistolam, qua dicitur, *Si quis hunc* (scilicet Romanum Pontificem) *contristauerit Christum, qui & credidit cathedram, non recipit, & quicumque contristauerit Doctorem veritatis, peccat in Christum.* Hæc suapte natura & significantia verissima sunt. Nam & Rex & Princeps, omnisque potestas sublimior, auctoritatis suæ virtutem per ministros expediat necesse est: quos si quis impedierit, DEI ordinationi resistit. Hoc nouit Appius Claudius, qui Magistratum primus suasit dictatoriæ potestatis cum licitoribus præeuntibus, dum dicit: *Pulset cum mihi licitorem, qui sciet jus de tergo vitæ suæ penes unum illum esse, cuius Maiestatem violauerit.* Ecce quod Maiestatem violat eius cuius licitorem pulsat violentus. Hoc hæreticus Septimus declarauit, dum docuit eos rebelles haberi, qui Magistratus & apparitores in exercitio commissi sibi officii impediunt rebellando. Ergo qui Christi legatum in exercitio legationis suæ nititur impedire, Christo rebellat. Sunt verò eius legati quibus dixit: *Ite in orbem uniuersum, & prædicate, &c.* An verò te fugit, in iuribus fiscalibus concessam esse facultatem resistendi apparitori aut commentariensi, non rite personam aut res innocentis inquadenti? Et Episcopus ex interdicto unde vi recte conuenitur, si Clericum licet prætextu pontificalis officii aut iudicialis auctoritatis non rite destituit vel deiecit. Tolle ergo cauillum, improbe cauillator, & nil reliqui habebis præter vanitatem. Quia nos Pontifici euangelizanti aut legationem Christi exequenti non restitimus, sed percussori violento,

Sed quod de putredine scatente in nos inuehis, omnium vilissime, hoc tibi reiicimus: quoniam pus tuum induruit ardore nequitiae, ut nullo unquam antidoto liquecat. Quia callidissimæ assentationis tuæ versutias etiam usque ad Imperatoris Romani palpationem pertendere tentas: cuius ignauiam ciues mirantur & hostes, totus postremo fastidit orbis Christianus, & quisquis Imperii Romani nomen reueretur, condolet alterum Sardanapalum hoc quondam triumphale solium occupare. Deinde profluis maledictis & conuiciis, quibus si quid vicissim obiecero, & clauum clauo retudero, nil plus egero, quam stercora tua vicariis obruere sordibus. Satiùs est ergo foetores tuos sordere, quia nil affers, in quo ingenia conterere valeamus.

Ad illa pergemus, quibus contendere paras, *licere Pontifici non vocatum condemnare*, exemplo Moyfi, qui absque præuia cognitione crimen idololatriæ plurima populi strage piauit. Subsequeris de Phinees in edicti sui transgressores, de Helia in Sacerdotes Balaam, & nuncios Regis Ochoziæ, de Petro & Anania & eius uxore Saphira, Paulo & Clinia mago. O miserum ingenium tuum, qui ex iis quæ nutu DEI & gratia singulari aguntur, ad humana fragiliaque opera per hominem peccatis obnoxium pro libito voluntatis suæ patrata, locos ducere credis exemplares, ac curuum sermone rotato tentas enthymema retorquere. Nonne iunior didicisti, humana priuilegia non esse in consequentiam trahenda? Tu verò diuinas actiones homini ducis communicandas. Disce nunc, ea quæ Spiritu DEI aguntur, nullis obnoxia legibus esse, nec mediatorem DEI & hominum Iesum Christum secundum diuinitatem, neque Sacerdotem secundum



ordinem Melchisedech, neque Papam eius vicarium esse, sed secundum humanitatem quam assumpsit Deus homo factus. Si enim una manu tot impios, quod Moyses strauisse perhibetur, ipse prosterneret, in ipso etiam sacro furore secernens tribum innoxiam; seu precibus eius Deus perimeret eos, quos ipse censuris etiam inauditos vexauit innoxios, aut Coelibum Ducem officio priuaret oculorum, iam gloriari posset omnia nutu DEI procedere. Denique surripis colloquium Moyfi cum fratre præmissum ante eadem, & suppressis verba Petri, scilicet; *Anania cur tentauit Sathanas cor tuum mentiri te Spiritui sancto?* quæ super singulis responsa prolixa forent. Unum te latere non sino, quod mystica Theologia ita demum est argumentatiua, cum à Christo vel à sanctis Patribus inuenitur recepta. Vide nunc si nostra vel tua exempla sunt recepta.

Nunc illud examinemus, quod tu vocas efficacius, egoque id reor propositæ materiæ propius adaptari, de Corinthio, quem absentem corpore Sathanæ tamen tradidit Apostolus absque iudicii tela, ob reatus sui notorietatem, quia Corinthios non latebat incestus eius in nouercam. Non arbitreris, Læli præsumptuose, me vasis electionis censuram in Corinthium ignorasse: sed eius exempli translationem portentosam assero, dum rete mihi texens sic licia trahis: *An verò inficiari poteris, crimen tuum non fuisse notorium, qui palam criminosum & Sacrilegum Sigismundum in crimine confouebas, &c. nec calumniaris id non esse facti permanentis, &c. id iure factum esse contendis.* Post hæc deliramenta tandem eo recurris, si factum nulla possit tergiuerfatione cædari, neue defensio ulla competere, liceat absque cognitione præuia facinorosum damnare. Insuper adiungis, *quod si quis peccat in conspectu iudicis, illico plecti debet:* addere debebas hoc verbum, *scilicet ut iudicis,* scilicet astantibus circumsepti, ut sit par iudicialiter confitenti, in quem quales sint iudicis partes, olim nosti scholaris, nunc doctoratus assumptione litura literis inducta est tuis. Nunc ad singula quæque nostra festinat Apologia. Quid tecum Læli contendam, qui nil omnino sapias, nec quid iudicare sit intelligis, nec quomodo vas electionis iudicauit animaduertis. Tu forte putas, neminem iudicare, nisi cui de publico sit data potestas. Iudicat sensus de sensato, & intellectus de cognito, cum phantasmata speculatur vel intuendo, aut ex intuitis eliciendo aut abstrahendo circumstantias usque ad rem secundum se, aut discurrendo per varietatem cognoscibilium, ut de morbo medicus, ac quisque de eo in quo plurimum pollet. Apostolus absens iudicauit ut præsens. At quomodo? certe intra se iudicauit, quid de Corinthio incestuoso facturus esset, quando cum fratribus Corinthiis ad se venturis constitueretur, quem in spiritu vidit operantem opus sceleratum, aut forte litteris sibi fuit indicatum ad Ephesum. Non ergo tradidit, donec Corinthios congregauit. Hoc habent Apostoli verba dicentis: *Ego quidem absens corpore, præsens autem spiritu iam iudicauit, ut præsens.* Quare? quia in Spiritu vidi. Quid autem iudicauit? Scilicet eum, qui sic operatus est, *in nomine Domini nostri Iesu Christi congregatis vobis, & in meo spiritu cum virtute Domini Iesu, tradere huiusmodi Sathanæ in interitum carnis, &c.* Iudicauit ergo Apostolus intra se secundum Spiritum, Sathanæ verò tradidit congregatis Corinthiis fratribus, non Ephesiis aut Galatis. Alias argumentationes vacuas esse liquet. Siquidem Duci aduersus Cardinalem constiterit superesse defensionem. Id verò quanquam iam liquido compertum tibi, etiam quam ut breuius explicem, sic accipe. Cardinalis tuus sponte, libere Capitulo suo annuente, prædecessorum suorum more, Ducem Sigismundum aduocatum Ecclesiæ suæ recognouit, ac omnium rerum eius, cum duobus castris in Carentana sitis; eaque omnia, si quando opus esset, in auxiliis aduocati fore spondit. Sub hac tutela impinguatus, dilatatus, Ecclesiæ castra ad manus externas transferre tentauit. Extant documenta manu sua scripta, extant qui tractarunt, & apud quos machinatum est. Dux statui suo prouidit, illico cautione recepta securitatis status sui, omne regimen Ecclesiæ apud Cardinalem liberè permansit, hoc modo prouiso, ne castra sub extero dominatu redigantur. Vide num satius fuerit periculis



periculis obviare, quam post causam vulneratam remedium quærere. Nam (ut aiunt) suspicari de præterito, quam re ipsa experimentum capere est melius.

Postea miserrime insanis, quasi Princeps legibus solutus damnare valeat inauditum. Si quæ scholaris didicisti, non absterfisset Doctoratus vel Pontificatus, iam promptum haberes, ubi scriptum est? *Etiam si coram Principe arrogatio habeat fieri, vocandos esse quorum interest.* Hic vero de maiori præiudicio agebatur. Dehinc cæcas ineptias tuas effundis innuens, quod sicut testamentum coram Principe factum omnium testimoniorum solemnitas exuperat, sic quæ per Principem aguntur, legibus adeò soluta sunt, ut nec in ius vocationem requirant, tanquam à solius Principis potentia vim habeant rei iudicatæ. O pauper sensus? Dic, oro, cui præiudicatur ex omissione solemnitatis in testamento, dummodo constet, sic placuisse testatori? at cui præiudicatur per priuilegium testamenti militaris, aut ad pias causas, vel inter liberos, aut ab intestato successuros, aut in pacto mutuae successionis? aut si quis heres institutus neget à se legata relicta, deinde conuictus se defendat, non esse solemniter relicta? Sed an quocunque casu etiam Principis præsentia facit narrata in testamento vim veritatis habere, sicut res iudicata? Quid si testator coram Principe dicat: *Centum quæ mihi debet Titius, Seio do, lego*; an probetur debitum? Disce pauper ingenio inter iuris solemnitatem & naturalem secernere necessitatem. Erubescere hæc tua, scripta doctis hominibus innotuisse. Nam licet de me malè meritis sis, mallet tamen errores tuos penes te retinuisses.

Alias vanitates pari errore resperfas mitto, hoc unicum tibi concedens, quod ubi seditio imminet, ubi gentes & regna commouentur, licere Principi absque partium vocatione imminetia præuenire pericula, quæ interea surgerent, postea fortasse non reparabilia. Sicut apud Valerium in sapienter factis comperio, quod ciuitate clandestinis machinationibus sæuiente, Princeps eius lege de indemnatis non castigandis abrogata, comprehensis continuo fontibus & necatis, illicò legem restituit. Si quis ergò Pontifex in dissensione pro Imperio Romana habita officiosè intervenit, quid habet hoc commune cum causa nostra, aut etiam cum causa Maguntina, de qua Domino annuente posthac disceptabitur. Nam & de seditiosis Justinianus nouissimo iure prouidit, ut leuiori suspitione præuia contra notatos in crimine illo procedatur. At in omnibus hiis casibus tela iudicii succiditur, naturalis necessitas non violatur.

Postremo repetitis blasphemias, ut malignitati tuæ naturæ satisfacias, tandem secernis, an de crimine contra quempiam inquiratur ut damnetur, an ut declaretur poenam promulgatam incidisse: quo ultimo casu nil novi statuitur, sed reus legis factiosus nunciatur. O cauillator præsumptuose, num audisti Ducem Sigismundum statui suo prouidisse, ne Cardinalis dextram eius fallens alium dominum immitteret? Tales proditores Maro in VI. apud inferos priore loco supplicii deputauit. Audiendus igitur erat Dux: quia etsi de facto constabat, de hoc erat disceptandum, num iure vel iniuria factum esset. Quod autem ad Concilium appellatum est, id argui non potest: quia ex salutaribus magnæ Synodi institutis iam dies Concilii cessit, decennium effluxit: culpandus est Pontifex qui resistit. Sed dic miser, qui tam parum pensi habes; Si quis Iudex falso denunciaret Titium homicidii reum, & idcirco lege Cornelia de sicariis obnoxium, an minorem fecerit iniuriam, quam si decernat eum homicidii reatum incidisse. Erras longe, si putas ullam tenere pronunciationem, sententiam vel declarationem, aut falsam publicationem, contra non vocatum vel inauditum. Num Pontifex ipse secum dissidet, qui ducem vocauit causas dicturum, cur ad poenas comminatas procedi non debeat: at legatum Ducis id parantem carceris comminatione disternit, ne quid allegaret. Tibi dico omnis cognitio causæ vel rei, quæ sit futura præiudicialis, euocationem prærequirit: siue de facto constet, & quæratur facinoris auctor, aut constet factum, & per quem, sed dubitetur iure vel iniuria; seu constet non iure factum, & disputetur de genere poenæ. Sed & quandocunque



de alterius præiudicio certatur, vocandus est is qui habet interesse, etiam Principe cognoscente quem latere possunt hominum facta: solus Deus est, quem nullum fugit secretum.

De primatu Ecclesiæ Romanæ.

Sentina mendaciorum perfidissima descendens in barathrum calumniarum, quid me calumniaris quasi primatum Ecclesiæ Romanæ pernegem? qui scio omnibus Apostolis esse dictum: *Ite in orbem, & quodcunque ligaveritis, &c.* Non poteris efficere, ut verba mea sonent aliud quam vox Evangelisantium bona, prædicantium pacem. Tu verò undecim Apostolos suppressere quæris, ut omnem Ecclesiasticam potestatem redigas in Petrum, neque fateris cœtum Apostolicum uno superiorem: qui tamen cœtui paruisse perhibetur. Sacra generalia Concilia inficiaris esse fidei Christianæ firmamenta, & a Christo habere potestatem in omnes Christi fideles, etiam si Romana pontificali præfulgeant dignitate. Quod te malum rationis in hanc dementiam coniecit, ut ex meis veris & Evangelicis prolatis infallos errores incideres? An ulla est discordia veris, semperque sibi certa cohærent, & omne verum vero consentit. Dic tu, qui soli Petro pasturam attribuis, quid est quod discipulus ille, quem diligebat Iesus, de ipsius Salvatoris pectore fluentia sacra potavit: an ut intra se contineret, an ut evangelisaret? Dixerunt autem discipuli XII. in congregatione multitudinis credentium: *Non est æquum nos derelinquere verbum DEI?* Et autem Evangelizare pascere, scilicet pabulo verbi divini. Quid vas electionis, nuncius Iesu Christi? *Non ab hominibus, neque per hominem, sed per Iesum Christum & DEUM Patrem, &c.* Sed quia utrumque errorem tuum postea falsis rationibus fucare præsumis, in processu tractatus latius confutabo, ac confusionem ordinis tui instigatus à te vestigiis imitabor. Primo veniam habiturum fidis, si paulò altius principia repetas. Proiicis ampullas, & professus grandia turges. Quid dignum tanto feret hic promissor hiatus?

*Parturiunt montes, nascetur ridiculus mus.*

Gloriaris te loqui scire, quod nullus ignorat: *Ecclesiam ab eo constitutam, cuius perfecta sunt opera, quique legem naturæ ut infima summis, summa infimis, &c.* Me admones eorum, quæ didici puer, scilicet elementarem mundum numerorum lege compactum. Hoc ita pueri nostri pronunciant: Omnia quæ à primæva rerum origine processerunt, sub numerorum ratione formata, &c. Deinde docetur, quod quantum uniuscuiusque elementi soliditas aut raritas alterum excedit vel ab alio superatur, tantundem alterum quantitate stringi vel distendi: rursus si una qualitate aduersatur, altera communicatur. Dehinc ætherei mundi compagem attingis, de Angelis & Archangelis grandia, quæ præfando spondisti, exoluisse putans: quæ quia postea superbius ampullaris, iam valere sino. Sed ne nos litterarum expertes aliis insinues, accipe istud Socraticum contra Callidem in Gorgia relatum. *Dicunt autem Sapientes ô Callides, & cælum & terram, & Deos & homines societatem & amicitiam, & ornatum & temperantiam & iustitiam continere, & hoc totum ea de causa mundum nuncupant, ô amice, non immunditiam. Tu autem videris non attendisse, quia æqualitas Geometrica & in Ideis & in hominibus plurimum valet.* Ecce quod Gentilis harmoniam sensit omnium rerum compagem: neque id nostri Pædagogi nescierunt, qui nos docuerunt quod sequitur:

*Tu triplicis mediam naturæ cuncta moventem  
Connectens animam per consona membra resolvit.*

Ergò si nil aliud habes, cur illud non custodisti? Compagem Ecclesiæ solus Papa soluit, qui membrorum officia præfocando impedit, & oppilando suffocat, ne quis Episcoporum officium suum tute valeat explere, iuncturas disiungit, confundens harmoniam, dum omnium officia solus sibi vendicat. Aufert corpori sanitatem, dum membra singula singulis officiis non finit uti. In processu di-

cis,



cis, *Unum in Ecclesia Principem, in quo & ex quo* \* nemo contradicit. Si Petrum, resistit tibi Paulus : *Ego enim à Domino accepi, quod & tradidi vobis, non à Petro.* Et rursus : *Non ab hominibus, neque per hominem, sed per Jesum Christum.*

Pergis dicens, *Non à multis unum, sed multa ab uno.* Cum à Pædagogo meo interrogarer infans, *Quid nam esset numerus ?* respondi, *Unitatum collectio ab uno scandens ad plura.* Similiter & tempus *mensura motus rerum mutabilium.* Postea ab Augustino in ultimis Confessionum libris didici, esse discretionem potentiae ratiocinatiuæ super rebus numerabilibus aut fluxis. Tu vero quid dixeris, vix consideras, quia non inferunt quod prætendis : ut Irnerius ait, consequentiam tollit contrariam, non inducit.

Prosequeris, *ut in corpore multa membra unius capitis sumunt influxum, &c.* Fatemur, sed non ita ut caput manus aut pedis usurpet officium, reliquis scilicet Episcopis nihil relinquendo.

Sequitur, *Inferiores motus primi mobilis motu gubernantur.* At non Sol rutilo concitus igne Phæbus gelidum impedit axem, sed veterem seruant sidera pacem.

Sequitur, *Ut ex reuerentia inferiorum ad caput una concordia fieret.* Vicissim lege S. Gregorium corripientem Episcopum, quod se *Universalis Ecclesie Episcopum* nuncuparet : Dicentem : *Cum omnia tibi tribuis, adimis mihi, &c.* Honor meus est fratrum meorum solitus vigor.

Sequitur, *In apibus unus Rex est, & græves unam sequuntur ordine litterario.* Si attentius quæ legisti, obseruasses, iam scires illud de quolibet Episcopo dictum esse, ut sequitur : Scire debetis Ecclesiam in Episcopo & Episcopum in Ecclesia esse, neque inficiari debes in Ecclesia esse Romanum Pontificem, extra quam nullus saluatur. Erit igitur Ecclesia Pontifice maior, sicut coetus Apostolicus fuit maior Petro. Sed quia gloriaris in apum metaphora, quam fateor esse præcipuam, nullus quoque populos attentius Regem obseruare, quo amisso rumpitur foedus, mella diripiuntur, favusque dissoluitur. Eum igitur humeris attollunt, & obiectant corpora bello, pro quo nec mori recusant. Sed quare, ut singula quadrent, omnes enim in commune mellificant, communiter & prolem educantes (ut ait Maro) solæ communes natos, consortia tecta urbis habent, & in medium quæsitæ reponunt. Rex autem est operum custos; non sic etiam Pontifex Romanus; qui Piccolominibus Pientiaque thesaurifat? Talis Rex iubetur expelli, ut rursus ait Maro :

*Deterior qui visus, cum ne prodigus obsit,  
Dede neci, melior vacua sine regnet in aula.*

Postea calumniosè præuaricaris Bernardum Claræuallensem, quasi omnem potestatem in solum Petrum innuat esse transfusam, dum dicit : *Sicut Seraphin & Cherubin caterique ordines sub uno capite, &c.* Sed longe alia est mens Bernardi, qui execrans detestansque Prælatorum exemptiones, Eugenium sic arguit : *Subtrahuntur Abbates Episcopis, Episcopi Archiepiscopis, ii Patriarchis : & sic facitendo probatis vos habere plenitudinem potestatis. Honorum ac dignitatum gradus, & ordines quibusque suos servare positi estis, &c.* Tu ne denique tibi licitum censeas, suis Ecclesiam mutilare membris, confundere ordinem, perturbare terminos, quos posuerunt Patres tui? Si iustitiæ est ius suum cuique servare, auferre cuiquam sua quomodo poterit convenire? Erras, si ut summam, ita & solam institutam à Deo Apostolicam potestatem existimas, & dissentis ab eo, qui ait : *Non est potestas, nisi à Deo.* Proinde quod sequitur. *Qui potestati resistit, Dei ordinationi resistit, etsi principaliter pro te facit, non tamen singulariter.* Rursus, omnis anima potestatibus sublimioribus, tanquam in multis. Non tua ergo sola potestas à Domino, sed & inferiores, &c. Monstrum facis, si manum submouens digitum facis capiti collateralem, aut in corpore Christi membra locas aliter, quam disposuit ipse. Nisi putas, alium esse qui posuit



in Ecclesia quosdam Apostolos, quosdam autem Prophetas, alios Evangelistas, alios Doctores & Pastores, &c. Sicut illi Cherubin & Seraphin &c. Quod si dicat Episcopus; Nolo subesse Archiepiscopo, aut Abbas, noli obedire Episcopo, hoc de cælo non est, nisi tu forte Angelorum quempiam dicentem audisti; Nolo sub Archangelo esse. Vides ergo doctrinam Bernhardi Eugenio sinceriter datam, quam tu impiè præuaricaris, qui ex reservationibus Ecclesiarum Cathedralium & confusione hierarchiæ consequentis ad illam nactus es pontificatum.

Sequitur nunc illud Evangelicum, *Tu es Petrus, & super hanc petram ædificabo Ecclesiam meam.* Multi calumniatores tui pares ex hoc verbo audent asserere, super solo Petro ædificatam esse Ecclesiam. Illis tuus Bernardus dissensit, ubi supra, dicens: *alios Apostolos, Prophetas, Evangelistas, Doctores, Pastores ad consummationem Sanctorum, in opus ministerii, in ædificationem corporis Christi.* Atque hoc corpus, quod tibi ipse Paulus hoc suo Apostolico figurans eloquio, & capiti convenientissimè adaptans, totum ex eo compactum perhibet, & connexum per omnem iuncturam subministrationis, secundum operationem in mensuram, uniuscuiusque membri augmentum corporis faciens, in ædificationem sui in charitate. Christus est ergo caput, cuius membra sumus per charitatem. Illud igitur iungas: *Petra autem erat Christus indeficiens.* Nam & Hieremiæ dictum est à Domino: *Ecce constitui te super gentes & regna, ut euellas & destruas, disperdas & dissipes, ædifices & plantes: nec tamen ideo summa rerum sibi soli collata perhibetur.*

Sequitur, *Una est columba mea, perfecta mea, &c.* unitate fidei & charitate Christi, non Petri vel Pii: quibus defunctis non desinit Ecclesia, neque expirat, si duo avari certent de Papatu, ut sæpe, aut Papa erret in fide, ut quandoque, Imo & Indum recte credentem in Ecclesia esse confido, ne coactio necessitatis ipsum excludat à regno Dei, quod promisit credentibus in se Dominus.

Sequitur, *Ego & Pater unum sumus.* Quis hic dubitet Jesum Christum patri consubstantialem? nec dubitatur, quin Christus ascensurus ad Patrem cuncta salutis nostræ opportuna prouiderit: qui & post ascensionem & Spiritus sancti missionem Paulum ad præputium misit, de quo differere post hoc non omittam.

Redis nunc rursus ad Claravallensem, quasi ille rem omnem soli Papæ attribuat. Cogis me rem illam ab initio attingere, ne putent homines ignari, Bernardum ipsum pompam & gloriam Eugenio persuasisse. Bernardus Claravallensis scripsit ad Eugenium super Pontificatu librum unum, hortans eum ad DEI cultum, & contemptum mundanorum, dum dicit: *Putasne tempora hæc sustinerent, si hominibus pro terrenis litigantibus voce Domini responderes: Quis me constituit super vos? Et istud: Cum obsidio urbi & barbaricus ensis immineret, beatus Gregorius extremam & obscurissimam partem Ezechielis tam diligenter quam eleganter exposuit. Et illud: Disputationes aduocatorum magis ad subuersionem, quam inuentionem proficiunt veritatis. Et illud: Timeant nummularii, nec fidant in nummis, scientes effundere quam accipere te paratiorem.* Ominatus est vir sanctus sese calumniari: idcirco telam succidit, librumque clausit hiis verbis: *Atque hic sit finis istius, ne duplo te oneret minus suavis oratio, si & longa fuerit.* Hoc etiam probat sequentis libri principium, quod continuo apologeticum est, tum circa prioris libri præcepta, tum circa titulum eius, quem illi iam *De consideratione* imposuerat. Tantus enim liuor in virum sanctum ascenderat, ut & titulus libri veniret in calumniam, quasi vir sanctus considerationem pro contemplatione nuncupasset. Huiusce defensionibus prælibatis vir sanctus ad prioris libri præcepta reuertens, ait: *Non est quod blandiatur celsitudo. Disce tibi sarculo opus esse. Nam Propheta cum similiter levaretur, audiuit, ut euellas & dissipes, &c.* Quid aliud hoc innuit, nisi cum leuaretur Propheta, sicut tu; quia similitudo differentiam notat non identitatem, &c. *Tolle fucum fucati honoris.* Ex quo satis intelligitur Doctorem sanctum calumnias esse perpeßum, qui & iam dixerat: *Libens in me accipio detrabentium linguas maledicas, & venenata spicula blasphemantium.* Et cum plurima scripsisset vir sanctus in execrationem deliciarum & pompæ pontificalis,



calis, subdit illa : Sacerdos magnus, summus Pontifex, &c. Deinde submittit de prioritate Petri ; at non ita , ut illi soli potestas sit delegata , ut superius dixi super eisdem verbis. Quid igitur in Bernardo gloriaris , qui delicias & pompas Pontificis adoras ? ad quarum detestationem & omnium temporalium rerum contemptum omnes illi quatuor libri à viro sancto profecti sunt, non autem quod Eugenius præcæteris illis abundaret, sed ut omnes Romanos Pontifices ministerii sollicitudinisque pontificalis commonefaceret, ut ipse quoque testatur. Nam cum singula quæque ad eminentiam ipsius dignitatis spectantia explicuisset, admonet eum suæ vilitatis , & prædecessorum suorum humilitatis, quæ tu impiè retices & suppressis, quasi vir sanctus delicias, pontificales & devorationem omnium velit approbare, qui tamen contra Pontificis auaritiam scribens ait, *omnia possidens non contentaris uniuerso, &c.* ut scripsi supra, super his verbis : *Tu primatu Abel.* Hac igitur lege coëamus & conciliemur, Clarævallensem in omnibus ut accipias, ut ipse Pontificis eminentiam veneremur, auaritiam verò cum Bernardo detestemur. O quid putas dicturum fuisse Bernardum, si vidisset Romanum Pontificem de minutissimis beneficiis disponentem , & hierarchicum ordinem per omnia confundentem , & suum monasterium S. Anastasii de urbe concessum in commendam ? qui ægre tulit Abbatum exemptionem damnans eam velut perturbationem ordinis à sanctis Patribus præfiniti.

Inter hæc unam admisces hæresin , dicens ; *In reliquos discipulos non nisi per Petrum sit deriuata potestas.* Hoc neque Anacletus dicit, nec magnus Leo consentit , fatentes Petro quidem omnimodam potestatem traditam , id est, nullis terminis coartatam ; minime autem diffitentur & cæteris Apostolis clauces esse traditas à Christo immediate. Dic rudis hæretice , ubi legisti , Petrum quemquam Apostolorum in Sacerdotem vel Episcopum consecrasse ? Ergò discite , omnes undecim Apostolos viua voce veritatis ordinatos : quia manuum impositio ritus est ab Apostolis introductus , postea solemnes prædicationes adiecit Ecclesia. Matthiam autem non aliter legimus ordinatum , nisi quod inter duodecim annumeratus est, & spiritum sanctum cum aliis accepit, ita ut non esset ulla manuum impositio necessaria. Atque hodie veritas est indubitata, nedum sacrum ordinem, sed & omnia Sacramenta à Christo immediate conferri. Episcoporum autem & Sacerdotum ministerii exhibitio corporalis incorporalia sacra contingere non valet , sed spiritualis collationis præbet indicium infallibile : quia non faciet Iesus irritum pactum suum ut cum minister eius officii sui ministerium in nomine eius exhibet , ipse præstat quod repromisit. Dic si speculator in colle consistere iussus , hostili exercitu inter angustias viso , signo dato moneat Imperatorem, sicut pactum fuerat , isque subito impetu obruat hostem, cui actionem attribuis , cui summam rerum defers ? Te parem esse reor Simoni , putanti manuum impositionem Petri ac Joannis factam super baptisatis in Samaria, qui nondum acceperant Spiritum sanctum, corporali quodam tactu id effecisse : Sicut ouum, quod ex cubatione gallinæ viuificatur. Cui Petrus ait : *Existimasti domum DEI pecunia possideri. Pœnitentiam itaque age, &c.* Rudis es , de sacris rudissime sentiens, alta tamen attingere audes, dum dicis, quod missio Petri & Johannis in Samariam à Coapostolis facta non sit indicium maioritatis omnium Apostolorum ad Petrum, & dicis similem fuisse Arrii impium errorem dicentis, *Spiritum sanctum patre filioque minorem quia mittatur ab illis.*

O philtrum grossum, Feltrensi populo dignum ! qui generationem & generationem, spirationem & processione æternam , Patris Filii & Spiritus sancti putas corporalibus rebus æquari , ubi mittens ac missus , generans & genitus substantialiter absque ulla essentiae communicatione distinguantur. Sed ad textum redeamus. Ille ipse Lucas qui scripsit : *Conuocantes autem XII. multitudinem discipulorum, dixerunt : Non est æquum nos derelinquere verbum DEI, &c. Considerate viros ex vobis boni testimonii septem, & elegerunt Stephanum, Philippum, Prochorum, Nicanorem, Timonem, Parmenam & Nicolaum, &c.* Vides quomodo apud

Hiero-



Hierosolymam XII. Apostoli congregauerunt Concilium, totumque Concilium elegit prædictos septem, quos constituit super hoc opus scilicet euangelisandi verbum Dei, non autem Petrus. Ille idem Lucas subiungit, quod Stephano lapidato omnes dispersi sunt per regiones Iudææ & Samariæ, præter Apostolos, & qui dispersi erant pertransibant euangelisantes. Philippus autem descendens in ciuitatem Samariam prædicabat illis Christum, intendebant autem turbæ hiis, quæ à Philippo dicebantur, &c. Et post pauca subdit Lucas: *Cum autem audissent Apostoli, qui erant Hierosolymis, quia Samaria recepit verbum Dei, miserunt ad eos Petrum & Iohannem, &c.* Ex hiis constat luce clarius, Ecclesiam Dei Stephani lapidatione dispersam, solis Apostolis manentibus congregatis, apud quos integra permansit auctoritas. Qui cum audissent Samaritanos in Philippum intentos, miserunt & Petrum & Iohannem. Quid igitur calumniaris, æquivocando missionem Philippi ac Iohannis à missione Petri, in eodem orationis contextu, præcipuè autem inter Petri ac Iohannis, quasi aliter Petrus sit missus, aliter Iohannes? an quia Petrus dignitati suæ derogatum esse duxisset, qui tamen à solo Paulo reprehendi se sustinuit? Ita enim Galatis scribit vas electionis: *Cum venisset Cephas Antiochiam, infaciem ei restiti, quia reprehensibilis erat, &c.* Neque enim Petrus quidquam Paulo contulit, sed ipse contulit Petro, quod acceperat à Domino. Tu verò somnia delirans dicis, *Qualiter Consilarii mittant Regem ad bellum, quamquam Rex sit cunctorum Dominus, ita Petrus ab Apostolicis Samariam missus sit, impulsis etiam amore eorum ad quos mittebatur, scilicet Samaritanorum.* Utrobique deliras phantastice. Neque enim Regii Consilarii Regem in bellum mittere, sed consultanti Regi, an bellum indicere vel suscipere an exercitum ducere, an alium illi præficere expediat, adesse habent ac persuadere. Ita Xerxen fecisse legimus, cuius tantæ copiæ fuisse dicuntur, ut nec mare classibus, nec campestris equestribus neque aëra telis capiendis sufficere posse, assentatores aulae suæ gloriarentur, præter unicum, qui censuit, *Immoderata regi non posse: quæ verò regi non possent, minime subsistere.* Ita & ceteri Reges fecere: nisi forte quis præcario regnet aut vacuo Regis nomine contentetur, ut olim ante Faramundum Francorum Reges vidisse perhibentur. Et quia nimium ineptè locutum esse comperio, existimare cogor te minime intelligere, quid Rex, quid regnum, quidue habeat dignitas & potentia regni. Id ergo perstringam, quia etiam à præsentis tractatu non abhorret. Etsi omnis vivendi & agendi ritus & norma, quibus pax & tranquillitas gentium vel populorum salubriter custoditur, generali vocabulo *Politia* nuncupetur: tamen propter agendi varietatem, quam vel prauitas regnantium, vel ipsa dominantium improbitas, aut fati fortasse necessitas humana iudicia superans tum persuasit, tum coëgit, auctores de politia scribentes illam profectò trifariam distinxerunt. Primam, quæ Principi Deo, qui omnem mundum regit, propius accedit, *Monarchiam* vocauerunt. Ea quidem in se ipsa perfectissima est ac populis accommodata, cum heroico viro defertur. Tales quippe fuerunt, quos Græcia diuinis colit honoribus, ut & Romani Quirinum suum ad astra tulerunt, qui tamen ob asperius ingenium à Senatu discerptus est. De his focrates in Apologia: *Nemo unquam Reipublicæ gubernator erasit, si liberè ad populum locutus sit, ac his, quæ iniuste indignèque plerumque sunt, se opposuit. Sed necesse est ei, qui velit reuera pro iustitia pugnantem vel exiguo tempore saluum fore, priuatum degere, neque Rempublicam attingere.* Tales neque hoc cælum, neque tellus nostra gignit, quorum meminit Philosophus 3. Politicorum & Flaccus ad Ofilium: *Hos utinam inter heroas natum tellus me prima tulisset.* Sed quia unicus hominis deprauatione Monarchia vertitur in tyrannidem, quæ fuerat Septimi Regis ab urbe pellendi causa, & Imperii consularis pro regno permutandi, successerit regimen optimarum, quod *Aristocraticum* vocatur, quia unicus hominis deprauatione non adeò corrumpitur, quin ab incorruptis valeat rectificari. Hoc est, quod Cicero ab exilio reuersus commemorat, cur tribunitio furori parere & in exilium abire maluerit, quam



ciuilibus armis decertare, quod alterutro Consulium incorrupto agente non dubitabat se rediturum : quem tandem omnis Italia humeris suis reportauit.

Cum autem optimatibus dominandi libido incescit, Aristocratia in Oligarchiam mutata est : ad tertium genus agendi deuentum est, quod in specie *Politiam* vocant, in qua quilibet vicissim participat, id vulgò *Populare* vocatur, corruptum verò in tumultum vertitur, quem appellant *Democratiam*. In quolibet autem horum Principatuum genere, si incorruptum regimen permanserit, populi unitas sustentatur. Ita & in Conciliis universalibus etiam Papa sublato, Ecclesiæ unitas conseruatur, & manebit una columba formosa perfecta, sed & unum ouile unius pastoris æterni, Christi Domini, Sacerdotis in æternum secundum ordinem Melchisedech.

Id verò, quod de amore in Samaritanos delirando somnias, nil proficit, nec inter missionem Philippi, Prochori, Nicanoris, &c. ac Petri & Iohannis quidquam secernit. Ut autem intelligas, quam sit impertinens ac disparatum enthy-mema, quod missione sempiterna patris & filii ad Spiritum sanctum, ac missione coetus Apostolici ad Petrum seu quemuis Apostolorum remotissima similitudine retorques, sic accipe. Legerat Arrius : *Patrem gignere filium, ipsumque genitum à Patre*. Rursus, *Patrem ac filium spirare Spiritum sanctum, illumque à Patre & filio procedere*. Alietatem ergò discretiui proprietatis personarum Arrius accipiens, habentem se per modum causantis & causati, ex rebus autem naturalibus productis & creatis ad Deum æternum, ad personas coæternas, & coæquales similitudine traducta, maioritatem inter illas esse putauit ; minimè considerans, quod in æterna generatione generans dat genito quidquid est, & quidquid habet, nil autem sibi diminuens. Similiter & spirans dat spirato vel procedenti : hoc solo dempto, quod pater filio non communicat innascibilitatem vel gignendi actiuam proprietatem, qua quidem discretionem à Filio secernitur. Similique modo Pater & Filius Spiritui non communicant actiuam spirationem æternam. Has enim notiones separatas esse oportet, ne personæ confundantur. Diuina autem essentia personis singulis communicata, nec generans, nec genita, neque procedens, simplex & ineffabilis eas facit esse coæquales. Ergò Pater & Filius Spiritum æterna spiratione spirantes, atque etiam nouissime in discipulos Spiritum mittentes, nihil aliud à se spirant. Nam Deum de Deo, genitum non factum confitentes, æque Deum de Deo, & lumen de lumen mitti ac procedere confiteamur oportet. Et sicut generans & genitus unum sunt, sic mittens & missus. Nec tamen ob hoc idem seipsum gignere, mittere vel spirare dicitur, ne persona seipsam, vel essentia gignat essentiam. Non autem sic coetus Apostolicus unum est cum Philippo, Prochoro, Petro vel Ioanne.

Pergis deinde fingendo, quasi ego innuerim Petrum ex Antiochia Romam à reliquis discipulis esse transmissum. Hoc de me (credo) fingis, ut habeas in quod conuitium habeas : neruos autem intendis, si efficere possis, urbem Romam Petri sedem esse præcipuam, & primatum Petri ipsius urbis Romæ principatu, quem tunc habebat urbs ipsa confirmes. Rem satis tranquillam commouendo, plus dubitabilem reddis. Nosti communiter omnibus esse dictum : *Hoc facite in meam commemorationem*. Rursus : *Sicut me misit Pater & ego mitto vos*. Insufflauit & dixit eis, *Accipite Spiritum sanctum, quorum remisistis peccata, remittentur eis*. Rursus : *Euntes docete omnes gentes, &c.* His quidem verbis nullus delectus personæ exprimitur, nullus orbis terræ locus cuiquam assignatur. Sed in omnem terram exiuit sonus eorum, & in fines orbis terræ vox eorum. Per reuelationem autem Pauli scimus, quod licet ipse per orbem euangelizare habebat, de quo scribitur : *Hic est mihi vas electionis, ut portet nomen meum coram gentibus & Regibus, & filiis Israel*, aliquo tamen respectu principaliter missus ad gentes, ut de se loquutus refertur in Actis : *Factum est autem reuertenti mihi in Hierusalem, & oranti in templo, fieri me in stupore mentis, & videre illum dicentem mihi : Festina & exi velociter*



lociter ex Hierusalem, quoniam non recipient testimonium tuum de me. Vade, quoniam in nationes mittam te. Ipse quoque Galatis secundo scribens ait: Cum vidissent Iacobus, Petrus & Iohannes, quod creditum est mihi Evangelium præputii, sicut Petro circumcisionis. Ac rursus: Iacobus & Cephas & Iohannes, qui videbantur columnæ esse, dextras dederunt mihi & Barnabæ societatis, ut nos in gentes, ipse autem in circumcissione irent Evangelium prædicandum. Quæ omnia magis inuere videntur, urbem Romam Pauli quam Petri fuisse prouinciam, à Christo sibi non a Petro assignatum, sicut & aliam quamlibet suam functionem, ut ipse Galatis primo scribens orditur: Paulus Apostolus non ab hominibus neque per hominem, sed per Iesum Christum, & Deum Patrem, qui suscitauit eum à mortuis. Sed & secundo Galatis scribens se à nullo puro homine accepisse significat, dicens: Mihi enim qui videbantur esse aliquid, nihil contulerunt, sed è contra cum vidissent, quod creditum est mihi Evangelium præputii, sicut Petro circumcisionis. Quod enim operatus est Petro in circumcisis, operatus est mihi inter gentes. Et cum cognouissent gratiam, quæ data est mihi, Iacobus et Cephas & Iohannes, dextras dederunt mihi, &c. Lucas insuper Actuum historiam clausurus, cum dixisset, Et sic venimus Romam, post pauca subiungit Apostolum Iudæis Romæ loquentem: Notum ergo sit vobis, quoniam gentibus missum est hoc salutare Dei, & ipsi audient illud. Mansit autem biennio toto in suo conductu, & suscipiebat omnes, qui ingrediebantur ad eum, prædicans regnum Dei. Omnes ergo suscipiebat, licet gentibus principaliter missus est. Ut & Romanis secundo scribens profitetur: Vobis enim, inquit, dico gentibus, quamdiu quidem ego sum Apostolus gentium, ministerium meum honorificabo, si quo modo ad amulandum prouocem carnem meam. In Ecclesiis certe Germanicis decantatur: Petrus Romam Apostolorum Princeps adiit, Paulus Græciam, ubique docens gratiam. Et historiæ non leues, sed extra sacrum Canonem Bibliæ, & Ecclesiasticæ legendæ Sanctorum habet, Petrum inuenisse Paulum Romæ prædicantem. Porro etsi sciam non omnia sanctorum Apostolorum gesta sacris litteris explicata esse, attamen nimis alienum videtur, quod neque Lucas Actuum historiæ scriptor, Pauloque adhærens, ipseque Paulus de hiis, quæ ambo contra Simonem Magum, aut alios Romæ egerint, nullam fecerint mentionem. Neque istud sane quadrat, quod Actuum ultimo legitur, scilicet Paulum in primo eius aduentu Iudæos allocutum, & aduentus sui causam aperiendo dixisse: Contradicientibus autem Iudæis coactus sum appellare Cæsarem. At illi dixerunt ad eum: Nos neque litteras accepimus de te à Iudæa, neque adueniens aliquis fratrum nunciauit aut locutus est quid de te malum. Rogamus autem à te audire, quæ sentimus. Nam de se et hæc notum est nobis, quia ubique ei contradicitur, &c. Si ergo Petrus Paulum Romam præuenit eundo, è contra certè Paulus Petrum præuenit euangelizando, disputando vel docendo, aut Petrus delituit, aut nil relatu dignum gessit, antequam Paulus superuenit. Paulus enim non reticuisse; sicut nec reticuit ad Corinthios & Galatas scribens de Petro. Si prolixior fui, tu incitasti. Expediebat enim errorem tuum vacuare, dum dixisti: In reliquos Apostolos non nisi per Petrum à Christo deriuatam esse potestatem.

Derides & illud, quod Ecclesia solemniter canit, Apostolos præesse gregi dominico. Nec tamen quidquam afferens, quam quod Ecclesia illorum patrociniis adiuuari deprecatur, quorum merita recolit. Non autem respondes ad hoc verbum, quo supplicat Ecclesia, ut eisdem rectoribus gubernetur, quos operis sui vicarios contulit præesse Pastores. Non dicit Petrum vicarium, sed Apostolos vicarios constitutos. Et sic vacuata est argumentatio tua, quam subiicis de verbis Domini ad Petrum dicentis: Pasce oues meas. Ubi Glossa dicit: Cum tertio audit à Petro, se diligere, iubet pascere oues. Trina negationi redditur trina confessio, ne minus amor lingua seruiat quam timori. Dic quæso an fortiora sint hæc verba, Pasce oues meas, an ista: Hic est mihi vas electionis, ut portet nomen meum coram gentibus & Regibus, & filiis Israel. Aut rursus quod omnibus dixit insufflans: Accipite Spiritum sanctum, quorum remiseritis peccata, remittentur eis. Atque etiam illud  
piis



piissimum & supremum consolationis verbum, quo Matthæus suum Evangelium ad omnes quidem Apostolos diuinæ vocis organo prolatum : *Ecce ego vobiscum sum, omnibus diebus usque ad consummationem seculi, &c.* Hanc igitur hæresin mitte, qua dicis, reliquos Apostolos non nisi per Petrum accepisse potestatem : & prioratum Petri sic demum asseras, ut aliorum potestatem non neges. Aliter asserendo tu cum Doctoribus tuis hæresin non euades, neque Chrysostomum neque Hieronymum testes habebis, quia Paulo minime contradicent.

Alias infanias audaciæ tuæ more impudentissimo accumulas : scilicet *Euangelium S. Marci à Petro demum auctoritatem accepisse, nec Paulum habuisse securitatem Euangelii predicandi, nisi Petri & aliorum, qui cum eo erant, fuisset sententia roboratum.* Primæ assertioni tuæ contradicit vox tonitruï DEI : ille scilicet, qui vidit similitudinem vultus quatuor animalium : & ille, qui dixit : *Dedit quosdam quidem Apostolos, quosdam autem Prophetas, alios verò Euangelistas, &c.* ut superius ex Claræuallensi conieci super his verbis : *Gubernatu Noe.* Quid enim Euangelistæ, si Petrus omnia ? ut idem Claræuallensis ait : *Erras, si ut summam, ita & solam à Deo institutam, &c.* ut dixi super his verbis : *Tu primatu Abel.* Secundo errori tuo vas electum contradicit, ut supra dixi qualiter Galatis scribens : *Paulus, inquit, Apostolus non ab hominibus, neque per hominem, &c.* Ac rursus : *Notum enim vobis facio Euangelium, fratres, quo euangelisatum est à me, quia non est secundum hominem : neque enim accepi ab homine, neque didici, sed per reuelationem Jesu Christi, &c.* Imo tute tibi contradicis, asserens Euangelium Pauli, non nisi Petri & aliorum Apostolorum auctoritate fuisse roboratum. Ideo enim auctoritatem Petri non auget, etiamsi verum esset, sed omnium Apostolorum conciliarem auctoritatem soli daret : quam ego semper affirmavi. Sed absit à me, ut totius orbis auctoritatem Christo præferam, ut tu miserrime Christo derogas, quasi non suffecerit Paulo Jesu Christi auctoritas, nisi aliorum Apostolorum fuerit assensu confirmata. Disce, rudissime Christiane, à Paulo Ephesiis scribente ; non Episcopum Romanum solum, sed Apostolos, Prophetas, Euangelistas & Doctores datos ad consummationem Sanctorum, in opus ministerii, in ædificationem corporis Christi, donec occurramus omnes in unitate fidei. Unitatem autem facientes in charitate, crescamus in illo per omnia, qui est caput Christus, ex quo totum corpus connexum per omnem iuncturam subministrationis. O miser, qui non aliam unitatem quam numeralem intelligis, qui tamen audisti, nos in unitate fidei congregatos : quæ communis est Clericis & Laicis. Et beatus Petrus prima Canonica : *Cum apparuerit Princeps Pastorum, percipietis immarcescibilem gratiæ coronam.* Tu vero contra Apostolum scribentem fundamentum aliud ponis, præter id quod positum est Christus Jesus. Sufficiat igitur dixisse, Petrum principaliorem fuisse constitutum : alios autem & à Christo & per Christum quoque ordinatos : ne cassâ facias verba Christi, cum insufflatione ipsius & Spiritus infusione. Duos namque discipulos Euangelico testimonio legimus amoris prærogatiua claruisse, quorum alter Dominum testatus ait : *Tu scis Domine, quod amo te,* de altero legimus, quia ipse est, quem diligebat Dominus, quemque virginem elegit, & quem sic manere voluit. Cum autem diuinus sicut & humanus amor amore pareatur, ut illud artis amatoris documentum, *Si vis amari, ama*, etiam de amore Domini verificetur, quare alter Apostolorum Dominum amasse, alter à Domino diligi perhibetur ? nisi fortè alium cordis, alium Spiritus amorem intelligamus. Est enim cordis amor quodammodo carnalis, quod magis erga carnem Christi, & quæ carne Christus gessit, cor humanum afficiat, quod repletum ad omnem de illo sermonem facile compungitur, nihil libentius audit, nihil legit studiosius, nil frequentius recolit, nil suauius meditat. Adstat oranti aut nascentis, aut lactentis, aut docentis, aut morientis, aut resurgentis, aut ascendentis Christi sacra imago. Hanc arbitramur præcipuam inuisibili Deo fuisse causam, cur vellent in carne videri, ut cunctas eorum affectiones, qui nisi carnaliter amare nescirent, ad suæ carnis amorem proprie retrahe-



ret, atque ita gradatim ad amorem prouheret spiritualement. Sed qualis qualis fuerit Christi ac illorum Apostolorum amor, ætati detulit IESUS, ne adolescens & puer progressæ ætatis Apostolis præferretur; in adolescentem quem dilexit, noluit conferre causam inuidiæ, quod & natura semper venerabilis fuit & honorata senectus. Possẽm hic repetere, quæ supra scripsi super his verbis; *Sacerdos magnus, Summus Pontifex, &c.* ni vereretur prolixitatem. Sed oro practicam Beati Petri inspicias, si sibi soli usurpauit, quæ Apostolis communiter iniuncta fuere. Nonne ante pedes Apostolorum posuerunt agrorum pretia non Petri? & illi diuiserunt singulis? numerum quoque Apostolorum communiter supplendo, statuerunt Matthiam & Barnabam, ponentes sortes? Apostoli scilicet communiter, non Petrus singulariter. Et communiter super Euangelio disputarunt, & Pauli decisio præualuit. Communiter quoque sententiam tulerunt, dicentes: *Placuit Spiritui sancto, & nobis*, absque illa præfatione Petri, memores præcepti diuini. Nam ut est apud Lucam & Matthæum, facta contentione inter eos, quis eorum esset maior, &c. & rursus apud Matthæum: *Nolite vocari Rabbi, unus est enim Magister vester, omnes autem vos fratres estis.* Tu vero soli Petro singula defers, ut successori blandiens plura feras in pretium assentationis tuæ, qui iam expertus es, illud assentationis aucupium præ cunctis virtutibus appreciari. Merito ergo te illis connumerabo, de quibus Apostolus scripsit Timotheo: Hoc scito, quoniam in nouissimis diebus instabunt tempora periculosa, & erunt homines seipsos amantes, cupidi, elati, superbi, blasphemii, &c.

Mihi verò Hieronymum illum obiectas, qui Constantiæ damnatus, qui de institutione Eucharistiæ temerè disputauit, cuius ritus usque hodie in Bohemia variatur à ritu Ecclesiæ occidentalis. Tu autem veneno contentionis penitus imbutus, quacunque ineptia certare non refugis, ut supra de Arrio fecisti, cuius errorem minimè cognovisti, quod ex inepta disparataque comparatione tua quisque perfacile deprehendit. Beatus verò Hieronymus contra Iovinianum I. scribens ait: *Inter duodecim unus eligitur, ut capite constituto schismatis tolleretur occasio.* Recense an electus sit à Christo, an ab Apostolis sit electus. Rursus ad Euandrium scribens, cum dixisset, unum esse Prælatum, ne quisquam ad se trahens Ecclesiam, &c. ne illi soli solidam deferret auctoritatem, subiicit: *Si auctoritas queritur, orbis maiorem urbe, &c.* rectè plane considerans uniuersalis Ecclesiæ auctoritatem ipsius Romanæ Ecclesiæ auctoritati præferendam, & cœtum Apostolicum Petro solo potiorẽ. Quia illis communiter promisit Dominus dicens: *Ego vobis cum sum omnibus diebus, usque ad consummationem seculi*, quod nec Petro, nec alteri cuiquam spondidisse perhibetur. Oves autem pascere iussit? Qualis sit pastura, superius satis explicui. Sed eam etiam cunctis absque limitatione commisit, Apostolis in nouissimo quasi præceptorum suorum omnibus uniuersaliter dicens: *Euntes ergò, docete omnes gentes.* Vide an minus expresserit, cum dixit *Omnes gentes* uniuersaliter, an cum indefinite dixit, *Pasce oves meas.* Et rursus ne acephalam relinqueret, adiecit: *Ego vobiscum sum, &c.* Ergò neque mortuo Romano Pontifice, neque etiam hæretico existente, manebit acephala, cui verum caput semper adest.

Procedis ad aliam methaphoram, quod cum Apostolis dicatur, ut laxent retia in capturam, Petro dictum est: *Duc in altum, hoc est, in profundum disputationum, quid enim tam altum, quam altitudinem videre diuinitatis, id est, scire Dei filium?* O mendicatum suffragium! Pensa num altiora sunt hæc verba, *Tu es Christus filius Dei viui*, an ista: *In principio erat verbum, & verbum erat apud Deum, &c.* Ecce omnia æterna per verbum plusquam perfectum, velut omnis temporis expertia, piscator eloquentissimus expressit, subdens: *Omnia per ipsam facta sunt.* Mox ad præteritum perfectum migravit, dum facturam creaturarum materiæ fluitantis opus temporis subiicit, tandem dicens: *Et verbum caro factum est*, ut filium consubstantialẽ & coæternum, & ex Patre ante omnia secula genitum, ostenderet ex tempore seu in tempore incarnatum & in carne visum, ut sequitur:



quitur : *Et viderunt gloriam eius, gloriam quasi unigeniti à Patre.* Gloria quippe Patris à credentibus, quasi visa est in filio, ab his, qui carnalibus oculis Christum in carne viderunt, quæ tunc demum perfecte videbitur ab illis, qui sempiterna fruitione satiabuntur. Vide an aquila Ezechielis altius rete duxerit, qui & Trinitatem discretivam Personarum cum unitate essentiae præ cunctis altius explicuit. Hoc autem in quo Petri Spiritum affers, etiam mulieri datum est, & illi, quæ non spiritualis, sed corporalis ministerii sollicita, attamen hoc modo professæ est : *Quia tu es Christus Filius Dei vivi, qui in hunc mundum venisti.* Quid vas electionis, Doctor gentium, qui antonomastice Apostolus nuncupatur, qui etiam Ecclesiasticam censuram præ cæteris clarius & potentius exercuit ? ut etiam intelligas eum quam allegasti de hamo mittendo metaphoram, & tollendo piscem qui primus ascenderit, non stringere illud quod de iurisdictione Petri figurare tentasti. Cuius si practicam inspexeris, potius dixeris, Petrum à Paulo districtum esse, quam Paulum aut quemquam Apostolorum à Petro districtum, aut etiam talem Petri primatum, qualem tu falso adseuerasti, ut in Alios Apostolos non nisi per Petrum sit deriuata potestas.

Denique replicas, quod & prius attigisti, sed nunc addis nugas, dicens de Simone Iohannis, quia *Petra* dicitur, eo quod prius in nationibus fidei fundamenta posuerit. Quod minime verum est, quia non *Petra* sed *Petrus* nuncupatur. Verum quia Domini & Salvatoris, nostri verbum, quo dixit : *Super hanc petram edificabo Ecclesiam meam*, tu corrumpis, ac si dixisset Dominus *super hunc Petrum*, aut dixisset, *Tu es Petra*, quorum neutrum scriptura testatur ; videntur autem ipsa veri & Evangelici textus verba etiam incorrupta nonnihil prioritatis innuere Petri, & à variis Doctoribus exponuntur diuersimode, ergo textum Evangelii sincera fide custodientes cum Aurelio Augustino ad Hieronymum scribente dicamus : *Solum eis scripturarum libris, quæ tam Canonice vocantur, didici hunc honorem timoremque deferre, ut nullum earum auctorem scribendo aliquid errasse firmissime credam.* At si aliquid in eis offeratur literis, quod videatur contrarium veritati, nihil aliud quam vel mendosum esse Codicem, vel interpretem non assecutum esse, quod dictum est, vel me minime intellexisse non ambigam. Alios autem ita lego, ut quantacunque sanctitate doctrinaque præpolleant, non ideo verum putem, quod ipsi ita senserunt, sed quia probabili ratione, &c. Idem in III. de Trinitate : *Noli, Lector, meis libris quasi Canonicis Scripturis inseruire, sed in illis, & quod non credis, cum inueneris incunctanter crede, &c.* Vides ergo quantam vim sibi vendicent literæ auctoritate Spiritus sancti munitæ, & qualem ipsarum expositores magistrali duntaxat opinione subnixi. In quibus tamen, quia non est eorum abiicienda auctoritas, istud ponderandum reor, an à transcurrente aliquid proferatur, an propter hoc ipsum, de quo agitur, doctrina emanauerit. Plerumque enim ita se habent ingenia humana, ut desiderio finis vel euentus assequendi media non satis fundata velut nota supponant, & intractata relinquunt, ut finis principio coherere videatur. Quod Flaccus Pisonem docens taliter enarrat :

*Semper ad euentum festinat, & in medias res  
Non secus ad notas auditorem rapit, & quæ  
Desperat tractata nitescere posse, relinquit :  
Atque ita mentitur, sic veris falsa remiscet,  
Primum ne medio, medium ne discrepet imo.*

Non à sanctis viris suspicor mendacia fingi : sed cupidine finis per media rapi, & à vero labi, proprium est humanæ fragilitatis. Neque etiam hoc prætereundum reor, an scribentis animus omnis expers curæ vel pathiæ, quæ si non flectere à vero, sollicitiorem tamen in alterutram partem efficere possit an verò ex contentiosa disputatione sermo totus effluerit. Verbi gratia, temporibus Anacleti, Marcelli, Leonis, &c. Oriens in fide Christi flagrans Antiochiam, Alexandriam,



aut forte Ierofolymam Romæ præferre voluit cathedræ dignitate. Rursus Imperiali Sede Constantinopolim translata Roma noua veteri præluce contendebat. Defensores Romanæ præminentia (ut est natura contentionis) victoriæ cupiditati ad rerum finem effectumque tendentes, inter transcurrendum tamen aliquando modum excefferunt. Ut apud Platonem Socrates Gorgiam alloquitur: Puto te, ô Gorgia, in multis disputationibus iam uersatum comprehendisse, non facile posse homines, cum disceptare inceperint, sic abire, ut se inuicem solum doceant atque discant: sed si de aliquo contendatur, nec concedant alter alteri, grauitur ferunt, certantes simul, non autem quærentes id, de quo ambigebatur, &c. Et ut Flaccus ait:

*Gratia sic fratrum geminorum, Amphionis atque  
Zethi diffiliit . . .*

Plura his similia adducere possem, quæ in consideratione versantur, cum discordantium Doctorum aut Scripturarum veritas enucleatur. Sed ad Evangelii textum reuertamur, scilicet *Super hanc petram edificabo Ecclesiam meam*. Hunc textum post varias expositiones postremo sic exponit Augustinus: *Dixi in quodam loco de Apostolo Petro, quod in illo tanquam in Petra edificata sit Ecclesia, sed scio me postea sæpissimè sic exposuisse, quod à Domino dictum est, super hanc petram edificabo, ut SUPER HUNC intelligeretur, quem confessus est Petrus, dicens: Tu es Christus Filius Dei vivi, ac si Petrus ab hac Petra appellatus personam Ecclesiæ figuraret, quæ super hanc petram edificatur*. Non enim dictum est illi: *Tu es petra*, sed *Tu es Petrus*. Petra autem erat Christus, quem confessus Simon (sicut ei tota Ecclesia confiteretur) dictus est Petrus.

Risum tandem excitasti dicens: *Cum secundum humanas leges triginta annis præscribatur, indignum esse, ut primatus Petri post tot secula temeraria disputatione ventiletur*. Quæro à te, num Paulus cottidie præscriptionem interruptit, qui in bulla, quæ litteris Pontificalibus robur omne confert, Petrum ordine ac ritu Christianarum tam Latinarum quam Græcarum Ecclesiarum legendi præcedit? Plurimæ quoque sunt litteræ Apostolicæ, in quibus nulla mentio fit de Petro: nulla verò bulla Paulo vacat. Rursus dic, an præscribatur aduersus illum, cui omnis iudiciaria via clauditur? Romanus autem Pontifex uniuersalem Ecclesiam congregari verat, ubi talis interruptio efficaciam assequi potest. Neque triginta anni fluxerunt à fine Concilii Basiliensis, ubi decreta magnæ Synodi Constantiensis *de superioriæ uniuersalium Conciliorum* salubriter sancita saluberrime innovata sunt, quæ decreta semper sunt in viridi obseruantia, semperque loquuntur. Nam sicut lex Codicis Iustiniani, quæ damnat Arrianos, Macedonianos, Donatistas, Gazaros, Patarenos, semper est in viridi obseruantia; sic magnæ Synodi decreta super maioriæ generalium Conciliorum per Concilium Basiliensè innouata, & per Eugenium & Nicolaum recognita & professæ, in viridi semper sunt obseruantia, ita ut contradictores eius hæretici sint declarati, nec ulla vetustatis littura vaneſcant.

Deinde commemoras errores Orientalium ac Bohemorum, tuam hæresin palliando, qui magnæ Synodi decretis falso contradicis, nec quidquam affers præter blasphemias de pectore virulento manantes, gaudens fortasse sicut sus immun-da cum quouis in cœno volutari. Wickleff Hufque commemoras Constantiæ damnatos. At verò ipsius Synodi sancta decreta respuis, hæretice vilissime, pœnis eius perpetuò plectendus, nisi resipiscas. Sed ut veremur, boni quidem veri vel honesti nullam habens curam, voluptate autem ac semper eo, quod dulcissimum sit, Papæ Cardinaliumque aures mentemque delinis, facisque adulando ut plurimi videaris existimandus.

Ad hæc semel inescatus cathedra Feltrensi, spem usurpasti capelli rubricandi. Semel autem exesa mens ærugine, & imbuta cura peculii, haud rectè prospicit,



spicit, neque promit opuscula, cedro linenda vel digna servari cupressò. Tuas ergo tabellas pigmentariorum trade mensis, ut tandem & vulgo fastidiosæ speciebus seruandis complicentur, aut deferas *in vicum* vendentem thus & odores, & piper & quidquid cartis amicitur ineptis.

Requiret forte quispiam, cur non pontificali tuæ deferamus dignitati? Viscissim hunc ego rogo; Cur non ponderibus modulisque suis usâ est ratio? Nam qui me tuberibus offendit, verrucis est æquum ignoscat. Hac etenim lege in trutina ponetur eadem.

*INVECTIVA GREGORII HEIMBURG  
VTRIVSQUE IURIS DOCTORIS, IN REVEREN-  
DISSIMUM PATREM, DOMINUM NICOLAUM DE CUSA, SAN-  
CTÆ ROMANÆ ECCLESIAE TITULI S. PETRI AD VINCULA  
PRESBYTERUM CARDINALEM, ET EPISCOPVM  
BRIXINENSEM.*

CANCER Cusa Nicolae, qui te Cardinalem Brixinensem vocas, cur non prodis in palestram? qui te Græcum & Latinum gloriaris, cur non palam pergis ad certamen literarum? cur ficta persona & sermone composito loqueris, quem finxisti, veluti figulus, nomen verò tuum suppressis? At hæc est natura libelli famosi, scilicet ab incerta ut prodeat sermo persona, an ne putas pares tibi reddi posse vices? Proin verò si cuiuspiam aures offendantur, illi succenseat, qui vitium introduxit. Dicis in fasmate, quod finxisti, Ducem Sigismundum irritè à Papa ad Concilium appellasse. A concilio autem ad Papam provocasse magnum Athanasium & obtinuisse, profecto siquidem in Gymnasium processeris, audies, qui Romani Pontifices, quæue concilia à fide orthodoxa defecerunt. Quia etiam si ea, quæ sæpe legisti, memoriæ tenacius commendasses, iam utique promptum haberes Papam non esse Ecclesiam illam, aduersus quam portæ inferi non præualebunt. Anastasium Papam absorpserunt portæ inferi, argumento est intestinorum egestio. O dirum omen, unde gentilitas *omenta* nuncupauit. Cæteros Pontifices in disputationis tempus referuo, sed ex his vacuata est impugnatio tua, qua dixisti, Papam non posse suspitione notari, quippe in quem grauiora crimina cadere possunt. Clarissimum virum Gregorium Heimburg, *verborum venditorem* vocas, qui gloriosæ vocis honoraria temperatissime dimensus est. Tu vero nugas & vanitates tuas, per Germaniam disseminando, pro ære vendidisti, plusquam ducenta florenorum millia fallaciter abstrahendo. Exprobrasti sibi, quod Rex non semper vicerit. Taceo de sordibus & gratia iudicum, & cæteris quæ rectum pervertunt iudicium. Te vicit, quandoquidem in Sede Moguntina, expugnata hæreditatis petitione, directa ex testamento, à parte tua instituta, tu ad Legatum Apostolicum concilio præidentem appellasti, ac inibi vigore scedulæ codicillaris, ac fideicommissariam conuolasti, nescius quod alterius electione remedii tollitur alterum: à Gregorio repulsus ruboreque confusus bellum perpetuum sacris legibus indixisti, cum desperasses in Facultate Iuris à modo præluce-  
re posse, honestiorem causam desertioni prætendens, ad Theologiam confugisti, cuius factus abortiuus, tandem Mathematicis superstitionibus, putas veræ Religionis sacra demonstrare. Pergis vim & insidias structas legato Ducis excusare, dicens: Laurentium procuratorem fuisse non oratorem, sed ad appellationem insinuandum missum extitisse. O Iuris transfuge, quæ te dementia coepit? Nonne adolescens didicisti, & per Epistolam procuratorem constitui posse? Epistolares verò literæ legationem probant. Tibi dico, Cancer Cusane, quod Laurentius missus fuit ad Papam melius informandum, quem tu variis surreptionibus obreptionibusque circumueneras, ad appellandum verò non aliter, quam in euen-  
tum



tum repulsionis suæ, sed letargum pateris, communem illufarum mentium morbum, quod minimè accidisset tibi, si ea quæ adolescens didicisti, non deseruiffes. Cum autem ad Theologiam confugiffes glorificabaris, de Letheo bibiffi, nullis Antyciris, nec ullo fanandus elleboro. Laurentium autem hæreticum nominas, idcirco incapacem effe falui conductus dicere debebas, nec ius reuocandi domum habere legatum, ut sic in potestate tua foret, quem velles pro libito laqueare. Num pudet vanitatis hominum vaniffime, qui fidei publicæ vinculum pro omnium rerum publicarum feruatur integritas, tam vana fictione diffoluere putas? Quis de cætero legationis subibit functionem, si propter confictum crimen, de qua nec quicquam fufpicatum eft, facriligas habuerit formidare manus, aut quod fibi obiiciatur Dominum fuum domi tenere vinctum aliquem de Clientela Cardinalis, ficut tu aduerfus Laurentium obieciffi? Nec minuit fidem publicam, quod Laurentius auditor eft Rotæ. Nam etfi longe inferius officium haberet aut fuperius, attamen à legationis munere non prohiberetur, nonne legiffi Romanum Pontificem populi Romani geffiffe legationem? Quid fi Epifcopus legatus effet, qui frater Papæ ac illi artiffimo Iurisiurandi vinculo aftrictus eft?

Transgrederis tandem ad merita cauiffæ principalis dicens: Ducem confeffum effe, hoftilem tui perfecutionem, teque diffidaffe, nec tamen in literis diffidationis cauiffam prætendiffe violentiæ vel repellendæ vel præueniendæ, fed agi fe iniuriæ poftea ducem confinxiffe. Putas ne populum Romanum sociali iure fanctiffimo belligerantem, fingula quæque literis explicaffe, quæ fenatus cenfuit, dum bellum decreuit indicare? cum te poftulante, Dux miffiffet ad te Parcifalem Caduceatorem, isque perfuaderet tibi qui te iactitaueras valles quamplurimas gentibus implere, ac Ducem obruere, cum (ut eius verbis utamur) te fibi æquare non poffet, ante omnia prouidendum effe tibi, ut cum Duce redires in gratiam, aut treugas faltem inires; Interea vel differentia tolli, vel faltem via compromiffi, congruis pactionibus Iuris arbitrio & confidentium arbitratui fubiici poffent, vel fubmitti. Tu verò repudiatif viis fuauiffimæ pacis, neque treugas nec ulla quidem inducias depofci voluiffi. Quid reftabat, nifi bellum & infidias, in quibus confidebas, æquitate iuffiffima in te retorquere? Apud Lucanum C. Cæfar commilitones fuos adhortando dixit:

*Arma tenenti*

*Omnia dat, qui iuffa negat.*

Ufus eft Dux viribus à DEO conceffis, neque Numen defuit illi.

Pergis fingendo Ducem à te veniam petiiffe. O fuperbiffime figule, poftquam rebus omnibus compofitis tu defpondiffes, te facturum, quæcunque Duci placitura. At his fimilibusque blanditiis tuis, Dux allectus, te confolando dixiffet, quatenus bono animo effes; poffe ipfum tibi, fi fuæ voluntati pareres, hæc omnia variis beneficiorum in te & Ecclefiam Brixinenfem collationibus abunde reftaurare. Tu modo hoc veniæ poftulationem nominas, hominum ingratiffime, qui fic ineptus es, ut omni humano alloquio te indignum reddas, qui humaniffimum principem, omnium iniuriarum obliuifci volentem, fraudulentiffime calumniaris.

Subnectis dicens, gentes Imperatoris, compofitis cum Comite Goritiæ rebus, iamdudum abiiffe. Surripis autem hoc, quod Iohannes Bani de Witawitz dimidium fere comitatus Goritiæ vi raptum, tunc ab Imperatore præmium recepit, deque tam nobili & opima præda fere triumphauit. Unde maior metus vicinis regibus, iam diffolutis castris, iniectus erat quam fi agmina bellica coacta effent, nulla tamen adhuc victoria cefiffet. Erant quidem adhuc in illis confinif, tribuni, prætores, centuriones, cæterique turmarum, cohortum, & cateruarum præfecti, ipfeque armi ductor, Witawitz, quibus perfacile, nuper abeuntes ad castra reuocare, aut ex aliis alpinatibus & montanis, malo affueris viris, gregatiorum, iam pridem abeuntium militum five prædonum, vicem numerosque fupplere,



plere, ac ordines sufficere. Tu itaque vide, si doli tui suspensionem, tuis fictionibus sustulisti, vel potius exaggerasti.

Gloriaris te pridie passionem Domini prædicasse, & postridie de eius resurrectione prædicaturum, despondisse. Deinde te ad Papam rediturum prænuñciasse, Parcifalem quoque cui idipsum triduo ante detexeras, Duci Sigismundo significasse. Nouum certe crimen, Cancer Cusa, prætendis in Parcifalem, scilicet quia id prænuñtiarit, quod tu palam proclamasti. Si quid verò illi sub taciturnitatis fiducia velut depositum commendasti, quod ipse prodiderit fidefragus, hoc perhibe, & probe respondebitur tibi.

Expurgare tentas suspensionem dolosæ machinationis iniectam tibi, ex refutatione treugarum, dicens, te semestres obtulisse treugas, in articulo mineralium, cum Dux annales postularet. Posthac tibi respondebitur, ubi tu latiori sermone, hunc passum amplificare prætendis.

Gregorium gaudes falso compellare mendacissimum, homo vanissime, fagina mendaciorum infatiabilis.

Episcopum Tridentinum, Ducem Sigismundum, Wolfgangum Neydlinger, & Parcifalem proditoris macula notas, dum dicis Episcopum tibi suasisse reditum, quoniam pacis viam haberet. Tu dolum suspicatus curasti, quod Papa scriberet Duci, te foedus perpetuum Duci seruaturum pollicens: Idque tibi vicissim seruari postulans, Dux se obseruaturum Papæ respondit; His fretus ad castrum tuum Frauelsburg applicuisti: quod tu sic nuncupas, mathematice sortilege, quia responsa dæmonum, quibus inibi sacrificas, Raphaelis Archangeli reuelationem confingis. In primis creditur, quod tu dolum suspicatus es, qui aliorum ingenia ex tuo metiris ingenio. Hoc etiam confiteor tibi, quod Dux respondit Papæ; seruaturum se foedera, pacta scilicet, si tu quoque seruares, quæ tu multipliciter violasti, semper enim more tuo aliquid retices, sicut fecisti, cum à Papa tam exorbitantia literas & breuia surripuisti.

Procedis, dicens; Wolfgangum velut caduceatorem ad te venisse, ferentem litteras Episcopi Tridentini Abbatis Wiltemensis, & iusiurandum Parcifalis, super securitate tua tibi supplicantem uti Brunegk proficisceris, quo Dux ipse missurus esset, pro differentiis componendis. Tu verò miseris Camerarium tuum ad Episcopum Tridentinum, qui tum cum duce manebat, ut rescires veritatem, cui Tridentinus tradit, se non esse traditorem, te quoque secure posse venire Brunegke. Itaque sub specie tractatus sis proditus. Omnes quippe differentiarum articulos ais fuisse compositos, præterquam super minera, ubi Parcifal postularit treugam annalem, tu verò semestrem dare voluisti, ne longiore mora possessionis iacturam sustineres. Itaque diu structam tibi proditorem, loco pacis expertus sis. Concludis ergò, licet falso, nil insidiarum in te præsumi posse, cum Papa ducem super obseruantia pacti foederis, certificarit. Hæc fictio à veritate remotior est, quam Deus à Diabolo. Quid ais vanitatum gurges? Wolfgangus à Capitulo & clero Brixinensi ac vasallis & ministerialibus ipsius Ecclesiæ ad te missus est, hortator pacis, & monitor virtutum, ac persuafor tui, ne ducem, ne totum populum omnemque statum hominum aduersus te, tuis sæue dictis prouocares. Omnes quippe homines cuiuscunque status aduersum te incanduissè, tibi que periculum in limite adesse præmonuit. Tu vero nemini, vix tibi ipsi fidens, Camerarium tuum usque Insprugk misisti, & Wolfgango ituro, iumentum commodasti, quem ad te missum fingis. Sed quid ad rombum, quis quemque miserit, nisi ut cuncti meminerint, te nugarum assuetum, etiam ab re vanitatibus oblectari? Sed eorsum tua verget oratio, ut fidem in te violatam vanissime persuadeas. Hoc certe reuocandum est. Neque enim Tridentinus te fefellit, neque Abbas, sed ne quisquam alius præter te, qui cum Brunegke venisses, simulabas te vetera grauamina tollere, & cum Principe in gratiam redire, & quæcunque per illos rudes idiotas Gebrardum & Possinger, quos tu præfeceras, sinisterius acta essent, emendare velle. Hoc colore clerum Brixinensem lætabundum Brunegke



negke illexisti, sperantem, iamque sibi pollicentem, quod satiatu iniuriis, quibus eos diutissime presseras, tandem pietatem ac mansuetudinem in illos exerceres. Tu verò savitiam conduplicasti, præciens ne diuina peragerent; quisquis secus faceret, tu illi curam animarum abstulisti. Talibus tuis ausibus inflammata sunt omnium pectora, ut nisi Dux ipse nefarios conatus tuos modesta castigatione repressisset, profecto indomitum ac irreuocabile vulgus in te irruisset, unusque & idem vitæ ac facultatum tuarum & furoris popularis exitus fuisset. Nunc verò salua est Brixinensis Ecclesia, tu degis superstes, & hæc omnia sine cæde, divino quodam iudicio peracta sunt. Hæc profecto quorsum verteris, undique quadrant: tua vero littera, sicut & reliqua omnino vita tua dissonat, nusquam sibi ipsi consentiens, sed velut sydera à terra distant, & flamma à mari, sic tua fictio à vero. Nam si foedus contractum observasses, sicut Papa pro te sponderat (tu vero violasti) profecto Ducem propitium tibi perfacile retinuisses. Treugas verò vel inducias dare vel acceptare noluisti, teste Parcifale, quem tute mediatorem velut proſenetam postulasti. Quanta sit eius fides, si leges desuper latas relegeris, clarius agnosces.

Porro non desinis Gregorium laceſſere, quem mendacissimum falso appellas, pro eo quod primi oratores illa ipsa coram Papa non allegarunt, quæ Gregorius, ut tu figule dicis, postea finxit. Afferis insuper fictionem eius videri, ab his, qui ipsa mentiuntur, quibus Dux de compressit. Et quando Imperator, Comitem Goritiæ inuasit, cuius gentes tunc emigrasse dicis, cum te Dux apud Brunegk obsidione cinxit, vel circumdedit. O miser quid insanis, cur ita gestis, ut Gregorium contra te prouoces? cum tu Ducalem indignationem, sceleratis factionibus tuis, rite provocatam, & ultionis iustæ vindictam exciperes, Gregorius in Austria manebat Archiducis illius obsequiis incumbens, & hoc de mense Aprilis. De mense vero Julii Laurentius coram Papa comparuit, allegaturus, cur aduersus Ducem ad pœnas comminatas non debeat procedi; tandem repulsus appellauit. Apud quem Dux sic loquitur appellans; *Non aliter quam naturali & humano jure permittitur vim vi repellentes & nostra defendentes &c.* Cardinalis via facti contra nos multipliciter procedere parabat, castra sua rebus bellicis instruxit, subditis nostris damna inferri sustinuit ex fortis suis &c. *Factavit se valles plurimas armigeris impleturum, &c.* Extant litteræ manu sua scriptæ, quæ animum eius produnt: *Naturalis defensio, qua vim vi repellere licet, nobis aufertur: Et infra: Postea admodum Gregorius ab Archiduce missus venit Inspruck consilium laturus duci Sigismundo.* Mitte in digitos, tempora dimetiens, & errorem tuum agnosces, Gregorius tua fasmata relegens exultat, velut Alcides epulans de bobus Gereonis, nec emtis neque donatis, altero scilicet convitiante, altero plus iubilante. Hoc in super addit: *Quod si tibi par esset beneuolentia ut est scientia, quippe qui omnium fere auctorum instituta & præcepta legisti, atque etiam audacia, quia nec pudor impedit, jam gauderet, te sibi obtigisse, cuius ingenio animam attereret, sicut aurum lapidi admouetur quando probatur, ita ipsam animam suam probaret, an recte imbuta esset.* Qualiter autem migrarint gentes Imperatoris superius audisti, scilicet terris finitimis subactis, ianua usque ad terras Ecclesiæ Brixinensis patefacta, adeo quod usque hodie inibi opus est maiore custodia, &c.

Ex his quoque responsum est petitioni tuæ, qua rogas, quomodo defendatur ab excommunicatione Dux, qui te post BRUNEGK euitam, & pacem proclamatam, decendio detinuit. Nescis insane, quam pie, quam benigne tecum est actum. Pax proclamata est, ut rapacium manus cohiberentur. Tu quippe nosti, quanta sit pietas viris, qui castra sequuntur. Tecum autem agebatur, quo pacto Dux & principatus eius, sub cuius aduocata Ecclesia Brixinensis sita est, asscuraretur, ne impoſterum ulla commotio fieret, sed Episcopus pro tempore ac ipsa Ecclesia suis contenti finibus communi omnium finitimorum protectione & tranquillitate gauderet. Tuque hanc viam primus inuenisti, ut castra & fortia in manibus capituli reponantur, & capitulum caueat ea talibus custodibus



bus gubernari, qui Ecclesiæ Brixinensi ac populo illius principatus grati forent ac fideles. Hanc conditionem Dux suscepit, ne terras Ecclesiæ ambissè notaretur, neque facinora tua, in Ecclesia reduci, darent detrimentum. Interea nonnulli dies effluerunt, quibus tu tamen reuerenter habitus es, & quotquot voluisti de prælatis, clericis & ministerialibus accersire potuisti. O ingratissime, qui te ducem jactas & principem secularem, & iam bellica præda fuisti, quam gratiam piissimo principi rependis?

Deficiens hactenus ad Calixti mandata confugis, quibus respondetur, comminationem non habere vim rei iudicatæ. Præcepit Calixtus securitatem tibi præstari, tu dolose literis illis inseruisti talem, de qua contentus fores. Etsi hoc non aliter quam de legitime ac consueta securitate debeat intelligi, quam Dux tibi præstitit; tuam tamen calumniam assuetam veritus, à captioso præcepto prudens appellauit. Mortuus est Calixtus; Pius appellatione admissa biennium pro fatali concessit, vide, ô iuris apostata, si purificata sit comminatio, iam appellationis admissione suspensa. Si verò Dux ipse iam te hortatus est, quatenus auferres papales comminationes, non idcirco probatur excommunicatus. Quod vero criminariis Ducem, quod à Clericis quicquam exactionauerit, ô superbissime, qui tibi prælatorum & clericorum illius dioecesis opes ac rem familiarem usurpas, quasi omnia sint tuæ ditionis, secularis præpositus Novæ cellæ, gratus fuit Principi suo, qui in illa expeditione, qua audaciam tuam repressit, gentes suas ab omni excursionem coercuit, ita ut Coloni, Censitæ, emphyteutæ, cæterique illius monasterii homines seculares, sed pater spiritualis, neque ipse quæritur de duce, sub cuius protectione tranquilla fruitur securitate: Henricus vero Magister Coquinæ tuæ, non se gessit pro Clerico. Passinger à populo interfectus esset, nisi Dux eum redemisset. Talis disciplina fuit in schola tua, tales mores aulicorum tuorum, ut qui audacia præualeret, is tibi fuerit acceptior.

Frustratus autem in viribus iuris ordinariis ad plenitudinem potestatis confugis, dicens Papam posse sacerdotibus suis inhibere ne celebrent, etiam si nihil deliquisset populus. Vide quid loquaris, ne asseras Papam in destructionem Ecclesiæ, vel devorationem ovium esse constitutum. Scio enim quam plenissima est Papæ potestas; sed tu non aduertis, quod Papa in literis suis non mandavit interdictum observari, ex suæ potestatis plenitudine, sed quia sibi suggestum est, qualiter Dux in te vim sacrilegam admiserit. His tuis falsis suggestionibus, Papa circumventus est. Ergo ad casum redacti sumus, in quo docemur, non obtemperare mandatis exorbitantibus, sed Papæ rescribere. Ita fecit Dux catholicus. Tu verò Papam dolis tuis circumvenisti, ne veritatem audire, aut innocentiam Ducis percipere vellet. Neminem vero unquam dux coegit ad sacrificandum, ut tu fingis; sed totus clerus omnisque populus sacrilegia tua, cum fortilegiis, incantationibus atque infascinationibus tuis taliter odit, ut dicat te coniuratione omnium malignorum spirituum has partes introisse, ut pacem perpetuam in diffidium commutares. Et qui nugis plusquam ducenta florenorum millia, de Alemania extraxisti, pari vanitate terram istam pacificam commouere ac seditiones in populo excitare studuisti.

De hinc aggredieris argumentari, contra appellationem ducis, his locis: Si hæreticus tueri se posset appellatione ad futurum concilium, interiecta, iam nulla esset fides Christiana, aliquando in quadringentis annis Concilium non fuit congregatum. Iam curuum sermone rotato torques enthymema, quia sic argumentaris: Lis nulla quadringentis annis est trahenda. Appellatio ad futurum Concilium trahit litem annis quadringentis ergo &c. Probatur minor propositio, quia aliquando in quadringentis annis non fuit celebratum concilium. Profecto si annos, qui fluxerunt à Concilio Apostolorum, quando receperunt Spiritum sanctum, aut quando miserunt Paulum & Iohannem in messem Domini, aut symbolum condiderunt, seu Petrum Antiochiæ in cathedram collocarunt, aut ultimo conuenerunt ab uno diuisi per orbem quod etsi Lucas in *Actis* non meminit, est



tamen *in Agiographis*, & ecclesia Teutonica idibus Iulii, eius festiuam peragit memoriam, usque ad Nicenam synodum, miseris in digitos, non redundabit summa tua, neque trecenti resultabunt anni, sed longe pauciores, quos tibi cedo, ut mea liberalitate fruaris, sed hæc omnia quid concludunt, nisi quod si quis à Petro, Lino, Cleto vel Clemente appellasset ad futurum Concilium, nimis prolixum fatale habuisset. Sed memineris te legisse, quod quia ante Constantini tempora non erat episcopis conueniendi licentia, ideo in varias hæreses scissa est Ecclesia. Hoc magna Synodus Constantiensis intuens ait: *Frequens Conciliorum celebratio agri Dominici præcipua cultura est, &c.* Et idcirco decreuit sacra Concilia de decennio in decennium celebrari, ergo quadringentorum annorum protelationis prætentio inanita est. Subdis, quod si ad futurum Pontificem vel Concilium rite appellaretur, eo quod successor de gestis antecessoris iudicat, & quisque successor alium habet successorem, procederet in infinitum. Num de Lætheo bibisti, oblitus ne in una eademque causa liceat tertio prouocare. Dixeris fortasse, differri iustitiam. At omnis appellatio suspendit executionem. Non ideo defensionis facultas auferenda est, moribus introducta. Quot vidisti causas in curia Papæ usque ad tertium vel Papam vel hæredem aut successorem protelatas, nec tamen unquam certa meta præfiniri potuit vel præscribi. Si dixeris biennium longam satis esse metam, quo lege ciuili durat instantia, quid si plus uno die? quid mense? quid tandem semestri vel anno utor permissio? paulatim addo vel iungo unum, iungo iterum unum.

Nunc vir sacrilege atque impudice, neges Concilium supra Papam esse, quod olim aliter scripsisti. Et extant tua, tum etiam Papæ scripta, in contrariam partem, qui aliter stans, aliter sedens, loqueris, homo quem nil pudet vanitatis, qui sic argumentaris: Concilium Constantiense nominauit Papam Iohannem, *Dominum suum*, quod non fecisset, si fuisset subditus eius. O quanta insania tua, qui ex nuncupatione urbana locos conuincere putas. Vendica tibi Dominium in Cardinales, qui te nuncupant, sua virtute dicentes, *Dominus meus sancti Petri*, ut ipsorum abutaris benignitate, si tibi commemorem, quando incepit & inoleuit mos nuncupationis dominicæ. Quando Papæ coeperunt nominari *Domine Domine*; Quando etiam Imperatores sic appellari noluerint: Quomodo usurpatum est Papas sese pluraliter & cunctos alios singulariter nominare, quippe qui sese aliquando singulariter nuncuparint, nimium prolixus ero. Sed sufficiat tibi probatum esse, quod magna Synodus Constantiensis, sibi met nil detraxit, cum Iohannem *sanctissimum Dominum* appellauit, quem tamen postea rite iusteque destituit, alioquin Martinus sedem vacantem non intrasset, neque Eugenio aut is Nicolao vacuam reliquisset, qui te Cardinalem creare minime potuisset; Vide vir petulantissime, quorsum euadat tua vana superstitio, qui cauillas appellationem Ducis ad ultimum Concilium interpositam esse, hoc certe non continet appellatio. Nihil enim est quod aut natura extremum inuenerit, aut doctrina primum. Hoc etiam accipe, quod sicut Capitulum eligit Episcopum, cuius assensu contrahitur spirituale matrimonium & non parum administrationis innoscitur, ita suffraganeorum assensu Archiepiscopus à Synodo prouinciali, quam tamen ipse creauit vel indixit. Cæterum si literarum sacrarum desertor ius publicum ignoras, adeò quæ moribus introducta sunt animaduerte. Regem Francorum iudicat parlamentum, Imperatorem Romanorum Palatinus Rheni, attamen uterque Dominus reuerenter nuncupatur utriusque. Procedis deinde longa quadam verbositate implicans & inuoluens, magnæ synodi quam plurima decreta iam dicens à Christo dependere, iam vero asserens supra Papam non esse, cum dicis illam tollendi schismatis causâ omnia dixisse, caue dixeris, illam pro unione assequenda dixisse vel fecisse, quod de iure non potuit. Gregorius non sustinebit, mihi paulo mitius estingonium. Varias enim & vacillas, ut dictum sit non dictum, ratum irritum, eò tamen tendere videris, quod Concilium super extirpatione schismatis congregatum plurimam habeat potestatem. Oro te, Cancer Cusane, ne cancrino more resili-



lias, sed recte perge ut cepisti, si Concilium super extirpando schismate congregatum esset, & interea surgeret hæresis, vel alter Paparum moreretur vel cederet, alter venderet Sacramenta, vel aliter scandalifaret Ecclesiam, nunquam patres cohererentur hoc Concilium dissolvere, & aliud pro hæresis eradicatione vel reformatione denuo instituire? Aut cur retorto sermone tandem dicis; *Et si actu Concilium esset super illis congregatum, super quibus Constantiense, &c. tamen non sequitur, quod Concilium nondum congregatum talem haberet superioritatem, quod à Papa ad ipsum posset appellari.* O bone vir, quid deliras? Nam si actu esset congregatum Concilium, ridiculus esset, qui omniffo principali concilio congregato, ad aliud nondum congregatum appellaret. Vide, Cancer, quam inique calumniaris Gregorium, qui dicit ex decretis magnæ synodi Concilium generale perpetuis temporibus de decennio in decennium debere celebrari. Dies cessit. Cuius est mora, tu nosti, sicut igitur ad Papam appellatio interiecta tenet sede vacante, sic ad Concilium, quia cessit dies, dissoluta est. Itaque innodatio tua, qua dicis; *quod enim non est, non est supra*; quia perpetua est ecclesiæ auctoritas, siue sit congregata, siue dispersa, quanquam ad opus operandum & exequendum, congregatio sit optima. Quæris tandem, quid operetur appellatio, ad futurum Concilium interiecta, etiam si rite sic appellaretur, cum non tollat sententias à iure prolatas nec suspendat effectum, quem secum trahit, sententia. In Concilio vero simplici querela introduci causa potest. De hoc verò adhuc contenditur, an Dux poenas inciderit. Hoc coram non suspectis Dux decertare cupit, Gregorius certat & adhuc coram iudice lis est, id verò, quod Papa nulliter agit, rite contemnitur.

Descendis ad constitutionem sacrilegam, qua vetatur ad Concilium appellari. Nil autem affers probabile, nisi quod ad Ducem verba dirigens ait: *Dicere non potes, quod te minus liget, quam alios Christianos, & infra subdis: Non debebas ponere os in Cælum plus quam alii*: cætera quæ dicis, aniles fabulæ sunt. Tibi respondetur, quod duci opus fuit prouocare contra surreptitia poenalia mandata, quæ tu falsis suggestionibus surripuisti, aliis forte non itidem, qui non fuere, grauati. Quibus verò grauamen impenderet, pari forma prouocarent, tam pontifices quam prælati, quibus Papa & legatus eius, decimæ triennalis impositionem comminatus est.

Quæ quidem impositio, suspecta est nugarum, propter feloniam tuam veterem, qua plus quam ducenta florenorum millia, ex Alemania suxisti, tam dulciter pollicens, nil ipsius pecuniæ ex Alemania traduci, sed inibi ad pios usus depositam conseruari. O utinam os tuum posuisses in cælum, atque oculos leuasses in montes: sed in marsupia nostra dispexisti: Non ergo auxilium à Domino sperasti. Ideoque te sol ussit per diem, cum pecuniis tuis sacrilege quæsitis. Taffer adeptus, Redenneck, Volturnum ac Iouedunum inhiaisti. Nunc te urget Luna per noctem, cum iustissimo Dei iudicio post fideifragium tuum, quo conuentionem Iurispublici violaisti, teque exulem facere maluisti, si forte animi tui malignitatem explere posses, etiam oppidis & prædiis, quibus frui poteras, te destituiisti. Tu forte nuncupas *os in Cælum ponere*, de gestis Papæ vel eius potestate disputare. Talis quippe dicendi modus ab adulatoribus inuentus, per assentatores tandem inoleuit. At tu minor disputatio, an super bigamia per Papam ad sacerdotium valeat dispensari; & an Papa possit concedere matrimonium in certum tempus, vel usque ad procreationem sobolis masculinæ, contrahatur: Sexcenta sunt quæ memorem si opus fiat. Nec tamen ad sacrigelium reputatur. De Deo enim disputatur, an possit producere infinitum an potentiam creandi delegare possit. Quid ergo vir bone caufaris, si quis dicat constitutionem Papæ peccare? Sunt qui dicant Papam fauore Episcopi Lucani agentis pro vi expulsiua contra Pisanos pronunciaisse super turbatiua. Ac rursus qui dicant alium Papam ex verbis Iohannis Frangapanis directæ substitutionis decreuisse obligationem. Quotidie Papales, & aliæ constitutiones modificantur, tum reuocantur, aliquando respuuntur. Et tu desertor iuris, abortiue theologie, multa prætextu legatio-



nis statuisti, ac quærentibus aduersum te respondiisti, quatenus adeant Papam de super supplicaturi, ut sic medullam in ossibus Germaniæ relictam sugendo tere- res. Quæ cum visa sunt, pecuniis datis tolli posse, tandem à cautiore principibus retenta pecunia repudiata sunt ac derisa. Et hæc omnia tu notas hæresin. Quid si Papa mandat solui Camerae suæ mille sub poena hæresis; An recusans sit hæreticus? Nequaquam. Sunt enim maleficia discreta, quæ suos tenent aucto- res. Neque enim coesor vitium vel arborum est parricida; Nec fur est. Desine ergo conuitiari, vel audies, quod audiisse noles.

Nunc quibus anfractibus lapsus illum vel euitare, vel erroris notam aufu- gere tentas, qua notaris errasse, docens, *in Ecclesiam esse credendum*. Id perfrin- gere libet. Dicis nil referre præpositionem *in* appositam in citatione. Non enim, ut ais, citatus est Dux, an credat Ecclesiam, vel in Ecclesiam, quia ad sym- bolum remittit citatio. Tu autem non desinis procaciter errorem defendere, quod est hæreticorum proprium, scilicet pertinacia. Quid dicis? Gregorium ne- scire inter symbola discernere? Iure suspectus haberi, quod de symbolis varie sentias. Postea subaccusas appellationem Ducis de perplexitate, quia ducem lai- cum esse dicat. Gregorius autem se in ipso Duce sciolum ostendere velit. Lai- cus est Dux, de fide simpliciter & bene sentiens. Tu verò omnem hominem hæresi falsa criminari, qui tuis audaciis contradicit. Nemo verò te suspectior est in fide, qui nondum purgatus es ab illa macula, quam Fratres Minores inie- cerunt tibi, qui tempore Papæ Nicolai articulos plurimos contra te obtulerunt, quibus de hæresi notatus, nondum autem absolutus, nequaquam purgatus es. Profectò si lædere pergis ut coepisti, talem tibi notam inuret Gregorius, quam to- ta reliqua vita tua eluere non poterit. Sed perge vanitates tuas prosequi. Non- ne hunc legisti Versiculum?

*Crede Deo, credasque Deum, plus credo valere,  
Ut credas in eum, quam quod ei, vel eum.*

Cum deliras dicens, *in sanctam Ecclesiam credere*, quemcunque Christianum oportere, de qua dicitur; *Qui aliter credit, quam sancta Mater Ecclesia docet, is est hæreticus*. O miserum ingenium tuum, qui non discernis inter *credere unam Ecclesiam*, aut *credere cum Ecclesia*, vel *sicut Ecclesia*, aut *in Ecclesiam*. Nonne credis, ut Apostoli crediderunt. Nonne in ea fide versaris, quam diuinum Petrum Apostolum Romanis tradidisse proditum est? at non credis in ipsum, sed ipsi cre- lis euangelizanti Christum. Nonne credis Dei genitricem Virginem? non au- tem idcirco credis in illam. Quod si assertioni tuæ assentias; in illam ergo cre- das, Deos habebis infinitos. Nonne puer didicisti, fidem esse assensum ex aucto- ritate dicentis generatum? Deinde grandior legisti, fidem esse dictorum conven- torumque constantiam, de imitatione Stoica, quasi fiat quod dictum est, appella- ta. Nostri verò fides orthodoxa, per Anthonomasiā dicitur, qua credimus & confitemur ad æternam salutem. In qua longe diuersum est, credere aliquid esse fore, vel fuisse; aut in illud ipsum credere. Obiectum illius assensus, qui fides aut credulitas nuncupatur, est propositio, cui per adhesionem animi assentis: non tamen credis in ipsam. Tu credis coelum & terram, Solem & Lunam, astraque micantia à Deo creata, sed non credis in ea. In solum Deum crede, & quæ ad salutem æternam credenda sunt, quæque Ecclesia diffiniuit, crede firmissime, non autem in il- lam. Illa etenim in Deum credit, non autem in semetipsam, quæ nec à semet ipsa, sed à Spiritu sancto viuificatur. In hunc crede viuificantem, qui per os Prophe- tarum ecclesiam præconisauit, qui confortans Apostolos, trophæa Christi vexit per orbem. Ecclesiam verò sic crede, ut obedias illi, ac cum illa sentias. Hæc est fides Augustini scribentis ad Neophytas baptizatos dum dicit; *Interrogauimus an credatis in Deum Patrem omnipotentem, & in Iesum Christum filium eius, Et in Spiritum sanctum &c. iuxta imperium Saluatoris precipientis; Euntes docete omnes gentes, baptizantes in nomine Patris, & Filii & Spiritus sancti &c.* Non interroga- uimus



*vimus autem, ut quomodo in Deum creditur, sic in sanctam Ecclesiam Catholicam, quæ propterea sancta & catholica est, quia recte credit in Deum; sed intelligere debetis nos dicere & dixisse ut in Ecclesia sancta conuersantes in Deum crederetis, &c.* Vide ergo quomodo cæcutieris, qui fidem Christi cauillas, ne tibi contingat, quod de Homero & Stesicoro narratur. Quod Socrates ne sibi contingeret, præuenire cauuit in Phædro. Si quis verò Prælatorum eius errauit, error certe non est imitandus.

Et ne disgreddiar à proposita materia, tu Papam Ecclesiæ caput ministeriale decepisti, qui te pro conditione fragilitatis humanæ secutus, literas emisit comminatorias. Dux fideifragium tuum subolens, & nugas sentiens tuas, ad Papam misit. Tu illum indurasti, aures obscurasti, obsurduit Papa contra Ducem, tu Papam delinisti assentationum laqueis infascinati ille inuolutus contra ducem incanduit, fulminauit, coruscavit, iecit grandines, & intonuit. Tu monachos, scurras vagos reperisti, qui vanitates tuas disseminarent. Dux autem posthabet horum sua seria ludo. Tu quidquid veneni quotannis aluisti euomens cum impetu, hæreticos mentiris eos, qui tuis audaciis obicem ponunt. Vide si hoc est, desipere in fide, aut de autoritate ecclesiæ irreuerenter aut male sentire. Sed elenchum contorsisti, sic argumentando: Christus est caput Ecclesiæ. Omnes autem credimus in Christum. Perge autem. Qui credit in caput Ecclesiæ, credit in Ecclesiam, quia caput pars corporis est. Credo & de te opinor, quia si quis per Atheismum in aliis terminis tibi taxaret arguendo; Christus est verus Deus, Christus est passus, mortuus &c. Ergo Deus est mortuus. Ac rursus, Deus est Deitas, ergo passa est diuinitas. Tu circulationem illam dissolueres, duas naturas vel potius substantias in Christo distinguendo, absque ulla confusione vel mixtura, in sola unitate personæ scilicet suppositalis quam nos, ut à Græcis accepimus; hypostaticam nominamus: Naturalis enim personæ significatio substantiam potius dicit, quam hypostasim. Sed ex ecclesiastica locutionis usu, venit talis acceptio; Christus igitur ex Deo Patre, ante omnia secula genitus, æqualis Patri secundum diuinitatem, creator est omnium, per quem omnia facta sunt; homo verò ex Maria virgine in seculo natus, sacerdos & Patris altissimi filius; non tamen duo, sed unus est, hypostatica scilicet unione. Nunc habes quomodo credamus in Iesum Christum. Vide si sic credatur in Ecclesiam, & secerne substantiam diuinam ab humana, ut scias quomodo Christus sit creator omnium, & quomodo caput Ecclesiæ, & aufugies Nestoris atque Euticetis sibimet formaliter contrarios errores.

Inter transcurrendum non cessas mordere Gregorium, afferentem ecclesiam esse immortalem, quia Paulus ait solum Deum immortalem. Miror quod talem oblivionis morbum incidisti, ut non memineris te didicisse, dignitates esse perpetuas; Item & perpetuam Iurisdictionem: rursus perpetuas actiones, quarum tamen quadraginta annorum spatium meta iura clauditur. Et Gregorius auctoritatem Ecclesiæ perpetuam esse dicens id loquitur, cum de Iuris distinctione Ecclesiæ contra te certat, ubi rite utitur usu loquendi Iuristarum. Tu etiam more Cancræ sub domo Lunæ fluitans, prius allegasti, te unionem cum Duce perpetuam habere quanquam mortalis sit natura utriusque.

Allegas in Capella Papæ cantari, *credo in Ecclesiam*. Vix tibi creditur, adhibe testem sancti Sixti vel Cameracensis, quorum alter diuinarum, alter sacrarum (licet humanarum) literarum peritus habetur, si verò sic canitur, profecto tale symbolum per Cameram expeditum coniicio, non per Cancellariam, ubi perspectio diligenter, & præsumptiones Iuris circa stilum aut Grammaticam in eis non militant, & quæ disponuntur minus sunt trahenda in sequelam. Superaddis obseruantiam Ecclesiæ Græcæ. O præcautissime, qui velut exhaustis Latinorum rivulis, ad Græcorum fontem recurris, propter tua Græca vocabula, quæ didicisti, quan-



quando de Concilio Basiliensi ad conuentionem Ferrariensem proditorie commigraſti. Nunc meant proſcena ludi, apud Cardinalem Cuſanum ſunt Dionyſia Bacchi, quem foecundi calices Græcæ linguæ fecere diſertum. Anne putas, Linguam Romanam deficere in expreſſione fidei, eorum articulorum, quorum explicita credulitas eſt de neceſſitate ſalutis? Iam tu Patris & Matris tuorum fidem condemnare, ut Gregorium vinceret, in foro crede mihi ſaltare.

Subnectis iure Canonico ſuſpectum haberi, eum qui per annum fuit excommunicatus, quod de fide male ſentiat. Afine, quid dicis? Ita demum hoc eſt verum, ſi contumax ſit in cauſa fidei; Quid ſi caſus tibi figurabo, ubi canon docet, potius ſuſtinendam excommunicationem, quam quod iudici pareatur contra verum?

Rurſum repetis, cenſuram Papæ iuſtificatam, quaſi conſtet de ſacrilegio Ducis, iamdudum reſpondi, fideiſragia tua & proditiones tuæ compreſſæ ſunt, per Ducem, pro quibus tu comparere & te expurgare dubitas, fugitivus iuris, & omnis iuſtitiae profugus, qui non audeſ aliquod non ſuſpectum ſubire iudicium, quod tibi iam ſæpe & multifariè oblatum eſt.

Amplius delirando dicis, quod Papa non vocatum Ducem declarare potuit, ſicut Paulus excommunicauit Corinthium. Dic ubi legiſti, quod ille Corinthius petierit audientiam, & Apoſtolus illam ſibi negaverit? Putaſne ſi Corinthius ille veniſſet ad Paulum dicens: Hæc mulier non eſt uxor mea, ſed honeſtè cohabitabat mihi, item nunquam fuit uxor Patris mei, item æmuli mei me tibi accuſarunt, inquire diligentius; An vas electionis dixiſſet, dabo tibi carcerem pro reſponſo. Nequaquam.

Iterum repetis, Ducem à te veniam petiſſe, crimenque confeſſum, Dux negat, Laurentius inficiatur. Procede in Palæſtram, experiendo iure, & iniurias ac contumelias atque conuicia tua miſſa face; Hoc eſt officium viri, non ut Leno certare maledictis, non ut ſus cum quouis in coeno volutari.

Poſtremo negas Eccleſiam Brixinenſem fore temporaliter de limitibus comitatus Tyrolis, quia caſtrum Tyrolis ſit feudum Eccleſiæ Curienſis. Comitem Tyrolis nunquam fuiſſe principem Mereaniæ dicis, qui tamen vides Mereaniam ſub caſtro ſitam & obedientem comiti Tyrolis. Ut quid inſanis? Quid ſi memineris, quod Reges (Rex Franciæ iurare dicitur geniculatus in manibus Abbatis S. Dionyſii, à quo regnum recognoſcit) & principes, regias ſuas & principalium reſidentiarum ſuarum terras & loca à viris eccleſiaſticis agnoſcant in feudum, mirari deſines, niſi forte magis ſtudeas ut non ratione inſanias. Quid enim facit ſola mutatio nominis ipſa rerum naturā & proprietate ſemper eadem manente? Tantum enim longinqua mutare valet vetuſtas, ut quæ olim Rhetia ſuperior dicebatur, de qua ſcribitur, *videre Rheti bella ſub alpiſus Druſum gerentem*, atque iterum: Mox graue prælium commiſit immanesque Rethos, auſpiciis pepulit ſecundis, ea poſtea Meorania, hodieque Tyrolis ſit vocata, utramque verò Rhetiam adhuc vocabulum tempore Theodorici Gotthi, retinentem, Rex in præfecturam concedens ſuperiorem illam, *Vallum Italiæ* vocat, cui & ſuperior Norica eſt ab Oriente ac realiter victa.

Tandem fingis te Dominum ſecularem vallis Eni & minerarum eius. Hæc ambis & diu celatam ambitionem detegis & aperis. Ex quo plane conſtat, quid tua iactantia voluerit, cum te iactaſti, plurimas valles armis impleturum, & omnem pacis vel treugarum oblatam tibi conditionem reſpuiſti, conſiſus in Graſacorum ferocia, qui comitatum Goritiæ iam pridem populabantur partimque ſubegerent, ubi deficiens ad Papam confugiſti, queſtus vim afferri. Duce autem vias Iuris offerente, ut ſic per legitimos tramites calumniantis detegatur iniquitas, tu fugitiue Iuris & iuſtitiae ad conuitia deſcendis, te Ducem nominas, maiestatem Sigismundi lædere, quaeris. Sunt etenim Principes Aſtriæ velut epimetati Principes ab Imperio Romano taliter honorati, ut qui in ipſos deliquerint, in Imperatorem Roma-



Romano taliter honorati, ut qui in ipsos deliquerint, in Imperatorem Romanorum deliquisse videantur; quippe apud quos plenitudo potestatis in eorum terris; quemadmodum in Romanorum Principe, constat. Vide quorsum tendat superbia tua, qui te Dominum; Ducem verò seruitorem nuncupas tuum, qui tamen auctore Archiepiscopo Salzbürgenſe Metropolitano tuo deſpondiſti ducem te habiturum taliter, qualiter à Prædeceſſoribus tuis Episcopis Brixinenſibus habitus eſſet, qui omnes, eum & progenitores ſuos tanquam Principes uniuerſales etiam per diſtrictum ac terras Eccleſiæ Brixinenſis recognouerunt, paucis exceptis, quæ in ducatu Stiriaë conſiſtunt, ubi pari modo Dux & Reſtor uniuerſaliter dominatur, tenetque Principatum ſecularem. Neſcis apud inferos ſedere eos, qui arma ſumere impia nec veriti dominorum fallere dextras, ſicut tu Duci ac Principi tuo fidem violaſti. Contemplantur quantum diſtat hæc tua elatio, ſaſtidioſis factionibus geminorum, qui manibus reſcindere cœlum aggreſſi, ſuperisque Iouem detrudere, regnis, quæ eſt figura Luciferi dicentis: ponam ſedem meam ad Aquilonem & ſimilis ero altiſſimo; aut eius, qui turrim Babyloniam inſtaurauit. Nonne legiſti:

*Crudeles dantem Salmoneæ pœnas*

*Dum flammas Iouis & ſonitus imitatur Olympi.*

Demens, qui nec dum irritabilem principem tibi ſubigere putas, ſola proſacitate linguæ fretus, dicens fortasſe melius ſub infideli tyranno quam ſub hoc Duce vivi poſſe. Qui utinam Sutrinus, Nepoſinus, Narnienſis, Balneoreginenſis, Ameliensis, aut Ortanus præſul eſſes, tunc demum ſentires, quid amiſiſſes. Iam Prometheus te nil ſentire permittit. Iam veſtis ornatus & dignitas, qua obuolutus es, & præcipuè rubedo verticis, qua operiris, teipſum non ſinunt de te iudicare, aliquando mitior fuiſti; ſed poſtquam irrubuit cranium capitis, veluti gruis ſaſuitia ſimul accreuit tibi cum grue, & propter licentiam peccandi, maxime & inſanabiliter peccaſti. Arduum quippe eſt, ut quis in maxima peccandi licentia conſtitutus, rectè vitam tranſigat. Nudus, crede mihi, iudicaberis; tunc labes animæ tuæ diu conteſta cernetur conſpicue. Tunc te Gnoſius Rhadamanthus velut Aſiaticum, quia orientalem linguam trium vocabulorum nouitate uſurpaſti, vel Latinum, ſi ad domicilii iudicem remitteris, Minoë in inſidiis ſuccenturiato ſtante, iudicabit; tuque illis transmitteris, ubi debitas ſubire pœnas oportet.

Hæc tibi rependo, gratificans tibi pro meritis, dum admonendo Ducem dixiſti; conuertere ne moriaris, &c. Quid enim aliud egifti, quam ex alieno contemptu, ſuperbiſſime tibi clypeum ſanctitatis & innocentiaë ſimulando aſſumere? ſi inter illecebras & blandimenta fortunæ durum aliquid expertus es, te verò delectatio præceps & inconfulta deſtituit. Ad cor redi, memor conditionis tuæ. Sic proſperaberis, Domino propitiante. Datum in foelicibus

caſtris militaribus obſidionis Viennæ Aſtriaë apud Sanctum

Marcum, quæ via ducit ad Ungariam, Idus Auguſti,

Anno M. CCCC. LXI.



NOTATIO PETRI NVMAGEN TRE-  
VERENSIS,

*Ex cuius autographo hæc desumpta sunt, exarato ma-  
nu eius Anno M. CCCCC.*

Nota Dominum Nicolaum Cardinalem de Cusa fuisse filium cuiusdam paupe-  
ris piscatoris dicti Krebsheime, quia morabatur in villa dicta Cusa ad qua-  
tuor vel quinque milliaria subtus Treuerim in littore Mosellæ, quasi ex opposito  
oppidi & castri dicti Berrenkastel sita, agri fertilis & tam vini, quàm frumenti fe-  
racis, supra quam vix unius vel duorum stadiorum distantia alia villa in eodem  
littore sita est, dicta Lifura: unde oriundus fuit socius dicti Cardinalis, dictus Io-  
hannes de Lifura, Doctor Iuris, cuius fratrem ego vidi. De his duobus extat  
versus multum vulgatus:

*Cusa, Lifura, peruertunt singula iura,*

Et quia præfatus Cardinalis Cancrum in albo scuto rubentem gessit, alias-  
que ex parte cognomen traxit Cancri, hinc auctor inuectivæ præfatæ eum voca-  
uit Cancrum.





**HISTORIA  
BELLI LEODIENSIS  
ET  
VARIA SCRIPTA  
AD  
HISTORIAM  
FRIDERICI III.**





LECTORI SALVTEM!

BURCARD GOTTHELF STRUVE.



**L**Amentofum erat Leodiensis urbis excidium, à Carolo Burgundiæ Duce ob contumaces Leodiensium Spiritus factum. Cœpit illud sub Philippo, Burgundiæ Duce, qui Ludouicum Borbonium Leodiensibus episcopis commendabat à Papa etiam adprobatam, quem tamen ipsi recipere recusabant. Post obitum Philippi, Leodienses aduersus Pontificem suum bello decertabant, quem apud Huium obsidebant, quod cum ferocissime oppugnarent, pontifex clam dilapsus est. Carolus vero audax dictus, Burgundiæ dux, Episcopo adfinitate iunctus, Leodiensibus bellum indicit, & capta demum urbe, eandem igne ferroque deuastat. Desumpsit Freherus hanc historiam ex Iacobi Piccolominei Rerum sui Temporis gestarum Commentariis, \* quibus, ut in Syllabo Autorum monet, Freherus ex MSto adiecit incerti Autoris epistolam de Carolo Burgundiæ Ducis laudibus & victoriis, nec non Leodiensium clade & excidio. Præfatio autem hæc est, libro de Principum custodia præmissa, quem amore Caroli ducis conscripsisse se ipse in fine testatur, ubi etiam se dicti Caroli Medicum fuisse receptum, profitetur. Consistit illa in solis Caroli elogiis. Bellum autem hoc Leodiense alias quoque a Nauclero \*\* Tritheimio \*\*\* atque Ponto Heutero \*\*\*\* videmus descriptum, atque probe est distinguendum ab alio bello Leodiensi, quod ab anno 1482. ob occisum Ludouicum Borbonium contra Leodienses a Maximiliano adhuc Archiduce fuit gestum, eademque urbs Maximiliano subiecta.

Accessit ex eiusdem Iacobi, Papiensis Cardinalis Commentariis narratio de Friderici III. Imp. in Italiam profectio votiua, anno 1468. suscepta de qua Gerhardus a Roo. \*\*\*\*\* *sub initium Nouembr. Cesar res in Au-*

\* Liber IV. p. 396. seqq.

\*\* Vol. II. Gen. XLIX. p. 1096.

\*\*\* Chron. Hirsau. ad an. 1467. & 1468.

\*\*\*\* Rer. Burgund. Lib. V. c. IV.

\*\*\*\*\* Lib. VIII. p. 270. Ex Papiensi vero sua hausit Millerus *im Reichs-Tags Theatro*, p. IV. c. XLIII. Extat etiam Narratio de hac Friderici profectio votiua ex libro I. *Cærimon. Sect. XIII. cap. I. in Tomo tertio.*



*Austria satis iam quietus, Mathiæ ob foedus fidendum ratus, suscepto in Italiam itinere, in ante diem natalis Domini nostri Romam venit, ubi ea nocte sacra faciente pontifice, euangelium de edicto Caesaris Augusti decantasse dicitur, exemplo Imperatoris Sigismundi. Sedecim dies illic commoratus, domum rediit. Itineris huius causa votum esse vulgo ferebatur, erant qui confirmationem successionis in Hungariæ & Boemiæ regna petiisse dicerent, nec absimile vero est, prudentissimum Imperatorem consilia sua, ex autoritate Pontificis, instituere voluisse. De expeditione in Turcam & bello Boemico actum esse nonnulli meminere.*

Sequitur *AUGUSTINI PATRITII de Comitibus Friderici III. Ratisbonensibus 1471. celebratis Commentarius.* Erat hic Patritius Franciscus Piccolomineo, Senensi Cardinali a secretis, & dum ipse Cardinalis ad hæc Comitibus a Papa fuisset missus, cum eodem in iisdem præsens, quæ ipse vidit, adnotavit. Initium facit a Turcarum progressibus in Asia & Græcia, & qua ratione Fridericus III. terris suis hæreditariis metuens sibi prospicere voluerit. Inde in causas Comitiorum Ratisbonensium inquirat, ubi dubius hæret, an ingruens bellum Turcicum, an vero quorundam principum Consilia de abrogando Friderico Imperio hæc promouerint & qua ratione Franciscus Piccolomineus ad eadem a Paulo II. Papa fuerit destinatus. Postea describit iter suum per Senas Mirandulam & Mantuam: reliqua vero quæ ad iter Germanicum faciunt & ipsum Comitiorum statum, desunt. Adiectæ IO. ANTONII CAMPANI, Episcopi Aprutini qui alter erat ex legatis Papalibus, epistolæ quædam de his Comitibus, quas inter alias ipsius epistolas a Cl. Menckenio coniunctim editas, æque reperimus, è quibus has nostras emendauimus. Plenius de his Comitibus egerunt Lehmannus & Müllerus \*.

Hæc exceperit *ARNOLDI LALAINI Epistola de congressu Imp. Friderici & Caroli, Burgundiæ Ducis Augustæ Treuironum anno 1473. facti.* Erat iste Præpositus D. Mariæ Brugenfis, \*\* atque hanc epistolam scripsit ad Paulum Baensium, Rectorem Papiensem, gallico sermone, quam tamen latinam fecit Rudolphus Agricola, \*\*\* licet, vt ipse in præfatione fateatur, non verbum e verbo exprimens, sed latius nonnunquam contractiusue res explicans. Egerunt de hoc congressu Roo. Fuggerus Müllerus, \*\*\*\* & præcipue Magnum Chronicon Belgicum \*\*\*\*\*.

Post hæc venit *PETRI d' AUBUSSON, Rhodiorum Militum Magistri, epistola ad Fridericum III. Imp. de victoria sua aduersus Turcas anno 1480. pacta.* Incidit ista in diem XXVII. Iulii \*\*\*\*\*.

Succedit Sixti IV. Bulla ad Philippum Palatinum Electorem an. 1481. missa, qua ipsum, aliosque Germaniæ Principes cohortatur, ad expeditionem

L I 3

\* Lehmann. *Lib. VII. cap. CXII.* Müller. *pag. V. cap. II. & III. & seqq.* Recessum exhibet Goldastus *Reichs-Sagungen Tom. I. pag. 187.*

\*\* Agit de eodem Val. Andreas in *Bibl. Belgica pag. 161.*

\*\*\* Hanc Val. Andreas excusam dicit *Basilea 1518. 4.* cum aliis Rudolphi Agricolæ opusculis.

\*\*\*\* Roo. *Lib. VIII. pag. 275.* Fugger. *Lib. V. cap. XXI.* Brower. *Ann. Treuir. Lib. XIX. p. 300.* Müller. *p. V. cap. XXXII.*

\*\*\*\*\* *Pag. 401.*

\*\*\*\*\* Christian von Osterhausen *vom Johanniter Ritter-Orden. pag. 536.*



tionem contra Turcas suscipiendam. Ideoque treugas indicit ad triennium a Kl. Iunii 1481. inter Germaniæ Principes seruandas.

Agmen tandem claudit *Legatorum Matthiæ*, Hungariæ Regis in *Comitiis Noribergensibus 1479. habita Oratio*, qua Imperii status ad expeditionem contra Turcas cohortari conantur.\* Verum ita de his Comitiis sentit Adlzreiterus: \*\* *Grandis Comitiorum expectatio, consultationes & salutaria iudicia, fructus nullus: verbo, Atheniensium more, proposita optima fortissimaque consilia, sed quæ nemo exequeretur grassante interim hoste in viscera miserorum Christianorum.* Subiunximus Eiusdem Matthiæ Epistolam, ad *Henricum Ratisbonensem Episcopum* perscriptam, qua ipsum aliosque Germaniæ Principes ad auxilia contra Turcas incitare conatur, qualia olim Imp. contra ipsum præstiterint.\*\*\*

\* Eandem Orationem Theatro suo Comitiorum inseruit Müllerus p. V. cap. LXXIX.

\*\* *Ann. Boic. part. II. Lib. IX. num. 34.*

\*\*\* Desumimus eam ex Leonhardi Pauholtz *Addit. ad Andrea Presbyteri Chronicon Bauariae* pag. 71. Eandemque in Syllabo Scriptorum promiserat Freherus.





DE LEODIENSIVM DISSIDIO CVM  
EPISCOPO SVO LVDOVICO, ET DE CIVITA-  
TIS LEODII EXCIDIO LAMENTABILI, NARRATIO  
HISTORICA, ANNO MCCCCLXVIII.

*Iacobi Piccolominei Cardinalis Papiensis, Commentario-  
rum eius Libro III. p. 396.*

**D**UM in hoc statu res Italæ agerent, lachrimabile interim nuncium Romam affertur, quo animi omnium non mediocriter sunt contristati. Significatum est enim ciuitatem Leodiensem magnitudine atque opibus claram, quæ in omni casu Ecclesiæ fidem Romanæ sedis erat secuta, ferro atque igni ad interuersionem deletam, nulla ætatis, sexus, vel factorum habita ratione. Eam vero cladem unico Caroli Burgundorum Ducis, & Ludouici Gallorum Regis impetu irrogatam, qui ad tantum facinus animos & arma iunxissent. Eam ego non ab re censui quarto huic libro mandandam, quo nostris Pontificibus esse documento possit, quantum seculi Principibus oporteat credi, quantumque adhiberi curæ conueniat, ne ii pastores plebibus dentur, quorum vel ætate, vel ambitione, pro pane lapis, & pro ouo scorpius (iuxta verbum Domini) offeratur.

Igitur sedente nuper Calisto tertio, petebat Philippus Caroli pater, ut Ludouicus qui in Borboniorum familia genitus erat ex filia, Leodiensi præficeretur Ecclesiæ, quam Ioannes annorum iam multorum Præsul, missis ad Pontificem documentis parabat dimittere. Sed ea res cum propter iuuenilem ætatem, quæ uigesimalium nondum annum attigerat, pontificiis legibus esset contraria, Calisto parum & Patribus probabatur; videbanturque uno consilio omnes non assensuri, nisi maiores causæ ad impetrandam rem afferrentur. Erat eodem tempore præcipuum Pontifici studium parandæ classis in Turcos, quæ ad redimendam Constantinopolin duceretur: miseratque propterea in omnem Italæ partem sacerdotes, quæstores, qui futuri operis prædicatione condonationibusque peccatorum, cuiusmodi subsidia compararent. Ad ripam quoque Tyberis Vaticano proximam comportari materiam, & triremes fabricari sine intermissione curabat, nulla de re alia vel loquens gratius, vel audiens. Id vero studium cum ad Philippum significationibus multis esset perlatum senili & ipse obsequens animo, quod iure de Ludouico negatum erat, promissis artificiosis aggreditur. Spondet, si impleatur quod cupit, missurum se terra & maiori grandia ad conceptum opus subsidia, quæ & facilia sibi futura essent, & magnopere conatum Ecclesiæ adiutura. Totam hanc sponsonem ea dictorum scriptorumque constantia firmat, ut nil minus iam putaretur, quam non facturum illum, quod tam asseueranter aiebat. Credidit senex Calistus primum, explendo desiderio intentus; mox etiam in eandem sententiam traductis Patribus, Philippo est obsecutus: ciuitatisque tam populosæ administrationem iuueni credidit munerum Ecclesiæ omnino experti, æstimans an-



norum paucorum iacturam emolumento tanti boni conpensari æquo animo pos-  
 se. Sed accidit diuino iudicio, ut malo inchoata initio calamitosum mox exitum  
 caperent. Nam neque tantarum promissionum fructus perceptus est, & funda-  
 menta sunt posita totius quæ superinducta est cladis. Hunc ergo pastorem plebs  
 illa, etsi longe inferiorem priore suo annis meritisque videbat, gratiam tamen  
 Ducis secuta, acquieuerat facto, sperans mox ut per ætatem licuisset, sumpturum  
 sacra Ludouicum, atque eorum Antistitem pleno ciuitatis imperio præfuturum.  
 Aliquamdiu igitur in hunc modum sine dissensione processit res, cum tamen Lu-  
 douicus fortuna suorum clarior; Leodiensium legibus, quas ante eum seruauant  
 ceteri, aduersaretur sæpe, & ab Ecclesia errans lasciuiorem vitam tanto indi-  
 gnæ sacerdotio ageret. Procedentibus annis, idoneus iam ad consecrationem  
 factus, ad eam peragendam, celebrandam, vnanimi omnium voluntate est po-  
 stulatus. Quod ille, siue quod à religione adhuc esset auersus, siue quod à  
 suis eam necessitatem imponi grauante acciperet, cum contumacius pernegasset,  
 oriri inter eas apertæ contentiones sunt cœptæ; atque ita indies adauctæ, vt mi-  
 nus iam natura elatus populus se vereri eius dignitatem, timereque iurisdictio-  
 nem inciperet. Verebantur ne sacrorum dilatio eo traheretur consilio, vt secu-  
 laris administrationis inducta consuetudine, Episcopum suum dedisceret ciuitas,  
 vicinique Ducis paulatim subiret imperia, quam illi rem morte quouis grauio-  
 rem putabant. Conflitantibus in hunc modum Episcopo & plebe, crescebat in-  
 dies aduersus Ecclesiam rebellio: iamque ministris eius potestates quædam ad-  
 emptæ erant, quæ nullis denuntiationibus reduci in locum pristinum poterant.  
 Itaque Philippus, qui natura vehemens erat, superarique genus suum ciuili con-  
 tentione dolebat, magnis precibus à Pontifice petit, vt dignitatem impugnatæ  
 Ecclesiæ adimi per subditorum violentiam non sinat; sed temeritatem populi su-  
 perbientis censurarum irrogatione contineat. Quod ille cum Leodiensi sedi &  
 communi aliorum dedisset exemplo; non multo post contempta etiam Romani  
 patris potestate, ciuitati & agro sacris est interdictum; inuocatusque ad præsi-  
 dium per iudices Dux bellum Leodiensibus intulit. Pugna autem non longe à  
 muris commissæ, occisis quamplurimis, reliqui in fugam conuersi sunt, ac ciui-  
 tas eodem impetu capta. Quæ vt ad nouam posthac contumaciam calamitatum  
 continuatione languidior fieret, dirui in circuitu muros iussit, tributumque im-  
 perauit, quantum redimendis comparati exercitus stipendiis satis suo iudicio vi-  
 deretur: quodque omnibus acerbius habitum est, eos qui per ætatem ferre arma  
 iam poterant, vno edicto in exilium expulit, paucis quibusdam ad rei familiaris  
 custodiam cum muliebri sexu intus relictis. Hac tanta clade Romam perlata,  
 miseratus Pontifex Ecclesiæ plebisque fortunam, legatum ex referendariorum or-  
 dine proficisci illuc iussit, qui & obtemperari Ludouico episcopo, & dissidentes  
 animos suo interuentu conciliari curaret, reducendis quoque exulibus, leuandis-  
 que tributis quam posset operam penderet. Erat is Honofrius Tricaricensis præ-  
 sul, homo Romanus in familia locupleti, quæ S. crucis dicitur, natus. Ad hunc  
 igitur, cum Agrippinam Coloniam maturato itinere peruenisset, Leodiensis lega-  
 tio aduentus huius præscia accessit, summis obsecrationibus petens, ut quanto  
 posset celerius Leodium properaret, reliquiasque dispulsæ plebis redditis sacris  
 consolaretur. Quorum ille desideriis obsecutus ad oppidum Aquigranense pro-  
 cessit; millia passuum viginti a Leodio positum. Ibi dierum nonnullorum mo-  
 rā cognoscendum putauit, quo animo Præsul & populus ad suscipienda monita  
 Romani Pontificis esset. Eos ut sentire idem, & in omnia paratos cognouit itinere  
 continuato, a quarto milliario præsulem clerumque, & magistratus urbanos obuios  
 habuit, singulosque iureiurando adigens parituros decretis quæcunque ipse tulisset,  
 poenas Apostolicas sustulit; benedicensque populo summa omnium exultatione  
 ciuitatem ingressus est. Cumque is dies vigiliarium esset Apostolorum Petri &  
 Pauli, ad ædem cathedralem procedens, solenne sacrum vespertinum cantauit,  
 assistente plebe, quæ ut in paucitate frequens ad visendum conuenerat. Postri-  
 die

Onofrius  
 Episc. Tricar.  
 legatus.



die quoque Ludouicus ipse, qui monitu legati consecrationem Episcopalem iam acceperat, primis suis missarum solennibus est operatus, Dominicumque Sacramentum tota urbe, legato & populo prosequente, manibus suis circumtulit. Erant gaudiorum plena omnia, respirareque tum primum ex longa fatigatione miseri videbantur, dissensionem omnem initio hoc sublatam putantes. Id modo supererat, ut exulum quoque & tributorum sua ratio haberetur, à modoque ciuitatis moenibus parceretur, quæ Ducis Imperio sine intermissione deiciebantur: Postremo ut leges patriæ redderentur, sine quibus nil quietis habitura reliqua putabantur. Igitur horum causa ad Carolum filium, defuncto interim patre, profectus est: sed in tempora incidit, quæ rebus agendis multum erant contraria. Ducebat ille per eos dies uxorem Britannorum Regis filiam, minusque diligenter propter nuptiarum solennia alienum quicquam intelligere poterat. Iis vero absolutis, cum etiam tantum audisset legatum, nil ob eam causam certum decreuit, quod bellum aduersus Regem Gallorum gerens sociis Britonibus in auxilium properabat, quos magnis copiis premi nunciabatur. Id tantum de postulatis Legato concessit, ut cum Præsule & populo quæ viderentur componeret, conuentaque referret ad se, confirmanda decreto suo vel respuenda. Hac promissione Tricaricensis reuersus, tractare de omnibus cum Præsule & exulibus coepit, sperans conditionem se aliquam inuenturum, qua semianimem populum suscitare, quietemque statuere suspensis animis posset. Sed dum in his sine intermissione laborat, episcopus moræ impatiens, suas iuueniles cupiditates secutus, ad propinquum oppidum suæ ditionis Traiectum secessit. Cuius rei occasione, simul quod diuturnius inter Regem & Ducem futurum bellum iudicabatur, plurimi exulum qui in proximas siluas ex prælio aufugerant, ad numerum quinque millia, resistente nemine Leodium redire; quos statim & reliqui sunt consecuti, inermes ac nudi, syluestribus tantum truncis, & fundis lapidibusque armati. Reditus huius populari quidem multitudini id consilium fuit, ut Cle-

p. 131 rum omnem, cuius nomine tanta mala acciderant, vno impetu spoliarent; grauioribus autem paucis, & poenitiæ significatione reditum sibi in patriam, pacemque deposcerent. Itaque horum suasu ad legatum vna voluntate omnes accedunt, multa per nouitatem facti timentem, orantque ut se deprecatore iam tandem vitæ eorum misereatur Episcopus, plebemque dispersam, ac bestiarum more in latibulis agentem perire in syluis fame, creditasque animas vna cum corporibus interire non sinat, sibi quidem id animi esse, ut illius subsint imperio, ac tanquam ministrum DEI dominumque ciuitatis accipiant: Porro ut opificiis intenti in sudore vultus panem quærant, & quotidianis obsequiis famulentur. Hortatur quoque ut supremas has preces miseræ plebis non negligat, quam eo calamitatis adductam intelligant, ut si se contemptam nunc videat, timendum sit ne ciuitatem & clerum, sacraque & se insuper ipsam vna impietate inuoluat. His auditis Legatus miserans multitudinis faciem, quæ vestitu in siluis discisso, capillorumque & barbarum promissione syluestrium hominum instar habebat, omnes in forum ad concionem vocatos benignis verbis alloquitur. Docet quanto in honore haberi episcopos velit Ecclesia, quid in contemnentes sacræ leges decernant. Illos quidem in patrem suum paulo contumaciores fuisse, diutiusque quam par videretur in contentionibus perstitisse. Quam ob causam coactus ille sit auunculi Ducis auxilium implorare. Magno eos victos prælio tulisse condiciones quæ imperari victis à victoribus soleant. Missum se à Pontifice ad consolandum populum, & subleuanda onera esse, fecisseque in eam diem quæ tulerint vires. Reddita iam ciuitati sacra, ad consecrationem Ludouicum inductum, cuius dilata causa tanta mala accidissent, ad tollenda reliqua se etiam ad ducem profectum esse, facultatemque tractandorum omnium accepisse. Opus hoc totum bona spe inchoatum, sed vereri ne hic eorum repentinus ad urbem accessus, successum suis laboribus adimat. Proinde deponant quam primum arma, quietique rerum exitum præstolentur: cogitent vero si tumultuari pergant, quid Epi-



scopo in eos, & quid sibi, & quid Duci futurum indignationis merito sit, qui praelio pulsos murisque nudatos, tanta in se audere nunc videat. Ipsum quidem, nisi monitis pareant, abiturum illico ciuitate, nunciaturumque Pontifici, quantum obstinationis apud eos inuenerit, ad quorum salutem procurandam sit missus. Ad has eius exhortationes cum respondisset quidam, necessitate impulsam multitudinem, quod viuere in syluis non posset, domum reuersam; Ducique & episcopo, quaecunque in se essent, paratam praestare: pati autem non posse alienis quam Ecclesiae dominis ciuitatem subesse, mortemque (si ita opus sit) huius vnus rei causa, intrepide adituram. Legatus eos iterum consolatus, ut disceptationibus in tanto periculo finem faceret, magna voce quae à tota concione exaudiri posset, postulauit, *An parati essent, positis armis, suis & episcopi imperiis, ut ante promiserant, auscultare.* Ad quam vocem multitudo omnis, diuturno miseriarum taedio in questus & lachrymas commota, protensis ad eum manibus pacem & misericordiam acclamabat, precans identidem, ut conciliarentur tandem Episcopo, & in patria esse cum parentibus & liberis liceret, ne laniati à feris passim per filuas, impio mortis genere necarentur: arma quae retinendae vitae causa sumpsissent, quam primum iusserit, posituros. Id verò cum ad eius imperium statim fecissent, legatusque propterea salutem eorum curae sibi futuram dixisset, quieuerunt paulum omnia; ciuitasque ab impetu furentis populi est conseruata, externis post paulo cladibus occisura. Igitur Legatus assumptis secum principibus multitudinis huius, Traiectum se ad Episcopum confert, & causam miserorum, quam maximis potest, precibus agit: Jamque dierum nonnullorum diligentia rem eo redegerat, ut reconciliatus Ludouicus ad oppidum Tungram, quod inter Leodium Traiectumque medium est, secum accederet, indeque repetendam ciuitatem statueret. Conuenerat autem ut turba omnis poenitentiae significandae causa, effusa obuiam inermis & supplex à transeunte misericordiam precaretur: illi vero liceret, quanto apparatu bellico vellet, ciuitatem intrare, dominatumque in se omnes suscipere, & sua voluntate omnibus moderari. Ea dum ad certam designatam diem perfici debent, Dux interim, qui accepto tam audacis motus nuncio vehementer erat commotus, ad Episcopum scribit, ut tractatum omnem, quicumque cum Leodiensibus haberetur, abrumperet, seque ultorem propediem expectaret, atque ut sine periculo fieri id posset, quatuor millia delectorum militum eius praesidio mittit. Erat duci iam pene explorata spes constituendae cum Rege pacis, quae cum sociis Britonibus iam constituta, quorum causa bellum susceptum erat, faciliorem suam videbatur efficere. His ergo intellectis Ludouicus, quod in potestate Caroli esset, dicto obsequitur, cunctaque dissoluens, praesidio quod erat missum, eodem loco se continet, maiorum copiarum aduentum operiens. Id ergo conspicati Leodienses, quorum in vtramque partem, & ad humilitatem, & ad contumaciam vehemens erat natu-  

ra, aliam (ut in desperatione rerum sit) salutis rationem adorti, proxima nocte, armata duorum millium manu Tungram maximo silentio accedunt, oppidumque ingressi, quod in recenti Ducis victoria deiectis muris aditus per ruinas habebat, eodem silentio ad episcopum penetrant: suamque primum, tum aliorum, qui secum erant domos circumfidentes, impetum in praesidiarios faciunt, nudosque & re subita perturbatos facile opprimunt: si qui effugere in tumultu casu aliquo poterant, ii contendebant Traiectum, erantque clamoribus & gemitu morientium omnia perturbata. Episcopus vero suorumque nonnulli, qui ad intimam custodiam excubabant, perfosso statim coniunctae domus pariete, in qua diuertebat Legatus, intra cubiculum eius refugerant, fortunamque aliorum pauidi expectabant. At Legatus, qui ab initio tumultus inermis in vicum erat progressus, cognitis statim Leodiensibus, duces eorum qui cade fugientium bacchabantur, vocari ad se multis suasionibus contendebat, casuque peranxius erat. Eos tandem venientes cum lachrymis rogat, *Quamnam ob causam eo miseri accessissent, atque inter deprecata pacis tractatus tantum nunc scelus admitterent.* Illi ut erant



erant madentes sanguine, & exitu adhuc rerum suspensi, perturbata voce respondent, quod ad Episcopum tanta viderint missa praesidia, ultionemque suam sint veriti, illuc eos venisse mala consilia praeuenturos, ne interim obtentu impendendae veniae ciuitati exitium pararetur: petere id quod ad salutem reliquum arbitrarentur, ut ipse cum Episcopo eo ex loco Leodium properet, quoniam & reuereri utrumque, dominumque ciuitatis Ludouicum statuere certum sit omnibus. Id ni fiat, propositum multitudini esse, eos atque oppidum uno eius noctis incendio absumere. Legatus instantem necessitatem cognoscens, quod animos ad ea quae minitarentur, incensos videret, accepta fide ne quem ultra occiderent, de accessu ad ciuitatem agere cum Episcopo coepit. Quo statim (ut in tanto periculo necessarium erat) in sententiam traducto, nullo tumultu ambo Leodium rediere, comitante multitudine, non quae vidisset, sed quasi quae dominos suos ex aliorum captiuitate per vim receptos domum reduceret. Laetabantur omnes, & tota Leodiensis Ecclesia restituto Praesule erat in gaudio. Ii quoque qui in Tungra superfuerant caedi, libertati pristinae reddebantur, cum honoribusque remittebantur ad suos. In iis erat dux praesidii paulo ante ad Episcopum missi, quem in latebris adinuentum, ut ad Carolum proficisceretur, veniamque & pacem multitudini oraret, magnis obtestationibus induxerunt. Dux vero qui nondum his acceptis, ad ultionem nihilominus tumultuosi reditus properabat, audita etiam Tungrensi audacia, nullo furori concessio spacio, pacem illico cum Rege constituit, impetrata conditione, ut praesentia sua atque exercitu conatum hunc adiuuaret. Itaque ambo in Leodiensem ciuitatem mouentes, a milliario vigesimo constitere, praemissis tribus millibus Burgundorum, qui vrbi appropinquantes duces cum reliquis copiis expectarent. Leodienses tanto hominum numero ad se iri videntes, quantum vix Gallia reliquum per id tempus in armis habebat, necessario vel moriendum etiam, vel relinquendam excidio patriam cognoscebant. Itaque ut eorum erat in magnis rebus ferocia, ratione aliquando parum expensa, ad extrema perferenda se firman: Tungrensemque fortunam sperantes, adoriri noctu propinquos Burgundos instituunt, quos non totis octo millibus passuum abesse constabat. Itaque de secunda vigilia populariter egressi, magnis animis in eos tendebant: illi vero proximo ad Tungram casu admoniti, vigiles in armis agebant; protinusque cognito per exploratores consilio, progressi obuiam praelium acerrimum commiserunt, quod ad lucem usque magna hominum caede productum est: tandem Leodienses coacti sunt cedere. In eo certamine ceciderunt Burgundorum permulti, in iis fortissimus quisque ac nobilissimus; sed ex Leodiensibus longe plures, quod noctis itinere fatigati, minusque armati iniqua pugna erant congressi. Quae res ciuitatem omnem, alioquin malis fessam, maxime consternauit, cum & luctibus passim replerentur omnia, & orta luce miserando spectaculo referri humeris patres, fratres, & filii exanimes manante adhuc sanguine viderentur. His tantis malis confusus Legatus, ac plane iam inops consilii, quod vnum ad deprecandam vitam reliquum erat, conuocato iterum ad concionem populo, in conspectu omnium lachrymans; *Videtur, inquit, ciues fortunam vestram ferocibus consiliis non mea culpa ad supremum adductam. Imminet propinquum exitium, iratus est Dux, & Duci adiunctus Rex potentissimus ad vos ambo instructo exercitu properant, vrgens necessitas longam orationem non poscit. Audite filii, ut extremam vobis quam possum, pietatem impendam, paratus sum (si ita opportunum putatis) ad Ducem nunc proficisci, mecumque Episcopum ducere, obuui ambo exercitui, atque humi strati misericordiam lachrymis nostris precabimur. Cum personam ego feram Pontificis, ille Regi Duci innotus sit sanguine, inueniemus forsitan, quod respirandi spatium praebeat, nam imperandi nunc interminandique tempus non est, precum esse redemptionem oportet, legitima de vobis meo & vestro nomine repromittam omnia. Si placet hac ratio, actutum ibimus; sin praesentior apud vos alia est, illam monstrate. Vobiscum, & sine vobis eundem casum parati sumus subire.* Cum hac profectio fletibus omnium & vociferationibus



probaretur, ad declarandam insuper poenitentiam ciuitatis adiciuntur primarii ciues, summum eo tempore magistratum gerentes; qui una euntes imperata Ducis suscipiant, deque reliquorum fide testimonium ferant. Itaque hora diei iam decima profecti omnes ad tertiam noctis, non sine crebris vitæ periculis, ad primas stationes hostium peruenere. Quibus statim præfecti duo obuiam facti, quorum alter erat Præses Burgundiæ, alter sororis episcopi vir, intellecta viæ causa venterunt eos ulterius progredi, ac statim in custodiam Præsidis legatus, episcopus in affinis sui tabernaculum adductus est, magistratus vero omnis in vincula coniectus. Inter hæc congregato Ducis consilio, cum hora lapsa iam esset ad eum omnes deducuntur, quamque ob causam id noctis venissent requirunt. Dicere pro omnibus orsus legatus, quanta verborum & vocis demissione misericordia potuit, placare conatus est iracundiam Ducis, & veniam miseris impetrare, identidem monstrans præsentem Episcopum, cuius causa sumpta essent arma, ouibus suis salutem precari, ciuitatem paratam esse, si velit, exercitum omnem intus accipere, & Præsuli parere, & quæ imperata post primam victoriam erant, quanquam maiora viribus, actutum implere: pro iis autem quæ ad Tungram, & nunc apud antecursores sunt gesta, ex Ludouici & suo etiam iudicio, satisfactionem præstare. Manus quoque in illum supplices tendens, atque ad hunc affectum lachrymas superimpedens petiit, si minus præstandam eam pietatem humiliato iam populo duceret, præstaret saltem Deo creatori, qui pro crucifixoribus Patrem orasset, præstaret & Romano Pontifici, cuius beneficio ea sedes Leodiensis generi suo esset concessa. Nihilo his dictis obstinata ad ultionem mens potuit flecti: Respondit tantum, liberam sibi in res atque animas ciuium velle potestatem permitti, nec omnino conditionem aliquam dici. Quæ res Leodium significata, ad sustinenda extrema, quærendamque armis salutem corda omnium incitauit, putantium occasum suum, quem declinare in prælio forsitan possent, in deditione certissimum esse. Igitur Dux missis Traiectum legato atque eodem loci magistratu Leodiensium in catenis traducto, iniungit episcopo, ut sumptis armis secum ad ulciscendas iniurias eat, patris propositum ac suum animo agitando. Etenim quod ea ciuitas potentissima esset, vicinaque Brabantia provincia, frequentes cum illa contentionum occasiones haberet, seruata autem contra maiores suos Regum patrociniis diceretur, delere nunc in tanta opportunitate conspirantis Ludouici Regis ad internecionem volebat. Igitur admoto ad urbem exercitu bipartito, copias diuidit, ac colle occupato qui Valburgenfi portæ proximus erat, suam & Regis stationem eodem in loco constituit, ad alteram autem ac longe diuersam ciuitatis partem Philippum Sabaudensem cum reliquis mittit, ut uno tempore tentata utrinque irruptione, populus ad duos conuersus, ad repugnandum inuoluitior fieret. Leodienses his tantis angustiis circumuerti, summam rerum suarum ad fratres duos præcipuæ fortitudinis viros detulerant, Burenium & Gozonum, quos reliqua multitudo in quamcunque duxissent partem, illico sequeretur. Ii vero animis usi, conuocatis ad se primis nonnullis docent, nisi aliquo grandi ausu salutem ciuitatis stare non posse. Proinde si accingere se una uelint, paratos esse omnium primos suas animas dare, cum statim velle se omnes dixissent, idque unum consentirent ad redemptionem patriæ superesse, partita inter Burenium & Gozonum multitudo, rationem irruptionis hanc ineunt, ut videlicet nocte quæ instabat, Gozonus ad castra regia nil tale in tantis copiis expectantia impetum faciat; Burenus vero eodem conatu ad Philippum erumpat, futurum sperantes ut alter exercitus alterius perceptis clamoribus desperatione alterni subsidii conuerteretur in fugam. Ut vero etiam perturbatius confunderentur omnia, iubent cupas innumeras secum portari nitro & pice completas, quæ primo adortu accensæ in illorum tabernacula locis omnibus iacerentur, atque inde flamma excita malo ancipiti trepidantes inuaderet. Condictis omnibus ad designatum opus disceditur, animis quam successu maioribus. Peruenerat iam ad regias stationes Gozonus nondum intellectus, expectabatque ut à Bureno signum

*Burenus, Gozonus.*



signum acciperet, quo significaretur ad Philippi castra à se quoque accessum, & pugnam commissam esse. Sed is dum tardius condictum exequitur, Gozoniani quidam moræ impatientes ad tentoria Ducis Regisque furtim prolapsi, incendere ea coeperunt, & ferocius hostibus insultare: quo factum est, ut clamore statim sublato, & à Philippensibus inde excepto, utrobique armatus exercitus Leodien-  
p.134 ses ab incepto terruerit. Ortâ luce indignati ambo, quod tot iam cladibus attritus populus nocturno etiam incurſu vitam suam petisset, ocyus Philippo imperant, ut qua parte muri essent disiecti, conferto agmine irruptionem tentaret, ipsique ex eo, ubi tendebant, loco producto exercitu idem conantur. Pugna incepta, magna contentione utrinque res gerebatur, his annitentibus ut conceptæ iracundiæ facerent satis, illis ut coniuges, liberos, parentesque supremo illo certamine ab interitu vendicarent. Sed longe impar Leodiensium fiebat congressus, quod hostes numero pugnatorum, & apparatu omnium rerum instructissimi erant, urbana autem turba nec assueta bellis, nec armata satis, multis acceptis cladibus ad paucitatem redierat. Quamobrem paulatim submota loco, & cadentium numero debilior facta, cedere propugnaculis, liberumque ingressum irruptentibus dare coacta est. Ita uno tempore duobus ex locis Burgundi calamitatem miserrimam intulere. Eorum vero qui adhuc integri erant, ad hominum circiter viginti, cum imbelli multitudine in forum subito confugerunt, obstructisque aditibus ut in articulo illo licuit, noctem expectabant, per quam reductis in castra exercitibus educere suos ad fugæ societatem possent. Sed ea re intellecta, è vestigio Dux ciuitatem omnem, locaque imprimis foro proxima iubet incendi, cuius mali necessitate compulsi illi relictis omnibus ad sylvas proximas se contulerunt. Clerus inspecta iam ante ciuitatis fortunâ, in sua quisque Ecclesia clausis ianuis se continebat, vestibis sacris indutus, sanctorumque reliquias, atque adeo ipsum Domini Sacramentum ad deprecandam misericordiam manibus præferens. Idem religionum virginumque cœnobia pro sua quæque conditione egere. Sed nihil inter arma sceleratæ militum manus incontaminatum liquere, refractis portis sacra omnia in lachrymabilem direptionem sunt data, sanctuaria Dei tota urbe incensa, spoliati sacerdotes atque occisi, tum nec parietibus templorum etiam parsum, in ipsam autem imbellem turbam tanta impietate sæuitum est, ut nulli sexui, ætati, aut ordini ignotum voluerint. Infantes allisi parietibus sunt, puerperæ confossæ, pleræque virgines stupratæ primo, mox strangulatæ, senes quoque & pueri eodem quo pugnantes habiti loco. Quin & illud ad malorum cumulum accidit, ut parentes cum matribus, filiis, & omni prole inualida fune uno constricti ad acerbiteriam interius in profluentem Mosam deiicerentur, in mediisque diuinis, dum astat sacerdos altaribus, & Domini corpus sanguisque inter manus versantur, sacræ patinæ & calices impie raperentur, ut merito de tam sæuis hostibus emitti ad ultorem Dominum vox illa Prophetæ lamentabilis possit: *Domine Deus, venerunt gentes in hereditatem tuam, polluerunt templum sanctum tuum: posuerunt Hierusalem in pompæ custodiam, posuerunt morticina seruorum tuorum escas volatilibus cœli, carnes sanctorum tuorum bestiis terræ, effuderunt sanguinem ipsorum tanquam aquam in circuitu Hierusalem, & non erat qui sepeliret.* Inter hæc autem tam fæda crudelitatis ministeria, Ludouicus Rex amicæ semper ciuitatis calamitate confusus, quæ in illum pugnans nomen eius clamoribus inuocabat, plane iam facti pœnitens, in proximas regni sui regiones exercitu abducto concessit: Dux vero dimissa urbe prædonibus, ipse cum expeditis equitibus ad insequendos qui fugerant continuo profectus est. Sed ubi asperitate sylvarum ne inueniri quidem illos, nedum capi posse intellexit, regressus Leodium, tota passim ædificia deiici imperauit, ne profugis spes ulla reditus superesset, mox quoque Traiectum contendens, magistratum qui salutis fidem ab episcopo ante acceperat, vinculusque nihilominus illuc fuerat deportatus, strangulari & in profluentem abiici iussit. Eandem fortunam vicina quæque nonnulla oppida, quæ Leodienſes adiuuerant, mox subiere.



Hic finis contentionum fuit, atque hunc occasum celeberrima quondam ciuitas tulit, victoriis nobilitata innumeris, & à Romanis Imperatoribus condita, clero autem ante alias Germanicas Ecclesias clara, diuini vero cultus ornamentorumque sacrorum cum sanctissimum tum locupletissimum domicilium. Cuius quidem ante has calamitates is animarum numerus fuit, ut censu habito centum & viginti millium intra muros tantum continere inuenta sit.

*DE LAUDIBVS CAROLI BVRGVNDIÆ DVCIS, ET VICTORIIS, ITEM DE LEODIENSIVM CLADE ET EXCIDIO,*

*Epistola incerti Auctoris, Tractatui de Custodia Principum præfixa.*

CUM animaduertentem, quam bonum & utile, iustum honestumque foret, quemlibet cum labore summaque diligentia ad eius spirare salutem, soliteque vigilare custodiam, à quo totius patriæ salus reique publicæ commodum iugiter procedit. Sæpe & multum mecum ipse cogitavi, quibus in negotiis occupandum nunc fore melius, satis otii libenter susceperem, sui ut custos essem feruusque fidelis, ac eius rei tutor, cuius ad salutem totius populi vota suspirant. Et nunc mihi cogitanti in mentem venit, ut quo in casu & si armis eius in hostes bella contere non valeam, certandum tamen mihi animo fore existimaui maxime, quo sibi tandem munitionem contexere possem fortissimam. Cum & illi iuste cogitant, qui eum quem sibi debent obsequium reddunt & honorem, eiusque pericula suis cum periculis expetere velint, atqui & ut incolumis semper maneant, nullum laborem vitandum esse putant; cum nullum tam magnum sit periculum, quod sapiens pro salute patriæ, incolumitateque Principis vitandum arbitretur. An tu ne huius rei commodum proprio tuo commodo anteponas, ex cuius & totius politiæ commoda augeri crescereque videntur, ex cuius & interitu non est in patria salus, non in ciuitate bonum quod non fraude marcescat? Quid tu tandem putas patriæ dulcius tutiusque possit afferri à Fortuna Duce sapientissimo, quem quivis non immerito viribus defendat maxime suis, tu gladio, ille baculo, calamo ego, alii armis, ceteri lancea linguæ, nonnulli consiliorum cuspide; hic vigil, ille cursor, ingenio multi, omnesque cum ratione, & tutius tandem precibus cum deuotis? Quis vestrum sentit ut ego, adesto mihi præstoque sit, & sibi quem puto sapientissimum fore ducem, custodiæ fabricamus arcam, si prius & de ipso laudes, quem cordis amore amplexus sum, meoque affectu, mecum depromere vis permaxime sibi condignas, quod tu tanto libentius audies, quanto & ipsum feruentius amas. Iocys, qui cupis, iubilo cordis, consonaque voce nobiscum præcinere laudes. O felix patria cuius defensor erit Carolus, Princeps Illustrissimus, Dux Burgundiæ, Lotharingiæ, Brabantiae, Limburgi, & Luxemburgi, Comes Flandriæ, Artesiæ, Burgundiæ, Palatinus Hannoniæ, Hollandiæ, Selandiæ, & Namurci, Marchio sacri Imperii, dominus Frisiæ, Sabignæ, & Machliniæ, vir nobilis, omnique virtute præstantissimus, æquitate plenus, prudens, atque benignus, liberalitate munificus, humanitate vero pius, in bello felix atque victoriosus, pace modestus, omnique in opere sapientissimus. Cuius adhuc similem visurus ne sim hæreo, quem naturæ splendor, & virtutum decor excellens tam decenter significant, iustiusque decorant, qui cum sui generis profapia multa priuilegia & prærogatiuas nobilitatis sibi vendicat, tali parentatus progenie, quæ Reipub. semper honori, nunquam detrimento affecta fuit. Taceo de militia & victoriis, quibus auus, proauus, & plurimi eiusdem generis Rempubl. auxerunt, & salutem procrearunt. Hic filius patrem sequitur sua proles, non cum sceleratis, sed virtutum fauore, scientiarum claritate perlucida educatus

*Carolus Burgundus.*



tus est, ut ipsa honestas & vitæ modestia à pueritia sibi ex ipsa consuetudine, quæ est altera natura, insita & complantata fuerit. Præterea quanta sibi sit facultas potestatum, quantum primatum, facultatis, validæ armaturæ in affinibus. Ob-  
 ticeo etiam amplissimum potentatum quo roboratur: non numero multitudi-  
 nem armigerorum, quibus ipsemet & sui quoslibet rebelles sibi subiugare, &  
 colla superba migrantum prævalent inclinare. Ipse etiam amicis, affinibus, &  
 consanguineis, fratribusque priuilegianter audax est & venustus. Cum non in iis  
 quæ lites & iurgia sunt multoties iucundatur, sed quæ probitatis sunt & hono-  
 ris; honestius gloriatur, cuius prætextu non histriones, non adulescentes, non  
 passionum executores, sed scientiarum & virtutum cultores huic amantur. Cu-  
 ius etiam dignitas & præsentia Prælati Ecclesiæ, & fidei professoribus est amica,  
 multumque grata. Quid opus est grandia dicere de velocitate aut agilitate cor-  
 poris sui, quæ ipse præfertur multis; cum beneuola promptitudine ad obsequia  
 diuinorum, ad quæ non dormitat, semper velox aut agilis ad ea quæ æternæ sunt  
 salutis. De corporis specimine, pulchritudinis formositate, aut decore & phy-  
 siognomia perplacita multa ediffererem, nisi ornatus ad intra illi plus pondera-  
 ret, qualis ei ad extra apparet, multum plus ad intra virtute, intellectu, & con-  
 scientia decoratus est. In consilio namque prudentissimus, in cogitatione pro-  
 fundus, in conscientia fidelissimus, in fortitudine omnibus proficiuus, & sui in  
 prudentia sibi & aliis utilissimus. Adeo quoque bonis rationibus præditus, ut  
 nullum vitæ discrimen aut periculum sibi pro fortunis Reip. patriæque salute fu-  
 giendum putarit. Quod & profecto claruit, dum nuper non proprii causa com-  
 modi, sed alienæ rei gerendæ pacis in Franciam venit, dulces sibi amplexus re-  
 linquens patriæ, patrem senem, matremque charissimam, uxorem eius, gloriam,  
 & hominis unicum solatium. Heu quanti tunc fuerint patriæ gemitus, quantum  
 matris Ligurium, \* quanta uxoris lamentatio, nemo sermone edicere potest,  
 dum patria pro ipso preces atque processionum cerimonias Dei, sanctorumque  
 viagia, illi mater fundebat lachrymas, uxor vero iam desiccata fletibus, infimo  
 pectore suspiria. In Deum sperans patria sui mœroris quodammodo inuenit so-  
 latium, dum etiam continuo triumphi prodigia diuinâ notescerent gratia, dimi-  
 nuit planctus confidens in Domino: mater vero eius in templo plorans luguber-  
 rime, ecclesiastica voce tandem unius de obseruantia Prædicantis consolata est.  
 Cuius & talis sermo fuit; *noli flere Domina, saluus perueniet filius noster, & saluus  
 reuertetur ad nos, & oculi tui videbunt eum, credo enim quoniam angelus Domini bo-  
 nus comitetur eum, & bene disponat omnia, quæ circa ipsum geruntur, ita ut cum gau-  
 dio reuertatur ad nos.* Ad hanc vocem cessauit mater eius flere, & tacuit. Pro-  
 fectus est ille modo in Franciam, cuius uxor nullo modo consolari poterat, sed  
 cotidie exiliens circumspiciebat & circuibat vias omnes, per quas spes remeandi  
 videbatur, ut procul videret eum si fieri posset, venientem; cruciabatur spiritu,  
 nesciens si ipsum visura ante mortem, qua nunc ipsa felix sepulta est. Illa dum  
 corpore debilitata, exhausta virib. agonizando traderet animam, iste robusto pe-  
 ctore, virili animo certando saluauit patriam. Num ipsum summa cum virtute  
 & honore pro patria voluisse interire vidisti, ubi dum sibi hostes ori suo hastam  
 infringerent, hic suis mordebat dentibus? Helas, helas, qualis iste cibus, qui nu-  
 per comedit amygdala, nunc clauum dente ferreum suo conterit, cuspidemque  
 sua inter mandibula fregit, genas sanguine perfusas, cruentas, collum, cor au-  
 tem intremulum, triumphique plenum habuit, collarium dum sibi chalybe tex-  
 tum finderent hostes, si aliis timorem, illi audaciam præbuit: non pauescebat  
 repentino terrore irruentes in ipsum impiorum potentias, animam suam belli  
 gloria, amoreque patriæ contentus effundere, arma vero nequaquam voluit pro-  
 iicere. Ideo Dominus erat in latere suo, custodiebatque pedem eius ne capere-  
 tur; nam dum captus esset, certe capi ipse non potuit. Nonne hic similis Ma-  
 chabæo, qui cum se armis succinxit bellicis, similis factus est leoni in operibus  
 suis, & sicut leo rugiens, in venatione, dilatans gloriam populo suo, indutus lo-  
 ricâ

*Expediit.  
 Francica.*



ricâ ut Gigas, viris suis qui secum erant, hæc loquebatur verba: *Ne timueritis multitudinem eorum, & impetum eorum ne formidetis, mementote qualiter salui facti sunt patres nostri, & nunc clamemus in cælum, & miserebitur nostri Dominus, & conteret exercitum istum.* Et viderunt eos venientes ex aduerso in prælium, & tuba ceciderunt, & congressi sunt, & contriti inimici eius, & fugierunt in campum, nouissimi autem ceciderunt in gladio. Nam cum iam \* Gallorum validissima obsideretur, qui cum plures erant, hic non obstupuit, neque in campo dimicare metu, nullo periculo vel morte perterritus, amore patriæ ibat in prælium, corpore tauri validissimi, impetuque leonis, & se pro legionibus in hostes immisisse dicitur medios, ubi manu victoriosissima simul unâ bellum cum pace concessit, liberauit exercitum, & à quibus tueri debuit, ipsos protexit, tam valide, tam fortiter, tamque gloriose, ut etiam inimicus suus ipsum laudare coeperit, contentus ab eo vinci quem vincere non potuit. Tam decentis viri victoriam subiit libens regalis maiestas, victa quasi vicisset triumphauit cum eo, cuius in bello stupescenda fuit seueritas, & paulo post in omnes miranda eius erat clementia. Hoc viri fortis est, qui de victoria contendunt, eos hostes putare, qui victi sunt, eos homines iudicare, ut possit bellum fortitudo minuere, pacem humanitas augere. O quanti sit eius gloria existimanda putatis, qui cum inimicum vinceret, ipsum vincendo amicum fecit, ut cum quo prius luctabatur maximo certamine, cum eo ipso alios iam in hostes sibi maximam comparauit victoriam. Nam quid Africano similis viro serenissimo, cui industria virtutem; virtus gloriam, gloria æmulos comparauit, qui etiam ad eas laudes, quas à patribus suis accepit, addidit aliquid suæ, ut puta eloquentiam, quâ sibi bellicam comparauit gloriam. Sic Princeps noster Carolus Philippi patris filius, qui cum belli laude non inferior quam pater fuit, & ad eam laudem (si recte conspiciatis) doctrinæ & ingenii gloriam adiecit. Pertranseo quem pridem ante nobis amorem ostendit, quamque patriæ procurauit salutem. Cum militibus, malisque complicibus Vrbs redundaret, & omnes timore domi oppressi continerentur, venit iste succinctus gladio miles inuictissimus, & p. 137 terruit aduersarios acrimonia, terruit voce, terruitque vultu; quin imo & solum sui cum præsentia inimicum prostrauit valide, illum puta Draconem maximo veneno aspersum, qui ex superbia, insolentia, pertinacia, & aliis grandioribus originem traxit, scelere & malis cogitationibus abundans, persæpe euolans è templo \* dynant rabido spiritu circumspectans huc & illuc, si quem vidisset de domo Principis nostri amantissimi, cui aliquid mali faucibus afflare, ore attingere, dentibus insectare, lingua aspergere potuisset, tam violenter, tamque inhumaniter, vt statim nemo per illa proficisci loca qui poterat, securus erat, quin ipsum ille explorator gentium, Deo contumax, omnibusque inobediens, maximis iniuriis, pestifero suo veneno molestaret, qui nullius potentiae frenis domari potuit, aut minarum tonitribus concuti, vel proteri, nisi quo tandem astrictus iudex ille amator patriæ, Dux Burgundiæ, ira commotus & iustitia, ad propulsandam patriæ illatam suæ iniuriam illico paratus, proprio suo corpore vindictam sumere voluit, sicut & iustum virum decuit, de emenda contendere coepit, & vbi reum inimicum suum iustitiæ contumacem reperit, qui & nullius amicitia placari, aut ab eius obstinata retrahi malitia potuit (*cum ab impiis non egrediatur nisi impietas, vt scribitur Prouerb.*) in eum tandem armis recte ultionem expleuit, illum ipsum serpentem inimicum patriæ funditus expiauit, in guttur eius clauum infixit iustitiæ, strangulauit. Recte illud quidem in Job scribitur, *Huic similis est rugitus leonis, & vox leæ, & dentes catulorum leonum contriti sunt, tygris periit eo quod non haberet prædam, & catuli leonis dissipati sunt.* Eum & tandem in aquam submersit, qui & cum defluerat in Leodium ciuitatem peruenit, vbi virus suum euomere coepit totam infecit urbem, & in tantam rabiem miseram plebem perduxit, vt etiam templum Dei sputo maculare suo & manum eius iniicere sanguinolentam verebatur minime, non modo vt homines sed vt bestiae fauientes ferocissimæ omni ratione virtutisque gloria priuati, vt iam dedecus, atque volupratem

Leodienfis  
populus.



ptatem honestati, & venusto turpitudinem anteponant. Quid enim interest, utrum ex homine se conuertat quis in belluam, an hominis figurâ immanitatem gerat belluæ? Perinde hic populus seditiosus ad ostia vnus, quem sibi imbelli caput præfixerat, tyrannidis enormi irruit tumultuatione, eumque tubis & buccinis, claraque voce præconis euocare cœpit, quo tandem hic impius atque crudelis prodiit in lucem sudanti ceruice, oculis ardentibus, eiecetoque capillo, complutis \* armis, compluribusque aliis festinantius ire cœpit. Et cum cornua sua vibrasset ut aper, caput erexit animo insolenti ac corde iniquissimo, celerique brachio vexillum suscepit, in forum venit, vocatis sibi complices, sui & suorum malitia fretus exercitum duxit: & in eo loco, quo sibi gloriam magnam, cum securitateque victoriam expectat, in eodem sepultus est ab illo nostro principe, qui & nuper eius fauces, gutturque perstrinxit, nunc tota etiam eius viscera amputauit, intestina euulsi, eius & omnia vestigia deleuit, consulatum amouit, tyrannidem induxit, partesque per orbem dispersit. Recte eorum merita tabulis comparauit suppliciis, quibus etiam potius diuinitus quam ab homine ultio nefandi sceleris creditur profluxisse. Nam ut scribitur Prouerbior. \* *Qui recti sunt, habitabunt in terra, & simplices permanebunt in ea; impii vero de terra perdentur, & qui inique agunt, auferentur ex ea.* Non minor strage Israelitici populi clades illa fuit, hoc campo periit Saul, hoc campo periit Jonathan, hoc campo periit totius Israel fortitudo; nunc libertatem quæ non erat, suis in patria peperit; potius est gloria quæ cum laude summa prodita & venustate cotidie magis & magis enitescit. Quis est tandem tam tenui cogitatione præditus, cuius animus tantis angustis inuidiæ continetur, qui non hunc principem studiose laudet, & sapientissimum iudicet, qui pro salute patriæ, pro incolumitate ciuitatis, pro Reip. fortunis, quamuis magnum atque atrox periculum studiose suscipiat, & libenter subeat. Et quidem hunc ego Principem magis cupio satis laudare quam possim. An tu hoc inter minima existimandum putas, tui cum pridem custos Carolus Princeps Illustrissimus, te propter patriæque salutem, inter inimici brachia requiem susciperet momentaneam. Ecce nefario scelere fratres vno consilio Leodii cives, illi nostro amantissimo Principi calamitates machinabantur atrocissimas, in noctis dum tenebris arma susciperent, nobilissimumque tentarent prodere Duce<sup>m</sup>, ante eius maximis insultibus ouantes papilionem: irruerunt sicut Leo famelicus, aut aliqua teterrima bellua soluta catenis volitabant, ingentem facere cladem, nobilissimum sibi sanguinem sub hostilem libidinem trucidare sperantes, non aliter quam Philistis tres cunei. Et in illa hora non est inuentus gladius vel lancea in Israel, sic nostris dormientibus legionibus, nullus gladium manu tenebat, quo tandem expurgiscentibus ad Philistin, id est, & nostri ad feroces Leodii homines descendebant, ut acueret vnusquisque vomerem suum, & ligonem & securim & sarculum. Retusæ itaque erant acies vomerum & ligonum, tridentium, securium, vsque ad stimulum corrigendum, cumque venisset dies prælii, non est inuentus ensis & lancea in manu totius populi. O feroces animos! ô crudeles cogitationes! ô derelictos homines ab humanitate, qui agere ausi sunt, aut cogitare possunt, quo pacto dulcissimum illum Ducem sanguinolenta eorum palma, proprio nunc sinu dormientem iugularent! Hoc quod volebant, traditorum nefas ni Deus ipse vidisset, ad exitum perduxissent. Nunc de ipsis verificatum est, quod & Prouerbior. \* scribitur; *Pedes illorum ad malum dum currerent, & festinarent, ut effunderent sanguinem, ipsi contra sanguinem suum insidiantur, & moluntur fraudes contra animas suas, sic semitæ omnis iniqui animas possidentium rapiuntur.*

Nunc igitur Vrbs eorum acerbissimo concidat conflagrata incendio. Neque verbis consequi indignitatem rei, sed negligentius ubi fero quod vos mei non egetis, vbimetipsi rem propriam, manu propria tractatis. Num illum ante pedes vestros Quiritem telo percussum cadere vidistis fortissimum? Quid tunc vestro cogitastis animo patriæ amantissimæ, dum illi suas vobis spicas tridentium



minabantur infigere spurcissimi, dum etiam è gremio vestro iugulatum eriperent, vere amor patriæ timorem in vobis exnihilat. ô nobilis, fortissimusque animus, qui pro nobis in limo terræ pede fixo, vix vt ambulare posses, inimicum persequeris, infra te lutum, supra te pluuiam, niuem, denique glaciem ipsam ruere vidisti, & tunc etiam incalefactibili vndique frigore septus eras, nullus gelu tale vidit, quo Solis radios in glacies algore fuisse conuersos, & anhelitus hominum ante ora gelatos, panem dum roderes, lacum bibisti, quinimo glaciem fuxisti, & femore ligatam tanquam prouidus tibi ad necessitatem tecum tulisti, quoties & crudas carnes desiderasti, ne dicam foenum, paleas, ipsa quoque stercora? Nemo est qui possit satis rem consequi verbis, nemo referre oratione magnitudinem calamitatis. Omnia pro nobis hæc ille libenter sustulit, quod ô tu felix re- cense patria. Quid si nunc hæc Leodiensium ciuitas, vrbs inuictissima, vocem immutat, num hoc pacto loquatur: Ego illa pluribus tropæis ornata, triumphis ditata, clarissimis locupletata victoriis, quæ nullius fraude, viribus, aut potentia labefactari potui, nunc tuis seditionibus vexor, ô Princeps inuictissime. Nihil vires corporis mei contra te mihi auxiliatæ sunt, nihil mihi scientia rei militaris ad- iumento fuit, nihil erudita calliditas præsidii tulit, nihil morum & societas ser- monis opitulata est, nihil ferocissimorum robur animorum victoriæ contulit. Nam quæ mihi reliqua spes manet libertatis? si tibi in me quod licet, libet; & quod libet, licet; quod licet, possis; & quod possis, audes; quod audes, facis, & quod facis, nulli molestum est. Nunquid tua cum virtute potestateque amplissima mu- ros euertisti mihi quondam validissimos, totiusque Reip. ambitum ignis in gre- mium misisti & ædes. Per te mihi extincta est lucida fama per orbem, qua glo- ria potitus es, eadem miseria peri. Nihil mihi præter nomen post multa secula relinquis. Heu me miseram, quæ semper rebellis & iniuriosa fui, moreque im- probo laceffita virtutibus inconsiderata, minax semper eram, superba, petulans, atque opprobriosa, potentiæ, diuitiis, factioni, militibus, affinitati, & sodalibus magis quam veritati confisa. Proh dolor, hæc mea damnabilis sententia prostra- tam effecit, ita vt nulla in me præter aliorum exemplar illacerata remansit com- moditas. Nunc scio quid sibi angelus voluit dum ad Ezechielem locutus est ita dicens: *Dabo te in desertum & opprobrium gentibus, quæ in circuitu tuo sunt in con- spectu prætereuntis, & eris opprobrium & blasphemia, exemplum & stupor in gentibus, cum fecero in te iudicia in furore & indignatione & increpationibus iræ; inducam su- per vos gladium, & disperdam excelsa vestra, & demoliar aras vestras, vrbes vestrae deserta erunt, & cadet interfectus in medio vestri, & displicebunt tunc sibi met super malis quæ fecerunt in vniuersis abominationibus suis. Qui in agro erit, gladio mo- rietur, qui in ciuitate, iugulabitur, & qui fugerint ex eis, erunt in montibus quasi columbæ conuallium, aurum & argentum vestrum non liberauit vos. Dabo in manus aliorum, angustia superueniente requirent pacem, & non erit, conturbatio super con- turbationem veniet, & auditus super auditum.* Panem suum nunc in solitudine comedent, & aquam suam in desolatione bibent, & desolata est terra multitudine sua ciuitasque eorum igni data est, moestam vtramque eius partem consumpsit ignis, & medietas eius redacta est in fauillam. Nunc scient quia Deus iustus est, eoque de- ceperunt populum eius, dicentes: Pax, & non fuit. O vos barbaræ gentes, quonam modo subacta vobisque inuisa & inculta videar concipite, non meum quo me damna- tam conspiciatis iter proficisci velitis iniquissimum; nullum in vobis machinari contra eum cogitate exitium, quem conditor rerum nobilitate præclara, bellandique gratia deaurauit altissimus. Hic est quem Deus elegit secundum cor suum, in quo compla- cuit, omnium malorum extirpator, amor & fiducia omnium amicorum suorum, ini- micorum vero timor & angustia. Cum etiam immortales sibi Deos adiumento esse velint, hic persequi ad mare rubrum & ultra inimicum suum potest, nihil est quod sibi <sup>p. 139</sup> resistere possit: quoniam iustus (vt habetur in Prouerbiis) odit iter impiorum quasi sepes spinarum, via iustorum absque offendiculo. Sibi omnia parent, in suo conspe- ctu omnes digitum ponunt ori suo, si dixerit vade, vadunt, si veni, veniunt. Se- dens



dens in puppi mundi vertit gubernaculum quo voluitur orbis, cui & totius curiæ obsequatur coelestis familia: quare vos omnes qui virtutem colitis, & vobis ac vestris pacem augeri diligitis, crimen læsæ maiestatis, si quod in ipsum præsumitis, cautiùs abiiciendo vobis consulite; & obsequio potius parere, quam manu forti succumbere velitis, illius, qui victor semper abibit. Hæc sæpe locutus, dum fui filiis meis, non audierunt, despexerunt omne consilium meum, & increpationes meas neglexerunt, dixique eis, *In interitu vestro ridebo & subsannabo, cum vobis quod timetis aduenerit, cum irruerit repentina calamitas, & interitus quasi tempestas ingruerit, quando venerit super vos tribulatio & angustia, tunc inuocabitis me, & ego non audiam*: Non susceperunt, nec acquieverunt consilio meo, & detraxerunt uniuersæ correctioni meæ, in manibus meis confisi, potius nunc confusi sunt. Recte stultorum prosperitas iam perdidit illos, & ego conflagrata incendio, ita disrupa sicut videtis. Cum etiam eis quæ & in prouerbis scripta sunt, proposueram, sex esse quæ Deus ipse odit, & septimum detestatur anima eius, in quibus & ipsi nutriti educatique semper fuerunt, oculos sublimes, linguam mendacem, manus effundentes innoxium sanguinem, cor machinans cogitationes pessimas, pedes veloces ad currendum in malum, proferentem mendacia, testem fallacem, & eum qui seminat inter fratres discordiam. Ipsi me deriserunt: & nunc quis est qui ipsos non rideat? Ego nunc melior sum quam unquam fui, veritatem quam nuper absconderam, nunc palam effero: quam & me modo dicere necesse est, dum multi iam prætereuntes meo in circuitu mihi dicent, *Mutatus est tibi color optimus, vab qui te tam pulchram, mœnibusque ornatam ciuitatem destruxit, arecant manus eius pedesque terentur*. Lamentabilem cladis vindictam de me eum sumpsisse vident, quam tam iustam, tamque necessariam fuisse ignorant: Nunc mecum scient, & alium de eo sermonem facient, non dubito. Nobiscum modo dicent. *Benedictus sit, qui Dei iustitiam eiusque mandatum propria manu sua peregit*. Me ita disrupit, quæ Dei cum integra eram indignatio, hominisque blasphemia fui: nunc video, quæ antea fui, eumque laudo, cui semper opprobria dedi.

Modo in patriam cuiusmodi fuerit habetis, nunc suis in negotiis qualis extiterit considerate. Qui cum ita se gerat rebus in prosperis, & aduersis, æquo semper animo, fortiter atque prudenter curata cum diligentia facit, suorum commoda prouidere non tepescit, nunquam otio marcet: qui licet animum quandoque remissum habeat solutum vero nunquam. Tarda accelerat, perplexa expedit, dura mollit, aspera lenit, ardua exæquat; ex paruis magna, ex apertis obscura, ex proximis remota æstimat. Sicut sidus in orbe, sic inter Duces hic tua virtute pollet, lucerna Mundi cuius non æstimo tam magnum fore Principem, qui non eius in virtutem plus quam propriam confidat potestatem, nemo est qui nescit & se non sui defensores confiteatur. Quo euenit, ut non vi armorum, nec pecuniarum potentia, sed solum suis cum virtutibus totam eius patriam, cuius etiam salutem in humeris suis portat dum puerilem ætatem adhuc ageret, in non præceptibili tempore, à quorundam violentorum manibus infectam miraculose redemit, quasi ab ipsorum raptorum manibus & faucibus extirpauit, summamque in pacem constituit, quod totius orbis potentiæ in tam breui tempore possibile non fuisset. Deinceps vero non ut victor superbia usus est, sed illicitos cohibens motus animi, nullis in illicitis suasu prosperitatis potuit contaminari, omnibusque in eum impetum facientibus velut christianissimus forefacta \* remissit ad sui gratiam eos benigniter reuocando. Sic pie, sic humane, sic iuste, sicque familiariter subditos suos tractare consuevit, ut omnes communiter clament, atque concorditer uno ore dicent: *Pium, iustum temperatum, fortem, prudentem, sanctumque habemus principem*. Cui altissimus fauet, fauerint & astra, ut aperte eius inspecta natiuitate monstratur, sic ut nullus unquam contra eum aliquid attentare præsumperit, qui eius in potestatem non venerit. An ipse sit lapis iste, quem tulit Samuel inter Masach & Seu, & vocant nomen loci illius, Lapis adiutorii.

\* i. delicta.



torii. Huc usque auxiliatus est sibi Dominus, & humiliati sunt omnes inimici eius, sibi que redditæ sunt urbes quas tulerant, & ancillas & iuvenes optimos eorum, & azymos abstulit, & posuit in opere suo.

Viue igitur, piissime ducum, viue precor ô decus Flandriæ, tuorum salus subditorum, viue (inquam) diu atque felix. Nam heu quid illa amoenissima Ligurium \* faceret patria, aut quibus subiecta periculis, mærore foret & aculeis, si quouis modo nostris ab oculis euanesceres. Quod ô tu Deus almaque tutrix aduertite eumque semper placitum, prosperumque rebus seruate secundis, ac sibi coelesti gloria præstetur inclyta proles, ne quisquam terræ nostræ colendis in virtutibus degeneret. Nam ipso superflite felix, imo felicissima patria reputatur. Quanto igitur magis valet iste, & pluribus erit utilissimus, tanto & accuratori à nobis mente, quinimo & omnibus custodia sibi summa debetur, exhortor & oro. Ego etiam hoc opus *de principum custodia* disposui in mente conficere amo-<sup>p.140</sup>re illius, scilicet Christianissimi Principis Domini mei, Domini Caroli Ducis Burgundiæ Illustrissimi. Qui me nondum sibi cognitum, tam dulciter tamque benigne suum in Medicum recepit, licet minimum. Saltem ad honores teneor ego velut fidelis subditus cotidie laborare summaque cum diligentia ad eius spirare salutem, ac sollicitè vigilare custodiam, cui rerum conditor vitam præstet felicem, suæque familiæ semper gubernando (ut optat) pacem & concordiam, patriæque salutem.

Tu igitur piissime JEsu, omniumque rerum opifex, cuius & de gratia summaque clementia hominum illustrantur mentes, acuunturque ingenia, ac materiæ intellectus uniuersi fiunt angelici, amore huius benignissimi Domini, domini mei, qui sic religiose te colit, huic principio benignus adsis, placidusque iuues, ut hoc valeam opus ad optatum perducere finem, qui viuus & regnas trinus & unus, Amen.

**DE FRIDERICI III. IMP. IN ITALIAM PROFECTIONE VOIUA, ET HONORIFICO ROMAM ADVENTU QUIDQUE IBI CVM PAULO II. P. P. EGERIT, ANNO M. CCCC. LXIX.**

*Iacobi Piccolominei Cardinalis Papiensis narratio, è commentariis eius Lib. VII. ineunte.*

CUM Calendis Decembris, qui fuit annus sedentis Pauli quintus, nunciatum esset Fridericum Imperatorem eius nominis tertium in Italiam descendisse voti soluendi causa, quod ad ædem Apostolorum ex Germania vouerat, idque Venetorum literis certissimum haberetur; conuersus Pontifex ad eius suscipiendi curam unum ex secretiorum ordine, quam longissime ire obuiam iussit, negotio iniuncto, ut crebris nunciis de ratione viæ, & cæteris, quæ cognouisset, sine mora significaret, Inde vocatis in consilium patribus, quatuor ex diuersis nationibus Episcopos designauit Iudicesque rotæ duos, & consistoriales aduocatos totidem, qui secretario succedentes secunda salutationis officia exhiberent. Delegit quoque Cardinalem Hostiensem, ac sancti Eustachii, qui præstarent tertia, non tamen ultra bidui viam progredierentur.

Post hæc de ingressu in Urbem agi est capturn. Cuius solennitas cum neque ex ceremonialibus libris, neque ex omni historia reperiri tum posset (aliter enim cum coronam petit, aliter cum priuatæ rei causa venit, accipitur Cæsar) hæc deducendi ratio nouo exemplo est sumpta. Ideo à me diligentius annotata, ut sit posteris in hunc casum quod vel sequi, vel adinuenire melius habeant. Cognita igitur via, quæ illi per Flaminiam erat, cum iam & Pisauri Secretarius, & non



& non longe à Spoletò Episcopi, Cardinales autem Sexto ab Vrbe milliarìo obuiam illum habuissent, die ipso aduentus quadruplex gratulatio à quatuor hominum generibus per interualla diei, & locorum est instituta. Primam ad mille passus trans pontem Miluium, ducente Procamerario præstiterunt Præfectus Vr-  
bis, & Conseruatores, Regionum capita, reliquique vrbanì magistratus, in eam pompam compositi, quam ludis testaceis circumferre sunt soliti. Secundum ad ipsum pontem Præsul Vrbinas, quem sequebantur subdiaconi omnes, Iudices Rotæ, Clerici camerae, Acolyti, Cubicularii, Secretarii, Aduocati, diplomatum scrip-  
tores, item omnis ordinis curiæ ministri. Tertiam vero ad medium fere spa-  
tium, quod est inter portam & pontem, Quæstor ærarii. Hunc magno agmine comitabatur tota Pontificis familia, Toparchæ Romani, & Duces belli, præeun-  
tibus hostiariis, custodibusque Pontificum; his virgas sericeas, illis argenteas clauas manu gerentibus. Vltimam Cardinales ante portam exhibuerunt, ad eam viam partem ordine collocati, quæ venienti sinisterior esset. Hos cum primo ac-  
cessu vidisset Cæsar, capillamento detractò, singulos apprehensa manu & dato osculo salutauit, gratiæ & benignitatis documenta ostendens. Ingresso Urbem præsto  
fuit vmbraculum aureum, quo solennibus suis vti olim consueuerat Pius. Atque vna  
Romani ciues per vicos dispositi, qui illud hastilibus sustinentes toto itinere per vices  
succederent. Morantibus ceremoniis ad tertiam iam horam processerat nox. Itaque  
antecedente secularium turba, quæ innumera erat, & sequente Patrum collegio,  
atque omni clero, moueri cæpit hæc pompa lucentibus vndique viis multitudine ce-  
reorum, qui certatim accensi diei claritatem præstabant: A porta ad ædem Marci  
pontificis recta est itum. Inde ad dexteram flexum, & pontificali via in theatrum  
Pompeii peruentum: denique in Vaticanum ad Basilicam Petri accessum. Qua-  
cunque autem fuerat transeundum, imparatum erat ad decorem & magnificentiam  
vias ornari: idque summo studio pro ædibus suis quisque impleuerat, penden-  
tibus utrinque versicoloribus aulæis, sed nox superueniens abstulit cuncta. Dum  
enim metus est, ne humore noctis (id quod in his ornatibus accedit) exposita ni-  
torem suum amitterent, detensa iam erant omnia, & domi recondita, paucis ex-  
ceptis locis, in quibus maior fuerat honorandi Cæsaris, quam accipiendi incom-  
modi cura. Ad ædem D. Laurentii in Damaso præsul Vrbinas cum omni comi-  
tatu (quem dixi) Quæstor item cum Palatinis Episcopis & presbyteri Cardinales  
duo, ac diaconi quatuor ad Pontificem (sicut institutum erat) diuerso itinere  
contenderunt, vt essent qui in Basilicam descendenti assisterent. Ad Basilicam  
vero, quantum à primis gradibus ad summum altare pertinet, collegia religio-  
num sacerdotiorumque dextra & læua in veste sacra disposita erant, hymnos trans-  
eunti Cæsari concinentia. Ad primos quoque gradus vicarius templi cum suo  
collegio in mitra & sacro pluuiali religiose illum accepit; crucem quæ in manu  
erat porrigens osculandam. Natalis Domini nox illa erat, & hora iam quinta.  
Itaque Pontifex qui expectare Cæsarem, atque excipere ad portam argenteam  
in vestibulo constituerat, indecorum iudicans id iam horæ eam rem fieri, in  
chorum ascenderat, & sacrum matutinum iusserat inchoari, altiori solio residens.  
Ad eum igitur per media hæc collegia Imperator accedens pedem, manum, &  
faciem deosculatus est. Sed post pedis manusque osculum alleuans eum altius  
Pontifex, & de sede assurgens præcipuo affectu in vtrumque latus illum comple-  
xus est, moxque in propinqua sede collocans inter se patresque ad dexteram me-  
dia ad complendum sacrum suo se loco continuit. Eo absoluto diaconi Cardi-  
nales duo, quibus præceptum id erat, ad altare Cæsarem deduxerunt. Ad cuius  
ille aditum primum in genua procidens, tam diu perseuerauit orans, donec &  
votum absolueret, & diuinæ preces super eum à Pontifice mitterentur. Earum  
hæc fuit prima solennitas. Cantauerunt alta voce duo ex choro: *Elegit eum Do-  
minus, & excelsum fecit præ Regibus terræ*, ab omni choro responsum est: *Glori-  
ficauit eum in conspectu Regum, & non confundetur*. Inde assurgens Pontifex ex-  
ritu ceremonialium librorum peregit reliqua, choro præfanti illi in omnia respon-  
dente.

Ingressus vr-  
bis.

Volateranus  
interfuisse se  
pompe scribit,  
lib. 23.



dente. Inde è Solio descendens, dextramque Imperatoris apprehendens, in pontificiam illum, atque inde in cubiculum ad quietem perduxit. Cum verò non putaret hoc primo ac pene tumultuario matutinæ laudis officio tantæ nocti satisfactum esse, solennius aliud censuit iterandum, in quo & Cæsar, & Patres, ensisque sacratus pro more adessent. Itaque ad horam 12. paulo quidem ante primum diluculum secundum indixit. In eo Cæsar vetusto sedis ritu, ense de manu eius cum benedictione accepto, illoque ut erat nudus; armigero adstanti tradito; camiseum stolamque albam & pluuiæ ministrantibus diaconis cardinalibus sumsit, iisdemque latus eius claudentibus Evangelium lectionis septimæ non iniucunde cantavit, lectionem ipsam eorum alteri prosequendam relinquens. Admonuerat inter vestiendum ceremoniarum magister, ut transuersam stolam & pluuiæ ad sinistram apertam acciperet. Sed ille (me audiente, qui proximus eram) *Non faciam* inquit: & utrumque à collo ad pectus rectum induens, conuersusque ad magistrum, *sic*, inquit, *semper sum solitus*, suadente iterum illo, ut post Euangelium decantatum pro aliorum consuetudine ad pedem Pontificis osculandum ascenderet, Germanico verbo, quod à circumstantibus est intellectum, *Et hoc*, ait, *etiam minime*: putans videlicet (ut creditum est) à vulgari aliorum obsequio maiestatem Imperii ea in re vindicandam. Mane vero ipso Paschali solennibus Missarum operatus est Pontifex. In quibus post communicationem suam Eucharistiæ partem in hoc ipsum seruatam Cæsari obtulit, subnixoque in genua, & suum honorem sacramento reddenti. Ab altari sub vmbraculo digredientes, ad venerandum Domini Saluatoris sudarium, quod imperatum erat proferri, profecti sunt: inde pulpitum supra gradus Basilicæ ascenderunt, ex quo Pontifex solenni more benedicens plebi, quæ innumera ad visendum conuenerat, summam peccatorum veniam tribuit. In ea denuncianda quod semper latine & Italice per diaconos Cardinales fieri est solitum, cum in extremis verbis admonerentur turbæ, ut acceptæ gratiæ memores pro Romana Ecclesia & Pontifice orarent, additum est, *Et pro Friderico Imperatore nostro, ut contra infideles gentemque hereticam diuinum illi semper subsidium adsit*. Introitus sui, & noctis dieique natalis hæc fuit celebritas.

Quarto post die in consistorium veniens, quod dari sibi ob publicam causam poposcerat, cum & Patres, & Germani proceres quidam, & Regis Hungarorum legati, & Cypri & Venetorum frequentes adessent, in hunc modum per interpretem, Laurentium Præsulem locutus est: *Iter hoc meum, summe Pontifex, ad reddendum Deo votum libentius tamen ad salutem communem susceptum est: Nostri clades per hos annos à Turcis acceptas, & quæ nunc imminet vides. Egerunt Principes proximi quod potuerunt, curas eorum & vigilas nouimus, non tam quidem illas se-  
p. 142  
lices, quam suo ministerio dignas. Meis quoque conuentibus, quos de Germanis Principibus eius rei causa plurimos habui, successus non fuit, impedimentis assiduis utrobique in cassum fuere consilia. Veni propterea ad te, ut quam salutis viam non cerno, si qua hic est, tuo iudicio videam. Christianorum summus es pater. Primam hanc esse curam oportet, proximam meam. Consule in medium, & quid agendum sit, monstra. Ego quæ suaseris, quæque ad rem censueris opportuna, accipiam, liberisque iuuabo.*

Ad hæc Pontifex nullo ante cum Patribus communicato consilio (id certo quod probatum non est) longa oratione, quæ ante se Pontifices, longiori quæ ipse in eam diem egisset, sigillatim recensuit. Quod vero ad postulatum attinuit, nescire se dixit, quid modo consuli posset: ita iam consilium omne exhaustum cognosceret. Rogare autem illum vicissim, ut si quid attulisset ipse ex Germanis, prior proponeret. Dicente Cæsare, *Venisse se non dandi, sed accipiendi consilii causa*, Pontifice eadem iterante, in proximam ille aulam deliberaturus secessit, atque ibi horam pene continuam fuit. Reuersus cum proceribus & legatis, qui secum in concilium ierant, *obtemperasse*, ait, *neque in tanta consiliorum inopia melius inuenisse, quam ut Constantiæ (quæ Germaniæ ciuitas esset Italiæ propinqua)*



qua) conuentus Principum indiceretur, ad quem & ambo accederent, & reliquos omni diligentia conuocarent. Venturum eo (quantum crederet) Hungarorum Regem Matthiam, id quod praesens legatus eius sponderet. Hunc vero laborem ideo necessarium duci, quod quae commune opus requirant, haec & communi consilio administranda putentur.

Non placuit Pontifici sententia. Ab exemplo praeteritorum conuentuum, hunc quoque inutilem futurum contendit. Deliberaturum se nihilominus amplius dixit, atque alio tempore responsurum. A meridie in noctem protracta iam consultatio erat. Itaque consilium & Caesarem simul dimisit.

Dubitatum post haec à plerisque est, qui pensitare haec diligentius solent, Caesarisne an Venetorum petendi conuentus consilium fuerit. Etenim magno studio à Venetis res agebatur, perstudiosis tunc rerum Imperii. Qui fuisse Caesaris arbitrabantur, cum nisi per legatos conuenerit nunquam Caesar, quaesitam aestimabant non tam proficiendi spem, quam ostentandae religionis occasionem: ut si quando maioribus ingruentibus malis querelae populorum de Imperio & Pontificatu essent, culpam omnem desertae salutis reicere in nos posset, amissamque vocante Mantuam Pio suam aestimationem, vocato nunc Constantiam Paulo redimeret. Qui vero inuentum hoc Venetis adscribebant, procuratum per hanc speciem priuatam eorum rem aiebant, non publicam; videlicet ut perlata ad Turcos tanti conuentus fama, terrore illi iniecto, vel pacem in suas leges conficerent, vel ad innouanda foedera Italorum Pontificem, quo absente tutiora essent domi omnia, incitarent. Quae quidem nec ipse petere propter elationem vellent, nec praeterire propter necessitatem possent. Igitur proximo post consistorio, vocatis iterum ad consilium Patribus, cum de responso dictae sententiae essent, censuit Pontifex, *Quacunque ratione conuentus is peteretur, non videri à Republica esse, quando & praesens temporum conditio non postularret, & praeteritorum exempla documento certissimo essent.* Placuit quoque ne veniente saepius in Senatum Caesare (id quod sine grandi expectatione esse non poterat) studio rerum publicarum vincere nos videretur: quatuor ex patribus ad eum in cubiculum mitti, qui decretum hoc nunciarent. Ii vero collocti diutius, cum missum iam esset consilium, ad Pontificem redire summam hanc referentes, *Placere nihilominus Caesari conuentum monstratum & consistorium iterum queri, in quo de hisce rebus agi amplius posset.* Id vero cum triduo post permissum esset, conatus est populari magis oratione quam graui argumenta nostra diluere, quibus ratio habendi conuentus non fuerat approbata. Ad quae omnia etsi diceret Pontifex, ex Germanorum consuetudine ab Germano homine secum non agi, quorum ea lex sit, *Vt post decreta in Consiliis nil postulent ultra;* eadem tamen ferme quae nunciata per Cardinales erant, recensuit, argumentisque inuicem collatis sua propiora vero esse contendit. Orans identidem, ut quae dicerentur, & fierent, pia voluntate acciperet, quando nec tepiditas vlla, nec metus, sed tota ipsorum ratio à iudicio suo cogeret nos dissentire. Duo tamen communi animo sunt constituta: alterum ut literae ad Principes vtriusque nomine mitterentur, quibus illi ad Calendas Nouembris anni venientis legatos suos Romam mittere rogentur, de ratione tuendae fidei cum Pontifice acturos. Altero ut Venetis diutino Turcorum bello exhaustis decimae clericorum, Hebraeorum vicesimae, & secularium trigessimae in ditione sua concederentur: quales decreto Mantuani conuentus Pius olim Italis quibusque indixerat. Et hic quoque postulatorum Caesaris exitus fuit.

Responsum  
Pontificis.

P.143 Non multo post, cum totos septemdecim dies Romae fuisset, in Germaniam reuersus est. Multis eum interim Paulus magnisque demeritis officiis est. Nunquam cum processerunt passus est, nisi ex aequo esse; plerumque autem dextera eius apprehensa: bis quoque ad cubiculum suum descendit. Die quae circumcisionem Domini Saluatoris praecessit, peracto, Laterani sacro vespertino, ad veneranda Apostolorum Petri & Pauli capita constituto ponte, per quem ex aequo ire-



iretur, intra ferreos cancellos perduxit, & postridie ad Vaticanum rediens albo equo phalerato & aurea ueste donauit: volens videlicet, ut cum antea atratus Caesar semper fuisset, solenni illa transmissione Imperatoris ornatu procederet. Ad pontem porro Adriani eodem itinere cum Patrum collegio substitit, spectauitque amplius horam continuam Germanos innumeros, quos ille eo in loco equestri ordine vetusto ritu donauit. Gratias itidem spirituales, easque gratuitas innumeras contulit. Victum sibi & comitatu, qui sexcentorum amplius equitum fuit, largissimum præbuit. Abeuntem denique diuersis duum millium aureorum muneribus est prosecutus. Et præfules nonnullos ire secum ad usque Caesarem iussit, qui toties Ecclesiæ oppidis ad impensam itineris, & diuersionum commoda necessaria imperarent. Quæ omnia eo munificentius studiosiusque collata sunt, quod notissimum erat toto eius imperio propugnatorem fuisse Romanorum Pontificum, & nec abiisse unquam in impiorum consilia, quibus Transalpinae nationes sine causa sæpe tumultuantur in nos.

DE COMITIIS IMPERII SVB  
FRIDERICO III. IMP. APUD RATIS-  
PONAM CELEBRATIS ANNO M.CCCC.LXXI.  
AUGUSTINI PATRICII COMMENTATIONIBUS.

ITEM:

IOAN. ANTONII CAMPANI, AD IA-  
COBUM CARDINALEM PAPIENSEM,  
EX EISDEM COMITIIS DE REBUS IBI GESTIS,  
EPISTOLÆ FAMILIARES.

Augustinus Patritius Reuerendissimi Cardinalis Se-  
nens. Legati in Germania Secretarius, Iacobo Cardi-  
nali Papiensi sal. & commendationem.

CUM in Germaniam venissem nuper cum hero meo Francisco Piccolomineo Cardina-  
li Senensi, Apostolica sedis legato, videremque ad conuentum Ratisponensem mul-  
tos magnosque Principes undique confluisse, & maxima quæque ibi tractari, quod res  
visa sunt relatione digna, utque interrogantibus in meo reditu amicis ad verum respon-  
dere possem, statui omnia literis annotare. Adhibui itaque exactissimam diligen-  
tiam, ut rerum omnium quæ ibi agerentur, veritatem ac seriem cognoscerem, partem  
per me ipsum audiens, cum latine loquerentur (interfui enim fere semper in concioni-  
bus) partim ex aliis qui aderant cognoscens. Quin & legatus ipse cum epistolas ad Pon-  
tificem atque amicos mihi dictaret, omnia aperiebat. Fuit sane conuentus hic Ratis-  
ponensis frequentissimus, & omnium (ut seniores aiebant) nostra ætate maximus. In  
quo Caesar cum quinque Electoribus, & Principibus compluribus, duobus legatis Aposto-  
licis, altero Cardinale, altero Episcopo, & Regum ac Ciuitatum oratoribus permultis  
consedit. Redegi igitur omnia quæ in conuentu gesta sunt, sed & quæ ubique locorum  
per Germaniam egit legatus, & totius huius nostræ peregrinationis iter descripsi, cum  
& pulcherrimæ sæpe urbes, & res memoratu digna interdum occurrerent. Est Ger-  
mania (ultra quam nostri homines credant) magnifica, & pulchra, & illi antiquæ,  
quam Caesar, Strabo & Tacitus aliique describunt fortuna & moribus valde dissimi-  
lis: ita ut multæ sint inter eas Vrbes quæ multitudine populi, pulchritudine adificio-  
rum, templorum magnificentia, & ciuitatis splendore nostris Italicis haud multum ce-  
dant, interdum etiam superent. Atqui cum mecum cogitarem, cuinam potissimum  
dica-



*dicarem has meas lucubratiunculas quamvis tenues, tu solus occurristi qui sine invidia gentilis tui Cardinalis Senensis res gestas perlecturus videreris, & meam hanc insulsam incomptamque narrationem pro tua innata mansuetudine, & consueta in me indulgentia equo animo esses laturus. Mitto igitur ad te libellum hunc ut cum per otium licebit illum perlegas, in eo tamen præter nudam ac veram rerum explicationem nihil quod te detineat inuenies, oro ut boni consulas, & mihi ignoscas, si dignationem tuam rebus maximis occupatissimam his meis scriptis vexare sum ausus. Vale, Romæ No- nis Ianuarius, anno salutis 1471.*

Post captam à Turcis Constantinopolin, & Græcorum imperium deletum, sæpe Romani Pontifices, & Fridericus Cæsar, qui reipublicæ Christianæ Gubernacula tenent, conati sunt reliquos nostræ religionis principes ac potentatus, contra sæuissimos hostes in arma cogere. Et Cæsar quidem cum externi dicto minus parentes viderentur, inter suos Germanos crebros celebrauit conuentus, ut quantum in se esset, salutem Christianorum consuleretur, nunc Francofordiæ, nunc Ratisponæ, nunc Norinbergæ, nunc Viennæ, nunc aliis in locis eos conuocans: nec prætermisit interea cæteros Reges ac Principes literis ac nunciis hortari, ut communi consilio expeditionem fumerent in communes hostes. Pontifices vero Romani qui per hæc tempora præfuere, Nicolaus, Calistus, Pius, & Paulus nunquam destiterunt Christiani orbis præsides literis & assiduis legationibus hortari, mone- re, rogare, obsecrare, vt relictis intestinis odiis in religionis ac libertatis nostræ hostes arma conuerterent. Nullus est habitus conuentus ad quem non miserint legatos, oratores ad singulos Principes sæpe transmissi, laborantes bello nostri qui Turcis proximi sunt, consilio, milite, pecunia, frumentoque adiuti. Pulsi ab hostibus auitis sedibus benigne suscepti, & ad vitam præbita necessaria, clas- ses sæpe in orientem missæ ad comprimendos hostes, Hungaris (qui murus Chri- stianæ ciuitatis hætenus fuerunt) magna vis auri data, missi prædicatores ad ex- hortandos populos: promissa pugnantibus æterna præmia, nihil prætermisum quod illis fieri aut excogitari posset. Et vt de reliquis taceam, diuus Pius, Ro- manæ sedis perpetuum decus, à principio sui Pontificatus indicto Mantuano con- uentu & modis omnibus perquisitis cum nihil succederet, ipse per se, vt nihil intentatum relinqueret, homo morbis annisque confractus in expeditionem sta- tuit proficisci, non ætati, non dignitati, non valetudini, non vitæ denique suæ parcens. Sed peccatis nostris id exigentibus ante nobis subtractus est, & in cœ- lum relatus, quam ex portu Anconitano in hostes soluere potuisset, sic tanti conatus paruo momento in irritum redacti, sic sæpe magnæ exorsæ telæ volente Deo succisæ. In Germania autem quamvis sæpe bellum in Turcos communi sententia decretum sit, siue quod Cæsar hostili arte impeditus conuentibus raro interfuerit, siue Principum discordiis & priuatis commodis rempublicam impe- dientibus, nunquam in hostes est itum. Semel tantum cum Turci Belgradum oppugnarent, excitus populus Prædicatorum vocibus tumultuarie in hostes ruit, atque zelo potius religionis quam armis pugnans, soluit obsidionem ac fugauit hostem.

Mahometes vero Turcorum Princeps fretus nostrorum desidia, & conti- nuis victoriis animo eleuatus, dum nostri tempus longis consultationibus terunt, Peram primo expugnat Constantinopoli oppositam, deinde protensis viribus Bul- gariam, Rasciam, Seruiam, & quicquid à mari Pontico, ad amnem Sauum, & ab Ægeæ pelago ad Danubium interiacet, armis doloque occupat. Sed neque Danubius Valachos, neque Sauus Hungaros omnino tutatus est. Nam & Vala- chia partem rapuit, & Hungariam sæpe populationibus afflixit: ex alia parte Pe- lopponnesum, & Græciæ olim arcem Achaia, Atticam, Bœotiam, Acharna- niam, Macedoniam, Epirum, Bosnam, & Illyrii magnam partem redegit in pote- statem, Lesbum & Cycladas fere omnes subegit, & in Ponto Synopem ac Tra- pezuntem, & demum anno superiori Euboeam (Nigropontem appellant) expu-

gnauit,



gnauit, magno Venetorum, quibus parebat insula, & communi Christianorum damno. Verum cum neque his contentus anno ante captam Euboeam ex Bosna in Carnos penetrasset, & regionem omnem caedibus, incendiis atque rapinis longe lateque foedasset, Fridericus Cæsar, cui ut Duci Austriæ hæreditario iure prouincia paret, quique prius pro Reip. salute tantum sollicitus erat, nunc propriis atque auitis prouinciis timens de subditorum defensione intentius cogitare coactus est. Is cum viribus hostium impari omnino se esse cognosceret, Germanorum Principum auxilia postulare statuit. Anno igitur salutis 1471. conuentum principum indixit Ratisponæ ad 8. Kal. Maij. Is dies Christiani-  
 no more D. Georgio Martyri solennis habetur, vocauitque omnes Germaniæ Principes ad eum locum suis literis, de Reip. salute cum eis consultaturus. Pontificem vero summis precibus orauit, vt & ipse aliquem ex sacro Senatu, qui nomine Apostolicæ sedis in conuentu præsideret, legatum mitteret. Has dicunt huius Ratisponensis conuentus fuisse causas. Cæterum qui altiora quærent, & Ecclesiastici & seculares, si quando à militia vacat, voluptati atque otio plerumque incumbunt, molestas ac graues cogitationes raro admittunt, literarum autem & sapientiæ studia attingunt fere nunquam: omnia igitur consiliariis credunt, eorumque iudicio cuncta geruntur. Horum nonnulli qui doctiores sunt, & ingenio atque astutia pollent, pro arbitrio omnia versant, iis gloriosissimum est vocari ad conuentus, rogari sententias, consuli à principibus, & eorum sermones atque responsa tanquam Delphica oracula haberi: gaudent rerum mutatione, & contentionibus atque discordiis principum crescunt, procurant assiduo nouis artibus, vt principibus suis libertatem parare videantur, & à reuerentia Apostolicæ sedis (quam *durum atque asperum iugum* appellant) sed etiam Romani Imperii eos nituntur auertere. Cogitauerunt igitur si tales iam pridem imperium Friderico Cæsari abrogare, illudque quando alius animo & viribus potentior in Germania non videretur, Georgio hæretico Boemiorum Regi deferre: reuerentiam deinde summo pontifici eius nomine polliceri, Imperii confirmationem & coronam petere, quæ si modo darentur, nationi interdicere ne amplius Romano Pontifici auscultaret. Jamque inter se ac Principes suos diuiserant præfecturas, ac munera hæc vt legitime fierent, assensum omnium Germaniæ Principum necessarium putabant. Sperantes itaque si conuenirent Principes, facile quæ cogitarant perfici posse, subtili arte Cæsari persuadent, vt Ratisponæ principum conuentum indicat: aiunt Cæsarem, quoniam spretis Imperii ciuitatibus in auitis moretur prouinciis, omnibus neglectui esse, à nemine venerari, agitari vbique latrocinia, ac tota Germania iustitiæ formam esse nullam: si ad superiora ascenderet, vt prisca redeat reuerentia & fides, parituros omnes suo Imperatori, & eius timore ab iniuriis temperaturos, assuturos ei omnes Principes, & certatim obsequia exhibituros. Et quoniam Imperii census ita sunt diminuti, vt inde Cæsar viuere non possit, se iam reperisse vias, quibus facillime & volentibus cunctis ducenta aureorum millia quotannis corraderet. Tentauerat hoc idem Cæsar alias in quibusdam conuentibus, quippe prouentus imperii ita minimi sunt, vt vix legationibus suppetant. Sed illi non tam suadebant vt Cæsari consulerent, quam vt occasionem nanciscerentur patrandi quæ cogitarant. Hisne igitur persuasionibus commotus Cæsar conuentum indixerit, aut vt Reipubl. suisue prouinciis, quas à Turcis iam deuastari videbat, saluti consuleret, illis diiudicandum relinquimus, qui altiora cognoscunt. Certe Georgii Bohemi obitus, qui medio tempore accidit, effecit vt consiliariorum cogitata efferri non potuerint. Sunt etiam qui asserunt hunc conuentum indictum esse ipsius Georgii solerti opera, qui astutia sua id effici posse sperabat, vt decreto omnium Principum eius absolutio (nam iam pridem vt nosti, extra Ecclesiam propter hæresin fuerat factus) à summo pontifice impetraretur, etiam ipso permanente in damnata opinione. Cæterum in tractatibus ipsius conuentus Cæsar ostendit, rem suam priuatam non neglexisse: Romanus autem Pontifex Paulus secundus, vt & Cæsari & suo officio satisfacere-

Georgius Rex  
Bohem.



ret, legatum ad conuentum mittere statuit. Sed cum diu inter patres disceptaretur, quisnam videretur aptior, Franciscus Cardinalis Senensis diui Pontificis Pii maximi nepos communi consensu designatus est, qui prouinciam suscipere-<sup>Franciscus Cardinal. Senensis.</sup> tum ob summam hominis integritatem, & vltra eius ætatem, prudentiam, atque modestiam (nondum enim quartum & trigesium annum impleuerat) tum propter auunculi sui memoriam, quæ adhuc recens apud Germanos erat, apud quos priuatus diu vixerat, non sine magna virtutis opinione, & in pontificatu illius prouinciæ hominibus facilem benignumque se semper præstiterat. Accebat ad hæc quod ipse Cardinalis, vt qui apud auunculum in Germania à puero fuerat educatus, Germanorum linguam, & mores calleret, & propterea omnibus fere Germanis gratus, & notus. Vndecimo igitur Calendas Martii legatus designatus ex curia Pontificis vetusto more à Patribus domum deductus est, iussusque vt quoniam dies dicta instaret, ad profectionem quam primum sese accingeret. Breui itaque compositis domi rebus, & paratis quæ ad tam longum iter erant necessaria, XV. Calend. Aprilis discessimus ex vrbe post secretum consistorium, media ferme Quadragesima, sacer Senatus legatum extra portam deduxit. Continuato deinde itinere per Pientiam Senas venimus: in publicis diuersoriis apud Paleam flumen Oratores Ducum Saxonie offendimus, qui Romam petebant, p.146 annuente Casare, compositionem rerum Bohemicarum Pontifici suasuri, qui diu cum legato locuti sunt. Senas ingressi sumus ante horam qua à ciuibus expectabamur, nam legatus actu eos decepit, ne cum pompa introduceretur, quantum tum per angustiam temporis licuit pompa & ciuium & cleri magnifice ducta est. Hic crucem accepit legatus principium legationis insigne. Senis iussis valere cognatis atque amicis, post tertium diem discessimus, venimusque Florentiam summo mane insequentis diei, introducti sumus magna pompa & ingenti populi concursu. Legatus sub vmbraculo ductus est nouiter facto, excepti sumus apud monasterium S. Mariæ Nouellæ in pontificali palatio, vbi admirabilis fuit locorum apparatus. Postridie per pontem Siene Apenninum, transcendentres deuenimus Florentiam in valle Saterni fluminis sitam. Saternus in orientem vergens forum Cornelii (Imolam vocant) præfluit, & in Padum exoneratur, hincque aquæ omnes feruntur in Adriaticum. Sequenti die per montes ipsos Lollianum primo, deinde Planorum peruenimus, oppidum in radicibus montium situm: & hic quidem est finis Apenini in latitudine, qui mons à Genua Ligurum emporio incipiens Italiam omnem disternit. Hinc ad Alpium conuallem iuxta Volaruam planities semper patet, quam Cisalpinam Galliam præci dixere, Togatam quidam, vltra Padum vero Transpadanam. Jacet enim Togata sub ipsis montibus (vt Ptolomæus ait) quæ à Placentia Rauennam vsque protenditur. A Planoro summo mane Bononiam petiuimus, nihil prius ciuibus significantes, ne sacra perturbarentur. Planorum enim neque celebritati diei, neque victui nostro sufficiebat, eam urbem ingressi occurrerunt magistratus intra moenia, adiunimus templum, ibique sacris interfuimus, erat enim dies dominicus (qui passionis vocatur) quintus decimus ante resurrectionis Saluatoris nostri. Distat Bononia à Senensi vrbe millibus passuum quatuor & octoginta. Ciues & iucunde & magnifice nos exceperunt publicis sumptibus, sequenti die quæ Kalend. Aprilis fuit, circa meridiem vrbe egressi, apud oppidum S. Joannis pernoctauimus, & inde pluuioso coelo iter agentes, Panarum flumen, quod ex Apenino Padum influit, apud Bonportum nauigio transuecti per aggeres Situlæ amnis venimus Mirandulam. Hic Blanca Maria, Borsii Ferrariensium Ducis soror, vxorque Galeotti Mirandulæ tyranni absente viro magnifice nos excepit, iunxitque cum legato spiritualem affinitatem, commater enim facta est, erat namque prægnans & partui vicina. Datus est curator, qui vice legati partum ex sacro fonte leuaret. Mulier ipsa prudens & elegans sermone visa est, clauda dextro pede aliquantulum, alioquin honestissima: vir eius Galeottus, quem postea Mantuæ vidimus, iuuenis pulcherrimi corporis est, & prudentiæ non contemnendæ. Is tamen non multis



multis ante mensibus fratrem suum minorem natu in carcerem coniecerat, tanquam res novas contra eum moliretur. Adhuc in vinculis est: supplicium de complicibus sumptum. Altera die agrum Mantuanum ingressi iuxta Quistellum oppidum situlam scapha transiuimus, petiuimusque D. Benedicti venerandum ditissimumque coenobium. Hincque digressi emensis circiter 20. stadiis, per Padum fluuiorum Italiae maximum nauigio Transpadanam Galliam ingressi sumus. Hic filii Mantuani principis Fridericus primogenitus, Joannes, Franciscus, & Rodolphus Gonzagæ obuiam legato facti Mantuam vsque nos deduxerunt, vbi per totum insequentem diem quieuius: Princeps summa hilaritate, & regali rerum omnium splendore & copia nos suscepit. Mantuam & Veronam inter Insuabres ponunt: Ptolomæus autem Cenomannos hos populos appellat. Postridie per Campestria Veronam profecti urbem intrauimus circa meridiem, insperantibus eo tempore ciuibus, qui ad vltimam vesperam nos expectabant. Obuiam tamen intra moenia, & magistratus qui Venetiis præsunt, & ciues cum clero & populo dati sunt, magnificeque ac reuerenter nos exceperunt, & quoniam Palmarum dies solennis instabat (biduo enim antea illuc appuleramus) coegerunt nos ibi commorari vsque ad eam celebritatem. Dominica vero die peractis sacris inde discedentes, transmissio per pontem Athesi in vrbe Valerni, venimus villam millibus passuum LXXII.

*IACOBY'S CARDINAL. PAPIENSIS CAMPANO SVO.*

**G**Audeo tibi & tuo Mæcenati secunda euenire, quæ facitis. Puto communia, quæ in utramque partem accidunt vobis. Iter legationis vestræ Senam usque agnoui. Cura ut à prima Germania reliquam Italiam discam. Id nos, qui vos votis prosequimur, non minus expectamus, quam petimus. Nostra urbana nosces ex multis. Ex pompis Mutinensibus ea sola fuere: Magni apparatus, magnæque expectationis Borsii Estensis ingressus. A Flaminia in Pontificiam medius inter Aquilegiensem & Mantuanum traductus est. In comitatu plurima stomachi tui, non tuorum tamen hoc tempore oculorum. Primo venienti est datus Senatus: Oratio eius nulla: lætitia vultus multa. Receptus solum post Diaconos Cardinales est, inde domum dimissus; aduentus huius nondum patuit causa, cum patuerit, scies. Palatina quoque si quæris, pauca sunt. Post discessum auditi Cyprii oratores, quorum fuit deprecatio, ut Princeps eorum Iacobus, Rex appelletur. Sunt & quædam à Cæsare, & Saxonum Ducibus breui ad vos peruentura, ex eorum genere quorum causa petita est legatio. Exercebunt nos, (ut cerno) Boemica. Tu perge, & forticulum te in laboribus præbe. Pro epistola & epigrammate non tibi gratias ago, qui enim digne ut possim. Vincuntur gratiæ omnes gloria diuini ingenii tui, quod cum ætate & beneuolentia crescit. Ex metu saluta Romagnanum nostrum, & Patricium, & Montanum. Vale Romæ V. Aprilis. 1471.

*IOAN. ANTONIUS CAMPANUS IACOBO CARDINALI PAPIENSI.*

p. 147

I.

*Lib. VI. ep. III.*

**L**iteras tuas, quæ scriptæ fuerunt Eugubii ad III. Calend. Aprilis, pridie Calend. Iunii accepi Ratisponæ. Longissimum iter, non mirum, si tardiuscule confecerunt. Legit eas non minus iucunde legatus, cuius mentionem faciebas, quam ego cui dirigebantur. Memoria tui apud me ita residet, ut tamen sæpe inter tot negotia subdormiat, nunquam moriatur. Accelerabimus reditum, ut quantum in nobis erit, breui absoluamus. Discessum ex Vrbe duodevigesima Martii: ingressi sumus Ratisponam Kalend. Maii, tribus & 40. diebus in itinere consumptis. Substitimus diem unum Viterbii, triduum Senæ, Florentiæ, Bononiæ,



noniæ, Mantuæ singulos, Veronæ, Tridenti, Bolsani binos, ad pontem Oeni cum Sigismundo Duce Austriæ triduum, ad Lantshutum cum Ludouico Duce Bauarorum biduum, ubique supra vſitatam magnificentiam excepti, Ratisponæ solos inuenimus Oratores Allobrogum, qui hodie Sabaudienſes appellantur. Conuenerunt poſt diem tertium Moguntinus & Marchio Brandenburgensis, uterque maximus in Germania Princeps, & quibus ius ſit cum quatuor Cæſaris eligendi. Moguntinus vir ingenii manſueti, & qui neque aſpectu, neque manſuetudine Germanum præ ſe ferat. Marchio vir acer, eloquens, vaſer; & quem Vulpem Germaniæ vocant, bellicoſiſſimus & pugnaciſſimus omnium, qui in Germania laudantur (Pius \* Achillem appellauit) cicatricibus totus in manibus, pedibus, vultu, collo excauatus, ſæpe ſingulari certamine dimicauit, quo genere pugnæ nunquam victus eſt, prælio ſemel à Ludouico Bauaro eius conſobrino. Oratores Burgundorum cum eo venere ad viros triginta. Ciuitates Germanorum fere omnes & Duces multi miſere legatos. Imperatorem circa Pentecoſten expectamus, ſi venerit, aderit & Principum magna frequentia, etiam eorum qui legatos præmiſere. In aduentu illius, tota ſpes eſt: abſente eo referri de nullis, deliberari nihil aut exiguum poterit. Scribam tibi ordine quæcunque in conuentu peragentur. Vale.

*Ans. Sylu.  
Europ. c. 39. 60  
in Germania.*

E I D E M.

II.

*Lib. VI. ep. IV.*

**V**IVIMUS, ſi modo vita eſt aliqua, eſſe cum Barbaris. Cæſarem iam prope menſem expectamus. Moram hoc leuat, quod ſcribit ſe venturum. Moguntinus Antiſtes & Marchio Brandenburgensis, & alii quidam nobiſcum ſunt, at Cæſarem præſtolamur. Treuirenſis & Spirenſis ſunt in itinere. Res omnis in Cæſare ſita eſt, niſi venerit, nequicquam laborabitur; Eum principes omnes inuentur: conuenientque omnes, ſi ipſe aderit. Dico ego tecum, quod ſentio, fieri omnia poſſe in ſalutem Chriſtianam, ſi Cæſar volet, nihil, ſi tergiuerſabitur. Factioſa Germania eſt, amici eum facillime conſequuntur, cæteri, quod magnum eſt in hac gente Cæſaris nomen, & multa poteſt, cupiunt reconciliari & rei communi adeſſe. Bohemica diſſident: utinam non ad cateram felicitatem Turci hæc quoque accedat, quod eſt Bohemia vires & Hungaras & Germanas ad ſe petraçtura omnes, quod ſi acciderit, periimus funditus. Vale.

E I D E M.

III.

*Lib. VI. ep. V.*

**M**IRERIS, quod pauca de rebus Germanicis ſcribam: præſertim quæ in conuentu noſtro aguntur. Sed perſuade tibi, aut exiguum, aut nihil eſſe, quod agitur. Multa & magna quæ cogitantur, omnia pendent in aduentum Cæſaris. Frequentia principum atque oratorum in dies ſit maior: ſed pars maxima aut domi adhuc manent, aut cognita mora Cæſaris in itinere ſubſtiterunt: omnes tamen ubi de Cæſare intellexerint, venturi exiſtimantur. Ego legatum non deſero, dignitatem veſtram, id eſt ſedis Apoſtolicæ, inter ſurdos eloquentia tueor. Fama increbuit, Cæſarem iam ſoluiſſe, & per Danubium adnauigare. Hoc exploratum ad verum nondum eſt: multi terra cum equitatu venturum arbitrantur. Magna eſt eius auctoritas in prouincia undique factioſa; verum ita magna, ut multum umbræ, non tantum corporis habeat. Si quæris ſententiam meam, illud ſentio, magnam ſpem propoſitam eſſe nobis, ſi Cæſar inſtabit, exiguum, ſi lenteſcet, nullam, ſi tergiuerſabitur. Bohemia tripartita eſt omnis. Alii cupiunt Polonum magna pollicentem præſidia, ad huic diem nulla præſtan-



tem. Si sunt hæretici quidam, sperant impune se victuros sub eo Rege, in cuius regno infinitæ prope sunt hæreses. Catholici Hungarum, cui iuramentum præstiterunt, magna ex parte sequuntur. Promiscue utrinque multi, & Catholici & hæretici Albertum Saxonem amplectuntur. Germani ad hunc inclinant omnes, & metu Hungari, & quod fere omnes intima affinitate iunguntur, quanquam hætenus multum consilii, nihil auxilii misere: nec dubium si conicere de mente Pontificis possent, quin auxilia undique subministrarent. Vale.

E I D E M.

IV.

Lib. VI. ep. VI.

CUM scribebat legatus ad te quotidie, superuacuum esset aliquid per me significari tibi de rebus Germanicis; & literæ ad casum committuntur. Hoc unum velim scias, legatum nihil facere, nihil cogitare aliud quam quo pacto & honorem sedis Apostolicæ, & gratiam inter Principes augeat. Ego quoque, etsi idem facere cupio, tamen eo sum in loco, ut neque intelligam quemquam, neque intelligar. Si Cæsar veniet (quemadmodum speramus) fortassis utilis fuerit opera nostra: alioquin & operam perdidimus & impensam. Nam nisi is venerit, exigua erit hæc diæta. Principes ægre & pauci conuenient: omnes Cæsarem intuentur, & quia periculum factum est sæpe, non videntur se moturi, nisi prius ille se mouerit. Qui iam venerunt, & paucissimi sunt, & ad solam spem Cæsaris continentur; quæ si euanesceret, statim reuolarent. Tædia Germanica infinita sunt, verum omnia ferenda sunt seruis pro domino, filiis pro patre, membris pro capite. Oratores Veneti adhuc Patauiæ, quæ est ad ripam Danubii, metu latronum se continent, ibique Cæsarem præstolantur: distant à nobis minus quam trium dierum itinere. Scribunt insidias sibi undique structas esse, nam (ut uno verbo dicam) patentissima Germania est, & potentissima, & nobilissima: sed ea tota nunc unum latrocinium est, & ille inter nobiles gloriosior, qui rapacior. Apud Principes solos securitas est: sed duntaxat cum promittunt, nam nisi publica fide accepta, eorum quoque fines infesti sunt omnibus. Sed hæc querela in Italia erit iucundior. Vale.

E I D E M.

V. \*

Quarto decimo Cal. Iun. rosam primam legi Ratisponæ, adeo seruum est in Germania florere. Iam si maturari nostrum reditum putas, præcox iudicium habes. Cæsarem tam nunc expectamus, quam cum venimus. Aquilæ ad gruem <sup>p. 149</sup> rediere. Profectionem nostram perscripsi tibi omnem, idem faciam de moribus gentis. At quid, inquires, in Germania ingenio dignum nostro? Multa quidem, sed illud imprimis, quod & mortui viuunt, nec putes coeli clementia fieri, sit moribus. Ego qui miracula nostri temporis non odi modo, sed horreo, nusquam versatus sum omni vita mea fastidiosus. Sed dices perpulchrum est mortuos viuere? perpulchrum: sed malim ego & viuos mori, nam cum fæteant qui ambulant, si fæterent mortui non ambulant. Anceps fortuna mea est. Quanta calamitas nata, tanta auribus felicitas inest, dum omnes sentio, intelligo neminem, ô epigrammata:

*Tu sortem miserere meam, fugere repulsa*

*Pierides, Istrum Flora Venusque bibunt.*

*Arce sedet Bachæ: cessit neglectus Apollo.*

*Non heic est aliud viuere, quam bibere?*

\* Hæc epistola inter alias Campani non reperitur.

Vale



Vale felix, nec accusēs breuitatem, mox refarcientur omnia, nunc comparo me in aduentum Cæsaris, habiturus orationem, qualem Italia legat, Germania non capiat, incredibilis est his ingeniorum barbaries, rarissimi norunt literas, nulli elegantiam. Vale iterum. D. Antonius de Romagnano, Patricius & Montanus se D. V. plurimum commendant Ratisponæ 24. Maii 1471.

E I D E M.

VI.

Lib. VI. ep. VIII.

CUpimus ambo, & tu scire, & ego significare, quid in Germania faciam. Dicam, facio nihil, dico parum, meditor unum. *Italia, Italia est, resonat mihi dulcis in ore Italia, in animo mihi fixa est Italia.* Amplissimum conuentum speramus, ut fere semper altius crescunt arbores, quæ tardius. Habemus Treuirensē, Spirensē, Aichstatensē: nam de Moguntino iam pridem audieras. *Vnus sed nostram cunctando destituit rem,* & quantum perspicio, grus illa non perstat, transiit iam in cornicem. Scribit Cæsar, heu quam non Cæsar: ad triduum se venturum; sed hoc triduum iam centiduum est: In mora fuit Pancherii insignis latronis & conspiratorum quorundam supplicium, aut supplicia potius: nam Pancherius auctor coniurationis securi percussus est: & cum eo, qui proxime sequebatur: Tertius flumine, nescio an Danubio, submersus. Magna res, & minime opportuna consiliis, sed tamen magna. Cæsarem tam mitem Principem aliquando incaluisse: nam incanduissē, tam iusta causa non dixerim. Principes qui adsunt, eo videntur animo, ut aspirante Cæsare sperare non pauca possimus. Sed quid dicam, tarditas & cunctatio ipsa desperatio quædam est, ut raro acriter insurgunt, quæ lente se moueant. De Boemicis iam puto ad te esse perlatum, filium Poloni, ex Ladislai (qui veneno adolescens periit) natum sorore Regem appellatum, sed ab iis duntaxat, qui & religioni & Hungaro aduersantur, & cum Georgio sentiebant. Nec refert Georgium num habuerint Regem, an nunc habeant Polonum. Tam se impunes futuros sub hoc Rege vident, quam sub illo iam fuerant, & periculum est ne contagio serpat, & augeantur viribus, qui destituti videbantur. Cæsar cui faueat incertum est, nisi quod Hungaro propter veterem contentionem & Pancherii causâ putatur infensus. Non possum de omnibus certa perscribere, & multa sic pendent, ut minentur potius quam cadant: quædam contra casum existimentur, quæ nondum inclinauere. Vale.

HIC DESIDERATUR INSIGNIS EPISTOLA DE CÆSARIS ADVENTU.

E I D E M.

VII.\*

Lib. VI. ep. XII.

Perscripseram tibi \* de aduentu Cæsaris, & apparatu eorum qui Cæsarem sequebantur, & quæ spes esset proposita nobis de amplissimo conuentu, & quantum nec ætas nostra vidit, nec grandissimi natu Germanorum recordantur. Deinceps hæc acta sunt. Ad VIII. Calend. Iulias rem diuinam, in prætorium secuti Cæsarem conscendimus, quem in locum conuenire Principes consueuerunt de rebus Germanicis acturi. \* Hic Antistes Tridentinus nomine Cæsaris prodiit in medium oratione Germanica: quam euestigio, ut externi quoque oratores intelligerent, latine est interpretatus. Primum Cæsaris moram excusauit, quod ad diem non venisset, & capita contentionum, quæ domi post indictum conuentum exortæ eum detinuissent, enarrauit: egitque gratias & Principibus & Oratoribus, quod non sine iactura rei familiaris & sumptibus grauissimis alterum prope mens-

\* Hæc epistola non extat, quod dolemus.

Tridentinus pro Cæsare.

\* Extat etiam hæc epistola inter Jacobi, Cardinalis Papiensis Epistolas CCCLXV.



sem expectassent. Causam deinde aperuit, quæ ad indicendum hoc in loco & tempore conventum impulisset: præteritas Christianorum calamitates, & recentem Carniolæ cladem deplorauit: potentiam crudelitatemque immanissimi hostis, quam breui tempore quantum occupauerit finium nostrorum, quantum Christiani sanguinis fuderit, & in Europa & in Asia, ostendit, repetitaque eleganter veterum non una historia, clarissimas ac prope innumerabiles Germanorum expeditiones & pro religione Christiana & pro Imperio Germanico susceptas commemorauit: hortatusque est Principes omnes, oratoresque ciuitatum Germaniæ, partam à maioribus gloriam conseruarent, occurrerent imminentibus periculis, & religionem in qua patres eorum vixissent, & ipse essent nati atque instructi tuerentur. Addidit postremo Cæsaris preces, auxilium & communi libertati, & priuato suo periculo implorantis, responsumque postulauit. Post Tridentinum legatus graui & ipse oratione propositum Cæsaris & principum aduentum commendauit, egitque gratias Pontificis nomine uniuersis, hortatus ut quam spem Christianis ex conuentu porrexissent, eam sumendis armis exhiberent, nec se carpi singulos paterentur, qui uniuersi non modo resistere sed profligare hostem quam facillime possent. Conuentus multos reperit nequicquam in Germania factos, ubi si obtemperatum fuisset consiliis eorum, qui futura pericula præuidissent, non eo discriminis ventum fuisset, ut quem facile tunc potuissent ex omni depellere Europa, nunc in ipsa Germania perferrent: dum extrema essent neglecta, ad intima hostem penetrasse. Adiecit & preces ac verba, vultum animumque legato, & tantis necessitatibus dignum accommodauit. Principes Germanico more paulum segressi, atque inter se locuti, gratias Cæsari egerunt, quod aliquando Germaniæ libertatis & publicæ salutis curam suscepisset, se paratos per omnia vitæ fortunarumque discrimina illius Imperium sequi; ituros in expeditionem, si ipse aut eat, aut iubeat iri; missuros si iubeat mitti: Lætus eo responso Cæsar, laudatis principibus conuenire sequentem in diem iussit, Postridie pari frequentia reditum in prætorium est; sed initium consultandi à controuersia ortum, omen belli futurum impedimenti fuerit suspensum me habet. Oratores Burgundi cum post Legatos Electorum collocati, atque ideo despecti priore confessu viderentur, redire in subsellia recusabant. Electores qui erant, absentibus collegis qui aderant, quanquam summa cum modestia, dignitatem tamen communem tuebantur. Burgundi potentiam sui Principis, & in Gallia & in Germania maximam: electores parem nobilitatem ac vetustum morem obiiciebant, seque è corpore Cæsaris cum essent; ne regibus quidem, si qui adessent, cedere oportere contendebant. Quæ contentio cum tres prope horas consumpsisset, non antea est sublata, quam Burgundi alteris subselliis ad frontem Cæsaris inter oratores Regios locarentur. Tum demum & ipsi auxisse principis sui dignitatem, quod in ordine absentium Regum sederent; & Electores seruasse æstimationem suam, quod exclusi à primis subselliis Burgundi essent, videbantur. Vbi omnes confedere, primi Burgundi surrexerunt, quorum vnus locutus est oratione ideo parum accommodata, quod plus in criminando Rege Gallorum quam in proposito iuuandi belli visus est occupari. Regem rupisse fœdera, violasse publicam fidem, media pace oppida Burgundi expugnasse conquestus est. Pauca quædam adiecit ad orationem belli, & quæ nunc ibi potius excogitata, quam domo adducta viderentur. Altera fuit oratio Pauli Moricini Venetorum oratoris breuis & collecta. Certasse cum Turcis Venetos annos iam ducentos, eorumque vires atque impetus solos & in Thracia & in Illyrio sustinuisse. Enixius tamen octo proximis annis mari cum iis ac terra gessisse bellum, propugnatoresque nostros fuisse, iam non tam defatigatos aut exhaustos, quam à cæteris Christianis destitutos esse. Communi ad eam diem solos periculo excubasse, creuisse nunc hostem, factumque ex aliena somnolentia magnum, & quantum iam perferre Christiani vtinam vigiles possint. Instare illum ab Illyrio, à Pannonia, ab sinu Adriatico; non mari, non terra quietos nos sinere. Genus belli quale esset, ipsos perspicere, senes



senes occidi, strangulari infantes, ceteram multitudinem sine sexus ætatisque discrimine in seruitutem Asiaticam trahi, conflammari templa, viros DEI intra templa concremari, igni & ferro ad excidium vltimum vastari omnia. Incipere iam Germanos intelligere, quam durum fuerit Venetis, tam diu bellum gessisse cum Turco. Nec tamen desperandum esse, modo eo sint animo Germani, quo quisque esse debeat ad vitam suam libertatemque suorum defendendam. Habere se permagnam classem & præsidia per Illyrium Græciamque disposita, militare eorum stipendio ad hominum quinque & viginti millia, iuuari & à Ferdinando Rege maritimo bello, si iuuentur terrestri à Germanis, breui & futuros ipsos in tuto, & cæte-  
 p. 151 ros extra periculum posituros. Misisse Ferdinandum tres & viginti triremes, quatuorque naues onerarias in aduentum classis, & alias propediem esse missurum: ipsos triremes sexaginta, nauesque aliquot instruxisse, & putare iam esse deductas. Centum triremibus ac duodeviginti rostratis nauibus bellum maritimum aggressuros: si terra quoque distrahatur hostis, vtroque laboraturum. Post eum legatus magnificis verbis & rem Venetam, & Pontificis diligentiam, & Ferdinandi apparatus complexus, parem Germanorum curam, quorum non dispar esset periculum, postulauit. Secundum legati verba præsul Aystetensis iussu Cæsaris pro-  
 gressus in medium hæc postulauit. Primum vt decem millia ad præsentem ne-  
 cessitatem, quarta pars equites, ceteri pedites cogerentur, qui per fines extremos Germaniæ dispositi hostem ab incursionibus prohiberent. Alteram deinde manum subsidiariam ac paratam in omnem belli euentum, & ad quamuis hostium impressionem compararent. Postremo vt de summa totius belli, quantum geri vniuersis viribus Germaniæ posset, in annum sequentem constituerent. Ad hæc Principes, quod digna consultatione res esset, spatium postularunt, responsurosque in diem sequentem polliciti, præsentibus quoque verbis spem Cæsari addiderunt. Magna visa est omnibus Cæsaris postulatio, nec minus necessaria quam magna, sed & meo & multorum iudicio præpostera, nec legatus ordinem approbavit postulatorum. Laudare se dixit consilium Cæsaris de auxilio præsentis, de subsidio parato, de expeditione futura, sed eum ordinem non placere. Primum quod cum fama potissimum bella constent, nec minora in re bellica terrore quam prælio conficiantur, irrisuri essent hostes tam exiguum manum, & vires Germanicas ex decem millibus militum existimaturi; ac tanquam omnem expressam Germaniam in tanto conuentu nihil plus præbere virium quam decem millia potuisset, aut si posset, ægre reliquos in castra venturos aliquando esse, qui nunc vt darent nomina, compelli non potuissent. Deinde spem omnem ereptam iri ciuitatibus nostris finitimis Turco: concasuros omnium animos, cum primum de numero audierint tam exiguo, & quicquid nunc præsentis Cæsare, astantibus omnis Germaniæ Principibus, tanto habito conuentu, in eorum salutem factum non sit, fieri posse amplius desperabunt. Postremoque vbi decem millia contulerint Germani Principes, contulisse se quantum opus fuit existimabunt; vt fere semper grauius est quod additur ponderis, quam quod imponitur, eo maxime imputatur quod primum exactum est. Proinde suam esse sententiam, vt ante omnia de summa vniuersi belli deliberetur, vires omnes Germanorum inspiciendas, nomina militum quotquot & vbi vbi sunt conscribenda. Habendum, quantum habere maximum possent, ex omni Germania delectum. Ac tum demum ex ea summa primum decem millia educenda, præsidiumque ad impressiones ex eadem submittendum. Cæteras copias destinatas conscriptasque, & primo quoque tempore paratas habendas esse. Ita futurum, vt hostibus terror, spes nostris adiiciatur, vt illi se contineant, nostri ad resistendum confirmentur, & cuique exploratum sit, quo tempore quid facere, quorsum aut qua manu ire iubeatur, magnam vim habere & animi & rerum apparatus. Laudata est magnopere Legati sententia, non tamen Cæsaris propositum immutatum. Vnde orta suspicio est nobis, remissiorem eum futurum ad hanc expeditionem, quam sperabamus, & consulere velle præsentibus periculis, futura non cogitare. Quanquam legato re-

*Aystetensis  
pro Cæsare.*



*Principum re-  
sponsum.*

spondit; Bono esset animo, se nisi re ad summam vniuersi belli perducta, Ratispona non discessurum. Principes quod erant polliciti, sequenti die responderunt, se ad omnia quæ Cæsar postulasset esse paratos: vnum orare, simulates Principum, ciuitatumque discordias (quod facile autoritate sua posset) à Germania tolleret, magnam partem virium Germanicarum occupari principum seditionibus, quibus sublati vno robore, communi manu, copiis vniuersis inferri bellum posse. Cæsar studiosum se ait semper fuisse concordie Principum, & nunc quæ ad pacandam Germaniam pertinerent, omnia esse facturum. Nouissime designati sunt quinque viri ex familia Cæsaris, ac totidem ex consiliariis principum, qui cum Moguntino (cui est primus inter principes locus) de cogendis statim decem millibus, & præsidio supparando, & de numero copiarum Germaniæ in annum sequentem, præfiniendo, & de præficiendo imperatore, ac de omni ratione non mouendi solum belli, sed etiam continuandi inter se agant, & vbi deliberauerint, ad Cæsarem & Principes referant. Hoc in statu res sunt. Legatus nihil neque excitandis Principibus neque Cæsare incendendo prætermittit. Ego ea sum nunc sententia, quæ nuper fueram, cum primum de conuentu ad te scripsi: pendere omnia ex Cæsaris voluntate: qui nisi omnia velit quæ ad ineundum bellum pertineant, nihil dicam aliud, quam fato malo perituram rem Christianam. De populata Carniola & igni ferroque vastata nisi excitetur, non video quid sperare possimus ab eo auxilii calamitatibus nostris, qui suis non moueatur. Auctus conuentus est incredibili multitudine Principum. Nudius tertius venit Landgravius Hassiæ cum equitibus quadringentis. Heri Antistes Colonienfis exiguo Comitatu. Fratres Saxones, quorum est magna inter Germanos auctoritas, ad triduum expectantur. Conuenisse feruntur ad hunc diem paulo plus minus quam equitum decem millia. Pulcherrimum spectaculum nobilitatis, vtinam æque profuturum. Feliciter vale Ratisponæ. III. Nonas Julias MCCCCLXXI.

E I D E M.

VIII. \*

*Lib. VI. ep. XIII.*

*Albertus Ba-  
varus.*

POSTRIDIE Nonas Julii, quo die opinio fuerat quinque viros de Principum decretis relatueros, Wolfgangus Bauarus frequentissimo confessu querelam noui sceleris intulit de Christophoro fratre, qui ab Alberto & ipso quoque eorum fratre in vinculis detineretur: orauitque Cæsarem tam immani & inaudito ante eum diem exemplo impietatis clementia sua & pro dignitate Imperii occurreret, vt quem naturæ charitas non teneret, seueritas iudicii à maleficio coerceret. Breuis accusatio, ingens vulnus visum est, perculitque omnium animos, fratrem aduersus fratrem pro fratre contendere, nec causa modo, sed promissa barba, & mutatio vestis, & lachrymarum immodica effusio certare pro duobus fratribus altero captiuo, altero sponte sua exule videbantur: & habetur alioquin Albertus summa inter Germanos principes gratia, dignitate corporis & facundia, quantam capere gens potest, nonnihil & literis præditus. Altera fuit contentio Spirensis Episcopi, qui primum nomine Colonienfis acceptus in conuentu inter Oratores electorum confederat, sed vbi Colonienfis \* aduenit, jam Palatini loco se gerens, veritus à Cæsare est, ne vbi prius (hoc est, Electorum gradu) locaretur, quod nec decreto suo Palatinum \* Electorem esse contenderet, nec oportere duos simul fratres potestatem habere Cæsaris eligendi. Jam vides quæ ab eo pacis tam necessariæ fundamenta iaciantur, & quantum de concilianda Germania cogitet, qui exortas contentiones non comprimat, nouas exuscitet. Vereor, Papiensis mi, ne ad vnguem diuinaueris. Memini quo die locutus sum tecum de profectione Germanica, dixisse, te nullam spem habere in Cæsaris mente, dubiū & latebrofi consilii hominem nihil ad communem salutem, omnia ad

\* Rupertus  
Palatinus.

\* Fridericum.

\* Extat hæc inter epistolas Jacobi Papiensis CCCLXXVI.



ad suam vtilitatem reuocare. Post hæc lectæ sunt literæ Carniolanorum plenæ efferatissimæ immanitatis, nullum relictum templum, nullam agrestem casam à Turcis in Carniola; iacere passim cadauera occisorum senum atque infantium, & iam cœlum foetore corrumpi. Abrepta præterea esse ad millia hominum ferme XX. Communisse Turcos loca quædam, vnde excurrere quam latissime, ac recipere se incolumes cum præda facillime possint, implorare Cæsaris & Principum, & omnium mortalium opem. Recitata etiam litteræ Strigoniensis & optimatum Hungariæ, quibus significabatur diuisum esse bifariam Turcorum exercitum, partem Carniolam in fines Cæsaris contendere, partem ad ripam Sauis fluminis confedissee, eo consilio, vt exitu aliquo explorato, & communito excurrerent, & depopulari Hungariam possint. Centum iam annis pugnatum ab Hungaris cum Turcis esse, exinanitum iam & viris & viribus regnum: nisi ope quoque iuuetur externa, non posse diutius tam assiduam tamque potentem hostem sustinere: Communem causam agi. Se etsi propinquiores sint periculo, non tamen solos perituros, monere & orare Cæsarem, vt conuentu prope omnium Principum Germaniæ, & quantum nunquam antea amplissimo, remedium aliquod Christianis vulneribus adhiberet. Oportere eum præcipuum esse Christianorum propugnatorem, qui idem Christianorum sit Imperator. Idem quoque à Principibus postulabant. Cæsar & ad contentionem Wolfgangi, & ad utrasque litteras egregie dormit. Respondit Moguntinus nomine Principum, hoc unum agi, præterea nihil, ut & Carniolis & Vngaris succurratur. Hoc in statu res est. Vale. Ratisponæ, die X. Iulii M. CCCC. LXXI.

E I D E M.

IX.

Lib. VI. ep. XVI.

SCRIPSI ad omnem nuntium, inquietos dies, insomnes noctes ducimus. Parietes nostri te somniant: mensæ tecum vigilant: unus ubique es nobis. Redeuntibus Balthasare & Luca doctissimis clientulis tuis, nihil est quod scribam de rebus Germanicis: omnibus interfuerunt. Habemus hic oratores Hungaros, Bohemos, Polonos. Magnis verbis, maioribus ventis res agitur: sed Cæsar immotus ad omnia. Rediisse Turci feruntur in agrum Carniolanum: & rediisse manu maiore quam antea. Et tamen possumus etiam interdum querelis mediis indormire. Vale.

E I D E M.

X. \*

Lib. VI. ep. XIV.

QUÆ ante nonas Iulias acta sunt in conuentu, binis simul literis iisque longissimis, quas tabellario Mantuano deferendas ad te dederam, accuratissime scripseram. Ad decimam Iulii principes Saxones, quos propediem expectari dixeram, aduenerunt cum equitibus paulo minus septingentis, armatis fere omnibus, magnificentiorum ingressum eorum Cæsaris occursum fecit. Postridie quam venerunt, vocati Principes non quidem amplius in Prætorium, sed in domum Cæsaris, quæcunque acta essent, ordine Saxonibus enarrarunt. Saxones contra quæ in Bohemia egissent & moram excusarunt. Continuis deinde multis diebus acta est causa Palatini, \* graues diuersæque accusationes, æque magnis defensionibus auditæ. Albertus Saxonum alter, Otho Bauarus, Antistes Aystetensis, missi à Cæsare pro educendo vinculis Christophoro Bauaro: nihil profecerunt, & opinio est omnia ex Palatini contentione pendere, quam breui sublatum iri speramus. Designati ad eam tollendam Legatus, Ernestus Saxonum fratrum maior,

Tom. II.

P p 2

ior,

\* Est inter epistolas Jacobi Papiensis CCCLXXXVI.



ior, Ludouicus Bauarus cognomento Diues, & Sigismundus Dux Austriae. Interea Caesar mutata (ut videbatur) in deterius sententia, ex decem millibus quos ad praesentem necessitatem postulauerat sex millia detraxit, affirmans satis nunc futura quatuor millia. Magna undique murmuratio exorta, & consilarii designati ad rationem cogendi exercitus, ne quicquam dies multos in praetorio consumpserant, quod grauari multi videbantur: Heri XIX. Iulii à quinta hora diei ad multam noctem consultatum est de summa expeditionis, & demum consensu omnium ita decretum est; *Ut in sumptus belli quisquis prouentus annuos mille aureorum habeat, is equitem unum conducat; peditem, qui quingentos.* Ceteri proportionem fortunarum ad eam summam. Ceterum ubi de prouentibus haberi ea ratio nequeat, de capite habeatur, *Ut cui mille sint aurei, quinquaginta habere in prouentibus censeatur, atque ea computatione contribuat.* Fieri posse hoc modo ingentem exercitum aiunt, & facillime sustineri etiam longissimum bellum: & sunt qui adfirmant, si ad unguem res exigeretur, ducenta prope hominum millia cogi posse. Nos erimus minus octoginta contenti. Principes miro assensu conditionem receperunt. Vale. Bohemi haeretici filium Poloni accierunt, quem fama est cum XXXII. millibus armatorum ingressum Bohemiam ad diem S. Iacobi coronam accepturum. Cras Oratores regis expectamus, scilicet Regis Ferdinandi. Hungari quoque propediem. Ratisponae XX. Iulii MCCCCLXXI.

E I D E M.

XI. \*\*

Lib. VI. ep. XV.

**O** Solis, ô Coeli, ô Deorum domicilium Italia! Quando, quando? Papiensis mi, hoc grauissimum est nobis carere Italia. Sed illud multo grauius in maximis negotiis fieri nihil. Aegre, lente, segniter procedunt omnia, nec tamen desperandum, quia procedunt. Significaui proximis literis quae 17. Iulii acta in conuentu fuerant, de ratione cogendae pecuniae & exercitus comparandi. Post id tempus dormitum egregie est. Conuentus Noribergam propter rerum copiam transferetur. Hic coelum paulo grauius est. Aegrotant multi; nec omnia ad conuentum tam magnum, tam longum suppeditant. Caesar clausis oculis optimo est proposito: nihil tam sonorum, tam strepens, quo illi excitentur. Nihil tam magnum atque arduum, quod is se facturum non praedicet. Si tam bene olim pugnabit, quam nunc stertit, vicimus. De Bohemicis rebus nugae fuerunt, quae scripseram: tamen si minantur Poloni, se quam primum venturos ingenti manu ad regnum capeffendum: & sunt qui confingant, adolescentem illum veste dissimulata in Bohemia visum. Graua sunt odia in nos, sed haec literis non plane committenda, & astu Legati, qui omnia subodorat facile opprimuntur. Causa Palatini \* ad hunc diem nequicquam diu multumque acta interturbat omnia; & rumor est, coegisse eum quantum nunquam antea exercitum. Is multa petit. Caesar paucissima videtur concessurus, spes tamen est in p. 154 necessitate Caesaris aliqua. Habet qui auribus instillent, & plane referta est haec natio malis pulmentariis. Data sunt regalia nudius tertius Landgrauio Hassiae. Fuit operae pretium aspicere Caesarem coronatum, pulcherrima est illi tyara, sed nihil ad nostram, aut non multum fortasse. Gemmae sunt magnae, diuersi colores, perlucidae, & multae. Sed quantum ego hac in re sapio, Germania vincitur, nec dissimulatur omnino contentio. O tempora! ô Imperium! ô Lumina! ô beatos qui accedunt, miseros qui gloriantur, stultos qui conqueruntur! An te quoque non miseret conditionis humanae? Sed properat tabellarius. Ratisponae XXVIII. Iulii MCCCCLXXII.

\* Friderici.

Inuestitura  
Landgrauii.

IOH.

\*\* Ep. CCCLXXXVII.



Nisi literis Ferrariensis statum rerum Germanicarum tibi cognitum esse putarem; scriberem ad te ordine, scripsissemque hactenus omnia. Sed inculcatio laboris esset, non officium obseruantiae aures occupatissimi Principis saepe iisdem de rebus obtundere. Conuentum habemus omnium qui unquam memoria patrum nostrorum habiti sunt, & praesentia Caesaris & Principum multitudine maximum. Agitur grauissimis de rebus; nec ignoramus expectationem omnium nihil minorem esse conuentu. Sed spes ea proponitur nobis, quae haberi ex mente Caesaris possit, utinam is sit qui debeat esse, non qui consuevit, nihil lenti calamitates nostrorum patiuntur. Carniola una ex prouinciis auitis eius superiore mense direpta, depopulata, incensa est, nun maiore manu redire hostes feruntur, & ulteriorem facturi impressionem, & oppida quibus nuper vastato agro abstinerunt, oppugnaturi. Magno in discrimine ut simus non tam hostium vires, quam nostrorum traditas, ne dicam ignauia facit, & cunctatio Caesaris. Nunc quoque in tanto conuentu Principum nihil aequae displicet quam lentitudo. Principes ea sunt mente ad expeditionem suscipiendam, ut qui periculi intelligant magnitudinem, occurrere nisi uniuersi non possint. Pacem Germaniae Caesar omnibus pronuntiauit, nulli dedit, & (quantum licet perspicere) nec deponit inimicitias, nec exercet. Legatus ad omnia desudat, non mensa illi, non nox libera est, omni fomite, omni materia Caesarem conatur accendere, sed nescio an unquam accendi possit is, qui nunquam incalescit. Decretum est proximis diebus de stipendio militum: *Ut qui mille habent in prouentibus, equitem unum con-  
ducant, peditem, qui quingentos. Qui prouentus non habent, ex capite computatio sic  
fiat, ut quibus mille sunt ex capite, iis quadraginta esse ex prouentu censeantur, agrestes  
duos de viginti denarios viritim soluant.* Summam fieri permagnam hoc modo, & ingentem posse confici exercitum putant. Sed facile est Caesari decernere, exequi Friderico difficile, ut uno dicam verbo. Nisi pacem Germaniae uniuersae confecerimus, omnino nihil fecimus, huic uni intenditur. Capita sunt discordiarum Palatinus \* & Caesar, hic verbis, ille armis rem inturbat: cum alter maxima petat, alter nec minima quidem videatur concessurus. Hos Germani omnes & propinquitatibus & studio partium sequuntur. Multum Caesari auctoritatis & virium est, Palatino plus animi. Quanquam nec vires habet, qui sic habet, ut non habeat. Etiam auctoritas exigua est, etiam quae magna, si ministrum desideret. Traducemus conuentum Noribergam, si persistabit in proposito Caesar. Ibi aut absoluemus, quod erit reliquum, aut abrumpemus. Vale.

\* Fridericus.

*Hicce iunge Aeneae Senensis Episcopi epistolam ad Leonardum Aretinum,  
num. CXXVII. & alias.*



DE CONGRESSU FRIDERICI III  
IMP. ET CAROLI DUCIS BURGUN-  
DIORUM, APUD TREVERIN EACTO,  
ANNO M. CCCC. LXXIV. HISTORIOLA  
PERELEGANS.

M. Chr. Belg.  
f. 411.

ANTONIO SCROFINEO, RODOLPHUS  
AGRICOLA S. D.

**I**NIUNXISTI mihi ut literas illas, quas de congressu Imperatoris Friderici & Caroli Burgundiorum Ducis Gallice perscriptas legisse me tibi narraueram, in Latinum sermonem conuerterem. Gessi morem voluntati tuae, non tamen verbum è verbo exprimens, sed latius nonnunquam contractiusue res explicans. Ordinem quoque rerum, sicubi commodius visum est, commutavi. Tu si quae parum Latina tibi videbuntur, aut nescisse me meliora, aut (ut excusationem aliquam ignorantiae meae prae-textam) rerum culpam putabis: quarum nonnullas, quod nostro aeo repertae sunt, difficile crediderim priscis appellare nominibus. Neque enim fieri potuit, vetustati quae res ignorarentur, ut nota earum essent rerum nomina. Sed utcumque sit, una eademque maxima excusatio mihi tu, qui iussisti. Malui enim audacter suscipiendo obsequi tibi, quam offendere negando prudenter. Hac erat sententia epistola.

ARNOLDVS DE LALAING, PRÆPOSITVS D.  
MARIAE BRUGENSIS, PAULO BÆUST, RECTORI  
PAPIENSI S. D.

Metis ciuitas.

Treuiris.

Tacit. in Ger-  
man.

**P**ERSPECTUM mihi fuit, summo te studio summaque voluptate conuen-  
tum Imperatoris & Ducis nostri auditurum. Idcirco rem omnem quam po-  
tui diligentissime perquisitam exploratamque scripsi. Certior factus est ab Im-  
peratore Dux, velle illum magnis arduisque de rebus coram secum agere, com-  
positis rebus Ducatus Gelrensis, quem bello subegerat, in Lotharingiam aduenien-  
ti Imperatori est obuiam profectus. Erat secum fere dimidia exercitus sui pars,  
quem dicta expeditione habuerat. Metense oppidum est Lotharingorum clarum  
iis locis, & natura opereque egregie munitum. Id cupiebat ingredi Dux, ciues  
reputantes & armato, & potentiori, & inter hostem amicumque dubio credere  
periculosum, quum non nisi praefinito numero comitum, & quibus, si vim para-  
ret, pares se crederent, illum admissurum se dicerent respondit, *Maluisse se quod  
cogere posset, impetrare. Esse sibi clauis portarum in promptu*, arma exercitumque  
significans. Statua habet in agro Treuerensi. Exercitus per villas tectaue vi-  
corum sparsus tres in longitudinem, in latitudinem binas continet leucas. Ter-  
tio Calend. Octobris Imperator Treuiros venit, comitatus filio suo, & Turchi  
filio. \* Treuirorum ciuitas ad Mosellam flumen sita, sexaginta supra Mosellae &  
Rheni confluentem millibus, & rerum gestarum magnitudine & vetustate urbis  
(quippe quam circa Troiana conditam tempora ipsi affirmant) praecleara. Galli-  
ca olim gens, & quae diu ambitiose inter Germanas videri voluerit, donec tandem  
promotis finibus Germani, & occupato quicquid Galliarum ad Rhenum pertinet,  
Treuiros quoque in imperium nomenque suum adegere. Huc cum venisse Im-  
peratorem Dux accepit, ipse proficisci postridie parabat. Quem ubi appetere au-  
ditum est, simul ipse Imperator cum omni strepitu fortunae suae simul Episcopus  
Treuirens.

\* Erat is Calepinus, Mahometis II. frater, qui capta Constantinopoli, Romam delatus, ibi-  
demque iussu Calixti III. baptizatus Calixtus Osmahnus dictus. Hic postea in Germania  
in magnam familiaritatem venit cum Friderico III. Imp. a quo regie donatus ac munifice  
reditibus annuis prouisus in Austria pluribus annis vixit, teste Cuspiniano in *Cesar*, p. 449.



Treuirensis, & quicquid nobilitatis dignitatisque tota in ciuitate fuit, paulo minus leuca obuiam processit. Postquam in conspectum utrinque ventum est, Dux venerabundus detecto capite, equo defiliit. Itidem Imperator faciens, procumbentem in genua Ducem amplexus sustulit. Dicta ergo redditaque salute, & à Duce reliquis etiam, quibus hic debebatur honor, saluere iussis; rursus equos inscendunt. Ibant iuncto gradu Imperator atque Dux, sequebantur filius Imperatoris & Turchi, post hos, ut cuique nobilitas vel claritudo erat.

Ingens numerus utrique principi, qui tubis buccinisque præcinerent. Tributa hæc quoque Duci ab Imperatore dignatio, ut Ducis ipsius primi agminis essent, solique canerent. Præcedebant ducem pro numero gentium quibus imperat (caduceatores nescio, an nomenclatores dicam, vulgus Gallorum *Heraldos* vocat) genus hominum Galliarum Germanisque, & reliquis ad Occidentem nationibus usitatum, Italiae non perinde cognitum: genus, nobilitatem, decus Principum, insigniaque per gentes familiarum nosse ipsorum muneris habetur, quibus maioribus nobilissima quæque domus propagata, quid in quaque honeste, egregie, fæde turpiter factum patratumque, ipsi præcipue vel norunt, vel nouisse creduntur. Tuti ac velut sacrosancti, in pace honorati, in bellis quoque quamuis sauis intacti, Libertas ac licentia scelerate facta Principum reprehendendi, minor nunc quidem, olim maxima. Ausi adire mensas Regum, & resupinatum (summæ id ignominiae loco habebatur) panem apponere, & linteum quo mensa infertitur, medium perscindere, & alia dedecoris notandi causa facere. Sed hæc quemadmodum pleraque robustior in vita posteritas magna ex parte neglexit. Nomen tantum & vetustæ venerationis potius memoria, quam præsens auctoritas remansit. Hi insignia singularum gentium nomenque præferentes, Ducem (ut diximus) præcedebant. Gladium Dux maiori (ut par erat) potestati concedens, Imperatori submisit. Erat videre cuncta opulentiae maiestatisque plena. Strepabant tubæ buccinaeque & funalia flammantesque obiter cerei noctem incendebant. Iam fremitus & ardor hominum equorumque, & omnia ostro atque auro fulgentia, & hæc per tranquillitatem, tanquam exposita spectaculo notabiliora, omnium in se aures oculosque conuerterant. Imperator vestiebatur textili auro, vestis ad pedes profusa, & circum collum replicata, perque humeros more Turcorum sparsa, limbo circum pedes manusque, ingentis pretii margaritis picturato. Ipse grandis natus, sed virenti adhuc atque solida senectæ. Dux autem circiter quadraginta natus annos, in ipso ætatis robore, medio rerum gloriæque cursu conspicuus, armis se totum texerat. Fulgebat desuper chlamys unionibus, adamantibus distincta, quam, qui paucissime, ducentorum millium scutorum æstimauerunt. Tam multorum paupertate constat, ut unus vestiatur. Scias necesse sibi esse velut ex immenso & inexplebili cupiditate haurire, cui tantum libeat in re modica profundere. Filius Imperatoris decimum octauum agens annum, insigni facie, egregio pro ætate & capacissimo paternæ fortunæ ingenio, indutus sanguineum intertextum argento. Turci filium aiunt captum in bello, quod cum Imperatore Trapezuntio Rex Turcorum gessit: Romæ dehinc ad Pontificem Maximum missum esse, mox ab Imperatore dono datum. Amictus patrio more veste aurea figurata erat, crinem in nodum collegerat, sicut Sarmatæ solent, toruus aspectu: prorsusque horror, & patria vastitas vultu apparebat. Jam plerique alii duces, comites atque Principes, viri magni memorandique, si soli fuissent, nunc solum tantorum nominum accessio. Præcipui quoque honore aut opibus populi Treuerensis prope sexcenti equites, amicti omnes rubeis vestibus, iactantes Duci officium suum, & imminentes forte metus præuiis beneficiis occupaturi. Imperator & Dux multo, & (quantum ex vultu coniicere erat) benigno sermone iter emetientes, quum tandem per mediam Urbem ad forum ventum est, longis inter se precibus utrinque, longa obsequiorum ostentatione, uter alterum domum comitaretur, contenderunt, Concedente vero neutro, & ambobus tantum honorem obstinate abnuentibus, valescientes inuicem disce-

*Heraldi An.  
Sylm. epist. 126.*



discedunt. Imperator in aedes amplas atque magnificas in prospectu fori, Dux extra muros urbis ad S. Maximinum (coenobium id est D. Benedicti) diuertit Calend. Octobris. Quum prandissent, Dux iam pridem operientem se Imperatorem domi suæ conuenit. Stabat Imperator iu aula aureis sericisque tapetibus instructa, innixus abaco, & cogitabundo similis. Utque aduenientem Ducem conspexit, obuiam in medium atrium progressus, humanissime salutatum dextera apprehendens, in aulam perduxit. Ibi adhibito uno principali Ducis scriba, diu multumque incertum qua de re colloquuti, ubi satis visum est, circumlatum ex more vinum & bellaria, discessumque. Ibi iterum instare Imperator, velle foras comitari Ducem: abnuere vero Dux neque vlla id ratione pati. Tandem victor Dux, cum medias scalas transisset, Imperatorem sequi parantem propere rediens inque mediam reducens aulam, abscessit.

Postridie Dux rursus reuisit Imperatorem, abduxitque secum ad S. Maximinum, ubi diuertisse ipsum prædiximus. Induebatur Imperator purpura intertexta auro, Dux præter pileum vestem gestabat ducalem: filius Imperatoris damascenam viridem vestierat. In reliquo comitatu tantum texti fabrefactique auri, quantum vel his gentibus, vel hoc seculo difficulter, nisi qui vidisset, putaret fuisse. Non errauerunt forte qui dixerunt, *Peregrina luxuria patriam gloriam commutasse Germanos*. Quis credat horum maiores sago, aut pellibus quas feris detraxerant, vestitos, toties Romana arma exercitusque fuisse, & quaque versum trans flumina, maria, montesque auxisse fines? Ingressi sunt con-<sup>p.157</sup> clauē quoddam Imperator, vnaque episcopus Moguntiacus, secretorum suorum intimus arbiter, & Dux cum principali Scriba. Coepit nomine Imperatoris Episcopus dicere de re Christiana, quo loco, quamque difficili in statu esset, tum Duci de maiorum suorum splendore, tum præcipue quoque de sua laude rebusque gestis subnectere causas, hortarique vt opem ferret. Dignum prorsus eo vigore, eo virium & animi impetu opus, consulere in commune sacro Christiano nomini, & vna opera de DEo hominibusque optime mereri. Pulcherrimum idem tutissimumque inceptum, extra fortunæ incerta, supraque linorem detractionis positum. Quippe in quo aduersa reprehensione, secunda carerent inuidia. In hanc sententiam cum multa dixisset Moguntiacus, respondit Dux; cupere quo possint à pluribus quæ pro se dicenda viderentur exaudiri, in locum ampliorem se reciperent. Concessum in coenaculum quoddam grande, ornatum aulaeis, in quibus exactissimo opere res Alexandri eius, qui Orientem perdomuit, erant intextæ. Huius rei præcipua admiratione, qui curas, studiaque sua interius norunt, aiunt ipsum teneri. In medio sella eminentior, gradusque quibus adibatur, subsellia quoque instrata auro. Consedit Imperator, ad dexteram erant Episcopi, Moguntiacus, Treuerensis, Metensis, filius Imperatoris, Marchio Balearum, post Ludouicus & Albertus Duces Bauariæ, Comites Montis vigilantis, \* & Wirtebergensis, filius Thurci, & clarissimorum virorum magnus, quantum locus capere poterat, numerus. Ex altero latere Dux Burgundiæ, Episcopi item Leodiensis & Traiectensis, reliquaque aulicorum nobilitas. Astabat proxime Ducem scriba, amictus purpura villosa, vir (vt apud Gallos) eloquens, & promptior quam facundior. Is latine orsus dicere, primum orationem Moguntiaci recensuit, tum de Rege Francorum, beneficia Philippi patris in ipsum, meritaque ex quo exul paternam fugiens iram, hospitio ab eo exceptus, hinc vt opera sua reductus in regnum, post hæc cœpta compositaque bella, & quæ alia ad hanc rem pertinebant, multis verbis commemorabat. Tum de Principe Aquitanix subiecit, diligentissime omnia explicans. Postremo ad postulata respondit; *dolere Principem suum communem vicem Christianorum, & recenti memoria acceptas clades se, si quem alium, grauissime ferre. Quanquam autem ipse id sibi non sumeret, in ea Regum Principumque magnitudine & opibus, vt se eum esse putaret, qui vel auxilio vires firmare posset aliorum, vel auctoritate commouere mentes deberet; si tamen tuti populi sui saluæ res permittantur, effecturum se vt nemo in ipso*

\* Mont. be-  
liard.



ipso quicquam præter successus felicitatemque desideret : intelligantque omnes, ad hanc rem nec viro sibi animos, nec principi opes, nec Christiano religionem defuisse. Facto dicendi fine, Dux Imperatorem ad ades suas vsque reduxit. Dux Aquitaniæ (de quo supra mentio) frater Regis erat inuisus sibi atque infensus. Huius causa quod Rex prope pro exharede ipsum habebat, susceptum inter Ducem Burgundiæ & Regem bellum iactabatur. Postea vero quam Dux victum in acie Regem, & obsidione Parisiis pressum ad conditiones accipiendas coegit, maiora diuersioraque quam pro hoc incepto victoriæ præmia recepit : vt crederent, qui malignius interpretabantur, cuicumque cupiditati suæ speciosum hunc titulum circumdedit. Ipse frater autem proximis annis miseranda peste consumptus mortem obiit. Ægrotabat grauius & morbi ignoto genere, decidere ungues, capillique defluere, vt suspicionem præberet hausti veneni. Et (vt est vulgus ad optima facienda tardum, ad dicenda pessima promptissimum ingensque libido de maximo quoque turpissime æstimandi) autorem necis eum videri voluerunt, cui fuerat dum vixit, inuisus, & ad quem mortis præmia redibant.

Paucos post dies oratus à Duce Imperator secum pransus est. Conuiuium maximo apparatu magnificentiaque instructum erat, vt propemodum nuptiis suis, quarum fere per omnem Galliam Germaniamque celebratur fama, exæquaretur. (*Hactenus epistola : Et si qua visum est mihi rerum cognoscendarum adicere causa. Reliqua ex his qui affuere.*) Agebatur vt filio Imperatoris in matrimonium Ducis filia locaretur, nec satis conuenit. Hactenus Imperator procuratorem, seu (ut ipsi dicunt) Vicarium Imperii \* Ducem, perinde ut ipse poscebat, creare paratus erat ; si modo Dux antea nuptias firmasset. Dux contra procuratorem præsumere velut ex tuto volebat, deinde de nuptiis communi se sententia statuturos. Procuratoris huius hoc aiunt esse munus debere, adniscum Ducem studio viribusque quantum posset, omnia quæ usquam Imperio ablata sunt, ad priscam Romani principatus maiestatem rursus redigere. Ingens materia & audenti, & prospero, & ad quoduis audax cœptum in speciem abunde multum iuris. Præterea alia quædam petisse ab Imperatore dicitur, quorum nihil neque negatum neque tamen satis pronis auribus auditum. Spectacula quotidie atque ludi equorum, concertatio, hastatorum concursus, simulacra pugnarum, & in certamen opulentia fortunarumque fulgor ostentatus. Maior Imperatori clarorum virorum numerus atque nobilitas ; apparatu splendoreque rerum Dux effusior. Equidem audiui qui affirmaret æmulatione inter ipsos agi : & utrumque oblitum mensuræ, suæ, illum quidem inuidere minori, hunc vero contemnere maiorem.

\* In terris  
Gallicanis ul-  
tra Rhenum  
Pius II. epist.  
381. Vicaria-  
tus Imperii.

## RHODIORUM MILITUM MA- GISTRI, DE SERVATA URBE SUA, ET INSIGNI VICTORIA CONTRA TURCAS, AD FRIDERICUM III. IMP. RELATIO.

EIUS HISTORIÆ ITA MEMINIT TRITHE-  
MIUS ABBAS IN CHRONICO SPANHEI-  
MENSIS.

ANNO MCCCCLXXX. Mahumetes Imperator Turcorum cum ingenti classe & maximo bellatorum exercitu Rhodum Insulam Christianorum trimestri obsidione terra marique fatigat. Sed nostris muros fortiter defensantibus confusus abscessit, maximam exercitus sui partem post se relinquens occisam.



*Idem in Chronico Hirsaugiensi.*

Anno MCCCCLXXX. indictione Romanorum XIII. Turcorum Imperator Mahumetes de Constantinopoli ciuitate Græcorum in magnitudine nauium nulla per mare descendens, ad insulam Rhodianorum in manu valida centum millium pugnatorum urbem Rodensem XXII. die mensis Iunii obsedit, & per tres menses sine intermissione fortiter impugnavit. Sed miseratione diuina largiente, virtute, prudentia, & industria Petri Dansbussøn magistri militum S. Iohannis Baptistæ in Hierusalem, nihil profecerunt immundissimi canes. Christo namque suis donante victoriam pars Turcarum exercitus maior cæsa interiit: cum reliquis tandem Imperator ad sua reuersus est, cladem maximam & ingentem confusionem reportans.

*Serenissimo & Inuidissimo Principi ac Domino nostro, domino Frederico Romanorum Imperatori semper Augusto, domino nobis obseruandissimo.*

**I**NVICTISSIME ac serenissime Princeps. Quæ in obsidione Rhodiæ urbis à Turcis expugnando, & à nobis tutando gesta sunt, non incongruum videtur vestræ imperiali Maiestati significare, cum ad hanc diem pugnae ad honorem Christiani nominis felicem exitum adeptæ sint. Et non ambigimus vestræ Imp. maiestati ex victoriis non paruam lætitiā excepturam. Turci ubi circa Urbem castra metati sunt, oppugnationis loca diligentius explorant, ciuitatem quoque omni ex parte bombardis quatere & eruere proponunt, & quod mente concipiunt opere demonstrant; ad id quoque exequendum bombardis & mortariis urbem circumdant, verberant, diruunt turres IX. & bolwardon, magistratusque palatia concutiunt, & prosternunt. Tribus tamen ex partibus commodissimum sibi esse videtur ciuitatem oppugnare & aggredi, potissime ad rem conficiendam pertinere videtur turris molis S. Nicolai expugnatio: ex qua urbem in suam potestatem facile transiturem arbitrantur.

Est enim arx in vertice molis sita, quæ versus septentrionem in mari prominet, usque ad portum conspicit, & aditum nauigantibus, qui eam tenet, si libet, facilem prohibet. Ad occidentem oratorium S. Antonii situm est fere CC. passibus à turri distans, mari interiecto. Conspecta igitur loci opportunitate hostis turris potiundæ auidus omni conatu incumbit, ut eam in suam redigat potestatem. Ad turrim itaque diruendam tres ingentes bombardas æneas deuehunt, quarum magnitudo & vehementia incredibilis erat, saxa quæque sphaerica IX. palmarum torquebant, easque apud Sacellum S. Antonii collocant. Mirabile dictu, cap. 159 lamitosum visu, opus quidem percelebre, & quod stabilissimū videbatur, sed diebus assiduis CCC. lapidum ictibus turris pro potiori parte diruitur, prosternitur, laceratur, hostis quidem ruinam conspiciens exultat, plausibus quoque aera complet, quæ vana gaudia in luctum suum conuersa sunt. Nos vero de tuitione turris solliciti, grandem horrendamque ruinam conspicientes, quod superaret munitioni implere iussimus. Et quod id quoque parum visum est, propter ipsius magnum lapsum; constituimus ne dum arcem tutari, sed molem ipsam S. Nicolai defendere. Omni igitur vigilantia, cura, ingenio operariis fere mille die noctuque adhibitis, totis diebus fossa non incassum excisa, propugnaculis quoque ex lignis ædificatis in vertice ipsius molis circa turrim in medio quoque eius & in radice turrim & molem inexpugnabilem non sine paruo sumptu reclusimus: tum præsidium quoque fortissimorum commilitonum in ruina molis & munitionibus & propugnaculis circa eam confectis collocamus. In radice quoque ac pede eius altera præsidia ad Orientem & Occidentem collocamus. Nam illic radix muro clauditur, & mare vadosum est, quare obseruatur defenditurque, ne Turci illuc transeant, & nostros à tergo adoriantur. In moenibus vrbs bombardas disponi



sponi iubemus, quæ ad tempus pugnae officio fungantur. Ignes quoque cum scaphis parantur, quæ in classem mittantur. Turci ædificii ruina allekti vno & demum altero prælio turrim inuadunt, primum cum ipsam facile expugnare putarent, mediocribus viribus aggrediuntur ante auroram luce adhuc dubia, triremibus ad hoc paratis arcem oppugnant, prælianturque. Nostri quidem tuitioni intenti locum constanter tutantur. Sic hostis victus discedit. Ea in pugna fere DCC. Turci (prout profugi significauere) cecidere. Interiectis autem diebus accensi priori repulsa, turrim mari potentia arte & ingenio oppugnant, & repara-  
menta ac propugnacula iactu bombardarum quatunt, nonnullaque conterunt. Nos quoque reficimus summa celeritate quod obteritur.

Parant ad hæc conficienda triremes bene munitas, & ingeniose ad prælium ornatas, adiiciunt & nauigia quædam oneraria (parendarias vulgo dictas) quarum quædam onusta bombardis & saxis erant, vt locum turris & molis, qua se potituros credebant, munirent, & ex his urbem lacefferent, diruerent, expugnarentque. Cymbas præterea quasdam disponunt, ex quibus quique Turcorum strenuissimi facile in molem descendat, & pontem miro artificio ædificant, qui ex Ecclesia S. Antonii turris in molem transitum præbeat. Nos enim suspicati quod euenit, post primam pugnam abundantius dies noctesque circa turris & molis tamenta vires & ingenium adhibemus, munimenta ampliamus, præsidia augemus, grauissimis impensis non parcimus: Nam & in ea salutem urbis constitutam coniiciebamus. Media igitur nocte grandiori accensi ardore Turci XIII. Cal. Iulii arcem summo silentio aggrediuntur, omnique parte magno impetu inuadunt, erectæ enim erant nostrorum aures, nec dormitabant. Vbi autem adesse inimicos comperitur, machinæ saxa iaciunt, milites gladio stringuntur, balistis, fundis & Saxorum iactu ex turri & mole hostem deturbant & propellunt: pugnatum est summa vi à media nocte vsque ad horam decimam. Turci vero complures, qui ex cymbis & triremibus in molem descenderant, trucidantur; pons natans Turcis onustus machinarum iactu frangitur, qui supererant Turci merguntur. Quatuor quoque triremes, & ea nauigia, quæ bombardis & lapidibus onusta erant, Saxorum iactu ex tormentis perfringuntur, & vndis obruuntur. Ignis quoque in classem mittitur, qui eam retrocedere compulit, sic discedunt victi Turci. Insignis quidem hæc pugna fuit morte clarorum virorum, qui Turcis præerant: quorum interitus luctum exercitui præbuit. Profugi quoque post pugnam introducti affirmant, Turcos in hac pugna magnam stragem accepisse, ex eis quoque fere MMD. cecidisse. Cum autem Turci spem turris expugnandæ perdidissent, industriam, ingenium, vires, & omnem conatum, ad urbem expugnandam conuertunt; & licet tota ciuitas machinis concuteretur, & laceraretur, vt vix forma prioris urbis remanserit, tamen potissime murorum partem oppugnare intendunt, qui Judæorum domos claudunt Orientemque spectant; eamque etiam partem quæ ad turrim Italiae ducitur. Ad hæc igitur moenia diruenda & dilaceranda octo ingentes grandissimasque bombardas comportant, saxa circuitus palmarum IX. torquentes, quæ assiduo die noctuque muros verberant. Nec cessant bombardæ & mortaria circa ciuitatem locata similes lapides torquere, quin imo ad terrorem & detrimentum ictus multiplicant. Nos ad iactum mortariorum vitandum, imbecillem ætatem ac mulieres sub fornicibus & valuis & plurimis locis pomoerii cohabitare statuimus: quo effectum est vt pauci hoc tormento interirent. Vsi sunt quoque alio tormenti genere, quo igneas pilas proiciebant, ac sagittas ignitas ex balistis & catapultis torquent, quo ignem in ædificia iacerent. Nos vero indemnitati urbis consulentes peritos artis delegimus, qui post casum pilarum magna solertia ignem extinguerent. His remediis Rhodii à magnis incommodis seruari sunt. Excogitant insuper impii Urbem ingenio occulto propinquare; fossas itaque tortuosas effodiunt, quas partim lignis & terra operiunt, vt latenter ad fossas urbis accedant, propugnacula quoque multis in locis ædificant, ex quibus assiduo sagittant; colubrinis ac serpentinis bombardis,



nostros deturbant, fatigantque; pensitant quoque eis esse commodum aliquam partem ciuitatis, quæ muro Speronis adiacet, complere. Opera igitur ab hoste adhibita lapides congerere non cessant, & occulto in fossam iaciunt, assiduitate pars fossæ oppletur, antemurali quoque æquatur: ex quo & ruina in formam dorfi redacta facillimus conscensus in moenia efficitur. Nos autem inimici conatum conspicientes tuitioni Urbis inuigilamus, totaque vrbe & castello reparatis & munitionibus, fossis quoque quam diligenter intendimus. Quod Turci coniectantes, desperati ad muros Judæorum & alio se conuertunt, & nos munimentis ac reparis validissimis ruinam Turcorum firmamus, palis lignorum viuacissimorum infixis, ac terra, fascibus arborum & ramorum interiectis, quæ inuicem subtilissime firmissimeque coherentes vim machinarum sustinebant, & ruinam protegebant, ne muri collapsi intra Urbem facilem descensum præberent. Etiam loco propugnaculorum, palos & vegetes terra oppletas statuimus, quæ nostros tutarentur, & conscendentibus Turcis impedimento essent. Ignis quoque artificiosos, & alia ingenia parauimus, quæ ad propulsandam Turcorum vim conducere videbantur. Excogitatum quoque est, eam partem fossæ, quæ lapidibus à Turcis oppleta erat, euacuare; sed cum id palam effici non posset, cuniculo latentique fossa in pomerio ædificata exitum sub lapidibus nostri habent, & occulto lapides in Urbem comportant. Sentiant profecto Turci, qui fossæ propinqui erant, lapidum congeriem minui, & ascensus oportunitatem adimi, nisi quantocius quod cupiunt efficiant. Itaque in his operibus XXXVIII. diebus consumptis, quo in tempore MMMD. vel circiter ingentium Saxorum in media & in Urbem iacti sunt, Turci scilicet occasione inuadendæ vrbs inspecta, ne ascensus commoditas auferretur, accelerant propositum conficere; pridieque quam bellum iniretur ac sequenti nocte, & diluculo quod mane quo pugnatum est præcesserat, octo bombardæ dictis muris obiectæ absque intermissione saxa ingentia torquent, quod loco propugnaculorum adhibitum erat dilacerant, diruunt, vigiles & custodes, & moenium præsidia pro parte potiori occidunt, ut quisquam vix muris superstare posset, nisi summo astu occultaretur, & scala ad signum campanæ paululum descenderent & demum conscenderent. Nec tempus datum est propugnacula denovo instaurandi, cum semper ictus bombardarum augerentur, ut eo paucio tempore CCC. vel circiter saxa iacta sint. Turci vero iactu bombardarum finito ad signum iactus mortarii, quod pridem in eo loco constituerant, confertissimi magno impetu quam celerrime VII. Calend. Augusti conscendent. Erat namque facilis (ut diximus) eius conscensus, faciliior quam nostris per scalas. Superiora quoque murorum loca, eradicato nostro quod illic erat præsidio (quod primum tanto impetu resistere nequiuit) antequam subsidia nostra scalas conscenderent, occupant, & illic vexilla sua statuunt. Idem quoque faciunt ad turrin Italiæ, cuius verticem oppugnant. Clamor vndique oritur, manus quoque viriliter conferuntur, magnaue vi pugnatur. Repente nostris hosti se obiectantibus, dextera leuaque murorum superioribus locis nostri hostem oppugnant, & valide deturbant, ne moenia discurrerent. Scalas quoque quæ quatuor erant, quibus in vicum Judæorum descendeatur, vna iussu nostro perfracta, conscensus hosti nos opponimus, tutamur, defendimus.

Turci vero perpulchre armati duo millia supra muros erant, confertissimi de nostris secum manus conferentes: qui armorum vim propellere, & loco expellere nitebantur. Sed nostrorum virtus firma persistens nequaquam loco cessit. Sequebatur vero Turcos qui muris potiti erant, ingens multitudo Turcorum, quæ totum campum adiacentem, ruinam, vallum & fossam oppleuerat, ut terra vix conspici posset. Affirmarunt profugæ MMM. \* Turcorum inuasioni adesse. Nostri ex Turcis, qui super muro erant, CCC. vel circiter in vicum Judæorum propellunt, qui ad vnum occisi sunt. Eo in conflictu vexillum imaginis sacratissimi Domini nostri Jesu Christi & religionis nostræ ante



ante hostis conspectum ereximus. Summa itaque vi horis duabus pugnatum est. Tandem Turci pressi, fatigati, perterriti, vulneribus quoque fessi terga vertunt, & fugam tanto impetu arripiunt, ut sibi ipsis impedimento essent, & perniciem afferrent, cecidere ea in pugna Turci tria millia, quingenti vel circiter, quorum cadauera intra urbem & supra moenia, & in fossa munitionibus hostium & mari reperta sunt, & postmodum ad luem vitandam combusta, quorum spoliis nostri potiti fuere; qui fugientes Turcos usque ad campi planitiem magno animo secuti eos trucidantes, tandem incolumes ingressi sunt. In praelio quidem ex nostris militibus & baliuis inter confertissimos hostes constanter pugnantes occubuerunt. Nos nostrique commilitones pluribus vulneribus acceptis; Deo gratias acturi, praesidio valido muris imposito, domum reuertimur. Nec id profecto sine diuino auxilio contigit, qui tandem cladem à nostris auertit. Misit enim Deus (non ambigimus) de caelo auxilium, ne plebecula Christum colens Machometis spurcitiis inficeretur. Parauerunt Turcae spe potiunda Urbis sibi funes ad captiuos alligandos, & palorum ingentem magnitudinem ad viuos cruciandos. Decreuerant enim omnes mortales, mares & feminas, supra decem annorum aetatem trucidare, & palis suffigere; teneriorisque aetatis mortales in captiuitatem ducere, & ad fidem abnegandam compellere, & omnem supellectilem in praedam conuertere, urbis ditione Turco reseruata. Sed frustrati suo nefando optatu, tanquam pecudes caduntur. His in pugnis & eruptionibus diuersis diebus factis, ut approquinationem prohiberemus, & fossam euacuaremus, & ageremus quod ciuitati commodum esset. \* Etiam machinarum iactu in exercitum & viridaria quae incolebant, (ut perfugae diuulgauerunt Turci) nouem millia occisi sunt. Ingens quidem multitudo vulnerata, inter quos quidam capitanei, ac Germanus Balse, \* & quidam Turci gener occubuerunt. Pugna commissa, munimentis prius exultis, ad primum lapidem castra Turci locarunt, ubi supellectili impedimentis ac machinis onerandis, ac Turcis in Lyciam reuehendis nonnullis diebus consumptis, Rhodiorum littore soluentes fiscum continentem urbem antiquam nauigant. Sic quoque victi cum ignominia recedunt. Omnipotens Deus vestram Imperialem Maiestatem feliciter conferuet ad vota. Datum Rhodi die XIII. Septembris, anno Redemptoris nostri incarnationis MCCCCLXXX.

\* f. Bassa.

*E. V. Imperi. M.*

Humiles seruitores, Petrus  
Danbussen, Magister hospitalis Hierosolymitani, & consules.



SIXTI PP. IV. PASSAGIUM, SI-  
VE BULLA EXHORTANS PRINCI-  
PES CHRISTIANOS AD SACRAM EX-  
PEDITIONEM IN TURCOS SUSCIPENDAM :  
MISSA PHILIPPO PALATINO ELE-  
CTORI, ANNO  
MCCCCLXXXI.

*DILECTIO FILIO, NOBILIVIRO, PHILIPPO  
COMITI PALATINO RHENI, SACRI ROMANI IMPERII  
PRINCIPI ELECTORI.*

**D**ILECTE fili, Salutem & Apostolicam benedictionem. Animaduerten-  
tes Christianorum Principum discordias truculento hosti ad communem  
perniciem viam indies magis aperire, volentesque pro pastoralis officio nostro his  
tot incommodis & periculis obuiare, ne in deterius serpent, postquam eo iam  
deductæ sunt res nostræ, ut minime cunctandum sit; cum perfidissimus & vigi-  
lantissimus hostis apparatus maximum aduersus Italiam, Germaniam & Rho-  
dum indefesso studio, (ut ex pluribus locis compertum habemus) instruat:  
Triennales inter omnes Christianos Principes & potentatus inducias indiximus ad  
defensionem Catholicæ fidei, paterna caritate omnes hortati sumus, venientes aut  
mittentes ad tam piam & necessariam expeditionem, sub nostra & Apostolicæ se-  
dis protectione suscepimus: eis bella aut impedimenta quomodolibet inferen-  
tes, sub spiritualis & temporalis gladii poena ut abstineant commonuimus, prout p. 162  
in literis nostris desuper confectis, quas & in tuis & in reliquorum omnium Prin-  
cipum, & potentatum Christianorum regnis, prouinciis & dominiis publicari  
mandauimus, latius continetur. Volentes igitur literas ipsas plenum sortiri effe-  
ctum, & debitæ omnino executioni demandari, nobilitatem tuam in Domino  
hortamur, & per religionem quam profiteris; per passionem saluatoris nostri,  
quam ut nos ab æterna morte redimeret, subire dignatus est; per tot fideles po-  
pulos, qui in teterrimam ducti seruitutem præsidium tuum implorant; per mi-  
seram stragem, quæ tot præclaris ciuitatibus, tot nationibus imminet, nisi quam  
primum succurratur; per gloriam & splendorem Christiani nominis, quod à  
spurcissimis hostibus in totum conculcatur, nisi nosmet ipsos excitauerimus, te  
obtestamur, & Apostolica auctoritate tibi mandamus, ut literarum ipsarum teno-  
rem & continentiam in omnibus & per omnia serues, & cum effectu adimpleas,  
sicuti pro catholico animo tuo facturum te confidimus, ne in extremo iudicio  
apud tribunal Dei reus sis effusi Christiani sanguinis, qui è manibus tuis require-  
tur. Alioquin contra inobedientes & contumaces ita urgente communi periculo  
& necessitate, ad executionem contentorum in literis ipsis procedemus. Datum  
Romæ, apud S. Petrum sub annulo piscatoris, die XII. Aprilis año MCCCCLXXXI.  
Pontificatus nostri anno X.

Sixtus Episcopus seruus seruorum Dei. Ad futuram rei memoriam, co-  
gimur iubente altissimo, & urgente Reipub. Christianæ grandi necessitate, uni-  
uersos Christianos Principes, ac omnes Christi fideles requirere, eisque manda-  
re vice Dei, cuius locum quamuis immeriti tenemus in terris, ut à vigentibus  
inter eos bellis & guerris omnino cessent, & pro illius honore & salute Christia-  
næ religionis in maximo periculo constitutæ aduersus impiam Turcorum gentem  
arma sumant, & orthodoxam fidem conculcari à tam spurcissima secta non per-  
mittant, tot iniuriis lacessiti. Lex etenim Domini sancta & immaculata, quam  
eliminatis Idolorum spurcitiis, redemptoris nostri vox deuicto mortis aculeo,  
præ-



prædito mundo inseruit testimonium eius fidele atque verum, *Meum*, inquit, *testimonium verum est, sapientiam præstans paruulis*, apostolis scilicet, discipulis suis, qui ut plurimum rudes, illiterati & indocti uniuersum ferme orbem sua prædicatione & quam Spiritus S. edocuit sapientia, ac exemplaris vitæ conuersatione vicerunt, perditas oues ad ipsius veri & boni pastoris reduxerunt ouile. Impletumque est illud Danielis vaticinium; *Omnes gentes, omnes tribus, & lingua seruiunt ei*. Nam circa tempora Constantini Magni, natus ex Maria Deus & homo Christus, à Gadibus usque Auroram, & Gangem colebatur, neque Meridies neque Septentrio Deum ignorabat, dicente propheta: *Ab ortu Solis usque ad occasum magnum est nomen inter gentes*. Et ex ore sedentis in throno (ut Iohannes in Apocalypsi se vidisse testatur) tanquam Iesu Christi vicarii gladius bis acutus, coruscationes procedebant & fulgura, quæ terras & maria penetrabant, eratque per alta & tranquilla quies, gens sancta (ut inquit Apostolus) gens electa, populus acquisitionis Christiani habebantur, eis gentes seruibant quotannis tributa præstantes. Hæc fuit olim Christianorum potestas, hæc gloria, hoc imperium. Nunc vero quo Saraceni & Turci Christianos redegerint, miserum & flebile est enarrare. Indi namque & Armenii ac Æthyopes, qui Christianos se esse profitentur, in multis à veritate Catholicæ fidei deuiant, quod reliquum est continentis Asiæ atque Africæ (Septensi atque Tingensi ciuitatibus, & illis duobus vicinis oppidis, quæ Portugalix Reges pro fide Christi athletæ pugnantes in Africa eorum ditioni subdiderunt, duntaxat exceptis) Christi nomen ac legem impacato prosequitur odio. Hoc cursu ad Heraclii Cæsaris tempora usque peruenimus, cuius temporibus Mahometus sceleratissimus vir, contraria Legi Dei dogmata in Arabia seminavit, & degenerante postmodum apud Græcos imperio, ac Romana debilitata virtute, Turci qui spurcissimam eiusdem Mahumeti legem acceperant, è Scythia venientes omnem minorem Asiam, & in Europam transfretando, magnam illius partem occupantes ad hos terminos in Oriente Christianos reduxerunt. In occidente vero mari non paruum in eius finibus partem tenentes, quam Granatam vocant, fidelibus Hispanis eis finitimis sunt infesti: & qui ad Tanais oras consistentia incolunt loca & Norwegis vicini populi, & Tartari, cum quibus & Liوني bella gerunt, Christi legem minime recipiunt. Et his tam angustis Christianis constitutis terminis non contenti Turci, nostra ætate Constantinopolin Orientalis Imperii caput, & plures alias in Europa, & nouissime in Italia Hydruntium ciuitates, eorum spurcissimæ sectæ subdiderunt. Heu loca omnia in quibus dominus noster IESUS Christus, natus, nutritus, baptizatus, conuersatus, transfiguratus, ac consummata huius seculi peregrinatione, & patrefacta Euangelicæ veritatis luce, postremo pro nostra salute crucis subire patibulum, morique dignatus, sepultus & mortuus, resurgens suis discipulis apparuit, & cum eis conuersatus ascendit ad cœlos; & in quibus sacrosancta Ecclesia Christi dilectissima sponsa, & ex illius latere nata atque educata adoleuit, & ipsius prima iacta sunt fundamenta. Insignes etiam illæ totoque orbe celeberrimæ Ecclesiæ, vbi quatuor generalia celebrata fuere concilia, in quibus veluti in quadrato lapide sanctæ fidei structura consurgit, & quæ sicut quatuor Euangelia S. Gregorius suscipere ac venerari profitetur, quatuor etiam Patriarchales sedes, quas tanquam quatuor animalia fenas alas habentia, oculis vndique plena, in medio & circuitu agni Joannes in eadem vidit Apocalypsi, & septem ad quas scripsit Ecclesiæ, vbi antea omnipotens DEUS confitebatur, laudabatur, adorabatur, nunc (proh dolor) ab his qui eum non nouerunt, quique nomen eius continue blasphemant, possidentur, conculcantur, & prophanantur. Sola super est Romana sedes, sedes vtique immaculati agni, sedes viuentis in secula seculorum. Hæc quippe prædictas Patriarchales genuit ecclesias, quæ quasi filiæ in eius gremio residebant, & in circuitu tanquam famulæ in ipsius adstitebant obsequio. Modo eis quas genuerat educaueratque amissis, sola sedet plorans, ipsarum mœrens interitum, sponso exules & desolatos, & ab illarum seiunctos



amplexibus. Vox in Rama audita est, imo per vniuersam terram ipsius ploratus & eius eiulatus perstrepuerunt, non est qui consoletur eam, ex omnibus caris eius, quem moueant Christi opprobria. Christianæ religionis Zelus, miserorum Christianorum qui durissima seruitute detinentur, lacrymæ; desolatæ regionum & illorum qui vicini Turcis vltimum exterminium indies expectant, miserratio. Omnes enim periculum in quo versatur Christiana Respublica norunt, omnes miserrantur, nemo succurrit, nemo fert opem. Potuerunt hæc aliquo modo tolerari ab Occidentalibus Principibus, cum Orientalia remotiora viderentur vastari: quamuis satius fuisset ad vicini incendium extinguendum occurrere, quam domesticum ignem (quod sine magna iactura fieri non solet) pertractare. Hæret iam, hæret iam circa præcordia virus, penetralia irruit hostis, gladium ad iugulum adegit. Hinc occupato Hydrunto Italiam premit, inde Germanorum fines ingressus, Bauariam vsque omnia proterit. Non dubitamus Christianorum Principum mentes tantis turpissimæ gentis iniuriis stomachari, & pro religionis nostræ zelo indigne ferre, quæ in religionem continue ab hostibus committuntur, & nec profecto talia sunt vt piæ aures ea sine graui molestia audire possint. Particulares tamen iniuriæ & priuata commoda, suspiciones præterea, contentiones, variæ hominum cupiditates efficiunt, vt dum quisque se tutum à periculo putat, quia procul abest, vel alteri inuidet, ne vel hostium ruina crescat, vel domum vacuam relinquere veretur, tanquam vicini fraude occupandam, Respublica neglectui tribuitur, & pecudum more modo hic modo ille trahatur in perditionem.

Nos igitur, qui dum Turci insulam Rhodi superiori anno arcta obsidione tenerent, & eodem tempore Hydruntium ciuitatem prædictam occupassent, quam plurima possibilia nobis auxilia pro insulæ liberatione, & Hydruntium ciuitatis, earundem recuperatione terra marique adhibuimus, & cum ciuitas ipsa Hydruntium recuperari non potuisset (prout nec adhuc potuit) & insula prædicta ab huiusmodi obsidione fuerit liberata, vniuersos Italiæ potestatus pacare, vt inuicem pacifice viuentes contra eosdem Turcos arma fumerent, & ad illorum ex Italia expulsionem vacarent, efficacem operam exhibere curauimus, sperantes ipsorum potentatuum facultates & vires ad id sufficere: Cum autem nuper intelleximus, eosdem Turcos maximam classem parare, & omnibus aliis curis omis-  
sis ad insulæ prædictæ, Italiæ & Pannoniæ ac Austriæ occupationem, & fidei catholicæ omnimodam conculcationem, omnes suos diuertisse cogitatus, & aperte cognoscamus ipsius sæuissimi hostis vires adeo auctas esse & in immensum creuisse, vt omnibus Christianis Principibus merito formidandæ videantur, neque eas posse cohiberi nisi à pluribus & diuersis locis distrahantur; atque Italiam, Germaniam, Hungariam imprimis vt hostibus viciniore in manifesto periculo versari, quæ profecto si singulariter & separatim inuaderentur, tantis viribus pares esse non possent: more pii patris pro filiorum salute anxii atque solliciti de consilio venerabilium fratrum nostrorum sacre Romanæ ecclesiæ Cardinalium, omnes & singulos Christianorum Principes & potentatus ecclesiasticos & seculares, ac vniuersos Christi fideles, cuiuscunque prouinciæ ac potestatus existant, etiam si Imperiali, Pontificali, Regali, Reginali, Ducali, vel alia quauis Ecclesiastica vel mundana præfulgeant dignitate, per viscera misericordiæ Domini nostri Jesu Christi per acerbissimam eius passionem, quam immaculatus & innocens agnus, vt nos miseros peccatores ab æterna morte redimeret, dignatus est pati, per iudicium extremum, in quo eius ante tribunal constituti quisque secundum opera sua mercedem suscipiet, per spem vitæ æternæ quam repromisit Deus diligentibus se, Harum serie enixe monemus, requirimus & obsecramus, ac in vim p.<sup>164</sup> repromissionis factæ in sacri susceptione Baptismi, & vim iuramenti præstiti, cum dignitatum suarum infulas susceperunt, nec non per obedientiam nobis debitam, eis & eorum singulis præcipimus & mandamus, vt mutuam inter se caritatem & pacem ac concordiam, vel saltem per triennium à die Kalend. mensis

Junii



Junii proxime sequentis inchoandum, treugas, inducias seu belli moram, quas tenore praesentium, auctoritate omnipotentis DEI, & pro defensione & securitate dominici gregis, quem Saluator noster pascendum, tuendum atque curandum nobis commisit, indicimus, & per vniuersos Christianos seruari volumus, obseruent, arma deponant, & priuatarum iniuriarum atque offensionum obliti, Christi redemptoris nostri iniurias, offensiones, & opprobria vlciscantur, & in hostes qui Christianorum omnium sanguinem sitiunt, & Euangelicam legem delere conantur, arma sumant, ac cum à nobis per nuncium vel literas fuerint requisiti, per se ipsos, vel eis legitime impeditis, per eorum capitaneos vel duces pro sua virili, & cum notabili parte suae potentiae accedant vel mittant, aut tantum de suis facultatibus, quantum si per se ipsos irent, vel alios mitterent (vt praefertur) exponere deberent, Aut alias secundum eorum facultatem in tam sanctam & pernecessariam expeditionem, per singulos dicti triennii annos erogent. Opponant se murum pro domo DEI, & aprum de sylua vineam Domini Sabaoth demolientem exterminare festinent; recognoscentque sibi potestatem & gladium à Deo commissum esse ad vindictam malefactorum (vt dicit Apostolus) laudem vero bonorum. Repetant hortamur, quot prouincias infestissimus hostis, quot regna superioribus annis euerterit, quot Christianis hominibus clades intulerit, quantum virum, quantum potentiae sibi cumulauerit, quae in finibus Germaniae, quae Rhodi, quae in Italia nouissime gesserit, quam magna ardeat cupiditate dilandandi fines, & imperium propagandi, & tunc cognoscent, quam sit eis tutum habere talem vicinum. Pro libertate igitur, pro liberis, pro patria, pro ipsa vita, pro religione & fide Christiana, pro salute aeterna sumantur arma, cum talis immineat necessitatis articulus, à quo nullus se valeat excusare legitime, vt in hostes, antequam interius penetrent, forti animo proficiscantur, seque & suos vlciscantur à tantis foedissimi huius hostis iniuriis, atque imminentem sibi & suorum ceruicibus gladium auertant. Non impossibilia vel nimis ardua eis iniungimus, aut minus vtilia, necessitas ipsa vtilitatem arguit, cum, nisi defensionem se accingant, manus dare, & in seruitutem venire, atque ea pati quae victoribus libuerit sit necesse, quae qualia sint aliorum exempla nos docent. Imperator Constantinopolitanus, dum regia vrbs expugnatur, in praelio cadens, etiam mortuus capite truncatur, Graecorum procures atque omnis nobilitas depositis armis trucidatur: Rasciae Despotis in potestatem redactis eruti sunt oculi, Trapezuntiorum Imperator contra datam fidem occiditur, Rex Bosnae in fidem susceptus inter vina maectatur. Verum est quod ille ait, *Regnum non capit duos*. Nolint igitur sperare Christiani Principes & populi, vt libertatem victore Turco retinere possint; nolint in suis fictis blanditiis & falsis pollicitationibus confidere. Quem ex deuictis regulis vel cum toleranda conditione seruatum videmus? Cui fidem vnquam seruauit Turcus? Abiicient hanc falsam & inanem spem Christiani procures, & in DEo solum, atque in eorum dexteris salutem reponant. Si enim viriliter pugnaverint non solum propria defendent, sed ab aliis deperdita recuperabunt; sin vero (quod DEus auertat) in solita negligentia atque desidia perseuerauerint, se ipsos & Rempublicam Christianam perdent. Quid enim Christianis deest, quod ad victoriam considerandam desiderari possit? eis viri fortes, equi, arma, pecunia, commeatus abunde suppetunt. Adsit tantum voluntas & ardor pugnandi: adsit & vera religio, & ad DEum redemptorem nostrum, à cuius viis declinamus, humilis & deuota conuersio, & Petri, quae nunquam deficiat, fides; Pauli constantia, Zelus Phinees, & Mathathiae ac fortissimi Machabaei animus: & certa procul dubio de coelo mittitur ac indubitata victoria. Praecedat enim angelus Domini exercituum eius, & vinifica crucis ac Iesu Christi in ea pendentis vexillum: quod humiliter intuentes, & defixis in sublime oculis victoriam sperantes de coelo, exurget omnipotens & misericors DEus, & misertus eorum quos plasmauit, regenerauit, redemit, exurget & dissipabuntur inimici eius, & fugient, qui oderunt eum à facie eius. Et vt Principes ipsi & alii



Christi fideles sic per nos vice DEI moniti & requisiti, contra eosdem Turcos arma sumere, & Christianæ religionis & fidei defensionem vacare eo liberius & securius possint, quo intelligent illas quæ viguerunt & vigent inter eos dissensiones, guerrarum & offensionum quarumlibet suspicione fore sublatas, eisque licere per seipsos militare, & eos atque illorum stipendiis militantes extra territoriorum suorum fines absque ulla suspicione ad eorum Turcorum expugnationem progredi & mittere, & ad id pecunias erogare, classemque instruere & parare, uniuersos & singulos Christianorum principes & potentatus, ecclesiasticos & seculares, & omnes Christi fideles, cuiuscunque præminentiae ac potestatis existant, etiam Imperiali, Pontificali, Regali, Reginali, Ducali, vel alia quacunque dignitate Ecclesiastica vel mundana fungentes, ac in terras Christianorum temporale dominium quomodolibet obtinentes, qui per supradicti triennii tempus per se ipsos, vel eis legitime impeditis, per eorum capitaneos seu duces, pro sua virili & notabili parte suæ potentiae ibunt, vel mittent, aut tantum de suis facultatibus quantum si per se ipsos irent, aut alios mitterent (ut præfertur) exponerent, aut alias secundum eorum facultates in tam sanctam & pernecessariam expeditionem per singulos dicti triennii annos erogabunt, à die arrepti itineris, vel qua pecuniam huiusmodi pro primo anno erogauerint, & quoad in his perseuerauerint, ac deinde post ipsorum videlicet reditum, vel auxilii cessationem ad sex menses cum eorum statu, ciuitatibus, terris, dominiis, subditis, territoriis ac bonis omnibus sicut ea nunc tenent & possident, sub B. B. Petri & Pauli ac Rom. ecclesiæ protectione recipimus, atque nostra, ita ut d. tempore durante, & eis permessa per se ipsos aut alios implentibus plena securitate & quiete gaudeant: ac omnibus & cuilibet, cuiuscunque status & conditionis existant, & quacunque dignitate præfulgeant, auctoritate Dei omnipotentis, cuius vices gerimus in terris, cuiusque causa agitur, distincte præcipiendo mandamus, ne durante triennio huiusmodi, & quam diu per seipsos militauerint, aut alios miserint, vel pecunias ad expeditionem prædictam erogauerint, & per sex menses immediate sequentes (ut præfertur) quouis quæsito colore directe vel indirecte, palam vel occulte quenquam ex eisdem Principibus aut personis supra dictis offendant, aut offendentibus præbeant auxilium, consilium vel fauorem, aut ut ciuitates, terras & loca uni Principi vel domino, aut adhaerentibus eorundem utcunque subiecta ab illius cui subsunt obedientia, quomodo libet se subtrahant, aut ab aliis subtrahantur, seu alias in illorum regimine perturbentur, vel in eis aliquid innouetur, directe vel indirecte procurent. Nos enim contra omnes & singulos quos arma sumere, & indictas per nos auctoritate Dei omnipotentis inducias huiusmodi violare, & nostris inhibitioni & mandato contrauenire contingat, per censuras ecclesiasticas & alia iuris remedia, quauis appellatione remota, usque ad satisfactionem condignam omnino & indilate procedere, eosque persequi, & ad eorum persecutionem alios inducere non cessabimus, ut illos in quorum præiudicium aliquid fuerit attentatum pro posse indemnes conseruemus, non secus quam si talia contra nos & sedem præfatam, loca ditioni dictæ sedis subiecta forent attentata, non obstante constitutionibus & ordinationibus Apostolicis contrariis quibuscunque seu si eisdem Principibus vel quibusuis aliis comuniter vel diuifim à sede Apostolica indultum existat. Quod interdicti, suspendi vel excommunicari non possint, per literas Apostolorum non facientes plenam & expressam ac de verbo ad verbum de indulto huiusmodi mentionem. Et ut præmissa ad comunem omnium notitiam celerius perueniant, & ii, quos tangunt, quod ad ipsos non peruenerint, aut contenta in præsentibus literis ignorauerint, nullam excusationem prætere, vel ignorantiam allegare, volumus hodie eas quæ est 5. dominica quadragesimum de passione nuncupata, in præsentia nostra, in basilica Principis Apostolorum de Vrbe astantibus ibidem præfatis fratribus nostris, & quam plurimis prælatis Rom. curiam sequentibus ac Imperatorum, Regum & Principum potentatuumque plurimorum



morum oratoribus ad diætam, quæ præmissorum occasione celebratur transmissis, nec non cleri & populi multitudine, intra Missarum solennia legi & publicari, ac valuis eiusdem basilicæ postmodum affigi, & quod huiusmodi earum publicatio, perinde omnes quos contingunt à die Calend. mensis Iunii prædicti ardeant, ac si ipsis omnibus personaliter & præsentialiter insinuata & exhibitæ extitissent: cum non sit verisimile ad aliorum notitiam non peruenire, quæ tam patenter fuerint publicata. Et ut præmissa eo fiant notiora, quo etiam in aliis ciuitatibus & locis fuerint patefacta, uniuersis venerabilibus fratribus nostris, Patriarchis, primatibus Archiepiscopis, Episcopis, & aliis iurisdictione ordinaria fungentibus ubilibet constitutis, districte præcipiendo mandamus, quatenus per se vel alium, vel alias præsentis literas postquam eas vel earum transumpta authentica manu notarii publici confecta, & alicuius prælati sigillo munita receperint, seu alias earum habuerint plenam notitiam, semel vel pluries prout expedire viderint, in Ecclesiis suis, dum maior in eis populi multitudo ad diuina conuenerit, solenniter publicent, & Christi fidelium mentes deducant, & nuncient & declarent eisdem, faciantque & mandent per eorum patriarchatus, primatus, prouincias, & dioeceses, ac loca eorum iurisdictioni subiecta prout expedire cognouerint, per alios publicari. Nulli ergo omnino hominum liceat hanc paginam nostræ monitionis, requisitionis, obsecrationis, præcepti, mandati, indictionis, hortationis, receptionis, & voluntatis infringere, vel ei ausu temerario contraire. Si quis autem hoc attentare præsumpserit, indignationem omnipotentis Dei, ac beatorum Petri & Pauli Apostolorum eius se nouerit incursum. Datum Romæ, apud S. Petrum, anno incarnationis Dominicæ 1481. sexto Idus Aprilis. Pontificatus nostri anno decimo.

## MATHIÆ CORVINI HUNGARIÆ ET BOHEMIÆ REGIS, ORATORUM AD PRINCIPES IMPERII PRO AUXILIO CONTRA TURCOS FERENDO, IMPLORATIO.

*Facta Salutatione, & credentialibus literis præsentatis & lectis, infra scripta dicuntur.*

QUÆ nomine serenissimi Principis & domini, domini Matthiæ Bohemiæ & Ungariæ Regis dominationibus vestris magnificus dominus Sigismundus de S. Georgio, & de Bozin Comes, & ego suæ Maiestatis oratores proposituri sumus, si Catholicam fidem non concernerent, pro qua tuenda quisque nulla pericula vitare debet, sed omnem laborem subire, si ea grauissima & magni momenti non essent, & toti Christianitati, nisi celeriter prouideatur, pernitiola, præsertim Principibus & communitatibus Imperii, longa insinuatione nos uti oporteret, ut nonnullorum opiniones; qui nos forte mendicos existimant, euidentibus rationibus repelleremus. Sed res de quibus dicturi sumus, si bene aduertentur mentes D. vestrarum ad lachrymas saltem cordis commouebunt. Curabimus igitur nobis iniuncta clare, aperte & breuiter demonstrare, ut quisque in Imperio existens inexcusabilis sit, & serenissimo domino nostro Regi nulla culpa adscribi possit, si quid aduersi ob negligentiam eorum, qui prouidere debent, Christianitati euenerit. Dicturi igitur sumus de Turcorum ingenti potentia, deque eorum insatiabili cupidine Christi fidelibus dominandi, & in eorum sanguine grassandi rabie, deque prouidendi, ne tale eueniat, celeri necessitate.



*Turcorum origo**Ottomannus**Orchanes.**Amurates.**Baiazetes**Calapinus.**Moyfes.**Mahometes.**Amurates.**Mahometes.*

De ingenti igitur potentia Turcorum & de eorum insatiabili cupidine Christi fidelibus dominandi, & in eorum sanguine grassandi rabie pauca breuissime attingamus. Turcorum gens ex Caspiis portis egressa feritatem & immanitatem bestiarum more præse ferens, Pontum, Cappadociam, Galatiam, Bithiniam, Pamphiliam, utramque Phrygiam, Cilices, Cares, & eam Asiam, quæ Minor vocatur, usque ad littora Græci maris occupauit. Non unum tantum Principem, sed diuersos, quasi per factiones, sequebatur. Ex hac Turcorum gente (ut scriptum reperimus) quadragesimum secundum ab hinc & centesimum creatus annum Ottomannus (à quo familia Ottomannorum nominatur) exigui tunc census & obscuri ex collectitio milite non parua manu per seditionem conflata, non solum Christianas reliquias vexare, verum etiam homines suæ gentis armis infestis petere & sibi subdere coepit. Orta inter Turcorum Principes seditione, auctoritatem breui & nomen adeptus est tempore: vrbes & oppida non pauca partim vi partim deditioe in suam potestatem recepit. Ottomanno Orchanes eius filius successit, qui rem à patre commodo profecutus admodum propagauit; eum Amurates suus filius subsecutus est, qui duobus de Græcorum imperio disceptantibus in auxilium ab altero accersitus, Turcorum primus in Græciam transiuit, ubi consulto bellum protrahens, postquam ambos eneruatis consumptisque viribus fractos animaduertit, sumpta occasione arma in eos conuertit, magnam Thraciæ partem ditioni suæ subiecit. Is vita functus duos filios reliquit, Solimanum & Baiazetem. Solimano breui vita subtracto, res uniuersa ad Baiazetem deducta est, qui non solum Thraciam pene uniuersam, excepta Constantinopoli & Pera, sed Thessaliam & Macedoniam olim fere totius orbis dominam, Phocidem, Boetiam, & Atticam maiori ex parte occupauit; Mysorum quoque, quos Rassianos, Illyricos, quos Bosnenses, Triballos, quos Bulgaros nunc appellamus, crebris in cursuionibus infirmauit. Ecce initium belli Turcorum contra regnum Ungariæ. Hic enim Baiazetes armis membra regni infestare coepit, quod valde notandum & aduertendum est. Cum Calapino Baiazete filio & natu inter fratres maiore, postquam primum regnum obtinuit, Sigismundus Rex Hungariæ collatis signis prælium commisit, & tumultuose fusus, castra & impedimenta reliquit, Christianorum ingens occisio facta; Ioannes dux Burgundiæ, proauus modernæ ducissæ, eo prælio captus multo auro libertatem redemit. Calapino Moyfes eius frater successit, qui paulo post vita functus Mahometem fratrem reliquit heredem. Hic Walachis bello attritis, tributa graua imperauit, & nonnullos in Asia regnis spoliavit. Mahomete mortuo Amurates eius filius Thessalonicam magnam in Græcia urbem, quam Veneti tunc possidebant, vi captam penitus diripuit: Epiri partem, hoc est Albaniam, reliquo regno adiecit, Bosnensium agros vastauit, oppida multa vi cepit, diripuit atque incendit, Hungariam cum centum millibus pugnantium intrauit, late populatus prouinciam. Sterilis annus impedimento fuit ne regno potiretur, commeatus penuria compulsus ad propria rediit. Hac tempestate sæpe cum Turcis dimicatum est, non sine Ioannis Hunniadis Regis nostri genitoris ingenti laude, ac nostrorum & Turcorum sæpe maximis stragibus. Defuncto Amurate Mahometes eius filius regni gubernacula ex voto adeptus est. Hic est ille Mahometes, Turcorum modernus Princeps, qui sibi totius orbis monarchiam promittere videtur. Hic est ille Mahometes, qui postquam gubernare coepit, à bellis contra Christianos & etiam infideles nunquam cessauit. Hic est ille Mahometes, qui omnes maiores suos in augmentando dominia sua superauit. Hic est ille, qui quanto magis quatitur, tanto fortius insurgit, & nunquam cessat, donec votum suum adimpleat, & quem hostem reputat, ditioni suæ subiiciat. Pauca igitur de suis gestis perstringamus. Constantinopolin totius Græciæ & olim Orientis caput vi cepit, & magna cum cæde diripuit, Peloponensium Amorream, fere totum Trapezuntia Imperium, Eubæam hoc est Nigropontum, & alias omnes Ægæi maris insulas excepta Rhodo, Caffam nobi-



nobilissimam in mari Pontico urbem cum Mæotidis palude, & alias urbes circa mare Euxinum & Ponticum (quod mare Maius nunc vocatur) existentes, Regnumque Bosniæ pro maiori parte, Rassiam & Bulgariam, Acarnaniam & Alganiam totam usque Dalmatiæ finem suo adiecit imperio. Et Walachos sibi aliquando parentes habet. Patet igitur manifeste, quod Mahometes Turcorum Princeps modernus maiores suos potentia superat. Ipse enim per superiores suos parta retinuit, & ultra plures & maiores addidit prouincias, prouinciasque per suos superiores in parte occupatas integras suæ ditioni subiecit. Patet etiam manifeste, quod eius dominandi cupido insatiabilis est, Rabiem eius in Christi fidelium sanguine grassandi non solum Ungariæ regnum nouit, sed Carniola, Corinthia & Stiria, usque ad Bauariæ fines, Teutonicæ nationes non ignorant, & Italia in Stiria & in foro Iulii usque Teruifum experta est, ubi & trucidati & captiuati innumerales fuerunt. Ex quibus omnibus (ut diximus) ingens ipsius Mahometis potentia, & Christi fidelibus dominandi insatiabilis cupido, ac in eorum sanguine grassandi rabies manifeste apparet. Quodque Hungariæ regnum ultra centum annos incurfionibus infirmatum & bellis conquassatum est. Apparet etiam sollicitudo manifesta dicti Mahometis, qui plura suo tempore quam sui maiores in Christianos facinora fecit, & plura acquisiuit. De potentia ergo Turcorum & eorum insatiabili dominandi cupidine satis huc usque clare & aperte dictum esse putamus. Nunc vero ad prouidendi necessitatem descendamus, in qua & ea aperientur, quibus & ex prædictis intelligetur D. vestra, quod serenissimus Rex noster, ut Christianissimus Princeps totæ Christianitati, cuius ruinam cuiusue destructionem totalem mentis oculo prospicit, ex cordis visceribus compatitur. Nam contra tantam Mahometis potentiam, sua Maiestas, quæ olim socios habebat, nunc sola relicta est, nec aliunde nisi à Principibus Imperii auxilium expectare potest. Quod si in ea re deficient Imperii principes, credant, imo certi sint, quod Turcorum aduentum in laribus propriis citius videbunt, quam audiant. Veneti nulla ratione constrikti, sola inuidia moti, ut suam voluntatem prauam & rebellionem contra sanctam sedem Apostolicam magis firmarent, quam potius, ut veri filii communis matris contra rebelles, iuuare debuissent, cum Turco pessimis conditionibus & multum iniuriolis, imo toti Christianitati periculosis, pacem inierunt: dederunt Turco munitissima castra, loca & ciuitates, immo prouincias quas Turci decem aut quindecim annis expugnare non potuissent. Obligarunt se, quod Turci per terras & maria absque eorum impedimento tute transire possent. Portus eorum Turcis apertos tenere promiserunt, & victualia eis dare, ac plura alia, quæ in totalem Christianitatis ruinam vergunt, nisi subito prouisum fuerit. Ecce Veneti Regiam Maiest. solam reliquerunt, & (quod peius est) creditur, quod socios in ea re habeant. Pacem cum Turco Maiestas Regia si voluisset, priusquam p.168 Veneti aut alius habere potuisset, & eam cum utilitate suæ maiestatis, & non sicut Veneti, ut sua bona, ut pacem haberent, à se alienarunt. Turcus enim per triennium magna cum instantia, à sua Maiestate pacem quæsiuit, & usque Budam pro ea extorquenda solennes tandem oratores misit, Regiæ Maiestati regnum Bosniæ & alia multa offerendo, subsidiaque etiam de propria persona, ubi opus fuisset, Turcus pollicebatur, dum modo sua Maiestas eidem & suis, sine suæ Maiestatis & suorum damno transitum per regnum suum ad alios Christianos permitteret. Hæc omnia Regia Maiestas recusauit, existimans (ut bonus Christianus) alios similiter facturos. Sed proh dolor Veneti à Turcis (ut diximus) turpissimis conditionibus & cum Christianorum iactura pacem extorserunt. Quæ res valde aduertenda atque consideranda est. Turcus enim facta prædicta turpissima cum Venetis pace non ignorat, quod serenissimus Rex Ungariæ contra eum solus relictus est, quem credit celerius deglutire, quam à Christi fidelibus suæ Maiestati auxilia præbeantur. Et expu-



*Transylvania.*

gnato Hungariæ regno, totius Occidentis & septentrionis monarchiam Turcus sibi absque dubio pollicetur. Ipse enim Turcus post prædictam cum Venetis turpissimam pacem, Hungariæ regnum armis infestare non cessavit: & ut de aliis primis anni incursionibus pluribus Turcorum & Hungariæ regnum taceamus, duas tantum notabiles referemus. Inuasit enim Turcorum gens de mense Augusto fimbrias superioris partis regni ad ea loca per Stiriam in Hungariam intrando, de quibus nunquam aliquis cogitavit, & inde (ut communis fama est) ultra viginti millia captiuorum abduxit. Sequenti vero mense Octobri maximo cum exercitu electorum hominum quadraginta trium millium, & Walachorum numero maximo Transylvaniam (ubi nerui regii fisci, salis scilicet, & auri & argenti fodinarum existunt) Turci intrarunt, magnaue cum præda ad propria redeuntes ab exercitibus Regiæ Maiestatis Dei gratia non sine magna ipsorum cæde prostrati fuerunt & omnes capitanei siue primarii partim occisi, partim capti apud Regiam Maiestatem existunt, ipsorum vero ex minoribus pauci euaserunt. Manifeste igitur apparet, & cum lachrymis referendum est, quod Turcus, qui sollicitissimus est (ut pluribus suis gestis comprobari potest) Hungariæ regnum totis viribus inuadere cito conabitur, ut & ignominiam, quam in regno Hungariæ nuper accepit, à se aboleat, suæ ditioni dictum regnum subiungendo: sperat enim à nullo Christianorum exilia suæ Maiestati præberi. Regia ergo Maiestas regni sui destructionem videns, ac totius Christianitatis, cum sua Maiestas suumque Hungariæ regnum ultra centum annos à Turcis conquassatum, ipsorum potentia sic fortiter ut prius resistere non valeat, nos ad Imperii partes misit, ut & prædicta pericula significaremus, & unde auxilia celeriter sperare poterat, ea peteremus. A nulla enim orbis parte, hac tempestate, nisi à principibus Imperii auxilia sperat. Italia enim, & Hispania, & Francia, cum dominiis ducis Burgundiæ, bellis ardent. Sperat tamen sua Maiestas, quod quamuis Veneti, & si qui sunt sequaces, cum Turco pacem turpissimam inierint, si Imperii Principes cum effectu subito auxilia suæ Maiestati præbeant, prout per nos qui hic sumus cum plenissima potestate, declarabitur, quod regnum suum retinebit, & partes Imperii illas servabuntur. Considerent igitur D. vestre Turcorum ingentem potentiam, & Mahometis eorum Principis insatiabilem Christi fidelibus dominandi appetitum, ac in agendis solitudinem & vigilantiam. Quodque in mora providendi maximum discrimen non solum Hungariæ regno, sed toti Christianitati esse potest, præsertim nationi quæ cum Turcis post Hungaros immediate vicina est, & ad quam Turcis per Hungariam usque Rhenum & alias partes facilis transitus est. Disponant ergo se D. vestre ad celeriter providendum. Nos vero qui hic sumus cum plenissimo (ut diximus) mandato Regiæ maiestatis, etiam in specialissimis casibus, postquam intellexerimus D. vestras ad providendum cum effectu dispositas, ea D. vestris aperiemus, quæ non solum eiusdem D. vestris pergrata erunt & facilia, sed toti Christianitati utilia. Et intelligent Regiam Maiestatem optime ad defendendam Christianitatem dispositam, si suæ Maiestati D. vestrarum auxilia non deerunt.



*MATTHIÆ REGIS HUNGARIÆ EPI-  
STOLA AD HENRICVM EPISCOPVM  
RATISBONENSEM.*

**ANNO MCCCCLXII.** Quidam Electorum Imperii, Palatinus Rheni, Dux Saxoniae, Marchio Brandenburgensis, Noribergæ ad petitionem Imperatoris, ubi conuocati fuerunt Principes & ciuitates Imperii, pro auxilio Imperatori contra Matthiam Ungariæ Regem præbendo, misit etiam illuc Rex iam dictus ambasiatam suam, quibus denegatus fuit saluus conductus, & sic absque audientia abierunt. Electores taxas fecerunt Principum secularium & spiritualium & cum hoc ciuitatum Imperialium. Principes Bauariæ nihil dederunt, neque miserunt: afferentes non esse bellum Imperii, sed Ducatus Austriæ. Episcopus Ratisponensis Henricus de Absperg non misit armigeros: taxauit clerum suum, & Imperatorem sitibundum in mille refecit aureis. Cognita igitur munificentia Episcopi sperans alios mille, iterum cum armigeris eum vocauit: & cum non occurreret, amplius eum sollicitare cessauit.

Rex Ungariæ aegre ferens denegatam sibi audientiam, scripsit Principibus spiritualibus & secularibus his verbis: Matthias Dei gratia Rex Ungariæ & Bohemiæ, Reuerendissimo in Christo Patri, Domino Henrico, Episcopo Ratisponensi, amico nobis dilecto salutem. Reuerendissime in CHRISTO pater, amice nobis dilecte, questi sumus non semel, sed pluries amicitiae vestrae, & aliis sacri Romani Imperii Principibus, de iniuriis, quas nobis & regno nostro Imperialis Maiestas iam dudum irrogare non cessauit. Nec dubitamus, ipsum Cæsarem, plurima contra nos excogitata, apud amicitiam vestram, & alios fratres & amicos nostros in Imperio protulisse, & more solito de multis nos insinulasse, de quibus si iusta ratione decerneretur, facile appareret, uter nostrum insinulandus foret. Id enim firmiter credimus, quod si negotia illa quæ inter nos & illum aguntur, suo modo & ordine, & uti rei veritas continet, amicitiae vestrae & aliis Principibus transacto anno fuissent exposita, vel saltem nostri Oratores, qui ad declarandum super omnibus veritatem missi ad diatam in Nürnberg fuerunt, liberum accessum atque audientiam debitam habuissent, præsidia illa quæ contra nos Cæsari collata fuerunt, minime collata extitissent.

Sed ut omne malum, quod in nos & in regnum nostrum, vel potius in totam Christianitatem Cæsar ipse ab initio conceperat, tandem aliquando patefaceret; egit & per se, & cum Venetis, ut Turcorum Cæsarem perpetuum Christiani nominis hostem contra nos excitaret, id palam affirmans (quod non nunc primum, sed longe antea cognouimus) nisi deletis & exterminatis Hungaris, non posse res Christianas prosperari. Ex eius igitur & Venetorum suggestionem & impulsu, Turcos ipsos cum maximo & ingenti apparatu contra nos venire certificati sumus, atque illos in nostrum & Christianitatis exitium suasu Christiani Cæsaris conspirasse. Quibus occurrere volentes, atque cum adiutorio Dei partes nostras, vel potius Christianas, contra infidelium rabiem defendere cupientes, amicitiam vestram requirimus & hortamur, ut si Cæsari contra nos agenti vestra præsidia non negastis, nobis pro fide Christiana decertantibus, ad cuius tutelam longe magis obligati estis, transmittere & nobis adstistere velitis: ut communi omnium collato præsidio, partes nostræ contra Turcos defendantur. Ne si quid nobis & regno nostro (quod Deus auertat) contingeret, vos & tota Christianitas proximum periculum sentiat. Nos quidem fatemur, non semel, sed multiplicatis vicibus ab ipsis Turcis fuisse petitos; multis etiam & maxi-

mis



mis pollicitationibus oblati oratos, ut eis liberum passum per terras nostras ad Dominia Cæsaris & alios Christianos concederemus. Itaque pro sua prudentia, & pro affectu in Remp. Christianam, quam non ambigimus in vobis esse præcipuam, secum reputet amicitia vestra, utrum magis iustum magisque necessarium sit, nobis contra Turcos, non tam pro nostra, quam pro omnium salute agentibus, in tanta opportunitate præsidium ferre; quam Imperatori contra nos. Quæ si nostrum periculum non reputat, habeat saltem communis, & toti Christianitati impendentis periculi rationem. Nam si nos ab aliis Christianis non iuuabimur; fortasse & nobis necessitate compulsis aliquid facere opus erit, quod non in nostram modo, sed in aliorum calamitatem redundabit. Valere optamus amicitiam vestram. Datum Budæ XI.

Aprilis anno Domini MCCCC LXXXIII. Regnorum  
nostrorum Hungariæ anno XXVI. Bohemiarum vero XIV.





**JO. TRITHEMII  
HISTORIA  
BELLI BAVARICI.**





LECTORI SALVTEM!

BURCARD GOTTHELF  
STRUVE.



**I**lustre nomen erat inter scriptores seculi decimi sexti Johannis Trithemii. Hic natus in pago Trittenheim, Trevirensis dioecesis, ad ripas Mosellæ fluminis, Calend. Februarii 1462. Pater erat Johannes de Heideberg, mater Elisabeth de Longovico. Anno 1482. in Monasterio Spanheimensi Moguntinæ dioecesis, habitum secularem deposuit, & monasticum sub norma Benedicti de obseruantia tunc nouiter introducta, illic adsumsit. Sequenti Anno 1483. Joanne de Colenhufen abbate, ad Seligenstatt canonica postulatione translato, Trithemius communi fratrum electione, in abbatiam cœnobii Spanheimensis IV. Calend. Julii fuit promotus & ornatus. Huic monasterio præfuit annis 23. mense vno, diebus decem & nouem. Quibus euolutis, anno 1506. non sine laboribus multis, quorundam æmulo- rum temeritate prouocatus abbatiam S. Jacobi Herbipolensem, quæ illi offerebatur, adsumpsit; & Spanheimensem curis inutilibus plenam, spontanea voluntate resignauit.\* Vir erat doctrina præstans, Principibus etiam, Joachimo potissimum I. Brandenburgico Electori adama- tus\*

\* Hæc Johannes Duraclusius, qui ipsius olim fuerat discipulus in vita, Trithemii Operibus præmissa, plenius exponit: Scripsit alias eius elogium J. Langius. *Chron. Citic. ad annum 1515.* Andreas Theuetus *de Vir. illustr. lib. III. cap. LXXX.* & Vossius *de Histor. lat. lib. III. cap. X.*



tus \* de quo sæpius mentio fit in Trithemii Epistolis. Immo, intercessit inter Joachimum I. & Trithemium commercium quoddam litterarium. \*\* Multos quoque tractatus, qui in Catalogo Operum ipsius reperiuntur, ad eum scripsit Trithemius. Inter varia scripta, quæ & in Cœnobio Spanheimensi & Herbipolitano concinnauit, sunt quædam, quæ concernunt Historiam atque Genealogiam Bauaricam & Palatinam. Inter hæc *Chronicon est successionis Ducum Bauariæ & Comitum Palatinorum, ad Philippum Palatinum Comitem. Principem Electorem de Origine, Regibus, ac Ducibus Bauaricorum simul & Comitum Palatinorum & Spanheimensium libris quatuor.* Hoc ipsum, quod exhibemus, scriptum promiserat quidem Freherus in Catalogo, huic Tomo secundo præfixo, sed non inseruerat; hoc saltem addens: *hæc quoque eodem hoc tempore apud nos eduntur.* Continet illud *Historiam atque res gestas Friderici I. Palatini Electoris dicti Victoriosi, qui Friderici III. temporibus variis negotiis clarus.* Trithemium quidem auctorem illud agnoscit, neque tamen sigillatim ab ipso fuit editum, sed ex ipsius Annalibus Hirsaugiensibus compilatum, prout ex initio statim notarum adparet, ex quibus etiam patet, Trithemium ex Matthiæ Kemnatensis, qui Friderici Capellanus fuit, & Michaelis Weinspergensis Poëtæ vita Friderici multa hausisse. Compiler fuit noster Freherus, qui in notis subinde ad Origines Palatinas prouocat. Ista ætate, dum Freherus hanc compilationem ederet, Annales Hirsaugienses, prout, repetita lectione à Trithemio in Monasterio D. Jacobi Herbipolensi, pleniores longe fuerunt conscripti, nondum vero editi, sed iisdem saltem ex Codice manu exarato vsus fuit Freherus. Nouiter vero ex Codice Sangallensi prodierunt Typis Monasterii S. Galli 1690. f. Dum

Tom. II.

Ss 2

autem

\* De quo ipse Trithemius Chron. Spanheim. ad an. 1505. *Joannes Trithemius dispositis, ut potuit, rebus, per Thuringos Marchiam, intrauit & veniens ad Berlin oppidum, in quo Marchionis est residentia, cum gaudio magno & honore ab eo susceptus est, & in omnibus iuxta principalem munificentiam copiose prouisus. Mansit autem cum eodem Principe in Marchia mensibus IX. varia ad institutionem illius laudabilem componens opuscula. Erat enim Princeps idem in omni varietate scripturarum doctissimus, annum tunc agens XXIV. sed prudentia atque sapientia longe supra ætatem clarus & multum insignis: qui amore scientie salutaris multum æstuans, Trithemium a multis annis habere Præceptorem desiderauerat.*

\*\* Inter Trithemii epistolas lib. I. epist. VII. Joachimi est ad Trithemium, VIII. est responsoria epist. LXII. ad Joachimum. lib. II. epist. VII. & VIII. XIV. XVIII. XIX. XXIII. LX. hæc faciunt.



autem nec ista editio in omnium sit manibus, notæ etiam a Frehero adiectæ, multam lucem adferant historiæ, idem scriptum hic inferendum esse duximus. Accessit *Petri Antonii Ferrariensis Liber de Principum dignitate*, ad Fridericum Palatinum scriptus, in quem colloquium quoddam de eadem materia inter Jodocum Kalb & Henricum Munfiger retulit, in quo laudes dicti Friderici satis superque prædicantur. Conferri merentur cum Trithemio, Gobellinus de Comment. Pii II. Fuggerus, Naclerus, Freherus Origg. Palatinis & præcipue Müllerus in Theatro Comitiorum sub Friderico III.





RES GESTÆ  
**FRIDERICI**  
 PALATINI  
 ELECTORIS, EIUS NOMINIS PRI-  
 MI, VICTORIOSI VULGO  
 DICTI.

IOHANNE TRITHEMIO ABBATE  
 SCRIPTORE.

*Notis & additionibus variis illustrata.*

Accedit

PETRI ANTONII FINARIENSIS DE DIGNITATE PRIN-  
 CIPUM LIBER, AD EUNDEM FRIDERICUM.

PAULI MELISSI FRANCI,  
 COMITIS PAL. ET EQU. AUR.  
 CIVIS ROMANI

CARMEN ALCAICUM

DE FRIDERICO VICTORIOSO, ELECTORE  
 PALATINO, PRINCIPE FORTISSIMO.



IXEM canorus temporis id, Duci  
 Quo FRIDERICO vivere contigit,  
 Victoriosi grande nomen  
 Et titulum merito perennem:

*Suggestet amplam materiem ipsemet  
 Dignè canendi facta tot inclitis*

*Præclara pugnis præliisque,  
 Magnificè sibi tum patrata,  
 Non absque famâ perpete. Dicerem  
 Ut Iseburgi pectus, Episcopi  
 Magontiensis, per papyrus  
 Romuleam temere abdicati,*



*Defensitaris : cumque ferocius*  
*Irruptionem præsul agrum in tuum*  
*Metensis, & frater Badensis*  
*Regulus, & comes ille Tecci*  
*Fecisset ; illos ceperis, ac simul*  
*Florem catervæ nobilium agmine*  
*Præsentis, Helffenstenio atque*  
*Salmiade comite interemptis.*  
*Talem Leonem, Marmaricum genus,*  
*Desauientem in bruta animantia,*  
*Prædaque fortes & rapina*  
*Comperiunt inbiantem alumni.*  
*Sic vindicasti victor, & ultus es*  
*Iniurias ense domestico*  
*Turmas, colonorum Penates*  
*Prædiæque & segetem involantes,*  
*Cum luctuosâ Mulciberis face*  
*Cremante pagos. Arx vetus haud rei est*  
*Oblita, quæ captos recepit,*  
*Sed Cereris sine fruge pista*  
*Mensam exhiberi suavit, ut hoc modo*  
*Damni admonendos falleret. Huius &*  
*Tu stragis Haidelberga testis*  
*Es locuples, sabulæque campi,*  
*Campi patentis, quâ via Sæccanum*  
*Versus pedes fert, ac tumulos recens*  
*Ethinga monstrat. En meantis*  
*Non adeo procul inde Rheni*  
*Fluenta cerni turgida sustinent,*  
*Nicrique lymphæ. Marmor ibi editum*  
*Factum esse conflictum recenset,*  
*Atque tuas FRIDERICE laudes*  
*Transcribit ævo nobile postero.*  
*Quid perpetraris præterea, loci*  
*Est alterius. Iamque multis*  
*Publicat e veterum tabellis*  
*Testationum pondera plurimum*  
*Docti FREHERUS verticis, integer*  
*Veri patronus. Quæ tuo de*  
*Sanguine vivit adhuc superstes,*  
*Gens eminentis robora dextera*  
*Haud abnegabit, seque Leosthenis*  
*Gaudebit adiuncto vocari*  
*Nomine perpetuos in annos.*



FRIDERICI PALATINI ELECTORIS,  
EIUS NOMINIS PRIMI, RES  
GESTÆ.

JOHANNES TRITHEMIO ABBATE,  
SCRIPTORE.

**V**T GENEALOGIA Comitum Palatinorum scire cupientibus fiat manifesta : placuit nobis sermonem à Rege Ruperto altius repetere. Igitur Rupertus Germanorum Rex, Palatinus Comes, Bauariæque Dux, vxorem habuit, nomine Margaretham, Burgrauii Nurnbergenfis filiam, de qua genuit filios sex, & tres filias : quorum ista sunt nomina, Rupertus Pipan, Fridericus Amberg, Ludouicus Barbatu princeps Elector, Joannes Neuenberg, Stephanus in Zweibrücken, Latine Gemini pontis, & Ottonem in Mospach. Filiarum vero nomina ista fuerunt; Agnes, Margaretha, & Elisabeth, numero tres.

Rupertus Pipan primogenitus Ruperti regis Germanorum, qui (vt supra diximus) Anno dominicæ natiuitatis nonagesimo quarto supra trecentessimum atque millesimum contra infideles pugnauerat Turcas non satis feliciter, vnà cum Joanne Burgundiorum Duce, & multis aliis Principibus vix euadens, in magna paupertate cum paucis venit in patriam, & non multo post vxore carens, sine liberis moritur, cuius cadauer in Amberg oppido sepelitur.

Fridericus Amberg secundogenitus Ruperti regis, ante patrem juvenis etiam sine liberis moritur, & similiter in Ecclesia prædicta Ambergenfi tumulatur, & sic principatus Electorius ad tertio genitum iure deuoluitur.

Ludouicus Barbatu tertio genitus Ruperti regis Germanorum, Comes Palatinus Rheni, Bauariæque Dux, & princeps Elector, duas habuit vxores : quarum prima fuit Regis Anglorum filia, nomine Blanca, de qua filium genuit nomine Rupertum, cognomento Engelland, qui ante patrem sine liberis moritur. Nec diu post mortua est & mater eius Blanca Henrici Regis memorati filia. Qua mortua Ludouicus alteram duxit vxorem Mechtildem ducis Sabaudia filiam, de qua genuit tres filios, Ludouicum pium, patrem Philippi, genitoris in principatu successorem; Fridericum Philippi (vt dicemus postea) tutorem; & Rupertum Archiepiscopum Coloniensem.

Joannes quarto genitus Ruperti regis, Comes Palatinus Rheni, & dux Bauariæ, duas habuit vxores. Prima fuit Catharina filia ducis Pomeranorum ac Stetinensium, quæ peperit ei sex filios: Christophorum Regem Dania, Suedia, & Norwegia, Ottonem quoque, Joannem, Joannem alterum, Fridericum, & Adolphum. Sed hi quinque vltimi omnes in pueritia sine liberis obierunt. Altera fuit vxor eius, filia Ernesti ducis Bauariæ in Monacho, de qua liberos non habuit. Dux iste Johannes pro vnitatis fidei Catholicæ multa patrauit contra schismaticos in Boemia, & plures insidias ab eis simul & damna perpeffus est: moriens tandem in senectute bona, sepultus est in Nuenberg Bauariæ cum patribus suis.

Stephanus quintogenitus Ruperti Germanorum Regis, Comes Palatinus Rheni, & dux Bauariæ, vxorem habuit Sophiam, vltimi comitis in Veldentz & Zweinbruck filiam : cum qua & duos comitatus prædictos Veldentia & Gemini pontis obtinuit, & filios ex ea quinque suscepit, quorum ista sunt nomina. Fridericus primogenitus, qui dictus est Cynonotus, id est Huntzrucker, propterea quod partem Comitatum in Spanheim & in Starkenberg consecutus, morabatur in Simern oppido, in paganis qui *Huntzrucker* dicuntur, situato. Hic duxit vxorem ducis Gelria filiam, nomine Margaretham quæ peperit ei tres filios, & duas filias apud Treuerim moniales. Primus fuit Joannes patris successor in principatu : qui genuit Joannem hodie \* in Symen principantem, ex \* *An. 1514.*  
filia



filia Comitis de Salm. & vxor eius filia Christophori Marchionis Badensis. Rupertus secundo genitus Friderici, Episcopus Ratisponensis. Fridericus autem tertio genitus, hodiè adhuc viuens, Canonicus est Treuirensis, Moguntinensis, Colonienſis, & Argentinenſis, vir moribus & vita honeſtiſſimæ conuerſationis. Secundo genitus ducis Stephani Ludouicus fuit, cognomento Niger, qui ducatum Veldentiaſimul obtinuit & Gemini-pontis: vxorem habuit Gallicanam, quæ peperit ei duos filios, & vnam filiam, noſtri ordinis iuxta Popardiam monialem. Primogenitus Ludouici nomine Caſpar ducta vxore cum eſſet impotens & inutilis ad generandum, teſticulos ſibi patre neſciente fecit præſcindi. Vnde commota vxor ab eo diſceſſit ad genitorem ſuum reuerſa: & dux Caſpar pro faſtuo habitus, dolo fratris cuſtodiaſmancipatus eſt uſque in præſens. Secundo genitus nomine Alexander, fratri captiuo ſuccedens in ducatu, hodie claudus ex morbo puſtularum & valetudinarius, terram gubernat ſuam. Genuit autem Ludouicus dux Niger & alios filios, miniſterio dicatos Eccleſiaſtico: quorum mihi ignota ſunt nomina. De præſcriptis ſuo tempore latius dicemus.

Otto ſextogenitus Ruperti Regis, cognomento Moſpach, propterea quod ipſum oppidum Moſpach cum aliis ad illud pertinentibus à patre acceperat in hæreditatem, & morabatur in eo: habuit vxorem filiam ducis BauariaſinLandshuta commorantis, de qua genuit Otthonem Moſpach, qui noſtris temporibus ſine vxore permanens, etiam ſine liberis eſt mortuus: & ſic Moſpach cum omnibus pertinentiis ſuis ad manus Philippi Comitis Palatini iterum reuoluitur. Rupertum quoque Episcopum Ratisponenſem, Johannem Canonicum, & Albertum Episcopum Argentinenſem. Et in iſtis genealogia ducis Otthonis memorati defecit.

## M CCCC XXXVII.

Anno præſcripto vltima die menſis Decembris obiit Ludouicus Barbatus, Comes Palatinus Rheni, Bauariaſique: Dux, & princeps Elector, filius quondam Ruperti Regis Germanorum: Ludouicum Pium ex Mechtilde filia Ducis SabaudiaſiAmedei, Papæ poſtea Felicis, legitima filium relinquens hæredem. Cuius frater, ſecundo genitus Ludouici Barbati, Fridericus non duxit vxorem, ne principatus iteraretur diuiſio: genuit tamen ex nobili quadam foemina filium, nomine Ludouicum, qui hodiè Comes eſt in Lebenſtein, cuius matrem (vt ferunt) priuſquam moreretur, in facie Eccleſiaſi duxit vxorem. Rupertus autem tertio-genitus Ludouici Barbati Archiepiſcopus fuit Colonienſis poſt Theodoricum, & antè Hermannum, de quo ſuo tempore latius dicemus. Filias etiam reliquit tres, quarum vna Gandaui fuit monialis cum ſancta Coleta: ſecunda ſimiliter fuit monacha in Colonia: tertia primò nupſit Comiti de Wirtemberg, & poſtea Duci AuſtriaſiAlberto, fratri Friderici Imperatoris tertii.

## M CCCC XXXVIII.

Anno iſto, duodecima die Menſis Maji obiit Heydelbergæ Mechtildis, vxor quondam Ludouici Barbati Comitis Palatini, Bauariaſique ducis, de quo plura in ſuperioribus per ordinem diximus, mater pauperum pientiffima.

## M CCCC XLV.

Anno prænotato Ludouicus Comes Palatinus Rheni, Bauariaſique Dux, & princeps Imperii ſacri Elector, filius quondam Barbati, & nepos Ruperti Regis Germaniaſi, qui morabatur in Heydelberg, vxorem duxit Margaretham filiam Amedei quondam ducis Sabaudiaſi, tunc verò Papæ Felicis quarti, & ſororem Ludouici, quæ ducatum paternum tunc Sabaudiaſi ſtrenuè gubernabat: de qua genuit filium vnicum Philippum, qui ei in principatu Palatino ſucceſſor fuit.

## M CCCC XLVIII.

Anno prænotato quarta decima die menſis Iulii hora tertia poſt meridiem,  
in



in oppido Heidelberg nascitur Philippus Rheni comes Palatinus, Bauariæque Dux, patre Ludouico Pio, matre verò Margaretha filia Amedei primi ducis Sabaudia, vixit annos quinquaginta nouem, mensibus quatuor, diebus tredecim: de quo per ordinem temporum consequenter dicemus reliqua.

## M CCCC XLIX.

Hoc anno decima tertia die mensis Augusti, moritur Ludouicus Comes Palatinus Rheni, Bauariæque Dux, & Princeps Elector, Heidelbergæ in choro Spiritus Sancti Ecclesiæ sepultus cum honore. Filium reliquit vnicum, vndecim menses habentem ætatis, nomine Philippum, quem genuit ex Margaretha Amedei ducis supradicti, Felicis Papæ filia, & relicta quondam Ludouici regis Sicilia, quæ tertio postea nupsit Vdalrico Wirtenbergenfi comiti. Moriturus autem Ludouicus ipse princeps Christianissimus, filium suum memoratum vnigenitum Philippum, vxorem quoque Margaretham, & omnem principatum suum, Friderico fratri suo commendauit, qui non habuit vxorem, sub tali videlicet conditione, vt ipse tutoris ageret officium, quousque Philippus octauum decimum compleuerit annum, quo (miserante Deo,) completo tutoris officium exspiraret, & Philippus paternum liberè haberet dominium. Sed fratre mortuo, Fridericus superuixit annis viginti sex, & nomen tutoris non deposuit, nec principatum (vt promiserat) Philippo resignauit. Sed quam diu vixit officium tutoris tenuit, & prudenter omnia gubernauit.

Fridericus tu-  
tor Philippi.

## M CCCC LII.

Hoc anno, Indictione Romanorum quinta decima, Fridericus Comes Palatinus Rheni, tutor & patruus Philippi, contractis copiis bellatorum, contra Comites de Lützelstein processit ad prælium. Cuius aduentu perterriti Comites in castello suo se continuerunt, non audentes cum tanta multitudine dimicare. Unde Fridericus firmata obsidione, Lützelstein per septem dies & duos menses fortiter impugnans, tandem in profesto S. Martini castellum cum oppido violenter obtinuit, & omnem Comitatum suo dominio subiugauit. Comes autem ex Lützelstein prius occultè fugerat, nec Palatino congregari audebat.

Causam belli quantum possumus, breuiter dicemus. Ludouico Pio Comite Palatino Rheni patre Philippi viam uniuersæ carnis ingresso, Fridericus frater, qui erat sine uxore, consensu procerum curiæ Palatinatus, auctoritate quoque & confirmatione sedis Apostolicæ, tutor infantis Philippi constitutus est: & cum titulo Electorii principatus Imperii Romani *Palatinum & Principem Electorem* se & scripsit & gessit in omnibus, non tutorem se nominans, ut erat, sed dominum. Displicuit ista prærogatiua, ne dicam potestas, vicinis Principibus, & inprimis Theodorico Archiepiscopo Moguntino, Stephano quoque duci Geminipontis, & filiis eius Friderico & Ludouico, Carolo Marchioni de Baden & Comitibus quibusdam, præcipuè illis de Lützelstein, qui singulari odio Fridericum Comitem Palatinum insequabantur. Unde contractis, ut poterant, latrunculis frequentes hostilesque incursiones fecerunt in terram eius; & multas pauperibus clades igne, ferro, & rapina intulerunt. Adhæserunt autem prædictis Comitibus de Lützelstein occultè Principes memorati: quorum seducti pollicitationibus, quicquid potuerunt mali semper in Palatinum præsumpserunt. Post multas tandem iniurias Comitum, quas terræ pauperibus intulerunt, euigilans Palatinus, qui alioquin princeps erat mitissimus, diutius tantam illorum insolentiam dissimulare non potuit: sed contracto milite Lützelstein obsedit, cepit, & Comites de terra eorum fugauit, usque in præsentem diem.

## ADDITIO. Inde versus hi facti.

*Ecce Palatine Comes ô preciose, potenter  
Lützelstein pridie Martini præsulis intras.*



*Sedula laus Christo, qui vim dedit hanc Friderico  
Excelfo Comiti, Bauariaeque Duci.*

## M CCCC LV.

Anno praesignato, Ludouicus cognomento Niger Comes Palatinus Rheni, Bauariaeque Dux, Comes in Spanheim, Veldentiae, & in Zweienbrücken, filius Stephani Ducis, & frater Friderici apud Symern commorantis inter Cynonotos, homo inquietus, molestè ferens, quod Fridericus tutor Ppilippi se Principem scriberet Electorem, praedas contra eum & incendia pauperum exercere coepit. Quem Fridericus secundo & tertio per literas & nuncios charitatiuè praemonuit atque rogauit, ut à malè coeptis, desideriis, & incursionibus suis desisteret, ac pauperes Palatini principatus de cætero non turbaret. Ludouicus autem nihili pendens monentem, in suo proposito perseverabat, & suo more ut coeperat incursiones, deprædationes, & incendia pauperum terræ Palatini continuauit. Undè commotus dux Fridericus, magnum suorum adunauit exercitum, & oppidum Bergzabern, in quo Dux Ludouicus praesidia locauerat sua, obsedit: & diebus viginti quatuor fortiter impugnans, tandem infesto S. Tiburtii Martyris expugnauit & cepit. Postea inter eos concordia sub tali conditione facta est, quod Fridericus oppidum Ludouico deberet restituere, & Ludouicus deinceps nihil mali contra Fridericum & Palatinatum attentare. Sed non mansit in fide.

## ADDITIO. Inde versus hi scripti.

*Inchyte, magnifice \* Princeps ac generose.  
Digne Palatini Rheni Comes à Friderice,  
Electo per digne sacri simul Imperii, Dux  
Bauariae præcelse, nitens præclarus in orbe.  
Magnificis gestis terram terroribus imple.  
Anglia, Francia iam timet & Burgundia, partes  
Circum vicina, tanta feritate Leonis  
Insultare tremunt, longè lateque per orbem  
Terrarum domini tacti terrore silescunt.  
Plantis dum calcas nudatis sancte Tiburti  
Horrendas prunas, Berchzabern viribus intras  
Ecce Palatine Comes inuictissime portas.*

*Kleeberg.* Erat eodem tempore Richardus de Homburg, vir bellicosus & inquietus: qui & ipse partes Friderici Palatini Comitis memorati variis incursionibus fatigabat. Contra cuius insolentias Dux ipse Fridericus contracto milite castellum eius Kleeberg nuncupatum, haud procul à Wissenburgo situatum, obsidione cinxit, & breui in suam potestatem accepit. Erat enim Princeps timens Deum, & amans iustitiam: propterea in cunctis prosperè agebat.

ADDITIO. *Antequam ad ulteriora pergamus, inferendam hic censuimus historiam Ambergæ à Friderico in ordinem coactæ, à Trithemio omissam, ex Chronico Bauarico Andreae Presbyteri Ratisponensis, quod ita habet.*

Philippi pueri curam assumsit, & affectu paterno omni decentia usque ad annos pubertatis educavit. Heidelberg cum suis attinentiis in possessionem coepit. Ciuitates autem Bauariae, quarum principalior fuit Amberg, Philippo homagium fecerant, procurante patre eius, dum adhuc in humanis ageret. Requisiti igitur à Friderico sibi eadem præstare, denegarunt ea de causa, ne periurii incurrant reatum. Et ne temeritate quadam hoc facere viderentur, volebant se offerre declarationi Episcopi Ratisponensis (tunc enim praesulabatur Fridericus de Planckenfels) tanquam eorum curati, vel uniuerstitatis Wiennensis, tanquam in hac parte neutralis: quæ idem Palatinus Rheni acceptare renuit. Interim dum hæc



hæc agerentur, misit eis consiliarios suos : inter quos Doctor iuris quidam certis argumentis nitebatur asserere, Eos nequaquam labe huiusmodi affici ; sed hoc faciendum omninò expedire, illas etiam conseruatuos conscientias. Sed huiusmodi persuasionibus postergatis, dicti consilarii quinque exierunt ciuitatem, sollicitantes apud alias. Quæ responderunt, quidquid Ambergenses tanquam principales facerent, idem & ipsi facere non abnuerent. Et dum iterum atque iterum hæc geruntur, diuisus est populus in diuersa : atque orto tumultu omnes consiliarios eosdem ceperunt, tanquam ciuitatis proditores in vincula coniicientes : & nisi quidam de consulatu interuenissent, omnes exitio finali addicti fuissent. Deinde anno Domini MCCCCIV. tempore Carnispruii, Palatinus personaliter ingressus est ciuitatem cum notabili multitudine. Cui obuiam venerunt clerus cum reliquiis, Laici similiter abiectis armis. Rei verò seditionis per muros & alias, prout poterant, euaserunt. Quidam tamen capti : quorum decem producti in publicum, ex his quinque precibus erepti, & quinque capitibus plexi. Deinde iuramento fidelitatis ab eis sumto, rediit Heidelbergam. Post hæc renouauit castrum, ac fossato firmavit, & portam egrediendi & ingrediendi ciuitatem per castrum fecit, quæ antea non fuit : de qua vehementer ciues dolabant, ex eo quia rarò ibi habitat Princeps, aliquando etiam Locum tenens abest, & ciuitas absque custodia sufficienti relinqui potest. Ipse tamen Palatinus postea magno semper fauore & gratia Ambergenses est prosecutus usque in diem mortis suæ. Quæ fugientibus tempore sui ingressus abstulit, postea cuncta reddidit. *Hæc ille.*

## M CCCC LVI.

Fridericus Dux XV. die Octobris ex Heidelberg oppido cum exercitu pugnatorum digrediens, auxilio Theodorici Archiepiscopi Moguntini, castellum Montfort latibulum latronum & commune receptaculum prædonum obsedit, quinque diebus fortiter impugnans, tandem sexto die cepit, ac funditus destruxit : nec postea reædificari potuit usque in præsentem diem, sine consensu Archiepiscopi Moguntinensis & Comitis Palatini pro tempore existentium. Moguntina etenim Ecclesia plura sustinuit damna retroactis temporibus ab illis, qui mansionem in Montfort habuerunt : quia Spanheimensi Comitatus fuit contiguus locus, similiter & dictæ diocesis.

*Montfort.*

## ADDITIO. Huc versus.

*Ecce Palatini Comitis sapientia præstans  
Pacis iter populo, Montfort sibi subiungat intrans,  
Octobris decima nona, tempus cape supra.*

## M CCCC LVIII.

Udalricus Comes de Wirtenberg, auxilio Marchionis Brandenburgensis Alberti, contra Fridericum Palatinum hostiles gerens animos, castellum Widern obsidione vallauit, cepit, ac funditus destruxit. Quo facto Albertus Marchio cum suis ad propria reuersus est. Comes autem Udalricus per agrum Heilprunnensium iter faciens, ab altera parte Neccari fluminis, Fridericum suprascriptum Comitem Palatinum defensorem oppidi memorati Heilprunnensis sex mille pedum & mille octingentos equites habentem offendit. Quo recognito, Comes plana via cum suis, qui iam fatigati erant ex feruore solis & numero pauciores, sicut coeperat graditur, & ad conspectum hostium consultò non peruenit.

*Widern.*

Eodem anno Ludouicus Dux Bauariæ cognomento Diues, congregato ex Bauaris, Bohemis, & Australibus magno pugnatorum exercitu, ciuitatem Eichstensem obsidione circumuallauit. Amicis autem se interponentibus tandem inter eum Episcopum concordia reformata est, & soluta obsidione discessit. Itaque post hæc eundem exercitum duxit contra Albertum Marchionem Brandenburgensem.



Landeck,  
Stauff.

burgensium : cuius duo castella Landeck & Stauff obsedit, cepit, & funditus subuertit. Contra quem Albertus iste Marchio processit ad bellandum, habens secum Wilhelmum Ducem Saxoniae simul & copiosum exercitum. Sed congressi non sunt, nec quid memoria dignum fecerunt. Concordia tamen inter eos facta est sub conditione, quod Marchio Albertus Duci Ludouico literas nonnullas à Cæsare Friderico impetratas contra eum, ad manus deberet restituere; & feuda sua, ut Nurenbergensium Burggrauius, ab Ecclesia Herbipolensi (quod prius recusauerat) acceptare. His pro pace conclusis Principes concordati discesserunt.

Post hæc in diata quadam Nurenbergæ habita Marchio Albertus Ludouico Duci Bauariæ litteras & priuilegia, quæ contra eum à Friderico Cæsare impetrauerat iuxta prius concordata in prætorio Senatus restituit: quas ille mox coram omnibus publicè lacerauit. Quod cum in noticiam Cæsaris peruenisset, iratus est, & Ducem Ludouicum reum læsæ maiestatis declarauit: cuius rei occasione multiplicata sunt mala super terram.

#### M CCCC LIX.

Sexta die mensis Maii obiit Theodoricus Schenck de Erpach Archiepiscopus Moguntinus, anno Pontificatus sui vigesimoquinto, & in maiori Ecclesia cum antecessoribus suis honorificè sepelitur: præsul optimus, qui satis prouide in utroque statu rexit Ecclesiam suam, & multa fecit opera bona.

Eodem anno posteaquam vacasset sedes Moguntina tribus & quadraginta diebus, conuenerunt in vnum Canonici, & XVIII. die Junii, Dietherum ex Comitibus de Isenberg Canonicum in Archiepiscopum elegerunt, qui præfuit annis fermè tribus. Contra hunc Dietherum erexit se Adolphus ex Comitibus de Nassau Canonicus, & toto triennio pro archiepiscopatu cum eo lites continuauit: cuius ratione contentionis infinita mala fuerunt subsequuta, de quibus per ordinem suo tempore dicemus. Postremò tamen Adolphus victoriam obtinuit, & Dietherus resignare archiepiscopatum compulsus fuit.

Eodem anno secunda die Septembris obiit Sifridus Episcopus Spirensis, post quem die XVII. eiusdem mensis per Capitulum fuit electus Johannes Nix de Hoheneck dictus Entzberger, & præfuit annis quinque. Is quorundam consilio deceptus adhæsit Carolo Marchioni Badensium, Ludouico quoque Palatino Comiti ac Duci Bauariæ cognomento Nigro, & quibusdam aliis, contra Fridericum Palatinum tutorem Philippi: per quod Ecclesiam suam valde læsit & damificauit in multis, totam diœcesin rapinis exponens & incendio, non solum hostium, sed etiam (quod grauius fuit) amicorum.

Anno item præsignato Fridericus Imp. tertius mandauit ciuibus regni, vt arma fumerent in Ludouicum Ducem Bauariæ cognomento Diuitem, quem propter laceratas Nurenbergæ literas imperiales (vt paulo ante diximus) læsæ maiestatis reum declarauerat. Simile mandatum dedit Alberto Marchioni Brandenburgensi, & nonnullis aliis in vicino Comitibus. Ciues ergo regni omnes in superioribus Germaniæ partibus, præter Nurenbergenses, mandato Cæsaris obedire parati arma capiunt, & Marchioni Alberto contra Ducem Ludouicum Bauariæ auxilia imperata transmittunt. Dux igitur Ludouicus, accepto nuncio diffidationis à Marchione Alberto & ciuibus regni, magnum rursus Bauarorum & Boemorum contraxit exercitum: & ingressus terram Marchionis, oppida, castella, munitionesque illius cepit plurimas, villas incendit, prædam abduxit, & damna pauperibus multa fecit. Non diu postea cum Ludouicus Dux pro quibusdam negociis intrasset occultè Bohemiam, innotuit Marchioni absentia eius à patria. Vnde contractis copiis & auxiliis ciuium terras eius ingreditur, & pari furore omnia vastans, rapiens & incendiens, resistente nullo demolitur. Tandem per Bohemiæ Regem ad concordiam reuocati sunt, & oppida sibi restituerunt ablata.

Diethe-



## M CCCC LX.

Dietherus Archiepiscopus Moguntinus, Johannes Nix Episcopus Spirensis, Albertus Marchio Brandenburgensis, Ludouicus Dux Bauariæ Niger, Carolus Marchio de Baden, Vdalricus Comes de Wirtemberg, Emicho Comes de Lyningen, & plerique alii Comites & militaris ordinis homines, in vnum conspirantes, se Friderici Comitis Palatini Philippi tutoris hostes & inimicos publicè denuntiarunt, causas singuli singulas prætendentes. Archiepiscopus enim Dietherus propterea quod Fridericus defenderet partes Adolphi contra eum: Comes autem de Wirtemberg Vdalricus Margaretam filiam Ducis Sabaudia, relictam Comitis Ludouici Palatini, fratris memorati Friderici, & genitoris Philippi, duxerat uxorem, cuius dotem præcedentis matrimonii iuxta conditum iure postulare videbatur. Contra hanc Vdalrici Comitis postulationem Fridericus Comes Palatinus respondendo negatiuè replicabat; Quod Margareta memorata fratris quondam vxor materque Philippi, secum ex camera Palatinatus in clenodiis, jocalibus, & aliis præter corporis sui necessarium ornatum vel vsum, detulerit in valore non minus centum millium florenorum: reddat illa prius, & dotem promissam reciperet. Aliis aliæ fuerunt causæ. Maxima tamen omnium causa fuit, quia Fridericus Imp. non solum permisit, sed etiam præcepit, vt bellum contra ipsum Palatinum Comitem Fridericum moueant supradicti Principes: propterea quod videretur nimium superbus, arrogaretque sibi titulum electionis imperialis Philippo, cuius tutor erat, debitum, imperialibus præceptis rebellis & inobediens; eo quod Ludouico Duci Bauariæ consentiret.

Fridericus igitur Comes Palatinus tot inimicis circumseptus, nequaquam est mente fractus aut perturbatus animo; sed contractis suorum copiis, principatum inprimis suum per circuitum armatis muniuit, ac deinde cum reliqua parte exercitus Schauuenburg castrum Ecclesiæ Moguntinæ, in montensi strata \* situatum, obsidione vallauit: quod octaua die cepit, quæ fuit Dominica post resurrectionem Domini. Erat autem castellum illud muris, turribus, atque fossatis optimè munitum, bombardis, balistis, machinis, victualibus, & cunctis necessariis prouisum: in quo reperit equites decem & octo, pedites verò triginta quos omnes Heidelbergam misit in vincula captiuos.

Schauuenburg.  
Bergstrasse.

## ADDITIO: Inde versus hi facti.

*Excelsæ comes, Princeps potens ac generosæ,  
Dine Palatine, Schauuenberg per vim quoque intras;  
Dum canit Ecclesia sancta Quasimodogenitiquæ  
Arcem magnificam in cineres diruis igne:  
Ut reputanda quidem parui, sed quantaque fuit  
Cernitur: testatur enim magna illa ruina,  
Quam fuit immensa Schauuenberg mensura ruentis.  
Viuere te cupimus, dator custosque salutis.  
O utinam magnis resoluta corpore tantis  
Laudibus attollant Dii potentes Friderice.*

## Item &amp; alii:

*Viuere te cupimus multos Friderice per annos,  
Aurea quo principe secula nostra patent.  
Victus abest hostis, & sua \* miserrima fata,  
Omnia sunt pacis te duce, languor abest.  
Vincere fortunam magis est quàm monstra domare:  
Herculeo maius nomine nomen habes.  
Felix Germanus: dum te domus alta tenebit  
Bauaria, vis te ledere nulla potest.*



Concordia, quam diximus, inter Ludouicum Ducem Bauariæ cognomento Diuitem, & Albertum Marchionem Brandenburgensem, anno præterito per Bohemiæ Regem facta, non placuit Friderico Palatino Comiti: unde & eius consilio iterum violata est, factique sunt inimici ad inuicem acriores quam fuerunt prius. Steterunt ergo hi duo Principes, Fridericus & Ludouicus Comites Palatini & Duces Bauariæ, contra decem & octo Duces, Marchiones, & Comites, multo tempore concertantes, & multa damna sibi mutuò intulerunt. Nomina Principum eius aduersantium ista fuerunt: Fridericus imperator tertius, Albertus Marchio Brandenburgensis Princeps Elector, qui ut Burggravius Nurenbengensis morabatur in Anoltzpach, Wilhelmus Dux Saxonie Princeps Elector, Dietherus Archiepiscopus Moguntinus princeps Elector, Iohannes Archiepiscopus Treuironum Princeps Elector, Georgius Episcopus Metensis, Iohannes, Episcopus Spirensis, Ludouicus Comes Palatinus cognomento Niger, Comes Veldenfis & Gemini-Pontis, Carolus Marchio Badensis, Udalricus Comes de Wirtemberg Emicho Comes de Lyningen, & alii plures.

Ludouicus igitur Dux Bauariæ Diues adiutorio præfecti Ducis Friderici Electoris in Amberg, bellum fortiter gessit contra Marchionem Albertum, & ciuitates regni in superioribus terræ partibus circa Nurebergam: & mirantibus cunctis ubique vicit, ubique feliciter triumphauit, hostes suos pene omnes miserabili calamitate affecit.

Interea Fridericus Comes Palatinus, habens secum Ludouicum Landgrauium Hassiæ cum multis armatis mercede conductum, Rheno flumine transmissus, Pfedersheim oppidum Ecclesiæ Moguntinæ haud procul à Wormatia distans obsedit. Erant tunc in oppido ipso viri plures & fortissimi ad eius defensionem ab Archiepiscopo destinati, Iohannes videlicet Comes in Nassau, Wilhelmus Comes in Wertheim, Otto Comes in Henneberg, Philippus Comes de Lyningen, Henricus Comes in Runkel, & nobiles multi, quorum nomina ignoramus. Aderant & Ringaugienses incolæ vinitores in magno numero, ad custodiam loci & pugnam ab Archiepiscopo deputati. Comes autem Palatinus cum suis fortiter impugnauit oppidulum: quod & cepit tandem non paucis aduersariorum occisis, pluribus captis. Reperit in oppido quingentos equos sellatos, & prædam non modicam, quæ omnia fecit asportari in villam proximam Westhofen, & inter milites suos (ut fieri solet) distribui. Capti sunt supradicti Comites quinque, nobiles quoque & ignobiles numero sexcenti tredecim, qui se pecunia redimere coacti fuerunt: pauci fuga lapsi euaserunt.

His peractis cum Fridericus Comes Palatinus contra Dietherum Archiepiscopum ulterius disponderet procedere: Wilhelmus Hassiæ Landgravius & quidam alii de concordia coeperunt inter eos habere tractatum, Igitur pax inter eos reformata est his conditionibus saluis: *Comes Palatinus pro impensis, quas fecit ad triginta millia florenorum, habebit in pignus castella Schauenburg, Dossenheim, Hentschusheim, cum villis & omnibus prouentibus eorum: quorum tamen omnium reemptio pro dicta summa pecuniarum, in arbitrio stabit uniuscuiusque Archiepiscopi Moguntini pro tempore existentis. Ringaugienses etiam vinicola nouem millia florenorum dabunt ipsi Comiti Palatino, pro quibusdam rebus & prouentibus seu iurisdictionibus, quas apud villam Lorch iure seu gladio adquisierat.* Ab hac autem concordia seclusi fuerunt Ludouicus Dux niger, Comites de Lyningen, Marchiones ambo, & cæteri omnes qui consenserunt, superius nominati.

Comes autem Palatinus contra Ducem Ludouicum Nigrum duplicem irascendi causam mente gerebat: quarum una erat, quod primam concordiam apud Zabernam prius factam & iuratam non seruauit: alia verò quod specialiter coniurauerat cum Diethero Archiepiscopo Moguntino, & Comitibus de Lyningen contra ipsum, quod antea promiserat se nunquam esse facturum. Insuper contractis copiis regale oppidum Ingelnheim occupauerunt, incenderunt, muros deiecerunt, ac funditus destruxerunt. Oppidanis autem in aulam Caroli Magni

Cæsaris



Cæsaris (quæ & castrum est amplum, & Canonorum regulæ S. Augustini coenobium) fugientibus, & mox ab hostibus fuerunt obsessi. Interea Palatinus cum magno exercitu nunciatur venturus quod illi audientes, obsidione soluta recesserunt.

Post quorum recessum Palatinus cum exercitu suo venit prope Moguntiam, & pauculas ædes Canonorum apud S. Victorem, S. Albanum, & S. Crucem in Campis, primo impetu subuertit: quod factum reliquos terruit, & ut se pecunia præseruarent ab incendio imminente, concitauit. Datis enim Palatino Comiti quatuor millibus florenorum, Clerus Moguntinus domos, ædes, curtes, frumenta & bona sua, ne perirent incendio, prouidè liberauit.

Post hæc Pfedersheim, quod pertinebat Archiepiscopo (sicut diximus) obsedit & cepit. Concordia autem cum Archiepiscopo Moguntino facta, Palatinus Comes exercitum duxit contra Ludouicum Ducem Nigrum, & cum in oppido suo Meisenheim, quod milliariis a Spanheim vix distat duobus, fortiter obsedit. Cernens verò Ludouicus quod multitudini hostium non posset resistere, maximè cum Archiepiscopus iam defecisset ab eo, pacem petiit & impetrauit. Fit iterum concordia, & his conditionibus firmatur: *Dux Ludouicus mediam partem quingentorum florenorum, quos annuè cedentes habet in telonio Bacharacensi, Palatino iam remittet, ac deinceps perpetuò non repetet, vel ipse vel hæres in æternum: aliam verò medietatem à Palatinis Comitibus in feudum, cui nunquam renuntiare possit, suscipere sit iure perpetuo astrictus. Castrum quoque Scharffenberg sine contradictione in manus Palatino resignabit.* Ab ea concordia Comites de Lyningen fuerunt seclusi, unà cum cæteris inimicis Palatinatus supra nominatis.

His peractis Comes Palatinus animo feruens in Comites de Lyningen duxit exercitum: & inprimis castrum Hasloch obsedit, cepit, incendit, funditusque destruxit. Plures ibi subditorum suorum inuenit captiuos, quibus liberatis non modicam deportari prædam præcepit. Inde mouens Mynfelt castellum eorundem Comitum obsedit, cepit, spoliavit, & igne submissò terræ coæquauit. Hæc & plura his similia gessit Fridericus Comes Palatinus anno prænotato: quorum reliqua in annos continuantur sequentes.

## M CCCC LXI.

Hoc anno Dietherus de Isenberg Archiepiscopus Moguntinus anno pontificatus sui tertio per sententiam Pii Papæ secundi ab archiepiscopatu deponitur, & Adolfus de Nassauë iubente Papa in Archiepiscopum sublimatur, & præfuit annis quatuordecim. Post cuius obitum Dietherus iterum Archiepiscopus factus præfuit annis septem. Interea verò quod Adolfus præfuit Ecclesiæ Moguntinæ, Dietherus pro sustentatione sui possedit oppida & castella in Hœst & Steinheim, cum omnibus prouentibus eorum: quæ sunt duo meliora Ecclesiæ Moguntinæ commoda siue clenodia. Causæ autem depositionis Dietheri subiectæ ferebantur. Prima, quod mandatis Romani Pontificis inobediens & rebellis extitit: annatamque sedi Apostolicæ non persoluit, vigintiquatuor millium florenorum, quos Romano Pontifici dare quilibet Ecclesiæ Moguntinæ nouellus Archiepiscopus confirmandus introducta consuetudine cogitur. Secunda, quod infra constitutum sibi tempus in confirmatione à sede Apostolica neque sacerdotium assumpsit, neque se ordinari Archiepiscopum fecit. Tertia, quod nuncios & legatos sedis Apostolicæ cum reuerentia non suscepit, honorem eis debitum non impendit: sed eorum litteris, mandatis, commissionibus & factis contrarius, rebellis & inobediens fuit. Quarta, quod Friderico Palatino Comiti adhæsit, quem Apostolica sedes illo tempore ad informationem & instantiam quorundam Principum regni Germanici, ut rebellem & inobedientem Ecclesiæ Catholicæ condemnarat.



Starckenburg :  
Heppenheim.  
Bensheim.  
Morlebach.

Bergstrasse.

Beckelheim.  
Sobernheim.  
Montzingen.  
Nusbaum.  
Ulmen.

Algesheim.  
Gaubeckelheim.

Aichsfeld.

Ringgau.

Ex hac depositione Dietheri Ecclesia Moguntina damna incurrit multa. Dietherus etenim vociferans & clamitans iniuriam sibi factam a Papa, Friderici Palatini Comitis supradicti auxilium contra Adolpum inuocauit. Cuius adiutorio Dietherus nouem oppida Ecclesiae Moguntinae in sua obedientia retinuit: cetera verò ad Adolpum eius aduersarium subito defecerunt. Verum quia Dietherus pecunia recompensare Palatini labores & impensas in his motibus factas minime potuit, alienare bona Ecclesiae compulsus fuit. Igitur subscripta Ecclesiae Moguntinae castella & oppida, Starckenberg, Heppenheim, Bensheim, Morlebach, omnemque stratum montensem cum vniuersis prouentibus suis ei pro centum florenorum millibus in possessionem tradidit: quorum tamen omnium, pro eadem summa pecuniarum, ius reemptionis Moguntinae Ecclesiae reseruauit. Terra est non modica Stratae Montensis inter Heidelberg & Diepurg oppida constituta, habens oppida, castra, & villas non paruae utilitatis: quam Sifridus quondam Archiepiscopus Moguntinus de monasterio Laurissensi, tunc nostri ordinis, quomodo vsurpauerit & Ecclesiae suae incorporauerit, anno Dominicae Natiuitatis M CC XXXII. alibi exposuimus. Manet autem sub ditione Comitis Palatini terra memorata vsque in praesentem diem.

Adolfus autem contra potentiam Comitis Palatini Diethero assistentis, auxilium Ludouici Ducis Nigri, qui morabatur in Meysenheim oppidulo, inuocauit: assignans pro stipendio quidquid habuit Ecclesia Moguntina in comitatu & districtu Spanheimensi, Bickelnheim videlicet castrum & villam, Sobernheim oppidum, Montzega oppidum, Nofsbaum villam, Ulmenam oppidum, & villas plures alias in circuitu, cum omnibus prouentibus & utilitatibus earum, sub certa pecuniarum summa reemptione salua. Quae omnia Fridericus Comes Palatinus saepe dictus iure belli non diu postea (sicut dicemus) suo imperio subiecit. Carolo autem Marchioni Badensi Adolfus Archiepiscopus pro stipendio contulit in pignus quasdam villas, videlicet Algesheim, Gaubeckelheim & nonnullas alias in circuitu, cum omnibus utilitatibus & prouentibus earundem. Vdalricum Comitem de Wirtenberg in auxilium contra Dietherum Adolfus inuocauit, & conduxit stipendio viginti millium florenorum in prompta pecunia. Erat autem Comes Vdalricus homo bellicosus & audax, simul & potens valde. Wilhelmum quoque Saxoniae Ducem, & Henricum Comitem de Schwartzenberg Thuringum, sibi Adolphus contra Dietherum & Fridericum Comitem Palatinum fecit stipendiarios, assignans eis pro mercede quaedam in Eisfeldt dominia Comitem verò de regio lapide, vulgariter Königstein, sororis suae maritum auxiliatorem habuit, cui pro stipendio comitatum de Hoffheim assignauit. Cernis in quantam miseriam nobilis illa Moguntina deuenerit Ecclesia, in cuius desolationem duo Pontifices acriter contendentes omnia penè destruxerunt. Adhaeserunt Adolfo contra Dietherum, & alii Principes & Comites multi. Joannes videlicet Archiepiscopus Treuironum: Georgius frater eius, Episcopus Metensis: Joannes Episcopus Spirensis, Albertus Marchio Brandenburgensis. Cum Diethero sensit Fridericus Comes Palatinus, Henricus Landgravius Hassiae, Philippus Comes de Catzenelnbogen, Philippus & Johannes Comites de Isenberg fratres eius. Ciues quoque Moguntini cum Diethero contra Adolphum senserunt.

Inprimis igitur postquam Romanus Pontifex Pius secundus audiuit, quod Dietherus non curaret eius sententiam, sed Archiepiscopum se gereret contra Adolpum; in eum fulminauit excommunicationis sententiam, & in omnes qui partes eius sequebantur. Fridericum quoque Palatinum Comitem, propterea quod partes Dietheri defenderet, cum omnibus sibi adhaerentibus excommunicauit & interdixit: & multiplicata sunt mala in terra his Principibus subiecta.

Dietherus autem in arce Moguntina consistens, auxilio Palatini & aliorum sibi consentientium, milite contracto plurimo descendit in Ringaugiam, & incolas eius, homines quidem satis audaces (non dico temerarios) aut promissionibus aut armis in suas partes compellere nitebatur. Audientes autem Ringau-



gii Comitis Palatini cum Diethero contra se aduentum, confestim ad præsidia sua confluunt: & se venientibus non armis sed latibulis opponunt. Verum propter nimiam aëris inclementiam exercitus Palatini diu manere non potuit: alioqui Ringaugii necessariò in sententiam Dietheri peruenissent. Soluta igitur obsidione quantocius Principes ad se redierunt.

Posthæc rumor venit ad aures Dietheri sub nomine certæ promissionis, quod si descenderet ad Ringaugios, in eius ditionem transirent. Credidit homo hominibus: collectoque rursus exercitu in Ringaugiam cum potentia descendit: & rumorem promissionis falsum & mentitum inuenit. Vnde confusus iratus & deceptus ad Moguntiam cum suis reuersus est.

Comes autem Palatinus, posteaquam semel in hostes sæuire cœpit, non potuit quiescere: sed tanquam vnicus molossus, quem plures catelli circumstant latrantes, nunc in istum, nunc verò in illum copiarum suarum impetum vibrauit & morsus: & primo quidem his (quæ diximus) per eum transactis, expeditionem mouit contra Vdalricum Comitem de Wirtenberg, & eius terram incendio, & ferro, multiplici incursione hostiliter deuastauit. Comes autem contracto exercitu decem millium pugnatorum, quarto Calend. Iulii contra Heilbron-  
*Heilbron.* nam regni oppidum, quod erat sub defensione memorati Comitis Palatini, mouit exercitum. Quod vbi ciues intellexerunt loci, missa legatione ad Comitem ea quæ fuerunt paucis rogabant, & impetrauerunt.

Interea Fridericus Comes Palatinus, cum vna exercitus parte, contra Ludouicum Ducem cognomento Nigrum processit vt hostis, quippe sæpè deceptus: & oppidum Gawbickelnheim inprimis obsedit, cepit, murosque & turre in circuitu eius solotenus destruxit: in quo centum sexaginta pedites captiuauit. Durauit ista Principum & Episcoporum supra scriptorum contentio per integrum annum, & non sine multorum damno, periculo & sanguine, continuatur in sequentem.

## M CCCC LXII.

Anno prænotato, posteaquam inter Fridericum Comitem Palatinum defensorem Dietheri de Isenberg, & Adolsum de Nassaw cum adhærentibus ei, longa concertatio durasset, etiam fessis aliquantulum partibus, amicorum consilio per oratores Principum de pace fuit tractatum. Igitur conuenientibus in vnum, quibus consultandi legatio pro pace fuerat commissæ, sub certis clausulis atque capitulis negotium concordie in medium fuit propositum. Placuit ergò in communi omnibus, pro eo quod non haberent concludendi potestatem, vt singuli suis Principibus super conditionibus pacis, atque capitulis facerent relationem, & quicquid illis in commune placeret, in proximo conuentu eorundem confirmarentur. His actis discessum est.

Adolfus autem impatiens morarum, conuentum pro concordia facienda exspectare contempsit: sed in exterminium Palatini socium exercitum concitauit. Rumor quippe falsus exierat, cuius fuit credulitate deceptus: quia Palatinus, qui dicebatur esse in Bauaria, manserat occultè in patria. Igitur Carolus Marchio Badensis, Georgius Episcopus Metensis frater eius, & Vdalricus Comes in Wirtenberg, contracto milite adunauerunt exercitum, sexcentorum videlicet equitum, & sex millium peditum, & terram Palatini Comitis, quem longè extra patriam credebant absentem, deuastare coeperunt. Et inprimis quidem Hei-  
*Heidelberg.* delsheim oppidum obsidione cinxerunt, quod cum Comes Palatinus intellexisset, viros probè armatos quotquot videbantur necessarij, secum assumens occultè nocturno tempore intrauit oppidum: & paucissimis cognitus, custodias & defensores per muros & turre suffientes collocauit. Videntes autem postridiè obseffores, quod expugnare oppidum non possent, soluta obsidione inde recesserunt, expeditionem vltèrius mouentes.



Deinde haud procul ab Heidelberg. oppido residentiae Comitis Palatini, castra posuerunt : quibus locatis auxiliarii missi ab Adolfo quadringenti superuerunt equites peditumque tria millia , paucisque diebus quieuerunt.

Ultima vero die mensis Iulii anno prænoto mane in aurora prænominati tres principes, Georgius Metensis Episcopus, Carolus Marchio Badensis & Vdalricus Comes de Wirtenberg, cum aliis multis comitibus atque nobilibus, peditatu in castris relicto, cum solo equitatu mille circiter virorum in agrum Heidelbergensem iter defleunt : & pededentim equitantes igne cuncta villagia, & curtes religiosorum deuastare simul & incendere coeperunt. Fridericus autem Comes Palatinus per exploratores de hostium intentione manè certificatus, cum septingentis equitibus & peditatu multo, cum adhuc tenebrae essent, Heidelbergam exiit : & in proximo nemore, ubi hostes transitori fuerant, se abscondit. Superuenit à casu Dietherus de Isenberg, cum trecentis equitibus : & se Palatini copiis latenter coniunxit.

Postquam ergo tres memorati Principes cum equitatu pertransissent, in nemore haud procul à Seckenheim villa Palatinum cum suis latitare nescientes, & iam peruenissent inter angustias Rheni & Neccari, ubi nullus erat locus fugae, nisi retrorsum; surgunt de insidiis qui latuerant Palatineses, & impetum facientes à tergo, praecedentes invadunt, percutiunt, vulnerant & occidunt. Quo fugerent iam miseri ab hostibus & aquis praclusi? Videntes ergo Principes saepe dicti, quod nullus esset euadendi locus, nisi ferro tantum relictus, tumultuario impetu conuersi, contra venientes dimicare coeperunt, contra quatuor millia mille & contra multos pauci.

Ceciderunt in eo praelio multi ex parte trium Principum, inter quos fuere duo nobilissimi Comites, alter de Helffenstein, alter vero de Salm : capti autem fuerunt, Georgius Episcopus Metensis, Carolus frater eius Marchio Badensis & Vdalricus de Wirtenberg, & alii Comites, nobiles & ignobiles ferme quingenti. Reliqui non occisi gladio, per fugam saluati sunt. Captiui omnes in oppidum Heidelberg cum magno triumpho deducti fuerunt : & vinculis mancipati sese tandem multa pecunia redemerunt. Acta haec sunt in campo latissimo non procul à Ladenburgo, ultimo Iunii.

Georgius Metensis Episcopus, Iacobi Marchionis de Baden quondam filius & Caroli frater germanus, pro liberatione sua de captiuitate Palatino Comiti Friderico quadraginta quinque millia florenorum dare compulsus fuit : denique se cum omni militia sua, & tribus in Lotharingia castellis, Bergard, S. Theobaldi, & S. Crucis Palatino perpetuo scripsit obnoxium.

Carolus Marchio Badensis pro sua liberatione Palatino promisit, scripsit & dedit centum millia florenorum, ut dicemus. Verum quia tanta summa pecuniarum non erat in promptu ad manum, tali conditione suo triumphatori satisfecit. Quidquid in Comitatu Spanheimensi habuit, Palatinatui sub reemptionis titulo tradidit. Oppida quoque Besigheim, Bonheim, cum thelonæo & castello, simili sub reemptionis iure assignauit. Insuper omni reemptionis iuri, quod se habere super oppido Heideisheim & Eppingen prætendebat; venationibus quoque & piscationibus inter Seltz & Germersheim in terra & Rheno, pro quibus antea lis & contentio fuerat, in perpetuum renunciauit. Oppidum denique Pfortzheim Palatinatui feodale constituit : & se cum omni posteritate sua literis & iuramento necessariis in perpetuum eidem obnoxium fecit.

Udalricus autem Comes de Wirtenberg pro centum florenorum millibus Palatino fuit similiter mulctatus. Quorum in promptu fuerunt soluta quadraginta millia. Viginti autem millia florenorum Comiti memorato ab Adolfo de Nassau, Moguntino Archiepiscopo contra Dietherum, super strata montensi assignata, idem Comes Palatino Comiti resignauit : & sic fuerunt soluta florenorum sexaginta millia. De reliquis vero quadraginta millibus, Comes de Wirtenberg

Cemi-

Besigheim.  
Bonheim.

Heideisheim.  
Eppingen.  
Pfortzheim.



Comiti Palatino pensionem dabat annuam, duorum millium florenorum, quam necessariis monimentis confirmavit. Marpach insuper oppidum Palatino feodale constituit, & se cum omni militia sua Palatinatui obnoxium scripsit. His factis Principes liberati fuerunt.

ADDITIO. Inde carmina Epinicia hæc composita.

O columen firmum patriæ spes, gloria Rheni,  
O tu certa salus, protector fortis ut Hector,  
O decus armorum, celeberrima gloria gentis.  
Eximia virtute tua de Bade superbus  
Victus, & compulsus in vitâ præbere tributum;  
Wirtembergque tuis pressus victricibus armis:  
Compes eum Suevos vetuit spectare penates.  
Iactatrix ora gens implens voce sonora  
Colla leoninis nunc arrige victa catenis.  
Ha ha, Metensis, quæ te dementia cepit?  
Dum manus iniectos sacras fœdares in enses  
Herois doctas ab iniquis sumere pœnas,  
Es victus, victorque leo \* fortis ut Hector,  
In Pauli festo quis finis erat, memor esto.

Item aliud :

Quæ mihi Musa placens, quæ chordula, quæue Camæna  
Laudibus excolere dabit acta leonis amena.  
Quem conspirarunt Samsonis perdere vulpes  
Fraude, dolo, laqueos nectentes fomite turpes.  
Dauidica testante lyra, quia falsa pararunt,  
Nec stabilire valent, quæ consiliis cogitarunt,  
Hæc vi non iure disceptant, bellua tanquam.  
Sed rationis opem sequitur leo viribus aptam.  
A summis, mediis, & ab imis iura poposcit:  
Obturant aures cuncti. Deus omnia nescit,  
Dans domino pugnam, propriis non fudit in armis.  
Vulpibus \* Leo vi sociauerat unam,  
Hinc reliquæ litis cupiunt defendere primam.  
Tentarunt temerè numerum complere priorem,  
Quem leo (dante Deo) faciebat rite minorem.  
Ex hoc singultus, gemitus, dolor, ira, simulas,  
Fletus & insidia mentes penetrat modo multas.  
Is leo dante Deo potens hominis quem velat imago,  
Actibus est elegans, facit hoc generosa propago.  
Parcere deuictis scit mens animosa leonis:  
Non sit ursus, aper, vulpes, lupus, ira draconis.  
Vine, vale: valeant, leo qui tua facta coronant.

Et iterum :

Marchio Badensis festo Pauli prostratus  
Ducitur, & captus Palatinis exsuperatus:  
Wirtemberg: Baden, comites sunt Petri prostrati  
Crastino, captiui Palatinis rite redacti.  
Marte Fridrice tuo calcas tot bella, quot hostes:  
Subque nucem \* Cererem ducis Mauorte madentem.  
Commemores Pauli psallemus festa triumphi.

\* al sub mi-  
tem.



Rottenberg.

Wersau.  
Lushart.

Principibus in captiuitatem actis (vt dictum est) Fridericus Comes Palatinus contra Iohannem Nix Episcopum Spirenses traduxit exercitum: & inprimis oppidum Rottenberg cum castello annexo circumdedit obsidione, expugnauit & cepit. Postremo ad instantiam Capituli Ecclesiæ Spirensis concordia sub tali conditione facta est: *Castellum cum oppido Rottenberg, similiter Wersau perpetuo sint iuris Palatini. In nemore quoque Spirensis Ecclesiæ, dicta Lushart, omnis venatio soli cedat Palatino cunctis temporibus.* His ita conclusis, post mirabilem Ecclesiæ Spirensis desolationem, post rapinas & incendia multa, pax reformatur Ecclesiæ, non sine incommodo eius maximo.

Moguntia  
uirbs capta.

Eodem anno in mense Octobri Adolfus de Nassau, quem Pius Papa secundus abrogato (sicut diximus) Diethero de Isenberg, Archiepiscopum instituerat Moguntinum, consilio suorum habito urbem capere Moguntinam cupiebat. Ciues enim Moguntini partes Dietheri sequebantur. Ludouicus igitur dux Bavarix, cognomento Niger, qui morabatur in Meisenheim, Alwicus Comes de Sultz, Eberhardus de Königstein, & quidam alii ex nobilibus huius prouinciæ onus subeuntes, Ortwinum & Dudonem ciues Moguntinos traditores urbis in consilium admiserunt, quorum informatione res fuit peragenda. Cumque tempus adesset negotio præstitutum in vigilia SS. Apostolorum Simonis & Iudæ memorati Comites unâ cum duce Ludouico, Ringauensibus quoque, & armato milite non nimis plurimo, in profunda nocte, cum silentium iam quietum teneret omnia, cum scalis & machinis ad fossatum ciuitatis in eo peruenerunt loco, ubi propter difficilem aditum custodibus non videbatur opus, & falce facto tramite per vepres & dumeta muros aggrediuntur, scalas applicantes totis viribus parabant ascensum. Interea cum scalas apponerent muris, vidit quispiam muro insidentem eminentemque noctuam: quæ sedens, uno fixa in loco super murum alas iam extendit, iamque depressit. Cumque hoc in longam faceret horram territi fuere cernentes, propterea quod latere fortem super muros arbitrentur custodiam, Nam propter tenebrarum horrorem, clarè quid esset discernere non poterant. Propè iam erat, si paulo diutius durauisset spectaculum, ut scalis à muro depositis, infecto negotio retrocessissent metu perculsi: cum ecce bestia subito deuolans metu liberauit semidesperatos.

Gumpfort.

Iam deinceps facti alacriores, muros per scalas conscendunt erectas, atque successiuè silenterque introgressi traditorum auxilio custodias occupant, proximamque urbis portam, quæ Gauri porta nominatur, applicatis machinis infringunt & aperiunt, per quam totum exercitum foris præstolantem intromittunt. Expergefatti ciues tam ex clamore vigilum insolito, quam ex fragore portarum & hostium strepitu, correptis armis tumultuariè, quid agerent non satis scire potuerunt. Primo itaque impetu in paucos hostes irruerunt pugnaturi: sed fracta urbis porta, mox equites peditesque hostiles ciuitatem ingressi, suis audaciam & vires contra miseros addiderunt.

Coadunati tandem ciues fortiter contra hostes pugnaverunt, & cum eos bis terque retrocedere compulissent, numero tamen eorum tandem superati sunt, & quadringentis eorum occisis succubuerunt. Nam hostes ab una parte cum ciuibus acriter pugnabant, & in alia parte ciuitatem per traditores fecerunt incendi. Unde miseri ciues & urbem ardere videntes, & se imparibus viribus cum hoste decertare non posse considerantes, proiectis armis deditionem fecerunt. Quo facto ciuitate pulsi sunt omnes, qui arma ferre potuissent, & tam celeriter exire coacti, ut ne quidem salutatio suorum concederetur. Egrediebantur enim necessitate urgente omnes, uxoribus, liberis, amicis, & bonis omnibus, in hostium potestate relictis: & ibant egentes atque mendici.

Prædam hostis reperit ingentem, quæ non unius ciuitatis, sed penè totius patriæ thesaurus esse videbatur. Omnium namque in circuitu Monasteriorum, Ecclesiarum, nobilium & rusticorum bona mobilia in ciuitatem fuerant reposita, metu hostilitatis à facie inimici. Nemini parcebant, non clericis, non claustralibus,



libus, non ciuibus : sed quidquid poterant in tota ciuitate inuenire, absque ulla miseratione rapuerunt. Videres ministros Christi sacerdotes, una cum Iudæis crudeliter captos, & in altam villam satis ignominiosè duci ligatos. Omnes enim, qui cum Adolfo non senserunt contra Dietherum, a Papa Pio secundo denunciabantur excommunicati. Et quicumque in ciuitate Moguntina, priusquam caperetur, non sentiebant cum Diethero contra Pium Pontificem Romanum, eius censuras, sententias, interdictum, & Adolphi promotionem contemnendo, urbe pellebantur. Præfuit illis diebus monasterio S. Iacobi nostri ordinis in monte specioso, iuxta mœnia foris ciuitatem, Eberhardus de Venlo Abbas, vir experientiæ & prudentiæ multæ, secundum instituta Bursfeldensium unâ cum Monachis suis optimè reformatus. Is cum Papæ mandata constantissimè in se, & in Monachis suis obseruaret, nec in præsentia excommunicatorum & interdictorum ab eo consentire celebrare diuina; iussus est monasterio cum suis deserto procul abire. Qui Christi vicario malens obedire quàm Diethero, & ipse discessit ab urbe, & Monachos suos præcepit exire de cœnobio. Prior itaque processionaliter una cum conuentu per medium ciuitatis transiens, exiuit de cœnobio, signum sanctæ crucis Ottoni de Selbach nobili præferente donato. Tres duntaxat seniores in monasterio ad sarcinas (ut solet dici) remanserunt. Fratres autem hinc inde dispersi, alii apud S. Matthiam propè Treuerim, alii verò in Colonia apud S. Martinum, alii in aliis locis mansiones receperunt ad tempus.

In ea nocte, dum ciuitas Moguntina caperetur ab Adolfo, Dietherus præful abrogatus unâ cum Philippo Comite de Catzenelnbogen erant in castro, quod vrbi iacet annexum, Fridericum Palatinum Comitem expectantes, qui illò erat postera die venturus. Audito autem tumultu, & intellecto quod hostes præoccupassent ciuitatem, per murum submissi nauicula Rhenum fulcantes euaserunt. Comes enim Palatinus Rheni consilio mathematici sui Matthiæ de Kemnaten præmonitus nunquam induci potuit, vt in Moguntia vel vna nocte permanisset: eo quod urbem sibi periculosam astra prænunciarent.

Interea verò dum hæc in Moguntina diœcesi gererentur bella, Johannes ex Marchionibus de Baden Archiepiscopus Treuirorum, volens & ipse mandatis obedire Apostolicis, & exterminare Dietherum; Lanstein oppidum, quod pa-  
*Lanstein.*  
rum distat à Confluentia juxta Rhenum, cuius incolæ partes Dietheri sequebantur, bina obsidione vallauit. Est autem prædictum oppidum in diœcesi quidem Treuirorum, sed iure domini Ecclesiæ pertinet Moguntinæ. Obsessi ergo ab Archiepiscopo ciues fortiter egerunt, murorum & turrium firmitate defensi, hostes tandem fatigatos sine effectu discedere compulerunt. Altera post hæc vice Archiepiscopus denuò contra eos firmavit obsidionem: & denuò sine effectu cum damno Ecclesiæ suæ & confusione abire compulsus est.

Postremò fatigatis Principibus & exhaustis ærariis, de concordia reformanda inter Dietherum & Adolfum coëpit haberi tractatus, qui apud Franckenfurt oppidum regni tali sanè conditione fuit postea conclusus. Dietherus Archiepiscopatum ecclesiæ Moguntinæ, cum omnibus bello vel pace contractis eatenus debitis, Adolfo resignauit: & pro sustentatione sua, quamdiu viveret in humanis, Lonstein oppidum, castellum & thelonæum, oppidum quoque Hœst, ca-  
*Lonstein.  
Hœst.  
Steinheim.  
Diepurg.*  
stellum & thelonæum, Steinheim oppidum & thelonæum, Diepurg quoque oppidum cum omnibus prouentibus eorum liberè suscepit. Et sic tandem pax reformata est post omnimodam penè desolationem.

In hac negociorum compositione Friderico Palatino Comiti, pro impensis cum Diethero habitis contra Adolfum, assignati sunt mille floreni annui census super theloneo in Ernfeld, cum viginti millibus florenorum redimibiles. Pronouem verò millibus florenorum, quos Ringaugiensis Palatino se daturus promiserant, dum Pedersheim oppidum caperetur (vt supra diximus) & nec dum sa-



tisfecerant, ipsum oppidum Pedersheim sub titulo reemptionis fuit assignatum, usque in præsentem diem inreemptum.

*Hofgericht.* Anno item prænotato Fridericus Comes Palatinus cultor & amator iustitiæ, subditorum suorum pauperum curam gerens peruiilem, Parlamentum, quod Curiale iudicium nuncupant, instituit: in quod viros iure peritos cum certis nobilibus assessores & iudices collocavit, qui iustitiam administrarent omnibus, nulli facientes iniuriam.

*Cancellaria restituta.* Eodem anno vicesima prima die mensis Augusti, quæ fuit Sabbatho post festum Assumptionis beatæ Mariæ semper virginis, domus scribarum, siue cancellaria Principis Palatini Heidelbergæ casuali igne fuit incensa & exusta, cum literis nonnullis atque registris. In cuius locum Fridericus eam, quæ hodiè cernitur, pulchram & sumptuosam brevi restituit.

ADDITIO. Hoc tempore Principis honori hæc carmina fuerunt consecrata.

*Da mihi Musa placens, date carmina, dæque Poesis  
Magnanimum Rheni Comitem, diuum Fridericum  
Laudibus efferre, quas admiranda requirunt  
Gesta sua, populos dudum vulgata per omnes.  
Quem sit laudari dignumque necesse videtur,  
Nec latet id quemquam. Sed non describere quasque  
Ipse velim laudes, cum nactus idonea non sim.  
Scribere præterea cum paulum versiculorum.  
Hactenus effeci, cum animos admitteret ætas.  
Ædes prudentum stipata caterua venustat  
Illius, & crebrò tales imitantur \* abundè,  
Qui pro iustitia de rebus semper agendis  
Definire sciunt, & secundos \* dare suafus.  
Non modo doctorum turmas consuevit amare,  
Ast ad doctrinas animum non dedere sperni.  
Laude magis dignum nil censeo, nil meliusque  
(Ut prisca planè decantauere periti)  
Quam Reges patriæque supremos philosophiam  
Insignem colere, quo doctrinas adipisci  
Possint fructiferas, & dignè regna subire.  
Heidelbergæ moram nonnunquam præbet amœnam  
Illi, quam locus oblectans circumstat ubique  
Graminei campi, siluæ frondibus altæ,  
Fucundi montes: solamen Neccharus affert,  
Commoda Gymnasium præstat perplura celebre,  
Quod grandis cœtus sapientum ritè poliuit.  
Robore pollentes sed bello educat apertos.  
Cum quibus effrenes hostes domet atque propulset,  
Defendat, saluet subiectos & tueatur.  
O quam grata salus populo sub principe tali,  
Cui pax semper adest, cui rara pericula dantur.  
Sed plerique suis inuisi sæpe trophæis  
(Namque fauent alii rarò quem fata secundant)  
Oderunt miserè fortunatum Fridericum.  
Qui simul insidias quondam statuere latentes,  
Qualiter excidium dirum, discrimina, magnum  
Dedecus inuicto possent offerre Leoni,  
Maxima turba fuit. Sed Dii quibus omnia parent,*

\* f. inuicantur.

\* f. securos.



*Præsidium gratum diuo dederant Palatino.  
 O Palatine Comes, palmarum sit tibi iam spes  
 Firma futurarum, quem Dii seruant peramantque.  
 Magnificus leo versutos subuerterat hostes,  
 Et pietate sua prostratis parcere visus  
 In castrum victos illaeso corpore duxit  
 Æmulos. Infelix si quis fortem Palatinum  
 Concitat in bilem, casses hunc Hercle priores  
 Arripient, nec eum stimulos fortuna sequentur.  
 Desine sperare palmam modo quisquis es hostis.  
 Huius enim magna virtus & mira potestas  
 Te superat, vincit, capit, affligit miserandum.*

## M CCCC LXVIII.

Indictione Romanorum prima, Rupertus Archiepiscopus Colonienſis nimia paupertate & inopia preſſus, cum habere non poſſet, unde iuxta decentiam ſtatus ſui viueret, conſilium & auxilium Capituli ſimul & vaſallorum inuocauit. Omnia enim caſtella, oppida, & thelonea, cum redditibus & prouentibus eorum, vnde pontifices viuere ſolebant & ſtatum manuteneſe dignitatis, per anteceſſores eius fuerant impignorata pro ſummis pecuniarum maximis: & menſa Epiſcopalis in vltimam penè redacta paupertatem.

Rupertus Archiepiſcop. Colon.

Fuit eo tempore Decanus memoratæ Eccleſiæ Colonienſis, Stephanus Comes Palatinus Rheni, Bauariæque Dux, Friderici Cynonoti & Ludouici cognomento Nigri ducum Bauariæ frater germanus: qui contra memoratum Epiſcopum Rupertum cognatum ſuum, neſcio quam ob cauſam, feroci quadam diſplicentia, ne dicam odio laborabat. Is quo potuit ingenio, Canonicorum ſuorum ab eo mentes & animos ſedulo auertebat, ipſumque multorum detractio-  
 bus breui obiecit. Neceſſitate igitur compulſus, & inopia graui oppreſſus memoratus Archipræſul Rupertus, cum neque à Capitulo, neque à vaſallis ſuis conſilium obtinere potuiſſet, quo ex tanta releuaretur miſeria; rem armis aggredi ſtatuit, & vaſallis Eccleſiæ impignorata caſtella, oppida ſiue thelonea manu auferre violenta: quod ei in maximum ceſſit malum, cuius occasione tandem & Epiſcopatum amiſit & vitam. Deſtitutus namque ſuorum auxilio, Friderici Palatini Comitſ germani ſui, qui tutor erat Philippi, ſubſidium inuocauit contra eos, qui bona Eccleſiæ tenebant impignorata: qui fratri compaſſus egenti, miſit ei pecunias, frumenta, & viros armatos, in quorum violenta manu plura Eccleſiæ bona, quæ fuerant alienata, ſubitò recuperauit. Ex qua re omnium in ſe vaſallorum atque nobilium terræ odium concitauit.

Stephanus Pal. Canon. Colon.

## M CCCC LXIX.

Indictione Romanorum ſecunda, Fridericus Comes Palatinus, tutor Philippi, contracta bellatorum multitudine nauigio per Rhenum bombardas & machinas, per terram verò exercitum in agrum duxit Colonienſem, pro ferendo germano ſuo Ruperto Archiepiſcopo contra eos auxilio, qui oppida, caſtella, & alia Eccleſiæ bona, ſub impignorationis titulo detinebant. Erant autem nobiles & vaſalli Eccleſiæ memoratæ potentiores, qui hæc ipſa bona tenebant impignorata: qui cum nollent ea gratis & ſine pecunia Pontifici ſæpe dicto reſtituere, arma in eos mouit, & fratris præſati auxilio violenter obtinuit plurima, quorum iſta ſunt nomina. Bunna oppidum cum theloneo: Nuſſia oppidum: Lechnech oppidum cum caſtello: Zulwich oppidum: Bruël oppidum caſtrum atque theloneum: Nurberg caſtrum in Euphalia: Altenaer caſtrum: Rinbach oppidum, caſtrum & theloneum: caſtellum quod nominatur die Hardt: Lynz oppidum caſtellum & theloneum: Andernach oppidum, caſtrum & theloneum: Rolandſeck caſtrum: Gutenawe caſtrum & oppidum: Lyns oppidum caſtrum & thelo-

Bonn. Neuſi.  
 Lechnech.  
 Zulich, Broen.



& theloneum : Gutenberg castrum : Kempen oppidum & castrum : Erpenrod castrum : Keiferswerd oppidum , castrum & theloneum : Nyet castrum : Papenberg castrum : Hersberg castrum , & alia plura , quorum nomina iam memoriae nostrae minimè occurrunt. Omnia praescripta oppida , castella & thelonea , cum aliis multis , Fridericus Comes Palatinus Rheni non pecuniis , sed armis & comminationibus ab illis quibus impignorata fuerant , obtinuit : & Ruperto fratri Archiepiscopo Coloniensium resignauit. Ex qua re omnes penè vasalli Ecclesiae ac nobiles terrae occasione sumpta , cum se grauiter laesos conquererentur , vnanimi conspiratione facta , contra ipsum Rupertum Archiepiscopum insurrexerunt : & multiplicata sunt mala per totam dioecesin Coloniensem , neque cessauerunt à tumultu , donec tandem & Pontificatu & vita priuaretur Archiepiscopus Rupertus , post mortem fratris Palatini , vt infra dicemus.

Porro Fridericus Comes Palatinus Rheni , frater Archiepiscopi Ruperti , pro laboribus suis & impensis , quas fecerat in memoratis occupationibus cunctis , *Keiferswerd.* Keiferswerde oppidum , castrum & theloneum impignorata pro certa pecuniarum summa accepit , cum omnibus prouentibus eorum , quae post annos aliquot Hermannus Archiepiscopus Ruperti successor immediatus data pecunia redemit Ecclesiae.

Eodem anno cum insigne monasterium SS. Petri & Pauli Apostolorum in oppido Weissenburg Spirensis dioecesis , nostri ordinis , sedi Apostolicae immediate subiectum , propter malum & inordinatum regimen Iacobi de Brug eo tempore Abbatis , in ultimam deuenisset paupertatem , essetque grauatum aere alieno plusquam in viginti florenorum millibus , & omnia penè bona & impignorata , vel prorsus alienata , viuerentque in eo sine lege Monachi ; apposuit animum Fridericus Comes Palatinus , ut ad regularis obseruantiae tramitem reduceretur. Commessione igitur impetrata à sede Apostolica , ad se vocauit Eberhardum de Venlo Abbatem montis monachorum propè Bambergam , & Hermannum Abbatem montis S. Iacobi prope Moguntiam , viros in obseruantia strenuos , & longo usu exercitatos : quorum consilio negotium optatum perduxit ad effectum , licet cum magna difficultate , multisque laboribus & impensis. Cum enim praedictos duos Abbates , cum aliis viris doctis ac notabilibus suis à secretis pro reformatione praedicti monasterii misisset ad Weissenburg , Senatu consentiente ac iurante se manu tenturum , quicquid pro monachorum obseruantia fuisset inchoatum ; stabat in umbone Iodocus de Galba concionator Heidelbergensis , sacrae Theologiae Professor insignis , Dei verbum faciens ad populum commissariis rei praesentibus. Et ecce tumultus in oppido saeuientis populi oritur , in altum clamor extollitur , monasterium armatis vinitoribus obsidetur , clamabant omnes una sententia vociferantes : *Tollite monachos istos rurículas , qui nobiles viros de cœnobio expellere laborant : occidantur pediculosi nebulones , qui loca sibi vendicant aliena.* Ad clamorem tanti ciuium tumultus territi sunt omnes , qui venerant ad reformandum , & alii se in sacristia recludentes absconderunt ; alii vero in aliis monasterii locis , ubi poterant latibula quaesierunt. Sedato tandem per Senatum furentis populi tumultu , inceptum negotium perficiebatur , & sancta reformatio Bursfeldianorum obseruantiae fuit introducta , Monachis antiquis deformatis à facie regularis disciplinae fugientibus , & nouis benè reformatis ex monasterio S. Iacobi propè Moguntiam in locum eorum repositis.

Eodem anno in mense Augusto reformatum fuit monasterium S. Martini in Spanheim ordinis nostri , ex monasterio S. Iacobi propè Moguntiam , opera & impensis Friderici Comitum Palatini , Bauariaeque Ducis ac Principis electoris , & alterius Friderici Ducis , qui morabatur apud Cynonotos in oppido Symern , consensu & permissione Adolphi Archiepiscopi Moguntini , per Conradum Rotenbergium S. Iohannis in Ringaugia , & S. Iacobi propè Moguntiam monasteriorum ordinis nostri memoratos Abbates. In qua reformatione Otto de Colonia , tunc *Ruprechtsberg.* Abbas officium resignauit , & praepositus monialium factus est in monte S. Ruperti.



perti. Huic in Abbacia successit Iohannes de Colenhufen S. Iacobi Moguntiae, & praefuit annis tredecim, mensibus undecim, & tribus diebus in magna paupertate: vir doctus & optimus: qui postea translatus fuit ad Selgenstat.

Eodem anno Adolfus Archiepiscopus Moguntinus Rudolphus Episcopus Herbipolensis, & Fridericus Comes Palatinus Rheni, Bauariaeque Dux, tutor Philippi, auxilio ciuium regni contractis copiis castrum Georgii, Arnoldi, & Michaelis de Rosenberg nomine Bugsberg, obsidione cinxerunt, in quo sese latrones viarum atque praedones sceleratissimi recipere solebant: qui propriae salutis immemores, imperialiumque mandatorum contemptores, & pacis regni communis impii turbatores, non solum bonos quoslibet spoliauerunt itinerantes, sed & alia prius inaudita scelera in sacerdotes Domini commiserunt. Amputatis namque virilibus ministros Ecclesiae sacrilegis manibus castrauerunt, ex quibus nonnulli doloribus nimium urgentibus moriebantur. Posthac quaedam instrumenta ferrea seris occultissime clausa excogitauerunt: quibus testiculos tam clericorum, quam laicorum comprimentes; cum nemo seras aperire posset, nisi ipsi, venire miseros quocunque iussissent compellebant.

Bocksberg.

ADDITIO. De isto clero-mastyge hi versus fuerunt scripti:

*Quiraso capite praestas, proficiscere cautus:  
Iam tibi succensens nobilis ecce latet.  
Esse pius clero propter sua probra recusat,  
Quem regit antistes clarus in Herbipoli.  
Qui vulgo praesunt, clam nunc expectat, ut illis  
Absumat leto pectore testiculos.  
Presbyter ergo caue, maneat in adibus astu,  
Ne sic te miserum sauciet hostis atrox.  
Nam mucrone malo quae surripit ipse nefandus,  
Nequaquam minima viscera sunt hominis.*

Hac & his similia plura facientes mala, nomen infamiae sibi perpetuum contraxerunt, quod non dubium apud inferos vindictae semper manebit obnoxium: quia non solum ipsi grauiter in his peccauerunt, sed etiam aliis prauae actionis praebuerunt exemplum. Si peccatum non dimittitur, nisi ablatum restituitur; quis dubitauerit raptores atque latrones istos perpetuae damnationi obnoxios fore, qui omnia, quae possunt iniuste diripiunt, nunquam restitunt, & sic moriuntur. Obsidione autem firmata in anno sequente, castellum per dictos Principes dure fati impugnatur, & postremo expugnatum capitur: in quo fuerunt septuaginta nobiles pro eius defensione congregati qui omnes fuga lapsi sunt. Durauerat memorata obsidio diebus uno & viginti, in quibus obsessores castrum bombardis & machinis sine intermissione fortiter quassare non cessarunt: quod captum illis de Rosenberg sub certis conditionibus postea fuit restitutum. Acta fuerunt haec anno sequente in quinta feria coenae Domini. Inde mouentes exercitum Schuff castellum quoddam satis munitum octo diebus obsidentes, tandem in octaua resurrectionis Domini coeperunt, quod funditus desolarunt.

Schuff.

M CCCC LXX.

Eodem anno ciues oppidi Weissenburgensis, qui anno transacto in verba & sententiam Palatini iurauerant, quod Abbatem Henricum & monachos de obseruantia ad monasterium ibidem laudabiliter introductos, (ut supra diximus) fideliter deberent vellentque fouere, manu tenere, & contra insultus deformatum antiquorum & expulsum defendere; mutato consilio & immemores iuramentorum deformatos Monachos antiquos iudicio Apostolico, ut inutiles & votorum suorum transgressores per Palatinum Comitem expulsos, in habitu muliebri nocturno tempore ad oppidum intromittunt, & expulsis reformatis ad coenobium iterum reponunt. Wiricum etiam dictum Hoffart manifestum Palatini

Comi-



*Weissenburg.* Comitibus hostem, & alios inimicos eius fouentes in oppidum susceperunt hospitio: & licet eorum esset protector, tamen ipsi non satis fideliter in ipsum respiciebant. Praefectum quoque seu Vice-tenentem Palatini captum & spoliatum contumeliis & iniuriis plurimis affecerunt: & alia nonnulla ferebantur in eum commisisse delicta, quibus iram eius non gratiam meruerunt. Vnde commotus animo Palatinus oppidum Weissenburg in manu suorum valida obsedit: & locatis in deserta praepositura quatuor turrium militibus, per totam fere hyemem urbem fortiter impugnauit. Tandem Argentineses & quidam alii ciues regni viciniore inter Comitem Palatinum & Weissenburgenses pro pace laborauerunt: quorum interuentu concordia sub certis fuit conditionibus reformata, & soluta obsidio.

*Ludouicus Niger, Capitaneus Imperii.* Veruntamen Weissenburgenses in conclusione pacis acceptae non diu permanserunt: sed literis & nunciis ad Imperatorem missis, qui tum erat in Austria, Comitem Palatinum *destructorem regni & persecutorem ciuium eius* proclamauerunt. Cuius ut insolentiam & tyrannidem possent reprimere, Caesari supplicabant, quatenus regni capitaneum & Caesareae Maiestatis vicarium per Alsatiā & circumiacentes regiones constitueret, cum plena potestate bellandi contra ipsum Palatinum auxilio ciuitatum, Ludouicum Comitem Palatinum, Bauariaeque Ducem, cognomento Nigrum patrem ducis Alexandri, qui morabatur in Geminio ponte, vulgariter Zweybrücken. Et consensit petitioni eorum Fridericus Imperator: constituitque ducem Ludouicum regni capitaneum.

*Stralberg. Schriesheim.* Quod mox ut Friderico Palatino Comiti supra dicto innotuit, suorum non paruum exercitum contraxit, & quasi leo rugiens ad praedam contra Ducem Ludouicum processit ad praelium. Sed Ludouicus Dux ad eius venire congressum non audebat. Palatinus Comes Fridericus terram Ducis Ludouici cum potentia ingressus, multas breui tempore munitiones illius obtinuit. Et inprimis quidem obsedit Stralburg castrum, & Schriesheim: & in octo diebus utrumque obtinuit, & praeda oppidanis dimissa, nobiles & praesidium Ducis Ludouici captiuos abduxit. Ex peditibus vero in oppido & castello inuentis sedecim fecit submergi. Inde mouens exercitum Armsheim oppidum Ducis memorati obsedit: quod bombardis & machinis fortiter impugnans, tandem in die commemorationis S. Pauli cepit & obtinuit. Non erat ei mos vel consuetudo pauperum exurendi domicilia: sed pecunia redempta, prout unusquisque soluere poterat, intacta relinquebat. In oppido iam dicto nobiles reperit decem & octo: equites vero duo & quadraginta, quos omnes captiuos fecit abduci. Pedites autem reperit quadraginta, quos ad oppidum Alzen proximum transmisit captiuos. Deinde muros & turres per gyrum oppidi funditus destruxit, & fossatum solo adaequauit. Quadraginta vero pedites, quos in Alzen diximus fuisse deductos, quasi omnes fecit submergi. Habebat enim quasi pro lege consuetudinem, ut comprehensum neminem sineret viuum, qui ex eius dominio ad hostes spontanea voluntate defecisset.

*Wachenheim.* Post haec mouit exercitum ad Wachenheim: & oppido proximè supereminens in monte castellum, situ & arte munitum obsedit, impugnauit, & cepit. Quod aliquandiu in locum praesidii tenuit: sed posteaquam & oppidum cepit, ipsum castellum (ut hodiè cernitur) funditus euertit. In eodem castello magnum reperit apparatus bombardarum. Capto autem castro, mox oppidum Wachenheim obsidione vallauit, quod tamen illa vice non obtinuit.

*Deidesheim.* Enimvero cum audiisset Ludouicum Ducem & regni capitaneum, adiunctis sibi Comitibus de Bitsch & Liningen, cum magno pugnatorum exercitu per Alsatiā venire in terram Palatinatus, animo & intentione ut omnia desolaret: obsidione soluta, machinisque bellicis in Didesheim oppido Ecclesiae Spirensistranspositis, cum exercitu obuiam hostibus venit. Ludouicus autem cognito Palatini aduentu retrocessit, nec stare coram eo se posse confidit. Nouit enim vires Palatini expertus.

Post-



Posthac memoratus Comes Palatinus munitissimum castrum Rupertseck ob-  
 sidione cingens, bombardis & machinis fortiter impugnavit: quod subfossum  
 tandem violenter obtinuit: in quo multam prouisionem ad victum necessariam  
 reperit: arma quoque, machinas bellicas, equos, & suppellectilem variam inue-  
 nit. Viros etiam militares, quos nobiles vocant, cepit numero tredecim: in-  
 ter quos fuerunt precipui, Reinhartus Comes Hirsutus, qui vulgariter Rugraff di-  
 cebatur, & Ioannes de Landeck capitaneus. Equites non militares cepit nume-  
 ro quadraginta sex: & nonnullos pedites.

Rupertseck.

Interea dum hac fierent per Comitem Palatinum, nebulones quidam ar-  
 mati, quos dux Ludouicus in oppido Wachenheim ad custodiam contra Palati-  
 num posuerat, in vigilia Assumptionis beatæ Mariæ semper virginis, irruptione  
 facta monasterium vicinum Lymphurg nostri ordinis turnatim intrarunt: & fra-  
 ctis violenter ianuis coenobii omnibus, quicquid præter libros & reliquias San-  
 ctorum inuenire poterant, rapientes ad oppidum reuersi sunt.

Lymphurg.

## M CCCC LXXI.

Indictione Romanorum quarta, Fridericus Comes Palatinus exercitum  
 quatuordecim millium pugnatorum in propria persona duxit, contra Ludouicum  
 Ducem Nigrum regni Capitaneum: & inprimis oppidum eius Wachenheim,  
 quod obsederat anno transacto ante hyemem (sicut diximus) iterum obsedit, in  
 vindictam maximè, quod coenobium Lymphurg ex eo spoliauerant. Obsidione  
 igitur firmata, Palatinus oppidum bombardis & machinis fortiter impugnans,  
 tandem in die S. Bonifacii Archiepiscopi & Martyris obtinuit: in quo cepit ex  
 nobilitaribus viros octo, equites inferioris ordinis triginta quinque, pedites vero  
 septuaginta, quorum quinquaginta quatuor fecit submergi in aquam, propterea  
 quod pauperes rusticos interfecerant, domos succenderant, Ecclesias & monaste-  
 rium Lymburgense spoliauerant, reddidit malefactoribus vicem dictante iusticia:  
 & ceteros abduxit captiuos. Deinde muros & turre oppidi omnes subuertit:  
 & fossatum per circuitum solo adæquauit, bombardas & machinas sibi ser-  
 uauit.

Posthac mouit exercitum ad Beckelnheim villas maiorem & minorem,  
 utramque fossatis & propugnaculis benè munitam, quæ pertinebant Comitibus  
 de Leiningen, ambasque obsidione vallauit, impugnavit, & in octaua die obsidio-  
 nis cepit: fossata complanauit, & propugnacula destruxit. In his reperit nobi-  
 les quatuor, equites quindecim, & pedites viginti ex quibus nonnullos in aquam  
 fecit submergi. Ex nobilibus autem pridie quam villæ caperentur, nonnulli fu-  
 ga lapsi, noctis beneficio euaserunt. Villas iussit incendio cremari, ac funditus  
 destrui. Facta sunt hæc anno dominicæ natiuitatis prænotato quarta decima die  
 Mensis Iunii.

Beckelnheim.

Inde mouens exercitum Palatinus Ulmen oppidum cum arce obsidione val-  
 lauit, quod impignoratum pro certa summa pecuniarum ab Ecclesia Moguntina  
 Dux Ludouicus tenebat: ex quo plura Palatino intulerat damna. Obsidione fir-  
 mata Canonici memoratæ Ecclesiæ præcogitantes, quod futurum forsan esse vi-  
 debant, quod si oppidum & castellum in virtute bellica semel in manus perue-  
 nisset Palatini, ad ius Ecclesiæ minimè deinceps posset reuocari, talem cum eo  
 concordiam inière. Conditio prima concordie fuit, *ut Palatinus nobiles, equi-  
 tes, & alios, qui ex parte Ducis Ludouici erant, in oppido vel in arce, sine lesione  
 cum rebus suis omnibus, quo vellent saluos abire sineret.* Secunda conditio fuit, *quod  
 Canonici Ecclesiæ Moguntinæ castrum cum oppido ad manus suas reciperent & posside-  
 rent, ita tamen quod Ludouicum Ducem vel suos perpetuò deinceps non intromitte-  
 rent.* Tertia fuit conditio pacis, *quod Canonici Moguntinenses Palatino Comiti per-  
 soluerent quatuor millia florenorum, pro habitis expensis.* Et quod nullus perpetuò  
 foueri seu teneri debeat in eodem oppido vel castello, qui damnum velit inferre Pala-  
 tino.

Ulmen.



*tinatui.* His factis atque conclusis, in die S. Jacobi Apostoli anno præscripto, soluta fuit obsidio.

*Lamsheim.*

Exinde mouens Palatinus oppidum Lamsheim situ, muris, propugnaculis, fossatis, aquis, & milite satis munitum obsedit: in quo illo tempore fuerunt viri nobiles quatuor & triginta cum equitibus, pedites verò ex coniuratis Heluetiorum mercede conductis, plusquam trecenti. Obsidione autem firmata oppidum ab hostibus fortissimè impugnabatur: quod videntes Heluetii pedites, qui Palatini vires iam prius fuerant experti, de sua coeperunt timere salute. Igitur consilio inter se habito, licentiam & securitatem abeundi à Palatino Comite postulantes, obtinuerunt: oppidum sine custodia dimittentes, sub ea tamen conditione, *quod illa durante contentione inter ipsum & Ducem Ludouicum non amplius bello se intromittant.* Post quorum recessum Palatinus oppidum fortitudine & defensione nudatum, in suam potestatem accepit. In quo reperit Philippum Lusser ex Didesheim capitaneum Ducis Ludouici, cum aliis nobilibus quindecim, equitibus vno & triginta: pedites verò quatuor & viginti, quos quidem pedites in fossato fecit submergi. Oppidani autem in verba Palatini iurantes, salui corpore rebusque manserunt. Facta sunt hæc quarta die mensis Augusti, quæ fuit Dominica post vincula Petri.

*Leyser.*

#### ADDITIO. Inde versus hi compositi.

*Vincere murum tandem potuit vis magna Leonis  
Munitum Lamsheim, cui laus immensa dabatur,  
Vix expugnari sperabant tempore longo,  
Quos ad presidium Ludonicus Dux dedit illi.  
Magna tamen virtus est spem frustrata Leonis.  
Octo dies nondum labuntur ab obsidione,  
Dum patet ingressus, ignisque coercuit hostes.  
Hic belli fortes, hic comperit ipse nefandos.  
Hi ramos inter, hi nobilium prece turpes  
Euasere neces, missi nunc quærere pisces.  
Philippum Lusser, Adam Rissen petulantes,  
Nonne Leo domuit? sua nunc lasciuia cessat.  
Ergo hostis caueas, noli irritare Leonem,  
Quem stipata cohors animo comitatur atroci,  
Oppida quæ vastat, villas, hostesque propulsat.  
Prouida sis Zabern, Meyßenheim sis cauta necesse est.  
Hortor vos itidem summis in montibus arces,  
Solliciti sitis vestras vitare ruinas.  
Singula magnanimus leo plurima castra subegit:  
Hoc anni spacio tam splendida gesta peregit.  
En Boxberg, Schrisheim, Schuff, Stralburg, Wachenheim,  
Armsheim, Rupertzeck, Bockenheim, Lamsheim deleta videtur.  
Ne foret his socia, vix nonne supersuit Ulma?  
Obtulit hæc primus & septuagesimus annus.*

*Türckheim.*

His peractis Comes Palatinus obsedit Türckheim, oppidum Comitatus de Leiningen præcipuum, pro cuius munitione Comites ipsi per annos viginti antea defudantes, neque laboribus, neque impensis pepercerunt: quod muris, fossatis, turribus & propugnaculis fortissimum reddiderunt. Sed quid destruere manus hominum nequeunt, quod construere potuerunt? Comes enim Palatinus in vicino monialium nostri ordinis cœnobio Sebach personaliter constitutus, oppidum fortissimè impugnabat: & variis capere modis annisus est. Hi autem qui erant in oppido, viriliter incurfantibus restiterunt, & hostium plures astu & ingenio peremerunt. Postremò tamen octaua die Augusti, quæ fuit festo S. Martyris Aga-

*Sebach.*

Aga-



Agapiti solemniter, oppidum à Palatino capitur, muri, turres cum arce destruuntur: & fossatum in gyrum complanatur, sicuti hodiè videtur. Vxor tunc Emichonis Comitis ex Duroburgo \* veniens ad Palatinum, precibus obtinuit sibi donari Durckheim, & ipsum castellum Hartenburg, propterea quod essent ei ascripta in dotem: alioquin dubium non est, quo minus vtrumque funditus ab illo fuisset euersum & destructum. \* *Hartenburg.*

Reperit autem Comes Palatinus in memorato oppido Dürckheim, Philippum & Dietherum Comites de Leiningen, Petrum Comitem quendam Gallicanum, nobiles quatuor & viginti; equites centum sex, pedites conductos stipendio quadraginta; oppidanos vnum & quinquaginta, rusticos ex diuersis locis comitatus de Liningen pro defensione introuocatos septuaginta: quos omnes captiuos pro pecunia libertati postea donauit.

In ea expugnatione Durckenhemensis de exercitu Palatini ceciderunt occisi ducenti viri: inter quos plures fuerunt nobiles atque potentes. Ex parte verò comitum de Liningen octoginta nouem interierunt. Absconderant enim Durckhemenfes in fossato vel circa foueam terrâ subtiliter opertam, in cuius fundo palos fixerant acutos. Cumque Palatini milites cum impetu ad muros vellent irumpere, subito ceciderunt in foueam occultam. At illi quibus talis negotii fuerat commissâ industria, præparatis antea pulueribus ignem submiserunt in foueam, & lapsos in eam cunctos necauerunt. Meliores inter suos nobilitates Palatinus ibidem amisit.

Posthæc Palatinus mouit exercitum contra Ducem Ludouicum, obseditque Sobernheim oppidum Ecclesiæ Moguntinæ, ipsi Ludouico (vt supra diximus) ab Adolfo Archiepiscopo pro certa pecuniarum summa impignoratum. Oppidani non habentes à Duce Ludouico defensionis aliquod subsidium, cum tantæ multitudini nequaquam possent resistere, in manus se obsidentis Palatini cum oppido tradiderunt, anno prænotato in die S. Bartholomæi Apostoli: & ita salui manserunt sub Palatinatu vsque in præsens. *Sobernheim.*

A Sobernheim mouit exercitum ad Montzezen oppidum: quod breui vna cum Merixheim & Nosbaum in villis munitis in suam potestatem accepit: quæ similiter fuerunt iuris Ecclesiæ Moguntinæ, sitæ in comitatu Spanheimensi, emptæ quondam cum aliis supra & infra notatis per Wernherum Archiepiscopum ab vno Comite de Spanheim Heinrico. *Montzezen. Merixheim. Nosbaum.*

Castellum posthæc Bickelnheim & vtramque eiusdem nominis villam obsedit, expugnauit & cepit. Erat in ipso castello ex parte Ludouici Ducis capitaneus seu vicem-tenens, homo quidam patria Ringaugiensis, nomine Conradus Schlarpp ex Gisenheim oriundus, qui castrum custodiendum susceperat. Verum posteaquam Ducis sui auxilium implorasset, expectassetque aliquandiu, & nullum penitus adueniret; castrum in manus Palatini tradidit, & ipse cum his, quos secum habuit peditibus, quo vellet, liber abire permissus fuit. *Bickelnheim.*

His gestis Palatinus Comes à Bickelnheim mouens exercitum, vicesima sexta die Mensis Augusti, quæ feria erat secunda post festum S. Bartholomæi Apostoli, castellum Landsperg & vicum Moscheln cum arce obsedit, & fortiter satis impugnare cœpit. Tunc primum Dux Ludouicus videns, quod desolatus esset ab omnibus, neminemque haberet auxiliantem, & quia suis viribus nequaquam posset resistere, posteaquam plura iam oppida & castella perdidisset, suorum vsus consilio procerum veniam ab eo rursus postulauit. *Landsperg. Moscheln.*

Anno igitur Dominicæ natiuitatis prænotata facta est inter Fridericum Comitem Palatinum & Ducem Ludouicum tertia concordia: & secunda die Septembris Heidelbergæ conclusa, scripta, & sigillorum monimentis confirmata. In ea concordia fuit conclusum, quod omnia oppida & castella, quæ Palatinus toto defensionis eorum tempore de manibus Ludouici Ducis obtinuerat, perpetuò deinceps ad dominium Palatinatus debeant pertinere sine impedimento cuiuscunque: sicut & hodie pertinent, quorum ista nomina. In comitatu Spanheimensi, Sobernheim *Transactio inter Fridericum & Ludouicum.*



bernheim oppidum, Monzingen oppidum, Bickelnheim castrum, & duæ villæ: Merixheim villa, Nosbaum villa, Bois villa, cum aliis pertinentibus ad prædicta: quæ omnia dux Ludouicus ab Ecclesia Moguntina (vt supra dictum est) ab Adolfo Archiepiscopo contra Dietherum susceperat impignorata, & olim pertinebant ad comitatum Spanheimensem iam dictum. In strata montensi castrum & oppidum Schriesheim. In gauio maiori Armsheim oppidum, Gawbickelnheim oppidum, Waldertheim oppidum, cum viculis quibusdam & villis eorum. Lamsheim quoque oppidum, & Rupertzeck castrum cum aliis. Vlme. nam nihilominus oppidum & castrum dux Ludouicus perdidit: quamuis in dominium ecclesiæ Moguntinæ, & non Comitum Palatini (vt diximus) peruenerint.

Non placuit Romanorum Imperatori Friderico ista concordia, qui aduersus Comitem Palatinum multiplices ob causas animum gerebat indignabundum. Dux autem Ludouicus iam tertio non sine maximo principatus sui detrimento expertus iram leonis, Imperatorem ipsum iam deinceps maluisset habere aduersarium, quam eius mandato Comitem rursus impugnare Palatii. Cæteri quoque in circuitu Principes penè omnes magno cum periculo rerum suarum experti, quid vires possint memorati Comitum Palatini, contra eum mouere pedem amplius non audebant: quia incubuit timor eius super eos vehementer.

ADDITIO. De hac concordia scripti sunt hi versus:

*Nubila nunc tandem cœlo prosper \*    aufsert,  
Nec rursus imbres tristia parturient.  
En Friderice Comes iam fata laboribus ipsis  
Adducunt finem: iam labor omnis abit.  
Jamque palam seruant fulgentia signa leonis  
Castra Ludouici, qui prius hostis erat.  
Ergo Leo plaudas hostes virtute coercens,  
Quos demum pacem cogis inire piam.  
Infestos terras tu, munitas capis vrbes,  
Succubuit miserè nunc inimica manus.  
Jamque reluctantes ferro telisque propulsas,  
Ciues, tirones, ruricolæ, procures.  
Frustra tuis hostes iam vi virtutibus obstant:  
Nam non impune facta proterua ferunt.  
Nactus es immensos summa cum laude triumphos:  
Tu Rheno felix commoda magna paras.  
Nullos deuitat audacia magna labores  
Ambigit, & faciunt iam tua gesta fidem.  
Nuper enim Dorckheim atrox expugnando petebas,  
Difficiles aditus non verebare quidem.  
Nec rumor falsus, nec Cæsaris ira minantis,  
Nec te formido terruit vlla necis.  
Nec tristes Hyades, nec Phœbi grandior æstus,  
Quin inimica tuis oppida diriperes.  
Quis sat consequitur præconia magna Leonis?  
O magnas laudes principis egregii.  
Pellite magnanimi mecum vos, pellite curas:  
Nam vitam placidam pax dabit accelerans.  
Dux en Veldensis, qui sæpe pericla minatus,  
Qui se discidium gesserat ante ducem;  
Jam dedit ad nutus humili se mente Leonis:  
Mutata mente deditus esse cupit.  
Plaudite mortales, præsens modo Iuppiter adsit,  
Jam bellum cedit, gratia pacis adest.*



*Nunc mercator iter cape, nunc miles pede fausto :  
 Nemo tibi rursus clam locat insidias.  
 Ergo tibi Friderice Comes spondemus amici,  
 Nos semper monitis velle parere tuis.  
 Vire, vale, gaude : nam qua nos cunque sequentur  
 Fata, viros tecum nos dabimus comites.  
 Nec tibi coniuncti nos desperabimus unquam :  
 Et metus in nobis te duce nullus erit.  
 Exercere modo Mauortia gesta licebit :  
 Nam Jouis excelsi fungimur auxilio.  
 O Rheni ductor, leo fortis, & inclite Princeps,  
 Magna salus patriæ tu Friderice Comes.  
 O præclare comes, ô tu fortissime victor :  
 Maieitati tuæ me modò dedo miser.  
 Suscipe parua libens munuscula mente benigna,  
 Quæ tibi Jacobus \* ex famulis minimus.  
 Ille tuas laudes longum diffundet in ævum,  
 Et tenui metro te super astra feret :  
 Virtutesque tuas tenui lanugine cinctus  
 In totum faciet nunc penetrare solum.*

His ritè peractis, iterum Comes Palatinus Weissenburgenses cunctorum iam destitutos auxilio monuit, quatenus Monachos de obseruantia Bursfeldensi, remotis & expulsis deformatis, quantocius reciperent, aut bellum & obsidionem denuò experirentur. At illi consilio inter se habito satius iudicabant monachos reformatos intrmittere, quam propter antiquos deformatos vitæ ac rerum suarum extremum periculum subire. Expulsis ergo monachis antiquis deformatis ; expulsi prius reformati ad locum reuocati & introducti sunt, manentque reformati usque in præsentem diem.

Eodem anno vicefima tertia die mensis Octobris sæpè dictus Comes Palatinus, confederatione prius facta cum Nicolao duce Lotharingiæ, coadunato pugnatorum exercitu oppidum Mauri monasterium, & castellum vicinum Gerolfeck, in quibus prædones & inimici prænominati ducis Lotharingiæ sua receptacula consueuerant habere, obsedit, impugnavit, & cepit, murosque per gyrum & fossata destruxit, latronibus nocturna fuga salutem quærentibus.

Morsmünster.  
Gerolfeck.

Rursus eodem anno in Decembri memoratus Princeps duo prædonum castella, quorum alterum dicebatur Dortzbach, alterum verò Waltbach, in pago quem Odenwald vulgò nuncupamus, obsedit : quorum primum septima decima die Decembris obtinuit, secundum verò die sequente. Latronum in castellis ipsis tunc existentium alii fuerunt occisi, alii verò capti : cæteri autem fuga lapsi manus persequentis euaserunt, ne & ipsi caperentur.

Dortzbach.  
Waltbach.

#### ADDITIO. Super hoc versus hi facti.

*Nequaquam admittis gratam Friderice quietem,  
 Nec rigidum Martem vexillis ducere cessas,  
 Ni virtute tua compescas quosque nefandos.  
 Temporis æstui post diros hercle labores,  
 Dum refrenatus tibi Dux Ludonicus abibat,  
 Et manifesta suo gemitu discrimina planxit  
 Cinctum Morsmünster tunc obsidione molesta,  
 Quod prius indomitum tenuit lascinia grandis,  
 Mox tibi subiicitur, auulsis mœnibus atque  
 Iure cohercetur, eius petulantia cessat.  
 Quando munitas arces inuadere tentas,  
 Expugnas subito, sternens virtute superbos.*

Scd



*Sed mortis timidus procul hinc fugit ipse Ditherus,  
Vitam consuluit propriam querendo salutem.  
At frater victus obscuro carcere dormit.  
Vos quoque lasciui, maledicti, vos nebulones  
Pœnas effugite; metuenda est ira Leonis,  
Ne vos arripiat, ne vos tradat cruciandos  
Carnifici, dudum qui plures misit in Orcum.*

Ermelstein.

Eodem tempore arx quædam nomine Ermelstein, in qua Palatinus ius aper-  
tura & refugii habebat, per insidias à quibusdam iniquis conscensa & occupata  
fuit. Quo comperto Palatinus statim armatos suos adduxit, & prædictam arcem  
vi in manus suas recepit. Unde versus:

*Qua dudum terras fuerat vulgata per omnes  
Amplificas famam tu Palatine tuam.  
Demonstrat solitos arx perquam clara triumphos.  
Viribus Ermelstein exsuperata tuis.  
Non fuit hunc equites iustum coluisse rebelles:  
Est tua vis illos pellere visa viros.*

Eodem anno Fridericus Imperator tertius conuentum Principum statuum-  
que regni magnum habuit in ciuitate Ratisponensi: ubi inter alia multa varii  
habebantur tractatus de bello in Turcas mouendo, sed omnia terminabantur  
verbis, cunctis quæ sua sunt quærentibus, non quæ Reipublicæ Iesu Christi.

## M CCCC LXXII.

Hoc anno Rupertus ex Comite Palatino Archiepiscopus Colonienfis ger-  
manus Friderici sæpe dicti principis, magnam suorum contra se displicentiam  
concitauit. Nam inter ipsum & Canonicos maioris Ecclesiæ (quorum congre-  
gationem Capitulum nuncupant) magna contentione suborta, prouentus eorum  
& census in vindictam rebellionis, ubicunque potuit extra Coloniam præoccu-  
pauit, & in usus proprios conuertit. Hinc nimium commoti, & forsân non im-  
merito, Canonici quidquid contra eum potuerant agere, toto mentis studio con-  
siliati sunt. Adhæserunt eis ciues Colonienfes: adhæserunt Bonnenfes: Noue-  
sii quoque, & omne robur totius nobilitatis in patria: qui penè omnes unanimi  
sententia rebellarunt.

Archiepiscopus autem ipse cum experimento rebellionem suorum didi-  
cisset, grauiter tulit: & quomodo suam posset ulcisci contumeliam, sedulo co-  
gitabat. Erant inter consultantes rebus Pontificiis nonnulli, quorum sententiam  
male sequutus Præsul, Nouesium capere viribus cum non posset, insidiis & dolo  
aggressus est. Dicebantur eo tempore subordinati fuisse tres viri, magnisque  
promissionibus conducti, videlicet Erhardus Bock, Fridericus Schouff, & Basilius  
quidam per eos, quibus Archiepiscopus rerum commiserat summam, ut oppidum  
in manus eius traderent per insidias. Recesserunt enim Nouesii (sicut iam dixi-  
mus) ab obedientia Archiepiscopi. Verum Basilius aquam utroque sciens por-  
rare humero, & in una re bis traditor factus, à Nouesiis accepta pecunia, socios  
suos in eorum notitiam secretius tradidit. Qui cum nauigio per flumen Rheni  
descendisset Nouesium, accepto ciues à bis traditore signo, mox eos in littore ca-  
pientes, torturis examinarunt. Quid plura? Interrogati consilium aperiunt,  
voluntatis suæ institutum fatentur: sententiam capitis accipiunt: ceruicibusque  
amputatis, trunci quatuor in partes diuiduntur. Hinc grauem commotus in  
iram, necatis factam clamauit iniuriam: asserens nec se nec suos unquam de  
traditione Nouesii quelecunque habuisse consilium. Mandauit ergo Nouesiis,  
& iureiurando denunciari fecit, scirent, quod & illatam sibi ab eis contumeli-  
am, & innocentibus mortem, totis viribus, & quo posset ingenio cogitauerit in  
proximo vindicare. Iam deinceps in apertam rebellionem conspirarunt.

Eodem



Eodem anno Fridericus Comes Palatinus, ubi tantam audiuit inter fratrem Archiepiscopum & Canonicos eius Colonienfes discordiam, misit ad Coloniam Reinhardum Episcopum Wormatiensem, cum aliis quibusdam à secretis, ut si quouis ingenio possent, concordiam inter eos reformarent. Missi ad Coloniam veniunt, causam aduentus sui aperiunt: sed pacem inter dissidentes nullatenus componere potuerunt. Abeuntes ergo sine concordia vel pacis effectu tristes, cum nauigio venissent paululum supra villulam Rotenkirchen, omnes capti, & nescio quorsum fuerunt abducti. Iam enim Palatinus odio habebatur à Capitulo, à ciuibus, & omnibus terræ nobilibus, propterea quod Archiepiscopo adhæsit. Cuius odii prima causa fuit violentia, quam fecerant his qui bona Ecclesiæ tenuerant impignorata, quæ sine pecuniarum solutione occupauit omnia.

Rotekirch.

Anno prænotato circa festum S. Martini Episcopi Palatinus Comes Fridericus missis exercitibus suis castellum quoddam nomine Dissau in Bohemiæ nemore situm, in quo prædones latibula sua habere solebant, obsedit, cepit ac funditus destruxit: latrones in eo repertos interfecit, & dominum castri ad Amberg misit captiuum. Itaque superatis hostibus pacem bello comparauit, & ambulanti-  
bus in principatu suo itinere purgauit.

Dissau.

## ADDITIO. Versus desuper facti tales:

*Non solum Rheni te patria vasta veretur,  
Nec satis esse putas sylua Ottonis dominari,  
Finitimisque locis, quibus est tua cognita virtus:  
Sed tua maiestas simul est perspecta Bohemis.  
Namque illis Dissau cepisti nudius arcem  
Deuastans penitus, ac deprensos nece tristi  
Illico condemnans: quoniam factis meruere.  
Perversumque caput, pietas cui magna pepercit,  
Nunc Amberga tenet loris ceruice reuinctum.*

## M CCCC LXXIII.

Canonici maioris Ecclesiæ Colonienfis contra Rupertum Archiepiscopum suum iam propter spoliū à sede Apostolica ad eorum instantiam excommunicatum Hermannum ex Landgrauis Hassiorum Canonicum suum Ecclesiæ beatæ Mariæ semper virginis in regali oppido ad Aquasgrani Præpositum, in gubernatorem & administratorem Ecclesiæ suæ constituerunt: qui erat vir non solum nobilitate præcipuus, sed etiam prudentia, consilio & actione præclarus: qui etiam Ruperto postea in Archiepiscopatu successit. Huic mox gubernatori facto Nouesii, Andernachii, Bunnani, & plerique alii deficientes à Ruperto fidelitatis iuramenta præstiterunt: quorum suffultus auxilio non pauca breui castella Ecclesiæ obsedit, & cepit sibi & Capitulo memorato potenter, nulloque resistente subiecit.

Hermannus.

## M CCCC LXXIII.

Hoc anno Philippus Comes Palatinus Rheni, Bauariæque Dux, Ludouici Pii Principis Electoris quondam filius, uxorem duxit Margaretham Ludouici Ducis cognomento Diuitis filiam, sororem Georgii diuitis: & in oppido Amberg nuptias in dominica Quinquagesimæ solenni pompa celebravit, anno ætatis suæ vicesimo sexto. Ad regimen tamen paterni principatus, quamdiu vixit Fridericus patruus, non peruenit. Superuixit autem post eius coniugium tutor ipse Fridericus annis tribus.

Philippi Palatini nuptiæ.



ADDITIO. In has nuptias hoc carmen scriptum.

*Plaudite iam procures, latas ignobile vulgus  
Voces effundat, festos celebrans hymeneos,  
Qui Margaretam omnis virtutis simulacrum  
Cogunt felices thalamos intrare Philippi.  
Dux Ludouice potens, fortis gaude & Friderice.  
Diuos connubium dabit hoc spectare nepotes.  
Margareta virum sortita est tempore fausto,  
Quo non est melior, nec est formosior alter,  
Dulcior alloquio, factisque benignior ipsis  
Vita non fruitur. Latas ad sidera palmas  
Tuque Philippe refer : tibi est castissima coniux,  
Moribus insignis, præstanti corpore quasque  
Præcellens nymphas cretas de sanguine claro,  
Te sobolis pulcræ dulcem factura parentem.*

Anno 1514. Margaretha verò Philippi uxor, peperit ei filios & filias subsequentes, Ludouicum primogenitum, qui patri succedens in principatu hodiè \* dominatur : Philippum Frisingensem Episcopum : Rupertum ducem, qui habuit uxorem filiam ducis Georgii auunculi sui, & obiit ante patrem : Fridericum qui hodiè sine uxore tutorem se gerit filiorum Ruperti fratris ante dicti : Georgium Episcopum Spirensen : Henricum præpositum S. Albani Moguntia : Ioannem Episcopum Ratisponensem : Wolfgangum Canonicum Herbipolensem. Filiarum ista sunt nomina : Elifabeth, primo nupsit Landgrauio Hassiæ Wilhelmo quo sine liberis mortuo data est in coniugium Badensium Marchioni Philippo : Amalia, & Helena quarum altera nupsit duci Merckelmburgensium, altera verò duci Pomeranorum & Stetinenfium : Catharina monialis est nostri ordinis in cœnobio Neuenberg propè Heidelberg Wormatiensis diœcesis. Porro Barbara cum esset annorum quatuordecim, virgo moritur : & Otto Heinricus in pueritia sua obiit. Reliqui hodiè adhuc viuunt omnes.

M CCCC LXXVII.

Friderici obitus.

Anno duodecima die mensis Decembris obiit Fridericus Comes Palatinus Rheni, Bauariæque Dux, tutor Philippi, frater iam dictæ Mechildis, Ludouici quoque patris Philippi & Ruperti Archiepiscopi Colonienfis : cuius corpus in habitu fratrum minorum apud eiosdem in oppido Heidelberg sub marmore cælato, in absidula dextrorsum, solemnî pompa fuit sepultum. Magnus Princeps, amator Cleri, defensor pauperum & viduarum, Ecclesiarum aduocatus integerrimus : qui tanta fecit, quanta nullus in Germania Princeps in trecentis retrò annis, pro pace & defensione suorum omnium, adiutorium eius postulantium. Qui (ut mea fert opinio) si Romanorum fuisset Imperator, non tot regna, tot prouincias, tot urbes à Christianorum dominio Turcus rapuisset ; aut si Imperator fuisset, qualis iste erat. Quo mortuo excellentissimus Princeps noster Philippus Palatinus, hodie feliciter imperans, paternum ducatum quem ille post obitum patris tutorio nomine gubernauerat annis XXVI. regendum hoc ipso anno suscepit, annum ætatis agens XXVIII. Princeps inclytus, mansuetus, ingenio clarus & subillis, non minus consilio quàm armis valens, amator pacis & subditorum suorum defensor & tutor accerrimus.

Philippus Palatinus succedit.

ADDITIO. Apotheosis Friderici Palatini.

*Tanti fama ducis, totum celebrata per orbem  
Compulit, ut cælo collocet ipse suo  
Jupiter : atque tuum pateat iam nomen Olympo,  
Agmine quod fortes Marte viros superas.*



*Sic ego dum radiis nomen \* fulget ab alto,  
 Protinus exarsi, quo tua sacra colam :  
 Nomina grata Deis, Musisque dicata serenis,  
 O Friderice salus & decus Imperii.  
 Aureus in medio terræ notissimus orbe :  
 Arduus astra petens, quo fremit acer equus.  
 Dux Fridericus adest, & inter sidera fulget,  
 Nomen & æternum posteritate feret.*



EOLOGIUM  
 ILLUSTRISSIMI PRINCIPIS FRIDE-  
 RICHI BAVARIÆ DUCIS, COMITIS PALA-  
 TINI RHENI, SCRIPTUM à IACOBO SCHLETSTAT,  
 XII. CAL. FEBRUAR. ANNO  
 M CCCC LXXI.

*Cæsareum pectus tibi cum sit, maxime Princeps,  
 Corpus & Hectoreum, lingua Catonis adest.  
 Munere Alexander tibi, voce cedit Ulysses,  
 Qui valuit summa posteritate frui.  
 Quod si te tantum genuissent prisca parentem  
 Tempora, dedissent vota \* gerenda tibi.  
 Quare age magne Princeps, mihi munus trade rogatum,  
 Ut mea sint grata carmina missa tibi.*

\* f. regna.

*Prouida discutiens iam dudum cuncta vetustas,  
 Humani generis quisquis status esset, eidem  
 Supremum statuit, cuius ditione subacti  
 Transfigerent longam fausto cum fœdere vitam.  
 Ne si tollatur honor & formido regentis,  
 Pessima diffidia crebrò subrepere possint.  
 Nam virtute carens, quamuis turpissimus adsit,  
 Ambitione celer quiniis ad honores anhelat,  
 Preferri cupiens ut iure coherceat imos.  
 Huic voluit veterum prudentia magna mederi,  
 Virtute egregia quicumque sit accommodatus,  
 Refrenans alios regnum prælatus haberet.  
 Ergo Ludouicus omni virtute probatus,  
 Qui quondam fuerat illustris sanguine multum  
 Bauarico, reges superans virtutibus omnes,  
 Præfuit his terris summa cum laude gubernans.  
 Is pius, is iustus, populo veneratus ab omni,  
 Plangitur emoriens, & magnum sentit amorem  
 Mæstorum procerum, quos mors fecit sua tristes.  
 Verum lætitiæ cunctis spes unica præstat,  
 Quam fuit amplexus dum viueret, inclita virtus  
 Quæ facit ut iunctum superis hunc nemo vacillet.  
 At patris effigies nobis Philippe superstes  
 Mansisti, sectans virtutes crebro paternas,  
 Quem natura dedit vultus splendore venustus,  
 Sideris oculis, cultu quoque præditus omni :  
 Quoslibet in magnum vehementi laude fauorem*



Allicit ille tui, nec te quoque amasse\* :  
 Quosque piget ut ament, faciei forma coerces.  
 Namque tibi hac animum proficitur inesse benignum,  
 Præ se fertque palmam magna virtute venustam.  
 Et quia virtutes tua mens amplectitur omnes,  
 Prosequiturque imos placide coniunctio mitis,  
 Et tua Maestas est visa tyrannidis expers;  
 Non inconsulto subiecta caterua tuorum  
 Te colit, expectat, te diligit, & veneratur :  
 Et tibi congaudet, amat, applaudit, fauet ultro :  
 Atque uniuersa tuas clamat Germania laudes.  
 At non immerito præconia talia seruas,  
 Cum teneris, ut erat laudabilis indoles, annis  
 Quæ tibi rectorum mandabat idonea turba,  
 Ipse memor fueras studiosa mente secutus.  
 Jam didicisse senem, iam iussa salubria quondam  
 Auscultasse iuuat, nam regna futura requirent,  
 Tum princeps aderis populo gratissimus omni,  
 Tum tua vota tibi subito feliciter omnes  
 Explebunt auidi, monitis parere veloces.  
 Omnibus in rebus nunquam diffidere fas est  
 Insigni tecum duce patrone Friderico.  
 Is pater optatus regimen tibi nato beatum  
 Suggestit, atque docet præsens incumbere Marti.  
 Ipse Philippe tuas virtutes semper amauit,  
 Et sua cura tibi regnum noctesque diesque  
 Amplificare studet : hunc tu sectare parentem.  
 O Friderice tuas iam pridem accedere laudes  
 Philippus statuit, mores virtutibus ornans.  
 Non illum quisquam venturis Hercle diebus  
 Degenerem dicet, patris at similem Ludouici.  
 Nuper enim Princeps dum Marte inimica secundo  
 Oppida dirueres, arcesque & hostibus armis,  
 Philippus constans, bellis aptissimus, atro  
 Confecta noluit audax euadere tyro.  
 Sed tua non certi prudentia nescia fati  
 Illum nolebat atroci exponere damno.  
 Hæc sunt iudicia senii spectata salubris.  
 Gesta etiam multum doctus iocunda palestra  
 Cernitur in theatro cunctos superare coxuos.  
 Nemo illi par est : in propatulo magis unquam  
 Nemo insedit equos placide, quibus ardua ceruix,  
 Et iuba dependens, & robore pectus amœnum.  
 Hic ubi magna suis hastilia sumserit alis,  
 Et lato fuerit umbone in pectore cinctus,  
 Et gressus celeri concurret rite caballus  
 In pugilem aduersum, quanquam sua pectora tundat,  
 Is fixus residet, deorsum nec corpore nutat.  
 Nonnunquam gladiis comites vibrantibus apte  
 Ne tactus obsint, aduersaque pectora ledit.  
 Quid iuvat, o Musa, longis ambagibus uti,  
 Ut morer illustrem summa virtute Philippum ?  
 O felix Princeps, o vasti gloria mundi,



*O decus excellens, ô summo dignus honore.  
 Quæ tibi non insit, virtutem nemo recenset.  
 Imo tuis manibus quacunque negocia tractas  
 Sunt visu placida, quacunque iocunda videntur.  
 Dum quoque frendentes altis in montibus apros  
 Sectaris, te nulla fera vestigia terrent :  
 Aprum qui nudius confosso pectore in undis  
 Letali gladio minimè penetrare timebas.  
 Ergo tui mores, tua mens, tua maxima virtus  
 Vitæque iocunda te cunctis reddit amandum.  
 Latificat pariter omnis spes una Philippe, &  
 Præmia si meritis condigna rependere fas est,  
 Quin tibi regalis præstetur laurea tandem  
 Romani imperii : nam virtutes meruere.  
 Tum tibi gesta canam, temptabo dicere versu,  
 Quæ splendore suo præconia magna requirent.  
 Tu modo quæ Iacobus iuuenili carmine pangit,  
 Et quæ felicitis anni sub nomine mittit,  
 Suscipe, vive, vale longè venerandus in ævum.*



## NOTÆ ET ADDITIONES QUÆDAM, AD GESTA FRIDERICI PALATINI, COGNOMINE VICTORIOSI.

Pag. 327. (*Trithemio scriptore*) Hic familiam Palatinam, cui multum debuit, quantum potuit, calamo suo exornare studuit. Extat eius *Chronicon successionis Ducum Bauariæ & Comitum Palatinorum, ad Philippum Palatinum Principem Electorem*, iussu illius scriptum : quod cum aliis eius operibus Historicis nuper recensum est. Scripsit etiam *De origine, Regibus ac Ducibus Bauarorum, simul & Comitum Palatinorum & Spanheimensium, libros IIII. ad Johannem Comitem Palatinum, & in Spanheim, apud Symeren residentem.* si fidus est catalogus operum eius Polygraphiæ præfixus : nam in Epistola ad Rogerium Sicambrum (quæ inter familiares est num. 51.) scripta anno MDVII. qua omnes eius lucubrationes enumerantur, nulla huius operis mentio. Friderici porro Palatini Electoris laudatissimi Principis, præter quæ de eo in breui illa Genealogia strictim notat, res gestas in Chronico Spanheimensi per annorum seriem cum cura consignauit : postea tamen etiam copiosius & accuratius, in repetita elaboratione Annalium Hirsaugiensium, quos anno MDXIII. in Abbatia sua Herbipolitana de nouo recoxit, & in tantum amplificauit, vt duobus prægrandibus voluminibus descripti, quadruplum primæ editionis, quam solam hætenus vulgatam habemus, conficiant. Inde nos ista excerptimus, cum beneficio Illustrissimi principis Ducis Johannis Palatini Rheni, eos libros precariò teneremus : ne forte Lector putet, peculiarem fuisse à Trithemio libellum Friderico tributum. Habuit tamen etiam proprios rerum suarum scriptores Princeps noster, vernaculo sermone vsos. Inter quos duo eximii fuerunt, vnus Matthias de Kemnaten Theologus, Principis Capellanus, & (vt Trithemius pag. 33. meminit) Mathematicus : alter Michael Bohemus Weinspergensis Poeta : quorum ille prosa, hic rhythmis Teutonicis, vterque ab origine Palatinæ stirpis exorsus, Friderici huius gesta diffusè & copiosè celebrarunt, qui in archiuis Palatinis adhuc conseruantur. Eorundem gestorum diuersæ etiam Epitomæ, incertis auctoribus, circumferuntur. Quæ omnia



partim à clementissimo nostro Principe Electore Friderico IIII. benignè suppeditata, partim ab amicis vltro oggesta, cum diligenter inspexissem; deprehendi iis ipsis adiutum Trithemium, qui proximè ab illorum scriptorum æuo abfuit, ista sua concinasse. Nos illis nunc etiam aliunde lucis aliquid afferre conabimur.

Pag. 329. *Nascitur Philippus*) Huc Genethliacon, ab illius æui elegantia, eodem illo Jacobo (vt videtur) auctore.

*Surge age Calliope, letas de pectore voces  
Cum Musis sociis virginioque choro  
Funde, exultando melos ad sidera profer:  
Jam resonet Phæbus cum cithara atque lyra.  
Ipsi gaudentes voces ad æthera iactent  
Nunc mecum populi, Pæan Joque & Jo.  
Nascitur hac die nam pulcra de stirpe Philippus,  
Dux populi inclitus Diis gratus superis.  
Mille quater centenos & quaterque decem Sol  
Annos cum octo nato Ihesu faceret.  
Illa die moritur sanctus Henricus & eius,  
Spiritus æthereis collocatur sedibus.  
Quem Bambergæ potens tumulto sacrauit & ade  
Ante annos multos fata superna sequens.  
Despiciens qui cælo suos de stirpe creatos,  
Hunc pro se terris omine fausto dedit.  
Gaude igitur felix pietate atque omine tanto:  
Inque patrum dirige gressus & ingenia.  
Disce puer studio virtutem & optimas artes,  
In pace vt patriam iustitiaque regas.  
Sic tibi pro meritis terram multosque dabunt Dii  
Cum liberis annos, æthereasque sedes.  
Ipse ego carminibus (absit modo inuidia) pergam  
Scribere facta tua, te super astra ferens.*

*Ead. quousque Philippus XVIII. compleuerit annum*) Hoc secundum dispositionem Aureæ bullæ Caroli IIII. Imp. S. Inter sollicitudines: Si Principem Electorem seu eius primogenitum mori, & heredes masculos & legitimos laicos defectum ætatis patientes relinquere contigerit; tunc frater senior eiusdem primogeniti, tutor eorum & administrator existat, donec senior ex eis legitimam ætatem attigerit; quam in Principe Electore octodecim annos completos censi volumus & statuimus perpetuo haberi. Quam dum attigerit, ius, vocem & potestatem, & omnia ab ipsis dependentia, tutor ipse totaliter cum officio teneatur protinus assignare. Idem confirmauit Sigismundus Imp. duabus Bullis, à nobis editis cum dissertatione singulari, De legitima Palatini Electoris ætate.

Pag. 329. *Tutor infantis Philippi*) à se adoptati. Æneas Syluius in Europa cap. 40. Mortuo Ludouico Palatino, qui relictam Ludouici Regis Cypri uxorem duxerat, filium ex ea natum infantem adhuc Fredericus frater eius, consentientibus terræ optimatibus, adoptauit: gubernatorem prouinciæ tanquam dominus, Electorem Imperii se dixit: celibatum perpetuum promisit, ne arrogato filio uxorem ducens præiudicium faceret. Rogatus Nicolaus Pontifex v. id genus adoptionis confirmavit, recusauit Fredericus Imperator sæpe multumque requisitus.

Pag. 333. *Latibulum latronum*) Laus Friderici magna, tumultoque eius inscripta, FVL MEN PRÆDONVM. Wimpheling. in Epit. rer. German. cap. 55. Raptores & prædones inprimis exterminauit, eorumque arces solo æquauit, terrarum itinera viatoribus tutissima fecit. Horum quæ illo æuo rabies, & metuenda licentia fuerit, docet Æn. Syluius in Germania cap. 68. Et quamuis adhuc veterum



rum nonnulla rapinarum vestigia maneant, (nam hoc unum est ex prisca barbarie vitium inter vos relictum) non tamen ea pradarum libertas est, quæ olim fuit: nec civitates vestrae prædonibus, si quando in potestatem earum veniunt, veniam præbent, sed eos acerbissimo rotarum supplicio enecant.

Pag. 333. Principatum suum muniuit) Cui rei etiam speculam illam oportu-  
nissimo loco positam, latè undiquaque prospectantem (cui *Trutz-Rauser* nomen  
fecit) militari opere excitavit. De qua vide not. in origin. Palatin. cap. 10. &  
Crus. in Annal. Suevic. part. 3. lib. 7. cap. 10.

Ibid. Ecclesiæ Moguntinæ castrum Schauenburg) Huc pertinent versus, in Tri-  
themio edendo omissi:

Ecce Palatinus Rheni Comes inspicit hostes:  
Hos fugat, hos cedit, multos captivat, & ecce  
Quatuor hic comites nunc captivando triumphat,  
In Moguntinum sic primatem superando  
Hunc Vdalrici Dux Bavariæ Fridericus  
Princeps elector, facit hic animosus ut Hector,  
Gaudia multa tuli, Princeps iustissime, quando  
Mæstum principium gratior fortuna secuta est.  
Terror namque tuum inuasit populum, agmine tanto  
Allecto Furiis quando comitata sororum  
Tartareas liquit sedes, superasque petendo  
Corda sacerdotum stimulis infecit amaris,  
Ac rabie, fera bella mouens. pudor atque pudebit  
Æternum, Christi populum tam perditis actum:  
Consulibus quis iustitia exulat, atque Deorum  
Religio prostrata iacet. pia numina sacris  
Excessere locis: quibus agmina nunc temulenta  
Bacchi, & luxuriosa Venus, Cererisque gulosa  
Turba subit: segetemque ob pinguem turpiter acta  
Turpia committit, Christi perdensque tributum  
Templa Deum violans miserorum sanguine fœdat:  
Et corpus Domini quo nos à morte redemit,  
Quodque pium nobis monumentum & pignus amoris  
Vescendum tradidit, pedibus calcare relinquit.  
Attamen omnipotens pater antiqua pietate  
Æquis hæc oculis, hominum indignosque labores  
Aspicit, & sceptro caput aquæ religionis  
Haud dubitans ferro statuit te. Putrida tabes,  
Atque vlcus sanie aspersum nocuoque veneno,  
Singula ne pestem contactu pecora sumant,  
Rescindendum est ense, ne pars infecta trabatur.  
In partem putridam. \* Nec te terreat armis  
Gens ignava sacerdotum, queis oia cura,  
Et Venus, & Bacchi cyathi longæque popina.  
Martis opus spernunt, nec membra labori  
Sufficiunt tanto: Mars gaudet milite duro.  
Ergo age nunc Friderice potens & religionis  
Perfectum statue, & iusticia concomitante  
Accinctus armis fidum fer pectus in hostem,  
Torpentem ignavia turpi, & stabulis saturatum  
Armentum infectumque gregem pelle atque coerce,  
Donec se Christi famulos & religionis  
Cultores opere & verbo efficiant statuantque.



Namque hæc mens superum est, sic suadent numina Divum :  
 Juppiter ex altoque tuos iam respicit actus,  
 Et iuvat assiduo : cæpto ne desice, testis  
 Est arx clara tuis manibus prostrataque terræ  
 Machina Schauenburg, fususque exercitus omnis  
 Cum castris : pridie cum victor spolia tanta  
 Attuleris, victosque equites in vincla dedisti.  
 Eia age, ne timeas cunctos superare labores :  
 Perfer & obdura, contraque audentior ito,  
 Quam tua te fortuna sinet suprema salutis.  
 Tempus erit cæloque suo pandetur ab alto.  
 Tunc tua facta canam, cæloque adducere temptans  
 Te decus æternum patriæ sine fine dicabo.  
 Invidia quanquam nunc maxima turba tuorum,  
 Quos nutris, tua facta filet : tamen inclyta virtus  
 Opprimi nec poterit, pueri namque agmine tanto  
 Conclamant læti, Mauortia gesta canendo,  
 Queis superas cunctos, nec quis tibi par erit unquam.  
 Neque tuum turpis poterit abolere vetustas  
 Nomen & imperium, decus ô Friderice tuorum,  
 Allecto namque Stygiis sese extulit undis,  
 Corda sacerdotum rabieque infecit amara,  
 Ut bene factoribus bella horrida sicque cruenta  
 Inferrent, atque ingrati immemoresque bonorum  
 Pro pietate dolum, pro melle venena referrent.  
 Quod Deus ex alto conspexit, teque piorum  
 Ultorem statuens, hostem superare volebat.  
 Sicque sacerdoti, dum bella fortia temptat,  
 Armipotens princeps iustumque piumque colendo,  
 Signa rapis, referens spolia ampla ex hoste trophaum  
 Spiritus sancto statuisti, laude perenni  
 Cuncta per ora virum celebrabere carmine nostro :  
 Quod tibi nunc iuvenum depromunt pectora puris  
 Vocibus, & saluum exoptant te tempore longo.

Pag. 334. Regale oppidum Ingelnheim) Huc vide Munster lib. 3. Cosmograph. cap. 128.

Pag. 335. Dietherus per sententiam Pii PP. II. depositus) Naclerus Geneal. 49. Causa priuationis sue depositionis fuerunt, quod scilicet procuratores sui suffulti pleno mandato, dum prouisionis literas obtinerent, iurauerunt in animam ipsius Dietheri, inter cetera quæ Episcopi iurare necesse habent, quod infra annum se Romano Pontifici presentaret : quod (vt asserit Papa Pius) non seruauit. Fertur excommunicationem etiam debiti causa fuisse, quod mercatoribus soluere debuisset. Item quod consecrationem in tempore debito non accepit, & quod simoniace electus fiat. Item quod legato misso ad exigendam decimam contra Turcas dixerat, Papam argentum nationis non fidei defensionem querere. Item quod in natione conuentum Principum contra voluntatem Imperatoris conuocauerat. Item quod à bulla Mantuana super decimatione decreta ad futurum Concilium appellauit. Et iterum, quod appellauit à Papa male informato ad melius informandum : prout hæc omnia in Bulla priuationis continentur, Data 2. Cal. Sept. Anno MCCCC. LXI.

Pag. 336. Strata montensis de monasterio Lauriffensi) Platea montium vocatur in veteri documento, edito in origin. Palat. pag. 51. Ut à Laurissa in Moguntiam fuerit translata, vide Chronicon Laurishamense, in fin. & Append.



Pag. 336. *Fridericum, quod partes Dietheri defenderet excommunicavit*) Huc pertinet illa inter Aeneae Syluii Epistolas 383. *Pius Episcopus, servus servorum Dei, nobili viro Friderico Comiti Palatino, Sacri Imperii Electori S. Quod te dilectum de more filium non vocamus, neque benedicimus tibi, faciunt opera tua: qui & Ecclesiae Moguntinae bona ad te detrahens, aduersus Apostolicam sedis mandata Diethero priuato & anathematizato iungere arma non es veritus, & ulterius publica edicta ponere, ne quis litteras nostras in tuis tentoriis vel publicare vel exequi audeat, mortem ei comminatus qui contra fecerit. Quod nihil est aliud, quam primae sedis & Jesu Christi vicario rebellare. Quibus ex rebus quamvis non à nobis, ipso tamen iure excommunicatus es & extra Christi Ecclesiam factus. Neque dilectus filius appellari potes, neque benedictionis capax habebis: nec tua te tuentur edicta, nec inhibitiones quibus Apostolica decreta prohibes ad te deferri. Non flumina, non montes, non muri, aut alia quauis munitiones, excommunicationis ad te aditum impedire possunt. Dei fulmen est Apostolicum anathema, cui nulla possunt arma resistere. Tu longam epistolam ad nos scripsisti, ut excusares quod fecisti. Sed quanti momenti sint quae dicis, Deus novit, & tu ipse scis: nec ignoramus, iudicat te conscientia tua. Quae te causa mouerit, Diethero tuo prius inimico auxilium prestare contra iustitiam, omnes intelligunt. Potes multa dicere: sed veritas in suo loco manebit. Petis ne credamus inimicis tuis, neue causam tibi demus querendi remedia, quibus defendi possis: & arroganter aliqua per minas subnectere videris. Nos solum operibus credimus, & ea quae palam videmus, non possumus non credere: tua offensio notoria est, & manifesta rebellio. Si te volueris emendare, ut bonum filium decet, Apostolicis obedire praeceptis, utemur pii patris officio, nec redeuntem filium aspernabimur: quin potius vitulum saginatum apponemus, sicut in Evangelio erga filium prodigum fecisse legimus bonum patrem familias. Quod si perges Apostolicam sedem impugnare, & eius decreta contemnere; senties maiorem esse Romanam Ecclesiam, quam vel tu sis, vel quicumque alius, qui tibi opem asferre voluerit. Prudens es, & nosti quae possunt aduersus te fieri: & plane intelligis, quia non potest vinci veritas, & quod iniuste agenti nulla satis tuta possunt inueniri praesidia. Dat. Romae, 7. Calend. Martii.*

Pag. 337. *Convenientibus in unum*) Interueniente potissimum summæ tum auctoritatis Principe, Philippo Burgundiae Duce. Naucler.

Pag. 338. *In agrum Heidelbergensem*) Progressum & circumstantias huius praelii accuratè describit Nauclerus Generat. 49. Sed iuuat ipsius Friderici de ea re nunciam epistolam, ipsa die victoriae ad Ludouicum Bauariae Ducem datam, adscribere. Dem Hochgebornen Fürsten vnserem freundlichen lieben Vettern, Herrn Ludwigen, Herzogen in vnder vnd obern Bayern, 2c. Vnsern freundlichen dienst, vnd was wir liebs vnd guts vermögen, zuvor, Hochgeborner Fürst, Lieber Vetter, Es seind auff heut dato des Brieffs, Marggraff Carle von Baden, sein Bruder der Bischoff zu Metz, vnd Graff Ulrich von Wirttemberg mit einem starcken raisigen zeug, bey acht hundert pferd, in das Rump Heidelberg kommen, vnd allernechst bey Heidelberg angestossen zu brennen. So haben wir vnsern raisigen zeug, zu guter maß heimlichen beneinander gehabt, vnd vnser Freund der Bischoff zu Metz ist heimlich mit drehundert Pferden vnden zu vns gestossen, vnd wir seind den Feinden nachgezogen, vnd ihnen ein fürlass geben, vnd wolten sie in die mitte nehmen. Da seind wir mit dem hauffen zusammen gestrichen, vnd durch gnad vnd hülffe des Allmächtigen Gottes, haben wir die genandte drey gefangen, vnd mit ihnen ein Graffen von Werdenberg, ein Graffen von Sendenwerd, vnd ein von Liningen, vnd sonst viel guter Ritter vnd Knecht. Vnd ist ein Herr von Brandis, ein Graff von Helfenstein, vnd sonst etliche von der Ritterschafft auff der Wahlstatt blieben, auff der Feind seiten. So ist auff vnser seiten niemand, dann ein Ritter Herr Wilsprecht von Helinstatt, todt blieben. Den handel wolten wir ewer lieb nicht verhalten, in dem getrawen, daß ihr das zu grossen freuden gern vernemmet: vnd euch auch in ewren sachen desto füg.



füglicher wiſſet zu richten. Datum Heidelberg, auff Mittwoch Petri vnd Pauli Apoſtoli, Anno 62. Herzog Friderich Pfaltzgraß, Churfürſt.

Pag. 338. *Campo latissimo non procul à Ladenburgo*) iuxta villam Seckenheim hodie dictam, olim Sigenheim, & Sickenheim, super flumine Nechar in pago Lobodunensi sitam, de qua in Origin. Pal. cap. 7. Nec vana coniectura ducor, campos illos patentes eundem locum esse, vbi Gratianus Imp. olim Germana agmina fudit, & vltra Nicrum repulit; vbi tum oppidum habebant Lupodunum, Aufonio teste, quod hodiernum esse Ladeburgum alibi exposuimus. Inde loco & villæ ab insigni victoria factum nomen *Sigenheim*, veluti Nicopoli aut Niceæ: vt alteri villæ Ladeburgo proximæ *Walstat*, à clade & internecione sua luctuosum nomen ab ipsis Germanis tribui potuit. Idem locus postea tot sæculis hac eximia Victoriosi nostri victoria (de summa rei tum ferè agebatur) nobilior redditus est. Vbi in agro prælii conscio, crux lapidea erecta visitur, hac inscriptione: *Als man zalt nach Gottes geburt MCCCC LXII. Jahr, auff S. Paulus gedächtnis tag, seind auff dieser walstatt durch Herzog Friderich Pfaltzgraßen bey Rhein und Churfürsten, nidergeworffen worden, Herz Jörg Bischoff zu Metz, Marggraue Carl von Baden, vnd Graue Ulrich von Wirtemberg, mit einer mercklichen zahl ihrer Diener, Grauen, Herren vnd Knecht. Vnd denselben die in solchem geschefte todt blieben seind, wolle Gott barmherzig sein.*

Ibid. *Cum magno triumpho.*) Sunt qui scribant, parta victoria Heidelbergam reuersum non statim ascendisse arcem; sed prius ingressum templum, flexis genibus ad aram, longo tempore precationem suam ad Deum dixisse, & egisse gratias pro liberatione à periculis. Quo forte respicit versiculus ille, pag. 29. *Dans Domino palmam* (ita legere malim) *propriis non fudit in armis.* Vexilla Principum captiuorum, suspensa ad tholum Templi S. Spiritus etiam hodie visuntur. Peruulgata est historiola, quam tamen in antiquioribus eius æui scriptoribus non reperi, Fridericum deuictos captosque hostes excepisse in prima cœna conuiuio Principibus digno: sed panem apponi prohibuisse. Hunc verò cum poscerent conuiuæ, respondere iussisse; *Non esse iustum illis panem præberi, qui segetes contra belli iura crudeliter vastassent, & frumentum in horreis combussisset, & molas passim igne deleuissent.* Porro victoriam pariter illam insignem, & in ea animi moderationem verè heroicam, eleganti stylo celebrat Petr. Antonius Finariensis, in libello *De dignitate Principis*, huic ipsi Friderico nostro inscripto, cuius verba placet adscribere: *De clementia*, inquit, *qua ad Deum (Demosthene teste) propius accedit princeps, si quis satis dicere vellet, annalibus profectò foret opus.* Nam cum iussu in hostes saure posset, quos iusto prælio captiuos fecerat, clementissimum se ostendit. *Didicit enim iamdudum Parcere subiectis & debellare superbos.* Intelligit namque glorie Principis ac decori non parum conuenire, eos, qui de victoria contendunt, hostes putare, victos verò homines iudicare. *Animi autem magnitudine quàm incredibili valeat, declarauit ea in audita victoria, quam præter omnium spem sua virtute parua manu nactus est.* Fuit enim hoc antiquitati ignotum, posteritati verò incredibile, ut de cuius victoria desperabatur, is se victorem demonstraverit. Is enim optimè tenet, quod Salustius ait; *Antea consulto, deinde facto opus est.* Nam cum iterum iterumque quid factum esset, cogitasset, tum repente in hostes veluti corpore tauri validissimi impetum fecit; vt eos terrore timidos reddiderit: qua re gloriosum & immortale nomen sibi posterisque suis quadam heroica virtute vendicauit. Neque velim tibi persuadeas, huius victoriae partem sibi Fortunam vindicasse. Fuit enim propria sua virtus, qua ad cælum usque tollendus est. Hanc clementiam tangunt illi versus

pag. 343.

*Magnificus Leo versutos subverterat hostes:  
At pietate sua prostratis parcere visus,  
In castrum victos illeſo corpore duxit.*



Pag. 340. Principibus in captiuitatem actis.) Ringente Papa Pio, & mira cum Cæsare consilia clanculum agitante, ut videre licet ex Epistola eius 381. Pius Episcopus, seruus servorum Dei, dilecto filio, nobili viro, Philippo Duci Burgundia salutem & Apostolicam benedictionem. Scripseramus superioribus mensibus charissimo in Christo filio Friderico Rom. Imp. Augusto quam potuimus accuratius, ut causam defensionis Ecclesie Moguntina amplecti vellet, ac operam daret liberationi venerabilis fratris nostri Georgii Episcopi Metensis, & dilectorum filiorum Caroli Marchionis Badensis, & Udalrici Comitis Wirtenbergensis, qui superiori astate rebus aduerse gestis à Friderico Comite Palatino Rheni capti extiterunt. Requisuimus suam Serenitatem, ut adgredi vellet hæc opera, in quibus & laudem & gloriam sibi parare posset. Rescripsit nobis sua sublimitas, animumque promptum quidem & optimè dispositum demonstravit: adiecit autem inter cetera, nonnulla de peruerso proposito Palatini prædicti, eumque accensum contra honorem nostrum & Apostolicæ sedis esse significauit: quodque post inducias Nurenbergæ initas inter ipsos, idem Palatinus astu & dolo nonnullis Principibus & Prælatibus ac communitatibus se coniungere & colligere nixus est, eo consilio, ut Apostolicam Imperialemque dignitatem pro damnabili sua libidine confundere & pessundare posset. Suadet imperator obuiandum esse tantæ iniquitati: & ad conseruationem utriusque dignitatis præ ceteris unam & expeditam viam nobis obtulit, qua via una occurri possit malignitati Palatini & complicitum, & liberatio Episcopi Metensis aliorumque captiuorum procurari. Ea est, ut nos simul cum ipso Imperatore communi nomine Nobilitati tuæ, aut dilecto filio Carolo nato tuo, contra Palatinum & Dietherum de Isenberg, & Comitem de Katzenelenbogen, & illis adhaerentes ac sequaces, capitaneatum committamus, litterasque Apostolicas cum censuris & pœnis ecclesiasticis ad cohercendum rebelles & hostes concedamus. Placuit nobis & placet Imperatoris consilium, idque amplecti animo decreuimus. Sed quia nescimus, quæ si in hac re intentio tuæ Nobilitatis, deliberauimus prius ad te scribere, ut nobis significes, quid intendas. Nam si noverimus tibi cordi hanc rem esse, alacri animo Capitaneatum huiusmodi, ut Imperator censet, deferemus. Nobis enim gratum supra modum futurum est, ut Nobilitas tua aut filius tuus onus assumat: & ut assumere velit, affectuosè hortamur ac requirimus: id etiam postulantes, ut super ea re tuam intentionem nobis notam facias. Si eam acceptandam duxeris, nos confestim litteras Apostolicas ad te transmittemus: confidentes nihilominus, quod propter hoc non deseres religionem Christianam, quin ei contra Turcos (ut sæpe pollicitus es) auxilia opportuna ipse præstes. Erit igitur prudentia tuæ examinatis rebus id consilii capere, quod dignum sit tanto principe, & quod tibi & domui tuæ laudem & gloriam afferat. Ceterum ex ipsius Imperatoris litteris leto animo accepimus, eum decreuisse, nostra præsertim contemplatione, concedere tibi Regalem inuestituram: super quo in tui fauorem sæpius ad Celsitudinem suam scripsisse meminimus. Et non hoc tantum facere deliberaffe, sed etiam affinitatem tecum contrahere ratione filii sui & filie tui nati; ac tibi Vicariatum Imperii in terris Gallicanis ultra Rhenum concedere statuisse. Quod profectò nobis est gratissimum: idque Serenitati suæ & Generositati tuæ prosperum & felix esse optamus, ad pacem & perpetuam consolationem utriusque vestrum, ac sedis Apostolicæ & Christianæ religionis conseruationem & augmentum. Datum Romæ apud S. Petrum, Anno incarnationis Dominicæ M. CCCC. LXII. XIV. Calend. Februarii, Pontificatus nostri anno V.

Extat elegans oratio gratulatoria per Iohannem Camerarium Dalburgium Episcopum Wormatiensem nomine Philippi Palatini Electoris ad Innocentium VIII. Pont. Max. habita, stylo Rodolphi Agricolæ conscripta, qua noster Fridericus de hac apud sedem Romanam contracta offensa purgatur. Ludouici frater Fridericus, Philippi per atatem tutor, difficile diiudicatu est, prudentior, fortior, an felicior fuerit: qui crebro admodum collatis cum hoste signis cum præsens ipse dimicauit, victoriam quæ natura incertissima est, ut ubique industria sua certa esset, virtute perfecit. Quindecim Germaniæ Principes bellum illi uno eodemque tempore cupidissime indixerunt. Id cum acerrimè gererent, inferrentque, tres ex eis una acie



victos cepit, eoque res perducta est, ut conditiones pacis à nullo acciperet, omnibus daret. Primus is veterem rei militaris disciplinam, quantum temporum ratio passa est, renovavit. Primus Germaniam post Augustum Cæsarem purgare latrocinis est adorsus. Fuit tempus, quo similitudine & factione hostium coactus est, de se præbere alienioris animi in Sacram hanc sedem opinionem. Paruit tempori, & urgenti se necessitati cessit. Postea verò quam datus est liberior de omnibus cognoscendi locus, tum quidem est illius accepta accusatio, præstititque deinde, quod semper ante præstiterat, ut Ecclesiam Romanam nullo in loco fidei obsequiique sui pœniteret.

Pag. 344. Cultor & amator iustitiæ.) Petr. Antonius Finariensis eodem loco: Qua verò iustitia, qua animi prudentia, qua continentia, qua constantia omni iure utatur, satis perspicuè intelligi potest, quod nulla turpitudine admittitur. Unicuique quod suum est, tribui vult: benemerentes autem & officio & favore prosequitur: malos verò (quod Iustitiæ plurimum convenit) maxima pœna dignos esse existimat. Nihil enim die noctuque cogitat, nisi quod ad suam immortalem dignitatem spectare cognoscit.

Ibid. Curiale Iudicium) supremum totius Palatinatus Rhenensis tribunal, ad quod ab omnibus totius provinciæ iudiciis appellatur, quodque omnes Principis ministri & officii agnoscunt: neque inde ad Cameram Imperialem ab exteris appellatur, infra magnam summam priuilegio Cæsareo definitam. In hoc cum nos etiam iudicio Principis clementissimi quatuordecim totos annos Assessoris locum tenuerimus, visum nostris oculis memorabile & perpetua laude dignum eius factum hoc loco memoriæ posteritatis consecrandum duximus. Anno enim superiori M. DCI. XV. Cal. April. cum cognitis examinatisque causis controuersis, dictatas decretorias sententias complures solemni more promulgaturi essemus; absente tum legationis Polonicæ causa dignissimo Præsidente nostro D. Hyppolyto à Collibus, ipse Princeps serenissimus Fridericus Palatinus IV. Elector, proceribus suis cinctus in confessum venit, tribunal ostro stratum occupauit, sceptrum tenuit, & ut verbo dicam, iudex sedit, dum sententiæ ex breuiculo recitarentur: atque ita non minus se iustitiæ religiosissimum, quam armipotentem Ducem & facto ipso, & eleganti ad assessores suos sermone extemporaneo comprobauit. O digna posteritas magni illius cognominis Victoriosi, primi huius Curiae conditoris! cuius memoriam pariter & saluberrimum institutum hoc exemplo honoratum, Manes ipsi Herois lætabuntur.

Pag. ead. Prudentum stipata caterva.) Quos inter eximium virum habuit Matthiam Roming Bauarum, Curiae suæ Cancellarium: qui prudentiæ virtutisque suæ merito in Præsulem Spirensensem euectus, successor D. Iohannis Nix de Hoheneck, sub quo multis modis pauperatam & damnificatam Ecclesiam refecit & restituit. Ad hunc quoque scriptum à Iacobo illo panegyricum non omittemus: iterum testati, unico exemplari vitiosissime scripto usos, hac vice emendatiora dare nos non potuisse; duros si quis correctius amice suppeditet.

En spaciola tuas cantat Germania laudes,  
Optime Matthia, Spirensis & inclyte præsul.  
Copia virtutis in te processit auita:  
Quo sit ut ingenue summo fungaris honore.  
Non tu degeneras patrum vestigia sectans,  
Ac superas ipsos virtutibus accumulatus.  
Omnibus in rebus tibi cura est semper honestas  
Fluxis illecebris crebro cælestia præfers.  
Præsulis officio quacunque negocia tractas,  
Ad superum nutus ea cuncta referre videris.  
Hic labor, hoc opus est: hic per singula finis  
Insertus cordique tuo, non ledere Diuos.  
Quid verbis opus est? tua laus immensaque virtus



Diuum religio, morumque elegantia grandis,  
 Magnus honos, omnem dudum penetravit in orbem,  
 Et quos inuisa nonnunquam torquet egestas,  
 His tu praesul opem speratam sedulus adfers.  
 Dii dent inter eos demum valeam numerari:  
 Ne dum fautor ades his qui coluere Minervam  
 Sed veterumque frequens monimenta salubria versas.  
 Ergo ex canonibus es magnum fulmen adeptus.  
 Quod sint vera tua prorsus praemia fama,  
 Magnanimus Leo dat, cui te coniungere maus,  
 Quo tibi contingat virtutum copia maior:  
 Quam plerisque comes nunc apparere tyrannis.  
 Spectatis iunctus fiat, bonus ipse, necesse est.  
 Id voluens animo diuum sectare Leonem.  
 At properare dolor me nunc ad certa coegit.  
 Conqueror ecce tibi maestus, iustissime Praesul:  
 Ecce modo parui iucunda poemata vatum,  
 Quae fuerant rebus quondam praelata caducis.  
 Gaudebantque sui scriptores aere tributo.  
 Hinc vita egregia veterum: nunc undique nostrae  
 Tempestate putet omni uenerabilis aeo.  
 Et modo Caesaribus priscis laus nulla daretur.  
 Nam sua iam dudum non cognita gesta laterent,  
 Si non scripsisset vatum diuina caterua.  
 At subit in mentem, quare tam poemata rogat  
 Nunc aspernari pariter conantur inertes,  
 Ut docti ignoto vab indulgere labori  
 Tamen carmen vacuum mendeque pellacie fedant  
 Dicere nam temptat artis cuiuslibet experts  
 Magnanimum laude dignissima gesta virorum.  
 Carminibus lectis ubi menda videtur inesse,  
 Incutiunt scripta regi vitiosa pudorem.  
 Et multi sparsim lustrando volumina vatum  
 Inconcinna solent connectere carmina stulti  
 Cunctaque finxisse mentitum lingua superba  
 Maiorum scriptis famam mendica requirens.  
 Nec dubito quin saepe meos clam nebulo versus  
 Esse suos iuret: tum scribere plura rogatus,  
 Mox supplex nostrum desiderat ille laborem.  
 Ergo spectatos nunc explorasse poetas  
 Cura sit, o Reges, qui semper idonea scribant  
 Carmina mandantes praemia posteritati,  
 Quae vitae integritas & praelia vestra merentur.  
 Magnus Alexander proficisci dedecus in se  
 Sentit adhuc stulte scribentis carmina vatis.  
 Jaetabat Cherylus sese olfecisse Poesin,  
 Gesta palam regis Mauortia scribere tentans:  
 At miser indigne palma calamum sibi sumsit,  
 Contaminans temere nulla formidine cartas.  
 Sic ego non dubitans itidem conscribere versus,  
 Viribus ingenii discussis, ultro peregi,



*Quæ laudi & fama, quæ summo semper honori  
 O tibi fortis erunt Leo, nobilis omne per ævum.  
 Virtutes cecini simul & præconia Martis,  
 Et sanctum regimen, quo gens tua freta bonum  
 Se noctam dudum rectorem sentit apertè :  
 Cuius Maestas & laudes sidera tangunt.  
 Nec minus ipse tuam, Præsul clarissime, famam  
 Sæpe dicabo tibi numeris utcumque peractis.  
 Plura supervacuum me iam dixisse putabo :  
 Ingeniumque tuum rursus obtundere nolim,  
 Nobilis antistes. tua iam me scribere virtus  
 Impulit, & pietas, tibi quam fert rumor inesse,  
 Me facit audenter versu conscribere retro.  
 Ergo Matthia tibi mea scribit inertia carmen.  
 Tu miserum clemens scriptorem suscipe Præsul :  
 Nec tua me virtus immensa repudiet, oro.  
 Sedulo namque tuas decrevi scribere laudes.  
 Tu modo quæ cecini prima lanugine cinctus,  
 Præsul magnifice, iam suscipe mente benigna.*

Habuit Fridericus & alios sapientes consiliarios, Dietherum de Sickingen, Henricum Ieger Protonotarium, & præcipuum quendam M. Johannem Ernst Custodem Ecclesiæ Wormatiensis. Cuius hoc extat Epitaphium :

*Paruit Ernst fatis Marcelli luce Johannes,  
 Justitia cultor, & leuitate carens.  
 Prudens, maturus, solers, grauis atque modestus :  
 Cognomen rebus conueniens fuerat.  
 Is tibi consilio semper Leo fortis adhaesit,  
 Prouidus in causis singula iura colens.  
 Conduxisse tibi sua cum prudentia visa est,  
 Nobilis ô Princeps, hunc obiisse doles.  
 Marcelle nocte tua lux Ernst deficit à te.*

M CCCC LXXIII.

Pag. 349. In expugnatione Durckheimensi.) Huc pertinent carmina, quibus reuertentem è bello Principem filii sui Fridericus & Ludouicus, de reditu eius gaudentes, adorti sunt :

*Salve iuste parens, genitor charissime salve :  
 Aduentusque tui sit tibi fausta dies.  
 Qui redis ad natos illaso corpore felix,  
 Quique euasisti tanta pericla necis.  
 Felix plaude pater, & te venientibus ultrò  
 Fortunis offer. Dii tibi plura dabunt.  
 Sic tibi mens hilaris, pater ô charissime, gaude :  
 Quem superimites semper amare solent.  
 Ecce reluctantes inimicos quosque refrenas,  
 Frangis & insidias quas statuerè tibi,  
 Arces expugnas, & strenuus oppida deles :  
 Castra tuis manibus nunc inimica cadunt.  
 Vi capis ingenuos, & domas Marte nefandos :  
 Omnibus in rebus tu pia iura colis.  
 Jam Dorckem petulans tua vis compefcuit : ergo  
 Maestas Comitum iam quoque mæsta gemit.*



Nobilium quanta fuerit stipata caterua,  
 Non datur ô genitor dicere carminibus.  
 In te iam pridem statuit diffundere bilem  
 In Ratispona Caesaris ira sui.  
 Illic ecce Duces ferus accusauerit omnes,  
 Et petere in Turcas se simulauit opem.  
 Ac tibi succensens, cinctus liuore maligno,  
 Tandem te aduersum quaque mouere studet.  
 Suintenses, superos, Acheronta laceffere (ut aiunt)  
 In te conatus: sed labor eius iners.  
 Nam non ex facili tua \* praterita virtus:  
 Illa sibi constans iustitiam sequitur.  
 Si libet, ô Caesar, abs te propellere Turcas:  
 Nostri nunc patris quare Leonis opem.  
 Hunc palmam breuiter latam cernes adipisci:  
 Quo sine bellantis nil tua cæpta valent.  
 Nonne pater fortis tua laus iam sidera tangit?  
 Nonne tibi vera nos iuuenes canimus?  
 Cum bellis superes tanquam fortissimus Hector,  
 Hostes inuadas ut Leo magnanimus.  
 Nemo tui similis ex vasti Regibus orbis.  
 Quem tua plebs vellet semper adesse sibi.  
 Ergo letamur: iidem lateris oportet:  
 Nam DEUS inprimis est tibi subsidio.

Et ne hos Principis filios silentio prætereamus, elogium eorum tale in eodem codice reperimus:

Jam Palatine Comes, fortis Leo, maxime Princeps,  
 Indoles ecce volat passim diuina per orbem  
 Natorum iuuenum, Friderici cum Ludouico.  
 Corporis effigies resplendet Apollinis instar:  
 Ingenium procax, studii præclara cupido,  
 Ingenii mores, industria nobilis, illos  
 Condignos laude facit & super æthera tollit:  
 Præferri reliquis iubet & fama reuereri.  
 Hi mox, ut fas, auscultant iussa magistri,  
 Semper eos habiles spectati sufficientes,  
 Vberibus multum doctrinis erudierunt:  
 Quæ sunt ventura virtutis idonea signa.  
 O letare parens, cuius & stirpe creantur  
 Filioli tales, quorum molitur uterque  
 Virtutes patrias amplecti. Jam Leo plaude.  
 Vos teneri iuuenes diui curate parentis  
 (Namque decet) iussa cum fronte capeffere leta,  
 Sicut cæpistis studiosi pergite: rursus  
 Pergite solliciti crescentes tempore floris.  
 Nouit enim senium, iuuenilis quod capit ætat.

Horum Trithemius ita meminit in Genealogia Palatina: *Fridericus Comes Palatinus non habuit uxorem, nec heredes legitimos reliquit: filios tamen duos genuit ex quadam Clara (Dettin cognomen fuit) quorum primus Fridericus in Ecclesia Spirenſi Canonicus fuit, secundus Ludovicus Comes in Leuuenſtein factus, adhuc bodie vivit. Sunt qui dicant, eum cum præfata muliere matrimonium (forte ad morgaticam)*



naticam) in facie Ecclesie clandestinè contraxisse. Quod & tetigit supra pag. 5. Eius Friderici Canonici Epitaphium iuxta paternum visitur tale : Anno Domini MCCCCLXXIV. ipso die Galli obiit venerabilis & nobilis dominus Fridericus, illustrissimi Principis & Domini, Domini Friderici Comitis Palatini Rheni, Ducis Bavariae S. Rom. Imperii Archidapiferi ac Principis Electoris filius legitimus, Ecclesiarumque Wormatiensis & Spirensis Canonicus : cuius anima requiescat in pace.

Pag. 350. Animum grebat indignabundum. ) Duravit animi ille rancor ad utriusque successorem. Ita enim loquentem Maximilianum Imp. de Philippo Palatino, inducit Ricardus Bartolinus lib. 3. Aufriadus.

- - - - Stat Pallatinus in alta  
Arce ferox, nostrisque inhiat violentior arvis.  
Nec quemquam timet, & iam formidabile bellum  
Illum oratores referunt pugnamque futuram  
Moliri impavidum : ac frustra repetuntur ab illo  
Nostras quas tenuit sedes. Hagenoia tellus  
Testis erit nobis, & iam pridem oppida capta  
Antiqua Hellsatia. Vobis quot & abstulit urbes,  
Colligite : atque utinam falsum sit, latius acrem  
Instruit hic animum, & vi parto degere nescit :  
Vestra nisi hunc contra virtus insurgat, & iram  
Arceat, atque sui regni intra limina cogat.

Pag. 350. Conventum Principum Ratispona) In eo ad Fridericum nostrum pertinentia hæc eruo ex epistolis inde scriptis Iohan. Antonii Campani ad Iacobum Cardinalem Papiensem Epist. 8. Altera fuit contentio Spirensis Episcopi, qui primum nomine Colonienfis acceptus in conventu inter oratores Electorum confederat : sed ubi Colonienfis ipse (Rupertus nimirum Palatinus) advenit, iam Palatini loco se gerens, vetitus à Cæsare est, ne ubi prius, hoc est Electorum gradu locaretur : quod nec decreto suo Palatinum Electorem esse contenderet, nec oporteret duos simul fratres potestatem habere Cæsaris eligendi. Epist. X. Continuo deinde multis diebus acta est causa Palatini : graues diversæque accusationes, æque magnis defensionibus audita. Epist. XI. Causa Palatini ad hanc diem nequicquam diu multumque acta inturbat omnia : & rumor est, coegisse eum quantum nunquam antea exercitum. Cæsar paucissima videtur concessurus : Spes tamen est in necessitate Cæsaris aliqua. Epist. XII. Capita sunt discordiarum Palatinus, & Cæsar : hic verbis, ille armis rem inturbat : cum alter maxima petat, alter nec minima quidem videatur concessurus. Hos Germani omnes & propinquitatibus & studio partium sequuntur. Multum Cæsari auctoritatis & virium est : Palatino plus animi. Quamquam nec vires habet, qui sic habet, ut non habeat. Etiam auctoritas exigua est, etiam quæ magna, si ministrum desideret. Hæc ille

Pag. 354. Rupertum, qui habuit filiam Ducis Georgii) cuius occasione Palatinatui obortum est triste & exitiosum illud bellum Bauaricum : quod latè describit idem Trithemius noster in Annalibus Spanheimensibus. Idem poetice deducit Ricardus Bartolinus Perusinus in libris Aufriadus. Eam rerum conuersionem & aduersitates, præuisam velut per corneam portam, attigit Iohannes Liechtenbergius in Prophetia sua, cap. 22. ad Philippum Palatinum ita scribens : Dicat iuris naturalis æquitas, probat hoc recte rationis perspicacitas, attestantur hoc annales, quod Principum gesta conuenit conscribere, ne obliuio mater erroris interveniat. Congruit itaque sæpius conspicere eadem, quatenus ex eis elucescat, unde bonus commendetur, & malus vituperetur : ut sic tanquam ex relucens speculo valeant extergere sordes criminum, & immaculatum laudare Dominum. Igitur huius Comitis Palatini intueri suæ exaltationis initium, ut pateat quam honestum fuerat suæ conversationis principium. Nam splendor paternæ gloriæ, & candor lucis æternæ, clare fundens



dens ex aethere thesauros sua gratia in ipsum Comitem Palatinum tam morum quam sapientiae: duos enim micantes radios largifluos per lacteum circulum sua clementia, sic quod praemultis Principibus quasi columna nubis candida Virginalibus esset divinitus missa cis fluvium Rheni. Hic Comes Palatinus non est idololatra, sed verus Dei & Christianae religionis cultor & testis optimus. Quid autem huic iusto pio, clementi principi praesens Eclipsatio portendat, audiat Dominus meus benigno favore. Hic debet volare aquila supra silvam: sub una silva Leo medius videtur, sub alia silva Leo totus videtur, sub tertia Leo absconditur. Cap. XXIII. Saevissima & valde horrenda huius Eclipsis erunt portenta, & longè saeviora quàm ab hominum memoria habita aut visa fuerint; adeo ut à promulgatione significationis eius me prope deterruit: longè namque malitia & saevitate eclipsin illam praecellit, quam maiores nostri Martini Pontificis tempore fuisse narrant, Regibus quidem & Principibus minimè profutura, sed plurimum noxia. Ex quo enim in signo regali & capite fuerit Zodiaci, maximam Regibus & dominantibus iacturam indicit, & contra eos vario infortuniorum genere grassabitur: plurimis quidem ipsorum repentinum & insperatum mortis decernit exilium. O Dux sincerissime, fortunam influxam à caelestibus noli amittere. Tu imitaberis domesticos tibi contrariantes, regem hylly excitabis. Aquilam dormientem provocabis. Leonem sylvestrem adversus Ecclesiam consurgere & garrere facies. Tu in altissimo cacumine scale tuae existis. Aspectum amabilem arripuisti: à leunculis honorem percepisti: nidulos preparasti, leunculos domuisti. Attende quid dicatur. Qui se existimat stare, videat ne cadat. Heu quot lilia in agris tuis succrescent. Nam subditi tui per hanc saevissimam eclipsationem ab inimicis aut emulis opprimuntur. Alii à subditis & familiaribus dominandi causa patientur insidias. Simili modo civitatibus & villulis tuis, gubernatoribus & praesidibus crudeli semper feritate praesens eclipsis obsidet, variisque periclitabuntur insidiis. Alios namque ex honoribus & administrationibus suis cum dignitatis iactura deponet: alios sub principatu tuo turbulentis seditionibus oppressos, popularium manibus dissipatos taliter interimet, ut mortis eorum auctores nec inveniri possint, nec dici. Et ut in summa dicam, cunctis principibus Baioaricam terram tenentibus ac ibidem regnantibus, funesta calamitatis decernit praesens eclipsis incommoda. Hic debet stare Leo supra montem coronatus, & tres Leones secum sub monte. Cap. XXIV. O Princeps illustrissime, qui leonem geris in capite coronatum, liberum omni impedimento: attende (ut Principibus congruit) clementer. Nam iuxta dictum Principis Astrologiae Ptolomaei, vir sapiens praedominatur astrorum influxibus. Praesens eclipsatio praedicat tibi & tuis fortunas varias. Nam tibi & tuis leunculis montensibus maxima gloria conferentur insignia: aut tu, vel de sanguine tuo unus erit equitum dux, aut peditum duces exercitum, aut navale committeretur imperium, aut aliter utcumque apprime equo vectus militares exercebis armaturas, vitæ necisque potestatem adquires. Adventum tuum civitates & castra semper perhorrescent: & nisi Eclipsis contra operaretur, processu temporis omnis felicitatis substantia tibi & tuis accederet. Verum fatidica haec Eclipsis in praecipitium & malæ mortis exitium ducet, nisi prudenter vigila-veris. Quia ab Aquila Leo montensis patietur vix & lamentum. Ergo Princeps illustrissime, necesse est ut siderum interpretes, astrorum iudices, scientes caelestes influxus ruinam principum ac infortunia non cessent praedicere, ut cognoscas unum solum in caelestibus dominari. Mortalitates per gladium, & decollationes, & sanguinum effusiones, quas caelum & stella influunt & indicant, spero sapientes tui, o Dux, reconcilientur. Amicabiles quoque considerationes causa quietis & honestatis intromittent. Influxus enim caelestis aliquorum mentes hominum mulcebit: unde insidiae placabuntur. Difficile enim erit ortas insidias posse ad bella & sanguinum effusiones deuenire, nisi particularis revolutio potenter id impellat. Si quos verò mori contingat, quacunque dictarum mortalitatum, illi de radice Geminorum (ut infra patebit) erunt. Itaque erunt anni plures subintrantes chiliadem praesentem pacifici & prosperi, & satis fertiles compassione iam ad multos praeteritos annos. Patet etiam fortunam prosperam arripam ire his quorum radix est Sagittarius. Hi sunt qui insitiam, honestatem & pul-



chritudinem roboratas lege naturæ pro fundamento habent : occasione cuius commotiones & intricaciones faciunt in usurpatis per Geminos, quæ iustitiæ, honestatis, pacis utilitati derogare videntur. Et timebitur difficultas magna sub principatu tuo, quæ tamen sine laudabili terminabitur. Maius tamen periculum quod tibi vel tuis, ô sincerissime Princeps, imminebit in mancipatione novitatum, in tuis itineribus continget, & in montibus ad loca aliena caballanti. In pactis verò & compromissionibus, fœderibus & ordinationibus tuis plus quam bellis aut exercituum motibus proficient, si non fallor. Leo ergo in montibus securus dormiet, & in speluncis : venatores enim vestigia eius non considerare possunt, nisi in egressu & descensu. Hæc corde reconde, & in terris & oppidis tuis hæc significata continget, & surgent sub tuis novitates cum quadam decentia & pulchritudine. Et quæcunque dicta sunt per me de tua potenti serenitate, intelligi etiam debent de statu & officio & artificio circa populares tuos &c. petens cum humilitate veniam. Sed de sanguine tuo exsurgat maior in regimine. Cæli rotunditas illa parit. Confœderatio tua, funiculus tuus rumpetur : fides, confœderatio frangetur tibi. Adversum te excitabit Aquila bestias regni. Proximi tui exsurgent, & Leunculi parum dabunt fugam, & mœrebunt. Illa arguuntur ex Sole domo earum. In propriis nidulis patientur Leunculi radio solari. Oriente ac radiante sole cætera stellæ Leonistæ obfuscabuntur : & sicut lumina vestra à Sole incendiis, sic eclipsationes, passiones, deiectiones patiimini tempora longa. Hæc ille.

Pag. 354. Turcus rapuisset.) Certè aliquando Turcico bello destinatum fuisse Fridericum, notat Æneas Sylvius in Germania Cap. 67. Per Saxoniam, Sueniam, Franconiamque viri clari sunt, numerosos exercitus ducere idonei. Siquidem & Fridericus Palatinus Princeps Elector, & Albertus germanus Imperatoris, & Carolus Marchio Badensis, digni omnium iudicio existimati sunt, qui copiis in Turcos educendis præficerentur.

Ibid. Sub marmore cælato.) Quod monumentum etiamnum extat, & dignum fane visu. Ipse Princeps in habitu electorali, imperiale pomum dextra tenens, Leonem suppedaneum habens, supernè in saxo eleuato & quatuor columnellis sustentato conspicitur : in saxo autem inferiore quod terræ incumbit, skeleton hominis osseum faberrimè scalptum, mortalitatis etiam maximorum Principum nos admonens. Inscriptio Heroe digna per saxi superioris circuitum legitur talis : FRIDERICUS. BAVARIÆ. DUX. COMES. RHENI. PALATINUS. SACRI. ROMANI. IMPERII. ELECTOR. SALUS. PATRIÆ. PRÆDONUM. FULMEN. TREIS. ILLUSTRIS. HOSTES. VICIT. PRINCIPATUM. AUXIT. ET. PIE. VIVIS. EXCESSIT. ANNO. CHRISTI. M. CCCC. LXXVI. PRIDIE. IDUS. DECEMBRIS. FUIT. EIUS. VITÆ. SOCIA. VIRTUS. GLORIA. MORTIS. COMES.

### Omissum.

Pag. 332. Theodoricus Schenck de Erpach Archiep. Mogunt.) Habuit hic Cancellarium, virum doctum & cordatum, Martinum Maiorem Heidelbergæ oriundum, cuius extat ad Æneam Cardinalem Senensem epistola cum primis notatu digna, & omnino hoc loco adscribenda, ut appareat, eodem tum zelo pro patriæ & Ecclesiæ libertate illum Præsulem laborasse, ob quem postea eius successorem Dietherum idem Æneas factus Papa Pius II. gravissimè est persecutus. MARTINUS MEYR Cancellarius Moguntini Præsulis, domino Æneæ Cardinali Senensi, patri optimo S. P. D. Cognoui ex literis amicorum te Cardinalem esse creatum. congratulor & tibi, qui pro virtute tua digna consecutus es præmia, & mihi, cuius amicus in ea dignitate constitutus est, in qua me meosque necessarios aliquando iuvare poterit. Illud mihi molestum, quod in ea tempora incidisti, quæ sedem Apostolicam afflictura videntur. Nam domino meo Archiepiscopo frequentes afferuntur de Romano Pontifice querelæ, qui neque Constantiensis, neque Basiliensis Concilii decreta custodit, neque se pactiõibus antecessoris sui teneri arbitratur : nationemque nostram



nostram contemnere & prorsus exhaurire videtur. Constat enim electiones Prælatorum passim reiici, beneficia dignitatesque cuiusvis qualitatis & Cardinalibus & protonotariis reservari. Et tu quidem ad tres provincias Teutonici nominis sub ea formula reservationem impetrasti, quæ hætenus insolita est & inaudita. Expectativa enim gratiæ sine numero conceduntur. Annate sue medii fructus absque ulla dilatione temporis exiguntur, & plus etiam quàm debeatur, extorqueri palam est. Ecclesiarum regimina non magis merenti, sed plus offerenti committuntur. Ad corradendas pecunias novæ indulgentiæ indies conceduntur. Decimarum exactiones inconsultis Prælati nostris Turcorum causa fieri iubentur. Causæ quæ tractanda terminandæque in his partibus fuerant, ad Apostolicum tribunal indistincte trahuntur. Excogitantur mille modi, quibus Romana sedes aurum ex nobis, tanquam ex Barbaris, subtili extrahat ingenio. Ob quas res natio nostra quondam incluta, quæ sua virtute suoque sanguine Romanum imperium cõmit, fuitque Mundi domina ac regina, nunc ad inopiam redacta ancilla & tributaria facta est, & in squalore iacens suam fortunam, suamque pauperiem multos iam annos mæret. Nunc verò quasi ex somno excitati optimates nostri, quibus remediis huic calamitati obuiam pergant, cogitare cœperunt; iugumque prorsus excutere, & se in pristinam vindicare libertatem decreverunt. Erit hæc non parva iactura Romanæ curiæ, si quod cogitant, Germani Principes effecerint. Quantum itaque de tua nova dignitate lator, tantum commoveor & angor tuo tempore hæc parari. Sed Dei fortasse alia est cogitatio: & illius profecto sententia obtinebit. Tu interim bonum habeto animum, & quibus repagulis fluminis impetus coherceri possit, pro tua sapientia cogitato, & vale optimè. Ex Haschaffenburg, pridie Cal. Sept. MCCCC LVII. Vixit eodem tempore & alius Theodoricus de Morla Archiepiscopus Coloniensis eodem (ut videtur) zelo affectus, ad quem idem Æneas Cardinalis ita scribit epist. 305. Certificatus est dominus noster Pontifex, in conventionibus quæ in Germania fiunt, aliqua tractari quæ hanc sedem concernunt. Oro ne tua circumspectio his aures adhibeat, qui novitates efficere cupiunt, ut vel sic emergant. Namque si Romanæ sedis auctoritas deprimeretur, credito quia nec tua nec aliorum Episcoporum salva manebit. Audito tamen quæ consulis, ut hic quoque ea reformentur, quæ odium tuæ nationis pariunt, & ego si vox mea audietur, ad id operam dabo. Nam & hic aliqua committuntur, quæ non laudo omnia. Verum illud salubre puto, ut super gravaminibus quæ vestri allegant, ad Romanum Pontificem recursus habeatur: qui non negabit assensum iusta petentibus. Vnde apparet, quæ causâ Fridericum nostrum mouerit, ut pro libertate patriæ contra machinationes Pontificias tuenda nec ipse cessaret: cum toto Rheni tractu gravaminibus illis Germania ingemisceret, nec iam per legatos Pontificios ultra demulceri posset. Ex illis fuit Laurentius quidam Rouarella, ad quem idem Æneas ita scribit epistola 334. De negotiis Rheni multa referuntur non bona: propter quæ necessarium erit, ut quamprimum cum consilio Imperatoris & cum litteris suis ad partes illas te transferas, & labores iuxta commissionem tibi traditam. Interea bonum est ut cures, quod Imperator scribat Archiepiscopo Magdeburgensi, simulque Rigeni, & imprimis Trevirensi & Saltzburgensi, ut si querantur ad aliquam conventionem in factis Ecclesiis, non consentiant, sed ad seipsam omnia referant quæ queruntur: & suadeat, ut si qui sunt qui novitates querant, illis non assentiant, quia periculum est in mora. Bonum est etiam laborare apud Ducem Baviaræ Ludovicum, ut scribat Palatino Rheni sanguineo suo, ne se implicet conventionibus eorum, qui contra sedem Apostolicam aliquo modo moluntur: persuadendo sibi, quod multo facilius filii Principum promovebuntur per sedem Apostolicam, quam per Capitula vel ordinarios. Et hoc bene cura in auribus Principum inculcare, quia veritas est. Vale, & scribe sæpius quomodo tibi succedat. Data Romæ 8. Cal. Decemb. Et hæc ille.



AD EXCELSUM ET INVICTISSIMUM  
PRINCIPEM D.D. FRIDERICUM BAVA-  
RIÆ DUCEM AC PALATINUM  
RHENI,

PETRI ANTONII FINARIENSIS  
LIBER INCIPIT.

**C**um omnes cogitationes & actiones meas, inuidissime Princeps, iam dudum propter tuas singulares ac propè diuinas virtutes tibi me debere arbitrarer: quod tua celebri auctoritate dignum opus esset, cogitare cœpi. Nam cum te sapientissimum principem & eloquentissimum esse, historiisque & antiquorum clarissimorumque virorum exemplis (quibus maximopere delectaris) abundantem, honestissimis moribus præditum, antiquissima prole natum, ætatis & consilii plenum intelligerem; neminem mortalium reperiri posse rebar, qui quod illis innumera bilibus tuis virtutibus conuenientissimum foret, tractare ac dicere posset. Hæc omnia diutius mihi cogitanti, penè ab instituto me reuocauit. Nam cum apud Celsitudinem tuam de huiusmodi rebus tractare constituerem, in quibus à teneris unguiculis versatus es; verebar maximopere, ne in id inciderem, quod ab Annibale de Phormione ferunt antiqui dictum fuisse. Sed cum à tua diuina mente humanitatem haud esse alienam acciperem, ea nimirum fretus: quod de Principum dignitate à magistro Iodoco Kalb. S. Theologiæ Doctore, & magistro Heinricho Munsiger experto Medico tuo disputari audiui, in hunc librum rede gi. In eo enim si quid docti elimatiue excellentia tua legerit, eorum sapientiæ poterit attribuere: id autem quod minus dignum aut incultum libellus hic præ se fert, auctori esse adscribendum haud negare possum. Eum autem, cum sit mei laboris anteacti primum munus, & deuotionis in tuam excellentiam summa plenum, gratum accipere debes. Hortus enim meus cum amplior & cultior fuerit, præstantiores profecto fructus tibi reddet.

**HEINRICVS.** Quæ de Principis Friderici laudibus in medium adduxisti, & vera, & summa memoria digna esse non me later. Sed quoniam de eius celebri ac præstanti dignitate incidisti in sermonem, non arbitror à tuo officio esse alienum, quippe qui pro tua inæstimabili sapientia solitus es sedulò omnem rem & ornatè & cumulatè differere, si de *Principum dignitate*, quod iam dudum audire, & mirum in modum intelligere optaui, nonnihil abs te accepero. Nam cum sit res & nostra ætate, & posteritate digna, & à tua officina haud aliena, facies quod non solum mihi intelligere vtile, sed nonnullis summopere gratum erit, si id quod de ea te sentire cognosco, mihi desideranti significabis. Non enim te fugit, quod diuinus Plato ait, *Ortus nostri partem patriam, partem amicos sibi vendicare*: neque quod Stoicis placuit, *Homines hominum causa generatos extitisse*, à tua mente est alienum. Nam & te ignorare non arbitror, optimum eum esse virum (quod philosophus ait) non qui ad se ipsum, sed qui ad alium vtitur virtute. Etenim Persii illud iamdudum legere debuisti.

*Scire tuum nihil est, nisi te scire hoc sciat alter.* Nam & Homerus omnium Græcorum poëtarum facile princeps, nullam vnquam apud nos laudem sibi vendicasset, si se sibi natum fuisset arbitratus. Neque Demostheni ætas nostra vllam gloriam condonasset, si ea quæ memoriæ nostræ commendauit, silentio præterisset. Quid rursus Ciceroni profuisset inaudita dicendi vis? quid Maroni Musæ? quid Alexandro orbis imperium? quid Scipionibus Carthaginensis triumphus? quid Pompeio nauale bellum, & piratarum faustæ persecutiones? quid Cæsari crebræ victoriæ? quid Octauiano unica pax? nisi literis & monumentis clarissimi viri notam fecissent posteritati? Age igitur, te unice rogo, adgredere id cui pro

tua



tua singulari sapientia, & eruditissimorum virorum exemplis, & rerum magnarum excelsarumque experientia facillimè es satisfactorius, & tuæ virtuti laudem non vulgarem accumulaturus.

**JODOCVS.** Humani hominis officium esse non arbitrarer, qui tuæ orationis suauissimo dicendi stilo non summopere delectaretur. Conatus es enim & antiquorum, & eorum quidem clarissimorum virorum exemplis, & ratione (quæ omni in re maximam partem sibi vendicat) probare, homines haud aliqua laude esse dignos, nisi eam quam aut ingenium aut natura (de his enim locutus es quæ ad virtutem attinent) eis comparauerit, ut futura ætas intelligeret, maximam diligentiam adhibuerint: fuit enim de doctissimorum hominum virtutibus tua facunda & grauis oratio. Non enim negare possum hominem veluti diuinam imaginem præ se ferentem, & animi immortalitate præditum, debere, quod vel natura, vel studium, vel longæua ætas (quæ rebus præsentibus, sanè quod multorum hominum mores vidisse debuit, præterita atque futura solet adiungere) sibi condonauit, siue id ad priuatam siue ad publicam hominum actionem spectet, posterorum sæculorum memoriæ declarare atque significare. Sed quis ego sum, aut quæ est in me facultas, ut de Principum excellentissima dignitate ausim disputare? Nam cum ea per se summa atque immortalis est, quippe quod & gloria & clarissimarum rerum excellentia clareat, sintque Principes tanquam quædam naturæ in terris simulacra, quibus reliquorum hominum dignitates præstant; ita humani ingenii quemquam haud posse inueniri iudico, qui pro rei magnitudine dignum quidquam ea in re non solum differere, sed verbum facere possit. Quid enim Principum dignitate excellentius? quid hoc in orbe præstantius? Non enim meis humeris parem prouinciam vendicasti: etenim doctissimorum virorum sententiis hoc onus commendandum erat. Hi enim etsi omnia, tanquam mortales de immortalis dignitate Principum, ad cumulum dicere non potuissent, tamen me multò subtilius versati ea in re profecto fuissent. Sed cum nostra amicitia, qua iam pridem coniuncti sumus, nihil tam difficile esse mihi persuadeat, quod facile, cum tuæ voluntati morem gesserò, non ducam; de dignitate Principum quid sentiam, ea profecto me dicere cogit. Quamobrem videamus imprimis, quis Principum fuerit ortus, & à quo fonte hanc eorum dignitatem hauserint, paululum inuestigare liceat. Aggrediamur igitur eam, scilicet Virtutem, quam Aristoteles habitum proæreticum in mediocritate consistentem esse dixit. Nam cum de eius vi potentiaque dictum fuerit, intelligemus planè eam fuisse, quæ inter homines maximam constituit esse differentiam. Quid enim aliud (ut reliquos omittam) Saturnum, Iouem, quos Heroas antiqui appellarunt, fuisse quisquam potest arbitrari, nisi homines singulari virtute præstantes? Nam cum ea obscura & ignota antiquitati penitus foret, quippe quod homines æque ac bruta carentia rationis vi ac maiestate viuerent, neque hanc mellifluam, sed asperam iniucundamque vitam præ se ferrent; facillime fiebat, sanè quod humani ab se alienum haberent nihil, ut cuiuspiam egregii viri auctoritati auscultarent. Itaque si inter tam crassa ingenia, inter incultos mores, inter tantam barbariem quis altissimo ingenio, probitatis maiestate præditus oriretur; profecto qui neque DEum solum colerent, neque quid religionis cultus saperet intelligerent, fiebat, ut eum æquè ac DEum adorarent. Proinde factum est, ut Lycurgus apud Lacedæmonios, post Cecropis Athenarum conditoris obsoleta iamdudum extinctaque de coniugio præcepta, vxores viris certa lege ac singulari sapientia coniungens, ab Apolline Diuus fuerit iudicatus. Neque enim velim aliò nostram de hominibus primis opinionem, quàm nos duceres. Quis est enim medius fidius à naturæ bonitate alienus, ut non intelligat eorum antiquam probitatem, non tanquam diuinam, sed humanam præ se ferentem rationem, omninò fuisse colendam? Nam si homo est, ut veteres definiere, animal rationale atque mortale, atque quodammodo (teste Augustino) medius inter pecora & angelos; utque pecus est animal irrationale atque mortale; medius est homo, inferior angelis,

superior



superior pecoribus ; sit, cum rationis particeps sit, ut ipsam virtutem, quæ à rationis fonte originem trahit, habere summa cum diligentia quærat. Nemo enim est, qui duce natura bene feliciterque vivere in hoc spatii curriculo non expetat. Placuit enim Ciceroni, *honorem artes alere, & omnes ad virtutem incendi gloria.* Sed tanta illorum hominum paucitas, ac exiguus numerus inuenitur, qui bene viuendi rationem, sine qua nullum honestum vitæ genus esse potest, sequatur, ut sit incredibile dictu. Alii enim diuitiis, ut Croesus, ut Masinissa, ut Lucullus; nonnulli potentia, & exercitu, ut Artaxerxes; aliqui honoribus præstantius meliusue æstimant nihil esse. Multi præterea sunt (quod bel-luarum proprium prudentes esse dicunt) qui in voluptate vitam consumunt: quo in genere Sardanapalum Regem fuisse accepimus. Et ita variis opinionibus polluti ac infecti, singuli ferè singulis in erroribus versantur. Itaque fit ut inter tantam generis humani societatem vix comperti sint, qui non aliqua ex parte à virtute forent alieni, & in his communibus deliramentis versarentur. Quis enim hac tempestate voluptates non magni facit? quis opibus non delectatur? quis honores non cupit? Nemo enim tam parui pusillique animi est, qui quadam dulcedine ac cupiditate perfectæ gloriæ non trahatur. Etenim quanto quis maiore animo natus est, & ab ipsa natura omnium procreatrice pulcherrimè optimeque dotatus; tanto enititur magis, ut pace vel bello clarum æternumque nomen sibi vendicet. Verum enim verò alia re nulla, nisi virtutis splendore, maiestate, dignitate, quisquam se immortalem præstare potest. Ea enim cum in homine (ut Aurelio sanctissimo placuit) diuina sit, ita ab ea diuinum nomen & ortum Principes habuerunt. Nam & id virtutis præmium est, ut omnes qui eius studiis plurimum delectantur, quam primum ad id perueniant, quod est bene beateque vivere. Quamobrem hi qui illustre nomen sibi vendicarunt, vel in beata vita extiterunt, nunquam voluptatibus parendum esse existimarunt. Quid enim ipsos septem numero sapientes, Biantem Priensem, Cleobulum Lindium, Chilonem Lacedæmonium, Pittacum Mitylenæum, Periandrum Corinthium, Solonem Atheniensem, Thaletem Milesium, aut Socratem, aut Platonem tantopere apud nos commendauit? Quid Aristotelem ipsum Philosophorum principem? quid reliquos omnes Philosophos? Num virtus, num scientia, quam sibi summis vigiliis comparauerunt? Quid Catoni, quid Lælio tribuit Sapientis cognomen? Quid Alexandrum? quid Themistoclem? quid Pyrrhum? quid demum Cæsarem ipsum posteritati notum fecit, nisi suæ pulcherrimæ res gestæ? Quid postremò (ut altius repetam Paullos, Fabricios, Scipiones, Catones, Scæuolas tanta nos prosequi admiratione docuit, nisi virtus, qua summopere delectati sunt? Salomonem taceo, Moysen prætereo, reliquos vero non commemoro, quos singulari virtute præditos fuisse & audiuit posteritas, & nouit antiquitas. Sumus enim in virtutem parumper prolapsi, quoniam te ea mirum in modum delectari cognouimus: & ad id, quod ad Principum dignitatem attinet, plurimum spectare pertine-reque videtur. Neque enim Principis nomine seu aliqua laude dignus quisquam Princeps inuentus est usquam, qui in virtute summum bonum non posuerit, locauerit, firmauerit. Nam cum Deus optimus maximus humeris Principum orbis imperium regendum, gubernandum, moderandumque tradiderit, quis est qui absque ullo probitatis genere, & sceleratorum fraudibus obuiare (quod maximè Principem decet) & bonos munere afficere possit? Quæ quidem omnia ad iustitiæ obseruationem, quæ Principum mentes sanctè ac honestè commouere debet, attinere videntur. Cum enim nonnullis excellentiæ meritis eos cæteris hominibus antecellere discamus; hoc uno tamen potissimum eis præstant, quòd bonis benefacere, & poena digna malos persequendos esse cognoscere debent. Illi enim consilio & probitate Principis gloriam magnificandam esse ducunt, & eam tanquam nauem in portum à ventorum concussione, hoc est, ab inuidis inimicorum manibus liberant, tuentur, conseruant. Hi verò in rempublicam seditiones, discordias inducunt: quo fit ut inter ciues horribile bellum oriatur.

Si qui-



Siquidem Romæ Gracchum, Catilinam idem fecisse memoriæ proditum est. Quis enim me Hercule est, qui sibi iure optimo non persuadeat, Principes in terras à Deo optimo maximo esse lapsos, ut essent qui sua virtute, præstantia, ingenio, homines regerent, gubernarent, hortarentur, monerent, punirent; ac si fas esset, ut Iustitiæ, quæ Principis regina est, & omnium bonorum nutrix satisfacerent, & malos morti traderent? Quo enim pacto virginum stupra, quo pacto adulteria, quo pacto homicidia, contra naturam & diuinam voluntatem quæsitavirent homines? quo demum pacto & rerum sacrarum ad diuinum cultum spectantium observatio illæsa inconcussa maneret? nisi in Principe iustitia, prudentia, fortitudo, temperantia, & earum partes haberent locum? Huic autem nostræ sententiæ, Platonis illa diuina accedat auctoritas, quòd *qualis Princeps in Republica, tales reliqui soleant esse cives*. Fit igitur facilè, si Princeps optimè sit institutus, ut ciues bene beateque viuendi exemplo eius trahantur. Si verò quis erit in Principe vitiorum morbus, facile in eos qui ei obtemperantes præsto sunt, traditur atque transfunditur: & multò facilius malum quod in eo est, ab eo transit, quàm si quid in eo virtutis & industriæ fuerit. Quamobrem (ut aliqua iam conclusione utamur) videmus in Principe virtutem esse potissimum necessariam, & absque eius actione eum mancum esse profectò cognoscimus. Virtus enim quod Aristoteles iam pridem dixit, (cuius sententia summopere delectamur) est potius benefacere, quàm suscipere; & honesta potius agere, quàm a turpibus abstinere. Quis est qui non intelligat, Principum ortum à Virtutis fonte emanasse. De Principum ortu ac dignitatis origine sat à me dictum fuisse arbitror, Heinricæ suauissime. Itaque si ea in re aliquid amplius audire cupis, te rogo ab eis petas, qui hanc facultatem profitentur, & in eius doctrina, tanquam in propria suppellectile versati sunt.

HEINRICUS. Neminem inueniri posse arbitror, vir doctissime, à quo, quàm abs te uno, ea quæ de ortu Principum narraſti accipere maluissèm. Quis enim est, qui te uno ea in re subtiliorem sermonem habere potuisset? quis elimatiorem, quis ad eam rem accommodatiorem? Sat enim intellexi tua oratione virtutem eam fuisse, quæ Principes reliquis hominibus quadam dignitate antecellere constituit. Quod etsi non secus esse abusque tuo dicendi initio mihi persuadebam; tamen te narrante, hæc meam in mentem prorsus inciderunt: si virtutis operatio est; ut paulo superius egregie abs te est dictum) quæ ex priuatis hominibus eos Princeps fecerit, crearit, constituerit; ut omnes qui virtutis domicilio delectarentur, & in eius actione versarentur, principes forent necesse esset. Sed quoniam nonnullos singulari virtute præditos homines esse cognoui, qui imperium nullum, maiestatem nullam haberent, ut de Diogene, de Aristide, de Fabricio audiuius, quos nedum imperasse, sed minimas fortunas, habuisse legimus; eodem modo multos fuisse & apud Babyloniam, & apud Assyrios & Romanos imperasse accepimus (si de Semiramide, Heliogabalo, de Smin-diride fama non mentitur) qui omnem libidinem, crudelitatem omnem, & vitia maximi fecere; alium inter priuatos viros claros & principes prudentes dilatum \* præterquam virtutem, & eum quidem maximum esse existimo. Nonne generosum & illustre nomen, & antiquorum suorum clarissimæ res gestæ nostræ atatis Principibus non mediocrem fauorem condonarunt? An non Romulo & Remo in condenda urbe Troianum nomen summopere profuit? Nonne Iupiter Æacum genuit? nonne Æacus Peleum? nonne Peleus Achillem? nonne Achilles Pyrrhum? qui omnem Æacidarum gloriam quadam animi magnitudine superauit? An non Alexandro, quamuis orbis imperium florente iuuentute virtute & fortuna secunda nactus fuerit, Philippi patris gloria ingens profuit? Neque arbitror Epaminondam deuictis Lacedæmoniis gloriosam victoriam cum morte sibi comparare potuisse, nisi maiorum suorum memoria clarum se præstitisset. Neque



que iure quisquam mihi probare poterit, Pompeium vigesimo secundo anno natum aduersus Sertorium ad necem paternam vindicandam exercitum ducere potuisse, nisi ingens patris gloria eum maxima auctoritate esse dignum militibus persuasisset. Neque cygnus mergum, neque agna leonem gignit. Quare videtur mihi potius hereditarium quoddam esse munus, quàm à fortuna quæsitum imperium.

IODOCUS. Nisi te virum doctissimum esse cognoscerem, quemque quod de Principibus variè dixisti, potius disputationis, quam iudicii gratia loquutum fuisse non me fugit; dubitarem equidem te tacitè vulgo assentiri velle, cum volueris gloriosum nomen parentum posteris viam ad imperium, non autem virtutem reliquisse. Soleo enim pro meo iure hac in re ab his longè dissentire, qui omnem nobilitatis gloriam non in suam, sed in maiorum suorum virtutem & clarissima facinora conferunt: quique cum genus suum laudant, nescient se aliena iactare, quod Seneca sensit, *Et miserrimum esse aliena incumbere fama* ignorant, ut Iuvenalis Satyricus ait. Quod autem multos Principes fuisse ais, qui quod præse ferrent, in virtute versari possent nihil; nolim, si silentio id præterirem, atque tibi concederem, me potius assentatorem & blandam frontem habere, quam rectum iudicem existimares. Nam si quid imperare, & quid proprium Principis sit, rectè metiri velis; iudicabis eos, non dixerim nomine Principis: sed Tyranni fuisse profectò dignos. Itaque neque Sardanapalum illum, neque eos quos in Principum numero ausus es collocare, principatum vllum habuisse arbitror. Quis est enim, qui in alios imperium habere dici possit, qui sibi ipsi imperare nequeat? Homini verò cum sit perdifficile scire regi, id est, regenti se obtemperare; multò difficilius est scire alios regere, ut Gregorius Nazianzenus voluit. Nam si is, consilio cuius rectè se putant gubernari homines, & in quem oculi sui sunt conuersi, prudentia egeat, & eius vitam ad perniciem pestemque conuertat; non mihi rectè videtur Princeps, sed multorum principum seruus esse. Ex quo in calamitatem & in eum errorem deueniunt sapenumero homines, ut in Republica infinita penè regentium sit multitudo, quorum animos (ut Romæ scimus fuisse) ad priuatam commoditatem non ad publicam vtilitatem conferunt. Nam quandoquidem quot capita, tot sunt sententiæ; ut plures variè de imperio sentiant, est necesse. Quo enim pacto putas illum principatum diutius esse permansurum, in quo \*obedientes sunt. Proinde rectè Tragicus *regnum duos non capere* dixit. Age verò, an censeres eum Principem appellari posse, qui contra mores, leges, instituta faciat, & Reip. rationem non habeat? Nam quemadmodum Mimum, quanquam in Comoëdiarum scenis, spectante populo actus celebrat, non præterea Poëtam vocamus: ita eum qui regitur, non Principem, sed eum regentes Principes appellamus. Neque C. ipsum Iulium Cæsarem imperium in Romanos, sed violentam tyrannidem habuisse legimus, quippe quòd omnia Romanæ Reip. instituta, & sanctas leges euerterit; ararium autem, in qua & pacis dignitatem & belli commoditatem consistere non te præterit, iure priuato sibi vendicauerit. Quare in eam incidit Satyri sententiam.

*Ad generum Cereris sine cade & sanguine pauci  
Descendunt reges, & sicca morte tyranni.*

Nam si se non priuatam, sed omnium Romanorum personam gerere cognouisset, ad id sane fortasse peruenisset, in quo Thales ille sapiens summam felicitatem Principis inesse existimauit, hoc est, *si finiuerit consensescens secundum naturam.* Quod enim ille ipse de aliis augurium dederat, in semetipsum iure redundauit.

Is enim



Is enim ita inquit Cæsar, *Consuevere Dii immortales, quo grauius homines ex commutatione rerum doleant, iis quos pro eorum scelere ulcisci velint, secundiores res interdum, & diuturniorem impunitatem concedere.* Quare in Principe omnium rerum maturationem maximam inesse oportere existimamus, ne cum rectè ac sapienter facere videatur, id perperam fecisse iudicetur. Est enim (vt iam aliquid quod ad eius officium spectat, aggrediamur) proprium Principis, diligenter curare, vt vnusquisque suum teneat, & ne de bonis priuatorum ciuium publicè diminutio fiat, diligentiam adhibere. Non enim dormiendum est, cui rerum publicarum cura & administratio commissà est. At illud prætereundum non est, quod maximè curare debet Princeps, vt in ciuitate sint viri optimi, quorum consilio bellum suscipiatur; & pacem & concordiam Rerumpublicarum maxima esse fundamenta optimè intelligant. Danda est etiam opera, quod fieri sæpe videmus, ne propter ararii tenuitatem, assiduitatemque bellorum tributum sit conferendum; idque ne eueniat, multò ante erit prouidendum. Quæ autem & ad ornamentum & decorum ciuitatis spectant, si maxime sibi erunt curæ, ad maximam laudem suam accedat non parum oportet. Illa verò quæ diuinum cultum & sanctissimas ceremonias concernunt, vt optimè sint instituta, longè videre ac animaduertere debet: & vt religio de se ipsa pollicetur, ita nihil in ea statuet, quod vim aut iniuriam vlli adferre possit. Vt autem earum rerum quæ ad ipsius Principis dignitatem pertinent, maxima sit copia, consulere profectò debet: dummodo ne nimix auaritiæ suspicio inducatur, maximopere caueat. Nam velut liberalitas animos hominum ad amorem Principis trahit & allicit, & eos iratos mitigat atque placat; ita avaritiâ ad odium, ad iram incitantur atque penitus inflammantur. Quid enim deterius in Principe avaritiâ? Audiat autem C. Pontii vocem Princeps: *Vtinam me ad illa tempora seruasset, Et tunc natus essem, quando Romani dona accipere cœpissent: non essem passus eos diutius imperare.* Quo factum fuit, vt Africanus maximam laudem sit adeptus, quod capta Carthagine haud locupletior factus esset: intelligebat enim ille avaritiam multorum malorum esse caput. Proinde ferunt Apollinem Pythium oraculum dedisse, *Spartam nulla re alia nisi avaritiâ esse perituram.* Quare noli eos principes iudicare, qui ciuium bona diripiunt, vt in omnem libidinem, voluptatem omnem suam consumant vitam. Videsne eos ipsos quos imperasse dicis, vt Neronem & Heliogabalum, multosque alios, non Principes sed Tyrannos fuisse. Quo enim pacto putas Principem incolumem esse diutius posse, si ciues suos saluos esse nolit. Non enim potuit Cæsaris abhorrenda vox eum à manibus Bruti liberare, qui cum dicere veritus non sit: *Si violandum est ius, regnandi causa violandum est, in reliquis seruare decere pietatem,* quis dubitat in alium finem eum incidere potuisse, nisi in eum in quem ipse peruenit? Quanquam enim homine indigna sententia esset, quippe quod ius, quo nihil melius, nihil præstantius mortalibus à DEO optimo sit datum, violandum esse duxerit, tamen pietatis nomen censuit esse seruandum. Itaque eos arbitramur, qui ita viuere volunt, vt sanctum nomen imperii nanciscantur, pietatis imaginem præ se ferre debere. Age verò, vir doctissime, eumne diutius censes imperare posse, qui in principatu suo ius seruare non cupit? Non dixit Julius, *Vbi ius ratioque perit, illic habitandum non est.* Quemadmodum enim secundum naturam nihil magis esse dicimus, quam si labores & molestias quam maximas, pro omnibus gentibus, si fieri possit, conseruandis ac iuuandis suscipimus: ita contra naturam eum facere existimamus, qui iniuria detrimentum aliquod afferre societati humanæ procurat. Quo quid sordidius Principi accidere potest? Qui enim appetitione ducitur alieni, is quidem mea sententia potius Reipublicæ destructor & Tyrannus, quàm conseruator, quàm Princeps est appellandus. Nulla enim sancta lex, nulla bonorum morum institutio, nulla honesta religio cum tyrannis esse potest. Quo fit vt huiuscemodi



hominum genus pestiferum atque impium ab omni humana societate exterminandum esse ducam. Et tanquam quædam membra amputantur, si sanguine & spiritu carere coeperint, ne cæteris partibus corporis noceant; sic ista immanitas belluæ à communi humanitate segreganda est. Sed ut iam eorum aliquam rationem habeamus, quos præditos virtutibus summis esse dixisti, quique priuatam vitam egerunt; siquidem Diogenem & alios multos nullum imperium in homines scimus habuisse, sed in posteros suos maximum & excellentissimum principatum eos tenuisse demonstrandum est. Nonne Aristotelis auctoritas & in omnes bonos non mediocre est imperium? Qui verò illi tanquam Philosophorum principi, auctoritatem dant, tanquam obedientes aliqui sunt. Quid enim aliud est imperare, nisi auctoritatem habere? Sed ut ad nostrum sermonem redeamus, eum mihi haud negabis optimum Principem esse, qui non in aliena sed in sua clarissima facinora sui principatus spem collocavit. Neque Alexandrum, neque Romulum, neque Pompeium sola paterna gloria in excellenti principatus gradu, sed eorum paternæ adiuncta collocavit atque constituit. Delectat me hîc loci plurimum, & te credo iuuabit quoddam præclarum Lycurgi exemplum, qui cum populo leges laturus esset, quibus eum ad bene beateque viuendum prouocaret, duos iisdem parentibus catulos natos ad varias res instruendas esse duxit: quorum alter crapulæ, alter venationi operam dedit. Cum autem is in medium ferre vellet leges, in forum catulos venire iussit, parata autem erant omnia, ad quæ quilibet nutritus fuerat. Itaque qui crapulæ exercitium habuerat, ad id continuò currere coepit: alter verò quàm primum leporem secutus est. Neque enim sine magna maturatione hoc Lycurgum fecisse existimare debemus. Non enim fugiebat eum, hoc facillimè fieri posse, ut ex iisdem parentibus Princeps quidam singulari virtute præditus nasceretur, & ex his pessimus & ventri deditus vir oriretur. Fateri hoc quidem mihi necesse est, ad summam Principis felicitatem accedere, si clarissimorum sanguine principum ortus & genitus, aut parentes, ut Alexander Philippum, gloria & ingenti virtute superarit, aut eos saltem adæquarit. Et ne longius exempla repetamus, accedat in campum M. Tullii Ciceronis sententia: *Ego meos maiores virtute præluxi, ut omnes si antea noti non fuerunt, à me capiant initium nobilitatis suæ.* Neque Æneas ipse Pius, quanquam ex Troiano principe natus, Romæ vrbi originem dedisset, nisi singulari animi magnitudine pericula mari terraque adire constituisset. Nec ipsum Marcum Arpinis natum parentum gloria, nec maiorum suorum memoria, quæ nulla erat; sed sua virtus, ad Consulatus dignitatem aduocavit. Quod si tua ratio seu opinio hac in re locum sibi vendicaret, ut hi Principes essent, qui nulla virtute, nulla bene viuendi ratione pollerent; ut nonnunquam latrones & piratæ Principes fierent, necesse esset. Quamobrem eos quos vitiis deditos Principes dixisti, violatores principatum rectè poteras appellare. Sed ut eò reuertatur, quo nostra digressa est oratio, arbitror equidem C. Fabricium, M. Curium, Diogenem, eosque qui in virtute summum principatum collocarunt, in optimo imperio esse versatos. Is enim qui aliis & sibi imperare non potest, non honesto imperio sed voluntate ducitur. Qui vero ita se instituit, ut sibi & aliis imperare possit, is mea quidem sententia non hominibus sed similis DEO iudicandus est. Quis ergo magis sibi ipsi & posteris imperauit quàm philosophi, quàm viri sapientes. Hi enim quod rectum, quod honestum, quod sanctum esse existimabant, id obseruare maximum imperium esse ducebant. Sola enim probitate, sola animi virtute delectabantur. Ut igitur in omnibus rebus multò maiora opera sunt animi quàm corporis: sic eas res quas nostro ingenio, & virtute nostra exsequimur, gratiores esse profectò iudicamus, quàm illæ quas viribus. Illi enim optimum imperium, appetitum inhonestum refrenare, (qui hominem nonnunquam ad interitum voluntarium ducit) ac maximum



ximum esse opinati sunt. Est enim Principis optimi officium, non ad iram, non ad odium, non ad amorem, sed ad iustitiæ sanctitatem animum conuertere. Quod quidem in eo esse haud potest, qui appetitui, ut illi fecerunt, non resistit. Nam si Tarquinius ille non pro libertate imperii in Lucretiam nobilissimam stuprum committere sibi licere fuisset arbitratus; nunquam priuatus regno, ad Porcenæ Clusinarum regis auxilium conuolasset. Decet enim Principem non solum manus, sed oculos habere abstinentes, quod ad prætorem pertinere Tullius scripsit. Neque Ptolomæus Pompeium capite priuari iussisset, si bene merentes meritis, non autem malis & pœnis prosequendos esse didicisset. Theseus verò Hippolyti morte non doluisset, si falsa vxoris suasionem ad iram non se prouocasset. Quamobrem fit sæpe numero, ut ciuitates, principatus, regna corruant, cum malis hominibus, non optimis viris ac sapientissimis permissum sit imperare. Angor enim mirum in modum antiquarum urbium calamitatem recordari, & nostra tempestate Christianorum acerbam videre cladem, & Principes nonnullos effectos cæcos fuisse doleo: qui si viderent immanem illam belluam Mahometum rabido ore in Christianos sæuire, non ducerent in atriis habitare nunc esse bonum, neque in choræis versari iucundum esse arbitrarentur. Hæc autem omnia accidere & imminere vidimus, quoniam ad summam miseriam venire contenti sumus, & nihil pluris facimus, quam vicinum prostratum & iacentem videre. Quod si optimè imperare nouissent homines, cymba Christiana in portu tutè nauigaret. Quare te nunc fugere non arbitror, optimum Principem neminem nisi virtuosum esse.

HENRICUS. Non sum nescius, cum Principem, (ut ex tua diuina oratione accepi) in summa felicitate esse constitutum, qui nedum virtutis ac probitatis laudem egregium munus esse ducat, sed etiam in omni ætate ea se refertum ostendat. Etenim cum mecum iterum iterumque reuoluo id, quod de Principum dignitate dixisti; vereor maximopere id de his posse dici, quod de sapientibus Apollo iudicauit: *Unum enim solum è cunctis hominum millibus sapientem esse dixit.* Nam aut fingendus tuo Princeps est quispiam iudicio, aut unicum, qui ea omnia teneat, quæ in Principe necessaria esse statuisti, vix posse inueniri iudico. Quare si nostra hac ætate Princeps quisquam est, qui (ut sentire videris) de Deo immortali, de pietate, de concordia, de communi ciuium utilitate, de hominum iure & æquitate, de temperantia, de magnitudine animi, de re militari, de omni virtutis genere dicere, & illis versari possit; facies rem mihi gratissimam si eius immortale nomen abs te audiuerò.

IODOCUS. Geram ego quidem libenti animo hac in re tuæ voluntati morem. Potes enim apud me pro singulari virtute non parum. Ego enim cum adolescentulus Philosophiæ ac Theologiæ studiis mirificè deditus essem, his maximis laboribus, vigiliis, insomniis ac lucubrationibus non paruis operam nauare coepi: in quibus quantum profecerim, aliorum sit iudicium. Verum enim vero dum ætas me parumper, tum usus multarum rerum, ad quid nati essemus, cognoscere constituit; decreui apud aliquem optimum Principem locum mihi vendicare. Occurrebant autem mihi præterea multi clarissimi quidem, quorum nonnulli diuitiis, alii potentia, multi autem præstantissima prole, atque clarissimarum rerum gloria florebant: qui verò hæc omnia, quæ optimo & præstantissimo Principe digna esse existimaui, teneret, solus mihi inuentus est. Quem cum tibi nominauero, haud vereor, quin eius præstantissimum nomen immortale tibi videatur. Is enim FRIDERICUS Bauariæ Dux clarissimus ac Palatinus Comes est: quem cum intelligerem ea omnia, quæ Principem & virum optimum decent, possidere, est incredibile dictu, quanta animi affectione sibi fer-



uire flagrabam. Iure enim optimo mihi persuadebam, aut hunc solum aut neminem Principem esse. Eo igitur id meam in mentem incidit, quod arbitrabar Principem æquè ac omnium suorum civium personam gereret, ita ea omnia quæ ipsi bona animi tenerent, eum deceret habere. Nam quemadmodum mundi huius bona, & summa hominis laus tribus consistit in rebus, in fortunæ, in corporis, in animi bonis; ita eum hæc omnia possidere tibi persuadeas velim. Quod si ad eius laudes immortales ac propè diuinas mea non accedat oratio, tuum erit intelligere, hinc loci me non de laudibus, sed Principis optimi nomine quærere. Quum igitur (ut te non latet) clarissima atque antiquissima prole natus esset, ad ea quæ ad Principis morem & decorem attinent, eius inuictissimus pater nutriendum erudiendumque esse statuit. Cum autem iam fari cœpisset, literis operam dare voluit, maiorum Romanorum Regum exemplum imitatus, qui ad Principis gloriam, cognitionem literarum atque studiorum spectare plurimum iudicabant. Intelligebat namque optimus Princeps ille, se virtutibus facillimè imbui posse, si quid Duces, quid Imperatores, quid Reges antiqui fecissent, sapere posset. Quo factum est, ut ad optimarum literarum peritiam pervenerit. Nam cum sibi opus facto cognovisset cum his viris versari, qui literas saperent, noluit ab eis illæsum se iri posse, \* facillimè enim fieri potest, ut Princeps literarum ignarus à viris doctis decipiatur, & opinione potius quam optima ratione ducatur. Quapropter Philippus Alexandrum Macedonem Aristotelis disciplina erudiendum esse statuit. Quemadmodum enim si quis Herculis pictam imaginem vidit, ad eius amorem atque vestigia imitanda incitatur; ita qui Darii, Xerxis, Cyri, Artaxerxis, Hectoris, Hannibalis, Pyrrhi, res clarissimas gestas legit, fit ut eos gloria & virtute imitari conetur; & à vitiis in quibus illi versati sunt, penitus abhorreat, & pericula quæ illis acciderunt, funditus euitet. Quare factum est, ut hic Fridericus Princeps noster, tanta animi magnitudine, tanta sapientia præditum se die noctuque legendo præstauerit, ut sit admirabile dictum. Quod si cuiuspiam fortasse obscurum & incredibile videtur, conuertat animum ad res suas pulcherrimè gestas, circumspiciatque omnium Regum & imperatorum clarissima facinora. Inueniet profecto, nec bellorum magnitudine, nec pacis ornamentis, nec multiplici victoria, nec rerum optimarum gloria cum hoc nostro diuo Principe eos posse comparari. Laudatur Alexander quod liberalis, Hannibal quod magnanimus. Hercules quod fortis, Cato quod prudentissimus. Scipio quod continens, Cæsar quod clemens, Q. Mutius quod constans fuerit. At quis magis Friderico liberalior aut visus, aut unquam inuentus est? qui neminem virum probitate refertum à se indonatum abire permittit. De clementia verò (qua ad Deum, Demosthene teste, propius accedit) Principis, si quis satis dicere vellet, annalibus profecto foret opus. Nam cum iuste in hostes sauire posset, quos iusto prælio captiuos fecerat, clementissimum se ostendit. Didicit enim iamdudum.

*Parcere subiectis, & debellare superbos.*

Intelligit namque gloriæ Principis ac decori non parum conuenire, eos qui de victoria contendunt, hostes putare; victos verò homines iudicare. Animi autem magnitudine quam incredibili valeat, declarauit ea inaudita victoria, quam præter omnium spem sua virtute nactus est. Nam qui Cæsarem, qui Pompeium propter crebras victorias laudare solent, quàm maiores arbitraris huic nostro Principi laudes dare meritò posse? Illi enim magna militum copia, hic parua; illi ingenti manu, hic exigua victoriam consecutus est: illi lustro, hic hora bellum diremit, atque triumphauit. Non enim iure is laudatur,



datur, neque victoriæ gloria se Victoriosum præstat, qui magno equitatu, ac milite multo in paucos vires ostendit suas. Itaque quanto maiori laude is dignus iudicatur, qui paruum hostem debellavit; tantò maiori gloria splendet, qui minima cum manu maximam militum devicit multitudinem. Fuit enim hoc antiquitati ignotum, posteritati verò incredibile, ut de cuius victoria desperabatur, is se victorem demonstraverit. Is enim optimè tenet quod Salustius ait, *Antea consulto, deinde factum opus est.* Nam cum iterum iterumque, quid factururus esset, cogitasset: tum repente in hostes veluti corpore tauri validissimi impetum fecit, ut eos terrore timidos reddiderit: qua re gloriosum & immortale nomen sibi posterisque suis quadam Heroica virtute vendicavit. O admirabilem Principis prudentiam! ô virtutem inauditam! Quid enim est tam laudabile, quàm Principem bello victoriosum, & pace iustissimum se ostendere? Quid tam singulare, quàm audire unicum Principem de multis principibus triumphasse? Quid porrò tam liberale, tam egregium, quam in captivos clementem se præbere atque præstare? Quid demum tam admirabile, quàm audire hac tempestate Principem esse, qui omnem antiquorum Regum Imperatorumque memoriam superavit? Neque velim tibi persuadeas, huius victoriæ partem Fortunam sibi vendicasse. Fuit enim propria sua virtus, qua ad cælum usque tollendus est. Qua verò iustitia, qua animi prudentia, qua continentia, qua constantia omni in re utatur, satis perspicuè intelligi potest, quòd nulla in eius Principatu iniuria, nulla vis, nulla turpitudine admittitur: unicuique quod suum est, tribui vult: bene merentes autem & officio & favore persequitur, malos verò (quod iustitiæ plurimum convenit) maxima poena dignos existimat. Nihil enim die noctuque cogitat, nisi quod ad suam immortalem dignitatem spectare cognoscit. Age quis est enim aut nobilitate aut probitate præstantior? Quæ tanta potest esse dicendi vis, quæ ubertas tanta ingenii, quod tam diuinum orationis genus, quo quisquam non dicam exornare, sed enarrare res suas clarissimas gestas possit? Quare dabis veniam, quæso, si eas haud complexus sum laudes mea exigua oratione, quibus dignum esse non te præterit.

HENRICUS. Scio certè multò maiora in Principe nostro diuo virtutum merita esse, quàm oratoris cuiuspiam eloquentissimi exprimi lingua possit. Nam si, quas singuli habuere virtutes, is possidet, nemo mortalium est, qui ad summum usque narrare possit. Verùm quoniam, ut de Croeso Solon dixit, finem uniuscuiusque, quomodo quisque felix, iudicatur esse considerandum; quid est cur cum in vita felicem esse iudicas?

IODOCUS. Ego verò id arbitror, finem quempiam aut bonum aut malum in homine inesse oportere. Sed unum profectò existimo, quod non vulgaribus coniecturis percipi potest, neminem probum & optimum virum in pessimum finem posse devenire. Nam cuius operatio bona fuit, eius finis ut sit optimus necesse est. Quod idem de Principe nostro futurum arbitror: quum in omni virtutis genere vitam exerceat suam, nihilque pluris faciat quàm quòd Chilon dicit, *Principatum habentem nihil mortale, sed cuncta immortalia debere iudicare.* Itaque omne suum tempus nunc in iusto prælio, nunc in pace & iustitia consumit, nunc ad coelestia mentem erigit: & si quid est quod summum bonum spectare cognoscat, omni cura ut ad id perveniat, summaque cum diligentia inquirat. Quod si sermo hic noster suas laudes ageret, ostenderem profectò, neminem unquam principem fuisse, qui Principi nostro optimarum rerum gloria iure merito non cederet. Sed quoniam optimi Principis, & eius dignitatis exemplum dandum fuit, neminem aut paucos inveniēbam, quorum



exemplum idoneum mihi videretur. Habes quæ ad Principum dignitatem pertinere existimaui. Si quæ autem amplius sunt (credo autem esse multa) ab his quaeso petas, qui hanc differendi profitentur facultatem.

*Non me latet, optime Princeps, cum hunc librum tuis in manibus accipies, parvum; cum verò perlegeris, magnum munus fuisse, te fore iudicaturum. Nam veluti lapillos pretiosos non magnitudine, sed perfectione ceteras res prestare videmus: ita hunc librum illis antecellere rectè tibi persuadere potes. Illi enim, quo ad te, post tuam peribunt mortem: hic verò tuo perempto corpore, te apud homines viventem & immortalem constituet.*





**M. ANTONII TORQUATI**  
**PROGNOSTICON**

APOPHTHEGMATA IMPERATORUM.

**FRIDERICI III. IMP.**  
**EPISTOLÆ ET LIBELLUS**  
**PRECATIONUM.**

**HERMOLAI BARBARI**  
**ORATIO**

AD

FRIDERICUM III.





LECTORI SALVTEM!

BURCARD GOTTHELF  
STRUVE.



Nter superiorum temporum astrologos eminet nomen M. ANTONII TORQUATI, Medicinæ Doctoris Ferrariensis, cuius Prognosticon, quod hic exhibemus, magnæ olim erat existimationis. Non defuerunt equidem Prognostici euentus; ast multa etiam plane aliter acciderunt. Operæ pretium est Joannis Filesaci, Theologi olim Parisiensis verba de eodem hic adducere: \* extat ait, Antonii Torquati Ferrariensis, Astrologi sua ætate clarissimi, prognosticon, quod Matthiæ Regi Hungariæ, in cuius paterna historia lusimus aliquando, oblatum est, anno Christi millesimo quadringentesimo octuagesimo, quod cum aliquanto prolixius videatur, præcipuas illius sententias tantum adnotabo. Turci magna strage suorum in Christianis arma mouebunt. Venetis primum multa inferent damna, post eorum amici facti, Belgradum in ditionem recipient, Rhodum superabunt, Pannoniam & Hungariam multis cladibus afficient. Tandem vim comminantes, regnum Hungarorum lacerantes, simulque imperium Romanum Germanumque diutissimis bellis tentantes, in eorum manus cadent: Annus erit Christi 1594. ad 1595. Sed prius Apuliam intrabunt, Siciliam, Galliæ Hispaniæque littorum classe sua, nec non Italiam molestabunt & affligent. Paulo post, Imperatorem Turcarum in prælio occidendum prædicit, additque Osmann namque domus in tredecimo vel quarto decimo capitibus corruet, nec illum excedet numerum, nec annum salutis 1596. transibit. Tunc enim horrendo concidet casu, tandem concludit hac clade euersum iri Imperium Turcicum & a Christianis occupandum. Sic refert Leunclavius in Historiæ Musulmanæ appendice, post Epistolas. Non est vel huius loci, vel mei otii historias retexere, quibus multa, quæ hic exprimuntur, euenisse intelligamus, satis sit expendisse corollarium huius prædictionis quam varium sit, quam falsum, quam ridiculum, de Imperio Turcico funditus euerso, ad annum Christi 1596. cum hoc anno 1608. tum florens & potens, magno quidem Christiani nominis malo, cernamus, quam unquam antea extiterit, nec vlla parte, aut biare, aut mutare, aut inclinare, tanti Imperii moles perspiciatur: nec in quarto decimo Imperatore Osmanida seriem Sultanorum & Principum

\* De idolol. Magica fol. 32. Ex hoc sua habet Bayle Dictionnaire Histor. voce Torquati.



pum suorum defecisse videamus, cum Sultanus Muhamet Cham, tertius huius nominis, sit decimus quintus Osmanidarum Principum, à primo illo Osmano Sultano. Magno certe constitit Hungaris hæc prædictio, cui cum stolide in-  
niterentur, motumque maximum sub Sultano Soleimanno in Hungaria excitaf-  
sent, ab eo magna clade affecti suæ credulitatis vesanæ, pœnas non minimas  
dederunt, quemadmodum narrat Leunclavius histor. Musulmanæ lib. 18. Hoc  
autem Torquati Prognosticon separatim antea prodierat Antverpiæ 1552.  
Reperitur quoque inter Goldasti Politica Imperialia. \*

In margine  
videmus ad-  
notatum, qua  
ratione hæc  
vel ista eue-  
nerint.

Sequuntur Impp. APOPHTEGMATA ex variis collecta. Con-  
tinent ista quædam acute dicta a Rudolpho Habsburgico, Henrico VII.  
Carolo IV. Sigismundo, Alberto II. Friderico III. Scilicet moris hoc  
erat seculo decimo quinto exeunte, & sexto ineunte, vt multa industria  
eiusmodi dicta colligerentur. Hinc etiam quæ prudenter dicta ab Au-  
striacis Impp. sedulus collegit Fuggerus Poggius Florentinus, Orator  
seculi decimi quinti clarissimus, facetiarum librum scripsit, qui inter  
Opera \*\* eius vltimum locum occupat. Sic etiam diuersa Principum  
apophtegmatata congeffit Aeneas Syluius, Episcopus Senensis, in Com-  
mentario in libros Antonii Panormitæ Poëtæ, de dictis, & factis Alphonfi  
regis memorabilibus, inter quæ varia sunt Imperatorum Germanico-  
rum. \*\*\* Henricus quoque Bebelius, Tubingensis olim Professor, face-  
tias edidit, \*\*\*\* talia continentes. Has quoque Bebelii & Poggii facetias,  
vna cum Alphonfi dictis, & Jacobi Henrichmanni Prognostico in omne  
ævum durante editas habemus: \*\*\*\*\* Ex tribus hisce Apophtegmatum  
atque facetiarum scriptoribus, hæc desumpta sunt, ea saltim continentia,  
quæ Germaniæ quidam Imperatores fuerunt effati.

Hæc excipiunt EPISTOLÆ aliquot FRIDERICI III. Imp.  
Inter has prima est, quam statim ac ad Imperii dignitatem esset promo-  
tus, ad Carolum VII. Francorum Regem scripsit, qua ipsum ad Comi-  
tia Moguntina in diem festum Purificationis Mariæ 1441. habenda, inui-  
tat. \*\*\*\*\* Altera Epistola ad Nicolaum V. Papam fuit directæ, qua ipsum  
rogat, vt communem quendam Regum ac Principum Europæ conuen-  
tum indicat, se non defuturum. Extat hæc ipsa Epistolas inter alias Syl-  
uianas. \*\*\*\*\*

Tertia ad Eugenium IV. Papam est directæ, pro iure Ladislai in re-  
gnum Vngariæ, quod ipsi præripere conabantur Vngari, Albertum Ba-  
uarum eligentes. In Quarta Epistola Aeneæ Sylui de Cardinalis digni-  
tate, quam fuerat adeptus, gratulatur. \*\*\*\*\*

Adiecimus, quem Freherus in Syllabo Auctorum promiserat Libel-  
lum Precationum Friderici III. Imp. ad Blasium, quem ex Gabrielis Bu-  
celini Chronologia Monasteriorum Germaniæ \*\*\*\*\* sumimus, de quo  
vbi de Blasio Hippolito, Musico in Monasterio Vrspringensi loquitur, sic  
agit: habebat is egregie ornatum orationale Imperatoris Friderici tertii, ex  
quo sequentem precationem (qua optimus Imperator pro filio Maximiliano

Tom. II.

C c c

apud

\* Part. XVIII. pag. 773.

\*\* Basileæ 1538. fol. edita.

\*\*\* Extat inter ipsius Opera Basileæ 1551. fol. coniunctim edita pag. 472.

\*\*\*\* Inter Opuscula ipsius Argentorati 1514. edita.

\*\*\*\*\* Tubingæ 1555. 8.

\*\*\*\*\* Reperitur ista etiam in Mülleri Reichs-Tags Theatro Part. I. c. IV.

\*\*\*\*\* Epist. C LXIII.

\*\*\*\*\* Extat hæc inter Syluii epistolas epist. CCL.

\*\*\*\*\* Pag. 624.



*apud æternum patrem Domini nostri JEsu Christi intercedere est solitus) transcripsi: quam ne intercidat, & pereat, huic loco inferendam statui una cum carminibus meis: quibus prædictus D. Blasius libellum Diuo Carolo V. Imperatori ipsiusque Fratri Diuo Ferdinando Regi offerre decreuerat.*

Sequitur HERMOLAI BARBARI *Oratio* quam Venetorum nomine ad Fridericum & Maximilianum, Augusto mense 1486. Brugis habuit, qua ipsi de Regis Romanorum dignitate gratulatur. Erat iste Francisci filius, Patritius Venetus, factus postea Archiepiscopus & Patriarcha Aquilegiensis, demum Ecclesiæ Romanæ Cardinalis. Magnam hic eloquentiæ laudem fuerat adeptus \* inde etiam Reipublicæ Venetæ nomine varias obiit legationes ad Papam etiam. Extat hæc oratio inter *alias* ipsius *Orationes coniunctim* \*\* editas & in Goldasti *Politicis Imperialibus*. \*\*\*

\* Testatur de eo Paulus Jovius *elog. vir. doct. anno XXXV.* Jo. Trithemius *de Script. Eccles. pag. 379.* Petrus etiam Bembus *Hist. Venet. Lib. I. p. 31.* eius laudes prædicat & qua ratione Patriarcha factus fuerit Aquilegiensis, demum obierit, testatur. Petrus Crinitus *de honesta disciplina Lib. I. cap. VII.* Vossius *de Histor. Lat. pag. 622.*

\*\* *Parisus 1508. 4. Basileæ 1529. 4.*

\*\*\* *Part. XXI. num. 2. pag. 973.*





p.169 **PROGNOSTICON M. ANTONII  
TORQUATI ET MEDICINÆ DOC-  
TORIS FERRARIENSIS, CLARISSIMI.  
QUE ASTROLOGI, DE EVERSIONE  
EUROPÆ.**

**QUOD SERENISSIMO MATHIÆ  
VNGARIÆ REGI ANNO SALVTIS  
M. CCCC. LXXX. DIREXIT, VSQUE AD  
ANNUM M. D. XXXVIII.**

**M**ULTA sunt serenissime Rex, quæ diuinos homines efficiunt, virtutis primum excellentia, ut in septimo testatur Aristoteles. Secundo Deitatis contemplatio, claraque substantiarum separatarum notitia, sicut ex decimo eiusdem habetur. Sed inter cætera nihil tam similes Deo mortales reddit, quam contingentium præscientia futurorum, quam omnes Dei propriam esse confirmant, nec sine diuinitatis participatione adipisci potest. Quæ & ad consilia præbenda & ad prouidentiam eorum, quæ ventura sunt, plurimum prodesse atque conducere experientia fidem faciente, conspiciuntur. Et propterea regnorum, prouinciarumque, nec non & ciuitatum dominis, rectoribus atque gubernatoribus permaxime noscuntur necessaria.

Et quoniam festinant tempora, in quibus Deus per astra tanquam per secundas causas mirabilia multa singulariaque plurima, horribilia visu, audituque tremenda, & euentu ipso ac effectu terribilia, quibus similia per longa sæcula facta fuisse non legimus. Quæ licet plurima climata, orbisque prouincias sint afflictura, & reges, dominia, status, leges, mores, religiones, sectas, doctrinas mutatura, & variatura pro certo sint. Tamen quoniam maiori ex parte huiusmodi euentus nostra apparebunt in Europa, dignum duxi eadem annotare, & tuæ Maiestati destinare. Quia vir diuinus es, & non paruum ipsius Europæ partem cum prudentia regis atque gubernas, Christianamque rempublicam ab infidelibus tueris & defendis. Et id ad consolationem tuam addere non vereor. Futurum esse, ut post nonnullas strages & depopulationes Ungariæ ab Otthomannis factas, Otthomannorum Regem in manus cuiusdam Ungariæ Regis, & Ungarorum, Imperiique Romani, & Germanorum agentibus Hispanis casurum esse. Interficienturque ab eisdem, antequam anni M. D. XXXVIII. finientur. Et Otthomannorum domus, Imperiumque Constantinopolitanum deficiet. Et Imperator Germanus unicus, super duo regnabit Imperia, & Ungariæ gloria super sydera scandet.

Et ut iudicium nostrum hoc Christiano more bonum sortiatur exordium, Diuinum prius inuocabimus auxilium. Primo & ante omnia tria ponderosorum



M. CCCC.

XCIV. Lud. Sfort. pro duce Io. Galeazzo nepote suo ex fratre, Mediolanum gubernante ob Zelotypiam, Carolo Gallorum rege contra Alphonsum Arragonie regem provocante qui relicto Neapolitano regno in Siciliam fugiens.

M. CCCC. XCIX. Lud. Gallorum rex. expulsus. Lud. Sfort. duce Mediolani, & capto Mediolano, postque menses sex, iterum derelicto, & expulsus.

M. D. I. Lud. Sfort. Mediolani. dux à Gallis Novarie capitur, atque in Franciā perducitur. Incidit in foueam quam fecit.

M. D. VIII. Caesar Maximilianus cum Iulio Pont. & Lud. Gallorum rege contra Venetos conspirant.

M. D. IX. A. Cesare Maxim. Pont. Iul. & Gall. rege subactis, debellatis castris & profugatis Venetis, Caesar capit Venetiam, Patavium Galli Bergamum Brixiam, & Cremonam, cum aliis oppidis, locis & castris tollunt.

M. D. XIII. Caesar & profugatis Novarie Gallis, ab Italia expulsis Maxim. Sfortia Dux Mediolani restituitur.

M. D. XV. Francisc. Rex Gall. mens. sept. castris hostibus Mediolano potitur.

conuentuum prius inuocabimus auxilium. M. D. III. & M. D. IV. futura prænotabimus, & in M. D. IV. anni bissextilis Februar. 5. die mensis 21. Virginis gradu, annalis reuolutionis erit, præuentio. Quæ non parum ponderanda venit. Quoniam luna defectum patietur. Secundo considerandum accedit, non solum trium ponderosorum, sed etiam omnium pene erraticarum stellarum coitus in piscibus, qui anno salutis M. D. XXIV. Februarii continget mense, sed & lunæ solisque defectus, qui contingent, ac maxime de aquea, terreaque triplicitate, & in angularibus signis, angulariisue schematum, ac præcipue primo & decimo fient, geminorumque tetragonis maiorum duorum supernorum ponderosorum & oppositiones, & qui coitus sequentur.

Ex præfatis igitur cæli constellationibus primo dicendum est, ab Italia exordium tantorum malorum nasciturum esse, nam præiis malis dispositionibus, quæ orientur, ex similitudinibus Aragonum Sfortiadumque domorum, accitis ab altera earum in Italia, Galliis, Europæ, discordiæque ruinæ virus diffundetur, & semina iacentur, ex quibus inter Christianos reges & principes maxima nascuntur bella, & ad hæc mala augenda Turcarum auxilia etiam contra Christianos, ab ipsismet Christianis implorabuntur. E regno Neapolitano agentibus Gallis Arragones non semel pellentur, sed è Mediolano per eosdem pellentur etiam Sfortiadæ. Et ab utroque regno vel dominio ab Hispanis, Germanis & Italis, pluries vel ipsi expellentur Galli, & mutationes magnæ orientur in Italia, in qua nonnulli mox in altum eleuabuntur, moxque decident.

Potentes Veneti ac Ecclesia Romana in præfatis fortunæ ludis commiscuntur, qui utinam abstinerent. Nam cum maiora lucrati credent, etiam quæ habebunt, amittent, nec semel id duntaxat eueniet eis.

Orientur quoque res ob Italicas inter Romanum Germanumque Imperatorem, & Gallorum regem primam post constellationem multa odia, & inimicitia non parua, sed agentibus etiam Ecclesiasticis Principibus dicti reges in vnum inient foedus, & in Venetorum pernitiem conspirabunt, dissimulata potius inter eos pax concordiaque fiet quam vera, & ideo post aliquot annos secretis & occultis effectibus, alter alterum deiiciet, neque alto animi consilio inuicem bene conuenient. Galli superabunt Venetos, & omnia pene terrestria ab eis auferent, & ad custodiam Venetiarum Veneti ipsi deuoluentur. Sed hæc initia dolorum eisdem erunt, non finis. Nam humiles facti, contra Gallos non modica recipient auxilia, & amissa recuperabunt, & animos apponent ad maiora acquirenda. Quæ res totalem interitum libertatis, atque status ac eorum domini ruinam pariet, parumque aberit, quin & Venetiarum ciuitas quoque euertatur.

Post hæc inter Ecclesiasticos prælatos, inter Gallosque atrox bellum insurget, & nonnullæ ciuitates Venetorum antè à Gallis subactæ, ipsis nouissimis dominis rebellabunt quamobrem bellis acerbis ac diris interfectionibus & depopulationibus affligentur, & modo Galli, modo Ecclesiastici vincent, varia utriusque & anceps fortuna eueniet, & in bello utrinque multi cadent. Ecclesiastici Germanorum, Hispanorumque auxiliis freti fortiores erunt, Gallosque cladibus & præliis affectos vi tandem ab Italia pellent. Eoque tempore Angli contra Gallos tunc magna necessitate compulso bella ex Hispania mouebunt, sed hæc bella parum durabunt. Post quæ exurget in Gallos rex novus, in cuius spe plurimi peribunt, quoniam Gallos iterum in Italia ducet. Hic humili cum gente dimicans, magno tamen cum discrimine vincet & Insulorum ciuitatibus potietur, & cum Papa duratura foedera iniet. Nam circa salutis annos, M. D. XIX. vel M. D. XX. noua iterum prælia inter Gallos Papamque consurgent, & agentibus Imperatore Romano, Romanis, Hispanisque Papa solitante, rursus Galli Italia pellentur. Et Sfortiada domus (parum duratura) tertio in Mediolanensium ducatum redibit. Verum obstinati Galli obsessum Mediolanum reuertentur, sed re infecta calamitatibus oppressi, fugam arripientes, vix in patriam suam se recipient. Sed nedum Galli obstinatiores effecti, quin tamen domi bellis fuerunt vexa-



vexati, ab Italis seducti, Italica rursus bella tentabunt, & in annis M. D. XXIII. M. D. XXIV. M. D. XXV. infelicitèr pugnabunt, & eorum rex, vel capietur, aut interficietur. Qui liberatus immemor præteritæ fortunæ ad maiora discrimina subeunda animum ponet, nec desinet tam diu Romanum imperium contra prælia miscere, donec contractis viribus, regnum, vitam, filios, duces, & omnia simul amiserit, sed alio me reuocant coelestia fata.

Per hæc fere tempora tumultus in Germania orientur atque internitiæ multæ. Ignobiles contra nobiles insurgent, sed prius hæc labes in Ungaria nascetur, in qua viri Ecclesiastici plurimorum causa malorum fient.

Sed ad omnium prouinciarum particularia quædam veniam, & ad nonnullarum domorum ac gentium & statuum seu dominia specialia procedam, in quibus plura distinctius enodabo futura.

Futurum est enim post hæc, vt Papa, Galli, Angli, Veneti ac Sfortiada domus, cum nonnullis aliis contra Romanum Imperium consurgant, & noua prælia mouentes uno animo in illud ferantur. Mediolanum obsidione cingent, & Insuæres diuersis commiscebunt malis, intus ac foris, & cum Hispanis male res agentur, & eorum militia circumdabitur, sed noua auxilia ex Germania venient, virosque anxios releuabit, & ad meliorem spem euectos consolatione non modica faciet lætari. Sed hæc lætitia diutius non durabit. Nam iterum ruina eadem pene Insuæres, Hispanique maiori calamitate, nec dissimili prementur.

p.171 Per hæc fere tempora atque hæc ob bella Christianorum & ad nonnullorum forte Christianorum instantiam immanissimus Turcarum exercitus capiet Belgradum & Rhodum munitissima Christianorum loca. In Ungariam traiciet. Et potius Ungarorum seditionibus quam vi sua vincet. Ungariæ Rex, qui tunc erit, nescio vi an dolo, aut casu, eo morietur in bello.

Quamobrem non modica inter Ungaros de regno orietur contentio, atque hi vnum, alii alium sibi deposcent in regem. Turcarum gens Pannoniam pene totam depopulabitur, incendet, destruet, & prædam multam, viros ac mulieres captiuas absque numero ex ea abducat. Et duo reges in Ungaria eligentur, vnus per ambitionem & contentionem, alius canonice atque mature, & forte ex antiqua regni Hungariæ stirpe veniet. Hic ille erit Rex, in cuius manu Otthomanorum Imperator interficietur. In ea siquidem re Ungarorum aderit non modica laus & Germanorum: sed astra etiam Regem quendam magnum Hispanum, ac Hispanorum ingenium affuturum pronunciant, & Imp. Romano auxiliares copias promittunt, & forte ipse quoque aderit Cæsar. Sed regis Ungariæ prima laus & singularis in hac erit opera. Nam & secretum tibi serenissime rex, & stellarum fata aperiam, inter annos Domini M. D. XXXVI. & M. D. XXXVII. hæc oculata fide cernent Christiani. Antequam præfati finiantur anni. Imperium Constantinopolitanum dissoluetur & debellabitur, Turcis ipsis crudelissimis stragibus affectis, & non solum ab alienigenis hæc fient contra Turcas, verum etiam à discordia inter suos principes orta. Nam interfecto Turcarum Imperatore tantum orietur inter duces eorum discordia atque dissensio, quod & ab inuicem, & ab externis crudelissimis bellis lacerabuntur, & diris bellis per totam Græciam excitationis, atque Marte per Græcos, & Asiam minorem furente, & eosdem populos fauissima peste cruciante. Ex Otthomannorum familia, atque à Turcarum gente Constantinopolitanum Imperium absque dubio cadet, de quibus in fine libelli nostri longior à nobis fiet mentio.

Tempus est enim vt ad Christicolæ reuertar, & de Ecclesiasticis Diis hominibusque vniuersis cantum lugubrem canam. Nam in annis M. D. XXVI. vel annis M. D. XXVII. capitibus Ecclesiasticorum prælatorum aduersa fortuna

Ccc 3

am invadens, proditione Alba regali capto. M. D. XXII. Post longam Rhodi defensionem mense Decemb. tandem in Turcarum deditionem venit. M. D. XXVI. Lud. Ungariæ Rex in stratagemate contra Turcas, XXVII. Augusti periit. Eodem anno pars Ung. Ferdinandum regem Boemorum, Pars altera Ioannem Wayuodam in reges eligunt, duo illi pro regno disceptant. M. D. XXVII. Pro Cæsare belli Imp. Carol. Borbon. Dux Romam circumvallat, & 6. Maii eam capit, ingrediendo actu belli tactus tormento, tam gloriosissime quam victoriosissime cecidit Papa Clemens VII. cum aliquibus Cardinalibus ad arcem S. Angeli aufugiens, tandem se dat captis dispersisque cæteris.

M. D. XXI.  
Franc. II. Sfort.  
Dux Mediol. potentia Caroli  
V. Cæs. in partem solum  
reducitur.

M. D. XXIV.  
Ingenti milite  
Franc. Rex Gal-  
liæ mense Sep-  
tembri Papiam,  
capto primo  
Mediolano cir-  
cumvallat, &  
M. D. XXV.

Febr. 24. apud  
Papiam in Bar-  
bachis palati-  
um Mirabelli  
infelicitèr pu-  
gnans, Rex cum  
ingenti Baro-  
num, procerum  
& copiarum  
cede capitur.

Per totam fe-  
re Germaniam  
vulgus contra  
potentes, nobi-  
les, superiores-  
que capti seuire  
ob innumerabi-  
les aggrauatio-  
nes, nascitur se-  
ditio magna, su-  
sio sanguinis  
maxima ab  
utrisque.

M. D. XXVI.  
Papa Clemens  
VII. Henricus  
Anglicus, par-  
lamentum Fran-  
ciæ, & Veneti  
aduersus Cæsar.  
copias tam Ger-  
man. quam Hi-  
spanas, vt ab  
Italia eas de-  
pellerent coniu-  
rant, agentes  
Cæs. sub conspi-  
rationis colore  
fucato, obno-  
xium, Francisc.  
Sfort. II. Me-  
diolani Ducem  
contaminant  
laborantem in  
agone.

Creditur Vene-  
tos, ut se sua-  
que tutarentur  
facilius, Turcam  
contra Christia-  
nos incitasse.  
Qui M. D.

inci- XXI. Ungari-



incipiet comminari, fietque pluribus annis fortuna nouerca, & Ecclesiasticis Romanisque dura contingent mala, Roma vi expugnabitur, & exercitui Imperatoris Romani præda fiet, & in ea interficientur multi. Papa vel fugabitur, vel capietur. Cardinales & Ecclesiastici prælati spoliabuntur & priuabuntur bonis, & Cardinales tristabuntur, & prælatorum Ecclesiasticorum diuitum atque potentium incipiet ruina. Horrendum quidem & extremiscendum Ecclesiæ Romanæ futurum dicam, Ecclesia namque Romana diuitiis ultra modum aucta ad id deueniet, ut posthabita rerum spiritualium cura, de rebus temporalibus duntaxat cogitatura sit, atque curam habitura, & regnum cælorum cuius clauces sibi datas creditur, in temporale terrenumque regnum commutabit. Propter quod DEus eos abiiciet à se, atque diris ac crudelissimis flagellis eos percutiet. Quoniam nihil cæleste tunc diuinumque meditabuntur, & armis hostium, tum infidelium, tum Christianorum, bellisque multiplicibus expugnabuntur; & tam acriter quidem, ut dispersi prælati in fugam conuersi profugique varia sint ad loca accessuri. Nec in tribulationibus illis maximis alicubi tuti erunt, & à Christianorum tandem auxilio destituti miseras suas amare flebunt; Quoad omnes solum CHRISTVM Dominum honorantes, rebus factisque contemnentur atque vexabuntur, & ad pristinam religionem reducti sub spirituali fient potestate, quoniam neque DEum, ut DEum, neque sanctos eius, sed seipsos tantum glorificabunt.

Et in hypocrisi loquentes mendacium, populos decipientes, atque fallentes spe virtutis, & umbra, Ecclesiam DEI profanabunt, & multorum malorum inter principes & populos Christianos & gentes existent causa. Quorum nonnulli nominis Christiani hostes occulte erunt, & quoniam tales pestes nunquam dignatus est Christus habere seruos de futuris malis dico, non de bonis, nam multos, & Ecclesiasticos nedum bonos, verumetiam optimos fore cerno. Veruntamen de malis duntaxat intendo loqui. Quoniam propter eos veniet, ira DEI super Ecclesiam, & malos hic incipiens de medio tollet, qui futuri sunt in malo obstinati, alios ad se conuertet. Bonosque sicut argentum & aurum præfatis flagellis ac veluti per ignem purgabit, & sic ex malis DEus eliciet bona, & Ecclesiæ statum reformabit. Nam plures erunt mali, & boni paucissimi. Quoniam tunc insurgent Hypocritæ multi & Pseudoprophetæ, & pauci in veritate Christi ambulabunt. Miser ille papa & infelix, de quo dixi, dolis propriis capietur, & alios credens decipere ipse se decipiet, & ab aliis decipietur.

An de Luthe-  
ro hoc dixisse  
velit an de aliis  
nescio. Circa  
tempora Luth.  
Pont. Leonem  
x. inuohere de  
potestate cla-  
uium incepit  
pro indulgen-  
tiis.

M.D. XXIX  
Comitis de Zyps  
dicti Wayuote  
favore nuntius  
Turca potentis-  
simo exercitu,  
immodico da-  
mmo Ungariam  
intrans Buda  
capta, aliisque  
oppidis Deinde  
in Austriam  
animum ponens,  
Viennam inua-  
dit, atque obsi-  
det.

Post capturam aut fugam eius non diu superuiuet, obiturus breui aut animi dolore aut veneno, aut ferro, vel à semetipso nescio. Cardinales infuturi Papæ electione discordes, magni schismatis causa erunt, plures papæ creabuntur, quo fiet, ut Ecclesiastici viri odio omnibus hominibus, tum infidelibus tum fidelibus, & in hæresin venient, & abominabiles cunctis erunt. Religiones omnes perturbationibus plurimis ac discordiis agitabuntur, & præcipue Minorum religio. Omnes Ecclesiastici viri tam presbyteri seculares, quam claustrales, à via veritatis discedent, sanctimoniales à dono castitatis & regulis suis decident, & cuncti pene à via veritatis auertentur, multa simulatio sanctitatis regnabit & dominabitur, adeo ut veri boni Religiosi non valentes habitare cum malis, ad montes tunc fugere cogantur.

Veniet à septentrione Hæresiarcha magnus, subuertens populos contra vota Romanæ sedis, cum magnorum Principum Septentrionalium auxilio, qui faciet ingentia, & magna loquetur, & apparebunt tunc temporis multi Hypocritæ, quærentes sibi exaltationes & honores, & dignitates Ecclesiasticas ambient, & erit confusio & persecutio maxima in Ecclesia, tam diu, donec interfectis Ecclesiasticis in malo obstinatis, atque vi maximarum tribulationum ad Deum conuersis, & malis moribus in bonos mutatis, & iniquis legibus ac prauis consuetudinibus sublatis, & ritibus pessimis deletis, & in sanctas & æquas leges consuetudinesque ac ritus pios conuersis. Ecclesiæ status renouabitur totus, & velut sol oriens cla-



ro sereno formosus, & decorus refulget in terra, sed nondum statim finis. Nam MDXXXVII. fere annis octo Petri nauicula fluctuabit, sed fluctibus non opprimetur. Quin Innumerabili exercitu Turca secundo Austriam pergrassatur incendiis, ruina, atque depredat, infecta re, ludibrio se recedit. M. D. XXIX. Perhorrendus inauditusque prius morbus, Anglicus sudor appellatus increbuit, Medicis incognitus, quam plures citissime abstulit. Eodemque anno penuria ingentissima non tam Italiam quam etiam Germaniam peruagata, per multi fame perierunt.

Sed & alio sermonem meum conuertere me oportet, & ad Christianorum bella redire, demum ad externa me conuertam. Erunt enim in diebus illis bella saeuissima inter Francos tunc maxima calamitate compulsos, & inter Germanos, Anglos, Hispanosque, nec non inter Pannonios & Italos, & Italiam, & tanta quidem, ut genus humanum tantam mortalitatem vix poterit pati. Galli cum Hispanis, Anglis Germanisque manus miscebunt. Sed & inter quosdam eorum primos inuicem bella, & discordiae videbuntur. Itaque ab externis, & a suis affligentur. Germanique & domi, & foris, & ad inuicem & cum externis & maxime cum Gallis & Italis praeliabuntur. Angli modo cum Gallis, modo cum finitimis Scotis, ac etiam cum Hispanis bellabunt. Itali & ad inuicem & ab externis opprimuntur & interficientur, & in area Italiae maior pars huius lugubris ludi fortunae fiet. Nam in ea pestes saeuissimae, quae eam consument, euenient, ac praecipue Roma, Venetiae, Mediolanum, Florentiae, Ianuaeque pene totaliter consumentur, licet & aliae civitates plurimae eo morbo pluries adeo affligentur, ut hominibus quasi vacuae sint remansurae. Inauditi morbi nascentur in eis, quibus Medici nescient remedia propria conferre. Penuria quoque Italiae populos ciuitatesque plus quam credi possit aggrauabit. Ciuitates nonnullae, villae castraque partim comburentur, partim destruentur, & aequabuntur solo.

Timeant Insubres, & Longobardi, qui ad mortem usque & internitiam grauissimis & diris & variis affligentur malis intus & extra. Quae omnia eis propter intestinas discordias ac delicta, & propter status Mediolani contentiones contingent. Post Mediolanum Roma, post Romam Florentia, post Florentiam Ianua, Venetiaeque consimilia timeant fata. Nam eadem fortuna & aduersa ipsos omnes moratur, ut deuoret.

Sed & Neapolitanum regnum angustias & aduersas fortunas sustinebit, in quo Galli cum Hispanis pluries longoque tempore pugnabunt.

Post Turci cum Hispanis, quibus omnibus tandem Hispani superiores erunt. Omnia extrema visura, passuraque misella est Italia, sed praecipue Longobardi; p.173 bellicus furor omnia maligna in Italiam effundet, plusque Italiae quam ceteris prouinciis astra minantur. Apparebit namque fortissimus princeps à septentrione, qui populos debellabit, & urbes & dominia, & potentatus, horribili cum terrore saeuissimisque bellis, expugnabit, uniuersos vi sibi subiiciet.

Aquarum diluuium nedum in Italia, verum etiam in aliis quoque prouinciis exundabunt, & humiliora operient loca, & ciuitates & castra submergent.

Futurumque est mare piratis & classibus plenum, qui magno cum terrore ciuitates maritimas oppriment, & spoliabunt, vnde fleant expectantes, fleantque permaxime Romani Imperii hostes. Quot dominia mutabuntur, quotque illustres familiae antiqua amittent dominia, haud facile narrari potest, & hoc permaxime in Italia continget. Quot Respublicae per vim & cum dolore suos statum & libertates amittent, & aliis dominiis & externis subiicientur. Florentia, Luca, Ianua, Venetiae, & aliae quaecunque Italiae Reipublicae praefato fato erunt subiectae, neque euadere poterunt, & quo tardius id fiet, eo durius miseriusque atque infelicius eueniet eis, & eo fato prementur. Circa namque annos M. D. XXVIII. & M. D. XXIX. & M. D. XXX. tam ardua, diraque atque saeuissima bella inter Gallos atque Germanos & Hispanos, & inter eorum reges oritura sunt, inter quos Angli, Italique miscebuntur, & etiam Turci ad ea Christianis in auxilium vocabuntur. Ita quod tunc videbitur, quod status orbis sit ruiturus, & omnes praefusione rerum, timebunt ultimam ruinam.

Multi contra Romanum Imperatorem & suos ferentur & ibunt, sed Romanum Imperium tanta vi repente contra hostes suos praeter omnium spem & opinionem

MDXXXVII.

Innumerabili

exercitu Turca

secundo Austriam

pergrassatur incendiis,

ruina, atque de-

predat, infecta

re, ludibrio se

recedit.

M. D. XXIX.

Perhorrendus

inauditusque

prius morbus.

Anglicus sudor

appellatus in-

crebuit, Medi-

cis incognitus,

quam plures ci-

tissime abstulit.

Eodemque an-

no penuria in-

gentissima non

tam Italiam

quam etiam

Germaniam

peruagata, per-

multi fame pe-

rierunt.

M. D. XXVIII

Franc. Gall. rex

cum Venetis ca-

stra contra Nea-

polin ponunt,

eamque obsidio-

ne cingunt.

M. D. XXX.

Die 8. Octobr.

hora 11. noctis

Tybris fluius

excreuit, non

modico damno

Romam sub-

mersit.

Eodemque an-

no 5. Novemb.

Selandia &

Holandiae ma-

xima fuit aqua-

rum inundatio

submersione

multorum loco-

rum.

Hoc idem An-

verpiae, in

Flandria vici-

nisque oppidis

accidit.



nionem insurget, quod contra omnium iudicium opprimet eos, superabit, ac vincet, & Gallorum regem aut interficiet, aut secundo eum capiet, tamen gladio concidet, & amisso regno, filiis calamitatibus oppressis, Ducibus suis interfectis vitam finiet, & tunc vltima Gallorum laus, sub aquila volabit, tum Galli infelices erunt, M. D. XXVIII. M. D. XXIX. & M. D. XXX. M. D. XXXI. sed in armis M. D. XXVII. & in principio. M. D. XXVIII. ipsorum Jupiter causam fouebit & permeabit ingentem gloriae famam, mox interituram amittet, & post subito totaliter extinguetur, interea feliciter pugnabit.

Anglus quoque Rex Gallicis ruinis non longe dissimilia pertimescat infortunia, poterit & ipse cum suis aduersam experiri fortunam, & ingenti strage proflerni, quia tutum non est contra fata niti. Verum si sapiens fuerit, dominabitur astris.

Hispani multis victoriis augebuntur, gemina Hispanorum regna sub vno rege conuolabunt. Auaritia foedabuntur, & eos in Italia grauius pessundabit. Multas Italiae partes Africamque totam suo subiicient imperio.

Romanorum Imperator, Germanusque, & Vngarus indissolubili iungentur amicitia, & inuicem auxiliaribus armis se iuuabunt.

Angli modo cum Imperio, modo cum Gallis, nuncque cum his, nunc vero cum illis erunt, firmam stationem non habebunt, sed videant ne studio aut opinione fallantur.

Germani cum Vngaris mediante rege firmiter cohærebunt.

Veneti nunc his, nunc illis adhærebunt, adeo ut perfidi reputentur, & magna super eos veniet, & insperata ruina. Nam destructis Gallis, & eorum rege interfecto, Florentia, Januaque occultorum ac manifestorum criminum suorum crudeles poenas dabunt.

Mediolanum in ipsa Gallorum concidetur ruina, post Venetiis manent crudelia fata, pestibus saeuissimis consumentur, & nouis bellandi artibus, & inaudito exercitus genere ipsamet Venetiae expugnabuntur, & alienae ditioni fient subiectae.

Astra quidem monent virorum bellatorum ingenia, nec crudeli fato obuiam venire poterunt. Clamabunt nec exaudientur, neque quisquam eorum miserebitur. Et adducet Dominus super eos omnem ruinam, quam ipsi super alios artibus induxerunt, & potentes potenter tormenta patientur. Concludet eos dominus in manus inimici, & sapientiam eorum perdet, nec scient vulnere suo remedium aliquod afferre, propter grauissima eorum peccata, quae in CHRISTVM & rempublicam Christianam commissuri sunt, & quae commiserunt. Tunc p. 174 ad Turcarum auxilia iam non secrete sed palam manifeste confugient, & Otthomannorum Imperatorum familiam, gentem secum in ruinam trahent. Veruntamen victis hostibus huius velint nolint, tradent manus, & decantus Hieremiae atque lamentatio cantabitur. Princeps prouinciarum facta est sub tributo.

Cumque eorum interitum absque lachrymis praedicere nequeam, cum de me benemeritos non amare non possim, Hoc illis tamen praedicere volui, ut non ignorent, quam viam ad eorum salutem capere. Si tamen obcoecatum non fiat cor eorum, quod saepe contingit. Quia nescimus credere coelo materiamque magnae struimus per vota ruinæ, & à Deo saepe ducimur, atque cum peruenerimus, peccatorum poenitentes, futuris ac imminentibus malis remedium aliquod afferre non valemus.

Ad immanissimos Turcas iam sermonem meum conuerto. Quos longum latumque ac magnum imperium, diuitiarum magnitudo, & frequentium gloria victoriarum, tantum attollet animum eorum ac spem, ut eis non putent ipsum posse resistere coelum, atque idcirco ad totius imperium aspirabunt, Assyrios, Aegyptios magnis praeliis fractos superabunt. Armenos, Parthos & Persas continuis praeliis infestabunt.



Cum his variam fortientur fortunam, nunc eos superabunt, nunc ab illis superabuntur, pluries victores atque superiores euadent, & quandoque succumbent magna strage suorum. In Christianos arma mouebunt, Veneris multa inferent damna, post amici eorum facti, Belgradum in ditionem suam recipient, superabunt Pannoniam, Ungariamque multis cladibus afficient, tandem in eam intrantes, aut regem eorum bello laceffentes, simul & Imperium Romanum, Germanosque bellis durissimis tentantes, eorum Imperator in ipsorum manus cadet. Annos tunc Christi M. D. XXXIII. vel M. D. XXXV. sed prius Apuliam intrabit, & Siciliam, & Galliae Hispaniaeque littora classe sua, nec non & Italiam molestabit & affliget, terrorem magnum Christianis incutiet. Sed CHRISTUS tandem suorum stragem diutius non feret, Furorem Germanorum, Ungarorumque militiam, & Hispanorum atque Italicorum ingenia contra eum adducet. Et tandem superatus interficietur, in quo proelio, ac negotio Regis Ungarorum laus erit prima. Nam ut astra praedicunt dicti regis auspiciis ingenio industriaque ac ductu perficientur omnia.

Hac de morte immanissimi Imperatoris Otthomannorum, & victoria contra eum per Christianos habenda praedixi. Otthomanna namque domus in XIII. vel XV. capita deficiet, neque illum excedet numerum, neque annos salutis. M. D. XXXVI. transibit. Tunc omni horrendo concidet casu. Ex hac Turcarum Imperatoris morte tanta orietur inter Otthomannos discordia, quod ab inuicem & ab externis interficientur & destruentur, & tota Graecia inermis, & in externis bellis feruescentibus in ea afflictabitur, pesteque ac fame laborans fauissima, ultra modum excrucietur, nec sibi paulum respirandi praestabitur tempus aut locus, donec pene tota corruerit. Tunc Christiani omnes uno animo, unoque impetu alacres mare transibunt, & tanta velocitate ac tot & tantis copiis, ut quasi totam terram Christianorum in orientem non ire, sed potius volare credendum sit. Sed prius Veneti & ipsi malis omnibus afflicti succumbent, quam hac fiant. Tunc videbis Turcas ad Christi fidem conuolare, tunc Christiani qui Christum abnegauerunt, ad eius suave iugum laeti reuertentur, & gemina imperia sub uno Imperatore conuolabunt, & ab uno regentur.

Aphrica quoque sanguinolentis bellis deuastabitur, pesteque fauissima laborans, & multis afflicta calamitatibus, & ipsa Hispano regi victas manus dare cogetur. Ad hoc accedit stultissimi Poenorum regis stultissima proles discordiis agitatura, & de Numidia, Aphricaeque contendens Imperio, dum quisque summam Aphricae conabitur habere, atque regere, viribus nititur, regnum dissipans amittet, & ad tantam prorumpet insaniam, ut malit externo subiici regi quam praefati & paternum regnum ad Hispanos peruenire potius quam apud suos permanere. Hac odia proxima ad annos Christi M. D. XXXVI. & M. D. XXXVII. inter fratres oriri incipient, & aliquandiu dissimulata erunt, in principio parum contendunt ad inuicem, post in apertas inimicitias deuenientes ad insaniam & extremam angustiam ducentur, & furore ad inuicem agitati, vel relinquent statum, p.175 quod ad perniciem fraternam facere arbitrabantur, sicque dum externa ad auxilia confugient, & ab suis & ab alienis vi compulsi cadent. Et in manus Christianorum Aphricae perueniet regnum. Nec cessabunt, nec desinent Hispani ad ulteriora procedere, donec omnia meridiana ad extremam Indiam usque sibi subiiciant, sed gloriam suam auaritia, luxuriaque aliquantulum denigrabunt, praedaeque ingentissima ab omni parte, genteque domum adducta, supra quam credi potest ditabuntur. Sicque domini nostri Iesu Christi vexillum ad orientales partes, cum gloria portabitur. Et Machumethana secta cessabit, & passim Machumethani & Indi, ad Christi Baptismum conuolabunt, cui sit honor & gloria in secula seculorum, Amen.

Hac dixisse scripsisseque voluerim, Serenissime Rex, & tibi direxisse, ut nonnullam ex hoc caperes voluptatem & in eo tanquam in speculo futura prospiciens,



ciens, etiam quæ ventura erunt post te prænoscas, ut beneficiorum à te receptorum non immemor, dictum vaticinium gratiarum loco referendarum Maiestati tuæ mitterem. Qui obsecro non donum, sed mittentis cor aspiciens benigne accipias, & Torquati tui semper in bonum sis memor.

APOPTHHEGMATA IMPERATORUM  
ROM. RUDOLPHI, HEINRICI VII. CAROLI  
IV. SIGISMUNDI, ALBERTI, FRIDERICI III. PER  
POGGIUM FLORENTINUM, ÆNEAM SYLVIVM,  
ET HENR. BEBELIUM  
CONSIGNATA.

RUDOLPHI ROM. REGIS.

QVAS non didicerunt artes, recusant omnes exercere: imperare, quæ est ars artium, omniumque difficillima, nemo recusat. Interrogatus Rodolphus Cæsar, qui primus in familiam Austriæ traduxit Imperium, cur ita fieret; *Non mirum*, inquit, *stultos putant, qui regna nesciant, stultum autem sese nemo indicat.*

*Senerum*, inquit Cæsar Rodolphus, & *imitem fuisse me aliquando pœnituit, lenem ac placabilem nunquam.*

Ad Rudolphum Imperatorem venit quispiam, qui Ottacarum Bohemiæ Regem in venatione sese occisurum promitteret, si facto præmium esset. Cui Rodolphus; *Etsi noster hostis est Ottacarus, eumque odimus, non tamen id efficiet, ut iustitiæ & moderationis fines transeamus.*

HENRICVS VII. IMP.

COMITES de Wirtemberg apud Germanos in Sueuia late dominantur, & quamvis principatus honore & appellatione careant, potentia tamen multos principes antecedunt. At insolentes & improbi habentur, qui neque Romanam sedem verentur, neque obsequuntur imperio. Nobilis quispiam, qui hos diu sectatus fuisset, ab eis tandem recedens ad curiam Cæsaris profugit. Henricus tum Septimus imperabat auus Caroli IV. qui Sigismundi pater fuit. Nobilis in conspectu Cæsaris quotidie accusare comites, nunc rebelles, nunc raptores appellare, hostes imperii, contemptores Ecclesiæ. Cui Henricus; *Tace*, inquit, *veterator, neque laudanti tibi, quos scimus pessimos, neque vituperanti, quos tu olim sequebaris, fidem habemus.*

CAROLI IV. IMP.

IN scholam Pragensem ingressus aliquando Carolus IV. Romanorum Imperator, cum disputantes liberalium artium magistros in horas quatuor audiuisset, idque purpurati moleste ferrent, ac cœnæ tempus adesse dicerent: *Mibi*, inquit, *tempus est minime, nam cœna mea hæc est.*

Carolus IV. Romanorum Imperator, hominem qui sibi necem parasset, ad se vocavit, eique aureos mille dono dedit, quibus nubilem filiam nuptui collocaret; illius se misereri dicens, cui filia natu grandior domi clausa esset. Homo gratias egit Regi & ad conspiratores egressus; *Nesciebam*, inquit, *Carolus qualis esset. Nunc liberalem & clementem Principem ferire nullo pacto possum.*

WENCESLAI REGIS.

WENCESLAVM Bohemiæ Regem inter purpuratos suos crebro sermone p.176  
vsurpare solitum ferunt; *Ego si me diripiendis urbibus Italia fors præsentem dederit, cæterarum rerum prædam militibus impartiar, vini tantum apud me spolia refer-*



25. Et tu Girrhai Cæsar mihi numinis instar.  
*Quæso faue cæptis : mea si tibi plectra mouentur ,  
 Si tua Daphnæis præcinxit tempora ramis ,  
 Et me palladio quondam manus induit auro ,  
 Annorum lustris nondum mihi quatuor actis ,*
30. Sponte tua sacras dignatus tradere lauros :  
*Qua torquet Naucellus aquas , ac gurgite flexo  
 Raptus in Adriacos currit sine nomine fluctus.  
 Tu quoque Sigæi custos , vel nominis autor ,  
 Maxmiliane , mihi decus admirabile & orbi ,*
35. Summaque Strimonii vel debita gloria Martis  
*Cui nunc diuinos resonant mea carmina honores ,  
 Ingredere ad citharam , votisque assuesce vocari.  
 Aspice Cimbriacum jam nunc tua facta canentem ,  
 Non quo terribilem prosternis Teutona vultu ,*
40. Gallorumque acies , aut duros cæde Sycambros ,  
*Aut Morinos , Celtasque truces , Batauosque furentes ,  
 Sed quo pacatum moderaris Apolline Martem ,  
 Cum tibi Cecropias resonat facundia voces.  
 Et loquitur tecum positis Tritonia monstros.*
45. Cæsar ubi proprias sensit torpescere vires ,  
*Ingentes quondam ( tantum insperata senectus  
 Secum aufert sensim ) ne jam sufferre labores  
 Bellorum possit , cælum speculatus & astra ,  
 In longum cæpit grandes extendere curas ,*
50. Quis quondam imperii currum moderetur habenis  
*Plus ætate vicens , maiorque ad munia Martis  
 Surgat , & ad pacem . Qualis confectus ob æuam  
 Getulus quondam pastor , cui regna relinquat ,  
 Extremis alium querit fugientibus annis ,*
55. Cui proprias committat oues , doceatque repertos  
*Fontes , & raris habitata mapalia tectis :  
 Haud aliter Cæsar , numen venerabile terris ,  
 Atque decus fidei , Christi que vicarius alter ,  
 Siue secundus apex , cui regna tradat habenas ,*
60. Quærebat , terris ubi cedit debitus astris :  
*Ne sacrum imperium rapiat dum perfidus hostis ,  
 Seruitioque premat gentis vexilla fidelis ,  
 Et iam belligeri feruebant Pannonis arma  
 Austriacas pressura vrbes , dum Cæsar ad oras*
65. Filius Oceani , iustas ulciscitur iras ,  
*Ac si stelligeri Martem regnator Olympi  
 Captiuum videat , non curet regna minora ,  
 Sed totis natum redimat cœlestibus armis.  
 Præterea crebris etiam tunc cædibus ipsam*
70. Ausoniam late vastabant agmina Regis  
*Sæua Dicarchei , propiusque incendia belli  
 Horrebat tellus quondam regnata Quirino.  
 At contra diuis ibat Malatesta secundis  
 Ille triumphator Veneto sub Marte Rubertus ,*
75. Cuius ob auspiciū Calabri cecidere sub armis.  
*Ergo magna novos spectauit Roma triumphos.  
 Hunc iuxta haud aliter ductorem flamma subibat ,*

Frederici Cæs.  
 cura de succes-  
 sore.

p. 193

Ac



- Ac si Peliden quondam sequeretur Achillem  
Ipse Menætiades, quos & genuere sorores.*
80. *Tum quoque Boiorum gentes ab origine prisca;  
Jusubrumque duces, Mantusque Bianoris urbes,  
Atque Fluentini communi sorte ferebant  
Hercule & Alcide cognomina, & arma secuto  
Ductore & Calabro Getici Mauortis alumno,*
85. *In Venetos bellum Phrygia de stirpe creatos,  
Qua ferit extremas violentior Adria terras:  
Seu furor inuidiæ, seu regnorum æmula virtus,  
Seu fatale odium, tantos mouere tumultus.  
Et miseram Scodram Turcarum sæua premebant,*
- p.194 90. *Quæ modo Hydronteos popularant agmina campos  
Jam capta & sæuo direpta Chalcide bello.  
Hac iter est, quoties tristes Nabatea furores  
In nos castra mouent, iurataque signa sequuntur.  
Tunc & Carnorum variis incurfibus oram*
95. *Vastabant Turcæ currit qua fonte Timæus  
Septeno, & rapidas voluit qua Soncius undas,  
Ingressi cades & tristia damna tulere.  
Vidi ego Noriciæ qua se subducere colles  
Incipiunt, nostros crudeli cæde peremptos.*
100. *Sapius hæc rabies Carnorum terruit urbes:  
Donec gens Venetum statuit munire Grauisacas,  
Hostis ob incursum, & fido custode tueri.  
Sed nec Gallorum gentes non Marte furebant:  
Ac nostro penitus semoti ex orbe Britanni;*
105. *Sapius Oceani missa trans æquora classe.  
Raptabant furtim vicino ab littore prædas.  
Nec minus horridulo subiectus Sarmata cælo  
Arma sequebatur, nec victus prælia Dacus,  
Sic quos terrificis propriis premit imbribus Vrsa,*
110. *Non pacem Hesperia gentes, non oia habebant.  
Tristia præcipue sæuus Rex arma mouebat,  
Qua sol Herculeas pronò petit æquore metas,  
Et lauit excursu fumantes æthere currus.  
Certabant fidei causa, pendebat in armis*
115. *Mars dubius, longo currit qua flumine Batis.  
At nunc hostiles toto premit agmine turmas  
Hispanus fidei cultor, gentisque nefanda  
Ingens vastator, ritusque oppressor iniqui  
Sic eat, o decus & stellantis gloria cæli.*
120. *Christe precor, pereant gentes & sacra nefanda;  
Mahumetique fides, sæuique potentia regni.  
Sic vexari orbis, sic omnia feruere bellis,  
Non sectæ populis nostræ, non gentibus ullis  
Jam non esse odium, toto discordia mundo*
125. *Bacchari. seu sponte homines in bella ruebant,  
Ac si cælestes non hæc mortalia curent,  
Auertantque oculos, nec tristia facta luantur:  
Seu tales motus ingens poscebat & ordo.  
Fatorum, & cæli series arcana mouentis:*
130. *Non vitium rectoris erit. sic æquora venti  
Æolii quondam refractò carceris antro*



*reſeruabo. Si quis autem in cellam vinariam iniuſſu meo fuerit ingreſſus, gladio feriatur.* Hunc Principes Electores velut inertem atque ſocordem imperio deiecerunt, Ruperto Boiario in locum eius ſuffecto: ad quem ciuitates Teutoniæ omnes defece-  
runt, demptis Noribergeniſibus, qui Wenceslao iuraſſent. Hi cum hinc iuriſiurandi religionem vererentur, inde vim Boiarii timerent, legatos ad Wenceslaum mittunt, qui ſe iuramento ſolui petunt, ac ſi neceſſe ſit, auri viginti millia nummum in eam rem offerunt. Rex auditis legatis, liberos Noribergeniſes dicit, *ſi curruſ quatuor tradant onuſtos vino, quod Baccharaceniſe vocant,* Hoc eſt inter Rheneniſia vina, vt putant, optimum.

Jodocus Marchio Morauix, cum patruum ſuum Wenceslaum Bohemiæ Romanorumque Regem viſitatum veniſſet, vocauit eum patruus in penitiorem ædium partem, atque in hunc modum allocutus eſt: *Eſſi ſatis ſcio non eſſe è dignitate mea, quod Electores imperii me regno Romano abdicauerunt, ſolatio tamen eſt, quod familiâ noſtra hoc decus non excidit: Ego te libens volensque ſucceſſorem mihi datum accipio.* Cumque Jodocus hiſ verbis territus ad regis genua procubuſſet ac ſibi nihil imputandum diceret, qui earum rerum omnium ignarus eſſet; *Pone metum,* inquit, *nepos, nam neque imperium inuitus depono; neque ſi retinere illud cupiam, iura ſanguinis violare auſim.* Bono itaque animo eſto, imperiumque tibi demandatum ſuſcipe: *mibi mea ſatis eſt Bohemia, viris, opibus regni mei tanquam tuis, vt libet, vtere.* Lætumque & donatum nepotem à ſe dimiſit. At ille ſex tantum menſes ſuperuixit, locumque poſtea Ruperto Boiario qui inperaret, fecit.

## SIGISMUNDI IMP.

**S**IGISMUNDI Caſaris prouerbiuſ fuit, *Ignarum eſſe regnandi, qui ſimulare nſciret.* Vera ratio nec vultum, nec animum mendacio obtegentem regem probat.

Laudanti eum ſupra modum, & Diis perſimilem eſſe prædicanti cuiſpiam, alapas Sigismundus non paucas incuſſit, dicentique illi, cur me cædis? *Cur me mordes?* ait.

Alberto Aſtriæ Duci (qui mortuo Sigismundo Caſare, cuius erat gener, regnum Hungariæ ac Bohemiæ cum Romano Imperio ſuſcepit) cum Principes amore ciuium tutos eſſe oportere, idque ſolam innocentiam præſtare diceret; *Et fida cuſtodia,* reſpondit ſocer, *infortunium excludit.*

Cum accuſaſſent purpurati apud Sigismundum maledicentiam Germanicæ multitudinis, quæ de ſuo Principe paſſim obloqueretur, ſubridens Imperator; *An vobis,* inquit, *grauē videtur illos male loqui, cum nos male agamus.* Cumque quidam ſe ciuem Budenſem diceret, ſibiſque tanquam membro parcendum arbitra-  
retur; *Et putrida,* inquit Sigismundus, *ſi ſit mea manus, abſcindatur.* At à Deo, inquit Fridericus Imperator, *cum oro, miſericordiam peto, non iuſtitiam.* Cur igitur me ſubditis clementem atque miſericordem non exhibeam?

Interrogatus Sigismundus Imperator, cur apud liberas ciuitates peculatus crimen adeo frequens inueniretur; *Idcirco,* reſpondit, *quod nudos honores ciuibus commendant, populus autem ad lucrum inhiat.*

Beatos eſſe in terris Reges aiebat Sigismundus Imperator, *ſi excluſis ſuperbis, manſuetudinis, humanitatisque cultores in curiam adſciſcerent.*

Exigenti promiſſa veterano militi, cum diceret Sigismundus Imperator, *At immoderata fuit petitio tua.* Reſpondit miles, *poteras negare, cum peterem: nunc ſine turpitudine quod promiſſum eſt, reſcindere non poteris.* Tum Sigismundus, *ſi ex duobus, alterum me ferre oportet, leuius rerum quam fama iacturam ſubibo.*

Vlrico de Roſis, \* inter Bohemos proceres opibus & auctoritate pollenti, cum Sigismundo abſenti mortem fratris, & rebellionem Pragenſium ſignificaf-  
ſet; *Fratrem ſuum* reſpondit Sigismundus *natura tributum ſoluiſſe.* Pragenſes vero ſibi tanto glorioſius ſoluturos, quanto fortius vincerentur.



Piponem Florentinum, ex domo Stroziōrum, cum plurima bella fideliter feliciterque confecisset, adeo Sigismundus Imperator apud Hungaros magnificauit, vt secundum illius regni caput omnes faterentur, plerique primum putarent. Dixisse quoque Sigismundum aliquando ferunt. *Facile Pipo, si velit, Scipione in manum meam dato, regni fines egredi me solum ac nudum videbit.*

Cum diceret aliquando Sigismundus Imp. assentatores se veluti pestem odif-<sup>p.177</sup> se, imo inquit Brunorius Veronensis; *Nullum genus hominum magis amas. Nam quid apud te possent Marcus Banus, Laurentius Palatinus, Ursacius Michael, Caspar Schlickius, nisi assentando tuam gratiam meruissent.* Tum Sigismundus, Brunori, ait, *sic nam comparatum est, cum vitandos esse adulatores dicimus tum maxime illis aures damus. Nec tu mecum tam diu fuisses, nisi mihi blandiri assueuisses.*

Mariam Hungariæ Reginam cum accepisset vxorem Sigismundus. Principum regni concilium apud Budam actum est. In eo regina perfidiam regulorum accusauit, qui se regno spoliare conati essent, tum Sigismundus vna cum iudicibus causa cognita, duos & triginta regulos securi percussit, quæ res multorum deinde laborum & discriminum ei causa fuit.

In obsidione Pragensi principes ciuitatis, qui Sigismundum odissent, populares vt obscæna & petulantissima in eum verba iactarent, astu atque arte prouocabant. Sic enim futurum arbitrabantur, vt irritatus hostis crucem & quæuis duriora supplicia comminaretur obsessis; illi vero pœnam metuentes, obsidionis incommoda constantius tolerarent. Quod cum intelligeret Imperator, impunitatem omnium, quæ in se dicerentur, per præconem promisit.

Cum diceret Laurentius Palatinus Hungariæ, imprudenter agere Sigismundum Imperatorem, qui victis hostibus non solum vitam & opes relinqueret, sed etiam eos inter amicos reciperet, extolleretque: *Tibi, inquit Sigismundus, videtur utile inimicum occidere, neque enim mortuus bellum excitat: At ego inimicum occido, dum parco, & amicum facio dum extollo.*

Conspirauerant Hungari aduersus Sigismundum, armatique regiam intrauerant, aut capturi Regem, aut si id non succederet, occisuri. Quos vt ad se irrumpentes cognouit, accepto pugione in medium progressus; *Ecquis, inquit, vestrum manus in me iniiciet? aut quidnam feci, quod me regem vestrum occidere vultis? prodeat è vobis si quis audet, & cum me solo solus congregiatur.* Ea voce & audacia obstupere coniurati, & sibi quisque timens abiire.

Captum ab Hungaris Sigismundum duo adolefcentes cognomento Garii, quorum pater ab eo neci traditus fuisset, custodiendum accepere, donec omni conspiratorum iudicio in eum animaduerneretur. Quos cum ille ut se dimitterent, frustra pertentasset, vidua eorum matre ad se vocata; *Scio, inquit, mulier, viri tui mortem tibi acerbissimam fuisse, teque mihi tanquam auctori eius infensam, verum ego per superos iuro inuitus tanti viri exitio assensus sum. Regina eum atque alios accusauit, condescenderunt regni proceres, atque in reos mortis sententiam tulere. Ignarus ego factionum vestrarum, novus ad regnum veneram. Quod regulorum maior pars decreuisset, id mihi exequi necessarium erat. Esto tamen, virum tuum sciens volensque neci dederim cruciandum, tunc propterea natorum tuorum aut aliorum iracundia me obiicies? Et quis (obsecro) vel te vel illos fructus sequetur? Non desunt mihi fratres & amici, qui meum sanguinem ulciscantur: neque Hungaria rege diutius carebit. Exempla Reges timent, nemo apud eos acceptus est, qui manus suas regio sanguine cruentauerit. Quod si me missum feceris, ex filiabus Hermannii comitis Cilie necessarij tui uxorem ducam, fratris ac soceri adiutus opibus, regiam demum potestatem vendicabo, filios tuos imprimis charos habebo, efficiamque ut omnis posteritas tua hoc factum sibi fructuosum sentiat. Hoc ego cum liberis tuis egi: sed non capit ætas, quantum necesse est. Te quæ plus sapis, & illis, & tibi consulere oportet.* Persuasa mulier Regem dimisit. Is Barbara Ciliensi in matrimonium suscepta, breui post tempore debellatis rebellibus victor regnum obtinuit, promissoque satisfaciens, Garios iuuenes super regulos extulit. Ex his ortus est Ladislaus



dislaus de Gara, quem Banum appellant, inter primores Hungariæ proceres opibus & auctoritate præpollens.

Allata erant Sigismundo Cæsari ex Hungaria aureorum quadraginta millia, cum iam aduesperaſceret, eaque in thalamo regio recondita fuere cum cubitum iſſet. Cæſar dum cogitat, in quemnam uſum eam pecuniam conuertat, ſomnus eum deſtituit. Tum ille excitatis cubiculariis; *Ite*, inquit, *ocys: conſiliarios ducesque militum huc accerſite*. Vocati proceres media nocte trepidi (timebant enim ne quid aduerſi accidiffet) Imperatorem celeriter adeunt, & quæ cauſa ſit tam repentinæ vocationis inquirunt. Imperator conſeſtim aperta arca, inter eos qui aduenerant pecunia diſtributa; *Ite*, inquit, *ſecure, tranquilleque nobis dormire liceat. Nam quod mihi ſomnum ademerat, vobiſcum exit*.

*Satis vicit*, inquit Sigismundus Imperator, *qui hoſtes fugauit*.

Cum rogaretur Sigismundus Imperator, quem virum regno dignum aptumque exiſtimaret? *Eum*, inquit, *quem neque ſecundæ res extollerent, neque aduerſæ deprimerent*.

Sigismundus quoque Imperator cuidam coram eo querenti, Conſtantiæ libertatem non eſſe. *Atqui*, inquit, *niſi hic ſumma eſſet libertas, tu tam libere minime loquereris. Libere enim loqui, magna libertatis eſt ſignum*. Bebel.

p.178 Cum gloriabundus quidam eques coram Sigismundo urbanos magiſtratus parui faceret, tribunosque militum laudibus in cælum tolleret: *Tace*, inquit, *Thraſo nulla nobis militia opus eſſet, ſi ſuas quique ciuitates prætores, cæterique magiſtratus moderate iuſteque gubernarent*.

Cum beatos quiſpiam foeneratores coram Sigismundo diceret; qui dormientes rem augerent? *Et tu ergo miſer*, inquit Sigismundus, *qui rem vigilando comminuis*.

Georgius Fiſcellus cum eſſet Doctör, à Sigismundo Cæsare equeſtris militiæ inſignia ſuſcepit. Exin cum Baſilienſium Synodum adiſſet, conſultante de rebus arduis Sigismundo, dubius an Doctöribus legum coniunctis in unum locum, aut ſe equitibus ab illis in alium ſeparatis coniungat; cumque tandem ad equites inclinaret; *Stulte agis*, inquit Sigismundus, *qui literis militiam præfers. Nam ego milites mille vna die fecerim: doctorem mille annis non vnum fecerim*.

Sigismundus Imperator cum eſſet in Italia, audiſſetque patres Baſileæ coactos Eugenium Papam ſummo pontificatu deponere ſtatuiffe, quamuis podagra laboraret, itineri ſe commiſit, tantaque celeritate aduectus eſt, vt ante in Concilio ſit viſus, quam eo venturus audiretur. Neque enim bono Principi tolerabile videbatur, Eccleſiam, quam ſe auctore ad conſenſionem & pacem Conſtantiensis ſynodus reduxiſſet, Baſilienſis denuo reſcinderet.

*Qui iocos moderate ferrent, ſapientes dicere* Sigismundus ſolitus erat; *qui promptiſſime iocarentur, ingenioſos*.

Quemadmodum ſuperi amari & timeri volunt, ita & Reges, ait Sigismundus. *Neque enim bene ames, niſi timeas*.

Ignis quem ſacrum vocant, digitum pedis Sigismundi Cæsaris exurebat, & ne altius ſerperet timebatur. Medici abſcindendum digitum ſuaſere, paruit Imperator, & quaſi alius incideretur, ita immoſus chirurgi ferrum inſpectauit & pertulit.

#### ALBERTI II. IMP.

IN bello quod contra Bohemos Albertus Austriæ Dux, priuſquam Romanis imperaret, diutiſſime geſſit, interrogatus, quem copiis præficere ſtatuiffet; *ſi alium* inquit, *quam me ductorem exercitus petitis, fruſtra me Austria Ducem appellatis*.

*Venatio*, inquit Albertus Imperator, *Ladislai pater, exercitatio virilis, ſaltatio muliebris: ſequæ voluptate quauis alia carere poſſe, venatione non poſſe*.



IN Fridericum Cæsarem III. cum nonnulli dicta probrosa iactassent, referentibus aulicis: *An nescitis*, inquit Fridericus, *Principes quasi signum ad Sagittam expósitos esse. Turres quidem fulmina præaltas feriunt, humilia tecta prætereunt. At nobiscum bene agitur, si verbis tantum impetimur.*

Hypocritarum vitam Friderico Cæsari coram accusabat Caspar Schlickius, abiturumque sese aliquando in loca dicebat, quæ hisce hominum monstris vacua essent. Cui Fridericus. *Ultra Sauromatas ergo, inquit, & glaciale Oceanum tibi eundum est. Sed cum eo veneris non omnino carebit hypocrisis locus, si modo & tu homo, non Deus es. Inter mortales enim nemo est, qui non ex aliqua parte fictus fucatusque sit.*

Dicentem sæpe numero Fridericum audiuius, *malle se febre teneri, quam saltationi operam dare.* At Galli, ut quam leuissime saltent, vestium, quibus nec nates (turpe dictu visque) obtegunt, usum inuenere. Sequitur Hispania Gallicas ineptias; Italia vero damnat, detestatur, abhorret. Nam quid turpius, quam ita vestitum esse hominem, ut quasi nudus pudenda quæque in propatulo habeat.

Ioannes Gersius Westphalus, qui Sigismundi Cæsaris protonotarius fuit Alberto Romanorum Rege fatis functo, Principes Electores apud Francfurdiam adiit, ac ne Fridericum eligerent, suadere summopere conatus est, conficta in eum vitia multa disseminans. Neque contentus his, cum Romam Fridericus peteret, imperiales infulas suscepturus, Nicolao V. Pontifici Maximo epistolas direxit, quibusne Fridericus coronaretur annixus est. Nihil tamen horum Imperatorem latuit; hominemque cum posset corrigere atque interimere, passus est Viennæ vivere, partisque frui bonis, quæ illi non mediocria fuere.

Fridericus Imperator extra cœnam nunquam vitur vino. In cœna lectissimum bibit, & id aqua perdomitum. Leonoræ Augustæ, quæ paterna in domo nunquam vinum gustasset, suadebant medici, in Germania regione frigida, si mater fieri vellet, vinum biberet. Quod cum accepisset Fridericus, nie dico vocato, p. 179 *Abi*, inquit, *atque Imperatrici dicito, sterilem me coniugem quam vinosam malle. Proinde, me si amat, vinum oderit.* Ad id nuncium, Leonora: *Et si viri iussioni tam libenter pareo, quam viuo, si tamen vini usum mandaverit Imperator, mori optauerim quam parere.*

Teutoniæ Regibus, qui ad Imperium eliguntur, apud Belgas in Aquisgrani ciuitate mos est coronari, atque inungi. Huc dum Fridericus iam electus properat, Albertus frater eius, iunctis cum comitibus Ciliæ viribus, Camos inuadit, Labacum insigne ac munitissimum oppidum obsidione cingit, Crainburgenses infestat, Tergestinis, se nisi dedant, exitium minatur; apud Carenthanos, apud Stirieneses nouas turbas excitat. Seniores qui apud Ernestum patrem imprimis accepti ac fideles fuerant, Friderico suadent, *patrimonii quam imperii curam maiorem gerat. Imperium rem communem, alio tempore curari posse; patrimonium rem propriam, & ad hæredes transituram nisi nunc tuetur, frustra in posterum optari querique.* Contra Fridericus, imperii communia negotia per sese, hæreditaria & priuata per procuratores curanda statuit, cœptumque iter prosequens, belli duces elegit, qui se absente patriæ consulant. Coronatus dum reuertitur, fratrem cum comitibus profligatum reperit: ad se vocatum temeritatis fraterni hospitii & amoris arguens, rursus in gratiam recipit, & quasi nihil peccasset, in partem regni restituit.

Fridericus Imp. III. victis bello & vi captis Gunziensibus, LXXX. homines, qui rerum nouarum ac rebellionis autores fuerant, in patibulum sustulit, reliquæ multitudini vitam libertatemque ac fortunas concessit.

Audiui Fridericum Imp. sæpe numero dicentem, *ex iis quos extulisset, quam pau-*



*paucissimos gratos fuisse : idque muneribus suis datum esse , ut ex fidelibus infideles fierent.*

Homini agresti , qui ad nundinas Nouæ ciuitatis Austriæ venale triticum aduexerat , dum parumper ad caupones diuertisset , equorum alter ex biga subtractus est. Furti querela ad Fridericum Imperatorem defertur , iubetur actor reum nominare. Is sibi de furto constare ait , in ciuitate regia facto , furem ignorare. Hærentibus in coniectura consiliariis , si forte in suspicionem quisquam veniret , *Mirum* , inquit Fridericus , *cur etiam alterum equum homo non perdidit : tot sunt hodie in hac vrbe equites , qui equis indigent.* Cum rusticus ; *Equa est altera , ô Cæsar , qua belligerantibus nulli est vsui.* Atqui ergo , ait Cæsar , *eam infideto , atque in omnes vrbs viculos discurreto : subtractus equus in aliquo stabulo latitat , qui cum iugalem equam senserit , mox hinnitum dabit.* Paruit homo , eo-que pacto furtum compertum , agrestis quod suum erat recuperauit , fur poenas dedit. Omnes igitur qui iuri dicundo præsumunt , non tantum iustos , sed etiam prudentes & peracutos esse decet. Zischa Bohemus , qui cæcus Thaboritarum duxit exercitum , villam quandam in Austria cum diripuisset , neque inuenisset armenta (nam illa in insulam Danubio cinctam transuecta fuerant) conquisitis à proximis villis duobus vitulis , totidemque suis , eos è regione insulæ tam diu verberari iussit , donec mugitum , grunnitum , vaccæ , fuesque exaudientes ad ripam suam transnuat. Quibus interceptis , prædam non modicam abduxit ? atque ita docuit ingenio non minus quam viribus res militares geri.

Jacobus Archiepiscopus Treuirensis , Princeps Elector , vir industrius , ac magni consilii , sed multum cupidus , & ad extollendam Ecclesiæ suæ potentiam nimis attentus , anno ab hinc secundo , Fridericum Cæsarem apud Nouamciuitatem cum adiisset , & alia atque alia petens impetrasset , pluraque petendo instaret : *Si non facis* , inquit Imperator , *petendi finem , ego negandi principium inueniam.*

Alberto Ladislai patre vita functo & Bohemi & Hungari Fridericum Cæsarem sibi regem petiuerunt ; Quibus ille , *Abstine à me* , inquit , *scelus hoc , ut patrueli meo paternam hereditatem auferam.*

Friderico Romanorum Imperatori Amadeus Dux Sabaudia , quem clerus apud Basileam congregatus , Eugenio IIII. à summo Pontificatu deposito , in illius locum suffecerat , Felicemque Papam V. vocauerat , filiam quam domi habebat viduam , iuuenem & forma præstantem in matrimonium obtulit , simulque dotis nomine auri nummum ducenta millia , si Eugenio relicto Petri se successorem appellaret. Horruit Cæsar , minimeque Sacramento suo , Ecclesiæ Sacramenta foedare voluit , atque ad suos conuersus ; *Vendere* , inquit , *alii pontificalia solent , hic libenter emat , si reperiatur venditorum.*

Qui duri atque immites essent Principes , his aiebat Fridericus Cæsar , mortem nimis extimescendam esse , *Nam quales se dum vixerunt , aliis præstitere , tales cum moriantur , in se iudices inuenturi essent.*

*Neque stultis* , inquit Fridericus Cæsar , *delectari possum , neque superbis esse amicus.*

179  
180 Victis in Hungaria Gunziensibus , *Magnum* , inquit Fridericus Imperator , *actum est opus : nunc maius restat , ut scilicet vincamus nos metipsos , atque auaritia & vlciscendi cupiditati frenos imponamus.*

Cum vocaret in curiam senatores Fridericus Imperator , *Vtinam* , inquit , *duas res consilarii mei in palatii vestibulo deponerent , sic enim & ipsi recte consulerent , & mihi inter consilia diiudicare facillimum esset.* Interrogatus , quamnam res illæ essent , *simulatio , & dissimulatio* , respondit.

In Austriam cum remearet ex Italia Fridericus Imperator , renunciatum est , Australes in armis esse , & assumptis secum aliquot Bohemorum militibus Nouam ciuitatem obsidere instituisse. Proinde caueret , ne montes Stiria transmitteret , similiterque amici omnes vno ore consulere. Nam fugæ , cum in Au-  
stria



stiriam venisset, nulla ei facultas daretur. Ad ea Fridericus, *Nec mihi verisimile fit Australes*, ait, *eo perfidia prolabi, ut me dominum suum exercitu petant; neque ego is sum, qui fugiam ante ora eorum, quin capi vel occidi malim.* Exin quid illi petant, nisi Ladislaum, pignus hoc, quo reddito liberi sumus? tenerum adhuc puelum inuiti ex tutela nostra remitemus. At si pergunt petere, in medium Australium, Bohemorum, & Hungarorum id pomum dabimus, de quo tres DEos inter se contendisse fabula Junonem, Venerem, & Mineruam tradunt.

Romam cum peteret Fridericus Imperator, ex praefectis quos Flauianis reliquit, certior factus est, Vlricum Eitzingerum, inter proceres Austriae opibus & industria nulli secundum, trans Danubium profectum esse, ibique clandestina colloquia cum Morauis habere, timendum esse, ne res nouaret absente Principe, è re igitur fore, Vlrico, cum rediret, vincula iniicere. Quibus Imperator respondit; *Clarum ac potentem hominem periculosum esse in carcerem rapere, quando neque nocentem plectere eum, neque innocentem dimittere audeas.* Vlricum deinde, quia consiliarius suus esset, iurisiurandi immemorem haudquaquam se credere, prius quam experiatur.

Ladislaum Hungariae ac Bohemiae Regem cum educaret Fridericus Imperator, non defuerunt peruersae mentis homines, qui perdendum suaderent puelum, cuius vita ingentes molestias Caesari, mors regna, & opes maximas allatura essent. Ad quos ille; *Ergo me*, inquit, *opulentum magis regem, quam pium, quam iustum cupitis? at ego bonum nomen cunctis diuitiis antepono.*

Ad gloriam non mediocrem Alphonso Aragonum Regi cessit, quod Fridericus Imperator Romae coronatus, ad eum visendum venerit. Nam ille cum in Germaniam redisset, interrogantibus amicis, apud Italos quae memoratu digna vidisset; *Alphonsum*, inquit, *omnium qui modo viuunt Regem & prudentissimum, & magnificentissimum.* Cumque aliqui non probarent, quod maior dignitas ad minorem venisset: *Imo*; ait ille, *ad maiorem profectus sum.* Nam etsi minor est Regis auctoritas quam Imperatoris, *Alphonsus tamen Friderico maior est.*

Schadureнна oppidum est cum arce munitissima, per quod Australibus in Stiriam iter est. Huic praefuit vnus ex veteribus amicis Ernesti, qui Friderici Caesaris pater fuit. Adierunt Fridericum aliquot successiue adolescentes, sibi quae praefecturam loci committi petierunt, quod qui illam teneret aetate ac viribus confectus esset. Ad quos Fridericus; *Paternum amicum oppido, non amico oppidum commendamus.*

Litterae Casparis Schlickii ex Norinberga missae cum in manus Friderici Caesaris venissent, quae nonnullis Hungaris inscribebantur, fuerunt qui eos aperient das dicerent, quod in iis aliquid prodicionis scriptum esse putarent, quod sciri oporteret. Quibus Fridericus, *Casparem ego & probum virum, & mei amantem existimo.* Si fallor, malo per sese error pateat, quam mea diligentia inuestigetur.

Interrogatus aliquando Fridericus Imperator, quid homini optimum possit contingere? respondit, *Bonus in hac vita exitus.*

In terra Austria cum obiisset vnus ex primoribus annos natus tres & nonaginta, qui vitam inter voluptates illecebrasque nulla vnquam valetudine offensam duxisset, ignotaque illi omnis calamitas, omnis moestitia fuisset, idque Friderico Caesari narraretur; *Et hinc*, inquit ille, *immortales animas censere licet.* Namque si Deus est, qui hunc mundum gubernat, ut Philosophi & Theologi docent, eumque iustum esse nemo negat, profecto! alia loca sunt, ad quae post mortem animae migrant, ibique pro factis, aut mercedem aut poenam accipiunt. Nam hic neque bonis sua praemia, neque malis sua supplicia reddi videmus.

Interrogatus Fridericus Imperator, quinam sibi charissimi essent, *Qui me*, inquit, *non magis quam Deum timent.*

Iurasse Fridericum nunquam comperi, nisi cum in ciuitate Aquensi apud Belgas, & cum Romae coronatus esset. Idque iuramentum constantissime tenuit. Cum enim iureiurando promississet, *Quae bona possideret Imperium, nullatenus alienatu-*



*naturum*, & modo hoc modo illud ex eo peteretur, maluit auarus negando, quam concedendo periurus videri, eamque ob causam petenti Borſio \* Mar-  
chioni Eſtenſi ducatum Mutinæ & Rhegii, tam diu reſtitit, donec monſtratum eſt  
eundem ducatum, qui ſub annuo tributo concederetur, lucri magis quam alie-  
nationis ſpeciem habere, præſertim cum Mutina ac Regium in poteſtate ſua non  
eſſent. Quam rem nos ei potiſſime ſuaſimus.

\* Borgia.

*Hæc ex Ænea Syluio.*

Fridericus III. Cæſar Auguſtus, cum Romam profeſſurus Florentiam tran-  
ſiret, videretque Coſmi Medicis florentiſſimas opes, qui aliquando pauperrimus  
eſſe prædicabatur, dixiſſe fertur: *O quam multa conuitia & contumelioſa verba per-  
tulit, ſurdaque aure tranſiit, donec ita locupletatus fuerit.* Optime iudicans,  
omnes illos, qui præter conſuetam felicitatem aliorum, ex paupertate, vel ex  
humili loco ſtirpeque emergunt; multorum odiis, variis opinionibus atque con-  
uitiis exponi. Cum ex traditione Corn. Taciti libr. 17. inſita ſit mortalibus na-  
tura, recentem aliorum felicitatem ægris oculis introſpicere. *Bebel.*

Cum diuus Fridericus III. tempore Concilii generalis Baſileam peteret, ac  
oppidum Rhinfeldam tranſire ſtatuſſet, ciues eius oppidi honorifice Regem ſuum  
ſalutare cupientes, quæritabant ſacerdotem eruditum & idoneum, qui munere  
oratorio fungeretur. Obtulit ſe quidam Beanus (vt Barbare vocamus eum, qui  
barbarus ſit & homo indoctus, incultisque moribus deformis) qui vel Zuickauia,  
vel Dauentriæ, vel Butzpachii in militia literaria deſudauerat; & cum uniuerſus  
populus, totuſque ordo clericorum cum Sacramento Eucharistiæ obuiam proceſ-  
ſiſſent Cæſari, infulſus Beanus (vt Barbare de Barbaro loquar) nihil aliud dixit,  
niſi *Bene veneritis domine Rex.* Qua ſalutatione ob ſacramenti reuerentiam vix  
riſum Cæſar continuit. *Bebel.*

Cum Fridericus III. Rom. Imp. conuentum Principum haberet Noriber-  
gæ, venit quidam mendicus ad aulam, petens intromitti, quia frater Cæſaris eſ-  
ſet. Et cum ſæpius inſtaret, tandem res deuenit ad Cæſarem, qui rei admiratio-  
ne motus, iuſſit intrare mendicum, atque *unde frater ſuus eſſet*, interrogauit.  
Reſpondit mendicus. *Omnes eſſe mortales inter ſe fratres, à primo parente Ada-  
mo, atque vt ſe pro iſta fraternitate donaret, petiuit.* Cæſar cui procacitas illius  
parum grata fuit, homini tantum cruciferum, quæ eſt moneta ſatis nota, dedit.  
Cui mendicus: *Non decet, inuictiſſime Cæſar, vt fratri tuo tam paruum munus des,  
cum tu tam diues ſis. Vade,* inquit Imperator, *& ſi quilibet fratrum tuorum tantum  
tibi dederit, eris me ipſo ditior.* *Bebel.*

## FRIDERICI III. IMP. EPISTOLÆ ALIQUOT.

### I.

SERENISSIMO PRINCIPI, CAROLO FRAN-  
CORUM REGI, FRATRI ET CONSANGUINEO  
NOSTRO CHARISSIMO.

FRIDERICUS Romanorum Rex ſemper Auguſtus, Auſtriæ, Stiria, Karin-  
thia, & Carniola Dux, comes Tirolis, &c. Sereniſſimo principi, Carolo Re-  
gi Francorum fratri & conſanguineo noſtro chariſſimo ſalutem, & fraternæ di-  
lectionis affectum. Dum ad ſacri Imperii ſæſtigia diuina vocati munere tantæ  
moli grauiſſimæ gubernationis humeros noſtros in Dei nomine, ne ſuæ videre-  
mur ordinationi reſiſtere, ſyncero corde ſubmiſimus, inter innumera mala, qui-  
bus undique orbis terrarum concutitur, hoc maxime quo certamen agitur, vt  
æuo noſtro ſancta ſcindatur Eccleſia, animum noſtrum eo premit, ardentiusque

Tom. II.

E e e

folli-



sollicitat, quo eidem Ecclesiæ matri nostræ filiali dilectionis amore & nobili ad-  
 vocationis officio fortius constituimur obligati, ut illi sæua nunc iacula patienti  
 pro viribus nobis distributis ab alto, diligentia celeri succurramus, atque ad con-  
 currendum in hoc tam necessario ac salutari opere Reges & principes Christiano  
 nomine gaudentes pura sinceritate hortemur. Nihil vero ad id æque patrocini-  
 naturum conspicimus, quam si catholici simul conueniamus Reges & principes,  
 Ecclesiastici & sæculares, ut sentiant quicunque dissidentes unam esse voce-  
 omnium. Tunc enim sperandum, quod nemo usquam illam irridebit, aut sper-  
 net, nemo non reueretur, neque non timebit. Unde venerabilium & illu-  
 strium nostrorum & sacri Imperii Principum Electorum oratoribus qui pridem de-  
 cretum electionis de nostra persona ad culmen imperii celebratæ conspectui no-  
 stro attulerant; aliis quoque prælatis, principibus, comitibus, baronibus, proce-  
 ribus, & viris consularibus, nostris fidelibus dilectis deliberate consulentibus,  
 conuentionem seu dietam solennem pro communi constituimus omnium salute  
 in ciuitate Moguntina, rebus gerendis pluribus ex causis accommoda, in diem fe-  
 stum Purificationis gloriosæ virginis Mariæ proxime futurum, quæ erit secunda  
 mensis Februarii: ad quam dexterâ Dei nobis assistente propitia, intendimus per-  
 sonaliter nos transferre: charissimam fraternitatem vestram puro cordis affectu  
 rogantes, quatenus orthodoxorum progenitorum vestrorum imitantes vestigia,  
 pro laude Dei, pro consolatione Ecclesiæ suæ sanctæ, ac totius populi Christiani  
 salute, ad conuentionem seu dietam huiusmodi idoneos vestros oratores, de ve-  
 stræ fraternæ dilectionis proposito, viis quoque & modis, quibus ab imminenti-  
 bus calamitatibus sancta possit respirare Ecclesia, distincte instructos, & ad tractan-  
 dum, consulendum, cooperandum, & concludendum in his plena vestra potestate  
 fulcitos, illic destinare velitis. Si autem fraternitas vestra conuocationem &  
 dietam eandem accedere posset ac vellet propria in persona, id profecto ingen-  
 tem gloriam & rebus gerendis fructum vberiore afferreret. Hortamur denique  
 fraternitatem vestram, aduertere velle mente fideli, quæ si nostra exhortatio,  
 quantaque Ecclesiæ subsit necessitas, & quam periculosum esset nostrum silentium  
 & agere libeat quod expetimus, propter salutem populi & decus vestrum, re-  
 spicientes ad illum cuius causâ agitur: qui de coelo descendit, ut moriturus ho-  
 mo crucem ascenderet, in quo militans fundatur Ecclesia: quatenus in ea subor-  
 ta tollantur dissidia, & à grauioribus periculis eruatur. Datum Viennæ, Anno  
 Domini MCCCCXL. mensis Maii, regni nostri anno primo. *Ad mandatum*  
*Domini Regis.*

Conradus præpositus Viennensis, Cancellarius.

## II.

FRIDERICI III. IMP. AD NICOLAUM V. PP. EPISTOLA  
 DE AMISSIONE VRBIS CONSTANTINOPOLIS.

*Apud. An.  
Sylv. epist. 153* BEATISSIME pater & domine Reverendissime, cum nobis renunciatum ef-  
 set his diebus Constantinopolim Græciæ caput, & Orientalis imperii quon-  
 dam sedem per Turcorum dominum expugnatam & in seruitutem redactam,  
 multumque ibi Christiani sanguinis fusus esse; grauius quidem (ut debuimus)  
 & molestissime tulimus communem Christianæ religionis calamitatem atque ia-  
 cturam, intelligentes, non de præterito solum quod doleamus, sed de futuro  
 quoque quod timeamus, tantæ urbis amissionem fidelibus Christianis abunde præ-  
 bere. Namque si verus est rumor ad nos delatus, hominum quadraginta millia  
 cæsa sunt: animæ plures in seruitium miserabile ductæ: Tempia diuino nomini  
 dedicata funditus diruta: Naues non paucae captæ: amissa ciuitas famosissima,  
 & ratione situs & aliis conditionibus ad tutelam Christianitatis admodum necessa-  
 ria: In qua per multa secula & patriarchalis dignitas claruit, ac imperialis maie-  
 statis insignia floruerunt. Taceamus de literis & bonarum omnium artium stu-  
 diis,



diis, quæ veluti domicilium proprium ex tota Græcia Constantinopolin habuere. Quibus modo cum ciuitate cadentibus nullum profecto credimus esse Christiano nomine insignitum, qui de tantæ vrbs ruina supra modum non angatur & doleat. Maximum certe atque horribile vulnus illatum est ecclesiæ Catholicæ nostro tempore, ac maius, quam scriptis possit aut verbis exprimi. At cum potentissimus hostis, crudelissimus, immanissimusque in manu victoriam hanc, locumque nactus sit, ex quo fidei Christianæ quam prosequitur pro sua libidine possit officere, quis non eum indies plura conaturum existimet, quibus Christianorum gentem in perniciem desolationemque ducat? Quippe victoria sui natura insolens etiam si ad mites venerit, feroces eos impudentesque reddit: Quid cum his agat qui suoapte ingenio soliti sunt fauere? An putare quisquam potest, iratorum hominum cupidorum atque acerbissimorum quieturam esse victoriam? Enimvero qui ex illis partibus ad nos veniunt, & Peram aiunt Christianis perditam, & alia pleraque loca vicina Constantinopoli per Turcos occupata: qui proximam quamque victoriam non desidiæ aut socordiæ ducunt, sed instrumentum sequentis habent, studiisque omnibus enituntur, vt Christianum nomen ad internicionem redigant. Nescimus an vera sint, quæ autorem non certo dicuntur, timere tamen quam sperare multæ nos vrgent rationes: Fama quæ de venturis Turcorum exercitibus erat, ciuitas regia pro magnitudine sua parum populosa, hostium propinquitas, auxilii spes remotior & infelix ac dolorosum nuncium optato & fausto semper credibilis. Quibus ex rebus & si non dubitemus S. vestram his cognitis excitatam esse ad cogitandum inueniendumque modos, quibus tam periculoso & potenti hosti, ne amplius noceat, opportune resistatur; tamen quia nos quoque velut Imperatorem & Aduocatum Ecclesiæ res ista concernit, haud ab re credimus esse, si clementiam vestram pro communi  
p.183 fidelium salute accensam, magis ac magis inflammare nitamur. Neque enim res est, quæ negligi debeat, vel differri: oportet occurrere, priusquam vulnus altius infigatur, aut veneni labes in corda decedat. Caterum cum tanto negotio non vnius prouinciæ, aut paucorum principum, sed omnium Christianorum Regum seu certe magnæ partis eorum necessariæ vires existant, dicemus confiderenter, quod nobis ex vsu videtur, neque dubitamus, quin dicta nostra vestra Sanctitas in partem recipiet meliorem. Sane pro tanto & tam necessario opere optimum factu censemus, clementiam vestram, quæ locum tenet in terris Saluatoris nostri Jesu Christi, cuius res agitur, nunc exurgere, scribere Regibus, legatos mittere, monere, hortari Principes ac communitates in aliquem communem locum, vt aut veniant, aut mittant: nunc dum malum est recens, Christianæ rei consulere festinent. Pacem aut inducias inter socios fidei componant, atque iunctis viribus aduersus salutiferæ crucis inimicos arma promoueant. Quod si vestra S. toto pectore suoque more ad rem hanc tam piam & vtilem intenderit, non est nobis dubium, quin plures & Reges & Principes, in quibus zelus domus DEI & ardor fidei orthodoxæ non est extinctus, ad mandatum vestrum voluntarios & obsequentes se præbeant. Nos certe pietati vestræ, vt libuerit, & assistere & cooperari pro nostri officii debito minime omitemus. Solum precamur, vt vestrum in hoc negotio consilium & intentum communicare dignemini. Namque si fuerit opus, nostræ nationis & imperii sacri Principes ad hoc ipsum conuocare, & alia quæ iuxta consilium vestrum putauerimus opportuna, implere non negligemus. Quia vero ad huiusmodi negotium maxime conducere arbitramur, Italica bella quam primum sopiri, quamuis Beatitudinem vestram ad hoc conari & per se sufficere non ambigamus, tamen quia anno proxime decurso, & Romæ & Neapoli, & Ferrariæ, & Veneriis de hoc plurimum egimus, licet frustra, si pietati vestræ impræsentiarum quouis modo expedire videtur, quod oratores aut ad S. vestram aut partes contendentes mittamus, siue alio modo pro pace celerius conficienda laboremus, vt sanctitati vestræ fuerit visum, eo modo faciemus, omnique cura & studio proni erimus ad ea intendere,



per quæ pace tam Italis quam cæteris Christianis data, & furori Turcorum resistatur, & Christiana religio in suo statu conquiescere possit, & debito sub splendore foueri, Datum, Anno M CCCC LIII.

## III.

FRIDERICVS DEI GRATIA ROMANORVM REX SEMPER AVG.  
SANCTISSIMO PATRI DOMINO EVGENIO PAPE IV.

S. P. D.

ETSI non dubitemus Apostolicam sedem, tanquam veritatis doctrinam, iustamque vitæ magistram, quorumlibet iuribus fauorabilem esse, nullique prorsus iniuriam facere, quia quicquid ab eius folio manat, iustitiæ lancibus libratur & æquitatis? Non tamen ab re fore putamus aliqua per nos scribi. B. tuæ, quibus ius serenissimi principis Ladislai Vngariæ Regis patruelis nostri charissimi, pueri pupilli & Orphani commendatum efficiamus, & eorum qui ficta pro veris referunt, impiis resistamus conatibus. Scit enim tua beatitudo patruelem nostrum præfatum, qui post obitum vitæ, diuæ memoriæ patris & antecessoris nostri Alberti Romanorum atque Hungariæ, Bohemiæque Regis, in utero matris posthumus remanserat, ut primum natus fuit, & sacri fontis vnda renatus, adhibitis ex more solennitatibus veram Vngariæ & scientiam \* suscepisse coronam. Nunc autem (sicut accepimus) magnopere quidam instant, ut tua sanctitas titulum regni huius in alium transferat, multa illinc emolumenta, tum sanctitati tuæ, tum regno præfato prouenientia dicentes, quæ licet nullatenus Apostolicum mouere credamus, quia nullum commodum est tam ingens pro quo bene vendi iustitia possit, mirandus tamen est eorum conatus, qui ex alieno incommodo suum quærentes commodum, altissimi sanguinis puerum & paterno & auito regno cupiunt spoliare. Iniquum profecto & abominabile scelus. Fecerit enim alius cuius magnalia, sit potens, sit aptus regimini, sit per aliquos accersitus, volumus ista discutere, nec cum iniuria volumus loqui cuiusquam: nulla tamen ratio suadet, huic puero suum adimi regnum, qui si propter se non esset magni putandus, ei tamen propter facta paterna vniuersa Christianitas fauorabilis esse deberet. Quis enim nostri temporis homo est, qui patris huius gloriosos conflictus, tum contra Turcos, tum contra Hussitas non audierit? Debent præterea & huic puero fauorem præbere, aui sui clarissima gesta, & illa Ecclesiæ vniõ Constantiæ reparata, tum vero & Caroli quarti, & Henrici septimi. Quorum vltimus hic sanguis est memoria Cæsarum. Tacemus inclitæ domus nostræ Australis opera, tam pro imperio, quam pro Ecclesiâ in fauorem fidei per nostros & huius pueri progenitores edita. Quis tandem non compati deberet innocenti puero parentibus orbato, vero Vngariæ Regi ac hæredi? Infamæ profecto mentis & animi truci sunt, ac totius hostes iustitiæ, qui tam generosum puerum regno priuare & ius tam clarum conculcare nituntur. Sciunt tamen & illi ipsi qui talia petunt, inhumanum esse quod optant, atque idcirco extinctum puerum & nusquam inueniri confingunt, ut vel hoc colore regni titulus in alium deriuetur. Sed aliud reperitur. Viuit enim Rex Ladislaus, ac fausta & felici fruitur sospitate: scitus puer atque formosus. Is est in Nouaciuitate vicinus Vngariæ, adiri que ab hominibus potest, qui eius visendi sunt cupidi. Spes & nostra & omnium est antecessorum suorum, virtutes in hoc puero reuicturas. Quæ omnia tuæ B. recensemus, ne per sinistras suggestiones aliquid ex curia tua valeat extorqueri, quod huic patrueli nostro possit esse nocuum, utque Puerum istum omnibus Imperii Principibus sanguine iunctum Apostolicæ sedis fauore tua Sanctitas prosequatur. Sit igitur hic Rex pupillus in tuo conspectu recommendatus, sit ante oculos tuæ mentis sua generositas, sua ætas, sua puritas, suorum memoria prædecessorum, & huius iustitiam, ex qua non inanis

& ficta

\* Legendum forsam sanctam.



& ficta, sed vera & ampla utilitas Apostolicæ sedis redundare potest, amplecti atque tueri velis. Datum Viennæ.

## IV.

FRIDERICVS DIVINA FAVENTE CLEMENTIA ROMANORVM  
IMPERATOR, SEMPER AUGUSTUS, ET AUSTRIÆ, STYRIÆ, CARIN-  
THIÆ ET CARNIOLÆ DUX, ET GOMES TIROLIS, ÆNEÆ SAN-  
CTÆ ROMANÆ ECCLESIAE CARDINALI EPISCOPO SE-  
NENSI, PRINCIPI AC CONSILIARIO NOSTRO  
CHARISSIMO, SALUTEM.

EX literis Henrici Senfleben consilarii nostri Vlrîco Episcopo Gurcën, etiam Apud An.  
Syl. epist. 250.  
principi ac consiliario nostro pridem ex Vrbe destinatis, accepimus paterni-  
tatem vestram, nuper in proximis quatuor temporibus, per sanctissimum Do-  
minum nostrum Papam ad dignitatem Cardinalatus promotam extitisse: de quo  
profecto lætitiâ & consolationem habuimus valde singularem, præsertim cum  
id multo iam tempore desiderauimus, & summo opere expectauimus. Gaude-  
mus enim nos voti nostri compotes effectos, ac tot preces & scripta nostra non  
vsque quaque incassum porrecta fuisse. Quanquam paternitas vestra huiusmodi  
gradum in Ecclesia suis etiam meritis & laboribus pro sede Apostolica multipli-  
citer perspectis digne fuerit consecuta. Optamus itaque ut ea dignitas vobis fel-  
ix, fausta, ac longo tempore duratura existat. Sperantes per hanc apertam esse  
viam paternitati vestræ ad maius aliquod fastigium, Domino concedente, con-  
scendendi: quemadmodum & sæpius sumus augurati. Nec dubitamus, eam  
quidem dignitatem in primis sanctæ Romanæ Ecclesiæ & vobis plurimum decoris  
& ornamentis, nobis vero & sacro Romano Imperio ac inclytæ domui nostræ,  
cui in minoribus semper fructuose & vtiliter præfuisitis non mediocriter commo-  
dum & vtilitatem allaturam, cum id longe magis efficere poterit. Confidimus  
enim, ac pro certo tenemus, paternitatem vestram in ea dignitate & loco, ea  
quæ personam nostram, statum atque dignitatem nostram & sacri imperii, nec  
non dictæ iam domus nostræ, ac nostrum ac nostrorum honorem, commodum  
atque vtilitatem respicere videbuntur, pro sua solita in nos fidelitate & consuetu-  
dine, nec non singulari prudentia vestra tam apud sanctissimum dominum  
nostrum, quam etiam sacrum collegium, cui modo adscripta est, diligenter  
promoturam & vbicunque opus fuerit, optime defensuram. Rogamus autem  
& hortamur paternitatem vestram, quatenus licebit, nos suis literis nobis sem-  
per iucundissimis crebro visitare nec suum circa nos officium intermittere velit.  
Et nos pro occurrentibus singulis ad vos tanquam patronum & promotorem ne-  
gotiorum apud Apostolicum agendorum continuo recurremus; Paternitatem  
vestram bene valere, & optimis successibus prosperare desiderantes.

Datum in Grätz, die Dominica, 30. Mensis Ianuarii,

Anno M CCCC LVII.



## LIBELLUS

PRECATIONUM DIVI FRIDERICI  
IMPERATORIS AD BLASIIUM.

*EN* adsum ante tuos oculos charissime Blasii,  
*Teque* liber supplici testor & oro manu.  
*Redde* meis me principibus, quorum optimus olim  
*Pulchre* ex amplexus me Fridericus avus.  
*Te* quoque laude ego apud Reges ornabo perenni  
*Officiumque* tuum hoc gratus ubique canam.

## Respondit Blasius

*Vade* libelle mihi longe charissime : *Vade*  
*Augustos* dominos atque require tuos  
*Qui* Te in deliciis habituri nocte dieque  
*Propicia* & nobis numina forsitan erunt

## In ipsum Orationale

*Parvulus* iste liber Friderici Caesaris almas  
*Precationes* continet,  
*Et* quibus ipse DEO verbis pro Maximiliano  
*Suo*, egerit quoque gratias.  
*Austriacam* pietate domum qua ornârit, & ipse  
*Dicaverit*, Patri DEO.  
*Ha* quia te Fernande, preces, te Carole Quinte  
*Deliniant* & asserunt :  
*Iustus* hunc habet, & circumfert nemo libellum,  
*Quam* vos beati principes,  
*Quos* Fridericus in his precibus depingere pulchre &  
*Monstrare* ceu digitis solet.  
*Vos* hunc Augusti divi, Regesque potentes  
*Et* Caesares piissimi,  
*Non* modo sumite clementer, sed saepe libellum  
*Deorum* ad aras volvite  
*Sic* pater ille Deus qui Divo Maximiliano  
*Ubique* promptus astitit  
*Vos* quoque (ut hactenus) eximia bonitate fovebit  
*Contra* hostium omnium faces.  
*Subiciet* vestrisque aliquando nepotibus orbem,  
*Quam* late totus is patet.  
*Vivite* felices Augusti, vivite tuti  
*Sub* optimi chypeo patris  
*Vos* metuat, vobis subsitque occasus & ortus  
*Et* quicquid orbis ubique habet.

SEQUI-



## SEQUITUR PRECATIO DIVI FRIDERICI TERTII IMPERATORIS.

Nunc dimittas servum tuum Domine ad pacem & tranquillitatem, quam prædestinasti mihi secundum magnam misericordiam tuam Deus meus, quia viderunt oculi mei salutare tuum, quod ex me parasti tuo populo Christiano, ad tuorum inimicorum destructionem, filium meum Maximilianum inquam, lumen oculorum meorum, & baculum senectutis meæ, super quo innixus quietem fumam optatam. O Deus meus! O misericordia mea infinita! O misericordia immensa: quoniam non derelinquis in finem quærentes & invocantes te. Quas igitur laudes ac gratias tibi dicere possum, indignus de tanta gratia & munere? Si ex toto corde meo aio: si ex omnibus viribus meis dicere velim, nil facio de meo, quoniam tua sunt omnia & ego totus tuus sum, & tua creatura: Omnia denique tibi iure debentur bona, quoniam à te sunt facta. Accipe tamen secundum clementiam tuam immensam, & secundum dignationem tuam infinitam, de seruo tuo, quod tuum est, tibi que debetur, æternas & immortales gratias, qui & hanc misericordiam fecisti cum indigno seruo tuo, sicuti fecisti cum seruo tuo David, ut poneres super sedem meam de fructu ventris mei, in conspectu meo, & super thronum filium meum post me regnaturum populum tuum, sanguine tuo pretioso redemptum. Et nunc tu Domine Deus, cœli & terræ creator, & gubernator liberalissime, audi orationem meam, ut impleas eum spiritu sapientiæ & intellectus, fortitudinis & iustitiæ: sicuti Salomonem filium serui tui David: ut possit hæreditatem tuam in unam aggregare, unire, pacificare, custodire & gubernare: Hostes tuos hereticos, schismaticos & infideles ad viam reducere veritatis: Rebelles & Obstinos compescere, & extirpare, fidelem populum tuum ac cultum tibi debitum ampliare & augere. Benedic & sanctifica ipsum benedictione patrum Abraham, Isaac & Iacob, ut multiplicetur semen suum super terram, sicut stellæ cœli. Manus eius fortes fiant in cervicibus inimicorum tuorum: Diligant eum tribus ac populi ac omnes nationes fideles: accurrant sibi armata auxilia in tempore opportuno. Comitentur eum sancti Angeli tui Michæel, Gabriel, Raphaël: Sitque illi semper victoria de cœlo tuo, sicut & Achatio, & Georgio, Duce S. Mauritio, quatenus pacificatis terris Christianis obtineat terram passionis tuæ sanctæ, despectui & ludibrio tam diu subiectam. Nunc enim, ut spero, tempus venit, & venit tempus miserendi, quo Christiana multitudo capta & subacta immaniissimo ac turpissimo Turco, terra-que sancta tua liberabitur per manum meam, & filii mei post me. Da igitur nobis Domine Deus omnipotens, qui aufers spiritum principum tyrannorum, & destruis consilia Regum impiorum, potentiam & virtutem, ut hæreditatem tuam, & terram sanctam sepulchrumque tuum (quod vidi meis indignis oculis) possideamus in sincera bonitate, ac pura innocentia tibi semper serviamus, semper te sequamur, te diligamus, tibi semper adhæreamus, te nunquam deseramus, ut à te nunquam deseramur, sed ad te, post labores & sudores nostros, quietem perveniamus æternam, Amen.



HERMOLAI BARBARI ZACHARIAE F. LEGATI VENETI, AD FRIDERICUM IMP. ET MAXIMILIANUM REGEM ROM. PRINCIPES INVICTISSIMOS,  
ORATIO GRATULATORIA.

I. CARONDELETO SUPREMO  
REGIS ROMANOR. SECRETARIO,  
HERMOLAUS BARBARUS S. D.

*Ad Principes orationem à me nudiusquartus habitam, amplitudini tuae mitto recognoscendam castigandamque. Quanquam enim mei moris esset, nihil unquam temere, nihil non diu conditum atque pressum emittere, quum primum tamen desiderari eam à te subodoratus sum, intuli mihi vim & pernici tandem, ut instituto meo decederem, ratus id quod erat, minus esse malum adire periculum fama, quam moram desiderio tuo facere. Queris, unde tanti sis apud me, quem ne de facie quidem norim? Perspecte sunt, omnibus eruditio, fides, integritas tua. Compertum nobis est, quantum Veneti nominis studiosus sis; exploratum habeo, quantum me diligas parum merentem, quantum orationem & actionem meam commendes. Sed heus tu docte vir, obsecro ne mirere, si qua leges in hoc libello, quae tunc dicta non fuerunt. Nec enim addidi nunc ea, sed detraxi tunc, admonitus ab aulicis exemplo quam limen attingi, ne longus essem, ambitiosa reciderem, optima quaeque dicerem, patientissimis omnino, sed occupatissimis tamen Principibus parcerem. Amputavi subito consilio multa. Quanquam quod potest consilium fuisse, si subitum? Ea quae tunc rescui, modo sunt annexa. Utrumque veterum exemplo facimus, quos F. Quintiliano teste constat longe aliter scripsisse, quam egissent. Exulanti Massilia A. Miloni quidam orationem M. Tullii, non quam habuisset pro eo, sed quam scripsisset, attulit, Tunc ille, si sic egisses, inquit. M. Tullii, non esitaret Massiliae barbaros pisces Milo. Ceterum non dubito, quin (nisi te amor fallat) ut audiendo tunc, ita nunc legendo non parum multa tibi displicitura sint. Sed æquum te, quæso, nobis & cognitorem & iudicem præbe; considerans hoc & æstimans, quod sesquihoram antequam Principes adiremus, significatum nobis fuerit, non duas orationes seorsum, ut cogitabamus atque paraueramus, sed unam duobus iunctim habendam & recitandam esse. Plena difficultatis, plena discriminis res erat. Tota mihi ratio dicendi puncto temporis immutanda fuit. Orationis uniuersæ filum retexui, atque (ut breui rem complectar) & cutis & facies ipsa interpolata est. Vale decus nostrum, & me Principi nobilissimo (cuius es inter eos, qui sunt à secretis, merito supremus) commendatissimum rogo facias. Utinam aliquando tanti sim, ut res ab illo fortiter & magnifice gestas posteritati commendare possim. Tam facturus sim id libenter, quam qui maxime desideret. Ex Brugis. Pridie Nonas Augusti, millesimo quadringentesimo, octogesimo sexto.*

HUIUS PANEGYRICI ITA MEMINIT Q.  
ÆMILIAN. CIMBRIACUS, IN ENCOMIASTICO, III.  
v. 44. AD FRIDERIC. ET MAXIMILIAN.  
CÆSARES.

*Te ferat in cœlum Veneta legatus ab urbe  
Laudibus Hermoleos: quo non iam plenius alter  
Scrutatus causas, & lati semina mundi,  
Haurit Dirceæ vates è fonte liquores.*



POSTQUAM literæ tuæ, Sacer Imperator, iocundissimum reipublicæ nostræ  
 nuncium attulere; Maximilianum celsitudinis tuæ filium, principem cele-  
 berrimum & fortissimum admirabili populorum & optimatum consensu lectum &  
 salutatum esse regem Romanorum: Senatus & vniuersa ciuitas nostra non con-  
 tenta id per epistolam fecisse, congratulatum vtrique nos misit & in mandatis  
 adiecit, vt magnitudinem gaudii sui, quod pro tanta re merito concepisset, non  
 duobus modo vobis, Principes inuictissimi, sed Galliæ & Germaniæ, sed omni-  
 bus gentibus, omnibus nationibus testatissimam & conspicuam faceremus.  
 Quum quia nihil tam amplum, tam gloriosum sacratissimæ Maiestati vestræ po-  
 test contingere, quod sibi quoque pro sua in vos obseruantia, fide, beneuolen-  
 tia commune non putet: Tum vero maxime quia quum Christianum nomen, &  
 p.186 Romanum imperium hoc altissimo prouidentia vestra consilio diuinitus ampli-  
 ficatum sit; hoc tanto & tam communi bono sic afficitur vniuersa nostra respu-  
 blica, vt sollicita sit admodum, ne lætitiā incredibilem suam oratione conse-  
 qui valeamus. Quanquam enim Cæsar gloriosissime (vt à te primum incipiam)  
 nihil est fere, quod vel à natura vel à virtute, vel à fortuna sit expectandum;  
 quin cumulatissime consecutus esse videaris: Et iam pridem eas res gesseris arti-  
 bus pacis & belli, quæ nomen tuum æternitati commendare possint: Hinc tamen  
 opinione nostra fructum omnis antea vitæ tuæ maximum cœpisti, quod filium  
 generosissimum, qui nobilissimas gentes, ferocissimos populos, bellicosissimas  
 nationes non minus armis quam sapientia vicisset, Regem Romanorum te viuo re-  
 nunciari permiseris. Multa sunt maiorum tuorum Cæsar egregia tum bello tum  
 pace monumenta, quorum persecutio neque loci, neque temporis huius est: sed  
 omnia ea ut per se magna sunt, & immortalī memoria digna; ita cum hoc vno  
 facto comparata, multo reperiuntur esse minora quam præ se ferunt. At gesse-  
 runt quidem illi rem Romanam tam præclare, ut nihil addi potuerit. Sed  
 quam diu vixerunt, & vtrique sibi. Tu autem filio tuo ad gubernacula tanta-  
 rum rerum promotus, posteritati quoque consulis: & pluribus in futurum sæcu-  
 culis prouides, ratione inuenta, quemadmodum curam publicæ salutis retinere  
 videaris, etiam post mortem: ratus id quod est, Imperatoris esse boni prospice-  
 re, ne possit esse malus Imperator: Principem esse malum, quem vitia succef-  
 foris commendent, & bonum videri faciant. Nam quotusquisque princeps non  
 bonus sit, ad alterum collatus. Congratulatur ergo tecum sibi & secum tibi,  
 princeps eminentissime, non Respublica modo nostra, sed Christianus orbis vni-  
 uersus; quod principem eum, quem certatim omnes efflagitabant, & tibi facere  
 & sibi habere contigerit. Rara & visenda felicitas tua, Cæsar beatissime, filium  
 genuisse, quem Galliæ, quem Germaniæ, quem Barbari, quem Romani, quem  
 populus Christianus Imperatorem optare te viuo, te reluctante non erubescunt.  
 Dixi te reluctante. Nam hæc tua diue Federice propria laus est, non minus tibi  
 quam cæteris moderari. Verebaris (audio) modestissimus & grauissimus Impe-  
 rator, ne si precibus populorum & principum omnium protinus annuisses, aut  
 charitati patris in filium, aut ambitioni datum esse iudicaretur. Parum tibi vi-  
 debatur præstare Cæsarem in alios, nisi aduersus teipsum quoque præstitisses:  
 immo qui clementissimus, humanissimus, & facillimus es in cæteros (id quod  
 ego non famæ credo, sed expertus loquor) in te parum æquus, & duriusculus  
 esse voluisti. Nihil erat apud te fuga voluptatum, & continentia: quas virtu-  
 tes vno te nullus ante magis commendauit; nisi & paternum affectum, quo ni-  
 hil esse constat in homine potentius, nihil tam legitimum, castigasses & com-  
 pressisses. Nec enim vitium erat in Cæsare, liberos suos (qui & ipsi sunt Cæsa-  
 res protinus, quam nascuntur) Reges esse cupere: quandoquidem non magis  
 honestum est Regem vocari, quam Cæsaris esse filium. Iam patris in filios in-  
 dulgentia popularis, & plausibilis quoque solet esse: nedum vt vel inuidiosa sit,  
 vel probrosa. Nam in Cæsare commendabilis semper fuit: in te vero etiam



expetitur, quasi debita. Nec iam indulgentiæ nomen habet : sed iuris & æquitatis. Quis enim est filio tuo, vel bello, vel pace clarius ? quem res aduersæ magis exercuere ? Quis prosperis & secundis minus intumuit ? quis in vtraque fortuna constantior : in labore pertinax : in remissione diligens, ac præcinctus ? Mitto bellicas virtutes : quæ ut in eo præstabiles & eximiæ, ita nec temporum sunt omnium, nec locorum. Attingantur pacis artes, quæ semper & vbique sunt vsui, sapientia, temperantia, placabilitas, innocentia, religio, frugalitas. Hæ in iuvene vno tam præclaræ, tam eminentes esse perhibentur ; vt ne in sene quidem Imperatore maiora desiderari posse videantur : futuræ prorsus incredibiles, nisi eum ex Austria gente celebratissima, & filium tuum esse meminissimus. Quæ quum ita sint, immortales tibi gratiæ prouinciatim, oppidatimque habentur, & semper habebuntur, Imperator consultissime : quod pro communi bono verecundiam & modestiam tuam expugnari passus es. Ergo bis teipsum vicisti, Cæsar inuictissime : Primo quum oblatum filio tuo regnum minime dissimulanter auersatus, & deprecatus es : naturalemque patris in filios pietatem virtute plus quam heroica, immo diuina quadam mentis & animi magnitudine superasti. Secundo quum hanc ipsam virtutem, qua modo te vicisses, vtilitatis publicæ contemplatio peruenit, & impetrauit à Cæsare, quod impetrari non potuisset à patre.

Sed iamdudum mihi Cæsar innuit, Maximiliane Auguste princeps generosissime, vt à se digressus, orationem ad te conuertam. Obtemperabo lubens atque lætus : quum quia laudes tuas pater æquiore animo, quam suas audit : tum quia per hunc modum imperio Senatus & desiderio Reipublicæ melius & vberius satisfecero. Ergo Maiestatis tuæ nomen apud nos tam celebre semper p.187 fuit, vt ad diligendum, amandumque te propensos etiam colendum & obseruandum impulerit. Est hic mos Reipublicæ nostræ peruetus atque sanctus, perniciosos & improbos Tyrannos exitialiter odisse : Principibus bonis & fortibus non solum fauere, sed etiam obsequi : dignitatem eorum & amplitudinem omnibus modis iuuare, tueri, defendere. Ætate porro nostra nemo de Regum & Principum numero fuerit, quem collidi tecum, & comparari posse iudicemus. omnino talis & tantus es apud nos : in quo vel plura, vel maiora quam præ te feras, optare, comminisci, desiderare pudor sit : vt nemo mirari debeat, si lætitiæ immortalem, gaudium incredibile, voluptatem incomparabilem, quam te Romano Rege declarato concepimus, dicendo repræsentare nullo modo possumus. Enitent ac prælucent in vno te, sed iuvene (mirum dictu) virtutes omnes imperatoris, iustitia, liberalitas, animi magnitudo, clementia, placabilitas, abstinentia voluptatum omnium, & (vt complectar vno verbo multa) quam immaturum æui te cernimus, tam maturum imperii te cognoscimus. Peruidit hanc indolis altitudinem Carolus Rex Belgarum, experientissimus belli dux, & acerrimi vir ingenii : qua vsque adeo exarsit, vt nihil prius habere videretur, quam vt unicam sibi filiam virginem magnæ spei, foeminam lectissimam, hæredem multarum gentium nationumque futuram, & omnino quam multi Reges appeterent, obseruarent, ambirent ; tibi vni fere puero, nec uxorio, nec quærenti desponsare posset. Undeuigesimo autem ætatis anno, quum princeps ille, cui mox asciscendus gener eras, ab Leucis & Heluetiis interceptus esset : foceri tui regnum à Gallis occupatum ingressus, parua manu fuscis & trucidatis ingentibus hostium copiis seruitute liberaisti : vxorem defuncti ducis & filiam, fortunatissimas modo foeminas, tum miserrimas & exangues, nec plus moerore quam metu confectas, omni diuina & humana spe destitutas erexisti, subleuasti, redemisti : vitam earum & dignitatem & pudicitiam conseruasti. Hoc mater, hoc prouinciæ tanto & tam immortalis beneficio deuinctæ, virginem ope tua recreatam, virtute tua defensam, tuis armis inimicorum ereptam iniuriæ, desponsatam à patre prius animo,



animo, tunc certatim opere tibi collocant : videlicet vt eundem generum atque virum haberent, quem habebant & assertorem & vindicem. Haftenus rudimenta virtutis & fortitudinis tuæ diximus. Quid illa quæ mox egisti quam famigerata ? quam mira ? quam visenda ? nato tibi filio ciuiles ortæ seditiones sunt. Morini auctoribus : quorum opera factum est, vt charissimum tibi pignus, nescio quo prætextu, custodiendum & asseruandum eriperetur. Fuit hoc eorum non perfidia, non defectio, princeps gloriosissime : sed fati vis hoc agentis, vt per intestina quoque bella clarior & celebrior fieres. Nec enim plus eos amat fortuna, quos indulgenter habet, & quibus parcat : sed quos iactat, quos exercet : alioquin clari nec bello nec pace duces intelliguntur, quibus omnia prospere cedunt : sed quibus contingit per labores, per ærumnas, per incommoda splendescere. Nam vt secundæ res foelicem, magnum certe faciunt aduersæ. Alexandrum illum Macedonem, sunt qui minus egregium bello ducem fuisse prædicent, quod ei nullius pugnae non secunda fortuna fuerit : quodque in ipso rerum incremento nondum vertentem fortunam expertus, vita decesserit. In te vero, quem certa syderum decreta sceptro patris & solio destinauerant, quid mirum : si aliqui operam dederunt, vt tristiora tibi tempora inciderent : ne aut virtus quiete languesceret, aut parum dignus imperio fuisse videreris : qui omnino futurus esses imperator.

Itaque continuos nouem annos in castris agens difficillima quinque bella profligasti, Gallicum siue Francicum, Eburonicum, Sicambrium, Batauicum, Moranicum : quod quidem postremum haud facile iudicari potest, utra tibi re gloriosius fuerit, eo ne, quod filium tam diu tibi ademptum auulsumque recepisti : an eo, quod nobilissimas gentes, scientissimos bellicæ rei populos, vrbes opulentissimas ad deditionem & poenitentiam compulisti : id quod nec Carolus socer, nec profocer Philippus, excellentissimi duces, hic bello, ille sapientia consequi potuisse memorantur. Non cogito Panegyricum, Rex clarissime : non laboro verborum ambitu, nihil amplifico, nihil alleuo : sed decurro per capita, & nudas rerum à te gestarum summas attingo. Mirantur tamen hæc omnes, mirantur etiam citra fucum & negligenter effusa : plus mirentur, si qui te propius introspicerent, & virtutes eas intuerentur, quarum præsidiiis munitus tot insignes victorias, tam multa belli decora consecutus esses. Videretur istud os tam probum, tam facundum, hæc tracta de cælo species, ista lacertorum & pectoris firmitas, hic totius corporis vigor, hæc animi tempestiuitas & volucritas, hic imperatorius ardor oculorum : præterea quam ferox in prælio, mitis in contubernio, effusus aliis, tibi parcus. In castris non veste, non mensa præcipuus : aguntur hyemes cum cætero milite sub pellibus, sudantur æstates æqualiter. Epulæ modico & castrensi cibo contentæ. Iam quiste solertius castris locum capiat ? comatus expediat ? Hostem ludificetur ? pugnae tempus eligat ? aciem instruat ? vrbes obsidione cingat ? Neque vero partes imperatoris, & optimi ducis impleas : militi non impleas. Nullum tibi castrense munus sordet : non stare pro signis, non excubias sorte agere, non vallum ferre, non speculatum egredi : primus inire prælium : postremus excedere : Utrumque iuxta doctus : opere militem & consilio ducem agere : nullam tibi vel principalis fortuna, vel maiestas imperii functionem remittit : nihil tibi parcis, nihil blandiris : indulgentissimus cæteris, tibi parum latus : & omnino nihil gregario plus habes, nisi quod plus laboras : ratus id quod est, non tam honorem quam onus esse, quod regnas. Imperatoris hoc esse munus, vt opes & magnitudinem suam non ad ambitum quem priuatum, sed ad salutem & commoda reipublicæ conuertat : utique non imperium sibi, sed seipsum imperio dedititium faciat. Sed & illa tibi peculiaria feruntur : diligere quidem omnes, sed amicos etiam diligere :



ligere : non oblatos istos & passim obuios, de palestra, de sphæristerio, de fritillo. Sed quos ad innocentiam, patientiam, continentiam : ad algores, ad æstus, ad opera militaria sapius exploraueris. Nec enim amici sunt quicunque vos sequuntur : alioquin tam multi, quam sunt (vt Plutarchus inquit) in culina muscæ, quæ cum ipso nidore confluunt & recedunt. Sed quos amicitia dignos esse iudicaueritis, eos debetis vos vltro sequi. Itaque cum iis qui se tibi aliquando virtute commendauissent, consuetudine delectassent, vtilitate demeruissent in omnia familiaritatis officia descendis : & Cæsarem obliuisceris, vt amicum præstare possis. Neque vero postremum inter laudes tuas posuerim, quod literas & ingenia (sicut audio) tam impense diligis : quodque bonas artes non foues modo, sed alis atque promoues. Imperatorium & hoc decus : quum quod in nullo plus emicat hic nitor, & hoc lumen doctrinæ quam in regibus, unde natum sit illud ex Homero Platonis interpretatione : *discipulos Deorum non alios esse quam Reges*. Tum vero maxime quod præcepta sapientiæ non habentibus modo profunt, sed in alios (etiam vere dixerim plus) redundat. Quis ignorat Anaxagoram in Pericle ? Platonem in Dione multos instituisse ? Non nauigasset ab exercitu Cato Rhodon, vt Athenodorum audiret : nec Panætium Scipio videre concupisset, nisi tantum in ea re vel ornamenti, vel fructus inesse iudicauissent. Prætereo multa prudens atque conscius : nihil me fugit quam religiose, quam innocenter, quam sancte iuuentutem tuam exigas. Patet omnibus obsequentiore te patri filium, nec esse nec fuisse quenquam. Scio quam præclaræ, quam magnificæ cogitationes tuæ sunt omnes. Non ignoro, quæ pridem vota conceperis, nuncupauerisque digna principe Christiano, digna maioribus tuis, digna Cæsare, digna teipso. Hæ virtutes illæ tuæ sunt, Imperator vnice, propter quas ducem suum te bellicosissima terræ Galliæ pars, Belgæ non modo non dedignantur aduenam & Germanum, (quibus alioquin tam sunt infensi, quam proximi lingua, coelo moribusque disjuncti) sed appetunt vt indigenam, venerantur vt principem, diligunt vt parentem. Hæc ingentia tua merita, propter quæ Federicus pater, innocentissimus & grauissimus Imperator adduci persuaderique potuit vti te Regem Romanum se viuò renunciari pateretur. Ac differebat quidem ille primum, & cunctabatur : simul vt verecundiam, & modestiam suam (quemadmodum prædiximus) ab omni labe suspicionis assereret, simul vt exploraret, assentarentur ne patri, qui pro filio tam enixe laborarent : an consultum salutis suæ vellent. Sed extemplo paruit, acclamationes illas atque preces, non adulantium voces fuisse, sed studentium. Nam adulatio semel elisa protinus frangitur atque languescit : Studia quo plus arcentur, eo magis gliscunt & exardescunt. Quanto nunc diue Friderice gaudio perfunderis : quod filius tuus te incolumi placere potest Imperator ? quam iucundum tibi, quod te comparari filio tuo sentis ? Et quoniam controuersa res videtur, modo vincis, modo vinceris : Cæterum quid prouidentia tua dignius : amplitudini gloriosius, clementiæ, pietati, felicitati conuenientius facere potuisses, quam vti quem ex vtilitate publica fuit, vt genuisses : eidem quoque per patrem & decus & nomen imperatoris accresceret ? Maacte ingenti vtroque in rempublicam merito : etiam si difficile percipitur (vt inquit \* ille) pulchrius & honestius fuerit genuisse talem, an cooptasse. Non multo minor tamen vestra laus, Germani principes integerrimi ; quorum ius id est, Regem Romanum mox futurum Imperatorem eligere. Nec enim possunt non optimi censeris, qui principes sibi optimos prospiciunt. Proinde quum talis & tantus esset is, quem legistis, vt & omnibus anteponi meruerit, & ab omnibus : scitote vos vtrumque cumulatissime consecutos fuisse. Et vt gratiæ vobis ab omnibus immortales & incredibiles haberentur, & vt nomen vestrum æternitati commendatum & consecratum esset. Etenim vt nomine Vitellii, vel Othonis subinde admoneremur eorum, qui

\* *Plin Panegy.*



qui facies illas, atque pestes ad dissipandum & incessendum orbem intulissent : ita hæc optimi principis electio nunquam memoriæ hominum sine vobis recurret : quotiesque posteri vestri res ab illo fortiter gestas incognoscent, toties laudabunt, qui talem Imperio præfecerint. Sed redeamus vnde nos contemplatio patris, & eorum qui te legerunt abduxit. Magna per se res erat omnibus punctis, omnibus suffragiis, & (vt ita dicam) tributim centuriatimque declaratum esse Regem Romanorum. Sed fecit occasio maiorem. Ea sunt enim reipubl. Christianæ tempora, is habitus Imperii, ut non tam speciosum fuerit te Regem creari, quam necessarium : nec ad futura modo, sed ad præsentia rerum momenta salutare : Omitto singillatim enumerare publicas clades, omitto percensere quam luxata, quam conuulsa sint omnia religionis Christianæ membra : omitto bella, quibus imperium hoc distinguitur : sit enim piaculum in tam festa præsentium gaudiorum luce misceri tristitia. Illud sine periculo violatæ publicæ lætitiæ diceretur : hoc quod principes Germani de creando te sibi Rege cogitauerunt, non tam consilium fuisse, quam remedium. Ergo non ad ocium, non ad remissionem, non ad quietem (alioquin tibi debitam post tam multos labores) sed ad nouas expeditiones, noua bella, nouas difficultates, imperium tibi traditur : omninoque per hoc non solatium tibi, sed aliis quæritur. Nihil enim aliud cogitasse video summos viros qui te patri tuo principi nobilissimo, sed annorum pleno socium addidere ; quam vt ille consilio rempubl. tu laboribus & operibus adiuuare posses. Quid illud quam gloriosum tibi, quam lætum patri, quam omnibus in tempore ? vt Regem decerni tunc demum te contingeret, quum opem tuam non imperium sed imperator ; nec imperator, sed pater expectaturus esse videretur. Accessit hoc ad cumulum amplitudinis & fortunæ tuæ, Rex præstantissime, vt qui filium infantem è penitissimis hostium munimentis eripuisses, apud eundem patris quoque recreati gloria staret. Duos omnino legimus cognomento Pios fuisse : nec argumentum ignoratur vnde sic appellari meruerint. In te posteritas ambiget, vter euentus hoc nomen tibi conciliauerit : quod pius in parentem, an quod pius in filium apparueris.

Sed iam tempus est, vt vela retraham : neu longius me quam volo, aut quam partes legati sunt, laudum vestrarum splendore, numero, magnitudine detineri patiar. Quamobrem si nihil est in rebus humanis principe Romano maius & augustius, si talis & tantus est filius tuus Cæsar, vt ab omnibus legi debuerit ; & ex omnibus denique si nihil vel nobilius ad gloriam, vel certius ad salutem excogitari poterat, quam vt ille rempub. difficillimo tempore capefferet : nemini mirum videri debet : si (quod per initia testatus sum) ad huius magnitudinem lætitiæ nullius hominis facundia, nullius vis ingenii peruenire potest. Sed hæc translæticia sunt, communia sunt omnibus. Illæ peculiæ Veneto causæ, quod neque gens est vlla, neque natio (absit verbo inuidia) cuius vel plura vel maiora, & in Christianam rempub. cuius vos caput estis, & in Rom. imperium argumenta beneuolentiæ, fidei, pietatis appareant. Non auderem ista profiteri, Cæsar optime, nisi & vera esse constaret, & tu vera libenter audires : alioquin sciebam scelus esse coram te parum certa dicere, nedum falsa. Sunt & illa nobis propria, Maximiliane rex fortissime, quod clarissimum nomen Austriæ familiæ, qua nulla fuit vnquam Regum Imperatorumque fœcundior, religiosum & venerabile semper habuimus, quod Federico patri tuo principi saluberrimo, quæcunque se res tulerunt, enixe studuimus, quibuscunque eum locis & temporibus singulari significatione voluntatis & obseruantiae profecuti sumus, quod ipsum & te semper à teneris vnguiculis inductione quadam animi non occulta impensissime coluimus, auctoritati tuæ fauimus, amplitudinem quantum vires fuere defendimus. Jam qui principibus Lusitanæ nobilissimis & fortissimis, vnde maternum



tibi genus est, qui focero tuo, Carolo duci generosissimo, qui Philippo eius patri sapientissimo principi chariores vnquam fuere quam Veneti? Tot modis copulati cum sublimitate vestra sumus: tam multiplici nexu vincti, vt qui hæc non videt, nihil omnino videat, qui plus desiderat, nihil omnino desiderat. Gratulatur ergo prorsus in vobis sibi, & in se vobis Senatus & vniuersa ciuitas nostra, non quantum cæteri fecere, sed quantum nulli: nec quantum dici vel cogitari potest, sed quantum nec dici nec cogitari fas est. Et quoniam ambo vos celeberrimi principes, hinc pater inde filius ita mutuo creuistis, vt neque tu maior, neque tu felicior esse possis: reliquum est, vt DEum optimum maximum conditorem huius & seruatorem imperii, publica voce comprecere & obtester, vt quando rem Romanam principum duorum patris & filii, huius maturitate senioris, illius virtute iuuenis florentissimam esse voluit; beneficio suo p.190 faueat, pietatemque suam & voluptatem conseruandi per optimos Principes generis humani fanciat, & perpetuam esse iubeat. Postremo vt illustrissimum Ducem nostrum, & inclytam Rempub. incolumitatis & gloriæ vestræ cupidissimam, quæ te Cæsar semper & patrem & principem Christianæ religionis agnouit, coluit & suspexit, sacrosanctæ Maiestati tuæ quanta maxima possimus veneratione, religione, deuotione commendemus: opes nostras omnes atque vires ad ornamentum & incrementum Imperii, dignitatem & amplitudinem sacratissimi nominis vestri promptas, expositas & dicatas esse doceamus.





Q. ÆMYLIANI  
CIMBRICI  
ENCOMIASTICA.





LECTORI SALVTEM!

BURCARD GOTTHELF STRUVE.



Oëtica laude insignis erat Q. Æmylianus Cimbriacus, patria Vincentinus. Comes hic Palatinus erat, & nondum viginti annos natus, laurea poëtica ab Imp. donatus. Sic enim ipse canit: *Libro I. v. 28.*

*Et me Palladis quondam manus induit auro,  
Amorum lustris nondum mihi quatuor ætis,  
Sponte tua sacras dignatus tradere lauros.*


Non defuerunt igitur ipsi præcones. Sic enim de eodem Lilius Gregorius Gyraldus: \* fuit & Æmylianus Cymbricus poëta elegiographus in primis, cuius & epigrammata leguntur, audiui & illum exorsum fuisse bellum Rhodiacum quod Turcæ suo tempore aduersus Rhodienses gessere: & epicedium in Federicum tertium Imperatorem cecinit: at inique huius hominis scripta ab inuidis dicuntur supprimi. In his autem secutus fuerat Gyraldus Gesneri Bibliothecam. Cuspinianus \*\* sic eum commendat: *Cimbriacus poëta nostri seculi haud contemnendus, raræ eruditionis ac doctrinæ.* Poëmata varia ab ipso fuisse edita, ex dictis patet. Christophorus Hendreich \*\*\* adlegat Carmen in Petri Hædi anterotica elegantissimum ad Capidinem impr. *Iaruisii 1497.* Eiusdem Epicedium in Fridericum III. quod etiam Cuspinianus inseruit. Aliud epicedium Maximiliano I. scripsit. Idem Hendreich eiusdem adlegat poëmata *Frankofurti 1612.* edita. Quod autem Gyraldus indicat de bello Rhodiensi poëma, ipse sub initium statim encomiastici adlegat Æmylianus. Hoc ipso autem encomiastico, libris V. in duobus prioribus quidem electionem potissimum Maximiliani in Regem Romanorum, in reliquis eiusdem captiuitatem à Brugenfibus anno 1488. factam, describit, prout sub initium statim promittit. Editum illud primum ex Aldina esse Jo. Camertis præfixa præfatio nos docet. Postea prodiit Argentorati apud Schürerium, mense Maio 1512. 4.

\* De poëtis nostri temporis Dial. I. pag. 386.

\*\* Vita Friderici III. pag. 413.

\*\*\* Pandectis Brandenburgicis, voce Æmylianus.





QUINCTI ÆMYLIANI CIMBRIA-  
CI POETÆ ET COMITIS PALATINI,  
ENCOMIASTICA AD DIVOS CÆS. FE-  
DERICUM IMPERATOREM ET MAXIMILIA-  
NUM REGEM ROMAN.

PALIVRVS.

*Fortia gesta volens cognoscere Maxmiliani,  
Nec non Friderici Cæsaris acta sacri.  
Fulgida Cimbriaci pellustret carmina Vatis,  
Cui fudit diuam flauus Apollo chelim.*

JOANNES CAMERS ORDINIS  
MINORUM, IN URBE VIENNA PU-  
BLICE THEOLOGIAE PROFESSOR, DIVO  
CÆSARI MAXIMILIANO.  
S. P. D.

*Quærebam cupide ab literarum bonarum professoribus, inuictissime Cæsar, an qui-  
spiam ex iis, qui Heroum gesta memoria tradunt, acta vel tua, vel genitoris tui,  
memoratu digna, hac nostra tempestate conscripserit, sic nempe fortium virorum fama  
viget in posteris. Reperi diuina (ut reor) dispositione Encomiastica hæc quinque, qui-  
bus complurimas tam tuas, quam diui parentis tui, sapientissimi senis laudes, Æmilian-  
us Cimbriacus Vincentinus, vates eximius, qui iudicio peritorum cum antiquitate  
merito certat, heroico carmine non minus docte, quam eleganter complexus est. Quod me  
quanto affecerit gaudio, non facile dixerim. Quare iis, qui res tam à te quam à patre tuo  
vel armis fortiter, vel pace sapienter gestis, studiose legunt, facturus copiam, me in  
Aldi Romani Academiam contuli, ut accurate inibi, atque emendatissime imprimeren-  
tur, id quod est ex sententia factum, nam nihil gratius, nihil accidere incundius Aldo  
ipsi potuit, quam ut diui Cæsaris acta, sua cura excusa ob ipsius incredibilem in tuam ma-  
jestatem obseruantiam emitteret in manus hominum. Dabitur deinceps opera ad studio-  
forum utilitatem Leonardi Turrensis studiosi iuuenis, ac Æmiliani pergrati discipuli cu-  
ra, apud quem Encomiastica ipsa reperimus, ut cætera ab eodem vate edita carmina,  
quæ plurima extant, in lucem veniant. Legant interea docti omnes in his En-  
comiasticis virtutes tuas, teque parentem bonorum omnium diligant,  
venerentur, colant. Vale.*



EX IOAN. TRITHEMII CHRONICORUM HIRSAUGIENSIIUM  
VOLUM. II. SUB ANNO 1488.

ANNO Blasii abbatis quarto, indictione Romanorum sexta, cum ex Germania Maximilianus paucis comitatus familiaribus descendisset in Flandriam, Philippi filii sui rebus consulturus qui annum ætatis tunc agebat sub tutoribus decimum, à Brugensibus consilio Gandauensium cum suis omnibus capitur, & diutius in custodia cuiusdam habitationis honesta detinetur, cunctis ab eo seclusis familiaribus, præter coquum (ut ferebatur) vnicum. Enim vero cum Philippus Archidux, quem secum habebant in Flandria, puer adhuc non esset ad regimen principatum terræ idoneus, & patris ordinatione, non per incolas prouinciæ, sed extraneos omnia disponderentur & fierent, indignabantur Flandrenses quasi viderentur despecti: & seditione facta manus miserunt in Regem violentas. Inferebant etiam, quod regentes & præfecti, quos Rex terræ proposuerat annis iam pluribus retroactis incredibilem pecuniarum leuassent summam, quam, ubi, quomodo vel in quem usum exposuissent, nulli fecerint rationem. Hic ergo nimia importunitate Regem vrgebant, volentes imprimis quod omnes deponeret præfectos terræ atque regentes, se quoque penitus abdicaret renuntiaretque omni jure comitatus Flandriæ: & jam deinceps omnem administrationem principatus filio permetteret liberam & absolutam, quem ipsi pro suo recognoscerent domino, & alium neminem, ne patrem. Renitentem postulatis Regem diutius furiosi detinere captiuum, venenato consilio Veneratorum prope in ejus necem parati, sic more suo scribentium: *Homo mortuus non facit Guerram*, quorum consilium qui non intelligit, nihil intelligit. Sed armis pugnant Germani, non inuisibili magisterio. Nihilominus ex familia ejus atque nobilibus aliqui vasa Burgensium fuerant occisi, nonnulli similiter capti, cæteri fuga labentes vix euaserunt. Interea Fridericus Imperator pater Maximiliani Regis audiens filium à Brugensibus captum, inprimis auisat Romanum Pontificem Innocentium octauum de facto, qui Majestatis læsæ reos statim excommunicat.

Deinde Principum & ciuium regni auxilio congregauit exercitum, & descendit cum multis principibus, atque nobilibus in Flandriam, ut liberaret filium. Habuit autem in suo exercitu equitum tria millia, quadringentos & viginti dños: Peditum vero duxit quinque millia, nongentos & viginti quinque: Currus autem habuit ducentos & viginti duos. Cum his veniens in Flandriam, quicquid erat in villis & agris, extra munitiones irato deuastare animo cœpit. Burgenses autem cum audissent Cæsaris aduentum, non confidentes oppidi sui muris atque fossatis, captiuum Regem tradidere Gandauis. Quod ubi Cæsar intellexisset, Gandauum obsedit & fortiter impugnauit. Tricesima nona cernentes Gandauis, quod Cæsaris viribus diutius non possent resistere, humiliati pacem ab eo petunt, & sub certis conditionibus impetrant: qui plurimorum judicio venia indigni videbantur, & sic pater filium potenter liberauit.

ARGUMENTUM ENCOMIASTICI  
PRIMI.

Dum Cæsar reputat suam senectam,  
Ac bellinarios videt tumultus,  
Et nostræ fidei timet, Repente  
Ad se concilium vocat, Subinde  
Lectores subeunt sacrum Senatum,  
Mox aulea suis decent figuris.

CIM-



## CIMBRIACI POE. PROTREPTICON AD LIBELL.

Si non vis calamos seueriores,  
 Si non vis Domini pati Asteriscos,  
 Et tantum properas foras abire :  
 Non vis esse diutius libelle.  
 Et cum grammaticis statim cathedris  
 Explosus miser in graues coquinas,  
 Ad scombros venies salariorum,  
 Ridebunt scioli mihi papyros,  
 Et frustra nimium perire noctes,  
 Patronum nisi habebis Hermiolaon,  
 Scitum, (Jupiter) & bonum Poetam,  
 Et quem Sauromatae audiunt canentem  
 Curuae Callimachum lyrae magistrum,  
 Aut grande Aonidum decus sororum  
 Latum, qui Illiadae docet nepotes.  
 Hos si nactus eris tibi patronos,  
 Tum ridere Ciconias licebit,  
 Et nugas & ineptias Suillae.

QVINCTI AEMYLIANI CIMBRIACI  
 POE. ET COM. PAL. ENCOMIASTICON.

PRIMUM AD DI. CAES. FEDERICVM IMP. ET  
 MAXIMILIANVM REGEM  
 ROMAN.

- Asteridos carmen tenui praelusinus orsu,  
 Quo Turcarum acies, inimicaque bella canebam,  
 Pulsataeque Rhodon, partumque ex hoste trophaeum.  
 Nunc mihi fert animus laudes vulgare per orbem*
5. *Caesaris, ac gestis sic addere rebus honorem,  
 Ordinar, ut regem diuino Casare natum  
 Legere Ausonia, quibus est optare potestas  
 Rectorem imperii, vel tradere signa Quiritum,  
 Victrices aquilas, regni diadema secundi.*
10. *Qua re stelligero sese iam gloria caelo  
 Tollit, & immensum sperat per secula nomen  
 Austriacae gentis, tam longo stemmate auorum  
 Nobilis, ac magno praesentis numine Regis.  
 Sed nec fortune inuidiam, nec facta silebo.*
15. *Brugarum, plusquam crudeli morte luenda :  
 Quae ieiuna fames, quae pestis adegerit ipsos  
 Et reserare fores, & dicere verba precantum  
 Suppliciter tristes, quamuis in carmine vires  
 Sint mihi praetenuis, tantarum ad pondera rerum.*
20. *Ergo Castalides praesentia numina Vatum  
 Ferte pedem mecum, facilesque in vota venite :  
 Si vestro quondam solum plectus amore  
 Sacra fero, citbarumque mouens plectrumque sonorum,  
 Sedulus ingredior Musarum templa sacerdos.*



- Hippota de inuito miscet. seuasque procellas  
Quisque sua regione mouent, freta concita feruent,  
Horrendumque tonant. Esto mihi credere, magnum*
135. *Sic statuisse DEum, cui sunt hæc omnia cura,  
Vt regnaturus discat sperare triumphos,  
Expertus toties prorumpere victor in hostes.  
Sydereum quondam regem sic bella Gigantum  
Tentaure Jouem, posset quo dignus haberi*
140. *Cælorum imperio partis ex hoste trophæis,  
Victorique suo seruiret regia mundi,  
Hinc metuens (quidem longe non prouidet illud  
Diuinum pectus, vel mens bene conscia recti?  
Imperio exitium, sacras grandæuus ad aras*
145. *Cæsar in æternos conuertit lumina sensus,  
Suppliciterque manus tendens in vota poposcit  
Ire DEum, ne se vel debita fata relinquat  
Ingressum, reliquos liceat securius annos  
Exigere, & curuam melius finire senectam,*
150. *Quando onus imperii iam tot portauerit annis,  
Nunc humeris tandem fessis optare quietem.  
Ipse paret terris, nutu si regna reguntur  
Ac superum imperiis, alium qui frena subire  
Possit, & in populis æternam ferre quietem.*
155. *Sic fatus supplex oculos tendebat in astra.  
Audiuit pia verba DEus, iustasque precantis  
Expendit voces, statuitque in vota venire.  
Et iam tempus erat, terris cum bruma rigentes  
Cogit, & Arctoum constringit frigore pontum,*
160. *Et mæsta querunt syluis sua tecta volucres,  
Insonat & Boreas, spoliataque frondibus arbor,  
Phillyridesque senex insleat semifer arcum,  
Et Mars desertis vacuus terit ocia castris  
Inculti ad gelidas spaciatus Strymonis undas,*
165. *Aut qua sublimem Rhodope se flectit in Arcton,  
Armorumque redit posito Bellona furore  
Ad superos, narratque graues ex ordine pugnas,  
Quas animosus Atax, quas Maurus fecit, & Indus,  
Sauromataque truces: patris stupet aula tonantis.*
170. *Maximus hic Cæsar solito de more vocauit  
Concilium, magnis quoties de rebus habetur,  
Qua gens turritam Francfordia possidet urbem.  
Haud mora, Cæsareo iussu venere vocati:  
In primis sacro quibus est optare potestas*
175. *Imperio regem, quorum Beretholdus ab oris  
It Maguntinis, cui circum tempora vitta  
Allebant gemini tenues insignia honoris.  
Hunc portabat equus maculis variatus, & auro  
Insignis, cui sella nitens, phalerisque decorum*
180. *Instratum, grandi comitum subeunte caterua.  
Qualis ubi Lyciam Delphis commutat Apollo.  
Aut sacrum Ortygiæ gaudens Phithona reuifit,  
Hunc iuxta Hermannus subiit regnator ad undas  
Rheni, qua quondam gens Agrippina resedit,*

Comitis Franc  
fordia. 1486.

Bertholdus  
Moguntinus.

Herman. Co-  
lonien.

p.195



185. Nobilitate nitens, numerosoque agmine septus,  
Post & Joannes vestis prædines & auri,  
Plus centum comitatus equis, quem belliger omnis  
Excolit, ac Trenir sacro veneratur honore.  
Hinc magnum ingreditur præclara stirpe Philippus
190. Concilium illustris, cui seruit corniger Ister,  
Et quem mirantur generosa Palatia Rheni,  
Noriciique truces, Rhetiusque asperrimus armis,  
Ac nemus Hercinium, sub quo Germana triumphos  
Pubes æquavit veteres, & facta Quiritum.
195. Venit & Ernestus Saxonia missus ab oris  
Usque tuis, quo non præstantior alter in armis  
Bella mouere manu, sæuos concurrere in hostes,  
Pallentes reuocare globos, aut ponere castra,  
Aut dubiam Martis causam decernere ferro.
200. Hunc portabat equus longe velocior Austris,  
Candidior niuib, quas nondum contigit ullus  
Pes hominisque feræque. Hinc præco sanguine auorum  
Insequitur terra Brandeburgensis alumnus,  
Ac princeps magno cunctis dilectus amore :
206. Tam miti imperio populos moderatur & vrbes,  
Nullus inferior bello frenare furentes  
Hostiles acies, cum martia sumpserit arma.  
Mille alii subire Duces, Comitesque potentes,  
Atque oratores, quorum si nomina fabor
210. Secretim, offendam diuinas Caesaris aures:  
Tam longum carmen, tam longa exorsa secutus.  
Non tamen antiquas intexta aulae figuras  
Præteream, quamuis spaciosi iugera campi  
Currimus, atque datas metas optamus obire.
215. Hic erat Austriacum genus usque ab origine ductum,  
Et repetita mihi veterum modo facta parentum,  
Hic solis lunæque vices, hic quatuor anni  
Tempora, & instabili labentia sidera motu,  
Et quæ perpetua raptat vertigine mundus,
220. Cernere erat, & geminos sinuosis orbibus angues,  
Sublimemque Arcton, condit Styx atra minorem,  
Illic & pigri vidisses plaustra Bootæ,  
Andromeden Persei, Bacchi Minoida amores:  
Altera victa manus, passis per colla capillis,
225. Atque DEos atque astra vocat, vocat altera amantem  
Ingeminans, Theseu redeas mihi perfide Theseu,  
Quo fugis? his surdas implebat questibus auras.  
Vela dabat Theseus dulces oblitus amores.  
Illic cæruleas Tritones nare per undas.
230. Ac leuiter flantes spectasses æquora ventos,  
Et quæ stelligerum secant orbita lactea cælum.  
Inferius nubes, & tela trisulca tonantis,  
Terrificasque trabes nulla ratione negantes,  
Tum cadere ex alto compressis nubibus imbres.
235. Et patrem Oceanum totam circundare terram,  
Perpetuoque inter sese concurrere fluctus,  
Quare nunc crescunt, nunc æquora nostra residunt,

Philippus Pa-  
latinus.

Ernestus Sa-  
xon.

Albertus  
Brandeburgen-  
sis.

Achilles Ten-  
tonicus.

Aulaorum  
Pictura.

Alternant-



- Alternantque vices, sol qua descendit in undas,  
 Et qua mane recens optato lumine terras  
 240. Spargit, & humecta fugat astra cadentia noctis.  
 Hinc Eurus perflat Titonia regna relinquens,  
 Illinc occidui genitalibus aura Fauoni,  
 Quos inter stridet Boreas ab vertice mundi,  
 Et contra surgens Boream depressior Auster.  
 245. Stat tellus immota, rigent sub frigore utrinque  
 Perpetuo geminae, non est habitabilis aestu  
 Inter utrasque, suo diuise ex ordine partes:  
 Frigore sol medias iunctim moderatur & aestu,  
 Illic Antipodes, nos hic habitamus, & ipsam  
 250. Internas limes partitus disparat oras.  
 Ad Noton est diues Getuli terra leonis:  
 Aethrica ab imperiis Atlantis ad ostia Nili,  
 Contra Asia ad Boream longe procurrit utroque;  
 Has inter Scythicis Europa potentior armis.  
 255. Tum poterant urbes poterant & regna videri  
 Semotim, & vario labentia flumina cursu,  
 Ingentesque lacus, & grandi vertice montes,  
 Ut quae Pannonios alpis, flectuntur in arcus,  
 Contra Barbaricos vel munimenta furores.  
 260. Praeterea Taurusque Cilix, & paena Promethei  
 Caucasus, atque humeris caelum qui sustinet Atlas,  
 Caspius, & superis propior qui surgit Olympus,  
 Quem non terribili percellunt turbine venti,  
 Non nubes gelidaeque niues, seuque pruinae;  
 265. Quaesitumque antrum Vulcani, at triste cubile  
 Enceladi crebris conflagens ignibus Aetna,  
 Et quos terrigenae quondam struxere Gigantes;  
 Ausi stelligero regem depellere caelo:  
 Non procul Eridanus Phaethontis grande sepulchrum,  
 270. Quod mœsta lachrimis quondam sparsere sorores,  
 Donec paulatim liquefactas abstulit alnus.  
 Inde pater Tybris, tum Rhenus proximus Istro  
 Ad fontem, quamvis post in diuersa fluentes,  
 Rhenus ad occasum solis, fluat Ister ad ortum.  
 275. Praecipitansque Ararim Rhodanus tam longa morantem  
 Flumina, diuitiorque Tagus, vel Betis Hiberus,  
 Tigris & Euphrates, tum Ganges, Nilus, Hydaspes,  
 Sperchiosque senex, & mœstis Inachus undis.  
 Te Benace loquar casus imitate marinos,  
 280. Et quondam inferni veneranda silentia Auerni.  
 Nil habet hoc caelum, nil tellus, nil mare vastum,  
 Quod non praesentent variis aulae figuris,  
 Ac pascant animum naturae arcana secutum.  
 Nunc taciti pompas vestis transimus & auri,  
 285. Ac varias Arabum merces, pictisque tapetis  
 Instratas sedes, Indi quas nobile dentis  
 Sustentabat opus secta testudine factas,  
 Quis delubra DEum festina fronde per urbem  
 Velatam, & sacra nituerunt cultibus ara,  
 290. Priuataque domus, ac regia caesare digna.  
 Si quis scire velit, longe maiora requirat



*Quam festinanti liceat narrare seorsum,  
Talis erat cultus, talis modo Caesaris aula,  
Qualem crediderim superis, cum Juppiter olim  
295. Exhibuit mensas latus post bella Gigantum.*

## ARGUMENTUM ENCOMIASTICI SECUNDI.

Caesar concilio statim vocato,  
Factum post superis sacrum, profatur.  
Ostentis subito DEI reuifis.  
Fit Rex Aeneadum potens auorum  
Longo stemmate Maximilianus.  
Quem post Laudibus efferunt in omnem  
Victuris obiter perennitatem.

## QVINCTI AEMYLIANI CIMBRIACI POETAE ENCOMIASTICON II. AD DI. CAES. FEDERICUM IMP. ET MAXIMILIANUM REGEM ROMAN.

- Expectata dies regem visura Quiritum,  
Illum belligerum diuo de Casare natum,  
Eois surgebat equis, vel letior illa,  
Qua pater imperii quondam suscepit habenas,  
5. Et qua Scipiadae Romani fulmina belli,  
Aut ingens Libya vastator signa Quiritum.  
Tum lato Phaeton spargebat lumine terras,  
Ridebatque dies, nec toto nubila caelo  
Vlla videbantur, cum diuus Caesar, & ille  
10. Maximilianus honos, & auita gloria gentis  
Illustresque duces subierunt templa, ferentes  
Vota DEO sanctasque preces. Ex ordine sacris  
Perfectis, sedem Caesar conscendit eburnam,  
Sceptra tenens dextra, vestemque indutus & aurum,  
15. Ac capiti impositum gemmis diadema coruscans.  
Intenti siluere omnes, vel principis ora  
Mirati solio pro maiestate sedentis.  
Non procul hinc praestans sapienti pectore, & armis,  
Maximilianus erat. Qualis post bella Gigantum,  
20. Aetheriam in sedem patrisque vocatus in aulam,  
Maiores terribili miscebat praelia vultu,  
Saevus adhuc, talis diuino Casare natus  
Concilium ingressus, comitum stipante caterua,  
Consedit medius. Cuius si facta recenssem,  
25. Aequabunt veteres non ficta laude triumphos,  
Collatusque illis longe superabit Achillem,  
Longe Tydidem, longeque relinquet Ulyssem.  
Tales sunt vires, talis prudentia rerum,  
Siue opus in casum subito concurrere Martis,  
30. Seu conferre manus, seu tuto ponere castra,  
Seu vim facundis certantibus addere verbis,*



- Sen vexare hostes, & solvere bella morando,  
 Fortunamque omnem juxta superare ferendo,  
 Hunc ergo latis venientem plausibus omnes*  
 35. *Excepere, omnes & laudare sedentem.  
 Tum breuiter placido Caesar sic pectore fatur,  
 Concilii expositis longo prius ordine causis:  
 Nunc legite ex vobis unquam, qui frena secundi  
 Accipiat regni, & currum moderetur habenis,*  
 40. *Quas ego cedo libens: quando jam serior atas  
 Admonet, & labens fidei respublica nostra,  
 Ut mihi succedat, qui fortia munera Martis  
 Tractet, & immensum pacem diffundat in orbem  
 Plus atate vicens. Cui, dum per fata licebit,*  
 45. *Addam me socium, ac monitis opibusque iurabo.  
 Sim licet ipse senex, quando vel grandior atas  
 Consiliis prodesse potest, sic viribus uti  
 Non liceat. Pylus sic post duo secula Nestor.  
 Profuit, iratus cum non pugnaret Achilles,*  
 50. *Sub Phrygiis caderent Danaï. Sic fatus Olympi  
 Alloquitur regem, Si non indebita posco,  
 Da pater omnipotens, cui parent sydera mundi,  
 Cœruleique maris tractus, terræque iacentes,  
 Qui regat imperium mecum, dum vita manebit.*  
 55. *Et post fata, meas in totum sumat habenas  
 Regnorum, ac seuos bellis exerceat hostes,  
 Tuteturque fidem, cuius studiosus in oras  
 Victor Idumæas Romani insignia sceptri  
 Proferat, ac gentes armis contundat, & omnem*  
 60. *Perfidiam reprimat, Solymorumque asserat urbem,  
 Ac Domini natale solum, sanctumque sepulchrum,  
 Quæ mea cura fuit, quod si mihi fata dedissent,  
 Non ita Maumethi creuissent regna nefandi,  
 Turcarumque genus. Scis tu pater optime rerum,*  
 65. *Et sine fine DEus, qui nutu sydera torques,  
 Qui super astra sedes, fidei voluisse potentes  
 Nostræ quondam me auctore & principe Reges  
 Concilio in magno contra capere arma furores  
 Turcarum, ac seuas bello compescere gentes.*  
 70. *Hocce animi fuerat Venetis socialibus armis,  
 Pontificique Pio, populisque fidelibus, omnem  
 Maumethi sectam, ritusque abolere nefandos.  
 Verum aliter visum fatis. Da sancte Deorum  
 Quæ petimus, dexterque meis illabere votis.*  
 75. *Vix ea fatus erat, cælo cum flamma sereno  
 Arsit, & in medium visa est descendere longis  
 Tractibus, ac rutilos circum depascere crines  
 Maxmiliane tuos, qualis cœlestis Julo  
 Lambebat crines quondam sacer ignis & ora.*  
 80. *Ostentis stupuere omnes, trepidique ferebant  
 Auxilium, sacram conati extinguere flammam,  
 Cum subito ex oculis tenues sacer ignis in auras  
 Innocuus fugit visum, fumosque relinquens.*



- Hic sanctum Caesar supplex ita lumen adorans :*  
 85. O salve quacunque venis, quacunque recedis  
 Tam subito ex oculis lumen venerabile nostris.  
 Agnosco numen: DEus hæc ostenta secundet.  
 Sed metuo fumum, qui te fugiente relictus  
 Inuoluit crines, ac circum tempora nubem  
 90. Offudit cecam, verum regnator Olympi  
 Speratis meliora dabit, qui cuncta per auum  
 Aeternis regit imperiis, & temperat orbem;  
 Cælorumque globos, vix hoc sermone peracto;  
 Ecce iterum lumen, sed longe clarius, alto  
 95. Emicuit cælo visum signa coronam,  
 Atque eadem circum depascere tempora crines.  
 Agnouere DEI numen, superosque precati,  
 Accipiunt omen lati, Regemque salutant;  
 Certatimque patri tantum gratantur honorem,  
 100. Nec minus Æneadum Regi, tum Caesar adorans  
 Constitit, ac placida supplex sic voce profatur,  
 Intendens pariterque manus & lumina cælo:  
 Tu mundi supreme parens, tu conditor orbis,  
 Quem fluctus, quem terra colit, quem sidera honorant,  
 105. Cuius & inferni iam manes iussa sequuntur;  
 Dexter ades, votisque pater precor annue nostris.  
 Si super imbriferas nubes, super æthera trina  
 Maiestate sedes, si te vel pallidus Orcus  
 Contremat, ac metuunt horrenda silentia Auerni,  
 110. Si tibi paret Helix tepidis depressior Austris,  
 Si te sublimis veneratur Parrhæsis Vrsæ,  
 Astriferique globi, serues hunc oro Quiritum  
 Incolumem Regem, tua grandia iussa sequentem.  
 Fac superet patris titulos, & stemmata auorum.  
 115. Dixerat, excipiens Rex est sic ore locutus:  
 Cælorum terræque sator, rerumque potestas  
 Non ullis comprehensa locis, tibi cognita soli,  
 Per quam subsistunt, quæ continet omnia cælum;  
 Productumque tui exemplar, quæ verba secutus  
 120. Ostendam gratumque animum, mentemque benignam,  
 Ac tibi debentem meritas, quas soluere grates  
 Non potis est? quid enim queat hæc imbellis potestas?  
 Et tua sunt certe, falso quæ nostra vocamus.  
 Sed nec pro meritis hominum facundia laudes  
 125. Ferre potest, centum licet ora sonantia linguis,  
 Et sacrum Aonides moueant Heliconæ sorores,  
 Quamuis Threicius vates traxisse feratur  
 Syluas, & cantu manes placasse silentes;  
 Deficiat tamen, ac laudum pars vna tuarum,  
 130. Illa si tenter, mirabitur Orpheæ victum.  
 Dircaoque sacros deplebit fonte liquores.  
 Ipse tibi satis esse potes, quencunque dedisti.  
 Hunc mihi seruato rerum pater optime honorem:  
 Inque tuos nutus nostram precor exige mentem,  
 135. Atque mei longum serua genitoris honorem.



*Ad Electores.*

Vivat, & Euboici transcendat pulveris annos.  
Præterea vobis multum debere fatemur,  
Magnanimi procures etiam super æthera noti,  
Qui nos imperii dignos habuistis honore:

140. Pro quo vel grates, vel debita præmia reddam.  
Sic fatus; siluit, cuncti pia verba sequuntur.

Tum promissa DEO solvunt ex ordine vota,  
Appendunt sua dona tholis, sua munera sacre  
Accipiunt aræ: præcinctus veste sacerdos,

*Misse sacri-  
ficium.*

145. More patrum, & fidei diuino dogmate nostræ  
Thuricremas diuis supplex operatur ad aras.  
Non hic taurorum placatur sanguine fuso,  
Non positis holocausta sacris altaribus ardent,  
Cadunturque homines Scythica de more Diana:

150. Sed qui panis erat, verum fit corpus & vnda  
Fit sanguis, Christusque pias offertur ad aras.  
Hic quodcumque vides, diuinum credito corpus.  
Ac Christum esse puta, non te deceperit error,  
Corpore vel quoties fit sacrum sanguine Christi.

155. Alternant psalmos, respondent organa psalmos,  
Et tuba multiplici crepitans sonat aræ cantu,  
Accenditque animos, variis spectacula ludis  
Eduntur, pars currit equis, pars bella sub armis,  
Strymonii ostentat Martis simulachra furentis,

160. Certaturque hastis, pars nexa fronde coronas  
Imponit capiti, mensis epulatur opimis,  
Perque vias passim molles atate puella  
Cum pueris saltant, & læta carmina dicunt.  
At Regem interea dictis affantur amicis

*Principum  
gratulatio*

165. Illustres procures, quibus est data copia fandi.  
Salve magna ducum laus, salve splendida Martis  
Gloria: quem cælum, diuinæque iura secuti  
Legimus Ausonia Regem, magnique secundum  
Rectorem Imperii, firmet data conditor orbis

170. Numina, maiores titulos tibi fama per æuum  
Orditur, sedemque parat, qua lacteus orbis  
Astrigeri tacitos cursus miratur Olympi,  
Seu qua regna monent gelida prope cornua Luna.  
Plus certe Elysi debent tibi sidera campis,

175. Et quæ Sigæi nunc induis arma Quirini,  
Si venies, quo tendis iter, quo stemmata aurum  
Inclita, quo magni virtus sudata parentis  
Te vocat, & plenis atas robustior annis;  
Si rerum domine quondam victricia Roma

180. Signa feres, qua summa vagi ferit æquora Thetys  
Oceani, latasque premit circumflua terras,  
Quo tibi concessit sacrum diadema Quiritum  
Cæsar & imperii iunxit socialibus armis  
Te socium, titulos tradens ad regna minores.

185. Sic Atlas quondam cupiens requiescere, magnum  
Sufficit Alciden: nitidis Tyrrhæus astris  
Succedit, dorsumque senis leuat ipse ferendo



- Hirta Cleonæo constratus membra leone,  
Plus ætate vigens mirantur sidera tantum*
190. *Immanes sufferre humeros, & iam stupet ipsa  
Alternas natura vices, durare per ævum  
Jam longum, nullogue absumi tempore vires.  
Sic te belligerum stupet unda binominis Istri,  
Corniger & flexo sinuosus gurgite Rhenus,*
195. *Ac Rhodano confusus Arar, gelidusque Lemannus,  
Herciniumque nemus, stupet ultima terra gelati  
Oceani patris, diuesque Britannia Solis,  
Acceptum in patrem regnorum, & sceptrâ Quirini  
Sufficere imperio, iussisque ingentibus olim;*
200. *Vt pater optatam decursa ætate quietem  
Exigat, & vitæ reliquum sine Marte reponat  
Securus, post bella feri compestita Rheni,  
Cum tulit auxilium tibi Nussia Cæsar, & armis  
Vix tunc speratis immanem depulit hostem: \**
205. *Post & Pannonios vario certamine fractos,  
Vltaque vel toties civilis bella furoris,  
Visa Palestine sacraria maxima terra,  
Et natale solum pueri cunabula Christi,  
Bisque salutata fulgentia limina Romæ.*
210. *Tantus amor, fidei tanta est reuerentia nostra.  
Quid nunc laurigeros labor per bella triumphos?  
Dum validas plenus vires ad fortia sanguis  
Munia præbebat, longe maiora sedendo  
Exegit, quam qui crudelia bella sequuntur.*
215. *Sic te Belgarum diuino pectore fecit  
Maximiliane ducem, sic nunc tibi sceptrâ secundi  
Tradidit imperii. Tu tanti nominis hæres  
Ingredieris regnum, quantus Peleus Achilles,  
Aut Tros Hector erat; quantus, qui vectus ab Istro*
220. *Aesonides rediit post tanta pericula victor,  
Aut de Cretæis Theseus fortissimus oris,  
Et iam terdecies consertis fortiter armis,  
Terdecies fracto remeasti victor ab hoste,  
Raptas exuuias inimicaque signa reportans.*
225. *Qualis sæuorum prostrata mole Gigantum.  
In solium rediit Phlegreæis Jupiter agris,  
Cum fumaret adhuc tellus madefacta cruore,  
Ac durum Inarime premeret congesta Typhoeum:  
Sic quondam nigris Lenæus victor ab Indis*
230. *Venit ad Ogygios frenata lynce penates.  
Tu decus Ausoniæ, & Germanæ gloria gentis,  
Viue diu fœlix, faustumque per omnia regnum,  
Victricesque aquilas, & tradita sceptrâ ministres,  
Vt vincas quicumque olim rexere Quirites,*
235. *Germanasque vrbes. Totos ubi vixeris annos  
Hic tibi concessos, venias in sidera mundi  
Spiritus, & fœlix æterna pace fruaris.*

\* Caroli  
Burgundum.

Votum aucto-  
ris.



Q. ÆMILIANI CIMBRICI  
ARGUMENTUM ENCOMIASTICI  
TERTII.

SÆvos inuidiæ refert furores,  
Et Regem Aufoniæ malis retentum  
Brugarum insidiis, subindem oras  
Bellorum subito manus in hostes.  
Hinc mistas lachrimis pias querelas.

QVINCTI ÆMYLIANI CIMBRIACI  
POE. ENCOMIASTICON III. AD DI.  
CÆS. FEDERICUM IMP. ET MAXIMILIANUM  
REGEM ROMAN.

- ET iam fama volans totum compleuerat orbem,  
Illum diuino præsignem Casare natum  
Aufoniæ Regem sceptrum subiisse Quirini.  
Ergo Oratores diuerso ex orbe profecti*
5. *Laudatum veniunt pariter natumque patremque.  
In primis Veneti, quorum facundia laudes  
Et Regis bello mauortia facta secuta  
Mouit Fortune inuidiam. Nunc tristia dicam  
Facta, sed inuitus, vellem tibi lata per omnes*
10. *Ad citharam numeros deducere carmina, Cæsar,  
Qui si tu faueas, non est cur numina vatam  
Sollicitem Musas, Nyseique orgia Bacchi,  
Occisoque DEI tripodas Pythone canoros.  
Hanc igitur cantus etiam precor aspice partem;*
15. *Nec quia non placeant, ideo contemne canentem  
Brugarum insidias, ac tristia facta furentum,  
Gandarumque scelus, quod nunquam deleat ætas;  
Si quondam ante rogos auditur flebile carmen,  
Et iuuat exhaustos olim meminisse labores,*
20. *Illustrisque magis per summa pericula virtus  
Redditur, ac profert victurum in secula nomen.  
Si non errasset, minus esset notus Vlysses.  
Noscitur Æneas Troianis exul ab oris,  
Dum maris & terra patitur, bellique furores.*
25. *Notior ad Troiam sæuus dum pugnat Achilles,  
Quam dum semiferi cantat Chironis in antro.  
Sic tuus insignis post tanta pericula natus  
Maior erit, quam si concessa tempora vita  
Egisset sortem nunquam perpeffus iniquam.*
30. *Non hic te, Cæsar, per longa exorsa morabor:  
Summa sequar fidibus concede sonantibus aures.  
Hic mihi Pierides, & eris mihi magnus Apollo.  
Cum sic vnanimis Regem fecisse Quiritum  
Cognouit Fortuna duces, tituloque minore*
35. *Imperii nato magnum celsisse parentem,  
Ac totum letari orbem, summisque per omnes  
Laudibus in cælum tolki; subrisit amare  
Sæua mouens animo, nec tu per numina nostra  
Rex (ait) Aufoniæ mihi non exercitus ibis,*

Fortuna.



40. *Quamuis promittat sacram tibi Jupiter aulam,  
Nec minor Alcide venias ad regna Quiritum,  
Ac tibi certatim populi gratentur, & orbis  
Latitia incedat, magnosque exsoluat honores.  
Te ferat in calum Veneta legatus ab urbe*
45. *Laudibus Hermoleos, \* quo non iam plenius alter  
Scrutatus causas, & lati semina mundi,  
Haurit Diræo vates ex fonte liquores.  
Dixit, & ut Gandas Brugasque armaret in iras,  
Ocyus infernis pallentem dira sororem*
50. *Sedibus Invidiam exegit, qua vasta vorago  
Ducit in abruptum duplicata nocte barathrum,  
Tartareamque domum, pernix volat illa per vrbes  
Magnas, summa petens, sequitur liuorque dolorque,  
Æternique metus comites, ac tristia pallor*
55. *Ora mouens, dubia comitatur murmura lingua.  
Excitat illa animos Gandarum, & pectora acerbis  
Irritat stimulis, Brugasque hortatur & urget  
In scelus, æterna promittens nomina fame,  
Si capiant Regem sociata fraude Quiritum,*
60. *Ac morti dedant pro libertate suorum.  
Ante oculos proponit auos, & facta parentum.  
Belliger in Gallos iam tum Rex arma mouebat  
Per Brugas, igitur factis gens effera iniquis  
Compositis, tenuit captiuum fraudibus illum*
65. *Nil sic sperantem, portisque exire vetabat:  
Vel maius factura nefas, ni bella moueri  
In se continuo, atque vlticia signa venire  
Audisset. Libycis ceu cum Getulus in oris  
Jam sine patre furens lustrat leo tecta ferarum,*
70. *Nec timet insidias, nec subdita regna veretur:  
Tam præstans animi fertur securus in hostem.  
Si tamen exceptus vasto claudatur in antro,  
Non exire potens; secum crudelia frendit,  
Secum indignatur, secumque exæstuat ira.*
75. *Tum Timor inuadit syluas, tum sæua ferarum  
Agmina captiui sortem miserata leonis  
Horrescunt; acti donec non immemor aui  
Extemplo mortis genitor sibi vendicat armis  
Natum, immane furens, subitoque vlciscitur hostem.*
80. *Sic toties victor quamuis iuuenilibus annis  
Ille tuus, Cæsar, natus per regna suasque  
Incedens vrbes, cum bellum ferret in hostes,  
Armatasque acies, & pictis Teutonas armis;  
Nil metuens clausa subito retinetur in vrbe*
85. *Brugarum, ille dolis vel circumuentus iniquis  
Quamuis captiuus, tamen imperterritus hæsit,  
Multa mouens animo, Fortune agnouit iniquæ  
Et fraudem, & casus, & inexorabile fatum.  
Quo præceps fortuna ruis? quo tristia latis*
90. *Permisces rebus? quantis vesana periclis  
Quæsitum decus, & magnarum pondera rerum  
Disturbas? quantos humana negocia motus*

\* Hermolaus  
Barbarus.

Invidia.

Rex capitur  
Brugis.

Excipiunt,



- Excipiunt, miscentque vices? heu sortis amara  
Interdum, & fragilis laudata potentia sceptri.
95. Talibus incusat Rex indignatus acerbam  
Fortunam, rerumque vices sub corde volutat.  
At tu nostratis fidei venerabile, Caesar,  
Exemplum, ac magni certissima gloria mundi,  
Non iter euitans, non longi incommoda belli
100. Pro nato fugiens, quamuis grandævus & annis  
In senium versis, subito capis arma, ducesque  
Primus in arma vocas, Romanaque signa secutos  
Ducis in aduersos Brugas, quos Marte coactos  
Exceptum insidiis etiam tibi reddere natum
105. Fregisti victor, quod nunquam deleat atas  
Postera, dum Nilus septeno gurgite pontum,  
Dum prior exurgens venienti nocte sequetur  
Stella diem Veneris renouato nomine Vesper,  
Caesaris hoc factum cunctis mirabile seclis
110. Semper erit, nomenque diu per vota nepotes  
Sponte feret seros; nulloque tacebitur æuo,  
Dum Sol flammigera lustrabit lampade terras,  
Et soror obliquos incedet luna per orbes,  
Principis hæc pietas: pro qua tibi debet Olympus,
111. Caesar, honoratam sedem, cum munere vita  
Functus in astra senex ibis, qua lactea mundi  
Pars vacat, & nullis turbatur nubibus ather,  
Qua sedes hominum, gelida qua proxima Phæbe  
Regna beatorum, quos usque in sidera virtus
120. Vexit ab Elisii post longa obliuia campis,  
Talia præclaris redduntur premia factis,  
Post cineres surdos, ac plenam manibus urnam,  
Et quaestorem vitæ Minoa relicte;  
Qualia iam totum de te pia fama per orbem
125. Spargit, & intentas hominum sibi vendicat aures,  
Quali tartareas Orpheus cum venit ad umbras  
Mouit voce DEos, quis enim modo nescit honores  
Caesaris, ac laudes habitosque ex hoste triumphos?  
Vnde venit Phaethon, & qua se condit in undas,
130. Qua tonat extremi ad Boream pars ultima mundi,  
Qua Notos exurgens depressam deserit Arcton,  
Auditum est, spreta Brugas pietate rebelles,  
Atque feros Gândas (quibus & sua premia reddan  
Si mouet ira DEos, si sunt qui talia curent)
135. Horrendum fecisse nefas; inuenemque potentem  
Et formæ egregium, & sublimem laudibus olim  
Captiuum tenuisse ducem: cum ferret in hostes  
Jam toties victor, iam toto cognitus orbe  
Armatas acies, & martia signa per oras
140. Belgarum, ac fremeret tellus hostilis, & illum  
Optatum votis speraret Gallia regem.  
Præterea comites Regis violasse nefandis  
Vulneribus, quosdam raptos in vincula sæua  
Confecisse fame, aut ferro secuisse bipenni.



145. *Quid tibi mentis erat, cum talia facta videbas  
Præfens? heu quales surgebant pectore ab imo  
Tum gemitus, quantis implebas questibus auras,  
Fortune inuidiam lachrymis facturus iniquæ.  
Non sic Circaïs socios ploravit Vlysses*
150. *Ingeniis versos variarum in monstra ferarum,  
Aut casos duri vasto Cyclopis in antro,  
Qua rapidis ardens flammis exæstuat Ætna;  
Non sic Æacides raptum sibi fleuit Achilles  
Cade Menœciaden, nec tantis fletibus olim*
155. *Phœnix exceptos Cadmus quesivit amicos,  
Ogygiæ quondam positurus mœnia Thebes  
Certatura odiis: non sic delatus in oras  
Pœnorum Æneas nunc acrem flebat Orontem,  
Nunc Amycum, fortemque Giam, fortemque Cloanthum.*
160. *Horum virtutes magna cum laude secutus  
Nil pro te quereris; tibi nam mitissime regum  
Plus aliena dolent, tu sortem expertus iniquam  
Nunc socios comitesque tuos, fortesque phalangas,  
Nunc dulcem natum Belgarum sceptrum tenentem,*
165. *Atque tibi & superis debentem magna Philippum  
Querebas lachrymis, tu sydera conscia fati,  
Tu superos testes supplex in vota citabas,  
Præsentisque animam, & numen spirabile mundi,  
Te nullas vitasse vites, cum fortiter olim*
170. *Pugnare nati pro libertate, fuisset  
Hic tibi dulce mori: siquidem per vulnera letum  
Quod venit, plus laudis habet, nunc facta priorum  
Occurrunt, veterumque subit tibi gloria patrum,  
Nunc decus imperii, cari genitoris imago,*
175. *Maternumque genus, quo Lusitania priscis  
Laudibus accedit, magnumque meretur Olympum;  
Vnde tibi genitrix mores edocta priores,  
Atque fidem Christi, cultrixque operosa Minervæ,  
Atque pudicitia, qualis quæ sanguine quondam*
180. *Coniugis & patris movit Lucretia vultus,  
Vltæ virum; talis diuinam principis aulam  
Intrauit coniunx maturo nubilis ævo,  
Qualis ad Æmonium venit Nereis amicum  
Pelea fatorum decretis mater Achilli*
185. *Sydereo quondam vetito succedere Olympo.  
Illa Thetis, Peleus Cæsar, tu magnus Achilles,  
Heroum æquastis laudes & fortia facta,  
Tu rex Æacida, tu Cæsar Peleos, ipsa  
Nerines genitrix; quæ nunc pro talibus oras*
190. *Possidet ætherias felix, quæ morte labores  
Non vidit præuenta tuos, nec lumina fletu  
Turbavit plorans captiui incommoda nati.  
Felix præterea coniunx, quæ tristia facta,  
Infandumque scelus Brugarum nescit, & iras:*
195. *Angelicis sociata choris, ubi pace quiescit  
Æterna, ac nullo turbantur gaudia luctu.*



- Illic non habitant lachryma, seuque dolores,  
 Non morbi, tristesque metus: non curua senectus,  
 Non vaga paupertas, nec habendi dira cupido,  
 200. Nec furor inuidia, non vana superbia vita,  
 Sed tranquilla quies, & gaudia summa per omnes  
 Annorum cursus, venturaque sacula mundi,  
 Hic te sancta parens, hic te castissima coniunx  
 Jampridem expectant, ac summa pace fruuntur,  
 205. At tu vine diu terris, & perge per omnes  
 Maiorum titulos, partosque ex hosse triumphos,  
 Maximiliane, licet fueris captiuus, & olim  
 Te flerint populi, te magnis quastibus vrbes  
 Quaslerint concussa omnes, te nocte, dieque  
 210. Plorarit natus, te carum filia pignus,  
 Te soror, & maestus terrarum fleuerit orbis.  
 Solus in astrigerum Caesar conuersus Olympum,  
 Non maestos habuit vultus, non signa doloris  
 Vlla dedit, fletus sed lamentaque tenere  
 215. Constituit, magni quod sciret lucida mundi  
 Astra mouere diem, propiusque accedere, fatis  
 Cum maris imperium ac terra securus habebit,  
 Qui nunc Brugarum captiuus fraude tenetur.  
 Hinc Caesar nato concessit regna Quirini,  
 220. Atque ideo securus erat, nec signa doloris  
 Vlla dabat; totus quamuis exterritus orbis  
 Esset, & ingentes mortalia pectora cura  
 Turbarent, veluti si vinctum fraude Gigantes,  
 Captiuumque Jouem multo custode tenerent;  
 225. Arma senex caperet, superosque ad bella vocaret,  
 Non tereret lachrymis tempus, quin protinus hostes  
 Iret in aduersos, tum lati regia caeli  
 Suppetias ferret. Sic tu, fortissime Caesar,  
 Pro nato capis arma senex, ac Martia signa  
 230. Tollis in aduersos Belgas, stragemque minaris,  
 Excidiumque vrbis, caput obiectare periclis  
 Stat tibi, & infestis subito concurrere telis;  
 Ni reddant natum Bruga, portasque recludant,  
 Satque tibi faciant. Ergo te principe magni  
 235. Ductores coeunt, percussaue foedera iungunt  
 Germani bello clari, Mauortis alumni,  
 Qui prima Iliacam referunt ab origine gentem.  
 Cognatosque DEos, & proxima signa Quiritum,  
 Quamuis indigenas malint audire vetustos,  
 240. Atque ferant Mannum, patremque Tuiscona Manni,  
 Moenia testentur licet Asciburgia Vlysem,  
 Herculis aduentum memorent, \* genus acre virorum,  
 Assuetum bellis, subitamque accersere mortem,  
 Ac promptum conferre manus in bella feroces.  
 245. Nunc pro captiuo percusso foedere Rege  
 Coniurant Brugas communi exscindere ferro,  
 Gandarumque genus sauis urgere periclis,  
 Sternere cede viros, captiuas ducere matres,  
 Dedecus hoc illi vel summa iniuria genti.

\* Tacit. in  
Germania.



250. *Aulide sic quondam tumidis iuravit Atridis  
Gracia tota, genus bello delere vetustum,  
Nec prius à positis olim discedere castris,  
Furatisque Deis in verba Agamemnonis, olli  
Quam versa in cineres vidissent Pergama Achiui,*  
255. *Captiuasque nurus posita venire sub hasta  
Pro raptu, & fidei violato iure Lacanae.  
Sic duce Christophoro mouit Germania bellum,  
Furatosque Deos sic Caesaris arma secuta est.*

### ARGUMENTUM ENCOMIASTICI QUARTI.

**B**RVGÆ nunc subitis mali coacti  
Excusant scelus, & sibi precantur  
Per facta inclyta Maximiliani.  
Ergo Rex veniam dabit petitam.

### QUINCTI ÆMYLIANI CIMBRIACI POE. ENCOMIASTICON. IV. AD CÆSS. FEDERICVM IMP. ET MAXIMILIANVM REGEM ROMAN.

- J**AM qui cornigeri pallentia frigora Rheni,  
Boiorumque vrbes, ac duris proxima Rhetis  
Saxa colit, positasque domos in montibus altis,  
Victrices aquilas, Germanaque signa secutus  
5. *Ibat in arma, furens animis, camposque per omnes  
Jam positis castris prædas vectabat, & urbem  
Brugarum ingentem longa obsidione premebat  
Magnanimus ductor, flammis & cadibus agros  
Vastabat Germanus eques, sic Hannibal olim,*  
10. *Ille Saguntina vastator barbarus urbis,  
Inuasit Latias superatis alpebus oras:  
Sic Lybyam oppressit ductor Romanus, & arces  
Scipio Phœnicas subito certamine vicit,  
Ille triumphator Pœnorum maximus, ille*  
15. *Affertor patriæ, Latialis gloria gentis,  
Nunc etiam Aonides precor aspirate sorores,  
Et mihi (si mereor) cantus, citharamque mouete.  
Dura fames intus, Germani tristia Martis  
Bella foris, sæuique premunt contagia morbi.*  
20. *Crudeles mors atra manus exercet & iras,  
Pestilente furens, qualis per Dorica castra  
Vltæ sacerdotem, contemptaque numina Phœbi  
Sacra, cateruatim Danaos in tartara misit.  
Continuo exoritur ieiuna maxima plebis*  
25. *Seditio: in primis vulgi sua damna queruntur,  
Quod iam non vendant merces, quod littora naues  
Non subeant solitæ, quod non dispendia belli  
Ferre queant, duramque famem, tristesque labores:  
Præsertim quoscunque humilis fortuna subegit*

*Seditio ciuica  
intra Brugas.*



30. *Quotidie panem mercari, & querere victum,  
Incusant procures, maioraque verba minantur.  
Scilicet inclusi paucorum crimine mortem  
Nos viles animæ non una morte feremus?  
Nos bellum, tristisque fames, morbique furentes*
35. *Conficient, nec erit finis sperata malorum?  
Ante oculos nati, (proh si qua est cura Deorum)  
Imbelles ætate senes, lætisque iugales  
Cæde cadent, longæque fame, pestisque furore  
Occiderint nondum matura ætate puellæ,*
40. *Arserint & longo tandem quæsitæ labore?  
Ut paucis cumulentur opes, ut regna sequantur;  
Nos mortem horrendam, nos tristia fata subimus.  
At cur non potius cuncti per tela furentes,  
(Quod placeat superis) ulciscimur ante cadendum?*
45. *Ut discant sine plebe patres, sine paupere dites  
Fortunam non ferre, licet per vulnera mortem  
Exigere ulticem, ac pallentes ire sub umbras.  
Primo secretim, post hæc per compita passim  
Cuncta ferebantur, veluti cum surgere venti*
50. *Incipiunt, æquor tacitis immurmurat undis,  
Horrida commoti subeunt dum prælia fluctus.  
Præsensere Patres, ac decrevere furorem  
Et populi mulcere iras, ubi crastina terris  
Attulerit lux orta diem, tibi reddere natum*
55. *Incolumem, Cæsar, veniamque orare precando,  
Ante pedes Regis proieciti exposcere pacem.  
Interea nigris paulatim aduecta quadrigis  
Nox subit, & tantum surgens se tollit in auras,  
Quantum Phœbus equis imos inuist anhelis*
60. *Antipodas rediens; & iam sub nocte silenti  
Per mare, per terras animalia fessa quierant,  
Cum Rex portantem rerum simulachra nouarum,  
Vix oculis somnum accepit. Namque ire videbat  
Tisiphonam horrendam, & pallenti condere morte*
65. *Tela cruenta manu, Brugasque venire precatum  
Suppliciter veniam, portasque patere reclusas,  
Ac sese egredier, patrisque in castra subire,  
Brugarum læta comitum stipante caterua.  
Ter somno excitus, ter somnum vidit eundem:*
70. *Tum surgens inquit, DEus hæc mihi visa secundet,  
Euentusque ferat monstratos conditor orbis.  
Quicquid erit, nostram oblectant insomnia mentem.  
Orta dies aderat, Patres de more Senatu  
Tunc habito, atque DEO perfectis ordine sacris,*
75. *Ad Regem veniunt humiles, precibusque paratis  
Illum assertorem patriæ Regemque saluant.  
Heu mentes hominum varias, quæ tristis Erinnys  
Vos agitat? nemo sic se componit, ut olim  
Non sibi displiceat. Bruga modo perdere Regem,*
80. *Inuisumque humeris cupiebant ponere fascem:  
Nunc illum laudant, titulisque ingentibus illum*



- In cœlum extollunt, perque omnia vota precantur  
Suppliciter, veniamque orant, referuntque, quod ille  
Gesserat in Leucos, quibus interceptus ad umbras*
85. *Carolus ex oculis abiit, nec protinus illum  
Quisquam hominum vidit. Regnum inuasere subinde  
Continuo Leuci: non iam spes ulla salutis,  
Non erat auxilii, quid enim sine coniuge posset  
Fœmina, vel tantis subito circumdata turmis?*
90. *Non bellis assueta manus, cen dia Camilla  
Volscorum regina fuit, seu qualis in armis  
Pentesilea furens, ferroque armata bipenni  
Duxit Amazonidas, tellus cum Troica quondam  
Ferueret, & longo pugnaret Gracia bello.*
95. *Non aliter fido quondam spoliata magistro  
Puppis in Aegeo commotis fluctuat undis,  
Quam circumstunt vario certamine venti,  
Hinc Boreas, illinc bellum mouet humidus Auster.  
Stridet ab Hispanis Zephyrus, sonat Eurus ab Indis,*
100. *Æquora consurgunt, crebrisque insultibus urgent,  
Donec Tyndaridum ter fulgens nobile sydus  
Æquoreas construit aquas, tum nauita surgit,  
Grataturque Deis, ac vota in littore soluit.  
Sic uxor rapti nuper per bella, per hostes*
105. *Belgarum domini Leucis oppressa cateruis,  
Pendet inops animi, atque ingenti fluctuat aestu,  
Quam circum dubii resonabant praelia Martis,  
Quid faciat viduata viro, viduata marito  
Fœmina? vel tantum mœrens pro coniuge rapto?*
110. *Ac pene exhaustis regnorum viribus? ergo  
Illa fidem implorare DEI, manesque vocare  
Coniugis erepti: cunctis se credere diuis.  
Cui Maria ingentes duplicabat filia curas,  
Jam matura viro, iam plenis nubilis annis,*
115. *Quam DEus & patris regnum dotale manebat,  
Ni raperent hostes. Igitur (sic astra ferebant)  
Egregius factis, ac longo stemmate auorum  
Illustris, belloque licet iuuenilibus annis,  
Non expectatus subitam, ceu numen Olympi,*
120. *Maximilianus opem tulit, & furialibus armis  
Eripuit miseras, ac regnis depulit hostem,  
Quorum vel soceri satiauit sanguine manes,  
Errantemque diu collegit fortiter umbram,  
Hostibus exactis, regnoque in pace quieto.*
125. *Illicet in sanctas accessit filia tēdas,  
Matre volente pias meritis sic reddere grates,  
Ac seruatore propiori iungere vincolo.  
Sic seruata suo victori nupsit ad Indos  
Andromade cœlum soceri visura tonantis.*
130. *Hæc memorant, veniamque petunt, Regemque precantur,  
Per patris imperium, per spes surgentis alumni.  
Qualis sub magna ramorum pullulat umbra  
Laurus, & assequitur spaciōse brachia matris,  
Si puer Aeaciden crescendo equabat Achilles:*



135. Sic modo subsequitur Titanis Phosphorus astrum,  
Ac modo præcedit: sic fratris Cynthia currus  
Assequitur, quoties renouato lumine crescit,  
Inque suas bigas spacio breuiore recurrit,  
Cornibus & maior vel decreſcentibus exit.
140. Cresce puer terris, & aurum facta secutus  
Quem te sperarunt, præſta virtute nepotem,  
Præſta itidem patrem, quem Bruga in vota precantur,  
Per caput utriusque, & inexorabile fatum,  
Per decus, atque olim venturum in ſecula nomen,
145. Et ſoceri manes, & amata coniugis umbram,  
Per cineres matris, per ſydera conſcia fati  
Orant, ut parcat falſis, dominamque potentem  
Fortunam agnoſcat; ſeſe, qui cætera vincit,  
Nunc etiam vincat, quando victoria maior
150. Eſſe nequit, nec plus laudis paritura per æuum,  
Addunt, magnanimo regi præſtantius eſſe,  
Incolumes ſeruare ſuos, quam perdere bello,  
Quos iam pœniteat ſcleris, pro ſanguine poſſe  
Nunc tantas ſatis eſſe preces, miſerabile viſu,
155. Ecce alii canos fœdati puluere crines,  
Nudatique pedes, ac vincti guttura fune  
Pacem orant, feriuntque manus ſua pectora triſtes,  
Ductaque ſingultim longo ſuſpiria tractu  
Corda premunt, veluti cum mater mœſta ſepulchro
160. Affidet, & chari lachrymatur funera nati:  
Dilaceratque comas, & acutis unguibus ora  
Fœdat, & affiduis contundit pectora pugnis.  
Sic Bruga affuſi genibus, Regemque precentes,  
Suppliciterque diu triſtes ſic voce loquuntur:
165. Da veniam miſeris, ſortemque agnoſce malignam.  
Sic tibi Rex viuât Regum, miſiſſime Cæſar,  
Omniaque Iliacæ tranſcendas ſecula vitæ,  
Neſtoreosque dies, & longos pulueris annos  
Cum ei genitor, ſeroque & in aſtra receptus,
170. Te videat toti decoratum inſignibus orbi  
Regnantem, & tecum ſubeuntem in regna nepotem,  
Amborumque omnes vitam ſuperare Sibyllas.  
Sic tua ſancta parens, caſta ſic coniugis umbra  
Gaudeat, & felix æterna pace quieſcat:
175. Sic tua cura puer, ſic longum filia viuât,  
Ac neutrum ſimiles cogat fortuna ſubire  
Ærumnas: ſic te non deſerat illa Deorum  
Virgo Paſtſtinis enixa puerpera regem.  
Hanc pugnaturus quoties in vota vocabis,
180. Non neget aſtrigeri veniam regnator Olympi.  
Exemplum pietatis habes, en aspice Chriſtum  
In cruce pendentem, proque hoſtibus ora mouentem  
Ad patrem æternum, tibi nos peccaſſe fatemur.  
Verum quisnam hominum ſic eſt formatus ad unguem.
185. Nec peccare queat? quæ ſi natura fuiſſet,  
Fruſtra vel pietas, vel erat clementia noſtro  
Fixa animo, lachrymis ad cor reuocantibus illam.

Supplicantes  
Brugenses.



- Nos meruisse mori scimus, miserere tuorum,  
 Quando humiles veniam petimus, nec ferre negamus
190. Imperium, si nulla mouent te verba precantum,  
 Nec locus est miseris etiam sua crimina fassis;  
 Cede tuos ferro, nos ultra ad fata venimus,  
 Quamuis te Caesar repetat, mortemque minetur  
 Presentem, excidiumque urbis pro talibus ausis;
195. Te tamen ante suis, quam nos extingueret armis:  
 Ni freti pietate tua, tibi tendere palmas  
 Maluimus, iustasque preces ac verba secuti,  
 Non plus laudarent venturi fata Sagunti,  
 Quam Brugas illis equatos morte nepotes.
200. Sic fati ingenti turbabant lumina fletu,  
 Ac genua amplexi Regis terraque voluti  
 Oscula figebant pedibus, veniamque vocabant,  
 Et pacem. Iussi postquam tacuere, subinde  
 Sic Rex excepit: Sileo, quæ plurima possem
205. In vos ferre, viri, lachrymas nec deprecor istas,  
 Nec gemitus sperno, nec tum pia verba precantum.  
 Fortune inuidiam agnosco, ne flete, libenter  
 Hanc vobis veniam damus, & miseresчимus ultro,  
 Quam deceat, si vestra velim non verba, sed ipsa
210. Facta sequi, meritasque reposcere crimine pœnas;  
 Sed vos excusent fletus, si fraude doletis  
 Semota, ac vere scelerum vos pœnitent omnes.  
 Quod si per fraudes, si me per falsa mouetis  
 Gaudia, post magni presentia Caesaris arma,
215. Vltorem sperate DEum, mihi cedere regnis,  
 Et vitâ quando volet hæc fortuna, placebit.  
 Sic breuiter fatus manibus leuat ipse iacentes,  
 Ac latis iubet esse animis, & parcere fletu.  
 Tum positis lachrymis Brugæ sic ore loquuntur:
220. Quando pro meritis tibi, Rex, persoluere grates  
 Non opis est nostræ, cœli regnator, & orbis  
 Præmia digna ferat, te nos ex corde feremus  
 Laudibus in cœlum, viuet tua gloria, viuet,  
 Inque dies maior veniet, dum sydera Olympus,
225. Dum mare habebit aquas, medio dum terra feretur  
 Ponderibus librata suis, dum machina mundi  
 Audiet imperiis, viuet tua gloria, viuet,  
 Ac tua venturi memorabunt facta nepotes,  
 Qualia sunt magni Alcide, tu maior auorum
230. Stemmatis laudes, sacrumque mereris Olympum.

### ARGUMENTUM ENCOMIASTICI QUINTI.

**B**RUGÆ, cum veniam dedisse Regem  
 Laudauere, statim DEos precantur  
 Pleni lætitiæ, subit parentis  
 Tum Rex castra senis; statim cateruæ  
 Gratatum veniunt. Subinde vates  
 Blanditus cytharæ, bene ominatur.

QVINCTI



QVINCTI ÆMYLIANI Cimbriaci<sup>p.211</sup>  
 POETÆ ENCOMIASTICON V. AD DI.  
 CÆS. FEDERICUM IMP. ET MAXIMILIANUM  
 REGEM ROMAN.

- C*um primum Brugas Regem exorasse precando,  
 Atque illum cunctis veniam pacemque dedisse  
 Fama tulit, sensim totam vulgata per urbem;  
 Continuo letis implent clamoribus auras,  
 5. Ingeminant voces, respondet vocibus æther,  
 Letitia incedunt, Regique ex ordine grates  
 Vicatim soluunt, & gaudia summa fatentur.  
 Hic vos Castalides precor aspirare sorores,  
 Ultima fila sequor, faueas mihi Cæsar Apollo,  
 10. Si tibi leta cano. Votis & thure Sabæo  
 Incendunt aras, velantur templa per urbem  
 Fronde sacra, promissa suis cadit hostia votis,  
 Sacra ferunt nostra fidei de more per urbem.  
 Nunc alios hominum vultus, aliosque videres  
 15. Nunc habitus, vacuum latus ferit æra cantus.  
 Sic cum vesani turbarunt æquora venti,  
 Aut pluit imbre diu, fugiant si nubila cælo,  
 Et cadat unda maris, redeat lux alma, diesque,  
 Illicet exoritur volucrum concentus in agris,  
 20. Tunc alii motus animorum, & nobile terris  
 Lumen, sic letos Brugas dare thura per aras  
 Nunc videas, penitusque oblitos ante malorum.  
 Quin etiam seris monimenta nepotibus illum  
 Sacrauere diem, Bruga quo Rege Quiritum  
 25. Quondam exorato veniam meruere precando,  
 Quem iussi celebrent per sæcula cuncta minores,  
 Mane salutabunt aras, letamque per urbem  
 Ordine procedent fidei vexilla sequentes,  
 Et sanctam leta pacem clamore vocabunt.  
 30. Tum variis memores edent spectacula ludis.  
 Hic mos semper erit: contra voluere profanum  
 Esse diem, infustumque operi, quo mente sinistra  
 Alitibusque malis Regem tenuere Quiritum.  
 Præterea legere viros, qui iussa secuti  
 35. Suppliciter fando placarent Cæsaris iras,  
 Atque pium merito Regem sequerentur honore,  
 Diluerentque nefas. Titan surgebat Eois  
 Latus equis, terrasque nouo iam nocte fugata  
 Lumine spargebat, Tyrio cum splendidus ostro,  
 40. Et picturatis indutus vestibibus auro,  
 Cui lateri pendebat ebur; vagina corusci  
 Ensis & auratis fulgentia baltea bullis  
 Ornabant latos humeros, & pectus honestum.  
 Quo positus Patroa sedet Tritonia monstros.



45. Colla flagellabant rutilantes lactea crines,  
Quos etiam molli lambebat circulus auro,  
Sicque DEO similis faciem Rex inclytus armis  
Instratum conscendit equum, phalerisque decorum.  
Qualis Bucephalus, qualis memoratur Arion,
50. Qualis Xanthus erat, qualis Balaribus Achilli,  
Aut malis currus, qualis tibi Caesar in armis  
Impatiens consortis erat, mansuetus amicis;  
Talem insedit equum subiturus castra parentis  
Rex generosus auis, comitum stipante caterua,
55. Egreditur portis, feriunt clangoribus auras  
Aere tubæ incuruo, raucos dant cornua cantus,  
Armiger ante suum fert arma micantia Regem.  
Qualia Lemniacis aiunt fabrefacta caminis,  
Et quibus indutus Pelides Troas agebat.
60. Sub domino præludit equus, cursumque minatur  
Frena ferox mandens, aurasque hinnitibus urgens,  
Ac si Mars premeret calcaribus ilia, tanto  
Suffectura DEO spaciante ad Strymonis undas,  
Ipse tamen duris reflecteret ora lupatis,
65. Insultet sonipes animoso pectore Dimos.  
Sic Rex vectus equo patris ad tentoria venit,  
Non expectatus, quamvis prænuncia fama  
Hesterno vulgata die, nec credita magni  
Attentas etiam mouisset principis aures,
70. Incolumem natum reddi, cum crastina surget  
Terris orta dies, Brugasque venire precatum.  
Quo viso attonitos subitus stupor occupat omnes:  
Mirantur, Regemque vident, Brugasque sequentes,  
Vixque suis oculis credunt, ceu somnia eburnas
75. Nunc spectent egressa fores liquentia manes  
Tartareos medio sub hydere noctis opaca,  
Atque suos falsa laudant sub imagine sensus.  
At tibi, cum natum vidisti, maxime Caesar,  
Venisse incolumem, maduerunt lumina fletu,
80. Tantaque sollicitum tentarunt gaudia pectus.  
Quanta olim mouere senem, cum venit Ulysses,  
Quattuor exactis per bella, per æquora lustris.  
Tu natum reducem manibus complexus utrisque  
Oscula anhelata dabas, longæuus qualiter Aeson,
85. Raptor ut ad patrias Phryxæi velleris oras  
Venit, & Adriacos pulsauit remige fluctus  
Seruato, magni superatis fluctibus Istri,  
Alpinisque iugis, per quæ vel nobilis Argo  
Traiecta est humeris ad Japidis æquora ponti
90. Oscula mille dabat post tanta pericula nato  
Aeson, ac superis reddebat vota secundis.  
Non aliter Caesar soluebas debita magno  
Sacra DEO supplex pro nato sospite ad aras:  
Hic merces Arabum incensis altaribus ardent,
95. Quasitæque preces sunt, dum thura cremantur,  
Quales conueniat tanto pro munere reddi.



- Præterea auditis breuiter pro tempore Brugis,  
 Vix tum speratam pacem, veniamque dedisti.  
 Ante oculos versata tuos clementia, sensus
100. Commouit placidos, subiit pietasque, fidesque,  
 Ac toties magnis virtus spectata periclis,  
 Et iunctæ pariter mentem flexere sorores,  
 Vt citra inuidiam Brugis ignoscere posses,  
 Quæ tibi perpetuas pariet clementia laudes,
105. Et fama implebit, titulisque sonantibus orbem.  
 Bella gerant alii; placida tu pacis amator,  
 Tu fidei cultor, tu mentem proximus astris  
 Cuncta vides cæli fatorum arcana mouentis,  
 Non te perturbant fluctus, seuæque procelle
110. Rerum humanarum, quin tu maiora sedendo  
 Sæpe facis, quam qui crudelia bella secuti  
 Per tristes hominum clades, seuosque furores  
 Ac varias mortes, humana negotia miscent,  
 In te iustitia est, placiteque modestia vite:
115. Raro belligeras, raro descendis in arma.  
 Quis neget, aut ideo contemnat Cæsaris acta?  
 Si non plus laudant irati prælia Nerei,  
 Quam cum prostratus toto silet equore pontus:  
 Nec magis hybernæ seuissima frigora brumæ,
120. Aut tristes pluuias, quam verni temporis auras,  
 Quamve serenati mirantur sidera cæli.  
 Quis nisi sit demens, ergo tua tempora Cæsar  
 Accuset, raro quod te iuuat arma mouere?  
 Quod tibi non placeant cædes, non tristitia Martis
125. Vulnera, non mortes hominum, non bella furoris  
 Impia terrifici? Verum si forte coactus  
 Vltrices aquilas ad Martia facta mouere,  
 Dii quantus seuos ultor consurgis in hostes,  
 Siue opus in longum cunctando ducere bellum,
130. Siue erit in dubiam subito concurrere pugnam:  
 Illic siue moras Fabii siue vtile rebus  
 Consilium Ausonia superas, hic Cæsaris illos  
 Ad pugnam ardores, ubi posceret alea fati,  
 Præcipitesque moras, ac festinata periclis
135. Facta per ancipites abrepto tempore casus.  
 Testes sunt Bruggæ, subito qui Marte coacti  
 Post Regem Ausonia deductum in castra parentis,  
 Cæsaris ante pedes veniam meruere precando.  
 Illum igitur fores antiquo more phalanges,
140. Illum Ductores, illumque exercitus omnis,  
 Æneadum Regem lato clamore salutant,  
 Ac certum imperii columen. fideique futurum  
 Auctorem Christi, qualem non viderit orbis  
 Ab cæpto imperio. Tum Cæsaris arma secuti,
145. Juratosque Deos socii gratantur utrisque;  
 Regi priuatim, quod in ista luce manere  
 Maluerit, duro quam vitam abrumpere ferro,  
 Quamuis extollant rigidi pia fata Catonis,

Fridericus  
 Imp. pacificus.

p. 213

Horruit



- Horruit ille minas, ac longam Caesaris iram,  
 150. Non oppressorem patriæ, non cæde madentem  
 Sustinuit Magni, venturaque fata videre.  
 Plus tamen est sauos durando vincere casus,  
 Ac rerum expectare Vices, quam fata subire;  
 Et fugere indignos ascita morte labores,  
 155. Vel miscere domos luctu, vel funere magnum.  
 Hoc animo vixit post tristia prælia Magnus,  
 Æmæthiosque ducum spumantes sanguine campos,  
 Prostratasque acies, direptaque castra suorum  
 Vidit, & ultorem sese promisit iniquæ  
 160. Fortune, quamvis longinqua per æquora vectum,  
 Post visam celeri & laudatam remige Lesbon,  
 (Pro scelus) ad Pharios illum ferus hauserit ensis  
 Sic etiam Varro Cannarum in strage superstes  
 Maluit esse, iterum qui turmas cæde madentes  
 168. Colligere aut posset magnas audire ruinas  
 Hannibalis, quondam si quid fortuna moueret,  
 Aduersi, Tyrios etiam mersura furores,  
 Horum facta ducum maiori laude secutus  
 Rex nouus Ausonia, Brugarum fortiter iras  
 170. Pertulit insanas communi fraude retentus.  
 Verum non ideo turbauit facta decusque,  
 Aut binis acies pugnatæque prælia lustris,  
 Quorum sunt testes Morini, fortesque Sycambri,  
 Celtarumque genus durum, Bataunisque furentes,  
 175. Ac plures alii, gentes quas fortiter armis  
 Contudit, ac victas frenis parere coegit,  
 Quas tibi nunc ferrem numeris, faustissime Caesar,  
 Sed mea fessa chelys requiem, sertumque reposcit,  
 Si tibi, si regi cecinit per carmina laudes,  
 180. Et tua maiores auertunt pectora curæ,  
 Quas propter longis superasti tractibus alpes,  
 Italiam visens iterum, tua regna, decusque  
 Nobile terrarum, cuius te splendida honorat  
 Gens Venetum, nullis per bellica facta secunda  
 185. Regnis, ac præsens meritos largitur honores.  
 Tu mihi testis ades Veneta legatus ab urbe,  
 Antoni Boldæ clarissima gloria gentis,  
 Et lux & Veneti non ultima fama Senatus.  
 Verum tempus erit, cum me tua bella sonantem,  
 190. Germanasque acies iterum mirabitur orbis,  
 Quo se cunque dabit maiores tempore vires,  
 Et sperata meos hilarabunt otia vultus:  
 Quæ solus præstare potes, qui sponte dedisti  
 Nunc iterum crines circum mihi serpere lauros.  
 195. Quare viue precor, totos & Nestoris annos  
 Transcendas venerande senex, omnesque Sibylle  
 Titonique dies, quamvis te regia cœli  
 Optet, & inuideat terris tua numina Caesar.  
 Et tu qui Comitum sacrum largiris honorem,  
 200. Casareæque domus titulos, nomenque per æuam,

Venetorum  
cultus erga Ce-  
sarem.



*Maxmiliane, tui decus & verissima seculi  
 Gloria, belligerum cui nuper tradidit enssem  
 Cæsar, & Ausonia concessit iura corone,  
 Victricesque aquilas, etiam maiora daturus :*  
 205. *Vive diu felix, ac tantis suffice regnis,  
 Ut te fama vetus longum diffundat in ævum,  
 Et pater in diuos tandem vel in astra receptus  
 Gaudeat imperii titulis succedere magnis,  
 Ac Pellenæos factis æquare triumphos,*  
 210. *Donec regnanti victus tibi pareat orbis.*

FINIS ENCOMIASTICORVM CIM-  
 BRIACI POETÆ AD DIVOS CÆS. FE-  
 DERICVM IMP. ET MAXIMILIANUM RE-  
 GEM ROM.



CON-



CONRADI WENGERI  
DE BELLO  
INTER VENETOS  
ET  
SIGISMUNDUM  
AUSTRIÆ ARCHIDUCEM  
COMMENTARIUS.



CONRADI WENGERI

DE BELLO

INTER VENETOS

ET

SIGISMUNDUM

AUSTRIÆ ARCHIDUCEM

COMMENTARIUS





LECTORI SALVTEM!

BURCARD GOTTHELF STRUVE.



Onradus Wengerus Canonicus erat Brixinensis, pro-  
ut ipse sub introitum huius libri se effert, qui in hoc  
ipso libello Germanorum causam defendendam su-  
scipit. Argumentum sibi sumsit belli Veneti histo-  
riam, quod Sigismundus, Austriae Archidux anno 1487.  
& 1488. gesserat, cuius summam Gerhardus a Roo\*  
tali modo exponit: *Aestatis initio, qua haec apud Flan-  
dros gesta sunt, Sigismundo Austriaco, Tyrolensium Domino, bellum incidit  
cum Venetis, de quo, cum alii multis scripserint, quam paucissimis dicam. Di-  
sceptatum iam annos aliquot erat, de finibus, inter Ripenses, Benaci accolae,  
& Arcuanos regulos, quorum sub Sigismundi fide hi: sub Venetorum illi  
erant, neque dum per legatos ea lis componi potuerat. Accedebat de ferrifo-  
dinis, quae in Noricis, utrorumque finibus, communis fere iuris habebantur,  
controuersia. Cumque iam ad arma res venisset, Athesini per agrum Triden-  
tinum irrumpentes, Roboretum oppidum, tormentis quatunt. Horum Dux  
erat Gaudentius Amasius, militari gloria illustris. Amasiorum vero, vetus  
iis in locis, & nobilissima olim familia, prorsus extincta est. Veneti ad hunc  
nuncium, copias conscribunt, quibus Robertum Sanseverinatem, excelsi no-  
minis ducem praeficiunt. Adduntur ei Julius Caesar Camertius & ipse Veneti  
exercitus imperator, ac Lucas Pisanus eius legatus. Urgebant acriter obsi-  
dionem Germani, & praclusis undequaque viarum angustiis, nemo subuenire  
circumsessis poterat. Ideo Nicolaus Priulus loci praetor (Potestatem ipsi vo-  
cant) permissio hostium potestati oppido, in arcem se recepit, quadragesimo ob-  
sidionis die. Dein ponte per Athesin facto, Veneti omnem exercitum traii-  
ciunt. Singularis per eos dies pugna, ex prouocatione, inter Antonium Ma-  
riam, Roberti ducis filium, & Georgium Comitem Sonnenbergicum, pares  
aetate ac animo iuuenes, spectaculum utriusque non ingratum praebuit. Hi  
equites prius concurrunt, mox Italo in terram delato, Germanus, uti aequo  
Marte congrediatur, suum & ipse equum relinquit, cumque ille hunc deicere  
conatur, una ambo corruunt, & Georgius superincumbentis femur posterius,  
quo arma non pertingebant, pugionis ictu aliquoties repetito, feriens, victo-  
riae confessionem extorsit, qua contentus, deductum in castra ac amice habi-  
tum, & muneribus cultum, ad suos remisit. Non multo post, Germani pro-  
pe Rupacionem, nec opinato impetu hostem adorti, multos cadunt. Rober-  
tum*

\* Hist. Austr. lib. X. pag. 511.



tum ipsum, in summo vitæ periculo constitutum, Antonius Maria & Venancius Julii Camertis filius, seruauere, ipsi vero ab hostibus circumuenti, se dedidere. Post hanc pugnam arx Roboreti in potestatem venit. Priuilegius prætor, & Franciscus Crassus arcis præfectus, capti, ad Sigismundum mittuntur. Cum vero Germani, non numerato stipendio tumultuarentur, Gaudentius, incensa arce, Tridentum rediit. Robertus, recepto cum arce Roboreto, Tridentum recta ducit, & ne quid hostile a tergo relinquatur, Ifanium & Numium arces, ex itinere capit, hinc ponte Athesim iungens, inter Petram ad Callianum & Bisenum, in hosticum progreditur. Agrestes vero homines, trepido cursu, in urbem advolantes, hostium aduentum nunciant. Igitur duæ Germanorum equitum turmæ, ac totidem peditum signa, cum promiscua Tridentinorum multitudine excurrentes, hostem sine ordine ad prædam diffusum, in fugam agunt, qui dum ad pontem properant, Robertum & voce & manu sistere fugam, ac aciem instaurare parantem, secum abripiunt. Germani, audita ex hostium metu audacia, fugientium tergis instant, donec pons multitudine degrauatus, dissoluitur, & Sanseuerinas, multique cum eo mortales, & equi a vorticofo amne absorpti, misere perierunt. Cecidere & ex Germanis non pauci, quibus cum Guidone Rubrio Parmensi res fuit. Is enim, cum equitibus suis, strenue pugnans, hostium aciem sustinuit, donec amisso iam imperatore, in tutum se recipere coactus, amnem tranauit. Roberti cadaver cum cura quæsitum, Tridenti in æde D. Vigili, honorifice tumulatum est, is honos, eius virtuti etiam apud hostes est habitus. Postea intercessione Pontificis & Imperatoris legatorum, pax facta. De finibus nihil mutatum, & Ifanium Numiumque Venetis relicta, quoad Pontifex de tota controuersia arbitrium ferret. Atque hæc obiter huic loco inferere visum est, plura qui uolet Bembum ac alios legat.

Describit autem Bembus bellum hoc prolixius libro primo Historiæ Venetæ. Wengerus, uti ex indice scripti statim patet, hoc scriptum contra Jacobum Caniceum Parmensem direxit, qui idem bellum describens, multis opprobriis Germanos lacefferat, quæ in hoc scripto refellit.





## I.

p.215 **D. CONRADI WENGERI DE BELLO  
INTER VENETOS ET SIGISMUNDUM  
AUSTRIÆ ARCHIDUCEM GESTO.  
ANNO MCCCCLXXXVII.**

*Commentarius.*

**CONRADI WENGERI DE BELLO INTER VENETOS ET  
SIGISMUNDUM AUSTRIÆ ARCHISTRATEGUM  
LIBER.**

**I**llustrissimo excelsoque Principi Sigismundo, Archiduci Austriæ, Comitique Tyrolis, Domino suo gratiosissimo, vniuersisque Baronibus euocatis, & ærariis Militibus per Germaniam constitutis, in campo apud Calianum Tridentinæ diocesis prælia gerentibus Conradus Wenger D. Canonicus Brixinensis humilime se commendat, obsequiumque dicit. Et has vti sunt huiusce sui laboris lucubrationes pro gloria princeps tua, & inclytæ Germanicæ nationis offert, contra & aduersus quendam Iacobum Canicem Parmensem, Italum, Ligurem, cuius scripta 10. Cal. Septemb. ad suas vsque effluebant aures, qui aduersus Germanum profluit iniuriis, & opprobriis dente cruento laceffens. Cui si me ipse obiecerō clauum clauo retrufero, nil plus egero, quam par pari vicarias referre iniurias. Satiū mihi consultum iri conuitia sua sordere, quibus nil affert, quam gloriam Princeps tuam, & totius militiæ victricibus armis partam obfuscare, & gentis suæ fugam ignominiosam, exceptamque stragem, sub epithemate & nitore sermonis, rethoricaque adulatione colorare. Te inclytum Principem cum milite tuo, plus multitudini quam pietati & fidei fidentem, nulla laceffitum iniuria, nobile castellum Roforedum obsidione cingentem, Venetos omnes mercimonia agentes, in tua publica fide receptos capientem, spoliāntem, incarcerantem (vt verborum suorum sententia vtat) arguere non pauet, compositam post pacem, & reliqua. Digressus extra genus demonstratiuum, ad genus iudiciale profiliens, non quid iure belli actum pro & contra sit, sed quid æque vel iniue factum censet, & diiudicat, quod longe est ab officio historiam texere volentis. Id non erit opus & labor meus, partes pace nunc facundas, & corda ira & odio defecata expergefacerē, quæ per Papalis dignitatis, & Imperialis maiestatis legatos & caduceatores conciliatæ sunt, compositoque nituntur. O Iacobe non indigne vliscendum, si tua sponte non submissus, carmina illa famosa per Italiam & Galliam Cisalpinam, per choros decantari adornasti; sumpta olim Fescennina licentia condemnataque, dum per honestas serpere cœpit domos lex lata malo, quæ nollet carmine quenquam describi, ludum illum noxium, ver-



terunt formidine fustis: sic ad benedicendum redacti, ipse chorus obtinuit. In quam legem commisisti aduersus Germanum principem eiusque militem, falsa veris miscendo ac inclamando. Ais etenim *Germanum nulla laceffitum iniuria*. Principem meum Germanum esse scito atque principem Epimetatum, quo non praestantior alter humanitate, liberalitate, maior pietate & fide extat, eo tuo & nunc hunc laceffitum per tempora praeterita sua in familia per Caesaream Maiest. commentata scilicet in archigenerosos comites, aduersus quos Venetus sua dimensa potentia pro tempore sauit, terminos agrorum mouendo, currus & equos abigendo & reliqua. Pro qua familia serenissimus Princeps defensanda, longe ante hac impar hosti cum suo milite aurato in agro dictorum comitum castra metando, bella & exercitum mouit, multas expensas sustinendo, licet eo tunc parum profeceritis; lege permissa, collectis viribus in continenti, vim vi propulsare non distulit, nec ut puer laceffitus inultus fleuit. Num si iuris expertus es, id iure digesto permissum esse didicisti, ius suum sibi dicere pro familia laceffita quenquam posse, hoc inficiari nequis. Urit enim fulgore suo, qui pergrauat arces penes se positas, aspice canino dente rodens, si hoc bellum gemino sit orditum ab ouo. Seu causam ipse praestitisti humanissimo principi, restat te tuis scriptis in principem calumniatum, qui nec primo prouocauit causam liti praestando. Ea non contentus infamia contra principem disseminata, contra militiam Germanam in rebus agentem, *nullam fidem obseruasse, & astu stylo delitescente Germanum in singulari certamine Italum superasse* confingis, ad quod mea festinat Apologia. Germanus quis sit, & unde sit accipe. Germania cis citraque Istri, alias Danubii fluminis oram, Sueuiam dico, quam Romana respublica apud Vindelicam urbem, nunc Augustam appellatam clade accepta, ad internitionem vnius hominis usque pernotuit. Ab illis Iulius Caesar apud Nomagium trans Rhenum ponte fabricato fracto, viso Germano ponte abstinuit. Huius nunc Ungarus a finibus suis egressus, in Vindelico campo superatus, fugatus, fusus, ad fines suos adactus, accepta clade persensit, amplius nunquam reuersus, & reliqua. Sic Germana Germania, Rhoetia facta, in societatem Romanorum non victa deuenit. Quae non consuevit multitudini fidere, sed fidei & pietati semper amica fuit. Hodieque libera Sueuia, fide & armis praepollens, in Caesarea expeditione, in cornu ac primo aggressu locum habet, & signum fert victoriale. Haec est ista Germania Cerere ac Baccho abundans, cui etiam nec lac nouum aestate nec frigore deficit. Cuius virtus bellica pipere preciosior est, & cunctis aromatibus uti pulegium p. 216 apud Indos. Is nempe Germanus nutritus faustis sub penetralibus, fortis creatus ex fortibus patrum testiculis? feroces nec imbecilles progenerat ut aquila columbas. Inde Flaccus *Quis horrida quos parturit Germania foetus, immanesque Rhoetos te Cesare incolume pauescet?* Hos forsitan Iacobe ex Suicia villa existimas, qui ea lege non censentur. Ex ea Sueuia pauci milites periere; sed hi qui ex gleba fulcanda in militiam vocati, partim succubere dormientes. Haec tibi in praefatione patefacere me iuuat, ut agnoscas aprium solum, & Genus Germanum, De inclyta Alania ad oram Rheni fluminis, nobilique Teutonia, ad oram Albiae fluminis, confinantibus prouincijs, bellicis gentibus describere historia me praesens comprimit. Nec in praelijs Teuthones propter nimiam distantiam interfuerunt; nunc adacti cruentissimi Martis & praetiorum, pro Deum, pone agrum Calianum Tridentinae dioecesis, aliaque loca, gesta per serenissimum Principem Sigismundum, contra & aduersus magnificum & potentem Senatum Venetorum, styli officio describere zelus dicti mei principis, dulcis amor patriae Sueuicae, & tua Iacobe scripta commouere. Non quae vidi (quod proprium est historicorum) sed quae ab his, qui viderunt, interfuerunt, praetati sunt didiceram, post multam lucubrationem, ut ficta non sint proxima veris, uti Graeci in historijs nugari soliti iuxta vatem, Xerxem regem velificatum Athon montem, fretumque constratis classibus pontificabile facere (ut aiunt) tentasse, scribere tentabo.

Et

Sueuorum primum  
legium Lamb.  
Schaffn. sub anno  
1071.



Et ceu olim videre Rhoeti bella Drusum gerentem, sub alpibus Vindelicis, \* *Hor. 4. od. 4.*  
 ita sub anno salutis 1487. in die S. Georgij Martyris videre Rosforenses ciues, do- *Rosforensi obsi-*  
 minio Veneto subiecti, Gaudentium Comitem Amaciæ, belli ducem genera- *dio.*  
 lem, sub alpibus ad oram Athesis fluminis, & procul ab extremis fluminum  
 Rhæni & Istri oris, sylvaque Hercinia principi meo subiectis gentibus, Norico  
 admixto milite, vna cum suis proceribus comitatus Tyrolis, nec non & quos (vt  
 ait Lucanus) *fundit ab extremo flauos Aquilone Sueuos, Indomitumque caput Rhæni du-*  
*centem,* quibus deductus per omne tempus mos Amazonia securi dextras obarmet,  
 quorum suprascriptorum omni ope Rosforem forti cingitur obsidione. Dux  
 castra, tentoria, papiliones, statiuas, aggeresque locat, fabricat sedula cura mem-  
 bra, & montem occupat, bombardas admouet, muros & arcem agitat, commea-  
 tum claudit. Miseri incolæ data repentina obsidione territi, resumpto spiritu,  
 mens vna omnibus patrios defendere muros, telis & saxis mortiferis hostes pro-  
 fligant, aggressores propulsant. Poenas Germanus ex hostili homine extra mu-  
 ros sumit, sic turmam è turmatu lituo dux reuocat, faucios vngit, necatos in  
 fossam sepelit hostis. Stratagemate dux vsus, muros & arcem bombardis præ-  
 uios facere decreuit, viam latam & tutum scalis ascensum. Sic altera iam vi-  
 ce, prima quia non successit, via adoritur reliqua. Insonat Germanus tuba,  
 turma labori non detrahens, nec metu mortis fracta, impigre hostis postes ad-  
 oritur, muros & arcem tormentis bellicis igne & sulphure præuios patefactos  
 ingredi nititur, & scalis apposis ascendere tentat. Qua rata est acies, ex arce  
 60. viris munita, longa arcem defendere temporis morâ moliantur, saxa infe-  
 sta voluunt pondere graui. Contra ruunt hinc inde saucia corpora, ploratus &  
 gemitus intra muros & extra. Partibus tandem ad inuicem afflictis grauiter &  
 attritis vulnere, cæde, fame, squalore, tabo, obsessi pacem precantur, inducias  
 & treugas deposcunt. Germanus pietate vsus & fide, inducias præstat. Vene-  
 tias nuncius datur, concione facta per Robertum belli ducem. Decernitur, mi-  
 seris non esse succurrendum, nec congregiendum esse cum Germano, qui ta-  
 men suo milite impar exercitui Italo extitit. Sic arx & oppidum in ditionem  
 principis Germani deuenit, captiuus principi præsentatis. Fides sponsa obserua-  
 ta est, quod tu Iacobe inficiaris. Porro priusquam arx & oppidum se dedere,  
 Robertus Sanscuerinas, vir insignis, generalis Venetorum capitaneus Germa-  
 nos in certamine singulari & tumultuario tentare & gustare gliscens, filium suum  
 præstantiorem Antonium cum quouis ex agmine Germanorum in certamine ad  
 duellum exitiale subeundum pro mille ducatis sistere pollicetur. Quidam Joannes  
 de stirpe dapiferorum, Comes de Sunnenburg, pugil robustus, & natus Sue-  
 uus iustus se sistit. Pacta fiunt & capitula, de die, tempore locoque conueni-  
 tur. Congreditur ab equis, tritum in solum & luctationem devenitur. Squa-  
 lent calentia in solo pectora, nec alter alterum subiugare valet. Tandem Ioan-  
 nes memor pugionis, quem palam in certamine penes se gestabat, nec pacto  
 contrarium, extrahit, in nates Antonium torfit, fixit; qui sic fixus ne Ioannes vi-  
 ctor inclementius in eum ageret, & mortis euaderet ictum, captiuum se dedit,  
 M. ducatos soluit: prout hæc in quadam Monomachia latius descripsi, ad quam  
 refero legentes. Hic tu Iacobe suspectum te facis. Si Germanus arma non  
 permissa, sed delitescencia habuisset. Italus appetitor præsens non tacuisset.  
 Itidem ante deditam arcem & oppidum belli dux annuit militi frumentatum  
 ire, qui ponte ultra Athesim traiecto, & custode tutato, decreuit à lacu Bena-  
 ci, exercitui Veneto, qui apud Serauellem castra metabatur, meatum claudere  
 & intercipere montis Coronæ aditum. Venetus auisatus, montem prior occu-  
 pat. Interim Robertus exercitum soluit apud Serauallem, & Germanum inauisa-  
 tum obruere tentans, equite & pedita non pauco. Germanus cum paucis equi-  
 tibus C. & L. ac octingentis peditibus latentibus in insidiis, nec præsentibus Ve-  
 netum adoritur. Vi maxima insultans, coniecta velut cerua sagitta, fundit ex-  
 tremos



Belum secundum.

tremos metendo, solus absque pedite milite delitescente, qui longe adhuc aberat. Audiens vero conflictum maturat, crudeli ardente praelio, Petrus Galban. Paduan. In ore gladii cadit Antonius Maria, alacri & imperterriti vultu in Germanum insultans, capiuntur & reliqui. Venetus terga vertit. Profugus fugit Robertus, à filio pater. A Germano Italo cohors, cohorte angusta, in angusto arcetur loco, per saxa & scopulos, in gurgite Athesis mergitur ingenti numero. Nobilis ex Germano mortem obit vnus, & stationarii milites pauci. Interea audientes armorum fragorem milites delitescentes, ex insidiarum loco profiliunt, & ad finem conflictus vsque perveniunt. Venetum fugientem, vnum veluti Thyrsis & Coridon pastores gregem compulerant ouium in ouile ad suas compulerant arcas. In quo certamine Robertus, quem pramiserat continuo miles, vix mortis contagium dicitur euasisse, cæteris occisis & submersis. Et tamen de primo praelio, in quo Germanus impar Italo extitit, triumphabat spolia legendo. Post hæc Gaudentius Rosoredo in fidem recepto arce & oppido, milite paucio custode relicto, pontem trans Athesim factum demoliri iubet. Exercitum qui vltra 12. millia nunquam (quem Iacobe 24. millium existimas) extitit, emittit. Castra dissoluit ap. urbem Tridentinam. Dominum capitaneum & virum insignem Fridericum de capella militem cum CCC. equitibus & certo milite pedestri relinquit pro urbis ac terræ custodia sola. Ad vallem Aufugii, Burgum Delphani dominum, Theodoricum de Blumega strenuum virum cum paucio pedestri milite capitaneum locat. Disgregato exercitu Germano, & in Germaniam vltra montes profecto, subito aliæ gentes armiferae ad Meraniam se conferunt peregrinae, ex terra montana Curiaë Rhætensis concitæ, pramaturantibus totidem ex ora Rheni fluminis ad Insbrucas. Venetus non quiescens, cui ex clade de proximo accepta feruebat sanguis & ira, cogitat qua alia, dum hac non successit, via Germanum profligare, & terras suas occupare possit. Fabricat machinas, rates & pontes, speculatores mittit, infirmiora terræ perlustrare facit, quo facile hostis superari valeat, flumina & arces visendo. Interea cis citraque montem Durani, in valle Indicaria hostem Venetum aggreditur strenuus miles Nicolaus de Firmiano & in ore gladii centum cadunt viri, reliqui in fugam versi domus suæ in prædam dantur. Dum res sic agerentur, & essentiam nondum principis, sed totius terræ negotia & status disturbata, ab hosteque amaricato per omnia in defensione terra, & ingruente nouo hoste magis in secura terræ natiuæ; natu & prudentia maiores mussitant, quo res ea pertingere velit, olfacientes quasdam terras ardere, & tamen aliud ageretur, & aliud prætenderetur ex diutina oppiduli obsidione, & tam facili derelictione & gentium abdicatione. Captata hinc conjectura, vna rati serenissimum principem conuenire, inuitatur princeps oppidum ad Meraniam: istac se confert, comparent prouinciales. Inter quos habita concione, & mysterio consilii inter terræ Proceres communicato & bene digesto, Principi pro audientia sedenti, communi omnium ex ore profari iubent, quo coram captata beneuolentia, Orator sic orditur. *Optime Princeps, res dura, & terræ nouitas, nos talia moliri cogunt, arcentque, & late custode fines tueri. Inprimis rogamus, protestamurque gentes has peregrinas, ex Merania, quo ingenio cæcitas nescitur, abigere velis. Nec non eas, quæ de prope maturant à Rheno, gentes auertere, sine more dispendio cura tibi sit. Item Capitaneum Tridenti ampliori sufficere milite propter Venetum molientem, ne tardes. Tibique & statui tuo vt consulatur, dietam ad Oeni vallis oppidum Hallis illico instituas. Maiores natu proceres, & terræ incolas acciri, in animo tuo sit. Ad ea nos tui & patriæ dulcis amor compellunt, veniam petamus, excessum si foret.* Serenissimus Princeps intelligens in rem suam agi, assentit, milites peregrinos, multo ære conductos, ære dato remittit. Ventum est ad Hallis, examinato negotio, conperitur aliud actum, aliud prætensum. Quæ ipse scribere prætermitto, hæc parce scire congruit. Nec fas est omnia scribere præter vnum, quo minus dixerim,



rim, & alterum, quibus vltra vnum non addam, sed ponam digitum ori meo. Magnificus Senatusconsultus Venetorum, concione habita in magna Prægrada, concludit Germanum magna & tumultuaria vi adoriri. Pontem & ratem nauticam vltra Athesim traiecit, illam fune ad littora pendet, versus Calianum, in planitiem. Inter eum & riuulum Aquæ viuæ castra locat, non longe à castro Petræ, subter Bisenum collem eminentem, custode & speculatore munit. Signum hoste superante dare præcipit, tripudiando & grassando. Interea Germanus ante custodes & scrutatores incolas, quod veluti tyrones, nec ferire nec mori didicerant, iuxta & prope Calianum locat. Et ex Biseno speculatorem, pariter ordinat signum, si hostes traicere exercitum tentat, auisset scrutatores de auisamento ex Biseno. Fidentes, siti & fama noctisque vigiliis confecti dormierunt, in quos miles Venetus irruit, necans ad internecionem vsque huiusce præsumptæ prodicionis signo neglecto, reus capitur, carceri mancipatur cæco, poenas luit; conscius nec ne sit, parum mihi constat. Venetus grassatur prædæ gratia, circum uagantur alii, statiuas milites aurati fabricant, continuo gentes traiciendo. Nuncius capitaneo Friderico illico datur: æstuans labore, sparsus puluere, inquit, Venetum cum 10. millibus vltra Athesim venturum hostem, & iam fere mediam totius exercitus partem traiecit. Et quod magis, necatis custodibus totis discesserant campis, prædæ gratia furentes, & bacchantes. Nondum finito verbo, venit vir armorum validus Michæletus ex Durano valle Indicaria, datus super trecentis jure militari robustis viris, quem Fridericus ante miserat tribunus. Interim Fridericus cum milite in arma se parat suo post Michæletum maturando. Optimi ciues Tridentini non tardantes, se mox in arma pariter parant, capitaneum subsequuntur: Michæletus non expectato capitaneo, cohortem aggreditur hostilem, necatur, perdit in ore gladii viros CC. circiter. Adest confestim cum suo aurato milite, & stationariis paucis capitaneus, de tanto aduersus eum gregato & ferrato equitum & peditum 4. millium agmine. Ipse vero cum omni aggregata cohorte præter ciues Tridentinos, qui nondum venerant abundabat mille viris. Territus, obrigescens quid faceret, premit altum corde dolorem. Spei reique prorsus dubius hortatur milites: *O vos socii maiora passi aduersus ducem Belgarum Carolum, quem vice terna ad internecionem vsque prostravimus, terras suas in ditionem Germani redeigimus, immemores ante malorum incumbite armis quisque suis. Hic non est locus refugii, asylum nullum. Si terga vertimus, hostis dorso hæret. Quanquam Venetus sit in multitudine contra nos gravi, nos vero pauci, facile est concludere multos manibus paucorum.* Sunt equidem per Illyricum Superique maris sinum gentes pretio conductæ, cis & citra Eridani, alias Padi fluentia, ex Æmilia, Liguria, Cisalpina Gallia collectæ, mala poena sub dira seruitute constrictæ, quæ non solent pro dulci patria, suisque dominis se præcipitare, corpora obicere, nec pulchra petere per vulnera mortem, altifona voce subiungens, *In Dei nomine petite hostem, nec ipsi parcite ab homine vsque ad pecus.* Vix sermone finito, miscentur equites, milites procaces in certamina rursus concedunt, vibrantur gladii, hastæ rumpuntur, Cristatæ Italicorum Galeæ labant, crudefcit prælium, vociferantur hominum & bestiarum animæ morituræ. Et erat hora diei apud nos post meridiem prima quasi, tabescunt præliantes labore nimio. Subducit dux belli lassos, quietos & insaucios in locum sufficere studet. Fit mox ingens prælium, lassæ & fatifcentia hinc inde quiescunt corpora, facta non post multa mora, ingruit alius horribilis conflictus. Germanus impar, virtute in equos lanceas torquet, perfodit. Equi torti, confossi spiculis, frendunt spumantia frena mandentes, corruunt sub onere, quæ gestant. Et alia mortis contagio, iactant pectore crura, humescit terra cruore fuso dehiscens. Fit graue aliud, labor cruentus & super humanus bellatores extenuat spiritu, quidam animas exhalant, absque vulnere & callo. Extrema corporis membra, attritione la-



boris natura iuuare refugit. Agminibus hinc inde, ad horam fere 3. post meridiem vel prope, grauius afflicti & attriti, requiescere possunt. Qua paululum facta pausa, spiritu resumpto, Germanus angustus, profugare non valens, neque praesumens, spuens in manus, ferro praecucuso, iterum foro se parat, quos dux belli, cuius cura & sollicitudo mentem extenuat sic affatur: *O viros ineffabiles, o inclytos bellatores, quorum hasta nunquam est auersa, nec clypeus abiit retro, incumbite nunc armis. Suppetia Tridentinorum maturant succurrere nobis. Afflicti consulite rebus quisque suis, ne Venetorum dominio & seruituti (quod nec metas rerum, nec tempora cessura suo imperio ponit) subiiciamur.* Eo sermone consummato, impius labor omnia vincens adest. Statim conferuntur manus, fit atrox bellum, & tale, quod armorum fragore & collisione syluae remurmurant, resonatque ex aethere Echo, clamantibus in coelum animabus morituris. Extemplo de properat aestuans, cursu puluerulenta, Tridentina militum cohors, arma mouet, spicula mittit, lanceas in hostem & cuspides procusos dirigit. Nec casso vulnere fallit equites Italos, Germanum nimia multitudine superantes, Tridentinus propulsat ad mortem vsque, ad sepultum se reddit. Collidunt se mutuo bellantes, & erat circiter horam prope sextam. Sol ab hora prima certaminis, totam per mediam diem grandi incanduit aestu. Speculator desuper superante Germano aduentatu nouorum recentium bellatorum, pro sanguine & vita certantium, declinare versus pontem partem exercitus Veneti videns, signum dat. Incipit Italus circumspicere, retrospicere prospicere ad omnes orbis plagas. Et quia per loca, quae hostis occuparat, naturaque muniuit disfugere nequiens, versus pontem, quem longe ante dux belli Germanus non improvide soluit, harentem fune fugit moestus exercitus. Quem Germanus persequitur manu forti, ruunt ferratae equitum & peditum cohortes, qualis vndas exercet Auster indomitas, Pleiadum scindente choro nubes. Germanus equos frementes mittit sonipedes, medios per hostes. Cadit irrevocabile vulgus, quo quemque fert impetus. Sine ordine harentia sibi agmina prorumpunt, alter alterum ocyus in itinere versus pontem praeuire nititur. Nescientes pontem ruptum, ad fluminis littus contendunt, fugientes hostem a tergo, gurgiti se credunt, ventrem in flumine purgant. Hi vero qui scaphas, lintres seu phaselos sibi consciuerant, saluis ad portum venere carinis, tabentes & tremulos artus in littore ponunt spem metumque inter dubii. Mane Germanus dulcia spolia legens, Italia cadauera ad submersos vna sepelit, & ad rastrum Veronae in Athesi praetensum delegauit suos, in Calcina tumultando. Nunc vide Iacobe, si sententia tua quadret qua asseris *Guidonem apud pontem Germanos trucidasse.* Quae scribo, vera sunt, tu vero profugus factus, scire non vales, quae abs te acta sunt in toto huiusmodi bello. Non interire (custodibus & gentibus Michaeli imputatis) in agro praedicto Germanorum quingenti viri, Italorum vero millia multa. Nolo redargui mendacii, & numerum designare certum. Tu Iacobe responde, cur non stetisti cum mille & ducentis equis, cum milite aurato tuo, quo manente impar tibi Germanus cum suo exercitu, partim etiam faucio, & labore confecto, extitisset? Sed quid? Et mors fugacem sequitur virum. Te morti deditum cum vulgo innumerabili in Caliano, terra firma, aquisque Athesis profundis certum est, incertus vero numerus, quod missum facio. Veronensibus qui Athesim raistro pretendunt, & ad quos corpora prouoluta sunt, dinumerare poterunt, facile committendum ducimus. Tridenti canitur, *te homines & equos perdidisse, & turpiter fugisse.* O crudele bellum, o res inter Christianos principes miserandas, quibus interdum pro ouo certantibus interim plectuntur Achiui seditione, dolis, scelere atque libidine & ira. O mundi scelera, o homines, tantorum causa malorum. O inclyte Roberte, qui (vt aiunt) post multam militiam actam, per tempora cupieras Germanam militiam in suo ordine etiam agnoscere. Agnouisti, & interiisti a tuo milite mercenario desertus,



fertus, qui dexteram fefellerat tuam, quia mercenarii sunt. O nobilis, & superinclyta natio Germanica, quæ hodie sublimium & potentum colla calcasti milite paucis. Fide tamen, non metu serui, sed beneficio iuncto, qui pro te mori non recusant, corpus suum morti obiectare, aduersus hostes, minime expauescent. O felix nimium dies ista; feliciores milites, qui sanguine suo nostram patriam ab hoste saluam peperere. Quamobrem sit tibi illa dies triumphi, æuo perpetuo, ut fausta annotanda, Hunc Germane diem numera meliore lapillo, qui tibi lapforumque apponit candidus annos. Quamquam Itale multa ambules pecunia, hoc tamen non mutat genus, penes quam alieno & peregrino milite certas. Num *vilis argentum est auro, virtutibus aurum?* Virtus tamen hoc æuo post nummos. *Hæc Janus summus ab imo perdocet, Hæc recitant iuuenes dictata senesque.* Miles Germanus, fido milite beneficio iuncto, pauca Gaza hostem adoritur, illum penes se locat, alit, vestit, virtute domat, non metu percellit. Securus dominus est, fugam ne adornet, transfugaque fiat. Quod Satyricus laude effert imperium, stabilius esse, quod virtute, non vi metuque sit. Hoc satis, & tantum de secundo bello, pone Calianum peracto, qua non maius existimandum est, comparatione facta cum Catilina, parauit arsuras in tecta Romanorum faces. Hora <sup>Bellum ser-</sup> diei peracti belli tarda, noctem versus, triumphat belli dux suo cum milite, <sup>tium.</sup> spolia legere iubet. Necessaria, planitiem Marci victi campi (ut assolet) tutari ab hoste mandat. Tridentum redit cruentus, faciscens artub. nocte ille dulci sopore quiescit. Orto lucis sidere, ex Tridento excidit cum milite, victam Tellurem, & campum Martium alias Certaminis circuit, exanimata corpora lustrat. Spolia & eximios ad currus 9200. equos sellatos in urbem vectare iubet, campum sanguine profusum cadauere purgat. Quo facto, cum milite victorioso Tridentum, custode campi relicto redit, Pompeianis dignus, victo Oriente, triumphis, exultans tanta à DEO præstita victoria, quæ non dum ope humana, sed diuina, nec arte magistra proueniebat. Crateres læti statuunt, & vina coronant, sed Comicus infit omnibus in rebus. *Nequid nimis.* Enim vero, *Nescia mens hominum, fati sortisque futura, Et seruare modum rebus sublata secundis.* Si quem prima dies belli dedit hæc eadem versa fortuna & aufert. Deinde ad corpus Ducis Roberti, quem abstulit lethi atra dies, & funere merfit acerbo, inquirendum in gurgitem mittitur, quod prope castrum Petræ in abyssis reperitur, extractum in urbem Tridentinam honorifice sepulturæ traditur, cuius anima in Christo requiescat. Hunc tu Jacobo fingis, *cælesti nube adumbratam* more Græcorum, qui afferunt ex cerebro Jouis Mineruam prægnatam fuisse. Illum boni ducis officium gessisse non ambigitur: miles suus si steterisset, nec mors sua ignominiosa dicenda esset. Magnificus Senatus Venetorum, de tam insperata clade in suos facta, statuit circa alia loca Germanum persequi, & primum apud Scalas militem locat, Græculos, Arafios, stratiotas, armigeros milites emittit ad prædandum. Item ad Primerii districtum, ad Cauarillas, Brixinensis diocesis fines, postremo ad Cadobrium villam, Ambetum (vulgariter *Haiden*) in valle Anfugii Yuam castrum, pupillorum quondam Jacobi Trap. oppugnatur obsidione forti. Venit falsus nuncius, hospes Hospitalioli d. vallis, & pupillorum subditus afferens falso castrum Petræ expugnatum, Bisenum non posse subsistere. Castellanus credulus se dedit, absque vi expulsiua sic, non bellica, sed prodicione, in Venetorum ditionem peruenit: id tamen cui iure debeatur, sub Papa iudice Mars est. Venetus fimbrias suas dilatare, & serpere pedetentim (uti solitus) molitur pro domino Delphani districtus. Burgum vno mane, Theodorico Capitano de Blumeggia tunc ap. Tridentum agente, adoritur, tota cum cohorte Burgum cingens, aggerem demoliri ac valla nixus valida manu. Incolæ insomnes duxerant per omnia noctes, scruti-



Bellum 4.

Bellum 5.

Bellum 6.

nio didicere horam, qua Venetus Burgam obruere statuit. Se patrios lares ab hoste defendere coniurant, auxilio peditum paucorum freti, excipiunt militem irruentem, & aggerem disiicere conantem necant. Profligant ad internecionem usque Graculum & Italum passim ab agro, & Burgo nullo muro circumdato propellant, cæde facta in Capitaneum & militem euocatum, ac quosdam notabiles equites, quos morti deditos pro viuis commutari Graculi & Latini desiderabant. Abnuuit Germanus, memorabile hoc retinendo se penes. Hoc est bellum tertium, quod per viam aggressionis Venetus inchoauit, profugus factus, amplius haud rediturus. Deinde in vallem primerii districtus argenti plenam, quam Venetus ardebat, gentes mittit Germanus. In valle Cannalis, rupes penes fluuium eminentes, ne Italus prior occupet, intercipit, bastigiam fruit, munit, gentes locat. Italus circumuallat, oppugnat, euincit. Quatuor istuc interimit Germanus, collectis viribus ex Primerio, adunata potentia inter se, & accommodato milite per Principem, paucorum numerum adoritur. Italum, eo in loco. Qui relicta bastia, terga vertit, quos in terga persequitur, occidit, trucidat C. minus 8. bellicos viros percutiendo ad mortem vsque. Profectus inde in vallem Egerden, fugato ex hinc omni populo, spoliat, incendit villas numero octo, nemine defendente. Id est bellum quartum, in quo Germanus præualuit contra & aduersus Italum, tropheo & triumpho potitus. Non post multo tempore Venetus ad Cauarillas Brixinensis diocesis, contra districtum Andracii comitatus Ecclesiæ Brixinensis, Allodium gentes locat, locum firmat aggere & vallo, bombardis, sagittariis, cuspigerulis duorum millium in multitudine fidens, suam illam villam venustam, & pro tempore Ecclesiæ hominibus infestam sperans, contra hostem Germanum obtinere. Hi dum ignem mitterent in recta Ecclesiæ Brixinensis, aggregato milite M. & CC. incolis terræ rusticis, paucis agente in rebus militaribus experto adiuncto, adoriuntur. Et strage facta XL. viro- rum viriliter se intra septa villæ defendentium, reliquæ gentes terga vertunt, adeo fugientes, quod oculum elapsum præ formidine hostis subleuasset nemo. Germanus spolia legit, partitur. Partitione facta, villam incendit, ultra progressus, in syluis & saltibus, scrobibus & antris terræ condita bona quærit. Inuenit, abducit, lachrymantia commouet corda. Hoc non contentus, valles ingreditur, non vnâ, ad miliaria Itala 15. ultra concremat, exurit omnia, quæ reperit, nemini parcendo. Hoc potitus triumpho, ad propria regreditur loca grassans. Istud est bellum 5. quo Venetus cæsus, spoliatus, fugatusque exstitit, Germano superante. Sextum & vltimum bellum, quod Germanus libens euitasset, propter vicinitatem, vtrinque multo æuo obseruatam in pace bona. Superfederat bacchari aduersus villam Ambetet, quam in continuo præfatione treugarum, calide laborabant, & eo medio Graculos miserunt in vallem Emenberg, milite existente iuxta Andracium, qui ignem fulminant, quosdam capita truncant, in delubrium & scandalum, testes occisorum in superis suis gestant ampullantes. Mox designatur Hainric. Horber militum Tribunus, & Capitaneus generalis. Is collectis gentibus & incolis Ecclesiæ Brixinensis, & comitatus Taufers equitesque paulominus 70. qui hoste sciante & vidente, miliaria ad quinque Italica, per alpem ligno præcisam, graminiferam, planam incedit, luce meridiana ita & tali ordine, quod hostis 5. millium equitum & peditum stipatus, Germanum facile dinumerare poterat, inquitque Capitaneus Venetorum, visa tam parua multitudine Germanici hostis, *O viri bellatores, omnium aduenientium ex hoc hostili & inermi corpora nostra sunt. Ecce 5. aduersus vnum. Consortamini, sinite neminem viuere. Insistite armis, hunc pontem transire bombardis roboratum & munitum hostem necesse est.* Ibi profligabitur Germanus non ignauus, loco approprians bombardis, caute euitat gurgitem vadabilem. Versus læuam vadit madescit, frigescit, ex aduerso



aduerso hostis non resistit, meatum præstat. Quo vadato, in vnum Germanum se stipat, glomerat auidus & gelidus, quem stratiotæ equites à tergo continuo infestant, & persequuntur robore magno. Transita ripa, necesse habuit per manus ascendere collem arduum, versus hostem lapsilem & congelatum. Qua villa in alto posita est, dum ascendere in manibus & pedibus serpendo, pedites molirentur, vallum & loci septa firma dissipare, ex aduerso emittunt tela ad instar grandinis. Germanus bellicus ante hac non insuetus talia ferre, resupine se tenet, sic hostica casso vulnere tela volant. Et priusquam arcus distenderent Itali, balistarum Germani capitaneum ex Bliuo occidunt. Tremittit exercitus, horripilans, totus nescius mouere præ timore arma. Germanus accessit locum impetu, & robore forti dissecat, vellit, lacerat, quos reperit, necat. Vulgus fugat, equites pariter euacuat. Totam inhabitantium villam deprædat, spolia legit, incendit, dolum dolo compensat. Ignem & tædas antea in tecta Ecclesiæ immisos, in miseram plebem pariter iactat. Armigeri & Græculi de prope tenentes lustrant, vt viderent finem. O Venetia, vbi tua opulenta gaza, male merita milite tuo lasso & profugo atque transfuga. Germanus tota nocte, per itinera aspera, altasque alpes exercitum trahens, fame & labore deficiens, sudans & algens, extra villam, ad pontem vltra se recipit, concrepante rogi immissi pyramide. Victu reuocat vires, quibus exempta fame, in bona quiete, bene resectis, cum spoliis, sine cæde à tot millibus concessit. Hoc est sextum & vltimum bellum cum Veneto initum, & per Germanum nusquam recusatum, semper exceptum; in quo Venetus fugatus, enectus est, & exarsus à milite, & trecentis viris, paulo minus. De quibus singulis quatuor bellis nullam tu Jacobæ mentionem facis, in quibus corpore & rebus, miserabili strage interiisti, nullo vnquam triumpho trophæoque petitus, fugam crebrius adornando. Non igitur Senatus pertæsum se faciat, atque succenseat, sapius in dictis locis bello succubuisse, & lethi poenas soluisse. Sustulit & Germanus, sed triumphus potior, discrimina mortis: sed hæc sine cæde fieri vix prælia possunt. Quotiens respub. Rom. profligata, & fere extincta in mari terraque extitit? Cuius nominis fama vsque ad Euphratem flumen, & Caucaſi montis iugum porrecta. Apud Cannas Apuliæ regnum, Treiaque in Tuscia vicus, & ad Caudinas furcas loca testantur, & reliqua. *Omnia fert ætas animum quoque.*

Ad extrema bellorum omnium præscriptorum tempora, ad execrandas huiusmodi lites, Rom. Episcopus, beatissimus dominus noster, Papa Innocentius, post multam instantiam, vt à bellis desisteret, principi factam, tandem comminatus est, breuia aduersus eum emittere. Sic Princeps consentaneus factus, sua sanctitas Episcopum Teruſinum Legatum designat. Imperialis maiestas, quæ post Archiducem Austriæ proximus hæres extat, videns in rem suam non agi, Legatum Venetias mittit pariter suum, quibus coram electi viri, conterranei Athesinæ prouinciæ comparent. Germani nec pacem precantur, vt tu Canicee in tua inuectiua depromis. Sed longa concertatione à partibus coram Legatis habita, causam belli vter vtri dedisset, alterque in alterum plus æquo fauisset, discussa, & mature hinc inde propensa, tandem arbitrati auersa corda per decentia permollire, auisata fuit, & est ad infra scripta deuentum media; per legatos ipsos. Qui scilicet super actionibus & partium querelis, capitulis factis, & à partibus acceptis, inflammata hinc inde pectora, ardoremque litis extinguunt, ita & odio corda venenata defecant, in pacis & tranquillitatis vincula, amicitiamque veterem reducant. Compensatione hinc inde stragis, cædis, spoliis, ignis & tædæ facta, saluis mercatorum bonis, per militem in tumultu ablatis, captiuis emissis, castris duobus, ad iudicium Marcæ suo dirimendis, ad manus beatissimi domini nostri Papæ sepositis, partes pace fruuntur, & potiuntur foecunda, quam DEus æuo perpetuo conseruare dignetur.



Quæ facile non dissoluetur, si Lege agraria non neglecta, de terminis non mouendis, regundorumque finium rectum iudicium obseruetur inter confinantes. Quo omisso, tantus est hodie hominum ardor & libido habendi, terræque habitabilis auida occupandi concertatio, vix pax huiusmodi est tempore duratura. Sæpenumero in culpa subditi sunt, qui corda dominorum inflammant, falsas causas suggerentes, & eos prouocantes. Sunt denique ipsi Domini terrarum pari in causa, qui dum delirant, interim plectuntur Achiui seditione & scelere. Proinde precatur Vates Comicus, *Magne Pater diuum seuos punire prestes. Aut alia ratione velis. Cum dira libido mouerit ingenium, feruenti tincta veneno, Virtute inuideant, intabescantque relicta.* Serenissime Princeps, aurum & gemmæ non sunt mihi, quod habeo à DEO, tibi do. Accipe à me obsequatore tuo, hanc aduersus Italum calumniantem statum tuum, quem hactenus illæsum conseruasti, Apologiam, meque amore & gratia prosequi non desinas. Dixi. Anno Salutis millesimo, quadringentesimo, octuagesimo octauo, vltima Septembris.





ORATIONES  
VARIAE  
IN HONOREM  
MAXIMILIANI.



ORATIONES  
VARIAE  
IN HONOREM  
MAXIMILIANI





LECTORI SALVTEM!

BURCARD GOTTHELF STRUVE.

**D**iuersas Orationes hic exhibemus, quæ in Maximiliani I. honorem fuerunt scriptæ. Prima PALLANTIS SPANGELII est, Theologi Heidelbergensis, \* de qua ipse Freherus alio loco sic loquitur: *Maximilianus Rex Heidelbergam transiit, Philippum inuisens. Exceptus ibi Oratione Pallantis Spangeli Theologi, nomine Vniuersitatis, quam recudendam curauit Tomo II. rerum Germanicarum.* Quantæ vero existimationis hic Spangelius fuerit, testatur ipsius Epitaphium in Templo Spiritus Sancti Heidelbergensi \*\* positum, in quo dicitur:

*Consilio pollens, largus rerum, ore disertus  
Doctor erat Pallas, hac tumulatus humo.*

Additur: *Anno Domini 1512. Die vero 11. Mensis Julii 9 Magister Pallas Spangel de noua Ciuitate. Sacre Theologie Professor. huius Ecclesie Canonicus & Custos. C. A. R. J. P.*

Altera est Oratio VDALRICI ZASII insignis istius Jureconsulti Friburgensis, quam eiusdem Academiae nomine post reditum ex Italia, durante bello Veneto, quod anno 1509. factum coniicio, in honorem Maximiliani habuit, dum Friburgum transiret. Hac ipsum a victoriis, Belgica potissimum, Veneta, & Bohemica laudat. Adiecta ista fuerat ipsius Tractatui feudali *Lugduni 1552. 8.* edito.

Tertia Oratio est JASONIS Mayni, insignis olim Jureconsulti, quam nomine Ludouici Mariæ, Mediolanensium Ducis, utpote ipsius legatus in nuptiis Maximiliani cum Blanca Maria, Galeacii Mariæ filia anno 1494. Oeniponti celebratis, habuit. De hac sic loquitur Gerhardus a Roo. \*\*\* itaque *Blanca Maria, cum amplissimo comitatu, Oenipontum deducta est, ubi postridie Idus Martias nuptiæ celebratæ sunt. Eas luculenta oratione condecorauit Jason Mainus Eques Romanus, Jureconsultus ætatis suæ doctissimus. Idem confirmat Naclerus \*\*\*\* dicens: eodem anno decimo sexto die mensis Martii, Blanca Maria virgo illustrissi-*  
*M m m 3 ma,*

\* Chron. Heidelberg. quod Leodii Annalibus Palatinis est subnexum ad An. M. CCCC. LXXXIX.

\*\* Reperitur inter Monumenta Haidelbergensia pag. 14.

\*\*\* Hist. Austr. lib. X. pag. 527. De eadem testatur Fugger Speculo Honorum lib. VI. c. I. n. I.

\*\*\*\* Vol. II. Gen. L. p. 1111.



ma, Galeatii quondam vice comitis & Mediolanensium principis filia, serenissimo inuictissimo Rom. regi Maximiliano iamdudum desponsata, in oppidum Inspruck ad tedas nuptiales traducitur, ritumque Christiano copulatur. Orationem habuit tum clarissimam Jason Mainus eques Romanus, jurisconsultus toto orbe celebratus. Hæc autem Oratio tota est in laudibus Maximiliani & Blancae Mariæ, qua etiam dotem definit Maximiliano concessam, quater centenarium millium aureorum nummorum. Quam beneuole autem hæc Oratio fuerit excepta testatur Raymundi, Cardinalis Garcensis epistola, eidem subiecta.

Quarta est PANDULPHI COLLENUTII insignis Pisaurensium Jureconsulti de quo sic loquitur Paulus Jovius: \* Pandulphus Collenutius Pisaurensis, ingenio peracri, & studiorum rerumque omnium erudita notitia perornato, nobilissimarum Italiae urbium præturas gessit; functusque grauissimis legationum muneribus illustri facundia, & gestu pernobili Latini Oratoris nomen impleuit: Caterum tanto ingenio temperantia deerat, ut nulla in arte summum laudis fastigium teneret: insatiabili etenim cupiditate semper vagus in omnes disciplinas ferebatur, cum esset ex professo Jureconsultus: ut facile reliquarum facultatum Principes, disputatione, scriptisque laceggeret: quod nihil, nisi valde excellens probare esset solitus, & quæque mediocria fastidiret. Indignatione siquidem superba & ostentatione præcipiti Plinium aduersus calumniatorem Leonicum disertissime defendit. Scripsit & libellum de Vipera: ac item facetissimum capitis & pilei dialogum: postremo etiam Neapolitanorum Regum res gestas Ethrusco quidem sermone in gratiam Herculis Atestini, qui Latinas minime didicerat. Multa autem lectu iucunda, eleganter inchoata absolueri nequiuit, quum apud Joannem Sfortiam Pisaurensium Tyrannum, quem depræhensis literis offenderat, supra veterum officiorum memoriam, dissimulata recentis odii libido valuisset: vir enim incaute Tyranno fidens, ea nece indignus, in carcere strangulatus interiit. Testatur etiam de eo Inscriptio ipsius Historiæ Neapolitanæ \*\* tali modo præfixa: Pandulphus Collenutius Pisaurensis: peracri ingenio, & studiorum rerumque omnium notitia perornatus: Græcis Latinisque literis (quod eius scripta testantur) pereruditus: qui nobilissimarum Italiae Urbium præturas gessit: ob grauissimarum Legationum munera, quibus illustri facundia, & gestu pernobili functus est, Latinus Orator nuncupatus, præter alias lucubrationes, variis de rebus perscriptas, historia Neapolitani Regni in primis clarus: a Johanne Sfortia Patriæ Tyranno, quem depræhensis literis offenderat, veterum oblito Officiorum, in carcere strangulatus interiit. Hæc ipsa autem Oratio, prout in fine videtur, Oeniponti coram Cæsare fuit habita, & quidem, prout ex ipsa Oratione patet, statim post mortem Friderici III. qui nuper cælo redditus dicitur. Hinc coniectari licet, anno 1494. hoc factum, dum ibidem hæreret Maximilianus. Missus autem fuerat ab Hercule Estense, Duce Ferrariensi, qui fidem Maximiliano promitteret, quod ex hisce verbis facile patet: hæc cum ita esse intelligat, religiosissime Cæsar, deuotissimus tibi Dux tuus Estensis Hercules, qui te iam pridem (sicuti scis) multos abhinc annos, prius etiam quam regni nomen & fastigium imperiale conscenderas, obseruauit, coluit: (quippe non noua sunt australis familiæ decora, non noua virtutis ac magnitudinis tuæ gloria) verum te principem, verum omnium moderatorem, verum Cæsarem, verum Imperatorem agnoscit, salutatur, veneratur, adoratur. Et non eam fidem modo obedientiamque præstiturum se recipit, quam tibi per Ducatus dignitatem ab imperiali benignitate profectam, per vrbes

\* Elogiis doctorum virorum num. XXXVI.

\*\* Ed. Dordracenæ 1618. 8.



bes ab Augusta maiestate susceptus debere per scriptam legem proficitur; verum etiam illam, quæ tibi ab omni Romano orbe, gentibus nationibusque omnibus, diuino puriter & humano iure debetur.

Quinto loco subsequitur HENRICI GLAREANI Panegyricus, ligato sermone scriptus in Maximilianum. Henricus hic Loritus, Glareanus a patria dictus, eo quod Glaronam, Helvetiæ pagum natale solum haberet. De hoc, eiusdemque\* Panegyrico sic loquitur Melchior Adami *Henricus Loritus Glareanus in pago Helvetiæ Glarona parentibus honestis natus est, anno Christi octuagesimo octauo, supra mille quadringentos. Primis literarum fundamentis in patria feliciter iactis, ad publica Germaniæ Gymnasia sese contulit: inprimis autem Colonia Agrippinæ complusculos hæsit annos, ibique in Gymnasio Montano accessiones ad eruditionem non vulgares fecit; testimonium philosophicorum profectuum publicum virtute & doctrina sua promeruit. Maximilianus item primus Imperator Caroli quinti auus, princeps æterna memoria dignus, fautorque literarum & literatorum summus, eundem Glareanum, honestorum virorum commendatione complexus, laurea poëtices insigni Colonia coronauit & annulo eximio donauit. Ea in coronatione, quæ facta est anno Christi duodecimo, supra mille quingentos, carmen Heroicum & panegyricum audiente amplissimo Principum Germaniæ consessu coram ipso Augusto, non sine gloria multorumque admiratione, ad Doricintinum modulatus est: quod deinde Joanni Cæsario, philosopho & medico, præceptorum quondam suo cum annotationibus breuib. dedicauit. Reperitur id in tomo primo scriptorum Germanicorum a D. Schardio editorum. Sequitur ipsum Martinus Hanckius,\*\* qui Glareanum etiam inter Romanarum Rerum Scriptores refert. Hic autem est ille ipse, quem exhibemus, Panegyricus, cui ex Schardii Tomo primo\*\*\* præfationem ad Jo. Cæsarium & breues adnotationes adiecit Mortem huius Glareani ad annum 1561. refert Thuanus, dicens: hic quidem summus olim D. Erasmi amicus, & Musices scientia clarus Friburgi Brisgoiæ; ubi profitebatur, cum rem literariam diu voce & scriptis, quantum ea tempora ferebant, inuisset, annum agens septuagesimum quintum animam Deo reddidit.*

Hunc Panegyricum excipit Sexta NICOLAI ROSENBERGERI, Jo. Alberti, Poloniarum Regis legati, *Oratio ad Maximilianum Imp. in Principum Conuentu Friburgensi Sabbatho ante Margarethæ diem 1498. habita, pro auxilio contra Turcas petendo, una cum ipsius fidei litteris. Ansam dabat, quod Turcæ, a Walachorum Waiwoda, Stephano, adiuti, Poloniam Russiamque inuadentes, omnia ferro igneque vastarent, multa hominum millia in captiuitatem ducerent, prout Rerum Polonicarum Scriptores\*\*\*\* latius exponunt. De Comitibus vero Freyburgensibus Julio & Augusto mense celebratis, egit Fuggerus.\*\*\*\*\* Integrum Comitiorum Recessum exhibuit Dattius,\*\*\*\*\* in quo etiam huius legationis Polonicæ fit mentio.*

Septimum locum occupat MAXIMILIANI I. *Privilegium super constitutione Collegii Poëtarum in Academia Vindobonensi, de quo etiam Wolfgangus Latzius testatur.\*\*\*\*\* Idem Diploma sub titulo: de honore*

\* *Vitis Philosophorum* p. 109. 110. ex libro III. *Prosopographia Pantaleonis.*

\*\* *Lib. I. cap. LV.*

\*\*\* *Pag. 335.*

\*\*\*\* *Mart. Cromerus Rer. Polon. Lib. XXX. pag. 820. Matth. de Michovia Chron. Polon. Lib. III. cap. LII.*

\*\*\*\*\* *Speculo Honorum lib. VI. cap. II. pag. 1106.*

\*\*\*\*\* *De pace publica lib. V. cap. X. p. 913.*

\*\*\*\*\* *Chron. Vienn. Lib. II. cap. VII.*



nore & Privilegiis Poëtarum reperitur apud Goldastum. \* Ex eodem vero constat, Conradum Celtem primum ex Germanis fuisse poëtam coronatum, de quo etiam testatur Lambecius. \*\*

Idem hoc Collegium concernit VINCENTII LONGINI a patria Freystadt in Silesia, dicti Eleutherii, *Panegyricus ad Maximilianum* dictus Calendis Februarii 1502. Huius laudes tali modo prædicantur in Nicolai Henelii Silesiographia renouata. \*\* *Eleutherius inter Silesios Musarum laude celebres nomen quoque suum in æde Camænarum posuit, artium quippe & Philosophiæ Doctor, Poëtaque lauru coronatus Parnasside ab ipsomet Max. I. Aug. qui in Germania suo seculo ingenia mirifice excitauit, ac munifice iuuuit, audire semper doctos, aut percunctari, imo ipse legere, scribere, & commentari solitus. Testis eius rei Archiducalis Academia Viennensis, in qua quidem cum nouum Poëtarum, ac Mathematicorum Collegium gloriosissimè memor. Princeps erexisset, hoc inter alia privilegio, ut primus Collegii Rector Conr. Celsus, eiusque in illo munere Successores, Palatini, ut vocant, Comitibus potestate exornarent, si quos præuio examine dignos studiorum præmiis putauerint: Longinus noster tunc Panegyricum illi scripsit, (dixitque) quem legere licet Tom. 2. script. Germ. a Nobiliss. Viro Marq. Frehero Collectorem. Edidit & carmina alia complura, in quibus ut eruditio ipsius, & facilis atque elegans vena satis clare elucent; nisi quod verba alicubi requiras commodiora, sed quod non tam vitio ipsi vertendum quam æuo haud dum satis exculto. Floruit circa initium seculi XV. atque adeo sub crepusculum quasi litterarum per Germaniam passim ex tenebrarum abyssu emergentium, quibus aduersus crassam barbariem, eiusque satellites & σοφιστας Sophistas asserendis egregiam & ipse operam suo loco pro virili nauauit: ob id Xenophonti illi Germano Bilib. Pirckhaimero laudatus, cuius ad hunc nostrum elegantissima exstat epistola: initium illius est. Miraris forsitan cur ad Te, Finini, Me penitus iam tuum effectum.*

\* *Constit. Imper. Tomo III. p. 482.*

\*\* *Comment. de Bibl. Cesar. Vindol. Tom. I. p. 32. Vid. Gundling. Obs. select. Tom. I. Obs. I.*

\*\*\* *Cap. VII. p. 133.*





## I.

ORATIO EXTEMPORALIS HABITA AD MAXIMILIANUM ROMANORUM REGEM INVICTISS. à PALLANTE SPANGEL, THEOLOGO HEIDELBERGENSI, NOMINE EIUSDEM UNIVERSITATIS. ANNO M. CCCC. LXXXIX.

**M**AXIMIS hodie, Rex invictissime, gaudiis tua Majestas Heidelbergense studium affecit, dum dignatus es nos inuisere, & nostri defensoris illustris Philippi Ducis lares ingredi, qui te colit, te veneratur, admiratur, ac sincero prosequitur affectu. Gratulamur protectori nostro Principi Palatino, quem tuus aduentus (vtinam faustus ac pacifer) maximopere laetificauit, cui fortuna nunquam parem hospitem dignitate, genere, virtute, opibus ac ingenuis moribus in has aedes induxit. Iuuat intueri Regiam tuam serenitatem, quam fama præclara admirandis præconiis effert ad astra, diceris enim magnanimus, laborum patiens, contemptor tempestatum, sub dio & papilionibus; prædicaris intrepidus ad ardua, terribilia, immo lethifera, vbi tenui filo vix mors à vita distinguitur. Te autem bellicosum, victoriosum, quem non terreant malorum factiones, nec deiecit perfidia. Quas ob res dulce nobis visum est in te lumina conuertere, de te, maxime rex, spes est, si quando fatis præstantibus Monarchiam Romanam dirigere concessum tibi fuerit, tua potentia Christianos ad pacis vinculum cogere, rebelles & inquietos domare, frangere, contundere, exterminare bella ciuilia, intestina, domestica, vt fideles conciliatos exerceas, hostes Christi elidas, Turcorum immanitatem compescas, Mahometistas voluptati deditos conteras, Tartarorum, ac Barbaricarum nationum crudelitatem frangas, ac tandem in Ouile Christi ouiculas errantes perducas. Has ad res, potentissime Rex (cum tuæ Maiestatis venia loquar) vna sola via & breui gradiens, secundante fortuna peruenies, quæ est mandatorum diuinorum obseruantia. Siquidem præcepta Dei seruaueris, pollicetur tibi Moyses Prophetarum facile primus, quod te faciet Dominus Deus tuus excelsiorem cunctis gentibus, venientque super te vniuersæ benedictiones istæ & apprehendent te. Benedictus tu in ciuitate, benedictus tu in agro, benedictus fructus ventris tui, & fructus terræ tuæ, benedicta horrea tua, benedictæ reliquæ tuæ, benedictus eris ingrediens, & egrediens, Dabit Dominus inimicos tuos qui consurgent aduersum te, corruentes in conspectu tuo, per vnā viam venient contra te, & per septem fugient à facie tua, constituet te dominus Deus tuus in caput & non in caudam, & eris semper supra & non subter, si tamen audieris vocem Domini Dei tui. Brevis est ista Moysis conclusio; quam si seruaueris, seruabit te. Hæc missa facio. Mu-



nera pauca Maieſtati tuæ (Rex inuictiſſime) rector & Vniuerſitas Heydelbergenſis offert, quæ cum ex affectione dulciſſima prodeant, pro tua benignitate (quæ ſumma eſt) non ingrate ſuſcipito. Et per immortalem Deum tuam Serenitatem obteſtor, vt ducem noſtrum ac ipſius ſoboles, quæ olim tuæ curiæ præſtabunt ornamentum, ac vniuerſitatem ipſam fauoribus ac regali gratia proſequaris. Dixi.

## II.

AD INVICTISSIMUM PRINCIPEM  
DIVUMQUE MAXIMILIANUM CÆSAREM

OPT. MAX. ORATIO, HABITA UNIVERSITATIS FRIBURGENSIS NOMINE, ZASIO DICENTE.

Quamquam Illuſtriſſime, inuictiſſime & Generoſiſſime Princeps, Imperator Auguſte, nos qui ad tuam ſereniſſimam Maieſtatem excipendam, à tuæ Maieſtatis gymnaſio Friburgenſi miſſi ſumus, planè fateamur noſtrarum non eſſe nec virium, nec ingenii, id muneris apud tanti numinis fulgorem verbis quamlibet politis conſequi: Quæ enim humana mens ex æquo veneretur Principem immortalibus præconiorum titulis decorandum? Principem cuius imperium Oceano, cuius fama aſtris terminatur? Verum enim verò quod noſtræ ſuper eſt exiguitati, tuam auguſtam maieſtatem, quanta maxima veneratione, quanta obediſſima ſubiectione poſſumus, excipimus, & in genua, ut addecet, humillimè adpronati conſalutamus: felicem fortunatumque hunc diem arbitrati, quo poſt tot annorum curricula, poſt tot bellicos ſudores, tuam Maieſtatem ſanam iterum & incolumem videre licuit. Utinam vel Ciceronis nobis vel Demotheſis ſuppeteret facundia, quo illos ardentiffimos in te, deſideratiſſime Princeps, noſtrorum animorum affectus, paratiſſima propenſiſſimæque vota, ſtudia, obligamina, ex debito explicaremus. Quippe qui à tua Maieſtate eiusque illuſtriſſimis progenitoribus, origine, priuilegiis, prouentibus fundati, decorati, prouiſi, ſola ea tam honeſta tantorumque Principum digna liberalitate alimur & propagamur. Quod ſi nulla huiusmodi munificentia impelleremur, tuorum tamen eminentiſſimorum natalium, rerumque præclariffimè geſtarum admirabilem ſplendorem, quo totus propè orbis in prædicationem tui rapitur, memoria repetentes, in maximarum laudum coagmenta iure optimo prouocaremur. De clariſſimis tuis natalibus, quos tamen nonnulli ab Hercule, alii à Priamis deduxerunt, idè in præſentia non dicimus, quod ea res & non ſit noſtri inſtituti, & ab idoneis authoribus ampliſſimè pertractetur. Cæterum, quod in te maius & eminentius fuerit, propria tu virtute, rerumque geſtarum gloria, MAXIMILIANE, ita celebraris, ut in multa præconiorum quæ nobis offertur ſylua, ſicut ſe principium ultro exhibet, ita finem inuenire difficiſſimum ſit. Quum enim & paci & bello ſua ſint tempora, & præclaros principes pace liberalitas deceat & clementia, bello laborum tolerantia & fortitudo, utrobique tua Maieſtas, MAXIMILIANE, ita excellit, ut in ambiguo ſit, alterutrum ſit præſtantius. Clementiam ingens tua proteſtatur benignitas, qui benefacere omnibus, parcere delinquentibus conſueuiſti. Natiua hæc domus Auſtriæ virtus eſt, ut eius Principes humanitate potius mites & placidi, quàm ſeueritudinis rigore auſteri videantur: quod cum in aliis tuis maioribus conſpicuum fuit, tum in te ita egregiè pollet, ut quicumque familiarius tuæ Maieſtati conſueuere, etiam ſi minoris notæ homines fuerint, patrem te quàm dominum potius experiantur. At verò liberalitas vel exuberans in te ſpectatur: nam & nemo unquam honeſtus tuæ Maieſtatis curiam ſecutus, non opulentiffimis eſt muneribus ditatus. Quot enim militares, quot nobiles tua liberalitate conſouentur? Quot denique ſi cæteros taceam, literati viri tua ſunt bene-



beneficentia sustentati & prouidentur? Testis nostra Uniuersitas, testis Vienna, quæ ambo gymnasia in tua unius munificentia conquiescunt. Testes innumeri & Oratores & Poetæ, qui tua sunt liberalissima erogatione decorati. Et in summa, tua hæc insignis liberalitas, ex hostibus amicos, ex alienis tuos, ex infidis fidos facit, omnesque passim & peregrinos & domesticos ad te amandum allicit & inuiat. Mittimus, quod in te literarum expeditissima eruditio, & quod in aliis Principibus desideratur, variarum doctrinarum profundissima inuestigatio reluceat in pace illa. Bello verò tanta insignis claritudine, ut quicquid vel maximum de te prædicauerimus, minus illud à laude tua esse censeatur. Non enarramus hîc quo inuictò labore primos tuæ iuuentæ annos militari puluere exercueris: frigora, æstus, cæteraque incommoda, quanta animi perseuerantia pertuleris: non somnum, non quietem, non cibum non, potum tibi induleris, dum optimi ducis numeros vel omnes expleres. Non enarramus quanto animo tot periculosa, tot horrida bella inter primos non solum adieris, sed & vexilla anteieris, potentissimos inferioris Germaniæ populos iam tum rebelles subdideris & subiugaue-  
*A victoria in Bohemos.*  
 ris: non inquam plurima id genus spectatissima facinora referimus, quando multa præterire necessitas cogit. Hoc dicimus, in oculis omnium versari, quot nouissimè tua serenissima Maiestas memorabiles desudauerit victorias. Inuictam tuam vim nonnulli inter primos Germaniæ Principes, quos non nominamus, superioribus annis sensere, quorum potentia cum iam usque ad formidinem latè pateret, tua sunt manu in ordinem redacti. Sensere & ferocissimi Bohemi, quorum vel sola nomina quum prisca ætate tanto essent terrori, ut copiosissimi exercitus ab ipsis nec dum conspectis in fugam verterentur: tu tamen simulatque eos aduentantes accepisti, tuo exercitu non expectato, parua accepta militum manu, in quibus & nonnulli Principes, Comitesque & nobiles interfuisse traduntur: ipsos inopinatos & nihil tale verentes, animo maximo aggressus es, & cohortatis ad pugnam, ad res fortiter agendas militibus, in prima acie versatus, fortissima tua manu, tuo illo victoriosissimo ense ita in hostes ferebaris, ut quamuis resistere primo animosissimè viderentur, tuo tamen intolerabili impetu pars cæsi, pars in fugam versi, adeò sunt profligati, ut in verba tua truculentissimi isti hostes universi, quotquot à bello supererant, iurare cogerentur. Et nisi tuo pientissimo clementissimoque animo aliud sedisset, sub iugum velut coronata & iam venalia mancipia mitti potuissent. Ut meritò id, quod C. Julium cum Pharnacem fugasset, dixisse legimus, tua de se Maiestas usurpasset, Veni, Vidi, Vici. De Venetis denique hostibus quid dixerimus? qui dum se dominos terra marique iamdiu iactarent, & quos post Fridericum primum nullus vel Imperatorum vel Principum ne attentauit quidem, tua eos Maiestas breui tempore ita contudit & fregit, ut si modò perseueraretur, non magno negotio in ordinem redigi speremus. Hæc tanta, tam præstantia, aliaque plurima clarissima tua facinora,  
*Epilogus.*  
 tuæ denique divinæ virtutes, quæ in te velut concentu quodam relucet, & quas mirum est humanam naturam capere potuisse, toti te orbi iam planè admirabilem effecerunt, atque ita effecerunt, ut Christiani passim orbis reges & principes in foedus, amicitiamque tuam coniungi desiderent, & iungantur: neque id iniuria, siquidem cum vix alii unquam principi tot excellentes tum animi, tum naturæ dotes contigisse credantur, tantò in te celebratiora, tantò magis conspicua sunt, quo rariora illa in caeteris apparuere. Et ut uno verbo dicamus, Romani orbis Imperium tibi satis debere non potest, quod eum habeat Principem, quem prisca vel maximis imperatoribus rerum magnitudine, vel anteferre, nedum comparare possit. Sed quorsum hæc? Neque enim vel muneris nostri, vel præsentis est conditionis, in tuis laudibus, quod maximè desideraremus, latius immorari: nec etiam immensissima isthæc nostra sufferret exiguitas: unde finem facimus: & quod ad nostram rem attinet, tuæ serenissimæ Maiestati nos eiusque subiectissimam Academiam, totius Uniuersitatis nomine obedientissimè commendamus, atque sub tua velut diuini numinis umbracula confugimus, & sub-

*Obedientiam  
desert nomine  
omnium.*



mittimur : obnixissimè & humillimè petentes, tua Maiestas, Dive Cæsar, solita nos gratiæ benignitate defendat, ab hostilibus incurſibus, quibus tamdiu nihil tale meriti affligimur & atterimur, subleuet, liberet, & tueatur, ut qui in tua unius gratiosissima protectione quiescamus & foueamur. Tandem inuictissime Maximiliane Princeps omnium desideratissime Deum Opt. Max. rogamus, ut tuus augustissimus splendor pro reipublicæ Christianæ incremento in ultimam usque senectam felix uiuat, in dies magis ac magis fortuentur ac floreat.

DIXI.

## III.

IASONIS MAYNI IURECONSULTI,  
EQUITIS ROMANI, CÆSAREI ET DUCALIS  
SENATORIS, AC DUCALEM LEGATUM IN GERMANIA  
GERENTIS, AD SERENISSIMUM MAXIMILIANUM  
INVICTISSIMUM ROMANORUM REGEM, IN AUSPICATISSIMIS  
EIUS ET AUGUSTÆ BLANCHÆ MARIÆ NUPTIIS, EPITHALAMION.

CREDIMUS, serenissime Rex, & inuictissime Cæsar, felici aliquo sydere processisse, ut nos qui anno superiore pro inclytissimis Mediolanensium principibus gratulatoriam Romæ orationem habuimus ad Alexandrum sextum Romanum pontificem : nunc etiam eorundem legati ad te Romanorum regem maximum haud imparem simus orationem habituri. Vos estis duo mundi luminaria magna : Pastoralis auctoritas, & Cæsarea potestas, prima & summa Christiani orbis capita, & præcipua uniuersæ terræ fundamenta. Æquum fuit & consentaneum nos qui diuorum Principum nostrorum iussu eum qui spiritualibus præest, salutauimus, anno nunc reuoluto te, qui temporibus præesses, salutare. Detulimus principum nostrorum mandato (sicuti catholicos decebat) Pontificiæ beatitudini & Apostolico throno perpetuæ obedientiæ & sinceræ deuotionis cultum. Eorum nomine Cæsareæ nunc Maiestati inuiolabilis fidei & immortalis obseruantia pignus deferimus. Nos etiam (sicut par est) speramus ut quemadmodum à beatissimo sacrorum omnium antistite, & reuerendissimis Ecclesiæ militantis Cardinalibus, voces nostræ clementer admissæ fuerunt : ita nunc à serenissimo Romanorum Cæsare, & illustrissimis Germaniæ principibus verba nostra benignis auribus excipiantur. Nec tam inculti sermonis nostri exiguitas est attendenda, quam mittentium pronus ad omnia animus, præcipua fides, & singularis obseruantia consideranda. Gratiore quoque quæcunque à nobis in præsens proferentur, fore confidimus, quod inter Cæsareum culmen & excelsos Mediolanensium principes necessitudinis & affinitatis vincula sunt contracta. Per has sanctas maritales tædas, & hunc felicem hymenæum, ut cuilibet vel tenui eorum nuncio non parua gratiæ locum sperare liceat.

QUICUNQUE Rex eminentissime, egregia & summa augustissimarum laudum tuarum præconia, vel orando vel scribendo celebrare voluerint, vel potius celebrata & toties decantata contemplari, aut rectius contemplando admirari, & secum obstupescere, facile intelligent, nihil tibi vlla ex parte deesse, quod vel à natura, vel virtute, vel à fortuna sit expetendum : quin ea omnia sis cumulatissime consecutus, quæ ad assequendam omnem præsentis sæculi felicitatem spectant. Nec tuas maximas & immortales laudes ab vno aliquo rivulo scaturire inuenient, sed ex variis & vberimis fontibus abunde manare.

Natus



Natus es gente Austria : domo inclyta & celebratissima : quæ tot Regum <sup>Illud attestatur</sup> & Imperatorum mater, sæpe etiam Pannoniæ, sæpe Boemiæ, quandoque Poloniæ <sup>specu. in tit. de</sup> reges dedit. Ex Gente Austria vndeque occurrunt Rodulphi, Herneſti, Leo- <sup>rescripti præ-</sup> poldi, Henrici, Othones, Alberti, Sigismundi, Friderici, foelices & candidissi- <sup>sentia. §. f.</sup> mæ animæ huius excelsæ familiæ : quarum virtutem, illustria gesta, celebres <sup>ver. Et sunt hæc</sup> que victorias admirari magis quam recensere æquum est, & veneratione potius <sup>in argumen. lo.</sup> quam commendatione complecti. Rodolphus Austrius Romanorum imperator <sup>de Imol. in ru-</sup> Bononiam amplissimam Italiæ ciuitatem & totam Flaminiam Ecclesiæ Romanæ <sup>brica ff. de</sup> dono dedit : & Ottocharum robustissimum Boemiæ regem, qui Austriam & Sti- <sup>ver. ob in 7.</sup> riam Romano imperio ademerat, tandem vario & ancipiti bello victum intere- <sup>col.</sup> mit. Albertus Austrius tertius Pannoniæ, & sextus Romanorum rex, tibi pa- truus magnus : quum in humanis ageret, Martis filius & belli fulmen fereba- tur. Præter cætera præclara facinora Hussitas ferocissimos Boemiæ populos Ec- clesiæ Catholicæ non minus impias & hæreticas sectas, quam sæua & horrenda bella mouentes, non modo superauit, sed quasi malleus quidam omnino con- triuit. Fridericus Austrius tertius huius nominis Imperator, genitor tuus pien- tissimus, in omni probitatis & gloriæ genere etiam priscis quibuscunque confe- rendus, Heleonoram Heduardi Lusitaniæ regis filiam & Alphonsi Hispaniarum præclarissimi regis neptem, coniugem duxit nobilissimam, Augustamque sere- nissimam : vnde sibi omnes Lusitaniæ & Hispaniæ potentissimos reges affinitate deuinxit. Ex ea te Maximilianum filium suscepit : quem semper ( vt par est ) charissimum habuit : non tam ex eo quod vnicum haberet, quam quod vnicæ spei, ac vnicæ & miræ fores expectationis : & vnicus vt paternarum laudum, ita paterni imperii futurus indubitatus successor.

Tibi nomen Maximiliano parens indidit, non sine quodam divino instin- ctu, vt Plato attestatur : quod duo significat Maximum & Æmilianum. <sup>Maximus</sup> Am- <sup>Æmilianus.</sup> bo Romani militarium copiarum præstantissimi duces ac triumphales viri. Ma- ximus enim Fabius Romanum imperium pene desolatum aduersus Hannibalem Poenum cunctando restituit : Æmilianus vero Scipio Hannibale tandem deuicto Carthaginensium triumphum egit. Vtriusque tibi nomen copulatum est : vt quamuis alterum æquasse fuisset gloriosum, tamen utrumque nomine referre, & utriusque præstantiam superare esset tibi multo gloriosius. Illi Romanum imperium aduersus gentes barbaras defenderunt, & de hostibus profligatis cele-brem triumphum egerunt. Tu quoque Romanorum rex supremus, non solum Romanum imperium cui merito præses, sed & vniuersum populum Christianum aduersus Turchanicam barbariem, quæ diutius grassata est, proteges : & pro- stratis deletisque funditus nequissimis orthodoxæ fidei hostibus, & Christiana di- gnitate ac fide catholica in pristinum decus restituta, non solum terrestre tro- pheum reportabis, sed etiam coelestem triumphum cum immortalis gloria & sempiterna salute consequeris. Hæc sunt generosa semina & illustres radices, quibus tam foeliciter in lucem editus es, natione Germanica omnium vt am- plissima, sic & nobilissima : quæ non immerito Alamannia quasi ala magna nun- cupatur : gente Austria non modo vetere & heroica, verumetiam regia & impe- riali : patre imperatore gloriosissimo : matre ex regia prole & augustissima.

Tanta est tuæ sublimissimæ originis amplitudo, vt iam nihil tibi amplius posse honoris addere imperium videatur : quod etiam nascendo meruisti, quum ex imperio ita prodieris, vt ad illud assumptus, non tam institui quam in eo per- sistere credaris. Quos de te successus tam fortunatissimi partus stirpis adeo egregie præstolari iure optimo mortales poterant, longe semper excellentiores præstitisti. Parum enim fuisset præclaris nasci parentibus, nisi illorum splendor augeretur. Et quanto est maiorum vita præclarior, tanto posteriorum socor- dia flagitiosior. Quum Alexandro Macedoni sodales sæpius dicerent, tot & tanta tibi relinquet pater. *Quid prodest ( inquit ) si multa relinquuntur nobis, quum ipsi agamus nihil ?* Philippum Macedonum regem Alexandri patrem Theo-



phraſtus & Plutarchus tradunt non ſolum genere & dignitate regia, ſed etiam virtute & moribus maiorem cæteris regibus moderatioremque extitiſſe. Fuit tibi ſemper præcipuæ curiæ : vt non minus imperio, quam patre Imperatore dignus redderis. Vera iſta, ſed rara foelicitas eſt, foelicitate, ad quam quis genitus ſit, ſe quoque meritis & propriis virtutibus dignum efficere. Tecum ſedulo cogitabas qualem te euadere oporteret, ut maximæ parentum gloriæ reſponderes : & ſemper clarior euafiſti quam opinione conciperes. Coeperunt præluce in te adhuc iuvene virtutes ſingulæ imperatoriæ, clementia, liberalitas, continentia, modeſtia, iuſtitia, prudentia, fortitudo, magnanimitas : & tales quidem quales vix vnquam etiam longo ſenio conſecti nanciſcuntur. Viſus es honorem regium virtute prius quam ætate præueniſſe. Viſus es æuo immaturus, prius meritis ad imperium, quam annis maturuiſſe. Vix dum puer foelicia omnia quæ tibi obueniebant, ad Dei benignitatem referens : coepiſti pro Chriſtiana republica eſſe ſollicitus. Concepſti tacitus animo à teneris vſque vnguiculis futuram expeditionem aduerſus ſæuiſſimam & truculentiſſimam Turcarum inſolentiam : non minus teipſo quam Chriſtiano principe dignam : & eo quidem principe, qui cæteris Chriſtianis principibus præeſſe procul dubio ſperaretur. Inter creſcentem ætatis tuæ adoleſcentiam, quaſi inter virtutis & fortitudinis tuæ rudimenta Francos, Eburones, Sicambros, Batauos, Morinos, non minus ſapienter, quam fortiter proſligiſti. Reportaſti ſub viridi iuuenta varias celebresque victorias : quas longo etiam æuo obtinuiſſe fuiſſet glorioſum. Taceo quæ nimium omnibus nota ac trita ſunt : quanta ſit tibi rei militaris diſciplina, quanta diſponendis militum copiis ratio, quanta caſtrenſium laborum patientia, quanta vigilantia, quanta ſolertia, quanta ductandi exercitus peritia, quanto animi ardore, quanto corporis robore res bellicas tractes. Præterea actas ſub pellibus hyemes, æſtates inter bella ſudatas : quotiens excubias egeris, ſpeculatum ſis egreſſus, caſtrametatus : & omnium caſtrenſium munerum numeros obieris : ac vniuerſa optimi militarium ordinum imperatoris officia compleueris. Neque vero te caſtrenſia negotia aut bellicæ artes à literarum commerciis abduxerunt : quibus impenſe incubuiſti, quum intelligeres literas eſſe virtutum omnium magiſtras, & compertum haberes Cæſaream maiestatem non miſus literis quam armis præſtare oportere. Neminem decet plura ſcire quam principem : qui ſicuti plurimis præeſt, ita plurimos debet prudentia antecellere. Demetrius Phalereus Ptolemeum regem monebat, ut legendis libris ſedulo vacaret. Quæ enim amici non audent reges non monere, librorum lectione erudiuntur. Fortunatas eſſe reſpublicas Socrates & Plato attellantur, quarum principes ſapientiæ ſtudiis vacant. Prudentia cæterarum virtutum dux eſt : qua aurigante imperii habenæ conſultiſſime moderantur. Hac duce nihil temere, nihil inſipienter agitur. Carolus quartus eius nominis Romanorum Imperator, dum conſtitutiones de regum & Imperatorum creatione ederet, illud præcipuum ſtatuit : *vt qui ad Cæſaream dignitatem aſpirat, etiam variarum linguarum peritiā teneat, præſertim Latinæ, Italicæ, Gallicæ, Liburnicæ, & Germanicæ.* Tu has omnes adeo calles, vt quæcunque loquaris tibi ſic domeſtica reddatur, quam ſi eam inter teneros nutricum amplexus imbiberis. Mitridates rex Ponti vel ex eo apud veteres non parum commendatur, quod variarum linguarum quibus præerat, meminifſet : & ſingulis ſine interprete reſponderet. Accedit totius corporis dignitas & elegantia, quæ plurimum de cœlo traxiſſe creditur : & virtutibus gratiam vel ( vt Pacatus inquit ) ſuffragium addit. Valida membrorum internodia, lacertorum robur, lati pectoris firmitas, maiestas vultus, regium ſupercilium, quidam imperatorius oculorum vigor : vt appareat naturam heroicam totius corporis decorem indulſiſſe, qui te imperio dignum oſtendat. Hic generis tui imperatorius ſplendor, hæc tam præclara adoleſcentiæ tuæ facinora, peculiare animi & corporis dotes, raræ admodum ac propterea admirabiles, Carolum Burgundiorum ducem ac Belgarum regem



regem fortissimum facile adduxerunt, vt ei assentiretur quod post obitum per diuam eius consortem & primates effectui est demandatum, vt Mariam filiam vnicam multarum gentium & nationum futuram hæredem tibi vix pubescenti matrimonio copularet: ex qua priusquam immaturo letho occumberet, Philippum & Margaritam coelestes liberos suscepisti. Hæc ingentia merita mouerunt Germanos principes sacri Imperii electores, vt vnanimi consensu omniumque suffragiis te in Romanorum regem mox futurum Imperatorem legerent & salutarent, inter admirabiles populorum acclamationes, congratulationesque publicas. Magna tua laus est, sed maius meritum tam sincerum & integrum tot præstantissimorum electorum iudicium reportasse. Nec multo inferior eorum laus est, quin optimi censerī debeant, quum de optimo principe prospexerint: sed præstat benemeriti quam in benemeritum conferre dignitatem. Alterum enim solidæ virtutis est: alterum iudicii quamuis cum prudentia coniuncti. Interea cœpisti animum denuo ad rem Martialem flectere, quum p.225 meminisses quod matrimonium est venerabile fidei & honestatis templum, suauissimum vitæ condimentum, consensio quædam cælestis, consortiumque diuinum: humanos affectus & sensuales appetitus intra legitimam connubii copulam maritali lege coercens: & intra diuinos sanctissimi coniugii limites cohibens: ne soluti & infrenes ferarum ritu in varias cupiditatum illecebras euegentur, & in quacunque voluptatum præcipitia debachentur. Deus rerum omnium conditor & fabricator hominem veluti simulacrum suum formauit: & (quod erat maximum diuini opificii) ei soli sapientiæ gratiam inspirauit. Solus homo rationis capax, mente & prudentia præditus, linguæ & sermonis copia dotatus: solus etiam non vt cætera animantia in humum prostratus, sed erecto corpore & sublimi facie formatus est: & quasi terrenis neglectis ad supernarum rerum speculationem est effictus. Quum autem homini Deus rationis & intellectus lumen infudisset, quo longe cæteris animantibus præstat: & sentiendi atque eloquendi virtutem concessisset, qua carent cætera animantia quæ muta sunt & ratione carentia: statuens humani generis conseruationi & propagationi consulere, etiam salutarem modum adinuenit, quo à feris distaret. Non enim per promiscuos & indiscretos concubitus ferino ritu humanæ generationi studendum esse voluit: sed per sanctum genialis thori matrimonium. Deus ergo marem & foeminam in matrimonium, hoc est, in corpus unum indissolubili vinculo coniunxit: vt essent humanæ diuinæque vitæ perpetuo socii. Divina prouidentia per hoc sacrum legitimi coniugii foedus & coeleste matrimonii Sacramentum vniuerso humano generi prospexit, ne cuius dignitatem ineuitabilis conditio instantis mortalitatis extingueret. Qui igitur extra religionum claustra & extra cælibatum in sæculo viuere proponunt, superna lege, duce ratione, & sicuti hominem decet, castissimum sanctissimi coniugii Sacramentum obseruent. Qui secus faciunt, à recto rationis calle, & bono hominis sensu alieni, vitam pecudum sub humana specie viuere creduntur. Non ab re Dido Virgiliana Troiano Æneæ exprobrabat: *Non licuit thalami expertem sine crimine vitam degere more fera.* Cœpisti ergo, sacer Rex, vt reliqua omnia consultissime de matrimonio cogitare: sicuti Christianum regem diuinæ legis memorem decebat. Sic enim tuo generi, tuæ familiæ ac posteritati, regno & imperio consultum esse voluisti: & per dulcissima pignora tam generis claritatem quam nominis memoriam in posteros longius propagare. Offerebantur tibi non solum à Germanis principibus, sed ex vniuerso pene terrarum orbe à Regibus quibuscunque maritales tædæ. Nemo enim est tam alto folio constitutus, qui non existimet se ex tua affinitate altius multo subleuari. Sed tu animum adiecasti ad Blancam Mariam Vicecomitem Augustam: in qua virginalis pudor cum matronali grauitate coniunctus, omnium voluntates quam facillime promeretur. Incertum tamen videri posset, an diuino consilio, an tua prudentia processerit: nisi quod ad Deum optimum maximum bona omnia sunt referenda. Agitur nunc annus octauus



& vigesimus supra centesimum, quo Leopoldus dux septimus Austriae, proauus tuus illustrem dominam Viridem primogenitam inclyti Bernabouis Vicecomitis Mediolani domini uxorem duxit, ex qua quinque liberos superstites reliquit. Inter reliquos suscepit Diuum Herneſtum ducem Austriam patrem serenissimi imperatoris Friderici genitoris tui. Hinc liquet inter Austrios & vicecomites renouatam nunc esse & non institutam affinitatem: & necessitudinis vincula instaurata potius quam contracta. Quum de hoc fausto foelicique matrimonio verba ad te Maximiliane referenda sunt, oportet tuam admirari prudentiam: quum vero ad Blancam Augustam, foelicitatem. Neque enim illa excelsiorem virum in toto orbe aut praestantiorum nedum sperare, sed nec desiderare poterat: neque tu meliorem aut moratiorem virginem reperire. Blanca re & nomine non solum membris, sed & moribus & vita, naturae & corporis muneribus, fortuna & animi bonis praedita est: his praesertim quae in virgine praecipua habenda sunt: pudicitia, probitate, venustate, & ingenii acumine: Quamuis illustris sanguine paterno & materno genita, & Christianissimi Francorum regis consobrina, tamen in tela, in acu, in phrygiis operibus, & in omni mundo muliebri instructa: & tanquam à Pallade edocta, priscam Lydarum & Cariatum mulierum gloriam excellit. Gratia oris eximia: forma totius corporis procera & eleganti: & his lineamentis à quibus Zeuss pictor cantatissimus facile omnem pingendi venustatem, ut à virginibus Crotoniatibus, posset excerpere. Propter has eximias doctes à variis principibus & regibus in matrimonium vadequaue deposcebatur. Maximam enim in eo foelicitatem nobilissimus quisque reponebat, si hanc in coniugem assequeretur. Primum Philiberto Sabatensium ducis filio desponsata est: sed ille auro immaturus in rapida fata concessit. Tres subinde regum nup-<sup>p.226</sup>tiales tædæ oblatae sunt: Matthias Pannoniarum rex gloriosissimus eam Ioanni Coruino vnico filio desponderi curauit: sed Matthia vita functo, multa quae animo conceperat de futura filii in regnum successione, in irritum cessere, quae faeces hymeneas prohibuerunt. Iacobus Stuart Scotiensis primæ iuuentæ adolescens, qui insulae Britanniae imperat: qua parte in septentrionem vergit, hanc in consortem & thori sociam expetiuit. Vladislaus Boemiae imperitans, qui pannonico regno successit, haud impar Matthiae gloria futurus, per crebros inter-nuncios in uxorem diutius sollicitauit. Sed eras his omnibus longe superior Maximiliane, inter Christianos reges Caesarem maiestatem obtinens: cui ut genere & potestate, ita virtute & probitate par in toto terrarum orbe reperiri non posset. Tibi ab æterno destinata est non solum vna in carne pro diuino praecepto, sed etiam vna mente futura. Tibi est indissolubili sacri coniugii vinculo copulata: quod ut foelix & faustum est, ita in annos Nestoreos & ultra Pyliam senectutem vtrique producat. Tecum foeliciter omnem vitae suae cursum transiget, æque laborum & curarum atque honorum futura socia: nec tam potentiam tuam quam ipsum te perpetuo reueretur. In dotem constituta sunt ad quater centena millia aurei nummi. Insuper in parapherna aduecta est summa aureorum sexaginta millium, pro iocalibus, vestimentis, pretiosa suppellectili, & reliquo mundo muliebri. Visa est tamen natura rerum omnium parens ex industria illam Principum & regum contentionem in Augusta virgine ambienda, ac certatim deposcenda instituisse: nec confestim tui thalami socia constitueretur, sed quasi per aureos Principum & rerum gradus altius ascendens, tandem ad suprema tuæ Caesariae aulae fastigia deduceretur, qua nihil in humanis excelsius reperitur. Huic tanto matrimonio etiam numina & sydera applausisse liquet. Nam (quod vix alias nisi diuinitus factum credi posset) serenissima regina & comitibus media hyeme longum iter ad Maiestatem tuam facientibus, nullæ vnquam pluuiæ, nullæ è coelo niues deciderunt: non frigora, non obduratae glacies quasi rigoribus contractis obstiterunt. Quin etiam plerisque itineribus pulueres quasi æstiu affuerunt: Solis radii diuina augustæ specie delectati, & montanis & campestribus locis quotidie circumfulserunt: & ultra rationem



tionem hyberni temporis incaluerunt. Rheticae alpes cœlo vicinae, quæ Germaniam ab Italia determinant, asperimæ & quasi inuiæ in Augustæ transitu subfedisce, & quasi se inclinasse visæ sunt. Posteris hæc fortasse mira & incredibilia videbuntur : & tamen sunt re ipsa verissima. Nam terrarum dominae terras quascunque obsequi congruum fuit : & æquum cœlesti formæ cœlitus ista indulgeri. Excitauit te non parum, Rex sacratissime, ad has sanctissimas nuptiales tædas facesque diuinas sapientissimi Principis Ludouici Mariæ Sphortiae Vicecomitis Reginae patris ratio : quem magnis ex causis tibi maiori beneuolentia & arctiori affinitate iungere desiderabas. Lucius Sylla cognomento Felix inter maximas suas foelicitates Pii Metelli amicitiam deducebat. Repetis memoria ciuitates, populos ac nationes quæ ab imperio præsertim per Italiam defecerunt. Non ignoras quam altissima sit Diuus Ludouicus prudentia, quam immensa sapientia, quo diuino ingenii acumine excellat, quanta animi magnitudine præstet, quantam rei militaris scientiam teneat, quanta auctoritate polleat, quantum gratia. Non ignoras quod non solum Mediolanense imperium moderatur, verum etiam cæterorum Italiae principum & regum vota pro arbitrio disponit. Non ignoras Diuum Ludouicum esse rerum Italicarum arbitrum. Quod in eius manu sit pacis aut belli, Iani aut Martis postes referare. Non est tibi obscurum, quanto vsui & emolumento Diuus Ludouicus esse possit Cæsariae Maiestati pro imperio redintegrando & amplificando. Stimulat te non parum desiderata diutius in Turcas expeditio. Sed recolis retroactis sæpe temporibus tam piam expeditionem propter Italicæ seditiones variosque tumultus fuisse impeditam : qui etiam Romanos Pontifices & sacros Cardinales retardarunt. Diuus Ludouicus Italicæ pacis non solum auctor, verum etiam conseruator quascunque huius sanctissimi voti tui occupationes ex Italia facile dissoluet : & quæcunque obstantia amouebit. Non solent Planetæ ( nisi geminentur ) magnum aliquid moliri : sed ubi coniunguntur, ut Saturno Iupiter, aut Sol Mercurio, magnos in terris effectus portendunt. Per Blancam augustam vipera aquilæ tonantis aliti colligatur : & Ludouicus tanquam Mercurius Ioui, hoc est, Maximiliano terrarum domino coniunctus est. Sicque sapientiæ & potentiæ influxus sunt conglutinati, ut mirabiles & fortunatissimos maximarum rerum euentus non incerta spei ratione liceat expectare. Occurrebat & aliud animo tuo, velut ex alta specula longius prospicienti : quod quamuis Cæsarea potestas sit in orbe luminare magnum, eget tamen sæpenumero altero magno luminari, scilicet pontificia potestate. Huic indigentia succurret Reuerendissimus sacrosanctæ Romanæ ecclesiæ Cardinalis Ascanius Maria Sphortia Vicecomes, alius reginæ nostræ patruus.

p.227 Qui quantum apud Apostolicam sedem, & sacrum Cardineum senatum prudentia, auctoritate & gratia valeat ac excellat : ut ipse taceam, omnibus etiam extra Romanam curiam exploratissimum est. Ut primum Diuus Ludouicus de hoc tanto connubio regium nuncium accepit, tanquam graui somno excitus, coepit magis stupidus quam lætus esse. Multum ac diu secum cogitans & animo tacitus volutans : tandem non aliunde quam à Deo maximo bonorum omnium largitore tantum munus acceptum habuit : & maximas omnipotenti Deo supplicationes & gratias egit. Dum hæc aguntur, & iam Fridericus genitor tuus colendissimus longo senio confectus naturæ concessisset : Turcarum mense proximo Octobris multa millia in Croaciam descenderunt : non paruam stragem ferro & igne cum ingenti præda Christianis intulerunt : decem ferme millibus partim cæsis, partim pecorum ritu abactis : sed Croacij propriæ culpæ poenas luerunt : eo quod auxiliares Germanorum copias præstolari neglexerunt : ea clade tu sollicitatus, mira celeritate quindecim millium equitum ac peditum exercitum contraxisti, proposita omni alia cura quamuis admodum graui. Tanta trepidatione tuum celebratissimum nomen Turcas effecit, ut quamprimum eorum auribus etiam ex longinquo intonuit, turpem fugam arripuerint. Alij quicunque exercituum duces hostium fuga exultassent : sed vo-



tis tuis fuit contraria & inimica. Nam quum manum cum perfidis hostibus aperto Marte conferere quam maxime desiderares : & nihil magis timeres quam ne nimium timereris : illis ante tuum acceleratum aduentum, in præcipitem fugam versis, tibi celebrioris victoriæ materiam ereptam indoluisti. Tecum tamen foeliciter Rex generosissime actum est, quod eodem tempore & ad imperium vocatus & ad Turcarum arduam expeditionem es accitus. Quam speciosum est ad publicam disciplinam accommodatum, per aduersa & obstantia ad res secundas euehi : In rebus asperis virtus exagitata perficitur, & perfecta vndique cognoscitur, & cognita splendorem & gloriam longe lateque diffundit. In ipso imperij tui limine nactus es pulcherrimam occasionem ostentandæ virtutis tuæ, vt per difficillima bella clarior indies & celebrior reddaris : & tuis generosis operibus te tanto sceptro dignissimum ostenderes. Quam illud tibi gloriosum est, quod eo tempore imperij potestas ad te peruenerit, quo præcipuum Imperatoris munus præstare possis : & lautas opes ac magnitudinem imperij non ad priuata, sed publica commoda, publicamque salutem conuertere. Alius fortasse calamitosi temporibus se imperij fasces suscepisse grauaretur. Tibi maxime cedit voluptati, quod in ipsis imperij primordiis simul incipias, & imperij habenas suscipere, & in rerum discriminibus exerceri. Generosi & strenui animi est malle in castris & assiduis periculis esse, quam in delitiis versari. Quod si apud gentiles philosophos, & apud Ciceronem eloquentiæ principem creditum est ; *omnibus qui rempublicam auxerint, iuuerint, defenderint, certum esse in celo definitum locum, in quo beati sempiterno auro fruuntur* : tibi quum vniuersam rempublicam Christianam iuueris, & è faucibus spurcissimi & truculentissimi hostis eripueris, quas non Hysias beatorum sedes, quæ non coelestia loca parata credemus ? Scio Rex inuictissime, multos tibi deberi titulos : sed nullum illustriorem ac diuturniorem expectare potes, quam si foedam & impiam Turcarum gentem barbaram & pestiferam ex Christianorum ceruicibus excusseris ; eamque exterminaueris, funditusque deleueris. Quæ hætenus gessisti, etsi præclara sint, & illustria : talia tamen sunt vt humana aliqua excelsa virtute confici potuisse credantur. Sed quod nunc infracto animo aduersus barbaras nationes es adorsus, à nemine hætenus perfici potuit. Expectatur vt à te solo diuinis auspiciis conficiatur. Aut tu ille es, aut præterea mortalium nemo, quo duce, quo Imperatore Christiana plebs, ex diris & efferatis Turcarum faucibus eripietur. Animo tuo augustissimo ad recta tendenti, & grauissimum bellum in Turcas suscipere instituenti, non quidem pro imperij amplitudine, sed pro diuini & Christiani cultus propagatione, omnia prospere foeliciterque succedent : & sancta desideria diuina pietas comitabitur ac proteget. Fauorabile & gloriosum & apud omnes, præsertim Germanos procures Maximiliani nomen : eo quod maximas res polliceatur. Tuum est eniti & ingenuam operam dare, vt hanc præcipuam inter mortales gloriam consequaris, vt etiam quæ supra hominem sunt, tibi soli non impossibilia credantur. Caterum gloriosissime Rex ne longius quam fas est tua benigna audiendi facilitate, & sacri tui numinis reuerentia abuti videamur, vela contrahemus : & grandi negotio breuem finem imponemus. Illustrissimus & sapientissimus princeps Ludovicus, quum nos legatos ad Cæsareum Maiestatis tuæ culmen mitteret, admodum sollicitus fuit, ne parum tibi exprimere, gratum eius animum sciremus : neue incredibilem deuotionem erga te & Augustam maiestatem minus quam sit testatam redderemus : & læticiam inæstimabilem, ac gaudium incomparabile nostra oratione parum consequeremur. Sed tuæ prudentiæ fuerit, ex paucis multa, & quasi infinita colligere : & potius varia assequi coniectura, quam ex verbis nostris percipere. Vtinam eius animum posses linceis oculis introspicere : profecto multo plura quam referantur, spectares. Agit imprimis Deo bonorum omnium largitori dehinc sublimitati tuæ gratias, quas maximas potest, quum diuina opera & tua benignitate tam desideratum coniugium sit subsecutum. Deinde quum ex tuis regis

legatis,



legatis, & ipsis rerum successibus plane, dilucideque perspexerit summam benevolentiam & dilectionem, qua erga eum tua sacra Maiestas afficitur, & quam de eo optimam opinionem conceperit, & quod eius præcipuo intuitu regia celsitudo ad hoc sacrum connubium condescenderit: sese omnibus obligationum nexibus erga Serenitatem tuam deuinctum profitetur, ac perpetuo obnoxium affirmat. Opes itaque, facultates, copias, vires: seipsum ac liberos, constantissima fide, pro tuo arbitrio etiam absoluto, ac pro imperij usu & incremento deuouet ac dedicat. Tuum omne mandatum omni æuo immortalis beneficii loco ducet. Quinimo ad tuum omnem vel minimum nutum, semper non erit minus re & opere, quam verbis aut sermone, animo celeri, prompto & expedito. Ad quamcunque tuam expeditionem, præsertim in Barbaras & Turcas nationes, idem diuus Ludouicus sese paratissimum exhibet: non tam ex eo quod Christianus sit, & intelligat quid Christianum principem deceat, quam quod Maximiliani victricia signa, fulgentesque aquilas, quocunque vertantur, & in quemcunque rerum euentum insequi proposuit. Blanca vero consors tua & Augusta, vt omnibus admiranda, ita à te Cæsare quam maxime amanda, in te vnum omnes charitatis & affectus habenas relaxauit. A te solo pendere instituit: vt nihil unquam illi graue, aut molestum futurum sit, quod diuina maiestas tua imperauerit: non minorem tuæ incolumitatis quam vitæ propriæ rationem habitura. Actum Insprug, die XVI. Martij. Anno à natali Christiano millesimo quadringentesimo nonagesimo quarto.

RAYMUNDUS CARDINALIS CUR-  
CENSIS, CONSUMMATISSIMO JURE-  
CONSULTO, ET ORATORI FACUNDISSIMO  
DOMINO JASONI MAYNO NOSTRO  
PRÆCIPUO.

*Non possumus non summopere extollere, Iurisconsulte & Orator præclarissime, orationem quam ad Serenissimum Romanorum regem pleniori ventorum flatu insufflasti. Tanto enim Latini sermonis ornatu, tantoque verborum sale condita videbatur: vt non solum nos ipsi omnium minimi, verumetiam omnis multitudinis corona publico & vno consensu te oratorem in Italia longe ceterorum principem decerneremus. Eam mediis fidiis iam perorato sermone à te (sicut scis) petiuimus. Quippe quam publice sine oratoris discrimine legi, & publicari posse credebamus. Mirum in modum eloquio tuo mellito accensi, ipsam orationem apud nos esse cupiebamus. Sed voto nostro eo tempore subueniendi locus tibi non est datus. Siquidem (si recte meminimus) orationem te dumtaxat memoriæ mandasse, & non totam scripsisse affirmabas: pollicitus eam, ubi omni diligentia exscripta fuisset, ex Mediolano constanter nobis esse donaturum. Proinde quum eam ornatissimam orationem habere magis magisque accendamus: & ex memoria in scriptis translata esse arbitremur: desiderii nostri partis esse duximus, si orationem ipsam per literas nostras efflagitarem. Eia igitur te valde oramus, vt huic nostro Tabellario ad nos dare velis: pollicitisque tuis occurrere contendas: id quod ex humanitate tua effecturum te confidimus. Vale cum salute. Ex prætório Veronæ, octauo Aprilis, millesimo quadringentesimo nonagesimo quarto.*



## IV.

*PANDULPHI COLLENTII JURIS-  
CONSULTI ET EQVITIS, ILLVSTRSSIMI  
FERRARIENSIVM DVCIS LEGATI, ORATIO AD  
AVGVSTISSIMVM PRINCIPEM, MAXIMI-  
LIANVM CÆSAREM ROMANVM  
REGEM.*

**A**DVENTUS ad te nostri summa, Rex inclyte, sed & fortissime Cæsar, imo iam vero gloriosissime Imperator, hæc est, ut quod Estensis Hercules, patriæ nostræ pater ac princeps, deuotissimus tibi dux tuus, per publicas occupationes & ætatis indulgentiam facere prohibetur, sed maxime tamen cupit, te præsens numen videlicet, non alio cultu quam Romanæ urbis rectorem deceat, venerari; nos eius verbis quam maxime fieri potest, impleamus. Grande onus profecto, nostrisque omnino viribus impar, siue nos illius voluntatem, siue magnitudinem cogitamus. Quocirca dabis veniam (quæ <sup>p. 229</sup> tua est indulgentia) mitissime Cæsar, & quam nos ingenue culpam fatemur, tu pro incredibili tua clementia condonabis. Nam si salutandus adorandusque es tantum ad apte culmen, in quantum se rerum humanarum tollit imperium; quis hoc vnquam, rogo, satis digne pollicebitur? Sed lætandum gratulandumque est. Quis hoc officii genus absolutum vndique suisque numeris circumscriptum dabit? Neque enim aut soli tibi de imperio, aut nobis de Imperatore simplex est referenda lætitia: sed Illyrico, sed Germaniæ, sed Italiæ, imo vero Christiano orbi, qui latissime patet, gratulandum est. Si virtutes tuæ (quod esse in legationis officio, atque in salutandis principibus primum solet) explicandæ sunt, quæ vox tam felix, quod ingenium tam fecundum, quæ tam larga dicendi copia suppeditabit? Multa quidem (ut verum fatear) clementissime Cæsar, sese dicenda quasi certatim nobis obiciunt, quæ videlicet ardentissimus erga te nostri Principis iussit affectus; & quæ tu utinam, serenissime Rex, oculis tuis immortalibus videre potuisses, quo vultu, quibus verbis, quo ardore mandabantur? sed Maiestatis tuæ fulgore superamur, opprimimur gloria; & augustior longe, quam de te nobis fama pollicebatur, conspectus iste tuus exterret. Sparsum igitur ac nullo ordine mandata digeremus, & (quantum inter colligendum percussas animi vires memoria suppetet) quæ nobis ille iussit, exequemur. Verum nihil prius aut antiquius duxit Hercules tuus, quam ut ab eo maxime auspicaremur, à quo tanti muneris incrementa suscepimus. Agendasque immortalis DEO laudes ac gratias sempiternas primum censuit, quod cum terris principem dedit, qualem bono generis humani sperare quidem potuimus, inuenire vero non nisi ipse rerum omnium sator potuit, à quo Princeps terrarum gubernaculis imponitur, in cuius manu Regum omnium fortuna versatur, qui fessas res humanas pro sapientiæ suæ luce bonos interdum Principes indulgendo, subleuat, erigit, solatur, fouet. Sic Octauium, qui primus Augustus cognominatus est, post ciuiliū bellorum lachrymas dedit. Sic Vespasianum post Neronis, post Domitiani crudelitatem Traianum, Antonios: post Commodi furores Seuerum, post Heliogabali vespasianam Alexandrum. Et ne singulatim vniuersos prosequar (quos enumerare longum est) sic posteriori tempore Flauium Constantinum, sic Theodosium, sic Iustinianum: sic Magnum Carolum, sic Othones, Henricum fecundum, pluresque alios, quasi distinguendis malorum Principum ordinibus, secundisque Reip. fluctibus moderatores dedit: donec in Australem familiam tuam, à condito æuo nobilissimam, & ipsam triumphis grauidam, & imperiis genitam, Romana res omnis certa iam ferme successione resedit, tibi que or-  
bis

*Boni Principes per intervalla.*

*Australis familia.*



bis imperium tradidit gubernandum. Quare & illi immensas, & tibi quantas maxime possumus gratias agimus, quod illud animo magno regendum suscepisti. Gratulamur vero & virtuti tuæ, & bonis omnibus, & militari gloriæ, quam tu in antiquum statum redacturus es; & literarum studiis, quæ per te priscum decus & dignitatem recuperatura esse videntur. Gratulamur & ætati nostræ, & horum temporum felicitati, prouinciis omnibus, & Christianæ Reipublicæ; atque imprimis sibi ipsi Hercules Princeps noster gratulatur, & ob amplissimam quam de te spem expectationemque concepit, ob egregia multa & magnifica diui patris tui beneficia, & ob ingenuum quidem ac peruetustum Estensis familiæ in Australis gentis Principes amorem pariter ac reuerentiam. Quod si tibi de suscepto imperio gratias agimus, si lætitiæ nostræ magnitudinem (dum nobis ipsi plaudimus) ferre non possumus: nullus prudens rerum æstimator mirabitur, si quæ imperii partes sunt, quæ officia, quæ curæ, qui labores, quæ pericula, metiatur. Populis tanquam fluctibus huc atque illuc æstuantibus, & armatis exercituum cupiditatibus, immortalis pater imperii frena constituit. Quare non secus esse populis sapientes, sapientium quidam putauerunt, quam in ædibus contignationes lignorumque compages, quæ vniuersi ædificii molem pondusque contineant. Alii non aliud esse Regis officium atque Imperatoris munus arbitrati sunt, quam quod sentimus cordis esse, viscerum omnium præstantissimi in humano corpore. Quidam altius ac verius cogitantes, idem esse Imperatoris opus dixerunt, quod Solis in mundo, vnde rerum omnium motus ac vita, vnde operum omnium initia, progressus finesque deriuantur. Quare cum cui populorum gubernacula tribuantur Platonis sententia, tanto priuatos omnes antecellere oportet, quanto homines à Diis immortalibus superantur. Arduum certe opus atque omnino difficillimum, supra hominem sese attollere, belli pacisque, ac gentium omnium iura moderari, vnum esse cuius ad exemplum totus componitur orbis, ocii populorum ac subiectorum quietis rationem omnem curamque suscipere, propriæ vero nullam. Diuus Julius (vnde p.230 de primum felix illud æternitatis dicatum Cæsaris nomen, Maximiliane, defluxit) nihil aliud esse dicebat Imperium, quam *curam alienæ salutis*. Justinianus vero noster idcirco voluntarios labores suscepisse se dicit, vt quietem subditis parare posset. Aurelianus Augustus ad populum Romanum scribens: *Ego, inquit, efficiam ne sit aliqua sollicitudo Romanis. Vacate ludis, vacate Circensibus: nos publicæ necessitates tenent, vos occupent voluptates*. Vnde principatum constat nequaquam segnem rem esse, sed laboriosam; non ocio & animi remissione, sed curis ac laboribus abundantem. Hoc magnus ille quondam Armeniorum Rex Tigranes expertus cum esset, oblatum sibi venerabilem illum pannum, quo regius vertex coronari solet, manu diu versatum aspiciens; *O nobilem magis quam felicem* (dixit) *pannum; quem si quis penitus agnoscat, quam multis laboribus ac periculis sit refertus, ne humi quidem iacentem velit attollere*. Adhortantes se ad imperium suscipiendum amicos Tiberius Cæsar ignorare dicebat *quanta bellua esset imperium*. Arrius bis consul, vir bonus & grauis, Cocceium Neruam nepotem suum cum imperium accepisset, miseratus est. Expauit ad imperii nomen, quod vltro sibi offerebatur, M. Aurelius Cæsar. Diocletianum quoque dicere solitum legimus, *Nihil difficilius esse, quam bene imperare*. Sed & diuus Augustus imperii pacisque formator, cui plura Dii (vt quidam scribit) quam vlli vnquam homini dederunt, imperandi, hoc est laborandi vacationem à Senatu efflagitare nunquam destitit. Hoc & bonorum Principum raritas indicat, hoc imperialium coronarum insignia illa pondera non sine ratione significare videntur. Hoc nobilem illum expressit maximi imperatoris gemitum, quem sapius suspirantem dixisse accepimus: *O te felicem Damocles, qui non longius vno prandio regni necessitatem tolerasti*. Damoclem illum referens, qui à Syracusano rege Dionysio ad mensam vocatus, sub ancipitis gladii periculo, qui de tenuissimo filo penderet, pauidus semper tremebundusque discubuit. Jure

Princeps quid  
in re publica.

Laboriosa res  
principatus.



igitur pro suscepta à te imperii mole (quod rerum humanarum omnium maximum esse clamabat Isocrates) pro grauissimo isto Christianæ Reip. tuendæ amplificandæque munere, quod libenter amplexus es, & gratias agimus, & voluptate efferimur, & festis acclamationibus salutantes; *Cæsar vere Cæsar, verissime Auguste*, dicimus; faustasque illas voces omnes, quas publicæ lætitiæ feruor solet effundere. Quod si non illustrissimi modo electores tui, sed & ipsa Roma, & Italia, & Gallia, & ex prouinciis viritim omnes in suffragium essent; si vniuersum Christianum nomen vno in loco de Imperatore deligendo comitia habuisset; nulli magis quam tibi tantæ rei pondus impositurum fuisse videtur. Adeo omnia in te vnum diuina quadam forte cum naturæ tum fortunæ munera conueniunt, quæ in Imperatore desideranda veteres prodiderunt; vt etiam vel negatum Imperium (si petisses) iure tuo tamen vindicare potueris. Patere (obsecro) patere nobilissime Cæsar, nos & lætitiæ nostræ frena relaxare, & Herculis tui, quantum per nos licet, affectus exprimere; dum quæ gestiens ipse mandata dedit, tamen si elingues explicamus. Modestiam tuam in audiendis laudationibus nouimus, ac viuientis adhuc & præsentis adeo Principis laudes non sine dicentis reprehensione dici, non ignoramus. Sed non ideo diuina munera prædicari non debent, quod ea qui audiunt, per modestiam forte recusent. Potuisses (inquam) vel negatum imperium (vt de his humano quodam vsu loquar) si petisses tuo iure vindicare. Qui de imperatoria scripserunt, genus, ætatem, formam, rei militaris scientiam, vsu, auctoritatem, fortunam, virtutem in Imperatore eligendo spectari oportere censuerunt. Sed in quem obsecro (si verum fateri volumus, præfatâ gentium omnium veniâ) tanta ista bona coelesti prouidentia ceciderunt? Si genus quærimus, paternum tibi genus Austria. At qualis Austria? Fortissimorum ducum domicilium, Principum sedes, Imperatorum seminarium. Nonne hinc ex atavis tuis (vt cæteros transcam) Rudolphus Imperator prodiit, qui Romanam Ecclesiam fecundissima Italiæ parte Flaminia donauit? qui Primislao quinto Rege, memorabili illo prælio (quod in campis Austriæ gestum est) superato obtruncatoque Bohemicam potentiam domuit. Nonne ex maioribus tuis Albertus primus ob bellicam gloriam à Romano pontifice designatus est ultro, qui læsam Ecclesiæ maiestatem vindicaret? Nonne & Albertus secundus magnus tibi patruus, pietatis eximiæ Princeps? quem ideo rebus humanis (cum biennio tantum imperasset) ereptum gentium omnium consensus dixit, quod indigni essent eo principe illius temporis mores, atque ideo illum Deus hominibus ademerit, quia secum esse maluerit. Hunc diuæ memoriæ Federicus pater subsecutus est, nuper cœlo redditus, Imperatorum omnium innocentissimus, pacatissimus: cuius illud proprium fuit, quod omnes ante se Principes à Diuo Iulio, & vitæ & imperii diuturnitate superauit. Nemo diutius vixit, nemo solus diutius imperauit, nemo<sup>p.231</sup> innocentius regnauit. Quod si maternum tuum genus repetendum est, quis nescit à validissimis Gothorum Ducibus, quatuor atque octuaginta coronatos Reges perpetua successione Hispanias ad hæc vsque tempora tenuisse, unde sanctissimæ parentis tuæ deriuatur origo. Uxorū tuarū stirpem si quærimus, illæ magnorum Ducum filiæ. Si quos (non tam Romano quam vsu trito vocabulo) sororios dicimus; & ij quoque amplissimi Duces, atque in ijs splendidissimus Alphonsus noster Herculis tui filius, miræ spei adolescens, futurus Dux, filium fustulit, & is Ducum longe potentissimus est. Ut iam non imperatoria solum stirpe natus, sed totus ex Ducibus, totus ex Regibus, totus ex Imperatoribus, quasi seminario quodam generosiore virtutum concretus factusque videaris Imperator: vt intelligant populi, sciant nationes, virtutem tuam non tam adscitam adoptiuamque esse, quam genuinam, & ab ipsa natura ad Romani orbis imperium traditam, atque ideo augustiorem longe venerabilioremque esse. Quæ si quis prorsus amens non intelligat, atque in re perspicua (vt est interdum contumax ignorantia) dubitet; is speciem istam tuam maiestatemque contempletur.

Maximiliani  
genus.

Austria.

Federicus III.  
Imp.

Gothi Hispaniæ  
reges.

Digna imperio  
forma.



tur. Pulcherrimum te esse domicilium fateatur oportet, in quo se imperium ipsum prorsus penitusque componat. Felices illæ animæ, quæ nobiles curas suas naturalibus arcanis intulerunt, quo abditarum in ipsa natura causarum secreta rimarentur, augustissimam quamque hominis speciem plurimum de coelo trahere prodiderunt. Siue enim mundi ipse æternus rector nobilissimum animum missurus in corpus, speciosum prius atque illo dignum metatur hospitium: siue animus ipse cum venerit, diuinitatis suæ conscius, pro habitu suo sibi fingat & ornet habitaculum; certum est alterum alterius officio crescere, & cum se mutuo quasi fœdere iunxerunt, vtrique maiora consurgere: ut eos qui tali naturæ sint habitu, iam non natos, sed à Deo ipso factos formatosque esse scribat Cicero. Æthiopum populos, qui Gymnosophistarum sapientia gubernantur, non ex iis qui fortissimi, quique opulentissimi habeantur, nec qualescumque sibi Reges facere scribit Aristoteles; sed eos tantum qui forma pulcherrima præstantissimaque sint: quippe qui animorum effigiem ex corporis specie intueri se posse verissime arbitrentur. Nam & apud Iureconsultos relatum est, \* sapientis quoque iudicis esse, ex ipsa vultus corporisque figura mentis bonitatem speculari atque coniicere. Sicut enim (auctore Aristotele) ad felicitatem habilis deformis homo non est; fierique non potest (ut Aspacijs inquit) ut qui omnino deformis sit, bonus sit: Sic cum qui formosissimus sit, impossibile prorsus est ut non idem optimus sit. Quid enim aliud nobis pollicetur tua illa serenissimæ frontis maiestas? decora illa Cæsaries? ille oculorum fidereus vigor? illud os probum? ille totius corporis honestissimus status? illa dignitas? illa proceritas? Virtus illa splendidissima Cæsaris (quod negari non potest) meretur imperium: sed virtuti, quæ in pulchro corpore gravior venire solet, augusta illa tua forma suffragatur. Age quod ea ætate \* imperium suscepisti, quam coelestium consiliorum mysteria scrutantes Philosophi, hebdomaticorum annorum quintum locum stationemque esse dixerunt: in quo robur ac virtus maxime vigeant, quamque sapientiam quidem quintum progredientis animi tum actum, tum virtutem appellant, quinti septennii climacterium terminum designantes; in quo nec senis imbecillitas contemptui esse possit, nec adolescentis formidanda temeritas: sed in quo labor in negotiis, fortitudo in periculis, consilium in prouidendo, industria in agendo, celeritas in conficiendo, ceteræque illæ imperatoris virtutes, quasi vertice quodam vitæ constitutæ, firmiores conspectioresque reddantur. Verum ætas ista tua, quæque illam præcessit, non in otio, nec in languore, non in vmbra traducta est; nec naturalibus contenta muneribus, sine ullo rerum usu, per segnitiam situm quendam cariemve duxit: imo vero in ipsis pene cunabulis, Imperator antequam miles, arma tractasti, bella gessisti, victorias cumula-

p.232 peries, neque mors, neque vulnera terrent. Quid est quod nescias? qui semper cum fortuna ipsa (inuitus dicam, sed & illâ quoque inuitâ dicenda) pugnasse visus, inimicioremque illam fere habuisse, quam hostes: ita tamen aduersus illam pugnavisti, ut omnem sortis euentum docueris posse à virtute superari, fessamque illam in tua iura compuleris; magna admiratione mortalium, qui te tandem post tot exhaustos labores, post tot periculorum circumfusam molem, rebus omnibus pro arbitrio compositis, Imperatorem vident, nulla virtutis opinione fraudatum, non æstimatione commotum, non auctoritate minorem, sed firmis ami-

\* l. 13. D. de  
decurion. Chiac.  
20. obscr. 6.  
ult.

\* annor. 35.

Militaris ex-  
perientia.



Turci debellandi.

\* L. inter clavas. C. de sum. trinit. Religio principis decus.

Iustitia.

Liberalitas.

Fortitudo. Clementia L. vi. C. de testam.

Imperatoris potestas.

\* L. 9. ad leg. Rhod.

\* Homazii.

amicitiis auctum splendidissimo coniugio ornatum, fidissimis affinitatibus communitum, omnium Italiae Principum benevolentia septum : etiam superbis ac contumacibus terribilem, & immanissimis Turcis, sanguinariisque illis nostrae religionis hostibus formidandum ; quos tu verus Christiani nominis assertor ; quandoque ( quod speramus ) debellabis & conteres. Haec externa quanquam videantur, tua sunt tamen, fortissime Caesar ; tua ( inquam ) o nostrum sidus, & vnicum verae probitatis exemplar, quia tua ea vi animi moderaris, & virtutum gloria ( quas in te vnum tuo certo iudicio, atque ita eligens, atque ita usu comparans cumulaisti ) & maiora efficis, & consilio maturiore dispensas, magnis animi dotibus & verae ac solidae gloriae ardore succensus. Quid enim in te non mirabile, non conspicuum, non triumphale videtur ? Nihil est ( vt leges \* docent ) *quod lumine clariore refulgeat, quam recta fides, in Principe, quam vera religio.* Maxime enim cultorem Dei esse Principem decet, quando ipse à Deo maximum honorem consecutus est. Ceterae virtutes omnium omnino communes sunt. Prudentia ( vt Aristoteles scribit ) imperantium sola : Iustitia vero ( Theodosius Augustus ait ) Regum, sine qua nec ipsum quidem leuam dominari recte posse Poetae quoque cecinerunt. Sed quid, obsecro, aut fide tua firmitus, aut consilio grauius : aut sententia iustius ? Harum in te virtutum exempla contexere, nec modestia tua, nec temporis ratio patiuntur, nec auditorum praesentia postulat : nec enim apud ignaros habetur oratio. Atque vt virgineum illum pudorem, coelestemque mansuetudinem transeam, vt inclytam illam constantis animi aduersus voluptates omnes contumaciam, & indictum vitiis bellum, & summa semper petentis inuidi spiritus sublimitatem ; proprias certe peculiaresque tibi virtutes quonam piaculo praeteribimus ? liberalitatem dico, animi magnitudinem atque clementiam, quibus quidem virtutibus Reges omnes, ( sine inuidia dixerim ) longe praecellis, eos qui virtute sunt praediti.

Nulli magis ( vt Aristoteles scribit ) quam liberales amantur. Magnitudo vero animi non modo virtus ipsa, sed & virtutum ceterarum decus, momentumque : Ac clementiam, quae Principis dos prima est ( Demosthene, Iustinianoque \* auctoribus ) Deo maxime Imperatores aequantur. Haec te Maximiliane Caesar, vere maxime, Augustum faciunt ; haec omnium hominum tibi animos conciliant, haec tibi vniuersum mortalium coetum deuinciunt : has in te omnes admirantur, venerantur, praedicant. Haec magnum Alexandrum dominatorem Asiae fecerunt, haec Caesarem Iulium Diuis adnumerarunt, Augustum consecrarunt, Traianum, Antonios, Henricum, bonosque omnes Principes coelestes plane viros effecerunt. Harum & tu virtutum auspiciis ( vtinamque hoc à vate sit dictum ) *Imperium terris, animos aequabis Olympo.* Iure igitur summa tibi delata potestas, iure tibi debetur imperium. Sed eodem quoque iure ipsum tibi debetur Imperium, per te scilicet decus priscum recuperaturum : iure tibi humanarum rerum tradita sunt gubernacula. Tua sunt iura, tuae sunt leges, tua iudicia, penes te belli pacisque potestas omnis. Tu de omnium capite fortunisque iudicas, tu viua lex, tu animatum ius, tu unus ex omni hominum numero es, cuius sunt omnia. Tu vnus es vt Imperator tandem ( quod & diui Pii sententia, \* & Iure consultorum literis proditum est ) Mundi dominus : qui principatum non rapuisti, sed ornasti ; non ambisti, sed vindicasti ; non emisti, sed meruisti.

Omnis igitur iure tibi veneratio pariter reuerentia obedientiaque debetur. Haec cum ita esse intelligat, religiosissime Caesar, deuotissimus tibi Dux tuus Estensis Hercules, qui te iam pridem ( sicuti scis ) multos ab hinc annos, prius etiam quam regni nomen & fastigium imperiale conscenderas, obseruauit, coluit : ( quippe non noua sunt australis familiae decora, non noua virtutis ac magnitudinis tuae gloria ) verum te principem, verum omnium moderatorem, verum Caesarem, verum Imperatorem agnoscit, salutat, veneratur, adorat. Et non eam fidem \* modo obedientiamque praestitutum se recipit, quam tibi per Duca-



p.233 Ducatus dignitatem ab imperiali benignitate profectam, per vrbes ab Augusta maiestate susceptas debere per scriptam legem profiteretur; verum etiam illam, quæ tibi ab omni Romano orbe, gentibus, nationibusque omnibus, diuino pariter & humano iure debetur. Idem semper animus in Estensi familia, omnium Italiae longe clarissima vetustissimaque; eadem mens semper omnibus Herculis maioribus fuit: Romanos Imperatores magna semper fide, incredibili constantia, ingenti veneratione coluerunt; Ferrariamque ipsorum urbem, quasi Imperatorum omnium pacatissimum diuersorium, Italiam ingressi Romani Cæsares habuerunt. Illam Henricus tertius quandoque inhabitauit, in illa Carolus quartus exceptus, in illam Sigismundus diuertit: illam postremo diuus Fridericus pater bis illustrauit. Sed & Ottho iste tertius olim, qui ob eximiam quidem virtutem Mundi Miraculum cognominatus, non modo illam, sed Hugonem quoque Estensem ex genitoribus Herculis tui, virum fortem, & bellicis artibus per ea tempora insignem, cui à virtute Magni cognomentum fuit, comitem sibi adsciuit: qui collecto Italico exercitu (neque enim pacatis locis erat iter futurum) Romam ipsum duxit, reducemque tandem patriæ restituit. Idem in te est Herculis tui, deuotissimi tui ducis animus: eadem tibi Ferraria, subiectæque omnes Herculi ciuitates, oppida, municipiaque semper patent, quæ tibi ille vniuersa iuxta secum promptissime offert, proque Imperii tui maiestate tuenda amplificandaque magno animo pollicetur. Quoniam certissimam spem de virtute tua, deque incredibili erga se amore tuo, studioque iam pridem concepit; tantumque sibi de animi tui diuinitate pollicetur, vt nihil sit quod à te non impetrare se facillime posse confidat. Eius fidem suscipias, qua soles benignitate, precatur: vtque ipsum, liberos, omnemque Estensem domum, iure meritoque, & quasi dedicatione tuos, serenissimo vultu respicias, enixe te rogat. Vale igitur, viue ac vince, gloriosissime Imperator, Augusto felicior, Traiano melior, Frederico patre viuacior. Immortalis vero Deus, cuius beneficio tantum Decus Romanus orbis accepit, cui tu (æternus vtinam) datus es rector,

*Imperium Oceano, famam tibi terminet astris.*

*Dicta in Ispruchis, in auditorio Cæsaris.*

**JOHANNI CAESARIO JULIACENSI, PHYSICO, MATHEMATICO, ET MEDICINÆ DOCTORI, GRÆCÆ LATINÆQUE LINGUÆ APPRIME DOCTO.**

*Henricus Glareanus, Helveticus, Poëta Laureatus  
S. D. P.*

**G**Audere plurimum soleo, suauissime Præceptor, quoties in mentem venit (venit autem sæpe) tui memoria: cumque a te, à te inquam homine doctissimo, Græcarum literarum elementa cupidissime didicisse recordor, incredibile est, quantum triumphem, quantum læter. Ut autem aliquam tibi gratiam, quemadmodum grato discipulo congruum erat, rependerem, volui tibi meum, de Cæsaris Max. Æmiliani laude, carmen, quod Agrippinæ in conspectu Principum Germaniæ, coramque Cæsarea Maiestate, non sine gloria (absit verbo invidia) multorumque hominum admiratione ante biennium ad Dorium tonum demodulatus sum dedicare. Confiteor tamen ingenue me longe vinci à tali Principe, cuius ego ne umbram quidem consecrari valeo scribendo, sed quæ potui feci, quid enim ultra, quam possum, facerem? Vale felix bonorum studiorum decus Basileæ Anno Domini M. D. XIV.



## V.

AD MAXIMILIANUM ROM. IMPER.  
SEMPER AVG. HENRICHI GLAREANI  
HELVETII POETÆ LAUREATI.

## PANEGYRICON.

**I**Nclyte Romulidum Cæsar, quem summa tonantis  
Maestas mundo statuit pietate ferendum,  
Præfecitque vnum diuina potentia rebus,  
Qui cum ipso placide spaciosum temperet orbem  
Quod tua me pietas, & magnificentia sceptri  
Audiat (en cernis) rogito tua numina supplex.

Arfacas Arfacides, & Achemenas astra putabant  
Astrologi Persæ, Ptolomæos fama per orbem  
Sparsit in extremam Nili septemplicis vndam:  
Laomedontea fortunatissimus vrbe  
Infelix Priamus, Pelopeia ad arua volabat,  
Nomineque & fama celebris, currenteque vatum  
Materia, quid enim non audet Græcia, mendax?  
Cecropis & Thesei quam clarum nomen Athenis.  
Antiochique Syris nullo delebile sæclo.  
Proinde hæc vana abeant, ne tempora perdere dicat  
Verborum longa ambage, exorsisque remotis.

Eia age, Pannoniæ celeberrima gloria gentis,  
Rex Romane faue, cui longo seruiet æuo  
Sol oriens, solque occidens, polus. Auster & Arctos.  
Namque in hyperboreis, Tanais qua frigidus vndis.  
In Mœotica abit vada, tu venerabilis oris,  
Famaque nigrantes celeris tua contigit Indos,  
Extremosque hominum feres, aut si quid ibi vltra  
Priscis ignotum, Solisque perambulat ortum.  
Vesper vbi occidua rorescit frigidus umbra,  
Gurges Atlantiacus, Tartesiæque æquora Calpes,  
Te celebrant, te commemorant, tua numina adorant.  
Nec satis hac tellure, alius tibi quæritur orbis  
Sub pedibus, pene Antipodes noua terra marino  
Prensa sinu, cycloque sub æquatore reposta est.  
Ast vbi ab Arctoo Boreas volat horridus axe,  
Orcadas inuadens, semotosque orbe Britannos,  
Cimmeriasque umbras, agitataque limina bello  
Frustra Romulidis, vbi vasto barbara gyro  
Gotthia subiungit, cæcis abstrusa tenebris,  
Tartareas resupina iacens procumbit in umbras.  
Nota tua est pietas, & nota verenda potestas,  
Virtusque imperiumque, & Maximus Æmilianus,  
Denique Marmaricis vbi murmurat auster in oris,  
Imbriferas cogens nubes Goetulia, Psylli,  
Æthiopes, Elephantophagi, & Garamantica proles  
Ambigua, & Numidæ, Massyli, & corniger Hammon.  
Sæpe tuas laudes, sæpe audiuerunt procellas.  
Atque vt magna magis tua sint præconia Cæsar,

Exten-



Extendit caudam Lybiae, penitusque sub aram  
Tensa caput coeli, nescit quo sistere detur.

Sed satis ambagum, tibi nunc Germania pugnax,  
Et domini rerum, & melior famulabitur orbis.  
Burgundosque, Morinosque tenes, Athesisque fluenta,  
Indomitum Rhenum, sulcosque binominis Istri,  
Illyricos, Vbios, fulgentique aere Tribocos,  
Vangiones, hodieque feros in bella Batauos.

Idque vnum adiiciam, quo nil mihi gratius orbe,  
Heluetia aeterno Caesar tibi foedere iuncta est,  
Gens aquilam, gens terribileis imitata leones.  
Nec tibi dedecori Sueui, gens prisca Deorum,  
Et dura & fortis, nulloque exhausta labore.

Cætera subitico longum cantanda per æuum  
Quæ gentes, quæ regna tibi, quæ seruiet ætas,  
Semper in Oenotriis senuisti acerrimus armis.  
Pallasque, ut sceptrum, diuinas contulit artes,  
Prudens eloquium, & linguæ venerabile donum,  
Tot variisque sonare modis, mihi lingua palato  
Hæret; & albentes vix attingit arida dentes,  
Cum nondum tibi gestorum numerauero partem  
Tantillam, quid enim præclaræ nomina stirpis,  
Quid reliqua enumerem? citius quam copia desunt  
Tempora grandiloquo solum cantanda Maroni,  
Nec nisi Smyrneo gesta enarranda cothurno  
Illi Parnassi fontes, & Phocidis amnes  
Haustibus exsorbent plenis, mihi gutta negatur,  
Et cyathis versis, sitiens ego pocula lambo.  
Da veniam (dare namque tuum) iustissime Caesar,  
Si tua facta minus, maiestatemque verendam  
Attigero. Quis enim tam paucis exprimet autor?  
Semper in ore meo Regum veneranda potestas,  
Tuque caput mundi, longos tibi det Deus annos,  
Atque Sybillinam duplicata ætate senectam,  
Cum quo perpetuum regis inuictissimus orbem.

Max. Æmilianus Imperator Friderici Imperatoris filius, Caroli Quinti avus, perpetua memoria dignissimus Princeps, maximus Christianæ pietatis, ut vix alius cultor, plurimum bonis ac honestis disciplinis fauens, Germaniam mire illustrem suo seculo fecit, ingenia excitauit, pauperes iuuit, occasionem ad honesta studia capeſſenda omnibus dedit. Idem Glareanum iuuenem Colonia Agrippinæ honestorum virorum Gymnasii Montani commendatione amplexus, laurea coronauit, annulo eximio donauit. In qua coronatione hoc carmen Poëta ad Dorium Modum intonauit. Pro cuius explanatione paucula hæc scholia subieci-  
mus. *Arſacas Arſacides*) Laudum initium Regibus aliarum nationum factum ab sua cuiusque natione inquit, At Max. Æmiliani Imperatoris nomen celeberrimum declarat totius orbis consensus. Licenter autem Poëta *Arſacas* & *Achemenas* in quintam Græcorum declinationem torſit, cum alii in prima inclinent. Unde qui accusativus longus erat, hic corripitur. Sed in barbaris fortassis hoc licet. Ordo igitur & sensus est: *Arſacides*, id est, Parthus Reges suos *Arſacas*, & Persæ Astrologi suos item Reges *Achemenas* astra putabant. Ita Ægyptii suos *Ptolemæos*, Syri *Antiochos* celebrabant, Troiani *Priamum*, Athenienses *Theſea* & *Cecropem*. *Theſei*) vel *ſynæreſis* est, vel creticus pro spondeo. *Exorſisque remotis*] Virgilius L. 2. Georg. *Non hic te carmine ſicſto, Atque per ambages,*



*Et longa exorsa tenebo.* *Pannonia* ] Hungariae enim Rex fuit, quae olim Pannonia. *Namque in Hyberboreis* ] Oriens descriptus. *Extremosque hominum Seres* ] Allusio ad illud 8. *Aeneid.* *Extremique hominum Morini.* *Vesper ubi occidua* ] Occidens descriptus cum Portugallensium ac Castiliensium navigatione sub aequatore ad Indiae extrema facta sub hoc Imperatore, ac magis nunc sub Carolo Quinto. *Ast ubi ab Arctoo* ] Septentrionis descriptio cum indicio terrae septentrionalis Sueciae (cuius pars est Gothia) Norwegiae, Islandiae. Quarum omnium nationum nostra aetate est olai Magni, Episcopi Upsaliensis, excellentissimi Viri pulcherrima descriptio, Venetiis excusa cum elegantissima expositione. Quae nationes portentosa magnitudinis ac miraculis refertissima, maiore ex parte veteribus ignota fuerunt. *Denique Marmaricis* ] Meridies descriptus iterum cum Portugallensium navigatione per torridam zonam, qua Africa ad Tropicum usque Capricorni extenta, hodie navigatur, atque in Calecuticum nobile Indorum citra Gangem Emporium pervenitur. *Penitusque sub Aram* ] Ultimum sydus in nostro horizonte visu cognitum, de quo Ptol. & Higinus. *Fulgentique are Tribuchos* ] Mirum est hoc nomen ita corrupte legi apud Autores, proxime ad veram denominationem accedit Strabo, qui Graece *Τριβόυχες* vocat, Gallicae linguae est, **zum dreyen Büchen.** Et Poëta Ellatiam ac Brisgoeam significari vult. In Latinorum codicibus iam Triboces, iam Tribotes, nonnunquam Tribones, per tres inquam variatum literas c t & n. reperias. Ut taceam de quantitate mediae Syllabae pro cuiusque libidine variatae. Reliqua vocabula passim apud Autores obuia, ut Ubiorum, Attauorum, Illyriorum lubentes transmittimus. *Heluetia aeterno* ] Loquitur de foedere quod hodie Haereditarium vocant, iustum inter domum Austriae, ac Heluetios Constantiae a Max. Æmiliano Caesare, anno Domini 1508. quod adhuc per DEI clementiam durat magna utriusque populi felicitate, & ut porro in perpetuum duret, faxit idem DEUS in secula benedictus, Amen.

## VI.

**LITERÆ CREDENTIALIALES ET IN-**  
**STRUCTIO AMBASIATORIS REGIS POLO-**  
**NIÆ, SUPER IRRUPTIONE TURCORUM IN SUUM DO-**  
**MINIUM, AD CONVENTUM SACRI ROMANI IMPE-**  
**RII, SUB MAXIMILIANO REGE, IN FRIBURGO EX-**  
**HIBITÆ ET PRÆSENTATÆ, SABBATHO**  
**ANTE MARGARETÆ ANNO DOMINI**  
**M. CCCC. XCVIII.**

**I**OANNES Albertus Dei gratia Rex Poloniae, supremus Dux Lituaniae, Russiae, Prussiaeque dominus & haeres, vniuersis & singulis spiritualibus & secularibus dominis, praelatis, Principibus, Ducibus, Comitibus, Baronibus, Militibus, fratribus nostris charissimis, amicis, & beneuolis sincere & grate nobis dilectis, praesentibus requirendis, salutem, amicitiam, incrementum & regiem affectum.

Illustrissimi praelari Principes, nec non reuerendissimi, ac reuerendi in Christo patres, magnificique ac spectabiles, ac generosi fratres, amici beneuoli, sincere & grate nobis dilecti. Reddet vestris C. literas generosus, & strenuus Nicolaus Rosenberger, aulicus noster, quem ad V. C. in negotiis nostris & Reipub. Christianae mittimus plene informatum, cui rogamus V. C. in omnibus nomine nostro dicendis plenam velint habere fidem, non minus quam si nos ipsi per-



sonaliter loqueremur, cnm V. C. Datum Cracouiae in octaua Ascensionis Domini, Anno eiusdem M. CCCC. XCVIII. regni nostri VI.

## ORATIO LEGATI.

Postquam coniunctio sanguinis eo beneuolentiae vinculo sacram Maiestatem vestram, & serenissimum dominum meum Poloniae Regem mutuo sibi deuinctos efficiat, vt in quibuscumque necessitatibus, periculisque obeundis, consilio sibi & auxilio Majestates vestrae adesse jure debeant, quod semper per diuos Majestatum vestrarum parentes, sempiternae gloriae Principes, firmiter extitit obseruatum, nec id quidem & per Majestates vestras intermissum: Veruntamen in praesentiarum mutuae charitatis solidandae, & intelligentiae ineunda habendaeque maior ac urgentior causa est, commune videlicet periculum impendens Reipubl. Christianae: quae indies ab immanissimo nominis Christiani hoste, Turcorum Imperatore laceratur, diripitur & occupatur: cui nisi in communibus Christianorum consilijs & opibus maturius succurratur, ipsam procul dubio vniuersitatem propediem, vel ruituram, vel vehementer declinaturam verendum est. Non incogniti sunt, Rex gloriosissime, sacrae Majest. V. acerrimi illius ac potentissimi hostis conatus, qui nil aliud magis cogitat & curat, nil ardentius sitit, nisi vt rem Christianam euertat, quo sic & profanam sectam suam, & imperium propagare posset. Utque id facilius aggrediatur, ingenijs & astu vtens; treugas, sufferentiasque pacis, cum ceteris finitimis principibus sibi constituit, vt impetum potentiae suae in vnum principem conuertendo, illum vastet, occupet, & pedetentim ceteros Christianos principes facilius opprimat, & ditioni suae subiiciat: prout hoc ingenio initio felicitis assumptionis M. regiae ad regnum vsus est, dum pro treugis constituendis atque firmandis, ad quodcunque tempus placuisset arbitrio suae M. per oratorem suum plenarium habentem mandatum detulit. Cuius Maiestati ex certis rationibus respectibus atque causis diuturnas facere non fuit visum, sed praecipue ne ea res regnis ac principatibus clarissimorum germanorum suorum, ceterisque finitimis fieret incommoda. Tandemque temporum qualitate, in triennales pacis sufferentias consensit, vt medio tempore sese ad gerendum bellum commodius compararet. Quae quidem treugae, tam per capitaneos limitum Turcici imperii, quam etiam Tartaros, qui tunc in foederibus adscripti erant, non semel extitere violatae. In quos quidem Tartaros Tauricam Chersonesum incolentes, post captas magni ponderis vrbes Capham & Theodosiam, Turcus ditionem sibi comparauit & imperium. Quod dum M. serenissimi domini mei Regis cognouisset, quorsumque res tenderet, considerasset, treugae quoque ipsae expirassent, iustis ac necessarijs causis permota, nil cunctandum rata, ne incautam imparatamque hostis domi opprimeret, consultius fore, existimauit foris cum hoste bellum gerere, quam domi sibi illatum propulsare. Et maxime instigante ad hoc ipsum ac sollicitante Moldaviae Waiuoda subdito suo, cui se olim Serenissimus parens, aeternae memoriae princeps, vrbes dudum per Turcos occupatas Albipolim & Lycoscouiam (quae alias Kilia dicitur) jure suscepti ab eo feudi atque foederum recuperaturum pollicitus & obligatus erat. Dumque id M. sua validissimo instructissimo exercitu comparato perficere curaret, idem ipse Waiuoda Walachiae, praestitae fidei immemor atque debiti, quo se antea iureiurando regno Poloniae astrinxerat, ab obedientia suae S. desciscens, rebellauit, siue timore magnitudinis potentiae Turcorum percitus, siue solita inbutus pro more gentis perfidia, & ita coepta suae M. impediens atque perturbans bellum demum necessario in se conuertit. In cuius belli prosecutione, qua fortuna vsa sit Majestas sua regia, & quorum quantaeque auxiliares copiae aduersatae sunt coeptis suae serenitatis, & quantum in ea re delatum sit postulatis ac desiderio fraternae Majestatis serenissimi domini Hungariae Regis, quemque etiam in finem praefatus Moldaviae Waiuoda perfidia vsus sit in Majestatem Regiam,



giam, firmatis inducijs, atque foederibus violatis, æstimat sacram Majestatem vestram non latere. Sed neque ea perfidia illata contentus fuit, nisi maiorem multo periculosioremque nuper adiecisset, concitans ingentes Turcorum & Tartarorum copias, quibus etiam securum transitum atque com meatum per suam prouinciam præbuit: qui quidem crudelissimi hostes incredibili celeritate vsi, quæ omnes alias gentes superant, anni tempore sibi ad bellandum in consuetum, quali nunquam alias exercitum educere solebant, inopinati superuenientes in dominia suæ Majestatis irruperunt, hoc est in terras Russiæ, nobilissimam regni portionem, multarumque vicinarum prouinciarum altricem, quam tanta clade affligerunt, quanta nulla vnquam alia prouincia tam atrociter aut audita aut legitur afflicta fuisse: Quoniam in omnem ætatem sexus vtriusque, in omnemque conditionem humanam, sine delectu immanissime sæuitum est, senes, & decrepiti, pueri atque infantes, matronæ grauidæ, sacerdotes, & quicquid religionem Christi profitebatur, cæsi omnes crudeliterque obtruncati sunt, reliqui quibus vires & ætas validior fuit, capti omnes, & in duram ac miserandam seruitutem abrepti: Sæuitum etiam præter morem humanum in animantia bruta pecudum omnis generis, ex quibus nihil viui omnino relictum est, quodque ferrum absumere non potuit, ignis consumpsit. Vastata deinde pro magna eius parte nobilissima prouincia, onusti rerum omnifaria præda, Walachiam festinantissime repetierunt, vnde redituri aucti maioribus copijs breui sperabantur, prout de eo serenissimus dominus Ungariæ & Bohemiæ Rex fraternæ Majestati literis suis in exitu meo de Polonia significauit, quomodo gener Turcorum Imperatoris sexaginta millibus bellatorum associatus, ex Asia seu Anatolia aduentans iam Danubium trajicere incepisset, Russiam ingressurus, vrbesque & arces prouinciæ eiusdem & vtriusque Walachiæ Palatinorum auxilijs expugnaturus esset. Significauit etiam eodem tempore Illustrissimus Princeps Alexander Magnus Dux Lituaniæ, germanus suæ Majestatis huic simile auditu minus gratum ac iucundum, quomodo instigante ac sollicitante Turcorum Cæsare, duo vel fortasse tres Tartarorum Imperatores cum innumerabilibus copijs è sedibus suis mouentes Russiæ terris appropinquarent, iamque ad ripam Boristhenis fluminis castra metati fuissent, contra quos omni sua suorumque potentia adunata, præfatus Illustrissimus Lituaniæ Princeps ad resistendum consurrexit. His tantis ac tam periculosis rumoribus Majestas serenissimi domini mei permota, omni sua suorumque potentia congregata contra eam hostilitatem campestraliter ad occurrendum profecta est in partes Russiæ, committens se Deo, expectans celerrima ac indubitata Majestatis fraternæ auxilia, quæ ex vtroque suo regno, & literis & oratoribus certis suæ Majestati mittere fraterne ac liberaliter pollicita est, per seque in armis paratam necessitatibus suæ Majestatis modis omnibus succurrere. Cum igitur Majestas sua tanti periculi causam, & quæ inde sequi possent incommoda, secum diligentius reputasset, nōsetque dubios bellorum semper esse euentus; intelligens non vnus regni opum atque virium fore ad sustinendum diu tantum ac tam periculosum bellum, dignum ac necessarium existimauit causam communis impendentis periculi ad notitiam sacræ Majestatis vestræ, tanquam primarij Christianæ Reip. Principis, simulque vniuersorum sacri Imperij ac Germaniæ Illustrissimorum Principum, cuiuscunque status ac eminentiæ existant, referre, consilium & auxilium sacræ Majestatis vestræ atque vniuersorum tantæ necessitati exposcens, atque implorans, quo tantorum tamque validorum hostium conatus atque insultus communibus Christianorum opibus & auxilijs reprimi possent, ne hoc regnum quod semper singulare Christianorum propugnaculum extitit, assiduo bello attritum, concidere quouis modo aut euerti contingat. Quæ res quantum periculi vniuerso Reipubl. Christianæ afferre posset, facile est considerare. Non enim dubium est sacram vestram Majestatem minime latere, quomodo aliquando Gothi, Hunni, Tartari, cæteræque ignotæ Scythicæ gentes, non prius in Pannonias, Germaniam, & Italiam, ac deinceps in alias finitimas pro-



prouincias irrupere, nisi fractis & contritis regionibus Poloniæ regni, ut sic facilior illis aditus cæteras regiones inuadendi pateret. Quapropter Rex excellentissime, pro ratione & magnitudine periculorum expetendum necessario est, & adhibendum moderamen, ac celeritas consiliorum, ne aut minora aut tardiora sint remedia, quam casus & vulnera, quæ sacræ vestræ Maiestati sanare maxime conuenit, necessitatique tantæ salutis publicæ Christianæ gratam se atque utilem exhibere, quæ ex ea potissimum pendere videtur, singulare eam præsidium sui & ornamentum recognoscens; ostendereque lumen animi, ingenii, consiliique sui, neque eam tantis attritam iacturis, & pene periclitantem pro derelicta habere, vestigiis insitendo clarissimorum maiorum atque prædecessorum suorum, qui terrarum orbem late impleuerunt nominis sui gloria, & quibus virtus interfecit ad superos, atque in astra leuauit. Quorum tanta fuit virtus, animique magnitudo, ut Zelo religionis sanctæ permoti, optima spe pleni, gloriosum ac salutiferum laborem subire non dubitassent, quo non Turcorum solum potentiam ac principatum contererent, sed etiam Syriam vniuersam, regnumque Hierosolymitanum, cum sancta ciuitate, è manibus Saracenorum eriperent. Sic igitur oramus, sacra Majest. vestra, hæres clarissimorum maiorum suorum gloriæ, eorumque decorine desit. Subest enim causa ingens, & materia minus contemnenda: offert se denique opportunitas, qualis se nulli vnquam prædecessorum obtulit, exercendæ atque declarandæ virtutis animique magnitudinis, qua tam necessario & periculoso tempore illustrare maxime poterit hunc amplissimæ dignitatis principatum suum. Quoniam (gratia Dei opitulante) auctoritate, prudentia, & felicitate Serenitatis V. pacata esse videtur vniuersa Germania, nutum eius per omnia sequens atque respectans. Adsunt serenissimorum consanguineorum suorum Hungariæ & Poloniæ Regum ad causam alacres & promptæ voluntates, tantummodo incepto opus esse videtur, cætera rem perficere. Neque eo terreri debet sacra Majestas V. quoniam complures principes Christiani attentarunt aliquando gentem hanc pestiferam armis obruere, quorum (licet occulto nobis iudicio Dei), irriti fuere conatus, quia forsitan rebus neque consilium debitum, neque recta ratio fuerat adhibita. Utcunque autem fuit, non tamen esse desperandum Deum nostrum subuenire misericorditer causæ suæ, dum eam sincero affectu, summaque deuotione, concordibus vnitisque animis atque viribus adgressuri sunt ii, quorum manibus summam rerum potestatem in terris omnipotens committere voluit. Illustret obsecramus, Rex inuictissime, seculum nostrum; nomenque suum gloriosissimo ac utiliss. hoc omnium facto, ex quo solo tum salus tum etiam Reip. Christianæ ingentia commoda dependere videntur: pro quo quidem multum ei debebit ætas nostra, plurimum etiam posteritas, maxime autem dum ipsam Remp. Christianam tantopere afflictam atque fluctuantem ex desperatione summa in spem firmiorem reuocabit, ut sic sacram V. M. optatæ tranquillitatis auctorem perpetuo se gratuletur habituram. Nihil enim in hac vita mortali neque sublimius neque magnificentius sacra V. M. aggredi atque efficere poterit, quam iuuare, prodesse, atque defendere, patriæque & vniuersalis Reip. Christianæ commoda procurare, reminiscens officij debitique sui. Quia in hoc primario & amplissimo principatu, tanquam in specula consulari collocata est, ut vacuum metu populum suum sua vigilia ac prouidentia redderet: meriti tanti eam à Deo mercedem immortalis relaturo, quam etiam Ethnici illi, veritatis consummatæ ignari pro virtutis merito sibi certam proponebant, credentes omnibus qui patriam auxerint, defenderint, conseruauerint; certum esse in cælo definitum locum, ubi beati æuo fruuntur sempiterno. Hæc sunt Rex serenissime quæ mihi vice & nomine serenissimi domini mei gratiosissimi, Poloniæ Regis, sacræ V. M. exponenda erant. Cuius Majestas iterum atque iterum rogat, quatenus vestra Serenitas & necessitudinis mutua, & communis periculi, quod iam iam imminet, rationem habere dignetur, ne Majestas sua præsidio Christianorum deserta, aliter



ter quam eius decori, dignitatiue conueniat, pacem sibi regnoque suo procurare cogatur. Quin potius communicatis consilijs cum illustrissimis sacri imperij principibus, tantis impendentibus periculis, clementer consulere, matureque ac liberaliter auxiliari dignetur: ut sic res Christiana, & vniuersa Germania salute huius regni Poloniae conseruata, etiam saluti suae consulat.

## VII.

MAXIMILIANI IMP. PRIVILEGIUM  
ERECTIONIS COLLEGII POETARUM  
ET MATHEMATICORUM IN VIENNA.

MAXIMILIANUS diuina fauente clementia Romanorum Rex semper Augustus, ac Hungariae, Dalmatiae, Croatiae, &c. Rex: Archidux Austriae: Dux Burgundiae, Lottaringiae, Brabantiae, Stiriae, Charinthiae, Carniolae, Limburgiae, Lucemburgiae, Gelriae: Landtgrauius Alsatie: Princeps Sueuiae: Palatinus in Habsburg, & Hannoniae: Princeps & Comes Burgundiae, Flandriae, Tyrolis, Goritiae, Arthois, Holandiae, Selandiae, Ferretis, in Kiburg, Namurci & Zutphaniae, Marchio Sacri Romani Imperij ad Anasum, & Burgouiae, Dominus Frisiae, Marchio Sclauoniae, Mechliniae, Portus Naonis, & Salinarum, &c. ad perpetuam rei memoriam, notum facimus tenore praesentium vniuersis. Cum post susceptum diuino auspicio Caesareae Majestatis titulum, officij nostri in primis duxerimus, ad ea singula animum intendere, quae & reipublicae nostrae decori & ornamento perpetuo fore arbitraremur: & nationem nostram Germanicam apud omnes gentes ad posteritatem notas faceremus: id potissimum occurrit pro aeternitate literarum necessarium in humanis rebus fore, ut populis & vrbibus nostris Romanarum literarum gymnasia, laudato ordine & Romano more statuerimus, unde publicarum rerum moderatores ac rectores ut plurimum excellentes prodire: qui veterum rerum gestarum lectione facti prudentiores, bene & beate viuendi rationes multa etiam experientia posteris scripsere.

Directis itaque a nobis in nostro Viennensi gymnasio, ciuilibus iuris lectionibus; cum in Poetica & Oratoria arte nihil hactenus ibi instituerimus: decreuimus pro ipsius Vniuersitatis nostrae augmento collegium Poetarum ibidem praeursorum Imperatorum antecessorum nostrorum more erigere, abolitamque praeursorum saeculi eloquentiam restituere. Itaque de hac re prouehenda & imitanda duos in Poetica & Oratoria, duos vero in Mathematicis disciplinis eruditos, ad ipsum collegium deputamus: inter quos, eum quem pro tempore lectorem ordinarium in Poetica constituemus, volumus eidem collegio praefesse, quem etiam praesentibus nostris ipsius collegii & lectionum superintendentem facimus & creamus. Quo autem praefatum collegium vberiori a nobis gratia & priuilegio decoretur, resque ipsa felici gradu debitum sumat incrementum pro honore nostro, & dignitate augenda Viennensis vniuersitatis: Caesarea nostra auctoritate, ac motu proprio praefatum collegium hoc praesenti priuilegio ac praerogatiua decoramus: ut quicumque in praefata nostra Vniuersitate Viennensi in Oratoria & Poetica studuerit, laureamque concupierit; Is in praenominato Poetarum collegio diligenter examinatus, si idoneus ad id munus suscipiendum habitus & inuentus fuerit, per honorabilem fidelem nobis dilectum Conradum Celtem, per genitorem nostrum Fridericum tertium diuinae memoriae primum inter Germanos laureatum poetam & modo in vniuersitate nostra Viennensi poetices ac Oratoriae lectorem ordinarium, ac deinde per successores eius, qui pro tempore collegio praefuerint, laurea coronari possit. Sicque per eum



eum & successores eius Laureatus Poeta ab omnibus habeatur & celebretur : omnibusque privilegiis & insignibus , quibus ceteri poetæ Laureati fruuntur , quomodolibet , consuetudine , vel de iure , uti & gaudere possit : ac si manibus nostris ea dignitate fuisset insignitus. Cuius rei tenore præsentium damus , concedimus & impartimur nostri Cæsarii iuris eidem legenti poetæ ordinario (ut prædictum est) omnimodam auctoritatem : non obstantibus quibuscumque legibus , statutis , consuetudinibus , ordinationibus , aut aliis quibuscumque in contrarium facientibus : referuato tamen nobis nihilominus iure poetæ coronandi , quos idoneos duxerimus. Potestati etenim nostræ per hoc privilegium nequaquam derogamus. Nulli ergo omnino hominum liceat hanc nostræ concessionis & ordinationis paginam infringere : aut ei quovis ausu temerario contraire. Si quis vero id attentare præsumpserit , poenam indignationis nostræ gravissimæ , ac quinquaginta marcarum auri puri irremissibiliter se noverit incursum : quarum medietatem imperiali fisco nostro , ac reliquam partem præfato collegio decernimus applicandam. Harum testimonio litterarum , sigilli nostri consueti appensione munitarum. Datum in oppido nostro Bozano , pridie Calendas Nouembr. Anno Domini , millesimo quingentesimo primo , Regnorum nostrorum Romani sexto decimo , Hungariæ vero duodecimo.

## VIII.

p.239 **VINCENTII LONGINI ELEVThERII  
SILESITANI, ARTIVM ET PHILOSOPHIÆ  
DOCTORIS, POETÆQUE LAVREATI: AD DIVUM MAXI-  
MILIANUM REGEM ROMANORUM PANEGYRICUS PRO  
INSTITUTO ET ERECTO COLLEGIO POETARUM,  
ET MATHEMATICORUM IN VIENNA  
PANNONIÆ.**

*Alta velut primi stupuerunt æquora nautæ,  
Dum Pegasea ratis liquisset Thessala Pelei  
Littora : sic nos Arctoïis qui nascimur oris,  
Nitimur externas primum cognoscere linguas,  
Crassaque barbarico formamus verba palato :  
Quæ stillant veluti concretis stiria gemmis  
Guttatim , donec liquidis exuberet undis  
Alueus eloquii , atque ausit se credere ponto.  
Quamvis ingenii vis plusquam lingua probetur ,  
Hæc tamen Aoniæ fontis decorata liquore  
Auget spirituum vires , animoque beato  
Suggerit æternum post fata illustria nomen.  
Hinc est quod petimus crinitum tempora lauro  
Phœbum : quem noctesque dies Germania poscit  
Ingeminans : Vatumque orans hac voce parentem.  
Phœbe veni nostras placidissimus hospes in oras ,  
Nec pigeat gelido torpentia membra sub axe  
Visere & Illustres radios infundere nostris  
Pectoribus : quum sis priscis à sedibus olim  
Pulsus ab ignava Turcorum gente , vetusto  
Nomine , Teucrorum variato à tempore edaci.  
Hinc tua cessarunt oracula : nec tua Delo  
Templa pio fumant thure , aut Cynthoque Rhodoque.  
Phocidis arua iacent , delubraque ditia Delphis.  
Non iuga Parnassi resonant : victriciaserta*



Lauro hederæque ligant nec vates tempora circum  
 Nec blandam, Cytharam sequitur delecta sororum  
 Turba repercussis resonatque per æra nervis.  
 Namque Chelis moderator abest: & spretus Hiachus  
 A trucibus Turcis. Latios petiere penates  
 Musæ, explorantes terras sedesque quietas  
 Totius Europæ, ut tandem consistere campo  
 Felici possent, & libera pectora nudo  
 Ore per æthereas depromere vocibus arces.  
 Admonuere deos Bactrum Phœbumque calentem  
 Ut post Chaldeos, Solymos, Græcos, Italosque  
 Ardua per celebres peterent vestigia muros  
 Qua dat iter tutum ad Germanos Mantua campos.  
 Tum fluuios Athesis primum peragrarè sorores  
 Cœpere, & montes mirari argentea dantes  
 Munera: dehinc Cereris per lætas horrea valles  
 Pergentes, sinere alpes in duo brachia cernunt,  
 In medioque videt muscosis fontibus arua,  
 Prataque odorifero subluxuriantia flore,  
 Et fluuios dulces murenarumque fluentia.  
 Huc igitur sedem locet, orant numen utrumque  
 Lata ubi vitiferos circumspicit Austria montes  
 Inter quos latis cum vitibus, viuifer omnes  
 Est ingens Cecius, plures ut nutriet oras  
 Cum Bauaris Boemos, vicinæque regna Polonis,  
 Et terras circum sine Liberi honore iacentes.  
 Hic tua Thyrsigera celebrabunt Orgia Bachæ,  
 Et curuæ resonabunt montibus Euiæ Valles,  
 Siue illas teneat Rhenus, Necarusue, vel Albis  
 Aut Odera, aut Mœnus, Sala, vel Drauus, Cocerusque.  
 Cantantes venient ad Bachanalia ludos.  
 Nos quoque Pegasides, quas iam viridantia prata  
 Et caua saxa tegunt liquidi sub pumice fontis,  
 Et quartus retinet modo limes ab urbe Vienna,  
 Debita soluimus madida tibi munera voce,  
 Nec tamen interea fugiet nos carminis auctor,  
 Cuius fatidicos semper comitamur onantes  
 Gressus: hinc nemora ærei cum fontibus Hami,  
 Meonique senis celeberrima liquimus arua,  
 Vidimus ut nuper, Machumeti erumpere facès  
 Turcos in memoranda loca impia bella mouere  
 Et latices lætos, Musas, Cytharamque canoram  
 Spernere, & Argolicam sophiam, vocemque Latinam,  
 Et quicquid diuino animo complectitur orbis.  
 Hos quoque nos decuit contemnere, nec sinere omnes  
 Perdi quæsitam modo crebris vsibus artem:  
 Dixerat hæc ter trina cohors in Parthica regna.  
 Hinc non immerito in damnum illorumque pudorem  
 Maximus Austriacæ dux illustrissimus aula  
 Æmilianus honos regum, clarisque triumphis  
 Et decus & splendor, fama & pars maxima vatum  
 Condita totius spectat modo consilia orbis:  
 Et medio residens sceptra Europea gubernat,  
 Sceptra quibus trepidant superatis æquora terris,



Magnanimi & regis sacratum numen adorant  
 Gallus & Hispanus, Latium, pictusque Britannus,  
 Pannonus, Austriacus, Stiriusque, Charinthus hinc &  
 Carnus, Goritius, Croatusque, & Dalmata, & acer  
 Burgundus, Brabanticus, Haimoniusque, Selandi,  
 Quique caua Hollandi nunc de tellure vocantur:  
 Naumurci, & quos à tenebris dixere Pelasgi,  
 Scoti: cum Flandris, Phrisi, audentesque Sueui  
 Burgouii, Arthoi, Alsatii, Lymburgus, & alto  
 Sanguine quos reperimus Auentina arce creatos,  
 Habsburgi: Tyroli, Gelrenses, quosue tenet fons  
 Aut Oeni, aut Araris, Lotrico quique vocantur,  
 Seu à luco & burgo: vel quos Sungaudia nutrit,  
 Flandri, Mechlini, Schlauus: portusque Naonis,  
 Atque Salinarum. Sed quid Germania regna  
 Commemorem, aut terras circum tua rura colentes?  
 Cum tua iam proles alio consedit in orbe,  
 Cumque nepote tuo, Oceanum moderatur utrumque.  
 Hac dum miramur pensando Heroas auitos  
 Tecum, nil erit, & cedit tibi prisca vetustas.  
 Quæ si iam nostro tam lato viueret auro,  
 Diceret: hic maris & terra discrimina nouit,  
 Hic superat iusto irritatus Marte superbos  
 Reges atque duces? hic est & pacis amator,  
 Dum videt Heroas concordem ducere vitam:  
 Et rerum causas rimatur pace sub ipsa,  
 Nec finit in turpi mentem torpescere luxu  
 Diuinam: cuius de summa est spiritus arce  
 Missus ad inclusas animas velamine cæco:  
 Quas ut ad æthereas posset reuocare regendo  
 Sedes, difficili conatu sæpe laborat  
 Nec studio satis est huic ter Germania quino:  
 Accersit Græcos, Chaldeos, cumque Latinis  
 Hebræos, & habet doctos quos maximus orbis,  
 Siue illos teneat tellus qua Phosphorus undis  
 Occiduis condit se, aut qua se tollit in ortum.  
 Atque alio viuunt aduerso pondere mundo  
 Sub Stygiis lacubus, versa & vestigia planta  
 Figant, hos omnes audit donisque remittit  
 Magnificis, nec non diuina munera mentis  
 Illis infigit, stimulos ignemque ministrat  
 Virtutum. Quin & legum iurisque peritos  
 Et triplicis sophiæ in natalia rura vocauit,  
 Qua spectat templis munita Vienna patentes  
 Campos: & circum & leges, & iura ministrat.  
 Præterea vatum erexit collegium in auro,  
 Centeno, atque Oratorum, qui pectora possunt  
 Flectere: & est quorum numero obseruare Matthesin  
 Quicquid & Euclides, Vitruuius aut Ptolomeus  
 Metitur numero aut radio, terramque polumque  
 Res memoranda, & inaudita, & sub principe tanto  
 Digna: quod is post imperii tot secula gentis  
 Teutonice, primus mereretur amare Camenas.



Audiit ut nuper Lyricum resonare poema  
 Germani vatis, Phœbi præfente caterua;  
 Obtulit huic hilari mox regia munera vultu.  
 Munera quæ donare potest tantummodo Cæsar.  
 Nam potis est, lauro sacros decorare poetas  
 Celtis, in Austriaca memorandi principis aula,  
 Nunc igitur discat diuinas Teutonius artes,  
 Discat & humanas: mentem superumque hominumque  
 Hæc pius & iustus, doctrina maximus heros  
 Omnia Romulidum Rex instituitque dicauit.  
 Ut maiore fide maneat constantia maior  
 Inter Teutonicos Reges Regumque nepotes.  
 Idcirco hunc merito post tot felicia Regem  
 Gesta, triumphantem magno cunctatur honore  
 Italia horum genetrix, portusque Deorum  
 Quatuor ad partes terre tractusque marinos.  
 Hunc etiam expectat pontus septemplicis Histri  
 Qui nuper solito plus spumosa hostia cernens  
 Feruere Danubii, fluuiorum hunc agmine regem  
 Fluctuago excepit, vasto cum murmure ponti  
 Et noua rorisfluo laudabat nuncia vultu,  
 Dum Rheni fontemque Histri sub Cæsare tanto  
 Aspexit largas liquidasque effundere venas.  
 Concordesque per Oceanum perque hostia gentes  
 Reddere: & à Gallis pacato, currere lapsu:  
 Non Araris nymphae fugiunt, non aurea Tagi  
 Flumina Maxmilianeum decus vber Hiberus.  
 Et Rhodanus supplex, undarum molibus auctus,  
 Cum fluuiis aliis dominum veneratur aquarum,  
 Herculis hunc notæ memori munimine Gades  
 Exoptant: ut & occasum conseruet & ortum.  
 Inde triumphator, velut alter cælisfer Atlas  
 Quando fatigatos humeros ad pondus onustum  
 Sentiet, & superam letus remigrabit in arcem,  
 Fœlici soboli rerum committat habenas.

Dictus anno Domini M. D. & noui sæculi secundo.  
 Calendis Februarii.





**IO. FRANCISCI PICI  
MIRANDULANI  
STAUROSTICHON.**





LECTORI SALVTEM!

BURCARD GOTTHELF STRUVE.



LLustre exeunte seculo decimo quinto, & ineunte sexto, erat nomen Picorum. Nec enim, Jo. Picus solum Mirandulanus, \* magnam nominis sui famam fuit adeptus, sed etiam hic Jo. Franciscus Picus Mirandulanus, illius ex fratre Galeolto Pico nepos, licet ad Joannis patruī gloriam frustra adspiraret. Sacra potissimum scripsit poemata. Sed teste Jovio, quum in omnibus ingenii operibus sacras literas religiose respiceret, contempsisse Latinæ facundiæ flores, atque inde gloriam tanquam inanem existimari voluit; quanquam eius uniūsa literarum studia, tanquam illustri in homine, & in domo sanctissimis moribus perornata, quum in minus seueros iudices facile inciderent, splendidiora viderentur: & hercle vir antiqua simplicitate, potius quam nouo astu æquiora iudicia redimebat: quum libros ipsos priuato impressos sumptu, liberali largitione publicaret. Interfectus est cum Alberto filio, vir indignus adeo crudeli vitæ exitu, a Galeolto fratris filio, quum nocturnis insidiis, capta arce, Mirandolæ dominatum, ex paterno iure inuadendum existimasset. \*\* Jo. Pierio Valeriano \*\*\* dicitur: *Joan. Franc. Picus Mirandulæ comes, vir omni doctrinarum genere absolutissimus*: Lilius vero Gregorius Gyraldus \*\*\*\* sic de eodem: *Reliquit hic, (Picus Mirandulanus) certe amplam & tritam nepotibus viam, qua ad bonas artes facile ingredi possint, ad quam utique Joan. Franc. Galeoti filius pleno, ut dicitur, gradu contendit. Hic post graues & ingentes labores ne ærumnas potius dicam Herculeas, post bella (quod dicere est ipse solitus) plusquam ciuilia, quibus præter diuina & humana iura paterna & amita ditioe bis iam eiectus est (auertat Deus ne & tertio, & una ne vita priuetur) post theologiæ ac philosophiæ ceterarumque optimarum artium studia, post infinita pene volumina, quæ ad hanc diem soluta oratione composuit, se mansuetioribus musarum studiis tanquam ad amœniss. fontes solitus est recipere, atque inde animum a grauioribus curis leuare: nam præter staurostichon de mysticis prodigiis passim in Germania cælitus delapsis, post votum*

\* Extat Jo. Pici Mirandulani epistola ad eundem inter alias epistolas a Christophoro Cellario editas *Epist. I.* Idem Jo. Franciscus patruī sui Jo. Pici vitam scripsit, ipsius Operibus præfixam.

\*\* Verba sunt Pauli Joui *Elog. doct. vir. num. LXXVI.*

\*\*\* In epistola de introitu Matthæi, Gurcensis Episcopi Romano, quæ infra sequitur.

\*\*\*\* De poetis nostri temp. dial. I. pag. 383.



tum pro uxoris salute, heroicis quoque hymnis ad sanctiss. trinitatem, ad Christum, & ad matrem Virginem edidit una cum commentariis a se conditis ad Picum filium. Inter poemata ipsius hoc ipsum est Staurostichon prodigium quoddam de crucibus in hominum vel vestitu vel corporibus an. 1509. adparens, exponit, de quo ita loquitur Trithemius \* anno prænotato Cruces apparuerunt in lineis vestimentis hominum in camisiis, in lintheaminibus, in mensalibus, in peplis mulierum, in albis Sacerdotum, & Corporalibus non solum in his, quæ in quotidiano habebantur usu, sed etiam in illis, quæ abscondita iacebant in cistis, ad quæ nullus poterat aeris penetrare influxus. Cœperunt autem inprimis apparere circa Rhenum, ac deinde per totam Germaniam, in Suevia, in Francia Orientali, in Bauaria, in Austria, in Bohemia, in Saxonia, in Dacia, in Polonia, in Hollandia, in Brabantia, per Galliamque totam; non sine timore & horrore magno mortalium: subito & insperato apparuerunt, ut cadere quoddammodo putarentur de cœlo, ita quod aliquando cum Salue Regina cantaretur in Ecclesia, vel XL. vel L. homines insigniti Crucibus subito viderentur, maxime in peplis mulieres. Erant autem Cruces paruulæ, confusi & subrubri coloris, ac si pannus aliqua pinguedine mixti coloris fuisset intinctus. Non poterant aliqua lotione deleri, sed post nonum diem ut plurimum per se euanescebant. In quibus etiam cum Crucibus magnis apparuerunt multæ Cruces paruulæ, characteres in modum græcarum litterarum, clauis quoque, lancea, spinea corona, virgæ, flagella, & reliqua Dominicæ Passionis insignia, eratque videre terribile miraculum. Astantibus enim in Ecclesia Canonicis apparuerunt in Rochettis eorum, simul & in pallis Altarium, & præsertim in peplis mulierum, non omnium sed quarundam, & solum in lineo. Magna mortalitas has Cruces secuta est. Plenius hæc explicat Nauclerus, \* dicens: Anno salutis nostræ 1501. miranda sane, horrenda & inaudita ostendit DEUS hominibus. Siquidem ut scribit regi Romanor. Maximiliano Leodiens. episcopus, a festis Paschali-bus singulis diebus in uno vel alio loco dioecesis Leodiensis apparuit publice & inopinate aliquando in ecclesiis, aliquando in plateis, aliquando in domibus & in ipsis etiam cubiculis signum Dominicæ crucis perfectum, & fuit frequenter nigrum aut rubicundum, ita etiam, ut in aliquibus putaretur esse verus sanguis cum medulla & sanie effusus: & fuerunt plerumque cruces simplices, aliquando tamen duplices, in forma signi sepulcri Dominici. Apparent autem, inquit, ut plurimum super capita mulierum & maxime puellarum, in earum peplis supremo vertice. Et refert idem, se desuper inquisitionem solertem fecisse, ita quod nec dolus nec fraus interuenire potuerit. Scribit quoque de muliere quadam eiusdem dioecesis XXII. annorum valde honesta, quod die quodam compererit, admonita a matre, signum crucis magnum & amplum in peplo coloris aurei, atque ad singulos quatuor eius angulos interiores crucem unam paruam eiusdem coloris perinde atque arma sunt Hierosolymitani regis, inque medio maiorem crucem aliam sanguinolentam. Territa inde mulier, cum reuerentia pepulum illud ad locum mundum reposuit, & aliud mundum capiti imposuit, mox in eodem crux grandis apparuit. Accurrunt homines multi ex admiratione, in quorum conspectu iterum & iterum pepla mutauerat, ita ut nouem diebus pepla tredecim cruce signata fuerint. Insuper dum quadam vice quam plurimi cum ea de præmissis colloquerentur, viderunt adstantes inter colloquendum exoriri in eius mento crucem, latitudinis unius digiti, coloris & saporis mellei, cuius stipes a gutture in inferius labrum, ad usque dentes exurgebat, per brachia vero protendebatur ex aduerso instrumentum ipsius & labrum prædictum, quanta est oris amplitudo: quo cum ad adstantium admonitionem leuare manum dextram conaretur, apparuit consimilis crux in eadem: retracta ad sinum manu, cum utraque signa duabus ferme horis perstitissent demum prout aduene-

\* Chron. Hirsaug. ad an. 1500. alii reliqui referunt ad annum 1501.

\*\* Vol. II. Gen. LI. pag. 1121.



uenerant, ita disparuerunt. Sed post hac non solum signum crucis apparuit, quin & ueluti hasta quadam, ac desuper nonnulli characteres, cruenta quidem omnia, concludebantur in circulo viridi totum contingente caput protulitque inde acumina ad modum spinarum. Apparuerunt & signa in camisis mariti crucis sanguinolenta. Hortatus est mulierem curatus suus, ut cum Jubileus esset, in Traiecto superiori, ubi fuit episcopus, quod iret illo & confiteretur. Assensauit, & ad sanctum Servatium confessa est magno Theologo, iussa post hac iuit in chorum, & propter reliquias ducta est in sacristiam. allato ei peplo nitido, rogata est quod capiti imponeret, nec cum tanto horrore per plateas incederet. assumens ipsa nouum, quem capiti applicuit, mox erupit in ipsa peplo parte anteriori sanguinis tantacopia, ut confestim in extremam usque simbriam ad unius digiti longitudinem & prope duorum latitudinem deflueret, unde adeo conspicientes sunt attoniti, ut e canonicis unus protinus caderet. At illa inde discedente, publice visa est in ipso recenti peplo ad scapulam dextram magna vis sanguinis in figuram quasi crucis se porrigens atque amplificans. Cum quibus demum signis ipsa ad eundem episcopum ducta est, recenti & madido cruore, ut in presentia sua, sicut scribit attrectatus, digito adhaereret, multis uidentibus & admirantibus. Hæc scripsit idem Episcopus regi nostro Maximiliano 18. die mensis Maji anni currentis. An non sunt stupenda & mira hæc omnia? taceo tot monstra in sex annis retro edita, taceo scabiem elephantie non absimilem, inauditam, nec etiam medicis diu cognitam, quæ plaga ita inualuit ab anno salutis 1495. quod nonnullos extinxit, plerosque inutiles fecit, nec adhuc cessauit. Hæc tam horrenda præfagia nemo aduertit. latius terrent, quam emendant. Manifestum est autem, talia fieri per providentiam creatoris propter euidentem utilitatem, quæ ex ea provenire deberet hominibus: & hoc siue fiat per naturam, siue per voluntatem creatoris, ut timeant & a malo respiciant. Timor vero iste omnino bonus est, propter quem incutiendum inquit Guilielmus in lib. de uniuerso, Creator & stellas & cometas in cælo & gladios igneos & dracones creat, & apparere facit in sublimi, similiter & portenta in terra & in mari, monstra in hominibus etiam nasci, ut infantulos multorum caput, propter quod & monstra dicuntur, non solum quod propter admirationem nouitatis ea homines sibi monstrant imminere hominibus, quod DEus supplex oro, bene vertat. Jo. Faber in Oratione sua Parentali honori Maximiliani dicta, sic loquitur: maiora enim atque plura sub hoc Cesare signa miranda, quibus hæc sancta fides est roborata Dominus ostendit, quam sub ullo quouis Cesare Cruces, atque singula pene passionis Christi insignia M. D. III. e cælo in vestes ac hominum corpora visibiliter ac in prospectu cecidere. De iisdem testatur Fuggerus, \* licet etiam multas interuenisse fraudes non deneget. Agit de eodem prodigio F. Cornelius Curtius, \*\* & potissimum Jacobus Gretserus \*\*\* qui etiam hæc simul addit: exstat de his proprius libellus septem aut octo pagellarum, Norinbergæ tunc temporis editus, cum hac inscriptione. Collectio Reuerendissimi Patris & Domini, Domini Liberti Episcopi Gericensis de crucibus. Auctor in eo totus est, ut ostendat tales apparitiones augenda pietati contingere, idque argumentum per quatuor documenta persequitur. Longum esset ab omnibus seculis exempla repetere, quod Cruces in vestibus adparuerint, quod multo iam apparatu præstitit Gretserus, \*\*\*\* qui etiam ad hoc ipsum Poëma prouocat, \*\*\*\*\* dicens: vidi easdem Crucium, aliorumque passionis Dominicæ instrumentorum apparitiones, accurate iam olim variis coloribus depictas, quas mihi Marcus Velferus Septemvir Augustanus ostendit; de quibus Joannes Franciscus Picus Mirandulanus poëma bene longum heroicis versibus conscriptum publicauit, ad Maximilianum hoc nomine primum Imperatorem. In hoc autem Staurosticho Mirandulanus, postquam diuersa Noui foederis exposuisset miracula, & Pontificiorum quosdam sanctos recensuisset Germaniam etiam breuiter descripsisset, de isto prodigio agit, quam varia de eodem hominum fuerint iudicia, exponit. demum Imp. ad expeditionem contra Turcas suscipiendam exhortatur. STAU-

\* Lib. VI. c. IV. n. 5. Testatur de eodem Crusius Ann. Suevic. lib. IX. P. III. c. XI. & Linturius app. ad Wern. de Rolewinck. ad an. 1503.


\*\* Clauis Dominicis cap. XIV.

\*\*\* De sancta Cruce lib. III. cap. X.

\*\*\*\* De sancta Cruce lib. III. cap. III. V. VI. VII. IX. X.

\*\*\*\*\* Cap. X. pag. 547.





STAUROSTICHON IOANNIS  
FRANCISCI PICI MIRANDULÆ DO-  
MINI, ET CONCORDIÆ COMITIS, HE-  
ROICUM CARMEN DE MYSTERIIS DOMINICÆ CRU-  
CIS NUPER IN GERMANIAM DELAPSIS : AD  
MAXIMILIANUM AUG. ROMANORUM  
REGEM.

*Maximiliano Cesari Augusto inclyto, Joan.  
Franciscus Picus felicitatem.*

**D**Edisti occasionem mihi, Cæsar clementissime, ut ea studia quibus olim oblectabar, nunc quodam quasi postliminio repeterem, ab eis enim tum negotijs armorum diuerteram, tum grauioribus distentus ocijis literarum nuncium remiseram. Monstrasti, dum essem apud te in Germania, cruces clauas, lanceas & alia pleraque, cœlesti quadam nec visibili pluuiâ corporibus delineata, & quæ hac de re tibi etiam literis significata fuerant, qua es facilitate, dignatus es è Germanica in Latinam linguam interpretari. Vidi & ipse quamquam à tua Majest. discessi in Italiam rediturus, multa, quæ non modo fidem rei iam vulgatæ adstruerent, sed maiorem multo demirationem incuterent, & vniuersam pene Germaniam ad cœlestia prodigia religionis ergo commouerent. Quo factum, ut rem tam celebrem, tam dignam posteritatis memoria, literarum monumentis, heroicisque potissimum versibus in præsentia mandare destinauerim. Nil eas veritus calumnias, quas Philosophastri funderent, ignari altissimos literarum locos à prima antiquitate metro concelebrari solitos, nec apud Platonem & Aristotelem satis diuersati, quorum ab altero epigrammata, ab altero etiam poëmata excusa sunt, ut ipsius artis Poëticæ præcepta reticeam. Ipsi autem Theologi nec hymnos Ecclesiæ dissimulent, nec nesciant Nazianzenum, Hieronymum, Sedulium, Paulinum, & alios carmina cecinisse. Nec eas præterierit, Moſen primum diuinas laudes carmine hexametro decantasse, & Hebræum calamum nonnullis diuinorum libris versuum mensuras impressisse, quas equidem non solum licere, verum & expedire quoquo modo nostra etiam tempestate putauerim, modo fabulosa ne sit, nec obscoena materia, modo gentilium Deorum memores ne simus, præterquam forte dum eos explodimus, dum damnamus. Sume igitur libenti animo, Cæsar, nostram hanc historiam altius repetitam, & carmine concinnatam. Cuius lectione (si erit ocium) addi animo stimulos optarim, ut Christi memoriam in Occidente minus reuerenter quandoque habitam, in Oriente vero principum



cupum defidia iam pene abolitam, renouandam pro uiribus & illustrandam suscipias, & impii Mahometis cultum penitus oblitteres. Et quoniam militiæ tuæ me iam pridem, nec sine honore & e gregia quadam auctoritate, ascripsisti; istiusmodi quidem comparandæ victoriæ debemus ensẽ, partæ autem & publicandæ stylum pollicemur. Vale.

## STAUROSTICHOS.

**G**ermana nuper delapsa insignia terra  
 Principis ætherei canerem, ter maxime Cæsar,  
 Si me præcellens rerum mirandaque moles  
 Exiguo sineret residem de pectore vocem  
 Promere: sed vincet pietas, audacia vincet,  
 Abscedat Bromius, spumoso Cypria ponto  
 Dispereat, procul hinc absit Thymbræus Apollo,  
 Fabula Pieridum, procul hinc, procul este prophani.  
 Namque salutiferi canimus miracula regis,  
 Væsano signenta Deum qui dispulit orbe.  
 Christe faue ceptis, tuque o sanctissima virgo  
 Empyreï regina poli, genitrixque tonantis,  
 Dirige fluctuagam ventosa per aquora Cymbam.  
 Postquam flammifero præpes descendit ab axe  
 Summa Dei soboles, summi sapientia patris,  
 Vt male contractas à primo semine labes  
 Purpurea elueret sacrati sanguinis unda,  
 Mortales clauso profugos ut ferret Olympo,  
 Sacra prophanato diffudit lumine mundo,  
 Tartareas pellens hominum de corde tenebras.  
 Inque vices varias diuersa in tempora signis,  
 Quæ captum superant humana mentis, adegit  
 Suaue serenata in præcordia vulnus amoris:  
 Illapsus primum præcelse virginis aluo,  
 Quæ mox concepit nullo de semine prolem,  
 Viliæque enixa est nono ad præsepia mense.  
 Iam vix octauam lucem conspexerat infans,  
 Jam vix assumpta prima incunabula carnis  
 Attigerat, cultros pellis cum cæsa cruentos  
 Sensit, & hostiles aufugit principis iras  
 Herodis, supero matrem puerumque tueri  
 Afflatu iussus Ioseph, Nilotica tecta  
 Perrexit: monitusque iterum ad Iudæa reuerti  
 Herode extincto, Galileis adstitit aruis.  
 Subditus interea peragit mandata parentum:  
 Præcellitque senes puer, & Salomonia templa  
 Ingressus monuit, legisque abstrusa reclusit.  
 Mox docuit Solymos præclaræ munia vitæ  
 Præconis \* tonitru, qui flumine mergier artus  
 Suasit, & indignum Christi qui lora relaxet  
 Se vocat, & nitida soluat sandalia plantæ.  
 Hinc vastæ latebras Christus perrexit eremi,  
 Multos passurus violenti Demonis astus.  
 Nanque quater denos iam roscida lucra rotatus

\* Joannis  
 Baptiste.



Egerat, & totidem magnum sol aureus orbem.  
 Ambierat terræ, ne dum ieiunia Christus  
 Solverat esuriens, cum se tentator operta  
 Ingressit fraude, & lapides mitescere duos  
 Preciperet blande stimulat, cui talia fatur:  
 Nonne sacri referunt libri? Traducere vitam  
 Non datur in dapibus: sed enim felicius illud,  
 Quod fluxit sacro semel omnipotentis ab ore,  
 Perpetuam præstat ventura in secula vitam.  
 Protinus hinc celsæ vehit ad fastigia primæ  
 Spiritus, atque illi rursus: Si dia propago es,  
 Te tuto poteris summo de culmine templi  
 Mittere: namque extant de te mandata ministris,  
 Ne forte ad lapidem offendas. Cui talia reddit  
 Legiferi scitum Moïsis, Dominumque Deumque  
 Ne tentes. paucis pauefactus vocibus hisce  
 Obrigit, veluti cum saevo mœnia bello  
 Impiger obsedit multo conamine miles,  
 Actutum & chalybis percussus tempora glande,  
 Machina terrifico quam fulminat anea bombo,  
 Sternitur, atque illi torpescunt frigore membra.  
 Crudeles iterum versutus colligit iras,  
 Ac tristi obuerset fallendi pectore curas.  
 Nubiferi ductum præcelso in culmine montis  
 Collocat, & molli quondam regnata Dario  
 Monstrat sceptræ, Pharon, Lybies porrectæ sub axem  
 Regna, Trugum fulvæ populis qui voluit barenam,  
 Et quicquid latis rerum tractabat habenis  
 Roma potens, spondetque illi, si poplite flexo  
 Procumbat. Contraque refert diuina propago:  
 Perfide discedas, soli servire tonanti  
 Est opus, in tenues momento evanuit auras.  
 Post nucleum legis dirimens à cortice vulgo  
 Præbuit, æternæ referans compendia vitæ,  
 Dogmataque expungens scribarum mentis auaræ  
 Semina, pontificum luxus, fastosæque seclî  
 Gaudia perstringens, Pharisæa noxia turbæ  
 Carpit fulcra, dolos reteggit, prænuncia mortis  
 Spargit verba sua, non indignatus ab umbris  
 Infernis animas excire ad munia vitæ,  
 Reddere cognatis nutu, quæ sancta sepulchris  
 Corpora\*, quæ tristem dudum exhalare mephitim,  
 Disiectæ placuit rursus connectere formæ.  
 Invidia extemplo conflatur maxima, namque  
 Virtuti vitium bellat, diuina prophanis  
 Confligunt, pugnat tumido clementia fastu.  
 Supplicium petitur iusto de sanguine, poenæ  
 Poscuntur, sæuæ condunt spectacula plebi  
 Pontifices, tollit præses Romanus in altum  
 Membra salutiferi transfixo stipite regis.  
 Funditur innocuus toto de corpore sanguis  
 Vbertim celebris mixto fluit vnda cruore:  
 Qua scelus antiquum primaque ab origine mundi

p.244

\* Latæ



Eluitur, patria primæ piacula noxæ,  
 Scilicet humani generis percussus amore  
 Crudeles clauos, risus, atque aspera flagra,  
 Sputa, alapas, barba vulsus, diramque coronam  
 Sentibus horrentem subiit, mortemque fugare  
 Morte Crucis voluit. Quæ te clementia Christe  
 Ingratos nimium mortales, ferrea corda,  
 Vt morte eriperes, mortem perferre coegit?  
 Ne rogo, ne summi collati muneris unquam  
 Inferni obrepant vesana obliuia somni.

Dicite felices anima, quæ lucida templa  
 Incolitis, quoties renouarit mystica lethi  
 Signa sui, postquam sedes ferrugine nigras  
 Inuist, pulsisque æterna luce tenebris  
 Atque catenato resolutis patribus hoste  
 Sublimis superas Christus remeant ad arces.  
 Principio auratis confixit corda sagittis:  
 Corda \* virum sacri cœtus, quæ viuida virtus  
 Ardentis linguæ in speciem penetrarat, & alium  
 Spirabant calefacta nimis præcordia Christum.  
 Quem puro quondam sumebat turba fidelis  
 Pectore, sacra celebrans conuiuia cœna.  
 Scilicet immites hinc debellare Tyrannos  
 Exarmata valent flammanti pectora lingua.  
 Hinc veteres fugitare DEI, trepidare Senatus.  
 Mirari attoniti Sophia de plebe magistri,  
 Mirari & vulgus cœpit, cum cresceret ardor  
 Insolitus, numerumque magis quo senior ira  
 Redderet innumerum tormentis percita cades.  
 Recludunt Stephano cœlum stridentia saxa,  
 Vrentem moriens temnit Laurentius ignem:  
 Innumera rigidam constanti pectore mortem  
 Imbelles obeunt (res non audita) puellæ:  
 Pollutas pueri leti obtruncantur ad aras,  
 Inter mille neces fidei rutilantior ignis  
 Fulsit, Callaïcis veluti in fornacibus aurum.  
 Tum præses Syrius feruens Egnatius agris.  
 Christigenas pascebat oues, Romanus abegit  
 Miles, crudeli ducturus funera circo.  
 Sacra viri nimium formidant membra leones  
 Tangere, ab innocuo cobibentes ora cruore.  
 Quem rigidi immitis Traiani exhauferat ensis,  
 Protinus euulso (nam dirus pectore licitor  
 Traxerat) inscriptum cordi spectatur JESV  
 Nomen honoratum, quod tristia tartara longe  
 Formidant, superæ conspecta insignia dextra.  
 Tempore iam ex illo, multum cum viuendus ardor  
 Ferueret, inuidit demon transcendere cœlos  
 Stelligeros hominem, quibus ille expulsus Auerni  
 Horrendas subiit multa caligine sedes,  
 Hinc satagit Christi ut marcescant pectora luxu,  
 Crassetur vilis tumidusque nomismatis ardor.

Apostolorum.

Stephanus.

Laurentius.

Egnatius.

P. 245

Despectent



Despectent humiles vano ut turgentia fastu  
 Stemmata : sed vicit Christus superoque calore  
 Dispulit elatas Erebi de nocte tenebras  
 Hoste triumphato, ruit ille in tartara praeceps.  
 Sed magis infernus coluber cum sibila pressit,  
 Fallendi insidias viroso in corde volutat:  
 Cum velut à rabida, quam dira impellit edendi  
 Ingluies, pastor commissa armenta leana  
 Custodit, magis illa furit, licet improba fraudes  
 Dissimulet, renouatque latens in pectore bellum.  
 Secius haud coluber simulata pace venenum  
 Offundit. Sed quis summi omnipotentis alumnos  
 Fraudibus eripiat? placuit concire fideles  
 Sapius, atque magis quo frixit inertia mundi.  
 Propterea Assyrius nimio calefactus amore  
 Rettulit effossis flammantia stigmata membris  
 Franciscus, pauper terris, ditissimus aula  
 Principis aetherii, perrari signifer equi.  
 Alter ab Empyreis defluxit sedibus alma  
 Virtutis custos, fidei seruator Iberus\*.  
 Vtrinque innumera varia sub veste ceterua  
 Consendere polos, fremitu perterritus Orcus:  
 Nec non & Siculus\* flammam emisit, & ille  
 Conspicuus signis\* Picenae gloria gentis  
 Olim foeminei Senu: & Tuscus\*, & Vmber\*  
 Monstrare fidem, & gestata insignia, nec non  
 Sulphurea\* Nar albus aqua, priscumque Reate.  
 Quid referam sanctos monitus, praecordia crebra  
 Sacrorum vatum non exaudita prophanis?  
 Sed quae inuisa malis nuper demiserit, audi,  
 Dum sol obliquum bisseis partibus orbem  
 Supra quindecies centum numerasset ab ortu  
 Virginei partus, primae trieteridis annum  
 Postremum voluens, labuntur mystica calo.  
 Res comperta mihi: vos asperate canenti.  
 Est regio Europae gelido subiecta Trioni:  
 Bellaces habitant populi, quos Romula pubes  
 Vix domuit, toto quamuis dominarier orbe  
 Caeperit, & Latium iam formidaret Araxes  
 Armenius Tybrim, Pharium & pepulisset Anubim  
 Itala proiectos aluit, quae bellua fratres.  
 Illinc missa vadis ingentia robor a voluit,  
 Atque sub acreis praelabatur alpihus Aenus.  
 Aenus Caesareis ardentia ligna Caminis  
 Ducturus, vasto populus dum Sbocius\* antro  
 Effosum varios argentum promit in usus.  
 Hac Rhenus liquidi deuoluit fluminis undam:  
 Gallica Germanis qui separat arua colonis,  
 Romani toties expertus militis arma,  
 Ingentes paruo Tybri supponere lymphas  
 Pertulit, & Latiam vectare per aquora puppim,  
 Oceani bifido percellens vortice fluctus.  
 Hinc & Danubius non magnas deuehit undas,

Franciscus.

\* Dominicus.

\* Benedictus.

\* Nicolaus.

\* Catharina

Senensis.

\* Clara.

1501.

Germania.

Aenus fl.

vide Spiegel  
hic.

Rhenus. fl.

Danubius.



Passionis in-  
strumenta &  
crucis visa.

\* Arnonius.

Constantia.

Pici origo.

Basilea.

Brisacum.

Noric.  
Sicambri.  
Cimbri.

Vlma.  
Pfortzheim.  
Capnionis li-  
bro, de verbo  
mystico.  
Bohemi.  
Vangiones.

Ofi.

Montibus Arbonæ vix fusus, plurima nondum  
Flumina surripuit, nondumque binomius, ingens  
Alluit Elysios, Ariosque & Peonis oram,  
Et Lygios, tandem raptò tumefactus aquarum  
Euxinum ingreditur bis terno gurgite pontum,  
Extremumque caput limosa perdit in vluva.  
Hic demissa recens populi mysteria, mirum  
Attoniti inspectant homines, ac inania passim  
Inscribunt puro delapsa insignia cælo  
Sanguinolenta crucis: clari memoranda triumph  
Effigies late spectatur, spongia, flagra  
Visuntur, tunica inconsutis intima, clavi  
Cernuntur multo madefacti sanguine, telum  
Quod sacram sæuo discreuerat impete costam  
Pingitur, excubitor crista spectabilis ales,  
Ter geminique micant tali, quos inclita Christi  
Jecerat innocui sortitus tegmina miles.  
Non ignota cano, Cæsar monstravit, & ipsi  
Vidimus, innumeros prompsit Germania testes.  
Qua Rhenus tenui Ratis ex alpihus orsu  
Funditur, & maior suppositis influit aruis,  
Compertum, viditque lacus \* qui mille pererrans  
Muros piscosæ subiectos perluit urbis,  
Quos Constantini proles Oriente subactò  
Occiduas repetens stellanti murice terras  
Condidit, & proprio signavit nomine, cuius  
Principis (ut perhibent) demissus sanguine Pici,  
Pici arenosa genitus prope flumina Sicla.  
Audiit & tumidi iam ditior accola Rheni:  
Quique lacu missus leni submurmurat vnda,  
Mox alium præfertque lacum, quo denique fusus  
Inde humilis tumidusque voraxque euoluitur, inde  
Plenus & exiguus, rectus, sinuosus in orbem  
Labitur, hinc sumptis Basileam diuidit urbem  
Fontibus, ac vasto defertur gurgite, & alti  
Vorticibus magnis contingit tecta Brisachi,  
Aduersam celsa quæ nectunt abiete ripam.  
Noricus inspexit, torti audire Sycambri:  
Audiit & Mario domitus per vulnera Cymber:  
Senserunt amnes, senserunt aquora longe:  
Æquora torpenti glacie concreta sub axe  
Arctoo, propius conspexit Danubii fons,  
Spectarunt fortes ipsis sub mœnibus Vlma  
Assueti contis fortes bellare Sueni:  
Et Phorcin Latia donatus lumine lingua.  
Cui sacrum triplici celebratum dogmate \* nomen.  
Inspectant populi, quorum confinia Cæsar.  
Vastavit late victor, cum fusa Bohemus.  
Agmina colligeret, nuper dum prælia miscet  
Confractis vires latura rebellibus. Illinc  
Vangiones cernunt: latebrosa silentia filuæ  
Hercinia norunt: nouit perterritus Osus,  
Osus Aranisco dubium deductus, an illo

p.247

Hic



Hic genus antiquum referat, sub iudice lis est.  
 Vindelicus, Rhetus miratur, & aspera cade  
 Romani tremuit quondam provincia Vari.  
 Nec tam præcipiti formidine territus hausit  
 Armorum sonitum quondam Germanus arator.  
 Nec sic expauit, subitis cum motibus alpes  
 Intremuere: minus bellacis tempore Othonis  
 Pertinuit, claro primum cum mystica cælo  
 Dafluxere. Juiat lachrymas effundere, multa  
 Implorant veniam scelerum cum patribus urbes  
 Æni concutitur pons\*, illius accola nudis  
 Incedit pedibus celebrans amburbia, tantum  
 Relligio potuit, Minio color, & color atro  
 Nonnunquam similis, sacris mantilibus ipsi.  
 Sanguineis rutilans maculis insigne triumphi  
 Vidimus, Aethæo confusum pene liquore.  
 Puniceo interdum fulgor certauerat ostro:  
 Interdum fusci nigramentem nube coloris,  
 Permixtamque crucem rubro spectamus olim.  
 Nec morum discrimen erat: sacer atque prophanus  
 Jam conspersa sibi gestabant mystica, patres  
 Conscripti & pueri, conscriptus sexus uterque,  
 Et templa & vestes, à summa Cæsaris aula  
 Ad tenues vicos, ad dura mapalia ruris,  
 Cernere erat liquido deductum ex æthere signum.  
 Purpurea exceptum tunica quod ferre senator  
 Formidat, leui & matrona perhorruit armo:  
 Quod stupuit trito positum centone colonus,  
 Pauperis ad lychnum nati dum cannabe pero  
 Consuitur, teneras lacerent ne tristia plantas  
 Conslipata gelu, consertaque vepribus arua.  
 Miraturque sagi tenuato stamine miles  
 Insculptum mortis vitalia sede trophæum.  
 Miraturque simulque pauet, qui vasa sacerdos  
 Obnubit, celeri supra tectoria lapsu  
 Aduentare cruces, & lintea pingere pallet  
 Spectator, densusque redit formidine sanguis  
 Ad fontem è riuus, titubantque in pectore fibræ.  
 Nec non veloces ageret cum turbida lymphæ  
 Precipitata molas summo de vertice montis,  
 Atque excepta rotis tereret frumenta, minister  
 Qui lassata, vago stridore & pondere sacci,  
 Pollineque inspersus, placido dare membra sopori  
 Decernit, rubro sub tectis spargitur imbre.  
 Olli per pectus, per crus, per colla, per aluum  
 Sydereæ extemplo pingunt insignia guttæ.  
 Quam variis strepitus, quam dissona dogmata, quanti  
 Pro sensu capitum vario mussare susurri?  
 Crediderim dominum, celsæ qui præsidet arci,  
 Olim longa sui potantem obliuia mundum  
 Vidisse, & signis voluisse salubribus alma  
 Sapius (utque alias) excire ad limina lucis:  
 Quandoquidem fontes inferno sustulit antro

Vindelici  
Rheti.

Inspruck.

\* Intelligit  
sine dubio si-  
mile prodi-  
gium, quod  
imperante  
Otone M. ac-  
cidisse dicitur;  
de quo Herm.  
Contractus ad  
a. 958. Cruces  
in vestibus qui-  
busdam appa-  
ruerunt. Idem  
confirmat Ma-  
rianus Scorus.

Judicium ho-  
minum.

Tarta-



Tartareus princeps furias, scelerumque catervas  
 Immisit Stigii referantes abdita fontis,  
 Cuius mortifero dudum tenebrosus hiatu  
 Aera tabificum fumus pretexuit, inde  
 Angusta occultitur cœlestis semita vita,  
 Inde crucis miseros vesana obliuia tentant.  
 Hinc regina mali forte indignata sinistris  
 In cades & bella ruit sitibunda cruoris,  
 Præcurritque rotas scisso discordia crine,  
 Successus belli si forte arriserit, illinc.  
 Ambitio erumpit rebus tumefacta secundis.  
 Tumque infernis amor lucri, tum lurida gliscit  
 Ingluvies, studioque omnes excerpta per artus  
 Spurca Venus, lassus nimium quæ viribus hausta  
 Et parit ignavos animos, & torquet atroci  
 Invidia, & partos disperdit prodiga census.  
 Sic septemPLICIBUS crassatur perdita vinclis  
 Bellua multorum capitum, quibus impete seruo  
 Dejectam legimus quondam Babylona superbam:  
 Quam nec crudeli populasset milite Cyrus,  
 Nec centum crebro nutassent ariete porta,  
 Nec genesis falso lussisset dogmate mendax  
 Stellarum variis intentus cursibus augur;  
 Ni prius hostiles hausisset perfida mores.  
 Quos noster, pudet heu, iam dudum accersit orbis,  
 Quosque recens Babylon haustos cumulatus ambit.  
 Sed nec tam tumidum victrix te Gracia quondam  
 Reddiderant cæsi Marathonis in æquore Persæ:  
 Non delusa Rhodo, tergo non fulta Platonis,  
 Non Demosthenæa raptata volumine lingua,  
 Neve Stagereo motu peruecta tonantis  
 Ad solium, tanto pereuntis ludicra fama  
 Aut studio aut plausu quondam deposcis inani.  
 Quam nunc imbelles laudum mentita trophæa  
 Ostentant fastu, quam plebs ignara tumescit.  
 Molliciem subde & luxus, quos prisca Tarenti  
 Fama reformidat, quos nescit Apicius, odit  
 Atque Philoxenium guttur, quos reijcit ille  
 Qui sceptro indignus tractavit Serica pensa,  
 Et Sybaris parca spernens obsonia mensæ.  
 Sed quid Achemeniis quasitam Regibus olim  
 Immanem Venerem (pudet heu memorare) prophani  
 Nomine damnatur qui non admiserit. Omnes  
 Quotquot collegit vitiorum Roma cloacas,  
 Assyrium Tyberi cum iam admisisset Orontem,  
 Mox propriis opibus, propriis ruitura sub armis,  
 Iam dudum excipiunt. insultant Maurus, & Afer,  
 Ægyptus, Libye subsannat, Thracia ridet.  
 Nec fidei monitis auscultant, Vincimur, aiunt:  
 Colluvies scelerum, vitiorum fœtida nubes  
 Hinc illuc pridem migravit, perfida turba  
 In Christum laxant impune repagula, nobis



Non impune datum, si Christum lingua laceſſat,  
 Virginis & nomen nobis non ſpernitur alma:  
 Sed nec ſacrâ Dei nobis, nec templa, nec ara  
 Venduntur, dominis quo tandem cernimus uſque  
 Inſultare canes? purgemus noxia, rectum  
 Firmemus, noſtris opus eſt indicere bellum  
 Moribus in primis, mox bella inferre prophanis  
 Scilicet in caſſum patiemur myſtica celo  
 Delabi, aut veteris tantum effuſiſſe cruoris  
 Sacrata fidei proceres? aut denique Chriſti  
 Nil nobis predeſſe necem patiemur amaram?

Subjectos populos compesceſcas, inclyte Caſar,  
 A vitis: neque enim tantas regnator Olympi  
 Virtutes & opes tibi contulit, ut tibi tantum  
 Prodeſſent, celsa rariffima munera dextra.  
 Dona recognoſcas fortis cœleſtia Caſar.  
 Sopitam turbis ſacrato pollice barbam  
 Vellere ne pigeat, tua ſunt hæc munia, Caſar:  
 Stringere conſtantis fidei pro legibus enſem,  
 Inſculptaque cruce \* infidos Maomethis alumnos  
 Pellere. Quæ tibi ſunt iam tradita, deſine Caſar  
 Alter ut inſumat. te contemnente, miniſtri  
 Chriſto non deſunt Reges; nec tempore deſunt,  
 Ut mores abigat Satana impellente neſaſtos,  
 Et crucis imperium longe lateque propaget.  
 Tu dudum lectus, nunc inuitatus, ad altas  
 Dirige (ne pigeat) felicia carbaſa portus.  
 Non deerunt equites, non instrumenta, fideles  
 Adſunt Italiae populi, lectiſſima pubes.  
 Viribus indomitis inſtructas ecce phalanges,  
 Tormenta, & celeres preſtat Germania curruſ,  
 Et nervos belli, fauor ingens cœlitus, idem  
 Quo fretus iam pene puer certamine Gallos  
 Contundis Latio, nec dum diademate frontem  
 Conteſtus, multosque domas. Gens eſſera nuper  
 Rettulit Arctos inſiſſum vulnus in axes:  
 Iam metuuntque Gethe, metuit quoque Maurus, ut olim  
 Fugerat Edas indignabundus in ortus:  
 Amoniis equitum cuneus diſtinctus ab oris,  
 Dum Carolus \* bello iam Parthenopea ſubiret  
 Moenia, magnanimis qui mox ſuccumberet orſis:  
 Cuius nec geſis Byzantia turba ſariſſas  
 Duxiſſet contra, reſtuus quoque Boſphorus vdaſ  
 Velivolam claſſem Thracum excepiſſet in vlnas:  
 Ter ſervum Nemphis iure indignata tyrannum  
 Ceſſiſſet Pharium velamina torta tiaram.  
 Nunc aquila expeditur, rutilum quæ inſigne triumphi  
 Per Tanaim, Nilum, calidæ per rura Sieneſ  
 Perque Arabum campos, ambuſtaque ſolibus arva  
 Veſtet ad aurora populos, ad ditia regna.  
 Sed vereor, Caſar, veteri ne quaſſa timore

Ad Caſarem  
 exhortatio.

\* Paſſagio  
 in dicto.

\* Rex Gallo-  
 rum 8. vide  
 Gauguin.



*Occiduum turbet subitis incurſibus orbem  
 Hoſtica gens fidei : veluti cum percita voce  
 Evigilant, nudo meditantur prælia dente  
 Turba canum, ſurdis ſi forte irritibus hoſtem  
 Nil arcent, nec barbatus effundere vanos  
 Contulit, inſultum expediunt, quo territus hoſtis  
 Horreat, inque illum poſſit formido referri.  
 Rumpe moras, Preſtan videat Gangeticus armis  
 Caſaris excindi Perſas, non ſpernere Hydaſpem  
 Aut Hiſpanim, pontes patrios nec viſere ſaltus,  
 Donec odoratos alacer conſcenderit Indos.*





**HENRICI BEBELII**  
**CARMINA**

IN MAXIMILIANUM IMP.

**LUDOVICI HELIANI**  
**ORATIO**

IN

CONVENTU AUGUSTANO MAX. HA-  
BITA, IN VENETOS INVECTIVA.





LECTORI SALVTEM!

BURCARD GOTTHELF  
STRUVE.



Henricus Bebelius, Justingæ, quæ Sueviæ pagus est, \* prope monasterium Vrspringen, parentibus rusticanis quidem, sed honestis est prognatus. A puero omne studium, omnemque laborem ad litterarum optimarum cognitionem contulit: iurique civili simul operam dedit. Cumque ad carmen fundendum venam nactus esset non infelicem; eamque uno alteroque specimine probatum iuisset, laurea & insignibus a Maximiliano Augusto fuit donatus. Anno nonagesimo septimo, supra mille quadringentos in Tubingensem Academiam fuit accitus, ut politio- rem ibi doceret litteraturam. Frequenti itaque auditorio, poëtas, oratores ac historicos explicuit. \*\* De scriptis eius, sic iudicat Hanckius: \*\*\* sequentia tempora, quibus superstes fuit, ex scriptis, quæ publicavit, cognoscimus. Sæculi decimi sexti anno primo ad dictum Imperatorem de Germaniæ laudibus orationem; quarto, de eiusdem Imperatoris contra Bohemos victoria Paræneticon; octavo, aduersus Leonardum Justinianum Venetum, pro Imperatoribus Germanicis, apologiam; decimo, carmen, quod in Asophum Pseudo- prophetam composuit, luci publicæ commisit. Quos cum aliis eiusdem libellis, præclara Istorum triga, Simon Schardius tomo I. antiquæ Germaniæ illustratæ; Marquardus Freherus tomo II. Scriptorum de rebus Germanicis; Melchior Goldastus parti X. & XVIII. politicorum imperialium inseruit. \*\*\*\* Hæc ipsa autem, quæ hic exhibentur poëmata, in opusculis Bebelianis, Argentorati 1514. 4. coniunctim editis non reperiuntur: Prima est ecloga Trium-

\* Quenstedt de patr. illustr. vir. pag. JUSTINGAM, quæ pagus & arx Sueviæ est, patriam nacti sunt; JOHANNES STOEFLERUS, Mathematicus insignis, qui Tubingæ docuit, auctor operis Ephemeridum. Vide Gesn. in Bibl. Et HENRICUS BEBELIUS, Germanus Poëta, iis adnumerandus, qui Romani eloquii usum, temporum iniuria, pariterque hominum incuria neglectum reducere & genuino nitori restituere conati sunt.

\*\* Melch. Adami in vitis Philosophorum pag. 12. Mart. Crusius Ann. Suevic. lib. IX. part. III. cap. X. pag. § 16. & cap. XI. pag. § 18.

\*\*\* De scriptor. Rer. Roman. part. I. cap. L.

\*\*\*\* Plenius eiusdem scripta recenset Conradus Gesnerus & in Pandectis Brandenburgicis Christophorus Hendreich, voce Bebelius.



*Triumphalis de victoria Caesaris Maximiliani contra Bohemos*, qua pastores inter se de eadem inducit colloquentes, demum pacem hac victoria partam pastoribus tam necessariam commendat. Hanc autem eclogam, in fine Blancae Mariae, quæ vxor erat Maximiliani, commendat. Ista vero victoria in bello contra Rupertum Palatinum de Bohemis fuit parta, de qua Trithemius: \* *ex Bohemis etiam non paruum exercitum mercede pugnatorum conductum Rupertus euocauerat, contra quos Rex Maximilianus non longe a Ratisbona personaliter properauit ad bellum, habens in Comitatu Fredericum Marchionem Brandenburgensem, & Albertum Bauariae Ducem cum aliis Comitibus atque Nobilibus multis. Facto igitur congressu bellum atrox committitur; & aliquandiu ambiguo Marte pugnatum Victoria tandem Regi cessit Maximiliano, & Bohemorum exercitus ab eo contritus est, e quibus in ore gladii ceciderunt mille sexcenti viri, capti fuerant similiter sexcenti, reliqui fuga lapsi necessarium salutis perfugium quaesuerunt. Rex autem Maximilianus obtenta contra Bohemos victoria milites plures creauit auros, & partes hostiles in eo conflictu valde infirmauit & contriuit.*

Alterum sequitur poëma de eadem victoria, qua Germaniae Principes cohortari conatur, vt pro antiqua virtute Germana, contra Bohemos, tanquam hæreticos, coniunctis viribus pugnent, pro terra illorum expugnanda quod prout in fine videtur, Tubingæ Kl. Octobris M D I V. fuit scriptum.

Hoc excipit *Elegia Hecatosticha & querulosa ad Principes Germaniae*, vt desinant ab intestinis dissidiis, & coniunctis viribus contra hostes Germaniae agant.

Demum succedit *Poëma ad Maximilianum & Germaniae Principes*, pro Ducatu Mediolanensi ex Francica seruitute ad Imperii libertatem vindicanda.

Hæc Bebeliana excipit LUDOVICI HELIANI ORATIO. Erat hic Vercellensis Senator, Montisferratenfis Marchionatus est oppidum, & Gallorum Regi ad Germanos non solum sed Vngaros etiam missus Orator. Testatur de eo Cuspinianus\*\* dicens: *Helianus item Ludouicus Francorum regis Orator, cum quo inter cæteros comes fuimus in Hungariam ad Vladislaum regem, Caesaris Maximiliani & Ludouici Christianissimi regis res acturi, cum Domino Achille de Crassis, Pontificis summo legato. Postulabat autem Cæsar per legatos a Ludouico XII. vt Rex mittat vnum Oratorem Jurisconsultum ad diætam Imperialem pro habenda Oratione & persuadendis illis quæ petet & proponet Cæsar.\*\*\** Hæc autem Oratio, in Comitibus Augustanis anno 1510. fuit dicta, qua in Venetos nimium inuehitur, ipsorum superbiam nimiam dominandi cupidinem inculans, dicens de iisdem: *hi sunt homines, qui aiunt apud se natam nobilitatem esse, qui soli diuites ac modesti, soli sapientes sibi videntur esse in oculis suis. Ipsorum culpa vel dolo Hierosolymam ab Ægyptiorum Saladino dicit fuisse recuperatam, Constantinopolim a Turcis captam. Principes igitur Ger-*

S s s 3

manie

\* Chron. Hirsaug. ad an. 1504. Sequitur Gerh. a Roo. lib. XI. pag. 555.

\*\* In vita Maximiliani pag. 412.

\*\*\* Prout Andreas Burgus Margarethæ Austriacæ narrat iater Litteras Ludouici XII. Tom. II. pag. 70.



mania cohortatur, ne pacem petentes Venetos audiant, pergant potius in iisdem debellandis. Eandem etiam Politicis Imperialibus inseruit Goldastus.\* Depromserat istam Freherus ex Trithemii Chronico Hirsaugiensi, isto tempore nondum edito. Verum dum Trithemius eandem mancam admodum ediderit, hanc ex editione Augustana plenius exhibemus, quo illo ipso anno adhuc facta, prout ex fine patet: *Impressum Augustæ Vindellicorum per M. Joannem Othmar, apud Cenobium sanctæ Ursulæ, cis Lacum. Anno salutis humanæ M. D. X. die XII. Maji 4.* Factam autem hanc impressionem Cæsaris iussu, Jacobi Bannisi, qui Cæsari erat a secretis, præfatio præmissa nos docet, idque ideo, quia insigni cum adplausu fuerat excepta. Subnexus est editioni Augustanæ Eiusdem Poëma, quo Cæsarem cum sociis tanquam Venatores, Venetos, tanquam feras persequentes, inducit, eademque ratione Venetos perstringit, in fine demum illos exhortatur, ut ipsi se suaque Foederatis contra ipsos subiiciant.

\* Part. XXI. pag. 978.





p.251 HENRICI BEBELLII EGLOGA  
TRIUMPHALIS DE VICTORIA CÆ-  
SARIS MAXIMILIANI CONTRA  
BOHEMOS.

INTERLOCUTORES.

Faustulus, Lycidas, Turba pastorum.

**U**nde venis Lycida, vel quo vis pergere letus?  
Aut sibi tam dulcis quid vult ascula referto?  
Qua recinente canunt saltus rupesque profunda?  
Dum procul audieram, rebar duxisse choream

Faustulus.

Monticulas Faunos, & ruris numina cuncta  
Panaque contentum dulci modulamine diuis  
Composuisse tamen stulte, quid fistula Panos.  
Ad numeros faceret tantos? vel dulcis aedon?  
Flebilis aut faceret moribundi cantus oloris?  
Aut qua cantando cælum vibrantibus alis,  
Ætheraque ascendit toties dulcissima alauda?  
Tibicen Jouis es dignus, dignusque minister  
Latificans montes, valles, cum gramine campos  
Te recinente pecus gaudet, tacet atque lycisca.  
At dic, qui fueris mihi coniunctissimus olim,  
Cur tuus effuse tam animus latetur amico?  
Ab sine, difficile est cuiquam mea gaudia dici  
Quæ vix exprimeret cunctis de montibus Echo.  
Fac tecum silua, montes, & notus amicus  
Gaudeat ô Lycida, modicum est gaudere latenter,  
Ni sciat acceptus cui es, vel quem diligit ipse.  
Dicam: sed liceat viridi considerare in herba.  
Cumque piris plenum lapidosus ipse canistrum  
Cascolosque hodie portare Faustule in urbem  
Vendendos, Hister gelidis quam perluit undis  
Quæ (quoniam ratibus fuit opportuna locandis)  
Nomen habet, ratibus vel quod sit pons ibi factus;  
Ecce ruunt ciues effuse in gaudia leta.  
Tympana grandisono penetrabant aera bombo,  
Concordesque modos fundebat fistula dulcis,  
Ludebantque choros, pueri, innuptæque puella:  
Accessere senes vetula, nec ruga senilis  
In gyrum erubuit volucris saltare bacillo.

Lycidas.

Faustulus.

Lycidas.

Ratispona.  
Descriptio.

Hic



Hic plateæ passim vulgi clamore resultant :  
 Ast alibi miles galea munitus & hasta  
 Armato occurrit pariter, fragor æthera pulsat :  
 Effractæque haste volitabant frustra per auras,  
 Inque foro flammæ lucentes nubila pellunt.  
 Quicquid odoriferum molles legere Sabei,  
 Incensum fuit, & flores per strata refusi.  
 Nec superum neglectus honos, altaria fumant  
 Munere sacrifico, velatæ frondibus ara.  
 Quærebam stupidus, quid nam hæc sibi gaudia vellent.  
 Hic aliquis, cui multa fides proluxaque barba  
 Dixerat, I pastor, cunctis pastoribus ipse  
 Protinus enarres, ut agatur festa quotannis  
 Illa dies, peperit quæ nobis una salutem,  
 Et pacem & requiem, & securos præbuit agris.  
 Non rapidi post hæc prædas ex more leones;  
 Saltibus aut nostris vulpes grassabitur ultra :  
 Pascua, rura, canes, agni, sinæque capellæ,  
 Vobis parta salus, pastores dicite laudes  
 Induperatori, dederat qui munera tanta.  
 Illius inque decus victoris gloriam, honores,  
 O patrium carmen, patrium pæanæque cunctis  
 In triuiis leti vos congreginate bubulci.  
 Pastor ego simplex, hæc non intelligo, dixi :  
 Clarius ostendas, precor, o pater ipse togate,  
 Et tibi si quando mecum diuerteris, adsit  
 Lac ouium dulce, & setosi sinciput apri,  
 Jamque nuces coryli, & quærna ex arbore glandes  
 Ille refert, vestras forsitan peruenit ad aures  
 Quam Boiema cohors nullis obtemperet unquam  
 Vocibus Augusti, nec quas Ecclesia leges  
 Tradidit obseruet, vicinis prælia quanta  
 Mouerit, & contra diros foueatque latrones.  
 Aiebam, scio quod totus iam nouerat orbis.  
 (Prob dolor) in nostra est multos grassata per annos  
 Hæc plebs rura, casus, pastores, atque capellas.  
 Damna referre piget, quæ fecerit ipse satellites  
 Jam pridem immissus : Sed plura edicere iussus  
 Incipit, hanc iustis Cæsar compescuit armis  
 Maximus, & retulit niueos ex hoste triumphos.  
 Quo pacem nobis peperit, gentique Alemannæ :  
 Inque latere specu demissa bellua cauda  
 Cogitur, haud audens posthac immittere vulpes.  
 O felix Lycida, felices atque capellæ.  
 Illa dies felix, o felicissime Cæsar.  
 Laus prior æterno est & gratia habenda tonanti,  
 Qui mare, qui terras moderatur, & omnia cæli.  
 Auspicio cuius ceruix effracta superbi est.  
 Sed quoniam Lycida capiunt non pectora nostra  
 Letitiam tantam, cito concedamus ad agmen  
 Fac age pastorum, gratissima nuncia cunctis  
 Narrantes, dulci quia consedere sub umbra  
 Glandifera fagi, quæ non procerior arbor  
 Siluis, quæ patulas protendit & undique frondes.

Bohemi hæ-  
 retici & re-  
 belles.

Lycidæ.

Atque



p. 253

Atque pedes fessos ibi fessaque membra lenabis.  
 Faustule tu, quoniam fandi est tibi copia maior  
 Dicit, si quicquam neglexeris ipse, susurro  
 Implebo tenui, pergas audita referre.  
 Vos modo pastores, quicunque habitatis in arctis  
 Silvarum casulis, quibus & sunt pascua cura,  
 Plaudite latantes, gaudete feriteque terram  
 Ambobus pedibus pueri, iuuenesque senesque.  
 Aurea falciferi redeunt iam secula diui.  
 Jurgia nunc cessant, lites, discordia, bella:  
 Nec lupus insidias pecori, nec ouilibus usquam  
 Instruet, aut ullas fraudes meditabitur ursus.  
 Fulua leona famem proprio de sanguine post hac  
 Sedabit, trepidans exarmata atque latebras  
 Linquere formidans, nec furtim callida vulpes  
 Eripiet semper tantas ex more rapinas.  
 Plaudite latantes, gaudete, ut supra  
 Ambobus pedibus, &c.  
 Dicite quæ vestras mouerunt gaudia mentes?  
 Nec choreæ nobis agiles cessantibus, atque  
 Desuerint cantus, modo dicite gaudia tanta  
 Plaudite latantes, ut supra.  
 Ambobus pedibus, &c.  
 Nam Leo Boiemus siluis rurique timendus  
 Hactenus, & toti nil formidabilis orbi  
 Per quem tot iam iam passi sumus, atque ministros  
 Opprobria, & sannas, tot damna, incommoda, cades,  
 Jam timide horrescit proprias exire latebras,  
 Victus prostratus, & multo vulnere casus,  
 Nunc securus erit, pastor, nemus, arua, colonus  
 Plaudite latantes, ut supra,  
 Ambobus, &c.  
 Omnia fors versans auibus sperare finistris,  
 Et docet haud rebus nimium tumuisse secundis.  
 Si crebro hoc cuncti, qui nunc moderantur habenas  
 Regnorum, repetant, erit haud iniuria mundo.  
 Dicite quam primum victoris nomen amici,  
 Illius & laudes vel compita nulla filebunt.  
 Princeps Romanus regum Rex Maxmilianus,  
 Magnanimus, fortis, victor clarissimus armis  
 Magnus, felix, regum iustissimus, vnus  
 Boemos vicit felici & Marte cecidit,  
 Egressos patriis siluis, & iure triumphat.  
 Plaudite latantes, ut supra.  
 Ambobus pedibus, &c.  
 Dicite io iuuenes, & io ter iubila dantes  
 Exoptata diu differtis gaudia quare?  
 Cur dulces choreæ cessant? ascula quiescit?  
 Tibia det sonitus digitis pulsata canentum.  
 Et quoniam maius viridantes pingitur herbas,  
 Omnia nunc rident, virides nunc undique siluæ:  
 Tempora mox lati pexis redimite coronis,  
 Floribus & variis silvarum frondibus omnes  
 Sordeat haud fagus, nec duro robore quercus

Faustulus.

Turba pasto-  
 rum.  
 Faustulus.

Turba pasto-  
 rum.

Faustulus.

Lycidas.



Eufulius.

Laudatio  
paci.

Propter aqua riuum, nec populus alta pudori est,  
 Dicite io iuuenes, ut supra.  
 Cur dulces choreæ cessant? ascaula quiescit?  
 Dicite io iuuenes, & io ter dicite leti:  
 Et modulos faciat resonans ascaula suaves  
 Currite & in circum pariterque agitate lacertos,  
 Laudantes Regem de quo pax alba redundat.  
 Dicite io iuuenes, & io ter dicite leti:  
 Vnicus incipiat primum Rex Maxmiliane.  
 Diligat ex alto te summus rector Olympo.  
 Inde iterent alii quicquid cantauerit iste:  
 Teutonice specimen terra Rex Maxmiliane,  
 Tu pater es patria, te te Germania fortis  
 Laudat & extollit, te nobilis ipse Sueuus  
 Subditus agnoscit, vel formidabilis vnus  
 Toti orbi quondam, atque hodie nec degener armis,  
 Teque triumphantem summo veneratur amore.  
 Tu decus es nemorum, tu spes pastoribus vna  
 Te docti celebrant vates, te montibus altis  
 Agresti calamo pastor super æthera tollit,  
 Concentuque pia volucres super arbore laudant,  
 Mox faciat modulos resonans ascaula suaves,  
 Et facite in gyrum lasciuia volumina saltu  
 Post modo laudantes pacem, Pax optima rerum:  
 Pace polus constat, nutrit concordia cœlum:  
 Pax hominum genitrix, pax altrix, hæc eadem pax  
 Seruatricum hominum, dira pax mortis abactrix  
 Et male matura, vitæ custodia dulcis.  
 Pace maritalis firmantur fœdera lecti,  
 Paceque ciuiles connubia læta frequentant  
 Pace domus, villa, seruantur & inclita regna.  
 Pax alii agricolas, sata læta, boumque labores.  
 Pax alit hærentes quocunque in stipite fructus,  
 Arboreumque genus, nutritur vinea pace  
 Pace bidens & marra vigent, & vomer aduncus.  
 Illa viatores nigra sub nocte tuetur;  
 Illa facit tutos vasto super æquore nautas,  
 Pace nigros tute currit mercator ad Indos.  
 Paceque pastores gaudent, segnesque subulci;  
 Pace nemus, silua, pecudes, & quicquid vbiq; est  
 Natura gaudet, iusto moderamine crescens  
 Vis, dolus, insidia, cessant in pace rapina.  
 Pace latro cessat, cessat nocturnus abactor  
 Classica pace silent, in duos arma ligones  
 Incuruasque simul nostrorum lancea falces  
 Vertuntur, frameæ conduntur arantis in usum  
 O pax alma veni pomis, onerataque spicis  
 Hoc optant iuuenesque senes, facilesque puella.  
 Ante tuas aras statuentes dona quotannis  
 Pingua, pastores rogitant hoc supplice voce:  
 Pax adsis, terras post hæc nec desere nostras.  
 Post optate modo multos feliciter annos  
 Atque dies lætos, o diuo Maxmiliano,  
 Qui peperit nobis pacem post tristia bella.



p.255 **ILLUSTRISSIMÆ ATQUE AUGUSTIS-  
SIMÆ ROMANORUM REGINÆ BLAN-  
CÆ MARIÆ, HENRICUS BEBELIUS.**

**S**ALVE *fæminei sexus, laus, gloria, splendor,  
O regina orbis sit tibi Blanca salus.  
Ignoti carmen nec dedignere poëta,  
Aut legere, aut doctis auribus accipere.  
Hæc fore grata tibi rebar, quia magna mariti  
Gloria narratur, laus, honor, atque decus.  
Cumque tuo tibi me postremum Maximiliano  
Commendo regi, qui fauet ingenius.*

**DE VICTORIA CHRISTIANISSIMI  
AC INVICTISSIMI REGIS ROM. MAXIMI-  
LIANI HABITA CONTRA BOEMOS, AD CUNCTOS GER-  
MANIÆ PRINCIPES, VT TOTIS VIRIBUS PRO ILLORUM  
TERRA EXPUGNANDA COADUNENTUR, PARÆNETI-  
CON HECATOSTICHON HEN. BEBELII JUSTIN-  
GENSIS, POETÆ LAUREATI.**

p.254 **N**UNC *properate duces Germani, martia proles,  
Nunc properate precor, frameas nunc stringite vestras.  
Nunc tuba terribilis vocat, & nunc barbaræ buxus.  
Nec vos priuatum studium, tristisque simulas  
(Regnorum pestes, atque instrumenta cadentis  
Imperii nostri, veluti quondam Æneadarum  
Atque Macedonici sceptri) tam religiosam  
Militiamque piam, iustam, facilem atque fidelem  
Impediat, datur o vobis occasio summa  
Vincere Christi hostes, & duro Marte Boemos  
Pellere Teutonicisque plagis, gentemque rebellem  
Subdere vel Christo vel ferro excindere totam.  
Sit pudor o procures, quia durus apostata sanctæ  
Contemptor fidei, quam sancta Ecclesia firmat,  
Teutonice in gremio simul intra viscera terre  
Impune exultet, vel tot dominetur in annos  
Latus, & ex omni sibi parte trophæa reportet.  
Terreat haud nostros populus famatus ubique,  
Barbarus atque ferox, audax & strenuus armis,  
Et quos maiores nostri non vincere multis  
Aduerso augurio bellis valuere superbos.  
Nunc properate viri frameis, clypeoque corusci.  
Tempus adest rupisse moras, agite o Alemanni  
Jam cumulate decus, animosque afferte paternos.  
Nunc Deus est præsens, cursu & fortuna benigno.  
Belliger ante oculos vobis stat Maximilianus,  
Militiæ pecimen, qui belli fulmen atrocis,  
Qui deus est regum, virtutum gloria, splendor  
Imperii quo nil toto felicius orbe  
Fortius atque simul, quem magnus Carolus actis  
Admittit socium, & clarissima nomina Othonum.*

*Bohemi  
pregnatio.*



Hoc duce cadentur tota à radice Boemi,  
 Innumeras quorum turmas prostravit ad unum  
 Forti animo nuper, nondum altera luna refulget  
 Rex bonus & Mauors illi dum bella Roberti \*  
 Ense iuuare student, partemque fouere sinistram.  
 Egressi siluas patrias populantur inique  
 Agrestesque casas, & pinea tecta fauillis  
 Commendant tepidis, longe lateque cremantes  
 Marchio quas iusta villas ditone gubernat.  
 Non secus atque lupus campis cum vidit apertis  
 Balantes late pecudes, irrumpit & amens  
 Et stimulante fame, & praeda dulcedine captus  
 Obuia quaque necat vesano corpora dente.  
 Nec rabies habet illa modum, dum strata iacebunt  
 Corpora cuncta ouium, vel turba animosa molossi  
 Acris insliterint in deuia tesquaque anhelum  
 Aut agitent, torue vel discerpere minantem.  
 Haud aliter vesana phalanx, legio ista profana  
 A puero consueta malis & viuere raptis  
 Omnia deuastat, cunctos populatur agellos,  
 Cede furens hominum nullo discrimine stragem  
 Vndique committit matrum iuuenumque senumque  
 Mox querule voces, & verba miserrima pubis  
 Afflicta veniunt sacra Regis ad aures.  
 Dispulit ille moras miseris succurrere, multa  
 Vndique conueniunt turma peditesque equitesque:  
 Instruiturque acies trepidabilis atque timenda.  
 Fecerat hanc miram solers prudentia Regis  
 Pugnantes inter primos Rex visus ubique:  
 Affuit Albertus pariter dux Boius, atque  
 Marchio Fædricus, & nomina clara duorum  
 Gnatorum, Brunsvicensis dux vulnera honesta  
 Accipiens, aderat pugnax, comitumque caterua  
 Contra stat frendens, acies atque arma capeffens.  
 Arduus hic collis fuerat, quo perfida turba  
 Confluxit, galeis chypeisque micantius ardens.  
 Classica iam resonant, canor & vocat arma tubarum:  
 Attolluntque animos acies, clamoribus æther  
 Personat, & clarum nigrescit puluere cælum.  
 Protinus innadunt nostri, iam tristis arundo  
 Jamque volant glandes primum, mox cominus hastis  
 Bellum ingens oritur, stant firmo robore dudum  
 Perfidia famuli, multumque cruoris utrinque  
 Funditur inque vicem: donec violentior illis  
 Et magis instructus veniens exercitus hostem  
 Vndique lethiferis noster circumstilit armis,  
 Jamque virum strages, oriturque miserrima cedes  
 Victa fugit legio, & latis prosternitur agris.  
 Jamque fuga cuncti trepidant, & vulnera verso  
 Accipiunt tergo, pereunt sine fine fugati.  
 Proterit hunc sonipes, vibrata hunc lancea sternit  
 Hic cadit ille humeris capulo tenus accipit ense:  
 Hic iaculum; gemit hic, hic tendit ad æthera palmas:  
 Atque modis variis petitur victoria nostris.



Postremo captos facile haud numerabile vulgus  
 Deducens tristes manibus post terga reuinctis,  
 Urbis amœna adiit Rex mœnia letus ouansque,  
 Quod bona sit ratibus, quæ nomina clara resumpsit:  
 Et nostro celebrat niueum de more triumphum.  
 Militiam auratam post debita præmia laudis  
 Contulit omnibus his, facinus quos grande decorat.  
 Nunc properate viri procures, ô martia pubes.  
 Perfida gens penitus poterit nunc fortiter armis  
 Exscindi, & nostræ purgari infamia terra.  
 Nunc vobis animos simul & victoria vires  
 Congeminant, victi hostes nil amplius ausi,  
 Seruiliq; metu, turpique pudore fatiscunt.  
 Vobis clara ducis virtus & vincere sueta  
 Æternos pariet nunquam deuicta triumphos.

Ex Tubinga sexto Calendas Octobr.

M. D. IIIL

## LAUS GERMANORUM

ELEGIA HECASTICHÆ ET QVERVLOSA  
 GERMANIÆ AD PRINCIPES GERMANIÆ SIMILTATES  
 INTESTINAS ATQUE CIVILIA BELLA  
 DETESTANTIS.

HENRICUS BEBELIUS AUCTOR.

AN ne tuam gaudes ferro proscindere matrem,  
 Germane ô princeps? cur lacerare studes?  
 An ne meis meritis tam præmia dira rependis  
 Quæ genui in lucem, teque aluique frequens?  
 Quæ te fortunæ in gremium cunctisque locavi  
 Exundantem opibus, corporeisque bonis  
 Vt contabescam quid non seruire rubescis  
 Igne, fame, ferro, dilanierque parens?  
 Pone truces gladios atque arma micantia condas,  
 Classica nunc cessent Martis & omne nephas.  
 Parce meis lachrymis, misera miserere parentis:  
 Parce pio generi Teutonicisque viris.  
 Quæ si iura tuis pratendas congrua factis  
 Non opus est armis, non tibi militia.  
 Maximilianus adest iudex Astræa relinquens  
 Præsida quo cælos gaudet adesse polo  
 Iudicio cuius potuit diffidere nullus,  
 Ni foveat causam cui male fidat iners.  
 At placuit si filiis ingentia regna  
 Querere forti animo, Martigenæque manu,  
 Inque Getas conuerte manus, Turcasque profanos  
 Hæc tibi regna potes asserere inque fidem.  
 A patria abstineas, cui si vel parcere nescis,  
 Parce tuis natis, parce tuo populo.



Nam si bella moues, in bella laceffere pergis  
 Induperatoris belligeramque manum :  
 O quanto patriam fœdabis sanguine terram ?  
 Quotque cadant dira fortia corda nece ?  
 Cum quibus haud ægre Insubres mibi debita regna  
 Eriperem à Francis liligeroque duce.  
 Italiamque meam potuissem subdere nostro  
 Imperio, Siculos, Romulidumque lares :  
 Quasque solet Venetus per summum callidus astum  
 Inuasisse urbes proditiōis ope.  
 O quæ Germanas agitat discordia mentes,  
 Vertere vos tendat factio praua ducum.  
 Nam dum Germani fratrum tenuistis amorem,  
 Sanctaque vobiscum publica iura dabam ;  
 Victrix ipsa domos solis per utrasque cucurri,  
 Per calidas Libyæ per Boreæque plagas.  
 Incessi illustris totum regina per orbem  
 Submisique meis fascibus orbis opes.  
 Per medios Asiæ campos mea signa volabant  
 Et Solymos tenui sub ditione viros.  
 Atque leues domui Græcos, Afrosque bilingues,  
 Atque meas frameas sensit Iberus atrox.  
 Juris erant nostri Tybris, & Padus, atque Timæus :  
 Cum Sarno Siculum Sardiniaque fretum,  
 Tunc tria Gallorum nostra ditione regebam  
 Regna, quoque Histrorum, Dalmatiaque lares.  
 Tunc tributa libens mibi Sarmata pastus equino  
 Sanguine debebat, tuque Boemæ fidem.  
 Heu quo Germanæ vires, quo decidit orbis  
 Imperium, heu quantum degenerastis auis ?  
 Ambitio & discors ciuilis factio turba  
 Omnia regna ruens vertere, meque parat.  
 Proh dolor ! imperium quæsitum sanguine tanto  
 Atque seruatum robore & acri animo,  
 Hoc labefactauit rerum discordia pestis,  
 Saluaque vix tandem viscera nostra gero.  
 Ergo tot frustra suscepit uterque labores  
 Fredericus, tanto sanguine regna parans :  
 Conradus, Henrici, & clarissima nomina Othones  
 Maximus atque horum Carolus imperio.  
 Tot frustra terras domuerunt Marte secundo,  
 Totque sacras leges imposuere viris,  
 Et quæ vulneribus, quæ sanguine parta meorum,  
 Quæ quoque sunt olim subdita regna mibi,  
 Occupat iniuste Gallus, Venetique dolosi,  
 Italicique viri, plurima Turca ferox.  
 At contenta forem, si non ingloria saltem  
 Teutonici videam limina tuta soli.  
 Quod si communi procerum pax candida vel nunc  
 Et studio & voto Teutonicis dabitur.  
 Salua mibi sunt non tantum Alemanica rura,  
 Inuictaque geram regia sceptræ manu :  
 Verumetiam quicquid mibi cruda tyrannis ademit,  
 Lauriferis signis iam reparare queo



*Ibo per extremam Scythiam feritate subacta  
Caspia sceptrigeram littora meque colent.  
At fili princeps, quid me civilibus armis  
Impetis? Et pacem frangere dirus aues?  
Dum nec iura sinant, nec lex sanctissima tecum  
Sentiat, aut veterum scita sacrandae patrum.  
Parce tuo exitio subiectis parce popellis  
Consule Teutonia cum propriisque focis.  
Namque videre mihi videor iam tecta domosque  
Cum villis urbes Mulcibero esse rubras.  
Classica iam sonitant, iam Mars furit arma reclamans;  
Innumerique viri corpora dura cadunt.  
Exhaustis opibus tandem Germana fatiscet  
Virtus, Et fessis viribus agra iacet.  
Accola tunc Araris, Rhodani tunc potor in agram  
Seniet, hic terras diripietque meas:  
Aut implacatus felici Marte Boemus,  
Turca vel immitis, dii prohibete nefas.  
Exemplum sceleris, cunctis annalibus auctor  
Seditionis erit historicisque meis  
Subuersor regni, Et germani nominis hostis  
Exitiumque suum pro patriaue suae,*

*Dulcis amor fidei magna Et constantia mentis  
Nec fracta aduersis nec sustollenda secundis  
Laudis amans altusque animusque Et strenuus armis  
Prudentesque viros cunctis de rebus agendis  
Consulere Et pulchrum iustumue vel utile quid sit  
Quid deceat, quid non animo quassisse sagaci  
Inclita sed virtus lato pubescere fructu  
Incipit à teneris, Et se cito germina produnt  
Magnus Alexander teneris incepit ab annis  
Et premere imperio Gracos Asiamque potentem  
Dariumque simul inuictis subdere Marte  
Talis erat Bacchus nigros dum vicerat Indos  
Annosque seni puer haud adeunda gerebat  
Cede gigantea Phœbus puerilibus annis  
Arma cruenta tulit pugnans pro patre tuendo  
Et puer Alcides geminos colliserat angues  
Sic ergo dii faueant, summis pro viribus ipse  
Mente senex atate puer pugnare laboro  
Contra illos, mihi qui noctuque diuque pararunt  
Damna, probra, insidias, vim vique repellere tento.*



AD GERMANIAM ET SACRASISSIMUM IM-  
PERATOREM MAXIMILIANUM ATQUE GERMANOS PRIN-  
CIPES QUERELA HECATOSTICHA DUCATUS MEDIOLANI  
VT A FRANCICA SERVITUTE AD IMPERII LIBER-  
TATEM VINDICETUR.

BEBELIUS AUCTOR.

UNICA terrarum domina, ô Germania grandis  
Et domitrix mundi, querulas nunc accipe voces  
Insubris populi, tibi qui famulariter optat,  
Iureque debetur, tua si repetisse labores,  
Te DEus omnipotens, ô inuictissima tellus  
Reginam statuit terræque marisque profundi,  
Submisitque tuis vel fascibus orbis habenas.  
Cumque tuis populosa viris fortissima quondam  
Vincere consueris, quicquid contra arma ferebat.  
Quicquid & hostilis furor unquam audebat, es ulta:  
Concipe nunc solitos animos & pectore forti  
At vigil incolumes populos tuearis & vrbes,  
Quæ tibi subiectæ sunt & sceptris Alemanni.  
Nonne vides quod regna ferox insederit hostis  
(Insubres Italosque volo ditionis alumnos  
Teutonicæ) solis deuota & debita vestris  
Cæsaribus, sibi quæ seruire tyrannide Francus  
Compulit ô populos vel solo Cæsare dignos.  
Quam vestra minuantur opes, nunc aspice mater,  
Ni cito prævideas rebus patriisque periculis.  
Ergo meis succurre malis, pacemque petitam  
Et libertatem reddas, vt libera soli  
Imperio famuler, ceu fas & iura reposcunt.  
Maximiliane dei rerum cui sceptræ dederunt  
Te simul appello, Rex ô iustissime legum  
Vindex, iustitiæ firmissimus auctor & æqui  
Ecce fidem legum simul imperialia iura  
Inuoco, & imperii te qui moderaris habenas.  
Da precor auxilium, si non indebita posco.  
Insubrum gentis repetas Rex optime regna.  
Debita iure tibi, en quæ nunc Francus violenter  
In damnumque meum imperii clementia abusus  
Inuasit, nec te nec fas nec iura secutus.  
Res tua nunc agitur, nam si non legibus æquis  
Hostes paruerint, si non aliena reponant  
Francigenæ, perit heu iuris reuerenda potestas,  
Et status, & decor imperii subuersus abibit  
In foveas, & conciliabula dira latronum.  
Nullus honor regno, nulli venerabile nomen  
Regis erit, dum sit confusum fasque nefasque.  
Audiet & nemo leges à Cæsare latas  
Surge ducum specimen tandem succurrere, inique  
Oppressis veluti præscribunt munera regis:  
Ostendasque precor iusti documenta rigoris,  
Inque rebelles heu ceruicososque tyrannos.  
Vos quoque primores, pars ô fidissima sacri

p.260

Imperii,



Imperii, proceres nullis superabilis armis  
 Pubes, possitis victricia ferre per orbem  
 Signa, patrum suevit ut presentissima virtus.  
 Ponite desidiâ segnem, luxumque nocentem  
 Concutite at clypeos, patriisque micate sub armis.  
 Non volo ciuiles motus, ciuilia bella,  
 In foribus cum iam grassetur Francicus ensis.  
 Sed socii Augusti commune intendite bellum,  
 Ligero regi Gallo, nimiumque superbo,  
 Qui nec respiciens diuos, nec scita sacrarum  
 Legum vel semper maiorum more probata,  
 Eripuit per vim sibi non debentia vobis  
 Germanisque viris Itala atque Insubria regna.  
 O manifesta loquar lachrymis succurrite iustis,  
 O generosa cohors Alemanni, nobile germen.  
 Quandoquidem si vos vestris maioribus ortos  
 Et meminisse quidem, nec degenerare velitis,  
 Fertis opem oppressis, horum & miserescit ultro,  
 Atque Patrocinium ius implorantis & equum  
 More patrum nunquam vel suscepisse negatis.  
 Ite simul cuncti sociato fœdere fortes,  
 Gallorum populi vim propulsare malignam  
 Usurpantis opes vestras & iura nepotum.  
 Vobiscum DEUS est, vobiscum militat equum,  
 Vobis arma, viri sunt, florentissima opes, &  
 Fulminis instar erunt tormenta sonantia late.  
 Sunt & equi & galeæ, vel quicquid bellicus usus  
 Postulat & quorum fortissima pectora gaudent  
 Profligare hostes & proculcare proteruos,  
 Quid dicam proceres tandem commune periculum  
 Effugitis per me, vobis defenditis ipsi  
 Oppida, rura, domos patriosque focosque laresque  
 Namque probe nostis, quantum grauis incubet usque  
 Finitimis, quantum intolerabilis atque molestus  
 Et fuerit regi, regis quoque fouerit hostes,  
 Et clandestinis studiis adiutet iniquos.  
 Denique cuncta loquar, dominandi cæcus amore  
 Imperiumque agitans, fuerit si viribus auctus,  
 Et nisi mature fuerit violentia currens  
 Atque ferox animus, letis & stare recusans  
 Fortiter obtusus, vel duro Marte repressus.  
 Informis veluti multum immansuetus & ursus  
 Si quando inuenit nullo custode vagantes  
 Lanigeras pecudes, prædamque abduxit opimam  
 Successu elatus, simul & dulcedine prædæ  
 Semper ouile ambit, nullo & discrimine vitæ  
 Abstinet à raptu, non opilione minante  
 Territus, aut diro rabidi clamore molossi.  
 Sic semel incensus, successibus atque secundis  
 Hic semel afflatus, nescit mitescere cuiquam  
 Ipse hostis vester, precibus placabile nullis  
 Pectus amicitia sacro neque fœdere tactum  
 Surgatis proceres vim vi pulsare, paternos.  
 Imperiique lares libertatemque tueri.



LUDOVICI HELIANI VERCELLEN-  
SIS CHRISTIANISSIMI FRANCORUM  
REGIS SENATORIS AC ORATORIS DE BELLO SUSCI-  
PIENDO ADVERSUS VENETIANOS ET TURCAS ORA-  
TIO, MAXIMILIANO AUGUSTO, IN CONVENTU PRÆ-  
SULUM, PRINCIPUM, ELECTORUM ET CIVITATUM  
ROMANI IMPERII DICTA IN AUGUSTA VINDELI-  
CA III. IDUS APRILIS ANNO à PARTU VIRGI-  
NIS MILLESIMO QUINGENTESIMO  
DECIMO.

*Jacobus Bannicius à Cæsareis Secretis Stephano  
Ponchierio Reverendissimo Episcopo Parisiensi  
Salutem.*

**L**udouicus Helianus : qui à Christianissimo Francorum Rege vestro hic apud inuictissimum Cæsarem nostrum oratorem agit , habuit Orationem de Cæsare , proceribus , Germanisque omnibus aduersus Venetianos ac Turcas concitandis , deque factiosis quibusdam consilium ac sanctissimam principum confederationem interrompere conantibus comprimendis , non memini audire neque legere orationem nostra tempestate priscorum oratorum facundia propius accedentem . Nam has nationes , maxime autem Cæsarem ipsum ad id iam bellum incumbentem non delectauit modo atque commouit , sed etiam adfecit , & aduersus illas gentes armorum ardore vehementer inflammauit , ac omnium concursantium conatus perfregit . Cæsar voluit ut impressoribus ederetur , ego sicuti dicta est , quæ certe extemporanea est , pro ea quæ mihi tecum est gratia atque familiaritate eam ad te mitto , quem scio hoc dicendi genere delectari , & polere , & plurimum posse . bene vale . Ex Augusta vindelica . Cal. Maijs M. D. X.

**B**ene ac religiose fecissent Veneciani Maximiliane Auguste , si post multas ciuitates ac regiones , quas aut Christianis ademerunt , aut ipsi Turcis per pactiones tradiderunt , aut occupare permiserunt , sanctissimam expeditionem quatuor Christianorum principum in excidium Turcæ gentis paratam excurrere passi fuissent . Hoc enim pacto & abolitionem veterum peccatorum a Deo promereri , & solidam gratiam à principibus christianisque omnibus inire , & indelebiles victorias ex hoste referre potuissent . Nunc autem quum christianos exercitus in Turcas , ad terram sanctam Jerusalem progredientes armis impedire maluerint , digni visi sunt , qui à Deo , & ab hominibus , qui ferro & flamma , qui terra marique dispergantur . Ego autem qui ad agendas gratias ob res feliciter gestas , ad celebrandas vestras victorias , vestrosque triumphos me preparabam , qui multos defendere , lædere neminem consueui , in has angustias deductus sum , ut aut ab officio legationis mihi sit recedendum , aut de improbitatibus , de dolis , de male meritis Venetorum necessario , non sine magno dolore mihi sit dicendum . Quod si aliquorum aures offenduntur , debetis id necessitati temporis ac malignitati eorum , non meæ consuetudini tribuere . Quamquam videor in proposito defensionis propemodum perseverare , nam quum Venetos accuso , defendo infinitos mortales , Italiam totam , multasque alias Prouincias , à quorum faucibus in libertatem reuocandæ sunt . Defendo christianos orientales , quos ad manus Turcarum peruenire , ac in morem victimarum mactare permittunt . Defendo eccle-



ecclesiam Romanam, ad quam subuertendam ut ipsi sua desideria consequantur, vocare Turcas & quasi manus porrigere videntur. Quare quum dico contra Venetos nolite me putare contra Venetos, sed contra Turcas dicere, neque de bello Venetis inferendo, sed de bello à Christianis propulsando, neque de excidio Venetorum, sed de salute Christianorum verba facere. Sed quum maiestate vestri Cæsarei conspectus & tanta Pontificum, Principum, Ducum, Procerum, ciuitatum frequentia amplissimi ordinis, celebritate loci, magnitudine causæ, ingenii si quid in me est imbecillitas maxime debilitatur, Clementissime Cæsar in vestro vultu, in vestris oculis, in vestra humanitate atque benignitate totus acquiesco, recreor, refocillor. Multitudine igitur ac varietate rerum obrutus multa consulto prætermittam, multa etiam sunt, quæ quamquam omnibus nota sunt à me tamen in dicendo prætereunda non sunt, quæ omnia dum breuiter expono, quæso benignissimas aures diligenter accommodate. Senatus igitur Venetianus, quum decreuisset omni scelere retinere, quod per summum nefas acquisierat, & quum certo sciret vestram Cæsaream maiestatem foedus ac societatem coniunxisse cum Christianissimo nostro Francorum Rege, ut bellum aduersus Christiani nominis hostes Turcas gereretur, in qua quidem Societate Sanctissimus Dominus noster Julius Pontifex Maximus & Aragonum Rex catholicus includi etiam voluerunt, conscientia delictorum ac furijs agitatus exercitum quam maximum potuit comparauit, & Christianissimo nostro Francorum Regi cum sociorum exercitibus se coniungere properanti in ripa fluminis Abduæ totum opposuerunt. Ibi fusi ac profligati Venetiani Patauium urbem magno præsidio munierunt, quam urbem vestra Cæsarea maiestas hieme instante non expugnauit. At illi ferociore facti multa ex his quæ amiserant recuperauerunt, longe plura quam unquam habuerunt nisi provideatur consecuturi. Italiam ac omne occidentale imperium si istam tempestatem euaserint, paulatim occupaturi. Quæ omnia Christianissimus Rex noster longe prospiciens simul & auertere cupiens, si vestra Cæsarea maiestas deliberat illos bello prosequi & tantos motus compescere, ne hanc patriam vestram, has fertilissimas & bellicosissimas regiones quas à maioribus vestris liberas accepistis, posteris vestris in seruitute relinquatis, & pro imperij & Romanæ ecclesiæ salute & maiestate tuenda atque augenda, pollicetur omne auxilium atque opem, quam amicus amico, & frater fratri præstare tenetur, secundum Cameracensem confederationem, inter vestras Majestates factam, & quid pollicetur, immo iam magnæ eius equestres & pedestres copiæ cum maximo tormentorum apparatu hostilia mœnia circumtonant & manus cum hoste conferunt. Quod ut vestra quoque Cæsarea Maiestas & Vos, o Reverendissimi ac Illustrissimi proceres & ciuitates Imperii Romani iisdem viribus atque eadem celeritate uti velitis, tria præcipue sunt, quæ vestros animos maxime mouere atque inflammare debent, primum spes Venetorum, deinde Tyrannis, postea eorum de religione & christianis omnibus male merita, de quibus si mihi à vobis tribui concedique sentiam breuiter dicturi sumus. Non enim est difficile in illis tam nefariis, tamque fraudulentis vulpeculis, in tam audacibus tamque superbis leonibus demonstrare, magnam spem fuisse Italiæ primum, deinde Christiani orbis subiugandi. Nam ea omnia, quæ ad id necessaria sunt abunde illis suppetunt, potentia, doli ac cupiditas dominandi, & ut paucis absoluiam, nam eos qui superiori ætate quatuor potentissimos principes Christianorum in patentibus campis expectare sunt ausi, & collatis signis aperto Marte dimicare, profecto potentissimos homines existimare & iudicare debemus. Quare sinatis eos aliquantulum crescere. At sunt victi? sunt diminuti? sunt quidem? ideoque ad extinguendum faciliores, quam si essent integri. Sed nisi vestræ peregrinantur aures intelligere debetis quid iam recuperauerint, ut se iam refecerint. Quod si eos paululum respirare permiseritis, ut hanc unam calamitatem evadant, vereor ne scabrones ut aiunt, irritaueritis. Poterat Hannibal si victoria uti voluisset, in Capitolio epulari, poterant Galli Senones, si paulum adniti voluissent, Capito-



pitolium cum Romano nomine simul extinguere. Vtrique irritando ac dimit-  
tendo Romanos, suos ac omnium rerum dominos effecerunt. Quod nisi huius  
venenosissimæ ac resurgentis viperæ, dum ad huc titubat, ceruices perfregeritis,  
prædico vobis, quod si non tam cito, at profecto quandoque, si non vos, certe  
vestros successores suo veneno inficiet, ac spiris circumligabit. Est præterea illis  
consilium domi, & ars senatoria, deligunt ex callidissimis & versutissimis senato-  
ribus oratores, quos cum retibus, hamis & visco peregre mittunt, non ad pisces  
aut aues irretiendas, aut inescandas, sed ad fallendos atque decipiendos princi-  
pum animos. Sanctus Antonius, aut ut alij volunt, Paulus primus heremita  
in spiritu raptus vidit laqueos, quos mali dæmones miseris mortalibus tetende-  
rant, & admiratus subtilitatem, & artificiosissimam dispositionem & numerum  
laqueorum, si numerari potuissent, exclamavit: Ah clementissime Deus? quis  
unquam hos euitare poterit? tot & tales sunt laquei Venetorum, quos miseris  
principibus præparauerunt. Auctoritatem, pecuniam, urbes ac provincias mul-  
tas Veneti perdiderunt; superbiam, dolos, vaframenta non amiserunt. Ipsi  
homines crudelissimi omnibus cupiditatibus seruietes præponunt vobis ante  
oculos commutationem fortunæ, instabilitatem rerum humanarum, ac rationi-  
bus philosophicis, & Scipionis, Alexandri, Cæsaris ac aliorum exemplis cona-  
buntur vobis clementiam persuadere, animum vincere, iracundiam in victoria  
maxime cohibere, tunc Deum ac misericordiam eius obtestari, addent preces,  
addent pecuniam, vos memineritis, sicut Ulyxes fecit, istos Syrenum cantus,  
istas meretricum cytharas surdis ac obturatis auribus præterire & uti exemplo  
Dei contra Antiochum, de quo legitur: orabat scelestus Deum, à quo non esset  
misericordiam consecuturus, quia sunt illa dulcia Circes pocula, illa esca omnium  
malorum, qua infelices principes deliniti in maximos errores primum, deinde  
in maximos luctus præcipitantur. Age vero pro desiderio & cupiditate domi-  
nandi, si iustitiæ aut honori suo, si ulli hominum, aut Deo ipsi unquam peperce-  
runt. Testis est Jacobus Rex Cypri, quem accepta prius in Uxorem filia sancti  
Marci, ah amara filia, & infaustum matrimonium una cum filio, clam veneno  
sustulerunt, ut Cypri regno, ut insula novem quondam regnorum capace poti-  
rentur. Testes sunt Franciscus Comes Carmignola & Bartholomæus Bergoma-  
tes cognomento Colco, eorum copiarum Duces, duo tunc in re militari præstan-  
tissimi, quorum alteri propter facetum aut cauillosum dictum, in media curia  
reorum more securi caput amputauere. Bartholomeum autem propter ingen-  
tes opes, bellica virtute quæsitæ, etiam veneno clam necandum curauerunt.  
Testis est Patriarcha Aquileiensis quem Histria & dimidia parte Venetiæ priua-  
uerunt. Testes sunt iterum duodecim Canonici Aquileienses; quos parum fuit  
multis opulentis castellis & oppidis quæ possidebant cum vita simul spoliavisse,  
nisi in memoriam tanti sacrilegij duodecim porcos pingues abraço collo die Jo-  
vis ante quadagesimam singulis annis in harena populo spectante gladiatoribus  
conficiendos obijciant. \* Testis est serenissimus Rex Ungarorum, cuius prope

tre.  
\* Hanc historiam optime explicat M. Ant. Sabellicus Hist. Venetus dec. I. lib. II. p. 55. scribens:  
*fuerat Vlrucus ante ab Alexandro pontifice hæresis nomine damnatus: is quia egre credo ferret  
Gradensem ecclesiam suæ Aquileiensi prælatam, subito bello insula antistitem cum auxiliari Car-  
norum manu est adortus: ad quem præsentis bello leuandum Veneta classis missa est: quæ  
quum hostem in pugnam traxisset, paruo negotio sedit fugantique, capto Vlrucum cum nobilibus  
non paucis. Ceterum fusam multitudinem Venetus victor in continentem secutus, omnem lit-  
toralem Carnorum oram, quam nunc Forum iulium vocant, ferro & igne vastauit: oppida  
quoque aliqua subito incursum oppressa. Quidam post pugnam locorum ignari per Caprulanæ  
paludes errantes, in victorum manus incidere. Veneti ad conciliandam benignitatis famam  
Vlrucum cum reliquis Captiuis missum fecere: verum his conditionibus, ut quotannis serua-  
to victoria die Venetias mitterent porcos duodecim, ac totidem panes unius sextarii, qui ad-  
hibito tauro frequenti spectaculo necarentur. Ceterum castella quadam lignea ferratis basibus  
disticiuntur: quæ omnia, illis ipsis diebus quibus pugnatum est, magnifico apparatu quasi  
annui ludi pro foro hoc quoque tempore celebrantur. Incidit autem hæc victoria in annum  
1162. prout Jo. Bapt. Verus rer. Venet. lib. I. p. 60. nos docet.*



trecentas insulas, decem ciuitates episcopales, duas prouincias Dalmatiam ac Liburniam, tot portus, quingenta circiter milia passuum maritimi littoris occupauerunt. Testis est Imperator Constantinopolitanus & eius proceres & finitimi Itali Cartarienses, Scalenses, Mantuani, Ferrarienses & Mediolanenses Duces, quorum alios magnis urbibus insulis ac prouincijs, alios dimidia parte, alios omnibus bonis, alios etiam vita multauerunt. Testes sunt antecessores vestri Imperatores Romani, quos Patauio, Vincentia, Verona deciecerunt. Et Duces Austriæ & Vestram Cæsaream maiestatem quam Taruisio, Feltro, Concordia, Utino, Tergeste, Coricia & omni possessione Italiæ penitus expulerunt & conan-tem ad Imperatoriam coronam Romam proficisci iam XXIV. annos armis retinuerunt. Testis est denique summus Pontifex & S. Petrus ipse, cui ne se quoque ceteris vicinis pulchriorem putaret Forum Liuium, Forum Corneliū, Fauentiam, Ariminum, Rauennam abstulerunt. Et ut regno Siciliae potirentur, quinque urbes in Apulis ac Salentinis in laboribus Regum Neapolitanorum interceperunt, inter quas Hydruntem & Brundisium portus celeberrimus. Et qua arte Pisam usurpauerunt, ut per eam alterum Italiæ latus inferi maris affligerent, Florentiam paulatim attererent, Genuam ad primos motus ingrederentur, Siciliam, Corsicam, Sardiniam, Baleares, Narbonensem Prouinciam, omnia littora Hispaniæ ad Herculeum fretum usque classibus percurrerent, fatigarent, infestarent, affligerent. Proh Deus immortalis! quæ Carybdis, qui Oceanus tam vorax unquam fuit, qui tot & tanta tam paruo tempore demergere ac deglutire potuerit. Vix bene sunt centum anni, quibus è suis paludibus in continentem egressi sunt & longe plura suis præstigijs & syccophantijs circumscripserunt, quam Romani ducentis annis armis debellauerunt, capta autem Italia putatis illos quieturos? num creditis illos animo atque superba mente, iam diu agitasse, quemadmodum Alpes transcenderent? ut Danubium, Rhenum, Sequanam, Rhodanum, Thagum, hyberorum pontibus iungerent, & has in prouincias redactas exercitibus firmarent? nescit paterfamilias diues intra modestiæ se terminos continere. Gens igitur in domicilio superbiæ nata, quæ omnifariam rerum copiâ superabundat, & multitudine Tyrannorum tota scatet, homines è colluvione & fæce gentium in Veneticis paludibus congregati, piscatu primum viuentes, deinde ex piscatoribus institores, atque nauiculatores, ex his mercatores, ex mercatoribus per latrocinia, per cædes & uenena, per nefandissima scelera pulcherrimarum rerum domini facti, se continebunt? certe nullo modo, sed si eos ita exacerbatos dimiseritis, si paululum se collegerint, ac vires suas reassumpserint, progredientur, excurrent, longius efferentur. Satis multa verba fecisse videor de spe Venetorum, nunc de eorum Tyrannide quædam sunt dicenda. Mare, quod omnibus gentibus commune esse debet, suum esse dicunt. Et siue mariti Thetydis sint, siue uxores Neptuni singulis annis, illud desponsauere annulo iniecto. Arrogantiam inauditam elementa desponsare. Legimus Tyrios & Carthaginenses, Rhodios & Athenienses, Romanos & nostra tempestate Genuenses, tum Xerxem illum in rebus maritimis exercitatissimos, peritissimos ac potentissimos fuisse, nemo tamen tam levis græcus, aut tam temerarius barbarus inventus est, qui mare desponsaret. Et recte quidem? nam ex hoc matrimonio nati sunt Venetis liberi ab auidissimis & crudelissimis parentibus non degenerantes, infaciabiles Balenæ, immanes Lestrygones, infandi Cyclopes, & Polyphemi, qui ita mare obsident, atque infestant, ut nulla monstra maris, nulli scopuli, aut tempestates, nulli prædones aut Pyrrhatæ vehementius. Bene sciunt hoc Rhagusani, qui in limitibus Turcarum Aristocratiam tenent munitissimam, quos vexando & classibus opprimendo ad tantam inopiam atque desperationem adduxerunt, ut ad Turcas confugere & illis Tributum pendere coegerint. Duo littora Adriatici Maris Italicum & Illyricum ita inter se connexa, ut alterum absque altero vix viuere possit, usque adeo disiunxerunt suis pestilentissimis edictis & pyrratis, ut in syrtribus, in freto Siculo aut in ma-



xima tempestate quicunque deprehendi maluerint, quam adriaticum nauigare. Itali in libertate & ad mare nati, mare spectare potius, quam uti frui nauigare-que possint. Quot naues illi prædones expugnauerunt? diripuerunt? publicauerunt? quot diuites mercatores decoquere, ac cedere bonis coegerunt? quot nobiles familias & opulentas ciuitates euerterunt? Quid in Alexandria? in Syria? Asia? Græcia? Aphryca? denique in omnibus maribus infidelium faciant, quum neminem præter se nauigare vellent, quantas turbas, quantas molestias Christianis negociatoribus inferant longum esset enarrare. Quid in terra? longe peius grassantur. Hic subditos ad ædificandas moles, ut iumenta materiam ferre cogunt, onera militiæ sustinere, littorales taurinis neruis ad remos subigunt, ingentes & cottidianas exactiones & tributa exigunt. Prætores & gubernatores non Patauii aut Parisii, sed Tuente aut ad Tanaim a pueris nutriti periti sunt non legum, non philosophiæ, aut nostræ religionis, sed pecuniarum extorquendarum, sed morum immanium barbarorum ac rituum Magmetidarum, miserimum est habere unum aut duos tales dominos, quanto est miserius habere mille aut prope innumerabiles. Hi ius dicunt, hi urbes ac prouincias regunt, vel potius expilant exhauriuntque & tamen neminem honore, neminem sacerdotio, neminem nobilitate eorum dignantur. Putarent magistratus & præfecturas etiam minimas pollui si quispiam præter Tyrannos quos nobiles & magnificos appellare oportet contingeret. Non ingenijs, non fortunæ, non virtuti ad dignitates locus ac uia patet. Saluete O Romani diuum genus in vestra ciuitate virtuti locus nunquam defuit, vos integras ciuitates Romana ciuitate donauistis, vos ad Senatum ac Consulatam, ad regnum, ad imperium, ex Tusculis, ex Volscis, ex Sabinis, ex Gallia, Pannonia, Aphrica, Hispania ex Arabia usque ex toto orbe terrarum viros idoneos conquisiistis. Veneti fastidiunt probos & Hermolaum Barbarum & similes suos, nedum alienos? quam ob rem, quia studuerunt pecuniæ non militiæ, mercaturæ non litteraturæ, Magmedo non Christo. Ita sunt instituti, ut iam apud eos sit nefas confiteri ac poenitentiam agere, de criminibus quæ pro republica contra diuinam Maiestatem commiserunt. Romani homines sapientissimi tres ciuitates ita potentes, quæ pondus imperij sustinere potuissent, propter tria maxima vitia deletas esse voluerunt. Carthaginem propter perfidiam; Capuam propter superbiam; Corinthum propter auaritiam, quæ crimina qualia in Venetianis sint, diligenter attendite, ut hæc & multa alia, quæ vix in singulis reperiantur, huic uni ciuitati propria vitia sint & peculiaria. fartores fartoresque scelerum, inuentoresque ac artifices nouarum machinarum, quorum cellæ ac meatus corporis nihil aliud sunt, quam spiramenta proditorum. nemo cum eis commercatur, quem ad extremum ad lachrymas non cogant, nullum bellum a multis sæculis inter Christianos gestum est, cuius ipsi auctores non extiterint. nemo Venetias diuertit, sit acutus, sit circumspectus, sit sapiens, qui non decipiatur, aut aliqua fucata merce, aut aliqua falsa gemma circumuenitur, aut à Publicanis syngrapham non accepit, aut exploratorum numero est, denique est semper aliqua mala crux, quæ deprehensos miseros torqueat ac excruciet. & quæ potest oratio eorum superbiæ par inueniri? hi sunt homines, qui aiunt apud se natam nobilitatem esse, qui soli diuites ac modesti, soli sapientes sibi videntur esse. nos autem qui non ut Draco-nes recto pectore & elata ceruice purpurati non incedimus, qui multa millia in arca non custodimus, sermonem in digitis non constituimus, argentea furcula non comedimus, barbari sumus, intemperantes, ebrij, dementes, ac uesani, principes autem omnes uno vocabulo Tyranni, hominum mendicabula, nos odere, nos contemnunt, sumus illis materia ad ridendum uberrima. nos Galli multum, sed certe vos Alemani non longe minus. nam quæ nuptiæ, quæ comœdia aut fabula Venetijs unquam acta fuit, in qua primarum partium Alemani homo non fuerit introductus. Vestri mores, sermo, victus, habitus, incessus per mimmos ac hystriones representatus ridere & gaudere Venetias facit,



cit, exultare, triumphare gestire. tanta est eorum superbia. tantus Alemanorum contemptus ac irrisio. de Avaritia eorum profundissima melius est tacere, quam parum loqui. hoc tamen unum non silebo quod quum Germania liberam se esse putet, sicut & esse debet, quum armis adhuc non potuerint astutissimi sophistæ, bene inuenerunt artem qua sibi tributariam fecerunt. Locant enim mercatoribus vestris domum (*lofundico de Todeschi*) triginta supra centum ducatis in singulos dies, non dico singulis annis, quod quidem satis esset, dico singulis diebus. quæ quidem summa ad quadraginta aut quinquaginta milia ducatorum annua ascendit. hoc tributum quotannis Venetis pendetis. de gula immensa, de luxuria non attinet ad me dicere, quam qui scire velit, recenseat greges. quid greges? imo exercitus lenonum, meretricum ac exoletorum. non sanguini, non religioni, non ætati, non sexui honor ullus adhibetur, venus promiscua, venus indifferens, venus sine lege. transeo crudelitatem, habent Venetiani sua macella humana carne referta, habent suas latomias, suos tauros, ut quondam inmanissimi tyranni habuisse memorantur, in his excarnificant subditos, qui aut propter eximias ac singulares aliquas virtutes aut propter ingentes opes Tyrannis formidolosi, ac suspecti sunt. duo anni sunt, quum exercitum vestrum alpinis saltibus dolo interclusum non militari more spoliauerunt, non sub iugum miserunt, non captivum Turcarum ritu vendiderunt, aut redimendi potestatem fecerunt. quid ergo? ferro trucidauerunt. rubent Alpes sanguine, albicant iuga montium ossibus vestrorum ciuium. Patauinus Senatus qui vobis studisset ac primarius unusquisque furcis aut infelicibus lignis pependit. Quæ quum ita sint, audent tamen lugubri veste, torto collo, flebilibus oculis, summissa voce pacem poscere, & superioribus diebus deprehensi sunt cum scalis & exercitu magno sub mœnibus Veronensibus, ut urbem, sub noctem inuaderent & præsidia vestra iugularent & audent dicere: Vultis o principes Venetias alterum Italiæ oculum effodere ac delere. non est tam clementium principum illos ingeniosos artifices, illos honestos mercatores, illas ædes admirandas velle subvertere, quæ quanquam ex ruinis ac trophæis Romanorum ac Græcorum ac multarum urbium vetustate constant, tamen quoniam sensu carent, nec quicquam commiserunt, non sunt dignæ tantorum principum ira. Quid igitur volunt? volunt ædificijs parcere, sed delere Tyrannidem cum Tyrannis, volunt: quod Venetiæ sint mercatrices non dominatrices, volunt mare liberum, terras liberas, dacia gabellas, portoria dejicere, libertatem reducere, nam sicuti non decet principes mercari, ita etiam non conuenit mercatoribus imperare ac regnare. nunc autem dicitis: quid fecimus? quid commeruimus? quid commeruistis? at non ita dicebatis iam sunt duo anni, quando Alpes transgressi Danubium & Viennam infestis signis petebatis, Bononiam & Urbinum & Mediolanum superiore anno ante finem Mensis Maij in vestra potestate futuras esse iactabatis, quando pontificem maximum paruum Capellanum & minimum altaris ministrum facturos prædicabatis & Christianissimum Regem Francorum Venetias catenatum trahere minabamini. Et Cæsarem Augustum, vestram Cæsaream Majestatem deformissimis picturis atque inhonestissimis comœdijs ac spectaculis ignominiosissime referebatis cum titulo & causa, hic est Maximilianus augustus Imperator Romanorum. Viri non estis o Germani, cæsareo animo vestro solito amplius non estis Cæsar, si potestis tolerare has rapaces harpyias, has venenosissimas aspides, tam varias, tamque versipelles linceas, tam sanguinarias Tygrides sanctissimæ Imperatoriæ Majestatis vestræ calumniatrices, nomini germano infensissimas amplius dominari? Hæc de eorum Tyrannide sint dicta. Super est ut de his, quæ contra Christianos, contra religionem, ac Deum ipsum commiserunt, pauca subiiciamus. quod si hoc tam insolito vobis tamque inusitato genere dicendi vestra humanitate diutius abutor, sperate vos à Deo non minora præmia consecuturos, quam si sacerdote recitante Evangelium sacratissimum audiretis. Utinam Romane Imperator, & vos qui adestis, utinam Venetiani, aut  
veri



veri Christiani aut veri Turci fuissent. nam si veri christiani fuissent, & Jerosolymas & Constantinopolim & totum Orientem ut quondam Christiani possiderent quum validis classibus, quibus plurimum pollent ad defensionem non ad euerfionem christianorum uti voluissent. & si veri Turci fuissent, nunquam passi fuisset tam malas herbas omni Aconito pestilentiores, in nostris penetralibus, in nostris visceribus ac intestinis tam alte radices ponere, quin eos funditus extirpatos facto agmine ultra portas Caucaſeas reiecisset. nunc autem quum mali Turcæ, peiores Christiani sint, modo quum ambobus bella gerant, modo cum utroque societatem simulent, nunc harum nunc illarum partium, nemini fidi sint, religionem christianam ad paruas Europæ angustias, & pene destructam, mancam ac debilem concluderunt. ipsi sunt tanquam unum repagulum & propugnaculum, unum antemurale, quod nisi perfractum sit nunquam hæ duæ diuersarum legum & repugnantium religionum gentes Christianæ atque Turcæ inter se concurrere, ac manus conserere poterunt. sed hinc Veneti, illinc Turcæ singulis annis aliquid de finibus Christianorum, sicut fluvius de ripis abradent, perstringent, amputabunt, donec facto impetu inuersa confundent. ipsi sunt tertia secta, siue Marrani sint, siue illi dubii, ac ancipites angeli inter bonos & malos, qui neque cœlum neque inferos tenent, sed sunt lemures & mali genij, qui nocturnis incursionibus domos percurſitant, & diurnis grandinibus ac tempeſtatibus mare nauigantibus, & terras miseris aratoribus infestas reddunt, & ingressi corpora humana torquent, qui in aëre suspensi malo proposito remanserunt, nam quicquid habent alienis calamitatibus adepti sunt, & credunt & vera credunt, quod Christiani aduersus Turcas progressuri per eorum prouincias iter facturi fuissent, & unusquisque suum repetere mallet prius, quam aliena destruere. quod autem vero dico, quoties cruciata coniuratio ac deuotio Christianorum in Turcas temptata est, & toties à Venetis interrupta, præcipue Pio Pont. Max. qui quum omnia præparata essent, ubi sensit sanctissimam expeditionem artibus Veneticis dissolutam, vir acris ingenij, ac religionis amantissimus dolore interiit. Rhodus terra marique periculosissima obsidione à Turcis premebatur, quam cimbam, aut scapham in auxilium miserunt: quod nisi religiosorum virtute, ac auxilio Genuensium defensa fuisset: sicut Constantinopolis in Turcarum potestatem deuenire necesse fuisset. Venetiani primum auri, postea Constantinopolis potiundi cupidissimi, modo commeatus atque arma Turcis magna classe comportabant, modo exercitum eorum ex Asia in Traciam per Posphorum transfretabant, nihil omittebant, quod regiam urbem affligere posset, ut interdum ea potirentur. Constantinopolis terra marique durissime oppugnari coepta est. Constantinus imperator per clandestinos nuncios lachrymales deprecationes præfecto Veneticæ classis mittebat, eum obsecrans per Deum, qui sedem Patriarchalem illic constituerat, per virginem deiparam, cuius numini ciuitas consecrata fuisset & condita, ut Imperatori Romano & Regiæ orientali misereretur, ex tanta classe duas tantum naues subsidio mitteret. ad hæc præfectus Veneticus respondit: non esse moris Venetorum aliena defendere, perinde si se ac urbem dederent cum tota classe intraturum ac obsidionem soluturum. Se commiserari duram Christianorum sortem, sed ab senatu tale mandatum habere, quod non sine capitis periculo transgredi auderet. Interim Constantinopolis capitur & crudelissime diripitur, si unquam ciuitas dirrepta fuit, ita ut gemitus cadentum & mulierum eiulatus è Veneta classe exaudirentur. At Venetiani spe potiundæ urbis amissa spolia urbis ac prædam à Turcis cœmerunt, & plenis nauibus Venetias remigrauerunt, reliquias Imperij Romani Venetias secum deportantes. nolite mirari Venetiani, si nemo vobis auxilium præbet, quia vos auxilium præbere voluistis nemini, ne ciuitati quidem sacratissimæ virgini matri dedicatæ, nescitis omnium rerum vicissitudinem esse, remansistis cum nullis amicis, & cum pauca pecunia. necesse est vos inter ferales angustias perire omnibus inspectantibus, sicuti Constantinopolim vobis inspectantibus, interire passi fuistis. Quod præterea



terea proceres ac ciuitates Traciæ, Macedoniae, Graciæ, Illyridis, fidei Veneticæ ac si dicerem perfidiæ punicæ se tradiderunt, quos omnes, aut præcipitauerunt, aut Turcis vendiderunt. clamabant illi miseri, quum Turcis dederentur: Ah Venetiani christiani sanguinis mercatores? Ah Christianæ religionis desertores & proditores. & quo sermone? quibus verbis o Jherosolyme, o sanctissima terra vos deslebo? nolo amplius mihi credi. res est iam annalibus memoranda. credatis Blondo historico ab omnibus approbato. fama erat Saladinum Ægyptiorum regem Jherosolymas obsidere, nunquam nostra religio caruit defensoribus, quanquam nunc, ita principes delicati sunt, ut si ad limites regni sui, quamuis exigui usque peruenerint expeditionem se Orientalem confecisse arbitrentur. ad hanc famam multi proceres Venetias cum copijs, conuenere, animati pro sanctissima terra mori, petierunt in Syriam nauibus transportari, Venetiani accepta mercede aduersos ventos simulantes eos in Dalmatia exposuerunt, & eorum opera usi sunt ad Iadram ac alias ciuitates quæ rebellauerant à Venetis recipiendas. Interim Jherosolymæ capiuntur, non quidem Christianorum negligentia, ut plerique arbitrantur, sed dolo ac prodicione Venetorum. Quis hic non vociferaret, excandesceret, ingemisceret. Pisani quamdiu floruerunt, Genuenses omni tempore christianis in Oriente laborantibus suis classibus subuenerunt; At Venetiani semper infidi ac fraudulenti, semper crudeles extiterunt. Hic multa prætereo de Sophi Persarum Rege, qui maximum cum Turcis bellum gerit, cuius Oratores ad Christianos Principes venientes, Venetiani retrocedere coegerunt. omitto longe plura de Emanuele Rege Lusitanorum & Portugallensium, qui, quom à tergo Lybiæ in mare rubrum classes multas iam miserit & Ægyti, Arabiæ, Persidis, Caramaniæ, Indiæ, Taprobaniæ fines populatus fuerit, à Venetis magno odio habitus est, quod eos in societatem illius commertij recipere noluit, ob eamque causam, fabros, materiam, arma Saldano Ægyptiorum Tyranno miserunt, ut ædificata ac instructa classe, Portugallenses à tantis inceptis summoueret. transeo quæ in Cypro, in Creta, in Ponto, in Pelloponneso, in omnibus Cycladibus contra Christianos patrauerunt, ne vestras patientissimas aures eorum sceleribus ulterius obrundam. unum tantum dicam, & finis erit. Hydruntis ciuitas est Salentinorum, in extremis oris Italiæ. Hanc urbem Turcæ terra marique obsidere adorti sunt, Illa Italiæ regio, quæ certe magna ac fertilissima est ad Garganos usque montes tota Turcarum flammis exurebatur. & iam non regno Siciliæ tantum, sed Romæ sanctuario Dei sed Italiæ ac toti Christianitati timebamus. Quis tum christianorum non ingemuit? quis opem non tulit? quom ab Ungaris, ab extremo septentrione atque occidente undique auxilia conuenissent, & non principes ac ciuitates solum, sed familiæ fratrum mendicantium quoque subsidia præstarent. soli Venetiani, qui tum classem paratissimam ac instructissimam in anchoris Corcyræ tenebant, qui soli obsidionem soluere potuissent, soli spectatores, non auxiliores esse maluerunt. quid auxiliores? immo proditores extiterunt. quom simulates gererent cum Ferdinando Rege Neapolitanorum propter Alphonsum filium, qui tunc Hetruriam bello quatiebat timentes, ne maior fieret, quom ipsi non possent, per Turcas suas iniurias vlcisci maluerunt, atque ita Turcas in Italiam à suis ceruicibus reiecerunt, recordamini temporis illius, quum ab omnibus fere Christianis laboratum est, & morte Turci Regis agre obtinuimus, ut deditionem Hydruntis facerent. quot millia Christianorum, tunc turcicis manibus trucidata sunt? quantum Christiani sanguinis exhaustum est, quot nobilissimæ matronæ, quot virgines, quot pueri, in miseram seruitutem rapti sunt, quorum alij adhuc Turcis abnegata fide seruiunt, alios ego vidi, qui quom jure postliminij reuersi, me ius dicentē, vix à parentibus recognoscerentur, totum forum lachrymis compleuere. non memini Christianos maiorem cladem pertulisse, o Venetiani, quam vobis auctoribus perpeffi sumus. sed si homines oblitum sunt, non tamen deus tantæ prodicionis ultor oblitterauit. sanguis illorum clamat super vos, & super filios vestros, ante magni Dei tribunal. Vos,



vos non Turcæ illum cruorem effudistis. tempus erit, quo vos illorum cædes, atque utinam non cum vestris Venetijs vestro sanguine rependetis. nam quid ego in tanto facinore deplorem, quis non omni odio, omni pœna, omni supplicio Venetos dignos putaret. hic non me rudi aut simplici narratore opus esset, sed forti aliquo atque vehementi oratore, aut acri prædicatore ex his qui pleni spiritu sancto ad populum concionari solent. quantas lachrymas, quantam invidiam, quantas indignationes excitaret, superbia, potentia, corruptelæ, furta, rapinæ, oppressiones, sacrilegia, proditioes, immanitates, impietates Venetorum, qui jam ita indomabiles facti sunt, ut cum quatuor Christianorum potentissimis principibus de summa rerum decertare audeant, & ne victi quidem quiescere possunt. qui expirando, subornando, corradendo magnum ex vicinorum urbibus imperium sibi conflauere, qui omne aurum, argentum, gemmas, vasa, signa, tabulas, denique quicquid pulchri, quicquid pretiosi in toto terrarum orbe reperiri potuit, id totum malis artibus Venetias comportauerunt & congefferunt. qui mare ac terras intercludentes, mercatores cum mercibus intercipientes, nauarchos cum nauibus demergentes, venenando, necando, excruciansdo, omnia cruore, omnia lachrymis & funeribus compleuere, omnia Gabellis & dacijs & portorijs tyrannica seruitute foedauere, sacro sanctos sacerdotes torquendo, bona ecclesiæ consecrata prophanando, summum Pontificem contemnendo per vulnera nostra & per commoda eorum propria sua religionem christianam ad has exiguas Europæ angustias ac latebras deductam pene subuerterunt, ut cum Turcarum Rege tacite conspirasse ac partiti esse videantur, ut scilicet ille Orientali, ipsi Occidentali imperio contenti sint. inimici nobilitatis, contemptores principum, dirreptores ac incendiarij urbium, spoliatores prouinciarum, hostes sacrorum, depeculatores reipublicæ christianæ, labes & perniciēs humani generis? Siccine dormitis o Germani. expectate parumper, nam dum vos consultationibus vacatis, illi nocturnis scalis Veronam aggrediuntur. Vos armis inclyti eas ignominias contra morem maiorum vestrorum toleratis, quas vix ignaui ac umbratiles, vix mulierculæ medijs fidijs tolerare possent. oh si nunc viverent illi Cimbri ac Theutones, qui cum C. Mario de imperio orbis dimicauerunt & illi, qui cum C. Julio Cæsare, Traiano, Antonio, Fulvio, Sennero, Constantio & cum alijs pluribus Imperatoribus tot bella gesserunt, & qui Quintilium Varum Romanum Consulem cum tot legionibus trucidauerunt. Et illi qui Britanniam, Angliam, partem Hispaniæ vandaliciam, partem Italiæ Longobardiam à se devictis gentibus, de suis nominibus nuncupauere. Ubi nunc sunt illi Usipites & Tenchteri, illi Sueui, illi Saxones & Marcomanni Quadi, Catti, Sicambri, Heruli, Vandali, Goti, quorum milites boni duces erant, & duces ipsi magni heroes. & illi qui cum Henricis, Ottonibus, Corradis, Federicis Imperatoribus suis sanctissimam Jerosolymorum terram suorum corporum oppositione toties defenserunt, quorum trophea memorabilia adhuc pendere cernuntur. Vos igitur, qui estis eorum indubitati filij, indubitati successores virtutis, honoris & gloriæ, velitis etiam esse veri imitatores in exercendis illis hæreditarijs virtutibus, quas scio in vobis esse quam maximas & quam plurimas. nolite per Deum immortalem, nolite pati tot injurias primum Vobis, deinde ceteris Christianis, postea Deo redemptori nostro à Venetis atque à Turcis illatas, amplius inultas ac impunitas esse, qui in expugnatione Orientis, ut cetera nefandissima præteream in omnibus templis aut meretrices prostituerunt, aut equos stabulauerunt, aut templa ipsa demoliti sunt, aut Magumeto homini impurissimo ac nefandissimo, quem pro Deo colunt, dedicauerunt. Ossa sanctorum, reliquias sanctissimas canibus ac porcis obiecerunt, imagines crucifixi Domini nostri Jesu Christi, heu pietas, heu prisca fides, imagines crucifixi ad caudas equorum deligatas extra ciuitates in castra ad sonum tympanorum raptantes, sputo canoque foedantes in altissimam crucem iterum sustulerunt & lapides ac sagittas eiuculantes exclamauerunt: hic est DEUS Christianorum. Ludibrium Christia-



Christianæ gentis, sed maxime Germanorum, penes quos imperium est, cui igitur vos non præitis, cur non præferitis victrices aquilas, & reliqui Christiani vos sequentur, aduersus Venetos primum, qui sunt seges ac materia tantorum malorum, deinde aduersus ipsos immanissimos Christiani nominis hostes Turcas, nam ista vestra odia ac bella inter vos intestina, istas uenationes, conuiuia, structuras, delicias vestras, liberos, uxores, hanc vitam vestram, una parua arua, una parua febricula omnia commutabit, omnia corrumpet, & paulo post nihil erunt, at vero, quæ pro redemptore & creatore DEO nostro facietis, ea vobis perpetua manebunt, & dum viuetis, & dum ad feliciorem vitam demigrabitis, semper vos comitabuntur, florescentque cotidie magis magisque, æterna fient, nam in aliis causis & ea quæ habetis paruo momento dilabentur, & quæ perdetis, nunquam recuperabitis, at uero in hac sanctissima expeditione, & quæ habetis, nunquam amittetis, & quæ perdetis in cœlestibus Theauris omni tempore condita reperietis. Ergo perfringite illud obstaculum, adæquate & obstruite hanc pestilentissimam mephitim ac sentinam, hanc voraginem & præcipitium omnium vitiorum. Vendicate & vos & Christianum orbem in libertatem, soluite vos à tanto metu. Eradicate genus potestis esse tuti, si relinquitis eos quibus Venetiæ, Histria, Liburnia, Dalmatia, Corcyra, Cephalenia, Zacynthus, simul Creta ac Cyprus adhuc supersint? patefacite istas execrabiles ac diras portas Venetianas, quæ tamdiu Christianos aduersus infideles progredi elaborantes continuerunt, postea DEO auctore aperto Marte, maioribus auspiciis Turcas aggressuri. Et ea pietate, qua sanctissimum Dominum nostrum Julium Pont. Max. qua Christianissimum nostrum Francorum Regem & Catholicum Regem Aragonum principes sapientissimos exactæ ætatis & consummatissimæ uitæ, tres columnas christianam religionem suis humeris sustentantes esse videtis, eodem & vos o Maximiliane Auguste, o proceres: & ciuitates Imperii Romani, qui prima sustinendæ libertatis ac religionis columna & animo & pietate esse debetis. nam nisi illi vidissent excidium ac ruinas a Venetis & a Turcis Christianis imminere, certissimamque victoriam sperarent, nunquam profecto tamque iusta ac pia tam sancta aduersus eos arma sumpsisset. dixi o Romane Imperator, o gloriosissime ac exuberantissime DEus redemptor dixi, & si quid profeci, gaudeo dixisse. quod si etiam nihil profeci, tamen gaudeo me tuæ humanitati ac diuinitati morem gessisse, tibi que, si huic tuæ expeditioni sanctissimæ hanc vitam meam conducere arbitror, eam deuoeo, ac quibuscunque cruciatibus exhibeo, quia tu pro meis ac aliorum peccatis tuam miris tormentorum exemplis excarnificandam tradidisti.

## EJUSDEM LODOVICI HELIANI VENATIO LEONUM.

*Pontifex Maximus, Caesar Augustus, Rex Francorum,  
Rex Aragonum Venatores.*

**V**Enatum canimus Regum: & fera bella Leonum  
Maxima, quæ insani funera martis opus.

Alme faue armorum & nemorum Tritonia præses,

Et qui bella colunt & iuga summa DEI.

Dicite vos Musæ dulces, quis crederet unquam

Æquora fuluicomas incoluisse feras?

Aut terram Ausoniam alligeros aluisse leones

Quamquam Cyclopas sicilis ora tulit

Non hic æthola dicetur cuspide fixus

Cerua, nec herculeo robore captus aper.



Dicam monstra hominum & quis commutauerit illa  
 Et scelera & pugnas, accipite incipio :  
 Quod mare, quod tellus iam iam captiua iaceret  
 Non fuit hæc Ditis, nec fuit ira Jouis.  
 Omnis erat piceis Aquilonibus obruta classis  
 Restabat toto nulla carina mari.  
 Tunc primum timuere homines fulcare profundum,  
 Nec qui se ventis credere vellet erat  
 Nullus honorabat tumidi pia numina Ponti  
 Votaque soluebat, nemoque thura dabat  
 Tum grauitè frendens vitrearum rector aquarum  
 Humanum voluit mergere sæpe genus  
 Deucalionæas iam ter concusserat undas  
 Perdere, sed voluit nos grauiore malo.  
 Est locus Adriaci Venetas dixere paludes  
 Nunc mare, nunc terra est tot rotat unda uices.  
 Illyrici, Albenfes, & iuncto Dalmata Sclauo  
 Quique colunt Pontum, Cicladas & Cilices  
 Cercassi, Æthiopes, Mamalucchi, Jannizarique  
 Omnia purgauit littora prodigiis  
 Hique venenatas liquerunt Phasidos undas  
 Illi Hiliacos deseruere sinus  
 Non absunt Lydi, Strophades, non Syrus Orontes  
 Nec gens plena odiis punica, fraude dolis.  
 Pyrratæ, profugi, damnati sacrilegique  
 Mendici, mimini, turba nefanda maris.  
 Denique criminibus cunctis patefecit Asyllum  
 Hæc stagna, hos astus, has petiere casas.  
 Colluuiem & facies hominum collegit in unum  
 Et quot erant homines tot dedit esse feras  
 Et digitos teretes rigidos curauit in ungues  
 Ut possent rapere & rapta tenere diu.  
 Gutturis ingenti baratrum patefecit hiatu  
 Ingluuiem posset quod faciare nihil  
 Neue propinquaret, neu quis superesset amicus  
 Spirantem grauitè iussit olere animam.  
 Non satis alipedes humeris quoque nexuit alas  
 Ut pelagus, montes, ut super astra volent.  
 Iratos fecit vultus, toruosque Leones.  
 Horribiles visu, terribilesque sono.  
 His furiis, his tormentis iam mille per annos  
 Nos DEus & nostros excruciauit auos  
 Fallitur hoc, qui me maledicere carmine credit  
 Reddo laceffitæ damnaque reddo vices  
 Læserunt alios me diripere sed ultor  
 Carmine bella gero, Rex meus ense gerit.  
 Jura dabant ignem ex facie rabiemque uomentes  
 Hic infamis eras Barthole sancte aliis.  
 Quicquid erat pulchri subiecta per oppida ad usque  
 Verrebant auida uilia saxa manu  
 Quod reliquum fuerat catuli fætæque leonæ  
 Verrebant famulæque & niger ore Charon.  
 Damnabant ciues aliqua sub criminis umbra  
 Sed proceres solo hoc nomine crimen erant.



Torrebant oleo miseros ferroue calenti  
 Iste manum, hic oculos, perdidit ille caput  
 Stridebant populi, & taciti sua damna gemebant  
 Ut strident Stygiæ sub Rhadamanto animæ.  
 Appellas læsus rigidum sanctumque senatum  
 Herodes, Cayphas, Anna, Pilatus erant.  
 Turpis & in Venerem gens proiectissima plusquam  
 Aut Sybaris, Capua aut Pythagorea Croto.  
 Deformes iuuenes & cana senecta vacabant  
 Sardanapalineis sollicitudinibus.  
 Quid referam illicitos coetus & quæ ipsa trahebat  
 In noctem, longum stella diurna merum?  
 Casareasque dapes miserorum sanguine partas  
 Ad rem damnosos, & fera bella canes.  
 Cætera prætereo. nam cum uestalibus ipsis  
 Fas erat in sacro concubuisse thoro  
 Italiam, Italiam, Italiam, pleno ore salutant  
 Conseruatores scilicet Italiæ  
 Immo euerfores, ergastula dura, Nêrones  
 Estis, & immanis barbara barbaries.  
 Est doctus fortisque nihil, si proditor, illi  
 Præmia magna cito proditiōis erant.  
 Vos Linguam horretis Latiam, moresque latinos,  
 Vestra sonant totam guttura Dalmatiam  
 Equabant tumidi se, & præ sua gesta ferebant  
 Oh scelus, inuictis Martia Roma tuis.  
 Noctua sic aquilam, timidum sic damma leonem  
 Prouocat, & paruus sic elephanta, culex.  
 Bellorum causas, armorum semina docti  
 Spargere, & artificii nigra venena manu.  
 Ut solet horribilis gaudens spectare ruinas  
 Quas prius allecto texuit arte sua.  
 Sed isti armabant Reges, multoque cruore  
 Nostra triumphabant si tepuisset humus  
 Non maris aut terræ sat erat turbare quietem  
 Tentarunt interponere bella Deos.  
 Ante triumphantis Genuensia festa Georgi  
 Semileo celebrant te pie Marce diem  
 Petrus & Ambrosius clari duo lumina cœli  
 A Venetis grauius læsus uterque fuit.  
 Huic sunt conati trifidum extorquere flagellum  
 Et Mediolanum dirripere ante oculos  
 Illius aggressi laceram expugnare carinam  
 Pastorem turbarent, pascere gramen oues.  
 Ter quater omnipotens Venetos iubet ante citari  
 Ter quater actores non voluere pati.  
 Dicentes Veneti, si scandent culmina cœli  
 Coelicolum inficient angelicosque choros.  
 Ambibunt superos & erunt etiam altera rursus  
 Dira cathenati prælia Luciferi  
 Præterea lata est dudum sententia adestque  
 Patronus, Marcus dicere iussus ait:  
 Dum Veneti contra Mahumetidas arma gerebant,  
 Dumque mali minus, his ipse Patronus eram.



Ast postquam placuere illis furialia bella  
 Furta, latrocinia, toxica, adulteria  
 Quod nunquam tantumque nefas fecere Gigantes  
 Ista Gigantæa noxa luenda nece est.  
 Erubui semper tales habuisse clientes  
 Desero eos semper, quod meruerunt habeant.  
 Talibus æternam pacem, rigidumque Tribunal  
 Quærebant placidos sollicitare Deos.  
 Non bellum contra Turcas dominantibus istis  
 Spes inter nostros, nulla quietis erat.  
 Omnia turbabant, auro comitante veneno  
 Hæc duo cœlesti proposuere DEO.  
 Et velut effugiens hosti loligo sequenti  
 Nubem atramenti proiicit ante oculos.  
 Sic isti si forte aliquid fecere timendum  
 Ambiguas tenebras regibus injiciunt.  
 Non satis a Cypro fuerat quicquid iacet usque  
 Qua Phaetontæas Abdua rumpit aquas.  
 Et non contenti totum spoliassè profundum  
 Duraque captiuo subdere vincla mari.  
 Sacra fames auri, & dominandi cœca libido  
 Per scelus immodicas crescere suasit opes.  
 Per scelus omne duces raserunt regna, Thetrarchas  
 Ingressi summi viscera pontificis.  
 Gaudebant niueas vexilla inferre per Alpes  
 Ante oculos ibant Hister, Arar, Rhodanus.  
 De Roma & tota Italia iam actum esse putabant  
 Orbis anhellabant Imperium occidui  
 Non pudor ullus erat, nec erat reuerentia diuum  
 Prodere, mentiri, polluere, opprimere.  
 Et se immortales iactabant, deinde timeri  
 Non aliterque coli, quam voluere DEI.  
 Sicut aues alias bubo, & cornicula fallax,  
 Ludit regales improba vulturios  
 Ridebant ipsos nullo discrimine reges  
 Ipsum cum magno Cæsare, Pontificem.  
 Ungare magne potens, & te inuictissime Cæsar,  
 Jactabant soldis Vos meruisse suis.  
 Namque minabantur (sunt testes) præfulis almi  
 Pulsatas mitra cedere velle nates.  
 Et te clericulum & paruum ad pia sacra ministrum,  
 Facturos o lux maxima sancte Pater.  
 Rupturosque tua inuicta Rex France corona  
 Perfractum (oh facinus) terque quaterque caput.  
 O faeces hominum, porcorum semina, non vos  
 Talia de tanto dicere Rege pudet?  
 Hoc caput est, quod Christiculum pius orbis adorat  
 Quod Babylon, quod tu maxime Turca tremis.  
 Non tulit Arctoi moderator maximus orbis  
 Cæsar, qui triplici cingit honore caput.  
 Nec valet ulterius tantas tolerare querelas  
 Hortatur proceres & sua regna suos.  
 Hortatur socios sceleratam excindere gentem  
 Pontificem inprimis maxima Roma tuum.



Continuo Reges Gallus, Romanus, Hiberus  
 Cæsare cum magno foedera sancta ligant.  
 Retia rara parant, & acuto spicula ferro,  
 Fertur Marmarica lancea torta manu  
 Murorum in stragem atque hominum quæ inuenit Erynnis  
 Sicut ab irato fulmina missa Joue.  
 Non desunt laquei, pedica ancipitesque secures,  
 Non eques armato conspiciendus equo.  
 Primus ab Herculeis descendens Alpibus heros  
 Gallicus, hic centum traxit in arma Duces,  
 Quingentos duxit procures, & mille phalanges,  
 Innumerabilium millia plura canum.  
 Rex Lodouicus equo & fulgentibus acer in armis  
 Suscitatur in rabidas arma cruenta feras.  
 Nec minus expediunt alia se in parte leones,  
 Prudentes aliquis crederet esse viros  
 Unguibus effodiunt terras & castra coronant  
 Et tecti ferro pectora fida gerunt.  
 Signa sequi, parere duci, seruare Tubarum  
 Classica, conspiceres ordine stare suo.  
 Erumpunt portis rabido feruore duabus  
 Partiti in turmas sic abiere suas.  
 Exacuunt iras caudaque & dentibus uncis  
 Inferumque graui murmure profiliunt.  
 Vos quibus Aonidum est, studiumque & spiritus ingens  
 Dicite quot strages ediderint Veneti,  
 Me leges, & cura fori ingratiq[ue] labores  
 Impediunt elego carmine tanta loqui,  
 Id referam, dubio hærebat victoria Marte  
 Ni Regis præsens dextra tulisset opem.  
 Ille aciem totam, in Venetos dirrexit & illos  
 Disgregat & penetrans agmina densa secat.  
 Virtutis memores illi, memoresque salutis  
 Pulchrius esse putant in fera bella mori.  
 Ergo inter cades gaudent & tela virosque  
 Obita perfringunt, dillacerant, laniant.  
 Intrepidique ubi densa vident venabula currunt  
 Dant alternantes accipiuntque neces.  
 Pugnauere diu, sed ne morerentur inulti  
 Fortia strauerunt corpora multa hominum.  
 Tum vero audires ictus fremitusque cadentum  
 Rheticus hinc, valles hinc tremuere Padi.  
 Donec Celta cohors, Italumque exercitus omnis  
 Undantem hostili strage cruentat humum.  
 Corpora magna bouum veluti prostrata videres  
 Totaque insolito prata cruore natant.  
 Aut capti, aut cæsi innumeri periire Leones  
 Se dedit infami cætera turba fugæ.  
 O Carmignolæ & clari Coleonis in armis  
 Gaudete o manes impiger ultor adest.  
 O Rhagufæi & Ligures super æquora cæsi  
 In bellis Venetis, vester hic ultor adest.  
 O cruce signati, qui sancta videre sepulchra  
 Vultis ac in Solymas iam patefacta via est.  
 Hic finis Veneti Imperii, cecidere tyranni.  
 Innumeri, nunc est libera terra, mare.



De te magne leo Regum Rex maximus albis  
 Quattuor in lauri fronde triumphat equis  
 Nec vero Te sancte pater, te maxime Juli  
 Altera belli huius gloria præteream  
 Tu pepulisti armis Venetos ex urbe Rauenna  
 Atque Fauentina, Flamminiaque tua  
 Tu rem Romanam magnis legionibus auges  
 Clauigeri attollis dirruta templa Petri.  
 Quondam fracta mouet sub te tua Roma lacertos  
 Et veterum meminit fortia facta Ducum.  
 Et stupet insolitos non in Jouis ire triumphos  
 Ad Vaticanæ, sed pia templa DEI.  
 Nec vero iam te Cæsar memorande silebo  
 Qui Rhenum in Venetos, Dannubiumque trahis  
 Cuius in Euganeos Patauina ad moenia campos  
 Alpinis fluvitant omnibus arma iugis.  
 Nec tartesiæ ducens regnator ab oris  
 Vsque a Cantabrico carbasa mille sinu.  
 Nec veteres hostes Ligures, nec Gallica vela  
 Omnia turritis puppibus alta fremunt.  
 Sed vos o Proceres, qui iam vicisse putatis  
 (Ingentes vrit parua fauilla domos)  
 Ite triumphales infensa ad moenia Reges  
 Vincere laus prima est: altera scire frui.  
 Si Venetum vultis bellum nescire secundum  
 Infestum ex ima vellite stirpe genus  
 Distulit & poterat Capitolia vertere Pœnus  
 Et Graias Hector, si voluisset opes.  
 Viuere priuatus nescit, qui publica rexit  
 Sæpe rebellabant, sæpeque tela ferent  
 Præualidæ vires, immensa pecunia in urbe est  
 Regna subornabunt ambitione, dolis.  
 Constantina Urbis veterum monumenta Quiritum  
 Hic sunt & Cypri (scenora) regis opes  
 Diripere omnes, nemo illos, hic latet aurum  
 Occidua hic latitant, hic Orientis opes  
 Per pontes in equis Venetam si intratis in urbem  
 Nulla iam Baia, nullaque Abydos erunt  
 Plus maris hic quanto est, quam Sestus distet Abido  
 Vestra quidem tanto gloria maior erit.  
 Non tamen o Veneti deerunt solatia vobis  
 Ne desperetis gaudia vestra manent.  
 Sunt casses, hami, nasseque tridensque palustres  
 Sunt & quas arcu deliciatis aues.  
 Non defunt Gobi, Rumbi, Muli cocleæque  
 Cumque saginatis ostrea mugilibus  
 Sunt fora, sunt merces & auita pecunia terris  
 Abdita, sunt totidem carbasa mille rates.  
 Dedite Principibus, veniamque oretis ab ipsis  
 Prætozem mittent, qui fora vestra reget  
 Urbanis vacui curis ex æquore toto  
 Vndique contractas puppe vehetis opes.  
 Fortunam quicumque nequit tolerare secundam  
 Aduersam nolit, seu velit, ille feret.  
 Vos ergo ad proprias artes redeatis aurorum  
 Armaque & imperium linquite principibus.





**MICH. COCCINII**  
DE  
**BELLO MAXIMILIANI CUM VENETIS**  
**LIBER.**





LECTORI SALVTEM!


BURCARD GOTTHELF STRUVE.



Ubingensis patria erat Michael Coccinius, vulgo Köchlin dictus, post in Italiam delatus, Vitique de Furst, Gubernatoris & Vicarii Imperialis ducatus Mutinensis factus fuit Cancellarius. Licet postea valetudinis causa, prout huius libri præfatio docet, relicta Italia, Tubingam iterum secesserit. Hic quatuor libris integrum Maximiliani I. bellum cum Venetis scripserat, qui, cum ipse interfuerit, lucem adferre possent multam Italicae historiae, maxime, quod, uti ipse ait, Galli & Itali in laudes suas profusi, Germanorum res in obscuro relinquunt. Ex his vero instinctu potissimum Henrici Bebelii, quartum saltim librum publicavit, trium priorum editione in aliud tempus referuata. Comprehendit in eodem res vnius anni, quæ ab initio Maji 1511. ad Cal. Maji 1512. usque in bello Italico acciderunt. Orditur igitur historiam suam à legatione Matthæi Langii Augustensis, Episcopi Gurcensis ad Julium Pontificem maximum, inde ad defectionem Bononiensium ad Bentiuolos; fugam Papalis exercitus ante Bononiam progreditur. Hinc pergit ad indictionem concilii Pisani, & quod Papa ipsi contrarium indixerat Lateranense, novi fœderis percussione inter Julium Pontificem, Ferdinandum, Arragoniæ regem & Venetos. Intermiscet etiam bellum Maximiliani Helueticum & prolixius paullo ab initio Gallorum ingressum in Italiam repetit. His missis, pergit in Bononiæ obsidione per Hispanos facta; Brixiae occupatione per Venetos: & rursus eiusdem expugnatione per Gallos. Peruenit tandem ad atrocissimum illud prælium ante Rauennam gestum. Demum, facta comparatione quale olim extiterit Germanorum Imperium, & quale nunc sit, Germaniæ Principes monet, ut se suaque Maximiliano Imp. submittant, ipsiusque iussis obtemperent, alias detestari se Germanorum discordiam ignauiamque, qui Gallos iam XVI. annos in Italia versari & Germanorum robore atque milite sibi Italiæ dominium quærere permittant. In fine subiicitur Henrici Bebelii Querela Germaniæ, ad vniuersos Germaniæ principes, quod bellum Maximiliani contra Venetos non iuuent, aliaque in simili causa cohortatio Germaniæ. Prima huius Historiæ editio litteris adhuc monachalibus fuit exarata sine loco & anno impressionis, forma maiori. Alia cum Coriolani Cepionis Dalmatææ de Petri Mocenici Imperatoris gestis prodiit Basileæ 1544. 8.

MICHA-





MICHAELIS COCCINII TUBIN-  
GENSIS, DE BELLO MAXIMILIANI  
IMP. CUM VENETIS GESTO, ANNO  
M. D. XL.

LIBER VNVS.

REVERENDO AC CLARISSIMO VI-  
RO, D. IACOBO DE BANNISIIS, CÆSA-  
REÆ MAIESTATIS SECRETARIO AC CANCELLARIO  
MICHAEL KOCHLIN, ALIAS COCCINIUS  
S. P. D.

**Q**UM his diebus exactis, Vir clarissime, aeris mutandi gratia, Italiam li-  
quisssem, meque ad Tubingam, natale solum, pro meliore valetudine con-  
sequenda contulisssem, ad Italiae nouitates promulgandas sum à sodalibus  
amicis meis in ipso gymnasio rogatus, & in primis ab Henrico Bebelio  
Iustingensi, cuius literis compluribus antea dum in Italia essem, ad res Italicas scriben-  
das, sum provocatus. Ego vero quoniam ipsorum voluntati omnino repugnare ne-  
quini, quocirca, ut voto & desiderio eorundem quatenus licuit satisfacerem, destinaui  
quartum librum commentariorum, quos in Italia de bello Maximiliani cum Vene-  
tis gesto lucubraui, sub tuo nomine publicare, maxime quod Galli & Itali in laudes  
suas profusi, res nostras in obscuro relinquunt. Equidem tres primos libros hoc tem-  
pore haudquaquam publicandos putavi, quorumque editionem consulto in aliud tempus  
referuo. Quartum autem librum auspiciatus sum à legatione seu professione reueren-  
dissimi D. Matthæi Episcopi Gurcensis ad Iulium Pontificem, in quo omnia hoc anno in  
Italia gesta saltem relatu digna commemoro. Nam annus iam transactus meo iudicio  
omnium maxime memorabilis visus est & defectione Bononiensium, fuga exercitus Ec-  
clesiastici, indictione concilii Pisani, noui fœderis percussione inter Iulium Pontificem,  
Ferdinandum Regem Arragonia, & Venetos, item Bononia obsidione per Hispanos, oc-  
cupatione Brixia per Venetos, & rursus eiusdem expugnatione per Gallos. Et nouissi-  
me pugna illa asperrima ante Rauennam gesta. Nec præterii narrare Maximiliani  
imperatoris contra Venetos gesta. Addidi præterea dictis non incongruam digressio-  
nem de Gallorum in Italiam ingressu, & quid ipsi sedecim nunc annos in Italia gesserint.  
qua sane omnia curavi, pro viribus breuiter & luculenter perstringere. Et quoniam  
non sum nescius plurimos fore, qui, huiusmodi lucubrationes meas taxare impugna-  
reque conabuntur. Quocirca te rogo, obsecroque, quod solitum tuum patrocini-  
um (quod tamen in rebus meis omnibus, nullis quidem meis de te meritis, sed sola huma-  
nitate & beneuolentia in me tua singulari impartiri consueuisti) in præsens pro me, con-  
tra illos ofores & blaterones, suscipere digneris, ac opus tibi dicatum & clientem tibi  
dedi-



*deditissimum tueri defendere studeas. Te namque patrono & defensore, omnes aduersarios naucifacio. Quod si in scriptionibus meis quippiam leclitaueris menda dignum, id corrigas, & castiges, tuum quippe iudicium mihi instar omnium est. nec pudebit me erratum emendare, de quo me admonueris. Vale, ex Tubinga Kalendis Iunii, Anno Domini M. D. XII.*

HENRICUS BEBELIUS JUSTINGENSIS AD MICHAELEM COCCINIUM TUBINGENSEM, NUNC APUD LONGOBARDOS DEGENTEM, VI-  
TIQUE DE FURST GUBERNATORIS ET VICARII  
DUCATUS MUTINENSIS CANCEL-  
LARIUM.

*Coccini, constans vetus & sodalis,  
Quem fides, virtus, sapiens Minerva,  
Integri mores, probitas decorant  
Alite fausto.*

*Scribe res gestas Latius in oris  
Temporis nostri, precor atque bella  
Caesaris contra Venetos dolosos  
Maxmiliani.*

*Sive nam Gallos, Italosue rerum  
Sumis auctores, tibi falsa produnt,  
Atque Germanos merita laborant  
Fallere fraude.*

*Ipsæ sed præsens mihi veritatem,  
Quo vales multum, calamo fideli  
Pingito, dulcis patriæ nec unquam  
Immemor esto.*

CARMEN SEBASTIANI KEUFFER PHILO-  
SOPHI, IN LAudem COCCINII, ALIQUANDO  
PRÆCEPTORIS SUI. p. 268

*Grammatistarum numerosa classis  
Casuum tractans generumque vires  
Voce stridenti repetens sit an h  
Littera nec ne*

*Dormiat iam fugiensque cedat,  
Nam graues terfo calamo notauit  
Res, quibus falsi nihil est amicum  
Codicis author.*

*Cum suis cedant fugiantque rauci  
Deliramentis modo, sed legamus  
Coccini gratum nouitate librum  
Historiarum.*

MICHAEL-



MICHAELIS COCCINII TUBINGEN-  
SIS, DE PRINCIPVM AVSTRIÆ, CÆTERO-  
RUMQUE ET VENETORUM BELLIS, IN ITALIA  
GESTIS, LIBER.

Cum Matthæus Lang Augustensis, Episcopus Gurcensis apud Regem Christianissimum legationis munere fungeretur, Pontifex Iulius plurimum apud Maximilianum Cæsarem sollicitabat, ut ipse Gurcensem ad se legaret, quod medio eiusdem multa pro gloria, incremento amplitudineque Germanicæ nationis, ac suæ maiestatis decernere ac constituere deliberauerit. Cæsar ne paci ac tranquillitati Italiæ in aliquo defuisse videretur, statuit Pontifici morem gerere, atque ad eum Mirandulæ constitutum Ioannem Collam Mediolanensem destinavit, per quem se Gurcensem cum pleno mandato componendæ pacis inter se & Venetos absoluisse significavit. Ideo reliquum esset, quo beatitudo sua curaret, ut honorificam pacem à Venetis consequi valeat. Et quoniam Curcensis Vito de Furst Oratori Cæsareo scripserat se ad sanctissimum nolle proficisci, nisi cognitis antea oblationibus quas Veneti Cæsari offerant, cum desideret suam ad pontificem legationem, aliquem bonum effectum parere, ut quod si minus ipsa vniuersalem pacem producere possit, sit contentus quod saltem particularem operetur pacem. Orator itaque anxius & sollicitus apud pontificem pro eliciendis Venetorum oblationibus insistebat, quas & superiori libro memorauimus. Ut igitur Gurcensis per Collam eas intellexit, circa lacum Benacum in oppido Reiffio ex itinere subsistit, indeque eundem Collam ad pontificem remisit, & pro saluo conductu (quod Latini olim dixissent, *pro literis tuti itineris, & publicæ fidei*) & pro induciis inter beatitudinem suam & Regem Christianiss. ad ducem Ferrariæ, item & pro amplioribus Venetorum oblationibus. Ad hæc & oratori Regis Catholici Hieronymo Feych exponi fecit, cum Pontifex ipsum literis compluribus in Italiam vocauerit, Rex item Catholicus sapius fuerit cohortatus, ut nomine Cæsaris Italiam peteret, tum pro incremento & gloria Cæsaris, tum sua ipsius propria, videatur sibi, quod cum magno dedecore Germaniam repetiturus sit, ubi pacem ipse procurasset, in qua Venetis Padua relinqueretur, neque etiam ea pax grata Cæsari esset futura. Præterea & id ipsum esset contra decreta, inter Cæsarem & Regem Christianiss. inita. Proinde nisi sanctissimus vna cum Rege Catholico Venetos urgeat ad maiores oblationes, non sit institutum suum ultra Mantuam progredi. Pontifex his auditis, nullis induciis assentire voluit, neque aliquam concordiam cum Rege Franciæ & duce Ferrariæ se initurum affirmavit, nisi habita Ferraria. At Venetos se in præsens ad ampliora astringere non potuisse asseruit, cum nemo ex parte Cæsaris cum pleno mandato adsit, qui huiusmodi oblationes nomine eiusdem acceptet. *Adueniente autem (inquit) Gurcensi (cui contra consuetudinem nostram plenum saluum conductum dedimus) facere curabimus omnia, quo is cum honore proprio & incremento, gloriaque Cæsaris in Germaniam redeat.*

Post hæc Gurcensis lacum Benacum relinquens, ad Mantuam proficiscitur, quo in loco oratores principum confœderatorum conuenerant. Aderat illic Stephanus Episcopus Parisiensis nomine Regis Christianissimi, Gurcensis quidem secum illuc duxerat Episcopum Cathilinensem, oratorem Regis Catholici apud Cæsarem degentem, breuique post eum venerat Hieronymus Feych, nomine Regis Catholici apud Pontificem oratorem se gerens, & Archidiaconus Mantuanus nomine Pontificis. Gurcensis Mantuæ multum diuque de sua vltiori profectione hæsitabat, quoniam maiora promissa superioribus à Venetis non erant oblata: tandem tamen adhortatione Hieronymi Feych, eiusque pollicitatione ad vltiorem profectionem fuit adductus. Pontifex qui per id tempus Rauennæ erat, ubi intellexit Gurcensem ad se venturum, Bononiam redire statuit, quod



maior Hospitiorum commoditas & aer salubrior Bononiæ, quam Rauennæ, esset. Gurcensis priusquam Padum transisset, terræ motus Mutinæ & Bononiæ est auditus, de quo nescio quid prælaguerint. Pado igitur transito, eodem ipse die Mutinam venit, & inibi à ciuibus & Vicario, vel (vt cum vulgo loquar) Locumtenente, Vito de Furst oratore quam honorificentissime est exceptus. Deinde Mutinæ certos comoratus dies, auctoritate imperiali quaungebatur, exemptiones & priuilegia toti territorio est elargitus. Post hæc Mutinam linquens, Bononiamque petiturus, à Pontifice (qui eodem etiam die Bononiam ingressus, omnia illic inordinata offenderat) iussus fuit extra ciuitatem, in posterum diem subsistere. Sub noctis tamen crepusculo per Franciscum Alodisium legatum in ciuitatem secreto fuit introductus, & ad sanctissimi oris osculum & secretum colloquium remotis arbitris admissus. Postridie publice Bononiam ingrediens honestissima comitiua virorum & curiæ & ciuium comitatus est exceptus, qui paucis post diebus à pontifice ad exponenda mandata accersitus in hunc ferme modum orationem habuit. *Beatissime pater, scripsit alias Beatitudo tua ad inuictissimum Cæsarem, quod ipse me huc ad se legaret, pro tractandis, componendis & concludendis negotiis, quæ pro honore & incremento suæ Maiestatis deseruire visa fuerint. Cæsar itaque quo desiderio tuo obtemperaret, me huc destinauit, prius tamen quam ex itinere arrepto me huc contulisset, Beatitudo tua me monuit & adhortata est, vt cum omni celeritate maturare conarer, quippe quæ curare velit, quo cum gloria honoreque & Cæsaris & meo ipsius proprio in Germaniam repedarem & maxime in re Veneta efficere velit, quod Veneti omnibus, quæ in Italia continenti possident cedant, dempto Teruizio & Padua, quæ sane loca in feudum ab imperio recognoscere habeant; certam quotannis pecuniam Cæsari pro eisdem pensuri. Et quandoquidem Cæsari nequaquam honorificum foret, Venetis Paduam & Teruizum relinquere, nec aliquod habeo mandatum pacem conficiendi, nisi illis locis restitutis, quocirca sacratissimus Cæsar rogat atque obsecrat, vt Beatitudo tua (si Veneti obstinate ea loca tenere nitantur) dignetur eosdem deserere, simulque ea omnia facere, quæ bonum confederatum iuxta conditiones fæderis Cameracensis oportet & consentaneum est. Pontifex facta & audita huiusmodi mandati expositione tempus deliberandi sumpsit, interim deputauit tres Cardinales, Raphaelem Episcopum Ostiensem, Camerarium sancti Georgii, Petrum Ecclesiæ sancti Quiriaci Reginum, & Ioannem sanctæ Mariæ in Dominica de Medicis. per eosdem Pontifex conditiones pacis declarauit asseruitque, quod paratus sit efficere apud Venetos, vt hi Veronam & Vincentiam Cæsari relinquunt. Item quod Teruizum & Paduam in feudum ab Imperio recognoscant, certam pensionem Imperatori quotannis pro eisdem locis contributuri. Item quod forum Iulium & reliqua, quæ in continenti Italiæ tenent, Patriarchæ Aquileiensi cedant, qui vasallus sit Imperii iuxta antiquum tempus.*

Et vbi pax illa subsequeretur, ac Cæsar istiusmodi pacis conditionibus assensum accommodaret, polliceatur, se effecturum & curaturum, quod Gurcensis nanciscatur patriarchatum Aquileiensem, Cardinalatum, & quam plurimas dignitates Ecclesiasticas, vnde pro annuis redditibus & vectigalibus colligere possit centum millia ducatorum.

At Gurcensis nullis promissis, nullis item muneribus seu donis, quibus quotidie quam magnificentissime prosequeretur, nec aliqua alia re sibi proposita, adduci seu flecti potuit, quo mandatum sibi iniunctum transgrederetur. Iuxta quod cum negocia expedire non liceret, veniam abeundi à Pontifice efflagitauit, qua sane impetrata, Bononia quartodecima die simul ac illuc venerat, di-  
 scessit. Post cuius quidem abitionem Fabritius cum sua gente à rege Catholico fuit auocatus, & Bononiæ magna inter curiales trepidatio suborta. Gurcensis deinde Mutinam petiit, ac paucos inibi dies commoratus, subinde cum Episcopo Parisiensi Parmam profectus est, de communibus rebus ibi collo-  
 cuturi.



Quibus illic constitutis Pontifex per oratorem Regis Scotiæ ad id munus destinatum declarari seu exponi iussit, quod per eum non steterit, nec hodie adhuc die stet, quo minus Italia pacem consequatur plurimis ad id rationibus allegatis. At illi excusantes Principes suos, certa proposuerunt pacis media, rationi satis consentanea, quæ si Pontifex acceptare voluisset, Italia pacem & tranquillitatem affecuta fuisset. Interim Vitus de Furst orator & Locumtenens Mutinæ Cæsareus, nonnulla ordinavit repagula Bononiam versus. Admisit etiam intra ciuitatem iussu Domini Gurcensis ducentos pedites Italos sub Gallis militantes. Ex agro item Mutinensi commeatus exercitui Gallorum importari permisit. quibus de rebus Pontifex acriter contra Vitum mouebatur, de eo expostulans, perinde ac si conuenta secum inita minus seruare curaret; tamen Vitus ad nulla esset astrictus, nisi ut ciuitatem Mutinæ tempore belli Ferrariensis, neque Gallis neque duci Ferrariæ traderet. Sed de his hætenus.

Reuertamur igitur ad exercituum gesta. Gallorum exercitus Mutinensibus securitate data, ad Padi ripas se contulit, aliquantisperque ibi commoratus, dein copiis Ducis Ferrariæ circa fluuium Panorum è regione Bondeni (quo in loco amplior pars exercitus Ecclesiastici confederat) sese iungere cœpit, pontibus duobus super Pado constructis. Ambo quidem exercitus, quo tempore Gurcensis cum pontifice in tractatu versabatur, circa dictum fluuium pene otiosi sedebant. Ut vero Gurcensis Bononia re infecta discessit, & Galli & Ecclesiastici sese loco mouerunt, non multum à præfato fluuio digredientes. Iacobus Triuultius Gallorum Imperator, seu (vt nunc loquimur) capitaneus generalis, in itinere Concordiam expugnabat, quam plurimis in ea trucidatis, & in fossis castelli submersis, Mirandulæ vero expugnationem in aliud tempus opportunum differens. Pontifex autem ad prouidendum rebus exercitus sui Bononia abiens, ad oppidum Cento ibat, militibus stipendia pensurus. Deinde Bononiam reuersus, senatoribus accitis, eisdem de suo discessu declarauit, quos & exhortatus est vt in fide erga se constantes firmique perseverarent.

At illi optima quæque polliciti rogarunt, vt Beatitudo sua & ciuitatis & portarum curam sibi permetteret, facturi vt fideles & optimi subditi. quorum verbis & pollicitationibus Pontifex ductus, voluit vt certi deligerentur ciues præfecti, & (vt cum vulgo loquar) capitanei, qui cum militibus portarum & moenium custodiam susciperent, ordinatis ad id pecuniis. Bononiæ igitur rebus sic dispositis Pontifex Rauennam se recepit. Per id temporis Galli circa memoratum fluuium Panorum, ad locum qui dicitur Bonport, progressi, inibi cum exercitu traicere conati: è regione vero Ecclesiastici milites & bombardarum exercitu traicere conati: è regione vero Ecclesiastici milites & bombardarum missilibus, cæterisque telis repugnare, Gallosque à traiectu arcere. Cum vtrique diutius inibi, quam par esset, tempus contriuisent, tandem Triuultio consultum fuit, quod versus fluuii originem exercitum duceret, vbi offensurus sit in fluuii vado locum pedibus transmeabilem. Ad quem quidem locum vt Galli peruenire, agminatim fluuium transierunt. Primum equites transgressi, dein Germani conglobati, posthac Vascones, & vltimo reliqua exercitus pars, cum tormentis muralibus, & instrumentis bellicis. At Ecclesiastici milites interea temporis circa castellum Francum castrametati sunt, expectaturi Gallorum impetum: quinimo ferebatur eosdem sua sponte Gallos adoriri velle, manumque cum eis conferre. quam opinionem Triuultius verisimilem faciebat, exercitum suum ab ipsis Ecclesiasticis longioris spatii intervallo collocando. Pontificis exercitus dicebatur viginti quinque millibus & peditum & equitum constare; Gallicus vero duntaxat duodeviginti millibus constabat. Paucis post diebus Triuultius castra versus montana mouit, tanquam ab illis locis Bononiam obsessurus. Cui rei vt Ecclesiastici occurrerent, incontinenti castra reliquerunt, loca intra Pontem Rheni & ciuitatem præoccupaturi. Galli posthac recta via contra hostes progredi sategerunt, & in loco ad tertium vix lapidem ab Ecclesiasticis distante castra posuerunt.

Et



\* De hoc in vi-  
ta Georgii  
Fronsbergii  
p. 11.

Anno 1511.

Et ut certos deinde dies ambo exercitus ex opposito constitissent, superue-  
nit nobilis vir Georgius de Fruonschberg \* cum mille peditibus Germanicis à  
Verona ad Gallos pro suppetiis missus, Antea etiam Cæsar miserat Dieboldum  
de Stein in subsidium Gallorum, cum octingentis peditibus. Habebat & Iaco-  
bus de Emps idem & Sueuus & nobilis, uti alij duo, stipendio regis Franciæ su-  
pra bis mille & ducentos pedites. Galli, quo castris maior accederet existima-  
tio & pondus, ac ciues Bononienses clarius cognoscerent Maximilianum Cæsarem  
conatibus suis consensum præstare, Locumtenentem Mutinæ accersiri fecerunt.  
Et quoniam Locumtenens prædictus versabatur in practica (ut ita loquar) & se-  
cretiori consilio cum nonnullis ciuibus super deditione ciuitatis Cæsari offeren-  
da: idcirco non inuitus ad Gallorum castra concessit, quibus dictam suam pra-  
cticam communicauit, ne res à se inconsultis ipsis agi videretur. Eandem pra-  
cticam Galli approbantes asseruerunt sibi gratum fore, quod Bononienses se Cæ-  
sari dedant. Accidit autem altera nocte sequente circa tertiam fere noctis vi-  
giliam, quod in ciuitate Bononiæ magnus suboriretur tumultus, ac plerique pro-  
ditionis conscii proclamarent, *Popule, popule*. Quo sane tumultu capitanei, qui-  
bus portarum cura commissâ fuit, per vim portas aperientes, Bentiuolos ex do-  
mo eorum (quam in Gallorum castris habebant, in loco unde proximum erat  
iter de castris Bononiam versus) euocarunt, qui mox se de loco mouentes, in  
ciuitatem se receperunt. Eramus tunc in castris & in prædicta domo. Introdu-  
ctis ergo in ciuitatem Bentiuolis, Franciscus Alodisius legatus, suppellectile sua  
relicta, cum paucis vix aufugit. Capitanei vero Ecclesiastici, ut cognouerunt ci-  
uitatem proditam, è vestigio se ad fugam expedire cœperunt. At Venetos au-  
xiliatos, qui vltimo de proditione acceperant, populus Bononiensis ciuitatem  
egressus adortus est, multos ex eis occidendo, multos capiendo, bona item eo-  
rum diripiendo, quo quidem tempore Veneti in primis male mulctati sunt circa  
Bononiam, in diem sequentem, qui erat vigesimus secundus Maii, anni vndeci-  
mi supra millesimum quingentesimum. Galli reliquias exercitus Ecclesiastici  
persequiebantur, quo itidem de Bononia sine sanguine & sine aliqua vi ad Benti-  
uolorum ditionem redacta est. Bononiæ autem arx erat totius fere Italiæ mu-  
nitissima amplissimaque, Iulii Pontificis sumptibus constructa, eam nomine pon-  
tificis Georgius Vadisius tenebat. Is quia bombardarum iactibus ciuibus ma-  
gna inferebat damna, nec ipse arcem dedere volebat, quocirca Galli & Benti-  
uoli infensi, eandem vi expugnare statuerunt. Sed erant nonnulli ciues intra  
Bononiam, quibus Bentiuolorum dominatus displicebat, hi apud Locumtenen-  
tem Mutinæ egerunt, uti clam arcem intraret, eamque nomine Cæsaris accipe-  
ret. Locumtenens, quo res Domini sui ampliores redderet, confestim Bono-  
niam petens se in arcem prædictam recepit, comitatus tum à me & alio famulo  
dumtaxat, facta itaque sibi nomine Cæsaris arcis consignatione, & alio in locum  
suum subrogato, postridie mane ad Bentiuolos proficiscitur, ad denunciandum  
eisdem arcem sibi nomine Cæsaris traditam. At Bentiuoli Locumtenenti infensi  
indignabundique eundem intra cameram pallatii detinuerunt, me vero ad ca-  
pitaneum Gallorum (qui circa arcem custodiæ causâ incubabat) ire compule-  
runt, tandem tamen eodem die paulo ante noctem libere dimissi sumus. Galli  
deinceps & Bentiuoli omnia instruere & parare pro arcis expugnatione cœperunt.  
Verum quia nulli in arce commeatus erant, collocati illic præsidij gratia obsidio-  
nem diutius tolerare non potuere, ac paucis post diebus arx dicta fuit tradita,  
& à populo Bononiensi funditus diruta. Sic excelsa & magnifica in mundo ruere  
solent. Per eodẽ diẽ Franciscus Maria Urbini dux, Rauennæ Franciscum Al-  
lodisium Legatum pontificis curiam egredientem, multis vulneribus confossum,  
in publica platea interemit. Qui duas ferme horas post vulnera accepta vixit,  
nulla emittendo verba nisi illa, *O mea peccata hæc merentur*. Et ita præfatus le-  
gatus (quem Papiensem nominare solebant) sine sacramentis pro more Christia-  
no interiit, vir versutus, callidus, audax, crudelis, & sanguineus. Cuius me-  
moriam



moriæ pontifex subinde Romæ maledixit, quem tamen antea & honoribus  
 & dignitate subleuauerat. Eo autem tempore quo Gallicus exercitus per-  
 sequebatur reliquias Ecclesiastici exercitus, Joannes Franciscus Picus comes  
 Mirandulæ rebus suis diffidens, Locumtenentem Mutinæ accersiri fecit, ad  
 faciendam eidem nomine Cæsaris Mirandulæ consignationem. Ea sane re Lo-  
 cumtenens adductus, Mirandulam contendit, qui simul atque à præfato comi-  
 te per clauium ciuitatis & arcis traditionem & iuramentum Mirandulæ possessio-  
 nem nactus, eius administrationem Gerardo comiti de Arch commisit, ducen-  
 tos eidem pedites Germanos assignans, quos Georgius de Fruonsperg Veronam  
 rediens sibi miserat, deinde ad Mutinam rediens. Abiens vero Joanni Pico  
 suaserat, ut quam primum ad Cæsarem se conferat. Res illa postquam ad Ja-  
 cobum Triuultium perlata est, magno eum dolore & mœstitia affecit. Quan-  
 doquidem cupiditas se vlciscendi aduersus Pontificem & comitem Franciscum  
 p.272 primaria extiterat causa, propter quam capitaneum totius exercitus susceperat,  
 idcirco ad dictum Locumtenentem familiarem suum mittebat conquerendo,  
 quod sine mandato Cæsaris Mirandulam ad manus suas susceperit, & quod po-  
 tius sibi quam Francisco fauere debuerit: cum filia sua ex possessione à Pontifice  
 per vim fuerit exturbata; & præfatus Franciscus Pontifici se ut feudatarium in  
 præiudicium Cæsaris submiserit. Et proinde non obstante illa consignatione,  
 velit cum vniuerso exercitu ad obsidionem Mirandulæ proficisci, quod sane cum  
 magna festinatione facere studuit. Is itaque ut cum exercitu Mirandulam acced-  
 sit, priusquam bombardæ & instrumenta bellica collocarentur ad quatiendos  
 muros, certi inter Triuultium & Locumtenentem Mutinæ habiti fuere tracta-  
 tus. Tandem Mirandula promissa est sub conditionibus Triuultio, inter quas  
 vna erat, *quod si Cæsar intra mensem mandaret, ut cederet de loco, quod huic  
 mandato velit esse obediens.* Et ad eandem conditionem se astringebant reliqui  
 Capitanei, & in primis Locumtenens regis Franciæ, Gosthus dux Nemursi.  
 Alia quoque conditio erat, quod comes Franciscus possit libere exire, qui illis  
 diebus intra cameram mulieris delituerat. Sic Triuultius accepit possessionem  
 Mirandulæ, & comes Franciscus eam exiens, Mutinam peruenit cum locum-  
 tenente, qui postquam quatuor dies Mutinæ degerat, profectus est Floren-  
 tiam, ut instituto patris sui illic philosopharetur. Vxor vero cum libris se Mu-  
 tinæ continuit, imprudenter vero egerat dictus comes. Nam quo tempore Gur-  
 censis (qui Cæsaris erat legatus & Locumtenens generalis in Italia) Mantuæ ef-  
 set, ipse admonebatur ac ei consulebatur, ut Mirandulam ad manus Gurcensis  
 consignaret, quod id sine præiudicio iuris seu proprietatis facturum esset. Hu-  
 iusmodi ipse consilio obtemperare noluit, nimium Pontificis viribus confidens.  
 Sed quando vidit fractas Pontificis vires, tum primum recurrit ad id medium,  
 sed sero sapiunt Phryges. Nam Triuultius in continenti miserat oratorem ad  
 Cæsarem pro confirmatione possessionis, & obtinuerat ut Cæsar tutelam, quam  
 post mortem Ludonici comitis concesserat filiæ suæ, approbauerit & confirma-  
 uerit. Voluitque Cæsar, ne Locumtenens aliqua in futurum loca nomine suo  
 acciperet, nisi cum expresso suo mandato. Per id vero temporis quo Galli mi-  
 lites Ecclesiastici exercitus persequebantur nomine Cardinalium, qui Florentiæ  
 secesserant, nomine item Cæsaris & Regis Christianissimi, Concilium generale  
 ad Calendas Septembris Pisis celebrandum indicebatur. Ad quod quidem vo-  
 carunt Julium Pontificem, publicantur literæ indictionis Parmæ, Regii, Mu-  
 tinæ, Bononiæ, & etiam Rauennæ, ubi erat Pontifex. Itaque Pontifex re-  
 bellione seu defectione Bononiensium, fuga exercitus, & indictione concilii  
 percussus, Romam redire statuit, quo & vigesimo septimo die mensis Junii per-  
 uenit, relinquens Cardinalem Petrum tunc sancti Quiriaci, vulgariter Regium  
 nuncupatum, Legatum Bononiæ & Romandiolæ. Qui sane Legatus collectis  
 sex millibus peditum, & trecentis equitibus levis armaturæ, & totidem grauis  
 armaturæ Bononiam recuperare instituit, fretus fauore aliquorum ciuium, qui

Concilium  
 Pisan.



*Scala Kobel.  
Bruneck.  
Codobria.*

Bentiuolorum dominatum detestabantur. Idipsum Galli audientes, statim in succursum Bononiensium aduolarunt cum quadringentis equitibus grauis armaturæ. Quorum auxilio Bentiuoli cum ciuibus Ecclesiasticis in fugam verterunt, ac dein in ciues factionis Pontificiæ magnam exercuerunt crudelitatem, eorum bona publicando, ac nonnullos trucidando. Interea autem Germani & Galli coadunati, contra Venetos proficiscebantur, qui posteaquam oppidum Suaue per vim expugnarunt, Venetiani se receperunt ad Paduam & Teruissum, relinquentes Vincentiam, & alia quædam loca Cæsarianis. Cæsar vero per idem tempus in valle Asufiorum arcem illam, Schalam dictam, & locum Kobel nuncupatum ad deditionem compulit. Deinde ad Bruneccum se contulit, inde prouectus est cum duobus millibus peditum, ingentique tormentorum muralium vi ad expugnationem arcis Codobriæ, quam Beitelstein vocant, quam postea multo labore ad deditionem, Italis in ea prædii gratia constitutis abire permissis, Germanis autem transfugis ad vnum trucidatis. Germani vero & Galli, vt venerunt in agrum Taruisanum ad fluuium Blauum, qui antiquitus Silis est nuncupatus, Christopherus Episcopus Labacensis, item Christopherus de Rogendorff Australis, Georgius de Liechtenstein, & alii capitanei & præfecti Germanorum, decreuerunt proficisci in forum Julium, à Gallis contententes, vt interea circa dictum fluuium morarentur, ad Venetorum impetus & incursiones arcendas. Quæ res primum displicebat Gallis, qui noluerunt à Germanis seiungi: tandem tamen contentio quietuit, & Galli Germanorum secuti sunt consilium, ac circa præfatum fluuium perseuerarunt, quousque Germani vniuersum forum Julium ad deditionem Cæsaris rede-gissent. Morati tamen aliquantis per circa castellum Gradiscam, quod vi ad deditionem compulere. Quo quidem tempore Cæsaris exercitus contra Venet<sup>p.273</sup>os proficiscebatur, Alphonsus dux Ferrariæ cum populo Regiensi & auxiliari-bus copiis Gallorum ex Bononia redeuntium, oppidum Carpi obsedit, muris-que bombardarum iactibus quassatis, Albertum de Piis compulit se ad mediam oppidi partem admittere. Nam anno superiori, vt Galli eiecto Pontificis præsidio oppidum Carpi duci Ferrariæ & dicto Alberto restituisent, ipse dux suam vendiderat partem Alberto, pro viginti sex millibus ducatorum, & Albertus dederat ei in numerata pecunia viginti duo millia ducatorum. Quum autem residuam pecuniam Alberti commissarii ad constitutum tempus reddere vellent, eam Alphonsus acceptare noluit. Et quoniam eo tempore Albertus Mediolani Gallorum captiuitate detinebatur, quocirca eius commissarii verentes id quod postea euenit, Cæsarem adierunt, & literas ad Alphonsum impetrarunt, quibus eidem Cæsar sub poena priuationis Feudorum inhibebat, ne per vim occuparet Carpi, sed si quid iuris prætenderet, illud iure ac iudicio experiretur. Illæ literæ ad Locumtenentem Mutinæ mittebantur, præsentandæ ab eo Alphonso. Dux vero Alphonsus dissimulans se literas Cæsareas accepisse, in proposito suo perseuerans, Carpi per vim occupabat. Dum Alphonsus in obsidione Carpi versaretur, mittebar ego à Vicario populoque Mutinensi ad Gallorum Capitaneos, vt denunciando eisdem Cæsareæ Maiestatis sententiam & voluntatem, eos à proposito auocarem. Sed ipsi allegantes iussu & mandato Bossi generalis Locumtenentis se Ducis copiis coniunxisse, nihil efficere potui. Allegabant præterea rescriptum Cæsaris emanasse, quo tempore Albertus captiuus fuerit, & in eum casum Cæsarem Alberto prouidere voluisse, iam vero Albertus emancipatus domum redierit: & ita re infecta discessi. Albertus dein ad Cæsarem se contulit de Duce expostulaturus, qui impetrauerat à Cæsare literas, & ad commissarios Ducis in oppido Carpi existentes, & ad ipsum ducem, in quibus Cæsar sub poenis prioribus Alphonso iniungebat, vt Carpi Alberto restitueret, & commissarios ex oppido abire faciat. Sed dux mandatis Cæsareis se inobedientem exhibuit, qui & in multis aliis Cæsaris mandata contemnere videbatur: nam crebras habebat contentiones cum Locumtenente Mutinæ, quem im-pediebat,



pediebat, quo minus obedientiam à montanis Mutinensium consequeretur. Præterea & saluum conductum Locumtenenti prædicto dare recusabat, quo sal Mutinam deduceretur per terras suas, atque frumentum in terris suis emptum Mutinam deuehi non patiebatur. Quare Cæsar commotus, accito oratore Ducis, qui suam curiam sequebatur, eidem per consiliarios suos denunciari iussit, ut ipse cum Domino suo ageret, quod à memoratis se rebus contineat, alioquin ad vindictam ultionemque irritetur.

At Julius Pontifex ut Romam aduenit, haud longe post in febrem incidit, & usque adeo male se habere cœpit, quod per totam increbuerit Urbem, Pontificem interiisse, Omnes namque tabernæ, omnes item officinæ clauderentur. Vrsini præterea & Columnenses in armis stabant, quæ quidem fama obitus Pontificis allata est ad Cardinales Mediolani constitutos, item ad Cæsarem, item ad Regem Franciæ eius obitus tam certus exploratusque habebatur, quod legatus Romandiolæ iter versus Romam arripuerit, & Cardinales Mediolani exeuntes hospitia Ferrariæ, & aliis in locis disposuerint, Cæsar quoque voluerit ut Gurcensis\* cum Cardinale Adriano Romam proficisceretur, ad nouam Pontificis creationem. Non longe post certior superuenit veritas de vita Pontificis. Qua autem nocte Pontifex existimabatur mortuus, Franciscus Cardinalis Ecclesiæ Sancti Clementis mortem obiit; & Cardinalis Reginus ex itinere arrepto Arimini substitit, ac inibi diem clausit extremum, maxima pecuniarum summa apud eum reperta, cui in officio legationis substitutus fuit Joannes tunc sanctæ Mariæ in Dominica Cardinalis de Medicis. Pontifex ut à febribus conualuit, animum ad turbandum concilium Pisanum intendit, & eodem sub anathemate prohibito, indixit aliud Concilium œconomicum siue generale, Romæ celebrandum in palatio Lateranensi ad festum Paschæ anni duodecimi supra millesimum quingentesimum, quam concilii indictionem publicauerat vigesima prima mensis Iulii. Postea Cardinales Mediolani constitutos monuit, ut ad obedientiam reuerterentur, quos tanquam benignus pater & clementer suscipere, & eis gratiam misericorditer impertiri velit. At Cardinales monitis Pontificis nequaquam auscultantes, in mense Octobri Pisas profecti sunt, ad auspiciandum concilium in mense Maio indictum. Inibi igitur constituti postquam supplicationes diuinas ex more fecerunt, Sessionem habuerunt, in qua Bernardinum Episcopum Sabinensem, tunc sanctæ Crucis Cardinalem, & patriarcham Hierosolymitanum Concilii præsidem constituerunt. Deinde nomine Concilii decem delegerunt ciuitates, quas Julio Pontifici obtulerunt, quo p.274 pro œconomico seu generali concilio agendo aliquam ex eis eligeret, & quod si ei nulla ex eisdem placet, ut ipse vicissim decem deligat ciuitates, & electionem offerat. Ciuitates autem quæ pontifici fuere oblatae, erant Constantia, Thurinum, Bisantina ciuitas, Gebenna, Metensis ciuitas, Cassale, Verzelle, Auinionum, Lugdunum, & Verona. Pontifex intellecta oblatione nomine Concilii Pisani facta, tantum abfuit, quod illi consensum accommodaret, ut mox Cardinales ipsos & omnibus honoribus dignitatibusque priuaret. Quod simul ac Cardinales cognouere, duabus dein sessionibus habitis, concilium transtulerunt Mediolanum, quartam illic sessionem vigesimo secundo die mensis Decembris celebraturi. Maximilianus Cæsar statuerat Episcopum Brixiensem ad Concilium Pisanum mittere, qui tamen certis ex causis quas allegauerat, ab huiusmodi onere leuatus est, posthac ordinauit, ac cum pleno mandato absoluit, Felicem comitem de Werdenberg, Hieronymum comitem de Tyrol Veronensem, & Doctorem Faellam Vicentinum, qui Tridenti subsistentes, ulterius hætenus progressi non sunt, neque ad quartam concilii sessionem, quæ ex causis emergentibus in quartum diem Ianuarii prorogata fuit, peruenerunt. Cui quidem sessioni priores Cardinales qui Florentiæ secessum fecerant, interfuerunt, præter Consentinum, qui in Regio è viuis excesserat. Aderant item ex Ecclesia Gallicana quinque archiepiscopi, item viginti Episcopi, item

\* Quæ ad huius loci explanationem faciunt, reperiuntur in subsequenti præfatione ad Pierii Valeriani epistolam de Gurcensis Episcopi introitu Romano.



viginti quatuor abbates, ex quibus Abbas Claræuallis populum publica concione alloquens, inuehebatur contra Iulium pontificem, mores totius Ecclesiæ Christianæ pessimos reprehendebat, item ex Parisiensibus Doctoribus quatuor Theologi, item plerique procuratores ex capitulis Cathedralium Ecclesiarum. Julius autem pontifex quam primum concilium Pisanum erat indictum, verabatur, ne illud si viribus subsisteret, quippiam in sui destitutionem agere conaretur. Quocirca ad turbandum illud, & simul ad res Ecclesiæ Romanæ recuperandas, Ferdinandum Regem Catholicum sollicitare coepit, vt confecta cum Sarracenis pace, ac secum foedere inito, exercitum in Italiam contra Gallos trajicere velit. Rex quippe Catholicus, in ipsa ætate, maximas copias equitum & peditum, cum non mediocri apparatu bellico Africam transmiserat, ad domandam gentem infidelem. Vbi vero accepit exercitum Pontificis fractum, & Concilium Pisanum indictum, veritus Gallorum potentiam in Italia crescere, facile adducebatur ad obsequendum voto & desiderio Pontificis, atque pace cum Sarracenis constituta, exercitum in duas diuisit partes. Vnam remisit in Hispaniam, alteram cum septuaginta tribus nauibus magnis, & quindecim triremibus retinuit, quam & Neapolim adnauigare iussit, ad coniungendam se cum copiis illic coadunatis. Et ne videar Hispanos ex industria velle debita defraudare laude, obiter explanabo, quæ ab his tum gesta fuere. Nam & si ipsi armorum vi nihil eo tempore attentarint, attamen belli ostentatione id tum affecti sunt, quod rex Numidarum, qui nunc Rex Tunnicensis nuncupatur, se se subditum & tributarium regi Catholico constituerit. Is nempe Rex accipiens belli apparatus, quem Hispani contra Africam instruxissent, missis Oratoribus ad Regem catholicum suppliciter ab eo petiuit, quo se in protectionem & amicitiam perpetuam accipere dignaretur, pro qua sane re paratus ipse sit facere donationem firmam & ratam de omnibus ciuitatibus & castellis in littore maris sitis & ab eo tentis. *Item quod velit easdem terras vna cum Christianis defendere, & omnia damna eisdem terris per Sarracenos euenientia persolvere. Item quod singulis annis velit ei viginti millia ducatorum tributum loco pendere. Item quod Rex ipse Catholicus cum exercitu pertranseat ad expugnanda alia Africa regna, quod & ipse vna cum eo ad quorumcunque populorum expugnationem proficisci velit; quod si ipsemet non transeat, sed exercitum mittat, obligat se ad præbendum commeatus, equos & mulos ad portandum omnia necessaria ad exercitum.* His conditionibus Rex Catholicus assensum præstitit, ac ipsum Regem Numidarum in protectionem & amicitiam recepit, magnis & firmis cautionibus acceptis. Quærebat autem dictus Rex Numidæ pacem perpetuam, sed eam non nisi ad quinquennium assequi potuit, post pacem hanc cum Sarracenis firmatam, Rex Catholicus misit Neapolim decem millia peditum Hispanorum, mille ducentos equites grauis armaturæ. Dein ligam seu foedus commune cum Julio Pontifice & Venetis iniit pro mutuo quidem auxilio, & in primis pro recuperandis ac tuendis rebus Ecclesiæ Romanæ, pro salario vero Hispanorum in singulos menses à Venetis viginti millibus ducatorum constitutis, & totidem à Pontifice. Memorata confœderatio Romæ in templo quod vocant Mariæ de populo Calendis Octobris publicata existit, & dux de Thermis capitaneus ligæ seu foederis generalis designatus.

Per id autem temporis Germani, vniuerso Foro Julio, quæ regio inter Sontium & Lipientium amnes sita est, ad ditionem Cæsaris Maximiliani redacta, redierunt ad Gallos, qui (vt supra narrauimus) circa Planum fluuium per agrum Teruisianum ex valle Codobria fluentem morati sunt, quibus cum ad obsidionem Teruisii proficiscebantur. Germani multo propius quam Galli ad Teruisium castra metabantur, ac quotidianis cum hostibus certaminibus utebantur. Ex Teruisio quidem frequentia tela seu missilia ex bombardis in castra iaciebantur, à Cæsareanis autem militibus nullæ contra Teruisium oppugnationes attentatæ, nec aliqua tormenta muralia ad quatiendos muros seu hostium aggres

*Teruisium.*

res



res admota fuere. Teruifium antea haudquaquam munita erat, sed hostes opere & industria munitissimum effecerant, nam superioribus moenium partibus circumcirca demolitis, ingentem eleuarunt aggerem, post muros fossam fecerunt & altam & latam, postquam & aliam parauere fossam, sed occultam, & multis stimulis ferreis & puluere sulphureo repletam, quæ ingredientibus si non mortem, saltem maximum attulissent damnum. Vbi vero exercitus decem fere dies circa Teruifium moratus fuisset, iussu Cæsaris est dissolutus. Et præsidio ciuitatibus & oppidis Fori Iulii ex Germanis imposito, Galli petiuerunt hiberna. Molardus Vasconum capitaneus se contulit ad oppidum Carpi. Jacobus de Emps profectus est Veronam. Mille vero & quingenti pedites quos de Griseo foedere \* appellitant, & Rex Franciæ tum mercede conduxerat, Brixiā se receperunt, inibi soluto stipendio dimissi fuere. Equites Gallici se contulerunt Parmam & Rhegium. Ex Burgundionibus capitaneus Dominus de Reis profecturus ad hiberna, dum nimis incaute progreditur, à Venetis captus est cum aliis nonnullis equitibus.

\* Grobunder.

Interim Julius Pontifex apud Cæsarem vehementer institit, vt Gurcensem ad se destinare dignaretur, pro conficienda concordia inter ipsum & Venetos. Cuius rei gratia Veneti certas naues signo Aquilæ insignitas ordinauerunt, quibus Gurcensis de Venetiis Anconam deferretur. Cæsar pro saluo ducto Gurcensis quatuor petebat ciues obsides, inter quos vnus esset patritius, atque ipse tum in Austria versabatur, quocirca Veneti vt viderunt eum longius ab Italia abesse, paruaque præsidia pro custodia fori Iulii imposita, obsides denegarunt, & comparato collectoque exercitu, Vincentiam vendicarunt & deinde ad Forum Iulium progressi, & eiectis præsidiis, breui vniuersum Forum Iulium recuperarunt, præter castellum Cremons, & oppidum Gradiscam, quod quidem circa medium Nouembris obsidere coeperunt & cum nonnullas oppugnationes frustra tentassent, Christophorus Frangipan Comes Croatinus cum sexcentis militibus Goritia exiens, ex vna parte Sontii amnis, qui Goritiam alluit, & Gradiscam præterlabitur, profectus est contra hostes ad faciendum impetum in eos. Et dum dictus Christophorus Venetos adortus esset, interea quidam Germanus, Joannes Grubler de Veltkircha cum trecentis delectissimis militibus ex altera Sontii parte subsidii gratia ingressus est Gradiscam. Collocauerat autem Cæsar antea pro præsidio Gradiscæ Germanos & Bohemos bombardis optime instructos. Veneti posteaquam cognouere suos conatus circa Gradiscam irritos esse, cum non mediocri damno discessere, & profecti sunt ad vallem Codobriam; vbi vniuersa fere recuperarunt, præter arcem Codobriam, lingua Germanica *Beitelsstein* appellatam. Germani pedites postquam per exploratores acceperunt, Venetos in valle Codobria versari, & circa Castellum dictum Pleyff, consedissee, subito illic hostes aggressi, plures quam sexcentos equites & pedites trucidarunt, reliquis fufis & fugatis, ac memorato castello concremato, ad tutiora loca reuerfi sunt. Jodocus vero de Fucaris illud claustrum Italiæ, quod in via Torminii versus Noricum est situm, nomine Cæsaris tenens, cum videret id ipsum ex Italiæ locis nequaquam munitum ad resistendum, nec posse defendi, puluere sulphureo in locis obscuris posito ac disposito, vt interiecto certo temporis interuallo simul atque discessisset, ignem conciperet, consumptum est flamma, plurimis ex hostibus vita sublati. Hispani interea per agrum Picenum iter facientes petiuerunt Vmbricam & Æmiliam, quorum Capitanei erant Fabricius de Columna, Marcus Antonius de Columna, Petrus de Nauarra, qui anno superiore Tripolim expugnauerat, & nonnulli alii Capitanei. Capitaneus vero generalis erat Raymundus de Cardone Vicarius seu prorex, vel (vt cum vulgo loquar) Vicerex Neapolitanus, quoniam Dux de Thermis paulo ante mortem obierat. At Gosthus dux Neumursi Regis Franciæ (vt diximus) Locumtenens in Italia, cognito Hispanorum aduentu, certis equitibus & peditibus Bononiam præmissis, ipse cum equitatu Rhegium vsque subsecutus est, & post-

Pleyff.



Schwyz.

quam ibi paulisper substitisset, atque allatum esset Heluetios contra Longobardiam incursiones machinari, mox Rhegio relicto Mediolanum se contulit. Anno quippe superiore Locumtenens regis Franciæ Carolus de Ambogia quendam tabellarium ex pago Heluetiorum, qui appellatur Schwyz, ad Pontificem profecturum interceperat, eundemque ultimo affecerat supplicio, id ipsum populus dicti pagi vindicare cupiens, iam tum bellum Regi Franciæ indicabat, tam pro se, quam pro suis sociis, atque aliorum pagorum accitis confederatis cum duodecim millibus postularunt satisfactionem illius iniuriæ, quæ anno exacto Heluetiorum genti per memorati tabellarii obitum ac cruciatum illata sit. Dictis Dux obtulit viginti millia scutorum pro satisfactione, ut illis acceptis ad propria redirent. Cumque vtrinque in multis versarentur tractatibus, interea ex Bernensibus tria millia aduolauere. Heluetii itaque ex vniuersis pagis coadunati, audita Locumtenentis oblatione, ex oratoribus reuersis coacto concilio, deliberarunt denuo oratores ad dictum Ducem mittere, qui pro satisfactione postulerent duo castella agri Sebusiani seu Bullicensis, Lucan & Lucarine dicta, item ducenta millia scutorum, item & transitum ad Iulium Pontificem, seu ad terras Ecclesiæ Romanæ. His quidem mandatis expositis, princeps Neumursi offerre coepit viginti quatuor millia scutorum, nam maiora illis eodem tempore ipse offerre nequeat. Quo responso ad Heluetos relato, ipsi mox se de loco mouerunt, ac hostili animo terras ducatus Mediolani deuastare coeperunt, & itinere continuato vsque ad secundum lapidem à Mediolano, cum vniuersis copiis progressi fuere, omnia circum circa ferro & igne depopulantes. Ex quorum sane aduentu Mediolanenses mirum in modum deterreri, officinas claudere, fossas aquis replere, in magnoque prodicionis discrimine versari. Quapropter dictus Dux Gallorum copias vndecunque conuocare, Heluetios equitatu circumstiteri, & si qui paulum à castris, aut frumentatum aut lignatum secesserant, statim eos intercipere. Ad hæc Molardus cum Vasconibus, & Jacobus de Emps cum peditibus Germanicis aduolare. His de rebus Heluetii ad ducti, cum præda ad agrum Sebusianum redire statuerunt, minitabundi sese aliquando futuros auctores egressus Gallorum ex Italia, quemadmodum auctores extiterint ingressus.

1496.

Libet nunc parum à materia proposita digredi, & Gallorum in Italiam descensum ingressumque altius repetere. Anno nonagesimo sexto supra millesimum quadringentesimum Alexander Pontifex sextus indignatus Alphonso Apuliæ Regi succensensque, quod is Julianum Cardinalem Ostiensem Episcopum, Iulium secundum postea vocatum, contra se foueret, nec debitam obedientiam præstaret, contra Alphonsum accersebat Carolum Francorum Regem octauum. Cuius itidem ingressum, & Ludouicus Sphortia Mediolani dux ingenti pecuniarum summa promissa sollicitabat, quod is præfato Alphonso multum esset infensus. Postquam autem Alphonsus animaduertit Carolum Franciæ Regem magnum facere bellicum apparatus, se Alexandro Pontifici submisit, ci que & fidelitatem obedientiamque debitam exhibuit, quo quidem facto, Pontifex Carolo denuntiavit, quo cœptis desisteret, quoniam Alphonsus sibi reconciliatus esset. Carolus vero magnos tum fecerat sumptus, Heluetiorum ad decem millia conduxerat, aliaque instruxerat paraueratque. Idcirco Pontificis mandato auscultare noluit, ac quam celerrime cum copiis equitum & peditum, quorum supra viginti millia fuisse constat, Italiam ingrediebatur, & per Longobardiam iter faciens à præfato duce Ludouico & pecunia & re frumentaria adiuuabatur. Posthæc Ethruriam ingressus à Florentinis quam honorificentissime est exceptus, Florentiæ certos commoratus dies, Romam proficiscebatur. Alexander autem eius aduentu deterritus ad castellum Sancti angeli confugit, quem & Carolus obsedit, tandem tamen quorundam Cardinalium interuentu, discordiæ inter Pontificem & Carolum compositæ fuere, Regi à Pontifice in obfidem dato Cardinale Cæsare Borrea \* filio suo, quem Alexander sequentibus tempo-

\* Borgia.



temporibus capitaneum Ecclesiæ constituerat, ac Valentinum Ducem nuncupari fecerat. Carolo nonnullos dies Romæ agente, & pro arbitrio omnia disponente, cum exercitu Apuliam ingrediebatur, & mense haud exacto à die introitus, vniuersum regnum ditioni suæ submisit, Alphonso in Siciliam profugiente. Et quo tempore Carolus in Apulia hæc ageret, interea Ludouicus Aureliani dux cum magnis subsequitur copiis, tanquam suppetias Carolo allaturus, posteaquam is in Longobardiam venit, Ludouico Sfortiæ bellum mouit, eundem ducatu Mediolani deturbaturus, fretus auxilio copiarum ex Apulia redeuntium. Maximilianus quidem Cæsar, Ferdinandus Rex Hispaniæ, Veneti & Pontifex Alexander, vt viderunt Caroli conatus, mutuam inter se confœderationem inierunt pro ferendo auxilio duci Ludouico Sfortiæ, & pro extrusione Gallorum ab Italia. Agebat Maximilianus per id tempus conuentum Germaniæ Wormatiæ, in quo ipse adhortabatur Principes Germaniæ pro succursu imperii, & reipublicæ Christianæ, ac certa millia peditum Germanorum cum quadringentis equitibus Ludouico in auxilium mittebat. Carolus autem, vt primum intellexit Germanorum aduentum in Italiam, atque dictam confœderationem contra se initam, Italiam egredi maturabat, ne iter sibi ab hostibus intercluderetur. Veneti & Dux Mediolani mox copiis maximis contractis vltra fluium Thaurum supra Parmam labentem, in eo loco per quem Carolus iter facturus erat, castrametati sunt. Carolus vero circa Thaurum aliquantisper commoratus, fame & desperatione adductus, ferro sibi iter aperiundum censebat. Instrueto igitur exercitu flumen ingrediebatur, quod propter saxa & celerrimam aquæ cursum cum maxima difficultate erat transmeabile, Italis è regione Gallos repellere arcereque conantibus, vtrique ad pugnam peruentum est, fitque maximus conflictus in flumine. Postremo Carolus victor superiorque eo prælio euasit, plurimis interfectis. In eo quidem bello succubuit Rudolphus Gonzaga patruus Francisci Marchionis Mantuæ, & plerique alii viri famatissimi. Carolus dein victoria potitus in Galliam properabat; nam cum sciuisset suppetias Germanorum aduentare, malebat fortunæ periculum cum Italis solis, quam cum eisdem in simul congregatis experiri, tametsi Italarum exercitus triplo pene maior fuisset, quam Gallorum. Carolus itaque vbi Italiam exiuit, regnum Apuliæ ab eo defecit. Ludouicus autem Aureliani Dux Nauarra ad deditionem compulsa, ipse in ea ab Italia & Germanis auxiliariis fuit obsessus, & ad maximam necessitatem angustiamque deductus. Tandem ob certas seditiones inter Germanos & Venetianos milites subortas, dux Sphortia cum Ludouico Aureliani Duce pacem constituit. Sic Galli ea ætate, cum maximos motus in Italia concitassent, iamque formidabiles Turcis & Sarracenis facti essent, breui temporis spacio cum dedecore domum repedare fuere coacti. Et quoniam Carolus instigatione (vt dicebatur) Petri de Medicis, Pisas auulserat à Florentinorum subiectione, quamobrem Pisani vt suam tuerentur libertatem, contra Florentinos Venetias accesserunt, sollicitantes senatuique supplicantes, vt se in protectionem suscipere dignarentur. Veneti precibus ipsorum moti, auxiliares eis copias miserunt. Ludouicus autem dux timens, ne Veneti sub colore tuendorum Pisanorum Pisas occuparent, apud Cæsarem Maximilianum sollicitabat procius in Italiam ingressu: qui & anno postea VII. insciis Germanis principibus Longobardiam ingrediebatur, deinde Pisas se recipiebat, partiendo copias militum, quas secum adduxerat interim Liburnum obsidere, atque conuocatis confœderatis, his fere verbis affatus est. *Haud sane, inquit, nescii sumus, quin Galli animum habeant redeundi in Italiam, proinde quo ipsi intra limites regni sui se contineant, decreuimus eosdem in propriis sedibus usque adeo urgere & premere, vt tandem deponant animum ad dominium Italiæ aspirandi.* Et quoniam anno superiore tanquam confœderatus bonus pro expulsione Gallorum nostras destinauimus suppetias, cupimus itaque intelligere, quantum quisque confœderatorum nobis in id bellum auxilii polliceri velit. At confœderati habita deliberatione responderunt, sese



*non existimare Gallos propter iacturam, quam passi sint Italiam repetituros, neque ad hanc rem opus esse aliquo auxilio.* Maximilianus ut hoc responsum à confœderatis accepit, atque ut caueret insidias Venetorum, quas sibi Pisis struxerant, celeriter Italiam reliquit, Germaniam petiturus. Carolusque cum aliam expeditionem meditaretur, febre correptus interiit, & in locum sui surrogatus fuit à regno Ludouicus Aureliani Dux, quem quidem regem Maximilianus non ignorabat habere animum inuadendi ducatum Mediolani. Idcirco anno octauo postquam Friburgi in Brisgauia conuentum aliquorum principum egisset, cum certis copiis equitum & peditum per Sequanos proficisceretur contra terras regis Franciæ, & cum nonnullas excursiones leuiaque prælia contra Gallos confecisset, nec quicquam auxilii à confœderatis sibi offerretur, pacem cum rege Franciæ Ludouico constituit, ad id quidem faciendum inducebatur propter bellum, quod dux Geldriæ contra terras Philippi filii sui mouerat. Ludouicus autem rex Franciæ alta mente reuoluens ignominiam expulsionis suæ ab Italia, quam Caroli tempore perpeffus erat, anxius sollicitusque meditabatur, quo pacto se contra Mediolani Ducem vindicaret. Itaque instigatis ac sollicitatis Heluetiis contra Sueuos sibi conterminos, ac inita cum Venetis societate, ipse, & Veneti vno eodemque tempore bellum contra Ludouicum Sphortiam Mediolani Ducem susceperunt. At is acceptis liberis suis & thesauro, in Germaniam ad terras Maximiliani confugit. Sic rex Ludouicus anno nonagesimo nono supra millesimum quadringentesimum, Ducatum Mediolani, sine aliqua vi aut repugnatione obtinuit: & Veneti occuparunt Cremonam & terram quæ dicitur Clara Abduæ, & terram quandam circa lacum Benacum. At Heluetii interim contra Sueuos & terras Cæsaris hæreditarias incursiones agentes, eas ferro & igne deuastare. Cæsar vero bello, (ut antea memorauimus) Sicambrico implicatus esse, nec posse tam celeriter pro succursu Germaniam superiorem repetere. Et Sueui, cum eorum deesset caput & ductor, confundi, palantiumque instar vagari, & temeritate ac ignauia capitaneorum certas profligationes & strages accipere, quarum tres memorabiles extitere. Vna in agro Rauricorum, id est Basiliensium, facta est, apud castellum Dornack, vbi forte nouem millia equitum & peditum conuenerant, ductu Henrici Comitis de Furstenberg. Heluetii simul ac de eorum aduentu certiores facti, subito eos adoriri & obruere statuerunt. Cum autem Basilienses comitem Henricum, & capitaneos sub ipso constitutos de Heluetiorum accessu admonuissent, atque exhortati essent, quo se ad loca tutiora conferrent, aut ad repugnandum instruerent, comes prælatus temeritate quadam fidem Basiliensibus dare noluit, & capitaneos præterea inferiores huiusmodi admonitionem & consilium approbantes exprobrando obiurgauit: *Si quis (ait) sibi timeat, induat lorica.* Breui deinde post Heluetii inopinato aduolauere, ac prædictas copias sine ordine offendentes obruerunt, ac magnam in eas stragem edidere: quo quidem in prælio Comes Henricus occisus, temeritatis suæ poenas luit, interfectis cum ipso & Comite Simone Weckaro De Bitsch, & Barone De Casteltwart, item plerisque equitibus Burgundionum, item & plerisque ciuibus Argentinensibus & Brisgaudiis. Altera etiam strages apud Constantiam facta fuit, nam cum certo die supra septem millia equitum & peditum Constantiam fuissent egressi, & nonnullas incursiones depopulationesque in terris Heluetiorum edidissent, in reditu ipsorum pauci Heluetii ex loco obscuro, quem Germani & accolæ loci appellant Suaderloch, egressi contra Sueuos proficiscerantur, & repente ipsos territores fuderunt ac fugarunt, plerisque nobilibus viriliter repugnantibus interfectis, inter quos succubuerunt duo equites aurati & nobiles De Randeck, Burckardus & Henricus, item & Joannes De Neunck, & quidam alii nobiles. Nam equitibus sese opponentibus, pedites interim nemine insequente fugerunt. Tertia clades facta est circa Bregantium oppidum, quod ad initium lacus Batamici seu Constantiensis situm est, vbi circiter mille & quadringenti ex Sueuis desiderati sunt, tam

1499.

Sueuorum  
elades.

Suaderloch.

Bregant.



tam hostili tamque crudeli animo inter se Heluetii & Sueui debachabantur, quod nulli parceretur, nec aliqui reciperentur captiui, sed omnes trucidarentur. Hæc dum fierent, interim Maximilianus Cæsar ex Geldria ascendere cœpit, ac principibus & ciuitatibus Germaniæ auxiliares copias indixit. Aderant ex Nurenbergensibus nongenti pedites, Marchio Brandenburgensis Fredericus cum septingentis equitibus. Rupertus, filius Philippi comitis Palatini de Heydelberga cum ducentis equitibus. Episcopus vero Herbipolensis circiter centum miserat equites. Sed dux Wirtenbergensis ad quatuor millia peditum bene instructorum habebat. Postquam igitur Cæsar ad Uberlingam peruenit, relictis prædiis locorum, repente ad comitatum Tirolis proficiscebatur. Nam Heluetii illos Alpinos de Griseo foedere dictos & quos sibi etiam confœderatos habent, contra hostes Cæsaris ire iusserunt, auxiliis eisdem ad hanc rem faciendam missis, qui simul atque multa loca deprædati fuissent, tandem subditos Cæsaris circa originem Athesis in loco Mals appellato adorti, eos maxima clade affecerunt. Qua re Cæsar commotus ad vlciscendum se de illis proficisci maturabat, & terras dictorum ingrediens ferro & igne deuastabat. Interim Heluetii cum magnis copiis militum, quorum supra sedecim millia fuerunt in planum descendentes, ad cuiusdam castelli obsidionem (quod Stocka vocant) accesserunt, quod cum certis diebus obsidissent, vt expugnare potuissent, obsidionem soluerunt, & ad tutiora loca se receperunt, moti potissimum quod ex omnibus locis præsidia confluerent, vt vnitis viribus cum eis manum conferrerent. Post hæc Cæsar vt se vltus esset de populo grisei foederis, Constantiam rediit, confestimque ex locis propinquis militibus accitis, statuit Heluetios subito aggredi. Ex ciuitatibus quidem Sueuiæ mox aderant quatuor millia peditum, totidem mittebat Dux Wirtenbergensis, & sexaginta equites bene instructos. Habebat item Cæsar circa se bis mille equites, præfatæ itaque copię postquam Constantiæ coadunata fuissent, decreuit Cæsar Heluetios adoriri, ac dictas copias cohortabatur, *quo eo die sibi obsequerentur, ac forti animo se contra Heluetios sequerentur, quod ipse primus esse velit in aggrediendis hostibus*, ac erigi curauit vexillum magnum, in quo aquila erat depicta. Cum autem coniuncti conuenerant, dicto Cæsaris se audientes fore pollicerentur, copiarum Ducis Wirtenbergensis ductores, causabantur fame & itineris labore fatigatos nihil eo die efficere posse. Præterea cum dux Wirtenbergensis ampliores teneat copias auxiliares, quam vniuersum fere Imperium, seu totum foedus Sueuicum, ipse noluit populum periculo exponere, quousque singuli confœderati sua deputata misissent

p.279 auxilia. Quamobrem Cæsar eo die nihil agere potuit, præter votum & desiderium suum, quia non ignorabat in rebus bellicis occasionem non negligendam, interdumque festinationem maximos producere euentus ac rerum mutationes, ideo properabat contra Heluetios, priusquam admonerentur, aut maioribus se viribus firmarent. Ita cum bellum esset protractum vsque ad æstatem, tandem interuentu aliquorum pax inter Cæsarem & Heluetios interuenit, quam dux Ludouicus Sphortia multum sollicitauit. in eo bello ex vtraque parte plurimi desiderati, sed multo plures ex Sueuis quam Heluetiis, quoniam Cæsar ab initio belli erat absens, bello (vti scripsimus) Sicambrico implicitus: & Sueui quodammodo confusi erant & sine ordine palantes, tametsi Heluetii eo bello nonnihil confusionis reportauerint. Nam certum est eos obsidionem oppidi Stocka timore reliquisse. Præterea cum ipsi ad Hegaugiam profecti essent, ab ipsis equitibus in fugam versi sunt, non sine parua cæde ipsorum, & Ite Fredericus de Zolern cum tribus nauibus ex Lindou traiiciens ad Rastog, ipsos Heluetios repugnantes repulit, plerisque ex ipsis interfectis, & bombardis asportatis. Præterea ex pago Nuders ditionis Cæsaris ad octo millia ipsorum fugati sunt à subditis Cæsaris. Vtcunque tamen sit, Heluetii eo bello multo maiorem cladem intulerunt Sueuis, quam Sueui contra, tum Sueuorum temeritate, tum capitaneorum ipsorum ignauia. Adhæc Heluetii ad id bellum erant præmeditati,

Mals.

Stocka.

Hegen.

Nuders.



*Heluetiorum  
virtus.*

1500.

1502.

1503.

tati, & communi consilio (vti solent) rem gerebant, quam ob causam actiones ipsorum prosperiores fortiebantur successus. Accedebat his, quod populus Sueuiæ, & potissimum ciuitates imperiales Heluetiorum libertati plurimum fauebant, nobilitatemque detestabantur. Et etiam in annalibus reperitur Heluetios semper bellicosos fuisse. Scribit enim Julius Cæsar, *Heluetios reliquos Gallos virtute præcedere, quod fere quotidianis bellis præliisque cum Germanis contendunt, cum aut suis finibus eos prohibent, aut ipsi in eorum finibus bellum gerunt.* Bello itaque inter Heluetios & Sueuos pacato, Ludouicus Sphortia Mediolani Dux à suis pro reditu sollicitatus, à Cæsare petiit vt consensu eius conducere possit pedites, tum ex Heluetiis tum ex Sueuis. Cui Cæsar, *Volo, inquit, conuocare principes & ciuitates Germania, quorum auxilio te in ducatum restituere conabor.* At ille ait, *Nollem opportunitatem negligere, jam cum à meis accersor, paruis copiis vniuersa assequi potero.* Tum Cæsar, *Si, inquit, huic meo consilio obsequi nolueris, tibi secundo loco consulo, ne te Heluetiorum fidei committas, sed duntaxat Sueuos mercede asciscas, tutior namque eris, quod Sueni & Heluetii haud facile conueniant.* Sed neque illi consilio dux obtemperare voluit, qui nouem millibus Heluetiorum & Sueuorum ad stipendia sua accitis, ac liberis apud Cæsarem relictis Italiam ingrediebatur, ac breui vniuersa perdita recuperabat, eiectis præsidiis Gallorum. Anno dein millesimo quingentesimo Dominica natiuitatis, Ludouicus Gallorum rex magna equitum & peditum stipatus caterua in Mediolanum descendit, ducens secum ad sex millia Heluetiorum, & vt ambo exercitus ex aduerso constitissent, ac iam de mutuo conflictu expectaretur, Heluetii quibus dux largiter stipendia dederat, & Fratres in concione appellatauerat, noluerunt aduersus Gallos & reliquos Heluetios arma mouere, ac Ducem ipsum gregali indutum habitu ne agnosceretur, deseruerunt, sicut Volateranus prosa, & Petrus Crinitus carmine scripserunt, quo quidem tempore & Sphortia captus est, & pedites Sueui armis & bonis exuti, Heluetii vero honoribus & præmiis decorati, quibus de rebus Heluetii non incongrue iactitant, *se se esse auctores ingressus Gallorum in Italiam.* Anno præterea secundo supra millesimum quingentesimum, Ludouicus Gallorum Rex maximas copias equitum & peditum destinauit contra Fredericum regem Apuliæ: quem & breui expulit, vniuerso regno in suam ditionem redacto. At Ferdinandus Rex Catholicus, & vxor eius Elisabetha prætendentes ius ad regnum Neapolitanum, non mediocribus copiis contractis, Gallos Apulia extrudere statuerunt, quibus & Maximilianus ex portu Tergestino mille noningentos pedites Germanos pro suppetiis auxiliariis misit, inter quas plurimi ex nobilibus Sueuiæ progeniti erant, habuerantque Hispani ante prædictorum aduentum trecentos fere pedites Germanos. Capitaneus igitur Regis Catholici Germanorum peditum accessu non mediocriter exhilaratus, non dubitauit postea, cum Gallis & Heluetiis congregi ter circa oppidum Canosum, vbi olim Hannibal Romanos ad internicionem pene deleuit, cum eisdem manum conferens, ipsos ingenti clade affecit, Vicerege interempto. Post eam pugnam Galli exercitum circa Caietam restaurarunt, vbi circa fluuium Garlianum dictum, cum Hispanis congressi, superati victique fuere, plurimis ex eis interfectis & captis, & tormentis mirabilibus ac instrumentis bellicis amissis, quæ Heluetii turpiter fugientes deseruere, ac Hispanis reliquere. Gallis itaque ex regno Apuliæ expulsis, Hispani anno tertio supra millesimum quingentesimum illud ad suam ditionem rede gere, & id hodierno adhuc die tenent ac possident. Vnde non immerito scripsit in triumpho suo p. 280 Veneris Henricus Bebelius Justingensis, vnicus mihi amicus familiaris arctissimus, *Sapeque tentatur fatalis Apulia Gallis.* Nec item obscure animaduerti potest humanarum rerum instabilitas ac mutatio. Apulia habuerat in octo annis sex reges. Carolus Gallorum Rex octauus Apuliam ingrediebatur anno sexto supra millesimum nonagesimum. Et expulit Alphonsum filium Ferdinandi, qui paulo



paulo anteaquam Carolus Italiam intraret, mortem obierat. Post Carolum regnavit Ferdinandus Filius dicti Alphonsi, qui alias Ferandinus cognominabatur, & mortuus est rex. Successitque ei Fredericus patruus, qui fuit expulsus à Ludouico Francorum rege, qui Ludouicus & ipse regnavit & fuit expulsus à Rege Catholico, qui in praesentiarum regnat. Post eas quidem strages quas in Apulia acceperet, Janua metropolis Ligurum deficere coepit; quamobrem Ludouicus maximo equitum & peditum exercitu coacto, anno sexto supra millesimum quingentesimum ad Januæ oppugnationem accessit, quam vi obtinuit, misericorditer tamen & clementer cum victis agens. De his haecenus, & ad proseguendam historiam reuertar.

Heluetii ut cum præda ad Sebusianos redierunt, interea Hispani forum Cornesium, quam Imolam vocant, applicuerunt, exinde Petrus de Nauarra cum exercitus parte, ad oppugnationem loci, quem Allabastia nominant, accessit. Eundem pridie Calendas Januarii bis adoriens, expugnare non potuit, quadringentis ex militibus amissis, postridie dictum locum maiore aggrediens vi expugnauit, omnibus in eo trucidatis. Reliqua vero exercitus pars quamplurima castella ad comitatum Bononiensem spectantia occupauit, inter quæ erat castellum Budirium, in quo inuenta fuere viginti quinque millia corborum frumenti, quod quidem frumentum precii erat triginta millium ducatorum. Galli Heluetiis discedentibus, totis viribus contra Hispanos contenderunt, confestimque miserunt Ferrariam Molardum cum duobus millibus Vasconum, & quibusdam equitibus grauis armaturæ. Bononiam vero miserunt Jacobum de Emps Sueuum, cum mille & quingentis peditibus Germanis. Statim post Hispani ad obsidionem Bononiæ accesserunt. Et quoniam terra ex eo loco unde ciuitatem expugnare proposuerunt, plana erat, & propter vehementem missilium projectionem quæ in eos iaciebantur, diu maiores bombardas mœnibus admouere non potuere, ac minoribus duntaxat utebantur. Interim Alphonsus Dux Ferrariæ, 14. die Januarii cum Vasconibus & nonnullis Germanis, ad oppugnationem Allabastiae profectus est, quam tribus horis simul ac adortus est, expugnauit, interfectis centum octoginta Hispanis, & octoginta Italis. Dux quidem Neumursi cum reliquo exercitu Rhegium petiit. Inde Fredericum Gonzagam Mutinam misit, ad significandum Locumtenenti Cæsareo, quod istis transitum & statua pro exercitu habere velit. Cui gubernator respondit, *se Gallis transitum concedere non posse, quod Mutina sibi à Pontifice nomine Cæsareæ maiestatis consignata fuerit, ita ut eandem neque Duci Ferrariæ traderet. Cæsar quoque voluerit Mutinam esse à bello immunem, & (ut ita dicam) neutralem ac neutri partium adhaerentem, præterea & Galli anno superiori Mutinensibus cautionem securitatemque contulerint de non offendendo districtu Mutinensi.* Præfatus igitur Dux his rationibus allegatis ductus, institutum suum mutauit, & per alia loca Bononiam contendit. Hispani autem Bononiæ obsidionem continuantes, post longam tandem pensitationem 7. Calendis Februarii, cum vespertinum foret crepusculum, quamplurimi ex eis cum instrumentis, quos sclopetos & arcuboncos appellant, circa fossas apparuerunt intra portam vici sancti Stephani & Barachinum, quem locum Malcontonem nominarunt, ibique crebris missilium seu globorum iactationibus propugnatores ciuitatis ex mœnibus propulsarunt, nec unquam cessarunt, quoad murales machinæ in loco præfixo fuissent constitutæ, quas apud monasterium diui Francisci, vbi moniales habitare solebant, collocarunt. Postridie coeperunt concutere mœnia ciuitatis, quæ in quibusdam locis adeo debilia reperta sunt, quod vnico globi iactu vtrinque perforata fuerint, quocirca Hispani certatim illud concurrere, Schlopetis aliisque instrumentis præsidia ciuitatis vulnerare & interficere: ac propterea alacriores facti scalas muris admouere, atque delubrum quoddam in mœnibus situm (quod beatæ Mariæ virginis de Barachino nuncupatur) conscendere, illinc eos qui ciuitatem tuebantur, percutere quod vbi Germani pedites, & Gallorum equites cataphractarii animad-

uerterunt,



uerterunt, mox moenia audacter conscendere, & Hispanos partim capere, & partim interficere, reliquos vero ad fugam vertere, quarto Calendis Februarii Hispani quatuor arcus moenium muralibus tormentis deiecerunt, ac XL. pedites disposuerunt, qui cuniculis subterraneis factis, murorum excisioni incumbere<sup>p.287</sup>, id ubi Gabriel de Sulza Sueuus sensit, confestim cum suis commilitonibus, aduersus eosdem cuniculos fodere coepit, quo per cuniculos, intra muros ciuitatis à se factos, puluis sulphureus igne conceptus sine moenium ruptura erumperet. Postero die circa quartam vigiliam noctis, populus Bononiensis campanarum sono ad arma est citatus. Verebantur enim Bononienses, ne Hispani in eo die, quoniam moenia magna latitudine diruta latiore viam parauerant, ciuitatem occupare niterentur, quod moris sit Hispanorum, die Mercurii & Veneris libenter ciuitatum expugnationem attentare, sed eo die mutua fide promissa, induciæ factæ sunt, & ex Hispanorum exercitu profecti sunt Bononiam Joannes Vitellus; Joannes de Saxadello; & quidam capitaneus Hispanus, qui nomine Pontificis & totius exercitus persuadere conati sunt Marco Antonio de Fantutier agenti pro tota ciuitate, vt Bononiam traderet, nec Bononienses patiatur totius ciuitatis diuitiarumque & honoris expectare excidium. Re autem infecta discessum est, & capitaneus Molardus cum duobus millibus peditum, inter quos septingenti erant Germani, quos nuper capitaneus Linfer ex Germania adduxerat, item & cum ducentis equitibus grauis armaturæ Bononiensibus præsidio aduolauit. Calendis vero Februariis, cum ob nimiam Bononiæ moenium ruinam latissimus Hispanis pateret accessus, ita vt cum consueto & toto ordine ingredi possent, decreuerunt ipsi ciuitatem expugnare, ac instructo agmine in expeditionem conscenderunt, iamque non solum pedites, verum etiam equites superatis fossis, superatoque loco ubi moenia constiterant, munimenta & aggeres intra ciuitatem præparatos tentabant inuadere. Sed qua Bononienses pridie in parte diruta murorum multos currus fascium cum pice aliisque fomentis ignem facillime concipientibus apposuerant, qui vt igne correpti sunt, tantam & ignis & fumi densissimi vehementiam ediderunt, quod Hispani illam pati nequientes retrocedere cogerentur.

Interea Gosthus princeps Neumursi de Rhegio se mouit, & cum exercitu profectus est ad loca Final & Bundinum, ac dein 4. die Februarii Bononiam petiit, in cuius accessu & ingressu Bononienses nullum fecere signum lætitiæ, non pulsando campanam, nec emittendo bombardas, postridie Galli intra ciuitatem ordinem instruxerunt; ad congregiendum cum Hispanis. Hispani vero prælium detrectantes se de loco mouerunt, & ad fluuium Idissum, qui ad quintum fere lapidem à Bononia distat, contulere, relinquentes in prædam panes & puluerem sulphureum multum. At Gallis circa Bononiam occupatis, ubique per Italiam vulgatum extitit, *Maximilianum Cæsarem cum Venetis concordare*. Quam quidem famam Veneti confirmantes, & Brixienfes & populum circa lacum Benacum ad rebellionem sollicitarunt, ac cum quibusdam ciuibz primariis super Brixia traditione agere coeperunt, quoniam proditione seu factione freti, & equitum & peditum copiis coactis, die 25. Ianuarii, sub nocte Brixiam adierunt, sperantes Brixiam apertis portis occupare, sicuti constituerunt. Sed quidam proditoris conscius ante præmonuerat Gallos, qui rem clam & secreto tenentes, tempore accessus Venetorum, optimam obseruabant custodiam, disposuerantque, vt aduolantibus Venetis, frequentes telorum seu missilium iactationes contra hostes agitentur, ad arcendam eorum vim. Venetis autem recedentibus, & sua spe frustratis, eodem die capti sunt XXI. ciues, & inter quos erat filius comitis de Auagaris, hi omnes trucidati sunt, & eorum bona publicata. Veneti breui post cum amplioribus copiis, quam antea reuerfi sunt, & Gallis illic præsidio constitutis circa vnā partem ciuitatis viriliter repugnantibus, Cines interim Venetos, ex aliis locis finibus super muros in ciuitatem traxere. Id vt Galli acceperunt, è vestigio in arcem profugerunt, multis



tis ex eis captis & occisis. Accidit autem ut quidam eques Gallicus impeditus in arcem profugere non posset, is igitur ad ciuem familiarem se recipiens, eidem CCCC. obtulit ducatos (seu aureos ducales Latinius) quo sibi auxilio ad euadendum esset. Ille quidem ciuis pecuniam oblatam accipiens, & auxilium promittens, Gallum rusticali habitu indutum domum exire iussit, ac tum mox rusticis & ciuibus prodidit, qui captus per ciuitatem ductus est, cum ingenti rusticorum vociferatione. Tandem rustici ventrem Gallo gladio aperuerunt, ac cor eiusdem exciderunt, quod in plurimas partes dissectum, alius alii eiusdem partiunculam virga præbuit. Sed grossiorem ventris partem recipientes, in os dicti Galli immiserunt, cum hac exprobratione, *Tu te ex nobis saturasti, crassumque fecisti, iam illam pinguedinem manduca.* Adhæc rustici & ciues non contenti huiusmodi crudelitatem in viros exercuisse, qui & mulierem Gallicam inuentam occidentes, eiusdem pudenda seu cunnum in virga detulerunt. Sic Bri-

p.282 xienfes quoscunque Gallos assequabantur, miserabiliter perire fecerunt. Breui dein terræmotus auditus, quo vniuersa ciuitas contremuit. Veneti ea Brixie occupatione multum elati, spem conceperunt Veronam, Cremonam, & reliqua loca recuperandi. Et quoniam scripsi per Italiam fuisse famatum Cæsarem cum Venetis concordasse, volui latius explicare quo pacto huiusmodi rumor increbuerit. Thomas archiepiscopus Strigonienfis Cardinalis ex Patriarcha Constantinopolitanus ab Vladislao Hungariæ & Bohemiæ Rege Romam legatus erat, ad sollicitandam concordiam inter Cæsarem & Venetos: præterea & Veneti in locum defuncti oratoris alium subrogauerant cum mandato concludendæ pacis. Is Romam secum adduxit X. ciues, & vnum patricium, offerens Cæsari pro securitate Gurcensis patricium & 4. ciues obsides destinare. Et à Pontifice iussus offerre pacis condiciones, cœpit primum offerre eos, quos Veneti anno superiore Mirandulæ Vito de Furst obtulerant. Pontifex perinde ac infensus voluit, ut Veneti illis oblationibus relictis ea repeterent, quæ Bononiæ fuissent tractata. Et cum negotium ipsum inter dictum oratorem Venetum, & Joannem Collam commissarium Cæsareum multum diuque coram Pontifice agitatum esset, ac certæ pacis condiciones à Pontifice & oratore Regis Catholici præpositæ, restaretque modo ut concluderetur, orator Venetus asseruit, se non habere mandatum propositis conditionibus assentiendi. Quocirca Pontifex veluti indignans, vna cum Hieronymo Feych oratore Regis Catholici nonnullos concordie articulos excogitarunt. *Item quod Veneti relinquerent Cæsari Veronam & Vincentiam. Item quod in tribus annis proximis darent Cæsari ducenta quinquaginta millia ducatorum, & centum millia intra mensem post publicationem pacis Veronam mitterent, & reliquam pecuniam duobus proximis annis contribuerent. Item quod Veneti Paduam & Teruisum retinerent, quæ à Cæsare Carolo nepote, & principibus Austriæ recognoscerent in feudum, eisdem pro annuo tributo in tres vices anni 30. millia ducatorum dando, pro reliquis vero terris & controuersis Veneti & Cæsar compromitterent in Pontificem & Regem Catholicum qui intra annum negotium componere debeant.* Illos autem articulos superiores Pontifex Venetias per fidum hominem ad nuncios suos ibi agentes transmisit, quibus & commissionem dedit, ut omni modo Venetos persuadere conentur, quo eisdem articulis consensum accommodarent, alio qui protestarentur se eos derelicturum, ac ab inito fœdere exclusurum, præterea & Cæsari pro omnium rerum suarum recuperatione adhæsurum. Verum ex omnium rerum & Pontificis & Venetorum progressu semper mihi visum est, eorum actionem se tendere ad stringendum Cæsarem à Rege Franciæ, antequam concordia inter Cæsarem & ipsos Venetos subsequeretur. At Cæsar præfatis pacis articulis assentire noluit. Redeundo autem eo vnde digressi sumus, Gosthus Dux Neumursi, postquam intellexit Brixiam à Venetis occupatam, 9. die Febr. Bononia discessit, & contra Venetos festinabat, relictis Bononiæ præsidii gratia 4. millibus peditum, & CC. L. equitibus grauis armaturæ. Bononienses vero, quoniam tuitionis suæ spem præcipue Germanos collocaue-



rant, quorumque fortitudinem in maximo perditionis discrimine experti fuerant, à præfato principe efflagitarunt, ut Jacobum de Emps cum peditibus Germanis præsidio relinqueret. Sed is Bononiensium preces exaudire noluit, cum & ipse rei bene gerendæ spem in Germanos reposuisset, atque Pado transito cum maxima festinatione aduersus hostes contendebat. Destinauerant quippe per id temporis Veneti in Brixiensem succursum ac præsidium tercentum equites grauis armaturæ, quorum capitaneus erat Paulus Balianus, & supra tria millia peditum cum machinis & instrumentis bellicis, quorum aduentum cum Galli explorassent, eos celeriter aggredi instituerunt, quos XII. die Februarii Gallorum primæ custodiæ equites, in rure nobilissimo circa locum *Isula de la scala* dictum offendentes, adorti in fugam repulerunt, plurimis ex eis captis & occisis, ac multis in Athesi fluuio submersis, quos item Galli latius persecuti fuissent, si noctu impediti non essent. Postridie Philippus de Friberg cum mille & octingentis peditibus Germanis Veronam egressus, hostes fugientes eorumque impedimenta persequi coepit, & hostium bombardis circa Suaue oppidum reperi-  
tis, ex minoribus nonnullas asportauit, maiores vero multo sulphureo puluere immisso destruxit. Post hæc idem se cum copiis Gallorum, ad villam sanctæ Euphemie, duobus millibus passuum à Brixia distantem coniunxit, de quo sane loco Dux Neumursi, omnibus mediis ciues Brixienfes persuadere conatus, quo sese dedant, nec ruinam & excidium sui expectent, promittens Regem Franciæ istiusmodi iniuriam & rebellionem eis condonaturum, modo resipiscant, & in gratiam eiusdem concedant. Quod cum variis mediis ad ciuium notitiam deducere satageret, nec id populus ignoraret. Interea Fabricius de Columna cum mille quingentis equitibus & quinque millibus peditum, traiecto flumine Rheno, qui in territorio Bononiensi labitur, ad Padum proficisci statuit. Quod ut dictus princeps accepit, minime cunctandum ratus est, confestimque mittit Leonardum Ruch Sueuum cum mille peditibus Germanis sub capitaneo Jacobo de Emps degentibus ad expugnandum monasterium quoddam in monte post arcem Brixensem situm, quod Veneti propugnaculis, aggeribus, & mille rusticorum præsidio munierant, ne Gallis post arcis positum ingredien-  
di copia esset, id Germani ingenti vi adorti, rusticos breui propugnaculis depul-  
pulere, ac intra claustra monasterii sese abdentes ferro & igne ad internecionem  
vsque trucidauere, post quod factum Dux Neumursi cum vniuerso exercitu ar-  
cem Brixensem accessit, peditatum quidem arcem iussit ingredi, & ipse post  
portam arcis cum equitatu remansit, sub noctemque ad portam ciuitatis sancti  
Nazarii collocauit quingentos equites grauis armaturæ, qui hostes fugere con-  
tendentes intercipere niterentur. Poterant enim Veneti solum per illam por-  
tam effugere, quia reliquas & terra obstruxerant, & fossis circumdederant. 18.  
die Februarii dux Neumursi, & acies instrui, & quemlibet vexillo suo astare  
iussit: ac tympano proclamare fecit, *si qui primam aciem seu ordinem antesigna-  
norum seu antecurrentium ingredi velint, ad portam arcis per quam iter ad ciuita-  
tem est proficiscerentur.* Iuerunt itaque eo trecenti pedites Germani, inter quos  
ex Sueuiæ nobilibus erat, Joannes Spet de Pflumer, Burckardus de Emps, Joannes  
Hardar, Wolfgangus de Ehingen, Georgius de Vfenloch, Joannes Sigis-  
mundus de Friberg. Ex Saxonibus autem erat Fabius de Schläbersdorff, Got-  
hardus de End. Germanos quidem mox subsequiebantur trecenti Vascones, in-  
ter quos erat Molardus, & capitaneus arcis Brixienfis. In prima autem linea  
antesignanorum seu antecurrentium (ut Germani appellant) erat Molardus cum  
nobilibus Germaniæ. Post illam vero aciem instructi erant quingenti equites  
grauis armaturæ, qui pedestres erant ingressuri ciuitatem, in quo ordine & ipse  
Dux Neumursi stabat. Postea ordinatus erat vniuersus peditatus Germanicus &  
Gallicus. In eo agmine fuit Jacobus de Emps, & Philippus de Friberg cum  
tribus millibus, & octingentis peditibus Germanicis. Veneti qui Gallos arcem  
intraße rescierant, sub auroram diei prædicti ad arma conclamare, equites tu-  
bicine



bicine conuocare, ac populum campanarum pulsu ad arma concitare cœperunt. Intra Brixiam autem erant equites grauis armaturæ quadringenti, velites qui balistis pugnant mille, & stratiotæ octingenti. Item duo millia peditum bene instructorum, rusticorum vero & ciuium qui ad arma concurrerant, supra sex millia. Dux Neumursi simul ac ad quartam diei horam ordines intra arcem continuisset, nec quicquam de deditione expectandum cognouisset, consilio cuiusuis habito, decreuit urbem vi aggredi: & accitis Philippo de Friberg, & Jacobo de Emps eis exponit, Brixiam omnino violenter expugnandam, & proinde milites adhortentur, quo strenui ac constantes esse velint. Conuocatis igitur Germanis ad eos Philippus concionem habuit. *Vos (inquit) commilitones optimi, Galli statuerunt oppugnare Brixiam, quam & viribus vestris se expugnatos sperant, qua de re vos hortor atque moneo, ut pristina gloria & virtutis Germanicæ memores, strenui, firmi & constantis animi esse velitis. Dux nempe ipse ac totius regni nobiliores destinarunt aut mori vobiscum, aut victoria contra hostes potiri. Quocirca quicumque illius animi ac propositi sint, id eleuato brachio ostendant, reliqui vero aciem aggrediantur, tunc subito Germani maximo animo eleuatoque brachio, aut moriemur, clamitant, aut vrbe potiemur.* Dein Philippus eisdem ducis nomine exponit, *ut ipsi populo Citadellæ parcant, quod factionis sit Gallorum, sed ingressuri reliquas urbis partes, omnia diripere & quoscunque offenderint, trucidare nitantur.* Arx Brixienfis in editiore urbis parte montis satis accliuu sita est, ex ea vnum iter ad Citadellam. At Veneti circa portam Citadellæ, quæ urbem respicit, nonnulla tormenta muralia seu bombardas collocauere, vnde frequentia tela seu globos in exeuntes portam arcis iecere, propterea exitus arcis admodum difficilis & periculosus videbatur. Agmen antesignanorum primum arcem sensim exire, & alter alterum vt periculum euasere expectare, & dein agminatim secundum muros cliuum descendere, vbi vero ad monasterium S. Floriani peruenere 600. inibi pedites nostrorum impetum expectantes profligare, & quotquot fugientes assecuti sunt occidere. Verum hi qui bombardarum custodiæ deputati erant, vbi suos conspexere fusos, ipsi relictis bombardis fugæ sese accingere, quos & Germani & Galli insequentes, vna cum ipsis urbem ingressi fuere. Ea quidem urbis pars quam intrarunt, simul atque Citadellam exierant, Burletum appellatur, vbi ingredienti primum occurrit vicus strictus, post hunc est locus amplius & spatiosus. In vico stricto mulieres è fenestris lapides deiicientes, aliquos milites perdiderunt. Vt vero ad locum spatiosum accessere, inuenerunt plerosque equites grauis armaturæ & etiam leuis quos breui fudere, & ad interiorē urbis partem repulere, ac repulso vsque ad portam infecuti fuere. Tanta sane Venetorum fuga erat, quod & illam portam dimiserant apertam, quam & milites tumultuarie ingressi fuissent, nisi à Moraldo cohibiti essent. Et quia Veneti ante eam, quod parum à foro distat, omnes fere vires suas continebant, quocirca Molardus & Germanici nobiles, ne ab hostibus damno afficerentur, subito cepere consilium, ac dictam portam occludere, ac bombardam quam in Citadella conquisierant, ad eam disponere, quoad reliqui approximarent. In quorum quidem accessu eandem portam recludere, globum ex bombardam per portam iacere, hostes ruptis ordinibus hinc inde, quo quisque salutis suæ fuga consuleret, discurrere. Milites autem primi agminis, vt per eam portam transierunt, ad forum perrexerunt, quos magnum agmen & Germanorum & Vasconum subsequēbatur, quingentis vero illis armatis ad vicum amplum, ad dextram introitus portæ extantem declinantibus. Germani itaque & Vascones in foro constituti, ordine facto cum hostibus, manum conseruerunt, quos & breui fuderunt & profligarunt, atque illos qui fugerant & portam sancti Nazarii aperuerant, relictis in foro tribus millibus Germanorum, persequi cœperunt, quosque maxima clade affecere. Qui vero portam exierant à Gallis, qui ad ea collocati fuere, intercepti sunt, inter quos & comes Aloisius de Auagaris deprehensus est. Germani deinceps

Brixie Clades.

Burletum.



deinceps & Vascones per omnes vicos vrbs discurrere, quoscunque armatos reperiunt, necare, in domos ciuium irruere, bona ipsorum diripere, ciues pro indicio torquere, ac nihil intentatum relinquere, quæ irati victores exercere consueuerunt. Capti tamen fuere in hospitiiis suis, Andreas Critti, & Antonius Justinianus, qui prætorem se pro Venetis triduo gesserat. Hæc Brixia amplissima ac ditissima ciuitatis expugnatio facta est 18. die mensis Februarii, Anno 12. Dominica natiuitatis supra millesimum quingentesimum, interfectorum numerus non est omnino certus. Galli primum scripserunt ad Cæsarem, *interfectorum numerum fuisse supra 11. millia hominum.* Sed postea compertum est, occisorum seu interfectarum personarum tam in plateis quam domibus in multo præfatum numerum excedere. Cadauera mortuorum per vicos, plateas, fora frequentia iacere. Ex Gallis vero & Germanis admodum pauci interiire. Postridie Gosthus dux Neumursi edictum fieri iubet, *ne quis captiuos amplius interficiat, aut captiuos supra decimum quintum ætatis annum agentes ex vrbe educat.* Eo itidem die comes Aloisius proditionis auctor obtruncabatur, eiusque corpus in quatuor partes dissectum, ad portam sancti Nazarii patibulo est appensum.

Julius vero Pontifex postquam audiuit miserabilem Brixienstem cladem, non mediocri mœrore affectus est, atque Gallorum vires in se conualescere timens, omnibus mediis res suas firmare ac corroborare studuit, propterea Matthæum Episcopum Sedunensem tunc sanctæ Potentianæ Cardinalem, totius confœderationis Legatum deputauit, per quem item obtinuit vt Heluetii ex conuentu Thuricensi certos deligerent oratores, qui Venetias proficiscerentur ad mutuam societatem ineundam. Ad hæc Matthæum Lang Episcopum Gurcensem Cardinalem nominauit, quo medio eiusdem Cæsarem ad confœderationis suæ partes alliceret. Præterea Episcopum Vespruniensem Hungariæ Regis oratorem Venetias destinauit, vt illinc ad Cæsarem proficiscatur ad procurandam conficiendamque inter ipsum Cæsarem & Venetos pacem. Cæsar tum Germaniam inferiorem petebat, comitatus à Ludouico Palatino Imperii electore de Heydelberga, & Vdalrico Wirtenbergensium Duce, quoniam Dux Gelria maximas fecerat incursiones, depopulationesque in Batauos, quos Hollandinos appellant, & Brabantinos, qui olim partim Aduatici dicti sunt, partim Ambauariti. Adiutus ferebatur occultis auxiliis à Rege Franciæ, cuius conatibus Cæsar vt in tempore occurreret, & alia imperii & reipubl. Christianæ vrgentia negotia tractaret, conuentum seu concilium Germanicum Treueris celebravit. Interim Ferrarienses ac Bononienses autoritate concilii Mediolanensis diuina celebrare coeperunt: & Fredericus tunc sancti Theodori Cardinalis de sancto Seuerino, Bononiæ & Romandiolæ Legatus à dicto concilio deputatus, Parmam profectus est, vbi substitit, oratoresque Bononiam misit, pro tuitione sua à Bononiensibus postulauit tres ciuitatis portas, item Palatium, item episcopatum, & alia quidem priuilegia & iurisdictiones, de quibus sane Bononienses plane nullam (vt ita loquar) complacentiam habuere, & in primis Bentiuoli. Breui vero post Gosthus dux Neumursi Parmam venit, & contractis copiis militaribus Bundinum ac Final petiit, adducens secum prædictum Cardinalem de sancto Seuerino, vbi & Alphonsus dux Ferrariæ cum quatuor millibus peditum, & quingentis equitibus levis armaturæ, & trecentis grauis armaturæ Gallorum exercitui se coniungebat.

\* Lances.

Adduxerat Gosthus autem octingentos equites cataphractarios, quos \*Lanceas seu equites grauis armaturæ appellant; quatuor item millia peditum Germanorum, quorum capitanei primarii erant, Philippus de Friberg, & Jacobus de Emps, quatuor itidem millia peditum Gallicorum. Superueniebant etiam ex Gallia ad duo millia Vasconum & Picardorum, & Bononiæ præsidio constituta erant quatuor millia peditum, & ducenti quinquaginta equites grauis armaturæ. Adducebat præterea Burckardus de Emps mille pedites Germanos, qui  
nu per



<sup>p. 285</sup> nuper post Brixiae expugnationem primum in Italiam aduolauerant : & quotidie  
 ex Germanis peditibus exercitui Gallico accessio fiebat , vt alias quidem acces-  
 siones omittam. Ex Mutina accedebant centum , item & quadringenti , quos  
 Vitus de Furst Mutinae Locumtenens per fratrem suum Ernestum de Furst de  
 Verona acciuerat , ad coercendos quosdam rebelles & inobedientes Apennini  
 montis accolae , & ita summam comperi Gallicum exercitum ex 22. millibus  
 equitum & peditum conflatum , exceptis his , qui postea ex ciuibus Bononiensi-  
 bus se exercitui iunxerant. Galli igitur , vnitis viribus suis , traiecerunt fluuium  
 Panorum , agrum Mutinensem à Bononiensi territorio determinantem , ac con-  
 tra Hispanos proficisci coeperunt. Hispani autem impedimenta sua ad Forum  
 Corneliū conferentes , Budurum oppidum agri Bononiensis fertilissimū reli-  
 querunt , & ad Castellum sancti Petri sese receperunt. Castellum sancti Petri  
 per se quidem munitum aggeribus & fossis ita circumdederant , vt per vnicam  
 duntaxat portam patuerit accessus. Hispani ferebantur in exercitu habuisse 18.  
 millia peditum , & duo millia equitum grauis armaturae , & totidem leuis ar-  
 maturae , licet eorum numerus multo minor fuerit , primum agmen , quod *Ante-*  
*guardiam* vocant , ducebat Fabricius de Columna , in eo erant octingenti equi-  
 tes grauis armaturae , sexcenti velites , & quatuor millia peditum , Robur exer-  
 citus ducebat vicerex Neapolitanus , & Petrus de Nauarra , vbi inter ceteros  
 erant quatuor millia peditum , omnes albas induti armaturas quas *Corfaletos* vo-  
 cant. Vltimo agmini , quod *Retroguardia* dicitur , praefectus erat Gomeus Ro-  
 manus de populo Bononiensi vir intrepidus. Vicerex Neapolitanus , vniuerso  
 exercitu in concionem conuocato , pulcherrimam orationem habuisse dicitur ,  
 milites exhortando , *adeptae gloriae & nominis memores , Gallos hostes non expaue-*  
*scerent , quos aliter saepe domuerint.* Orationem Viceregis Petrum de Nauarra  
 suscepisse ferunt , eosdem milites exhortando , *quo intrepidi in hostile Gallorum*  
*agmen irrumpant , non secus ac contra Turcas pugnaturi ; quod Galli sint schisma-*  
*tici & bonorum Ecclesiae occupatores , & qui Gallum occiderit , nullum incurrat pec-*  
*catum , sed diuinam promereatur gratiam , occisus vero inter martyrum cateruas vi-*  
*tam assequatur aeternam.* Galli relictis Hispanis ad castellum sancti Petri profecti  
 sunt contra Sarsenam , quod oppidum Itali Ros vocant , oppidani mox Gallis  
 deditionem offerunt , Galli imposito praesidio petiuerunt Rauennam. At Sar-  
 senates altera die sequente sub noctem introduxerunt Hispanos , qui Gallorum  
 praesidium ad internecionem occiderunt. Galli ea suorum occisione audita ,  
 confestim irati reuertebantur , & dicto oppido vi expugnato , vniuersos vere  
 oppidanos trucidarunt , nullius aetatis rationem habentes , postea se contulerunt  
 ad obsidionem Rauennae. Hispani autem Rauennatibus praesidio miserunt Mar-  
 cum Antonium de Columna cum mille octingentis peditibus , & centum equi-  
 tibus grauis armaturae. Galli quia semper querebant occasionem belli gerendi  
 cum Hispanis , qua de re decreuerant Rauennam obsidione premere , vt Hispa-  
 ni tandem necessitate quadam succurrendi suis inducerentur ad pugnam. Labo-  
 rabant item penuria rei frumentariae Galli , & admodum nuper Veneti tres na-  
 ues commeatibus onustas in Pado eis abstulerant. Die 8. Aprilis Rauenna à  
 Gallis obsideri coepit , quo itidem die & ipsi tormenta muralia muro admoue-  
 runt , magnamque moenium partem diruerunt. Postridie Fredericus Gonzaga  
 cum Italis primus Rauennam adoriebatur , sed non sine iactura & Italorum moe-  
 nibus deturbatus est. Postea quidam equites cataphractarii Germani , quos ap-  
 pellabant *Arnbergischen* , hoc est Arnbergenfes , cum Picardis , & nonnullis Va-  
 sconibus oppugnationem tentarunt. Vt autem equites moenia conscendissent ,  
 & ciuitatem viriliter ingressuri essent , pedites haud subsequebantur , relinquen-  
 tes dictos equites Rauennatum occisioni. Durante vero oppugnatione interim  
 equites Gallici & pedites Germani stabant in ordine instructi , quia Hispani eo  
 die ad duodecimum ferme lapidem castris relictis , cum exercitu approxima-  
 bant , & ad quartum lapidem à Gallis castra locabant , inter ea duo flumina , in-

Ros.

Rauennae ob-  
sidio.



ter quæ Galli castra posuerant. At die 10. Aprilis ambo exercitus aciebus instructis, totam diem in armis contriuerant, tandem ad castra reuertebantur, nihilque diè actum fuit, nisi quod Rauenna à Gallis frustra oppugnabatur, nocte sequente Galli omnino deliberarunt cum Hispanis manus conferere, sed Hispani coeuntes deliberabundi consultabant, quid facto opus esset. Joannes quidem Cardinalis de Medicis, & legatus censebat castra vltra Pignetam fluuium mouenda, & è regione Gallorum collocanda. Fabricius de Columna iudicabat castra inter Adriaticum & Rauennam ponenda. Petrus autem de Nauarra existimabat, castra quidem vltra Pignetam mouenda, parum tamen remotius locanda ad locum, quem Galli non sine mediocri damno & præiudicio petitori forent. Huic consilio Hispani obtemperarunt, ac sub noctis crepusculo transito fluuio memorato, castrametati sunt in loco plusquam ad vnum lapidem à p. 286 Gallis distante, postridie misit Raymundus de Cardone ad Gosthum ducem tubicinem, vt ad flumen Pignetam colloquendi gratia accederet. Gosthus postquam ad Raymundum peruenit, *Domine*, inquit, *quid placet*. Cui vicerex, *quid tibi placet*. At ille: *Ego vocatus huc veni, quid tibi cordi sit, ediffere*. Cui vicerex, *Nonne hodie pugnabimus?* Ille vero, *Perplacet*, inquit, *est ne id decretum apud vos?* Cui vicerex, *Etiam* ait, moxque contractis albis, quos fecialium tempore in manibus gestabant, bacillis, vtrinque discessum est. Ast Gosthus petebat Jacobum de Emps & Philippum de Friberg, vt milites animarent ad certamen, qui peditibus in concionem vocatis, in hanc ferme sententiam sermonem habuerunt: *Strenui fratres & comilitones optimi, presens dies destinatus est pro mutua pugna Gallorum & Hispanorum. Et quoniam Galli rei bene gerende spem & successum in robore & virtute vestra ponunt, proinde vos memores pristinae virtutis & gloriae Germanici nominis, strenue, fortiter agere debetis hoc die, ne à maiorum gloria degenerare videamini, ac nostris simus dedecori, nec salutem aut rei bene gerende successum in manus aliorum reponite, sed proinde agite ac si soli pro vita & gloria vestra pugnetis, hoc certissimum vobis sit, nisi manibus vestris peperitis victoriam ac hostes profligaueritis, rusticorum manus minime euadetis, quocirca in pugna firmi & constantes persenerare velitis expectaturi aut victoriam aut mortem. Et quo Deus omnipotens nobis elargiri dignetur victoriam, promittamus votumque faciamus singuli, quod in proximum diem Sabbathi velimus in honorem DEI & beatissimæ Mariæ virginis pane & aqua ieiunare.* Hoc voto facto Galli acies instruxerunt, & flumen Pignetam transierunt. Primum agmen seu anteguardiam ducebat Alphonsus Ferrariæ dux. Robur exercitus ducebat Gosthus Dux Neumursi. Vltimo agmini seu retroguardiæ præfectus erat quidam Gallicus, qui nuncupabatur *Grandi diabolo*, qui & impedimentorum custodiæ deputatus erat. Germani quia ventus ora eorum afflaret, & sol facies directo inspiceret, sinistrorsum se flexerunt, vt à tergo & solem & ventum relinquerent, ac tardo lentoque gradu contra hostes progrediebantur. Mandauerat quippe Gosthus Germanorum capitaneis ne manus cum Hispanis confererent, antequam iuberet, quoniam destinauerat in primis cum equitibus configere, & illis profligatis pedites aggredi, qua de re Galli artelarias suas contra Hispanorum equites ita disposuerant, vt bombardarum globi in equites continuo iacerentur. Præterea is qui retro custodiam Gallorum ducebat, receptis quibusdam bombardis in ante custodiam Hispanorum equitum globos emittebat, ac eidem tantum cladis & iacturæ inferebat, quod illud primum agmen seu antecustodia ordine relicto, ad vltimum agmen confugeret, ibi equites Hispani coadunati decreuerunt Gallicos equites adoriri, quod simul ac Gosthus animaduertit, mox ex primo agmine suo recepit equites, quibus cum ordine instructo Hispanis equitibus obuiabat, & certamine in tot Hispanos in fugam vertit. Interea temporis Hispanorum bombardæ, quæ è directo Germanorum & Vasconum locatæ erant, maxima eisdem damna inferebant, inter quas vnus globus quadraginta ex ordine tollebat. Germani mox in locum mortuorum alios substituere, immobilesque stare. Vascones vero, globorum iactationes longius ferre non valentes, ad Germa-



Germanos confugere : sed Germani (ne ordo ipsorum turbaretur) eosdem armis & lanceis repellere. Ubi vero Germani iam duas pene horas cum maxima iactura globorum iactationibus expositi, firmi constitissent, statuerunt pugnare, nec diutius Gosthi iussu expectandum. Transita itaque vna fossa, aliud restabat fossatum quod transgrediendum erat, ultra quod pedites Hispani ordine instructo Germanos & Vascones expectabant, intraque illud fossatum tantum spacia relinquerent, quod Germanis locus standi & congregandi cum eisdem concedebatur. Habebant autem Hispani ante se currus quam plurimos, in quibus collocauerant bombardas quas *arcus busos* Itali vocant, Germani vero *backen buchsen*. Eisdem præterea curribus infixerant instrumentum cum tribus acutissimis ferris, duo eius ferramenta, quæ dextra & sinistra respiciebant erant curua instar falcium, id vero quod in ante prospiciebat erat prælongum & rectum, & dein supra id instrumentum curru infixum, disposuerant lanceas oblique locatas. Posteaquam ergo Germanorum magna pars præfatum fossatum transgressa est, Hispani globos ex arcubus busis in eos primum iaciebant, mox ad mutuum conflictum peruentum est, fit vtrinque asperrima pugna: rem primum lanceis gladiisque tractabant, ubi autem illa defecissent, rem globis terræ ac dentibus agebant. Dum vero vtrinque fortiter & dubio Marte pugnaretur, Interim Fabricius de Columna cum paucis equitibus ordinem Germanorum, eorum videlicet, qui fossatum vltimum non tum transgressi fuerant, rumpere, & Vascones quoque non omnes, sed qui nuperrime ad militiam acciti erant, turbati confusique ad Germanos confugere, eorum item ordinem turbatiorem reddere. Quo fiebat, vt Germanus quidam proclamaret: *O Germani vertite vos, & ad tutiora loca recipite*. Hæc quidem vox audita, plerosque qui vltimum fossatum transierant, permouit, quod pedem referrent, fossatum transilirent, & ad reliquos se Germanos reciperent. Quod quidem Germanis pugnantibus maximam iacturam inferebat, nam hi in loco suo perseverantes, nequaquam respicere aut pedem referre, sed viriliter & fortiter pugnantes, omnem hostium vim sustinere, morique potius quam retrocedere præoptare. Germanis igitur tum in maximo discrimine & periculo constitutis, Gosthus cum equitibus Gallicis peropportune præsidio occurrere. Germani illi, qui vltimum fossatum non transierunt, Gallorum videntes præsidium, ordine facto in Hispanos irruere. Hispani vero vndeque circumdati in ancipiti loco stare, qui cum aliquantisper nostrorum vim sustinuissent, tandem fundebantur, in fugamque vertebantur. Fusis igitur & fugatis Hispanis peditibus Galli iusserunt Germanos ad bombardarum tuitionem stare, in quorum quidem laudem dicebant; *Vos Germani nobis illas bombardas in regno Neapolitano abstulistis, eas autem nunc redditis*. Et postquam nullum amplius periculum apparuit, Galli Germanos adeuntes dicebant, si vellent lucri gratia aliquas facere excursiones, quod id concessione sua facere liceat. At Germani, *Nos*, inquit, *hic stetimus pro honore & gloria, & non pro lucro, id ideo questum minime curamus*. Atque genibus flexis suppliciter gratias DEO agebant pro parta victoria. Eo quidem proelio ex Hispanis desiderata sunt ad 9. millia virorum, ex Germanis mille, ex Gallis & Italis duo millia, tametsi plerique ampliorem numerum interiisse ferunt. Ego vero diligentiori inuestigatione adhibita, plurimorum relatione accipio, aliquantulum supra 12. millia hominum ex vtraque parte desiderata. Ex Gallis Gosthus dux Neumursi, & comes de Foys vir intrepidus, & parum supra vigesimum ætatis annum natus, eo bello occisus est à peditibus Hispanis, dum in foueam quandam cecidisset. Occisi quoque sunt capitanei Dominus de Legra, Dominus de Allabrotta, Dominus de le Vtrech, Mengironus, Baronus de Gremios, & nonnulli alii. Molardus autem Vasconum caput ante conflictum globo bombardæ interiit. Bonet in capite grauiter vulneratus est. Ex Germanis vero interiit Philippus de Friberg, ante conflictum eodem globo quo Molardus. Item in conflictu interiit Jacobus de Emps, Fabius de Schladersdorff, Joannes Sigismundus



mundus de Friberg, Gothardus de End, Nicolaus Wies, Georgius Empfer, Capitaneus Linfer. Ex duodecim nempe Germanorum capitaneis nouem interierunt, cum nonnullis nobilibus, quorum erant circiter quinquaginta, qui cum multis aliis peditibus fortissime Hispanorum vim sustentarunt, dum cæteri vel errore vel timore pedem referrent, mutuum vero conflictum, cum res bombardis ageretur. Fabius de Schlabersdorff, & Joannes Spet de Pflumern, capitibus viridi serito tectis, duos itidem Hispanos ad singulare certamen prouocarunt. Joannes Spet antequam Hispanum assequeretur, globo bombardæ vulneratus ad castra deferebatur. Sed Fabius voti sui compos, Hispanum sibi congregendi ausum interimebat. Ex Hispanis autem captus est Joannes Cardinalis de Medicis, Fabricius de Columna, Joannes Franciscus comes Mirandulæ. Marchio itidem de Betunda captus & vulneratus. Marchio de la Tela captus, & vulneratus, Comes Petrus de Nauarra captus & vulneratus. Marchio de Palude occisus, capitaneus il la Freda occisus, capitaneus Rammozat & capitaneus Vitellus, fugientes à rusticis occisi sunt. Joannes de Cardone vulneratus, sed Raymundus de Cardone Vicerex aufugit. Hæc sane pugna ante Rauennam gesta omnium confessu asperrima fuit, & qualis multis ætatibus vix in Europa fuit. Habita vero die 11. mensis Aprilis, anni 12. supra millesimum quingentesimum, quo die per orbem Christianum celebrabatur festum Dominicæ resurrectionis Christi, seu (vt dicitur) festum Paschatis. Victoriæ quidem tantam Galli obtinuerunt, partim propria virtute, partim Germanorum, hoc namque exploratum est, quod Galli sine Germanorum robore cum Hispanis haudquaquam configere tentassent: & ipsimet rei bene gerendæ successum in virtute Germanorum reponebant, fortitudinemque plusquam humanam in eo prælio eorum fuisse testati sunt apud Maximilianum, & ipsi quoque Hispani duntaxat Germanorum robur (vti professi sunt) formidabant. De his hætenus.

Cæterum dum cogito, menteque diligentius voluo, Gallos iam 16. annos in Italia versari, & Germanorum robore atque milite sibi tam latum amplumque dominium Italiæ quærere, non possum non detestari Germanorum discordiam ignauiamque. Nam Heluetii populare dominium amantes, Imperatorem vt Dominum non recognoscunt, ac illos solum affectare feruntur, qui pecunias elargiuntur, iustissimi tamen vtunque tyrannidum vltiores. At principes Germaniæ tenentes nunc vectigalia & cætera imperii iura, singuli veluti ipsi essent imperatores, ea quæ tenent, & possident, tanquam peculiari iure teneant, Imperatori in nullo accepta referunt, ac in omnibus liberi esse conantur. Quibus de causis Germani in magnum ipsorum dedecus pati necesse habent, quod Galli nunc sanguine Germanico id sibi imperium quærant, quod maiores nostri sanguine suo sibi vendicarunt. Sed quoniam alii mores maioribus nostris fuere quam nobis, idcirco nemo miretur, si Galli nostra in Italia iura paulatim & latenter sibi vsurpent. Maiores quippe nostri gloriam publicam sibi quærebant & imperium, pro quo & vitam & facultates suas omnes exponebant. Nos autem parum de publico solliciti diuitias nostras profundimus ad magnificos sumptus & ampla ædificia: & vbi pro honore & imperio publico quid esset contribuendum, penuriam allegamus. Illi quoniam publicos agebant conuentus, pro honore & vtilitate publica consultabant, se & omnia sua pro publica gloria offerentes. Nos vero quoniam conuenimus publice ad tractanda negotia publica, Cæsare agente pro honesta subiectione & auxilio nostro, nos contra concludimus pro Germanica Francaque nostra libertate. Quando vnquam in conuentibus nostris obtulimus substantias nostras Imperatori dicentes: *O Cæsar, omnia nostra tua sunt, vtere his pro arbitrio tuo*, quemadmodum maiores sese offerebant, & hodie Galli Regi suo offerunt. O principes Germani expurgiscimini tandem, & Salustii verbum ponderate, dum inquit, *Imperium eisdem artibus moribusque conseruari, quibus ab initio constitutum est*. Nostri maiores assecuti sunt Italicum imperium concordia, industria, iustitia, & disciplina militari.



Si vos Germani aliquando ab huiusmodi imperio deturbati estis per discordiam, negligentiam, & secordiam, Maiorum virtutes amplectimini, & facile omnia per violentos occupatores detenta recuperabitis. Carolus Magnus postquam Romæ à populo & clero Romano Imperator est nuncupatus, & fœdus cum Græco Imperatore iniit, *ut Apulia & Sicilia Græca Imperatori cederent, & reliquum quod esset Italiae ab urbe usque alpes, Latini Imperatoris esset; & quod Veneti in medio utriusque forent, neutri vel subiecti vel adherentes.* Ab eo quidem tempore Italicum imperium coepit esse Germanorum, quod supra centum fere annos per Caroli successores fuit administratum. Postea vero deficiente Caroli progenie, Italicum imperium peruenit ad Saxones, qui fœdus Caroli cum Græco Imperatore initum renouarunt. Verum cum Otho tertius sine liberis masculis esset, delecti fuere Imperatoris Electores, quod ius eligendi imperii electores tum communi consensu Germanorum & Pontificis Romani consequebantur, & id quidem in defectum & penuriam liberorum Imperatoris, ut videlicet eo iure imperii electores uti deberent, quando Imperator non haberet liberos masculos, aut tales non essent idonei. Ab eo sane tempore, quo Imperium sic ex electione competere coepit, ius Italici Imperii modo apud Sueuos, modo apud Saxones, modo apud Bauaros, modo apud Bohemos stetit, & id ius in præsentiarum penes Maximilianum versatur. Sed o principes Germani, rogo, aliquando considerate quomodo illud ius vestrum negligatis: animaduertite, precor, quemadmodum Italia ab exteris nationibus laceretur, pro qua cum vestra tempestate certent Galli, Hispani, Veneti, & pontifex Romanus, vos interim (ut cum vestra gratia loquar) desides, & instar dormientium, illa æquo animo fieri patimini. Quod si maiores nostri iterum reuiuiscerent, & hæc à vobis fieri cognoscerent, profecto ipsi dolerent, ingemiscerent, vosque de intestinis vestris discordiis, secordia item & ignauia inculparent, utque res multo suo sanguine, ingentique labore partas tam effoeminate tamque ignauiter negligeretis. Dixi ego Italiam ab urbe usque ad Alpes esse iuris vestri, licet non ignorem & Apuliam & Siciliam aliquando à maioribus nostris possessas: ut præteream regnum Judææ, & alia ultramarina regna, quæ à maioribus nostris fuerunt possessa. Lotharius enim Saxo, Normanis Apuliæ & Siciliæ occupatoribus expulsis, pro se regno potitus est. Et Henricus præterea quintus Frederici primi Sueui filius, exterminatis Normannis, Apuliæ & Siciliæ regnum pro se & successoribus usque ad Conradinum abnepotem & vltimum Sueuorum ducem obtinuit. Longum profecto esset, si referre tentarem, quale quantumcunque imperium nostrum sub maioribus nostris extiterit. Vos itaque principes Germani, pro amplitudine & gloria Germanicæ nationis, item pro incremento totius reipublicæ Christianæ, obsecro, dignemini Maximiliano Imperatori vestro obedire, eique fideliter & concorditer adherere, res & substantias vestras omnes sponte offerre. Tempore namque Maiorum imperatores habuerunt vectigalia, telonia, & (ut nunc vsitatis verbis loquar) datias, angarias, gabellas, pedagias, & alia imperii iura, quæ vos nunc tenetis: vnde olim Imperatores amplissimum

p.289 exercitum alere potuerunt. Quod si aliqui Imperatores extiterint, qui aut ex negligentia aut indulgentia quadam passi fuerint, principes Germaniæ uti huiusmodi imperii iuribus, cogitare debetis eadem iura, non ita in manibus vestris præscripta, quod ea Cæsar ex causa iterum vindicare non possit, etiam si Carolus quartus per priuilegium ea vobis concessisset. Nam priuilegium cum tendit ad noxam seu magnum damnum concedentis, reuocari de iure potest. Proinde aut permittatis Maximiliano Imperatori iura Imperii, aut aliquando in veritate ad imperatorem vestrum dicatis, *Omnia nostra in tua sunt potestate, dabimus tibi gentes & pecunias quas habemus, utere his pro tuo arbitratu tanto tempore, quanto suppetere valebunt. Te quoque & successores tuos liberos masculos recognoscimus ut Imperatores, ut Dominos nostros natiuos & hereditarios.* Quo autem rem hanc summatim & breuissime concludam complectarque, duo ponam dicta latiusque



discutienda. Primum meminisse debent principes Germani Maximiliani Imperatoris honorem, gloriam, imperiique incrementum in proprium ipsorum bonum redundare. Imperator nempe publica persona Germaniae existit, penes quem omnis iuris publici administratio versatur. Bonum vero publicum in bonum priuatorum vergi exploratum est, quocirca si Imperatoris status est bonus, & amplificatur honore & imperio, id vergat in honorem gloriamque singulorum principum, &c. Itaque curiose prospiciant principes Germani, ne dum quærant honorem priuatum, parum de publico solliciti, honor priuatus una cum publico pereat. Item ne dum singuli contentur suas domos & familias amplificare & illustrare, domus interim publica Germaniae labatur ruinamque patiatur. Præterea ne dum honorem, gloriam, imperii incrementum sanguini suo inuideant, interim alieni honorem & iura propria occupent, quemadmodum ante fores id apparet. Secundum dictum meminisse debent principes Germani, Maximilianum Imperatorem gentibus & pecuniis adiuuare, cum oblatione omnium bonorum sine temporis præfinitione, quoniam pax regni sine militibus conseruari nequit. Milites vero sine pecuniis haberi non possunt. Quocirca o principes Germaniae pro pace Germaniae, & honore publico & priuato, aut pecunias & res vestras ad arbitrium Imperatoris offerte ac ponite, aut vectigalia & imperii iura eidem cedite, alioquin inter vos semper intestinis laborabitis seditionibus. Pax namque sine iustitia esse nequit, iustitia vero exigit, ut unicuique quod suum est reddatur. Qua de re Augustinus super hæc Davidis verba, *Pax & iustitia osculatae sunt; Pacem (inquit) & iustitiam duas esse sorores mutuo se sine separatione concomitari.* Itaque pro pace, pro honore, gloria Germanicæ nationis, o Germani principes, vestras facultates & diuitias Cæsari offerte, ei præsidia præstate. Videtis enim militis Germanicæ nationis per subtractionem auxilii, quod Cæsari impendere deberetis, ad aliarum nationum stipendia accedere, in præiudicium iurium & rerum vestrarum, animaduertite ne dum Imperatorem vestrum fame laborare vultis, vos ipsi pereatis, uti in fabula est quam Liuius narrat. *Tempore, inquit, quo non, ut nunc: in homine omnia membra consentiebant, sed singulis membris suum cuique consilium, suusque sermo erat, indignabunda quidem sua cura, suo labore ac ministerio ventri omnia quæri, & ipsum ventrem in medio quietum nihil aliud quam datis voluptatibus frui, & proinde conspirasse, ne manus ad os cibum ferrent, nec os acciperet datum, nec dentes conficerent.* Hac ira dum ventrem fame domare vellent, ipsa una membra totumque corpus ad extremam peruenisse tabem, & deinceps apparuisse ventris ministerium haud segne fuisse faciendo sanguinem, quo viuimus vigemusque, hæc quidem intelligenti sufficiunt, receptuique cano.

Facto igitur bello de quo supra, altero die sequenti, qui erat duodecimus mensis April. Rauennates sese dederunt Frederico Cardinali de S. Seuerino, Gallorum capitaneis promittentibus eisdem bonam fidem, & res ipsorum saluas fore. Sed Vascones ciuitatem gratia commeatuum ingredienti, bona ciuium diripere ac ipsos ciues trucidare coeperunt, inuitis capitaneis & maioribus exercitus Gallici ac renitentibus. Marcus vero Antonius cum Hispanis in arcem confugit. Breui dein Fauentia, Forliuium & Imola ad Gallorum ditionem redacta sunt, arcibus tamen vbique sub Hispanorum potestate remanentibus. Interea funus Gosthi ducis Neumursi per Bononiam, Mutinam, Parmam, & Longobardiam in Franciam defertur, ante cuius quidem feretrum 18. vexilla Hispanis erepta ferebantur. Præterea aureus gladius Raimundi viceregis Neapolitani, quem Julius pontifex eidem dono miserat, item & crux legati. Sic Gosthus, cui viuo triumphare non dabatur, mortuus triumphabat. Galli ciuitatibus Romandiolæ præsidia relinquentes, Longobardiam petunt ad arcendas Helueticorum incursiones. Pontifex Julius concilium Romæ prosequitur. Maximilianus autem Matthæum Lang Episcopum Gurcensem Treuerensi conuentu legat in Italiam. Verum illa longiore narratione egent, & alterius libri initium requirunt.



AD UNIVERSOS GERMANIÆ PRIN-  
CIPES, QUOD JUSTISSIMUM ET TOTI  
GERMANIÆ GLORIOSUM BELLUM CÆSARIS MAXIMI-  
LIANI CONTRA VENETOS NON ADJUVANT, QUE-  
RELÆ GERMANIÆ BEBELIUS  
AUCTOR.

*O Mea progenies, dulcissima Teutona pubes.  
Accipias matris tristia verba tua.  
Illa ego terrarum domitrix, legumque verenda  
Impositrix olim gentibus innumeris.  
Cuius victrices aquilas, victricia signa  
Pertulit Eous, occiduique duces.  
Cuius & imperium tremuerunt omnia regna  
Seruiuit Gallus, Romulidæque viri  
Lugeo nunc merito, dura cernice parentem,  
O me nunc procures temnitatis atque duces.  
Nam Venetus populus, non iure aut fœdere motus  
Imperio inuasit debita regna meo,  
Vulneribus quasita meis & possidet arua  
Histrorum, & segetes demetit Italicas.  
Hæc repetens forti nunc Cæsar Maximilianus  
Milite, metatur castra per Italiam.  
Felicique manu summis in montibus arces  
Subingat, atque urbes sub ditione tenet.  
De Venetisque actum foret, auxiliis modo vestris  
Adiutus vester si dominus fuerat.  
Quem nunc deseritis, dum commoda, gloriam, honores  
Nominis antiqui iura referre licet.  
Quis furor, o gnati, quæ vox tam dira, nephanda  
Quæ tantum potuit consuluisse nephas?  
Heu mihi quo patriæ studium, quo decidit ardor  
Nobilibus quantum degeneramus auis.  
Classica quin sonitent, & adhuc Germania in armis  
Fulgeat, imperii quo reparemus opes,  
Aut male negligitur quasitum sanguine multo  
Maiorum imperium, gloria, fama decus.*

AD UNIVERSOS GERMANIÆ PRIN-  
CIPES, ET MAXIME ELECTORES IMPERII,  
QUOD BELLUM JUSTISSIMUM, ATQUE OMNIBUS GER-  
MANIS GLORIOSUM MAXIMILIANI CÆSARIS  
CHRISTIANISSIMI ADJUVANT CONTRA  
VENETOS, COHORTATIO IPSIUS  
GERMANIÆ.

*Surgite vos procures Germano sanguine nati  
Surgite vos, mater conuocat ipsa pios.  
Surgite nunc, patriæ fessis succurrite rebus,  
Surgite de somno segnitieque duces.  
Sumite magnanimas mentes, animosque parentum  
Qui pro me toties non timere mori.*



Et patrum reparate decus, nunc Itala regna  
 Eripite à Venetis imperiumque meum.  
 Surgite in imbelles homines, reuocate, quod olim  
 Abstulit heu Venetus proditione, dolo.  
 Pontifices primum Rheni, princepsque palati,  
 Surgite Bellaces Saxonique domus.  
 Imperii nam communis; patriæque salutis  
 Vos cura elegit Casari adesse manu.  
 Vos commune bonum & priscarum gloria rerum  
 Suscitat à somno, Surgite quasdo duces,  
 Imperium mundi quasitum sanguine auro, &  
 Usque huc seruatum si retinere placet,  
 Si libertatem priscam, patriæque salutem,  
 Denique vel proprium si retinere focum.  
 Surgite nunc procures propere, nam Teutona late  
 Nunc buxus resonat, classica arma vocant.  
 Maximilianus item vocato ad nobile bellum,  
 Quo paritur vobis gloria, regna, salus.  
 Ille etenim Italia vobis iam claustra reclusit,  
 Imperii & veteres iam reparabit opes.  
 Si modo cum domino vestro mentemque virilem  
 Sumitis, & galeam, surgite quasdo duces.  
 Nec qui perdiderat cum regno Sardanapalum  
 Detineat luxus, pestis amara virum.  
 Sunt & opes & equi vobis, sunt arma, virique,  
 Tam iustam superi militiamque iuuant.  
 Quare magnanimi consurgite quasdo Alemanni:  
 Classica iam sonitant, Mars furit arma vocans.  
 Imperium aut (timeo) maiorum sanguine partum  
 Libertasque ruet, Dii prohibete nephas.  
 Ludibrio & præda fiet tunc Teutona pubes,  
 Qua domitrix olim totius orbis erat.





**JO. PIERII VALERIANI**  
**EPISTOLA**

DE  
HONORIBUS MATTHÆO LANGIO,  
EPISCOPO GURCENSI ROMÆ  
HABITIS.

**JANI FRANCISCI**  
**VITALIS**

PANEGYRICUS EIDEM EPI-  
SCOPO DICTUS.

**HIERON. NOGAROLI**  
ORATIO PRO VICENTINIS.





LECTORI SALVTEM!

BURCARD GOTTHELF  
STRUVE.



Infelicitum litteratorum numerum auget Jo. Pierius Valerianus, \* patria Bellunensis, quod Marchiae Tarvisinae est oppidum, \*\* in paupertate scilicet viuens, \*\*\* excellentis alias ingenii homo, famaeque quoque haut minoris. \*\*\*\* Hic Romae agens, Gurcensis Episcopi ingressum Romam, hac describit epistola. Erat Matthaeus Langius, peruerusta patritiorum Augustanorum familia natus, Praepositus primum Augustensis, \*\*\*\* deinde Gurcensis Episcopus, factus postea Romanae Ecclesiae Cardinalis, & Maximiliani Imperatoris Consiliarius, demum Archiepiscopus Salisburgensis.\*

\* Sic Cornelius Tollius pag. 424. eum in horum numerum refert.

\*\* Vitam ipsius breuiter describit Girar. Ghilini *Theatro d' Huomini Letterati* pag. 190.

\*\*\* Queritur de hoc ipse in elegia, qua vitae suae calamitatem lugebat:

*At genitrix pauper, geminae sine dote sorores,  
Quas miseras frustra spes fouet una mei,  
Exposcunt a me fraterni praemia iuris;  
Sed cartas nullas, carmina nulla, volunt.*

\*\*\*\* Docet hoc eius Epitaphium quod Ghilino debemus, & tale est:

PIERIO VALERIANO.

Bellunensi, Poetae, Rhetorique amplissimo,  
Cuius pia umbra non poenitendum  
hic tumulum sortita est.

Nam ut optabilis in patria, ita speciosus  
Patauii supremi officii decus fato amissum  
virtute recuperavit.

Petrus Carrarius, ac Joannes Baptista  
Rota, Patauini vnanimes grato Hospiti  
pos.

\*\*\*\*\* Crusius Suen. *Ann. lib. IX. Part. III. cap. XI. & lib. X. Part. III. cap. I.* quem sequitur Car. Stengelius *Rer. Augustan. Part. II. cap. LXIII. num. 16.*



gensis. \* Magnæ hic apud omnem erat existimationis, \*\* multæque in negotiis publicis fuerit auctoritatis, historiæ nos docent. Anno siquidem 1508, Imp. per eundem e suggestu non jam regem eum, vt antea, sed Romanorum Imperatorem deinceps appellandum, promulgari iubet. \*\*\* Dum eodem anno famosum illud foedus Cameracense firmaretur, ipse Cæsaris nomine vna cum Margaretha Sabauda Belgii gubernatrice aderat. \*\*\*\* Insequenti anno in Italiam missus, vt Gallorum Regi Ludouico Cæsarem propediem in Italiam esse reuersurum, nuntiaret. \*\*\*\*\* Inde in Galliam missus legatus, \*\*\*\*\* sed postquam a Julio II. Papa sæpius fuisset expeditus, ad consummandum pacis negotium cum Venetis, \*\*\*\*\* annuit Cæsar & constituit Gurcensem Vicarium Generalem per Italiam, qui Bononiæ magnifice fuit exceptus, cum Papa etiam collocutus. \*\*\*\*\* Et licet ingrauescente Julii II. morbo Cæsar eodem anno Gurcensem Romam destinasset \*\*\*\*\* vt de ipso ad Papalem thronum euehendo laboraret, \*

Tom. II.

C c c c 2

ret, \*

\* Wigal. Hund. Metrop. Salisburg. pag. 32. qui etiam hæc addit: *suit vir singularis prudentia & doctrina, magnificus, beneficus, & maxime hospitalis, qui de omnibus infimis pariter ac summis bene mereri studuit, & propterea apud omnes Principes Germania, præsertim apud Maximilianum Imperatorem, cuius intercessione ad hunc Episcopatum peruenit, magna valuit autoritate.*

\*\* Docet hoc Petri, Episcopi Tergestini epistola ad Matthæum Langium, quæ Conradi Peutingeri Sermonibus Coniualibus fuit inserta pag. 8. Eiusdem Peutingeri epistola ad eundem pag. 12. Jo. Trithemii epistola LVI. libri secundi ad eundem. Vitam Eiusdem plenius describit Cabrera Tom. III. Vit. Pontif. pag. 299. Effigiem ipsius exhibet Hortleder de Caussis B. Germ. Tom. I. Lib. II. cap. VI. pag. 792.

\*\*\* Franc. Guicciardinus Hist. lib. VII. pag. 7. cap. 2. Gerh. a Roo. Hist. Austr. lib. XII. p. 568.

\*\*\*\* Nihil equidem de eodem reperitur in Histoire de la Ligue faite a Cambray. Sed claris verbis hoc testatur Gerh. a Roo. lib. XII. pag. 571. dicens: *igitur adnitente imprimis Pontifice, & commeantibus internunciis eo res deducta est, uti Imperatoris nomine Margaretha, eius filia, Belgarum gubernatrix, & Matthæus Langius, a rege Gallia Cardinalis Rothomagensis, quem sequebatur Jacobus Albionus, Aragonum regis legatus Cameraci conuenirent.* Patet hoc etiam ex Anglorum Regis legati ad Margaretham Sabaudam inter Epistolas Ludouici XII. epistola Tomo I. pag. 128. & ipsius Margarethæ ad Maximilianum pag. 134. Eadem epistolæ Gurcensis sæpius faciunt mentionem.

\*\*\*\*\* Guicciardinus lib. VIII. pag. 762.

\*\*\*\*\* De hoc sæpius fit mentio in epistolis Ludouici XII. Sic Joannes Caulier nuntiat Margarethæ Austriacæ aduentum Gurcensis in Galliam & qua ratione a Rege fuerit exceptus Tom. II. pag. 39. Andreas de Burgo inter alia Margarethæ refert Tomo II. p. 76. *Domina mea, est hic Dominus Gurcensis cum tanta reputatione Cæsaris & ita prudenter gubernauit omnia, quod est in mirabili estimatione & fuit aduentus eius mirabiliter bonus & utilis pro Cæsare.*

\*\*\*\*\* Testatur de eo Coccinius: *interim Julius Pontifex apud Cæsarem vehementer institit, ut Gurcensem ad se destinare dignaretur, pro consocienda concordia inter ipsum & Venetos. Idem alio loco dicit: ad hæc Matthæum Lang Episcopum Gurcensem Cardinalem nominauit, quo medio eiusdem Cæsarem ad confederationis sue partes alliceret.* Promissam etiam tunc ipsi fuisse Cardinalis dignitatem ex Andrea de Burgo epistola ad Margaretham patet, inter Ludouici XII. litteras Tom. II. pag. 81.

\*\*\*\*\* Hoc ipse Gurcensis narrat singulari epistola ad Episcopum Parisiensem XI. Aprilis 1511. scriptam inter dictas epistolas Tom. II. pag. 139. Adiecta est JO. FRANCISCI VITALIS Panegyris in laudem Gurcensis Episcopi.

\*\*\*\*\* Sic Andreas de Burgo Margarethæ Austriacæ ex Oeniponte XVI. Febr. 1511. narrat: *sua Imperialis Maiestas vult ut D. Gurcensis subito vadat Romam, Tom. III. p. 158. Ad eundem aduentum prouocatur in Tractatu Induciarum inter Maximilianum I. & Venetos VI. Aprilis 1512. initarum Tom. III. p. 217. ad certum Conuentum Pacis quam sortituram effectum Domino concedente sperandum & tenendum est in breui, præsertim adueniente Illustrissimo Principe & Reuerendo D. Domino Mattheo Electo Gurcensi Consiliario dicti Serenissimi Cæsaris Maximiliani Imperatoris Electi semper Augusti qui de proximo venturus speratur cum plenissimo mandato & auctoritate. Quam auide autem Julius II. hunc Gurcensem expectauerit, testatur ipsius epistola ad Maximilianum Sfortiam Romæ XII. Augusti 1512. scripta Tom. III. p. 309. ut autem rectius & cum dicti electi Imperatoris decore omnia stabiliantur & præcipue Ducatus tuus, dilecti filii Matthæi Electi Gurcensis aduentum auidissime expectamus.*



ret, \* dilatum tamen iter fuit, Gurcensis in Germania primum Cæsarem adiit, \*\* vsque dum Nonis Nouembris 1512. Romam intraret, ibidemque magno cum honore & gaudio fuisset exceptus, quod hac epistola sigillatim exponit Valerianus, ex qua etiam diuersa circa Cæremoniale Romanum discimus. Hanc Beatus Rhenanus, in cuius manum inciderat, Matthiæ Schurerio Argentoratensi Bibliopolæ commendat, cuius beneficio primum fuit edita.

Panormitanus patria erat hic Vitalis, poetica re clarus, cuius diuersos hymnos aliaque Carmina indicat Gesnerus. Bibliotheca, *voce Janus Vitalis*. Testantur etiam præmissi huic Panegyrico versus, inter eximios poetas ipsum fuisse numeratum. Hic Panegyricus autem totus est in laudibus Cardinalis, III. Idus Nouembris 1512. paullo post introitum Romanum scriptus, quem etiam breuiter describit Vitalis.

Sequitur HIERONYMI NOGAROLI Comitis Itali Oratio ad Maximilianum pro Vicentinis habita cum illorum urbem post infelicitè tentatam Patauensem obsidionem anno 1509. ingrederetur. \*\*\* Claudit tandem agmen SEBASTIANI MARRHENSIS, Junioris, Colmariensis carmen tumultuarium in laudes Maximiliani & Gurcensis. Legi quoque meretur Gurcensis elogium, quod infra in Jo. Fabri oratione Parentali Maximiliani reperitur.

## PIERII

\* Hunc fuisse animum Maximiliani testatur ipsius Epistola ad Margaretham filiam missa, Tom. IV. pag. 2. *Et envoyons demain Mr. de Gurce Evesque a Rome deuers le Pape pour trouver fa-  
chon que nous puyssions accorder avec ly de nous prendre pour vng Coadiuteur, affin que apres  
sa mort pourrions estre assuré de auoir le Papat et deuenir Presler Et apres estre Saint, Et que  
yl vous sera de necessité que apres ma mort vous seres contrainct de me adorer dont ie me trou-  
ueré bien gloryoes.* Scripta hæc epistola XVIII. Septembris 1511. Conuenit hæc cum alia  
ad Baronem Paulum a Lichtenstein scripta Brixia XVI. Septembris an. 1511. apud Ware-  
mundum de Ehrenberg in verisimilibus de regni subsidiis ac oneribus pag. 19. in qua:  
*in illum euentum, si Papa defungatur, Episcopum Gurcensem Romam ablegauimus, qui nego-  
tium interim nostrum de recuperando Papatu practicetur. Facit hic Mich. Coccius: at Ju-  
lius Pontifex ut Romam aduenit, haud longe post in febrem incidit, Et vsque adeo male se  
habere cepit. quod per totam increbuerit Urbem, Pontificem interiisse, omnes namque ta-  
berna, omnes item officina clauderantur. Vrsini præterea Et Columnenses in armis stabant,  
quæ quidem fama obitus Pontificis allata est ad Cardinales Mediolani constitutos item ad Cæ-  
sarem, item ad Regem Francia eius obitus tam certus exploratusque habebatur, quod legatus  
Romandiotæ iter versus Romam arripuerit, Et Cardinales Mediolani exeuntes hospitia Ferra-  
ria, Et aliis in locis disposuerint, Cæsar quoque voluerit, ut Gurcensis cum Cardinale Adria-  
no Romam proficisceretur, ad nouam Pontificis Creationem. Non longe post certior superue-  
nit veritas de vita Pontificis. Pluribus de hoc negotiis agit Jos. Mezger, Hist. Salisburg.  
lib. IV. cap. XLIX. J. Bayle reponse aux questions d'un Prouincial. Tom. II. cap. CXXIV.  
& Ernesti Salomonis Cypriani dissertatio de Maximiliano Primo Pontificatum Maximum as-  
fectante.*

\*\* Gurcensis iter ob recuperatam Papæ sanitatem postea fuisse dilatum, facile videtur. Sic enim Mercurianus Galinarius vlt. Februarii 1512. Margarethæ nuntiat, Gurcensem in Germaniam abiisse ad Imperatorem Tom. IV. pag. 53. Hinc etiam sub medium anni 1512. adhuc Romæ expectabatur, ut ante dictum fuit.

\*\*\* Agit de eo Gerh. a Roo. Hist. Austr. lib. XII. p. 579. *cum igitur omnium rerum copia ex an-  
te conueto suppeteret, Et milites, pecunia accepta, prompti ad imperata adessent, Cæsar fru-  
stra operam sumi videns, tormentis tutum in locum deportatis, Laminum se cum omnibus co-  
piis, atque inde Vincentiam conuertit.*





PIERII VALERIANI, DE HONORIBUS ILLUSTRISSIMO AC REVERENDISSIMO GURCENSI, CÆSAREO TOTIUS ITALIÆ VICARIO, VRBEM INGREDIENTI HABITIS EPISTOLA.

BEATUS RHENANUS MATTHIÆ SCHURERIO  
MUNICIPI SUO S. P. D.

**I**oannes Petrus Valerianus Belluniensis vir in utraque lingua egregie doctus, Reuerendiss. Matthæi Langii Episcopi Gurcensis, Cæsarei Archigrammatei in urbem ingressum, pompamque omnem ac honores quibus affectus est, eleganti ad amicum epistola descripsit fideliter adeo & graphice, ut cum legeris rem ipsam oculis subiectam te cernere credas. Hanc humaniss. integerrimusque vir Joannes Bergmannus de Olpe Cæsaris plurimum studiosus mihi tradit, ut alicui eorum qui stamnceis calamis libros exscribunt, per mille exempla publicanda committerem. Neque vero alius occurrit quam tu Matthia chariss. tum quia te ob virtutes tuas amo, tum quia ea quæ ad Germaniæ splendorem attinent, nullo unquam tempore procudere cessas. Misi itaque tibi Pierianam illam epistolam, & Panegyrii Jani Francisci Vitalis, cum multis doctorum hominum versiculis. Quare Gurcensis non mediocreis tibi habebit gratias, quod de se tam bene meritus sis, honores quibus Romæ exceptus est per omnem Germaniam diuulgando. Caterum facile hinc conicere poteris, si Christianissimus Imperator Cæs. Maximilianus ipse Romam veniret, quot illum poëta suis poematibus certatim essent concelebraturi. Volo item Carmen Hieronymi Nogaroli Comitis, quo Cæsarem Vicentie nomine ciuitatis salutauit, calci adiicias. Id quod mihi anno superiore conterraneus noster Jacobus Spiegel Cæsarea maiestatis à secretis, candide, ut alia multa, communicauit. Bene vale, & me ut facis ama. Sebastiano Murrboni meis verbis salutem dicito. Ex Basilea 4. Nonas Februar. Anno 1513.

EPISTOLA DE HONORIBUS ILLUSTRISSIMO AC REVERENDISSIMO GURCENSI CÆSAREO TOTIUS ITALIÆ VICARIO VRBEM INGREDIENTI HABITIS.

PIERIUS VALERIANUS PETRO CRISPO. LAVENTII CAMPEGII APOSTOLICI LEGATI AD CÆSAREM SECRETARIO

S. P. D.

**Q**um hinc discederes Crispe iucundissime, à summo Pontifice ad Legatum tuum nuncius iterum transmissus, summo opere flagitasti, ut si quid scitu dignum



dignum Romæ interim gereretur, id tibi per literas significarem. Ab eo vero tempore nihil vel accidit, vel gestum est maiori dignum admiratione, quam illustrissimi ac Reuerendissimi Matthæi Langii Episcopi Gurcensis ingressus in urbem. Tot illi Cæsareo totius Italiæ vicario honores publice & priuatim habit, tam magnifico, tam splendido rerum omnium apparatu receptus, & ad Pontificem deductus est. Sed, quod gratum omnino tibi futurum existimo, rem omnem à principio percurram, & ipsius pompæ formulam tuis oculis subiiciam. Quando ego ex hac Adriani mole rem omnem occulata fide diligenter aspexi, quod nusquam locorum melius obseruari potuit. Hinc enim (vt scis) omnis Roma videri & septem possunt montes. Age igitur te in otium asserere, meque interim ausculta dum quicquid fieri perspexerim, inter nos sermone referam, & ab ouo ad mala rem tibi satis opinare propinem.

Pridie Non. Nouembris, prima iam noctis hora significata, eram in præ-<sup>p.293</sup>fecti nostri cubiculo, atque (vti mos eius est) ea prima vigilia studia hæc politiora tractabamus, & Sallustianam tum forte historiam, tuas delitias, percurrebamus, quum vigiles renuntiant viam omnem, quæ decliuus est à Mariano monte in Vaticanum vsque facibus innumeris collucere. Rati id quod erat, Gurcensem aduentare, prodimus ad propugnacula, magna enim præcesserat expectatio, hominem esse hunc, qui missus rerum arbiter à Cæsare summis de negotiis vna cum aliis magnorum Regum & Principum Legatis ad Iulium II. Pontificem Maximum, rerum cardinem eo verteret, vt modus imponeretur tandem tot cædibus & excidiis, quibus per quinquennium hoc præcipue, non Italia solum sed vniuersa Respublica Christiana desolata, & magna ex parte deuastata est. Id enim semper (vt ipsemet nosti) impendio cauit Cæsar, vt sanguine abstineretur, cuius rei præcipuum testimonium Bellunienfes ciues nostri calamitosi his temporibus afferre possunt. Dum igitur ita quadam latitia delibuti vim eam funalium, in lactæ viæ speciem splendere prospectamus, aduertimus faces omnes, pro vt ad Nicolai turrin propinquabant deficere, nullas neque in Urbem, neque Palatium inferri. Noster interim Præfectus tubicines cornicinesque accersiri iubet, qui plausibili sono Principem ante molem transeuntem exciperent.

Tormenta quoque sulphure armari edicit, vt tonitruis emissis & Gurcensem ipsum honorifice saluaret, & urbem tam expectati aduentus nuncio totam exhilararet. Interea nuncius à Palatio regreditur, qui præmissus à Præfecto fuerat, vt quid ageretur, exploraret: refertque Gurcensem funalibus extinctis, vna tantum face contentum, familiaribus ad hospitium ablegatis, clam esse Palatium ingressum, prodiisseque illi obuiam Pontificem ipsum à folio ad extremam vsque aulam, vultuque hilari hominem accepisse apud se pernoctaturum, Urbem postridie solenniter ingressurum, quod Pontifex eum honorificentissime recipere destinasset. Nos igitur hinc coenatum, inde à literaria disceptatione aliqua defatigati cubitum imus.

Postero die præfecti nostri monitu Parin Pontificulum adii, in proximis D. Celsi ædibus habitantem, sciscitaturus ex homine quid honoris aduenienti paratum esset. Respondit is, Pontificis & sacro sanct. C. omnes illos honores huic imperiali vicario decretos esse, qui vel Regi, vel primogenito Regis sint præstari soliti, præter totius cleri & collegii Cardinalium comitatum, qui Regibus tantum obuiam ire consueuerunt.

Reliquos vero totius orbis ordines hominem deducturos, pompa quantum fieri poterit honorifica. Decretum tamen fuisse eodem S. C. vt Cardinales duo ex primatibus procederent extra urbem vsque ad aquam quæ transfuersa dicitur, vbi salutato & accepto Principe, eum ad pontem cognomento Miluium deducerent, inde per prata illi in Vaticanum pergerent, Gurcensis à reliquis acciperetur. Cæterum quia is ante statam diem in Vaticanum præuenerat, alia  
ratione



ratione fore excipiendum, eaque de causa placuisse pontifici, ut in speculam cui ab amoenitate pulchræ \* nomen inditum est, diuerteret.

\* Bel. veder.

Mane vero cum in Citriorum luco ad Bramanteum fontem pransus esset, auditis iis quibus cum de negotiis alicuius momenti statim fuerat discernendum, undecima circiter hora per Buccineam scalam in subiectos hortos, mox in prata pergit, ubi clientum vis innumera, seruitia & famulatus frequens, in equis insidentes operiebantur, magnus etiam Germanorum ciuium numerus confluerat, eorum qui vel propriis, vel alienis negotiis curandis dediti Romæ habitant: quorum plerique calami exscriptorii opera locupletati ad amplissimas interdum dignitates emerferunt. Cum hoc igitur comitatu, qui nobis ab arcē prospectantibus numerosi instar exercitus habebatur, per planitiem ad Tyberis ripam contendit. Hic Cardinalibus illis fit obuiam, qui fuerant à Pontifice, ut hoc facerent deligati. Quorum vnus Th. Strigoniensis Cardinalium sacris initiatorum prior. Alter L. Agenensis summi Pontificis consanguineus & poenitentiarius maior, honoratissima vterque dignitate ex meritis honestatus. Hi quum pileolos extulissent, Strigoniensis Gurcensem fronte hilari compellat, Pontificis & sacrosancti Collegii nomine saluere iubet.

Eum, quod bonum faustumque sit optatissimum omnibus applicuisse, multa in hanc sententiam ornate ac sapienter locutus. Matthæus vero minime ad loquendum ineptus, omnibus pro re, loco & tempore luculenter, & scite p.294 adeo respondit, ut magna nobilium conuenarum corona facta, ex affabilitate, atque prudentia, omnibus è vestigio sese præstiterit admirandum. Oratio siquidem animi simulachrum habetur. Inde quum progredientes Cardinales eum inter sese medium exciperent. Cardinalibus ipse decedere, utque probatissima est modestia, negare se locum eum occupaturum. At posteaquam reluctari non potuit, ingenuam professus verecundiam, coactus est in eos sacrosancti Senatus proceres mediis obequitare. Quum vero vicissim de his & illis rebus differentes ad pontem peruenissent, ingentem offendunt numerum eorum, qui pompam honestare iussi, iam aduentarant. Ibi tum Senator Urbis cum frequentissimo Romanorum Ciuium comitatu omnibusque Reipublicæ totius ordinibus, qui munus aliquod in Capitolino foro, vel in vrbe gererent, exquisitori sermone Gurcensem excipit, & amoenitate Neapolitanæ facundiæ demulcet, quumque idem facere singulorum ordinum præfides instituissent, veriti Pontificuli ne dies salutationibus his atteretur, silentium omnibus indixere.

Inter eundem itaque vnus ex Pontificulis singulas Cardinalium clientelas, quæ in ordines sigillatim instructæ obuiam veniebant, intento digito demonstrabat, missos hos & illos inquires ab Antistite suo, ut ingressum hominis decorarent. Quibus omnibus princeps, aperto capite, benignissime gratias agebat. Cum igitur inter ingentem hanc salutantium multitudinem ad vrbs portam, quæ templo Virginis popularis \* adiacet applicuissent, Cardinales pro gradibus templi venia petita Gurcensem relinquunt, mox ædem ingrediuntur adoraturi. Antiquum enim est institutum (ut accepi ex pontificulo) ne sacer Senatus quempiam per urbem publice deducat, nisi vel Regem vel Regis primogenitum.

\* S. Maria de populo.

Duo vero Cardinales secundo vel tertio Regum genitos, vel duces, & Marchiones eos, qui se addictos Ecclesiæ professuri venerint, quique ea sunt amplitudine, ut in subselliis vna cum Cardinalibus assidere possint. Quamuis vero Cæsarei huius Vicarii dignitas maior quam Mediolanensis & Ferrariensis Ducis esse censeatur, quippe qui Cæsaream Maiestatem in vniuersæ rebus Italiæ præse ferat, quia tamen in eorum numero non habebatur, qui sunt Ecclesiæ mancipati, satis esse visum est propensam erga eum voluntatem ostentare, nihil vero eorum intermittere quæ seruato venerabilis Ecclesiæ decoro præstari potuerunt. Proreges enim & Regum Vicarii à nullo Antistite deduci solent, nedum à duobus Cardinalibus excipiantur. Sed enim non ierim inficias huiusmodi ritus aliquando profanatos, præsertim Alexandri VI. tempore, qui Valentinum filium



filium suum à deposito Cardinalatu ex Galliis redeuntem, neque adhuc vexilliferum Ecclesiæ designatum, à duobus Cardinalibus medium excipi, perque urbem ad sese deduci iusserit. Idque iterum fieri curavit, quum idem victor subacta Flamminia rediisset. Sed detur hoc illi, qui longe maiora his præter morem fieri permiserit. Gurcensis itaque ab Regalis montis Episcopo Urbis gubernatore, & Neapolitano Archiepiscopo, Palatio Antistite, hinc inde exceptus, iter suum exequitur.

Quos vero secum adducebat legatos, & illustres viros, à dextera Antistes aliquis, à leua qui prius in Vrbe fuerant Legati comitabantur, quod genus pompæ pulcherrimum est, & rarissimum esse perhibetur.

Nos quum ab arcis fastigio comitatum omnem ab oculis elapsum aspeximus, statim in pensile viridarium, quod ripæ fluminis imminet, & ponti quem struxit Adrianus incumbit, descendimus, ut è fenestris ædiculæ, quæ pontem & Alexandrinam viam omnem perspicit, cominus reliquos præcedentium ordines spectaremus. Ibique cum arcis præfecto & Alfonso Antiocheno Patriarcha paululum morati, Græcum militem in expeditissimis equis primum omnium adventare aspiciamus. Ab hoc Germana omnis iuventus ea, quæ numerosissima, vel panificio, vel operibus aliis dedita Romæ degit, velutum armatura pulcherrime prædita processit, non sine omnium voluptate, qui priuatam eorum fidem & officium commendabant.

Hos inde subsequebantur Cardinalium clientelæ, singulæ in suas classes dispositæ, quas internumerosa Strigonienfis familia equorum generositate, amictus patrii vniformitate, gestaminum varietate, auri & argenti copia, quo non capita & colla, & pectora tantum insigniuerant, verum etiam equos eisdem ornamentis strauerant, spectaculum obtulit perquam delectabile. Inde Atrienfes minoris notæ, postea Gurcensis ipsius Tabellarii. Mox veterina iumenta cum sarcinis picturato stragulo superstrato, ab his eiusdem seruitia, famuli, clientelæque, (vti recensere potuimus) circiter quadringenti. Post hos illi procedebant, qui munus aliquod publicum gerunt, & amictu breuiori vtuntur, qui cancellarium aliquod opus curant, qui palatinis negotiis addicuntur. Inde scutigeri Palatini, mox viri præstantiores, qui vel auro honestati, vel monilibus insigniti Gurcensem secuti fuerant circiter centum. Inde principis ipsius equi aliquot præstantiores, quos præ ferocitate singulos ire necesse erat, & amplo satis interuallo distantes. Ab his Heluetii Pontificiæ custodiæ pedites, Italus etiam peditatus, inde Romana nobilitas cum pontificiis aliquot ministris, quique locupletiores curiam honorifico vestium & equorum sumpto decorant. Post hos Romani, qui urbicis regionibus præsident, vna cum scribis & aliis, qui munera vel publica vel priuata gerunt. Inde Oratores sociorum Ecclesiæ, Pontificique & Apostolicæ sedi addictorum, Placentini, Regienses, Parmenses, Bononienses, mox Urbis conseruatores cum senatore suo. Lictores inde pontificii sex, vna cum Imperiali nuncio. Præstantes inde viri opibus, nobilitate, militia, dominio, principatu, Pontificis necessarii, affines, & consanguinei. Mox Federicus Illustrissimi Marchionis Mantuani filius, acri vectus equo, & preciosissimam indutus clamydem, inde ceremoniarum Antistites, à quibus ipse Cæsaris Augusti Vicarius Illustrissimus in patriæ morem rogatus, inter eos, quos superius dixi, Præfules, equo vehebatur. Qui statim vbi marmoreum Adriani pontem inscendit, Præfectus arcis, nunc Angelicæ\* nuncupatæ, imperat ignem admoueri tormentis, quæcunque fuerant pro propugnaculis in hunc vsum comparata. Ecce vero primo flammis turres, & arcem omnem coruscant. Inde mugitus, & tonitrua vasta & horrenda statim exaudiri: tanto cum strepitu, tanto cum motu, vt non turres tantum quassarentur, verum solida ipsa moles Adriani concussa tremere vndeunque. Pons etiam ipse concuti, suburbanum & Vaticanus omnis contremere, quo strepitu perculsi subistere omnes, atque ipse in primis Gurcensis admirandus sublatis in molem oculis, rei nunquam prius

\* Castello  
S. Angelo.



in hunc vsum audita tenorem obstupescibat. Subsecuta statim tibicinum melodia quæ tuba ductili & quatuor tibiis intonata sonum omnium suauissimum reddebat. Ibi nos hominis effigiem non sine voluptate cominus ex proxima fenestra contemplari, omnemque corporis dignitatem mirifice commendare, mansuetudinem, atque prudentiam, quam oculis & fronte præ se ferebat, nunquam satis admirari; dexteris omnibus oculos salire, dum tuendo expleri nequimus. Interim acer & generosus equus, quem Federicus Marchionis filius regebat, eo strepitu consternatus, immo potius excitus vsque adeo ferocire cœpit, vt veriti sint omnes ne puerum vna secum in fluuium ex ponte deturbaret. Tam magnis, tamque iteratis saltibus attollebatur, tam erat freni contemptor. Quod nisi magnanimus puer ingenio rarissimus læuum calcar lateri appressisset, & in dexteram habenas leuiter deflexisset, perquam facile accidere poterat, vt tam festus, tamque iucundus dies in luctuosum & mœstissimum conuerteretur, vsque adeo egregia illa indoles ab omnibus & suspicitur, & adamatur.

Facta est inde nobis copia recensendi reliquos, dum in ipso ponte multitudinis frequentia, quæ visendi studio conuenerat, constipati lentius ire coguntur. Maxime vero spectabilis erat illustris Albertus Pius, Carporum princeps, & probitatis, & eruditionis columen; Cæsaris nunc ad pontificem Orator sapientissimus. Aderat & Joan. Fran. Picus Mirandulæ comes, vir omni doctrinarum genere absolutissimus. Cum his Andream Burgium Cremonensem agnouimus, virum in magnis negociis obeundis ætate nostra Clarissimum. Ac ne tibi sim tot Oratorum nomenclator; quorum singula paria Palatinus præsul à dexteris deducebat, Hispanos quippe, Burgundos, ac tertio loco Venetos, mox Mediolanenses, Florentinos, Senenses, Lucenses, ac Oratores reliquos quinque circiter & viginti, totidem Præsulibus comites adiectos enumerauimus. Antistitum inde mitratorum paria circiter quinquaginta, inde ordinum omnium numerosissimum equitatum. Dum interim hos recensemus & suauissimo tibicinum, qui ab arcis fastigio modulabantur, concentu delinimur, Gurcensis arcum, qui militari viæ superductus est, euaserat. Edicit igitur præfectus noster, vt ea tormenta, quæ per mœnia versus Leoninam urbem musica dimensione disposita erant, inflammentur. Ibique rursus immanem strepitum, clamorosa tonitrua, sed placidiori quodam rithmo exaudisses. Ad hæc arcis tubæ clangorem mirificum & suauissimum dedere, animos ad exultationem accendentes.

p.296 Fuerunt etiam ex Imperii clientibus, qui tormentis, & accensorum ignium illustratione (atra enim nox iam incubuerat) prætereuntem principem salutarent. Quid vero Crispe tibi de concursu dicam, quum viæ ab æde populari in Vaticanum vsque (quod spaciū, vt scis, in XX. ferme stadia, via lata porrigitur) tanta hominum vtriusque sexus, conditionis, & ætatis frequentia refertæ & constipatæ fuerint, vt singuli vix procedere interdum possent. Quin etiam fuerunt in aliqua vrbis regione viæ ita multitudine hominum obsessæ, vt declinandum ab instituto itinere fuerit, ne Pompa in totam vsque noctem traheretur. Per radices igitur Capitolini montis ad Cæsarianas ædes Vallenses Maximinas ire perrexerunt, à quibus in Floræ campum deflexerunt, recta inde in Vaticanum.

Vbi vero in Palatium applicuerunt, demissi ex equis, scalas & atria omnia Pontificiæ domus funalium frequentia, quæ noctem clarissime vincebant, illustrata vident. Gurcensis primo, mox Legati, & Oratores omnes, & magna vis nobilium, ingrediuntur ad Pontificem, quem in folio sedentem Cardinalibus aliquot circumseptum offendunt. Gurcensis itaque ter genu procumbens Sacrosanctæ simulachrum maiestatis pie veneratus est, admissus inde ad pedum oscula. Tum pontifex illi manum, mox faciem obtulit osculandam. Gurcensis inde vtroque genu posito aduentus sui causam explicuit, breui sed castigata oratione, cuius argumentum erat: *Se delegatum à Cæsare, vt omnino Christianæ Reipublicæ dissidia componerentur: bello, quod aduersus Apostolicæ sedis dignitatem tot annis gestum est, finis demum imponeretur. Principum Italicorum, Ciuitatum & populorum*



pulorum iura perpendere; abominabile schisma, quod pullulare ceperat, eradicaretur, & exustioni prorsus demandaretur. Ad hæc Pontifex, multum diuque aduentum eius, ob hæc eadem, se desiderasse respondit, eumque optatissimum ideo omnibus applicuisse, placere quod animi gereret, quod auctoritas Imperatoria ad hæc eadem accederet, quantum in se esset, ramis velisque omnia deducturum, quæque tanto rerum molimini oportuna forent, omni diligentia prospecturum. Hortari denique hominem, ut obuiis vlnis hæc exciperet, eoque animo, quem professus fuerat, persisteret. Futurum sperare se, ut res tranquillo adeo statu sedarentur, ut (quod bonum faustumque sit) vniuersa Respublica Christiana quieti, & honestati sua quam primum restitueretur.

Surrexit ab his Princeps, adsistensque à læuo Pontificis latere, tantisper cum eo familiariter locutus, dum Oratores reliqui, & vniuersa nobilitas, quique inde voluerunt, Pontificios pedes osculati sunt. Mox Gurcensis à singulorum Cardinalium amplexu & osculatione pia digrediens, eodem quo venerat comitatu, numerosissima funeralium vi addita ad Jordanum montem, vbi paratum erat hospitium, ire perrexit; cui aduenienti præfectus noster eundem tubarum, tibiarum, & tormentorum applausum dedit, quem antea transeunti præstiterat. Quumque sub horam noctis tertiam ad ædes peruenisset, vniuerso comitatu salutem dixit, & gratias egit. Illi domum reuertuntur: hic discubium accedit. Reliquum est, ut spes & expectatio hæc tranquillitatis, quam omnes optimam super eo conceperunt, euentu non irritum quamprimum elucescat, quæque tam aduersis tempestatibus vexata nauis est in vado, duabus anchoris firmetur. Nam quantum ad hominis prudentiam spectat, ipse eam optime nosti, quum superioribus diebus de negociis pontificiis secum ageres. Nos hic ex prima facie magnum nescio quid, & omnibus æque commodum auguramur. Vale. Valemus nos quoque, quibus apud Jo. Fran. Roborem præfectum benignissimum bene est. Bembi, Marosticani, & Augusti nomine plurimum salutaris. L. Bonfilius, Academiæ totius desiderio adhuc abest, ac vtinam quamprimum aditis animæ carissimæ. Interim tu vale atque etiam. Romæ. Ex Adriani mole. VII. Id. Nouem. M. D. XII.

PANEGYRIS R. D. MATTHEI EPISCOPI GURCENSIS, PER JANUM FRANCISCUM VITALEM PANORMITANUM. p. 297

C. SYLVANUS GERMANICUS.

*L*onge decus patriæ non paruum, maxima dum te  
 Missum à magnanimo Cesare Roma capit,  
 Quo fueris plausu, quanto susceptus honore,  
 Hoc Boreas illinc nouit & inde Notus.  
 Altus Apollo vetat non talia scire nepotes,  
 Dignus in æternum viuere vester honor.  
 Dimidium sæcli vix hunc memoraret honorem,  
 At nunc perpetuus carmine fultus erit.  
 Te quoniam Vates numeris pia vota receptant,  
 Eripitur morti fama decusque tuum.  
 Inter & excelsos Vates Vitalis honorem  
 Vestrum iam fecit carmine perpetuum.



DE HONOR. MATTH. LANGIO, EPISC. GURC. ROMÆ HABIT. 579  
 FRAN. MARI GRAPALDI CLARISSIMI  
 POETÆ LAUREATI.

*SUB Jove nonne Aquila est? nonne Esculus? utraque iure  
 Num iuncta? utramque protegit aura Jovis.  
 Qua narrata diu tandem stant fœdera JULII  
 Caesaris, atque Jovis, mundus in imperio est.  
 Sic tu JANE tuo Vitalis carmine Quercum,  
 Longum, Aquilam, Imperium vivere posse facis.*

HIERONYM. ANGERIANI DE-  
 CASTICHON.

*L*asciua dulcis Pelignus Naso Camœna,  
 Andinus docto dulcis Ore Maro.  
 Arte lyrae dulcis Venusinus Oratius, arte  
 Plectrorum vates dulcis Umbro erat.  
 Carmine quem genuit dulcis Verona Catullus,  
 Dulcis Romanus voce Tibullus amans,  
 Ipse sono dulcis Papinius, inclita cuius  
 Natali, studiis Parthenopæa tumet.  
 Dulcior his certe es Vitalis docte, Camœna,  
 Ore, lira, plectro, carmine, voce, sono.

OCT. SYLVIVS LAURELIUS.

*L*audat tam bene Casarem, atque Julum  
 Suavis, delitiosus hic Panormus  
 Vitalis, pater elegantiarum,  
 Et doctus, facilis, Deique plenus,  
 Vi tantam mereatur inde laudem  
 Suis carminibus bonus Poeta.  
 Quantam carminibus suis, Julo,  
 Gurcensi tribuitque, Cesarique  
 Hunc lector longe nobilem libellum.  
 Oblectat placidus poeta mentem,  
 Oblectant animos modi legentum.  
 Hunc lector lege nobilem libellum.

P. B.

*V*italis meruere diu, at nunc vivere semper  
 Carmina, æternis æqua prope imperiis.  
 Namque alias laudem tu ex te, at nunc accipis ex re  
 Nec plus das laudis quam datur inde tibi.  
 Jure igitur factis magnis verba æqua dedisti,  
 Qui volet æternum vivere, digna canat.

HIERONYM. VITALIS NEAP.

*N*on tantum hospitio letata est aurea JANI  
 Roma triumphalem conciliata Deum.  
 Carmine quam JANI VITALIS clara Panormus  
 Gaudet, æst fœtu terra beata suo.



*Bis geminos oculos gemina ille in fronte gerebat  
Janus, sed plus hic mente videre valet.  
Ille tenet baculum, tenet hic in carmine sceptrum,  
Ille anni clauas, hic Helyconis habet.  
Quam bene te Janum Vitalem nomine dicunt,  
Carmina nam vitam post tua fata dabunt.*

## PETRUS FOEDERINUS RO.

*UT miris peragrat Vates Helycona choreis  
Miror, & Aemonium quam bene flestat equum.  
Mollia Pipleides Cirrheo labra liquore  
Tinxere, & Vati laureaserta ferunt.  
Sulmo sui merita gratatur laude perennis  
Nasonisque opifex Umbria Callimachi.  
Ausonia exultat Vitalis laude Panormus  
Quod sibi Pierius venit ab ore calor.  
Arctos aque modulari compulit astrum,  
Tot laudes plectro concutiendo chelyn.  
Delectat Vitalis opus ceu pollice primo  
Lecta foret, rubeo tecta colore rosa.*

R. D. MATTHÆO LANGIO, EPISCOPO  
GVRCENSI CÆSAREÆ MAJESTATIS VICEM  
GERENTI ORNATISSIMO, JANUS FRANC. VITALIS  
PANORMITANUS S. P.

Cuiusque optimi, ornatissime Præsul, censuram euitare non possem, si tanta exercitationis genera audaci adolescentiæ morem gerens hoc opus imprimi non erubuissem, & tibi omni bonarum artium disciplina exultissimo dedicare, nisi ea me defensarent, intestinus videl. quum omnium probatissimorum, tum maxime erga te mens & amor & honor. Nemini enim in obscuro est, te animi imperio, corporis vires absolutissima virtutis luce ductum disponere ac moderari. Quæ omnia si particulatim nunc enarrare velim, non modo ego tanto ponderi imperasse viderer, at ille Arpinas eloquentiæ pater. Quibus ommissis satis sit ad excusationem me non laude, non lucro, non temeritate has nugas lussisse: verum ut animi mei gaudium à tot virtutibus excitatum testificarer. Præterea quum pace nonnullorum hac in miserrima tempestate in fidei nostræ interitum omnes fere conspirare videantur. Tu autem, ut bonus es: boni & æqui consule: & hæc (licet puerilia) eo animo, quo sunt data, suscipere dignator. Vale, nostri memor. Romæ. Tertio Idus Nouembris M. D. XII.

JANI FRAN. VITALIS IN PANEGY-  
RIM PRÆFATIO.

*Sunt quos cornipedes, canes, auesque  
Delectat volucres fouere, & illi  
Pingues montibus insequuntur altis  
Damas, hi cupidi sequuntur aurum.  
Secum, fulmineos equos, canesque  
Secum, secum habeant aues volucres,  
Damas opposita sequantur hasta.*



Non talem cupido decorem, & illis  
 Diues muneribus frui, rapit nam  
 Fortuna hoc facili modo bonum, nec  
 His parcunt celeres bonis sorores.  
 Phoebus non trepido sequendus ore  
 Sit dux, sit dominus mihi, sit auspex,  
 Hoc fiant cineres mei decori  
 Vnguento, & facilis sequendo sit hic.  
 Ergo mellifluis ades camœnis,  
 Et pandas graciles Apollo musas  
 Et pandas numeros Apollo dulces.

PANEGYRIS R. D. MATTHÆO LAN-  
 GIO, EPISCOPO GURCENSI CÆSAREÆ  
 MAJESTATIS VICEM GERENTI  
 EXCULTISSIMO.

*C*æsareas iterum gentes, gratamque tonantē  
 Progeniem, ramis condit tibi quercus opacis.  
 O tandem gratare tuis generosa tropheis  
 Roma iterum, vindex Heroa ē stirpe camillus,  
 Ortus ab Hesperia pepulit fera praelia, qui nunc  
 Magnanimo Liguris latitat sub pectore JULI.  
 Hostia septeni superas fluitantia Nili  
 Albula, tu Gangem vincis, fluctusque Tymani,  
 Tu celerem Tygrim, rapidum Symœnta, & Araxis  
 Impetum, & auratas qui fert Pactolus harenas,  
 Victus honorato sequitur tua flumina riuo.  
 Et maior titulis nunc aurea Roma superbis  
 Efficitur, sublime caput super æthera tollens,  
 Sub Julo æternos rursus visura triumphos  
 Gaudet, & aurata rutilant in fronte corona,  
 Qualis quum roseo compellat mane colore  
 Aurora & curui gaudet liquisse mariti  
 Pulchra thorum, dulces alio questura lepores:  
 Talis perdomitis latatur Roma tyrannis,  
 Quæ Rhodanum, quæ Arabas olim disiecit, & Indos  
 Sub iuga Cæsarei totus se tradidit orbis  
 Imperii, Cilices arisque deisque superbi,  
 Ditia victrici dederunt sua munera Romæ.  
 Ecce iterum Gallos eiecit Roma rebelles,  
 Atque iterum Latia sub maiestate tenentur,  
 Armigeros quondam quos perdomuere Quirites,  
 En tibi Meonii bacchantes prada resurgunt,  
 Magnanima aduersos gestantia pectora Thyrsos,  
 Quæ rabie rigida furibunda mente trabuntur.  
 Sed quis rumor adest, princeps quo vulgus oberrat,  
 Quo proceres Latii? cui pegmata celsa parantur?  
 Obsitaque egregie testantes regna tabellæ?  
 Chara DEum soboles & nostri cura Tonantis,  
 Cæsarei Imperii spes vna & sola carina  
 Occurrit lassæ, cuius virtute procellas,



Oceanus mulcet tempestatesque serenat,  
 Cuspide Mars, Phœbus Cythara, Cyllenius ore.  
 Alter olympiaco merito decoratus honore  
 Emicat, & serpunt tres circum clara corona  
 Tempora; grandiloquos tutatur prima poëtas,  
 Altera magnanimis ducibus fauet, altera cælum  
 Respicit, occultos monstrans super astra meatus,  
 Religionis opus, primasque acquirere sedes  
 Edocet, & superas qua possis scandere ad arces,  
 En meus ingreditur Latium dux maximus armis.  
 Atque togæ, hunc sequitur procerum concordia diues,  
 Purpureique patres, & candida turba potentum.  
 Auratis tortisque comis venere Sycambri:  
 Æthiopes nimio nigrantes sole sequuntur:  
 Pannonii hinc alacres frenis, phalerisque decori  
 Conspiciuntur equi, spumis maduere lupati.  
 Tympana pars tundit, Buxos pars inflat inanes,  
 Horrisonusque fragor volitat per amica tubarum  
 Sydera, Meoniis fumat & plausibus æther.  
 Talis Germanis venit Gurcensis ab oris  
 Cæsaris auspicium, talesque sequuntur onantes  
 Hunc Latii proceres, vultu nitet altus eburno.  
 Augusti imperii custos fidissime salve,  
 Salve chara DEum proles, rectura per æquor  
 Carbasa Clauigeri tandem, cui nomen utrumque  
 Principis & Vatis merito memoranda dedere  
 Facta, sub auspiciis cuius secura Poëta  
 Credunt vela mari Zephyris adiuta secundis.  
 Mens fugit Herois laudes scriptura decori,  
 Et superat genus hoc semper fulgentius æstrum  
 Scribentis, quantum ceu quum ditatur auarus  
 Diuitiis, tantum sit pauper sæpius auro.  
 At tu seu Vatum fauor es, seu cura deorum,  
 Seu Phœbum splendore refers, cytharaque sonanti,  
 Non mortalis adest vultus, color ipse sed alnum  
 Purpurei radii testantur tempora circum.  
 Denique ni Samie fallamur dogmate rhetæ,  
 Quæ tua nunc anima est, fuerat iam Cæsaris, artus  
 Ingressa æthereos, & numina tanta decori  
 Principis Italiæ conseruatura quietem.  
 Oceanum interea dum collapsura reuifunt  
 Sidera, dumque canis respondet montibus Eccho,  
 Semper honos, nomenque tuum, laudesque manebunt.  
 Namque tua gaudent sub tempestate Poëta  
 Laurigeri, quorum est mortales rumpere nodos,  
 Et freta secura turgentia rumpere classe.  
 O facile ingenium priscos imitantis honores,  
 O faciles animi generoso in principe, & ingens  
 Progenies calamos sacri victura Maronis,  
 Prisca tamen patria tutores secula iactant.  
 Qui periere armis, & honoro Marte, Quirites  
 At tu non armis, nec Martia templa reuifis  
 Cadibus infandis miserorum aut morte triumphans;



*Sed præfers tantus sanctissima dona Minerua,  
Cuius honorati fragrant fronde triumpho,  
Hæc hæc magnanimo laus est in principe. Salve  
Candida pax, cuius licuit fœdare decoram  
Vlli unquam faciem summoque cupita tonanti  
Quum superas voluit cœlorum scandere sedes,  
Et zonas vexare poli fera turba Gigantum,  
Tu furor euictis manibus post terga, dolique,  
Et rabies furibunda manus connexa sequuntur;  
Denique fidus amor circum, Jusque omne fidesque.  
Et pietas graditur, post hos concordia ramis  
Palladiis ornata petit dextram atque capillos.  
Et tecum Italia qui maxima facta labante  
Egit adest, venerare ducem, venerare deorum  
Progeniem, qua nil dum lumina candida fundit  
Phœbus, ab Eois spectat iucundius oris.  
Et vos ô Latii facunda caterua Poëta,  
Quos decet excelsum Musarum scandere montem;  
Et iuga Parnassi subter labentia opacis  
Flumina speluncis, riuosque haurire decoros.  
Hoc opus est vestris calamis & dignius altis,  
Ast ego (dum tenues seruabunt molliter auras  
Fata) tuos quacunque canam sub voce Triumphos.  
Arma canant Vates alii, seu mollia molles  
Facta viri Veneris tenerosque Cupidinis arcus.  
Tu mihi materies, numenque, decusque, canendi  
Aduenis, & nimias nostro de pectore curas  
Pellis, anhelanti requiemque imponis anena.*

HYPOTHESIS SEQUENTIS CARMINIS,  
PER BEATUM RHENANUM.

*Imp. Cæs. Maximilianus Augustus Patavina Urbis obsidionem (qua  
nulla ab hinc ducentos annos potentior memoratur) ob instantem brumam relinquere  
coactus, cum magna vi cataphractorum & levis armatura militum Vicentiam  
venit, ubi pro foribus delubri hoc carmine à Hieron. Nogarolo Co-  
mite salutatus est.*

HIERONYMI NOGAROLI COMITIS,  
AD SACRATISSIMUM MAXIMILIANUM  
CÆSAREM SEMPER AUGUSTUM, PRO VICEN-  
TINIS ORATIO HABITA.

*SI nostra natura parens tribuisset in uno  
Corpore nunc urbi te coram assistere Cæsar  
Posse, animumque tibi deuotum pandere aperto  
Pectore, venisset Vicentia tota serenam  
Hanc faciem spectare tuam, spectare verenda  
Maiestate oculos, & tanti principis ora,  
Ora tot egregias animi testantia dotes.  
Denique conuulsis properasset sedibus ultro  
Secum tecta trahens urbs ipsa, hominesque tueri,  
Te sydus numenque suum, te corde fateri*

*Aduenisse*



Aduenisse deum populis, quo vindice ab Orci  
 Faucibus, & tandem dominatu erepta superbo  
 Libera, tranquilla sub Cesare pace fruatur.  
 Quis ego pro meritis quasnam tibi maxime grate  
 Induperator agam? quoniam persolvere nostra  
 Non opis est, quæ digna satis præconia fame  
 Incipiam memorare tuæ? Thrasibulus honores  
 Æternos meruit, clarumque in secula nomen  
 Terdenos una dum pellit ab urbe tyrannos  
 Palladia; Tu pressa graui florentia centum  
 Oppida seruitio, clarasque tot eximis urbes  
 Exoluisque iugo, magnum tibi quinque tulerunt  
 Bella exhausta decus, iuuenili Marte Batauos  
 Dum Morinosque domas, victoque Eburone cohercet  
 Nunc etiam intacto gaudentes crine Sicambros,  
 Et modo fraterno iunctos tibi fœdere Gallos.  
 Accessit sed nulla tuis hac gloria maior  
 Rebus, in Italiam postquam felicia transfers  
 Signa, diuturno quæ tanquam oppressa veterino  
 Hactenus abs te oculos excita attollere tandem  
 Incipiet, priscumque decus reparare vetusta  
 Militia, cuius duce te documenta resurgent  
 Antiquum in morem, qui munia cuncta latini  
 Martis obis, valido seu robore militis uti  
 Siue opus est virtute ducis, mitissimus vnus  
 In castris acieque ferox; à milite differs  
 Non epulis cultuque nouo, sed pellibus algens  
 Fertur hyems, æstusque pari sudore, locandis  
 Nemo magis solers castris, nec callidus hostes  
 Ludificare magis, vel idonea tempora pugna  
 Eligere, instruere atque acies, circumdare clausas  
 Obsidione urbes, tibi nec castrensia sordent  
 Munera, pro signis sed stare gregarius abs te  
 Miles habet quæ exempla petat, speculariter hostem,  
 Sorte agere excubias; nec vallum ferre recusas.  
 Primus inire manu bellum, postremus abire,  
 Indulgens aliis, parcus tibi, commoda præfers  
 Quando aliena tuis, nec solis artibus ingens  
 Tutaris bellum imperium, sed consulis illi  
 Multiplici exemplo virtutum in pace tuarum.  
 E quibus illustri super æthera vertice surgunt  
 Tergemine imprimis, merito ter maximus vnde es:  
 Largus opum, clemens & seruantissimus equi.  
 Quo nec Alexander, nec se tibi comparet ipse  
 Julius, & iusta Traianus lance secundus  
 Sit tibi, summa deum cuius sub pectore virtus  
 Descendens Astrea polo sibi legit amicum  
 Hospitium, tutamque rata est se credere terris,  
 Quæ tibi sola via est, quæ tanti causa laboris?  
 Per gelidas alpes ut summo à margine Cymbri  
 Littoris in Latium tendas, ubi vindice dextra  
 Restituas leges, oppressaque iura vocanti  
 Jampridem misera Ausonia, vim vique repellas  
 Et reddas sua quæque suis, orbique iuuando



Impendas quam possis opem, quibus itur ad astra  
 Pro meritis. Neque enim reges quique alta gubernant  
 Imperia, & quibus est dominandi admissa potestas,  
 Rere ad delitias, rere ad sua commoda natos;  
 Sed vigilem ad curam populorum vrbesque tuendas  
 Ad commune bonum, sed egena ad munia vita.  
 Sic adolescentis capiebat origine mundi  
 Regna inuitus, habens oneri diademata & ingens  
 Pondus aui, quanto vix tot paterentur honores.  
 Tunc aliis melior, tunc qui sapientior ibat  
 Rex, non cuncta putans sibi sed se viuere cunctis.  
 Hic tibi mos antiquus adest, cui nulla laboris  
 Meta, nec assidue requies admittitur aura,  
 Imperio dum luce vacas oriente, cadentem  
 Ad solem, dum magna geris, maioraque gestis  
 Concipis, eternis celebrari digna camœnis:  
 Quas animo, quas mente foues, & pectore quarum  
 Cultores tu cultor amas, & honoribus auges  
 Diuitiisque beas, O terris numen amicum,  
 O summi pietate Jouis lecte arbiter, à quo  
 Pendet nostra salus, cœlo venis auspice, cœli  
 Consensu, & nulla potes hinc ratione negari  
 Missus adesse Deo, licuit cui sanguine nullo  
 Vincere, & hostiles sine milite fundere turmas:  
 Portarum cui sponte patent ingentia claustra,  
 Et validae turres, cui ferrea mœnia cedunt  
 Fossarumque mora. Nunc ô nunc incluta tellus  
 Itala iamdudum variis agitata procellis  
 Continget placidum superato turbine portum,  
 Et prisco illustres reuocabit honore triumphos,  
 Tollet Roma caput, & te moderante redibunt  
 Aurea felici Saturni secula mundo,  
 Quorum nostra tibi Vicentia dedita nuper  
 Se quoque participem sperat fore, nomine cuius  
 Te dominum prout veneramur rite, tuumque  
 Numen adoramus, & clauas tradimus urbis:  
 Immo animos ipsamque tibi cum ciuibus urbem  
 Commendamus, ut immunis sub principe largo  
 Viuat, & immodico iam vectigalis iniqui  
 Fasce sub arbitriis aliorum exhausta leuetur;  
 Quæque tue ditionis erant atque oppida iuris  
 Accipiat, maneantque suo cum corpore membra  
 Nec minus antiquis sancita aut pacta tabellis  
 Seruenturque indulta ducum, Regumque priorum,  
 Qui solium tenuere tuum, si nostra fauebant  
 Vota tibi, si fixa animis domus Austria nostris  
 Semper erat, si nos tenuit reuerentia sacri  
 Imperii, Adriaco quamuis parere leoni  
 Vicinam tulerit fortuna volubilis urbem.  
 Quæ subiecta prius vobis, & in are locata  
 Casareo, primos tam lata recurrit ad ortus,  
 Tamque libens Aquila sub signa reuertitur alme,  
 Quam nec mens valeat complecti & lingua profari.



*Auctaque, suae olim Cimbrorum à gente vetusta  
Condita, Germanae gratatur origine gentis,  
Adiungique suis quamcunque subire paratam  
Fortunam, pariter seque in tua Brachia condit  
Atque fidem tibi perpetuo dicat optime Caesar.*

*Sebastiani Murrhonis Junioris Colmariens. ad Lectorem Car-  
men tumultuarium.*

*Cæsareum quanto legatum exceperit ille  
JULIUS hic paucis docet honore liber.  
Cui tandem optatae referenti munera pacis  
Obuia se totam Martia Roma tulit.  
Imprimis, tenues quis circum tempora vitæ  
Dependent, sancti turba verenda patres.  
Hinc etiam antiqua Romani gente superbi  
Sub quorum Imperio terra fretumque fuit.  
Et Germana cohors Scythici Mauortis alumna  
Affuit, elato conspicienda gradu.  
Hac si Gurgensis pompa fuit urbe receptus  
Orator tantum Caesaris ecce sacri:  
Ne dubita, veteres renouabit Roma triumphos  
Aduentu Caesar MAXIMILIANE tuo.  
Marmoreum statuent arcum tua membra Quirites  
Inscriptum auratis talia verba notis.  
Hac egit victos Capitolia ad alta Bohemos  
Austriaca Caesar gloria vera domus.  
Hac Celtas, Morinosque, & torto crine Sycambros  
Attritos duro colla superba iugo.  
Hac etiam Venetum posita feritate leonem  
Tarpei duxit sub pia templa Jouis.  
Tu modo ne voto Caesar frustrere Quirites,  
Sed iamiam videat te tua Roma suum.*





**JO. CUSPINIANI**  
**DIARIUM**

DE  
CONGRESSU MAXIMILIANI  
ET  
TRIUM REGUM.

**RICARDI BARTHOLINI**  
**HODOEPORICON**  
**MATTHÆI GURCENSIS**  
**EPISCOPI.**





LECTORI SALVTEM!

BURCARD GOTTHELF  
STRUVE.



Ohannes Cuspinianus anno Christi M CCCC LXXIII. natus, Sueinfurtum, \* Orientalis Franciæ nobilem urbem, patriam habuit. Comparatis per ingenii felicitatem scientiis, maius augmentum additurus, in Academiam Viennensem, tum ob mathematica, potissimum ob humaniorum artium studia celebrem, concedebat. Ibi Conradum Celtem nactus fuit Præceptorem. Anno M D II. Imperatoris Maximiliani I. iussu, Joanni Stabio, Mathematico & Poëtæ claro, præmissa poëtices commendatione, lauream, pro maxima doctissimorum hominum concione, solenniter conferebat. Eiusdem Imperatoris deinde Consiliarius ex civibus Academicis lectus, in Hungariam, Bohemiam & Poloniam Orator missus, per duodecim annos continuos, in difficillimis rebus se virum præstitit. Plurimis legationibus (quarum viginti quatuor intra quinquennium solum in Hungariam suscepit\*\*) feliciter defunctum Maximilianus Imperator cum Senatui, tum etiam, in Conradi Celtis locum, anno M D VIII. Cæsareæ Bibliothecæ Viennensi præciebat. \*\*\* De quo Petrus Lambecius: \*\*\*\* *Ceterum mortuo Conrado Celti successit in administratione Bibliothecæ Cæsareæ discipulus ipsius Joannes Cuspinianus siue Spieshamer, Sueinfurtensis, relictis ingenii monumentis clarissimus, cuius consilio & opera Imp. Maximilianus I. qui eum Consilarii atque Historiographi sui titulo, & insuper Præfectura Senatus Vindo-*

\* Male igitur ipsum Viennæ natum dicit Girol. Ghilini *Theatro d' Huomini Letterati* p. 81.

\*\* Sic enim ipse Cuspinianus in præfatione huius Diarii: *amore tui omnia elegi, quæ & vidi, & quibus interfui. Quinque enim annis (ut scis) voluo hoc saxum, quibus vigesies & quater in Vngariam orator iui, atque hac negotia tractavi.*

\*\*\* Sic Nicolaus Gerbelius in litteris ad lectorem anno M D XL. scriptis, quas Cuspiniani de Cæsaribus Operi præmisit: Ex quo sua hausit Melchior Adami in *vitis Philosophorum* p. 33. & Mart. Hanckius libro II. de *Script. Rer. Roman. P. I. Cap. XVI.* Videri etiam de eo post Henricum Pantaleon *prosopographia* parte III.

\*\*\*\* *Comment. de Bibl. Cæsar. lib. I. num. XXXVI. p. 32.* qui etiam *lib. II. addit. XV. p. 1011.* ipsius Epitaphium adducit, quod Vindobonæ in Sacello quodam Ecclesiæ Cathedralis S. Stephani reperitur.



Vindobonensis ornauit, in difficillimis negotiis usus est, adeo ut sæpe in multam noctem de grauissimis Imperii rebus cum eo collocutus sit. Tanta enim præter eximiam facundiam in Cuspiniano fuit prudentia, & fides, & tenacitas silentii circa res arcanas, ut vigilantissimus Imperator fidissimo illius pectore reconditissima quæque tuto committere potuerit. Quare etiam adeo clementer, adeo mansuete ipsum complectebatur; ut sæpe in multam noctem cum eo de negotiis Imperii, de rebus secretissimis collocutus sit, plane, ut erat mansuetissimus Princeps familiarissime.\* Anno M D XV. in consiliorum partem quorum gratia Reges Vladislaus II. Hungarorum, Ludouicus I. Bohemorum, Sigismundus I. Polonorum, ad Maximilianum I. Imperatorem Viennam conuenerant, Cæsaris Orator adsumebatur. In hoc ipso igitur Diario celebratissimi Trium Regum cum Maximiliano I. Imp. Conuentus, qui in XVI. Julii M D XV. incidit, Historiam & quidem ea saltim scribit, quæ ipse vidit, quibus interfuit. Qua ratione vero ipse ante Conuentum istum missus fuerit in Hungariam, testatur Nicolaus Isthuanus, \*\* dicens: dum de his Vladislaus anxio animo consultat, oportune Budam venit missus a Cæsare Johannes Cuspinianus tum victoriam de crucigeris agrestibus partam gratulaturus, tum ut de mutuis foederibus, propinquitatis vinculo confirmandis, cepta iam pridem superioribus annis per Johannem olim Episcopum Varadiensem consilia atque pacta bono fine terminaret. Petebat autem Cæsaris nomine, diem & locum colloquio designari, ad quem ambo conuenirent, remque transactam quidem, sed tot annis intermissam finirent. Hinc idem Isthuanus conuentum ipsum describit. De eodem testatur Pontus Heuterus, \*\*\* dum ait: de hinc Regum amicis ac Consiliariis, Cæsaris nomine, per Joannem Cuspinianum Historiographum (qui huic conuentui, Oratoris munere Cæsari fungens, adfuit, singularique libello hæc accuratissime descripsit) dona sunt allata. Integrum vero hoc negotium his verbis complectitur Gerhardus a Roo: \*\*\*\* Hoc rerum statu Imperator, uti Rem Austriacam vicinorum regum foederibus & affinitate aliqua constabiliaret, Joannem Cuspinianum in Hungariam ad Vladislaum regem misit, qui nunciaret, ob nec opinatum Gallorum regis obitum, & Caroli Nepotis, annos jam tutelæ egressi, res, dubiosque Heluetiorum motus, non fuisse ipsi integrum, uti ad expetitum cum illo & fratre illius Sigismundo Poloniae rege colloquium veniret, quare producendum esse tempus, quoad maiori rerum mole sese expedire posset. Vladislaus ea de re fratrem per celeres nuncios certiore fecit. Ad finem Martii cum Gurcensis Cardinalis a Cæsare in Austriam venisset, reges Posonium conuenire, quo & ille profectus, ea quæ in mandatis habebat cum ipsis agit, reliqua in aduentum Cæsaris dilata. Memoriam proditum est, Matthiam quendam Mechovitam Astrologiam peritum, Sigismundo iter ingredienti, affirmasse, non futuram Cæsaris videndi copiam ante Julii medium. Id præscientia quadam siue diuinandi aut coniectandi solertia dixerit, nouerint alii; rei eventus verum comprobauit. Multis enim legatis ultro citroque missis, postquam Gurcensis ipse magnis ad Cæsarem itineribus venisset, is Oeniponto literas ad reges dat, venturum se propediem, orare uti moræ tedium patienter ferant. Tandem præmisso iterum Gurcensi cum aulicis aliquot satrapis, ad sextum Idus Julii Viennam ipse venit. Postridie auditi sunt Regum legati,

E e e e 3

quos

\* Hæc verba sunt Melch. Adami c. I. Hinc etiam Gerh. a Roo. Hist. Austr. lib. VIII. p. 289. inter doctos sui temporis quos maxime coluit, fuisse: ex historiarum & antiquitatis inuestigationibus, Joannes Cuspinianus summa dignitate ab eo auctus.

\*\* Histor. de Rebus Vngar. lib. VI. pag. 77.

\*\*\* Rer. Austr. lib. VII. cap. XI.

\*\*\*\* Rer. Austr. lib. XII. p. 595.



quos inter strigoniensis præsul, de bello Turcis inferendo, & ad hoc necessaria principum necessitudine, verba fecit, cui Cæsaris iussu respondit Petrus Motta Hispanus, eloquentia insignis. Legatis dimissis, Cæsar ex suis ad reges mittit, qui eos, uti Viennam ad ipsum veniant, inuitarent. Id cum facturos esse audiuisset, Cæsar cum splendidissimo comitatu, ad quintum ab urbe lapidem, obviam illis progressus, in arce Trautmansdorffia pernoctavit. Postridie reges, quorum Sigismundus eam noctem Hamburgi, frater ponte ad Leitham egerant, ad Cæsarem perrexere, jam arce egressum. Atque ita tres potentissimi Principes, cum suo quisque comitatu, in apertis campis convenere, ubi Maximilianum in hæc verba orsum fuisse memorant: Hæc est dies, quam fecit Dominus, exultemus & lætemur in ea; moxque intulisse Sigismundum: Faxit DEus hunc nostrum conuentum reipublicæ suæ salutarem. De hoc illorum congressu, totaque serie plura qui scire volet, Cuspinianum & Richardi Barusini itinerarium adire poterit, nos rei summam persequimur. Diem proximum, quo Viennam ingressi sunt minus celebrem fecit pluvia, quæ levis primum, deinde intentior fuit. Nihil tamen honoris festæque lætitiæ omissum est. Aliquot inde dies colloquiis & consultationibus dati. Erant Vladislao regi ex Anna Gandala (illustris ea in Vasconibus familia est) liberi Ludovicus & Anna. De his ita inter ipsos convenit, uti ambo Austriacis illigati nuptiis, perpetuæ pacis amicitiaque fœdus confirmarent. Sunt qui Vladislauum filia coniugium Cæsari prius obtulisse affirmant, eumque respondisse: auditum sibi aliquando ex parente Friderico; principi ætate proVecto, mitius non posse adferri mortem, quam si ei iuvencula conjugetur. Itaque consultius videri, uti Anna nepotum alteri collocetur. Ad decimum Calendas Augusti, qui dies publicæ sponsalium confirmationi dictus erat, Maximilianus utroque rege præsentem, Anna Coronam Auream imposuit, & florenti ferto ab ea donatus est. Hinc ad D. Stephani itum est, ubi peractis sacris, verba præeunte Strigoniensi, Anna, accepto in fidem annulo, ita Maximiliano desponsa est, uti intra annum aut Carolo aut Ferdinando conjungeretur. Dein Ludouico Maria Cæsaris neptis, præsens ipsa desponsa est, lacrymas ubertim fundente Vladislao. His peractis, ducenti Viri militari dignitate donati sunt. Inde ad epulas, ludosque equestres, & choreas discessum est. Per eosdem dies pax & fœdus promulgatum, ex quo maximæ provinciis illis & regnis commoditates redundarunt, imprimis vero Austriacis Principibus, ad Hungariæ Bohemiæque regna stratus est accessus: nam undecimo anno post, Ferdinandus, qui Annam duxerat, Ludouico ad Mohacium oppidum a Turcis cæso, utrumque regnum, ex fœderis & matrimonii jure, adeptus est. Post sponsalia rite celebrata, Imperator & Polonus, Hungarum Neapolim Austriæ deduxere, inde Viennam reversi; paucis post diebus in regnum hic, ille Egenfurtum ac Lincium abiire.

Testatur de eodem quoque in Sylua sua Jo. Dantiscus quæ infra sequitur, dum canit:

Venerat huc etiam doctorum clara virorum  
Concio, de quibus huc a Cæsare missus ad istos  
Cuspinianus erat Reges orator, abunde  
Doctus, & in variis versatus rebus agendis,  
Phillyrides certe vel nostro tempore Chiron,  
Et medica fertur præstans ut in arte Machaon,  
Tam bene languori vario, morbisque medetur.

Eundem quoque in epistola sua commendat Caspar Vrsinus.

Subsequitur RICARDI BARTHOLINI Hodoeporicon Matthæi Gurensis. De hoc jam supra dictum fuit, quod negotiis maxime arduis, Gallicis



Gallicis potissimum & Italicis fuerit adhibitus. Descripsimus etiam ipsius introitum Romanum sub Julio II. Papa. Postquam autem Julius II. Februario mense 1513. esset defunctus, coram Leone X. Papa Imp. negotia gessit controuersiam cum Venetis Papæ arbitrio relinquens, \* tali titulo vsus *Matthæus S. R. E. Dyaconus Cardinalis S. Angeli, locum tenens generalis & Procurator Serenissimi & Excellentissimi Domini D. Maximiliani Romanorum Imperatoris electi semper Augusti*. Inde ipsius potissimum ope pax inter Imp. atque Venetos fuit conclusa. \*\* Reuocatus ex Italia, ad negotia Hungarica & Polonica fuit destinatus. Missus igitur cum pleno mandato ad Vngariæ Regem Vladislaum, \*\*\* vt extremam manum imponeret negotio, quod animo conceperat Maximilianus de adfinitatibus cum Vngariæ Regibus contrahendis, prout sub initium Diarii sui exponit Cuspinianus. Hæc igitur singula in hoc libro plenius exponit Richardus Bartholinus, Perusinus \*\*\*\* Poëta. Hic etiam Austriados libros XII. siue bellum Noricum ob Georgii diuitis, Bauariæ Ducis hæreditatem gestum, scripsit. His autem, quæ describit gestis, testis idoneus interfuit: Sic enim de eo in Diario suo Cuspinianus: *fnito officio Richardus Perusinus, Reuerendissimi Cardinalis Gurcensis Capellanus dicere incepit, vt est eloquentissimus, sed strepitu nobilium, quia audiri non potuit, in medio destitit. Hic etiam tribus libris, quos Odeporicon vocat, conuentum hunc celebravit.*

Sic etiam Jo. Dantiscus in Sylua sua huic Hodoëporico inserta, ita canit:

Exin

*Appulit Hetrusco Riccardus sanguine cretus,  
Grandia qui cecinit Romani Cæsaris acta  
Egregius vates, tum notus primitus, & tunc  
Sæpius humana mihi consuetudine iunctus.*

Hoc autem Hodoëporicon in duos libros distinxit. Præmissa est Jo. Dantisci, Poloni, \*\*\*\*\* qui eo tempore Sigismundo Poloniae Regi erat a secretis, demum Warmiensem obtinuit Episcopatum, Præfatio ad Lectorem, quæ in laudibus Cæsaris, Annæ Hungaricæ, Mariæ, Vngariæ Reginae, Richardi Bartholini & Cardinalis Gurcensis consistit. Integer vero liber ad Bernardum sanctæ Mariæ in porticu Diaconum Cardinalem est directus. In primo quidem exponit iter Cardinalis Gurcensis ipsi a Cæsare demandatum, qua ratione Augusta discedens, per Bauariam in Austriam venerit, Viennæ magnifice fuerit exceptus, atque tunc Mausolæum non solum Friderici III. sed lepidam etiam fabulam de Neytharto describit. Vienna Neostadtium perrexit Cardinalis, vbi Cæsaris nomine conuentui Ordinum Austriæ præfuit, indeque Posonium pergit, ad Reges ibidem congregatos, a quibus beneuole exceptus exposuit, quæ ipsi fuerant demandata. Demum belli Polonos inter atque Moschos tunc gesti causam, & quod in idem tempus incidit, bellum rusticanum Pannoniæ describit. Dum alterum Gurcensis iter in Pannoniam recenseret, intermiscet carmen ad Poloniae Regem, Sigismundum, quo ipsi potissimum pacem persuadet: cui subiungit JO. DANTISCI *syluam de profectioe Sigismundi post victo-*

*riam*

\* Extat hoc compromissum inter Ludouici XII. litteras Tom. IV. p. 213.

\*\* Prout ipse Gurcensis in litteris ad Imp. Romæ IV. Martii 1514. scriptis, narrat, inter Ludouici XII. Litteras Tom. IV. p. 273.

\*\*\* Sic enim Cuspinianus sub initium Diarii sui: *decreuit itaque Cæsar, reuerendissimum in Christo D. Matthæum S. Angeli Cardinalem Gurcensem, & Coadiutorem Saltzburgens. mittere, qui cum pleno mandato cum utroque Rege omnia agenda perageret & tractaret.*

\*\*\*\* Egit de eodem Vossius de Histor. Lat. lib. III. p. 679. Gesnerus, in Bibliotheca & Hendreich in Pandectis Brandenb. voce Bartholinus.

\*\*\*\*\* Egit de eodem Gesnerus in Bibliotheca & Jo. Petrus Lotichius Bibl. Poët. P. III. p. 48.



riam contra Moschos in Hungariam qua etiam conuentum trium Regum Pofonii describit. Subfequitur JO. DANTISCI *Carmen ad Richardum Bartholinum de victoria Sigismundi contra Moschos*, cuius belli cauffam fupra exposuerat Bartholinus. Hæc excipit CASPARIS VELII *epiftola compendiaria ligato fermone fcripta ad Joannem Thurro, Vratislauienfem Epifcopum de conuentu Pofoniensi*. Hic Velius Suidnicenfis patria, Silefius, Vrfini nomen, ob eruditionis exiftimationem non vulgaris, imitatione complurium aliorum cum veterum tum recentium Poëtarum fibi adoptauit. Vir græce latineque erat doctiffimus, ea propter haut modo Matthæo Cardinali Gurceni, ac Stanislao Olomuceni, atque Joanni Wratiflauienfi Epifcopis notus amatusque, fed & D. Maximiliano I. Imp. cuius calculo vatum numero adfcriptus fuit, nec non D. Ferdinando Cæfari designato, cuius filium primogenitum Maximilianum perfectis moribus, atque bonis litteris erudiuit. Demum fatali morte periit, Viennæ quidem anno 1539. trigefimo tertio Nonas Maii, præceps in Danubium fponde, an illata vi, incertum, datus, fatali merfus aqua periit. \* Paulus Louius \*\* fic de eo: *fed qua demum veteri fodalitio digna pietate, imaginem tuam, vt Elogio noftro coronetur expectauerim, Vrfine Caspar Vindelice, paucis ante annis morte præpropere nobis erepte? nobiles enim poëtas leto carmine, hiftoricos vero ftyle grauitate, superabas: fed in cumulo honeftiffimæ laudis, vti integer vitæ fcelerisque purus, tranquillæ animi probitate periculofæ officii munus feliciter adimplebas, quum Maximilianum summæ indolis adolefcentem, Ferdinandi Cæfaris designati filium; patruus fortuna digniffimum, perfectis moribus, ac literis erudires*. Adiecta funt Eiusdem in Cæfarem uenientem poemata. Concludit tandem Bartholinus librum primum cum conclufione publicorum Gurcenis negotiorum, ipfiusque difceffu. Dum igitur omnes Scriptores confenfu unanimi Gurcensem Cæfareæ legationis caput faciant, male alii hoc tribuit Pontus Heuterus, \*\*\* dicens: *Vladiflaus Hungariæ & Bohemiæ, Sigismundus Poloniæ Rex, fratres, Pofonii conuentum cum Cæfaris Legatis (quorum erat caput Hieronymus Baltus, Præful ac Cardinalis Gurcenis, agentes, variis de rebus inter fe quam amiciffime tractabant*.

Secundo libro primum Gurcenis reditum in Germaniam per Laureacum & Saltzburgum exponit, vbi etiam arcem Salisburgenfem describit, & falinas Reychenhallenfes Bauariæ. Inde qua ratione Gurcenis Cæfari de negotiis ipfi demandatis rationem reddiderit, tradit & quod Reges Oratores fuos ad Maximilianum Viennam miferint, ad ipfum inuitandum, Regum etiam litteras, Oratorum orationem, Gurcenis refponfionem recenfet, & quod tandem Cæfaris Oratores ad Reges fuerint miffi. Progreditur ad ipfum Regum conuentum, prope arcem Trautmansdorff, ipforumque introitum Viennam, vbi fimul Principum Ducum ac illuftrium virorum nomina recenfet, qui vna cum Imp. & Regibus urbem fuerint ingreffi, Cæfaris orationem ad Reges, dona iisdem miffa, huius fponfalium cum Anna, Vladiflai filium refert, fuamque in dictis fponfalibus habitam orationem inferit. Et dum ibidem matrimonium inter Ludouicum, Bohemiæ Regem, Vladiflai filium & Mariam Maximiliani neptem fuiſſet celebratum in illud fingulari Idyllio luſit Bartholinus, cui etiam laudes Gurcenis intermiſcet, & cum voto concludit. Vltimo demum de fœdere inter Maximilianum, Regesque dictos aduerſus Turcas; concluſo horumque inuicem difceſſu agit. In fine diuerſa adduntur poemata doctorum virorum in laudem Bartholini conſcripta.


JOHAN-

\* Hæc ex Nic. Henelii Sileſiographia renouata cap. VII. p. 582. hauimus.

\*\* Elog. doct. vir. p. 278. Sic etiam agunt de eo Erasmus in Ciceroniano, Ederus in Acad. Vienn. p. 274. Lotichius Bibl. poët. P. III. p. 47. König. Bibliotheca, voce Velius.

\*\*\* Rer. Auſtr. lib. VII. cap. XI.





JOHANNIS CUSPINIANI PRÆ-  
FECTI VRBIS VIENNENSIS, DIA-  
RIUM, DE CONGRESSU CÆSARIS MAXI-  
MILIANI AVG. ET TRIUM REGUM, VLADISLAI HUNGA-  
RIÆ, LVDOVICI BOHEMIÆ, ET SIGISMUNDI POLO-  
NIÆ, IN VRBE VIENNENSI FACTO, XVI. JULII,  
ANNO CHRISTI M. D. XV.

JACOBO VILLINGERO, CÆS. MAXIMILIA-  
NI THESAURARIO, JOHANNES CUSPINIANUS PRÆ-  
FECTUS VIENNENSIS FELICITATEM AC  
S. P. D.

p. 304 **M**EMINI inter Philosophos magnam esse altercationem : An conue-  
niat sic vivere, ut nemo te vixisse sentiat, ut ille dixit : Crede mi-  
hi bene qui latuit, bene vixit. Et illi potissimum, qui cæteris vo-  
lunt esse religiosiores, hoc suadent, quasi sic videantur humanam  
contemnere gloriam, cum ipsi sint ambitiosissimi & gloriæ avidissimi. Hi qui  
etiam libellos de contemnenda gloria scripserunt, cum suum nomen proponunt,  
nunquid ipsi gloriam affectant? Nempe hoc sudamus, ob hoc laboramus, ob  
hoc mille pericula & in mari, & in terra subimus, ut quasi merces laborum  
gloria nos sequatur. Cur igitur arbitrantur illi sic esse viuendum, ut nemo nos  
vixisse sentiat, quasi omnia debeant ignorantia & tenebris occultari; cum nihil  
magis exoptet homo quam scientiam, & natura scire desideret, & animi etiam  
nobilior pars sit lux ac lumen: quandoquidem plane omnibus insita est cupidi-  
tas cognoscendi, non modo mundana, sed & quæ supra nos sunt, ac quæ vix  
capere intellectu nostro possumus. Sed ex plebe nemo est tam excors, qui non  
velit aliorum regnorum ac prouinciarum libenter indagare & ritus, & mores,  
& res gestas, si habere copiam possit. Ob id cum Plutarcho sentio, hominem  
nihil omnium æque refugere, ac ignorantiam & tenebras: atque ideo non esse  
viuendum, ut nemo nos vixisse sentiat: sed ita potius vivere, ut aliquo monimen-  
to, si fieri potest, nos vixisse testemur. Hic post se liberos, hic libros reliquit, hic  
prædia, hic possessiones, hic ædificia, hic bonam famam, omnes bonum nomen co-  
nemur post nos relinquere, alioquin vita nostra mors potius est. Ego ita pro  
virili semper elaboravi, ut me vixisse testarer, quibusdam monumentis, quæ ex-  
tant. Nec passus sum illud etiam ignorari, quod hic nobiscum iam actum est,  
quod certo scio, multi homines utriusque sexus, libenter etiam in remotissi-  
mis regionibus vehementissime exoptabunt. Quis enim bono ingenio præditus  
nollet scire, quomodo ille celeberrimus Regum conuentus inchoatus ac perfe-  
ctus esset? & quo pacto mutuo sese amplexi essent clementissimi illi principes,  
qui se de facie prius non nouerant, & si sanguinis vinculo prius erant astricti?  
Licet autem tu mi Jacobe, tanquam consiliarius Cæsaris, non inter postremos  
Tom. II. F f f f numeran-



numerandus affueris, & oculata fide omnia intellexeris, tamen aliquando ea quæ facilia sunt à memoria labuntur, quæ libenter in senectute relegimus. Amore tui omnia elegi, quæ & vidi, & quibus interfui. Quinque enim annis (vt scis) voluo hoc saxum, quibus vigesies & quater in Vngariam orator iui, atque hæc negotia tractavi. Quantum igitur potui, rem verissime, simpliciter tamen, sine turgida oratione perscripsi. Quidquid id est, boni consules, & me vt soles amabis. Ex Vienna, vigesima Augusti.

**C**ÆSAR Maximilianus, vt est ingenio singulari, ac prope diuino, animo voluens nihil esse præclarius bono principi, quam prouincias & regna sua solido aliquo robore stabilire, in omnes orbis angulos oculos suos coniecit. Et nobilissimum quemque regem affinitate sibi deuinxit, vt inde prouinciis suis perpetuam relinqueret quietem. Sic filium Philippum in Hispaniam mittens, Regem Aragonum sibi coniunxit. Cum autem diuus ille Philippus numerosam post se prolem relinqueret, noluit Cæsar quamcunque amittere occasionem, ex quatuor filiabus, quæ secunda est post Leonoram, cui nomen Isabellæ, Regi desponsauit Daciæ, sed hoc aliquanto post. Ex septentrione Cæsar in Orientem migravit, vt semen eius vndeque coalesceret, vidit pientissimum Hungariæ<sup>p.309</sup> & Bohemiæ Regem Vladislaum, nobilissimis liberis à DEO optimo Maximo donatum, Ludouico & Anna. Mox animo concepit, & illosque sibi deuincire Austriæque prouincias inferiores robustissimo muro circumuallare. Ludouico Hungariæ & Bohemiæ Regi tertiam neptem Mariam in vxorem & Annæ vnum ex nepotibus, aut Carolum, aut Ferdinandum in maritum dare cogitauit, vt prouinciæ illæ contiguæ & regna, mutuis viribus robustiores essent, contra impetum Turcorum, & quorumcunque hostium. Id consilio & opera Matthæi tunc Episcopi Gurcensis, hodie vero Cardinalis, qui & extremam manum huic operi imposuit, & Joannis Varadiensis Episcopi professi ordinis sancti Francisci, primum inchoatum est. Accesserunt dehinc plerique Oratores, quos Cæsar aliquot hinc annis in Hungariam misit, qui inter cætera negotia matrimonia hæc duplicia simul sollicitarunt, Janus Mrazii miles, præfectus arcis Dronsdorff, Comes Leonardus de Hag, Wolfgangus de Rogendorff Baro, Joannes de Pucham. Hic annis quinque continuus Orator iuit in Hungariam, Cuspinianus præfectus senatus Viennensis, qui vulgo Anbaldus \* dicitur: postremo & Laurentius Saurer vicedominus Austriæ, Orator cum cæteris iuit.

\* *Annualed.*

Interim Cæsar, licet grauissima bella gereret, & annis iam fere octo superbiam Venetorum castigaret, nullam occasionem omittens, vt suum sortirentur finem concepta iam dudum matrimonia, ex Flandria in Austriam misit charissimam suam neptem Mariam, sponsam Ludouici Regis, qui Viennam appulit duodecima die Junii, Anno millesimo quingentesimo decimoquarto, honorificentissime excepta, non tam à clero, quam vniuerso populo Viennensi, & deducta ad arcem Viennensem, vbi hodie adhuc habitat.

Prius autem Cæsar in Austriam descenderat, animo conueniendi Regem Vngariæ Vladislaum & tractandi, non tam de liberorum communium matrimoniis, quam de cæteris suarum prouinciarum & regnorum necessitatibus. Sed insperato erupit quædam incondita rusticorum multitudo, quæ cruciatorum appellabatur. Proximis enim ante mensibus Cardinalis Strigoniensis, Legatus Apostolicus, cruciatam detulerat in Vngariam, cum plenissimis indulgentiis: è qua re, vnde subsidium sperabatur, crudelissimum venenum ortum est. Nam longe lateque desæuit in Hungaria hæc crudelissima pestis, & omni pestilentia sauior, in vtrumque sexum indiscriminatum venenum iniiciens; rapiebantur liberi ex matrum sinubus, truncabantur vt feræ, & abiiciebantur. Stuprabantur passim virgines, & matronæ, in parentum ac maritorum conspectu. Sacra prophanabantur, spoliabantur templa, ciuitates, oppida, arces, villæ euastabantur, & incendio corruiebant: denique nihil tam sanctum, quod ab iis cruciatis non



non defoedaretur. Horum Dux Georgius quidam Ceculus (gentis nomen est, Ceculi enim prope Transsylvaniam habitant) ascivit hic sibi comitem Laurentium presbyterum, qui crudelitate omnes superavit. Erat etiam ex ducibus quidam Michael monachus, ita hæc pestis nullum ordinem intactum reliquit. Ex minoribus ducibus multi erant, quorum nomina scribere est superuacaneum. Hii quoscunque nobiles apprehenderant, palis affixerunt, mulieres ac liberos eiecerunt, prius tamen stupratis, bona surripuerunt. Erat animus illorum, vniuersam delere nobilitatem, & in toto regno, quod quatuor & decem habet episcopales sedes, vnam solam relinquere. Scribi non potest, qua crudelitate vsi sunt: hoc satis fit indicii, cum auxilio diuino rabies hæc extincta foret, ductu Joannis comitis Zepusiensis, Veivodæ Transsylvaniæ, qui ducem illorum nouo quodam tormenti genere, à suis dentibus laniari iussit, & hinc decollari. Et cum mense Nouembri illius anni facta esset regnicolarum in Buda congregatio, patria lingua *Rackuscb* appellatur, hic publice narratum est, hoc tumultu rusticorum, qui vix quadrimestris erat, desiderata esse in Hungaria, utriusque sexus septuaginta millia hominum, in quibus quadringenti fuerunt nobiles. Quod seculum narrabit mihi simile facinus? Quis vnquam talia aut legit, aut audiuit? Sed longe maiora sunt, quam quæ scribuntur: multa enim ob pudorem scribere nemo audet.

Ceculi.

Fuit in ista congregatione siue conuentu, nomine Cæsaris Orator Cuspinianus: nomine Regis Poloniæ, Christophorus Schidlouiczki. Et cum illic etiam de concordia Cæsaris & Regis Poloniæ, inter cætera negotia ageretur, visum est oratoribus differentias illas facile non posse complanare, nisi simul coirent Cæsar, & vterque Rex Hungariæ & Poloniæ fratres. Nam Cæsar iam à Rege Hungariæ pro suo fratre rogatus, indulserat, quæ in eum fecerat, & ipsum p.306 arbitrum & mediatorem differentiarum delegerat, pro sedandis discordiis, quæ inter illos erant. Remissus est itaque Cuspinianus à Buda ad Cæsarem, qui tum in Ponteoeni (*Insbrugg* vulgo dicitur) morabatur, vt Cæsarem sollicitaret, pro conuentu tam sancto horum Regum, qui non modo utilis suis regnis & provinciis, sed etiam hostibus plurimum formidolosus futurus erat.

Cæsar tum pluribus occupatus, venire ad finem Februarii in Posonium, vt deliberatum erat, non potuit: tum propter Heluetiorum formidabilem inconstantiam, tum propter subitam & insperatam mortem regis Franciæ Ludouici, qui prima Januarii Parisiis anno decimo quinto expirauit. Tum etiam propter Carolum Archiducem Austriæ ac Burgundiæ, nepotem, quem ex annis tutela Cæsar emancipauerat. Aliis quoque multis de causis Cæsar nequibat, quod vterque Rex petebat, adimplere.

Decreuit itaque Cæsar, reuerendissimum in Christo D. Matthæum S. Angeli Cardinalem Gurcensem, & coadiutorem Saltzburgensem mittere, qui cum pleno mandato cum vtroque Rege omnia agenda perageret & tractaret. Premissus est itaque Cuspinianus Budam, qui hæc Regi renunciaret, & vt dies conuentus in diem dominicam Quadragesimæ, qua in ecclesia Romana cantatur: *Lætare Hierusalem*, differretur. Placuerunt omnia Regi Hungariæ, qui illico nuncium expedit Cracouiam versus, vt hæc fratri regi Poloniæ referret. Ne tamen res tam sancta vilius fraude interciperetur, D. Ladislaus de Sternberg Cancellarius Bohemiæ, iter arripuit, & Regem eduxit, persuasitque, vt nullis literis ceptum iter desereret, sed ad Posonium vsque continuaret, expectaretque fratris regis, & Cæsaris aduentum.

Narrauit mihi Georgius Thurso, vir spectatæ fidei, & integritatis haud contemnendæ, Regis Hungariæ Camerario: Montium egressuro Regi Poloniæ Sigismundo, qui Cracouiam quinta Martii deseruit, Matthiam Mechouitam singularem tam in medendo, quam in prognosticando magnæ eruditionis virum annunciasse; ipsum neque visurum Cæsarem, neque expediturum quippiam. Quod cum miraretur Rex (vt est animi inconcussi & firmi) constantissime perseuerauit

Matth.  
Mechonita  
vater.



in proposito. *Eundem*, inquit, *est*, quo *DEus & fortuna vocat, promisi, promissum ratum seruabo; nemo me à proposito alienabit. Videbo Casarem, si DEus volet, & fratrem conueniam.* Nihilominus interim per quosdam secretarios mandat, vt diligentius ab eodem Doctore inquirant, serio ne an ioco locutus fuerit. Affert idem Mechouita, *Regem non visurum Casarem, nisi expectare velit Junium. Et ante festum diui Joannis Baptiste, Casarem omnino non visurum*: Cum Rex se rediturum in mensibus duobus ad summum speraret. Exiuit igitur Rex bonis auibus, & cum tam longa mora traheretur, saepe illius Doctoris memoria subiit, hoc idem Mechouita Andreæ Rostilitzki Thesaurario perscripsit, *Regem scilicet suum, vix Casarem ante festum Alexii visurum*, quod & euenit, vt paulo post scribemus. Decimosexto enim Julii, hoc est, in profesto Alexii, mutuo se videntur.

An. 1515. Vigesima igitur tertia Februarii, Anno præsentis M. D. XV. Reuerendissimus Dominus Cardinalis Gurcensis applicuit Viennam, quam honorifice ab vniuersa nobilitate, plebeque Viennensi susceptus: parumque quiescens, genio indulgit ad triduum, tum Nouam ciuitatem profectus, conuentum prouincialium indixit, iussu Cæsaris. Interea vt sui aduentus certior redderetur Rex Hungariæ, mittit D. Cardinalis Doctorem Vitum de Furst Budam, vt regem excitaret ad Posonium, locum conuentus designatum. Nam quidam ex nobilibus refragabantur, ex quo Cæsar non veniret, facilius posse Budam conuenire regem Poloniæ & Cardinalem afferentes: sed sanior pars præualuit, & rex se Posonium venturum promisit. Continuato igitur itinere, firmatus iam animo Rex Poloniæ Cracouiam deferit, & Posonium versus pergit.

Cardinalis interim Gurcensis, conuocatis Austriæ, Styriæ, Carinthiæ, Carniolæque prouincialibus, res sibi à Cæsare commissas strenue exequitur, sed perficere non potuit, audiens regem, Hungariæ 18. Martii Posonium venisse, crebris nunciis die noctuque singula indagat (vt diligentissimus) nullam voluit occasionem amittere.

Tum XXII. Martii, ne vlla re indiligentiæ culparetur, mittit Oratores ad Regem Hungariæ Posonium, qui se suaque offerrent, & aduentus sui diem exquirerent: nomine Marquardum de Stein præpositum Bambergensem, Janum Mraxii de Nascau militem, Cuspinianum Doctorem, Wolfgangum Hemerle secretarium Cæsaris. Hi iussa exequuti, per nuncios singula D. Cardinali adaperiunt, & eidem in Hamburgo 27. Martii occurrunt, de singulis ipsum certiores facientes, quæcunque viderint aut intellexerint. Nam ante, XXIV. scil. die Sabbatho illius Dominicæ, qua canitur in Ecclesia: *Judica me Domine*, Rex Poloniæ Sigismundus cum celeberrima pompa ingressus est Posonium, quem ex Tetuania vsque conduxerunt Episcopus Quinque ecclesiensis Georgius, & Georgius Marchio Brandeburgensis, iussu regis Hungariæ. Ipse autem Rex Hungariæ Vladislaus, in curru ei cum filio Ludouico occurrebat, sequentibus ipsos<sup>p.307</sup> Episcopis Colocensem, Vacensem, Bosnensem, Sirmiensem, & vniuersa eius nobilitate, quæ ornatissime more patrio est instructa. In campo vbi vidit fratrem aduentantem, iussit se ex curru in terram ponere in sella, quem Rex Poloniæ fraterne amplexus, prouocauit in lachrymas. Rex Ludouicus miræ indolis, patrum exosculatus benignissime excepit repositus in curru senior Rex: Filius Ludouicus equum ascendit, & in latere sinistro cum patruo urbem ingressus est, magno cum fastu, præcedentibus innumeris equitibus, nobilibus & curribus. Ducebat autem Rex Poloniæ plus mille quingentos equites, & partim more Hungarorum, quos *Husserones* appellant, vestiebantur, partim habitu Alemanico ornati erant. Sed erant præter Polonos Ruteni, Pruteni, Moschi, Turci captiui, & Tartari in suo equitatu, cum multis tibicinibus, qui tubas amplas sonoras, & à nostris dissonas, non sine horrore stridentes, vt in magno æstu solent vespæ & crabrones, inflabant. Erat & Turcus quidam cum tibia, qui nobis inauditam Harmoniam & auribus nostris inacceptam edebat, cum puero tympanum ambabus



bus violenter manibus percutiente. Sed & nostrates habuit tibicines, qui belle sonabant, & nostram musicam referebant.

Erat secum magna nobilitas, qui partim in equis anteibant deaurati & torquibus aureis redimiti, partim peditibus ipsum cingebant, equo insidentem & veste purpurea amictum Veivoda Valachiae, D. Nicolaus Virla, Palatinus Sandomiriensis, Nicolaus Palatinus Vilnensis, Palatinus Libliensis, Andreas Cancellarius Schidlouitzki, Nicolaus Palatinus Marpurgenfis, Thesaurarius Andreas Costilitzki, D. Lucas capitaneus Poloniae, dominus Raphael, & multi alii insignes & viri egregii vtriusque ordinis. Comitabantur vero illum tres Episcopi, Matthias Vladislauiensis, trium Regum Alberti, Alexandri & Sigismundi olim cancellarius; Joannes Posnanienfis, & Petrus Premisliensis, cum praepositis, secretariis & aliis praelatis. Durabat hic ingressus ab octaua vsque ad primam horam, nam summo mane ingrediebantur currus, qui feruntur fuisse pene quingenti, in quibus quandoque quatuor niuei equi, quandoque nigri, quandoque rubei, quandoque alterius coloris, nunc sex, nunc octo in eodem curru vehebantur: immixtae erant & bigae, licet paucae erant.

Vigesima octaua Martii Cardinalis Gurcensis ex Hamburgo soluit naui, & venit Posonium horam circiter nonam. Cui omnis multitudo obuiam egressa, ripam Danubii ita adimpleuit, vt eques vix subsistere posset. Incessit ipse in habitu Cardinalium, quem Archiepiscopus Colocensis Gregorius Comes de Frangepanibus, regni Hungariae cancellarius, in latere Regis Ludouici obuiam Cardinali, nomine patris & patrui missi, benigna & pulchra oratione suscepit. Ipse vero Cardinalis humanissime respondit. Aderant hic vtriusque Regis proceres & consiliarii, Episcopi & nobiles, ac summo cum honore ipsum quam honorificentissime vsque ad hospitium conduxerunt, cum ingenti tubarum sonitu ac plausu.

Sequenti die hoc est XXIX. Martii, ingressus est urbem reuerendissimus Cardinalis Strigoniensis, Thomas legatus de latere: cui & D. Cardinalis Gurcensis cum omni curia sua (ductabat autem electam nobilitatem Austriae & Styriae) & vtriusque Regis proceres occurrebant. Ipse sexingentos habuit equos, demptis curribus. Magnae vndique factae sunt caeremoniae: quandoquidem maior pars omnis aetatis humanae in iis conteritur. Occurrebat & clerus cum pueris, & reliquiae sanctorum deferebantur obuiam tanquam Metropolitano.

Prima Aprilis, quae erat solennis illa dies Palmarum, omnibus Christianis veneranda, Cardinalis Strigoniensis in Ecclesia maiori diui Martini praesentibus tribus Regibus, & Anna Reginula sacerdotale expleuit officium, cum caeremoniis debitis, ac cum indulgentiis plenariis. Cardinalis autem Gurcensis huic officio interesse non potuit, aduersa valetudine detentus: alia vniuersa nobilitas erat congregata.

Altera die iterum conuenerunt in hoc templo tres Reges, cum Cardinalibus ambobus: Strigoniensis celebravit officium de Spiritu Sancto, quo finito admonita est plebs per suffraganeum Strigoniensem, vt deuotissime pro concordia Caesaris & Regum DEO supplicarent: Lingua Latina, Hungarica, Bohemica, & Alemanica, pronunciatae sunt interim indulgentiae plenariae. Recta inde via tres Reges, duo Cardinales, Archiepiscopi & Episcopi, proceres & consiliarii in domum Regis Hungariae profecti sunt, & facto magno consilio Cardinalis Gurcensis: oblatis literis suae credentiae de more, latissime & profusissime cur & ob quam causam venerit in summo silentio locutus est, bene audientibus Regibus & Consiliariis Caesaris, ac vtriusque Regis, qui omnes erant plus quinquaginta; Cui finita oratione benignissime simul & elegantissime respondit Cardinalis Strigoniensis: durauit hoc consilium ad horam circiter secundam post meridiem.

Tertia Aprilis, Cardinalis Gurcensis comitante ipsum curia sua & pulchra nobilitate, venit ad hospitium Regis Poloniae, qui ei egressus obuiam, humanissime



nissime ipsum excepit in plateis : ac ubi ambo in praesentia consiliariorum resederunt ; Cuspinianus iussus literas Caesaris, cum quadam salutatione obtulit breuiuscula, ambo dehinc mutua colloquia sed non diu fecerunt.

Eodem die venit triste nuncium de obitu illustris ducis Bartholomaei de Mynsterberg, qui à Caesare festinans ad hunc conuentum, in Danubio haud longe ab Hamburgo à fluctibus obrutus, submersus est. Quod in primis affecit Vladislaum Regem, & in lachrymas excitauit. Deinde Cardinalem Gurcensem, qui eum vnice amabat, utpote virum bonum & strenuum. Ex cuius morte quidam male de futuro conuentu augurabantur. Nam & pridie magnificus Joannes de Moseritz, capitaneus Moraviae, qui etiam sapius Orator in hoc negotio fuit, subita morte expirauit. Et Vitus de Furst, qui Regem plurimum ad hunc conuentum sollicitauit, Viennae mortem oppetiit. Ita tres Oratores sese ex iis negotiis liberarunt, & superum conuentum adierunt.

Hinc iterum in hospitium Regis Hungariae conueniunt, omnes hi principes, & tractatum incipientes, inueniunt rem esse morosam in tanta multitudine per tot suffragia esse consulendum. Redigunt itaque ad minorem numerum singulorum Regum consiliarios : & D. Cardinalis Gurcensis accipit secum consiliarios Caesaris, D. Janum Mraxii, Laurentium Saurer, vicedominum Austriae, Cuspinianum Doctorem, & Gabrielem Vogt secretarium Caesarium : Nomine vero Regis Hungariae erat Cardinalis Strigoniensis, Archiepiscopus Colocensis, Episcopus Quinque ecclesiensis. Rex autem Poloniae misit Petrum Episcopum Premisliensem, Christophorum Schidlouitzki Cancellarium, & Palatinum Vilnensem Nicolaum. Hi quoties articuli propositi fuerunt, referebant ad Reges, sed plene concordari non poterant, licet plerosque dies consumerent, & consilium in tertiam vsque horam post meridiem sapius pertraherent.

Vndecima Aprilis institutus est ludus pro cursu equorum. Primus brauium accepit argenteum deauratum poculum. Secundus pannum aureum pro veste. Tertius simplicem pannum pro Tunica. Cucurrerunt vnde quadraginta equi velocissimi & pulcherrimi, sed Georgius Comes Zepusienis omnes praecessit. Visa est hic res memoratu digna : quidam Moschus insidebat equo Turco, & de more ducebat alterum in manu dextera, cum autem vehementissime curreret cum ambobus equis, saliit ex vno equo in alterum, in medio cursu, semper alterum manu seruans ne discurreret, erat pulchrum spectaculum coram Regibus & principibus. Nam tres reges egrediebantur pulchro ordine : similiter & Cardinalis Gurcensis, ac omnes Episcopi, cum vniuersa nobilitate. Moschi tum etiam ac Tartari artem suam iaculandi sagittas in aerem miro ingenio ostentabant.

Duodecima April. concluderunt interim quadam esse renuncianda Caesari. Et ideo data & accepta salute cum summa reuerentia, & post exhibita munera regia, Cardinalis Gurcensis Posonium reliquit, cum prius ex suis praecipui aulici, frater eius vterinus Joannes Lang, magister domus Joannes Schenck, Wolfgangus de Keutschach, & Christophorus Graff de Rattstatt, in die Paschae, expleto diuino officio, quod à Cardinale Strigoniensi celebrabatur, essent militari cingulo & honore ornati à tribus Regibus, in tanta diei festiuitate.

Reuersus Cardinalis Gurcensis Viennam, mox duos consiliarios Caesaris D. Wilhelmum de Rogendorff, & Laurentium Saurer vicedominum per postam mittit ad Caesarem, qui licet quatuor diebus ascenderint festinanter Augustam vsque, tarde tamen reuersi sunt, ob negotia emergentia quotidie, & interim vrbs Posonium inopinato & subito incendio plus media comburitur.

Vndecima Maij, D. Cardinalis Gurcensis cum sex Caesaris consiliariis, D. Marquarto de Stein Praeposito Bambergensi, Wilhelmo de Rogendorff, Jano Mraxii, Laurentio vicedomino, Cuspiniano, & Gabriele Vogt secretario, iterum in naui descendit Posonium ad vtrumque Regem, tractaturus & concludurus tam matrimonia, quam foedera pacis & concordiae. Et licet clam sine pompa



p.309 pompa intrare vellet urbem, mox tamen certiores facti Antistites & Principes, Ludouicum Regem eduxerunt Cardinali obuam cum omni vtriusque Regis familia. Cardinalis etiam Strigonienſis, quaſi omnia neglexiſſet, feſtinabundus circa portam urbis cum omni ſua familia occurrit. Similiter & alii Epiſcopi & Archiepiſcopi ſomno exciti obuam prodierunt.

Septem hinc diebus ardue diſputatum & tractatum eſt de ſingulis, & mature omnia deliberata ſunt, in articulos redacta & ſcripta, ac vltro citroque penſitata. Nunc enim conſiliarii vtriusque Regis in hoſpitio Cardinalis tractauerunt & conſultarunt: Nunc vero Cardinalis Regem Poloniae adiit, & ſecretius quaedam amotis arbitris tractauit, nunc viciffim dominum Cardinalem de ſuis negotiis ſollicitant: Nulla quies, nullum ocium, omnia labore plena erant.

Vigeſima Maij, mane à ſeptima hora vsque in primam poſt meridiem, vterque Rex cum duobus Cardinalibus & conſiliariis deliberarunt, & deliberatis omnibus in praſentia conſiliariorum Caſaris & amborum Regum, articulos legi fecerunt, qui fuerunt ipſorum manibus ſubſcripti & ſigillis muniti, cum omni fauore & plaufu.

Sequenti die Rex Hungariae inſtituit conuiuium Regale, quo regaliter & opipare accepit fratrem ſuum Regem Poloniae, Cardinalem Gurcenſem, & praefatos ſex conſiliarios Caſaris.

Reuerſus Viennam Cardinalis Gurcenſis XXIII. & XXV. Maij exiit, vt praelo-cuta Caſari narraret, ipſumque adduceret. Interim ambo Reges non ſine ingenti faſtidio longam moram traxerunt in Poſonio per totum Junium, licet crebro mitterentur litterae, nunc à Caſare, nunc à Cardinali Gurcenſi, quas vicedominus (vt eſt ſuarum rerum diligens exequutor) & nocte & die mox Regibus tranſmiſit, vt impatientiam eorum leniret crebris literis mittendis.

Sed non contenti Reges quod Cardinales iuiſſent ad Caſarem, miſerunt ambo Oratorem Hieronymum Balbum praepoſitum Poſoniensem, vt per eum intelligerent ſi Caſar eſſet venturus nec ne certo. Is Caſarem in Inſbruck apprehendit, ſed reſponſum in Rottenburg ab eo accipit. Subſequutus eſt hunc alius Orator Regum (tam impatienter longam tam moram tulerunt) dominus Proteſilaus de Schmi hau Bohemus, quem Caſar ſecum detinuit. Poſt hunc alii duo miſſi Nicolaus Ceculus Hungarus, & Petrus Poſonius milites, ab vtroque Rege ad Caſarem, vt eius aduentum ſollicitarent. Quibus honeſte exeditis, promiſit ſe venturum: & vt bono animo eſſent reges: eoſdem literis & reſponſione hortatus eſt fraterne & quam humaniſſime.

Vbi ergo Reges iam animo firmati, aduentum Caſaris crediderunt, honeſtatis & emerendi fauoris gratia, Oratores ſex, ſinguli tres inſignes viros miſerunt, Rex Hungariae Epiſcopum Quinque eccleſienſem Georgium, Ladislaum de Sternberg cancellarium Bohemiae, & Moysen de Buſlai magiſtrum curiae. Rex Poloniae item tres, Epiſcopum Joannem Poſnaniensem, dominum Lucam capitaneum regni Poloniae, Chriſtophorum Schidlouitzki cancellarium, qui Viennam ingreſſi ſunt, equis pene quingentis phaleratis, & more ſuo ornatis compta & eleganter, ſexta Julii, cum antea Caſimirus Marchio Brandeburgensis, cum comite Bertholdo de Hennenberg, cum equis centum & quadraginta ſex cataphractatis & nobiliſſime armatis, à Caſare praemiſſus urbem introiſſet, ſplendiſſime ornatus cum pinnulis, armis, ſimul etiam cum vexillis albis, paruis ac maioribus, & Thomas Fuchs cum centum quinquaginta equis bene armatus more germanico, Joannes Jacobus item de Landaw, cum totidem, & alii multi nobiles & aulici, qui Caſarem praeuenerunt, & ibi eum expectarunt.

Octaua Julii rediit Cardinalis Gurcenſis cum Archiepiſcopo Bremeniſi, D. Chriſtophoro, Ducibus Bauariae Guilhelmo ac Ludouico, Duce Alberto de Meckelburgk, Duce Vdalrico de Wirtemberg, quibus ad ripam Danubii occurrerunt, Joannes Epiſcopus Ratiſponenſis, Palatinus Rheni, Epiſcopus Parauiensis



sis Vigileus, qui pridie aduentarunt, & quorundam Principum Oratores ac legati.

Decima Julii, Cæsar circa horam noctis decimam Viennam sine pompa ingressus est. Cum biduo fere quieuiſſet fatigatus ex itinere, in caſtro quodam circa ſyluam Viennensem, cui nomen eſt Hecking.

Vndecima Julii Cæſar præfatos ſex Oratores Regum in arce Viennensi, au-<sup>p.310</sup> diuit in præſentia principum & conſiliariorum, & Episcopus Quinque eccleſienſis: longa oratione pro expeditione contra Turcos cohortatus eſt ampliſſimis verbis. Quibus benigne Cæſar per doctorem Petrum Mottam Hispanum reſpondit breuiter ac ſimul eleganter, illisque dimiſſis iuſſit corpora ſua curare ac in hoſpitia redire.

Duodecima Julii vocatis in arcem Oratoribus, eos abſoluit ac abire iuſſit. Sunt autem cum ſummo honore per Episcopos ac Principes extra portam deducti quam honorificentiffime, ſequenti die mane, hoc eſt, 13. Julii.

Eodem die Cæſar ad excipiendos Reges miſit obuiam Oratores ſuos, Archiepiſcopum Bremensem Chriſtophorum, Marchionem Caſimirum, Wilhelmum de Rogendorff, & Cuſpinianum Regi Hungariæ, qui decimo quarto die Julii inuenerunt Regem Hungariæ Vladislaum cum liberis ſuis in quodam caſtro Kottſee, cui adiacet villa prope Danubium, & facta ſalutatione mandata ſua exequuti ſunt, inuitaruntque vt Viennam veniret. Similiter ad Regem Poloniæ Cæſar miſit Oratores ad Hamburgum (illic enim traiecerat Danubium Rex Poloniæ, vt erat ordinatum, quo expeditius equi & curruſ Danubium in diuerſis vadis ſuperarent) Ducem ſcilicet Bauariæ Wilhelmum, Episcopum Labacensem, Chriſtophorum Præpoſitum, Balthaſarem Mercklin de Waldkirch, & Mraxii, qui ſimiliter vt ſuperiores exequentes ſua mandata, Regem nomine Cæſaris exceperunt ac inuitarunt.

Decima quinta Julii exiit Viennam ac prodiit obuiam Cæſar Regibus, in lectica adornata, inſtrictiſſimo & electiſſimo exercitu, cum multis equis cataphractariis, cum ſplendidiſſimis militibus, ac nocte quinque milliaribus à Vienna in caſtro quodam Trautmansdorff pernoctabat. Cum Rex Hungariæ in oppido Prugk prope Leyttam fluuium, Rex vero Poloniæ in Hamburgo eam noctem conſumerent. Nocte fere media venit Cuſpinianus ad Regem Hungariæ à Cæſare miſſus, qui dabat ordinem conueniendi, ne fieret conſuſio. Juſſus eſt Rex manere in ſua lectica: Nam & ipſe quoque vehebatur lectica, quam Cæſar pulchre adornatam cum optimis equis Regi donauerat pridie. Et reuerſus iuſſus eſt à Cardinale Gurcenſe ire ad Regem Poloniæ, vt idem ei narraret, quem reperit in campo haud longe à tentoriis, quæ illic extenſa erant. Arbitrabantur enim nonnulli Cæſarem, id quod maxime recuſauit; diſputaturum de præloquutis in tentoriis aut ſub diuo. Cæſar autem arborem excelſam iuſſit figi in planitiem latam, quæ poterat à longe conſpici, ſub hac voluit conuenire Reges. Et quaſi felici captato augurio ſub diuo aperte voluit alloqui fratres Reges, & eos ſalutare ac mutuis complexibus exoſculari.

Mane itaque horam circiter ſextam XVI. Julii egreſſus eſt Cæſar cum omni ſuo exercitu à Trautmansdorff ad locum illum designatum, in planitie quadam, iuxta ſyluam cui nomen eſt patria lingua Hart, hic erat collis intumeſcens aliquantiſper à dextris ſylua, à ſiniſtris vepribus ac modicis ſpinis conſparſis monticulus. Ab hoc deſcendens Cæſar poterat tam ab Hungaris quam à Polonis latiſſime conſpici, armis illuceſcentibus. In meridie præſertim, iaculante ſole radios vibrantes in exercitum.

Proceſſit autem hoc ordine Cæſar: Capitaneus Nouæ ciuitatis Melchior de Mansmunſter in equo cataphractato, & ſui armati rubeis veſtibus induti ipſum ſequentes, ductabat aciem, quem ſequebantur in primis aulici & familiares Cæſaris inermes ac prouinciales, cæteriſque nobiles, & qui ad hoc ſpectaculum concurrerunt ciues & mercatores, ſed ornati & bene veſtiti ac elegantes, alioquin



quin excluderentur & reiciebantur. Multi aureis torquibus redimiti & variis monilibus conspectum reddebant amoeniorem. In singulis membris quinque equitabant, hos sequebantur Ducis Wirtenbergensis familiares armati, & sagittarii. Nec non domini reuerendissimi Cardinalis Gurcensis aulici, sine armis quidem, sed honeste vestiti, fuerunt circiter octoginta. Pulchra dehinc serie progrediebantur equi Caesaris tredecim, quos tredecim pueri equitabant, nigro veluto vestiti perquam elegantes.

Post quos equitabant Heraldii suo peculiari habitu amicti, cum duodecim tibicinibus, & duobus tympanis magnis. Tum sequebantur Antistites, Archiepiscopus Bremensis, Christophorus, ex domo Ducum de Brunswig, Episcopus Ratisponensis, Joannes ex domo Palatinorum, Episcopus Patauiensis Vigileus, Episcopus Labacensis, Christophorus, Dux Bauariae Ludouicus, Dux de Meckelburg Albertus. Post hos succedebant Caesaris ianitores, cum albis virgis in manu de more praecedentes Caesarem maiestatem. Tum ferebatur in lectica Caesar, quae panno purpureo scarlato & nigro veluto, forma quadrata erat cooperta, eodem habitu pueri & feruus, qui equos ducebant. Prope lecticam in latere dextro Cardinalis Gurcensis, habitu suo ornatissime equitabat, in sinistro Orator Regis Angliae. Multi vero nobiles, omnes veluto nigro vestiti de equis descendentes, pedites circa lecticam ambulabant. Hos sequebantur in equis pariter nigro veluto vestiti aulici procures, Wilhelmus de Rapoltstein magister curiae, Cyprianus de Serenstein Cancellarius, Jacobus Villinger Thesaurarius, Joannes Schnaydpeck Austriae Cancellarius, & consilarii, & regentes Jacobus Fugarus, Balthasar Mercklin praepositus in Valdkirch, Marquardus de Stein Praepositus Bambergensis, Melchior Phinizing Praepositus Nurnbergensis, cum fratre Vdalrico Praeposito, & pluribus consiliariis & aulicis Caesareis, qui omnes sericeis vestibus & torquibus aureis ac pretiosis monilibus erant compositi & ornati. Tandem ornata Phalanx splendidissime incedebat, tota armis cooperta, cum Tibicinibus & tubis ductilibus. Praeibat cum equo cataphractato Leonardus Rauber Caesaris Marschallus, ducens secum familiares nigro habitu vestitos, quibus Rota in brachio pro insigni erat, auream ipse vestem supra arma gerens. Tum serie pulchra sequebantur, Wilhelmus Dux Bauariae aureus totus, cum equitibus suis suo peculiari colore vestitis, qui canem in brachio pro insigni ferebant. Hinc Casimirus Marchio Brandenburgensis, in equo cataphractato, veste aurea & rubra, cum electissima familia, quae rubeis vestibus erat ornata, & pluribus aureis catenis, ac pretiosis pinnulis, cum gemmis ac monilibus.

Penes eum erat Bertholdus comes de Hennenberg, & nobilitas Franconiae insignis, equites cuspides albis vexillis paruis ornatas, duo pueri alba vexilla lata & pulchra ferebant. Subsequebantur deinde comites, suo quisque colore ornatus, sed cataphractatis equis, comes Georgius de Montfort, comes Georgius de Schaunberg, comes Hoyr de Mansfeldt, comes N. de Vesterburg, comes Joannes de Hardeck, qui mirum in modum margaritis ac gemmis & perlis, & superbissime incedebat. Dehinc nobilitas Austriae supra Onasum electissimo instructa exercitu subsequebatur. Cataphractariis similiter equis Wolfgangus Iorger, capitaneus in Lyntz, Sigismundus, Ludouicus de Polham, Ciriacus de Polham, Rudolphus & Sebastianus fratres de Hohenfeldt, Joannes Jacobus de Landaw, Thomas Fuchs, qui omnes erant excellenter ornati. Et agebant equos plus quam octingentos, in quibus erant cataphractarii octoginta circiter. Hoc ordine incescit Caesarea Maiestas, & ubi appropinquauit arbori terrae infixae circa iactum bombardae, accesserunt Reges propius cum suis cateruis & militibus, qui more suo erant simul ornati. Hos antecedeat immensa multitudo Hussarum, qui vexillis bipartitis rubeo & albo colore praebant. Subsequebantur Moschouitae siue Moschi, ceruleo colore vestiti, cum albis longis pileis ac arcubus armati.



Tum Tartari, in quibus multi captiui, cum tubicinibus suis, de quibus superius scripsimus, qui sonabant horrendum. E regione seorsum immensa multitudo Hufferorum, qui Regis Hungariæ erant, pariter de more suo albis & rubeis vexillis armati. Quos succedebant vtriusque Regis Tibicines in aerysque clangentes, more germanico ornati & vestiti, cum tympanis sonoris. Tum incedebant ornatissime instructi vestibus & torquibus aureis, & equis phaleratis multo argento, domini Barones ex Hungaria & Bohemia, in quibus erat Marchio Brandenburgensis, Georgius frater Casimiri habitu Hufferorum, Dux Carolus de Munsterberg, tres fratres de Schmiehau, Ambrosius Stercko, Michael Paluci magister cubiculariorum, Petrus Carlaczki, Franciscus Ortzag de Gotz, Banus Nandoralbensis, & Emerichus Ortzag magister cubiculariorum Regis Ludouici. Joannes Pethen de Gerse, magister curiæ serenissimorum liberorum. Stephanus Perenni, Joannes Bornamissa, Moyse de Bultai cum filio Ladislao, magister curiæ, Ladislaus de Caniza, Joannes Banffii de Lyndua, pincerna Regis, Joannes Doczii cubicularius regis, & plerique alii nobiles & magnifici ex Hungariæ & Bohemiæ regno, qui mihi magis de facie, quam nominibus sunt noti, quandoquidem nomina horum vix memoria teneo, quia difficile scribuntur hæc nomina. Post hos sequebatur Ludouicus Rex iunior aurea veste rubea intertexta purpurea ornatus, capillis extensis, bireto ex veluto fusco capite te-  
ctus, pulchro & phalerato equo insidens, quem vndique cingebant ex utroque regno Barones & domini, pedites incedentes ad obsequium. Comitabatur hunc regina soror eius Anna, aurea veste & pulcherrima torque mirum in modum multis gemmis & monilibus ornata, quæ in amplissimo curru deaurato ac imaginibus exornato, octo equis candidis trahebatur, quam multi etiam nobiles pedites cingebant vndique. Inter quos erat Marchio Georgius Brandenburgensis, & comes Petrus de Posing, qui de equis descenderant pedites. Tum Rex Poloniae Sigismundus purpuratus & serico pileo tectus pulchro equo vehebatur, vndique nobilioribus proceribus amictus, qui pedites circumdabant ipsum, vestibibus & ornamentis splendidi. Postremo rex Hungariæ, pariter vt Cæsar lectica ferebatur, quæ veluto rubeo nobilissimo erat cooperta, quemadmodum pueri, qui hanc cum equis gestabant: hæc nuper erat donata Regi à Cæsare cum equis & instrumentis. Aderat hic ingens prælatorum & procerum caterua ex Hungaria, Archiepiscopi & Præsules, Cardinalis Thomas Strigoniensis, Archiepiscopus Colocensis Gregorius. Quinque ecclesiensis Georgius, Ladislaus Vacienensis, Michael Posnensis, cum suffraganeis, Præpositis & Archipresbyteris multis. Ex Polonia Matthias Vladislauensis, Johannes Posnanienensis, Petrus Premisliensis, cum capitaneo, cancellario, Thesaurario, Palatinis & Veuodis, quos superius nominaui, spectabilis & elegantissima caterua. Vndique strepitus & hinnitus equorum audiebatur, tubarum concentus, tympanorum sonitus, spectaculum sane dignum, quod omnis mirabitur posteritas.

Cæsar, vt appropinquare viderat Reges, iussit cooperimentum lecticæ deponi, quo palam ab omnibus videretur, & aperte omnes conspiceret: data dextera Regibus & Reginæ perquam concinne inquit: *Hæc est dies quam fecit Dominus, gaudeamus, exultemus, & letemur in ea.* Rex item Poloniae respondit: *Vtinam felix ac faustus sit ille noster conuentus vniuersæ reipublicæ Christianæ.* Pauca verba in similem sententiam Rex Hungariæ proloquutus, quæ vix sine lachrymis efferre potuit. Ludouicus, vt erat institutus, ex equo summa cum reuerentia Cæsari dixit, & tanquam patrem salutauit, nec auertere faciem à facie Cæsaris potuit, quasi aspectu non posset saturari. Regina in currum surrexit, nam altus erat, & obseruantiam in Cæsarem verbis, vultu & gestis ostendit. Fuerunt tum nonnulla disputata ab iis, qui inuiti ibant Viennam, & aliqua mora facta est, donec Cæsar inuitatis Principibus ac Regibus iussit secure secum migrare Viennam. Rex autem Poloniae, vt est summæ dexteritatis Princeps, suis & Hungaris dixit; *Sub confidentia Cæsaris, quem mihi multi grauissi-*



*mum hostem prädixerunt, huc veni, sub confidentia ipsum sequar Viennam, quisquis mihi confidit me sequatur, si quis timet, remaneat.* Fratremque cohortatus Regem Hungariæ, ut tuto simul veniret, qui alioquin Cæsarem semper amavit, incunctanter Viennam eundum esse concluderunt. Cæsar intelligens tam promptam Regis Poloniæ in se voluntatem; *Hic, inquit, Rex me compellit, ut quandoque vros siue bisontes amore eius in venatione videam.* Dissoluta conuentio forte post horam cum media: Itum est ad venationem, capti aliquot cerui, iterum ingens exitus tubarum clangor. Plures enim erant tibicines, tot Regum, Principum ac Præfulum. Ordinum est, ut Rex Hungariæ cum liberis iret Trautmansdorff, ubi priore nocte Cæsar decubuit. Cardinalis Strigoniensis ad sanctam Margaretham, cæteri Episcopi ac proceres ad Suadorff. Rex vero Poloniæ cum suis decessit ad Entzesdorff, Cæsar ad Laxendorff cum Cardinale Gurcensi. Multa sunt castra & villæ adiacentes, quæ familiares vtriusque regis capiebant, pars vero Viennam petebat, ut hospitia disponderet. Erat dies ille calidissimus & amoenissimus, pro huiusmodi spectaculo aptus, licet mane pluuiam minaretur nubecula quædam.

Sequenti die, hoc est, XVII. Iulii, Cæsar ex Laxendorff versus oppidulum quoddam venit, cui nomen Scheuchat, opperiendo illic reges. Rex Poloniæ citius, tardius rex Hungariæ venerat. Ingrediebantur toto die Viennam currus, quadrigæ, & bigæ Hungarorum & Polonorum. Vehebantur multi in curribus illis velocibus, quibus nomen est patria lingua *Kottsch*, magnaue omnium fuit expectatio illius ingressus tot Regum ac Principum. Sed ne omni careret felicitate, suborta est pluuiæ, quæ paulatim incepit & primum tenuis, tota dehinc pene die durauit. Ex vrbe sunt obuiam egressi CÆSARI & REGIBVS, electissimi pedites mille quingenti, quorum magna pars rubeis vestibus decorata fuit, ex ciuibus & filiis Viennensium, quos præcesserunt in equis sex senatores armati. Hos vrbs Viennensis ante Cæsaris aduentum diu in eius honorem præordinauit, post hos trecenti alii pedites, quos Cæsar ex imperio huc præmiserat fere omnes lanceati: Pauci secures, aliqui bombardas manuales gestabant, sed electissimi erant omnes & singulari ordine decori. Ad portam vrbs vsque egressus est vniuersus clerus: Primum quatuor ordines Mendicantium, Canonici regulares apud sanctam Dorotheam, Monachi ordinis sancti Benedicti, qui omnes reliquias sanctorum deferebant. Exinde parui scholastici ciuium Viennensium liberi in magna multitudine, singuli deferebant vexilla cum armis & insignibus, hi arma Imperii, aquilas, hi insignia regis Hungariæ, hi insignia Poloniæ, hi insignia Bohemiæ, illi arma Austriæ, illi Burgundiæ, hos sequebantur sacerdotes seculares singulorum templorum vrbs Viennensis. Tum immensa multitudo studentum studii generalis Viennensis, primum scholares, posthac Baccalaurei, dehinc Magistri, tum Doctores singularum facultatum, Medicæ, Juridicæ, ac Theologiæ. Postremo Rector vniuersitatis Doctor Theologiæ Christophorus Kulber.

Egressa sunt etiam omnium artificum collegia, quæ Zeche vulgo dicuntur, singulæ cum vexillis ac cereis, quæ numero sunt sexaginta circiter omnis generis qui vspiam in ciuitate reperiri possunt: Fabri lignarii omnis generis, fabri ferrei item omnis generis, Senatores, Fibulatores, Acufices, & qui ferrum ac cuprum, & qui aurum argentumque fabricant, Setarii & qui pectines faciunt, Fullones, Pileatores, Pistores, Molitores, Piscatores, Lanii, Cerdones, Sutores, Sartores, Phrigiones, Calceatores, Institores, Vinitores triplici ordine, Calones, Aurigæ, Carbonarii, Pelliones, Venatores, Pannifices, Figuli, Obsonarii, Rasores, Rotarii, Mensarii, Tornatores, Balneatores, Funifices, Chirothecarii, & qui peras ac marsupia consuunt, Fusores, Gladiatores, Tinctores, Pictores & Lapidæ & Latomi, Muratores, Coriarii, Sufferratores, & id genus alii opifices, qui latinis vocabulis vix exprimuntur. Pluuiæ autem effecit, ne omnes ordine pulchro ingrederentur urbem. Nam quandoque inualuit &



multos coegit relicta statione sua ingredi: Præterea interuenerant currus qui iter aliorum impediabant, tamen nihilominus post quintam horam ingressa est primum familia Cardinalis Gurcensis, deinde ducis Bauariæ Wilhelmi circiter centum sexaginta bene armati post Hufferones, tum tibicines, deinde Casimirus Marchio cum comite de Hennenberg, ac suis familiaribus, tum equites Lanceati domini Wilhelmi de Rogendorff, & familiares Leonardi Rauber Marefcalci. Posthæc familia Cæsaris, Comites prænominati, de Monfort, de Schaumberg, de Mansfeldt, de Westerberg, de Hardeck, qui omnes (vt supra scripsimus) fuerunt elegantissime ornati, vestibus, gemmis, aureis torquibus, & monilibus. Hos sequebantur nobiles vtriusque Austriæ, cum trecentis & quinquaginta equis, & Joannes Jacobus de Landaw cum nonaginta, ac Thomas Fuchs cum centum quinquaginta & alii plures. Tum ingressi sunt urbem Hufferones cum equis tectis, & Moschi sagittarii cum suis tibicinibus, ac Tartari. Post Hungari cum suis vexillis (vt scripsimus) tum habitu Turcali quidam rubeis vestibus vestiti, familiaque vtriusque Regis ac Episcoporum Principumque, qui numerari non poterant, quod pluuia ordinem destruxit.

Nunc enim Alemani, nunc Hungari, nunc Poloni, nunc Bohemi, nunc Moschouitæ & Tartari, promiscue ingressi sunt. Quamuis certe magnus vndique ornatus visus fuit. Multi pueri visi, qui brachia perlis onusta gesserunt. Multi Poloni habitu germanico vestiti, à nostris nosci non potuerunt. Diuersus post habitus visus est, & magna caterua equitum Regis Poloniæ, sed immixti & Germani, quoniam Ludouicus Dux Bauariæ cum suis adequitabat. Iterum Hufferones Vngarici, & tubicines Hungarici, post equi Cæsaris, & tredecim illi pueri, quos superius scripsimus nigro veluto vestiti. Leonardus Rauber Cæsaris Marefchalcus, in equo cataphractato, quem pone sequebantur Archiepiscopus Bremensis, Episcopus Patauiensis, Episcopus Labacensis, Episcopus Kyemensis: Episcopi quoque Hungarici prædicti, Colocensis, Quinque ecclesiensis, Vaciensis: & Polonici, Vladislauiensis, Posnaniensis & Premisliensis, Ludouicus Dux Bauariæ, & Vdalricus Dux Wirtenbergenfis. Subsequebantur oratores summi Pontificis, Episcopus Veltrensis, & Rex Aragonum. Post duo ministri Cardinalium, quos vulgo Macir appellamus, qui scepra horum deferrebant.

Tum Cardinales Strigoniensis, & Gurcensis, simul in rubeo habitu Cardinalium. Strigoniensem tanquam Legatum de latere, præcedebat quidam Sacerdos cum cruce argentea deaurata, vndique cingebantur ambo suis parasfrenariis & ministris. Hinc ante Reges, primores consilarii ex vtroque regno, optime ornati, tum Cæsaris Erhaldi cum tubicinibus optimis. Hos sequebantur duo reges, Sigismundus Poloniæ à dextris, & Ludouicus Hungariæ & Bohemiæ à sinistris, cincti Baronibus & nobilibus, qui pedites circa eos ambulabant. Hinc Cæsar & Rex Hungariæ duabus lecticis ferebantur, & multa nobilitas circa hos ambulabat optime tam vestibus, quam monilibus ornata. Deinde Anna filia Regis vehabatur in pulcherrimo deaurato curru, in quo octo candidi equi incedebant. A latere eius equitabat Marchio Georgius, & comes Petrus de Posingen. Currum antecedeat dominus Protefilaus de Schmihau magister domus, cum fratre. Sequebatur hunc alius curru deauratus cum sex niueis equis, & quatuor alii currus, in singulis quatuor equi vnius coloris, repleti virginibus, & matronis quæ Reginæ seruierunt. Comitabantur octuaginta equites bene vestiti in diuersis coloribus, viridi, croceo & fusco, familiares Marchionis Georgii, post quos multi currus varii equites sine ordine, nam pluuia creuit & quisque hospitium quærebat iam madidus, necesse ideo fuit ordinem inturbare.

Quando iam Cæsar cum Regibus attigit templum sancti Stephani, præteriens arcum domus, in qua quotannis solent ostendi reliquiæ sanctorum, stabat in summitate huius Antistes Viennensis Georgius, in habitu episcopali cum plerisque sacerdotibus, & dicens quasdam orationes, dedit benedictionem Regibus



gibus & Principibus. Capella autem Cæsaris concinne cantabat suauissimis concentibus canticum illud; *Te DEum laudamus*. Ascenderunt itaque simul ad arcem. Sed Rex Poloniæ declinavit ad sinistrum, & in hospitium suum, insignem domum, quæ vulgo *leporum domus* dicitur, diuertit. Nam Rex Hungariæ cum liberis recta via ingressus est arcem, Cæsar autem per hortum intrauit. Omnibus enim viribus Cæsar laboravit, ut summum honorem Regibus ostenderet, nec ullis vnquam pepercit expensis, vbique sollicitus & circumspectus. Duravit hic ingressus horis duabus, & numerati sunt equitum, qui in ordine intrarunt, tria millia quingenti, præter hos qui passim & sparsim ingressi sunt, qui plures fuerunt sexingentis. Nimirum pulcherrimus ingressus & raro visus, etiam in pluribus seculis, si non pluuia ordinem conturbasset, & hanc solam felicitatem abstulisset.

Decima octaua Julii quieuerunt: sed Cæsar, qui paruam quietem habuit, vndique anxius & sollicitus apertis cistis suis thesauros suos recognouit, quos preciosissimos aduexerat, Regique Poloniæ, Regi Ludouico ac Annæ sorori, primum nobilissimum pannum aureum, hætenus raro visum, singulis pro veste amplissima muneri mittit, ut eodem habitu omnes incederent.

Decima nona, mane circiter octauam, Reges simul cum Cæsare in arce conuenerunt cum suis consiliariis, & locatis tribus sellis ornatissimis, quibus duo Reges, Cæsar vero in medio sedit, Ludouicus autem à latere patrum Regis Poloniæ, in fenestra duo Cardinales, tum Oratores summi Pontificis ac Regis Aragonum, tum Archiepiscopi & Episcopi vtriusque Regis, deinceps procures regni Hungariæ, Poloniæ ac Bohemiæ, à dextris principes & consilarii Cæsaris, erant omnes plus centum.

Occurrebat mihi aspectus, qualis olim senatus Romanus ex centum patribus fuit. Vbi factum est silentium, Cæsar loqui incepit, & præter omnium expectationem Reges ita commouit, ut eos sibi maxime deuinciret. Gratias enim illis amplissimas egit, quod tantam moram tam patienter tulissent, donec aduentaret. Licet hoc DEO acceptum referret, qui voluisset illos tam diu expectare, quoad conuenirent pro communi vniuersæ Reipublicæ Christianæ commodo & tranquillitate, deinde aduersus impios Turcos pro sumenda expeditione prudentissime locutus, de modo & via, & nonnulla alia, quæ nunc referre importunum est. Tota autem fere hora loquebatur, non tam honeste quam prudentissime, omnium in se ora atque oculos conuertit; eosque ita demulsi, ut multi qui non boni Cæsariani fuerint, sed ab eo multum alienati, jam se submitterent, palamque faterentur, eam humanitatem, prudentiam ac dexteritatem nunquam in Cæsare ac tanto Principe expectasse. Aperteque Cæsarem extollebant, ac eminentissime laudabant, non tam eius egregie res gestas, sed singula dicta factaque.

Vbi perorauit, Cardinalis Strigoniensis vtrumque Regem adiens, & simul Colocensis, item Quinque ecclesiensis, ut ab eis quid respondendum foret, intelligerent: Ac mox dehinc Cardinalis Strigoniensis, amborum Regum nomine respondit elegantissime, ut homo est raræ prudentiæ ac doctrinæ. Jussus est hinc à Cæsare Cardinalis Gurcensis, ut verba faceret, qui etiam elegantissime diu loquutus coram Cæsare, Regibus, & vniuerso senatu, & reuera potuit hic senatus comparari centum patribus Romanis, dum olim Roma floruit, tam honestus erat Senatorum ac Principum aspectus. Dimisso senatu, quisque in ædes suas diuertit.

Eodem die post coenam hora sexta, facta est chorea in arce, iussit Cæsar, ut singuli Reges quinquaginta tantum secum afferrent, viginti quinque spectatores, & totidem qui choreas ducerent, ne ex multitudine nimia fieret perturbatio: sed principes indiscriminatim cum suis irruebant, & maxima præter spem conuenerat multitudo, licet omnes januæ diligentissime custodirentur. Fuit autem hæc chorea instituta, ut domina Maria Archiducissa Austriæ, filia Regis Phi-



lippi, & Cæsaris neptis, susciperet Reges & dominam Annam, quos nondum viderat. Ubi ergo Cæsar, Rex Hungariæ & Poloniæ tribus sellis confederant, Rex Ludouicus, & soror domina Anna seorsum suas habuerunt sedes. Tum ingressa est domina Maria præcedentibus principibus, Ducibus Bauariæ, & aliis quotquot hic erant Comitibus & Baronibus, & magistro curiæ domino suo de Rattal, quam multæ nobilissimæ matronæ, Comitissæ, & Baronum vxores, cum multis virginibus sequebantur. Quæ postquam regiam Cæsaris, vbi eam operiebantur intrauit, nam extra arcem tum habitabat in domo Comitissæ Ciliæ, decore motu flexis genibus, vt est morigeratissima, & à cunabulis recte instituta, primum Cæsarem auum, tum cæteros Reges ac dominam Annam salutauit. Locata illi sedes erat prope Regem Vladislaum à dextris, ad quam accessit, sed non sedit, donec Balthazar Mercklin Præpositus in Valdkirch nomine suo Reges & sponsum suum benignissime exciperet, pulchra ac affabili comitate. Rex Poloniæ accersito suo Vicecancellario D. Petro Episcopo Premisliensi, illi mandauit, vt nomine fratris & nepotis Ludouici ac Annæ responderet, quod & factum est. Nam Petrus Episcopus vir haud contemnendus, siue ex tempore oporteat loqui, siue præmeditate, bonarum literarum optimus patronus. Peractis ceremoniis post mutua colloquia chorea est incepta, clangentibus tubis & bene sonantibus, quas Cæsaris tubicines inflabant. Primamque choream duxit Rex Ludouicus cum sorore sua Anna, præeuntibus duobus Comitibus de Mansfeldt, de Vesterburg ac duobus Principibus, Casimiro & Duce de Mechelburg cum quatuor cereis, comitantibus duobus magistris curiæ Prothesilao de Schmi-hau & Petro Carlatzki. Secundam choream duxit Dux Bauariæ Wilhelmus cum domina Maria Cæsaris nepte, cui duo Comites præibant de Hennenberg, & Hardeck. Tertiam choream iterum Rex Ludouicus cum magistra curiæ dominæ Reginæ Mariæ, domina Rottalerin vxore domini Georgii de Rottal. Post cæteri domini Comites & Barones choreas duxerunt. Et circiter decimam horam noctis quisque domum suam reuersus est.

Duobus sequentibus diebus, consultatum est super negotiis, pro quibus conuenerant, & semper vsque ad horam secundam post meridiem & longius protractum est consilium, vt prandium consiliariorum & principum fieret circa tertiam. Nobiliores vero in militia, interea sese exercebant in palestra, Marchioque Brandenburgensis Georgius cum hastis concurrebat cum Comite de Hennenberg, in arce Viennensi, cum duobus aliis militibus.

Vigesima secunda die, quæ erat diuæ Mariæ Magdalænæ institutus est dies pro contrahendis sponsalibus inter principes & Reginulas, ideo vniuersa nobilitas simul cum regibus ad arcem confluxerat, in obsequium quisque, vt potuit exquisitissime ornatus, non tam vestitu, quam pretiosis monilibus ac clinodiis, vt dicitur. Cæsar cum Regibus ac consiliariis secretiora quædam tractauit in priuato, quæ referre non est operæ precium.

Tum accersita Anna, eam Corona aurea donauit, & capiti suo imposuit, quæ res seniore Regem Vladislaum prouocauit in lachrymas; vicissim ipsa Cæsarem pretiosissimo ferto exornauit. Elegantissimo igitur ordine Cæsar cum Regibus Poloniæ & Ludouico in equis. Seniore vehente in lectica, & Reginulis in curribus, præcedente & comitante nobilium caterua insigni, post nonam horam descendit ad templum sancti Stephani, quod erat elegantissime ornatum. Chorus aulaeis aureis & sericeis contextus. In dextra stabant Cæsar, rex Vladislaus, rex Sigismundus, omnes aureis vestibus ornati: Cæsar maxima torqui ex margaritis lapidibus preciosissimis, conspicuus omnibus erat. In bireto monile ex adamantibus preciosissimum gestabat, æstimabatur eius ornatus p. 316 vna milione auri. Post Ludouicum stabat Orator Regis Angliæ, Orator Archiducis Caroli Austriæ & Burgundiæ, Dux Wilhelmus, Marchio Casimirus, Dux de Mechelburg, Dux Wirtenbergensis, Orator Ducis Ferrariæ, & dehinc insigniores ex regnicolis Hungariæ, Bohemiæ & Poloniæ. In medio chori duo erant pulpita



pulpita aureis pannis contecta, in quibus duæ Reginæ stabant, Anna & Maria, circa quas à lateribus Orator Regis Aragonum, & Ludouicus Dux Bauariæ, Marchio Georgius, & Comes Petrus de Posing cum plerisque aliis inferuebant nobilibus Annæ. Pone stabat ingens multitudo matronarum & virginum, quæ Reginis subsequebatur sedula ad obsequium. A sinistris locati erant primum Cardinalis Thomas Strigonienſis legatus Apoſtolicus, Cardinalis Gurcenſis, Matthæus nuncius Apoſtolicus, Episcopus Veltrenſis, Archiepiſcopus Colocenſis Gregorius, Archiepiſcopus Bremenſis Chriſtophorus, Episcopus Quinque eccleſienſis Georgius, Episcopus Matthias Vladislauienſis, Episcopus Olomucenſis Stanislaus, Episcopus Ratiſponenſis Joannes, Episcopus Vacienſis Ladislaus, Episcopus Poſnanienſis Joannes, Episcopus Patauienſis Vigelius, Episcopus Labacenſis Chriſtophorus, Episcopus Kremiſlenſis Petrus, Episcopus Boſnenſis Michael, Episcopus Pyemenſis Bertholdus, cum multis prælatiſ & præpoſitiſ.

Episcopus Viennenſis celebrauit ſummum officium, quod cum ſumma reuerentia & amœniſſimiſ concentibꝫ diuerſorum muſicorum peragebatur. Quotuiſque enim Princeps eſt hodie in orbe noſtro, qui ſingularia ingenia muſicorum ita veneratur & appretiat, ſicut Cæſar? Sub eo itaque noua inſtrumenta muſices excogitata atque inuenta ſunt, quæ vetuſtas non habuit, ſeculum noſtrum non vidit, ſicut in diuerſiſ generibꝫ fiſtularum patet, & in illo ipſo inſtrumento quod *Regale* appellatur, ſine fiſtuliſ & chordiſ ab aurifabro inuentum, & in illo mirabiliſ, quod nuper monachus excogitauit, quod fiſtulas nullas habet, ſed quadaſdam concauitateſ in latum lignum exciſaſ, in modum ſerpentum ambulanteſ, quod ſonorum admodum edit concentum, & ex Rhe-no nuper allatum eſt inſtrumentum, quod voceſ auium repræſentat. Quæ omnia Paulus muſicorum princeps, cum illo ſimul quod ipſe reperit ex cornibꝫ, aptiſſime tangebatur, & ſimul cum cantatoribꝫ diuerſiſ vocibꝫ.

Finito officio Richardus Peruſinus, Reuerendiſſimi Cardinaliſ Gurcenſiſ, Capellanus dicere incepit, vt eſt eloquentiſſimus, ſed ſtrepitu nobilium, quia audiri non potuit, in medio deſtitit. Hic etiam tribuſ libriſ, quos *Odeporicon* vocat conuentum hunc celebrauit. Interea Imperator quodam ſecretiori loco regalibuſ amiſtuſ & coronatuſ, vt Cæſar, introiuit chorum, cui deſponſata eſt domina Anna per Reuerendiſſimum Cardinalem Strigonienſem per annuli ſubarrationem. Tum Ludouicus Rex, & Domina Maria per eundem Dominum Cardinalem copulati & coniuncti ſunt.

Reſidente tunc Cæſare in ſolio maiſtatiſ: à lateribuſ cingebatur tribuſ præſatiſ regibuſ, quibꝫ ſinguliſ nuduſ eſt datus enſiſ, vt militeſ inſignirent. Accurrebat vniuerſa nobilitaſ, in qua intermixti etiam fuerunt nonnulli noui homineſ & plebei. Creati ſunt tum à Cæſare, & tribuſ Regibuſ pluſquam ducenti militeſ ſiue equiteſ aurati (vt vulguſ loquitur) quo perfectio, aſcendit Cardinaliſ Strigonienſiſ ad ſummum altare danſ benediſtionem: cuiuſ ſuffraganeuſ ſua & Domini Gurcenſiſ auctoritate pronunciauit plenariam indulgentiam. Mox omneſ inflatæ ſunt tubæ, & mirabilis audituſ eſt concentuſ: Simul cantoreſ, *Te DEum laudamus* pronunciabant. Et in organiſ Magiſter Pauluſ, qui in vniuerſa Germania ſecunduſ non habet, reſpondit. Vſque in primam horam poſt meridiem durauit hæc feſtiuitaſ. Quiſque dehinc in ſuum hoſpitiuſ diuertit ad ſumenduſ meridianuſ cibum.

Poſt prandiuſ ad ſpectaculuſ haſtiludii omneſ conuenerunt, & Cæſar & Reges, Reginulæque eadem habitatione proſpectabant concuſſum eorum, qui haſtiſ luſerunt. Erant autem primi, Comes Joanneſ de Hardeck, & Dauid de Kneringen, de hinc Caſimiruſ Marchio, & Joanneſ Jacobuſ de Landaw, poſt Georgiuſ Marchio, & Adolphuſ de Bibrach.

In principio noctiſ conueniunt omneſ Reges cum Cæſare ad coenam, quia nuptiaſ hac nocte celebrabant, dominuſ Sigismunduſ de Dieterichſtein, & Barbara virgo, filia Domini Georgii de Rottal, parata erat coena regia innumeris dapibuſ.

Regal.

Richardi Bay  
tolini Hodepo-  
ricon.



dapibus. Collocabatur in principio tabulæ Rex Hungariæ Vladislaus, dehinc sponsa Barbara, tum Cæsar, post domina Anna, tum Rex Poloniæ, tum domina Maria, post Rex Ludouicus, tum eius Magistra curiæ, post Archiepiscopus Bremensis, tum Ratisponensis præsul, tum cæteri Duces sæpius nominati, quibus semper immiscebantur matronæ & virgines, tum vtriusque Regis consiliarii & familiares, semper immixtis puellis. Durauit hæc cœna in 10. horam noctis splendidissima & opipara, quâ finita Cæsar & Reges in aliud descendentes palatium, choreas duxerunt. Et hinc quisque diuersorium suum petiit.

Vigesima tertia Julii, Cæsar virginibus dominæ Annæ plus sexingentis vlnis de veluto & alterius generis serici pro vestibus muneri misit, Regi autem Poloniæ duos equos cataphractatos, quorum vnus armatus erat vsque ad ungulas, quod à paucis alias est visum. Quos cum tanta gratitudine acceperat, vt illum totum æneum equum inspiciens, cum animi iucunditate diceret ipse sine interprete; *Accipio hunc equum gratissimo animo à Cæsarea maiestate, in quo promptus ero ad mandata illius, quando mea vti voluerit opera: & comparebo vbi volet, donec hæc mihi vita supererit.* Cantharum deinde argenteum faberrime factum, cuius labor æquabat pretium, & in quo admirabilis erat veneranda vetustas, donauit. Regi vero Ludouico equum cataphractatum & arma pro corpore suo deaurata, & ingeniosissime fabrefacta, à paucis hæcenus similia visa.

Vigesima quarta, ante prandium consilium habebatur: post prandium Cæsar & Reges ad spectaculum hastiludii conuenerunt, quod horis pene quatuor durauit. Rex Poloniæ ad suum hospitium, Cæsar cum aliis duobus regibus & reginulis ad arcem diuertit, & simul cœnam duxerunt lætissimam: qua finita allata sunt numismata aurea & argentea, magna præter solitum cum imagine Cæsaris, quæ Cæsar regibus & reginulis dispartitus est, & ad chartam ludere coeperunt. Sed Rex Ludouicus, domina Anna & Maria maiorem partem numismatum abstulerunt, Cæsar nihil, Vladislaus rex parum lucratus est. Fuerunt multa iocosa in hac cœna prolata.

Vigesima quinta Julii, institutus est ludus militaris, *Torneamentum* vulgo dicitur, antiquitus ludus Troianus, simulacrum veri belli. Fuerunt in eo triginta duo in equis cataphractatis toti ænei, optime armati, in galeis christati cum suis insignibus, cuiuslibet lancea & ensis erat. Primum fuit concursus cum lanceis, deinde abiectis hastis & clypeis, concurrebant cum ensibus, sese mutuo verberantes, donec qui ad hoc ordinati erant sectores bellum dirimebant. Fiebat hoc in latissimo foro prope templum fratrum Carmelitarum, vbi quondam Henricus filius sancti Leopoldi, Marchionis Austriæ, primus Dux à Friderico Ænobarba Imperatore creatus, qui cœnobium Scotorum Viennæ hic sepultus fundauit, arcem & curiam habuit. Vnde & hodie adhuc locus ille *Curia* appellatur. Circa hoc templum extructum erat theatrum temporarium latissimum, ad quod ascenderant Cæsar, Reges & Reginulæ, duo Cardinales, Archiepiscopi & alii Prælati, cum Principibus & Baronibus, cum magna & insigni nobilitate. E regione huius erat alia domus, in qua clypei & arma perduellionum pendebant, & vbi tibicen triplici concentu ter concurrentes prouocabat, Erhaldi quoque hic prospectabant, qui victoriam & palmam merebantur. Erat locus hic quadratus & duplicibus palis circumvallatus, in medio stabant armigeri & lanceati, ciuium Viennensium mille quingenti, qui bene ornati (vt superius scripsimus) hic excubabant. Erat & tertia domus extructa, in qua vxores & filiæ ciuium hoc quoque spectabant spectaculum. Nam omnium domorum adiacentium fenestræ non modo repletæ erant, sed tecta quoque hominibus cooperiebantur, tam ingens hominum frequentia hic aderat. Magna tamen vndique habita diligentia & custodia, ne qua seditio, neuè tumultus aliquis inter tot homines, tam diuersas nationes, tam diuersas sectas exoriretur. Prouiderunt hæc multo ante singulari prudentia Senatores Viennenses, qui custodiam in portis vrbs, nocturnas & diurnas vigilias in singulis turribus vrbs, in monaste-



monasteriis ordinauerunt, & si forte incendium oriretur, artifices cum instrumentis sufficientissimis adhibuerunt, ac in tumultu, si forte excitaretur, praesto essent. Nihil itaque iis omnibus diebus aut publice aut priuatim ortum est. Timebant omnes incendium, aut seditionem aliquam inter tam diuersas gentes: quia hic Alemanni, Itali, Hispani, Franci, Hungari, Poloni, Bohemi, Morau, Slesitæ, Moschi, Tartari & Armeni, & Tusci simul iuncti fuerunt, sed DEo optimo Duce tranquillissime omnia peracta sunt. Durauit enim hoc spectaculum plus duabus horis, quo finito Cæsar in eodem theatro multos milites in praesentia Regum & Principum insigniuit. Lanceati autem & armigeri ciuium Viennensium, facta pulcra ordinatione & circuitu in orbem de more suo abierunt.

p.318 *Fuerunt autem hi in Torneamento, qui hoc pacto, primum bini & bini concurrerunt, & tandem omnes simul uno impetu.*

Dux Wilhelmus Bauariæ & Marchio Casimirus Brandenburg.

Dux de Mechelburg Albertus, & Georgius Marchio Brandeburgensis.

Comes Wolfgangus de Montfort, & Comes Bertholdus de Hennenberg.

Dominus de Verona debuit concurrere cum domino Joanne Comite de Hardeck, sed nescio qua causa idem Dominus fuit absens, ideo in eius locum succedebat Dominus Leonardus de Liechtenstein, qui bis concurrebat.

Dominus de Rapoldstein, & Sebastianus de Hohenfeldt.

Dominus Hieronymus de Stauffen, dominus in Ernfeld, & Joannes de Schwartzenberg.

Vdalricus Marscalcus de Bappenheim, & N. de Geroltzack.

Wolfgangus de Schellenberg, & Sebastianus de Veittmull.

Caspar Vintzerer, & Sigismundus de Hesperg.

Albertus Pencker, & N. Bellitzki.

Wilhelmus de Greis, & Georgius Kongel.

Valthasar Tanhauser, & N. de Emerszhoffen.

N. de Losenstein, & Dorle Polonus.

N. Kietzcher, & Wolfgangus Groswein.

Leonardus de Lichtenstein, bis (vt dixi) congressus est duello, & Christophorus Mindorffer.

Dominus de Dana.

Inuitati sunt omnes Principes & Barones post coenam ad choream. Ad quam facta coena, venerunt Reges & Principes cum vniuersa nobilitate. Erat Curia arcis mundata, & auleis pulchris exornata, tot cereis illuminabatur, vt tenebrae noctis vincerentur cereis splendoribus. Sedebant longa serie nobiliores matronæ & virgines ex vna parte. In alia Cæsar, tres Reges, duæ Reginulæ, magnus Principum & nobilium numerus. Cæsar cum domina Anna choream duxit, Ludouicus cum domina Maria, post Rex item Poloniae cum domina Anna, post sunt ferta & munera donata Principibus & nobilibus, qui illo die in torneamento duellum fecerunt. Dehinc post aliquot choreas Cæsar ascendit cubiculum. Reges autem in quoddam palatium cum Reginulis, principibus & virginibus, vbi parata erat regalis collatio mellariis & fructibus, illic omnis generis potus & abundantia. Sic vsque in horam pene secundam post mediam noctem deductum erat illud conuiuolum. Dehinc quisque in suas aedes diuertit.

Maturabant dehinc singuli suum discessum, diu enim vterque Rex aberat à Regno suo. Et Cæsar ab Heluetiis sollicitabatur, sed nondum conscriptæ erant literæ contractus. Biduum igitur, hoc est, XXVII. & XXVIII. dies Iulii, consumptum



sumptum est in scribendis literis, & dandis vicissim muneribus, sed ne Cæsar ullum humanitatis officium omitteret, nemine sperante cum suis consiliariis, & aulicis descendit ad hospitium Regis Poloniae, & ipsum visitavit. (Nam Rex Hungariae erat secum in arce) & tum ad aedes Cardinalis Strigoniensis, quem etiam sua praesentia honoravit, ut est clementissimus & humanissimus Princeps. Præterea cursus equorum etiam factus est: habuit primus pulchrum argenteum deauratum poculum quod faberrime factum erat.

Hinc Rex Poloniae de nobilissimis pellibus Zobelinis honoravit Cæsarem, de hinc Cæsaris consiliarios, & eos praesertim, qui his negotiis interfuerunt. Cæsar vicissim largissima munera ordinavit utriusque Regis consiliariis liberalissime, de auro, argento, poculis, vasis omnis generis, torquibus & sericeis vestibus. Judico ego & puto me non falli, Cæsarem in hac festiuitate exposuisse pro impensis (nam utrumque Regem suis alimentis liberalissime cum liberis quoque aluit) & muneribus supra centum quinquaginta millia nummum, erogasse: tanta liberalitate usus est erga Reges & Principes & consiliarios.

Vigesima octava die, de nocte post coenam, hora pene septima conveniunt Reges Cæsarem (iam enim de singulis erat conclusum) & postquam tribus sellis locati erant, in quarum medio Cæsar, in latere Ludouicus, post duo Cardinales, dehinc cæteri principes & consilarii residebant, Cæsar (ut est humanissimus) alloquutus Reges suavissimis sermonibus, tandem iussit Cuspinianum pronunciare, quod decrevisset. Cuspinianus debita inclinatione flexus, p. 319 ad latus Regum stans, alta voce, Latina & Germanica lingua ut ab omnibus intelligeretur, in hanc formam proclamavit, cunctis bene audientibus:

*De mandato sacratissima Caesareæ Maiestatis, & Serenissimorum Vladislai & Ludouici Hungariae & Boëmie, ac Sigismundi Poloniae Regum, Notum sit uniuerfis, qui ad laudem omnipotentis DEi & gloriose virginis Mariae, & totius curiae caelestis, nec non ad incrementum & conseruationem totius Reipublicae Christianae, & praecipue regnorum, dominiorum, & subditorum suorum, inter se inierunt, contractarunt, concluderunt, & confirmarunt, veram, sinceram & inuiolabilem atque firmam concordiam, amicitiam, unionem & intelligentiam confederationis, perpetuo & indissolubiliter duraturam: ad mutuam protectionem & defensionem contra eorum hostes quoscunque & praesertim contra hostes infideles, & ad hostium suorum futurorum perniciem. Et quo magis hac unio inter eos stabiliatur, ultra necessitudinem, quae alias inter hereditates eorum intercedit, etiam nouam affinitatem & connubium inter se & nepotes, & liberos eorum contraxerunt. Quod felix faustumque Maiestatibus praefatis, regnis & dominiis eorum sit, Amen.*

Vigesima nona Iulii, horam circiter nonam, Cæsar in equo cataphractato ornatissimis armis à capite ad pedes tectus, & preciosissima torque, ex vnionibus & gemmis, cum Ludouico Rege iisdem armis & equo cataphractato ornatus, quibus à Cæsare donatus erat, cum omni exercitu Principum, Baronum ac nobilium, urbem Viennam egressus, ad Nouam ciuitatem perrexit eodem pene ordine qui superius scriptus est, comitantibus peditibus Viennensibus. Sed Ludouicus Viennam repetit: Cæsar Nouam ciuitatem ingressus est.

Trigesima Iulii, Cuspinianus munera Caesarea, quae pridem Cæsar ordinauerat, ex manibus Thesaurarii domini Jacobi Villinger accepta, Regis utriusque consiliariis detulit, quae plurima ac preciosa erant, ac singulis, ut iussus erat, distribuit.



Vltima Julii, tres Reges, duæ Reginulæ, duo Cardinales potiores ex curia Regis Poloniæ, vniuersi vero Hungari, simul à Vienna ad Nouam ciuitatem profecti sunt, & recepti in arce, humanissime à Cæsare tractati.

Prima Augusti, mane ante prandium, Ludouicus, domina Anna & Maria ingressi sunt viuarium prope arcem, vbi innumeri hinnuli, cerui, damæque aluntur, & sagittis iaculati damam ac ceruam, patri suo Regi Vladislao obtulerunt, quasi prædam à se captam. Post prandium vero Rex Poloniæ, & Vladislaus egressi Nouam ciuitatem ad Cæsarem qui iuxta syluam illos expectabat, pulcherrimam Venationem ceruorum illis exhibuit, ac ea finita illos ad Nouam ciuitatem reduxit, ac ibi coenauit. Post egressus in Egenfurt, vbi honoris causa pernoctare solebat, vt integram arcem Regibus relinqueret.

Secunda Augusti ingressus Nouam ciuitatem Cæsar, factò ibi prandio, ad sese conuocauit vtrosque reges seniores, & adhibitis duobus Cardinalibus, & paucissimis consiliariis, tribus continuis horis cum iis tractauit, ac post valedixit. Dehinc ad Gynæcium descendens, Ludouicum amplexus optime valere iussit, Mariam osculo patrio more salutauit. Dominam Annam brachiis amplexus deseruit, multisque post se desiderium reliquit. Dehinc conscenso equo rediit in Ebenfurt, & sequentibus diebus per Austriam versus Lyntzium iter arripuit.

Tertia Augusti, Rex Poloniæ fratrem Vladislaum & nepotem Ludouicum, ac duas Reginulas valedixit. Post subscriptas manu sua, & fratris, ac sigillatas literas, iter ad Viennam resumpsit. Rex autem Vladislaus, cum maximo gemitu ac lachrymis filiam Annam salutauit. Ortus est ingens vtrobique eiulatus, hinc pater, hinc filius, hinc filia etiam astantibus lachrymas excusserunt, coacti sunt consilarii vi patrem abducere, qui vna cum filio eo die adhuc Suppronium cum omni sua curia concessit, Sempronium iudico appellari debere, quod Romani illic Duce Sempronio præsidia habuerunt: Sed omnia ea loca nominibus corrupta. Hodie enim *Posonium* appellatur, quod *Pisonium* à *Pisone* rectius vocabitur. Et *Scaurinum* hodie *Jaurinum* voce nihili dicitur; & *Strigonium*, quod etiam teste adhuc patria lingua *Istrogonum* vocabitur, sed de his alias. Nos ad nostra redeamus. Rex autem Poloniæ Viennam dehinc concessit. Volebat hinc Rex Poloniæ traicere Danubium, sed violentia aquæ pons ruptus, coactus est manere vsque in sextam Augusti, qua die egressus est rex, comitante Cardinale Gurcense, & cæteris Ducibus, qui supererant. Sed priori die, hoc est, quinta Augusti, castrum & arcem Viennensem ingressus est ad salutandum & valedicendum Annam & Mariam, cum quibus choreas duxit, & vniuersa eius nobilitas. Mutuis dehinc amplexibus sese salutarunt & valedixerunt: Alteraque die mane Viennam egressus est. Dehinc & Cardinalis, & Duces Cæsarem sequuti sunt.

*Posonium*  
*Jaurinum Stri-*  
*gonium.*

p.320 Sic summa cum tranquillitate solutus est celeberrimus ille Regum conuentus, sine dissidio, sine rancore, sine tumultu, sine seditione: Quod felix faustumque sit. DEus optimus maximus largiatur sua gratia, vt Rex Ludouicus ac Reginulæ ætatem sortiantur debitam, qua numerosam de se prolem relinquant, & Cæsar hostes suos castiget, & vnionem cum omnibus Christianis Principibus faciat, quo possit facilius sumi expeditio contra immanissimos Turcos, & fidei Christianæ perfidissimos hostes, Amen.

### AD LECTORES.

HABETIS candidi lectores, rem vt gesta est syncere & simpliciter scriptam, non affectate, aut tumide, nec phalerata oratione aut verborum aliquo

Tom. II.

H h h h 2

lenoci.



lenocinio, sed ut vicinus etiam intelligat, qui & numisma noscit, cui publica forma est, atque ideo necesse est in quotidianum & usitatum loquendi modum, etiam usque ad barbariem quandoque descendere. Malui enim rem aperte proponere, quam propositam à multis abscondere & velare. Namque haud video, qua ratione res illae sint nimium exornandae, quae per se sunt ornatissimae & insignes. Reuoluat aliquis multorum seculorum Annales, Chronica & historias, dicat si quando viderit simul congregatos Caesarem Romanum, tres coronatos Reges, duas Reginulas, ac duos Cardinales, cum tot principibus, proceribus, ac nobilibus, diuersarum nationum. Nunquid hoc pulchrum symposium & excellens, & apud posteros memorandum? Sed quod magis laudandum est & admirandum, quod inter tot diuersas nationes & sectas religionum, nullus est ortus tumultus, nulla seditio, nullum incendium, ex magnatibus & proceribus nullus mortuus est. Cum omni felicitate coierunt, cum eadem separati sunt: & quod amicissimum, nullus rancor interuenit, nullum dissidium. Fuerunt ab initio nonnullae friuolae suspiciones, quae sublatae sunt, visa vera integritate & amicitia: omnium rerum copia, nullus defectus, nec impensae difficiles, licet inundatio Danubii obstitit, quod non omnia fuerint longe uberiora & copiosiora. Haec enim Austriae pars, quae trans Danubium est, & Marchiae adiacet, unde & nomen habet, horreum nostrum est. Sed quanquam sola haec felicitas nobis defuit, quod crebrae erant pluuiae: Sperandum est tamen DEum optimum maximum gratiam suam pluuia influxisse. Ne altercatio aliqua suboriretur, omnia acta sunt feliciter & tranquille, non sine ingenti gaudio ac tripudio. DEus optimus maximus faxit, ut is conuentus exemplo sit omnibus Christianis Principibus, quo redeant in mutuam unionem ad concordiam, ad extirpandum fidei hostes, & ut religio Christi longius, latiusque per vniuersas illas nuper inuentas regiones propagetur & extendatur, ac semen Mahumeti excindatur radicitus & euellatur, ut vno ore omnes laudes

altissime decantemus, per vniuersum dicentes:

*Tu solus Dominus, Tu solus altissimus, Jesu  
Christe, Amen.*



## HODOEPORICON,

id est, Itinerarium

REVERENDISSIMI IN CHRISTO PATRIS ET DOMINI, D. MATTHÆI S. ANGELI CARDINALIS GURCENSIS, COADJUTORIS SALTZBURGENSIS, GENERALISQUE IMPERII LOCUMTENENTIS: QUÆQUE IN CONVENTU MAXIMILIANI CÆS. AUG. SERENISSIMORUMQUE REGUM, VLADISLAI, SIGISMUNDI, AC LUDOVICI, MEMORATU DIGNA GESTA SUNT, PER

RICCARDUM BARTHOLINUM PERUSINUM EDITUM.

JOANNES DANTISCVS

*Ad Lectorem.*

QVANTUM res veræ fictis præstare videntur,  
 Hoc recto doctum tramite pandit opus.  
 Non hic Cretensis Jouis incunabula, non hic  
 Quæ sunt de superis plurima ficta leges.  
 Semicapros faunos, Satyrosque fuisse bicornes  
 Quis credit? vel tot turpia monstra DEum.  
 Non raptum Stygii prædonis, Apollinis ignes  
 In Daphnem, Martis nec Venerisque thorum.  
 Non Diomedis equos, non illum Græcia mendax  
 Quem fert Troianas fraude subisse fores.  
 Hicque nec inuenies perplexa ænigmata Sphingos,  
 Nec quæ de Nihilo fabula longa datur.  
 Historiam nuper conuentus at ille probatam  
 Cæsaris & Regum facit in orbe trium.  
 Vidimus hic Annam, qua totus nil habet orbis  
 Pulchrius, Hunniaci est hæc decus vna soli.  
 Hanc sibi, vel charo conseruat forte nepoti  
 Cæsar, & est magno digna puella Joue.  
 Vidimus & Mariam, pulchris æquanda deabus,  
 Est siquidem, & primas inter habenda deas.  
 Cæsaris hæc neptis Regi Regina futura est,  
 Annis qui in teneris iam duo regna tenet.  
 Vidimus Heroas sacros, Proceresque, Ducesque,  
 Clarorum passimque agmina multa virum.  
 Tot gemmas, torques, phaleras, radiantiaque arma,  
 Tot mores, tot habitus, ingenii que vices.  
 Tot ludos etiam, spectacula pulchra, Triumphos:  
 Et quæ non aras viderat vlla prius.  
 Cuncta vt conspexit, Riccardus scripsit ad vnguem,  
 Delicium certe posteritatis erit.  
 Seu stricto incedit Vates pede, siue soluto  
 Orator, nemo cultior esse potest.  
 Hoc iter vt duxit Princeps Gurcensis ab vrbe  
 Augusta, videas, gesta que cuncta lege.

*Figmenta Poëtarum.**Cæsar. Reges.  
Anna Imperatrix.**Maria Regina Hungariae.**Riccardus Bartholinus.**Cardinalis Gurcensis.*



Tunc primum dices, viuas, pater inclyte, viuas,  
Cardinei specimen viue decusque chori.

Et merito laudes vni huic sunt vndique dandæ,

Omnis nam fuerat fons & origo boni.

Solus hic inflexit sensus, Regumque potentum

Pectora, multorum cordaque dura virum.

Christicolis solus diuino numine fultus,

In terris pacem post fera bella dedit.

Huic ætas debet præsens, & postera multum,

Tempore quod paruo commoda magna tulit.

Per quæ nunc noster recte componitur orbis,

Ex omni cedit parteque Martis amor.

Et crucis infidos propere ducetur in hostes:

Qui, Jouis hinc quid sint, experientur, Aues.

Fœderis hic formam nosces, pactosque hymenæos,

Cunctaque conuentus istius acta scies.

Nil finit intactum veri quod res habet in se:

Ante oculos plane singula gesta locat.

Res scitu digna est, nec enim reor esse, potest nec

In toto quicquam gratius orbe legi.

*Aquila.*

p. 322

p. 323

REVERENDISSIMO IN CHRISTO PATRI  
ET DOMINO, D. BERNARDO SANCTÆ Mariæ IN PORTI-  
CU DIACONO CARDINALI, DOMINO AC BENEFACTO-  
RI COLENDISSIMO, RICCARDUS BARTHOLI-  
NUS MANCIPIUM, FELICITATEM  
OPTAT.

**A**NCEPS eram Reuerendissime Domine, Cui mearum lucubrationum munus dedi-  
carem; sed cum Reuerendissimus Gurcensis numen meum, & tua Reuerendissima  
D. amantissimus, pomeridianus cœnaret, atque diuinas tui laudes vberrime extolle-  
ret, in quas volens inciderat, & inuitus ab iis retrahi videbatur, arbitratus sum,  
& illi, si hæc sub auspicio tuo ederentur, gratissimum fore; & tibi, quem gloria re-  
rum ab ipso prudenter feliciterque gestarum, summopere letari puto, non iniuncun-  
dum. Accipe igitur Reuerendiss. Gurcensis Hodoeporicon, ac Maximiliani Caesaris sem-  
per Augusti triumque potentissimorum regum Vladislai, Sigismundi, Ludouici, conuen-  
tum memorabilem, rerumque magnarum seriem, ita breuiter à me exaratam, ut nec  
dispendium operis fastidire possit, nec noscendi cupidos damnosa offendat concinnitas.  
At in quadam diuerſi, quæ si auribus tuis digna videbuntur, de reliquis quoque be-  
nemeritis existimari potero. Illud autem mihi suauissimum erit, Te in hoc libel-  
lo, in quem nihil perperam (nisi fallor) congeſſi, reperturum esse, quanta scilicet  
Reuerendiss. Gurcensis industria, prudentia, animique excellentia extiterit, quotque  
is etiam cum terra, tum aquis labores exantlauit, quoties aestuarit, alseritque ut  
tanti Imperatoris, tot Regum fœdus, affinitatesque coniungeret. Quæ quidem & si  
propter rerum magnitudinem prius egre credebantur, nunc, cum tuo consecrata no-  
mini, prodeant, puto & auo nostro, & apud posteros, cum sincere à me scripta sint,  
fide omnino non caritura.

**C**ONSULTVM mihi fuisset satis ex sententia, si ea, quæ obiter, atque sub-  
cisiuis (ut aiunt) horis collegi, tam præcoci fœtura minime prodissent.  
Optabam enim, ut cum primum meorum temporum angustiis paulo laxius  
spatium datum fuisset (id enim tantæ rei magnitudo, quam vix animo comple-  
ctor, exposcere videbatur) & vrbaniore & ampliora efficere. Verum cum in-  
quies,



quies sit animus & ponderis tanti impos, malui hæc breuiter, atque concise, potius quam nunquam quod stylo facundiore assequi cum laude non possem, in lucem dari. Nam quis Cardinalis Gurcensis labores, industriam atque animi magnitudinem merito prosequetur? Quis Maximiliani Imperatoris, Pii, Felicis triumque potentissimorum Regum, Ducum, ac Principum virorum conuentum, satis feliciter mandabit posteritati? & quoniam à remotis recedendi consilium est, hinc auspicabor. Vladislaus Pannorum Rex cum sibi non solum beneuolentia, sed etiam affinitate Cæsarem coniunxisset, reliquum erat, ut non solum hæc Cæsaris præsentia confirmarentur, sed etiam fratris Sigismundi Sarmatiæ Regis, in quem Cæsar hostilem animum iam præ se tulerat, partes miores fierent. Is ergo cum Cæsarem demulxisset, atque in suam quodammodo traxisset sententiam, fratri significauit, quam primum in Pannoniam, ut illic de rebus suis cum Cæsare sermonem haberet, proficisceretur. Fore autem sperabat ut & Cæsar veniret, & firmissima imposterum inter eos amicitia aboleretur, si quæ prius minus grata intercesserant, oriretur. Hoc cum à fratre Sigismundo Rex (Vilnæ quæ Lituaniæ, vastæ (ut aiunt) provinciæ metropolis est, morabatur) accepisset: Cracouiam versus, oppidum ad Vistulam eundi consilium cepit, quanquam nonnulli erant qui, ne id faceret, dissuaderent, arbitantes (quod etiam Mathematici quidam prædixerant) Cæsarem vel nunquam vel ad longum tempus visurum. Cumque hinc inde sententiæ proferrentur, magnanimus Rex sic dixisse fertur: *Quo nos cumque vocat fortuna Deusque sequamur. Nam Cæsarem videre omnino decretum est.* Nec mora, ex Sarmatia Pannoniam versus iter, de quo alibi scriptum est, cepit. Id quod cum Cæsar intellexisset, Reuerendissimum Cardinalem Gurcensem (ipse enim magnis negociis, quo minus iret, retinebatur, ut Reges in Pannonia conueniret, atque cum iis ut plane sibi mandauerat decerneret) destinauit. Simulque ei sex præstantissimos viros adiunxit, Marquardum præpositum Bambergensem, Wilhel mum de Rogendorff, Laurentium vicedominum Austriæ, Joannem Marescam, Cuspinianum Doctorem, Gabrielem Vogt; qui quidem, si quippiam, quo Gurcensis minime ut illuc proficisceretur, obstar, nihilominus solertiore quo possent cura apud reges negocium tractarent. Iis itaque rebus apud Cæsarem compositis Gurcensis Augustam, ut inde per Lycum, ac Danubium, postea in Pannoniam nauigaret, profectus est.

Tertio Idus Februarii Augusta Vindelicorum discessimus, primaque noctis (ut aiunt) face Sanctum Leonardum Bauariæ, multi nominis pagum, venimus. Postero die satis mane Ecclesiam ingressi sumus, ubi cum multâ catenarum genera, pedicas, manicasque, ac ferreas imagines contemplarer, admiratus ædituum, num illic fatui catenis vincirentur, interrogavi, *Minime*, inquit, *sed diui Leonardi, cui templum dicatum est, Numen esse, cui vincti catenis votum faciunt, liberati persoluunt, relictis ærumnarum monumentis posteritati.* Inde Neoburghum, vento, pluuiæque laceffiti petiuimus, obuiam præstantissimi adolescentes duo Roberti comitis Palatini filii, venerunt. Equi cum ad hospicia diuertissent, nos omnes vna in arcem recepti sumus, ubi & cœnaui, & prandimus laute. Adolescentulorum qui maior natu est, alteri Otho Friderico nomen est, alteri Philippo, sed ut maior facundior, alacriorque, ita minor (quod immatura fortasse ætas facit) parcior in loquendo, remissiorque videtur; tamen vterque indolis egregiæ, & qui etiam si non noscerentur, principum filii videri possint, addo eis non vulgarem educatorum curam iniunctam. Quanto enim fidelissimus quisque auo parentique in pace, belloque fuit, tanto eorundem recordatione venustissimis adolescentibus impensius fideliusque & incumbit, & consulit. Itaque cum iam dies diluculasceret, qui seruitia habebant, naui vna cum Gurcensi per Danubium vecti sunt, reliqui in equis, terrestri itinere Ingolstadium (*Auripolim* elegantiores dicunt,) peruenerunt. Cum oppidum

Ædes S. Leonardi.

De filiis Roberti. Comitis Palatini.



*Aulicorum  
nauifragium in  
Lyc.*

*Nauigatio  
Gurcensis per  
Danubium.*

oppidum ingrederemur, Gurcensis aduentu tanta oppidanorum excitata letitia est, ut omnes per vias compendiaque agminatim currerent, nec multo, postquam ad hospitium diuertimus, nunciatum fuit Gymnasiarcham cum maxima vi & doctorum virorum & scholasticorum, aduentare. Datus illi dicendi locus, qui oratiunculam, plane (ut verum fatear) desertam, sed disertam volui dicere, habuit. Palinodia Episcopo Acerrano viro satis facundo iniuncta est. Ii paulo post cum abiissent, Principes duo Brandenburgenses, qui literis illic operam dabant, Cardinalem (ut de eius aduentu congratularentur) adierunt, a quo summa hilaritate, ut suus est mos, excepti discessere. Postridie eius diei conuiuium peractum est, disertissimus ac nobilissimus quisque accersitus, inde itum ad choreas. Ego, quia non nisi emissitiis (ut aiunt) oculis fruor, abeundi consilium coepi. Itaque diem integrum hic morati sumus, expectabamus enim ceteros aulicos, qui postridie quam nos discederemus, ad nos Augusta per Licum nauigarent. Qui cum equis carerent (omnes enim nobiscum ductati fuerant) trabibus, quas ligneis cuneolis pangunt, nos *rates* appellamus, vecti sunt, frigus satis acre erat, ventorum flatus increbrescebant. Ii ergo vix Augusta soluerant per Licum nauigaturi, cum vel pondere, vel quod tenui aluco fluuius laberetur, ratis vado hæsit, diuque remulco colluctati tandem in altiore aquam ratem impulere; paulo post nautarum incuria, cum sub pontem veherentur, ratis sublicibus impacta fatiscit, tandem non citra periculum in tutum recepti sunt. Nauigabant quamplurimi, sed quorum meminisse est operæ pretium. Marquardus præpositus Bambergensis, Georgius Sumer præpositus in Felchmarch, Joannes Langus, Joannes Schenck Cardineæ curæ præfectus, animæ, inter mortales candidissimæ, multique præterea alii quorum nomina recensere longum esset, euaserant illinc. Sed cum venti in horas increbrescerent, validiusque flarent nautis contra nitentibus illis vrgentibus, impellentibusque in breuia & Syrtes, cum quid consilii captarent, nostri fessi iam ac prope victi ignorarent; semimortui ad ripas tandem compulsi sunt, ubi & aqua<sup>p.324</sup> humecti & frigore pene exangues (aqua enim qua madidi erant, in glaciem vertebatur) ignes in ripa excitauerunt. Itaque paululum refoti, ad Vestendorph (nos *occidentis villam* dicere possumus) iter pedibus arripuerunt, diuertunt ad Cauponem, domum occupatam reperiunt, nam intus cum nuptiarum choreæ (ut frequens in Germania vsus) ludos interpellare non sine turbis poterant. Quippe pagani (multi enim illuc conuenerant) surdis auribus saltabundi, clamabundique verba nostrorum audiebant: verum cum diu supplices viderent deliniti, è stabulo discesserunt, mane autem exorto solis iubare, coacti ad aquas reuerti (carebant enim equis, vno excepto, qui propter frigus strigosior factus, vix pedibus nedum quempiam ferret, substinere poterat) per Danubium longe, quam prius fuerat cursu feliciore ad nos peruenerunt. Postero die, crepero adhuc tempore, classico per Tubicinem pronunciato, pedibus alii, alii curribus vecti ad ripam Danubii conuenimus, rates ibi quam plurimæ (centum enim & quinquaginta fere homines eramus) in remis stabant. Gurcensis ut est omnibus in rebus curiosus, nomina singulorum scripta percurrerebat, rates patiebatur. Inscendimus, à ripa soluimus. Inde exoritur clamor, tonsarumque strepitus ita increbrescebat, ut vtrinque latissimi fluminis ripæ longum vastumque reclamarent. Ego ad ientaculi horam (herili enim rate vehebar) tum matutino frigore, tum quia ieiuni non libenter verba damus, aut legi aut dormitavi. Interim mensa concinnatur, recumbimus. Gurcensis ut solers imperator suo consulens exercitui, non prius in pugnam deæ Culinæ descendere voluit, quam totam aciem instructam videret. Cum ergo multos obruncauissimus, satisque cruoris exhausissimus, ad variam nos ludorum curam conuertimus, ii cartaceis ludis, ii taxillis diem transigere, alii calculis pugnare, alii ne inertia pigrescerent, se ad remigantium laborem conferre.

Sic



Sic vespera Regionem, quam nunc *Regensburg*, id est, regiam ciuitatem dicunt, applicuimus. In ripa episcopus Palatinus, cæterique vrbis principes viri præstolabantur, ab iis Gurcensis venerabiliter susceptus, magna comitante ca-<sup>Gurcensis in-</sup> terua, urbem ingressus est, de qua pauca hæc referre statui. Oppidum est in<sup>gressus Ratis-</sup> Danubii ripa situm, in qua per longitudinem extenditur, intus domus amplif-<sup>ponæ.</sup> simas habet, sed nunc (quoniam loci fortuna refrixit) vastæ sunt propter inqui-<sup>De Ratisbona</sup> linorum insolentiam, parietes domorum crassissimi patentissimisque valuis, vt<sup>quadam.</sup> facilius mercium currus admitterentur, ædificati. Nullaque non domus est quæ non Sacello careat. Templâ tamen & auro & argento opulenta, prætereunda cætera sunt, illud recitabo. Templum est ad quod Gurcensis ad vespertinam orationem se contulit Diuo Amerano dicatum. Ingressus ego, contignatio-<sup>S. Hemeranus.</sup> nem templi admirabar, tholoque non citra delectationem peruetusto delecta- bar, parietes vtrunque illo picturæ genere simplicissimo ornati erant, molestia tamen affectus sum quod Cantores, quibus musica hostis erat accerrimus, nouissimam Diuæ Mariæ salutationem ita strepero cantu inuasere, vt tanquam pugnam inirent vociferarentur. Peractis precibus altare visendum accessimus. Argentea tabula ad posteriora cornua sita erat, quam ego Græcanicis illis compa- ro, tum figurarum vetustate, tum simplicitate quadam (nulla enim parerga viscebantur) gaudentibus, pretii profecto non parui. Præterea librum Euangelio- rum literis pollicaribus vidi, aureisque picturis apprime ornatum, quarum æta- tem ego ad Euandrum & Aborigines retulissim, nisi flamines ab Arnolpho Im- peratore, vt pleraque huiusmodi Clinodia (sic enim templorum supellilem nominant) donatum affirmarent, à quo & corpus Dionysii Ariopagitæ ex Gallia illuc translatus (& si Galli omnino negant) asserunt, vbi Arnolphus quoque se- peliri voluit, eiusque adhuc sepulchrum ex lapide cernitur. Sancti Wolfgangi illic quoque corpus est, sed miraculis non claret, vt alibi cui dicatum tem- plum est, fabulam referunt. Ingressurum enim beatum Wolfgangum urbem, aiunt vulgo interrogauisse, *utrum corpus an miracula, post obitum mallent?* Ci- ues corpus elegisse, arbitantes, absque corpore miracula nullibi fieri posse, il- lic ergo cum eius ossa remanserint, miracula alibi translata sunt. Hæc retuli, vt cognoscas quanto in fidei errore caliget humanum genus. Inde ad pontem qui super Danubium est, visendum perreximus, Ego, Episcopus Acerranus, Spe- rantius, viri ambo ad vnguem perfecti, Joannes Keller, Caspar Lysius poëta non vulgaris, sciscitati sumus quis pontem iecisset. Relatum fuit Adrianum Impe- ratorem ædificasse. Nos cum in rei disputationem incidissemus, neque quic- quam certi asserre auderemus, nihilominus & vetustatem & longitudinem, ad- mirati sumus. Vndecim enim fornicibus constat: passus quadringentos & se- ptuaginta mensi sumus, ex medio fere alius longioris pontis ad insulam iacitur, quæ Danubio vtrinque alluitur. Hinc digressis nunciatum est, Gurcensem vi- sum choreas iturum. Accurrimus, tempestiuque pone aulam ingressi sumus, in qua nobilissimæ quæque nuptæ, innuptæque puellæ conuenerant. Ego locum ad conspicillum nactus, quantum per emissitios oculos licebat: omnes demo- libiles videbantur, sed vna mihi præ cæteris, nam & habitus adiuuabat, for- mosior videbatur. Erat enim breuissima coma, quæ vix medium collum fla- gellabat compta in modum capilli torquebantur, super iis Corolla odoratissimis herbis contexta pulchritudinem augebat. Vultus modo puellæ, modo Gany- medis, aut alicuius non proletarii pocillatoris repræsentabatur. Quam ego cum multum oculorum nictatione lacessiuissem, abii domum: & mihi, quia iam vox in Merim deficit, & Veneri, quæ non multum mihi propitia est, iratus sum. Vespera autem, vt hesternâ fueramus excepti, adipali coena refectioni su- mus, mane non satis luceſcente die surreximus, restimque soluimus, quadra- gintaque passuum millia permenſi Stranburgio applicuimus, oppidum esse mer- cium diues, quæ ex Boemia illuc aduehantur, dicunt. Inde tertia vix hora peractis sacris nauem ingressi, nauigationem illius diei Petauium vsque, quod



ego ab auium volatu (nam vrbes olim augurio condebantur) dictum puto, sexaginta millia passuum confecimus, multa nauigantibus nobis oppida, villæ, arcesque, vel in ripis, vel in collibus posita occurrerunt, quorum nomina recensere arduum esset. Petauio autem non longe aberamus, cum præstantissimi viri naui (arbitror flamines metropolitanæ fuisse) medio in flumine occurre; quos, ut est omnium mortalium elegantissimus, Gurcensis pacatissimo vultu excepit. Nec mora Episcopus, quem ego optimum virum iudico, oppidanique, ut tanti principis aduentu læticiam ostenderent, & ab arce, quæ in monte sinistra nauigantibus occurrit, & à mœnibus crebros bombarum tonitrus emitti iusserant. Applicanti ripæ totus occurrit populus. Episcopus homo iam siliernius, domi ante fores, præstolatus, à quo Gurcensis perbenigne excipitur. Nos alibi stabulatum diuertimus. De oppido hæc memoratu digna habeo. Situm est inter duo flumina, Danubium & Ænum, quorum alterum fluit ex leni iugo, cui Abnobæ nomen est, alterum ex penitioribus alpibus, & vtrumque ex Rhætia oritur: tertium ex Boemiæ montibus descendit, quod, quanquam vadabile, tamen ad materias mercesque vectandas aptissimum est. Oppidum ergo & si Chersonesi instar à fronte, dextera læuaque munitissimum sit; tamen è regione vltra Danubium munitissimam habet arcem, infra autem per ripæ longitudinem sita domus, ad quas æstate lembis transfretatur, hyeme cum acris est, per glaciem itur. In Æno vero pons iactus est Semilunio similis, arbitrantur enim sic maiorem aquarum impetum frangi posse. Ad alteram ripam cum euaditur, haud enormibus vicis domus porrectæ sunt. Itaque fluuiorum interuentu cum simul ciuitatis esse nequeat, trifariam diuisa incolitur. Illinc crepusculascente iam die, ientaculum matutinum deglutientes, abitionem capessimus; sexagintaque millibus passuum confectis, oppido Pannoniæ superioris, quam à Norico Ænus diuidit, Lynxo appulimus. Quod tum Augustissimi Friderici Imperio, cuius auspicio feliciter creuit, tum quia illinc temperie aëris atque vberis glebæ Austriæ fertilitas incipit, celebratum. Gurcensis itaque ibi ut Genio, Bacchoque lætitiæ datori habenas solueremus, iussit. Peractis igitur vix illucescente die sacris, ad suum quisque Cauponem diuertit. Inde ad choreas de more itum est, ad quas nobilissimæ quæque, aduentum principis excepturæ, conuenerant. Jurarem me nullibi formosiores, ornatioresque vidisse, multi ex Aulicis, nobili prognati genere emissiciis vultibus personati interfuere, omnes versicoloribus, quæ vnius diei intercapedine confecta fuerant, fatis ornatissimi processerunt. Postridie gallicinio per tubicinem excitati, ad triremes (sic enim codicarias trium remorum naues appello) cucurrimus, nec mora à ripa soluentes, dextra cum Laureacum peruerustum sane oppidum reliquissimus, satis felici cursu ad infamia fluminis loca peruenimus, de quibus breui hæc accipe. Duo pericula nauigantibus offeruntur, in altero per confragosa saxorum ingentissimo fremitu vnda rapitur, infra enim taniæ cautesque tam crebri sunt, ut nisi expertissimus loci nauta sit (capitur enim vnus vel alter ex oppido Grayno, quod paulo superius in ripa offenditur) ignari nauigationis aliquando periclitentur. Scyllam hanc latrantem cum superaueris, in Charybdim ut incidas necesse est, vbi non leuius periculum exantlandum obicitur. Rotatur enim aqua, immo totum flumen, maximumque in profundum mergi videtur, similisque turbini tempestuoso vortices volui, panduntur enim à principio turbinatimque in imo desinunt, nec vno in loco sæuiunt Syrtes, sed vnus ex alio vortex subinde nascitur, crescuntque in immensa aquarum volumina, factumque sæpissime periculum est rapidissimæ voracitatis, iacta siquidem repente absorbentur, nec postea apparere vsquam manifestum est. Hoc & si alias, elapso tamen anno, cognitum fuit. Cum enim naus, in qua viginti fere homines vehebantur, incaute illuc incidisset, absorpta est. Quæsitæ corpora diu fuerunt, nusquam inuenta. Nos igitur cum prope essemus, multi Gurcensi, ut ripæ appelleret, consuluerunt. Is quoniam & suos non vulgariter diligit, ne

Gurcensis ingressus Petauio.

Petauii descriptio.

Lynxum oppidum.

Laureacum.

Scylla & Charybdis Danubiana.

Mira Gurcensis in aulicos suos dilectio.



ne tantisper iis qui formidare occeperant, maiorem, è naui si descendisset, pauiorem incuteret, & quia Cæsarem illac nauigasse quandoque non ignorabat, renuit periculum seorsum à suis fugere, quod tantus princeps minime vitauerat. Tandem DEI Opt. Max. & Diui Nicolai, cuius in ripa Sacellum est, ope incolumes euasimus, acriterque remis incumbentes (mirum dictu) nonaginta passuum millia nauigatione confecimus, Sthanioque oppido, quod à petra sic dicitur, appulimus. Gurcensis à sorore, quæ illic ditissimo viro nupta est, excipitur. Episcopus Acerranus, Ego, cæterique flamines ad caupones diuertimus. Interim saltationes, & vespere, & mane exorto solis iubare, actæ sunt, peractoque matutino ientaculo nauem ingredimur, exortoque de more nautico cantu remiges palmulis incubuerunt. Vespere non adeo multo Neuburgæ applicuimus, vbi ditissimo in templo corpus Diui Leopoldi Austriae Ducis colitur; quod decennio iam peracto à Mariano Bartholino patruo meo ex humili sepultura, ad ornatissimum Mausolæum translatus est. Eius siquidem caluitium in quadricubitali defæcati argenti arca conditum, maximis claret miraculis. Illic Gurcensis hospitio exceptus est, nos alibi diuertimus. Postridie mane cum penitas (vt aiunt) offulas sumpsissemus, Viennam versus quæ duobus passuum millibus aberat, nauigationem coepimus, vbi appulimus ad ripam, tanta vis populi effluxit, vt longe spectantibus admiratio ingens oriretur. Gurcensis nauim egressus, magno cum tympanorum strepitu, tum innumerarum gentium plausu exceptus est. Nec mora: trium præstantissimorum virorum orationes recitatae sunt, quibus tanti principis aduentu congratulabantur, peractoque excipiendi officio, Gurcensis Cardineo paludamento equo vectus, ingenti mortaliū multitudine urbem ingressus est. Die iam aduersperascente, cum nos viles animæ ad hospitem diuertissemus, Dii boni, quam insolens domus visa est hospitandi, Axenia illic tunc celebrari arbitrabar, algebant omnia, hypocauftum quod multo ante dilapsum erat, inuerecundus hospes refarciebat; nobis autem quid agendum interim esset, nisi in Xenoprodromos \* nostros maledicere, nesciebamus; qui cum omnium bipedum scelestissimi sint, tunc se bene egregieque egisse, cum pessimam quamque nauant operam, credunt. Sed huiusmodi à me querimonia absit, cum iam in malis supra quam dici possit, occalluerim. Postero die, pomeridianum (vt arbitror) tempus erat, Rector studii, quod illic celeberrimum est, magna scholasticorum manu, aduentare nunciatur. Gurcensis habitu de more sumpto, pacato illos vultu excepit, pauxilloque temporis interiecto, Sebastianus Binderlius orationem habuit Encomasticam, non indigena, vt illa in regione animaduerti potest, prolatione recitata: vnde ego de Germanis ita coniecere (ni fallor) audeo; Eos Romanis prope oratoribus simillimos esse. Conciliant, præponunt, diuidunt, argumentantur quam satis erudite; sed ita copiose, vt Asiaticis potiusquam Atticis comparandi sint. Idem etiam nunc de Latinis oratoribus sentio. Nam apposite, eruditeque dicere difficile est, quid opus sit intelligimus, vt dicere debeamus, nescimus, præsertim, cum nobis angustissimi termini præfixi sint. Principes enim hac tempestate non digressionibus cultuque, sed crebris delectantur sententiis, breuique rem transigi, etiam si suas ipsorum laudes complectatur oratio, desiderant. Si antiquorum præceptis insistimus illamque Ciceronianam lecythum sectamur, Principes aut aliud agunt, aut dormitant, si concisus dicendi genus cum noua quædam nobis præcepta iniunxerint, aut nos ignorantia peccamus, aut si quippiam boni dicimus, quia dictum breuiter sit, ieiunam fuisse orationem dicunt, sed vt ad institutum redeam. Orationi cum episcopus Acerranus vir culti ingenii breui respondisset, discessere. Paulo post præstantissimorum virorum de administratione rerum Austriacarum consilium habitum est. Postero die, sole iam exorto, diui Stephani templum petiuimus, vbi peracto sacro altare tum argenti auriue facti infædique varietate, tum multarum reliquiarum (vt nunc aiunt) genere refertum admirationi omnibus fuit.

Stain.

Diuis Leopoldus.

Gurcensis ingressus Vienna.

\* furterer.

Orationes in laudem Gurcensis habitæ.

De impatentia Principum in audiendo.



De Mausoleo  
Friderici Imp.

rum cum tot ex Aufriaca domo Duces, Imperatoresque animo complector, inde & ciuitatem, de qua alii multa retulere, & templorum ornatum tantopere auctum esse crediderim. Quod & si à priscis factitatum, ætate autem nostra sub duobus Cæsaribus patre & filio cognitum est. Nam Fredericus cum sibi Mausoleum ante obitum condere iam incepisset, morte præuentus, opus inchoatum perficere nequiuit: Diuus Maximilianus cum viginti annos prope labor intermissus nunquam fuerit, non sine omnium mortalium admiratione perfecit, de quo pauca, ut quanta de se post mortem cura sit mortalibus, cognoscas, recitabo. Sepulchri opus quadrangulare est, longitudine vinarum quinque, latitudine fere dimidia, in ambitu septum bicubitale æquis fenestrarum intervallis opus amplectitur. Quod ubi primum ab imo surgere incipit, latius est, arcaturque tenditque introrsum quatenus ad Cippum peruenit ubi corpus conditum est, surgitque læuissimo marmore, quoad coronam lapideam offendit, quæ altrinsecus porrecta sepulcrum ambit, in inferiore basi quaque versus multigenæ animalium figuræ in concavo lapidum, quod per ambitum ducitur, instar ludentium videntur. Supra mirabiles innumerabilium Sanctorum effigies. In angulis autem exporrectisque in latere lapidibus, Electorum principum Germaniæ imagines sunt; à summo, imoque scalæ lapideæ, quibus cum ad fastigium Mausolei peruenitur Friderici Augusti Rom. Imp. corpus lapideum iacens, imperiali paludamento coronaque ornatum visitur, tanto artificio, ut saxo venerationem quandam habere quodammodo impellamur. Lapidis genus alibi Porphyriacum, venis tamen albicantibus, alibi Emathitem esse affirmares, ita sanguinem repræsentare videtur. Supra pallentius est, sed verficulor, eruitur in Norico, in agro Iuuauiano. Sed interim paulisper iocari lubet. Templum exhibamus, cum ego secundum valuas tumultum inspicio, mihi, cuius nam esset, sedulo percontanti ædituus respondit, *Neythartis ossa illhic condita esse*. Redii domum, accurateque hominis vitam inquirens, urbani apprime, ne dicam facetum fuisse intellexi. Is cum apud Duces Austriæ summo esset in pretio, charus habebatur. Mos indigenarum erat, ut qui primus veris initio florentem violam reperisset, locum signaret, nunciaretque principi, hac scilicet gratia institutum, ut omnes nuptæ innuptæque puellæ, ac glabella iuuenum pubes choreas ductantes, ad locum proficiscerentur, ubi solutis paululum curis lætitiæ Bacchoque effusissime indulgerent. Neythart ergo, cum violam reperisset, pileo cooperuit, festinusque urbem ingressus Principi, se violam repperisse nunciat. Nec mora, ingens virorum foeminarumque vis ad locum confluit. Interim paganus quidam cum pileum inuenisset, agnouissetque primitias veris, florem substulit, locumque probe excacauit, pileoque iterum operiens, abiit. Jam Viennensis iuuentus aderat lætabunda; iam circa pileum saltare inceperant: cum detecto loco, pro violâ flos merdaceus inuentus est. Risus simul & indignatio orta est, omnes in Neythartem iniicere manus volebant, is sibi fuga salutem comparauit, paulo post cum rus iret, villanos repperit circum eandem violam saltantes. Agnouit suam esse, quare concitus indignatione, aliquot ex iis interfecit, sumpsitque de furto supplicium. Ex illo in posterum tempore paganorum hostis accerrimus cum euasisset, mira de eo fabulamenta narrantur. Dicunt aliquando quosdam cum ebrios fecisset, totondisse illis crines ad monachorum similitudinem, & per Danubium, aliis in ripa paganis spectantibus, circumductasse. Semel item sumpto muliebri habitu ad quendam pagum peruenit, nec multo post, quidam credens eum foeminam esse, in uxorem duxit, cum hac pacti conuentione, ut non prius secum cubaret, quam centum florenos sibi tanquam Dotis auctarium, elargiretur; accepta pecunia, noctu aufugit. Perlustrato igitur templo domuitionem capeffimus. Interim cataphractorum militum ludi præparantur. Gurgensis ad Reginam Mariam profectus est, quam Ludouico Bohemiæ regi nuptum iri credunt, arbitrator nouennem esse, tamen tanta in puella grauitas est, tanta maiestas, ut merito

Fabula de  
Neythart.



rito crediderim ab Hesiodo dictum esse, *sub Jove reges nutrir*, Dii non homines eos alunt, & aliquid, quid in nobis inter multos attributum non est, & docent, & instituunt. Ex arce igitur regina in aureo pilento, Gurcensis equo vestī, hasticis ludis interfuerunt. Prima cataphractorum paria satis militariter concurrere. Secunda autem, vel quod equi refractarii & habenis minime parerent, vel quod imperiti omnino essent, infeliciter pugnaverunt; hoc tamen boni nobis attulere, ut risu effusissimo illa penerumperentur. Peraetis ludis in arcem rediere, conuiuioque adipali celebrato Regina personata cum aulicis puelulis incessit; vnaque Cardinalis, ut tantulae morem gereret ætatulae, vultu etiam emissio vsus est, saltauitque. Sequenti Luce pomeridiano tempore Vienna discedentes, ad laculum quendam peruenimus: ambitu mille passus excedere haud arbitror, in ripa piscatores multos offendimus, qui ex industria propter principis aduentum retia iecerant, ad singulum tragularum tractum (mirum dictu) tanta carponum vis capta est, ut cimba ad scalmos vsque repleta fuerit. Inde Padium oppidum, quod à thermis nomen habet, peruenimus. Balneæ illhic sunt suapte natura calescentes, sed infestus sulphuris odor est. Mane confecto prandio, Nouam ciuitatem (viginti millibus passuum aberat) petiuimus, oppidum satis celebre: tum quia à Matthia Pannonum Rege diu obsessum, nunquam ad deditionem compelli potuit, quod fame victi oppidani (equos enim iumentaue exederant) æquis conditionibus se dedere coacti sunt. Locus adhuc, in quo castrametatus est, memoriam tenet, siquidem duplici fossa cinctus est, in medio vestigium remanet, ubi subruta terra sese à tormentis bellicis tuebatur, extra vallum ingens fossarum numerus est, ad quas se milites recipiebant, relatum fuit mihi sèpimento magnarum arborum oppidum, ut nec oppidani exire possent, nec quispiam commeatus subministraret, circumualasse. Tum etiam quia natale Cæsaris Maximiliani solum est, ibi tanti principis prima fuere incunabula, vnde Numen adolefceret, quod tam pie sancteque Imperium Romanum gubernaret. Urbis autem ornamento, etiam attribuerim aquam circum moenia scaturientem, multigenumque piscium altricem. Addo leporarium orcadum, Damarum, Ceruorum, hinnulorumque tam fertile, ut tertio quartoue quoque anno vim ferarum subcrefcentem eximere cogantur. Arx oppidi, & munitionibus, & aulis, contignationibusque inauratis, item pensili hortorum structura, maxime celebris. Postero die cum illic moraremur, ociosusque essem ego, librisque carerem, ad ludum cartaceum me contuli. Inde non immerito, de me coniecturam faciens, Romanos Bonam & Malam Fortunam coluisse, existimaui: nam eam omnibus mortalium rebus dominari imprimis puto, huic si quid boni euenit acceptum referimus, si quid aduersi contigerit, hanc ream facimus; hanc conuiciis insectamur, sic bona hominum pars fortuito fieri omnia arbitrantur. Ego autem ut quædam fieri arbitror, quæ ita sunt ut à nobis, citra numinum curam fiant; ita non inficior secundas illas causas, quibus hoc munus infernarum rerum à DEO tributum est, plurimum polere. Verum ea ita coelesti animi vigore à nobis regi possunt, ut non illa nobis, sed nos illis imperare videamus. Perendie omnes qui ad conuentum Pruchium Styriæ oppidum profecti erant, quoniam Gurcensis cura rerum Vngaricarum distractus erat, Nouam ciuitatem venerunt. Postridie princeps Cardineo habitu decoratus eos in curia oppidi excepit, ubi de rebus arduis disceptatum est. Conuenerant Australes bifariam, infra supraque Anasum fluuium diuisi. Carenthani, Styrii, Carni, Hii quatuor ordinibus discreti erant. Primi qui Ecclesiasticis dignitatibus honestabantur, Prælatos vocant. Secundus procerum locus erat, quos Barones vulgus dicit. Tertius gradus nobilium personarum. Vltimi ciues numerabantur, suæ quisque prouinciæ negotia pertractabat. Complusculi dies consultando consumpti sunt. Interim nuncium attulit Regis Pannoniæ camerarius, Vladislau regem, Quarto Idus Martias ex Buda Presburgium (*Pofonium* eruditiores vocant) venturum. Quamobrem Gurcensis

*Laus Mariae Reginae.*

*Gurcensis ex Vienna egressus.*

*Baden Nova ciuitatis descriptio.*

*De Conuentu Austriaco.*

*Rex Vladislau ex Buda Posonium.*



pridie Idus confecto prandio magnis itineribus Viennam rediit, quam trecentis  
 aut amplius equis ingressus est. In itinere, Dii boni, quam acri omnes algo-  
 re affecti sumus. Venti enim ita vehementes, ac (vt patriæ mos est) frigidi,  
 per aliquot dies, turbas in aere terraque conciuerunt, vt domos quoque in  
 pagis (sunt enim cretaceæ) humotenus ruerent. Paulo ante maximum fuerat  
 flaminum silentium, sed duabus continuis noctibus terræmotus auditi sunt.  
 Dormitabam ego, vnaque in cubiculo Abbas erat non mediocriter obesi ven-  
 tris. Is noctu dum ad Matulam currit, pedibusque pauimentum grauitè ferit,  
 simul terræmotus exortus est, omasum (me castor) boni Abbatis, graui ponde-  
 re, pauimentum concussisse affirmabam. Tamen mane auditos ab omnibus  
 intellexi, tunc præfagiui futuram erumpentibus ex terrarum visceribus ventis  
 tempestatem, quæ tam ingens atroxque fuit, vt nos cum equis à frigore ani-  
 mam vix tueri potuerimus, per Deos iurauissem immortales folles Vlyssis, cui  
 Clypsò abeunti dederat, resignatos fuisse. Sed (proh Jupiter) quantum homo  
 homini præstat. Beatiores petorita habebant, & gestatoria operta, quorum  
 velatura, perinde atque in cubiculo essent, ferebantur. Mane ex Lysius Dux  
 Bartholomeus ad Gurcensem profectus est, dum hominis fortunas inquiri, in-  
 tellexi, in foro Iulii Cæsariani exercitus Imperatorem futurum. Dii felix fau-  
 stumque vortant. Nos ergo cum plusculos dies Viennæ moraremur, Gurcen-  
 sis vt de aduentu maximorum regum Pannoniæ, Boemiæ, ac Sarmatiæ certior  
 fieret, expectabat. Interim aulicos ornatissimis vestibus concinnauit, mihi Vn-  
 dulatam elargitus est. Perendie eius diei legatos quatuor, Marquardum præ-  
 positum Bambergensem, Marascam Boemum, Cuspinianum virum literatum,  
 ac Wolfgangum Hamerl Pofonium misit; nam Vladislai, ac Ludouici regum  
 patris & filii, aduentum intellexerat. Inde octauo Cal. Aprilis Sigismundus Sar-  
 matiæ Rex cum ingenti apparatu pompæque, tum hominum tum equorum Po-  
 sonium ingressus est, de eo sic accepi, à nostris. Cum is mille fere passus ab-  
 esset, Rex Vladislaus, Ludouicusque, pater & filius, Effedo, vt venientem exci-  
 peret, vecti sunt extra urbem. Pater quia iam senio confectus est, in curuli  
 sella permansit. Filius equum ascendit, priorque obuiam sese obtulit. Sed  
 antequam alter alterum alloqueretur, aberant adhuc longe, ex equis desilie-  
 runt, multisque passibus, pedibus profecti sunt, coeuntes tam arcte sese inui-  
 cem complecti videbantur, vt maximam omnibus pietatem palam præ se fer-  
 rent. Inde ad seniore Regem iunctim perrexere. Is filicernius admodum ex  
 gestatoria sella, quam insidebat, Fratrem ad se cum filio, aduentantem expe-  
 ctabat. Cum adfuit, Dii boni, qui amplexus, quæ gaudia fuerunt, quæ lachry-  
 mæ, non seni modo, verum & omnibus, qui aderant, exciderunt. Nemo  
 enim homo, qui trium potentissimorum Regum præsentia non obstupesceret,  
 tamque arctis complexibus fratrum pietatem animo complectens, non lachry-  
 maretur. Urbem autem ingressi sic feruntur. Rex senior effedo vectus est, Fra-  
 ter & filius Reges, ante equis vehebantur, habitus diuersissimi erant. Sarmatæ  
 enim, Moschi, Rutheni, Mysii, Lithuani, suis quisque paludamentis ornati,  
 aut anteibant, aut sequebantur, alii pennaculis ingentibus, alii infulis vinarii  
 quasi instar, compti procedebant. Equorum Scythicorum, quique ex Mœsia  
 aduehantur, vis ingens, Qui prætiosè phalerati, margaritisque refercti salta-  
 bundi ducebantur: maior tamen ornatus iis in pectoralibus cernebatur, quæ  
 vel aurea erant, vel argentea. Item focalia, quæ secundum aures vtrinque per  
 maxillas ad faucium ima circumducebantur: mira (medius fidius) arte concin-  
 nata, equites mille & quingentos fuisse tradunt. Ita urbem magna principum  
 comitante caterua (quorum nomina alibi recitabo) ingressi, senior duobus regi-  
 bus fratre & filio comitatus, ad regiam suam rediit. Filius Sarmatiæ Regem  
 patrum grato comitandi officio, domum vsque deduxit. Postridie cum hæc  
 ad Gurcens. allata fuissent, comparatam quatuor nauium classẽ inscendimus,  
 nec dum sole aduesperascente Hamburgio appulimus. Vastitas summa in oppi-  
 do

Gurcensis le-  
 gati ad Reges.  
 De aduentu re-  
 gis Sarmatiæ,  
 & ingressu  
 Pofoni.

Sarmatarum  
 cultus.

Gurcensis na-  
 uigatio ad Re-  
 ges. Quædam  
 de Hamburgio  
 opp.



do est, domorumque æquisolium passim visitur. Narrant Matthiam Pannorum regem, diutina obsidione, cum in Austriacos sæuaret, tandem potitum, ad tenuem fortunam locum redeisse. Arcem habet satis munitam, in arduo monte, qui oppido imminet, sitam; quæ cum inter Austriam Pannoniamque fere media sit, alterutros prohibet incursus. Ab ea item mons parua abest intercapedine, in quo Zynziber passim nascitur. Vix ergo Princeps ad hospitem diuerterat, cum Marquardus orator, cæterique qui vna iuerant, adfuere: quæ attulerant, de more, satis mature discussa sunt. Mane ad multum diem, Posonium versus nauigauimus. Gurcensi nauim Cardineo paludamento egredienti Ludouicus Boemiæ rex, Archiepiscopus Colocensis, Episcopus Quinque Ecclesiensis, Bosnensis, Jaurinensis, Vacienfis Pannonæ; Episcopus Vladislauensis, Posnaniensis, Premisliensis, Sarmatæ; tum Pannoniæ, Boemiæque, tum Sarmatiæ primores viri quamplures obuiam ad ripam sese obtulerunt. Archiepiscopus Colocensis, oratione satis erudita & graui ex equo Gurcensem excepit. Rex Vladislaus articulari morbo afficiebatur. Tamen tanta diuersarum gentium varietas fuit, ut mihi hæc recolenti, non satis omnia ex sententia succurrant. Aderant Germani, Pannonii, Sarmatæ, Tartari, Turcæ, Moschi, & eorundem imprimis Æneatores tortilibus tubis asperrime perstreptentes; neque enim ditonum, aut diapente, thessararunt, diaposo intermistam, aut bisdiapaso, cæterisque phonaforum voces concordiamque norunt, sed primo per hemitonium inuicem certantes, rursus à secundo hemitonio quatuor interualla ascendentes, tanta candidarum aurium molestia, ut aliquando furdastrum me esse desiderarem. Tradunt aliqui tale hominum genus ita efferatis esse moribus, ut perstrepero clangore (& si omnem antecellere harmoniam credit) delectatur. Cæterum si hoc Joannes Manens, aut Abbas Elephantarca musici Romanenses potentes fuissent, longe melius quam ego, de refractaria illorum musica iudicassent. Habitus præterea diuersissimi, alii (ut dicebam) infulas candidas in fastigium acuminatas gestabant, alii pilea, quorum in frontispicio pennacula ad posticam partem, vnius vlnæ latitudinis deflectebantur, alii pectoralibus à gula umbilico tenus, vel argenteis, vel aureis (ita enim vestium fibulamenta faciunt,) ornabantur. Quidam balthecos aureos, quibus enses vaginis argenteis aureisque pendebant, qui à dextro humero in sinistrum infra alam reflectebantur, gestabant. At vero ubi cingendi locus est laminibus aureis graphice figurata imaginibus fabrefactis, gemmisque Scythicis cingula confibulabant, hii plerique omnes erant Sarmatæ. Moscorum admodum non multi, quippe qui aderant, capti in bello ferebantur, quod paulo ante Sigismundus fortissimus prudentissimusque Sarmatarum Rex, quem ego (vnum excipio Cæsarem) & vultus grauitate, & rerum gestarum gloria puto comparandum nemini, faustissime gloriosissimeque ad Borysthenis ripas gessit, fluuium indigenæ Neper dicunt, qui ex iugis ortum habens, quæ Lithuaniam rubramque Russiam interiacent, in Bycem paludem supra Tauricam Cherfonesum descendit, incolæ ex plano oriri tradunt, neque ullos illic montes esse, quemadmodum etiam de Ryphæis mentita antiquitas est, qui illhic nusquam sunt: Tanaimque ex latissima planicie oriri manifestum est. In eo igitur bello (ut mihi ab his qui interfuerunt, relatum est) Moscorum pluris triginta millibus desideratos fuisse, Sarmatarum pauci ceciderunt, tamen tam populosa regio ut tanquam nullam acceperint cladem, nunc nouum parare exercitum, nouas copias vulgo ferantur. Adde quod nulli liberi nascuntur, omnes enim ab Imperatore seruitiorum loco habentur, nihil certi habent, neque vitæ, neque peculii: nam si Imperator cuiquam ut sese suspendat iuber, sine mora mandatum perficit. Si facultates alicui demere vult, potest. Itaque tum obsequio, tum regni amplitudine potentissimus Scythicarum gentium esse dicitur. Gurcensem ergo urbem ingressum iunior Rex Ludouicus, ingensque & Prælatorum & principum numerus, pone, antequæ, sed à leua Rex domum vsque comitatus est. Nos ad hostilem domum diuer-

*Gurcensis ingressus Posonii.*

*Pompa in excipiendo Gurcens.*

*Habitus Sarmatarum.*

*Regis Sarmatiæ victoria de Moschis.*

*Non esse Ryphæos.*



*Gurcensis ad  
Regem Panno-  
nie.*

*Gurcensis ad  
Regem Sarma-  
tie.*

*Legatorum  
nomina.*

*Aulicorum  
Gurcens. Laus.*

*Iudicium de  
gentibus.*

*Strigoniens.  
Ingressus Po-  
sonii.*

diuertimns, Dii boni ad quale concessimus stabulum, camera (vt conicere poteram) aut hara extiterat, aut gallinœcium, grabatulum nullum, ne dum stibadia, aut anacliteria, nisi transuersos à parietibus longorios, pullorum cubiculum, inspeximus, tectum diuæ Arachnæ dicatum, pauimentum deæ Porcillæ grunienti inferuebat. Coepimus cogitare, quid in tanta domus vastitate agendum esset. Fabri lignarii euasimus, grabatulum compegimus, omnino haud sane bonum, sed pro conditione barbararum gentium, cubiculum Basilice præparatum videbatur. Mane autem ad visendum Vladislauum Pannoniæ Regem, qui (vt dicebam) podagricus, in lectica iacebat, Gurcensis cum omnibus aulicis, qui & torquibus aureis & vestimentorum ornatu elegantissimi erant, proficiscitur. Quo cum sine arbitris cum aliquandiu fuisset, nobis etiam aditus, vt tantum Principem videremus, concessus fuit. Facies venerabilis vltra modum est, rubicunda paululum, tantaque in eo grauitas, vt & si tantum virum minime nosceres, Regiam in eo maiestatem omnino arbitrare. Vt satis spectando sumus exhilarati, discessimus. Gurcensis ad Annam Reginam Vladislai filiam (in regia enim domo morabatur) concessit, puella est annorum fere tredecim, flos ipse, eximiæ pulchritudinis. Gurcensis cum paulo longius cum filia, quam cum patre (quis enim diem anno longiorem non optasset) moram traxisset, dimuitionem tandem capeffimus. Perendie Sarmatiæ Regem adiit, qui vt Gurcensis aduentum intellexit, ad regię fores processit, venientemque humano est vt vultu, grauique) excepit. Inde in aula publice Cæsareæ literæ recitatae sunt. Episcopus Premisliensis Vicecancellarius legit, Nomina quoque legatorum qui vna cum Gurcense erant, recitata, Marquardus præpositus Bambergensis, Wilhelmus de Rogendorff, Laurentius Saur, Gabriel Fockt, Marasca, Cuspinianus, his peractis tempus vt secretius loquerentur destinauerunt. Interea aduentus Cardinalis Strigoniensis significatur, Gurcensis Ludouicusque Boemiæ Rex cum multis hominum millibus extra portam obuiam profecti sunt, Sarmatarum ingens numerus velutum more clipeis breuiusculis, lanceisque prælongis, præcurrebat. Nam eorum equi ad cursum velocissimi sunt, vtpote qui ex Thesalia, Mysiaque, & Chersoneso Taurica (quanquam & in Lithuania, & aliis Sarmatiæ partibus nascuntur) veniant. Principes, Duces, & quos Barones vocant, multi aureis vestibus, latisque clauis ornatissimi incedebant. Quidam torques ingentis ponderis ex auro deferabant, alii tot gemmis micabant, vt nostratia, (id est, Italica) præ iis omnino sorDESCANT. Verum nostri aulici multo elegantiores (absit verbo inuidia) videbantur. Nam & Gurcensis quadringentos secum viros habebat, quorum prima classis in prælatos diuidebatur, secunda in Comites, tertia in Barones, quarta in nobiles, quinta patritios continebat, deinceps mira ordinum obseruantia, ii tanto ornatu, tanto cultu visi sunt, vt & Pannonii & Sarmatæ, qui præ cæteris mortalibus cultissimi videri volunt, non citra admirationem intuerentur. Taceo vestimentorum genera, vel aurea, vel ex plumatili serico concinnata, taceo aureos torques millosque preciosissimos, Vnionum, Adamantium, cæterorumque huiusmodi lapillorum beatissimam copiam; verum moribus, vitæque elegancia, atque vrbani- tate cæteris facile præstabant. At si de aliis quoque iudicandum est, Sarmatæ & literis & moribus cultissimi sunt. Pannoniæ multo asperiores. Bohemi illos magno, sed proximi interuallo antecellunt, cumque iis vt lingua, ita & moribus nullam similitudinem habent. Qui ad Pontum vergunt, vt Moschi & Tartari, efferatissi-  
mi omnium nomadum more, in campis sub pellibus viuunt, crudoque anima-  
lium viscere, sed potissimum equorum pullis vescuntur. Diu itaque extra por-  
tam & Gurcensis & Rex Cardinalis aduentum Aquilone satis acri flante, expe-  
ctauerunt. Venit tandem quadrigenti equis (vt conicere potui) comitatus, ad  
portam Sacerdotes cum Vmbella expectabant. Cæterum Legatus tum propter  
Cardinalis Gurcensis, tum Regis præsentiam, quominus subiret, abstinuit. Or-  
do talis fuit, Legatus medius, dextera Regem, sinistra Gurcensem habens, vr-  
bem



hem ingressus est, peractisque in Ecclesia, de more, cceremoniis, domum omnes redierunt. Nam cum Palmarum dies illuxisset, Gurcensis domi mansit: Sarmatarum autem & Bohemiæ Reges, ad Legati sacrum accedere. Postridie cum primo consistorium inituri essent, à Legato Missa Sancti Spiritus solenniter celebrata. Reges, Gurcensisque (sacris enim interfuere) ad curiam Vladislai Pannoniæ Regis profecti sunt. Qui quoniam pedibus ire non poterat, obniam sella ad gradus aulæ vectus est. Itaque sic primum (quod faustum, felixque fiet) inter tot potentissimos Reges, Gurcensemque virum inter mortales prudentissimum, conuentio habita est. Sequens dies, id est tertio nonas Aprilis, obnunciatum est, Bartholomæum Lisitam Imperatorem Cæsarei exercitus in foro Iulii designatum (de quo scripsimus alibi) strenuum virum, cum noctu à Cæsare per Danubium cymba nauigaret, submersum esse, nulli non euaserunt, qui intra carinam fuerant: famulus arrepta tabula, & natando, & quorundam auxilio, qui ad voces adnauigauerant, euasit. Sic mortalium cogitationes interrumpuntur, vereque de ipso illud ex Menippæis mutuari potest, *Nescis quid lucifer uebat.* Corpus autem diu quæsitum, nusquam repertum est. Sexto Idus Aprilis cum Dominicæ resurrectionis dies illuxisset, ad sacrum profecti sunt. Vladislaus Regem sella vectum, frater & filius, Sarmatiæ & Bohemiæ Reges, & Anna Regina pone sequebantur, Gurcensis propter sellam incedebat. Intra templum ita confederunt, Vladislaus primus sedebat, secundus Sigismundo Regi, tertius Annæ Reginæ, quartus Ludouico Regi locus datus, longoque interuallo prælati ordinatim consistebant, è regione Gurcensi, Georgio Duci Brandeburgensi, Archiepiscopo Colocensi, Episcopis Quinque ecclesiensi, Acerrano nostro, Vacienfi, & plerisque aliis locus signatus est. Pulcherrimum profecto tot Regum simul, tot Principum, Ducum procerum ac magnorum virorum tum spectaculum, tum pompa cultusque percelebris videbatur. Quæ si mihi aliunde relata fuissent, minime ædepol credidissem, tamen maiora fuere, quam ut à me scribi possint. Peractis sacris, viri nobiles ex aulicis nostris à tribus Regibus, aurati (ut aiunt) Equites creati sunt, Joannes Schenck curiæ præfectus, Joannes Langus Gurcensis frater, simulque duo Episcopi Saltzburgensis affines. Sic ille dies feliciter exitum habuit: sequentes consultando transacti sunt, & quanquam Sarmatiæ Rex summopere Cæsaris amicitiam desiderat, tamen duo erant in quibus ambigua vtrunque deliberatio erat, in altero Pruthenorum, in altero Moschorum ac Rhutenorum res versabantur. Moschorum autem belli hinc sumpsit initium, Michael Hlinski Lituanus cum Sigismundum à Sarmatis Regem creatum intellexisset, Lituaniam occupare meditabatur, cuius consilium Sigismundus cum præuenisset, ad Moschos fugit, huius postea ductu in Lithuaniam cum ingenti manu irrupere, qui circa Borysthenem ingenti strage profligati, pacem petierunt. Mysi autem (quos *Tartaros* appellamus) Sarmatas bello inuadentibus, oblitus foederis Moschus fidem rupit, magnoque exercitu ad vltiores Borysthenis ripas castrametatus est, ibidemque rursus cum magna suorum internitione victus, nouum indies parare nunc bellum dicitur. Cæsar ergo cum Pruthenis, quia Germani sunt, Moschis, quia ii secum iuncti foedere erant, deesse non posse videretur, rem maturo agi consilio oportebat. Quarto Idus Aprilis cursus equorum celebratus est, diuersarum gentium equi, velocipedes aderant, Thessali, Turcici, Mysii, Moscici, Jaziges, Germanici, victores Jaziges extiterunt. Postridie cataphractorum ludi, nisi, pluuia quæ hic diu perdurauit, obstitisset, destinabantur: quid autem actum fuerit, ignoramus. Sequenti enim die Gurcensis colligere sarcinas iubet, transfretarique mane Danubium. Nam pridie à Regibus licentiam abeundi, grauius negotiis interpellatus, acceperat. Reges vero, ut signum aliquod suæ ipso erga tantum principem beneuolentiæ præ se ferrent, dona vasa aurea miro artificio fabricata, pellesque zebellinorum maximi pretii, quæ ex Rhutenis ac Moschis aduehuntur, miserunt. Sarmatarum autem Regi, equum ingentis magni-

Primum con-  
cilium.

Bartholomæi  
Ducis naufragium.

Reges Gurcen-  
sisque ad tem-  
plum.

Equites ex au-  
licis Gurcensis  
creati.

Causa belli  
contra Moschos.

Gurcensis di-  
scussus à regi-  
bus. Dona  
Gurcensi, à Re-  
gibus data.



magnitudinis mutuo princeps noster, qui muneribus cedit nemini, daturus ferebatur. Sumpto ergo ientaculo, rursus Reges (nunquam enim sibi in officio præstando satisfacit) adeundos censuit, à quibus maximo sui desiderio, relictis <sup>p.332</sup> Cæsarianis (qui secum aderant) legatis discessit, atque altero, postquam discesseramus, itinere Hamburgium partim vehiculis, quorum usus frequens in Pannonia est, partim equis peruenimus.

Postridiano diluculo, Gurcensis cisis, velocissimo cursu, Viennam ventus est, qui Wilhelmum de Rogendorff, & Laurentium Sauer, ut ad Cæsarem postero die magnis itineribus proficerentur, destinavit, iisque imposuit, ut pro virili eius aduentum sollicitarent, quem permagni referre putabamus, res enim gravissimæ incumbabant, tum Regum causa, qui tam diu Posonii morabantur, tum tumultu iam in Carnis excitato, tertioque arbitror servile bellum, nisi Cæsar Gurcensisque prudentia subveniat, in quo provinciales plurimum spei collocaverunt, oriturum. Siquidem primum in Pannonia ortum est, quod quoniam sævum atroxque fuit, facturum me operæ pretium, si tradidero memoriæ, puto. Pannonienses cum diutina gravique servitute premebantur, quemadmodum iugum excutere possent, meditabantur. Cardinalis Strigoniensis cum populis cruciatam promulgaret, ad facinus iter præbuit, trecenti enim fere ab initio nomina dederant, sed paulatim multitudo crevit Ducemque Georgium Zechelium elegerunt. Hic cum quater duello Turcas profligasset, propter res fortiter gestas summo in honore apud Regem habebatur: sed cum nihil mercedis ob exantlatos labores partasque victorias, à quaestore, cui Rex mandauerat, percepisset, indignatus ultionem meditabatur. Paulo post regium exactorem, tribus millibus ducatorum arreptis, iter fecit, minatus etiam se Turcarum partes sequuturum. Id cum Pannoniæ Rex intellexisset (nam is Belgradi arcis præsidium tenebat, ubi militum manus ad arcendos hostes semper excubabat) veritus ne Turcis regni obices aperirentur, illum ducens ducatis, equisque duobus auro argentoque phaleratis donavit. Dum hæc aguntur, Selimus Turcarum Imperator, cum oratore Regis Pannoniæ foedus iniit. Id cum Rex regniue Duces resciscerent rem occultare, atque in aliud tempus bellum in Turcâs suscipiendum consulere, animosque quantum poterant ab incepto retrahere. Verum qui nomina pro cruce Christi dederant, rem damnare, impiumque esse, nec dignum Pannonico nomini, nisi Christum sequerentur, asserere atque deinceps de iis, qui incepto obstarent se supplicium sumpturos palam dicere. Cum itaque nihil proficerent, cumque maximo odio invidiaque prælatos, Principesque, à quibus sævissime expilabantur, prosequerentur, Georgium Ducem primo, deinde regem creant, crescenteque indies

*Bellum servile Pannonicum.*

*Georgius Zechel.*

*Duces servilis belli.*

servitiorum multitudine Joannem quoque Georgii fratrem, Laurentium presbyterum hominem deperditum audacissimumque, ac fratrem Michaellem duces creaverunt. Hic mitis ingenii fuit, astu doloque insignis, ii ergo validissimis copiis (octo enim exercitus fuisse memorantur) cum in Pannonia crudelissime grassarentur, prædæ aviditate, quam quotidie exercebant, corrupti; arma, quæ contra Turcas à principio sumperant, in viscera patriæ conuerterunt, atque tam impie militiam exercebant, ut nobilissimis quibusque iugularis, vxoribus liberisque necatis, bona diriperent, alii stupro virgines corrumpebant, maritisque palo affixis, vxores in conspectu obscene permolebant. Episcopum Schinadiensem cum interceptissent, virum & prudentia & integritate memorabilem, palo per viscera transacto necauerunt. Idem se & Strigoniensi, quinque ecclesiensi Palatinoque, viris honestissimis facturos minitantes, in Regem minime sævituros affirmabant. Itaque quamplurimis deuastatis castris, regionibus depopulatis, innumerisque nobilium interfectis, animosiores facti, Budam versus copias mouerunt, usque Danubium ad Pestum oppidum castrametati sunt. Budæ adeo tumultuatum est, ut ciues urbem deserere aliquando cogitauerint. Sed dum illi consultando tempus terunt, Bornamissa cum omnes ad



ad propiorem ripam naues traxisset, Danubium cum parte copiarum transfretatus, eos quasi oscitantes aggressus est, quos prope pagum Subad fudit, fugauitque. Budenses victoria elati alterum exercitum ad oppidum Pazcho deleuerunt: tertium ad Seyues: quarta autem pugna, quæ circa Debre, Themsiuarque (quod contra Turcarum incursiones præsidium est, à Joanne Jazigum, id est Transyluaniae principe) cum diu, ancepsque certatum fuisset profligato tandem exercitu, Georgius Rex captus est, quem inter duas scalas religatum, à latronibus suis (quos more patrio Bestias vocare solitus erat) deuorari iussit. Joannes autem eius frater, post candentem galeam capiti impositam, in quatuor discerptus partes est, militum autem alii ad palum fixi, alii exenterati, cum longo vitæ cruciatu, feruntur. Circa autem Varadinum cum Laurentio presbytero, ita pertinaciter pugnatum est, ut tria hominum millia desiderata fuerint, ducem & assatum, & à suis exesum ferunt. Vltimus Michael, quanquam & circa Bachyam, & Bayam pagos reliquæ copiarum profligatæ, propter Syrmium cum fortiter pugnaret, victus est, reliqui autem qui vel vinci, vel capi non poterant, ad inhospita montium fuga salutem sibi compararunt. Talis itaque exitus seruii conspirationi datus. Idem in Germania bis ausi sunt, Semel non citra dominatus periculum, in Ducem Wirtembergensem sæuitia exarsere, victa poenas luerunt. Iterum in Carnis, sed Cæsariano exercitu superata excusum receperunt iugum. Nunc ad inceptum opus reuertamur.

Dum itaque Cæsaris aduentum, & nos Viennæ, & Reges Posonii expectaremus, pridie Cal. Maias Posonii incendium factum, Pannonica regia conflagrauit, Sarmatica autem à suis non defensa modo, verum & reliquum oppidi ab incendio seruatum est, septuaginta domus, aut paulo plures crematæ. Reges ad arcem, quæ in edito colle sita est, confugere. Ignoratur dolo ne, an imprudentia patratum sit. Verum in septentrionalibus plagis vrbes integras aliquando exustas vidimus, nam tecta passim scandulis, non tegulis fiunt, quæ simul atque scintillam excipiunt, celerius quam hominum ingenium opituletur, comburuntur. Qui cum incendiis expositi sint, nocturnos habent vigiles, qui & horas nunciant clamando, & ne quapiam in parte incendium fiat, præcauent. Stultum profecto arbitror, cum malint pervigiles, aliquando somno vinoque sepultos custodiri, quam tegumento domus tegere, quod ab incendio lædi non possit. Dum itaque hæc aguntur rumor latens increbuit, Carolum Galliarum regis filiam, Belgis id suadentibus, in vxorem accepisse, cui iam pridem Anna Pannoniæ regis filia desponsata fuerat: sed nuncium nihil turbarum attulisse vidimus, poterit enim hoc matrimonium, in Ferdinandum fratrem qui apud Hispanos nunc est, felicissime transferri. Quicquid tamen erit, trademus memoria. Idibus Maiis qui ad Cæsarem ierant, redierunt, quem prope diem venturum (& si principibus Germanicis molestum erat) significarunt. Quippe qui cum ad conuentum per Cæsarem accersiti fuissent, tum propter sumptus, quos magnifice fecerant, tum quia res Italicæ hære quodammodo, cum in castris esse iam milites deberent, viderentur. Perendie ergo eius diei Gurcensis cum paucis Posonium ad Reges rursus naui vectus est, tertio Idus Maias sereno coelo, stella visa est, quæ perpetuum illum diem, & oppidanis & externis negotium inspectando exhibuit. Ego cum in hæc naturæ signa differendo incidissem, omnino melius feliciusque præfatum stellam, quam xiphias, pogoniasque & cetera Cometarum genera, apportatam affirmavi. Sequentem diem disputando, potandoque, & festiua Moschorum acroamata auscultando cum Joanne Dantisco viro erudito, transégi. Qui cum multa laudabiliter magnificeque Sarmatarum regis gesta (est enim illi à secretis) retulisset; quantumque, is cum Cæsare iniret foedus, Christianæ reipublicæ profuturum esset, domum abii, versiculosque quos apposui extemporaliter exaravi. Qui ut felicius ad regias manus perferrentur, Episcopo Premisliensi, Regni Sarmatiæ vicecancellario, Præfule & moribus & literis elegantissimo, Epistolam dicaui subscripsi- que, si lubet legito.

Tom. II.

Kkkk 2

FELICIS.

Themsiuar.

Georgius captus.

Incendium Posonii.

Tecta lignea damnata.

Gurcensis secunda nauigatio ad reges. Stella visa.

Joan. Dantis.



FELICISSIMO AC INVICTISSIMO<sup>P.334</sup>  
 PRINCIPI SIGISMUNDO, SARMATIÆ  
 REGI, RICARDUS BARTHOLINUS PERUSINUS,  
 DEDITISSIMUM MANCIPIUM.

Rerum concor-  
 dia.

Sæua hominum  
 natura.

Persuadet Si-  
 gismundo pa-  
 cem.

À salute Chri-  
 stianorum.

Ab vilitate.

Invictoria.

Cum primum natura chaos discreuit, & orbem  
 Terrarum, & cælum varia compagine iunxit,  
 Rex ô Sarmatiæ, & bello fortissime princeps,  
 Indigestarum soluit certamine rerum,  
 Mandavitque coli pacem, & concordia mundi  
 Fœdera seruari, magnumque è littore Eo  
 Evolui iussit cælum, contraque reniti  
 Infernos orbes, nostrisque reducere terris  
 Atque auferre diem, variataque tempora solem.  
 Hoc superum dono cunctis animantibus esse  
 Concessum fœdus reor, & diuinitus omnem  
 Quadrupedum prolem, pisces, pictasque volucres  
 Crediderim genitas, propriam (mirabile) serpens  
 Non ruit in speciem, Tygrisque laceffere Tygrim  
 Vix fertur, fulvusque Leo scuire leoni.  
 Sæuior ast hominum natura animantibus ipsa est.  
 Hostis enim iam facta sibi, communia rupit  
 Vincula, neglexitque DEum cœlestia dona:  
 Vnde tot infande cades, vnde obruta regna,  
 Mutuaque è causis orientia bella prophanis.  
 Ergo animis hominum cum sit cœlestis origo,  
 Esse decet superis similes, & fœdera nobis  
 Primitus innata, & concessam numine pacem  
 Excolere æternum, ne forte expertia, nostram  
 Cetera consilii, excellunt animantia vitam.  
 Tuque adeo, cui sceptrum genus concessit, & auxit  
 Sigismunde labor Martis, Rex maxime regum,  
 Egregium fœdus, magnamque amplectere pacem.  
 Vnde salus, Christi populis oritura, putatur:  
 Quæ solo de te pendet, si deficis, hostes  
 Irritas maiusque illis discordia regum  
 Vestra parat, gaudentque, & seditioe fruuntur  
 Victores, regum, victus, si fœdera iungis,  
 Moscus erit, trepidusque intra sua castra Ruthenus  
 Vix stabit, pacem supplex, atque otia poscet  
 Collatis toties signis, & Marte cruento  
 Prostratus, nuperque tuas, gens barbara, vires  
 In gelidi latis experta Borysthenis aruis,  
 Orscha ubi iam celebris, tanto certamine, fertur.  
 Namque ut magna fuit strages, sic maius in ipsa  
 Es pugna meritis nomen, cum multa, nec anceps  
 Fama fit, innumeras duro sub Marte phalanges  
 Te parua fuisse manu. Quæ (si volet) atas,  
 Tuque meis olim Rex aspiraueris ausis)  
 Forsitan aggrediar, lapsu interuertere famæ.  
 Quare age rumpe moram, & temet nunc adiice tantis  
 Fœderibus, nec parua sient, quibus inclita virtus  
 Et pietas, & amor pacis, parituraque vestris

Imperiis



p.335

Imperiis fortuna decus mutetur, ad ipsos  
 Respice nunc ortus rerum. Si iungere tadas  
 Fas erit, & vinclo totnectere regna iugali  
 Spero etenim (nec vana fides) concordibus omnes  
 Auspiciis, visurum acies, vexillaque Martis  
 Ducere in externos, raptosque reposcere fines.  
 Cum metuet Tanais, denictaque Taurica tellus  
 Efferaque Euxini trepidabunt littora ponti,  
 O decus, o Fama nunquam delebile vinculum  
 Amplexare, Auget veluti concordia regnum,  
 Sic labi contra visum est. Tibi consule, & orbi,  
 Et fratri, sacrisque penatibus, & magnis Diis:  
 Imperiique foue surgentem ad sceptrum nepotem:  
 Atque grauem ut vultum praefers, atque ora verenda  
 Maiestatis habes, & te sapientior usquam  
 In terris nemo, nec sumptis fortior armis,  
 Sis pius, & rerum exemplo, complectere pacem.  
 Aetherea siquidem regione leuissimus aer  
 Dispositus, nec supra audet tentare, nec infra  
 Discretum imperium, ventique, & nubila sedem  
 Asciscunt propriam, sic & mare, & infima Tellus  
 Nexibus alternis iunguntur, iussaque seruant  
 Natura, sed enim quando hac concordia rerum  
 Ruperit & leges, & foedus fregerit orbis,  
 Nullus erit Titan, mistisque elementa figuris  
 Antiqua horrendi repetent primordia belli.  
 Vnda ignem inuadet, & mobilis aëra tellus  
 Disrumpet, scopulique iniecto ardore liquefcent.  
 Adde quod & vestra hac, bellis flagrantibus, hostem  
 Quem toties armis bellator Sarmata fregit,  
 Cadibus, ut timeant, obnoxia regna necesse est  
 Externum, Scythici referataque limina Jani.

Ergo per superos oro, per tempora fratris  
 Cana tui, perque hanc pueri, innuptaque puella  
 Fortunam, vestri per regni, orbisque salutem,  
 Si pietas vos vlla tenet, si vertere regna  
 Ryphea infixum est animo, cladesque parentum  
 Vlcisci bello Turcasque abolere nephandos,  
 Erigite ad pacem mentes & iungite dexteras  
 Auspiciis magnorum operum, sic sceptrum superstes  
 Sigismunde diu teneas, concorsque rebellem  
 (Quod faxint superi) vincas cum Casare mundum.

Hos versiculos cum cecinissem, Dantiscum meum conueni. Aderat mecum Gaspar Lyfita (inter poetas clarus) ecquid sibi de Heroicis meis videretur, cum interrogassem, oportune (inquit Dantiscus) calcaria enim sponte currenti addidisti. Sed nisi molestum vobis est, meos quoque quibus iter nostrum hic ex Sarmatia complector, legitote. Quod ut auidius nos aggredieremur, mellitum crustulum porrexit. Sunt enim, inquit, & diuini Gurgensis laudes, quantum perexiguo fieri ingenio potuit, non spernenda. Tuis autem cras si feriabor, mutuum recentum dabo. Quos cum legere exorsi essemus, ut mihi impartiret rogavi, ac ne vspiam Principis mei laudes in occulto delitescerent, subscripsi.

A felicibus  
 auspiciis.

Ab incre-  
 mento regno-  
 rum, a timore.

A pietate in  
 in Deos & in  
 suos.

Ab exemplo.

Conclusio per  
 precatorem.



DE PROFECTIONE SERENISSMI SIGISMUNDI REGIS POLONIÆ, MAGNI DUCIS LITUANIÆ, RUSSIÆ PRUSSIÆQUE, &c. DOMINI ET HÆREDIS, POST VICTORIAM CONTRA MOSCOS IN HUNGARIAM, JOANNIS DANTISCI SYLVA.

Enumerat vasti luctantes æquoris æstus  
 Nautica, per Syrtes, aut saxa Ceraunia vectus,  
 Incolumis postquam rediit: sua prælia miles,  
 Æratas acies, & tot per vulnera mortes,  
 Saluus post cladem prostrati differit hostis.  
 Venator sylvas, saltus, & lustra ferarum,  
 Et pedicas, structasque plagas, & retia cervis  
 Protensa enarrat. Longis peregrinus ab oris  
 Cur ego non referam rerum, variosque viarum  
 Amphractus? quos inuictis cum Rege Polono  
 Ambini, & Scytico quod ab usque Borysthenes ductus  
 Hactenus, ad ripas celeri, quas alluit unda  
 Abnobiis Ister labens ex montibus ingens.  
 Quæ nam causa via primum? quis tractus & unde?  
 Dicite Pierides, nec enim sine numine quicquam  
 Vos dixisse reor, clarius dum spirat Apollo.  
 Inclytus Arctoo Rex quum sub sydere cæli  
 Heroum Sigismundus honos superauit ad Orscham  
 Moscorum infidos populos, ut fœderis icti  
 Disrupere fidem, tandem ut sunt undique fusi,  
 Fama quidem nota est, à Gadibus usque sub Eurum,  
 Pannonia senior iam Rex effectus, & æger,  
 Ex mediis illum castris reuocauerat ad se,  
 Fraternalis vis tota in eo pendebat amoris.  
 Dulcibus hunc voluit superesse nepotibus, hisque  
 Conseruatorem fieri, robustior ætas  
 Cresceret ad regni moderandas donec habenas.  
 Paruit atque ultro, cuneis turmisque relictis  
 Ante Borysthenias rursum quas cæperat arces,  
 Utque solet, citius processit magnanimus Rex.  
 Noluit in tanto quamuis discrimine rerum  
 Fratri deesse suo, tandem quem visere fati  
 Ante diem extremum voluit, sic concitus ergo  
 Non pertæsus iter, non tempora dura, nec acres  
 Dum glacialis hyems Aquilonibus asperat auras,  
 Protinus ex Vilna Lituania soluit ab oris.  
 Ventum erat ad Gracci (quæ nunc Cracouia fertur)  
 Mænia, paulisper remoratus, liquerat illic  
 Reginam grauida Regni quæ pondus in aluo  
 Gestat adhuc, cuius leuis expectatur in horas  
 (Dii faxint faustum) partus, subitoque recessit.  
 Silesiacis primum piscosis appulit aruis:  
 Quicquid ibi lacus est, & ibi via lubrica eundi  
 Limosam per humum, venit obuius illico clavis  
 Dux Casimirus auis genitus Tessenensis, & illum  
 Regali luxu, dignoque in honore recepit.

Borysthenes.

Danubius.

Orscha arx.

Vladislaus  
Hung. rex.Vilna metro-  
polis Lituaniæ.  
Cracouia.Regina Polo-  
niæ grauida.Casimirus dux  
Tessenensis.

Attigit



Attigit hinc fines, ubi præsul Thurso Moranos  
 Prasidet eximius, qui religione secundus  
 Est nulli pietate, nec est in rebus agendis.  
 Hospitis hic etiam manifesto pectore tanti  
 Aduentu gaudens, obiter processit, eumque  
 Excepit, memor illius primordia vitæ  
 Esse suo in regno, quare impatiuit honores  
 Quos potuit, cunctos recte officiosus ad usus.  
 Post iter ad montes emensum, nubilus Auster  
 Æthere concretos ex toto soluerat imbres.  
 Contextitque solum, teneras cum floribus herbas  
 Qui sese sensim radios ad solis iniqui  
 Extulerant, hieme affecit, nec inertia solum  
 Germina reddiderat, verum penetrauit ad usque  
 Membra virum. Tamen à concepto nulla mouebat  
 Tempestas Regem, rigidi inclementia cæli,  
 Abruptaque via, nec enim iuga celsa, nec ulla  
 Obsuit intento res quo minus iret, in omnem  
 (Vt solet) euentum propere, concessit ad oras  
 Sic tandem Huniacas, quo se Tirnanua late  
 Disposuit. Venit illustris Georgius illac  
 Germana ex Regis genitus, non Hectore certe  
 Inferior, si quis vel Marte, aut viribus illum  
 Pronocat, acer init, detrectat denique nullum  
 Certamen, residens procerus corpore toto  
 Gradiuo cataphractus equo. Præcessit in armis  
 (Spectatu pulchrum) multos pulchro agmine princeps  
 Venit & Antistes numeroso milite cinctus,  
 A templis magno decoratus nomine quinque \*  
 Quem tulit ad tanti prælatum culmen honoris  
 Nuda fides, probitas, virtus, reuerentia diuum,  
 Et facile ingenium, rerumque scientia multa,  
 Hic collega Ducis Regem sub nomine Regis  
 Pannonii excepit, pariterque ad verna citati  
 Littora Danubii duxerunt, arcte ubi parua  
 Est sita Posonium, non longe à littore nota  
 Quondam, nunc toto que nomen habebit in orbe.  
 Postquam narratum est propius venisse Polonas  
 Hinc atque hinc acies, pulchras & in ordine turmas,  
 Rex Vladislaus carpento protinus æger  
 Obuius in campum tenero cum Rege profectus,  
 Heroum magna stipante vtriusque caterua  
 Regni, exoptatum iam longo tempore fratrem  
 Excepit coram, verbisque affatus amicis.  
 Regali paruam pompa deduxit in urbem.  
 Hactenus ex Scythia, Moscorum clade peracta,  
 Totque equitum, peditumque globis castrisque relictis,  
 Peruentum, solum fraterno ductus amore,  
 Visendique etiam studio (si forte futurum est)  
 Caesaris, ut Christi fieret pax una per orbem.  
 Huc igitur Langus tectus rubro ora Galero  
 Appulit, ingenio multum versatus & arte,  
 Resque gerit cunctas à Cesare missus ad istos  
 Legatus Reges, nostræ si verus amator

Thurso.

Morauie  
Episcopus.Ad Hunga-  
riam iter.Tirnanua.  
Margrauius  
Brandenburgens.Episcopus  
Quinque eccle-  
sienfis.

Posonium.

Vladislaus rex  
Hung. Ludou-  
icus rex Hung.  
& Bohem.Cardinalis  
Gurcens.

Religionis



Clades Hung.

\* Sarnovia.

Ad Gurcen-  
sem apostropha.

Petri nauis.

Christiani  
principes.Intestinum  
bellum.

Christus.

Religionis erit (si quidem est non ambigo verus)  
 Contra schismaticos Templi dabit arma rebelles,  
 Et contra hos, nostri sitiunt qui sanguinis ondas,  
 Crudeles Turcas, nuper Sarnovia ad arua\*  
 Ingenti qui Christicolum sparsere cruorem.  
 Clade, domi donec perplexa negotia aguntur  
 Sin aliter totum nunc paruo fomite mundum  
 Incendet, tenet ipse sinu pacem armaque eodem.  
 Si quisquam quem Martis amor, quem feruor habendi  
 Exagitaret, in his forsam decernere rebus  
 Deberet, res acta foret, iam praelia dudum  
 Per maria & terras infano turbine adessent.  
 Sed pater omnipotens, mundi cui machina cura est,  
 Talia scit cuius studio committere debet,  
 Commisitque tibi Praestes venerande, tibi inquam  
 Qui fidei, & decus eos Romani dulce Quirini,  
 Cardineique chori specimen, tu bella prophanis  
 Decertata odiis, iras dudumque repostas,  
 Et clandestinas, remoue de pectore rixas  
 Primorum Christi procerum, discordiaque vni  
 Pectora, nil poteris superis, nil denique terris  
 Gratius efficere, en coniurant monstra profundi,  
 Thrax ferus, & Macedo, Maotbidis accola, & Istri  
 Nauiculam in Petri, qua mergitur obruta pene  
 Vndique fluctuagis per mille pericula in vndis.  
 Eripe (namque potes) miseratus, te duce tandem  
 Aeolus immodicos reuocabit ab aequore flatus  
 Mitior, & clausis fera flamina condet in antris.  
 Serpit ab extremis, ut virus in intima membris.  
 Vique leui penetrat sensim praecordia, donec  
 Occupat in toto quodcunque est corpore. Flamma  
 Ut solet exardens in tectis tollere quicquid  
 Contingit propius, passim grassata, parumper  
 Obuia consumit, crescitque valentior ignis  
 Liberi quum iam furit, & bacchatur aperte.  
 Nil manet intactum, sic dudum Thracius hostis  
 Abstulit, at sparsim (pudet enumerare) tot agros,  
 Oppida, castra, vrbes, & regna tot inchoa quondam,  
 Nititur ulterius (miserandum) nemo resistit.  
 Huc Aquilas, Anguem, Gallum, fuluumque Leonem,  
 Hybernumque trucem, diti cum rege Britanno,  
 Et qui se Solyma titulis, Zonaque perusta  
 Extollunt defer, Germana potentia vires  
 Hic precor ostendat, non deerunt Sarmata & Hunnus  
 Assidue ducunt multis qui praelia ab annis,  
 Martia tot contra Machometis castra tyranni.  
 At quoniam proprio contendunt Marte vicissim  
 Nunc aliqui, quos religio deuinxit ad arma  
 Regis in Osores, qui mortem morte fugabat,  
 Risus, sputa, alapas, flagra, clauos, passus in alta  
 Pro nobis furca extensus, quam nemo tuetur,  
 Saluisici labefacta cadit respublica Christi,  
 Fit que minor sic & cunctas decrescit in horas.

P.338

P.339

Quid



Quid contra paucos, quorum furor urget Enys  
 Discordes animos, credis nunc posse tot hostes?  
 Imperium quorum subiit tota Africa, & ingens  
 Pars simul Europæ, atque Asiam qui sub iuga dudum  
 Miserunt, & qui toto dominantur in orbe,  
 Munita nihil his celsis in montibus arces,  
 Nil urbesque obsunt, vites populantur & agros,  
 Abducuntque homines: nec enim munitio prodest,  
 Desertis postquam sulcis non semina dantur.  
 Vertite dira procul superi nisi rebus in istis  
 Vnio nunc fiat, Bizantia pestis, & Istri,  
 Euxinique lues, Petri corrumpet ouile.  
 Hoc prohibere potes solus pater alme futurum,  
 Instantes extingue faces, ne fortior ignis  
 Post contemnat aquas, primis his motibus obsta,  
 Hoc pietas, iurata fides, hoc suadet honestum,  
 Vtile erit cunctis qui Christi nomen adorant.  
 Ne te seducant, magni nec Caesaris aures  
 Tot querulis deinceps precibus, vel munere vincant,  
 Hi qui bella fremunt, & nunquam bella capeffunt  
 Aduersus fidei tot tela minantia nostra,  
 Omnia vi quondam male dum concessa tenebant,  
 Fastu sub tumido, & sub cuncta licentia agebant  
 Immodica, nullamque prius consinia pacem  
 Ad quam deuincti fuerant habuere, sub armis  
 Gentiles subiere domus, vicinia late  
 Vastantes, testis locus est nunc Abiete nomen  
 Qui tenet ingenti est quod nactus clade perenne.  
 Nunc etiam possent tranquillo viuere luxu  
 Deliciisque frui (prout consueuere) vicissim,  
 Sed Stygiis emersa vadis sic versat Erynnis  
 Illorum mentes, ut summo à præsule bellis  
 Decretis obsint, contra Machometica castra,  
 Votaque quod tantis faciant discordia captis,  
 Inficiantque animos, ducantque in prælia mundum  
 Christicolum, quare superi olim tempore prisco  
 Non castigarunt frustra delicta nocentum.  
 Sed feror in præceptis, quo cæpi rursus eundem est.  
 Huc etiam domina Legatus missus ab urbe  
 Cardineo summique patris suffultus honore,  
 Pannoniæ Primas Regni peruenit, in isto  
 Conuentu multa ingenio, qui multaque fido  
 Commoda consilio pro regni utriusque salute  
 Disquirat, velletque libens succurrere rebus  
 Ne sic infectis hinc Reges forsitan abirent  
 Namque videt prudens, per multa volumina rerum  
 Tot mala quæ paruis sunt exorientia causis,  
 Nunc igitur (quamuis Labyrintho quicquid agendum  
 Fertur in ambiguo, quodamque errore laborent  
 Omnia) spes magna est cunctis, prudentia Legum  
 Istorum, tot Pontificumque Ducumque probata  
 Inuenta, hoc quod adhuc vertent in dulcia amarum est.  
 Sic lux post tenebras, Æther post nubila clarus  
 Sapius & sic post aduersa secunda sequuntur.

Infidelium po-  
tentia.

Ouile Petri.

Fomitei belli.

Abiet.

Aduentus  
Cardinalis Strā-  
goniensis.



Pompa regum.

Cuspinianus.

Sperantius.

Balbus.

Piso.

Riccardus.  
\* Bellum Boi-  
cum.

Vrsinus.

Ad Caesarem.

Quid referam innumeros Proceres, Heroas, & auro  
 Torquatos equites, huc qui venere superbo  
 Regum in circuitu, quid equos, phalerasque rubentes.  
 Auratas chlamydes, preciosa monilia, gemmas?  
 Hunnus qua diues, Moscorum ex clade Polonus  
 Quae tulit acer eques fortis qua deinde Bohemus,  
 Enumerare prius possem, quot Cynthia pleno  
 Dum fulget cornu sint aurea sidera coeli,  
 Igneus & medio dum flagrat Phoebus in axe,  
 Quot seges omnis habet tenues per ingera aristas,  
 Quot sparsim voluat Lybicoque in littore arenas  
 Auster, dum tumido bacchatur turbidus aestu,  
 Singula quam tanta valeam spectacula pompa  
 Dicere, totque graues currus, rubrasque quadrigas  
 Multaque nulla prior quae viderat ante vetustas.  
 Nec solum tanti Martis, procerumque tumultus.  
 Venerat huc etiam doctorum clara virorum  
 Concio, de quibus huc à Caesare missus ad istos  
 Cuspinianus erat Reges orator, habunde  
 Doctus & in variis versatus rebus agendis,  
 Phillyrides certe vel nostro tempore Chiron,  
 Et medica fertur praestans ut in arte Machaon,  
 Tam bene languori vario, morbisque medetur.  
 Fetus & à teneris solers Sperantius annis  
 Aula in Caesarea, nuda virtutis amator,  
 Ingenio promptus, multum facundus & ore,  
 Seu leges, vel iura patrum, vel carmina dicat.  
 Balbus item Phoebi quondam, nunc rite sacerdos  
 Et Jouis interpretres veri, qui grandia facta  
 Hunniaci scribit regni, totque edidit olim  
 Quod sua non potis est unquam evanescere fama.  
 Piso etiam nostro vir in auro doctus & acer,  
 Magnorum nuper qui multa negotia Regum  
 Tractabat, quod se stricto pede, siue soluto  
 Aggreditur quicquam, nil est exactius. Exin  
 Appulit Hetrusco Riccardus sanguine cretus,  
 Grandia qui cecinit Romani Caesaris acta \*  
 Egregius vates, tum notus primitus, & tunc  
 Sapius humana mihi consuetudine iunctus.  
 Gaspar & inde meus, Calistus forte puella  
 Vrsinus cognomen habens, atate Tibullo  
 Et par ingenio, Graio & sermone Latino  
 Imbutus, vates & praeo Caesaris ingens.  
 Sapius hic culto certavit carmine mecum,  
 Leniuitque meos pertaso in corde dolores,  
 Quos cepti sensim tabescens tadio in isto,  
 Candida iam noua ter rursus sua cornua Phoebe  
 Induit, Arctois procul hinc quod viuimus oris.  
 Omnia pulchra quidem sunt omnia amena sub isto  
 Tempore, per montes, per plana vireta, per amnes,  
 Per vernos prospectus agros ite latus, at ipsa  
 Jam mora sola nocet, nobis mora sola molesta est.  
 Ergo venit tandem Caesar Romane, citatum  
 Aduentum Reges cupiunt tibi sanguine iuncti,

P. 340

P. 341

Non



Non solum tecum contra hostes fœdus inibunt,  
 Tu modo ne deses toties videare morando.  
 Sed tecum connubia, sed latos hymenæos.  
 Mœnia si Austriacæ nunc sunt adeunda Viennæ,  
 Danubiusque celer tranandus, siue locanda  
 Ad ripas campo castrensia tecta in amico,  
 Vel quocunque loco placeat congressus, ad istos  
 Accelera Reges propius, iam tempus & instans  
 Deposcit contra Moscos occasio belli,  
 Inque feros Turcas, qui nuper clade cruenta  
 Affecere tuos Hunnos, non segniter ergo,  
 Ergo veni, cupidisque tui te protinus offer.  
 Sic me etiam, modo te videam, nec adusque pigebit  
 Danubium à gelidis venisse Borysthenis undis.

p. 341 Perendie cum propter Danubii ripam, nescio quid nugarum meditans,  
 ambulare; Dantiscus affuit, interpellansque, *En tibi Apophoreticum*, inquit,  
*si volupe erit, tuum in Diarium congeres.* His dictis abiit. Quod cum ego lecti-  
 tassem, hoc albo non indignum apposui.

JOANNES DANTISCUS RICHARDO  
 BARTHOLINO.

SI rerum pensare vices libet, ordine certo  
 Quas natura parens statuit, Riccarde, videmus  
 Omnia sub iusta moderari lege modoque,  
 Astra suos servant, quos consuevere meatus,  
 Servat uterque polus solitum quo voluitur axem,  
 Servat & hæc ingens immensi machina cœli  
 Circuitus, quibus hunc in se complectitur orbem,  
 Phœbus ab extremis ut dudum emergitur Indis,  
 Et Tartesiaco se rursus in æquore condit,  
 Ipsa suo pleno Latonia tempore cornu  
 Fulget, tranquilla per opaca silentia noctis  
 Illumisque etiam paruum decrescit in orbem,  
 Et perit atque redit, nunquam stata tempora fallit.  
 Annus habet glacies, habet æstus, veris amœni  
 Autumnique grauis pluvias, sua tempora tempus  
 Quodque tenet, sunt forte sua contenta vicissim  
 Omnia, nec fines, & littora præterit æquor.  
 Deucalionis aquas olim, Phaëtonis & ignes  
 Sustinuit tellus: sunt omnia tuta, fidemque  
 Nunc elementa datam nobis post Iridis arcus  
 Non temerant, fateorque animantia cuncta sub una  
 Quæ viuunt specie unanimi sunt fœdere iuncta.  
 Non Aper in similem per sylvas irruit aprum,  
 Vrsus in atrocem scuit non efferus vrsum,  
 Nec draco in Hesperium misso furit igne draconem:  
 Solius est hominis (quamuis animantia longe  
 Innata exuperat ratione) ferocia maior,  
 Omnes armorum strepitus, Martisque tumultus,  
 Quæque vides tormenta, sudes, thoracas, & hastas,  
 Tela, enses, frameas, arcus, volucresque sagittas,

Ferarum con-  
 cordia.

Hominum fe-  
 rocia.



Ardor ha-  
bendi.

Sigismundus  
Rex.

Sigismundi  
Rex Polon.  
Hlinski.

Prima contra  
Moscos victo-  
ria.

Contra homines effinxit homo, meditatur in horas  
Pluraque quis possit per plurima damna nocere.  
Per maria & terras, per multa volumina rerum,  
Itur in angustum discrimen & omne periculum,  
Inuise saltem rumpantur ut otia pacis.  
Sic ardor multos, & habendi dira cupido  
Versat, pertasos tranquillum viuere, semper  
Quin agitent quicquam superis terrisque perosum:  
Hinc tot bella, acies, cades, desertaque rura,  
Oppida, diffractaque vrbes, & inania regna,  
Et campi toties dispersis ossibus albet,  
Tales qui totum duxere in praelia mundum  
Hortare ad pacem, nec opus calcaribus esse  
Censeo equis ultro properantibus, ille profecto  
Non monitoris eget, placide qui pacis amator  
Sedulus est, & qui pacem deposcit & optat.  
Inclutus à multis Sigismundus faustiter annis  
Pacis amans, ultro nunquam, sed semper in hostes  
Arma lacestus suscepit, non tamen unquam  
Contra Christicolas, verum in crudelia castra,  
Bosphoron, & contra Mysosque Gethasque Scythasque  
Hunc igitur, cuius terras, spaciiosaque regna,  
Parrabsis Arctos agit per Balthea littora magni  
Oceani, prope ad Euxinum diffusus aquor.  
Ut noscas, quantum pacem desideret omni  
Pectore, ne graue sit paucis aduerte docebo.  
Slesiacis primum, regnum germanus habebat  
Donec Alexander patrium, dux iustus in oris,  
Iustitiam (solet ut semper) librabat in equis  
Lancibus, & cunctis iuste impartiuit eandem,  
Nullus erat prado, nullus grassator in antris,  
Per stratas, omnesque vias, per compita passim,  
Ibat securus tranquilla pace viator;  
Vndique cunctarum fuerat pax optima rerum,  
Hoc sentit praesens, hoc postera sentiet aetas,  
Quantum consilio, quantumque salubribus actis  
Profuit, & post se quam commoda multa reliquit.  
Quum frater demum fato concessit ad astra  
Conflata regnum grauitur qui affecerat are,  
Vnanimi procerum consensu sceptrum recepit.  
Orsus ut instantes vix restaurare ruinas  
Rex nouus, infida propere dux fraude Michael  
Concitus, ad Moscos defecit, turpiter hostis  
Factus, eos secum Lituanas duxit in oras.  
Hac paci intentus Rex ut cognouit, ommissis  
Omnibus in regno, velocius obuius ibat.  
Indecitum permensus iter, mox ipse priusquam  
Fama aderat, subito Moscosque Ducemque fugabat,  
Pone sequens victor per lata Borysthenis arua.  
Princeps hinc Scythicus bellum exitiale timebat  
Percussus, pacem orandam, deponereque arma  
Censuit, ad regem legatos munere multo  
Transmisit, supplex veniam pacemque poposcit.

P.342

P.343

Foedera



Fœdera Rex pepigit, generosi pectoris ira  
 Sunt siquidem faciles, & mens ignoscere lapsis  
 Supplicibusque solet leuiter regalis, habent nam  
 Dūs animos similes reges & pectora magnis.  
 Limitibus demum positis, & finibus orbis  
 Sarmatiae, æternum fuerat vulgata per omnes  
 Aëquoris & terra positus pax inter utrumque,  
 Quæ tamen (ut referam paulo post) fracta Scytharum  
 Fœdusfragum ut mos est grauius non mansit inulta.  
 Ad regnum rediit iam credens omnia tuta  
 Heroum Sigismundus honos, pacemque repostam  
 Militibus missis erexit, & oia cunctis  
 Libera distribuit, tædæ subiere iugales  
 Quærere quas voluit Germanis fors in oris.  
 Perfidus interea Valachus, cui Mysia paret  
 Inferior, dum Rex sperat latos Hymenæos  
 Fraude Leopoliæ multis obsederat urbem  
 Agminibus, late Podoleis castraque in aruis  
 Omnia depopulans statuit, per tela, per ignes,  
 Si choreas, dulcesque iocos, & cæpta fefellit  
 Gaudia, Rex igitur prudens ut semper ad omnes  
 Res solet esse graues, nihilo demissior (vno  
 Spectatur vultu, sint tristitia siue secunda)  
 Millia confestim collegit multa suorum,  
 Hacque insperatos propere dimisit in hostes.  
 Hostis ut hæc sensit, retro fugiebat ad arces  
 Quas habuit proprias, ad syluas, atque paludes;  
 Non ausus conferre manus, gens regia late  
 Terga sequebatur, totque oppida, castra, casusque  
 Exussit, longe sæuam populata per arua  
 Mysia, tot Ducibus captis procerumque cateruis,  
 Postremo rediit spoliis illæsa superbis.  
 Et nisi Germanus senior, qui sceptrum gubernat  
 Pannoniæ, rem pacasset, iam Mysia tota  
 In cineres pro perfidia conuersa iaceret.  
 Hinc Valachus veniam ut petiit, captosque redemit,  
 Res est sub cælo vix credo notior ulla.  
 Sic iterum dura lassatus casside victor  
 Pectore voluebat, positus grauioribus armis,  
 Pacem, qua totus nihil orbis gratius in se  
 Continet, Hunnorum præclaro stemmate, pulchram  
 Reginam duxit, ratus hinc securius annos  
 Dulciter exigere, & regno dum fata vocarent  
 Heredes patrio tum post se linquere. Vertit  
 Omnia fors aliter, mouit furialis Erynnis  
 Hippophagos Nomades gelida Maotide septos.  
 Hi clandestino sub verno tempore gressu,  
 Præter spem innumeri, regnum inuasere Polonum,  
 Ut sucti rapido transire per omnia cursu  
 Millia multa hominum, matres, vetulosque parentes,  
 Reptantes pueros, iuuenes, tenerasque puellas,  
 More suo iam nexerunt, misereque ligarunt,  
 Occisis multis; iam iamque abducere longe  
 Cæperunt. Tum Rex subitis, & rebus in arctis

Valachi irru-  
piti.

Victoria con-  
tra Valachos.

Nuptia Regis.

Tartarorum  
invasio.

Congessit



Victoria contra  
Tartaros.

Mosci perfidia.

Victoria contra  
Moscos.

Rex à Bory-  
sthene ad Danu-  
bium.

Congessit turmas equitum, peditumque cateruas  
Quas potuit, iussitque sequi velociter omnes,  
Ventum erat ad cuneos spoliis prædaque refertos,  
Qui nil cesserunt, contra configere magno  
Quin etiam clamore dabant sua signa volentes,  
Parte ab utraque statim nisu & conamine toto  
Bellatum, fortuna diu stetit eminens anceps,  
Verum quam cito se gens regia cominus hosti  
Intulit, & volucres detorsit ab aure sagittas,  
Terga dabant Nomades, ibidem bis dena Getharum  
Millia trunca iacent, abducti sicque soluti,  
Ad patrios tandem salvi rediere penates  
Pax iterum fuerat sed paruo tempore, cladem  
Post istam, donec periuro pectore Moscus  
Sacramenta, fidem, iurataque fœdera rupit,  
Adiunctis belli sociis, qui templa Quirini  
Romani obliti, templi adiungere prophanis  
Se hostibus, & regem conspirauere (nephandum)  
Contra Christicolam. Sed Diis sunt omnia cura,  
Hi non permittunt Titanas Pelion Ossæ  
Jungere, consilia & nunquam tam dira secundant,  
Qualiter hoc bellum confectum scribimus, omnemque  
Historia seriem, quod si mihi vita manebit  
Versibus innumeris conscriptum utcumque videbis.  
Hoc obiter tamen est addendum, quinque carina  
Myriades Stigia Charon una luce recepit  
Moscorum, primosque Duces, primosque senatus  
Principis insidi captos Sigismundus in arcto  
Carcere habet, qui compedibus durisque catenis  
Deiuncti, pro commissis dant crimine poenas.  
De reliquis bello sunt nobilioribus isto,  
In viuis siquidem plusquam duo millia capti.  
Sponte nocet nulli, nisi proritatus, habunde  
Contentus propriis, sua quæ sunt cuique relinquit:  
Parte sed ex omni fines & parta tuetur,  
Sique laceffit quandoque citatur ad arma,  
Velox egreditur, munitus milite forti,  
Et duce iustitia superat, semperque triumphat.  
Nunc quamvis victor tot grandia bella peregit,  
(Victores inflare solent res sæpe secunda)  
Non renuit tamen hæc ineunda fœdera pacis  
Ex mediis ad quæ castris huc venit, ommissis  
In tot prostratos armis victtricibus hostes,  
Pace frui cupiens interque capedine longa  
(Metire à gelidi sit quanta Borysthenis undis  
Danubii ad ripas distantia) pacis amator  
Hactenus ad pacem ex regno præcessit habendam,  
Non tamen ut prorsus iam segnis bella timeret;  
Sunt vires, est mens, gentesque ad proelia multa,  
Sed contra inuitus gentiles suscipit arma  
Christicolæ, quos tot bellis defendit, & illos  
Insidis semper tutatur ab hostibus, Ergo  
Parte libens ista confecta in pace maneret,  
Quam si quis temere iniustus conabitur ausis

p. 344

p. 345

Rumpere



*Rumpere, quæ nollet tandem cogetur inire  
 Bella laceffit, sua sic & parta tueri.  
 Hos igitur cum complicibus quos ardor habendi  
 Arietat, hortare ad pacem, concordia rerum  
 Fœdera, confusumque chaos compage saluta  
 Hos docta & longa doceas ambage, vel illos  
 Si pacem penitus nolunt, gaudentque sub armis,  
 Ista cothurnato compelle ad prælia versu,  
 Quæ nunc, pro Christi si quisquam vellet amore,  
 Depositis intestinis à pectore rixis,  
 Instant, præclaris accommoda tempora bellis  
 Sunt etenim, huc ducas tam multo Marte furentes,  
 Dum Sophus in Turcas immania classica ducit,  
 Quem nuper tota fudit cum gente, morandum  
 Non esset siquidem, nunc posset Græcia vinci,  
 Et Constantini Bizantia mœnia magni,  
 Thracia tota iugum, Trapefunciaque arua subirent,  
 Inde Palestine tellus promissa sacrata,  
 Memphis, Persis, Arabs, Babilon, sacra culmina Syne,  
 Totus & usque nigros mundus caperetur ad Indos.  
 Rex Sigismundus adest, diuini nominis atris  
 Hostibus infensus, contra illos fœdera iunget:  
 Sint modo qui accipiant, non detrectabit in omnem  
 Euentum, contra Machometica pergere castra,  
 De quibus unanimi (Dii faxint) pectore iuncti  
 Belliger ut magno Cæsar cum Rege triumphet.*

Oportunitum  
bellum.

Græcia.

344  
 p. 345  
 VIX hosce versus subscripseram, cum Caspar Vrsinus Poëta fane industrius & mihi coaulicus fores irrumpens, *Diurnam hanc*, inquit, *fœturam accipe*, ac Moschice, vix inclinato capite abiit. Ego cum diu ridendo ramices pene fregissem, legi, quantum per risum potui, quos obiecerat versiculos. In quibus cum non vulgares & Gurcensis laudes, & Joannis Epini Episcopi Vladislauensis nomen legissem, quem ego propter diuinas eius virtutes, & morum suauitatem, doctrinamque, ac miram in literatos beneuolentiam (quas & si ab aliis, Gasparis tamen præconio vberius intellexi) veneror & colo, piaculum me facturum putabam, si versus non inseruissem.

AD REVERENDISSIMUM IN CHRIS-  
 TO PATREM, ET DOMINUM D. JOAN-  
 NEM THURZO VRATISLAVIENS. EPISCOPUM, PATRO-  
 NUM SUUM MERITISSIMUM, DE CONVENTU  
 POSONIENSI COMPENDIARIA EPISTOLA  
 GASPARI VRSINI VELII,  
 SILESITANI.

*Vindelicis Augusta iacens late in chytæ terris  
 Nos tenuit bis, Thurze, decem cum principe soles,  
 Inde Licum emensi ratibus, iam classe parata  
 Danubium regnatorem sulcamus aquarum.  
 Multa quidem ripis spectauimus oppida circum  
 Vitigeros inter colles castella, situmque  
 Urbis ab exiguo quæ ducit nomina Rego.\*  
 Quaque suum amittit nomen torrentior Ænus,*

\* Regn. fl.

Danubium-



Danubiumque opulentat aquis & flumine magno  
 Confluus, applaudunt nymphæ Istrides, Istrides unda,  
 Et iam se Rhenum credunt equare bicornem.  
 Haud procul inde autem Greinea ubi mœnia surgunt,  
 Est locus horrendo qua vortice proruit Ister  
 Præruptis scopulis utrinque arctatus, & una  
 Parte absorbet aquas, aliaque excussat ab imo  
 Nauisfragos fluctus (visu miserabile) nautæ  
 Sæpe etenim illidunt naues, nant flumine merces  
 Precipitantque viri mersati gurgite vasto,  
 Frustra heu Nicoleon & numina sancta vocantes.  
 Nos ausi penetrare, ipsi posuere repente  
 Venti, terribiles visque fiescere fluctus.  
 Credo equidem sensere virum, quem flumine amico  
 Deueherent, gratum Diis & mortalibus æque.  
 Atque ut Pannonia ventum est ad pulchra Vienna  
 Mœnia successum & tectis, mox prima virorum  
 Delectos procures, princeps acciuit habendo  
 Concilio, acturus magnis de rebus, & inde  
 Secessit Stiriis confinia ad oppida terris.  
 Hic porro interea nos consuetudine suavi  
 Doctorum fruimur, mihi Cuspinianus in illis  
 Est potior, vir enim hic mellito fundit ab ore  
 Dulcia verba, quibus mollescent pectora Regum,  
 Diues opum, forma excellens, & pectore magnus;  
 Et quo cum magna digressus ab urbe Quirini  
 Germanos late populos patriamque reuisi  
 Egidius præstante Remus cognomine, quo non  
 Candidiorem animam Lucina in luminis auras  
 Protulit, ipse sacras leges Romanaque iura  
 Nouit, & est inter consultos Principis unus.  
 Ac longe ante alios facundus diuite vena  
 Eloqui præstat Vadianus, & innumera vi  
 Carminis, imparili pede, seu pede fluxerit æquo.  
 Cospus item Æmilie parui prope flumina Rheni  
 Natus, ad extremam bonus atque suavis amissim,  
 Ausonio reliquos æquat sermone, Pelasgo  
 Ore præit, mecum hic magnæ de mœnibus urbis  
 Delitiis, genioque solet non pauca Quiritum  
 Disserere, ab nimium nimium distamus ab illa.  
 Quin & amicitia nobis coniunctior, ori  
 Ingenioque modum scite qui figit honestum  
 Rudolphus, latices iuuenis satur Hippocrenes,  
 Nunc & Rhateis gens dura sub alpibus audit  
 Aut simile, aut melius Peligni carmine Vatis.  
 Et iam Pannonius Rex, & Rex Sarmata fratres  
 Posonii coiere, prior sed Pannonius Rex  
 Jam grandis natu & defecto corpore languens  
 Filiolo cum Rege, sua cum principe nata.  
 Alter ab extremis Scythiæ comitator oris  
 Victor ouans gelidique Borysthenis affuit undis.  
 Nuncia ut ad Langum peruenit epistola Regum,  
 Aduenisse viros, mox apparat ire vocatus.

Vulgo, der  
Strudel.

Cuspinianus.

Ægid. Re-  
mus.

Jo. Vadianus.

Aug. Cospus.

Rod. Agri-  
cola.

Regum con-  
uentus.

p. 346

p. 347

Quo



Quo cum ceruleas instructa classe per undas  
 Omnes deuehimur, pia numina voce sonantes,  
 Numina quis magni ius est maris & fluuiorum  
 Præcipuum, & lati iam optata ad littora Regum  
 Venimus, imperio nobis genitoris amico  
 Aduorsum natu Rex ipse nouissimus iuit:  
 Torquatos inter procures interque togatos  
 Pontifices, ipse emicuit ceu sydereus sol,  
 Blanda tuens, Huic flaua genas lambitque tegitque  
 Casaries, omni subeunt ex parte ministri;  
 Auro intertextis induti vestibus omnes.  
 Diuersos illic habitus atque ora virorum  
 Vidimus, inter eos studiosus Sarmata cultus  
 Regisici, quamque est habitu tam corpore pulcher.  
 Nec sua defuerunt Germano serica, non &  
 Copia pictæ vestis, fulgentis & auri.  
 Quamque grauis cultu, tam gens fuit ore verenda.  
 Vbertate tamen Panno præcelluit acer,  
 Siue auri vestes, siue auri pondera cernas.  
 Vera loquar, sed parua charis, quia simplice vestes  
 Arte laboratæ membris ingentibus hærent.  
 At laus est patrio non vltima viuere ritu  
 Indigenas, & non externi sumere cultus  
 Luxuriem, ac mores non perdere præstat auitos.  
 Ora perusta gelu crudus Scythia turpia Moschus  
 Imbellis sublime apicato tegmine vincit,  
 Atque latus curuo procedit acinace cinctus.  
 Jamque decem totidemque dies fluxere, peractis  
 Conciliis, magnis impensaue tempora curis.  
 Cum bene compositis diuino pectore rebus.  
 Auspiciisque deis, quas non est dicere, Langus  
 Digreditur, lati dominum comitamur euntem.  
 Sarmatico Langus celerem dedit astura Regi,  
 Nobilium pelles subito Rex ipse ferarum  
 Treisque simul pateras dedit aurea munera Lango.  
 Atque ita nos illo discessimus. Hactenus ambo  
 Et Regem Reges, & fratrem pectore fratres  
 Augustum expectant Augustæ stirpis uterque,  
 Magnus uterque virum tum re tum nomine magnum,  
 Venturum alloquio, quem consilia alta petentes  
 Heluetii retinent Insubro cum duce fortes:  
 Et Lusitani Rex littoris armipotens rex  
 Emanuel, nec non cui septem cura tuendi  
 Regna per Hesperios incumbit maxima tractus.  
 Nescio quos etiam perhibent componere motus  
 Belgarum, insidi perturbant omnia Belgæ:  
 Haud impune tamen, Deus omnia lumine iusto  
 Aspicit, o solus quam multa negotia Cæsar  
 Sustinet, & quanto curarum pondere sudat!  
 Subiectos placida populos dum in pace tuetur,  
 Debellatque malos, & proterit impiger hostem.  
 Ne tamen ulterius iunctos tibi sanguine Reges  
 Distineas Cæsar, qualis modo cumque labor te  
 Implicitum tenet, aut quocumque sub orbe moraris;

Hungarus.

Moschouita.

R. Portugale.

R. Hispania-  
rum.

Belgæ.



*Tolle moram, & venias, neu dedignare precantes  
Aspectu Reges, tua quos presentia reddet  
Imperio faciles, parilesque per omnia votis,  
Pacturos animum, atque aeternum in foedus ituros:*

Eiusdem in Caesarem Venantem.

*Si quis adhuc hominum dubitat te maxime Caesar,  
Sed non vulgaris numen habere Dei.  
Jam sciat hoc, nudam vidisti impune Dianam,  
Dum sequeris ceruam per iuga summa leuem.  
Ira Deæ fatum meditata Actæonis, undas  
Sed frustra ultrici sparsit in ora manu.  
Proinde rata esse patrem vultum demisit, humique  
Fixa verecundus repsit in ora pudor.  
Atque ait arridens, quid me pater optime tentas?  
Corpore an hoc dubitem stulta latere Iouem?*

Aliud.

*Cæsar's arma Senon, verum haud impune, superbus  
Risit, & in vili Cæsar's ira fuit.  
Risit idem tumidus contempsit & Adria nomen,  
Nunc cui lenta nimis Cæsar's ira nocet.  
Julius his inquit sapientior: Hunc bene Regem  
In numero nihil dicitis esse notam.  
Sum decies, quam solus, ego cum Cæsare maior.  
Vos tandem hinc unum perdidit, atque nihil.*

Wayuoda pro-  
figatus à Turcis.

**D**UM itaque Musarum suauitate delectamur, rumor increbuit, Joannem Wayuodam, cum quinque millibus Pannonum à Turcis fusum fugatumque esse, Is enim cum cis Danubium esset, ut aliquod egregium nauaret opus, pontem in fluuium iecit, oppidumque Sarnouietz ad alteram ripam obsedit. Turcæ collectis undique militibus, Pannonum castra aggressi sunt, tantaque ab iis strages illata, ut agere Wayuoda saucius cum paucis euaserit. Alii factum Ducis culpa dicere, alii exploratorum incuriam accusantes, defendere; atque ut cuiusque odium ac beneuolentia erat, rem culpa dignam aut indignam facere. Sequenti die, ut cladem tegerent, lauius factum vulgari. Velites scilicet trecentos à Turcis, qui in insidiis erant, interceptos caesosque. Verum (ut prior fama fuit) præsidium, quod illic tenebatur, auiditate gloriæ à Wayuoda amissum est; qui cum Regis Vladislai filiam sibi in uxorem dari vrgentissime efflagitauisset, & quo minus cum Cæsare affinitas contraheretur, pro viribus obstitisset, aliquid præclarum gloriosumque moliri tentabat, ut inde sibi Regis beneuolentia regnique favore comparato, quod optabat, facilius consequi posset. Sed longe aliter quam sperabat, accidit.

Gurc. pruden-  
tia in Cæsario-  
nis negotiis.

XVI. Calend. Junias festo Ascensionis die, Reges Gurcensisque ad templum profecti sunt. Anna Regina, obuiam cum se patri obtulisset, auream corollam versicoloribus intextam flosculis, paterno capiti imposuit. Dulcissimum profecto pietatis spectaculum. Sequentes dies in consilio transacti sunt, ubi iam ab omnibus, quanti & ingenii & solertia sit Gurcensis, plane cognoscitur. Quem in vno damnari sentio, quod ego maxime laudo & fidei erga Cæsarem Maximilianum non vulgari attribuo: vulgo enim fertur causis Cæsarianis ita firmiter inhærere, ut quod semel dixit, nihil propterea extorqueri posse, quamquam omni studio, opera, industria. Id tantummodo meditatur laboratque, ut pacem foedusque, firmissimum Christiani imperii stabilimentum, persuadeat. Quare



Quare cum tertio Calendas Junias mane ad multum diem in consilio fuissent ; Gurcensis instando, persuadendo, cohortandoque ita negotium pertractauit, vt felicius auspiciusque optari minime potuerit. Nam & Regis Sarmatiæ res satis prospere composuit, Ludouici regis cum Maria matrimonium firmavit, Reginae Annæ partes ita tractatæ sunt, vt de ea integrum Cæsari foret, vtrum Carolo, Ferdinandoue, an sibi Anna nuberet. Sed de his alibi à nobis latius deferetur. Itaque peractis rebus tanta vbique lætitia orta est, vt etiam præ gaudio Regem Vladislaum referant lachrymas non continuissse.

*Regum Gurcensisque negotiorum conclusio. De Annæ matrimonio.*

Postero die conuiuium in Pannonica regia celebratum est; conuiuæ, Vladislaus, Sigismundus, Ludouicus Reges, Anna Regina, Gurcensis fuerunt. Vladislaus in dextro thori angulo accubuit, secundus Reginae paterno lateri locus datus, tertius Sarmatico Regi, quartus Ludouico, in quinto Gurcensis discubuit. Diutuleque cum mensæ accubuissent, & saliare conuiuium factum, & magnis de rebus sermo habitus est. Tandem ad multum diem Rex Sarmatiæ, Gurcensisque domum redierunt, sed cum propius Gurcensis esset, comitandi officio instantissime fungi velle; Rex contra renuere, ille orare diuque cum in hac humanitatis pugna perstitissent, Rex tandem vicit nutuque significauit; vt præstitis virique primores Gurcensem comitarentur. Mira profecto tanti regis in principem obseruantia. Sed ad illud redeo, quod profecto inuitus præteriissem, Reginae Annæ tanta mihi pulchritudo visa est, vt neque Palladem, neque Venerem similem huic esse iudicarem, multo iis formosior est, quæ habitu concinnata Teutonico, supra quam dici possit elegans videbatur, Aureum caput corollæ treis, faberrimo ordine dispositæ, circumuallabant, vberes olli crines, à ceruice penduli, sensimque sinuato patagio residentes, paulisper ad finem conglobati, leni quandoque aura, vt eburneum etiam collum per interualla prospiceremus, mouebantur. Oculi in alborem procliuës, sed tam decori, vt cum eos vel aperit, vel conuiuet, dubium sit vtrum diuina an humana censeatur. Duo profecto sydera, duos soles (adeo spectantium animos perstringunt,) minus fulgere crediderim. Incessus grauis, animosusque, & lætabundus. Os non verba, cum loquitur, sed ambrosiam ac nectar, aut si quid dulcius est profert. Quodque optatius, iam nubilis est, iam Paphius flos legendus: qui & si nimis recens videtur, tamen cum rorem matutinum hauserit, pandiculabitur illico, atque adolescet. Hanc igitur Cæsar (vt dixi) velit ne in vxorem accipere, an alteri nepotum dare, sibi integrum reliquit. Sed ego per Deos iurare immortales, si hanc viderit, nusquam de nepotibus fiet sermo, sibi vult.

*Regum & Gurcensis conuiuium. Annæ Reginae laudes.*

## LIBER SECUNDUS.

IGITUR cum omnia ex sententia tractata fuissent. X. Calend. ad vespertum paucis comitatus equis Gurcensis vt & de rebus à se nauiter prudenterque gestis rationem redderet, & aduentum sollicitaret, ad Cæsarem proficiscitur. Tercio Cal. Jun. Laureacum peruenimus, oppidum sane peruetustum, nunc Ensum vocant, ad flumen Anasum, quod ex Alpibus fluens in Danubium descendit, à quo Austria bifariam diuiditur, quam incolæ supra infraque Anasum appellant. Inde quatuor itineribus Iuuauiam, sic antiquitus dictam volunt, petiuimus nunc Saltzburgium à flumine Sala haud ignobili nominant. Episcopus in cuius locum Gurcensis cooptatus est, & Ludouicus Bauariæ Dux obuiam processerunt, vt salutandi officio vltro citroque perbenigne satis functi sunt, de loco digniore grata omnibus altercatio orta est. Archiepiscopus Gurcensi assurgere (quia Cardinalis) volebat; Gurcensis quia loco patris Archiepiscopum & veneratur & colit, contra vt ille præiret, nitebatur. Tandem vt filius parentis imperio obsequens, Gurcensis medius, Archiepiscopus dextra, Dux sinistra urbem ingressi sunt. Ad vespertum stratis lautissime lectis discubimus, inde

*Laureacum oppidum.*

*Saltzburgium.*



*Arcis Saltz-  
burgensis de-  
scriptio.*

*Laus à cura  
bellica.  
Laus à miro  
artificio.*

*Reichenhall.*

*De puteo salso  
in Reichenhall.*

chorea incepta : Gurcensis & si pudice , vt reuerendissimo patri suo morem ge-  
reret , bis saltauit , quem ego cum conspicarer exemptilibus ( vt meus est mos )  
oculis utebar , cogitabam ludos illos Olympicos , ad quos Jouem nimirum de-  
scendisse aliquando credere sanctum est. Verum vt diuini vultus grauitatem  
seponere aliquantisper conabatur , ita & inuito quidem grauitatem ipsam auge-  
ri animaduertebam. Mane autem cum prandissemus , ad visendam arcem , ad  
quam calle angusto & supino admodum itur , profecti sumus. Duplex eius mu-  
rorum ambitus est : exterior in rupibus saxosis , ac verius rupes ipsa murus est.  
Crassissimas munitissimasque turre habet , circumque peruias. Interior multo  
labore intercisis cautibus ab altero disiunctus , natiuo saxo impositus est , vt si  
ab hoste prior captus fuisset , praesidia quo se reciperent , tutiorem haberent lo-  
cum. Intus cryptoporticus , quæ ad cellas vinarias quoque vsum , cum opus  
est , prestare possunt , nam supra cellarium fornicatum est , optimis vinorum  
generibus refertissimum. Extra sub ampla longaue testudine , seriarum ingens  
numerus , in quibus farina recondita est. Puteus item altissimo vado , vnde  
summo rotularum artificio aqua hauritur. Cisterna alio in loco , Italicum opus ,  
in quam pluuialis aqua superne ingenti imbrium ambitu per tessellatum implu-  
uium descendit. Superius , per gradus natiuo confectos saxo , ad armamenta-  
rium ascenditur , in quo sagittarum , spiculorum , scorpionumque vis ingens ,  
omniaque telorum genera visuntur. Quæ & si iucunda spectatu erant , tamen  
multo iucundiora , quod Archiepiscopus tanquam Philo ille ( nisi fallor ) opti-  
mum se armorum & demonstratorem , & disputatorem ostendebat. Nos itaque  
cum ad altiora tenderemus , ipse ad patulam arborem se contulit , in qua cen-  
tum vndique volitantes pauones vociferabantur , quos & si ego propter miram  
pulchritudinem admiratus sum , tamen vel hoc magis , quod totos albicantes  
sine maculis vidi. Dumque hac atque illac innumera arcis loca percurrimus ,  
Aulas , auro , argentoque faberrime contignatas offendimus , Propigneæ vero , &  
hypocausta plaste industria ita excellebant , vt nullibi elegantiora me vidisse me-  
minerim. Illud autem mirum dictu in Aula quæ in altissimo arcis loco est ,  
quatuor marmoreæ columnæ ingentis crassitudinis erectæ sunt , quæ in anguium  
morem contortæ , auratam trabium contignationem substinent , supra autem  
horrea auenæ , tritici , hordei , refertissima sunt , vbi etiam ( expositum enim  
coelum in arcis fastigio est ) doliola pulueris plena , ad vsum bellicum parata erant.  
Inde ad tormenta bellica , postea ad machinam onerariam , molendinariamque  
visendam descendimus ; Ea huiusmodi est , ligna quadrata æquali , ab angulis ,  
latitudine connexa sunt , ad angulos ( quatuor enim sunt ) singuli alligantur equi ,  
meditulliumque quod ad supernum tabulatum attollitur , voluunt , cuius verti-  
gine vicina etiam vertitur rota , funisque aglomeratur , qui ex præcipiti loco  
currus onerarios per semitam trabibus confectam , ad fastigium arcis trahunt.  
At si restis rumpitur ( contigit autem aliquando ) tam præcipiti ruina , onus re-  
trocedit , vt nisi ad multam camporum planiciem , residat. Dum ergo com-  
meatus in arcem per machinam trahuntur , Trabs , quod meditullium appella-  
ui , rotas in tabulato voluit , quibus satis frumentorum , molitur. Arce itaque  
perlustrata , in urbem regressi , coenauimus opipare. Perendie , nam postridie  
ingens pluuia fuit , Reichallam , Ducum Bauariæ oppidum petiuimus , quod  
( mirum dictu ) à vetula , ( vt oppidani rettulerunt ) inuidiâ , vel vt vicinum , à  
quo contumelia laceffita fuerat , vlcisceretur , paulo ante combustum est , tam-  
que repens ignis fuit , vt plures centum hominibus simul cum ædibus conflag-  
rauerint , domus tantum remansit in qua falsus puteus est , vnde maxima salis  
confectura exercetur , & quia quantum hominis ingenium possit animaduerti ,  
locum quam breuiter potero scribam. Puteus est quinque vt arbitror passuum  
latitudine , ad imum vsque quadrato lapide altissimæ profunditatis , ad aquam  
sexaginta fere gradibus descenditur , cuius duplex vt Alabarches ostendit , sca-  
turigo est. Nam aqua quæ salsedinem habet , in vado , vtpote ponderosior cras-  
siorque



fiorque resider, defecatio puriorque supernatat, quæ & multo falsa abundan-  
 tior: sed ut alteram ab altera haurientes separent, miro utuntur artificio. Nam  
 ex monte, qui Salinariæ imminet, riuus præceps per canalem ligneum descen-  
 dit, rotamque ingentis magnitudinis voluit, cuius impetu binæ item rotæ cir-  
 cumaguntur. Altera est quæ dulcem haurit laticem, super qua quadruplex vr-  
 narum ordo est eiusdem numeri: quilibet enim ordo sexaginta continet urnas,  
 quæ ad imum circumuolutæ, aquam puram excipientes in sublime exportant,  
 atque in canalem antequam redeant in profundum, exonerant. Tanta aqua-  
 rum abundantia, ut fluuiusculus inde oriatur. Hoc enim ut fiat necesse est,  
 quoniam maior huius aquæ (ut diximus) vena est, quam falsæ, si crescere pa-  
 terentur, falsâ aut euanesceret, quod nuper contigit, aut cum difficultate ex-  
 traheretur. Altera rota in eodem tabulato posita est, quatuor voluit cathenas,  
 quæ per quatuor vtrinque longissimos cubos descendunt, ac redeunt. Cubi au-  
 tem tanta sunt longitudine, ut ad vadum vsque falsæ aquæ producantur, quæ  
 ut à cathenis ipsis facile extrahi possit, iisdem per modica intervalla frustra co-  
 p.350 riacca alligata sunt, ut quam in redeundo conceperint aquam, quia peruium  
 tuborum obcludunt, quodammodo in sublime facilius expellant. Idque tam  
 admirabiliter faciunt, ut quatuor inde riuli nascantur, qui per oppidum etiam  
 ad salinarias diffusi iugem salis confecturam subministrant. Hæc contemplatus  
 discessi. Inde Chyzipelum oppidum, Tyroli quod sub Gurcensis Ditione est,  
 peruenimus. Sextodecimoque post diem, quam Vienna discedimus, perpetua  
 pluuia. Pontefanos, id est *Innsbruck*, peruenimus, ibique treis moratus dies,  
 cum Cæsari rerum à se gestarum rationem reddidisset, ei utquam primum iter  
 capefferet, persuasit. Interim Balbus vir apprime litteratus, missus à Regibus  
 orator aduentauit. Qui Hallam oppidum ad Ænum positum, ubi Cæsar  
 concesserat, postridie iturus ferebatur. Oratores autem, qui apud Cæsa-  
 rem morabantur, vel terrestri itinere, vel nauibus Lynzum vsque cum perue-  
 nirent, Cæsaris aduentum ut expectarent, imperatum est. Gurcensis Augu-  
 stam profectus est, ut inde Praunam Norici oppidum petens vna cum Ducibus  
 Bauariæ in Austriam nauigationem capefferet. Septimo igitur postquam Augu-  
 stam petiimus, Gurcensis iterum cum nouis paludamentis aulicos donauisset,  
 nono Cal. Julias transLycum per Vindelicos Noricumque magnis itineribus pro-  
 fectus est. Secundo enim die ad Phrysingum oppidum diuertimus, postero die  
 luce iam crepera Iserim fluuium, qui ex alpibus fluens in Danubium exonerat-  
 ur, transuecti, Muldorphum ad Ænum, quadraginta millium passuum itine-  
 re confecto, non sine equorum hominumque lassitudine peruenimus. Nam  
 cum ingens locorum planicies sit, nimiumque aquarum tenax, non transfre-  
 tare aquas, sed natâre videbamur; sæpiusque periculum incautis imminebat.  
 Nam vni aut alteri contigit, ut cum aliud (ut frequens fit) agerent, cum in lacu-  
 nas, aut ponticulos, qui sub aquis latitabant, diuulsos pene incidissent, cum  
 aquis coenoque subligarum tenus pugnam gesserint. Illinc templum Diuæ Ma-  
 riæ in Oethyng, miraculis refertissimum inuisimus, quo in loco quæ relatu  
 digna vidi, recitabo. Sacellum angustum est & rotundum; erectoque turbi-  
 ni per simile, ingens templi, non solum Germanorum, sed etiam externarum  
 gentium frequentia est. Nam cum loci Beata Virgo tutelarum parens sit, cle-  
 mentissimeque præsit, diuinis scatet miraculis. Ex altis enim rupibus cum ses-  
 sore equum præcipitem vidimus, equum animam exhalasse, sessorem, cum  
 Beatæ virginis auxilium implorauisset, incolumem euasisse. Alium, cum in  
 palum maximæ crassitudinis incidisset, per inguem ad artus vsque transfossus,  
 pientissima inuocatione, salutem recuperasse. Taceo per hostium turmas quos-  
 dam non visos euasisse: taceo perfractos carceres, disruptaque catenarum  
 vincula. Nam mortuos quoque quadriduo tanti numinis inuocatione, animam  
 resumpsisse, accepimus. Nuperque ante nos, cum Licus excreuisset, nauis  
 absorpta, cum nulla hominum iactura, sub aquis ferebatur. Gurcensis autem

*Innsbruck.**Hall.**Phrysingen.  
Muldorff.**Templum D.  
Mariæ in  
Oethyng.*



cum sacro interfuisset, Marquardus Sperantiusque præpositi, Joannes Schenk curiæ præfectus, Lamberghus canonicus Saltzburgenſis, animæ profecto candidiſſimæ, ego quoque vna, ad Donarium Diuæ, vt ſacram ſuppelleſtilem tantique nominis theſaurum inſpiceremus, perreximus, Eſt enim crux vna, Sanctique Dionyſii imagines auro argentoque puro factæ, quædamque huiusmodi alia non admodum multa, ſed quanti pretii ſint mox dicam, cum prius vnde illuc peruenerint, recitauero. Bauariæ Dux Galliæ Regiſ filiam vxorem duxit. Rex cum diem obiret ſuum, Dux in Galliam dotis gratia profectus, huiusmodi clinodia (ſic enim appellant) tulit: quæ per ſucceſſionem Georgio Bauariæ Duci obtigere. Qui quidem cum magnam vim pecuniarum in Diuâ Mariæ Oethingenſis ærario eſſe intelligeret, timens ne ædituorum incuria vel expiaretur, vel eam ſacerdotum auaritia inuaderet, accepta pecunia, ea ſcilicet gratia, vt Eccleſiam & opulentiorem efficeret, & cultum celebriorem, moritur; Burchauſique arx, vbi eius quoque theſaurus erat, à Palatinis, propter recens cum Roperto matrimonium, occupatur, qui reſerato ærario theſaurum ſibi vendicant. Interim bellum Noricum ortum eſt: de quo nos duodecim libros, \* ſed poëtice admodum, quamquam ſparſim hiſtoria tractata eſt, ſcripſimus, pecunia militibus erogata. Sed clementia Maximiliani Cæſaris cum res pacata fuiſſet, Palatini, & ſi propter atrox bellum exhausti erant, vt Beatæ Mariæ pecuniam inſumptam acceperunt, auitam magnanimitatem præ ſe ferentes, Gallicam ſuppelleſtilem Virgineo templo obtulere. Quæ tanti pretii tum Smaragdis, Zaphyriſque, tum Balaffis, atque Vnionibus pollicari craſſitudine ab auro, argentoque extuberantibus fertur, vt ſexaginta millibus ducatorum venire facile poſſit.

\* *Auſtriados.*

*Palatinorum magnanimitas.*

Illinc ergo curribus ad Ænum veſti naues inſcendimus, veſperaue Praunam appulimus, vbi Vilelmus Herneſtusque Bauariæ Duces Gurcenſis aduentum expectabant. Perendie eius diei iterum Ænum, vnaque nobiſcum Vilel-<sup>p.351</sup>mus Dux nauibus faberrime concinnatis, Patauium vsque enauigauimus. Inde Lynzum, vbi Cæſarea Maieſtas Gurcenſem præſtolabatur. Ad ripam, vt in tanti principis aduentu mos eſt, cum innumeri mortales confluiſſent, hos imprimis memoria complexus ſum. Oratores ſcilicet Pontificis, Regum Hiſpaniæ, ac Britanniæ, Archiepiſcopum Bremeniſem proceræ ſtaturæ virum, Ludouicum Bauariæ, Albertum in Mechelburgk, Vlricumque Wirttenbergenſem, Duces. Calen. Iulii ad Cæſarem itum eſt, Poſtridie Gurcenſis conuiuium celebrauit, conuiuæ fuerunt Archiepiſcopus Bremeniſis, Duces Wilhelmus & Ludouicus, Albertus, Vlricus, cœna ad longam noctem producta, poſtridianus dies conſultando inſumptus eſt. Ego ad Iacobum Baniſſum diuerſi virum candidiſſimum, humaniſſimumque: & cum literatus ipſe ſit, literatos non ſolum amat, ſed colit. Vnaque Stabius apprime eruditus, qui cum Hiſtoriarum ſerie, tum difficili mathematicarum rerum cognitione, ſecundus eſt nemini. Marquardus autem, Sperantiusque tempeſtiue & ipſi affuerunt, vbi ſatis & diſputando, & propinando, multo quam veneramus hilariores diſceſſimus.

*Jacobus Baniſſus. Stabius.*

*Oratores Regii.*

*Nauigatio per Danubium Cæſaris & Gurcenſis.*

III. Idus Iulii Cæſar Lynzo, cum pedibus laboraret, rheda veſtus Laureacum, vt inde Viennam peteret, diſceſſit. Interim allatum fuit Reges, cum aduentum Cæſaris intelligerent, Oratores cum quadringentis equis obuiam Viennam miſiſſe, quorum nomina inferius ſcribam. Nos autem poſtridie nauim inſcendimus, Gurcenſis cum reliquis aulicis ad diem alterum moratus eſt; Qui vna cum Duce Bauariæ, oratoribusque dum ad nos nauigat, ad ripam Danubii Cæſar venabundus occurrit, nauimque inſcendit. Simulque cum omnes Cranio oppido applicuiſſent. Cæſar cum oratoribus Ipſum oppidum, quindécim conſectis millibus paſſuum petiit. Gurcenſis Greinii pernoctauit. Mihi vero nunquam excidet memoria, quam peſſime ſtabulati ſumus, idque Xenoprodromorum noſtrorum cum omnium bipedum nequiſſimi ſint, incuria pa-  
tratura



tratum est, atque adeo magis ægre ferendum, quod tam abiectum hominum genus, cum vni aut alteri fecerint satis, tertium sibi locum vendicant, suoque ipsorum iure abutuntur. Cæterum ego in hac deperdita audacia nullum prius remedium repperi, quam ea quæ vitari non sine iactura possunt, æquo animo ferre, atque in aduersis occallere. Illud autem cum veniæ præfatione recensendum est. Siquidem tanta dioboliarum scortorum vis intra naues, quæ ad fornicalem quæstum Viennam proficiscebantur, apparuit, ut maiorem meretricum annonam me vidisse nullibi meminerim. Gurcensis itaque, Wilhelmus de Rapoltstain Cæsarianæ curiæ magister, & Serentanus magnus Imperatoris Cancellarius, cum Phœbus (ut apud Actium est) iam Albicaseret & recentaretur, commune lumen hominibus & voluptas, satis bene ientati. Ipsium ad Cæsarem nauigauerunt, vbi aliquot horas consultando insumsere. Inde monasterium Melicum vbi Sancti Colomanni sepulchrum est, quindecim millium passuum nauigatione transmisimus. Coenobium in monte positum instar oppidi est, quod cum & situ & propugnaculis bellicis munitissimum sit, Matthias Pannorum Rex cum totam fere Austriam subegisset, nunquam cogere ad deditionem potuit. Posterus dies cum illuxisset, Viennam versus nauigandi cupido incessit, inter remigandum sinistra ripa (quod priore nauigatione omiseram) Dirnstainum oppidum, viginti millibus passuum confectis, offendimus nec longius quinque passuum millibus Stainum, Cremesumque Cæsariana oppida. Inde quadraginta millibus passuum ad Neuburgium Monasterium, quod ad radices fere montis Cetii, qui Pannoniam à Norico diuidit, positum est, vecti sumus. Mons elato supercilio continuus ad Danubium vsque porrigitur, finiturque ad ripam, atque vbi definit altior factus, in vertice arcem habet, qui quoniam recaluafter olim fuerat: *Calenberg* dicta est, nunc autem superne ingens arborum fertilitas, à medio radicum tenuis vineta crescunt. Sed quanto magis ad Alpes (ut mihi à longe visus est) introrsus tendit, tanto lenior depressiorque videtur. Aliqui Cetium montem non hunc, sed qui infra Celeiam est affirmant, aliqui Budam nauigantibus offerri montem dicunt, quod ego cum essem illic minime indagaui, cui cum *Plindenberg* nomen sit, id est mons cæcus, hunc esse Cæcium montem arbitrantur. Cum igitur ambiguitas apud indigenas sit, suo quisque ingenio iudicet; cum ego iam pro confesso, vbi mons Cæcius sit, acceperim. Nos itaque illinc propero cursu Viennam versus profecti, paruo interuallo aberamus, cum naues Archiepiscopi Bremensis, ac Alberti de Mechelburg, Ludouicique Bauariæ Ducum, Oratorumque Pontificis, ac Hispaniarum Regis, se nostræ coniunxerunt. Qui quidem, ut maiore cum maiestate Gurcensis Viennam ingrederetur, omnes in nostram se nauim contulere, p.352 quam helciariis à puppi trahentibus, non remis, sed remulco aliquamdiu quodammodo vsi sumus. Inde helcio complicato propero cursu, Viennensi ripæ, quam innumeri occupant mortales, vespera appulimus. Egredientium ordo talis seruatus, post longum nobilium, illustriumque virorum ordinem, qui ante poneque sequebantur, Archiepiscopus Bremensis, Albertus de Mechelburg, Wilhelmus & Ludouicus Bauariæ Duces præibant, pone Gurcensis sequebatur, cui vtrinque Pheltrensis Episcopus, & Petrus Vrrea Pontificis, Regisque Hispaniæ oratores adhærebant, viri inter mortales oppido quam absoluti; à tergo Episcopi tres sequebantur, Reginonensis quem nunc Ratisponensem vocant, Comes Palatinus, Patauiensis, Viennensis, Marchioque Brandeburgensis, Cæsarianæque curiæ præfectus, Serentanusque, nobilissimus quisque confertim subibant. Ita tanta principum, cæterorumque pompa Gurcensis ingressus est, ut nihil maius neque fieri neque cogitari potuerit. Interim dum ego de oratoribus Regiis, quos obuiam Cæsari ituros intellexeram percontor, relatum fuit in oppido esse, Cæsarisque aduentum auidissime expectare. Nomina autem paulo post in literis regiis, quas inferam, explicabuntur. Quinto autem Idus Julias, Cæsar è Pesempeuco arce soluens, nox cum multa esset, Viennam ingressus

*Melicum monasterium.*

*Dirnstain.*

*Stain.*

*Crembs.*

*Neuburg.*

*Quædam de Cæcio, monte. Calenberg.*

*Plindenberg.*

*Cæsaris aduentus Viennam.*



Regum orato-  
res à Cæsare ad-  
missi.

gressus est. Nam Gurcensis caterique Consistoriani, vt de Oratoribus admit-  
tendis, deque aduentu Regum consultarent, ad Cæsarem profecti sunt. Vbi,  
Oratores statim intelligerentur, decreuerunt. Itaque vt honorifice deduceren-  
tur, Ratisponensis, & Patauiensis Episcopi, Ludouicus Bauariæ, Albertus de  
Mechelburgk Duces, Proceres Wilhelmus de Rogendorff, missi fuerant. Iis  
ergo à Cæsare comiter exceptis, literæ Regum Hungariæ, Sarmatiæque (Lu-  
douici enim oratores verbis honorifice mentionem fecerant) in hunc modum  
recitata sunt.

SERENISSIMO AC EXCELLENTISSI-  
MO PRINCIPI ET DOMINO, DOMINO  
MAXIMILIANO, DIVINA FAVENTE CLEMENTIA, ELE-  
CTO ROM. IMPERATORI SEMPER AUGUSTO, AC HUN-  
GARIÆ, DALMATIÆ, CROATIÆ, &c. REGI, ARCHIDUCI  
AUSTRIÆ, DUCI BURGUNDIÆ, BRABANTIÆ, &c.  
COMITI PALATINO, FRATRI, ET CONSAN-  
GUINEO NOSTRO CHARISS. ET  
HONORANDO.

Serenissimo ac excellentissimo Principi & Domino, D. Maximiliano Diuina fauente  
clementia, &c. Fratri & consanguineo nostro charissimo & honorando, Vladislaus  
Hungariæ & Bohemiæ, &c. Sigismundus Polonia, &c. Dei gratia Reges, Salutem,  
& fraterni amoris, ac felicitatis perpetuum incrementum. Serenissime Princeps &  
Domine Frater, & consanguinee nostre charissime, post tam longam expectationem no-  
stram, cum cognouissemus vestram Maiestatem Viennam aduenisse, magnitudine re-  
rum simul & fraterni amoris affectu persuadente mox ad eam oratores, & consiliarios  
nostros Reuerendos in Christo patres, Dominum Georgium Quinqueecclesiens. Cancel-  
larium regni Hungariæ, & Joannem Posnaniens. episcopos, ac spectabiles & magni-  
ficos, Ladislaum de Sternbergk regni Bohemiæ Cancellarium, Moysem Bnuslavi de  
Serdlacha magistrum curiæ, Lucam de Gorza Castellatum Posnaniens. & Capitaneum  
maioris Polonia generalem, & Christophorum de Schydlouitz Castellatum Sandomi-  
riens. & regni Polonia Cancellarium, misimus, qui vestram Maiestatem nomine nostro  
viserent, & salutarerent, ac nonnulla negotia mutuum nostrum congressum concernen-  
tia eidem exponerent. Quapropter rogamus, dignetur vestra Maiestas omnibus in re-  
bus, verbis eorundem oratorum aque ac nostris fidem habere. Sacram Maiestatem  
vestram incolumem ac felicem in longum æuum, à Deo Opt. Max. cupimus conserua-  
ri. Datum Pisonii prima die Mensis Julii. Anno M. D. XV. Regnorum nostrorum  
Hungariæ. XXV. Bohemiæ XXXV. Polonia vero anno nono.

Oratorum  
oratio.

QUIBUS perlectis Archiepiscopus Quinqueecclesiensis explosis iis qui ex mul-  
tis videbantur ex Aula, orationem satis ornatam, sed prolixiorē quam  
ipse fortasse locus exposceret, orsus est, in qua post gratulationem de Cæsaris  
aduentu Regibus iucundissimo, eorundemque in Cæsarem relatam beneuolen-  
tiam atque officia; cum magnifice Imperatoris laudes prosequutus fuisset, ad  
pacem concordiamque ineundam, ac expeditionem in Turcas suscipiendam ora-  
tionem conuertit, mediusfidijs satis eruditam, nisi hanc vltimam partem, quam  
ego in communem Regum conuentum potius reiecissem, nimis Asiaticæ, id  
est, copiose tractauisset. Peracto tandem orandi munere, cum de more Gur-  
censis, qui ad latus sessitabat, Setentanumque ac Doctorem Motam in consul-  
tationem Cæsar auocasset, Petro Motæ Hispano sed (vt illa fert gens) viro eru-  
dito grauique, respondendi prouinciam imposuit. Qui vt Cæsarem tædio libe-  
raret, cum primum oratorem aduentu Cæsarem letatum dixisset, laudibusque  
non vulgaribus orationis concinnitatem extulisset, amorem autem ac beneuo-  
lentiam

Laus Motæ  
respondendo.



lentiam Regum in Cæsarem, & si multo ante perspectam, tamen & literis Reuerendissimi Gurcensis, & verbis testatam satis esse affirmavit. Pacem vero, ut contra Turcas expeditionem pro Catholica fide facerent (quod & Cæsar semper ab ineunte ætate optauit) oblatam sapius ne dum desideratam accepisse. In fine cum tam longæ expectationis excusationem, asserens Cæsarem tempore aliquando obsequi oportere, cum tantum imperium nouis indies subindeque nascentibus curis prematur, non minus eleganter, quam vere inseruisset, ita feliciter auguste respondit, ut Cæsari nihil gratius ipsa densa fuerit concinnitate. His peractis oratores prius discesserunt. Gurcensis pone cum domuitionem capesseret, ab Archiepiscopo Bremensi, Wilhelmo, Vlrice, Bauariæ, Wirtenburgensique Ducibus, Casimiroque Marchione Brandenburgensi, comitatus est, tam ingenti tubarum tympanorumque clangore ac strepitu, ut Mars Idaque mater simul coisse videretur. Die autem qui secutus est, super Regum aduentu multa tractata sunt. Vespera Gurcensis conuiuium celebrauit, discumbentes fuerunt Archiepiscopus Bremensis, Episcopus Ratisponensis, Episcopus Labacensis, Duces Albertus & Vlrice viri summa apud Germanos & autoritate & potentia memorabiles.

*Postquam exempta fames, mensisque micantibus auro  
Instauratus honos, frontique est reddita demum  
Latitia.*

Ut quidam poëta cecinit. Gurcensis ad Cæsarem se contulit, è vestigio Regii oratores adfuerunt, omnesque cum in Cæsarea Aula conuenissent, Mota vir acris ingenii, cum multa rursus (id enim Cæsar mandauerat) de Regibus copiose ornatæque dixisset, orationemque quæ ante habita fuerat commendasset, Cæsaris mandato in ea parte, in qua de suscipienda in Turcas expeditione tractabatur, plusculum immoratus est, addito; Cæsari, ut ad conuentum res ista integra seruaretur, placere: in reliquis autem (non enim his præsens Cæsar fuerat) Gurcensi imprimis, cæterisque consiliariis, quæ tractanda erant, dicerent. Itaque de aduentu Regum cum satis vltro citroque disceptatum fuisset, Oratores à Cæsare redeundi licentiam cepere; quibus ut ex sententia factum satis videretur, Gurcensis etiam orationem habuit, utpote qui hesternæ concioni vel respondendo quippiam adderent, vel quia Cæsar tanto viro dicente maiorem in Reges affectum ostenderet. Hoc tamen compertum habeo, longam satis, sed citra fastidium, ornatamque orationem extemporaliter habuisse. Quod postquam rescivi, animo mirum in modum non interfuisse, scrutatus sum. Nam quam erudite sapienterque verba faciat Princeps omnium mortalium ad vnguem perfectissimus absolutissimusque, sapius & audiui & admiratus sum. Nam ex eius ore mel fluere, quam verba, ut in Nestore Homérico, potius dixerim: talemque dicendi suadelam Veneremque, qualis in Periclis labris sessitasse fertur, percipi. Ut proponit breuiter ac dilucide, ut ornatè diuidit, disputatque, subtiliter, ut resumptionem rerum in fine felicissime prosequitur. Quod si alicui respondendi detur prouincia, profecto (si quid iudicii in me est) vidi neminem, qui maiore memoria superflua non ignarus præteriret, partium ordini densius responderit, breuius concluderet, ac ubi necessitas cogit, erudita quadam latitudine sine dispendio tum verborum, tum temporum concinnius orationem diffuderit. Legati itaque cum tertio Idus discederent in consilio, ut sex mutuo Oratores ad Reges mitterentur, actum est. Missi sunt Archiepiscopus Bremensis, Episcopus Labacensis, Wilhelmus Bauariæ Dux, Casimirus Marchio Brandenburgens. Wilhelmus de Rogendorff, Morascki Boemus, viri tum genere clarissimi, tum gerendarum rerum administratione solertissimi. Dum hæc tractantur nunciatum est, duo millia Carnorum peditum à Cæsarianis prope Celeiam Norici oppidum Duce Jo. Hermesteno profligata esse. Quamobrem tam prosperis auspiciis credo aut seruitiorum internitionem omnino fere, aut clementia Cæsaris rem mitiorem exitum habituram. Gallorum item in Insu-  
expedi-

*Gurcensis conuiuium.*

*Alludit ad suum poëma.*

*Gurcensis eloquentia.*

*Oratores Cæsarei ad Reges. Strages Carnorum obiter.*

*Gallorum quædam obiter.*



Deploratio  
Italiae.

expeditionis indies rumor percrebrescebat, in exercitu viginti millia Germanorum peditum, cataphractorum tria millia ferebantur. Heluetii angustias Alpium, ut transitum prohibeant, occupauisse. Rex Hispaniae ad radices Pyrenaei, validas peditum legiones habere, ut cum primum Galli Insubriam inuaserint, igne, ferroque, superatis montium iugis, prouinciam vastaturus inuadat. Ita infelix Italia, vndique expedita laceffit, mutuumque eiusdem pristinae magnitudini ac potentiae rependitur. Vltro enim & nouis repertis causis externarum olim gentium regna occupauit, Europae, Africae, atque Asiae imperium obtinuit: nunc autem suae magnitudinis oblita, se ad praedam omnibus obicit, idque mortaliū nequitia inualescente, abolitaque morum disciplinā, accidere coniicio. Nam olim ut optimus ac prudentissimus quisque res publicas gubernabat, ita nunc pessima quaeque flagitiosissimaque ingenia, rebus publicis, ne suis quidem penatibus parcendo, exitium parant, tantumque abest, ut vnum vel alterum qui merito nobis imperare deberent colamus, sed modo harum, modo illarum partium affeclae, nobis minime fidi, in commune ruimus malum. Sed haec interim aequo animo ferenda, donec principum maximus, pacato Septentrione, potentiam suam, vnde nostra pendet libertas, triumpho declaraturus ostendat.

Trautmans-  
dorf.

Idibus Iuliis Caesar cum partibus copiarum Vienna egressus est, principes secum quamplurimi profecti sunt, quorum nomina, cum omnium nomenclaturam aggrediar, scribam. Viginti igitur confectis millibus passuum Trautmansdorfum oppidum, Caesar vnaque Gurcensis petierunt; alii alibi, ut quisque sibi hospites parare poterat, diuertebant. Reges vero alter in Hainburgio ad Danubium oppido, alter in Pruchio cum Rege Ludouico, atque Anna filiis permanferunt. Postridie eius diei XVII. Calen. Augusti Caesar ad Reges iter cepit. Qui quidem in latissimo loco, ubi oportuna explicandis copiis regio erat equitabilis, & vasta planities ad syluam duram; e regione Carnuti, olim sub Imperatoribus M. Antonino cognomento Philosopho & Commodo clarissimi, ubi ad aetatem nostram maxima vetustatis rudera cernuntur, inter Danubium Leytamque fluuios siti, tentoria fixerant; horumque Caesarei aduentus felicissimam sub pellibus expectabant. Caesar itaque, cum Pruchium dextra reliquisset, per iugum non admodum editum, profectus est, pauloque longius progressis Caesarianis, pulcherrimum innumerarum diuersarumque gentium,

Carnuntum.

Copiarum Re-  
gum, ac Caes.  
laus.

quae in subiecta planicie vagabantur, spectaculum oblatum est. Tentoria cum propter candorem, tum quia latissima erant, tanquam in cliuiis editoribus nix esset, videbantur, quae in parte fixa erant, qua paulatim insurgit aequor, seseque in iuga extollit. Idque ex industria factum puto, Nam pone per dorsum, quantum iugum extenditur, turmae velitum dispositae, melius quam quae in plano erant, discernebantur. Verum Caesariani multo maiori illis admirationi fuere: quippe qui non parmulis tantum, ligneisque (ut earum gentium mos est) paludamentis ornati erant, sed armis equorumque dorsualibus (ut ait Capitolinus) apricis discoloribus praefulgentes, tanquam ad bellum ituri, sub signis micabant. Caesar itaque cum ex iugo ad planum descenderet, ipse dextra cum parte copiarum, reliqui sinistra profecti sunt. Cum itaque ad planitiem ventum esset, ordo incedentium talis fuit. Aulici omnes qui inermes erant, praecessere; pone Ephoebi duodeni, (ut arbitror) nobili genere prognati, serico induti plumatili ingentes equos mirificeque phaleratos insidebant, a tergo Caesar pensili rheda vehabatur. Quem Gurcensis Cardineo insigniter habitu ornatus vel post, vel ad latus vna cum oratore Anglico ac magnis Ducibus affectabatur. Postremo cataphractorum, velitum, & ii in treis diuisi turmas, ingens numerus subibat. Primus ordo Magnorum Ducum ac principum erat, qui Bardatis mira varietate equis, grauiter bellicoseque prouehabantur. Aliqui enim lato clauo tectos equos habebant, alii plumatili serico, ii argento, ii durissimo nitidissimoque opertos calybe. Vnus tamen ceteros praestare videbatur: qui



qui bardas non serico auroue, sed pretiosissimis vnionibus tectas habebat: quæ quanti æstimatæ fuerint, aliorum secutus iudicium pretii triginta millium ducatorum fuisse affirmarim. Rebus ita compositis Cæsar ad Reges, qui & ipsi obuiam venire cernebantur, duobus equitum millibus comitatus, prouehi cœpit, dum paululum progredierentur. Episcopus Vacienſis vir candidi ingenii, & literis apprime eruditus, & Ambrosius Sciarzo inter aulicos Pannoniæ Regis facile princeps, Regum nomine felicissimum Cæsaris aduentum excepere. Inde copiæ vtrinque procedere, tubæ clangere, tympana perſtrepere, equorum hinnitus, innumerarumque gentium voces increbescere, tantaque mortalium varietas occurrebat, vt Doriscum, in quo Persicæ copiæ numeratæ sunt, memoria frequenter repetiuerim. Itaque vt Cæsar Regesque ad punctum (vt ita dicam) conuenirent, Pirus proceræ altitudinis in centro fere planicie, medullii instar, erecta fuerat, ad quam hinc Cæsar, illinc Reges, æquis incedentes passibus, tenderent coirentque, sed antequam cætera prosequar, hoc quoque tradendum memoriæ est. Legati Regii dum apud Cæsarem negotium tractarent, diu multumque insistere, vt Cæsar pateretur Reges ex equis descendere, vt secum maiori salutandi veneratione fungerentur. Idque cum sedulo (sic enim p.355 Reges mandauerant) efflagitauissent, Cæsar, qui humanitate cunctos superat mortales, quanquam ægre, tamen ne quispiam illorum descenderet, impetrauit. Itaque antequam ad felicissimam arborem omnino coirent, Ludouicus Bohemiæ Rex, Reginaque Anna soror obuiam, vt Cæsarem exciperent, processere. Hic ex equo Cæsarem in rheda post iunctam dextram latine his verbis salutauit: *Sacratissime Cæsar, ego saluto Maiestatem vestram, tanquam patrem & dominum meum.* Secundus salutandi locus, ex aurea rheda qua sola vehebatur, Annæ Reginæ datus est. Sed cum ad arborem peruenissent, tertius Vladislaus Pannoniæ Rex ex gestatorio & ipse magna Cæsarem salute impertiit. Qui cum (vt dixi) senex admodum sit, & plurimum Cæsarem diligat, cum salutaret, longiuscule lachrymatum ferunt, multisque verbis & ornatis in commendationem tanti conuentus vsum, perpetuoque huiusmodi affinitates concordiamque duraturam precatum esse. Postremæ partes Sigismundi Sarmatiæ Regis fuerunt. Qui peracto salutandi officio, diutuleque detenta Cæsaris dextra, his latine verbis vsus est: *Serenissime Cæsar, sit hic conuentus noster felix & faustus, Nobis, subditis nostris, & toti Reipublicæ Christianæ.* Alii autem referunt, qui propius merant, Cæsarem prius dixisse, *Ecce tandem aduenit dies, qua simul conueniremus, exultemus & letemur in ea.* Cui Rex, *spero serenissime Cæsar, quod iste dies sit futurus felix & faustus nobis, Regnis nostris & Reipublicæ Christianæ.* His finitis paulisper alter ab altero recessere, vt vacuus daretur locus, quo præclarissimus quisque mutuo Imperatoris Regumque dextras de more amplecteretur. Interea Gurcensis Cæsaris nomine cum Regem Vladislaum, vna cum liberis, vt Viennam proficisceretur, rogaret; Respondit Purpuratos suos id summopere, tum quia non poterat sine Regni iactura, tum etiam quia bellum cum Turcis nuper instabat, dissuadere. Hoc dixit, vel quia à Cæsare rogari volebat, vel vt maior fratris in Cæsarem affectio ostenderetur; de qua mox dicam, vel (quid verius suspicor) quorundam, qui hanc rem infectam volebant, ne vltius Reges procederent, sententiam fuisse. Itaque Gurcensis cum rem animo volueret, & quorsum euaderet intelligens, Regem Sarmatiæ adiit, eundemque Cæsaris nomine rogauit vt vna Viennam peteret, addito: *quanquam Serenissimo Vladislao consiliarii, vt quo minus Viennam cum liberis petat, pertinaciter persuadeant, idque firmissime illius animo inhereat.* Cui Rex, vt est prudentissimus, vtque suam in Cæsarem fidem penitus ostenderet, sic fertur respondisse: *Ego ex Sarmatia, relicto regno, & patrio solo, vt Cæsarem Augustissimum conuenirem, huc profectus sum. Quamobrem non Viennam solum si sua iuberet Maiestas, sed etiam vltius peterem, cum nunquam animum induxerim quippiam in nos, nisi quod bonum deceret principem, facturum, quod Frater cum liberis purpuratorum consilio*

Pirus pro ter-  
mino.

Cæsaris huma-  
nitas.

Vt Cæsar Re-  
gesque coire.

Ludouici Ver-  
ba ad Cæs.

Vladislai re-  
gis verba.



se minime venturum dixerit, Ego fratrem meum & nepotes una mecum ducam, qui vero sequi noluerint, ut lubet, faciant, Quare Reuerendissime princeps, Cæsari cuius sim sententia, & ut tu plane facere consueuisti, cumulatus referto. Talia cum dixisset, Gurcensis Regem amplexus, latissimum, inquit, nuncium Cæsari, qui nunquam de tua erga se fide veritus est, feram. Statimque cum fideliter omnia ab eo relata fuissent, aiunt Cæsarem lachrymas non continuisse, ac propius accedens: Serenissimi Peges, nihil est ait, quod vereri debeatis: Nam Vienna vrbs nostra est, in qua à me perinde atque fratres & amice & regaliter excipiimini. Idque vobis sub Imperiali fide facturum polliceor. His cum omnes assensu fuissent, rebusque feliciter compositis, dissolutus conuentus est. Cumque Germanici cataphracti, velitesque armis nitidissimis fulgentes, per æquor diffunderentur, Ludouicum Regem, qui adhuc puer est, ferunt dixisse, Sic vellem ut Cæsar, pater meus etiam mihi copias compararet. Mirum profecto in puero. Nam & amorem in Cæsarem, addito patris nomine, ostendit, & indolem bellicarum rerum auidam præ se tulit. Nec mora confertim omnes ad diuersa iter loca cepimus. Cæsar Regesque venatum (nam vbi colles desinunt, in plano densissimum nemus, aptissimumque venationi est) iuerunt. Gurcensis vespera cum paucis admodum Laxomburgum, vbi Cæsar diuerterat, petiit. Nos cum prodromos nostros quærendo ad multam noctem lassu fuisset, tandem ad pagum forte, vbi oscitantes ac sine vlla nostri cura morabantur, peruenimus mane ad Cæsarem, qui ex oppido cum paulo vterius processisset, Gurcensis dextrorsum ad Reges excipiendos iter cepit. Paulo post Regis Sarmatiæ vexilla à longe videri coepta. Gurcensis paucorum seruitio vsus (reliqui enim præcesserant) venienti obuiam se tulit, tantisperque morati sunt, donec Cæsarem à leua venientem exceperet. Vltimus Rex Pannoniæ cum liberis, diu tamen expectatus, aduenit. Interea ex Vienna (parum enim aberant) duum millium virorum, Lantsknechtos patrio nomine appellant, peditatus obuiam exiit, omnes nitidissimis thoracibus, brachialibusque ferreis ac machæris ornati erant, plurimi lanceas, pauciores alabardas ferebant, qui & si propter armorum genus, ordinemque militare, tum vel ob hoc admiratione digni videbantur, quod omnes rubea paludamenta, eademque expeditissima (ut patrius mos est) ferebant. Cum itaque plusculum temporis in huiusmodi spectaculo insumptum fuisset, pluuia super orta est. Ego ad urbem me contuli, ut inde introeuntes exeuntesque ex sententia recensere possem, interim pluuia ingrauescit, turbatusque paulisper ab initio ordo est. Nam duo millia fere equitum (ut conicere potui) turmatim propero cursu urbem ingressa sunt, reliqui, quantum per iugem nimbium fieri potuit, ordine non admodum turbato, procedebant. Et quoniam hic locus, Principum, Ducum, ac illustrium virorum Nomenclaturam exposcere videtur, à Cæsarianis ordiar:

## NOMENCLATURA CÆSARIORUM.

### PRÆLATI ET PRINCIPES.

Reuerendissimus Cardinalis Gurcensis, coadiutor Saltzburgens. generalisque Imperii Locumtenens.

Laurentius Episcopus Feltrensis, orator summi Pontificis.

Petrus Vrrea, orator Regis Hispaniæ.

Robertus orator Regis Angliæ,

Archiepiscopus Bremensis, ex Ducibus Brunsvicens.

Episcopus Ratisponensis, ex Ducibus Bauariæ.

Vigileus Episcopus Patauensis.

Christo-

Laxemburg.

Gurcens. in  
Reges officium.

Cæs. Reges-  
que iterum  
conueniunt.

p. 357



Christophorus Episcopus Labacensis, administrator Secouien.  
Bertholdus Episcopus Chiemenfis.  
Georgius Episcopus Viennensis.

*DUCES ET PRINCIPES.*

Wilhelmus Dux Bauariæ & Comes Palatinus,  
Ludouicus Dux Bauariæ & Comes Palatinus,  
Casimirus Marchio Brandeburgensis,  
Albertus Dux de Mechelburg,  
Vlricus Dux de Wirtemberg.

*COMITES.*

Bertholdus Comes de Hennenberg.  
Georgius Comes de Montfort.  
Carolus Comes de Oetting,  
Georgius Comes de Schaunburg.  
Hoyr Comes de Mansfeld.  
Nicolaus Comes de Salin.  
N. Comes de Westerburg.  
Joannes Comes de Hardeck.  
Vlricus Comes de Hardeck.

*PROCERES.*

Wilhelmus de Rapoltstain cum filio, Cæsareæ curiæ magister.  
Ciriacus de Polhaim.  
Ludouicus de Polhaim.  
Erhardus de Polhaim.  
Filii Domini Pauli de Liechtenstain.  
Wolfgangus de Liechtenstain.  
Leonardus de Liechtenstain.  
Hartmanus de Liechtenstain.  
Georgius de Liechtenstain.  
N. de Starchenberg.  
Senior de Scheftenberg, & tres eius filii.  
N. de Puchaim.  
N. de Puchaim.  
Wilhelm de Zerling.  
Christophorus de Zinzendorff.  
Sigismundus de Dietrichstain.  
N. de Traun.  
Fratres duo de Rogendorff.  
N. de Papenhaim.  
Joan. Jacob de Landau.  
N. Rauber Marschalcus curiæ Cæsaris.  
Thomas Fuchs Capitaneus Ratisbonens.  
Albertus de Wolffstain.

*Primores viri à Secretis & Consilio.*

Cyprianus Serrentainer, Magnus Cæs. Cancellarius.  
Jacobus Villinger Supremus Cæs. thesaurarius.  
M. Præpositus de Valkirck.  
Jacobus de Bannissis.



Petrus de Mota Theologiae Doctor.

Joannes Renner.

N. Ziegler.

N. Phintzing, Praepositus Nurnbergensis.

M. Phintzing quaestor, vel pecuniarum expendendarum magister.

Paulus Oberstainer, V. I. D.

N. Vinsterwalder.

*Oratores Caesaris ad Reges.*

Marquardus de Stain, praepositus Bambergensis.

Wilhelmus de Rogendorff, Baro.

Laurentius Saurer, Consiliarius Caesaris, & Vicedominus per Austriam.

Gabriel Vogt, Secretarius & Consiliarius Caes.

Jo. Morascki, Baro.

Cuspinianus, doctor medicinae.

*Regni Pannoniae Bohemiaeque Nomenclatura.*

Reuerendissimus Cardinalis Strigonienensis.

Archiepiscopus Colocensis, Comes de Frangapanibus.

Georgius Episcopus Quinqueecclesiensis.

Episcopus Olomucensis, Thurso.

Episcopus Vacienensis.

Episcopus Gaurienensis.

*Principes viri ac Proceres.*

Georgius Marchio Brandenburgensis.

Carolus Dux Ministerbergensis.

Joan. Comes de Canitscha.

Ladislauus de Sternberg, regni Bohemiae Cancellarius.

Albertus de Pernstain, regni Bohemiae Camerarius.

Heinricus Botzku de Kannstat.

Adam de Newhaus.

Ihereslaus de Schellenberg.

Albertus de Sternberg.

Moses Hunsiau de Serdlacha, praefectus curiae.

N. Bornamissa.

N. Pormanintzki.

Ambrosius Scharco.

Paulus Dieck, thesaurarius.

Orsagh.

Petrus de Erdundt.

Multi praeterea alii viri praclarissimi, quorum dignitatem atque gradus cum minime norim, veniam ab iis, qui legent impetratam velim, neque vero ob hanc gratiam libello irascantur. In mensa (si volent) locum digniorem occupent, aut in templo, subselliisue. Hic nomenclatura non ordo quaesitus est. Illud autem affirmare audeo, quanto Imperialis Maiestas sui magnitudine ceteris praestat regnis, tanto eadem clarioribus viris externas gentes facile antecellit.



REGIS SARMATIÆ NOMEN-  
CLATURA.

## PRÆLATI.

Episcopus Vladislauiens. Matthias Dreuitius.

Episcopus Posnaniens. Joannes Ludobrantzki.

Episcopus Premisliens. Petrus Tomicius, &amp; regni Poloniae Vicecancellarius.

## PRIMORES VIRI.

Nicolaus Firlei, Palatinus Sandomiriensis.

Nicolaus Palatinus Vilnens. &amp; magni Ducatus Lithuaniae Cancellarius.

Andreas de Tenczin, Palatinus Lublinen.

Georgius de Bayfen, Palatinus Mariæburg.

Lucas de Gorza Castellanus Posnaniensis, &amp; Poloniae maioris Capitaneus generalis cum filio.

Christophorus de Scydouitz, Castellanus Sandamiriens. &amp; Regni Poloniae Cancellarius.

Andreas de Costzeletz, regni Poloniae thesaurarius.

Nicolaus de Scydouitz, Castellanus Radomienfis.

Stanislaus Ostrog, Castellanus Callisienf.

Stanislaus Halitzkii, Marefcalcus Regni.

Joannes Pileczki, Capitaneus Lublinensis.

Ii omnes ad consilium admittuntur. Multi præterea, qui gentilicio no-  
 mine *Palatini* appellantur, qui auro, argentoque & equitatu ornatiores videban-  
 tur. Itaque Wilhelmus Dux Bauariae cum ingenti Cataphractorum manu, ante  
 omnes (quanquam Gurcensis Aulici præcesserant) urbem ingressus est, pone Ca-  
 simirus Marchio Brandeburgensis. Inde Hennenberg. Rauber Caesaris Mare-  
 schalcus. Post Comitum Caesarianorum turma. Nobiles Austriae supra infra-  
 que Anasum viri sequebantur. Inde Jacobus de Landaw, ac Thomas Fuchs,  
 ac Domini de Polhaim cum multis equitum turmis succedebant. A tergo Mo-  
 schi erant, hippotoxotæ fere omnes, Polonique, ac Pannonones, quorum quis-  
 que desultorium equum manu ducebat, in quem vel ardentissimo cursu transi-  
 liunt, quod Posonii quendam patria Mysium, dum Reges ludos ecuria cele-  
 brarent, factitasse vidimus, pone Albertus de Wolffstain: Centenique fere pa-  
 tagiati, vestibusque pretiosis induti. Confertim Poloni, Hungarique sequeban-  
 tur. Verum in his, quæ tum propter diuersarum gentium habitus, tum quia  
 iugis pluuia (vt dicebam) internoscere ordinem minime patiebatur, malo con-  
 niuere, quam solertiore cura ea perscrutari, quæ recitari nequicquam, nisi fal-  
 so possunt. Secutus est & alius ordo, qui ad cultum Caesaris Regumque præci-  
 pue pertinere videbatur. Nam duodeni nobilis profapiae adolescentes, quos ego  
 prius tunicas purpura micantes & plumanti (vt ait Vopiscus) difficultate perno-  
 biles, gestare dixi, præcedebant: pone Aeneatores, triginta (vt arbitror) tym-  
 panaque area incredibili strepitu clangoreque sequebantur. Post bini erant pro-  
 ceres, equorum dorsualibus ac paludamentis militaribus aureis ornati. Quar-  
 tus locus Valisiis, quintus Cardineis clauis Strigoniensi Gurcensique datus est.  
 Inde Imperiales Heraldici subibant, quorum officium olim non nisi Heroes (vn-  
 de nomen tractum est) exercebant, hos nobiles quidam Pannoniae seque-  
 bantur.

*Heraldici.*

Post Oratores minoris nomenclaturæ Principum, hos Duces; Ducibus Epi-  
 scopi, Episcopis oratores Pontificis, & regis Hispaniæ (Britannicus aberat) succe-  
 debant. Post Reuerendissimi Cardinales Strigoniens. & Gurcens. sequebantur;  
 à tergo,



Gentium nu-  
merus.

à tergo, Sigismundus Sarmatiæ, Ludouicus Bohemiæ Reges, equis insidentes erant, quibus viri Primores aureis induti vestibus, à pedibus famulabantur. Cæsar vero ac Vladislaus Pannoniæ Rex carrucis iunctim Annaque Regina à tergo, & ipsa aureo sticulo (quod octo albis equis trahebatur) succedebat; ad latus autem Georgius Margraphius Brandeburgensis obequitabat; cuius octoginta fere equites, tanquam subsidium in extremo ordinis loco positi erant. Aliæ vero quæ subsequabantur rhedæ (fuerunt enim numero duodecim) rubro omnes panno tectæ Regiæ Annæ aulicas ferebant. Itaque urbem ingressi, ad arcem Cæsaream profecti sunt, vbi cum Cæsare Rex Vladislaus & liberi permanserunt. Rex Sarmatiæ ad domum in qua prius Gurcensis fuerat (quæ & Cæsarea est) diuertit. Interim tanta mortalium turba ac multitudinē vrbs replebatur, vt nulli iter peruium inueniretur. Nam equorum sex millia fuisse, præter Carros, qui quadringenti, omnes trigati, aut quadrigati, plerique sciuges fuerunt. Cæsarianorum autem peditum, qui armati incedebant, duo millia numerabantur. Externarum vero gentium, quæ ad tantum confluerant spectaculum, ingens numerus. Sic ergo non sine maximo animorum stupore dies transactus est.

Quædam do-  
milia.

Cæsaris ora-  
tio ad reges.

Postridie eius diei Gurcensis peracto à cantoribus (quos oppido eruditos habet) sacro, Sarmatiæ Regem, & ante, & post confectum prandium adiit. Itaque aliquot dies in consilio vt res feliciter transigerentur, insumpti. Sed cum in arce primum Reges conuenerunt, in sellis vix sessitauerant, Pannoniæ Rex (sic enim ordo fuit) Anna Regina, Cæsar, Sarmatiæ, ac Bohemiæ Reges; cum Maria Regina, quæ Ludouico Bohemiæ Regi nupta est, aduentare nunciatur. Venienti Reges de more assurrexere, propinatisque cuique Corollis, quas secum non vulgaris pretii portauerat, eius nomine gratia regibus, qui ad patrium solum Viennamque urbem venerant, relata est. Inde choreæ initium datum Ludouicus & Anna soror præsaltauerunt. Postridie cum Cæsar ad Reges concionem habiturus esset, cum in loco quisque suo (aderant enim & Strigoniensis Gurcensisque pontifices, Hispaniarumque Regis oratores) confedisset, ita exorsus est. *Tam diuturna more quam aduentum meum expectauistis, Serenissimi reges, & si per Reuerendissimum Gurcensem oratoresque nostros satis excusatum me esse arbitror, tamen vt de me etiam intelligatis, curæ quæ indies nobis, ac imperio nostro emerfere, obstiterunt, quo minus communi nostro conueniendi desiderio satis fecerim. Tamen nihil à me vnquam prætermisum est, vt quam citius possemus, optatum hunc conuentum nostrum, quem Christianæ Reipublicæ saluberrimum speramus fore, perficeremus. Idque cum Dei optimi maximi auspicio, ex sententia consecutus simus, reliquum est, vt hæc nostra affinitas amicitiaque perpetuo ad nostram communemque omnium utilitatem conseruetur, vt non solum in Septentrione vbique pacem nos peperisse videamur, sed etiam vt coniunctis viribus contra perfidos Turcas (quæ de re, satis accurate, oratores vestri pridie disputarunt) expeditionem feliciter sumamus, quam ego quantum ab ineunte ætate semper desiderauerim, testis animi mei atque voluntatis Reuerendissimus Strigoniensis erit, qui cum apud me (iam 22. annus agitur) orator esset, bellum contra Turcas suscipiendum persuaderet, quam avidus huiusce expeditionis semper fuerim, facile percipere potuit, Verum & intestinis & finitimis bellis laceratus, quo minus quod summopere optabam exequerer, obstiit. Nam Ludouico XI. Gallorum Rege regnante, item Carolo octauo, ac Ludouico XII. quæ gesta mecum bella sint, intellexistis. Nuper autem cum ingentibus copiis Franciscus primus Gallorum rex in Italiam irrumpere tentet, deesse non possum, qui iure Imperii suppetias Italici feram: qui semper à maioribus nostris, & à nobis pro virili & defensi & aucti sunt. Et iam Heluetiorum peditum, qui nobis federe iuncti sunt, duodecim millia, quæ in armis esse mandauimus, fauces Alpium, vt Gallorum transitum prohibeant, occupauerunt, Ducisque Mediolani copias nostras, quas in Italia tam diu contra Venetos habemus, coniungi iussimus. Quamobrem si Galli Alpes superabunt, qui non sine parua suorum militum interitione facturos credimus, nonis iterum*



iterum bellis in Italia impeditos transiisse aliquando pœniteat. *Hac igitur & si nos*  
 p. 360 *ac desiderium nostrum in presentiarum impediunt, tamen si contigerit, ut vel bello,*  
*vel pace res feliciter transigantur (speramus autem Pontificis, Regisque Catholici*  
*persuasione, alterum omnino fore) aeterna inuicem pace coniuncti felicissimam hanc*  
*in Turcas expeditionem faciemus. Atque ne res absentia nostra frigescere quodam-*  
*modo videatur, rogatos vos velim, ut aliqui ad hoc negotium tractandum perficien-*  
*dumque deputentur, ut cum primum idonea tempora offerentur (quod & vos efflagi-*  
*tare videmini, & nos summo opere cupimus) pro gloria incrementoque nominis Chri-*  
*stiani exequamur.* Cæsar igitur cum ornate acuteque hanc sententiam disputa-  
 uisset, Strigoniensis Regum mandato respondit. Qui postquam Cæsaris tem-  
 pora excusauit, se testem etiam esse dixit, Cæsarem nunquam ad bellum in Tur-  
 cas inferendum requisitum fuisse, quin semper paratissimus (nisi finitima, & intestina  
 bella impedivissent) inuentus fuerit. Quod aliqui adhuc interim eligerentur, pro-  
 bavit. Sic quoque Gurcensis, addito etiam in rei commendationem (ut suus  
 est mos) verborum cultu, in eandem iuit sententiam. Ita dies orando dispu-  
 tandoque finitus est.

Sequens autem donando, elargiendoque clarus fuit. Cæsar enim Mariam Re- *Dona Cæsaris.*  
 ginam neptem Cruce aurea, quinque adamantibus ornata, singulorum cuiusque  
 palæ pollicaris latitudo, in ambitu autem Vniones viginti albicabant, quorum  
 eadem fere magnitudo erat. Regem Sarmatiæ Lato clauo, equoque vngula-  
 rum tenuis cataphracto donauit, qui cum hilari animo donum accepisset, sic  
 fertur dixisse; *Sacratissimo Cæsari immortalem refero gratiam, atque in hoc equo*  
*cum omni totius regni mei equitatu pro sua Maiestate, ubicunque licuerit, me pu-*  
*gnaturum polliceor: quod sibi omnino persuasum velit.*

XI. Calend. Aug. Anna Regina, Vladislai Regis filia, cum Cæsari despon-  
 sata quodammodo videretur, Imperator coronam auream, qua Ladislaum Bo-  
 hemiæ Regem olim coronatum memorant, afferri iussit. Inde (aderant enim *Tacita Cæsa-*  
 Notarii, & testes) sic est exorsus. *Quamquam ego te uxorem meam fore dixi, se-*  
*questraque fide tu mihi iuncta es, tamen ut vel Carolo, vel Ferdinando nepotibus nu-*  
*bas, sententia est: si vero neutri, tu mea uxor es. Quamobrem cum alter Casti-*  
*lia, Arragonia, Bethicaque regna habeat, alter Neapolitanum in Italia sceptrum*  
*habiturus sit: Egoque cum Romanorum Rex & Imperator sim, Te Anna Reginam*  
*nuncupo ac saluto, aureamque (his dictis) coronam capiti imposuit.* Duodeci-  
 mo Calen. ut omnia rite confirmarentur, Cæsar, Rex Pannoniæ, Rex Sarmat-  
 iæ, Rex Boemiæ, Regina Anna, Regina Maria, Cardinales Strigoniens. Gur-  
 cens. Principumque (de quibus mox dicam) ingens numerus in diui Stephani  
 templo conuenerunt. Ordo sic seruatus est, in dextris sellis Cæsar Regesque  
 confederunt, Robertus orator Britannicus, Duces Bauariæ Wilhelmus, & Lu-  
 douicus fratres, Albertus de Mechelburg, & Vlricus Wirtenbergenf. Duces,  
 Episc. Bosnenf. Panno, Andreas de Tenczin Palatin. Lublinenf. Raphael, post  
 hos viri à Secretis; Sarmatiæ, Boemiæque, Ducumque oratores confertim  
 omnes sequebantur, in sinistris Cardinales Strigoniensis & Gurcensis sedebant,  
 iuxta Laurentius Episcopus Feltrensis Pontificis orator, quidam nuper à sede  
 Apostol. cum pecunia in Pannoniam Legatus, inde Archiepiscopus Bremenf.  
 Episc. Ratisbonenf. Germani: Archiepisc. Colocenf. comes de Frangapanibus  
 Episcopus Quinque ecclesiens. Panno, Episcopus Vladislaienf. Episcopus Pos-  
 nanienf. Episcopus Premisliens. Sarmatæ; Episcopus Olomuncensis Morauus,  
 Episcopus Patauienf. Episc. Labacen. Episc. Chiemenfis Germani: Episcopus Va-  
 ciensis, Jo. Zagabrien. Pannonies: Inde Palatinus Sandamirien. Dux Leo Bur-  
 grabius, Palatinus Marieburgensis, Sarmatæ: Albertus Pernstain camerarius  
 regni Bohemiæ, Ostrorog. Sarmata. Multi præterea tum Pannoniæ, tum Sar-  
 matæ viri nobiles, quorum nomina in nomenclatura scripsimus. In medio  
 Tom. II. O O O O autem



autem locus ædificatus tabulis erat, vbi Anna Mariaque Reginae confedebant. Quod autem interualli dextrorsum erat, orator Hispaniæ ac Palatinus Vilnensis, qui Annæ templum introeunti comites extiterant, tenebant: sinistra Casimirus & Georgius Marchiones Brandenburgensis, Mariam Reginam, quam & ipsi comitati fuerant, vnaque Principes viri, Comes Bernardinus de Frangopan. & Bornamissa adseruabant. Confecto igitur sacro, Cæsar ex solio discedens se ad Mausolæum patris Friderici, quod prope erat vt Pontificis Max. habitum indueretur, contulit. Inde ego concionaturus quanquam mihi augustissimus terminus præfixus erat, ad orandum accessi, sed tantus deperditorum hominum strepitus increbuit, tanta dissonarum gentium vocationumque varietas inualuit (neque enim fabri lignarii, qui ad concinnandum pro Cæsare suggestum venerat, fragorem numerauerim) vt ne tertia quidem parte recitata, persuadentibus etiam amicis, desinere cogebar. Tunc illud Terentianum in mentem venit, *Dii boni, quantum homo homini præstat.* Nam quemadmodum diuersæ orbis regiones, ita & mores sunt. Certe ego Mastigophoro Aiace dignus esse, qui quidem arbitratus sim, apud illos haberi orationem posse, qui & pullos equorum comedunt, & lac concretum cum sanguine equino potant. Ego nihilo minus, cum Regem Sarmatiæ attentum quodammodo viderem, tantisper sum prosecutus, donec monstruosæ gentis immanitate victus, accersitam extemporaliter conclusionem feci. Verum vt quæ minime audita est, saltem legi possit, Orationem, & si breuiter conciseque subscribendam putauit.

ORATIO, IN CONVENTU INVICTISSIMI MAXIMILIANI CÆSARIS SEMPER AUGUSTI, SERENISSIMORUMQUE VLADISLAI, LUDOVICI, PATRIS ET FILII, AC SIGISMUNDI, PANNONIÆ, BOHEMIÆ, AC SARMATIÆ REGUM, PER RICCARDUM BARTHOLINUM HABITA.

*ET* si ab orandi officio, in quo tamen mediocriter versatus sum, semper abhorruì, Sacratissime Cæsar, Serenissimi Reges, nunc tamen ex sententia hoc onus, quam arduum est, suscepi. Nam quis vnquam in diuino sacratissimi Imperatoris, triumque potentissimorum Regum conspectu? Quis (inquam) in tam amplo, Reuerendissimorum Cardinalium, tot Principum, illustriumque virorum, consessu orationem se habuisse gloriari potest? Profecto ego diis immortalibus gratias non vulgares habeo, Quos tum me præter consuetudinem reddidisse animosorem videre videor, tum quia Christianum Imperium, quod consilio & armis; tueri non modo, sed & amplius reddere & latius vos decet: pristinas vires resumpturum esse arbitror. Cæterum tanta vestri omnium, sue imperia, sue res gestas complectar animo, magnitudo est, vt & si mihi satis firmam in dicendo fiduciam, ne dicam confidentiam præsumpserim, nonnihil timere omnino cogar. Nam si Demostheni, apud Philippum Macedonum Regem dicenti contigit vt pene laberetur, eundemque vnius ciuis Phocionis præsentiam adeo timuisse proditum est, vt illum linguæ suæ nouaculam appellare solitus sit: si multi ex latinis etiam in foro hallucinati sunt, Dii boni quid mihi facere par est? cum tuum Sacratissime Cæsar, inuictissimorumque Regum conspectum intueor? Quare non tam mea imbecillitas, quam vestrarum rerum magnitudo, qua candidissimum quidque ingenium obrueretur, culpanda erit. Nunc autem cum de hoc felicissimo conuentu, quam necessarius & quam utilis Christianæ reipublicæ futurus sit, cumque de vestris laudibus, atque regnorum vestrorum dignitate, verba facturus sim, æquo animo feratis obsecro, si aut concisus, quam deceat, aut pressius quam ipsa fortasse rerum sublimitas exposcat, dixerò. Profecto, si quid ingenii in me est, quantum-

Diuisio.

que



que coniectura assequi possum, Dei Opt. Max. nutu, ut tandem conueniretis, factum iudico. Quid enim tam necessarium fuerat? quid expetendum magis? quam ut labantibus pene Christianarum gentium rebus, vos qui Diu in terris habitis estis, communi omnium utilitati consuleretis? instarque Numinum caelestium curam totius orbis susciperetis? O auspiciatissimos dies, o felicissima tempora, o saeculum aureum, in quo tam necessarium est vobis, Serenissimi Reges, et toti orbi terrarum concilium celebratum est. Video enim (nec profecto fallor) similitates non modo odiaque, si qua prius intercesserant, peritura, sed etiam tam arctis vinculis saluberrimum amicitiae foedus oriturum, ut Christiani quid imposlerum timere possint, non plane videam. Quandoquidem gentes impiae, ac perfidum Turcarum genus, quique nostra aduersantur religioni, cum tanti Imperatoris, tot inuictissimorum Regum societatem affinitatesque intellexerint, ut sibi suisque ipsorum regnis timeant, necesse erit, cum prius multo liberius, quam dici possit (ut saepe intelleximus et experti sumus) cum maxima Christianorum clade atque internitione (quid meminisse piget) nostras eruperint sedes, praedas abegerint, tantaque immanitate usi ferantur, ut ne infantibus quidem parsum fuerit. Idque tum imprimis ausi sunt, cum Principes nostros quorum tuendi nos prouincia est, et odiis et bellis inter se implicatos intelligerent. Neque enim ut eorundem discordiis à Turcis Byzantium captum fuerit, repetendum est, non ut florentissimum totius Graeciae euersum Imperium, impositumque tot prouinciis iugum, sed recentioribus insistentibus rebus est, ut hunc conuentum necessarium fuisse omnes intelligant. Litterae siquidem ad tuam Maiestatem Sacratissime Caesar, allatae fuerunt, quibus significatur Selimum Turcarum imperatorem, post fratres nepotesque strangulatos, cum totius orbis imperium animo proponeret, expeditionem in Italos parare coepisse, raturum (ut litterarum verbis utar) iis subiugatis, reliquum quod destinauerat facile perfici posse. Itaque ingenti nauium classe parata, congregatis undique militibus, commeatibusque ad maritimas urbes dispositis, transitum ad Italos meditabatur, quod ut tutius securiusque efficere posset, tecum Serenissime Vladislai. pacem firmavit, atque id ipsum quod cogitauerat, iam perfecisset, nisi à Sopho Persarum Imperatore apud Araxem fluvium, cum ingenti exercitus cade, profligatus fuisset. Tanto enim animosiores ad bellum in Christianos suscipiendum Turcas fuisse conicio, quanto maioribus odiis (ut retuli) Principes nostri detineri videbantur. Quid si littoribus Italia, cum quinquaginta millibus equitum appulissent? qui milites describi? unde copiae ex Italia, quae diutinis bellis iam virium exhausta est, ad tam immanes impetus repellendos, parari poterant? Atqui tu Augustissime Caesar (nam tua Italia est, per te defendi debet) tandem succurrisses, triumphumque reportasses. Sed per Deos immortales (libere fari liceat mihi) obsecro, quot prius caesos, quot depopulatas regiones, quot oppida deuastata fuisse putandum est, quam Itali tuas, longe enim abes, suppetias sensissent. Quapropter Diis magnis volentibus auguror, qui sacra religioni nostra nunquam defuerunt, actum esse, ut et Reges Orientis mutuis se bellis debilitarent et vobis ad concordiam pacemque ineundam tempus suppeterent: quae cum primum ab externis hostibus interlecta fuerint, non solum nostra non laceissent, sed etiam ne suis quidem limitibus tutos esse posse arbitrabuntur. Idcirco hic conuentus ut necessarius, ita et utilissimus, ut ad hanc quoque partem descendamus, videri poterit. Si enim proprium cuiusque commodum prosequi volumus, quid hoc utilius unquam cogitari potuerit, quid salubrius nescio, cum regna non modo armis comparari, sed etiam amicitiiis fulciri debeant, quae cum vera sunt firmissimum stabilimentum afferunt, contra autem maximo saepe exitio fuisse manifestum est, quae de re exempla et apud Romanos et apud externos, ne de vobis loquar, quamplurima referri possunt. Quare haec societas et ab aliis, potissimum vero à nobis, Augustissime Caesar, Serenissimi reges, ut diu expetita, ita perpetuo conseruanda est. Nam quemadmodum Imperiis coniuncti estis, ita et societate, et amicitia coniuncti ut perpetuo sitis, utilissimum erit. Germania siquidem Sarmatia, citra utraque Vistulam fluvium iungitur: ab ea item Pannoni Carpathiis montibus, quos et Sarmatios dicunt, separantur, qui quidem hanc prouinciam in qua sumus incolunt, mutuoque commercia agitant.

Prob. d per-  
pessis cladibus.

Accersita  
narratio.  
Prob. d fu-  
turis.

Secundum di-  
uisionis mem-  
brum ab utili.

Ab utili Pro-  
prio.

Utilitas à  
regnis.



tant. Quotum ergo vestra hac imperia interliminium diuidit? ubi alter in alterius subsidium, & parare simul & transmittere copias potest. Quamobrem huiusce foederis, felicissimaque affinitatis vinculum non solum vobis utile erit, sed posteris quoque, & regnis. Illi pacatissima sceptrum, quo nihil prius aut antiquius optari potest, excipient. Hec non tantum dignitatem suam ac maiestatem retinebunt, sed per vos etiam ampliora fient & maiora. Nam cum animo complector, bella scilicet à vobis toties feliciter gesta, vestrique omnium diuina ingenia, Imperiorum potentiam ac magnitudinem, procera virorum corpora, promptissimosque ad pugnandum animos, qua plaga orbis terrarum, modo beneuolentia vinciamini, quod tam abstrusum mortalium genus, quod à vobis & penetrari, & vinci non possit? Nam ut à te incipiam, inuictissime Caesar, nihil in quopiam mortali, quantum ad vitæ felicitatem atque animi magnitudinem attinet, quin tibi vel natura largita fuerit, vel tua parauerit virtus, desiderari potest. Si enim genus repetimus à Clodoueo Francorum Rege, ne priores illos Priamum atque Marcomyrum indagemus, ortum habes. Qui quidem non solum Alemannos Gothosque vicit, sed etiam Alarico in pugna necato Aquitaniam subiugauit, tuorumque maiorum in Gallias usque propagauit imperium. Floruit quadragesimo nonagesimo Dominica conceptionis anno. Hoc autem à me relatum est, ut omnes intelligant, genus tuum mille & amplius, ad hanc usque ætatem annos, continua regum, Principumque serie claruisse. Sed multo clarius tui reddunt. Quippe qui ex matre Regina Heduardum Lusitanie Regem auum, patrem Fridericum Romanum Imperatorem refers. Sed hac & si ornamentum asferre aliquid videntur, tamen nisi virtute & rerum gestarum gloria excolantur, cum venia præfatione, sordescunt quodammodo atque obliuerantur. Quantum autem tu Caesar elaboraueris ut maius sacri Imperii decus posteris relinqueres, quam à maioribus acciperis: profecto arduum esset recensere. Quod tum in animi tui præstantia, tum in rebus, à te feliciter gestis positum collocatumque videtur. Nam si Prudentiam qua polles, mecum cogito, qui tibi comparari possit, reperio profecto neminem: cum propria hæc tua laus sit, non minores copias consilio quam armis vicisse. Vnde nullum unquam fuisse Imperatorem puto, siue Casarem Dictatorem, Augustumque recenseas siue externos illos Philippum Macedonicum, Alexandrum, Antiochum, Mitridatem, Tygranem, siue maiores tuos, Otthones, Albertos, Rudolphos, Fridericos nomines, qui perinde atque tu Sacratissime Caesar aduersa, contingere enim tibi plurima, non solum fortiore animo pertulerint, sed feliciore quoque exitu superauerint. Alterum Prudentia, alterum Fortitudinis specimen est. His ergo præuiis, tum domi consilio, tum foris bello, populosissima atque amplissima imperia, & tibi & posteris comparasti. Dixi etiam bello, nam ubi hostis consilio superari non potest, ferro cernendum est. Qua quidem in parte quam fortis, quam vehemens, quam inuictus semper extiteris, testes sunt Sycambri, Morini, Galli, Heluetij: quibuscum septies aut amplius signa contulisti. Qui quidem cum aberas, victoria, quodammodo frui videbantur, cum aderas quantum diuina tui præsentia atque virtus posset, cum facile vincerentur, sentiebant. Nollem Bohemicam pugnam recensere. Sed cum à tanto principe vinci etiam gloriosum sit, audeo hoc dicere, nullibi unquam neque fortius, neque periculosius pugnatum esse, adeoque feroces illos Bohemorum animos, & admiratus es, & tibi placuisse præ te tulisti, ut non solum iis qui superant clementissime peperceris sed in posterum quoque bellicosissimum populum tanta beneuolentia persecutus fueris, ut stipendiarios & præsidarios eos semper habueris. Contra ii quanta erga te fidei extiterint, testatur illa ad Moranum obsidio, in qua ut tua celsitud. fidem seruarent, ad turpium quoque animalium esum descenderunt. Verum enimvero quæ in Gallia egistum inuenis admodum, tum proximis annis, maiora sunt, quam ut per me in presentia referri possint. Italica autem gesta, & si graua tractatu fuere, tamen vel ob hoc memoratu digna, quod seruitutis iugum à nobis quodammodo excussisti. Profecto non tam tibi gloriosum est, hostes pene fractos reddidisse, quam etiam tuæ Maiestatis & sociis & amicis, totiusque Italiae salutem consuluisse. Sed quoniam magis aliorum laudibus, quam propriis delectaris, ad Serenissimum Vladislaum orationem conuertam.

Qui

Utilitas &amp; à regnis, &amp; posteris.

Tertium à laudibus Caesaris. Laus à Genere.

Laus à Natalib.

Laus à se ipso. Laus à prudentia.

A fortitudine.

Laus à rebus gestis.

Laus Bohemorum in seruanda fide.



Qui quidem cum abs te diligere non modo, sed & vehementer se amari intelligat, neminem tua Maiestate (ut liberum Fratrisque pietatem sileamus) neque gratiorem habet, neque chariorem. Cum igitur de te dicendum sit, Rex felicissime, plurima sunt quæ ultro sese offerunt. Verum quantum ad præclarissimum tuum attinet genus, quod etiam cum Serenissimo fratre tuo commune tibi est, constat potentissimos Lituania Duces, Jagellum, Vetholdumque progenitores vestros fuisse: quorum alter, cui Vladislao postea cognomentum fuit, Polonis imperavit. Is duos sustulit liberos, quorum maior natu, non solum Polonia sed etiam Pannonia regnum adeptus, dum pro Catholica fide seuit in Turcas, desideratur. Alter Casimirus, fortunatissimus scilicet pater vester, à Polonis in eius locum successus est, quem ego omnium mortalium felicissimum fuisse iudico. Quippe qui cum à tam beata Regum progenie descenderit, filios quoque continua serie futuros post se Reges reliquerit. Nam cum tu pene iam puer, Bohemia prius, deinde Pannonia sceptrum suscepisses, felicissimo fratri Joannes Albertus in regnum Polonia cooptatus est. Huic Alexander: Alexandro tu, qui nunc non minus fortiter quam sapienter imperas, Serenissime Rex Sigismunde, post Glogonia, Oppaniaeque ac Magnæ Lituaniæ principatum, successisti. Verum hæc aliam dicendi curam exposcunt. Nunc autem si annos, ut ad te redeam, Serenissime Vladislæ, euoluimus, quibus quantum in adolescentia Bohemis, in prouectiore ætate Bohemis simul & Pannoniis charus extiteris, nec modum, nec finem nostra esset habitura oratio. Hoc tamen tua præcipuum laudis est, duobus regnis nec diutius, nec felicius unquam imperitasse quemquam, quæ quidem non solum prudentia tua & defensa & aucta sunt, sed etiam bello, quod multos annos cum Mysis, Valachis, Turcis ita fortiter confecisti, ut aut victor omnino semper fueris, aut iniquis illi coacti conditionibus abs te pacem poposcerint. Nam quanti, & nominis, & terroris apud Scythicas nationes semper extiteris, vel hinc facile colligi potest, quod Turcarum Imperator tunc satis sibi suoque imperio consultum fore putabat, si tecum fœdus pepigisset, Idque cum antea sæpe, tum nuper etiam visum est. Quippe qui ad inhospita Pariadrorum montium loca, contra Sophum Persarum Imperatorem, ire cum exercitū, nisi tecum prius pace iungeretur, formidabat. Mira profecto potentia tue laus, cum is te pertimescat, qui se orbi terrarum iugum imposturum paulo ante gloriabatur. Hactenus de te dicere decreueram, nisi illud memoratu dignum occurrisset, in quo summa tua & prudentia, & fortitudo cognita est. Conflato enim Seruili bello, quod tam atrox seuumque fuit, ut propiores periculo fuerint ne qui vicerint, an qui victi fuerint, incertum sit, totum pene regnum distractum videbatur. Tu autem pristinam animi tui virtutem resumens, adeo seruili furori obstitisti, adeo feroces illos contudisti animos, ut in presentiarum tutius securiusque regnum esse non possit. Tot igitur rebus à te fortunatissime gestis, hoc etiam felicitatis DEum Opt. Max. addidisse video, quod cum iam ætate confectus sis, præstantissimos liberos Serenissimum scilicet Ludonicum & Annam, superstites habeas, quorum alterum, cum pene iam infans esset, non solum tibi duobus in regnis successorem viuens cooptasti, sed etiam Cesari Principum maximo, una cum sorore Anna, contracta iam diu affinitate, nuper constanter firmata ut iungeretur, curauisti. Atque mihi si de his vera augurari licet, duo surgentia Regnorum tuorum sydera, duo soles videri possunt, nihil gratius, nihil venerabilius: pulchri ambo, prudentes ambo, & antequam per ætatem præ se ferri possit, quadam in hiis latens animi magnitudo atque maiestas internoscitur. Quid ergo ad tuam eorumque felicitatem desit, non plane video.

Transitio ad laudes sereniss. Regis Vladislæ.

Laus à maiorib. Casimirus Rex Polon.

Laus à prudentia felicitateque regnandi. A bello. Asama.

Laus à sedata intestina seditione.

Laus à consilio in posteritatem. Laus Ludouici Regis & Annæ.

p.364 Cum etiam post felicem obitum tuum tale inuenerint regnorum stabilimentum, ut & tuto & diu imperare possint. Prosequeretur de te plura, nisi me serenissimi fratris tui Sigismundi partes auocarent. Quamobrem ut de te iam aspicer, inuictissime Princeps, ne generis felicitatem repetam (quam maximum tecum fratrem communem habere dixi) vera laus in dicendo nulla difficilior est, quam ubi multiplex est laudandi locus. Obruatur enim ingenium, nec unde exordium capiat, intelligit. Idem mihi, in te contigisse video. Nam si ea tantum, quæ in prouectiore ætate, & ante, & post

Transitio ad laudes Regis Sigismundi. Tacita totius vitæ laudes.



Laus à maie-  
state.

Laus in lo-  
quendo.

Laus à rebus  
bellicis.

Ultimum diui-  
sionis mem-  
brum.

Imperiorum  
longitudo ac  
latitudo.

Laus regno-  
rum à fortitu-  
dine virorum.

Repetitio di-  
ctorum.

Laus Car.  
Strigon. &  
Curcens.

Laus Pont.

post susceptum regnum sapienter egisti, dixero, multa in adolescentia supererunt, quæ memoratu digna, siue morum disciplinam, siue animi magnitudinem prosequi velim, viderentur. Caterum ut iam tecum compendio utar, quantum diuinam tui præsentiam contemplatus sum, te maiore vultus maiestate (vnum excipio Cæsarem, cui in terris nemo par est) credo mortalium esse neminem. Illudque tuum silentium, quod tibi peculiare fertur, altissimarum cogitationum indicium præ se fert, in quo maxima etiam prudentiæ ut sedes sita sit, necesse est. Nam ubi & quando opus est sapienter & grauitè loqui, diuini potius ingenii quam humani esse iudico. Sed hæc tibi, ut perquam paucis par esses, attributa sunt. Quantum autem bellicis in rebus (hoc enim meum dicendi institutum est) & inuictus, & fortunatus fueris, omnes norunt. Taceo quam fortiter olim diuque contra Tartaros, quique intra extraque Tauricam incolunt Chersonesum, pugnaueris. Taceo quas clades Moscis, Roxolanisque cis vsque Borysthenem intuleris, quantumque eorundem prouinciæ tuo adieceris imperio. Cum nuper quanti & ingenii sis, & fortitudinis facile perspectum sit. Quippe qui ad Neper fluium, quem antiqui (ut dicebam) Borysthenem appellauerunt, parua manu, ingentes Moscorum copias strauisti, ubi quadraginta fere hostium milia cecidere, tuorum autem perpauca, & ii aduersis omnes confecti vulneribus, considerati sunt. Longior essem de te Sigismunde Rex Serenissime, nisi ad exitum iam properaret oratio. Nam mihi quoque quanta regnorum vestrorum amplitudo, quantaque eorundem potentia sit, & in iisdem quam impauidi ad vulnera gignantur animi, dicendum esset, nisi tu sacratissime Cæsar, inuictissimi Reges, verius vos, quam ut per me recitari possit, sciretis. Sed ut breui omnibus innotescat, omnia vestra imperia, ab occasu ad ortum, si à Belgis pontum vsque auspicemur, decies centenis sexcentis millibus passuum fere protenduntur, latitudine autem ab Adriatico sinu, Germanicum vsque Oceanum, septies centena quinquaginta millia passuum continent, Quæ ut ampla, ita & innumerarum gentium ac populorum altricia sunt, tantique animi atque roboris in hiis aluntur viri, ut antiqui & recentiores, sine septentrionalibus legionibus nihil vnquam vinci potuisse, nihil perfici, sæpissime cognouerint. Maximaque gloria Imperatoribus Rom. accedebat, si vel Germanici, vel Pannonici, vel Sarmatici appellarentur: non quia vestras prouincias, quæ imperiis semper atque inuiolabiles externis fuere, vicerint: sed quoniam eas in fide retinuerint, ut ab illo merito dictum sit, das Cattis Dacisque fidem, cognominatos affirmari. Proinde Augustissime Cæsar, serenissimi Reges, in hoc sacro conuentu, qui quam necessarius & quam utilis reipubl. futurus sit, intellexistis, hoc agite, quandoquidem vos neque prudentia, neque virtute, rerumque gestarum gloria, quando nec regnorum potentia, gentiumque bellicosarum multitudine, à quoquam superamini, hoc (inquam) agite, ut perpetua copulati, ut ocepistis, beneuolentia, non vestra modo imperia conseruandi cura sit, orientaleque sceptrum à crudelissimis Turcis reposcendi, sed etiam tum gloria, tum augendæ Christianæ Reipublicæ gratia, ultra Armenias, Araxemque, ultra Garamantas & Indos, inferendi signa flagret cupido. Quis vestra resistet magnitudini? quis vestras vires non reformidabit? cum omnes tum bellicis virtutibus, tum regnorum potentia, militumque fortitudine, cunctos facile superetis imperatores: cum vos non alieno auxilio, sed propriis freti viribus, crebros externarum gentium triumphos reportarit? Nunc autem cum DEI Opt. Max. nutu, coniunctæ vires, imperiaque iam fausto affinitatis vinculo connexa sint, obsecro vos (ut vobiscum iam loquar Reuerendissimi Cardinales) quantum salutis, quietisue Christianæ reipublicæ allatura putatis? Quare & si omnibus tum Germania, Pannonique, tum Sarmatiæ principibus, si omnibus (inquam) qui adsunt pientissimis præsulib. vobis autem potissimum Christianus orbis debere fatetur, qui tam vigili cura, studio, labore, ea pertractaueritis, quæ ad ornamentum gloriamque Christiani nominis perpetuo futura videantur, quibus non solum communem omnium fortunam extulistis, sed etiam cum Leone Pont. Max. non vulgarem iniistis gratiam. Quippe qui nihil aliud cogitat, nisi tranquillum Catholica fidei statum facere, Principesque nostros ita

concor-



concordes fore optat, ut vigilantius solertiusque nihil hactenus, quam ut pacem, beneuolentiamque mutuo amplecterentur, sollicitauerit.

Idque imprimis tibi, Reuerendissime Gurcensis, & in mandatis adiecit, & crebro per litteras significauit, quod quidem in presentia cum ex amussim perfeceris, si unquam alias, tum in patria, tum apud externos, quanti & ingenii & solertia sis, prae te tulisti, cum uenia tuarum laudum dixerim, nullibi tamen maius prudentiae tuae praconium, quam in hac abs te feliciter peracta, tam ardui negotii magnitudine elucescet.

Laus Gurcens.

si propria.

Conclusio.

Ergo orthodoxum iam gaudeat imperium, exultet Christianum nomen. Cum te, Sacratissime Caesar, vos Serenissimi Reges, uestra erga mortales pietas, ad commune omnium bonum utilitatemque coniunxerit. Quis enim tam hebes, qui regnis etiam uestris, sacrisque penatibus, ac magnis diis, sapienter consultum neget? quis non uestrarum rerum accessus ut felicissimus futurus sit, utque faustissima in posterum fortuna oriatur, intelligat? Per vos ergo non desit, cum potentia uestra ac magnitudo, promptissimique ad effundendam animam populi, minime defutura uideantur. Hoc icta nuper foedera, copulataque affinitatibus imperia exposcunt, hoc augenda Christianorum respublica, subministrandaue uestrarum maiestatum & sociis & amicis auxilia expetunt, hoc (inquam) arma in perfidos Turcas uertenda, quod tantopere ab ineunte aetate, Sacratissime Caesar, optasti, efflagitant. Vestro enim hoc conuentu tam in Scythia tumultuatum est, iam oppida muniri, tormenta parari coepta. Tollite ergo animos, viresque contra infidum hoc genus colligentes, in Arabiam unde oriundum est, pellite. Ita enim tanti Imperatoris, tot regum conuentum, ut necessarium, sic etiam saluberrimum fuisse intelligemus. Vosque Regnis non modo uestris incrementum ac perpetuitatem, sed immortalem quoque uobis apud posterum nominis gloriam comparabitis.

Vix ego ad exitum perueneram, cum Caesar imperiali habitu, coronaque (quod regnum Germani appellant) ad suggestum ascendit: affidebant Vladislaus, Sigismundus, Ludouicus Reges, Wilhelmus Bauariae Dux, cum pila aurea, qua orbis imperium repraesentatur, Marescalcus de Pappenheim cum pugione, quod iustitiam defensionemque fidei intelligimus, antestabant. Inde mox Regina Anna ad Caesarem deducta est. Cumque ad publicam stipulationem deuentum, iuxta Imperatorem stetit, nec mora, Caesari Maximiliano Roman. Imperatori, nisi Carolus Ferdinandusue Reges, nepotes, infra annum acceperint, Anna Vladislai Regis Pannoniae filia, Arrabone annulo, & Strigoniensi. qui connubilia uerba fecerat, interprete nubit. Inde Ludouici Bohemiae Regis Vladislai Regis filii, & Mariae Maximiliani Imperatoris neptis, matrimonium etiam annulo confirmatum est. Quae dum agerentur, Rex Vladislaus cum filiam tanto matrimonio copulatam, filio uero Caesaris neptem uxorem dari, uideret, prae gaudio effusissime lachrymatum ferunt. His peractis à Caesare, tribusque Regibus, ducenti fere uiri nobiles militiae ornamento atque insignibus donati sunt. Tandem fessi domum repetiuere. Gurcensis apud Regem Sarmatiae prandit. Inde Pomeridiano tempore ad ludum hasticum itum est. Imperator, Regesque ac Reginae ex podiis spectauerunt, partium trium certamen habitum, interfuere Marchiones Brandenburgensi. Georgius & Casimirus fratres, Comes de Hardecko, Jacobus de Landau, Ardolphus de Bibracho, Dauid Cneriger, Victores Com. de Hardecko, Jacobus de Landau, Ardolphus de Bibracho (quanquam à seruo adiutus) fuerunt. Peractis ludis, uergente iam ad occasum die, basilicum à Caesare symposium in arce habitum est. Conuictores ita discubuerunt, Vladislaus Pannoniae Rex, Rodtalerina Domini Sigismundi de Dietrichstain, Maximilianus Imperator, Anna Regina, Sigismundus Poloniae Rex, Maria Regina, Ludouicus Rex Bohemiae, Matrona curiae Pannonicae praefecta, Archiepiscopus Bremensis, Episcopus Regisbonensi. Wilhelmus & Ludouicus Bauariae Duces, Albertus Dux de Mechelburg. Singulique ii singulis matronis accumbebant. Inde Pannonones Sarmatiaeque uiri primo-

Regnum.

Sponsalia Maximiliani & Annae.

Hastiludia.

Conuiuium maximum.



Colimitiana  
Academia.

Vadiani ora-  
tio.

Hippomachia  
antiqua origo.

Torniamen-  
tum cur à Ger-  
manis observa-  
tum.

primores longo ordine conuiuabantur, omnesque (vt de Aristippo inquit Ter-  
tullianus) ita nepotati sunt, vt faliare coenas, ac persica conuiuia superauerint.  
Trecenti enim aut (ni fallor) plures ciborum missus numerati sunt, omnia au-  
ro argentoque micabant. Stromata autem, ac peristromata Campanicis Ale-  
xandrinisque consitis, belluatis, pratiofiora parietes, Pauimentum stratoria  
tapetesque operiebant. Cumque per impetum reclusis foribus ingens morta-  
lium vis introrumperet, Caesar ad hortum, quem pensilem in arce habet, cum  
Regibus, chorea vt ducerentur descendit. Interim ego ad Colimitium meum,  
quem Mecanati simillimum iudico, contuli, vbi & Pierum Grachum, Calli-  
machum, aut Philetam alterum (ita elegos scribit) Stabium Stiboriumque Ma-  
thematicos, ac Aegidium Rem Jureconsultum, virum tum moribus cultissimum  
tum historiarum disputatorem subtilem ac eruditum conueni, qui apud Coli-  
mitium conuictores fuerant, nullusque non dies est in quo & disputando & le-  
gendo quippiam præclarum consequi non possis, adde frugi hominis humanita-  
tem, liberalitatemque, qui eruditos quosque ita complectitur, vt sibi nihil  
prius quam totum sese iis, ne dum facultates elargiri. Mane autem cum Gym-  
nasium (est enim Viennæ percelebre) gratulandi officio in Caesarem fungi vellet,  
ipse magnis negotiis interpellatus vt breuiter diceret, lecturus mox orationem  
si scriptam darent, mandauit. Quod cum Vadianus meus vir candidissimi in-  
genii (sibi enim dicendi prouincia iniuncta erat) accepisset, sic breuiter Cæsa-  
rem allocutus est. *Satisfactum arbitror voluntati tuae, sacer Imperator Maximi-  
liane, quod orationem, quam Gymnasi tui nomine coram habiturus eram, maximis  
& amplissimis rerum tuarum negotiis id interceptibus, te iubente ex animo in pa-  
ginam transtulimus, hoc ipso commune officium, & sedulitatem erga te nostram osten-  
suri. Tu eam cum horis otiosis legeris, ita recipito, vt animum inducas tuum nihil  
horum, quæ de maiestate, potentia, & virtute tua sentimus, copiose satis pro ar-  
dentissimo nostro in te amore, summaque rerum à te gestarum admiratione, lite-  
rarum monumentis demandari posse. Cui quidam à secretis Imp. nomine respondit,  
Caesari tanti Gymnasi, ac eruditorum virorum aduentum gratum fuisse: Eidemque  
fauorem ac operam omnem pro conseruanda, augendaque eius dignitate largissime pol-  
liceri, Nihil enim prius Maiestati suae fore, quam vt studia ingeniaque suorum florere  
intelligantur.*

Cum aduersperaceret, nuptiæ Sigismundi Dietrichstain, & N. Rodtalerinæ  
ad multam noctem celebratæ sunt, omnes, præter Sarmaticum, Reges Regi-  
næque interfuerunt. Postero die iterum hasticus ludus factus est. Spectaue-  
runt Cæsar, Reges, ac Regina. Paria duo concurrerunt, neutrum (cum pa-  
riter caderent) victor. Octaua Cal. Augusti Hippomachia id est verum equestris  
pugnæ simulachrum (Castrensi vocabulo *torniamen* vocant) habita est. Institu-  
tum vt arbitror Phrygium, sed pueri olim in eo certabant, vnde Maro auctor,  
*Troiaque nunc pueri Troianum dicitur agmen.* Et Caesarem legimus Troiam tur-  
ma duplici maiorum, minorumque puerorum luisse, Viennæ amplissimum  
forum est, in quo quadratum septum, sed longius quam latius factum fuerat,  
sinistra ingredientibus lignea domus, in qua & iudices stabant, & eorum qui  
pugnaturi erant arma affigebantur. Dextra temporarium pegma, frondium  
scena opertum, Caesari, Regibusque ac Reginis, cæterisque Principibus, qui  
ludo non intererant, præparatum. Turma duplex, id est paria quindecim fue-  
re, neque enim nisi principes viri, aut qui rerum gestarum gloria nobiles eua-  
ferant, ingrediebantur. Institutumque apud Germanos antiquissime observa-  
tum autumo, ex quo & strenuissimus quisque summam laudem reportabat,  
imbelles autem dedecore afficiebantur. Adde quod si quispiam vel regiæ vel  
mediocris conditionis, qui quidem aliquid perperam ignominioseque aut vecor-  
diter ante patrauiſſet, ludo miscuiſſet se, ita omnes illum ipsum vel clauis vel  
frameis insectabantur, vt lege militari impune necarent. Nam militem ger-  
manum ab omni labe remotum ali volebant, quæ militum disciplina vt con-  
stanter



stanter seruaretur, huiusmodi certamina, ad quæ ingredi gloriosum erat, non ingredi turpissimum, à maioribus instituta fuerunt, quæ nunc mitius delectationis gratia à nostris exercentur. Igitur cum separatim septum ingressi fuerunt, qui priores hostes in pugnam prouocabat. Itaque singulis paribus ab initio, diuisis turmis, pugna inita est. Primi mucronatis lanceis Wilhelmus Bauariæ dux, Casymirusque Marchio-Brandenburgensis concurrerunt, hastisque perfractis, exertis se inuicem machæris aggressi sunt casim) neque enim ferire punctim licet) cum in longum certamen protraxissent, dirempti sunt. Secuti sunt Georgius Margraphius item Brandenburgensis, & Albertus Dux de Meckelburg, qui cum lanceas fregissent, versis repente frenis, ad vulnera irrupere (neque enim ioco credas actum esse) sed incalescente (vt fit) martiali animo, non solum scuta inuicem frameis dissipauerunt, sed etiam ensibus, crebris adactis percussionibus fregerunt. Itaque cum nimio pugnandi ardore intumescerent, & ipsi dirempti sunt. Tertium certamen Comitibus de Henneberg, & de Montfort, datum est, qui cum strenue diu multumque certauissent, reliquis paribus locum cessere. Sic ab omnibus, quorum nomina excidere, tum hastis, tum parazoniis fortiter pugnatum est. Finitis vero parium pugnis, vtrique vtrinque acies, vt simul concurreret signum expectabat. Classico igitur dato, infestis hinc inde telis irruerunt. Ita forum cum fractorum telorum fragore, tum cadentium armorum strepitu, crebrisque quadrupedantum equorum hinnitibus reclamabat, vt non ludicram exercitationem, sed verum certamen fuisse crederem. Vt diremptus pugnandi ardor, recensiti pedites sunt. At Cæsar, quoniam in Diui Stephani, vbi prius conuenerant, insignibus militaribus omnes qui expetebant, donare non potuit; in pegmate, Regibus etiam assidentibus, reliquos equites creauit, quorum Rutheni plures fuere, ex nostris autem vt numero impares, ita & rebus gestis, & doctrinis, & studio nullis postponendi: quos inter Stabium meum, virum eruditum, mihique & litteris, & amicitia coniunctum, Cæsar à quo summopere diligitur, militari etiam ornamento prosequi voluit, quod non minori gloriæ Cæsaris tribuo, quam Scipioni, qui Ennii p.367 statua vt suo sepulchro imponeretur iusserat; aut Pollioni, qui Varronis Polyhistoros imaginem in libraria, quam crexerat posuit.

Paria certantur.

Stabius eq. creatus.

Cursus equor.

Postero die, Hippodromum celebratum est, Nicolai Comitis de Salm viatores equi Scypho aureo à Viennensibus Patritiis, Ciuitatis nomine donati sunt. Sequentes dies cum chirographis, syngraphisque, ac diplomatibus conficiendis, vademque vtrinque & prouinciarum & Principum, præstando præterire intelligerem; Epithalamium quod ego in Ludouici Regis, ac Mariæ matrimonio, multo ante triduo effuderam, Vladislao patri Regi obferendum censui, ingressusque eius aulam, cum fratre Sarmatiæ Rege subinde loquentem, ita breui affatus sum. *Quæ in laudem matrimonii Serenissimi Ludouici, ac Mariæ, tuæque Maiestatis multo ante triduo exaravi, vt hilari vultu accipias, rogo atque supplico. Hæc enim si tibi placuisse intelligam, si quid dabitur oculi, rebus à te sapienter fortiterque gestis, prælusisse videbuntur. Interim & tuæ Maiestatis, & dulcissimi filii felicitatem opto. Tu vt illi diu superstes sis, Ille tui similis, & vitæ institutis, & rerum gestarum gloria, videatur.* His breuiter dictis Versiculos cum Epistolii præfatione, obtuli subscribendosque putau.

SERENISSIMO PRINCIPI, VLADISLAO  
BOEMIÆ ET PANNONIÆ REGI, RICCARDUS BAR-  
THOLINUS HETRUSCUS PERUSINUS  
FELICITATEM.

VT aliqua in parte salutandi officio, quod apud Persas peculiarissimum fuit, fungerer erga te Serenissime Rex Vladislæ, quæ triduo à me, & tempusculo subinde  
Tom. II. P p p p interpo-



interpolato, in matrimonio Serenissimorum principum Ludouici & Marie (quod faustum felixque fiet) effluerunt; tuæ celsitudini offerenda censui. Atqui carmen in Laudem tanti coniugii maturius fortasse censes à me exaratum fuisse oportere. Haud profecto inficior, sed letitia, quam ex tantorum principum futuro hymenæo conceperam, ita afficiebar, ut multa succurrerent, quæ ne mihi quidem impensius cogitanti oblata fuissent. Tamen hanc meam meditatiunculam, quæ quam tenuis sit, non ignoro, satis placituram ceteris intelligam, si tu iucundissime Rex pacato vultu accipiens, non aspernabere.

IDYLIUM IN MATRIMONIO SERENISSIMORUM PRINCIPUM, LUDOVICI REGIS, AC  
MARIE REGINÆ.

**D**um caligantes terrarum summus habenas  
Aspiciet genitor, sceptrique cupidine mundum  
Distractum vario, & tenui pro limite clades  
Exortas miseris mortalibus, armaque ubique  
Feruere, sanguinei referataque limina Jani  
Errores hominum varios, curasque reuoluens  
Humani generis, secum sic Juppiter orsus:  
Postquam informe chaos, nec non elementa vicissim  
Æternum confusa, in corpora nexa redege,  
Scilicet ut medio penderet in aera tellus,  
Vastaque nec fremeret extra sua littora pontus,  
Et calidis purus candesceret ignibus æther,  
Limitibusque suis constaret mobilis aer;  
Omnia sic statui passim ut communia terris  
Essent, ut pingues fœtus, & copia rerum  
Castam alerent hominum, nullo discrimine, vitam.  
Tempore quo aggressi stillabat ab arbore nectar,  
Incolaque è scopulis hyblæus mella legebat,  
Sponteque sollicitis tellus non peruia rastris  
Ædebat partus cereales, quamque Iyæum  
Malebant gentes Acheloia pocula prisca  
Paulatim vero lapsa est, & decolor atas  
Quod fuerat commune datum mortalibus agris,  
Partiri cœpit, fallaxque & auarus habendi  
Creuit amor, paruoque repertus limes agello est  
Hic, mea sunt, inquit, ne transi, neue recide  
Hunc lucum, inter nos fluuius tu terminus esto.  
Inde orbem inuasit, Nihil discrimine longo  
Seiunxit Lybiam, atque Asiam, Tanaimque bicornem  
Europe voluit fines dare, protinus ipsa  
Sic natura gradus hominum, non conscia recti  
Struxit ad imperia, & vigilem ad præcordia curam  
Iniecit. Creuere arces, & mœnibus alta  
Oppida muniri, & fossis cœpere profundis  
Indigetesque patres, atque aurea desit atas.  
Vnde Nini imperium est, hinc bello illo tenus orbi,  
Ignoto Babylonque furens, & concita Persis,  
Cœpit in externos armis prorumpere fines.  
Quotque etiam memini Rex imperitauit Amasis  
Vrbibus Egypti, sed ne sequar omnia, tellus  
Sic diuisa modo est, regni sic anctæ libido

Aurea atas.

Ferrea atas.

Auaria.

Orbis partiti-  
tus.

p. 368

p. 36

vt



Ut quicquam certi non sit, iubet ire peracta  
 Euganeæ gentis, bello quas occupat urbes  
 Illato, atque ignes stupeo quos Austria passa est  
 Clam missos, & tecta dolis flagrantia miris.  
 Sic nusquam iam tuta fides, communæque fallax,  
 Ne fraterna quidem seruat concordia, regnum.  
 Ergo ineunda via est, qua tot discrimina rerum  
 Tollantur, meliusque orbis terræque regantur.  
 Pax cælo aterna est, quando Jovis omnia, munda  
 Solus ego imperito, ponto Neptunus, Auernum  
 Dis regit, hoc superest ut & hæc mortalibus ora  
 Concessa, vnius Domini quoque gestet habenas.  
 Sic fore decretum est, unum gens omnis adoret  
 Sit secum, voluitque modum, lustratque potentem  
 Regnatorem Asiæ, sceptrumque Sophitidos aula  
 Ægyptique urbes magna, dirumque Serapim,  
 Inde sub occiduo Tartessia littora sole,  
 Gallorumque minas regum, ditiesque Britannos  
 Complectens animo, Belgarumque inclita regna,  
 Germanosque acres bello, sedesque potentis  
 Austriada, mox Pannoniam, gelidaeque recurrens  
 Sarmatiæ populos, & quos alit ora Scytharum.  
 Pannonium in puerum tandem defixus inheret:  
 Hic placet, hunc animo totum complectitur, alto  
 Qui magnas orbis terrarum flectat habenas.  
 Hæc secum, & regis Belgarum à sedibus unam  
 Coniugio elegit stabili, cui mater Ibera  
 Cæsar auus, fraterque ingens, quo sanguine Regum  
 Præclaro quisquam non surgit maior in orbe.  
 Quicquid in occasu est, quicquid per littora portus  
 Gesoraci refugum tangit mare, & alpihus altis  
 Clauditur interne, illius sub iura futurum.  
 Interea absoluet Latialis munia belli  
 Austriades, tumidumque Adriæ victricibus armis  
 Frenabit pontum, maioraque sceptrâ parabit.  
 Sic etenim crescens, regnisque potentibus auctus  
 Inuenient post fata viam, qua sumere fasces  
 Terrarum possit, & gentibus imperet orbis.  
 Dumque ergo imperio mundi, maturior atas  
 Crescit, erunt olli magni per fœdera Reges  
 Jungendi, inque vicem celebranda iugalia sacra.  
 Nec mora Junonem, atque ortam Tritonide ripa  
 Arcessit, coramque Deis sic talibus infit.  
 Cura puella mihi Maria est sata rege Philippo,  
 Pannonio ut puero pulchro iungatur, & altas  
 Magna Vladislai incedat Regina per aulas.  
 Chæra faue coniunx, tadasque exprome iugales:  
 Tu Pallas puero incumbe, & virtute parentum  
 Imbue, daque armis nullus sit fortior usquam  
 In terris, nullique Deum pietate secundus:  
 Cui sum terrarum atque orbis cessurus habenas.  
 Annuit his Juno, at contra sic talia Pallas,

Perfidia mor-  
 talium.

Caroli laus.

Alludit ad  
 poema suum.



Hac in ultimo  
Austriados li-  
bro scribuntur.

Curcense  
pauces.

Ab ortu.

A studiorum  
genere.

A presentia.

A rerum ex-  
perientia.

A fide.

Tu quacunque iubes pater omnipotentis Olympi,  
Perficiam; siquidem Austriados pepigisse recorder;  
Cum domitos vidi magno sub Cesare Boios,  
Me fore presentem rebus dextramque futuris.  
Nulla mora his dictis, sese ad penetralia confert  
Iuppiter, & secum quæ sint peragenda volutat.  
Agnoscebat enim, causis ingentibus ipsum  
Ambiri Austriadem, hinc mors Galli, hinc Italia bella  
Distractum motu vario curaque premebant.  
Tunc mentem in Langum vertit, quem candida mater  
Incrementum ingens, felici prodidit aluo.  
Atque ait, hic meus est, hunc alta ad culmina rerum  
Prouexit virtus, nam quid memorare necesse est  
Felicemque ortum, & prima incunabula vitæ  
Diuino progressa gradu, quod mentis acumen  
In puero eluxit? studiorum quantus in illo  
Prematurus amor? quantum profecerit, ipsa  
Miratur Pallas, siue astra polique rotatus,  
Seu vim signiferi, seu res preceptaque morum  
Inquirat, terraque amnes atque æquora ponti,  
Quæque sub occasu gentes sint, quæque sub ortu.  
Vt fluat Oceanus, quam longo margine tellus  
Claudatur, qua parte gelu coit, æquor, & vnda:  
Nigris inuentus descendat Nilus ab Indis,  
Disserit hoc melius nemo. Suadela, Venusque  
Sessitat in labris, quo fante pependit in astra  
Ales sæpe, suosque oblita est incuba nidos,  
Diuinique animi stupere, vndasque silentes.  
Firmatas vidi, atque auritas currere quercus.  
Os etiam sublime datum, positusque sub alta  
Maiestate decor, grauitas, presentia, motus,  
Dius similem efficiunt, quanta experientia rerum  
Scit Latium, cui frena dedit, scit Gallia, Iberus  
Germanique Duces. Verum sub Cesare longe  
Est visum melius, cui tot labentibus annis  
Imperii adiutor magni, fidusque laborum  
Est comes. Hunc ergo tanta ad molimina, solum  
Eligere est animus, sic fatus abusque Lyceo  
Mercurium accersit, mandatque hac protinus olli.  
Inate, & cælo sumptis talaribus alto  
Labere, & Augusti sacras te confer ad aulas  
Cæsaris, hinc præpes (nusquam mora) Pannonia Regem  
Vladislaon adi, qui connubialia sacra  
Inter se celebrent. Nubat Maria inclita pulchro  
Virgo Ludonico, tædisque vndaque iugali  
Ipse adero presens Diuum pater, & bona Juno.  
Sed Lango pia cura meo data numine fido  
Tractandi hoc munus, tamque alta negotia Regum.  
Sic Jouis imperio magnos affare Tyrannos  
Dixerat, extemplo Cyllenius alliger Alpes  
Festinus petiit gelidas, & nunciat ipsis  
Regibus, in somno patris mandata Tonantis.



Nec mora, utrumque subit, tadis coniungere regna  
Irrequietus amor, stabiliq̃ innectere vinclo  
Hic Mariam poscit, contra sibi Caesar habendum  
Esse Ludouicum, nodoque augenda iugali  
Regna putat, pariterque incessit corda cupido.

Et iam tempus erat, quo lex & fœdera tanti  
Coniugii firmanda forent, exposcit uterque  
Magnanimi curam peragenda ad munia Langi.  
Exequitur mandata celer, fidusque minister  
Flumine Danubii lata rate vectus, in alto  
Vela dedit ventis, coeunt hinc Sarmata, & inde  
Pannonius, Reges magni, quorum alter anhelat  
Tela inter Moscos vibrare, acresque Rbutenos,  
Et magni tumidas superare Borysthenis undas:  
Alter Turcarum, Mysorumque agmina fundens  
Pacatum statuit regnum, nuperque senile  
Ostendit robur, rabiem qui Marte prophanam  
Bellaque victrici strauit seruilia dextra.

Langum ambo excipiunt, faciem mirantur amœnam,  
Atque graues pariter gestus, gratique verendam  
Maiestatem oris, linguaque arcana disertæ,  
Interea paucis res est transacta diebus  
Coniugiiq̃ fides utrinque est pacta futuri.  
Belgica Pannonio est sic iuncta puella marito.

Crescite iam pueri, coniuncti viuite Reges.  
Jam nitet omnis ager, ridet iam Dadala tellus:  
Clarius it cœlum, riuus letantur & amnes:  
Horrescunt plantæ, distillant balsama saxi,  
Danubii dant nectar aquæ, pacatus abundat  
Ambrosia Drauus, & vernantes Carpathus umbras  
Extollit, duroque fluunt è robore mella.

Crescite iam pueri, coniuncti viuite Reges.  
Non sic tardipedi visa est sibi Cressa puella  
Fluctisoma in Dia, sic nequidquam Artemisæi  
Annua coniugii celebrant solennia Cares:  
Non sic turrata, felicia vincla Cybelles  
Grata Deis, minor Alcæo quoque creditur Hebe  
Iuncta, nec fasio maior virgo Attica nupsit.

Crescite iam pueri, coniuncti viuite Reges.  
Pannon fronde comas, & vernis nocte corollis,  
Intorque Germane comas, & nocte corollas:  
Fescenninorum libertas prodiga passim  
Regales intret thalamos, iam Syrmius hospes  
Musta cadis relinat, spument Carchesia Baccho  
Austriaco saliant iuuenes, & ter pede dextro  
Propulsanto solum lati, tria nomina fantor,  
Quæ cœlum, pontumque regunt, terrasque profundas.

Crescite iam pueri, coniuncti viuite Reges.  
En mundi noua signa meant, nouus erutus ordo.  
Nescio quid maius cœlum promittis, habenis  
Vladislæ tuis, iam canos ungue capillos  
Et tadas adole pingues seruileque bellum



Excidat ex animo, quod tu virtute tuoque  
Sedasti ingenio, pauloque relaxior insta  
Letitia, & thalamum tua concinat aula, futurum.

Crescite iam pueri, coniuncti viuite Reges.  
Frater ades sacris, & bello solue phalanges  
Sarmaticas, patere indomitos errare Agathyrſos,  
Da veniam Mosco, Scythicosque relinque Rbutenos  
Paulisper, dum lata dies, dum latior annus,  
Dum ridet cælum, atque aer nigra nubila ponit,  
Frater ades, tædæque sacra pius omnia firma.

Crescite iam pueri, coniuncti viuite Reges.  
Per te etiam Cæsar, pugna dum parturit ingens  
Bellum animus, Venetumque minas dum cura domandi  
Maturatur, eat lux formosissima, Diuum  
Munere concessa, & magnos paritura triumphos.  
Liberior, sceptri nec maiestate retentus.  
Indulgeque iocis, mellitaque pocula ziti  
Spumantesque hauri nigro crateras facho.

Crescite iam pueri, coniuncti viuite Reges,  
Vos ambo, quorum Diis magnis cura remansit.  
Virgo, puerque, tuum factis imitabere patrem,  
Tu prior, ipsa tua videre simillima matri.  
Juno faue dictis, tibi vincla iugalia cure  
Atque maritales sit Regum adolescere tædas.

Currite felices Parcarum, currite fusi.  
Sit latus quicumque dies nucibusque relictis  
Dum iuuenilis amor feruet, dum pronuba Juno  
Aspirat, castamque Venus secat aurea zonam,  
Alma puella, puerque o terque quaterque beati  
Caste adeunto thorum, & caste celebranto hymeneum.  
Sic nati natorum, & qui nascentur ab illis,  
Perpetuo regno solioque fruantur auito.

Currite felices Parcarum, currite fusi.  
Ecce noua imperia, & rerum incrementa parantur,  
Sub vestrum, quæcunque videt Sol aureus ortu  
Quæque sub occasu, sceptrum ventura, Deorum  
Auguror officio. Venient sene patre Alitambi,  
Incultique Scythæ, Parthique, & discolor Indus  
Obsequio, cum sceptra potens sua Cæsar ad vnum  
Transferet, illiusque manu tractabitur orbis.  
Ergo dum rerum crescit maturior ætas,  
Currite felices Parcarum, currite fusi.

Damnat Prin-  
cipes sui tem-  
poris.  
Dies fœderis  
promulgati.

Strigoniens.  
verba pro fœ-  
dere.

Itaque hosce versiculos cum obtulissẽm, Adoreos abii nuxæ, nam Prin-  
cipum fores pedibus (vt aiunt) non manibus pulsandæ. Jam sextæ Augusti Ca-  
lendæ aduentabant: Iam felicissima albicabat dies, & nitido signanda lapillo,  
qua pax æterne, fœdus perpetuum, affinitates immortales promulgarentur. Ita-  
que cum Cæsar semper Augustus, Vladislaus Pannoniæ, Sigismundus Sarmat-  
iæ, Ludouicus Boemiæ Reges, in arce conuenissent, atque interim de rebus  
magnis sermo haberetur, fœderis promulgatio ad vesperam dilata. Quamobrem  
accensis cæreis sic res acta est. Cardinales Strigionens. Gurcensisque aderant,  
sed Strigionensi ob ætatem munus impositum, vt fœderis verba faceret: qui  
ita exortus est. *Sacratissime Cæsar, Serenissimi Reges, Felicissimus dies tandem ad-  
uenit,*



uenit, in quo inter vos perpetuum fœdus, immortalisque amicitia confirmaretur. Itaque quod faustum & felix sit, vobisque, regnis vestris, & Christianæ reip. profuturum, si pax, fœdusque ut inter vos tractata sunt placent, & verbis nunc confirmate, & dextras inuicem complectimini. Cum ergo latis animis & annuissent & confirmassent, ita dextras coniunxerunt. Cæsaris dextram primus Vladislaus complexus est, inde Sigismundus, tertio Ludouicus Reges. Rursus Vladislai dextram Sigismundus frater & Ludouicus filius complexi sunt. Tertio Ludouicus Sigismundusque dextras coniungere. Tanto omnium applausu hæc acta sunt, ut neque cogitari, neque referri gaudium possit. Hæc paulo secretius. Inde ut omnes, qui audissimè expectabant, palam Cæsaris Regumque fœdus p.372 intelligerent, ex Podio Syngraphum & Latine, & Germanice sic recitatum est.

*Quod faustum felixque fiet Nobis, ac Christiano orbi, Sacratissimi Maximiliani Imperatoris, Serenissimorumque Regum Vladislai, Sigismundi, ac Ludouici, fœdus perpetuum, amicitiamque contra infideles, atque hostium communium internicionem initam confirmatamque denunciamus.* Formula item fœderis.

Quibus perlectis, ferit aurea sydera clamor, tympana perstrepunt, tubæ clangunt, senes, iuuenes, innuptæque puellæ; tum ciues, tum externi, felicissimo rerum exitu lætabundi per urbem discurrebant; festa vbique diuersarum gentium gratulatio haberi videbatur. Postero die Cæsar, Regesque mutuis inuicem muneribus certauerunt. Gurcensem Sarmatiæ Rex Megaloprepes Scyphis Anaglypticis tribus, duobus crateris aureis, totidemque Zebellinorum quadragenis (sic enim appellant) donauit; omnesque præterea Oratores, virosque à secretis, amanuensesque Cæsareos, aut holoserics, aut pecunia profecutus est. Contra nulli aulicorum Pannoniæ, Sarmatiæque, quin prius à Cæsare basilice donati fuerint, recessere. Verum hæc prosequendi nec meum institutum est, nec si vellem, præ multitudine munerum ac magnitudine compos incepti operis fierem. Tantum hoc tradendum memoriæ est, Cæsarem Mariæ Nepti Crucem (cuius superius memini) viginti millium ducatorum elargitum esse. Regem vero Sarmatiæ zebellinorum pellibus trium millium ducatorum pretio Imperatorem donauisse: quis vasa aurea, argenteaque? quis scyphos, gutturnios, Anciliaque toreutice figurata arte enumeret? quis vestes purpureas, dibaphas, latosque principum virorum clauos, puellarum patagia, militariaque paludamenta feliciter prosequatur. Quare sit satis hoc in vniuersum meminisse, Cæsarem qui & Reges suis aluit sumptibus supra ducenta millia Rhenensium impendisse. Itaque rebus auspiciatissime confectis, perendino die Imperator & Ludouicus Rex graui ambo armatura tecti nouam ciuitatem, quo cæteri Reges postredie venturi erant, petiere; illuc sequente die cum omnes conuenirent, biduum insumptum est, compositisque examussim rebus, abeundi tandem vtriusque venia impetrata est. Vbi tot lachrymæ effusæ sunt, ut minus Niobem in Sypilo lachrymari crediderim. Nam Vladislaus Annam filiam, delicias suas, solatiumque ac senectutis præsidium relinquere grauiter ferebat. Illa effusis iam deuicta lachrymis, non solum paterni doloris ac senii miserebatur; sed & crebro fratris qui paulo ante dixerat, *malle mori quam sine sorore viuere*, singultu ac moerore ita afficiebatur, ut tota in lachrymas euanescere videretur. Sic cum diu mansissent, datis mutuo dexteris Vladislaus, Ludouicusque Reges, relicta apud Cæsarem Anna, in Pannoniam rediere; Sigismundus Viennam, ut inde paulo post in Sarmatiam abiret, reuersus est.

Dona Cæs.  
Regumque.

## AD LECTOREM.

QUOD pollicitus sum ab initio, in parte me præstitisse arbitror. Tamen non inficior, tantæ rei magnitudinem, & uberius, & sublimius dictionis genus poposcisse. Nam ea, quæ magnifice, excellenterque gesta sunt, nisi eorum dignitatem, atque



atque amplitudinem verborum cultu, atque ornatu prosequare, idem contingat necesse est, ut pro Elephanto Culicem depingas, atque ea dum leguntur magis risum quam admirationem afferunt, ac tantum abesse arbitror, ut res illustres, inerudite, incomptaeque scribi debeant, ut etiam cultissimus in iisdem ornatus requiratur. Alioqui & nos iudicio caruisse censeremur, & facta dictaque memoratu digna in tenebras à nobis coniici, nedum illustrari viderentur. Qua quidem in parte video complures errare, quippe qui magis vernaculis suis & iisdem indoctis, non citra fame iacturam consulere, quam rerum praestantia summa cum laude prosequi velint. Sed de hoc eruditi iudicent. Interim lectorem admonitum volo, ne minutissima quaeque, à quibus non ignarus pedem retraxi, & iisdem immorari, non nisi ingenio abutentis est, requirat. Nomina autem (ut alibi praefatus sum) ut cuiusquam lubido erit, resarciendi, mutandive edicto publico libertas esto. Nam ipsam rerum seriem, quam propriam quoruncunque Nomenclaturam prosequi maluimus.

Caspar Vrsinus Velius.

Quam bene Meonius celebrauit Homerus Achillem,  
Quam bene & Aeneas cantat ubique Maro.  
Tam canit Ausriadae bene Caesaris acta Ricardus,  
Scribendi graphice cultus utraque via.  
Felix Aecides, felix Anchisiades Tros,  
Felix Ausriades terque quaterque pius.  
Contigerunt merito magnis, magno ore locuti  
Vates, aeterni carminis artifices.

Joachimi Vadiani Heluetii.

Cesaris & Regum si quid monimenta merentur,  
Quae Ricarde tuus tollit ad astra labor:  
Iusta tibi fama merces accedet, & addent  
Priuato meritum grandia gesta decus.  
Lecta adeo rebus componis verba, suoque  
Quodcunque est nusquam non finis esse loco.  
Arte quidem: nam saepe solent parua illa videri,  
Verborum incompta quae leuitate fluunt.

Rudolphus Agricola Junior.

Hoc lege lector opus, non hoc est verius ullum,  
Quodque animo poterit gratius esse tuo.  
Sine stilum videas, seu gesta negotia regum,  
Omnia vel Criticis sunt placitura malis,  
Ad malum siquidem vere exorditur ab ovo,  
Et docte & proprie singula facta docet.

AD LECTOREM.

GRAVA-



GRAVAMINA NATIONIS  
GERMANICÆ.





LECTORI SALVTEM!

BURCARD GOTTHELF STRUVE.



Ultima Germanicæ gentis a seculo potissimum XV. contra Papalis antea attentata exorta fuerunt grauamina, maxime, dum per Jo. Wiclefi & Jo. Hussi doctrinam, lux evangelica paullatim inualesceret. In Concilio equidem Constantiensi Sigismundo Imp. an. 1416. iamdum quædam Grauamina exhibebantur, inde *Auifamenta Constantiensia* adpellata, \* quæ hoc effecerunt, vt in eodem Concilio inter Martinum Papam V. & Nationem Germanicam Concordata de Ecclesiæ vniuersalis administratione constituerentur. \*\* Inde eidem Sigismundo an. 1427. Moguntia noua exhibita fuerunt Auifamenta. \*\*\* Insecuta quidem fuit an. 1436. Sigismundi Imp. Reformatio, per ipsius Consiliarium, Fridericum a Landskron composita, \*\*\*\* sed parum proualuit. In Concilio Basileensi quidem ad Grauamina Germanicæ nationis fuit responsum, \*\*\*\*\* neque tamen hoc ipso iisdem satisfactum. Mortuo Eugenio IV. Papa, dum ipsi successus esset Nicolaus V. Comitia in diem S. Margarethæ 1447. Aschaffenburgum indicebat Fridericus III. Imp. \*\*\*\*\* Disceptatum ibidem est, quonam pacto Pontifici Nicolao parendum esset. Erant, qui decreta Basileensis concilii omnia suscipienda contenderent, illisque saluis, Papæ obediendum. Contra legatus apostolicus eius concilii legibus, quod Romana sedes refutasset, nullam inesse vim aiebat. Alii, quibus media sententia placebat, verum Basileæ concilium aliquando esse affirmabant, eiusque temporis constitutiones hautquaquam reiiciendas esse putabant. Postremo eo modo concordia locus fuit, vt sententia quorundam decretorum Basileensis concilii reciperetur, reliqua vero eius statuta reiecta viderentur. \*\*\*\*\* In iisdem quoque Comitibus Aduisata fuerunt exhibita. \*\*\*\*\* Tandem vero XVII. Februarii 1448. cum Johanne Cardinali S. Angeli & Legato a latere super Collatione Beneficiorum Ecclesiasticorum certa erecta fuerunt

\* Reperiuntur ista apud Goldastum Tomo vno *Constit. Imp.* p. 391. & inter Rescripta & Statuta Imper. Tom. I. p. 149. & apud Hardium *Prolegom. Concilii Constant.* Tom. I. c. XV.

\*\* Extant ista in Leibnitii *Cod. Jur. Gent. diplom.* Tom. I. p. 384.

\*\*\* Extant apud Goldastum in *Stat. & Rescriptis Imper.* Tom. I. p. 155.

\*\*\*\* c. l. p. 170.

\*\*\*\*\* Apud Goldastum *Stat. & Rescript. Imper.* p. 202.

\*\*\*\*\* De his Jo. Gobellius in *Comment. Pii II. lib. I. p. 24.* & Müllerus in *Reichs-Tags Theatro P. I. c. XXVII.*

\*\*\*\*\* Verba sunt Aenæ Sylui in *Apologetico ad Martinum Meyerum.*

\*\*\*\*\* Extant ista apud Müllerum c. l.



fuerunt concordata, quæ XIV. Cal. Aprilis eiusdem anni a Nicolao V. Papa fuerunt confirmata.\* Hæc tamen obtrusa potius fuerunt Nationi Germanicæ, dum pauciores status ista adprobarent. Nequetamen his, quæ Sedi Romanæ admodum erant proficua, contenti Pontifices, maiora adhuc attentabant. Mortuo igitur an. 1455. Nicolao V. Papa, fuerunt non pauci, qui Cæsari suaserint, nunc tempus esse coërcendi Apostolicam sedem, ne tantum in Germania posset: Conuentiones quæ cum Eugenio factæ fuerant, diminutas esse, nec prius obediendum Rom. pontifici, quam ea concederet, quæ natio Germanica optaret, ancillam eam videri libertatem aliquando mereri. Atque hoc ipsum Jacobus Treuerensis archiepiscopus obnixè requirebat, qui ex lite lucrum aliquod expectabat. Contra Æneas non esse e re Cæsaris aiebat, Romani pontificis auctoritatem reprimere, ut populi gratia iniretur, quæ sui natura inconstantissima est: nec multitudini relinquendas habenas, quam nosset principatibus inimicam: inter principes aliquando amicitiam inueniri, inter plebem, & regem odium immortale. Papam Imperatoris & Imperatorem Papæ auxilio indigere: Stultum esse illi nocere, cuius expectes opem: cum Pontificatus nouus initur; tunc Romani præsulis gratiam beneficiis emerendam. Quod si ab iniuriis incipias, difficile in beneuolentiam patere aditum: mittendam more maiorum obedientiam, fœdusque cum nouo præfule honestum ineundum, eoque pacto Germanos Imperatori obedituros. Vicit Æneæ sententia atque ipse missus est, qui ea perageret, quæ suaserat, & cum eo profectus Joannes Inderbachius Jurisconsultus.\*\* Electores tamen, præ cæteris Rhenenses, de Papæ attentatis sæpius querebantur. Patet hoc ex Martini Mayeri, qui Cancellarius erat Moguntinus, Epistola ad Æneam Syluium scripta, quæ hic inferitur, ex Aschaffenburg scripta,\*\*\* qua ipsi non solum de Cardinalis dignitate gratulatur, sed etiam quæ Nationis sint Germanicæ contra sedem Papalem Grauamina aperit. Ad singula tamen diuersis epistolis respondet Syluius,\*\*\*\* singularem etiam confecit Apologiam, quam inscripsit *de Ritu, situ, moribus & conditione Germaniæ*,\*\*\*\*\* quam Antonio tituli S. Chrysogini S. R. E. presb. Cardinali Episcopo Verelenfi destinauit. Ipse quoque Calixtus III. Papa se de Germanorum Grauinibus diuersis vicibus excusat.\*\*\*\*\* Ad dictam vero Syluii Apologiam ex mandato Maximiliani I. singulari scripto respondet Jacobus Wimpheingius Sletstadiensis, hic erat Presbyter Spirensis Ecclesiæ, qui etiam in

Tom. II.

Q q q q 2

Heidel-

\* Extant ista cum quæstionibus quibusdam per Georgium Branden edita, Colonia 1610. 4. apud Goldastum *Statut. & Rescr. Imper. Tom. I. p. 207.* Accesserunt Schilteri Institutionibus Juris Canonici & reperiuntur apud Leibnitium *Cod. Jur. Gent. diplom. P. I. n. CLVIII.* Müllerum *im Reichs-Tags Theatro P. I. c. XXVII. §. 7.* Commentati in eadem fuerunt Henricus Linckius & Adamus Cortreus.

\*\* Verba sunt Jo. Gobellini *Comment. de Gestis Pii II. lib. I. p. 25.* Extat etiam Æneæ Syluii Oratio, qua Calixtus III. Papæ Imp. nomine obedientiam offert, inter alia Eius Opera ep. CCCXCV.

\*\*\* Datum huius epistolæ apponitur *pr. Cal. Septembris, 1457.* Sed cum Æneæ Syluii ep. CCCLXIX, quæ ad eandem responsoria ex Roma scripta sit die VIII. Augusti MCCCCLVII. errorem quendam commissum esse arbitramur.

\*\*\*\* Facit huc Epistola Æneæ Syluii ad Martinum Mayerum CCCXXXVIII. CCCXLV Alia ad Joannem Lesurem CCC XLIX. ad Decanum Wormatiensem CCC LVI. Plerasque Theatro suo Comitiorum sub Friderico III. inseruit Müllerus *P. III. c. VIII. §. 3.*

\*\*\*\*\* In editione quidem Operum Æneæ Syluii quæ Basileæ 1551. f. prodiit, qua ipse usus sum, hæc ipsius Apologia non reperitur, extat vero in Bzouii Annalibus Tomo XVII. p. 186.

\*\*\*\*\* In epistola ad Ladislaum, Vngariæ Regem inter epistolas Syluii CCC XXXI. ad Henricum Leubing ep. CCCXXXV. ad Nicolaum S. Petri ad vincula Cardinalem ep. CCCXXXVII. & ad Fridericum III. Imp. ep. CCC LXXI.



Heidelbergenſi Academia docuit. \* Hunc autem Maximilianus elegit, quod non ſolum vario doctrinæ genere eſſet refertus, ſed etiam abuſuum Cleri cenſor acerrimus, \*\* qui alias pro Eccleſiæ immunitate ad Cardinalem Tornicenſem ſcripſerat. Hæc igitur Wimphelingii Apologia, cum aliis ſcriptis, Gravamina Nationis Germanicæ concernentibus, in hac continetur Collectione. Adiectæ ſunt duæ Orationes, altera a Legatis Leonis X. in Comitibus Auguſtanis 1518. \*\*\* habita pro colligendis decimis contra Turcas, altera eſt diſuaſoria ne Principes in eaſdem decimas conſentiant Nomen quidem huius Oratoris non exprimitur, ſed in fine eiſdem hæc verba reperiuntur: *finis Orationis Vdalrici (ut fertur) Hutteni*, qui illuſtris nominis cenſorque cleri erat acerrimus. Interuiſſe autem ipſum hiſce Comitibus Hiſtoria Vitæ ipſius teſtatur. \*\*\*\* Aſt, licet Huttenus diverſis ſcriptis contra Papam & Romanos eſſet clarus, dubium tamen mihi mouent vltima huius Orationis verba, quo minus eidem hanc tribuam Orationem, dum ſe a Laurentio de Bibra, Herbipolenſi Epifcopo ſacerdotum Collegio decoratum fuiſſe ſcribit, quod de Hutteno dici nequit. Proponit autem auctor quilibet ſit, quod Papa ſub prætextu ſaltem belli Turcici decimas à Germanis exigat. Inde pallii abuſus reprehendit, dicens: *prouenit Pontifici ex ſua terra veſtigal, quantum nulli Regum Chriſtianorum: & tamen Pallia emimus, & tamen aſinos auro onuſtos Romam mittimus, patibula Chriſti erigimus, munera promittimus aurum pro plumbo mutamus, negligentius (hem lapſo calamo) indulgentias paſſim admittimus.* Inde quantum lucrum Julius II. ex collectis ad Baſilicam S. Petri factis fecerit, enarrat, qua ratione Laurentium Medicem ducem Florentinum voluiſſet conſtituere. Demum cum laude Laurentii de Bibra, Epifcopi Herbipolenſis concludit. Omnia hæc ſcripta partem XXIII. conſtituunt inter Politica Imperialia Goldaſti. \*\*\*\*\*

\* Vitam ipſius & ſcripta exponit Bernh. Hertzog *Elſaſſ. Chronic. lib. VII. c. XXI.* Voſſius de Hiſtor. lat. lib. III. p. 640.

\*\* Teſtatur de eo S. Langius *Chron. Citic. p. 886.* ſcribens: *Jacobus Wymphelingus, ſacerdos & theologus vita & doctrina alioqui conſpicuus, ſed ſcribendo plurimum acerbus & ſpinosus, paſſim caterorum & vitam & ſcripta cynice taxando. Qui cum in libello ſuo de integritate mores religioſorum & ingenia etiam antiquorum patrum taxaret, librumque de ſcriptoribus eccleſiaſticis Joannis Trithemii abbatis & quondam præceptoris mei, temere & inſipienter reprehendiſſet, noſtroque ordini tres præſtantiffimos eccleſiæ doctores, Gregorium videlicet magnum, Alquinum Caroli magni magiſtrum, ac venerabilem Bedam ſubtraxiſſet, eos cucullatos ſive religioſos extitiſſe ſcriptum negando; ſicque aliis ordinibus feciſſet quibusdam, inſu ac inſtinctu memorati abbatis Trithemii, viri vndeunque doctiſſimi, ſub cuius tunc certo tempore militabam obedientia, in archiſterio prope Herbipolim, ſcripſi contra eum, immo eiſdem deliramenta, opus bipertitum in laudem & deſenſionem clauſtralium omnium. Edidit inſuper idem Jacobus & plura alia opuscula parua, quæ impreſſa venduntur palam.*

\*\*\* Inſcriptio Freheri præſerebat annum 1519. Verum dum Comitibus an. 1518. fuiſſent habita & finitis iſdem Maximilianus ineunte anno 1519. fuiſſet deſunctus ita emendauimus. Agit de iſdem Comitibus Chytræus Saxon. p. 201. præcipua de Bello Turcis inferendo, deliberatio fuit, qui ſuperiore biennio, Campſone, Syria & Ægypti Rege, ad Singam fluuium, cum Mamaluchis caſo, vniuerſam Syriam, Paſtinaſiam & Ægyptum, in ditionem ac Imperium ſuum redegerunt. Gerh. a Roo. lib. XII. p. 603. Imperator quoque in Turcicum bellum animatus, conuentum ordinum Auguſta Vindelicorum egit, ad quem Principes, ſolito frequentiores, venêre.

\*\*\*\* Reperitur iſta cum Catalogo Scriptorum Hutteni in Halenſium Teutſchen Anmerckungen Tom. III. Obſ. V.


\*\*\*\*\* Idem Goldaſtus in *Conſtit. Imp. Tom. II. p. 119.* eadem habet, & Germanico ſermone in *Reichs-Satzungen p. 215.* ſed non omnia.





GRAVAMINA GERMANICÆ  
NATIONIS, CUM REMEDIIS ET  
AVISAMENTIS AD CÆSAREM MA-  
XIMILIANUM, ET IMPERATORIS IPSIUS  
EDICTO.

GRAVAMINA CONTRA SEDEM ROMANAM,  
NOMINE NATIONIS GERMANICÆ ET SACRI ROMA-  
NI IMPERII, DECEM.

- I.  Quod ad seruandas bullas, pacta, priuilegia, & literas, ab antecessoribus absque omni derogatione concessas, successores Pontifices teneri se non arbitrantur; imo per crebras dispensationes, suspensiones, reuocationes ad cuiuscunque etiam vilis personæ instantiam contraheniunt.
- II. Quod electiones Prælatorum, quandoque reiiciuntur.
- III. Quod electionibus præpositurarum, quas quarundam Ecclesiarum capitula multo ære impetrarunt, contrahenitur. Spira scit & Hasela, cuius bulla de eligendo præposito eneruata est, eo adhuc superstitite qui dederat.
- IV. Quod beneficia & dignitates maiores, Cardinalibus & Protonotariis reseruantur.
- V. Quod expectatiuæ gratiæ absque numero conceduntur, & multi interdum ad vnum collatorem. Vnde surgunt quotidianæ lites, & pecuniæ dilapidantur. Tum illæ, quæ pro bullis gratiarum quæ nunquam effectum sortientur, expositæ sunt. Tum illæ, quæ pro litibus deducendis consumuntur. Inde apud quosdam ortum est prouerbum: *Quisquis gratiam expectatiuam ab Vrbe extraxerit, centum aut ducentos aureos nummos in cistam simul ad ipsam gratiam reponat, quibus ad prosequendam litem opus habebit.*
- VI. Quod annatæ absque dilatione, & sine misericordia, etiam Episcopis intra paucos annos mortuis, exiguntur. Interdum plus quam debeatur, extorquetur, propter noua officia, & nouos familiares. Exemplum de Moguntina & Argentinenſi ecclesiis.
- VII. Ecclesiarum regimina minus dignis (Romæ videlicet) committuntur, qui ad mulos magis, quam homines pascendos & regendos essent idonei.
- VIII. Indulgentiæ nouæ cum reuocatione aut suspensione veterum (laicis contra Clerum murmurantibus) ad corradendas pecunias conceduntur.
- p.374 IX. Decimæ sub prætextu expugnandorum Turcarum exiguntur, nulla expeditione subsequuta.
- X. Causæ, quæ in Germania (in qua etiam docti & iusti iudices sunt) terminari poterant, ad tribunalia Romana indistincte trahuntur. Quod sanctus Bernhardus ad Eugenium Papam scribens, valde reprobare videtur.



REMEDIIUM CONTRA GRAVAMINA NATIONIS  
GERMANICÆ.

SI Cæsareæ Maiestati consultum visum fuerit, proponatur summo Pontifici, & sacro sanctæ Ecclesiæ Romanæ, quod graue immo intollerabile sit nationi Germanicæ, à modo tantas expensas & molestias pati; tantâs pro confirmatione Archiepiscoporum & Episcoporum inferre annatas, præsertim quæ in quibusdam episcopatibus successu temporis auctæ, in quibusdam duplicatæ esse dicuntur. Nam sedes Moguntina (vt dicitur) olim solum dedit decem millia florenorum, quæ cum quidam illic electus dare renueret, sicque vsque ad mortem suam persisteret, electus post eum, confirmationis cupidus se opponere timuit sedi Apostolicæ offerens antiquam summam, puta decem millium florenorum. Is nec confirmationem impetrare potuit, nisi & reliqua decem millia simul redderet, quæ adhuc extabant à suo prædecessore nondum persoluta. Atque sic cogebatur dare viginti millia florenorum, quæ tunc indubie in registrum Cameræ signata sunt, & vsque ad nostram ætatem à singulis Archiepiscopis exacta, & nedum viginti millia, sed & viginti quinque, propter noua officia, & nouos pontificum familiares. Tandem excreuit summa, vsque ad viginti septem millia. Quæ Archiepiscopus Jacobus cogebatur nuper persolvere, vt retulit Vicarius in spiritualibus Moguntinensis. Sicque in vita vnius hominis septies viginti quinque millia à solo Archiepiscopatu Moguntino pro confirmatione Archiepiscopi Romam peruenerunt. Et cum Archiepiscopus Jacobus vix quatuor annos sedisset in archiepiscopatu, mox post eum electus dominus Vriel, ad minus quatuor & viginti aut viginti quinque millia coactus est persolvere; quorum partem mutuo forsan accepit à mercatoribus, sed vt illis satisfaciat, imponere coactus est subsidium aut exactionem in suos populos & pauperes agricolas, quorum aliqui nondum satisfecerunt tributo aut exactioni pro pallio à suo prædecessore Jacobo impositæ. Sicque non solum euiscerantur nostrates, & ad extremam inopiam rediguntur (qua de re Reuerendissimo domino Bernardino S. Crucis Cardinali & nuper Legato constat) verum etiam incitantur ad rebellionem, & quærendam vtunque libertatem, & vbi possunt, inter se fufurant de sauitia in clerum.

Admonendus etiam videtur summus Pontifex, quod per varia bella terræ Germanorum passim desolatæ sunt, ac per crebras mortalitates numerus viuentium diminutus. Sicque ob paucitatem cultorum, agri pro magna parte inculti iacent, & ipsa telonea diuersis euentibus attenuata, & venæ minerales exhaustæ sunt, pereuntque indies prouentus, ex quibus Archiepiscopi & episcopi (aliis etiam honestis & necessariis impensis grauati) sedi Apostolicæ annatam persolvere possint. Non sine causa, Jacobus Archiepiscopus Moguntinus iam fere moriens dixit, *se de morte sua non adeo dolere, quam ob id, quod subditi sui pauperes, iterum pro pallio grauem exactionem dare cogentur.*

Mitius ergo summus Pontifex, velut pius pater, filiorum suorum amator, ac fidelis & prudens pastor, cum filiis suis Germanicæ nationis agat, ne propediem vel in vniuersos Christi sacerdotes persecutio suboriat, vel instar Bohemorum plerique ab Ecclesia deficiant Romana. Mitius saltem agat, quotiens Archiepiscopus aut Episcopus ad paucos annos rexerit, sicut de Episcopis Bambergensibus accidit, quorum tres intra paucos annos mortui sunt. Quid de aliis multis episcopatibus? Siquidem Germania (Ænea Syluius teste) supra quinquaginta episcopatus habet. Quid de Abbatibus, quorum aliqui Romæ confirmantur? Esto, quod in Germania maiores essent ex agris, ex mineris, ex teloneis obuentiones, indigeret tamen Cæsarea Maiestas, & cæteri Principes, thesauro & neruo belli contra hostes, præcipue infideles, & ad conseruandam in Germania pacem, atque ad iustitiam vnicuique ministrandam. Ad quod, consistorium Regalis Cameræ cum magnis impensis sancte institutum, maxime deseruit.



deseruit. Præterea opus habet Cæsarea Maiestas pecuniis, ad comprimendos imperio rebelles, & ad exterminandos sicarios atque latrones, quorum nonnulli Ecclesiis nocere, earum bona diripere, immo in clericorum personas sæuere atque grassari non erubescunt.

p.375

Demum natio nostra non solum pro reparatione Ecclesiarum & monasteriorum auro indiget & argento, sed etiam pro hospitalibus, pro pueris exposititiis, pro viduis, pro puerperis, pro orphanis, pro filiabus pauperum (ne stupro cadant) desponsandis, pro domestica inopia laborantibus, pro annosis & effoetis, pro valetudinariis, ac pro postulatis, quorum (proh dolor) plena est Germania, alioqui etiam populosa, vti sexum minime fastidians muliebrem.

*REMEDIVM PRO CIVITATIBUS IMPERII ET ANIMARUM SALUTE.*

**S**I solitante Cæsarea Maiestate, à sede Apostolica impetraretur (quod Vriel Archiepiscopus Moguntinus impetrauit) ne quis deinceps in ciuitatibus imperii simul possit habere canonicatus aut vicarias, in diuersis eiusdem ciuitatis Ecclesiis, sed vt singulæ in singulas distributiones deferuissent: Tum minuerentur lites. Respublica magis sentiret commodum, plures docti, imperio & fidei vtilis promoueri possent, plures missæ legerentur, & omnis diuinus cultus alacrius & laudabilius perageretur. Sicut de Basilea & Spira exemplum adduci posset. In vtraque enim ciuitate, nullus simul in diuersis Ecclesiis plures canonicatus aut vicarias ex sanctissima consuetudine possidere potest. Ideoque vtrobiue religio & diuinus cultus egregie floret. Et summi Pontificis (Ænea Syluio teste) interest curare, vt honoretur DEus, & illi laudes atque hymni canantur.

Expediret Rebuspublicis & animarum saluti, si summus Pontifex immutabiliter sanciret, vt in quolibet collegio duæ ad minus essent præbendæ, gratiis non subiectæ, ad quas duo Theologi aut vnus Theologus, & alter Canonista duntaxat promoueri possent.

Atque vt idonei puta Philosophiæ, Canonum, & sacrae paginae docti, eo promptius curas subirent animarum, expediret, quod auctoritate Apostolica, monasteria & collegia parochiis, quas sibi incorporatas tenent, sufficientia & certa emolumenta inferre cogerentur. Hoc enim (si Æneæ creditur) Papam decet curare, vt Euangelium Christi, quod est optimum animæ pabulum, omnibus syncere prædicetur, vt omnes errores, omnis blasphemia eradicetur, vt bella sopiantur, vt furta, rapinae, incendia, homicidia, adulteria, ebrietates, crapulae, contentiones, odia & rixæ de medio tollantur. Ad harum rerum persuasiones, Theologi & Canonistæ magis idonei, quam Curtifani auari esse videntur. Immo & Theologi docti, concionibus apri, Summum Pontificem, reuerendissimosque dominos Cardinales in honore & auctoritate, sermonibus suis commodius tueri & conseruare possent.

*AVISAMENTA AD CÆSAREAM MAJESTATEM.*

**S**ICUT regnum Franciæ Pragmaticam habet sanctionem, cui in conferendis beneficiis innititur, sic imperium Romanum habet concordata principum, vtque ea illæsa conseruentur, interest Cæsareæ Maiestatis. Raro tamen hæcenus per summos Pontifices violata sunt: & auditores Rotæ iuxta illud hucusque fertur iudicasse. Et si aliquis curialium per quancumque dispensationem conaretur illa infringere, quod Episcopus, vel Princeps vel senatus eiusdem loci (principiis obstando) in faciem ei concordata inculcaret, pie exhortans, ne contra veniat, quoniam audacia sua sustineri nequaquam posset, cum & Turcæ & Judæi pacta fidemque seruent. Quis Curtisanorum tam insolens aut stultus est, vt contra voluntatem Episcopi, Principis, aut totius alicuius communis in aliqua ciuitate habitare præsumat.

Posset



Poffet etiam Cæfareæ Maiestas, per literas aut oratores, facile in regno Franciæ experiri, quomodo illic beneficia conferantur, & quam auctoritatem in conferendis beneficiis habeat summus Pontifex. Secundum hoc poffet moderamen fieri in imperio Romano, & frenum inexplebili avaritiæ Curtisanorum adhiberi. Si præclaræ vniuerſitates, præcipue facultas Theologica Pariſienſis approbauerit modum illum, qui de diſponendis & conferendis beneficiis in Francia ſeruatur, nemo dubitet Cæſaream Maiestatem & principes Germanos, ſi ſe iſti modo conformauerint, apud DEum tutos fore & excuſatos. Præſumendum enim eſt, quod tanti Prælati, tanti Doctores, tam probati viri, qui in regno Franciæ ac in ſtudio Pariſienſi viuunt, nihil approbent, quod contra DEum aut contra iuſtitiam committeretur.

Prouideat tamen Cæſareæ Maiestas, ne Archiepiſcopi Electores in hoc ſan- p.376  
cto inſtituto à ſe diſſentiant, ſibiſque non adhæreant, propter cenſuras apoſto-  
licas quas timebunt, & populus interdictum diu non ſuſtinebit.

Prouideat etiam Cæſareæ Maiestas, ne Fratres Mendicantes contra ipſam prædicent, qui ſedi Apoſtolicæ libenter deferunt, timentes perdere priuilegia ſua, vtinam Chriſto & naturæ innixa; quamuis iuſtiſſimam cauſam dudum habuiſſent contra tantam avaritiam, tantosque abuſus prædicandi.

Timeat Cæſareæ Maiestas, ne Papa mandet electoribus, vt ad electionem noui regis Romanorum procedant: Sicut contra Fridericum ſecundum Landt-  
grauius Thuringiæ, & Guilhelmus Hollandiæ comes iubente Papa fuerunt electi.

Timeat Cæſareæ Maiestas, omnes Prælatos Eccleſiarum, præcipue Præpo-  
ſitos, qui ex iuramento tenentur auſare Papam.

Timeat Cæſareæ Maiestas, ne S. D. N. Papa, obedientiam à ſubditis auferat, & circumiacentes populos prouocet, vt in terras Cæſaris, ſeu archiducatus Au-  
ſtriæ irruant, quod iſti homines ſub colore obedientiæ Apoſtolicis mandatis præ-  
ſtandæ, promptiſſimo animo ſunt facturi.

Timeat Cæſareæ Maiestas cenſuras Apoſtolicas, à quibus S. D. N. Papa non abſtinebit.

Timeat Cæſareæ Maiestas, ne Papa argutiſſimis locis rudi populo perſua-  
deat contra Pragmaticam, ſequæ excuſans, ſimplicium beneuolentiam captet,  
allegaturus, quod Eccleſiam ſancti Petri in Vrbe magnis impenſis inſtauret, &  
certis in locis contra Turcas ædificet, quodque bellis ſuis, nulli vnquam fecerit  
iniuriam: quoniam recuperet terras ad eccleſiam, ſiue patrimonium ſancti Pe-  
tri pertinentes, ad quod ex officio teneatur. Circumſpiciat ergo & deliberet  
Cæſareæ Maiestas, qualiter ſapientiſſimo ſuo conſilio omnibus illis Romanorum  
ſubtilitatibus, (ſi neceſſitas exegerit) ſit reſponſura.

#### CONCLUSIO ET PIA EXHORTATIO AD CÆSAREAM MAJESTATEM.

**N**IHIL ſanctius, nihil Deo gratius, nihil ſempiterna memoria dignius effi-  
cere poterit Cæſareæ Maiestas, quam vt tantas Germanicæ nationis mole-  
ſtias & exactiones moderetur, vt Laicis clerum perſequendi occaſionem auſe-  
rat, vt parochias (quarum aliquas Episcopatus Italicos Aeneas æquare ſcribit) ex  
faucibus Curtisanorum, concionari, conſulere & conſolari neſcientium eripiat;  
vt diuinum cultum augeat, vt avaritiæ & impietati Curtisanorum frenum im-  
ponat; & ius patronatus Laicorum in vtriſque, & nominationes Canonicorum,  
collationesque eccleſiaſticorum in ordinariis menſibus conſeruet; vt multorum  
Illuſtrium, nobilium, & ciuium filiis in Germania conſulat, qui in Vniuerſita-  
tibus ab adoleſcentia diuinas & humanas literas diſcunt, vt & ipſi extra curiam  
Romanam, abſque inquietiſſimis vexationibus, ſumptuoſiſſimique interdum  
etiam indignis litibus, ad præbendas eccleſiaſticas aſcendant, qui & imperio  
Romano conſiliis, & toti Eccleſiæ orationibus ſuis opem ferre poſſint. Neque  
enim



enim minima causa est, cur tantopere floreat Franciæ regnum, nisi quod tantos tamque præstantes in omni bona doctrina viros multos habet. Si Cæsar hanc impietatem eneruauerit, si Germaniam tributo graui oppressam, in pristinam libertatem vendicauerit, si doctis & honestis ad præbendas aditum fecerit, tum vero liberator Germaniæ libertatisque restitutor: tum vere Pater Patriæ, perpetuo ab omnibus passim poterit appellari: nec minorem sibi gloriam, Germaniæque fructum afferet, quam si prouinciam aliquam bellicis ei viribus adiecisset. Sicque non minores vni Maximiliano gratias debebit, quam his omnibus, qui translato ex Græcis in Germanos imperio, multis ante temporibus regnauerunt.

P. RÆSTERISCUS, D. JACOBO WIMPHE-  
LINGIO, DIVINARUM LITERARUM LICEN-  
TIATO. S. D.

**R**EMITTO ad te, vir ornatissime, fido cum hoc commensali meo, medullam illam Pragmatica, per quam scite syncereque abs te exceptam, una cum prudentissima Cæsarea Maiestatis instructione. Faxit DEUS Optimus Maxim. ut aquila nostra circumspiciat oculatissimaque, ipsam è summo culmine (perinde ut liliatus princeps) eripiat, conseruetque; ne scilicet posthac beneficiorum isti harpagines, vniuersam hanc nobilem Germaniam medullitus exenterent, eneruentque. Negotium ipsum, me Hercle, commodissimum atque diuinum summopere commendo. Nec non cum tuam ea in re diligentiam, tum Cæsareæ Maiestatis ad rempublicam Germaniæ Zelum haud immerito maximi facio, mirificeque laudo. Nihil prorsus demendum in ipso facto, adiiciendumve (hac præsertim tempestate pestifera, proindeque nobis inquietissima) operæ pretium duximus. Æneam Syluium de Germania situ propediem aut ipse reducam, aut fido cum tabellione ad suum remittam authorem. Vale faustissime Rasteriscoque tuo, tametsi scabro & inculto, vtare pro tua synceritate, ut vales. Datum festinanter & ex tempore, urgente contubernali hoc meo probata vite viro, quem tue humanitati commendo. Calend. Decembr. Anno Christi M. D. XI.

SERENISSIMO ROM. CÆSARI AUGUSTO  
MAXIMILIANO, JA. REGIUS  
FAMILIARIS.

**A**ldiens nuper, sacratissime Cæsar, Maiestatem tuam Romæ adeunda accinctam, scripsi Joanni Collauro à secretis, ut Cæsaream Maiestatem tuam de nonnullis commonefaceret, quæ ad splendorem nominis tui, Germaniæque decus non parum attinere videbantur, ut ea à sacrosancta sede Apostolica tecum referres. Nihil enim credidi impetrare te non posse, quod à Julio II. Pont. Max. à tua Cæsarea Maiestate salutando esses petiturus. Inter cetera vero Joannem Collaurum de vno singulariter reddidi certiores, quod fel. recordationis prædecessor tuus Henricus Romanus Cæsar, præbendam quandam (quæ ob id Regia vocatur) in Argentinenſi Ecclesia fundauerit, cuius omnes in Imperio Romano successores iure foundationis procul dubio collatores fuerunt, & adhuc esse deberent, sicut & hodie Cæsarea tua Maiestas duarum similium præbendarum, quas progenitores tui in templo Spirensi de suis erexerunt, ius patronatus habet. Quomodo autem ab eo iure erga præbendam Argentinenſem (forte propter interregnum) Romanus Rex ceciderit, & ad Præpositum illic deuolutum sit, prorsus ignoro. Hoc tamen multis persuasum est, Cæsaream tuam Maiestatem, ius illud patronatus à summo Pontifice denuo in utroque mense ex aequitate facile consequi posse, ut à modo ad DEI laudem & Ecclesiæ decus, vir quispiam scientia & vitæ honestate conspicuus, tuæque Maiestati cognitus, non inutile quoddam bestiæ aut coquinae mancipium, sed neque leno, neque catamitus, liber & alienus à scientiis & pietate, eidem præficeretur. Tua enim Maiestati, cunctisque tuis in Imperio Romano succes-



foribus, mores & merita personarum longe clarius, quam exteris gratiarum dispensatoribus poterunt esse manifesta. Sed & hoc quoque DEO gratissimum, animabus salutiferum, tuæ autem Maiestati in primis honorificum visum est, si à sacrosancta sede Apostolica de quorundam abusibus erudienda, inuiolabili lege impetrares, ne deinceps quicumque vel natali obscurus, vel omnium bonarum literarum indoctissimus, contra diuinam naturalemque legem, contraque sacratissimos canones, duo aut tria sacerdotia sub vno tecto, tres aut quatuor præbendas aut canonicatus in diuersis collegiis intra eadem Romani Imperii mœnia sitis, totidemque pingues parochias, qualicumque dispensatione (ne dicam dissipatione) à summis Pontificibus esset consecuturus, cum tot canonicatum aut ecclesiarum parochialium qualibet alterius aut utriusque iuris sacræve pagine Licentiatum, imo Doctorem honesto statu nutrire posset, adeo ut singuli singulis essent contenti, & in animo tranquillo. Hac re vix aliquid DEO gratius, Germanicæque vtilius Maiestatem tuam arbitror efficere posse. Taceo quod hoc pacto pii adolescentes, qui in Gymnasiis multo labore, bonarumque literarum amore, patrimonium suum expenderunt, parte ecclesiastici stipendii acta, cohæredes in hereditate paterna ad rerum publicarum augmentum releuare, Christoque seruire, & pro totius imperii ac Imperatoris salute preces effundere possent. Sic quoque per singulas Ecclesias ministri instituerentur idonei sacræ pagine, sacrorumque canonum docti, præbendas facilius consequerentur, ac ceteri literis, virtutibus præditi, ad Christi patrimonium ascenderent; occasio desideranda mortis alienæ tolleretur, neque essent tot lites totque contentiones, cum magno rei familiaris per totam Germaniam detrimento, neque essent tot fraudes; non vexarentur infantes ab eis, qui nihil nisi contendere, acceptare, inquietare, vexare norunt. Non quibus proximum circumueniendi maior astutia, aut ad litigandum facultas suppetit vberior, sub inuolutionibus prerogatiuarum, antelationum, regressuum, & laqueis instrumentorum à propriis seruis scriptorum, tot fraudes, tot deceptiones permetterentur; adolescentibus, qui literarum studio virtuosisque operibus intendere deberent, non daretur ansa vagandi, nec per litium anfractus turbarentur. Non confunderetur ecclesiasticus ordo, non sineretur vnus solus ad nullam rem Deo gratam, aut fidei nostræ vtilem idoneus, turpiter occupare stalla & loca in omnibus Ecclesiis, intra eandem imperii ciuitatem sitis; sicque parochiis per barbaros, quandoque mercenarios prouisis, salubrius per doctos consuleretur; nec diminueretur diuinus cultus nec animarum suffragia omitterentur: non essent vacua stalla, non cassarentur voluntates vltimæ, minus perderentur literæ monumentaque beneficiorum, non periret hospitalitas, non eleemosynæ, non domus & adificia cetera ecclesiarum corruerent, non bona & prædia alienarentur, non essent tanta murmura & odia vulgi in cunctos fere sacerdotes, propter paucos auarissimos ac insatiabiles. Neque ego primus sum, cui tanta sacerdotiorum multiplicandorum cupiditas stomachum mouet. Nam & Franciscus Petrarcha viro probatissimo hac impietas admodum displicuit, qui nec expauit ad Urbanum quintum in modum sequentem perscribere: Audiebam te ambitioni antiquæ, quæ priorum licentiâ in immensum creuit, frenum ponere, & vt vno aut paucis pro dignitate virtutis ac scientiæ, beneficiis contenta esset edicere, iuste (inquam) grauiusque. Nam quid turpius, quam vnum aliquem, parta forsan fædis artibus copia, nauseantem cernere, multis hinc inde melioribus penuria, fameque laborantibus. Et sapientissimus Gregorius Nazianzenus his verbis astipulatur: Religionem ac doctrinam nostram opprobrium nascitur, quod sacerdotia ambitione potius & gratia quam meritorum iudicio deferuntur. Et Franciscus Picus Princeps illustris in Oratione ad Concilium Lateranensem, lamentatur sacras ades & templa leonibus, catamitis & lupis fuisse commissæ. Cetera sunt plurima tibi, sacratissime Caesar, pro tua summa prudentia proculdubio cognita, quæ Casaream Maiestatem tuam ad huiusmodi auaritiæ, caterorumque vitiorum frenum & moderamen à sacrosancta sede Apostolica impetrandum permouere possent. Dominus Deus tuæ Casareæ Celsitudinis ad felix imperii regimen, Christianicæque religionis amplificationem propitius opem ferre dignetur.



## MAXIMILIANUS IMP.

*Summum Ecclesie pastorem, & omnem clerum, exemplo charissimi patris nostri, Frederici Romanorum Imperatoris tertii, hactenus venerati, non paruos dignitatum & ecclesiarum parochialium prouentus ex terrarum nostrarum finibus, clericis & praelatis absentibus clementer inferri permisimus. Quos etiam clam pro humana fragilitate delinquentes, cum Constantino prædecesore nostro chlamyde operire non dedignaremur. Verum cum ex nostra largitate diuini cultus decrementum profluat, unde diuinæ laudis, psalmorum & missarum amplificatio debuerat proficisci; nostra interest, qui absque meritis in solium Romani imperii electi sumus, ut inter ceteras maximas pacis & belli occupationes, vigilanter quoque circumspiciamus, ne ecclesia pereant, ne religio labascatur, ne diuinus cultus diminuat, & ne animabus defunctorum, qui Ecclesiis & sacerdotibus de suo patrimonio benefecerunt, contra ultimas ipsorum voluntates tardius succurratur. Quod manifestissime experti sumus, & indies experimur, ex ineffabili atque à nullo dispensabili quorundam auaritia prouenire, qui in beneficiis assequendis nullum finem constituunt, per quorum absentiam (cum in uno solo personaliter resideant, & distributiones deseruiant) diuinus cultus diminuitur, ultimæ benefactorum voluntates cassantur, defunctorum animæ tardius ex igne purgatorio eripiuntur, adificia labant, ecclesiæ decrescunt, ecclesiastica libertas leditur, literæ & monumenta perduntur, hospitalitas & eleemosynæ minorantur, patrimonia parentum & nerui rerumpublicæ ex crebris huiusmodi auarorum colligationibus euanescent; clerici pro doctrina sua & virtute beneficiis digni, suæque prudentia ecclesiis in temporalibus & spiritualibus utiles, à præbendis repelluntur, impediuntur, indigne vexantur, iniuste eis lites mouentur, scandala laicis præbentur, ipsorumque odium & murmur in reliquos honestos sacerdotes excitatur atque augetur. Eas ob res ex officio Cæsareæ Maiestatis, ex amore incrementi cultus diuini, ex zelo reipublicæ hortamur & requirimus, ne quisquam à modo in una nostrarum, nostrique Romani imperii ciuitate Canonicatum aut vicariam possidens, in altera eiusdem ciuitatis Ecclesia, aliam præbendam occupet, nisi primam intra anni spatium in personam idoneam ac ecclesiæ utilem sit dimissurus. Neque alium in beneficiis assequendis per iniustas lites aut ambages indigne vexet, aut circumueniat, nec quemcunque qui non sit de numero descriptorum familiarium (iuxta concordata Principum, & pacta nationis Germaniæ) falso familiarem fuisse fingat, in ordinariorum collatorum præiudicium. Nec laicis ius patronatus auferre tentet, nec exiles præbendas, potissimum vero curatas ecclesias pensionibus grauet. Nec in adipiscendis beneficiis & bullis, quacunque fraude, dolo, falsis instrumentis, corruptis testibus, symonia etiam palliata utatur. Neque regressum aut alia sacris canonibus inimica, contra ius, æquum, honestum, & rectam rationem impetrare præsumant, sub pœna criminis læsæ Maiestatis & grauissimæ nostræ offensæ. Quam non solum ipsi sic contra DEum & omnem honestatem exorbitantes, sed & omnes eorum fautores, auxilium, consilium, hospitium & mutuum dantes, omnesque nuntios, cursores, sollicitatores, notarios, procuratores, fideiussores & reliquos amicos incidisse volumus, condignam pro tantis iniquitatibus & nostri huiusmodi mandati contemptu pœnam accepturos. Ex Oeniponte.*

## APPENDIX.

*PRÆMISSIS admonitionibus, nedum imperio, sed & Ecclesiæ salutaribus, ac ad mutuam pacem & concordiam deferuentibus, posset etiam inter alia multa adiungi, summusque Pontifex certior reddi, de lapsu & ruina domorum, cæterorumque ædificiorum ad ecclesias & sacerdotia pertinentium, siquidem (exempli causa) vnus supra triginta annos, ex parochia patriæ nostræ summis Pontificibus hactenus deuotæ, multa & magna emolumenta in absenti & in portatis (ut eorum verbis utar) corrasit & assumpsit, nec tamen ad docendum*



populum suæ curæ creditum cancellos vnquam ascendit, nec quicquam in domo egregium illic ædificauit. Argumento sunt & publice testantur miseria trum rei diuinæ ministrorum cubicula, quæ minimus fraticellus aut opilio forte aspernaretur. Sed neque præsentias aut distributiones quotidianas in asse aut dupondio auxit, nec vniuersariam saltem suiipsius memoriam instituit, nec ad Bibliothecam templi parochialis minimum quidem libellum ex testamento legauit, nec eleemosynam pro pauperibus fieri procurauit. Cæterum adijci posset, quod vnus Curtisanus ineptus & barbarus, ad psallendum & ad sacrificandum non magis aptus quam onager, immo asinus, palam à suo notissimo & amicissimo appellatus, in otio viuens, plura vtcunque conquirere potest sacerdotia, quam eximie doctus, ad rem diuinam, ad contentiones, ad consultandum, sacrosanctamque Ecclesiam Romanam rationabiliter defensandam, non mediocriter accommodatus. Præterea, quod pistor, aut cocus, leno aut nebulo, imo (cum venia) catamitus, opimas præbendas & parochias occupans, plus emolumenti ex Christi patrimonio absorbet, quam laboriosissimus & fidelissimus magnæ parochiæ cuiuspiam populosa rector, cum suis vigilantissimis adiutoribus, imo etiam capellanis, qui eosdem ad tutores in ministrandis sacramentis, audiendisque confessionibus occupatissimos, in horis canonicis, missis & vigiliis cantandis adiuvant & releuant. Huiusmodi releuamen & adiutorium per sex capellanos in patria nostra perpetuo continuandum speramus, postquam vnione facta ex benignitate sacrosanctæ sedis Apostolicæ, ius capellaniæ istas conferendi in consules Reipublicæ nostræ in vtrisque mensibus translatum est, qui nullis à modo conferent, nisi eis qui personaliter residentes, diuinum officium impleturi, & vltimis fundatorum voluntatibus sunt satisfacturi. Multum quoque ad institutum Cæsareum conferre posse videtur Christianissima Reuerendissimi domini Erhardi Leodiensis Episcopi admonitio habita in conuentu principum Augustano, Anno decimo octauo post millesimum & quingentesimum.

MAXIMILIANUS DIVINA FAVENTE CLEMENTIA, ROMANORUM IMPERATOR SEMPER AUGUSTUS, HONORABILI, DEVOTO, NOBIS DILECTO, JACOBO WIMPHELINGO SELESTADIENSI, S. THEOLOGIÆ PROFESSORI, FAMILIARI NOSTRO.

*H*onorabilis, deuote, dilecte, mittimus in præsentiarum ad te Secretarium nostrum, cum Pragmatica sanctione regni Franciæ, commissimusque ei tibi nostro nomine nonnulla referenda. Quæ cum ex mente nostra proficiantur, cupiamusque omnino interueniente opera & industria tua, in talibus nobis satisfieri: ideo hortamur te, & per tuam in nos & sacrum Romanum Imperium obseruantiam, (quam opusculis & lucubrationibus tuis iamdudum habuimus compertam) requirimus, ut non modo Secretario nostro indubitata adhibeas fidem, sed te eum in his, quem etiam non requisitus à nobis præstitisti, exhibeas. Cupimus autem dictum Secretarium nostrum (quoniam eius opera diutius carere non possumus) cum hoc voto nostro ad te expeditum, quam primum ad nos remitti. Datum in oppido nostro Imperiali Vberlingen, die XVIII. mensis Septembris, anno Domini M. D. X. Regni nostri XXV.



p.380 INVICTISSIMO DOMINO NOSTRO IMPE-  
RATORI MAXIMILIANO, JACOBUS WIMPHELINGIVS  
SELESTADIENSIS, HUMILLIMAM COMMENDA-  
TIONEM.

Victoriosissime Cæsar, lecta Cæsareæ tuæ Maiest. epistola, moxque accepta à Secretario instructione, totis ad id viribus me accinxi, ut id, quod Cæsareæ tuæ Maiestas desiderat (quoniam cum Deo, & absque conscientia vulnere fieri potest) efficiam. Ab ineunte enim ætate omnem operam meam tuæ Maiestati, deinde Germanicæ nationis & sacri Romani Imperii amplificationi deuoui atque dedicaui. Quamuis me voto tuo & instituto longe imparem sciam, & multi sint in aula tua, qui hoc munus absolutissime implere valeant, quibus maior est eruditio, maiorque rerum istarum communium experientia. Sunt & apud reliquos Principes, & apud Senatus Rerumpub. optimi doctissimique viri, qui Germaniam exornare, & ad pacem concordiamque vniuersalis ecclesiæ, atque totius cleri ad Christianam disciplinam reducendi famam & gloriam persuadere possent. In qua re non modo tua Maiestas, sed & tui in imperio prædecessores, Carolus Magnus, eiusque filius Ludouicus Pius, Otthones, denique, Conradi, Friderici, & Henrici, nouissime autem Sigismundus summa industria operam nauarunt, impellente ipsos indubie zelo & charitate in Deum Opt. Max. & gratitudine in Christum, pro ipsius in humanum genus beneficiis, præcipue autem amarissimæ passionis. Neque enim Christus pauper pro nobis factus est, ut nos in omni rerum opulentia & luxu de ipsius patrimonio cupiditatem nostram & ambitionem prodamus. Neque famem pertulit, ut nos ingurgitemur: neque labores, castimoniam, & dira tormenta subiit, ut nos in otio, in lasciuiâ, inque omnibus delitiis & voluptatibus verseremur. Neque hi quibus res Ecclesiastica sua debet incrementa, quantum ad ditionem temporalem attinet, huc respexisse videntur, ut in otio tantum clerici degerent, omnibus rebus ad vota fruenter, citra tamen laborem. Alia certe causa fuit, cur illi seque suosque nonnunquam spoliantes, ecclesiam ditandam consueuerint: nimirum ut commodius diuinis officiis vacare possent, absque solitudine defuturi victus, quem ex agris, nemoribus, pratis, ac aquis facile colligere liceret: & ut pauperibus Christi, viduis, orphanis, & senibus, quos robur corporis prorsus destituit, ac ægrotantibus eleemosynam liberius impertirent. Sic enim in Institutionibus canonicæ professionis, quas auspicio Imperatoris Ludouici Pii conscriptas putamus: & ab Episcoporum concilio comprobatas, sic inquam legitur: *Res ecclesiæ (sicut à sanctis Patribus traditur, & in superioribus capitulis continetur) vota sunt fidelium, precia peccatorum, & patrimonia pauperum. Fideles namque fidei ardore, & Christi amore succensi, ob animarum suarum remedium, & cælestis patriæ desiderium, suis propriis facultatibus sanctam locupletem fecerunt Ecclesiam, ut iis & milites Christi alerentur, Ecclesiæ exornarentur, pauperes recrearentur, & captiui pro temporum opportunitate redimerentur. Quapropter vigilanti ac solerti cura prouidendum est his, qui eius facultates administrant, ne eos in suos solummodo usus conuertant; sed magis, iuxta possibilitatem rerum Christo famulantium, immo eorum in quibus Christus pascitur & vestitur, curam gerere penitus non negligant.*

\* Reformatio  
Ludouici Pii  
Imp.

Subscribit huius sententiæ Prosper asserens, viros sanctos res ecclesiæ non vendicasse in usus suos, ut proprias, sed ut commendatas pauperibus diuississe. Nam hoc esse possidendo contemnere: non sibi, sed aliis possidere, nec habendi cupiditate Ecclesiæ facultates ambire, sed eas pietate subueniendi suscipere. Quod habet, inquit, Ecclesiæ, cum omnibus nihil habentibus habet commune, nec aliquid inde eis, qui sibi de suo sufficiunt, erogare debet, quando nihil aliud est habentibus dare quam perdere. Hactenus aliena retulimus.



Proinde cum omnes Christi religionem professos eidem seruatori nostro gratos esse expediat, magis tamen id peculiare eius ministros, hoc est sacerdotes sacris initiatos, & de liberalitate tanta Imperatorum & procerum ceterorumque fidelium affatim prouisos, ut ab aratro & manuum laboribus alieni simus, tantorum beneficiorum decet meminisse, quo nostra vita populo bilem non moueat, nec ad oblocutionem & odium præbeat anam: sed ut ædificentur laici, amicitia mutua floreat, offendicula & sentes euellantur, reuerendi Antistites cum clero pietati dedito sint in sua veneratione, & in ipsum quoque summum Pontificem, sacrosancamque Romanam Ecclesiam, vniuersorum filialis affectus, & in spiritualibus obedientia fulciatur. Quapropter Serenissime Cæsar, celsitudini tuæ, quæ tam honesto & sancto negotio Christianissime afficitur, non potui non morem gerere, collectis tumultuarie nonnullis, quæ dedita opera & apud diuersas ecclesias, & in conuentibus præstantium virorum partim vidi, partim ex fide dignis audiui, quæ mihi, si tollantur, ad Germaniæ commodum, & ad diuini cultus amplificationem plurimum conducere videntur. Et eo ad id absoluendum, tuæque Maiestati in omnibus obsequendum promptior fui, primum quod nepotem meum Jacobum Spiegel, tuæ Maiestatis Secretarium, ex labore meo maiorem tuam in se benignitatem affecurum confisus sum, deinde quod sub Imperio Rom. natus & alitus, merito uti natura, subditus tuæ inseruio voluntati: postremo ut hac opera patriam meam Maiestatis tuæ patrocínio commendatiorem facerem. Selestadium enim natale mihi oppidum, omnibus terris charius, in Alsatia medietullo situm, prouinciis Austriacæ ditionis paruo sane interuallo cingitur. Quantum enim Brisages absunt? quantum Sungaui? quantum vallis Albertica in Vogeso? ut de minutioribus locis taceam. Si igitur Selestadium vel à Gallis, vel ab aliis hostibus (quod absit) premi contingat, quis illi melius subuenire possit, quam princeps Austriacus? siquidem vicinus vicino Deus est. Et solet nonnunquam ingentis beneficii esse causa paruum obsequium in tempore exhibitum. Ex Argentorato. Calend. Nouembr. M. D. X.

Jacobus Spiegel.

### CAPITA OPUSCULI.

*Epitome in Proœmium Pragmaticum.*

*Additio ad pragmatica proœmium.*

*De electione.*

*De reservationibus.*

*De Parochialibus ecclesiis sic provideant ordinarii.*

*De numero Cardinalium, &c.*

*Reliqua ut nimis prolixa, hoc loco omisimus, videat lector, cui ista cura, auctorem ipsum.*

JACOBI WIMPHELINGII SELESTADIENSIS, DE GERMANICÆ NATIONIS ET IMPERII GRAVAMINIBUS CONTRA SEDEM ET CURIAM ROMANAM, AD ÆNEAM SYLVIVM SENENSEM TUNC TEMPORIS EPISCOPUM.

REPLICÆ.

*Epistola autem, quæ huic disputationi causam primo dedit, ita habet:*

Martinus Meyr Cancellarius Moguntini præsulis domino Æneæ Cardinali Senensi, patri optimo S. P. D. Cognoui ex literis amicorum te Cardinalem esse



esse creatum, congratulor & tibi, qui pro tua virtute digna consecutus es præmia, & mihi cuius amicus in ea dignitate constitutus est, in qua me meosque necessarios aliquando iuuare poterit. Illud mihi molestum, quod in ea tempora incidisti, quæ sedem Apostolicam afflictura videntur. Nam domino meo Archiepiscopo frequentes afferuntur de Romano Pontifice querelæ, qui neque Constantiensis, neque Basiliensis concilii decreta custodit, neque se pactio-  
 bus antecessoris sui teneri arbitratur, nationemque nostram contemnere, & prorsus exhaustire videtur. Constat enim electiones prælatorum passim reiici, beneficia dignitatesque cuiusvis qualitatis, & Cardinalibus & protonotariis re-  
 feruari. Et tu quidem ad tres prouincias Teutonici nominis sub ea formula re-  
 seruationem impetrasti, quæ hætenus insolita est & inaudita. Expectatiuæ enim gratiæ sine numero conceduntur. Annatæ siue medii fructus, absque vlla di-  
 latione temporis exiguntur, & plus etiam quam debeatur, extorqueri palam est. Ecclesiarum regimina, non magis merenti, sed plus offerenti committun-  
 tur, ad corradendas pecunias nouæ indulgentiæ indies conceduntur, Decima-  
 rum exactiones inconsultis Prælati nostris Turcorum causa fieri iubentur.

p.382 Causæ quæ tractandæ terminandæque in his partibus fuerant, ad Aposto-  
 licum tribunal indistincte trahuntur; excogitantur mille modi, quibus Ro-  
 mana sedes aurum ex nobis, tanquam ex barbaris, subtili extrahat ingenio. Ob  
 quas res natio nostra quondam inclyta, quæ sua virtute, suoque sanguine  
 Romanum imperium coemit, fuitque mundi domina ac regina, nunc ac ino-  
 piam redacta, ancilla & tributaria facta est, & in squalore iacens, suam fortu-  
 nam, suam pauperiem multos iam annos moeret. Nunc vero quasi ex somno  
 excitati optimates nostri, quibus remediis huic calamitati obuiam pergant, co-  
 gitare cæperunt, iugumque prorsus excutere, & se in pristinam vindicare liber-  
 tatem decreuerunt. Erit hæc non parua iactura Romanæ curiæ, si quod cogi-  
 tant, Germani Principes effecerint. Quantum itaque de tua noua dignitate  
 lætor, tantum commoueor & angor tuo tempore hæc parari. Sed Dei fortasse  
 alia est cogitatio, & illius profecto sententia obtinebit. Tu interim bonum  
 habeto animum, & quibus repagulis fluminis impetus coherceri possit, pro  
 tua sapientia cogitato; & vale optime. Ex Haschaffenburga, pridie Calend.  
 Septembr. 1457.

*Hiscæ literis Æneas Cardinalis respondit duabus epistolis, quæ inter ipsius episto-  
 las leguntur, num. 338. 339. tum deinde libello peculiari, quam Ger-  
 maniam inscripsit. Ad quem postea istam Replicam Wim-  
 phelingus composuit.*

REVERENDISSIMO, INCLITISSIMO-  
 QUE PRINCIPI ALBERTO BRANDENBUR-  
 GIO, MOGUNTINÆ, ET MAGDEBURGENSIS ECCLESIA-  
 RUM ARCHIEPISCOPO DIGNISSIMO, SACROSANCTI RO-  
 MANI IMPERII PRINCIPI ELECTORI, AC PER GERMA-  
 NIAM CANCELLARIO, EJUSDEMQUE PRIMATI, DOMI-  
 NO MAGNIFICENTISSIMO, COLENDISSIMOQUE JACO-  
 BUS VUYPHELINGIUS DE SELETSTADIO, SA-  
 CRARUM LITERARUM LICENTIATUS,  
 SE TOTUM SUBJICIT, ATQUE  
 COMMENDAT.

*R*euerendissime Pater, & Princeps excellentissime. Ænea Syluius multis annis in  
 Germania versato, Germanicoque fauore, & Imperatoriæ maiestatis intuitu ad  
 dignitatem Cardinalatus assumpto, Martinus Maior Theodorici Erbacensis prædeces-  
 soris



foris tui epistolarum magister, nonnulla Germaniæ gravamina patefecit, quæ Principes imperii perferre nequirent. Aeneas ut Italus, nostrum veritus aurum suæ nationi subduci, Martini querelas multis verbis confutat, ac Germaniæ blandiens eius vrbes, templa, familias, nobilissimas præcipue domos, dulcibus præconiis exornat. Tuum in primis auum Albertum Brandenburgium (quem Teutonicum Achillem vocat) summis de prudentia & re militari laudibus afficit. Principum ac magnatum, siue comitum & Baronum filios, ad Episcopatus assumendos esse asseuerans. Nostrates tamen etiam Pontifices, & eorum contribules tum luxus, tum sacrilegii arguens, aurum nostrum sitire videtur.

Quod igitur Martinus, si superstes foret, indubie facturum erat, id oneris amicorum suasu desumpsi, Germanus pro Germano, Heydelbergensis pro Heydelbergensi, imperii filius pro imperio: ut sicuti Martino Aeneas, sic ego Aeneas per replicas (voti vocant) responderem. Quas nulli potius dedicandas quam amplissimæ tuæ magnificentiæ, excellentissime Princeps, indicaui: ut sicut ab aurea Moguntia per Martinum Cancellarium conquestiones Germanorum exorta sunt, sic ad eam mea qualiscunque confirmatio, à sacris litteris iureque pontificio nequaquam aliena, reuertatur. Quam tua magnificentissima paternitas, pro ineffabili tua virtute & doctrina, apud me clarissimi cuiusdam Comititis ore probatissimorumque hominum litteris sæpe prædicata, pie suscipere, clementer audire, ac felici auspicio tutari dignetur. Neque enim ad excitandam rebellionem Aeneas respondebo, qui semper inobedientiæ osor fui, quæ omnem ecclesiæ & imperii ordinem turbat, factiones suscitât, disciplinæ resistit, & sacris litteris inimicam vendicat libertatem. Nec Aeneas dicta refellere cœpi, ut cogitem ad alme vrbis ministeria restringenda: in qua si quispiam ex nostratibus bonarum litterarum cultor, apud honestum prælatus, vitæ suæ ac honori sufficientissimum nactus sacerdotium huc redeat, eiusque foundationi & fundatoribus, totiusque ecclesiæ salutis, psallendo, sacrificandoque respondeat, censuumque ac monumentorum curam habeat, ne (voti in patria mea) obliterentur, quisnam illum non & adiuuare, & singulari amore prosequi dignaretur? sicut neque te clarissime pater, non ab omnibus virtutum amatoribus coli, diligere & observari, mihi unquam persuaderi potest: qui licet clarissimus, clarissimi Principis Electoris sis filius, te tamen nec vestis, neque muneris pontificii piget aut pudet, neque maiorem equorum, canum, ferarum, & fisci quam animarum & pauperum habes rationem. Animarum, inquam, quæ vitiorum dissimulatione ac synodorum defectu pereunt, in quibus sanctiones provinciales sacro iuri innixa, & à sacro sancta sede Apostolica confirmata repeterentur, admonerenturque à Latinis oratoribus, si qui ex Christi patrimonio viuunt, amasias & nothos, pauperibus & consanguineis præteritis, sub Christiana sepultura carentia, ex testamento nequaquam instituere hæredes. Pauperum inquam, quos diuina & pontificiæ literæ canunt, non solum ex ecclesiasticorum (ut boni sint dispensatores) abundantia pascendos, sed & pontificibus singulariter debere esse commendatos. Qui sanctorum Patrum decretis & Euangelio fidem habent, nostris contra Aeneam replicis haud sese laesos arbitrabuntur, quibus omnes sana doctrina, veraque Christi religione pollentes confidimus astipulari. Dominus DEus clarissimam tuam Celsitudinem, ad felix ecclesiæ tuæ nobilissimæ regimen, ad sacrosancti imperii Romani incrementum, ad totius cleri gloriam, & libertatem conseruandam longauum conseruet. Ex Eremitico.

14. Cal. Junii, anno virginæ partus 15. post 1500.

RESPONSA ET REPLICÆ AD ÆNEAM STLVIVM. AD SALUTEM ET DECOREM SACROSANCTI ROMANI IMPERII, AMORE PATRIÆ GERMANICÆQUE NATIONIS.

GERMANIAM exaltatricem suam Aeneas Syluius iure laudat: Italus vero ipse nationi suæ vehementer (ut decuit) affectus, ne ad eam aurum segnius mittamus, nobis de culmine regio à Græcis in nos translato, mellitis verbis blanditur,



blanditur, quod maiores nostri suo sanguine & ope Romanis exhibita pepere-  
runt, blanditurque de domesticis nostris ecclesiasticisque opibus ac ornamen-  
tis. Etsi Germania labore partis aut frugalitate floreret opibus, an quidquam  
superuacanei poterit quotidianis vñibus superesse, si nostra templa, si DEI cul-  
tum, si nostras vrbes, si vias & Respublicas, si patriam ab hostibus, si xeno-  
dochia, si pupillos, si puerulos expositos, si viduas, si puerperas, si morbo  
Gallico siue pustulis aut lepra infectos, si ceteros valetudinarios & mendicos,  
quorum porticus templorum plenæ sunt, vti Christiana pietas exigit, seruatu-  
ri sumus? Quod Æneas religionem à suis ad nos profluxisse gloriatur, inquit,  
*Roma vobis Christum predicauit verum DEum, cuius religio barbariem omnem gene-  
ri vestro deterfit.* Fatemur ingenue Christum à clauigero, & discipulis eius ad  
nos Roma missis nobis prædicatum, at ab eodem, à quo omne datum opti-  
mum, ad fidem Roma ipsa illustrata est, quo Germania, ideoque non minus  
pro accepta religione ad gratitudinem (cuius nos Æneas vult memores esse)  
Roma Christo, quam Germania Romæ obnoxia esse videtur. Nam & Petrus  
natione Judæus, ex Palæstina veniens Romanis Christi fidem prædicauit. Ea-  
dem ergo radice, ne ingrati, acceptique à Judæis beneficii immemores esse ar-  
guantur, aurum argentumque quotannis in Syriam, si Christum profiteretur,  
esset transmittendum. At diceret Æneas, *Petrum sedem Romæ non Hierosoly-  
mis habuisse.* Cui responderi posset, eam prius Antiochiæ fuisse cathedram.

Veruntamen gratitudinem amplecti gestimus, eam vero quæ non tam  
splendore seculari & externis ceremoniis, quam imitatione morum, castimo-  
nia, humilitate, modestia, diuitiarum & deliciarum contemptu, liberalitate in  
pauperes, coelestium rerum amore, & deuota commiseratione in Christi cru-  
cem & passionem exhibetur: Atque his virtutibus ab ecclesiæ exordio, ab pri-  
mis pastoribus, aurum haud emulgentibus Germaniæ prædicatis (in quibus iux-  
p.384 ta Roterodami Moriam verus est cultus, longeque cælitibus gratissimus) ingra-  
titudinis vitium euadere confidimus. Fatemur enim nos Christo multa debe-  
re: quocirca illi templa, sacella, aras, & cultum instauramus, & maiores no-  
stri ad eius honoris augmentum sacerdotia fundarunt.

Addidit Æneas, *ante baptismi gratiam nihil immundius, nihil tetrius, nihil  
spurtius natione nostra fuisse;* tanquam soli Germani ante Christi fidem falsos  
Deos, obscœnaque vitia sectati sunt. At non de Germanis satyrici Latini ce-  
cinerunt: Nec Paulus immanissima & execrabilissima Germanorum flagitia in  
I. ad Romanos capite taxauit. Quod autem Æneas priscis Germanis maximum  
de filiis Cacodæmonilitatis crimen obiicit, id Cicero in oratione pro M. Fonteio  
Gallis tribuisse videtur. Et si Germani tum gentiles ab hac impietate dudum  
liberati sunt, beneficium hoc (Ænea teste) in Adrianum Cæsarem est referen-  
dum. Quotquot in nos magna & singularia beneficia à Romanis collata Æneas  
iactat, totidem & forte vix minora nostrates Cæsares ope Germanorum in eos  
contulerunt. Carolus magnus quid egerit pro eorum salute; quid Otthones  
victoriosissimi; quid magnificus Sigismundus, quid Fridericus III. pacificus;  
quid pia eius proles Maximilianus, qui nisi Romam coleret, Julius sede sua  
pulsus fuisset, quid reliqui multi Germani, ex tritis historiis pueri probe no-  
runt. Neque nos religionem accepisse parui pendimus, pro qua nos Æneas  
Romæ multa debere contendit: licet è diuerso nobis illa pro nobilissimæ ex-  
cellentissimæque artis impressoriæ, per nostratium, Argentini cuiuspiam & Ma-  
guntini, sagacissimam ac vigilantissimam industriam inuento nonnihil debere  
videatur. Hac enim arte omnes optimæ & fidei & morum doctrinæ, diuersis  
etiam linguis conscriptæ, in vniuersum orbem propagantur. Hac arte literæ  
summorum Pontificum quæ mandata, quæ auctoritatem, quæ summe necessa-  
ria Romanæ sedis religionisque negotia continent, vna die à duobus aut tribus,  
ad dignitatem sacrosan. sedis Apostolicæ conseruandam magis magisque multi-  
plicari ac disseminari possunt, quam à librariis ducentis tota hebdomade scri-



bendo fatigatis. Cum itaque religioni, sacrosanctæque Rom. Ecclesiæ maximum fructum atque leuamen attulerimus, cum Christianam religionem in nullo vacillantes profiteamur, cum pro eo sanguinem fundere (Ænea teste) proni & parati simus; indigne pro nostra sinceritate, qua mandata (vt par est) recipimus, condonationes suscipimus, urbem petimus, æs mittimus, Barbari vocamur. Si enim iuxta Æneam religio barbariam deterfit, & nos religionem colimus & amplectimur, immerito & iniuste foedo barbarorum titulo, vt sclauui & mancipia, à quibus aurum emulgendum sit, contaminamur. Veruntamen Æneas illustrissimam patriam nostram, vrbesque nostras, & sacras ædes munificis laudibus extulit, vt præconiis forte dulcibus illecti ad fidelissimas, suæque nationi profuturas admonitiones benignius aures nostras accommodaremus, & ad profundendam in externos rem familiarem simus beneuolentiores.

Quapropter constitutionem Basilienfis concilii (pro quo vel ipse Æneas ad Agrippinos scripserat) à sapientissimis iustissimisque patribus sacrosancti ductu flaminis conditam eneruare studuit, ne nos eidem sicut ceteræ Christianissimæ nationes, innixi, constriictis marsupiis ad expendendum aurum simus tardiores. Nempe sanctio Basilienfis Synodi ab Eugenio indictæ, stomachum Æneæ mouet, veluti ad hoc tendat, ne Germanica natio iussionibus Apostolicæ sedis obedire, & ne quid pecuniarum ad Romanam curiam deferre cogatur. At ego neminem vel Pontificum, vel Principum nostratum esse crediderim, qui prohibeat pecunias summo omnium nostrum pastori & patri debitas transferri. Pergunt nihilominus, illuc nostrates quotidie peregre, pro reseruatis gratiis & dispensationibus aurum expenditur; causæ etiam profanæ, nedum per appellationes illuc trahuntur. Condonationes, in quibus vel sedes apostolica, vel ordo scriptorum parte sua gaudet, nulla natio promptius suscipit quam Germanica. Episcoporum & Abbatum quorundam nostratum confirmationes nunquam vacuis ad nos manibus reductæ sunt. Quod ante hæc sæcula nostri præstitero maiores, quod legitimum est, quod iustum, quod tolerabile est, id à modo præstitum iri nemo nostratum refragabitur. At plus æquo à nobis emungi, Corinthiorum similes nos facit, ad quos arguendos electionis vas intonabat, *Sustinetis, si quis vos in seruitutem redigit, si quis deuorat, si quis accipit.*

Tametsi Bononia, Perusini, Ecclesiæ vicarii & reliqui populi Ecclesiæ Roman. subiecti aut nihil aut quantum velint (quod Æneas lamentabiliter meminit) conferant, ideone nos nostra immoderatus elargiri vlla lege cogemur? Quo autem Roma tot & fere innumeros ministros, diuersisque muneribus præfectos habet (vt Æneas ait) quos indies multiplicari dicunt, eane de causâ res familiaris Germanorum exhaurienda est? Operosum sane est Romam omnium causarum iure fori pertractandarum pondera solam sustinere. At sunt (præter imperatoriam iurisdictionem) in nostris quoque terris clarissimæ metropoles, iurisprudentia & integritate iudicum suffultæ, ad quas à nostris cathedralibus (quæ proximam iudicandi sedem habent) si quippiam se oppressum ratus fuerit, per appellationem refugium habere posset. Quemlibet autem nostratum vel profanum proximo suo iudice contempto, pro re leuissima, ex vindictæ quandoque liuore, & propria in persona (vt expertus sum) ad Romanum tribunal trahi, æquum esse diuus Bernhardus\* nequaquam iudicabat. In arduis tamen & grauissimis causis Romam appellandum (vbi suprema & maxima potestas, vbi summa prudentia iustitiæque viget) inficias ibit nemo. Quocirca si Cæsari, si nostris reuerendissimis Archiepiscopis, sua iudiciaria potestas inconcussa maneret, sacrosancta sedes Apostolica tanto laborum pondere ac molestia nequaquam obrueretur. Nam neque Germanis studium ac integritatem deesse, vltro Æneas illis astruit verbis: *Vidimus iudicia vestra, & consiliis vestris quæ de republ.gebantur sæpe interfuimus: omnia & prudenter & grauiter administratis. Nec facile à recto tramite deflectimini, nec vobis ciuiles leges, nec iura desunt pontificalia, literæ quoque & omnium bonarum artium studia apud vos florent.* Nec video cur nam

\* In de consider. ad Eugen.



lex Basiliensis tantopere spernenda confutandaque sit. Quippe quæ nihil (mea sententia) continet, nisi quod DEI gloriam fouet, quod ratio suadet, quod æquitas postulat, quod naturæ lex suggerit, quod canones mandant, quod religioni & honesto consentaneum est. Commemorat enim quinam Ecclesias crexerint, sacerdotia dotauerint, in eisque idoneos ministros instituerint ad propagandam fidem, ad bonos mores, & exempla virtutum, sicut & Clemens V. iustum esse conformiter decreuerat his verbis: *Cum ecclesiæ quibus præficiuntur personæ minus idoneæ, scientia, moribus, vel atate grauiâ propter hoc (vt docet experientia) perferant in spiritualibus & temporalibus detrimenta*, & reliqua. Quamobrem Clemens, vt bonus ouium Christi pastor, prudensque & fidelis sacerdotiorum dispensator, Episcopis districte iniungit, vt statuta canonica super præficiendis personis, & obseruent, & faciant à suis obseruari, si diuinam offensam, & sedis Apostolicæ debitam vitare velint vltionem. Nonne idem est nostra ætate DEus? nonne eadem sedes Apostolica, quæ fuit tempore Clementis, quorum offensa & vltio sit pertimescenda? Haud ab re igitur pia sanctio synodi Basiliensis (cui sapientissimi ac præstantissimi patres interfuere) narrat à sanctis patribus sanctos canones conditos esse, pro felici regimine status ecclesiastici; quodque quandiu canones illi obseruati fuere, in DEI ecclesia floruerit honestas, disciplina, religio, pietas, charitas, & pax, & quod ex ambitione & auaritia, quæ patrum decreta contemnit, subsecutæ sunt

Morum corruptiones atque deformationes.

Status Ecclesiastici dehonestationes.

Vsurpationes grauiissimæ.

Præsertimque hæc fieri, per prælaturarum & dignitatum, aliorumque beneficiorum Ecclesiasticorum reservationes, & per

Gratiarum ad vacatura beneficia expectatiuarum à iure valde exorbitantium multiplicationes, & per

Innumerabiles concessionēs, grauiissimaque & importabilia onera.

Quibus ecclesiæ & personæ ecclesiasticæ afflictæ, oppressæ, & quasi ad interuentionem redactæ his diebus conspiciuntur. Nam

Ecclesiarum & beneficiorum pecunias indigni exterique occupant.

Maiores dignitates, opulentioraque beneficia personis conferuntur incognitis & non probatis.

Pauci in ecclesiis resident, quia cum sint plurales, vbique residere, & præfidentias deseruire non possunt, vultusque commissi sibi gregis non agnoscunt.

Animarum cura neglecta, temporalia lucra solummodo quæruntur.

Christi cultus diminuitur.

Animarum cura negligitur.

Subtrahitur hospitalitas.

Ecclesiarum iura depereunt.

Ruunt ædificia.

Populi deuotio attenuatur.

Clerici scientiis & virtutibus effulgentes, qui in ædificationem plebis vacare possent, & qui pro animarum & ecclesiæ publicis forent consiliis opportu-

p.392 ni, diuinarum humanarumque scientiarum studia deserunt, propter promotionis ad beneficia spem eis ablatam.

Votum alienæ mortis oritur.

Lites infinitæ, contentiones & rixæ, rancores & odia inter Christi ministros suscitantur, nutriuntur atque fouentur.

Pluralitatis beneficiorum execrabilis ambitio fouetur.

Pauperes clerici cum rerum suarum discrimine per calumniosos cauillososque opprimuntur.

Beneficia per litium anfractus iniuste sæpius occupantur.

Beneficia in officiata relinquuntur.



Beneficia symoniace acquiruntur.

Juuenibus bonæ indolis euagandi licentia præbetur, qui literis & virtutibus intendere deberent.

Prælati & cæteris ordinariis collatoribus ius suum atque ministerium auferitur.

Ordo Ecclesiæ hierarchicus confunditur.

Plurima aduersus diuina atque humana iura in animarum perniciem, & ecclesiarum oppressionem & conculcationem perpetrantur.

Cum pace & venia Æneæ Syluii, discernant boni & æqui iudices, qui saltem enixe penscularunt, si non ecclesiis parochialibus, ad quas gratiæ Apostolicæ & reseruata se non extendunt, dum vacauerint, de idoneis pastoribus celerius & maturius provideatur, quam his quæ sub reseruatis aut gratiis cadunt: quippe quæ interdum propter diuersos colligantes, variasque ipsorum solertias aut vafrias ad biennium aut triennium certo & idoneo pastore caruerunt: cumque vix tandem aliquis colligantium, victor aliorum in parochia aliqua utcunque euaserit, vel in ea personaliter non residet, vel si residet non prædicat, nec cancellos ascendit, ut saltem pro summo Pontifice, & pro sacrosancta Ecclesia Romana, proque Cæsarea Maestate, aut contra Turcas, ad DEum preces à populo fieri exhortetur. Non sic vsu venit de Ecclesiis quibusdam parochialibus, ad quas contentiosi per gratias apostolicas aut reseruata non aspirant, ad quas omnes, cum vacant, e uestigio de idoneis rectoribus salubriter absque lite, absque multa pecuniarum effusione, providendas vel vniuersitates, vel Senatus, vel ecclesiarum tutores, vel deputati, vel capitula statim deliberant, & ad DEI honorem, animarumque salutem bonos ac doctos viros eisdem absque controuersia & litibus præficiunt, qui personaliter residentes, perse ipsos Euangelium prædicant populum verbo & exemplo ædificant, ac suas oues in viam salutis ut veri pastores dirigunt. De quo sanctissimi in Christo patres, summiq; cunctorum fidelium pastores & fructum spirituales conscientiarum suarum maiorem tranquillitatem & pacem animarum suarum coram Deo iustissimo iudice releuamen consequuntur, quippe qui de animabus omnium Christi fidelium exactissimam domino Deo rationem in extremo & horrendo iudicio sunt reddituri. Sicut & Julius II. in exordio Bullæ suæ contra Joannem Bentiuolum armis (utinam in Turcas conuersis) Bononia pulsum ingenue confitetur: & Platina recenset in Cælestino. Est etenim (Ænea teste) Pontificis Maximi proprium munus, Christi oues vbique existentes pascere. Pasturam autem eam esse oportet, quæ in caulas Domini, hoc est in viam salutis omnes (si possibile sit) perducere conetur. Conuenit ergo Romanum Pontificem, magnum sacerdotem, curare, ut Euangelium Christi, quod est optimum pabulum, omnibus sincere prædicetur, ut omnes errores, omnis blasphemia, omnis plantatio, quam Christus non plantauit eradicetur, ut pellantur à finibus Christianis impugnatores nostræ religionis, ut schismata remoueantur, ut bella sopiantur, ut furta, rapinæ, incendia, ut homicidia, adulteria, ebrietates, crapulæ, contentiones, simulates, odia, rixæ de medio tollantur, ut pax & iustitia osculentur, vigeatque concordia, ut honoretur DEus, & illi laudes atque hymni canantur.

Ad remouenda vero schismata, ad blasphemiam, ad bella, ad furta, & cætera quæ recensuit Æneas, flagitia dissuadenda, ipsis summis Pontificibus efficacius cooperaturi sunt non ephœbi; non malorum duces, non citationum insinuatores, sed iuris Pontificii diuinarumque literarum periti, tum in concionibus, tum in expiandis in auriculari confessione conscientiis. Bono nimirum spiritu lex Basiliensium decreuerat, tertiam præbendarum partem sacrarum literarum doctis esse conferendam. Sciebant enim optimi patres, doctos, & exemplares Theologiæ professores, ex sacris literis, sanctæ Romanæ Ecclesiæ dignitatem tueri, & plebem ad officium inflectere posse. Sicut Dominus præposi-



tus Gabriel Biel, (ab ingenioso Theologo Joanne Eckio sic vocatus in schismate Maguntino) subtiliter scribendo & constanter prædicando accuratissime fecit. Et extant hodie qui summi Pontificis maximam auctoritatem, reuerendissimorumque patrum Cardinalium gloriam ac omnem libertatem ecclesiasticam scriptis, lectione, disputationibus, piis monitis, concionibus rationabiliter defendere extollereque possent. Siquidem hac nostra ætate ad obedientiam, ad pacem, ad virtutes populus sacra doctrina, piis monitis, secretis consiliis, ac bono vitæ exemplo & concionibus facilius inducitur, quam acrimonia, pompa, minis, terroribus, armis aut censuris. Sacrosanctæ igitur Romanæ ecclesiæ, summisque pontificibus non solum in aula, in cubiculis, in penu, in coquina, in pistrino, in equorum carceribus apud Tyberim, sed etiam in Aquilone à diuinarum pontificiarumque literarum cultoribus potest fidelissime vtilissimeque inferui. Quicquid de aliis sacerdotiis à Roma (quæ Ænea teste sacrarium est veritatis, & vnicum religionis domicilium) actum fuerit, circa tamen illa, quibus animarum cura coheret, vt sunt Decanatus, & parochiæ, tempestiuissima circumspectissimaque per bonos viros moribus & doctrina probatos, quorum Germania scatet, nedum in gymnasiis, quorum non pauca post Æneam erecta sunt, prouisio & Deo gratissima, & summis pontificibus maxime decora, animabusque mortalium saluberrima esse videtur, ne sit populus Domini sicut oues absque pastore. Cum vtique honestius sanctiusque sit, ouibus Christi in Christiana vita fideliter instituendis, de bonis idoneisque pastoribus prudenter consulere, quam barbaris & indoctis, solum pastorum nomen habituris, de lana, lacte, Cerere & Bacho, auro, argento, in luxu ac otio pascendis ex carnali affectu, aut vilis obsequii contemplatione prouidere. Et inuenirentur in Germania non turpium fabularum, sed omnis nobilissimæ philosophiæ, Christianarumque literarum, ac iuris Pontificii apprime docti sine tamen pensionibus, prouinciam parochiarum studiose regendarum, si vocarentur, onus subituri, quibus ad eas alioquin, sicut neque ad canonicatus, nihil loci patere potest. Studii enim æstuantes amore, iuuentutis florem vel in penetralibus, vel in mulorum carceribus apud externos delitescendo ignauiter consumere recusarunt, siquidem eos genius suus à lucro traxit ad virtutem, à diuitiis ad disciplinam, ab otio aut turpi ministerio ad honorificas literas, quas ad ornatum animæ, ad conciliandam DEI gratiam, ad ædificationem morum, & instructionem simplicium, ad dignitatem sacros. sedis Apostolicæ tutandam, ad concionandum, ad patrocina pauperum, administrandam iustitiam, & ad Christianam religionem plantandam accommodatissimas esse cognorant. Quod si ingenio adhuc vegeto discurrerent, si labores rusticos perferrent, si scriptionibus, si gratiis, si reseruatis, si pensionibus, auro quandoque numerato redimendis, intenderent, ad munus indies ecclesiasticum, diuinis laudibus & animarum saluti, summisque pontificibus ac toti ecclesiæ profuturum steriles forsitan efficerentur. Cum autem nullum DEO gratius sacrificium sit, rememoratione Dominicæ passionis, si docti & modesti, ad sacrificandum prompti præbendas acciperent, si plura sufficientia sacerdotia in plures sacerdotes sapius quam vnus aut pauci sacrificantes, iuxta veram iustitiam distributiuam diuiderentur, tum Pontifices Maximi, Cæsereaque Maiestas plures sortirentur pro sua salute intercessores, imo & excelsus reuerendissimorum patrum Cardinalium cætus ac totius ecclesiasticæ dignitatis splendor multorum doctrina excellentium, consilio, eloquentia, & sapientia felicius in sua celsitudine conseruari posset. Hoc est (ni fallor) quod lex Concilii Basiliensis intendit, vt Euangelium Christi omnibus sincere prædicetur, vt à multis honoretur DEus, vt à DEo laudes atque hymni decantentur: hoc est quod & nos ipsi volumus, vt multi sint qui Deo seruiant, Deum laudent, singuli in singulis sufficientibus sacerdotiis Deum honorent, atque sacrificent, vt & summi Pontifices & Imperatores totaque Ecclesia de illo sacrificio (quo nullum efficacius) fructum acquirat, hostes vincat,

Gabriel Biel.



pacem & incolumitatem accipiat, gratiam hauriat, & gloriam consequatur sempiternam. Et quoniam Lex illa Basiliensis religionem à Romanis acceptam cupit propagari, diuinum cultum augeri, animarum salutem procurari, officia à sacerdotibus impleri, vltimas voluntates expleri, vitia euelli, virtutes inferi, non vsque adeo veluti sacrilega vltra Sauromatas explodenda esse videtur. Lex inquam, cuius editioni inter amplissimos constantissimosque alios patres, Iulianus S. Angeli Cardinalis, Cusanus item noster, & Ludouicus Arelatensis (quem miraculis claruisse perhibent) interfuere: quam & totum Franciæ regnum doctissimis & integerrimis refertum suscipit, amplectitur, fouet, eique innititur, ex eaque securitatem & innocentiam sua opinione desumens, primatem suum colit, seu patriarcham, quali nobilissima Germania non caret, cuius magna est auctoritas, nam & ei vel archiepiscopi obedientiam debent: *Retineat*, in-p.388 quit Gregorius, *Apostolica sedes proprium vigorem, at à te concessa aliis sua iura non minuat.* Quæ quia mater est, non nouerca, & (vt Æneas testatur) tutus portus afflictorum, & dulce refugium miserorum, sciensque ex Gregorio ad Marianum Episcopum Rauennatem, non plus pecuniæ quam animabus studendum (quoniam redemptor noster à sacerdotis officio non quærit aurum sed animas) Christianissimam & obsequentissimam Germaniam maternis tandem alis complectatur. Quæ cum (Ænea teste) hospitalis sit, humanissima sit, & quæ pauperibus, quæ pueris & liberis (feminas non fastidians) plena est, leuiorem ei tolerabilioremque sarcinam imponat. Gregorii magni exemplo, qui susceptis à Patricio Galliarum quadringentis solidis immortales gratias egit. Germaniam ergo benignissima nostra marer, & sacrosancta sedes Apostolica (apud quam summa constantia, summa veritas, summa religio) hac saltem pietate, largitionumque moderatione dignetur, vt Archiepiscopis nostris & Episcopis intra paucos annos è vita hac misera sublatis, mitius clementiusque cum successoribus agatur. Quod enim illi præstant, idipsum plerumque à miserrimis agricolis & ciuibus, cleroque, maxime rurali, corraditur & emungitur, quo persæpe patresfamilias pro liberis educendis, ipsique sacrificuli (quorum beneficia nonnunquam opulentissimis incorporata sunt) pro vita sustentanda opus haberent: ne seditio tandem vulgi sæpe de hac re murmurantis, vt his auribus (DEum testor) audiui, in ecclesiasticos suboritur, neque Bohemicum virus (quod absit) latius serpat. Haud abs re Leo II. Platina auctore, & Ludouicus Galliæ Rex inter Diuos relatus largitiones istas interdixerunt. Durum equidem est non quadringentorum, quibus Gregorius gratias agens satiabatur, sed viginti, aut eo amplius, millium aureorum nummum exactione clero & plebi nuper imposita, & ea quidem nondum dissoluta, propter nouum Archiepiscopum aliam & æqualem propediem popularibus & Christi ministris impositum iri. Potissime, cum veterem pro pallii vsu iam pridem præstitam summam, decem duntaxat millium fuisse memoriæ proditum sit, quæ quia à prædecesore reddita non est, successor suam decem, & antecessoris æqualem dissolui neglectam, tradere cogebatur. Quibus in scrinium seu registrum ad posteritatis memoriam forte consignatis, viginti millia, vsque ad nostram ætatem ab omnibus archiepiscopis exigi dicuntur. Consideret quoque pia mater nostra, propter noua officia indies, vt fama est, excrefcentia, pro confirmationibus summam augeri; telonia principum Electorum declinari, prouentusque diminui, propter bella & bellis equos multam tellurem iacere incultam; venas montium mineralium, quos Æneas, tanquam terrarum nostrarum explorator, egregie recenset, esse exinanitas: concordatisque Principum, quibus edendis Æneas adfuit, exemplo Calisti, ipso teste, pia mater non contraheniat, Stygios regressus nonnunquam falsos & fictos, quod in me ipso expertus sum, ordinariis collatoribus intolerabiles eneruet: Per amplissima reseruata, curialibus etiam molesta, non vsque adeo & tam crebro Germaniam grauet, nec innumeras ad vnum collatorem gratias in terris ecclesiæ Rom. non subiectis concedat, quod non

20000. fl.  
pro pallio.



non solum lex Basiliensis, verum etiam Æneas ipse illegitimum iudicauit. Lex enim præter damna in Proœmio recensita, alia etiam oriri incommoda narrat, ex multiplicatione gratiarum expectatiuarum. Primo, quod clerici in gratiis confisi patrimonium & parentum opes exhauriunt. Secundo, quod ii quibus aut maior proximum circumueniendi astutia, aut ad litigandum facultas superpetit vberior, beneficia sibi vendicant. Tertio quod sub inuolutionibus prærogatiuarum aut antelationum, & aliorum gratias eiusmodi concomitantium plurimæ fraudes committuntur. Æneæ autem verba hæc sunt: *Verum esse fatemur, huiusmodi gratias non esse omnino probabiles, eisque fortasse moderatius esset utendum. Nam passim concedi quibusuis hominibus, & ad unam collationem multos concurrere, haudquaquam probamus. Nec ambigimus, diuum Calistum, si paululum à molestia Turcarum requieuerit, huic rei prouide occurrurum qui & hanc gratiarum consuetudinem ab initio sui pontificatus abolere voluit.* Ecce quomodo Æneas defert huic Basiliensi constitutioni. Et ego nihil hic impium, nihil improbandum, nihil detestandum, nihil à ratione alienum video: Tamen si Ludouicus Delphinus, in sacrosanctum consilium Basiliense dirimendum, Platina teste, cum maxima patriæ parentumque meorum iactura, ab Eugenio sit laceffit. Impetrare igitur studeat natio nostra, de sede Apostolica non male merita, ne concordata Principum cassentur, ne preces regiæ in mensibus ordinariarum reiiciantur, ne ordinariis collatoribus per reseruata, aut regressus ius suum auferatur, quod neque Æneas probauit. Cuius profecto hæc verba sunt: *Sicuti indignum est ordinarios cuncta sibi retinere, pari modo detestabile censemus Apostolicam sedem vel nihil, vel parum illis dimittere.* Impetret quoque natio nostra à matre sua, quæ subditos suos (iuxta Æneam) ut filios non ut seruos habet, ne seculares suo iure patronatus priuentur, per quod cæteri à sacerdotiorum fundatione absterreantur, sicut in cathedralibus, aliisque Germanicæ ecclesiis, à Regibus, à Principibus, à magnatibus, à proceribus à ciuibus rebus publicis sacerdotia fundata sunt, quorum merito gauderent esse patroni & collatores. Impetret quoque natio nostra, ne familiares fuisse impune mentiri liceat eos, qui nunquam fuerunt; ne nostrates gratiis & priuilegiis proximorum sedis aut pontificis familiarium & alienigenarum innixi, principum (etiam electorum) filios in assequendis præbendis antecedant, cum non oriundos ex Germania Sixtus IV. ad Germaniam habere expectatiuas prohibuerit. Impetret etiam, ne sacerdotia pingua possidentibus senio vel morbo confectis, iniquissime lites moueantur, sub quarum pendentium typo versipelles nullo iure freti in præmortuorum beneficia vel iura subrogentur, per quod afflictis addatur afflictio. Ne consumptis & consummatis gratiis precibusue regiis, in maximam aliorum pauperum iacturam denuo liceat uti. Ne canonicus diues per interpositam illustrem personam, gratiam ad aliam eiusdem ecclesiæ præbendam impetret, eamque tantisper occupet, donec in suam vtilitatem conuerterat: ne quisquam duos aut tres canonicatus in diuersis vnius & eiusdem vrbis collegiis, & in cathedrali vicariam simul, omnium corpora rapiens & absorbens (propterea nullum locum pro pensione alteri, quantumuis docto & bono, cessurus) seclulis officiis, dignitatibus, parrochiis, capellaniis, pensionibus in maximum Dei contemptum, animarum benefactorum, & rerum publicarum, ciuiumque & pauperum iacturam, (ut de perniciosissimo scandalo taceam) usurpet. Impetret quoque natio nostra, ne per temerarias ac diuturnas lites tanti sumptus & impensæ excrescant, quantis vel nouum sacerdotium erigi, vel census ad vitam, quantos beneficium, pro quo certatum est, infert, emi potuissent. At ne in sacerdotiis opulentissimus quisque panem ab ore pauperum refecans, tota vita pro nouis sacerdotiis contendat, ac per fas & nefas intret: uti ex Philippo Agrippino Archiepiscopo, superiori mense (heu) vita functo (qui & ecclesiæ & sacrosancto Romano Imperio Princeps fuit vtilissimus) audiui; & pridem ex altero quodam prælato his auribus accepi, quosdam aua-

rissimos,



riffimos, qui multas pensiones, multos canonicatus, multas ecclesias, innumeras capellanas possederant, multique pauperibus lites indignas mouerant, in ius traxerant, per concussionem à beneficiis eiecerant, si hodie adhuc superstites essent, propter fraudes & astutias quibus vsi sunt, & iam demum in lucem prodeunt, flammis in cinerem, & fauillas esse exurendos. Quod si technas, mutuasque circumuentiones, quas alter de altero illius generis hominum, nouem pene lustris, vltro me præsente & audiente conquestus est, scribere vellem vel possem, vtriusque ferme instrumenti paginam æquarent. Quod grauius bellum nobilissimæ Germaniæ, sacrosanctoque Rom. Imperio indici posset, quam ab auarissimis vix vmbra fucati iuris quandoque suffultis, iniustissimas & sumptuosissimas lites concitantibus quibus pauperes nonnunquam obruunt, & patriam exhauriunt? Quippe qui domesticorum curam non habentes, ideoque infidelibus deteriores, ac ferme patriæ proditores, eam ad inopiam redigi floccipendunt, dummodo ipsi multas pingues præbendas ac dignitates, in luxu, ocio, pompa victuri assequantur: per quorum in explebilem auaritiam, & ambitiosissimam sacerdotiorum, malis etiam artibus, coaceruationem (quam etiam Æneas in nostratibus manifestissime taxat) profani sua vitia, & equites, qui è sella viuunt, suas rapinas attentuare, palliare, imo excusare nituntur. Taceo de condonationibus quarum diuersam concionibus interpretatio, plebeculam vel perplexam, vel frequentia ad mala procliuem reddere potest. Earundem vero & confessionalium non per duo aut per tria æra (vt Æneas refert) sed hebdomadali sumptu redemptorum suspensio, quam molesta, quam amara sit popularibus; persæpe pudore ac metu percussus ex eis intellexi.

Huiuscemodi maioraque Germaniæ grauamina (quæ ad sedem Apostolicam Æneas vult esse referenda) Bertoldus Hennenbergensis, Pontifex & princeps Maguntinus sapientissimus, cum sæpe ac multum animo reuoluisset, audiens cum solido gaudio Franciscum Senensem ad summa sedis Apostolicæ fastigia pro meritis nuper exaltatum, sciensque eum nobilissimæ nationi nostræ vehementer affectum, mox propria manu pleraque consignare capit, quorum ab eius sanctitudine vel remedia vel leuamina, pro diuini cultus, nostræ nationis incremento sese impetraturum confidebat. Ego itaque instituti & voluntatis tanti Archiepiscopi tantique Principis Electoris conscius, ad respondendum Æneæ vice Martini laceffitum sum. Impulit & me amor Imperii ac nationis, amor studii sacrarum literarum, quarum ii qui cum labore & patrimonii detrimento docti ecclesiæque vtilis euadunt, sacerdotia difficile consequuntur. Impulit & me commiseratio in pauperes agricultores, quos Hebræi vexant quandoque ac tyranni premunt, quorumque egestatem Apostolici legati nuper experti sunt. Affectus quoque me coegit in populum Dei (qui mandauit unicuique de proximo suo) per rectores doctos & honestos salubriter prouidendum. Impulit & me Leonis X. moderni pontificis summa sanctimonia, maxima iustitia, flagrantissimusque religionis Christianæ Zelus, quo iuxta munus proprium ab Ænea repetitum, ad fidem exaltandam sua sanctitas æstuans, desiderat non solum ephebos à ludi literarii magistris in bonis moribus, ac in his quæ ad regionem pertinent, (festis præcipue diebus) erudiri, diuturno poëtici studio prohibito, vt hoc ordine Christiana disciplina (Joanne de Gerson astipulante) feliciter reparetur: verum etiam ad diuini cultus augmentum, animarumque salutem, nonnullos ecclesiasticis redditibus in aliorum damnum aut scandalum repleri, conformiter ad constitutionem Basiliensem indignum iudicauit. Quoniam pacto prudentius aut salubrius Leo noster optimus maximus, piis in ecclesia moribus reducendis consulere potuisset, quam luxum & auaritiam, suo sanctissimo decreto, primum à statu excelsiore dignioreque præditis eliminando. Populus enim (quem verba minus quam opera mouent) exempla virtutum, in clero frugali considerans, facilius omne honestum, suo ingenio amplectetur. Sicque prisca disciplina refluere posset, & à religione Christiana, nostrisque sacris



sacris fuscipiendis infideles minus abstraherentur, & pauciores è nostris ad inferos properarent, ubi ductu Leonis in ecclesiastico, sicut in Reipublicæ corpore, ut totum saluum sit, quicquid est pestiferum, fuerit amputatum. Nec omnibus tamen Æneæ locis (quorum plerique facile repelli possent) sed paucis solum tumultuario & festinato per cæteras occupationes stylo respondimus, in nullius profecto contemptum aut iacturam; sed ut Æneæ futurus lector ex nostris responsis, veluti præmonitionibus, instar Vlyssis à dulci Sirenis cantu caueat; ne suauissimis eius laudibus, quibus Germaniam prosequitur, facilem aurem præbens, atque delinitus, res aduersas calamitatemque Christianissimæ Germaniæ, ingrauescentem negligens, salutis ac dignitatis propriæ nationis & patriæ, decorisque sacrosancti Romani Imperii amplificandi minorem habeat rationem.

*SINCERA ADDITIUNCULA AD REPLICAS,  
PRO MARTINO MAJORE, CONTRA ÆNEAM  
STYLIUM.*

QUI Æneam sedulo relegerit, suorumque verborum pondus accurate introspexerit, mea responsa grauitè non feret. Imo Æneas, si ad nos redire, ætatisque nostræ mores cernere posset, nobis indubie adstipularetur. Primum pro eximio suo in Germaniam amore, quam veluti patriam suam duxit: deinde pro zelo in Christianam religionem, pro qua vel senio grauis bellum in Turcas mouere tentarat; postremo pro sua laudabili frugalitate, qua ad cardinem orbis terrarum exaltatus, reseruatumque suum excusans, paucis se contentum esse posse Martino rescripsit: & iam dudum à sacrosancto Concilio Basilienfi (cui & Abbas Siculus, Ludouicus Pontanus, Joannes Lucas, cuiusdam patroni mei præceptor interfuerunt) in auxilium Hildeboldi senioris indigne vexati, huc orator missus, vrbe perspecta eiusque collegiis, Diui se Thomæ præposituram, maiora non desideraturus, exoptare cuidam dixit in ponte Brusæ sibi adstant. Westphalo, ex quo Joannes, & Symler Breidenbachius sese audiuisse mihi aliisque persæpe retulerunt. Accedit huc, quod cum voto meo, de in habitanda ad mortem Eremitio frustratus essem, vitam in patrio solo finiturus, statim loci ex cleri secularis paucitate pertæsus sum. Nam etsi in pueritia & adolescentia mea plures illic honesti sacerdotes in baptismali sacræque communionis templo DEum coluissent, hoc tamen tempore, quo grandæuus patriam reuiso, præter curatum, suosque mysteriorum dispensatores, vnum duntaxat sacellanum gemens offendi. Licet enim Ecclesia plures habuerit capellanas à secularibus fundatas, illæ tamen interim (qua forte nescio) ab opulentis & maiora sacerdotia tenentibus obtentæ sunt, qui dum in opimis alibi beneficiis, aut apud Tyberim pinguiora venaturi moram habuere, exiguis, quos in absentia perceperunt, prouentibus contenti, sacerdotia patriæ, quæ singula frugalem sacerdotem sustentare poterant, ad inopiam vergere neglexerunt: sicque beneficia patriæ diminuta, cultus Dei labefactatus, & parochia clero seculari destituta est. In patria (inquam) mea & quidem populosa, inque præclaro sacrosancti imperii Romani vico, apud quem Carolus Magnus natalis Dominici diem (Reginone teste) cum principibus gloriosissime quondam

Anno DCC.  
LXXV.

p.391 celebravit. Cuius calamitatis gratia ex Eremitio in patriam accersitus, cum honesto senatu, aliisque zelo Dei flagrantibus ad id nitimur, ut duæ aut tres sacellanæ ignauiter ad miseriam redactæ, in vnam alimenta residenti, & cum Ecclesiæ rectore DEum honoranti, suppeditaturam sacrosanctæ sedis Apostolicæ fauore, & auctoritate consilari & coniungi possint. Cuius rei Guilhelmus Antistes noster pientissimus, dignissimique prælati, & capitulum suum fundamenta iecerunt. Quo minus vereor me bonis ac Christianis viris bilem concitaturum, quando certo scient, me non animi morbo noua moliri, sed iusto di-



uini cultus, patriæque amore. Martini Maioris querimonias pro Germania dudum ab eo factas, cum exaggeratione confirmasse. Vt enim de Deo terribili (qui maior est omni laude) taceam; non tamen minus æquum, minusque decorum mihi visum est, Germanum suæ, quam Italum Italicæ nationi & patriæ fuisse affectum. Quod autem Æneas haud ad gloriam nostratum Episcoporum, hæc verba suo tractatui inseruit: *Quod si unum Romanus Pontifex, minus dignum presbyterio donauerit, supra mille inuenias rudes, ignaros, hebetes, & prorsus ineptos ab ordinariis esse promotos: id ad honorem & excusationem Antistitum Germaniæ nuper in Diatriba confutauit.*

## ORATIONES DUÆ,

ALTERA HABITA A LEGATIS LEONIS X.  
PP. CORAM INVICTISSIMO IMP. MAXIMILIANO, IN PRIN-  
CIPUM CONVENTU, PRO COLLIGENDIS DECIMIS  
IN EXPEDITIONEM CONTRA TURCAS,  
ANNO M. D. XLIX.

ALTERA VIRI CUIUSDAM CLARISSIMI ADHOR-  
TANTIS, NE PRINCIPES IN DECIMÆ PRÆSTATIO-  
NEM CONSENTIANT.

### ORATIO LEGATORUM.

**B**ONI adsumus nuntii, Illustrissimi principes. Leo pontifex Maximus post Apostolicam benedictionem, Romanum Christianum, idemque vestrum imperium occupatum à Turcis, restitutum vobis in vestra ac Christianæ reipublicæ virtute & opéra cupit, disponit, primum à vobis petit. Memoria siquidem cum repetimus maiorum vestrorum gloriam, animi magnitudinem, & ea quæ fortiter ac strenue gesserunt pro Republica, si Ecclesiæ præsertim religionisue causa ageretur, non possumus læti atque hilares nos ipsos continere. Cum non intra nos dicamus, non admiremur, non coniciamus, non extimemus, sed ipsis (vt aiunt) oculis conspiciamus, quanto sitis animo, quantis viribus ad Christi rempublicam ac religionem capeffendam, priscorum vestigiis insistentes accersiti. Ita vt qui annis prope septingentis Romanum imperium ereptum à Græcis, receptum à Gallis, summa fide Apostolicæ Ecclesiæ seruastis, idem quoque nunc sit non modo non diffidendum, sed quacunque orbis patet vestra quoque virtute ac fide propagandum; Italia omnis si quam spem reliquam habet, si quam victoriæ lucem videt, in Germanis videt. Germanos Christiani huius belli auctores, ac duces, eosdemque confectores sibi pollicetur. Nul- libi enim tanti Christiani nominis ac fidei patrocinium, quantum in Cæsare & Germanis principibus, esse & residere arbitratur. Nec vos degeneres futuros ab Ottonibus, Henricis, & id genus aliis, in periculo præsertim religionis & imperii, sibi persuadet. Nolite itaque pati, vt quam tantam de vobis opinionem conceperunt, irritam ac inanem fuisse postea fateantur; præsertim cum præsidere DEum optimum Maximum vestris ductibus sciamus. Cum enim causa hæc agitur, Dei causa agitur, cum in nefarium impurumque Turcam acies instruitur, pro Deo pugnatur. Cum in hoc genus mortis itur, pro Deo cadimus. Felicissimæ profecto mortis genus, quo vita comparatur, & ea æterna. An forte timendum vobis est Germani, vt hostibus cedatis, qui ipsas quoque Romanas legiones, alias inuictas, profligastis? Etsi enim, qui imminet hostis, late dominetur, ne dicam regnet, licet Syriam & Ægyptum nuper subegerit; si tamen ad mentem reuocemus, cum quis pugnam manusque conse-  
ruerit,



ruerit, nihil est quod ultra admiremur, quam si imbellis quisque deuicisset. Cum Orientalibus quippe pugnatum est: finite, finite cum Germanis congregiatur, inueniet legitimos milites, experietur inuicti roboris viros, sentiet omnipotentis Dei in vobis manum. *Prosequimini enim* (vt diuinum vsurpem oraculum) *inimicos vestros, & corruent coram vobis. Prosequentur quinque de vestris centum alienos, & centum ex vobis decem millia. An forte abbreviata est manus Domini, vt saluare nequeat? In promptu est vnde conuertatur DEus & ignoscat.* Dabunt siquidem tot millia hominum nomen in Christi militiam, signum crucis culparum omnium expiatorum, tanta multitudo suscipiet, criminaque nostra passim piis in sanctam hoc opus largitionibus redimemus, vt procul dubio factus caro & frater noster DEus, non sæuiat in suos: qui cum non nisi dominus humani generis esset, pugnavit pro externis. *Agite quod vestra interest, & venite, & arguite me, si deero vobis,* dicit DEus optimus Maximus. Bella non vsque quaque extincta, ne tam necessario diuoque operi impedimento sint, somnum interdiu capere, & Apostolicis (vt par est) mandatis obtemperando, quinquennialibus induciis tolli rogamus. Jesu Christi proprium admiramur, veneramurque opus, efficere in terra pacem bonæ voluntatis. Nobiscum bene agitur, si aliquantula fiet quies iniquo animo retento. Bello autem suscipiendo, quæ via, quisque modus habendus sit (licet quot capita, tot sensus) probata cum plurimorum sapientum ac principum consilio sententia fuit, oportere imponere sacris initiatis Decimas, plebeis quinquagesimas, cuique domui stipendium vnius militis, diuitibus annui census, ac lucri vicesimam. Nec vos terret, Decimæ, vicesimæ aut quinquagesimæ insuetum, nouumque nomen; horrenda quoque nobiscum (hæc affirmauerimus) si nuda occurrerent. Verum cum quinquagesimas, vicesimas, decimasque non soluere, sed deponere, idque tutissime, vt ea lege debeant, vt nisi definito tempore in expeditionis istius opus conferantur, illis qui deposuerint restituantur, pium, sanctum, optabileque cuilibet fore Christiano censebitis. Quocirca trepidare timore, vbi non est timor, desinant, ferentes expeditionem hanc fucatam esse, auri sacram subtegere famem. *Nos* (inquam) *Turca sumus, quibus expellendis incumbitur, in nos expeditio tota sæuiet.* Vacate & videte, quæso, quam superuacaneus est metus, ac timor iste, percipite quam pie, quam sancte, & cum sacris initiatis, & populis vniuersis agatur. Nolumus nos thesaurarii, aut exactoris officio fungi. Non eo tendimus, vt in nostram potestatem æra redigantur. Veteres reuoluite historias, inquirete si vllò vnquam tempore sanctæ Romanæ Ecclesiæ Cardinales de latere legati, interdictis etiam à iure facultatibus ad Pontifices, eorumque rem pertinentibus, vt in præsentia cernitis, prodierunt? & animaduertite omni exceptione laudeque dignam maiorem Leonis P. M. pietatem, atque liberalitatem, ex propriis tot per regna legatis opportuna conferentem. Non quærit profecto vestra, qui sua pro vobis sponte magnificeque largitur. Sed quid Pontificii animi argumentis immoramur, re ipsa comprobare operæ prætium est. Inuenite vos ipsi, inueniant metuentes ipsi modum quempiam, quo quicquid auri argentiue collatum fuerit, tutum adeo sit, vt nec in exactorum custodumue stipendia aliquid cedat, sed integra vniuersa, aut ad expeditionis huius vsum cedant, aut ad eos qui dederant, redeant. Non quærimus Germanum ærarium in Italiam transferre, at in Germanorum militum stipendia erogare cuncta summus pontifex vult, atque præcipit, nullum dolo fraudine locum relinqui, quia & vos clara luce videtis, quod Christiana se Respublica, religio, regnum, templa, vrbes, oppida, in vestra se propugnacula contulerunt, vestram opem implorant, vestris genibus aduoluuntur. Si illos destituitis, vos ipsos Germani destituitis, quando omnes in Maximiliani aquilas respiciamus, nec aliunde quam à Romano imperio auxilium expetamus, quando res vestra non minus quam aliarum regionum agatur. Contermina si quidem Turcis Germania præ aliis est. Italia enim, quamuis Turcarum classi



magis sit peruia, prius tamen quam in Italiam Turcarum copiæ terrestri inuadant exercitu (in quo constat vim omnem belli victoriæque sitam esse) Germaniam oppetere oportet, nisi Carinthiam, Styriam, Croatiam & Vngariam Germaniæ moenia esse inficiati fuerimus. Clementissimus Leo pontifex, dici non potest quantis vigiliis in rem hanc incumbat. Non dies, neque noctes ab hac cogitatione auelli potest; non si comedat, aut bibat, aliud pectore agitat. Non sua iam, sed seipsum, sanguinem & vitam pro Christiana religione & imperio gestit exponere. Superest, ut Cæsareus hic senatus expeditionem in Turcas indicat, efficiendamque suscipiat. Expectat Romana ecclesia, vniuersæ Christianæ reipublicæ capita & membra, in serenissimum hunc conuentum suspiciunt. Si definitur nunc nihil, si in alium conuentum differtur, confundemur omnes in expectatione nostra. Cauete ne dilatio hosti componendi cum Persis, finitimisque aliis tempus præbeat, Germanos principes linguarum moribus exponat, Christianisque populis desperationem inducat. Animaduertite grauissime istum conuentum fundamen esse, super quo tanta moles expeditionis erigenda est. Contantibus quippe vobis, Christiani principes reliqui retrahent proculdubio animum, & manum ab hac expeditione; *si Germania* (aiunt) *cuius primum interest, quia Romani Imperii dignitate gloriaque illustratur, cui Ecclesiæ defensio est tradita, verba dat, deque conuentu in conuentum definitionem transfert, quid nobis agendum sit discimus facile ab exemplo.* Sicque vestra Christianæ reipublicæ mora (quod absit: ruinam pariet. Causabuntur multi absentum libertatem, *Jureiurando* (aiunt) *nostris tenemur Ecclesiis, nihil contra earum commodum illis inconsultis agere, non est nobis delegata potestas absentes colligendi. Ibiimus illos consultum atque hortatum, referemus deinde altero in conuentu.* Verba (cum bona istorum venia dixerim) sunt hæc non multum dissidentia ab inficiis. Impossibilia à nobis petit nemo, fidem violari horremus, quam & hosti seruandam esse didicimus. Quod vestra interest, & quod in vestra situm est potestate, poscimus decerni, scilicet nunc expeditionem in Turcas, definire modum comparandi nummos nullius cum iniuria. Jureiurando demum spontaneo præsentem astringi, *daturus se bona fide operam, ut heic definita executioni demandentur.* Non sunt hæc contra iusiurandi cultum. Non excedunt hæc vestræ limites potestatis, non obsunt hæc absentum libertati. Tollite itaque moras, semper nocuit differre paratis? Anno parata sunt omnia ad expeditionem indicendam, quando vniuersa oblata sunt? Quid amplius enim à Romana Ecclesia exigitur? Quid ultra ab externis petitur, quando se, & sua omnia dedunt? Felix initium serenissimi Caroli Regis, feliciore nos auspicio trahat. Turcarum imperium ille adhuc adolescentulus nuperrime in Africa extinxit, pellite vos Europa. Nec longe adsunt Maxima quæque præmia. Etenim cupidine gloriæ ardet animus, numquam honestior, numquam facilius ad summam gloriam via vobis patuit. Capeissentibus quippe Germanis expeditionem in Turcas, si quæ à nobis dicta sunt, fient, suprema vos belli auctores & duces gloria manet. Sin vero (quod Deus nolit) irrita esse contingat, parta iam vobis in dicta expeditione gloria, integro apud eos splendore fulgebit, nullo accepto incommodo. Si regnum appetitur, de propagando vestro imperio agitur, si terrarum orbis non sufficit, paratum vobis à constitutione mundi cœleste regnum adest. Si in ius causa deducitur, astricti estis pro Christi nomine ac fide bellum inire, quandoquidem prior ipse Rex Regum aereis proprio sanguine ac cruce potestates debellauit, ut nos de perennī captiuitate in libertatem filiorum Dei referret. In manu igitur vestra populorum libertas atque salus cum posita sit, exaudite benignissimi Principes, nos Apostolico nomine pro vniuersa ecclesia supplicantes. Miseremini simul tam vastæ multitudinis, absque Baptismi gratia in æternæ mortis interitum præcipitis. Si quod vni ex minimis sit factum, sibi factum censet Christus Dominus, quanti facturum putatis illum, quod innumeris suis Ecclesiis tam ingens beneficium collatum fuerit. Vobiscum igitur  
quia



quia partiri curas, & rerum molem summus Christi ouium pastor desiderat, ab vtrisque par est, vt oues protegantur, & lupi arceantur, ab illo cruce, à vobis gladio, quo sub vtraque protectione quietam & tranquillam vitam transigamus. DIXI.

### DISSUASORIA.

SI vnquam Germaniæ principibus prudentia, consilio, concordiaque pro defendendo honore & omnium vtilitate opus fuit, Alemanni proceres excellentissimi, in primis indigere mihi viderentur hoc tempore, quo in prædam Romanæ auaritiæ deputantur, ac dedecorofam seruitutem, ita blande propositam, vt illâ homines priusquam intra viscera penetrauerit, sese captos non sentiant; Est enim modus fallendi adeo vaser, vt his captis versutiis (quid enim non excogitat auaritia?) existiment acuti homines fraudem à nemine posse deprehendi, præsertim à vobis Germanis ducibus, quos cibo semper refertos, & vino madidos arbitrantur, & publice declamant; Et ob id ad decipiendum liberius aggrediuntur. Præbuerunt præterita tempora fallacibus hominibus constantiam in spe præsentis. Quando enim non est assensum illorum malis artibus? Cum saltem adfuerit, qui vel mediocriter didicit fraudi fucum adpingere. Constat profecto, nullam partem Christiani orbis ab huiusmodi prodigiorum genere non esse callide tentatam, multos Reges & Principes fraudulentè deceptos. Sed singula secum reputanti occurret, nullam gentem sapius illusam habitamque ludibrio, ac nostram. Non ô inclyta Germania, ad libros relego, vt gesta hominum cognoscas legendo, satis ampla, quæ memoria huius ætatis tenet. Quo magis vereor, ne incititia temporis præteriti successum præbeat malo incumbenti. De quo breuem tibi Germania sermonem subiiciam; quanquam nil noui à me audies, quod per inclytos tuos principes non melius noris.

Quadriennium habitum Romæ consilium, primum de republica Christiana: quanquam legitime Jurisperiti & Theologi disputent: nondum erat finis, tamen de colligendis Decimis omnium assensu decretum est. Volutus erat lapis ad locum suum. Placuit ergo, reiecto reliquo negotio, tanquam parum utili, inuocato sancto Spiritu, concilium dimittere. Gratia agenda Deo, per quem operationes nostræ incipiuntur, & cœpta recte finiuntur. Porro impium est, quod Concilio placuit, id putare displicere Deo, quo hæc aguntur auctore. De pace agitur inter Reges, qua firmata, visum omnium suffragiis Asiatico hosti coniunctis viribus bellum inferre. Euomuntur è vestigio quatuor legati (nisi ob quintum collegium & ob computum errauerim) ad nationes Christianas, vt Reges & principes ad expeditionem instigent, ipsi vero pecuniam mulgeant. Quibus forte dicebatur: *Ite in orbem vniuersum, prædicate dicentes: Qui crediderit, & Decimas soluerit, saluus erit.* Quorum nuper, cum Bononiæ essemus, tres ingredi vidimus tanta pompa atque apparatu, vt sapientes ad eorum errorem allicerent. *Dilatate inclyti Germani imperium Christianum. Frangite vires hostis impurissimi. In hoc omnibus neruis incumbite, quo nomen Christi extendatur.* Res pia & sancta est, vt à nemine potest deprehendi, nisi quis malit Turcæ, quam Christo seruire. Verum sub hoc prætextu per hanc fictam pietatem, sub hoc umbrato nomine explorare imperitiorum populum, sugere lac gentium, inebriari mammona Regum, dico scelus multo esse probabilius, quam quæ à Turca inferuntur. Non quod tanti faciam pecunia priuari: (quam sceleratus citius quam probus habere potest:) sed quod nullo pacto ferre debemus, quantum in nobis est, quod Angelus Sathanæ transfiguret se in Angelum lucis, & poculo pietatis propinet impietatis venenum; vt populus se rem sacram facere Deo existimet, auaritiæ sacrificet, quæ mater est falsæ religionis. Falli, errare, labi, decipi, vbique turpe est, per religionem vero turpissimum: quam vnâ nobis contra noxios mores contulit diuina bonitas. Hæc absolu-



tam artem pietatis nobis proponit. Primum, Deum amare omnibus viribus, proximum deinde ut nos ipsos. At quando illum amabimus, cum videmus eius sacrosancta præcepta manifeste pollui. Nec tamen occurrendo, sed potius conniundo opem ferimus impietati. An ille proximum sincere amat, qui in incommodo illius remouendo nihil est occupatus? Nolo amicum nihil sollicitum de salute mea. Inimicus mihi habeatur, qui à me non propulset iniuriam, si potest: & tamen illa non legimus, non audimus, sed quotidie fieri videmus, nullo hominum prælucente, sed vel patientes ad omnem ignominiam, quasi non potius contumelia sit Deo, quam obsequium, stulta patientia. Vtinam tam facile possint ista euitari, quam reprehendi. Et principes nostri nollent perpetuo conniungere; sed tandem aliquam partem, si non totum, peruersæ consuetudinis præcidere. Quanto æquabilius res tam prophana quam sacra se haberent. Ego enim sic existimo, imperia his artibus melius retineri, quibus acquiruntur. At imperium Christianum non armis, non gladio comparatum est; sed pietate & optimis exemplis viuendi. Quæ postquam passim abierunt, omnia bona retro lapsa sunt. Multa imperia perdidimus, quoniam artes, per quas parta erant, non retinuimus. Amissa est pietas, retinuimus nomen. Salutamur in vita Sanctissimi, & post mortem nemo nos dignatur nomine sanctitatis. Ab hac parte paulatim cœpit proserpere virus exitiale. Deinde cæteri proceres sequuti sunt non segniter. Ergo mirum non est, quod à nobis alienatur cœlestis fauor, & nos non cognoscit amplius, atque prædæ relinquit improbo hosti. Pontifices vero Romani postquam cœperunt prophana cum sacris coniungere, imo relictis sacris solum prophana admirari, quam bene consultum fuerit reipublicæ Christianæ, quam bene placuerit superis ipsorum institutum, euentus comprobauit. Amissis externis, interna infinitis seditionibus conturbantur; Diuina despiciuntur, venditur Christus, lana ouium tondetur, de custodia studium nullum. Omitto hic Hispaniam, Gallias, Orientem cum occidente, quantum pro palliis, similibusque figmentis, ætate duorum Principum Friderici & Maximiliani, vna effudit Germania? Si Roma, ut institutum est, in fiscum collegisset, vel Germania (veluti par erat) in vnum contulisset, haberemus iam nervos Reipublicæ abunde sufficientes bello Asiatico: Nec opus foret orbem iam fatigare Christianum, & nouis onerare (ne dicam exenterare) eius quotidie pauperes tributis, & ex eo errore pauperes facere.

*Pallia Roma  
empta.*

Prouenit Pontifici ex sua terra vestigal, quantum nulli Regum Christianorum: & tamen Pallia emimus, & tamen asinos auro onustos Romam mittimus, patibula Christi erigimus, munera promittimus, aurum pro plumbo mutamus, negligentias (hæc lapso calamo) indulgentias passim admittimus. O auaritiam immensam carentem fundo, canum impurissimorum nescientium saturitatem, ut est apud prophetam Daniele: Certe emere pallia sanctum duco, modo id prodest aut pietati, aut valeat ad conseruandam communem vtilitatem. Sed cum vtrumque horum tot seculorum experientia refutet, & Pallia tantum extiterint simulata instrumenta perdidissimæ auaritiæ, surgat iam aliquis, aut iustam causam dandi proferat in medium, qui timeat pontificis fulmen. Probus Episcopus aliquis, concordiam fratrum, puraque conscientia electus, non faciet puto, sed concupiscens multis mediis aureorum emere Romanum centonem. Non probat Paulus Apostolus, qui nos deferant, qui in faciem cadunt, qui nos in seruitutem redigunt. Quandoquidem non Christianam charitatem, sed meram tyrannidem illi præ se ferunt, foris facto furore in pellibus ouium, intus lupos rapaces agunt. Mihi iustus dolor est, ob nefariam auaritiam totum mundum sub vmbra religionis pollutum. Quem enim locum, quantumuis obscurum illa contagione non contaminatum ostendas? Quæ respublica non multa amisit? Qui princeps ius auctum seruat integrum? Quæ sacerdotum collegia non sunt contaminata? Quis pessimos mores (nomen apud nostros maiores abhorrendum) induxit in Germaniam? & quæ honeste nominari non possunt, docuit?



cuit? Qui foedarunt hominum societates? Qui norunt egregie fallere, decipere, peierare, testamenta supponere, diuina & humana prophanare, miscere lites, quietos perturbare, denique cœlum cum terra confundere? Nonne Romana, Italicaque proluuie ista sentina sese in orbem terrarum effudit? Adeo ut ne saltus & syluæ, ubi lustra ferarum tantum esse dixeris, hoc malo careant. Episcopos merito sacrosanctos esse dicimus, sed prodeant, quibus est illæsa sua auctoritas. Et hunc veluti bonum valde, & rarum merito suscipiemus. Non sunt longe petenda exempla. Sermoni meo concordant res vestræ. Sed quid ego ista commemoro, quæ declamationis exempla superant? Ad institutum sermonem redeo. Turcam profligare vultis. Laudo propositum: sed vehementer vereor, ne erretis in nomine. In Italia quærite, non in Asia. Contra Asiaticum quisque nostrorum Regum, pro finibus suis defendendis, per se satis est. Ad alterum vero domandum, totus orbis Christianus non sufficit. Ille cum finitimis quoque tumultuans, nobis nondum nocuit. Hic ubique grassatur, & sanguinem miserorum sitit. Hunc Cerberum nullo modo sedare potestis, nisi aureo fluuio. Nihil armis, nihil exercitu opus est. Plus valebunt Decimæ, quam equitum turmæ, & militum copiæ. Duplex mihi videtur via proposita, dum rem diligentius considero. Vnam quæ iubente superstitione, aurum petit: Altera renuentibus Pontificis fulmen minatur. Vtram vultis ingredi mini. Sed ô stultam & superstitiosam opinionem credentium, cœleste numen, omnia æquis oculis intuens, ad nutum Florentinorum flecti & reflecti: irasci non danti, & rursus largienti placari. Non est Christi vicarii fulmen contemnendum, sed non semper ad illius iactum pertimescendum, præsertim cum res agitur pro humanis affectibus. Christi indignationem vereor, Florentinorum non vereor. Jam vero Florentiæ negotium agitur, non Christi. Superiori æstate sumptu non debili bellum gestum est contra Franciscum ducem Vrbinatem, quo regno eiecto, sed prius placato aureâ gratia, Laurentius Medices in locum successit. Ibi non satis prouidus fuit Julius II. Quod non plus auri reliquit. Ergo inuenta fuit quædam fraus noua, quicunque plura dare potuerint Cardinalium, hi inuenti sunt conspirasse in necem Pontificis. Horum bona fisco scribebantur. Subsequuta est discordia Fratrum cordigerorum: quæ quantum lucri attulerit rabulis Florentinis, rem pro voluntate in omnes partes flectentibus, quid attinet narrare, cum fidem superet largitio mendicorum. Non libet narrare erectas cruces Saluatoris per cuncta oppida, ad mensuram dantis propitias. Prætereo scenam de æde Petri, & risus, & indignationis plenam. *Templum Domini, templum domini, templum domini* clamat Propheta, sed non est templum Domini. Laurentius ædificat, non Petrus. Lapides noctu migrant. Nihil sic fingo, electissimi principes Romani imperii. Orbis quid sollicitatur pro æde Petri, in qua duo tantum opifices operantur, & alter claudus, nisi quod nuper in frequentia peregrinorum concitabatur tumultus artificum, currebatur, clamabatur, videbantur stulti, & picti Angeli excipientes munera largientium, ferentesque in sublime. Ridere poteratis mecum commoti ob præstigias aucupii. Sic risit olim venerabilis pater Cyprianus præ indignatione, viso Christo pedibus & auribus asininis depicto. Deslere libet fortunam seculi corruptissimi, ob supremam negligentiam Episcoporum atque Principum, permittentium populum suum ita nequiter decipi. Omnes illas artes inuenit fraus Florentina, & propediem nefandiores excogitabit. Animaduertite modo. Quisque modo dies nouam pariet curam. Tuetur, ne corpus Pontificis crassum immaturâ morte perturbet consilia. Fugato duce Vrbinatæ, similem fortunam minatur Principi Ferrariensi. Quo pariter eiecto, regnum constituemus, & Regem Thusciæ salutabimus Laurentium Medicem ciuem Florentinum. Sed quia nostra fortuna mutabilis est, & citius potest mori Leo decimus, quam ista optatum finem consequantur: & fieri potest, ut Leonis successor discedere cogat Laurentium ex alienis regnis: Ideo contra

aduersum



aduersum aduentum ducenda est vxor Laurentio in Gallia cuiusdam potentis Ducis filia, emendusque ibi principatus, parandum aduersus fortuitos casus praesidium, sicut decet sapientem virum duobus regnis profugum. Facta emprio, signata tabulæ, dati fideiussores. Satis diu Medices fuimus; Principum, p. 396 Regumque fortuna ambienda est. Habetis iam breuiter caput Decimarum, & insidias Turcæ, duce superstitione in viscera vestra latrocinatis. Quamobrem resistite nefando conatui. Nolite assentiendo contaminari impietate: quod rectum est, quod ratio suadet sequimini. Si natum est lumen vultus tui Domine super nos, illud errare nolentes non finit. Mementote vos esse Germanos, hoc est populum ante alios naturâ liberiores, sicut hostes vestri de vobis scripserunt. Nolite alicubi esse vectigales, ante omnes vero Florentinis. Proferant se in iudicium nostri Episcopi, indignum seruitutis iugum à ceruicibus suis abiicientes. Sed verentur omnes, mussitant quidem, quod dicere non didicerunt, alii metu fulminis, non nulli spe noui honoris. Vnus omnium mihi venerabilis Laurentius \* sese erigit, qui sæpenumero grauem imbrem consilio & prudentia sua à repub. Franconica amouit. Atque ideo coronâ aureâ merito laureandus: Augustiore vero, si hanc quoque tempestatem remouerit. Ad quem honorem studium omne conuertat alacriter diuino monitu. Nos, qui ab eo sacerdotum collegio decorati sumus, audentius deprecari volumus, Oremus pro pontifice nostro. Dominus conseruet eum, & viuificet eum, & beatum faciat eum in terra, & non tradat eum in manus inimicorum eius. In manus inimicorum traditur, quando audire contemnit eum qui dicit: *Ego Dominus amans iudicium, & odio habens rapinam*, qui sit in secula seculorum benedictus. Amen.

\* Laur. de  
Bibra. Episc.  
Herbipol.

**FINIS ORATIONIS VD ALRICI**  
(UT FERTUR) HUTTENI.



JACO.



396

**JACOBI MANLII**  
**HISTORIA**

COLLATÆ CARDINALITIÆ DIGNI-  
TATIS IN ALBERTUM MO-  
GUNTINUM.



IACOBI MANLI

HISTORIA

COLLATAE CARDINALITIS DIGNI-  
TATIS IN ALBERTUM MO-  
GUNTINUM.





LECTORI SALVTEM!

BURCARD GOTTHELF  
STRUVE.



Inter seculi XVI. Scriptores diuersi reperiuntur, qui Manlii nomen ferunt, ex quo haut exigua oritur eorundem confusio. Reperitur enim Maximiliani I. temporibus Jacobus Manlius, siue Manilius, Brigantinus Doctor, \* qui nomen sibi peperit Chronico Episcopatus Constantiensis, quod Brigantiae anno 1519. absoluit die XIX. Augusti, primus in lucem protulit Jo. Pistorius. \*\* Sub finem seculi XVI. viuebat Jacobus Menlius, qui iussu Maximiliani II. vt ipse in procemio statim testatur, \*\*\* conscripsit de Diui Maximiliani II. Rom. Imp. Maioribus vita pie defunctis libellum. \*\*\*\* Vtrosque confundit Jo. Ludouicus Schönleben \*\*\*\*\* & cum nostro Jacobo eosdem fuisse putat. Ast, licet non plane denegare ausim, priorem Manlium, Constantiensis Chronici Scriptorem eundem esse cum hoc nostro, cum eodem tempore vixisse videantur: idem tamen de posteriori Menlio minime erit dicendum, qui vel integro seculo post priorem illum vixit. Erat iste JACOBUS MANLIUS Friburgensis ex Brisgouia, Juris Doctor, Maximiliani I. Imp. Consiliarius & Historicus, qui iussu Maximiliani I. perlustrata omni Germania, perquisitisque litterarum documentis, ipsi decem libros exhibuit, magnâ voluptate ab ipsis exceptos. Hic Princeps sententiae, quæ Habsburgicos a Francis ducit, quem deinde plures fuerunt secuti. \*\*\*\*\* Videtur hoc scriptum esse, de quo Lambecius: \*\*\*\*\* *volumen chartaceum in folio oblongo, quo continetur Jacobi Menlii, \*\*\*\*\* seu, vt*  
Tom. II. U u u u 2 alias

\* De hoc Vossius de Histor. lat. lib. III. p. 651.

\*\* Inter Scriptores Rer. German. Veteres VI. p. 615.

\*\*\* Sic enim scribit: cum mihi Doctori Jacobo Menlio hoc negotii dedisset potentissimus Rom. Imp. Maximilianus II. semper Augustus, vt lustratis vniuersis monasteriis & collegiis, euolutis omnibus annalibus inspectis cunctis sepulchris & Epitaphiis, aliisque variis monumentis obseruatis, colligerem. &c.

\*\*\*\* Prodiit Georgii Bartheuteri sumptibus, Augusta 1593. 4. liber perquam rarus.

\*\*\*\*\* De Domus Habsburg. Orig. Proleg. P. I. c. IX. p. 96.

\*\*\*\*\* Hæc nos docet Fuggerus Speculo Honoris lib. I. c. II. n. 1.

\*\*\*\*\* Comment. de Bibl. Cesar. lib. II. c. VIII.

\*\*\*\*\* Hic Lambecius in margine: in fine eiusdem Voluminis subscripsit ipse nomen suum hoc modo, Jacob Menzel D.



alias apellatur, *Manlii*, *Chronologia Imperatorum Romanorum Germanica*, propria ipsius manu exarata, & Imp. Carolo V. tunc temporis adhuc Archiduci tantum *Austriæ* peculiari quadam *Præfatione* An. 1513. dedicata, cuius titulus *Kayserart*. De eodem Opere ita iudicat *Frisius*: \* *Jacobus Manlius scripsit vitas Imperatorum & Pontificum*, in quibus hæc septem indicat: *Annum quo imperium acceperint*, *Progeniem & nomen*, *Morum proprietatem*, *Tempus quamdiu regnarint*, *Ætatem quamdiu vixerint*, *Genus mortis*, *rerum gestarum magnitudinem*. De eodem in vita *Maximiliani* loqui videtur *Cuspinianus*, \*\* dicens: noctu autem, quia graui insomnia laborabat, audiuit *Jacobum Manlium* res suas & maiorum suorum gestas prælegentem quibus oblectabatur: erat enim & *historiarum studiosissimus*. Et cum familiam suam præclaram *Austriæ*, diu in tenebris obsitam ac iacentem, in lucem reduxisset, afficiebatur plurimum, si in pulchram redacta seriem scripta ei prælegebantur. Singularis autem est, hæc, quæ nunc exhibetur, *Historia*. Dum in *Comitiis Augustanis* Cal. Augusti 1518. *Leo X. Papa* per legatum suum, *Thomam Caietanum Albertum Moguntinum Archiepiscopum* ex *Brandenburgica* stirpe *Cardinalis dignitate* ornaret, & *Maximiliano* gladium pileumque consecratum mitteret, cuius cæremonias hic prolixius describit. De quo etiam *Fuggerus* \*\*\* & *Stengelius* \*\*\*\* testantur.

\* Bibliotheca, voce *Jacobus Manlius*.

\*\* Pag. 491.

\*\*\* *Spec. Honorum* lib. VI. c. XIX. p. 1359.

\*\*\*\* *Rer. August. P. II. c. LXIV. in iisdem Comitiis Albertus Brandenburgicus Moguntinus Archiepiscopus*, *Augusti Cardinalis inauguratus est cæremoniis & sacris in ea re consuetis*.





P.397 JACOBI MANLII FRIBURGEN-  
SIS, CÆSAREI HISTORIOGRAPHI  
ET CONSILIARII HISTORIOLA DUORUM  
ACTUUM AN. M. D. XVIII. AUGUSTÆ HABITORUM. I. IN-  
VESTITURÆ CARDINALITIÆ DIGNITATIS ALBERTO  
BRANDEBURGICO ARCHIEP. MOGUNT. COLLATÆ. II.  
GLADII ET PILEI PER PONTIFICIS LEGATUM  
MAXIMILIANO IMP. DONATI.

Ad Reuerendissimum in Christo Patrem, & Illu-  
strem Principem, Fabricium de Carreto, ex Marchioni-  
bus Finalis, Sacrosancti Militaris ordinis beatissimi Joannis Baptistæ, magnum  
magistrum Rhodi, &c. Jacobi Manlii Friburgensis Brisgaudii doctoris,  
diui Maximiliani Cæsaris Augusti Historiographi  
& Consiliarii, &c.

## EPISTOLA.

**Q**UEMADMODUM fortissimi olim fratres Machabei, veri Dei cultores  
contra turpissimos idololatrias diuinique cultus contemptores acerrime pu-  
gnare solebant: ita nunc strenuissimi fratres militaris ordinis sancti  
Joannis Baptiste præcursoris Domini veræ fidei defensores contra spurcis-  
simos Catholicæ Ecclesiæ hostes pugnare solent. Quo fit ut terra marique non altior  
fortuna eis arridere possit, quam cum duos gladios, quorum Saluator in Euangelio  
meminit, sibi in auxilium venire senserint. Quapropter Reuerendissime in Christo pa-  
ter & princeps dignissime, in omnipotentis Dei conseruatorisque nostri, ac omnium  
celitum laudem & honorem, ac denique nobilissima & bellicosissima Germanica natio-  
nis decus, atque perpetuam rei memoriam, tueque R. P. & optimorum fratrum tuo-  
rum gaudium atque incrementum, hoc de præclarissimo atque in Germania rarissimo  
munere, quo sanctissimus Leo decimus Pontifex Maximus Diuum Cæsarem Maximi-  
lianum Romanorum Regem & Christiani nominis Imperatorem Augustum, nec non  
Albertum miseratione diuina sacrosanctæ Romanæ Ecclesiæ tituli S. Crisogoni presbyte-  
rum Cardinalem, Sanctæ Moguntinæ sedis, & Magdeburgensis Ecclesiæ Archiepisco-  
pum, sacrique Romani Imperii per Germaniam Archicancellarium, Principem Ele-  
ctorem & primatem, Ecclesiæ Halberstatensis administratorem, Marchionem Brande-  
burgensem, Stettens. Pomeraniæ, Casuborum & Schlaunorum Ducem, Burggra-  
uium Nurembergens. ac Rugiæ Principem, ad Christianæ Reipublicæ  
augmentum decorauit, familiari stylo historiam  
conscribere placuit.



**P**ATEAT igitur R. P. tuæ, vt felicissima post festum Pentecostes Dominica nona, quæ anni millesimi quingentesimi decimi octauo primus dies Mensis Augusti erat, Apostolica commissioni satis faciendi causa. Reuerendissimus in Christo pater & dominus, dominus Thomas tituli S. Sixti presbyter Cardinalis, sanctissimi Leonis decimi Pontificis Maximi Legatus à latere, vir quidem omni virtutum genere cumulatus, circa sextam eiusdem diei horam ante meridiem, in ciuitate Augustensi Palatium vna cum familia pedes exiens, & reuerendissimus in Christo pater & dominus Matthæus S. Angeli sacrosanctæ Romanæ ecclesiæ Diaconus Cardinalis, Gurcens. Princeps, Coadiutor Salisburgens. ac Apostolicæ sedis in Germania Legatus de latere, collega suus, Reuerendissimi in Christo patris & principis Alberti, noui Cardinalis, &c. ædes pedestres petierunt: quo per dictum principem comperto, mox illis ad fores vsque obuiam venit, eosdem dulcissime suscipiendo: & deinde omnes tres vna simul earundem ædium sacellum intrauerunt, ibique supranominati Reuerendissimi D. Legati à dicto Cardinali summi Pontificis nomine iuramentum, quale singulis ad Cardineum apicem transcendentibus præstari solet, receperunt. Quo facto eiusdem noui Cardinalis cancellarius, vir quidem multa laude dignus, palam voce alta sanctissimi domini nostri breue ad prælibatum Cardinalem missum legit, cuius tenor de verbo ad verbum est, vt sequitur.

## LEO PAPA X.

**D**ILECTE fili noster: salutem & apostolicam benedictionem, fraternitatem tuam, p. 398  
quæ ex illustri Brandenburgensi prosapia & in Germania vetustissima magnique ponderis familia ortum ducit, quæque clarissimorum progenitorum suorum sancta vestigia secuta de nobis sanctæque Apostolicæ sedis bene mereri semper studuit, ad summum Cardinalatus honorem, quo nullus maior à Christi vicario concedi potest, & ipsam per se digna, & à charissimo in Christo filio nostro Maximiliano E. Imp. nobis per literas ipsius: & nuncios sæpe ac vehementer commendata promouere statuentes: id vt acta temporis atque rerum oportunitate faceremus. Ex quo nostro desiderio & tuæ fraternitatis dignitati atque decori magis consultum videretur: ea nunc nobis visa est huius temporis non solum commoda & honesta, sed etiam laudabilis occasio, in qua de expeditione sanctissima contra salutifera crucis hostes agendum est: & fraternitas tua tanto honore ornata magis de nobis Christianæque religione propaganda benemereri possit. Itaque hac nostra nunc de te promotio non solum grata, sed etiam periucunda tibi longe magis esse debet: quod circumspectionis tuæ fide, religione & deuotione erga nos & dictam sedem exigentibusque tuis meritis & præclaris virtutibus te solum non in magno numero Cardinalem creauimus. Nos quoque in bonorum omnium operum satore, & te spem locauimus: quod si ante hac de nobis sancta Apostolica sede & republica Christiana bene mereri studuisti, iam iam eo maiore alacritate animo tuo officio atque nostris pijs desideriis satisfacere poteris, quo hoc sacratissima dignissimo munere ornatus eris. Te igitur ad omnipotentis Dei & totius curiæ celestis laudem & gloriam, personæque tuæ ornamentum, clarissimæque Marchionum Brandenburgens. prosapiæ perpetuum decus & amplitudinem, hac die 24. Martii in consistorio nostro secreto de aliorum venerabilium fratrum nostrorum S. R. E. Cardinalium consilio pariter & assensu in Cardinalem creauimus. Superest, vt tu qui ex Moguntinensi Elector imperii, & Magdeburgensi ecclesiæ Germania primas, in Ecclesia & agro domini magnus & diues eras atque es, nunc Cardinalatus onere atque honore decoratus, quid dignitas ea sibi velit, quid Deus ipse abs te postulet, intelligas: & sedulo mediteris, quid te deceat: atque etiam dilectum filium nostrum Thomam tituli S. Sixti presbyterum Cardinalem legatum nostrum de sanctissima & pernecessaria contra perfidissimos fidei nostræ hostes & Christianorum sanguinem deletionemque sitientes



tes pertractaturum & nostro nomine curaturum, eiusque pias & optimas persuasiones & sana consilia, quæ nostra sunt, audias: eaquoque executioni debite mandes: ut quæ pulchrior totius orbis Europæ pars iam parua conspicitur, non solum diebus nostris ab impiorum manibus seruetur, sed illorum imperium seuque potestas vel ad sanctam fidem conuertatur, vel eruat. Qui vero nos & sancta piaque vota nostra sequentur, rectam viam ingressi, promissa felicitatis æternæ præmia consequentur. Datum Romæ apud Sanctum Petrum, sub annulo piscatoris, die 8. Maij, M. D. XVIII. Pontificatus nostri anno sexto.

Lecto breui, reuerendissimi domini Legati vna cum venerabili domino Felice Turphino Ceremoniarum magistro, viro quidem moribus ac literis ornatissimo, ipsi nouo Cardinali cardineum rubri coloris habitum, quem vulgo cappam vocant, imposuerunt. Insuper vnanimiter facellum ædesque egredientes, & medio nouo Cardinali R. tituli S. Sixti à dextris, & C. S. Angeli legati à sinistris, ad inclitissimæ beatissimæque Mariæ virginis Cathedralē ecclesiā Augustæ ibant. His quoque sic ingressis, cum dextera Cæsari dicata esset, ipsi sinistram chori partem occupauerunt: vbi nouus Cardinalis primam, legatus vero tituli S. Sixti secundam, & S. Angeli Legatus tertiam occupauerunt sedes.

Cum itaque præfati C. P. Cæsaris aduentum prope esse perciperent, tunc C. ti. S. Sixti locum suum relinquens maius eiusdem chori altare accessit. Vbi mox missæ celebrandæ gratia se (vt fieri solet) accinxit. Et inter accingendum Sacratissimus Cæsar, & nonnulli principes tam Electores quam alii, ingenti comitatu dictæ ecclesiæ chorum petierunt. Cui sane Cæsari summa quadam dexterritate, S. Angeli Legatus, & nouus Cardinalis obuios se dederunt. Cæsar vero heros omni maior laude, postquam gloriosissimis gestibus ac moribus Moguntino principi tanquam nouo sponso congratulatus est, cum hilari fronte ad latuam accipiens vnaque chorum ingressi Cæsar dextrum illic supremum (vt debuit) aureis ornamentis locum fulgentem occupauit. Secundum vero Cardinalis Moguntinus. Tertium autem illustrissimus princeps Ludouicus comes Palatinus Rheni, dux Bauariæ princeps elector. Quartum illustrissimus princeps Fridericus Dux Saxonie, &c. princeps elector. Quintum illustris princeps Casimirus Marchio Brandenburgensis. Sextum illustris princeps Fridericus frater Casimiri. Septimum illustris princeps Joannes Albertus alter frater. Octauum illustris princeps Joannes Comes prouinciales de Leuchtemberg. Nonum denique illustris Lotharingæ Ducis Antonii oratores.

In alio vero latere ex opposito primus extitit Reuerendissimus S. Angeli Cardinalis Legatus de latere. Secundus vero Marinus Caracciolus sanctissimi domini nostri Papæ protonotarius, ad Serenissimum Cæsarem Nuncius, tertius R. in Christo pater illustrisque princeps Christophorus Archiepiscopus Bremensis & collegii Verdensis Administrator confirmatus, Dux de Braunschwig & Lüneburgk. Quartus R. in Christo pater & princeps Georgius Episcopus Bambergensis. Quintus R. in Christo pater & princeps Gabriel Episcopus Aichstetensis. Sextus R. in Christo pater princeps Christophorus episcopus Augustensis. Septimus R. in Christo pater illustrisque princeps Joannes administrator Ratisponensis Comes Palatinus Rheni, Dux Bauariæ. Octauus R. in Christo pater & illustris princeps Arnestus Administrator ecclesiæ Patauiensis Comes Palatinus Rheni vtriusque Bauariæ dux. Nonus R. in Christo pater princepsque Henricus episcopus Ratzenburgensis. Decimus & vltimus R. in Christo pater & princeps, Petrus Bononus Episcopus Tergestinus, Cæsareæ Maiestatis Consiliarius. His itaque principibus eo quo ostendimus ordine locatis, sedato populo, impositoque silentio, R. tituli sancti Sixti Legatus rem diuinam exorsus est. Domesticus vero eius sacrificulus ad altaris latus, vbi Euangelium legi solet, crucem: & à tergo Aulicus quidam ex illustrissima Vrsinorum familia ensē & Galerum seu galeam tenentes steterunt. In latere vero vbi epistola legitur, Magister domus ex legati fratre nepos, qui pro nouo Cardinali rubeum pileum erecta



erecta tenuit manu. Deinde perfecta re diuina, cum verum sit quod idem nouus Cardinalis ab Apostolica sede XXIV. die mensi Martii proxime præterito Romæ in Cardinalium numerum receptus fuerit, Tituli sancti Sixti Legatus eundem, habito prius ad sacratissimum inuictissimumque Cæsarem & electores imperii aliosque Principes sermone, ad Altare vocauit. Cuius sermonis tenor talis est:

*Serenissime Cæsar Leo X. pontifex Maximus Maiestate tua intercedente præclarum proindeque in terris rarum opus nunc efficit, sunt sæpe cardines orbis egregio aliquo splendore fulgentes. Verum hominem inuenisse unum omni ex parte probatum non facile. Asciuit siquidem in sacrosancta Romana Ecclesiæ presbyterum Cardinalem Albertum Moguntina ecclesiæ præfulem, primatemque Germaniæ gentis, fortune, corporis, animique bonis non mediocribus ornatum. Is namque illustrissimus genere, corpore vegeto atque pulchro, ætate florida, ingenio, mentis acumine, sacris literis, diuitiis, dignitate, potestate, auctoritateque præstans. Continentiæ quoque religionis ecclesiasticæ & reformationis radius sit splendet, ut luceat lux sua coram omnibus hominibus. Accedit ad hæc quod dum Imperatoris summique Pontificis unus atque idem elector excellit, & vos pontificii, & vos Cæsarei electoris gloria illustramur, commune itaque ornamentum, decus, atque beneficium communis latitia comitetur. Surge igitur illustrissime princeps, & obseruandissime domine, & Cardineæ dignitatis insigne tuis debitum virtutibus susceptum veni.*

Eo itaque veniente, & humiliter flexis genibus coram altari constituto, idem legatus, quid nam dignitas ea sibi velit, quid DEus ab eo postulet, ac etiam quid eum contra truculentissimos fidei nostræ hostes Christianum sanguinem perniciemque sitientes, ac ipsius summi Pontificis nomine pro virili parte curare deceat, declarauit. Et cum ipse ad singula proposita se tanquam obedientiæ filium promptum atque paratum exhibuerit, Legatus caput eius pileo rubro decorauit: quo peracto nouus Cardinalis nouo apice insignitus, in Faldisterio ante altare, genu flexus perstitit, donec canticum diui Augustini & Ambrosii per cantores Cæs. maiestatis (qui & totam missam solenniter cecinerunt) solenni ritu cum organis decantaretur; Deinde perlectis certis collectis & orationibus per Legatum sedis Apostolicæ, nouus Cardinalis surrexit: & cum maxima tam corporis quam mentis præstantia de altari ante diui Maximiliani Cæsaris aliorumque principum conspectum venit, ubi de multiplici eadem die exhibito honore per doctissimum virum Laurentium Zcochen vtriusque iuris Doctorem dicti noui Cardinalis cancellarium, viua altaque voce gratias persoluit hoc modo:

*Maxime deceret, sacratissime Cæsar, Reuerendissimi in Christo patres ac domini S. R. E. de latere legati, illustrissimique principes, hominem summa eruditione ac non mediocri facundia præditum in hoc splendidissimo ac pene diuino vestro conspectu verba facere. In quo esset ea dicendi vis, ea loquendi copia, quæ Maiestatì vestræ, rei magnitudini, & loci huius dignitati conuenire posset. Ego autem cum nihil harum rerum in me agnoscam, iure vereretur ne aut vicio mihi dari possit, aut temeritatis incusarer: si vel mea sponte, vel meo ipsius consilio hanc prouinciā suscepissem. Verum cum Reuerendissimi in Christo patris, Illustrissimi principis & domini, domini Alberti sanctæ Maguntinens. sedis & Magdeburgensis ecclesiæ Archiepiscopi, principis Electoris, primatis, & nunc sanctæ Rom. Ecclesiæ denunciati presbyteri Cardinalis auctoritas & voluntas me ad id coegerit, ut in præsentiarum gratias agere debeam; p. 400  
etsi hoc meam imbecillitatem longe superat, quod & eruditissimi Demosthenis & eloquentissimi Ciceronis oratio consequi possit, tamen in sacræ Maiestatis & Reuerendissimarum Do. vestrarum clementia confisus non temerario ausu, sed magis obediendæ voluntate: breui oratione ea perstringam, quæ Reuerendissimi domini principis mei  
erga*



erga sacratissimam Maiestatem, dominationesque vestras Reuerendissimas grati animi testimonia argumentumque perhibeant: Prius autem quam id quod mihi in mandatis est peragam, unum quod iamiam in mentem subiicit, paucis exponam. Reuerendissimum dominum & principem meum amplissima hunc Cardineæ dignitatis apicem minime ambiuisse, quoniam dominatio sua Reuerendissima non clam habuit, maximum & laborem & animi sollicitudinem sibi adeptam dignitatem exposulare, exactamque pro tam locupleti tradito talento dandam sibi esse rationem: non ignorans Cardinales ipsos in sanctorum Apostolorum vicem succedere, eademque ab ipsis requiri quæ illi virtute multa præstiterunt, cum autem sua amplitudo S. D. nostri liberalissimum & pietissimum in se animum perspexerit, in ea dignitate sibi deleganda, pro qua sacra Cæsarea maiestas plus studii, quam dominus ille meus reuerendissimus animi, pro peculiari qua illum amplectitur clementia adiecit: voluit sua reuerendissima paternitas hanc sibi oblatam dignitatem, simulatque omnem curam & sollicitudinem illi coniunctam modeste agnoscere ac amplecti, & tam officiosis amantibusque votis obtemperare. Igitur pro hoc immortalis beneficio in primis Deo uni & trino, poplite flexo, non quas debet, sed quas potest maximas agit gratias suæque nunquam satis laudatæ matri virgini, ac toti cœlitum cohorti: eius summi Dei clementissimam maiestatem deuotissime implorans, quo his diuinis muneribus atque suscepti officii dignitati ad sanctæ Catholica fidei suæ profectum satisfaciatur, atque ac par est respondeat, propitius sibi adesse velit: tum Beatitudini sanctissimi domini nostri & sacra Cæsarea Maiestati vestrae immortales dicit & habet gratias, quod D. suam reuerendissimam hoc amplissimo munere ornare dignatæ sunt. Quicquid enim sua reuerendissima D. vel honoris vel dignitatis ex hoc consequuta est, id totum Sanctitati & Maiestati vestris, vobis reuerendissimis dominis de latere legatis, ac sacrosancto senatui tribuit, quod D. suam reuerendissimam in splendidissimum ordinem suum asciri, alboque suo præclarissimo conscribi annuerint: offerens se omneque studium suum & beatitudini Pontificis, & sacra Cæsarea vestra Maiestati, vestrisque dominationibus reuerendissimis ex animo proptensum, precaturque ut Deus Opt. Max. & beatitudinem Pontificis, & sacram vestram Cæsaream Maiestatem, vos atque amplissimos reuerendissimos dominos legatos, pro sacrosanctæ Ecclesiæ suæ beneficio & amplificatione dierum longitudine & omni bono replere, atque post exutam carnem immortalis corona pro ingentibus meritis & gloriofis actibus coronare dignetur.

Qua gratiarum actione finita Cæsareæ maiestatis nomine per Reuerendissimum principem Petrum Bonomum ita responsum fuit.

Non erant, reuerendissime in Christo pater ac princeps illustrissime, sacratissime Cæsareæ Maiestati à reuerendissima P. V. agenda gratiæ, quod ea apud sanctam Apostolicam sedem huic susceptæ suæ dignitati partes suas adhibuerit, quodque se licet inuitam & detrectantem ad Cardinalatus apicem suo studio, sua industria & auctoritate prouehi curauerit. Licet enim vestra reuerendissima P. sua singulari modestia eum honorem effugere, ac tanti cardinis ornamenta euitare constituisset. Arbitratus est tamen Cæsar, non parum officii sui interesse non id tantum perpendere quod erat modestiæ vestrae reuerendissimæ P. proprium, quam quod erat imperialis ac Cæsarei culminis peculiare, & non quod ipsa modeste renuebat. Sed quod religio, quod sanctimonia, quod frugalitas, quod ceteræ dotes & virtutes eius exposcere videbantur, id totis viribus prosequi ac procurare niteretur. Quidquid igitur à sanctissimo domino Leone X. Pontifice maximo, quidquid à sacro Cardinalium collegio in reuerendissimam P. V. collatum est, id non studio, non auctoritati sacratissimæ Cæsareæ Maiestatis, sed virtutibus & meritis eius est concessum. Ea igitur sibi concessa merito dignitate in ænum felix ac sospes perfruatur, non tantum pro suo honore: sed pro vniuersæ Christiane reipublicæ commodo: & in æternam laudem ac gloriam totius Germanicæ nationis: sibi hoc de Cæsare persuaheat, quod si etiam nullis progenitorum suorum ac



*illustrissima sua prosapia meritis inuitatus esset, à quibus se maximis commodis & honoribus exornatum proficitur, poterat tamen solius vestre reuerendissima P. intuitu ad multo maiora permoueri. Cui etiam in posterum pro honore & dignitate sua conseruanda adaugendaque omnem opem, industriam, & auctoritatem perpetuo pollicetur.*

Postea dominus legatus quasdam literas Apostolicas manibus suis in publicum protulit & Casari Augusto honorificentissime tradidit: quæ tunc clara voce per eximium iurisperitum Jacobum Spiegel Casareæ Maiestatis secretarium & consiliarium lectæ fuerunt, quarum tenor ita se habet.

CHARISSIMO IN CHRISTO FILIO NOSTRO p. 401  
MAXIMILIANO, IN ROMANORUM IMPERATOREM  
ELECTO, SEMPER AUGUSTO.

LEO PAPA X.

*Charissime in Christo fili noster, salutem & apostolicam benedictionem. Venienti ad Maiestatem tuam dilecto filio nostro Tho. tituli S. Sixti sanctæ Romanæ ecclesiæ presbytero Cardinali nostro & sedis Apostolicæ de latere legato, ob eas causas quas ad vniuersam salutem Christianæ reipub. pertinentes, per alias nostras literas, & eo ipso Cardinali interprete tibi significauimus, non putauimus alienum, enssem & pileum præclaro & solenni anniuersario natali domini nostri Jesu Christi nocte nostris manibus consecratos idem legato tradere tibi consignandos: quanquam non sumus ignari, maiestatem tuam hoc excellenti munere à Romanis pontificibus sæpenumero iam honestatam fuisse: sed cum argumentum huiusce doni misterium contineat ecclesiasticæ potestatis, cuius tutela ac defensio tibi præcipue incumbit, ut qui sanctæ Ecclesiæ aduocatus existis: volumus nos quoque in hoc nunc munere nostrum excitare: & virtutis tuæ iudicium & egregie in fidem Christi voluntatis testimonium: quum præsertim nullo vnquam tempore iustius quam hoc, quo Christiana resp. impiis conatibus crudelissimorum hostium in discrimen vocata tuam pietatem, sapientiam, tuam auctoritatem animique magnitudinem maxime requirit, huiusmodi sacrosancta arma maiestatibus tuæ data fuerint ac donata. Ac semper quidem te pro amplitudine auctoritatis tuæ accinctum gladio esse decuit super femur tuum: ut esses promptus ac paratus tum coercere improbos, tum bonis præsidio esse, ut esset in tua præstantissima dignitate, & tutela aquitati, & iniuriæ pœna constituta. Sed nunc non tam eo accinctum esse quam eum distringi iam & vibrari oportet potentia tuæ dextera. Quæ enim non modo causa verum etiam occasio maior esse potest, quam ea qua nos non in mediocres aut de longinquo metus sed in maximum & præsens periculum vocamur, non modo dignitatis nostræ, sed etiam salutis amittenda: nisi concordibus animis principum tuoque imprimis Christiana resp. fuerit fulta præsidio. Hac vero nos vehementius Maiestatem tuam aut ad hoc præclarissimum opus suscipiende in fidem tuam publicæ salutis hortati fuimus, aut illi tantam gloriam tantumue nomen optauimus, quam ipsa non nobis solum sed cuncto orbi Christiano suam operam, fidem, auxilium & literis & nunciis iam dudum pollicita est. Quibus quidem tuis promissionibus quam in spem & expectationem ab omnibus ventum sit, quanta alacritas animorum in omnium fidelium cordibus fuerit conciliata, libenter scriberemus, nisi Maiestatem tuam nihil latere fideremus. Quare cum res ita se habeat, cape arma manu princeps fortissime: & sacri gladii quem tibi mittimus, aciem aduersus Dei hostes atque tuos exercere appara dux belli sanctissimi, defensor gentium verum DEUM colentium, vltor Barbararum: quibus enim titulis honoratior, aut quo genere curæ atque laboris illustrior esse potes, quam si Augustam istam dignitatem qua polles, ac singularem virtutem, qua præditus es, in his rebus collocaueris, quæ maximi & Catholici Imperatoris pietatem postulant, & præstantissimi ducis virtutem. Nos quidem, quod offi-*



cui nostri & amoris erga Maiestatem tuam fuerit nullum locum tempusue pratermitteremus testificandæ atque illustrandæ tum pietatis & magnanimitatis tuæ, tum nostræ in te summæ perpetuæ beneuolentiæ; Erit autem tuæ illius nobis notæ, omnibus laudatæ sapientiæ, animaduersa occasione & opportunitate temporum periculoque (quod nisi obuiam eatur, omnibus imminet) dare operam & efficere, ut tua eximia virtus ac dignitas tibi gloriosa, orbi terrarum salutaris fuisse videatur. Datum Romæ, apud S. Petrum sub annulo piscatoris, die 5. Maij est 18. pontificatus nostri anno sexto.

Quibus literis perlectis Cæsar exhortatione legati ad altare domini transiit: ibique sacrosancta arma ensen videlicet & galerum seu galeam, quæ ecclesiasticæ potestatis ministerium continent, velut fidelissimus Catholicæ fidei Dux, tutor, & protector accepit. Legatus vero ad dictum Cæsarem orationem habuit talem:

Petrum Apostolum, serenissime Cæsar, constat gladios habuisse duos: alterum omni ex parte suum, alterum ita suum ut à te educendus sit. Idem nunc in successore suo Leone 10. pontifice maximo illius in Terris vicario: cui data est omnis potestas in cælo & in terra. Ensem istum euangelicæ veritatis defensorem nuncupatum, qui & Apostolica potestatis super gentes & regna sacrum est mysterium, & diuinæ nihilominus in Iesu Christo nato, quamuis secundum carnem paruulo quiescentis, omnipotentia est Sacramentum, Maieitati tuæ offert: utpote de Romano & de apostolico trono, deque sedente in illo optime merita: adhuc fortitudinis, magnanimitatis, pietatis, religionis, iustitiæ, sapientiæque splendoribus effulgenti. Et iure quidem maieitati tuæ ensis iste debetur: tuus enim est: tuum esse ritus ille satis comprobatur, quo tu Cæsar inter sacra pontificia anniuersario die natalis dominici si te contingat interesse, eductum hunc de theca gladium, galeaque hac adopertus, dum euangelium Joannis cantatur, euangelicæ veritatis assertor & tutor vibras. Solus namque Ecclesiæ defensoris aduocatiq; nomen accepisti. Tuum esse atque fore nostra hæc tempestas exposcit: quando Christianorum omnium oculi in te sperant domine, ut aperiās manum tuam ad ensen hunc capiendum stringendumque inque Christi hostes educendum. Sume Cæsar inuictæ Spiritus Sancti galeam, in columba gemmea: ut recondita animi mentisque sedes absque dolo & fraude tranquilla & fecunda à spiritu Sancto in columbæ specie donante ac protegente seruetur. Non enim Christianissimum Imperatorem gentilium tyrannorum decet ferinos imitari mores: verum ita se iustum, fortem magnanimumque victorem exhibere ut columbina mansuetudine mitis, serenus semperque Augustus perseueret. Accipe & gladium hunc tuum quo mystice non solum iustitia & iudicium, preparatio sedis tuæ tribuuntur: sed euangelicæ veritatis professores vniuersi sub tua protectione locantur. Firmetur itaque manus tua, & exaltet dextera tua contra Turcarum rabiem atque feritatem: faustum autem felixque sit quod hodiernus his sacris obtigerit dies communis primo Ro. pontifici primoque Augusto. Petro siquidem Apostolorum principi dies hic dicatus est: \* sed & Octauius deuietis hodie Cleopatra & Anthonio orbis terrarum monarchia potitus est, auctaque vehementer republica Augusti nomen accepit, sextilique mensi dedit. Felicissimo igitur hodierno hoc ense post Constantinopolim Hierosolimamque partem Ro. Imperium Apostolicamque ecclesiam ad fines usque orbis terrarum propagare Maieitati tuæ semper Auguste largiatur Iesus Christus dominus noster.

\* Cl. Augusti enim hoc factum qui dies S. Petri Vincula.

Postquam quidem orationem sacrorumque armorum susceptionem, Cæsaris iussu Episcopus Tergestinus gratias egit hoc modo.

Sacratissimus Imperator, Reuerendissime in Christo pater, munus hoc nomine sanctissimi domini nostri Leonis decimi pontificis maximi à paternitate vestra reuerendissima sibi oblatum gratissimo animo suscepit: offertque se pro sanctæ Apostolicæ sedis



*gloria proque vniuersa Christiana reipublica necessitate non modo opes & facultates suas, sed vitam ipsam & sanguinem uti ab ineunte atate semper concupiuit: quandoque se occasio obtulerit expositurum. Cuius quidem rei magnitudo, & si viridem magis iuuentam, & fortius corporis robur quam in eo nunc sit exposcere videatur, spiritus Sancti galea ac fidei clypeo frameaque protectus, ubi vires deficient, consilio tamen ac imperterrito animo Christo auspice & ductore huic sancto proposito, ac necessaria in hostes fidei expeditioni nunquam defuturus est.*

Peraetis demum pulcherrime rebus omnibus Legatus ad altare stans populo benedixit, & deinde sacerdotalibus vestibus exutus sese Cardineis vestiuit ornamentis: & tandem simul cum Caesare ac aliis principibus Cardinalibusque ecclesiam exiuit. Caesar autem cum ambobus legatis ac etiam nuncio Apostolico, principibus electoribus aliisque imperii proceribus, nouum Cardinalem ad palatium vsque suum reduxit. Deinde vero vtrumque Legatum versus eorum hospitia comitatus est.

Et postremo Caesar atque alii principes ad sua quisque tecta redierunt. Ita nobilissimus splendidissimus actus huiusmodi absolutus est: approbante DEO optimo maximo cui sit honor & gloria in secula. Actum in vrbe Augusta. Anno Christiano millesimo quingentesimo decimo octauo. Calend. Augusti.





**JO. FABRI,  
GEORGII SAUROMANI  
ET  
VDALRICI ZASII.  
ORATIONES.**

**IN MORTEM MAXIMILIANI I.  
IMPERAT.**





LECTORI SALVTEM!

BURCARD GOTTHELF STRUVE.



Ostquam Maximilianus I. pr. Idus Januarii 1519. Welsii, Austriae oppido esset defunctus, \* positus dehinc in lectum, ut iusserat, ab universa plebe urbis Welsii est cum dolore conspectus: nonnullis ululatum emittentibus praedolore. Inclusus deinceps feretro, primum in templum de more delatus, parentatum est ei. Dehinc per villas ac oppida Viennam allatus XXIV. eiusdem mensis in Diui Stephani templo, astante universa Austriae nobilitate, & Viennensi antistite Georgio sacra celebrante, exequiae peractae sunt cum maxima omnium astantium tristitia. Post triduum in Novam civitatem delatus, sub ara Diui Georgii sepultus, a Philippo Gundelio professore humanitatis Viennensi, elegantissima oratione funebri ac artificiosissima decoratus est, prout Cuspinianus \*\* testatur. Prior igitur parentatio, Welsii, dum ipsi exequiae fierent a Jo. Fabro habita, hic exhibetur. Erat hic natione Suevus, ex oppido Algoiae Leutkirch, \*\*\* factus inde Doctor Theologiae, Augustae Prior apud Dominicanos, & a Confessionibus virginibus Monialibus D. Catharinae, \*\*\*\* quare etiam Augustanus saepius fuit dictus. Post mortem Maximiliani Ferdinando Regi factus a Confessionibus, atque an. 1531. Episcopus Viennensis. \*\*\*\*\* Mortuus tandem 1541. Vinobonae, ibidemque in Templo Cathedrali S. Stephani fuit sepultus. \*\*\*\*\* Hae autem

\* Confirmant hunc mortis diem ipse Faber, haut procul a fine dicens: *mortuus est infra tertiam & quartam horas die XII. mensis Januarii, Anno salutis M D XIX. Posteaquam vixisset annos LIX. mens. IX. dies vero XIX. Regnassetque annos XXXIII.* Ipsi etiam Epitaphium, Oeniponti a Ferdinando I. erectum apud Lambecium lib. II. c. VIII. pag. 697. Sequuntur Gerh. a Roo. lib. XII. exeunte & Cuspinianus in vita pag. 492. Male igitur Fugger. lib. VI. c. XX. n. 3. diem XI. Januarii ponit.

\*\* c. l.

\*\*\* Crusius Ann. Suv. lib. XI. P. III. pag. 618.

\*\*\*\* Crusius Ann. Suv. lib. X. P. III. c. V. pag. 555.

\*\*\*\*\* Crusius lib. XI. P. III. pag. 618. Latzius Chron. Vienn. lib. II. c. IV.

\*\*\*\*\* De hoc Lambecius Comment. de Bibl. Caesar. lib. I. p. 33. hoc tantum nunc addo, illius (Wolfgangi Latzii) etate egregio auctam fuisse incremento Bibliothecam Caesarem translatis in eam plerisque tam manuscriptis, quam impressis voluminibus insignis Bibliotheca illustrissimi ac Reuerendissimi Domini Joannis Fabri Episcopi Vindobonensis, qui die 21. Maij, An. 1541. vita, inter acerrimas velitationes pro Catholica Ecclesia transacta, beatissimum finem imposuit. Candidus profecto ille Vir fuit & religiosus; cuius rei si alia non extarent argumenta, sola



autem Oratio tota est in virtutibus Maximiliani, quem potissimum laudat a pietate, & quod vnitatem ecclesiæ conseruare studuerit, dicens: *omnes adhibuit vires, omnem denique diligentiam apposuit, quatenus Julius II. Pont. summus in sua sede conseruaretur, nullaue in Dei Ecclesia fieret scissura.*

Commendat dein eundem, quod Præcepta Dei seruauerit, diuinis frequens interfuerit, templa & monasteria fundauerit. Sequitur inde Temperantia & modestia, quod bella, non nisi inuitus intulerit, liberalis fuerit, odio habuerit latrones & hypocritas, benignus in bonos, maxime eruditos, quorum multos recenset, qui a Maximiliano ad dignitates fuerint euecti. Commendat inde artem ipsius & peritiam militarem. Progreditur ad mortem ipsius atque tradit, quod mortem semper habuerit ante oculos, Sarcophagum apud se conseruauerit, mortem suam ipse prædixerit, quam etiam postquam conuentum Prouincialium celebrasset, in Austriæ oppido Wels constanti animo pertulit. Hinc locum sepulturæ exprimit\* in Noua Ciuitate Austriæ, in Capella a Friderico III. sumptuosissime extructa. Concludit tandem cum laude Caroli & Ferdinandi, qui Maximiliani nepotes.

Succedit GEORGII SAUROMANI *Oratio*, diuersaque in Maximilianum defunctum Epicedia. De quibus sic loquitur Pontus Heuterus: *Varia ac docta Cesari Maximiliano Epitaphia ac Elogia a viris litteratis fuerunt scripta, quod eius tempore politiores literæ disciplinæque omnes e cælo detractæ, & ab inferis excitatæ, Europam exornant: nullaue non erant paulo elegantiora ingenia, quæ non ad eloquentiam sub liberalibus Mæcenatibus se exercerent.* Georgius Sauromanus Gesnero\*\* Eques dicitur Germanus, de quo sic loquitur Iouius:\*\*\* *hic in Italia, quum iuris ciuilibus studio operam dedisset, eamque facultatem sine forensi agitatione parum nobilem, nec fructuosam esse fateretur, ad humaniores literas ingenium traduxit, adeo feliciter, ut duabus orationibus in laudem Caroli Cesaris publicatis, totius Academiæ iudicio, Longolio plenior atque tersior censeretur. Ob id ciuitate Romana donatus est, egitque tenerum sodalem apud Academicos, exuta quidem omni vocis, moris, atque habitus asperitate per aliquot annos, dum minuta Cesaris negotia procuraret, Leoni, Hadrianoque, & demum Clementi eloquentiæ nomine non ingratus. Sed in tumultu captæ urbis ab Hispanis, omnibus fortunis exutus, ne in tormentis expiraret, a Germanis ita seruatus est, & non multo post grassante pestilentia, cum filio, concubinaque perierit.* Plenius vero hoc ipsius fatum exponit Jo. Pierius Valerianus\*

*sola sufficeret Inscriptio Codicibus Bibliothecæ Casaræ passim inserta, qua solemniter testatur, se illos emisse, non ex ea pecunia, quæ prouenisset ex redditibus & censibus Episcopatus, sed ex ea, quam honestissimis laboribus suis aliunde accepisset. Idem Lambecius addit. XIV. ad lib. II. p. 1011. tale ipsius adducit Epitaphium.*

#### D. M. S.

Joan. Faber e Leutkirch Sueuiæ opp. oriundus, diui Ferdinandi Cæsaris, Rom. Hung. Boem. que Regis a consiliis & sacris confessionibus, Grauiissimus hæreseon, persecutor inclytus Euangelii Christi præco, Episcopus Viennensis qui posteaquam toto decennio ex hoc loco bonus pastor salutari verbi DEI pabulo suum gregem refecit, obdormiit in Domino annum agens LXIII. a nato seruatore M D XLI. XII. Cal. Junii.

\* *Rer. Aust. lib. VII. c. XVIII.*

\*\* *In Bibliotheca, voce Georgius Sauromanus.*

\*\*\* *Elog. Doct. Vir. num. C XVIII.*



rianus \* scribens: *Miserabilis est Georgii Sauromani exitus, qui vir natione Germanus ita litterarum Latinarum nitore ingenium expoliuerat, ut in Academia nostra viri bene elegantis nomen assecutus fuerit, cuius rei scripta eius non pauca, quæ in hominum manibus habentur testimonium exhibent. Is quoque in Germanos suos Romæ prædatores illapsus, atrociter exceptus, exspoliatusque bonis omnibus, cum nullum haberet, qui eius inopiæ subueniret, contactus insuper pestilentia est, ut, eo impeditus incommodo, non potuerit sese ex eo incendio alio profugiens liberare. Mendicabundus itaque, & morbo confectus, uno tectus linteo, eoque lacero indumento, dum panem ostiatim frustra flagitat in via media vi pestis, & famis impotentia exanimatus concidisse repertus est. Fuisse autem illum antea Gymnasiarcham Bononiensem, præfatio huic Orationi præmissa, testatur. Hæc ipsa Oratio, Gesnero teste, \*\* cum Panegyricis aliquot veterum impressa Basileæ apud Jo. Frobenium an. 1520. Ista vero virtutem potissimum Maximiliani militarem commendat, eiusdemque bella & victorias recenset. Tandem cum Epilogo ad Carolum & Ferdinandum directo concludit.*

Subsequuntur quædam in Imp. scripta *Epicedia*, cum potissimum Jacobi Spigeli congeſta, qui Sletſtadiensis patria, a Jo. Fabro inter eos relatus, qui a Maximiliano dignitatibus fuerint ornati. Factus siquidem ipsius Consiliarius, prout ipse infra in scholiis, se in aulicum munus adscitum fuisse scribit. Apud Argentoratenses vixit, magnæ præcipue auctoritatis. \*\*\* Primum est PETRI ÆGYDII, qui Antwerpiensi Reipublicæ a libellis, \*\*\*\* Threnodia, quam dum Antwerpiae iuxta Maximiliano persoluerentur, scripsit, quæ alias cum Epitaphiis aliquot & Epigrammatibus prodiit *Antwerpiae 1519. 4.* Subiiciuntur scholia quædam Spiegeliana, & Ægidii quædam Epitaphia Maximiliano sacrata. Hæc excipit JO. GEYLERI DE KEYSERSBERG, qui Argentoratensi Ecclesiæ a sacriserat Concionibus, ad Jacobum Wimphelingium, Sletſtadiensem Theologum, qua ipsi narrat, quod ad Cæsarem vocatus, benigne ab eodem fuerit exceptus. Succedit WIMPHELINGII *epistola ad Jacobum Spiegelium*, qua Cæsaris mortem luget & prudentes atque eloquentes Cæsareæ aulae ministros recenset. *Oratio Germaniæ*, quæ subnexa est, conqueritur de Francisco I. ad Imperium adspirante, qui tamen moribus plurimum diffideat, Germanisque semper fuerit contrarius. Succedit *Dialogus Cæsaris, & Cardinalis Gurcensis*, aliusque cum Poëtis & Jo. Piniciani Epitaphium Maximiliani.

His de nouo adiecimus VDALRICI ZASII *Orationes in obitum Maximiliani & Blance Mariæ* eodem anno Friburgi habitas, quæ post ipsius Epitomen in vsus Feudorum fuerant adiectæ, quas in Authorum Syllabo promiserat Freherus.

\* De infelicitate litteratorum pag. 377.

\*\* c. l.

\*\*\* De hoc Bernh. Herrzog *Elſaſſ. Chronic. lib. VII. pag. 34.*

\*\*\*\* De hoc Val. Andreæ *Bibl. Belgica voce Petrus Ægydius.*





ORATIO FUNEBRIS IN DEPOSITIONE GLORIOSIS. IMPER. CÆS. MAXIMILIANI AUGUST. P. F. IN OPPIDO WELS AUSTRIÆ, PRÆSENTIBUS ILLUSTRISSIMO PRINCIPE, REVERENDISSIMO DOMINO MATTHÆO CARDINALE TITULI S. ANGELI, ARCHIEPISCOPO SALTZBURGENSI, REVERENDISSIMO DOMINO EPISCOPO TERGESTINO, ALIISQUE PRÆLATIS ET NOBILIBUS QUAM PLURIMIS: PER FRATREM JOHANNEM FABRUM AUGUSTANUM, THEOLOGUM ORDINIS FRATRUM PRÆDICATORUM, HABITA ANNO CHRISTI M. D. XVIII. DIE XVI. JANUARI.

Reuerendissimo in Christo Patri ac Illustrissimo Principi & Domino Matthæo, S. Angeli Sacrosanctæ Rom. Ecclesiæ Cardinali, Archiepiscopo Saltzburgensi, &c. Frater Joan. Faber Augustanus, Theologus, ord. fratrum Prædicatorum sese humillime commendat.

**Q**UAM diebus superioribus orationem funebrem, Reuerendiss. D. V. iubente ac plane demandante, in depositione Imp. Cæs. Maximiliani Aug. P. F. cum omnium luctu multis quidem lachrimis declamaui, domi continere non iniuria statui: qui longe satius arbitrabar esse informem factum in abscondito recondi, quam si in medium proferretur ignominiosum iudicari, nostra maxime ætate, quæ & uberrimo ingeniorum prouentu, & viris omnifariam eruditissimis locupletetur. Quorum censuram cum vix effugiant qui tersius scribunt, quam aleam p. 403 sortitura sint mea, facile colligere potui. Nolui tamen eam diutius in tenebris & abscondito latitare: aliorum potius subiturus quantumuis graue iudicium quam hanc Cæsaris Christianissimam mortem, quæ nimirum omnibus Christianis principibus exemplar ac perpetuum speculum esse debet, non deferre in publicum. Maxime autem hoc tempore, cum omnis noster debeat cessare luctus, omnes abesse lacrimæ, quod DEI Opt. Max. pietate ac prouidentia in locum huius, de quo loquimur, demortui pii ac felicitis Imp. Cæs. Maximiliani Aug. communibus votis atque omnium suffragiis electorum principum Germanorum, potentissimus Carolus huius nostri Cæsaris ex Philippo filio nepos, Hispaniarum Rex, atque Austria archidux &c. in Romanorum regem, mox Cæsar atque Imperator futurus, sit electus. Cui electioni fausta atque (ut speramus) Reipub. Christianæ omnium fructuosissima, Reuerendissima D. V. una cum aliis principibus atque Catholici regis commissariis, tanta prudentia, fide, atque dexteritate ingenii affluit, ut omnes qui diuine huic aduersari voluerint electioni (fuerunt autem hii quam plurimi & magni) cum summa confusione ac perpetua nota discesserint.



Eam igitur orationem qualis ac quantulacunque sit, D. V. Reuerendissima offero atque dedico, quod eius mandato ac insu ac se presente coram sit habita, quoque tutior in lucem prodeat, atque aliorum subeat iudicium. Quis enim improbat, quod à principe doctissimo ac omnium rerum expertissimo fuerit approbatum? Approbavit autem eam sane Reuerend. D. V. dum in oppido Wels fuisse recitata. Accipiat ergo eam ipsam Reuer. D. V. à familiari suo sibi deuotissimo, atque iam diu antea perpetuo addicto. Sique aliquando per otium licuerit, (fit autem id raro, ob ingentia atque innumera negotia) vel horam in lectione eius absumat. Quam & pro Reipubl. Christiana communi salute atque sue ecclesie Saltzburgens. cui iam B. M. præest, prospéro successu DEUS Opt. Max. diu felicem ac sospitem conseruet. Cui & me summa humilitate commendo. Datum Augusta Vindelicorum. M. D. XIX. die XII. Julii.

*Virtutes Cæs.  
Maximiliani.*

*Tria in Cæsare,  
re, princeps,  
Christianus  
princeps, Christi-  
anus homo.*

Nihil minus futurum sperassem vnquam, Illustrissime princeps, Reuerendissimi domini, magnifici, nobilissimi ac præstantissimi viri, quam vt vnus ego ex tot millibus hominum sacratissimi diuinique Cæsaris Maximiliani acerbissimam mortem primus hoc in loco publico declamarem. Cuius etenim vitam desiderassem quam maxime, huius ego deplorabo mortem? Sed inanis est atque irridenda nostra omnis humana prudentia atque cogitatio, quatenus velimus nobis certi quidquam incertius polliceri: qui quod mortales sumus, omni mutabilitati, corruptioni, atque imbecillitati subiecti sumus. Itaque non possum non misereri & conditionis humanæ, & mei ipsius, qui in id miseriarum inciderim, vt eius sim funus deploraturus, in cuius vita certissimum Reipubl. Christianæ portum, mihi quoque firmum præsidium collocaram. Egone te laudaturus mortuum accedo, sacratissime Cæsar Maximiliane, qui ob innumerabiles tuas diuinasque virtutes dignus eras, vt non morte solum, sed mortis etiam omni suspitione ad longa tempora vacares? Nam quo magis animo ipse mecum repeto singulares ac heroicas virtutes tuas, quam fueris videlicet mitis, placidus, lenis, prouidus, æquus, humanus, patriæ pater, magnanimus, pecuniæ contemptor, nemini magis quam tibi ipsi imperans, voluptates subiiciens, affectibus nullis prauis obnoxius, magna cogitans, pro nobis quibus imperabas sollicitus, ad beneficentiam omnium promptissimus, ad vindictam lentus; propensior ad iustitiam, facilis aditu, comis in congressu, cunctis (alioquin volentibus) blandus, strenuè bella agens, nullum tamen per te affectans, pacis amantissimus, cuius & tenax esses, & quidem natus visus es ad bene merendum de genere humano, ac humani generis vt esses delitiæ. Hæc (inquam) quanto magis cogito, tanto reddunt attonitum magis, vt ab omni consolandi oratione mentem deterreant. O quanta & quam grauis ad nos calamitas ex morte tua peruenit? Heu quam nostri nos cogitatus de tua diuturnitate fefellerunt? vt cuius vitam quam longissimam fore speraremus, ac communi desideraremus voto, omnium repentina mors inopinate abstulit. Sed quo feror? quo me meus præcipitem fert atque rapit intolerabilis dolor? indulgebitis mihi paulisper, Principes ac viri celeberrimi, vt quo possim consolari alios, ipse prius tantisper mærori insudem, quo menti parumper solatii adferatur. Quo pacto enim solabor alios, qui maxime omnium sim mæstus? Vnde vero consolationem vel vobis vel mihi accipiam, non video, nisi ex vita, virtutibus, atque præclaris gestis huius nostri præclarissimi Cæsaris: quæ & tales tantæque fuere, vt nequaquam nobis mors eius tantum attulerit mæroris, quantum hæ ipsæ consolationis adferre. Hinc igitur initium sumamus, quod cum Cæsar noster Max. homo fuerit, ac princeps, & is Christianus, quod videlicet in singulo horum talem se præstiterit, ac ita se gesserit, vt inde consolationis, gaudii, ac spei ingentis nobis, imo & omnibus qui Christi nomen excolunt aut venerantur, accrescere possit ac debeat. Nos videlicet talem habuisse principem, qui non modo bene, Christiane, innocentissimeque imperauerit; sed & qui omnibus mortalibus qui in id fastigii culminis sunt ascensuri, speculum sit



datum quem imitentur, quemque sibi præ oculis perpetuo reponant. Prosequemur igitur pro viribus singula non quod æquabimus dictis nostris facta huius sacratissimi Cæsaris, quæ innumera sunt, sed ut consolationis maestissimis nobis saltem afferamus quidpiam.

Multum interesse puto, Princeps illustrissime, Reuerendissimi domini, magnifici ac nobilissimi viri, ut quis se principem solum, aut quod & Christianum se principem gerat. Multa etenim principi etiam iuxta approbatorum philosophorum doctrinam (ne dicam improbi vulgi, qui omnia ad fortunam metitur) licent, imo in ipso laudantur, approbantur, summis in cælum extolluntur laudibus, quæ Christianum principem neque decent, sed neque Christi lex ei permittit. Quantum etenim Christianus homo ab Ethnico homine distat, tantundem Christianus princeps ab Ethnico principe, & longe amplius distare debet. Neque enim putes, quisquis fueris Christianus princeps, delicatam Christi professionem, nisi forte leue putes sacramentum quod æque cum aliis Christianis in Baptismo iurasti, renuntiare scilicet omnibus quæ Sathanæ placent, Christo vero displiceant: displicent vero Christo quæcunque ab Euangelicis decretis abhorrent. Id enim Christus in Matthæo ita expressit: *Qui non est mecum, inquit, contra me est, & qui non colligit mecum, dispergit.* Non minus igitur Christi doctrina tibi quam sacramenta cum cæteris Christianis communis erit. Non in Iulii certe, aut Alexandri, seu etiam Octauiani Augusti, sed Christi Jesu verba iurasti. Christi igitur, non Iulii aut Alexandri, aut horum cuiusvis mores, regulæ, atque doctrina tibi imitanda. Christiani igitur principis in primis censeo esse partes, ut Christi legem, Christi instituta, Christi disciplinam calleat: iuxtaque eam vitam mores, atque iudicia instituat. Puto & id principis Christiani (maxime vero qui Imperium Christianum gerat) partium esse, ut unitatem Sanctæ Dei ecclesiæ conferuet atque pro viribus tueatur. Et si quid seu in moribus, seu capite aut membris lapsus fuerit minata, summo conatu ne virus serpat obsistat: Juxta id quod à sanctis ac vere orthodoxis principibus actum atque traditum est. Tertio quoque loco muneris Christiani principis esse puto, ut suam videlicet atque subditorum vitam ad Christi legem faciat atque instituat conformem. Quod si quid vel incititia, passione seu malitia in Euangelium delinquatur, castiget, puniat, apponatque medelas, quantumque in se fuerit. Leges nullas, consuetudinem item nullam, præscriptiones aut id generis quidpiam inolere sinat, quibus Euangelicæ legi fiat iniuria, memor omnium se rationem redditurum, quæ sibi sunt commissa, dum & sibi crux sua post Christum ferenda est. *Qui enim crucem suam non baiulat post me, non est me dignus*, inquit CHRISTUS. Dices & quæ crux mea cum sim potens princeps? Dicam & libere quidem. Hanc quisquis fueris Christianus princeps, scito crucem tuam esse. Quod rectum est sequi. Nulli vim contra ius æquumque inferre. Populum ultra æquitatem ac ius non expilare. Magistratus communes in populi perniciem non vendere. Muneribus non corrumpi. Reipublic. consulere. Iniurias nonnunquam potius perferre quam magno subditorum periculo vlcersci. Neque priuato amore seu vxoris, seu consanguineorum, siue dilatandi imperium desiderio, ad bella inferenda moueri. Sed Dei potius timor, isque respectus potius, quod omnibus æque mors ipsa immineat, quod DEUS iudex iustus, dictorum factorumque omnium exactam habiturus sit rationem, ipsum moueant. Quod si subditos tibi vel læseris, vel nihil eorum obmiseris, ob quæ ad internitionem ipsi deleantur; quid obsecro tum Christo iudici respondebis: dicenti *quod uni ex minimis meis fecistis, mihi fecistis?* Id (inquam) Christianum principem longe quam priuatus amor ad parcendum atque nonnunquam iniurias proprias perferendas potius quam ad vindictam sumendam, & moueat & persuadeat. Quod si exigit iustitia atque ordo rationis exposculet, ut bellum assumat aut indicat, si aliter regnum aut subditos ab iniuria tueri non possit, vitam etiam ipsam pro suis ponat. Quem-

I.

II.

III.

*Cruz Christiana  
no principi post  
Christum se  
renda.*



admodum & plurimi egregii viri aliquando pro patria, pro parentibus, pro legibus suis fecere. Testes erunt Decii, Brutus, Cassius, Cherea, Codrus Atheniens. Testes Themistocles atque Lycurgus & alii innumeri, quos enumerare superuacaneum duxi, si tamen Spartium & Bulidem Lacedæmonios non obmiserō, qui voluntarie ad mortem pro patria se tradidere, quo per eos apud Xersem scelus caduceatoris contra ius gentium apud Lacedæmonios interfecti expiaretur. Quos tamen plurimum collaudatos ad propria Xerxes remisit, posteaquam apud ipsum amore patriæ remanere noluisse. Nec arbitreris te Christianum principem agere, si hæc (debitis loco ac tempore) non feceris. Adulantium turbam, si quando tibi persuadere velit, te *CHRISTI legibus non teneri, sed alios qui minores sint quam principes*, ne audias. Caue obsecro ab hiis hominibus: sibi enim, non tibi consulunt: O princeps, quo te scilicet <sup>p.407</sup> sibi faciant propiciū, quo tui dimercentur gratiam, quem forte exploratum habeant in iis rebus oblectari, quæ Christi legi atque doctrinæ sunt contraria. Cogitabis & longe præstantius, quod quem admodum ex eadem corruptionis massa, spurcoque semine, sicut & ceteri mortaliū es genitus, quemadmodum non secus ac alii mortalis es, ac in cinerem redigendus, eisdem sicut & ceteri sacramentis initiatus Christiano more, neque singulare aut præcipuum quiddam tibi præ cæteris; ita & te vna cum aliis Christi doctrinam, Christi leges, Christi Euangelium ligare. Sed quid verbis opus? Nunquid non Christus apud Matthæum, Christianum principem plane depinxit, cum inquit, *Principes gentium dominantur eis, & qui potestatem habent, exercent inter eos: inter vos autem non erit sic.* Dominari igitur ac potestatem exercere, Ethnicorum ac gentium principium est, non Christianorum, quorum dominium administratio est, & regnum beneficium. Nec ob id te putes minus Christi lege ligatum, quod videas nonnullos, qui cum non modo Christiani sint sed & sacris (ut aiunt) initiati, atque cum de pinguedine crucifixi alantur, nec tamen Christi doctrinam aut leges sequuntur, immo neque approbatorum philosophorum doctrinam suis moribus adæquant. Hæc (inquam) te aut admodum parum aut nihil moueant, quo minus te putes Christi lege obstrictum. Qui enim de eo sunt grege, maleque ac perperam agunt, ipsi viderint: tu quid te dignum sit, cogita. Accedit quod & retroactis temporibus ac etiam hoc præsentis sæculo plures ac præstantissimi ex eo genere atque turba hominum fuerunt atque sunt, qui non obstante omnium rerum abundantia atque opulentia, Christi tamen legem adamussim & verbo & opere sunt sectati. Paucorum aurem (si qui forte sint) prauorum exempla te à salute propria, à virtutis via atque tramite non amoueant.

*Remedia contra adulantium assentationes.*

*Aliorum scelus te non excusat.*

*Cæs. Maxim. legem Christi ac sacras literas sciebat.*

*Conradus Peutinger Aug. I. C.*

Cumque iam quoad potuimus Christianum principem depinxerimus, puta quod legem Christi calleat, quod vnitatem ecclesiæ pro viribus conferuet, quod suam ac subditorum vitam iuxta euangelicam legem instituat, si quid vero in contrarium consuetudinis inoleuisset, summa potestate abroget, quodque in eorum numero sæpius recogitet sese repositum, qui morituri ac omnium æquissimo iudici responsuri sunt; restat videamus, quem qualemque Christianum principem Cæsar noster Max. se gesserit. Et quidem (ut nonnisi vera dicamus) Christi legem adamussim sciebat, literas sacras quantum deceat principem, ac si longis sæculis diligentissimam dedisset operam, adeo nouit; ut cum quouis homine etiam doctissimo ac exercitatissimo de his potuerit sane conferre. Quid vel arcani vel mysterii in diuinis literis comprehensum, quod ipsum latuisset? Voluit maiestas sua (dum adhuc viueret) nescio quæ arcana, paucis aut nullis hætenus pandita, in lucem prodere. Habito super hoc nonnullorum doctissimorum hominum consilio, inter quos & ille omnium literatorum ac literarum optimarum decus & gloria Conradus Peutinger Augustanus Juriscons. Maiestatis suæ tum à consilio atque arcanis ex præcipuis erat, adeo animus ille sacri Cæsaris nostri diuinorum scatebat noticia, ut & alios effundere summo teneretur desiderio. Quis



Quis vero Ecclesiæ Romanæ unitatem hoc nostro Cæsare conseruauit magis? Ad hoc quippe omnis suus conatus, cogitatus item omnis, ne multa in Dei ecclesia orirentur capita. Et vt pauca ex multis afferamus, eo tempore quo Julius secundus Pont. Max. Reges Christianos in Venetos pene omnes concitasset, ob id quod vrbes multas plurimaque oppida & castra sanctæ Romanæ Ecclesiæ, atque sacri Romani imperii occupassent, noluisse occupata restituere, iamque plane res Venetorum deploratæ essent & de ipsis actum; ex Cardinalibus nonnulli à Julio II. Pont. Max. desciuere, atque concilium Pisis ei indixere, vt vel illic coram patribus iuxta iuris formam (vt ipsi asserebant) ad obiecta responderet, aut iuxta sanctorum Patrum decreta de ipso iudicium ac pœna sumeretur. Et cum illic quam multa essent peracta, Cæs. Maximilianus timens, ne scisma omnium pessimum in Ecclesia Dei suboriretur, omnes adhibuit vires, omnem denique diligentiam apposuit, quatenus Julius II. Pont. summus in sua sede conseruaretur, nullaque in Dei Ecclesia fieret scissura. Quod & feliciter successit, atque iuxta optatum obtinuit plane. Dissipatum namque fuit concilium non modo Pisis, vbi eius fuerat initium, sed & Mediolani atque Lugduni, ad quæ loca sese hi qui à Julio desciuerant, ob bellorum motus contulerant. Est iudicio meo sancta sedes Apostolica huic sacratissimo Cæsari, Austriæque familiæ perpetuo obnoxia, quod tantam calamitatem quantam iam præ oculis versaretur, tam prudenter, tamque modeste auerterit. Nec dicere pudet, si Maximiliani consilia, fauores, promptissimumque ingenium, tum non affuissent, scandala, scissuræ, ac id generis mala infinita exorta fuissent, quæ forte multa sæcula vix deleissent: & forte longe periculosiora, quam vel tempore Regis Theodorici inter Symachum & Laurentium, aut inter Sergium & Formosum quamuis scandalosissimum illud esset, aut inter Benedictum IX. Siluestrum tertium atque Gregorium sextum; seu etiam inter Paschalem & sibi aduersarios tempore Heinrichi quarti; vel inter Alexandrum tertium & Victorem ac sequaces, tempore Friderici primi Barbarossæ, quod tamen per annos sedecim durabat; vel quod omnium fuit perniciosissimum per annos durans quadraginta, quodque nonnisi generali concilio Constantiensi expiari posset, quod initium habuit per Vrbanum sextum atque Clementem septimum. Nam magna pars Christiani populi Julio II. Pont. Maximo adhærebat. Non contemnenda quoque pars aduersariis consentiebat: & eo maxime tempore, quo alias omnia in combustionem essent apud Christianum populum. Vtebatur in his rebus Cæsar sacratissimus opera atque industria prudentissimi ac sane omnium optimi principis Matthæi tunc Gurcensis episcopi, nunc vero Cardinalis Saltzburger. tituli S. Angeli: cuius & ingenium, fides, atque in agendis rebus experientia eo tunc maxime enituit. Eum enim tum se præstitit, quem summæ præ cæteris mortalium ob rerum experientiam atque dexteritatem ingenii Julius II. fuerit admiratus. Dignus vero vel ob hoc (vt interim innumeras eius virtutes ac erga sanctam Petri sedem ergaque diuum Cæsarem nostrum Max. merita obticeam) quem sancta sedes Petri, sacratissimus quoque Cæsar ad hunc eueheret celsitudinis gradum. Quod vero suorum, imo & sui ipsius vitam diuinæ legi euangelicæque doctrinæ Cæsar conformem instituerit, quam nihilque contrarium (quantum in se esset) Christi legibus aut ipse peregerit, aut vero aliis indulerit, sequentibus videamus. Diuinam vero legem dicimus, quæ à Deo Opt. Max. rationali creaturæ primo quidem per manum Moyfi, demum per Iesum Christum tradita est ac pie concessa, qua & mortales ad aliqua facienda seu omittenda voluit oligare, quo eos à morte perpetua præseruaret, præstaret vero eam obseruantibus vitam perennem. Oportuit enim præter naturæ legem diuinam quoque mortalibus dari. Lex etenim naturæ (si nil superaddideris diuini) longe est manca, atque hominibus ad perpetuam felicitatem insufficiens. Neque enim homines nisi ad naturalem finem dirigit: cæcutientes quoque homines (in priuatis maxime actionibus) permittit, vt vix quid ac-

Unitatem Ec-  
clesiæ conserua-  
uit, Cæsar.

Concilium Pi-  
sis indicitur Ju-  
lio.

Sedes Aposto-  
lica tenetur  
Cæs. Maxim.  
& familiæ  
Austriæ.

Matthæus  
Card. Saltzbur-  
gens.

Exodi, 20.  
Matth. 5. &  
alibi.

Aug. in de  
lib. urb.



*Legis diuinae  
perfectio.*

*Matth. 22.  
Luc. 10.*

*Bonum cogni-  
tum obiectum  
voluntatis.*

*Augustin.  
Ex tota mente  
amare quid.*

ceptandum quidue respuendum, in plerisque rebus ea lege homines scirent. Nec ob singula scelera penam seu multam imponit, quin potius ne maiora subsequantur incommoda minora mala admittit, ut plerumque in matrimonii rebus, adulterii quoque ac concubinatus crimine & his similibus facile videri potest. Secretiora hominum item facta, cogitatusque peruersos non curat. Lex vero diuina homines ad perpetuum supernaturalemque finem, in quem creatus est (fruitionem scilicet Dei Optimi, qui summum bonum est) dirigit ac plane deducit, iter rectum monstrans, ac media quibus eum finem promereantur, mortalibus iubet atque designat. Hac ipsa lege diuina hominibus quoque plane constat, quid Dei intuitu quidque eius amore acceptandum, quidue respuendum. Ea lege diuina mortalibus manifestum fit, ut si scelera vel magna vel parua commiserint, etiam si humanæ legis effugerint multam, non tamen Dei seuera iudicia se euasuros. Sed nec si secretissima fuerint delicta, ob id DEUM iudicem effugies. De hac diuina lege Psalmista loquens, ait, *Lex Domini immaculata, conuertens animas, testimonium domini fidele, sapientiam præstans paruulis.* Vbi ea quæ diximus, Rexus propheta clare expressit. Hæc (inquam) diuina lex in duobus consistit, tanquam omnium aliorum principis, à quibus & singulæ leges dependent, cunctaque iusta decreta defluunt. Quorum primum est, ut Deum Optimum Maximum ex toto corde, ex tota anima, ex tota mente, denique ex omnibus viribus nostris diligamus. Secundum autem huic simile: quatenus proximum sicuti & nos ipsos adamemus. *Ex corde toto*, ob id dixit legislator, quod carnis amor maximopere à Dei obedientia ac cultu (vel ipsa experientia teste) nos retrahit atque retardat: eiusque amoris illecebris initia sint, sensus atque sensuale desiderium seu appetitus: quibus si principatum relinquant, iam iam de diuinis actum est. Cor autem iuxta approbatorum Philosophorum doctrinam fons sit vitæ, sensuum atque appetitus. Non immerito nec inepte legislator dixit, *ut DEUM ex toto corde diligamus*: hoc est, subiiciamus prorsus ac omni ex parte sensibiles vires voluntati nostræ, quatenus & illa pari ordine ad DEUM tendens, nulla in re ab ipsa ratione Dei-que lege dissentiat. Verum cum crebro absque rationis ductu, soleat aberrare voluntas, adiunxit, *ut ex tota anima ipsum diligamus*, hoc est, tota voluntate ad hunc finem directa. Anima siquidem vitæ est principium, unde motus profluit, ex quo ab inanimatis quæ animata sunt discernuntur. Animata etenim seipsa mouent quod his quæ anima carent minime conuenit. Cum igitur voluntas singulas rationalis animæ partes moueat, recte per animam legislator voluntatem designauit. Mandat ergo ut voluntas integra cum omnibus motibus atque operationibus suis in Dominum feratur, ut illum videlicet amet, illum desideret, in illo supra omne bonum oblectetur: si quid vero huic sit aduersum, fugiat atque summopere detestetur. In omni opere denique DEUM glorificet, cuius & voluntati ut pote omnium rectissimæ quæque in nullo aberrare possit, in omnibus se subiiciat. Quando vero ex se omnium rerum est inscia voluntas, cum nihilominus eius obiectum sit cognitum bonum, (inuisa enim amare possumus, incognita autem nequaquam) quo ratio seu intellectus voluntati in his omnibus continuo adsit, legislator denuo subiunxit, *ut ex tota mente DEUM diligamus*, mente intellectum seu rationem designans, quæ ita scilicet in DEUM Opt. Max. una cum voluntate feratur, ut nihil intelligat, nihil scire desideret, nisi DEUM, aut quæ in DEUM ac diuina referri queant, ut scilicet neque alta neque profunda sapiamus, nisi quibus DEUS honoretur atque glorificetur; simulque cum Apostolo Paulo quæ sursum sunt sapiamus, non quæ super terram. Finem autem absque mensura seu termino amamus, ut qui ob seipsum ametur: quæ vero ad finem sunt, eatenus amamus, quatenus ad finem ipsum proportionem habent. Neque enim in sanitate ipsa, verum diætis ac medicina mensuram ponimus, ob idque legislator sapienter adiecit, *ut ex omnibus viribus ad DEUM Optimum, qui finis noster* & ob



& ob id absque mensura amandus est, toto conatu, omnique nisu tendamus; nullæque sint in nobis vires, seu intrinsecæ seu extrinsecæ fuerint, quæ non omnimode DEO obtemperent ac subiectæ sint. Id autem ut hac in miseria- rum valle fiat, DEI donum, quod precibus ac lacrimis facile ab ipso obtine- tur, quodque DEI gratiam appellamus, nobis est pernecessarium. Nec enim hoc DEI mandatum ex naturæ dotibus te adimplere posse arbitreris: sed po- tius cum Aurelio Augustino dixerim, DEI gratiam in hoc requiri, non solum ut ipsa monstrante quid faciendum sit sciamus, verum etiam ut præstante ipsa faciamus cum Dei amore ac dilectione, quæ scimus facienda, quodque cum peregerimus, in nobis tum perfectis atque consummatis glorificabitur DEUS, quemadmodum causâ quælibet in sui effectus perfectione laudem ac gloriam acquirit. Fiet autem id facile nobis volentibus. Quid enim facilius amore acquiritur? quidque leuius, quam id desiderare quod suapte natura est opti- mum? Id quod etiam saluator in Matthæo dicit, *Fugum meum (inquit) suauis est, & onus meum leue.* Ex hoc itaque primo omnium legum ac mandatorum prin- cipio non modo quo pacto DEum, verum quo & nos ipsos debeamus amare, apparet. Perpetuo enim ordine ita illi vni affici tenemur, ac subiici, idque to- tum quod viuimus, quodque agimus, ad eius gloriam ordinare, quatenus in nobis tanquam suo opere ad instar suæ imaginis ac similitudinis factò, glorifi- cetur ac magnificetur DEUS, nomenque suum iugiter in nobis atque per nos sanctificetur. Quo vero pacto proximus esset diligendus, non tam erat manife- stum, ut cuius amor non esset tam naturalis homini quam sui ipsius. Noluit legislator hoc in ambiguum reponi, adiunxit ob hoc secundum mandatum seu mandatorum secundum principium dicens: *Proximum tuum diliges sicut teipsum.* Hoc est, ad eum quem teipsum diligis finem. Honor enim DEI ac eius glo- ria cum noster finis sit, in perfectione vero effectus longe amplius artifex quam diminutione honoretur, longe in hominibus perfectis summeque beatis DEUS amplius magnificabitur, quam in sceleratis impiisque. Si igitur DEUM dili- gendo illius gloriæ usque quaque nos sollicitos esse oporteat, pari fine quoque ad quem anhelamus (beatitudinem scilicet supremam) proximum diligamus ne- cesse erit: ut quemadmodum in nobis, ita & in illo diuinum opus reluceat simul ac laudetur. Quid quæso his principiis seu mandatis verius? quid ratio- ni consonum magis? quid diuinis dari potuit? in quibus & diuina iura, & hu- manæ societatis fœdera, ac demum legum omnium atque institutionum per- fectio continetur. *Hinc (ait Veritas) pendent leges omnes ac prophete.* Quic- quid igitur his consonat, ex hisue resultat, à quocunque homine, quouis tem- pore, in quacunque etiam schola seu secta traditum sit, fides CHRISTI sus- cipit, sanctum ac venerandum reputat. Quodcunque vero his repugnat aut obsistit, prophanum iudicat ac perpetuo abiiciendum. Rationi itaque consen- tanea hæc duo principia duabus tabulis Moysei DEI manu sunt exhibita, qua- rum altera ad DEUM, altera ad proximum mortales recto calle dirigit atque instituit. Homo enim cum ciuile sit animal, communitatisque alicuius pars, ad vitæ eius rectam rationem attinet, ut erga vniuersorum principem primo, demum erga suos conciuies bene ac iuste se habeat. At cum Christianus quili- bet Reipublic. Christianæ pars sit, bene se habeat necesse est, primo erga eum, qui homines regit & qui Christianitatis vniuersa est caput, erga Deum scilicet qui omnium rector est ac gubernator, ergaque IESUM Christum DEum ac hominem, qui caput nostrum est. Peroportune vero iusteque erga DEum IESUM Chri- stum quoque se gerere, si (ut diximus) ex omnibus viribus ipsum adamauerit. Primum vero atque præcipuum, quod communi omnium principi inter multa quæ ei à subiectis debeantur, fidelitas est, qua inuiolata ipsi fides in omnibus obseruetur, nec quisquam ab illo ad hostes vllò pacto deficiat. Primum idcir- co primæ tabulæ præceptum est *ut vnum mortales colant DEum, alienos vero ne- que venerentur sed neque admittant:* Ob nullumque commodum ad Dæmones pessimos

August. in de  
correct. & gra-  
tia.

Quo modo pro-  
ximus diligen-  
dus.

Math. 22.

Præceptorum  
10. decalogi  
ratio.

Apostolus  
Ephes. 1.

Primum præ-  
ceptum.



Secundum præ-  
ceptum.

pestimos (quos vulgo Deos existimarint homines) quoquo pacto diuertant. Principi secundo loco reuerentia ac honor debetur: id secundo primæ tabulæ mandato præcipitur cum inquit, *Nomen Dei tui in vanum non assumes*. DEum etenim prorsus inuisibilem mortales honorare cum desiderent, in his maxime quæ ipsum repræsentant, cuiusmodi voces sunt quæ ad eum designandum seu laudandum sunt inuentæ, honorare debent: omninoque quod huiusmodi vocibus seu quibusuis rebus aliis DEum repræsentantibus in Dei dedecus seu ignominiam (qualia sunt blasphemiae, periuria) vergeret, abiiciendum. Principi quoque tertio ac postremo loco obsequium debitum præstare tenemur. Id altero primæ tabulæ mandato expressum est cum dicitur; *Memento ut diem Sabbathi sanctifices*; quo externus qui ceremoniis & sacramentis, internusque qui fide, spe, & caritate peragitur, simul DEI cultus mortalibus DEO sincerissime exhibendus demandatur. Quæcunque ad DEI Optimi Maximi cultum, obseruantiam atque honoris exhibitionem pertinent, his tribus primis mandatis expressum est. At & proximus sicuti & nos ipsi à nobis diligendus cum sit, diligere vero sit alteri bonum velle, eique nolle malum: quo ei bonum velimus, primo mandato secundæ tabulæ legislator exprimit, cum inquit, *Honora patrem tuum ac ma-*

Quartum præ-  
ceptum.

*trêm, &c.* Quo omnis exhibitio honoris, beneficiorum gratitudo, in pauperes pietas, ac id generis quæcumque proximo exhibenda sunt, sane depromuntur, mala vero proximo ne inferamus, opere, lingua, ac corde caueamus oportet. Opere vero, non modo in propriam atque coniunctas personas, sed & in res suas contiguas, ab omni iniuria proximi abstinendum esse censuit DEUS: ut absque quauis noxa atque iniuria nobiscum viuere ac conuersari queat, ob hoc

Quintum præ-  
ceptum.

alterum item secundæ tabulæ mandatum subinfert, *Non occides*, inquit. Quo omnis iniuria in personam proximo inferenda inhibetur. Bella quoque & quæ ex bellis oriuntur, deuastationes, seditiones, ac id generis infinita, quæ proximo vitam adimere possent. Vxorem vero, quæ altera est ipse maritus, proximi ne polluas sædusque inter eos initum ne violare præsumas, tertio loco sub-

Sextum præ-  
ceptum.

iungitur; *Non mœchaberis*: quo & omnis spurcitiae atque pollutæ libidinis fræna mortalibus stringuntur. Cupit enim DEUS nos mundos esse: quoniam

Matthæus  
Septimum præ-  
ceptum.

*beati mundo corde, eo quod DEUM ipsi videbunt.* Bona quæ fortunæ dicimus extrinseca; Famam item proximi ne contra ius & fas contingeres aut deprauares, duobus inde mandatis inhibuit dicens, *Furtum ne facias, Falsum quoque*

Octauum præ-  
ceptum.

*testimonium contra proximum tuum non dicas*: quibus omnis fraus, omnisque illicitus contrahendi modus, quibus proximus in fortunæ bonis lædi posset, prohibetur. Mendacium item omne, detractio, ac id generis mala, altero mandato inhibentur. Tam vero lex hæc diuina hominum profectio inuigilat, ut non solum operis, ut reliquæ leges, sed & mentis rectitudinem deponat. Vnde & cordis inordinata desideria, maxime autem circa Venerem ac fortunæ bona, ut quæ homines etiam cogitatu delectent vehementer duobus vltimis mandatis inhibentur. Ex his igitur mandatis, omnia alia iura, leges item omnes aliæ defluunt in illaque omnia reducuntur; iusta quoque aut iniusta omnia ex his sunt iudicanda. Nihil enim quod ad bonos mores pertinet, illis contrariatur siue repugnat, quin potius quæcunque iusta, quæ sancta, quæ impolluta sunt, in hæc tanquam principia reiiciuntur, ac vltimo resoluuntur. Quæ vero bonis ac sanctis moribus seu institutis sunt contraria, & his maximopere repugnant. Ob id & Christiana religio, quæ hanc legem amplectitur ac præceteris mortalibus obseruat, quicquid de virtutibus ac moribus philosophi seu doctissimi viri scripserunt, facilius, vberius, sanctiusque complexa est: quæ vero ab illis ignorata, vel prætermissa, seu diuina seu humana essent, exquisitè ac cumulatissime tradidit & auxit. Consilia quoque lex diuina seu Euangelica addidit, quo facilius per ea præcepta obseruentur. Cum Christiana enim vita ad nihil æque ac diuini amoris perfectionem tendat, quæ absque puritate cordis, terrenarumque affectionum purgatione nequeat haberi: quibusdam DEI man-

Vltima duo  
præcepta.

\* Aristotel.  
in ethicis &  
politicis.

Consilia Euan-  
gelica.

Affertiuæ.  
Negatiuæ.

datis



p409 datis puritas cordis inducitur, aliis vero terrenarum affectionum purgatio. As-  
fertiua dicuntur, prima, Negatiua vero, altera. Consilia autem vtrunque re-  
spiciunt; neminem tamen ad sui obseruantiam nisi volentem ac sua sponte illa  
acceptantem, vel ligant vel obstringunt. Neque id consilium omnes obligat:  
*Si vis perfectus esse, vade & vende omnia quæ habes, &c.* Vt cælibem quis atque  
continentissimam ducat vitam: seu etiam religiosi alicuius patris obedientiæ se  
subdat, quo facilius scilicet à cupiditatis, gloriæ, fastusque omnis, necnon vo-  
luptatis & rerum exteriorum sese affectibus procul amoueat atque emundet,  
consilium est, non præceptum. Simul id quoque, vt diuino cultui quisquam  
in perpetuum se dediceret, quotidie diuinas celebret laudes, sæpissime oret,  
plurimaque alia peragat: ad quæ nemo aliam ob rem obligatur, nisi vt ma-  
gnam perfectionis apicem caritatisque peramplum augmentum attingat. Hæc  
(inquam) & his similia neminem nisi volentem ligant: mirum tamen in mo-  
dum auxilio sunt mortalibus vehementer DEum amandi, ipsumque faciliter at-  
tingendi. Nam charitatis venenum est sola cupiditas, quæ his sane excludi vi-  
detur atque omnino abiici. Demonstrauimus his (vt puto) paucis quidem, di-  
uinam euangelicamque legem ordinate sapienterque in cunctis procedere: ita  
vt nihil incompositum, nihil inordinatum admittat; nullamque philosopho-  
rum, neque Platonis, nec Stoicorum, nec Epicureorum neque Pythagorico-  
rum, sed nec Peripateticorum scholam, nullam denique sectam seu religionem  
aliam, imo vero legislatorem nullum, seu Mercurium Trismegistum qui Ægy-  
ptis, seu Solonem qui Atheniensibus, seu Licurgum qui Lacedæmoniis, seu  
Phoroneum qui Argiuis, seu Pythagoram, qui Italii, seu etiam Numam Pom-  
piliū qui Romanis legem tulit, citaueris, eiusmodi attulisse doctrinam, omni  
ex parte tam rationi consonam, nihilque quam æquum & iustum admittentem:  
quinimo tantum ab hac nostra distare, quam terræ centrum à summo distat cœ-  
li conuexo, quamue tenebræ ab ipsa clarissima luce.

Restat videamus quam Cæs. Maximilianus (de quo sermo est) hanc DEI  
Opt. legem seruauerit, ac suam secundum hanc vitam instituerit. Consiliis  
quidem omnibus vsus non est, cum & mundo nonnunquam adhæserit, in mun-  
do conuersatus fuerit, orbique imperauerit. Neque tamen adeo mundum il-  
lecebre excoluit, vt mentem ipsius serenissimam à Deo Opt. potuerit auel-  
lere. Si forte tamen aliquando, vt est inter homines prauis inclinatio, atque  
à iuuentute sensus ad malum quam prouisi, non est malis immoratus Cæsar,  
neque malo addictus, sed quam primum ad se reuersus DEum quam deuotissi-  
me & excoluit atque in pristinam restituit amicitiam. Præceptis diuinis ita se  
accommodauit, vt princeps an homo priuatus Deo quam maxime addictus ef-  
fet, non facile diiudicasses. Quæ enim (vt per partes singula dicamus) ad Dei  
Opt. Sanctorumue cultum, ad diuini item nominis honorem attinent, nemo  
hoc Cæsare nostro feruentius & persoluit, attentiusque peregit: quantæ fidei  
atque spei amoris quoque in DEum fuerit, paulo post dicemus. Diuinis sin-  
gulis diebus interfuit, Mysteria diuina nullo die prætermisit: aderat illis tanta  
deuotione, tam animo recollecto, vt nil nisi diuinum, nil præter Christi mor-  
tem, cuius mysteria in missa sciebat tractari, pro tunc cogitaret. At si forte  
(vt fit) mens sibi nonnunquam subriperetur, dilabereturque prorsus ad alia,  
quibus forte tum deditus esset magna Imp. negotia, statim vt perpendit ad se  
reuersus iterum in DEum ferebatur. Nec id coniecturis, sed vera experientia  
edoctus loquor. Vnde & militaribus fratribus S. Georgii inter cætera id quod  
quali præcipuum dedit statutum, *vt quam attentissime singulis diebus diuinis inter-*  
*sint, nec quantumvis eis imminet negotium, ad alia quam diuina eo tempore eo-*  
*rum mens feratur.* Testantur & deuotionem huius sacri Cæsaris Sanctorum plurimi,  
in quos magno ac feruido semper ferebatur amore: præcipue in Diuum Andream,  
Georgium, atque alios plerosque, quorum & festa tam exacte, tam sincere sin-  
gulis annis peregit, vt putasses nil præter Sanctorum festa sibi fuisse menti. Di-

Consilia non  
obseruauit a Cæsare.

Præcepta Dei  
obseruauit.  
Cultum diui-  
num auxit at-  
que dilexit.

Diuinis fre-  
quens interfuit.

Militares fra-  
tres S. Georgii.  
Patroni Cæsaris  
inter sanctos.  
Festa coluit  
Sanctorum.  
S. Leopoldum  
inter diuos re-  
ferri curauit.



*Templa & monasteria. Honoris diuini feruens Zelator. Blasphemus nunquam fuit. Ieiunia ecclesiae obseruauit.*

uuum quoque Leopoldum Austriae quondam sanctissimum principem, consanguineum suum ob praecipuam in eum deuotionem inter diuos referri curauit. Templa atque monasteria quamplurima deuotionem eius ac in DEum & sanctos deuorum cultum testantur, quibus cum emolumento tum ornamento fuit deuotio Caesaris. Nominis vero diuini tam feruens Zelator, ut nusquam villo tempore vel Dei vel Sanctorum quisquam blasphemum audierit. Imo nec vnquam in vanum nomen Dei aut Sanctorum assumpsisse, testes locupletissimi omnes qui viro die noctuque astiterunt. Sed nec blasphemum vllum etiam si alias sibi charissimus esset, apud se passus est: experti id plerique malo suo edocti. Ieiunia ab Ecclesia instituta pie semper ac religiose obseruauit. Non potuit tamen (ut dicebat) non commisereri miseræ plebeculae Christianae, cui neque ad victum cibus, nec alia quae ad ieiunium requirantur in Germania ac septentrionali plaga suppeterent necessaria. Instet ob id magnis apud Pont. Max. Leopoldum X. precibus ut misero misertus popello, ne magis hæc de ieiunio Christi, fidelibus præcepta atque mandata sint in præcipitium seu ruinam quam salutem occasio, quatenus ieiunii tempus, quod quadragesimale dicimus, in plures diuideretur anni partes; ciborumque iuxta regiones haberetur exacta ratio atque discretio, quo omnibus quos ligaret huiusmodi præceptum, esset ieiunandi facultas. Verum instigatione quorundam id interruptum est consilium, quo minus Pontifex assenserit, quos Hypocritas nominare ipse fuit solitus, ut qui magis propriae gloriae quam animarum saluti consulissent. In parentes piissimus fuit, ut qui ab ineunte ætate ardentissime & patrem Federicum tertium, ac matrem Leonoram Imperatores Aug. semper veneratus sit, coluerit atque summo prosecutus amore; ut Coriolani erga Veturiam matrem, Claudiae Vestalis, Cimonis Atheniens. Antigoni Macedonum regis erga parentes amorem, aut æquauerit, aut certo longe exuperauerit. Amorem eius maximum erga parentes suos testantur monumenta, patri Federico in Vienna Pannoniae, matri in ciuitate Noua, tanto apparatu, tantis sumptibus constructa, ut cum per annos iam amplius quam viginti multi continuo adsint artifices, magnæque indies habeantur impensæ, neque tamen ob magnitudinem atque excellentiam operis adhuc in finem perducere potuerunt. Continentiæ quoque incomparabilis ac pudicitiae fuit, cum Mariam Burgundam Caroli clarissimi illius principis Burgundionum filiam primo in vxorem duxisset, ita apud eam matrimonii iura conseruauit, ut pauci admodum continentiores ipso seu puriores, nedum inter huius nostræ ætatis, sed neque vetusti sæculi principes facile reperiantur. Postea vero quam ex ea filios duos suscepisset, Philippum qui post tempus aliquod Hispaniarum Rex fuit designatus; atque Franciscum qui iuuenis admodum ab hac luce migravit, nec non Margaritam filiam, inter mulieres huius nostræ ætatis foeminam omnium rarissimam, aduersa fortuna equi casu collapsa diem obiit extremum. In cuius locum Blancam Mariam Mediolanensem principem traduxit vxorem, quæ tamen absque sobole ex hoc sæculo migravit. Vtranque adamauit vnice, castoque amore dilexit, puto quod neque Graccus Corneliam Rom. neque Julia Pompeium Magnum adamauerit magis. Continentiæ (inquam) ac modestiæ talis ac tantæ, ut nullo vnquam tempore quisquam audierit ab ipso nec ingenuas, sed neque inferioris sortis virgines pollutas. Ut maiora interim taceam, matronarum puta seu virginum raptus, aut incestus, seu id generis multa, quibus (proh dolor) Reges nonnulli ac principes huius nostræ ætatis (ut fertur) plerique dant operam. Abhorruit ob mentis (puto) perpetuam puritatem, nedum veterum ut Neronis, Caligulae, Tiberii, Arthoxerxis, Darii, filii quorum notæ historiæ atque polluta labia, sed & quorumcunque suorum maxime, incontinentiam. Vnde si ex eis de adulterio aliquem notasset, semper toruis (ut aiunt) oculis, ac sinistra mente respexit. Testantur & purissimam eius mentem, decreta fratribus militaribus S. Georgii per eum tradita, quibus ipsos inter cætera plurimum ad continentiam à venereque abstinen-

*Maria Burgunda vxor Caesaris prima.*

*Blanca Maria vxor Caesaris secunda.*



abstinentiam adhortatur, ostendens ac plane demonstrans quot inde mala, quanta infamia, quam praua subinde exempla apud mortales oriantur.

In bellis inferendis tardus, ut qui damna irreparabilia, quæ ex bellis euenire solent semper præcogitarit: pertulit ob id à plerisque iniurias multas per longa etiam tempora, maiori etiam quam humana nonnunquam patientia usus, priusquam bellum inferret. At ubi secus fieri non posset, magno animo bella & indixit & prosecutus est.

*Bella iniuncta  
intulit Cæsari*

In misericordiam tamen ac pietatem semper procliuor, Vnde & sapius victorias, quæ iam in manibus haberentur & essent, cum se hostes recognoscerent ad pedesque prostrassent, elabi passus est. Multos exercitus & si fuderit ad internitionemque deleuerit, hostesque simul habuerit truculentissimos, nunquam tamen humanæ conditionis ac fragilitatis immemor, omnibus quantum in se erat ad parcendum fuit paratus, ut visus sit cum Julio Cæsare omnium præterquam iniuriarum memor. Experti sunt id quamplurimi suorum hostium, quos enumerare facile esset, si aliorum contumeliis Cæsaris nostri laudem quæreremus. Sed id neque instituti, neque nostræ mentis propositum.

*Fastum mentis  
abhorruit.*

Fastum mentis ac elatum animum semper abhorruit, nec quousvis quam superbos magis habuit despectui. Gallos ego ob id atque Venetos apud se fuisse inuisos crediderim, quod tam erga omnes & sint semperque fuerint animi elati. Nil in hoc Cæsare nostro nisi modestum, nil quod non summam modestiam redoleret ac præ se ferret. Habitus, incessus, gestus, omnia in eo modestiam quandam redolebant. Si quando tamen vel locus vel tempus expostularet, & principem magnanimum simul ac Imperatorem Romanum vultu & gestu sese magnanimiter demonstrabat. Cibi atque vini

*Abstinens ac  
temperatus.*

temperatissimus, ut qui ultra necessarium naturæ nihil nec cibi nec potus sumeret. Parcissimi fuit potus, ut qui raro ultra quam ter in prandio aut cæna potum sumpserit: infra prandium vero ac cænam quam rarissime bibisse visus est. Germanorum principum more bis in die cibum sumpsit: determinatas horas cibum sumendi non obseruauit, verum iuxta importunitatem negotiorum differebat aut præueniebat horam consuetam. Neque in se solum temperans fuit is Cæsar noster, verum & eos maximo prosequatur odio, quos vino se ingurgitasse notasset, Legem etiam seueram pluries contra eos qui intemperate nimis vino abuterentur, essentque immodestissimi, promulgari fecit, ac nonnunquam quos deliquisse comperisset, iuxta legem vel curia sua depulit, vel alia poena multauit. Diximus iam, quo pacto Cæs. Maximilianus iuxta Christi doctrinam ac Dei mandata vitam instituerit propriam. Nunc videbimus quid de aliis curauerit, quibus moribus seu institutis vitam traducerent. Natura inditum est ut simile simili oblectetur, sitque similitudo in rebus ratio amoris, in animantibus ac aliis rebus id sane videmus. Cumque Cæsar noster adamussim iuxta CHRISTI legem vitam ac proprios mores instituerit, quod neque hostes Cæsaris negabunt, quodque CHRISTUS DEUS Opt. Maxim. hoc genere moriendi, quod Cæsari ab alto est concessum testatus est. Neque enim facile fiet, ut qui male viuant, tam bene, tam Christiane, tamque religiose, ut Cæsar hic, ab hoc sæculo migrent. Quid nisi ipse omnes percuperit iuxta CHRISTI legem & vitam atque mores instituisse, & si de priuatis id quam longissime constet. Quotiens enim in conuentibus Imperialibus, quos plures celebrauit, regulas, decreta, ac leges sanxit, quibus sancte atque inconcussè viuerent omnes. Nihil tamen indoluit magis vir ille optimus, quam quod totiens verba fuerunt habita de nescio quâ Christianorum reformatione atque pristinae innocentia Christiana ad normam reductione, cum tamen nullus vnquam subsecutus fuerit effectus. Sciebat Cæsar, pluriesque replicabat, quod inanis est medela, ac plane frustra apponitur cura pedibus, nisi capiti, brachiis, ac cordi prius abunde fuerit prouisum. Vnde vniuersalem semper desiderauit lapsorum morum reformationem; non quidem fictam, non verbis palliatam, cui nihil subest operis, sed synceram, sed veram ac integram, quemadmodum

*Aliorum vitam iuxta  
Christi legem  
institui curauit.*

*Multa decreta ac leges sanxit in dietis imperialibus. Reformatio verbalis.*



dum & sibi in DEUM atque ecclesiam mens erat vera, integra atque sincera.

At quia vir sanguinum visus est esse, cum quantumvis ex se vir pacis esset, tantus suo tempore quo praefuit Imperio Romano effusus sit sanguis Christianus; noluit forte DEUS Maximus ob id, sicuti neque ab altero David à Caesare Maximiliano sibi construi templum: sed cum Solomone id quo perficiatur ac plane in finem bonum deducatur, potentissimo regi Carolo Caesaris nepoti ac filio reservatum est. Alieni æris nunquam cupidus, ut qui sui esset largissimus ac in erogando profusissimus. Si quando enim aderat copia (ut apud potentissimos principes crebro est) liberalissime erogavit. Maximo odio profectus est eos qui latrocinia exercerent: si quosque deprehendisset, capitis supplicio affecit. Dici vix potest quam etiam eorum nomina nedum personæ sibi fuerint inuisa. Non minus abominatus est eos ac plane odio habuit, qui sub specie religionis hypocrisis laborarent, utque hominibus placerent, parum quo DEum offendant ipsi timent: hos (inquam) nec videre neque coram audire voluit: aliquando in eos iocatus, *lupos sub specie ovina esse* dicebat. Nihil nisi apertum, nil nisi integrum atque sincerum amavit aut coluit. Principem quoque se gessit optimum.

*Liberaliss. Cæs.  
Odio habuit latrones. Abominatus hypocritas Caesar.*

*\* 8. eth.  
5. polit.*

Cum inter tyrannum enim ac bonum principem hoc intersit, quemadmodum Aristoteles \* in ethicis atque politicis describit, quod videlicet princeps bonus, omnibus consulit, nihil ei antiquius, nil dulcius re publica, animus in omnes plusquam paternus, omnium vita charior quam sua, nihil neque noctes neque dies agit nititurque quam ut omnibus sit optime, apud eum præmia parata bonis, malis (modo sese ad frugem melioris vitæ referant) venia, patriæ commodum, suum ducat esse lucrum, semper vigilat, quo cæteris liceret altum dormire, nusquam sibi otium, quo patriæ liceat in otio vitam agere, At tyrannus sequitur quicquid in animo collibuerit, diuitias subditorum anhelat, vi atque armis imperium acquirit, atque conservare conatur. Cui ii omnes suspecti qui prudentia, virtute, atque autoritate pollent, similes sibi scelestissimos tum officiales tum consiliarios parat ac deligit, & quos præpollere videt nititur ad internitionem ultimam delere. Et cum hæc (ut diximus) & boni principis & tyranni sint partes, quis maiori animo, ingenio meliori, boni principis quam Caesar noster partes peregit? quis tyrannicas magis est aversatus? Et quia res sole clarior nihil his immorabor, si tamen id vnum non silvero. Quo enim nobis, qui sub imperio sumus esset quam optime, liceretque altum dormire, hic Caesar vigilavit semper, noctes atque dies pene vigilando absumpsit, ut mirum etiam hostibus ac exteris sit visum quod homo quispian huiusce ac tantas perferre potuerit vigiliarum molestias: tribus aliquando vix horis, ad summum vero quatuor aut quinque quieti indulgit: reliquam noctis partem in negotiis versatus duxit infomnem. Labores itineris quis enumeret? Cum tot tantique fuerint, ut vel gregario militi exitiales esse potuissent: pauca enim in Germania provinciæ, pauca vrbes, quas pro temporum atque negotiorum opportunitate ipse præfens non adierit. Nullum habuit vel temporum vel locorum discrimen: niues quales habet Germania maximas, etiam inter Alpes altissimas, ubi nonnihil periculi & sibi & suis aliquando esset, superavit crebro. Seu frigora seu calores forent immensi, modo prodesse posset, ab itinere nunquam destitit: & quidem nonnunquam tanta velocitate iter emensus est, ut tabellario fuisset supra quam satis. Experti sunt quæ dico, qui eum sequerentur.

*Vigilantia  
Caesaris.*

Cum autem multa sint quæ regem seu principem decorent, nihil tamen æque ac clementia: per eam enim non coniungit modo sed deuincit sibi populos non solum suos sed & externos. Reges enim Israel clementes sunt; Alias in principe admiramur virtutes, hanc amamus atque observamus vnice, quod in Pompeio Magno visum est cum Armeniæ regem Tigranem in regnum restituisset, neque post cruentissima bella quæ cum populo Romano gesserat, coram se diutius iacere supplicem passus est: sed benignis eum adhortatus verbis, diadema



dema in caput ipsius reponens & regnum & imperium restituit, æque pulchre iudicans & vincere reges & restituere. Verum quia pacis ac belli sunt sua tempora, præclarosque principes pace liberalitas deceat atque (vt diximus) clementia, bello laborum tolerantia atque fortitudo; vtroque Cæsar noster Maximilianus ita excelluit, vt in ambiguo sit alterutrum fuerit præstantius. *Clementia Cæsar.* Clementiam in eo attestantur, innumera ipsius benigniter acta, qui (vt prius diximus) omnibus etiam hostibus, modo voluerint, benefacere, delinquentibus quoque parcere si ad melioris vitæ frugem reuerti voluerint consueuerit. *Austria domus natua humanitas.* Natura tamen hæc Austriæ domus virtus est, vt eius principes humanitate potius mites ac placidi quam seueritate austeri sint. Quod cum in aliis Austriæ principibus sæpius fuerit visum, in hoc tamen nostro Cæsare peculiare erat, vt homines longe magis patrem atque parentem quam dominum in ipso se habere testati sint. *Liberalitas Cæs.* Liberalitatis tantæ, vt nemo qui huic Cæsari honeste integre inferuierit, non satisfactus ac bene pro rei dignitate remuneratus ab eo discesserit. Et vt verum dicam, eo vsque liberalitas huius viri sacratissimi processit, vt hostes ac æmuli prodigum eum fuisse fuerint perbelle iocati. Nec silentio tradere possum, quod cum ex magnatibus suis quidam aliquotiens eum admonisset, ne tam profuse sua effunderet, ob id enim nonnunquam Maiestatem suam & passam, passuramque aris inopiam: sibi potius cordi seu exemplo esset Princeps quidam, quem tum referebat, qui cum rerum ac censuum esset perexiguus, omnia tamen abunde apud eum essent, ob id vel maxime, quod non tam vbertim sua effunderet: *Quin abi tu potius*, respondit Cæsar, *neque post hac de his tecum conferas. Meminisse enim te oportet, me Austriæ non alterius familie esse principem.* Hactenus Austriæ principes longe liberalitate sua plura quam alii, tenacitate seu manis auaritia sua acquisierunt. At ille omnium maximo qui adessent risu discedens, nunquam deinceps de his allocutus est Cæsarem. O vere magnanimum principis ac Imp. animum. Sit vel liberalitatis eius testimonium permaximum, quod cum aliquando Cæsar religiosis domibus, seu etiam priuatis personis aliqua dari dona iussisset, hi vero qui his præessent, aut negligentia aut alia ratione quadam in soluendo fuissent tardiores, nonnunquam etiam pertæsi, tanquam si nimis multa in huiusmodi erogaret, idque rescisset Cæsar, pluries duplum dari iusserit, nonnunquam triplum. Nemo qui aliqua singulari arte, aut doctrina esset præditus, modo resciret Cæsar, ab episcopo absque singulari munere discessit. Poætæ, Oratores, seu cuiusuis doctrinæ homines, ab eo quam multi & ad honores publicos euecti, & plurimis eorum abunde prouisum. Testes huius erunt quam locupletissimi Reuerend. Dominus Card. Saltzburgenf. Dominus Petrus episcopus Tergestinus, Dominus Georgius Episcopus Vien. Dominus Ludouicus Marlianus Episcop. N. medicus quondam Diui Cæs. Regis Philippi atque potentissimi Caroli Rom. atque Hispaniarum regis, Dominus Petrus de Motta Episcopus Pacen. Balthasar præpositus de Waltkirch, Paulus præpositus Vienen. Jacobus de Bannisis Decanus Trident. Sebastianus Sperantius præpositus Brixinen. Maximilianus Transiluanus Secretarius Ro. regis Caroli N. Cancellarius Ro. ac Catholici regis, Conradus Peutinger Jurisconf. Erasmus Roterodamus, Joannes Reuchlin, Jacobus Spiegel, Stephanus Rosinus, Joannes Stabius, Joannes Cuspinianus, Zasius quoque noster Friburgensis. Hos omnes (vt plures alios taceam) & fouit & singulari quadam animi beneuolentia profecutus est. Militares, nobiles, exercituum ductores, qui essent bellorum gnari, plures ab hoc Cæsare castris, oppidis, & agris donati sunt. Et vt summatim dicamus, hæc illa sua liberalitas ex hostibus amicos, ex alienis pene domesticos, ex infidis fidos fecit: passimque omnes etiam peregrinos ad se amandum atque colendum traxit. *Qui ob bonas literas à Cæs. ad dignitates euecti.* Militari disciplina adeo excelluit, vt nemo ei suo tempore par fuerit, nedum superauerit quisquam. *Diatati militares viri à Cæs.* In milite enim non philosophorum austeritatem, sicuti nonnulli duri militaris modestiæ exactores,



*Disciplina mi-  
litaris.*

res, sed civilem modestiam ac virtutem ad res gerendas requirebat. Quam ob rem longinquo hoste, liberiora militibus disciplinæ frana remittebat, ut postea propinquior factus, cum ita militum animos viresque recreasset, promptioribus diligentioribusque aduersus hostem vteretur. Prælii aut expeditionis raro tempus militi prædicebat, ut horis omnibus esse præsto se debere atque in mediis deliciis, si iuberentur, descendendum in prælium scirent. Quæ norma & ei plurimas peperit victorias atque perpetuam gloriam, & hostes in magnas deduxit sæpius calamitates. Militarem seditionem siue militum contumaciam, aut si quando accidit ad hostes defectionem (quæ militaris disciplinæ venenum sunt mortiferum) seuera animaduersione castigauit. Et ut summatim perstringamus, neque Julio Cæsare, nec Octauiano Augusto, inferior erat Cæsar hic in militari arte: qui & nouum genus bellandi, nouum quoque militum genus (quos *Landsknecht* appellant) ipse instituit atque fouit primus. Bello vero tanta insignitus claritate atque gloria, ut quicquid de hoc dixerim minus illud à laude & gloria ipsius esse videatur. Nam si enumerare voluero, quo inuicto labore iuuentutis annos militari puluere exercuerit, dies deficiet, frigora, æstus, cæteraque incommoda quanta animi perseverantia pertulerit, non somnum, non quietem, non cibum, non potum, sibi indulserit; dum optimi ducis atque imperatoris munus ipse expleret. Neque vero numero quanto animo, tot periculosa, tot horrida bella inter primos non solum adierit, sed & nonnunquam anteierit. Gallos in iuuentute pene totiens prostrauit, quotiens eis congressus. Fuit autem id sæpius, posteaquam Carolus Burgundiorum Dux diem obiisset vltimum, vellenteque armis Galli nonnullas terras & prouincias, quæ hæreditario iure Maximiliano pertinerent, sibi vendicare: quibus magno animo, maioriq[ue] felicitàte Cæsar gloriosissime restitit, atque sæpe sæpius de ipsis triumphauit: eousque tum Gallos floccipendit, ut semel in pugna etiam atrocissima lacertis denudatis bellum animose inferret, ad internitionemque exercitum Gallorum deleret. Multis tum annis nusquam à castris ne quidem pedem digrediens, bella grauissima cum Gallis (ut diximus) Sicambis, Batauis, atque etiam Morinis gessit, sæpe eos profligauit atque confecit.

*\* Rupertus  
Palatinus. Bo-  
hemi victi.*

Cum quidam ex principibus Germanis magnus quidem ac præpotens\* non satis obedire Cæsari videretur, Maximiliani Cæsaris manu in ordinem est redactus. Bohemi quoque viri omnium bellicosissimi, qui pluries sola nominis sui fama exercitus fugarunt, cum nescio quid sinistri aduersus Cæsarem hunc molirentur, essentque auxilio his qui non satis obedire viderentur, parua militum manu accepta (neque enim exercitum suum, qui magnus esset, expectare voluit) apud Ratisponam ab hoc Cæsare nostro prostrati sunt atque profligati. Nemo eorum saluus remansit, nisi quem innata clementia Cæsaris conseruauit, quos & in verba sua iurare coegit. Nemo posthac Cæsarem magis dilexit, admiratus est quam viri Bohemi, quos & ob eximias suas virtutes ac integritatem animi Cæsar summo in pretio deinceps habuit, ipsisque in bellis usus, magnam eorum expertus est fidem. Veneti vero (qui se à multis iam sæculis inuictos atque insuperabiles esse existimarent) cum Cæsarem Maximilianum quam maxime riderent, omniaque ipsius facta subfannarent, ita contudit ac fregit, ut nisi maioribus rebus occupatus (translationi scilicet Caroli nepotis potentissimi in Hispaniam) iam plane eos confecisset, actumque proculdubio fuisset de his viris. Cum enim ipsi Veneti per longa iam tempora vniuersam pene Italiam miris suis artibus subiugassent, animique essent quod reliquum erat Italiæ, atque (ut ipsi dicebant) Europæ (nam monarchiam sibi pollicebantur) post hoc occupandi, à nullo Cæsarum post Federici Barbarossæ tempora nedum expugnati, sed neque aditi fuerunt; quos Cæsar noster, cum non vulgaribus iniuriis eum affecissent, magno animo, maioriq[ue] prudentia aggressus, ad internicionem pene deleuit. Mirum vero de hoc Cæsare, quem præ cæteris mortalibus Veneti despectui habuerunt, quod eos ita expugnauerit, ita contuderit, ut ante eum

*Veneti à Cæs.  
debellantur.*



p. 414 cum nullus. Sed hæc DEI iudicia, quæ sunt abyssus multa, ne gloriatur sapiens in sapientia sua, sed neque fortis in fortitudine: verum sciant homines, quia omnis caro foenum & tanquam flos agri quæ emarcescit. Sintque omnes subiecti manui Dei, qui quos vult humiliat, quos vult exaltat. Principem igitur optimum nihilque tyrannidis olentem gessit Cæsar.

Dei opus.

Qualem autem se hominem Christianum habuerit, restat videamus. Christianum autem hominem ex his maxime agnoscas; Si feruidi in DEum Maximum sit amoris; Si fidei arcanis (quæ omnem humanum superant intellectum) firmo adhæreat animo; Si spem atque omnem fiduciam in DEum diuosque reponat; Si denique mortem suam præ oculis crebro habuerit. Nihil enim æque mundum contemni, quod maxime Christianum decet, desiderareque facit ac mortis continua imago. *Facile etenim* (inquit Hieron.) *omnia contemnit, qui crebro cogitat se esse moriturum.* Quod hæc Cæsar noster peregerit (si præ lacrimis potuero) iamiam dicemus. Amoris in DEum erat feruentissimi, isque Dei amor ipsum inter aduersa quibus pene per omnem vitam suam premeretur, tam patientem, tam mitem, tamque constantis animi fecit, ut cum altero Job veræ patientiæ cunctis mortalibus visus sit à DEO datus exemplar. Hanc vero æquanimitem suarumque aduersitatum tolerantiam Dei amor, qui fortis est ut mors, in Cæsare nostro operatus est. Inter prospera quoque quæ plura sibi contingere, tam modestum, tam sui non oblitum is Dei amor reddidit, ut difficile fuerit cognitu, prospera ne an aduersa vteretur fortuna: tam sibi semper idem, tam vniformis in omni fortuna. Et hoc Dei amore tam pius, atque in pauperes miserosue compatiens & largus sibi animus, Xenodochia quoque decem quæ in pauperum Jesu Christi vsum construi, atque ex suo ære prouideri, vltimo testamento quam liberalissime iussit atque voluit, hunc etiam in DEum eius attestantur amorem. Hincque arbitror emanasse ut cum (Christo attestante) *ei multa dimittantur, qui plurimum diligit, charitasque multitudinem peccatorum cooperiat*; Si quando Cæsar ut mortalis, humanisque passionibus subiectus nonnunquam deliquit, facile sibi DEus id indulserit, ob eximiumque illius in se amorem misericorditer remiserit: & cum *bene sibi conscia mens quasi iuge sit conuiuium*, quis hilarem ac semper lætum Cæsaris vultum admirabitur? Facile enim qui sibi ab intra boni conscius est, de foris subridebit. Qui enim DEUM diligunt, sicut Sol splendet in ortu suo, ita ipsi fulgebunt. Spei quoque ingentis in DEum Optimum Maximum erat, ut qui inter aduersa quibus crebro per omnem vitam (ut diximus) premeretur, etiam quibus humano consilio aut ingenio resisti non posse videretur, magna fiducia dicere solitus fuerit; *spem in alium non posui præterquam in te Domine.* Ob id insanias ac vanitates falsas, in quibus nonnunquam homines spei quidpiam reponant, derisui habuit.

Signa 4. Christiani hominis.

Amor in DEum.

Luc. 7.  
Prouerb. 10.

Prouerb. 15.

Iudicum 5.

Spei magna erat Cæs.

Cum resciret, *Beatum esse virum, cuius est nomen Domini spes eius*, DEUM Optimum Maximum omnibus in rebus suis præposuit, rerumque suarum semper à diuinis sumpsit initia. Vnde & eum DEus nunquam dereliquit, sed in finem vsque protexit. Affuit in tribulatione sibi cum ad eum clamaret, ab hostiumque incursum misericorditer liberauit atque defendit. Quis eum enim à tot tamque potentissimis, quos ipse pertulit, hostibus liberasset, ut nec beneficio, nec gladio, seu alia quadam fraude per tot annos, quibus & regnis & imperio præfuit, circumueniretur? Cum & eos ipse habuerit hostes, qui his malis artibus longe plus quam gladio bellare didicerint atque consueuerint. Quis iuuenili ætate, cum totiens inter Gallorum versaretur impetus? quis in mari, cui aliquoties etiam exigua manu se commisit? quis inter Heluetiorum tumultus? quis à Geldrensi fraude tot annis? quis inter Hungaros atque Bohemos? Et quod omnium est maximum) quis a Venetis & Gallo, per quos etiam nonnunquam (ut dicitur) prodiones ac id generis sibi parata essent, nisi DEus Optimus Maximus, in quem spem suam reposuit, eum conseruauit atque protexit? Non enim manus nostra, sed brachium tuum & illuminatio vul-

Psalms.

Psalms.

Pericula à quibus liberatus Cæs. diuina ope.

Psalms.

tus



*Fidei magnæ  
fuit Cæs.  
Diuinis deu-  
te interfuit Cæ-  
sar.*

*Luc. 10.*

*Act. 9.  
Act. 20.*

*Eccles. histor.  
14. Histor.*

*Diuis Domi-  
nicus.  
Apollonius  
heremita.  
Actus Apo-  
stolorum.*

tus tui domine DEus hæc fecit : quoniam complacuiſti in ſeruo tuo , qui ſpem ſuam non in homines aut creaturas quæ fallaces ſunt , ſed in te qui verax , qui fidelis , qui potens es , plene reposuit. Spes quoque quam habuit maximam in DEum , in vltimo quoque vitæ ſuæ luce clarius patefacta eſt , vt paulo poſt dicturi ſumus. Fidei quoque fuit ſinceriffimæ , ac plane totus ( vt dicunt ) catholicus. Diuinis laudibus affuit frequens , Diuina myſteria ſingulis diebus videre & audire voluit , tantaque illis interfuit deuotione , tanta animi ſui recollectione , vt nil tum præter diuina cogitaret : & ſi mens ſibi ( vt fit ) ſubriperetur , in aliaque ferretur , ſtatim vt perpendit ad cor reuerſus , ruſus in DEUM , atque CHRISTI paſſionem ( cuius eſſet deuotiſſimus contemplator ) ferebatur. Nec id coniecturis refero , ſed certa experientia in hoc edoctus hæc dico. Et cum reſciret CHRISTUM dicentem ; *Qui vos audit , me audit : quique vos ſpernit , me ſpernit.* Dei miniſtros atque diuinorum ſacerdotes tanto habuit in honore , p.415 etiam ſi minimæ eſſent ſortis , quanto ante eum principes pauci. Teſtes erunt de hoc quotquot ei affuerunt frequentes. Solebat Cæſar ( cum per otium liceret ) de diuerſis miſcere ſermones ; at pluries , etiam de diuinis , & eo libentius quo ſibi aut rariora aut ſolidiora afferrentur. De fide autem & eius veritate : & ſi nullum ( vt dicebat ) ſcrupulum vnquam habuerit , magna tamen animi voluptate ſolida ſtabilia fundamenta illius auſcultabat. Reſcolo me ſemel ac iterum apud Maieſtatem ſuam fuiſſe , ac inter cætera quibus me alloqueretur , etiam de huiusmodi fidei noſtræ veritate ac ſolidis fundamentis verba plura habuiſſe. Cumque iuſſiſſet , hæc Maieſtati ſuæ tum adduxi : *Et ſi fides noſtra iamdudum & JEſu Chriſti verbis atque factis , ſacraſſime Cæſar , Apoſtolorum item ac innumero- rum Martyrum ſanguine confirmata ſit , atque cunctis mortalibus ( qui obicem DEO non ponant ) plane eius pateat veritas , multaque ſint doctiſſimorum hominum in eam ſcripta : poſtea tamen quam Maieſtas veſtra ita iubet , pauca de his ſubiungam. Si fides (inquam) noſtra ſacraſſime Cæſar , vera non eſſet , Chriſtus JEſus ( prout aſſerit fides hæc ) DEus quoque non eſſet : ex ſola enim hac fide ipſum aſſerimus DEum. Ergo credere ac conſiteri ipſum fore DEum , ſumma eſſet blaſphemia , ac deteſtationis genus. Si igitur nos per JEſum Chriſtum obſecramus DEum patrem , quem cum ipſo & Spiritu Sancto credimus vnius eſſe diuine naturæ , quomodo DEus tantum errorem ex ignorantia & ſimplicitate conceptum indecenter , tanto tempore ſuſtinuit , atque hodie ſuſtinetur ? & ſolita bonitate ſua , ſupplicantibus & illum toto cordis affectu quaerentibus non ſuccurrit , quatenus à tanto errore liberentur ? maxime cum id in primis ab eo petamus , vt nomen ſuum ſanctificetur per nos : cuius maxime contrarium fieret ſi JEſus Chriſtus pro eodem Deo vna cum Patre & Spiritu S. adoratur , ipſe vero DEus non eſſet. Aut ſaltem cur ( vt diximus ) huic errori & impietati tantundem faueret DEus , dum plurima & ampliffima dona quæ omnis naturæ excellunt limites ac poſſe , impartiens illos proculdubio clementer exaudit ? Et vt id plane conſtet , Petrus Thabitam viduam oratione à morte ad vitam reuocauit , Paulus Euticum , Joan. Euan- gelista Drufianam. Oratione deuota Theodoſius Chriſtianiffimus Imp. Eugenium tyrannum proſtigauit , atque vna cum exercitu ſuo interfecit. Oratione Alexander patriarcha Alexandrinus Arrium potentiſſ. hereticum & vicit & confudit. Oratione diua Maria Magdalena ſepties in die in aera à ſanctis Angelis eleuabatur , cæleſtique ſplendore illuſtrabatur. Dies me deficiet ſi enumerare voluero , quæ homines Dei oratione deuota impetrauerint. Diuus Dominicus Hiſpanus precibus obtinuit fratrum ſuorum inedia depelli , pane è cælo ſibi allato. Apollonius vir in heremo ſanctiſſimus cum nihil cibi adeſſet , fratribus nihilominus iuſſis vt menſam pararent , oratione abundantiæ ciborum impetrauit. Et vt ſummatim dicamus , orantibus Apoſtolis in nomineque Chriſti deprecantibus Spiritus Sanctus viſibiliter miſſus eſt. His donis quid maius , quidue glorioſius excogitari poſſet ? Quare igitur DEus Optimus Maximus his Chriſti cultoribus tam magna conferret , qui ſummam ſibi per Chriſtum inferrent contumeliæ ac blaſphemiam. Fides igitur Chriſtianorum vera. Anima inſuper noſtra veritate in primum delectatur , nihilque adeo abhorret ac mendacium , in quo ex natura*



tura ipsius nullo pacto quiescere potest. Christi autem fide falsa, absurdior ac pestilenti-  
 or nulla abusus inueniri posset: quomodo ergo innumeri homines (præcipue vero iusti  
 ac sapientes) in ipsa Christi crucifixi contemplatione usque adeo exarserunt, ut non so-  
 lum humana omnia despiciant, sed inedia, labores, æstus, impropria, minas, ver-  
 bera, carceres, ac demum sanctissima quaque tormenta libenter etiam pertulerint seu  
 perferunt, sed etiam si desint, ardentem exoptentur? Id innumera attestantur & mar-  
 tyrum & sanctorum heremitarum, Antonii Pauli, ac aliorum gesta. *Ant. Paulus  
heremita.* Jacobus quoque *Jacobus in-  
tercicus.* id attestatur. Is enim cum omnia sibi ob Christi confessionem præscinderen-  
 tur membra, ad corque iam tortoris manus sanisset, ipse eleuata mente in cælum di-  
 xit; Domine JEsu, si mille adhuc mihi essent corpora, omnia pro te ut cruciarentur,  
 exponere paratus essem. O animum in JEsu Christi amorem transformatum. Vnde  
 igitur tanta animi firmitas ac quies, si fides vera non esset? Certe digitus Dei est hic.  
 Ab exordio item nostræ religionis ad hæc usque tempora ex archiuis, attestationibus, &  
 exemplis tam priscorum quam recentum patrum & quotidiana experientia nouimus,  
 quod hunc cultum diuinum Christianum extrinsecum, qui in sacramentis ac ceremoniis  
 consistit; pie ac fideliter exercentes, & qui pluries sacramenta diuinaque mysteria aut  
 tractant aut sumunt, quam prius non habuerant, perfectionem acquirunt, & indies  
 admirabili sanctitate fiunt diuiniore. At e contra qui sine fide atque religione his fa-  
 miliariter assuescunt, efficiuntur ceteris hominibus longe nequiores. *Cultus Chri-  
stianorum ex-  
trinsecus.* Experientia enim  
 etiam nostris temporibus in plerisque clericis atque religiosi id testatur. Si enim hi  
 ipsi boni fuerint, nemo eis melior: Sin vero mali, nemo peior inuenitur. Illi enim  
 post positis omnibus, despectaque præsentis vitæ felicitate, honoribus mundi, volupta-  
 tibus illicitis, ad id generis, soli Deo placere satagunt, lectionibus diuinis incumben-  
 tes, DEum ac Sanctos frequentissimi summa deuotione excolunt. E regione vero alii,  
 P. 416 superbia, fastu, auaritia, multisque aliis vitiis obruti, eo deueniunt, impietatis, ut  
 non modo emendare vitam nolint: sed (quod omnium pessimum atque periculosissimum  
 est) quod quibus ceteri respiciunt, admonitione scilicet reprehensione, adhortatione, ac  
 bonis exemplis, ipsi magis atque magis exacerbentur. Hæc cum nemo negare possit  
 (utpote quæ præ oculis singulis videmus horis) querenda est tam diuersorum effectuum  
 in eiusdem sortis hominibus, qui eadem sacramenta contingunt, eisdem utuntur cere-  
 moniis, sufficiens causa. Duos enim contrarios effectus ab una eademque causa pro-  
 uenire, propter contrarias sibi repugnantes materiæ dispositiones, philosophia non  
 repugnat. Terra etenim solaribus radiis induratur, & glacies soluitur in liquorem.  
 Arbor vero fixis humi radicibus, virtute cæli flores pomæque producit, eadem rursus  
 euulsa pari influxu penitus exarescit. Cum igitur hi duo effectus adeo sibi sint opposi-  
 ti, ut alter eorum optimus sit, in his, qui recte (ut diximus) sacra mysteria veneran-  
 tur; alter vero in his, qui sacris abutuntur, sit pessimus, non possunt ab inani aut  
 falsa (quæ nulla esset) provenire causa. Cumque id in alio genere hominum minus  
 appareat, aliam eorum causam dare non possumus, nisi diuersum contrariumque in il-  
 lis Dei colendi habitum. Si enim Christianæ religionis cultus exterior ab ipso Deo non  
 penderet, virtutemque ac diuinam virtutem in se hoc modo non contineret, quo in-  
 strumenta scilicet virtutem continent principalis agentis, nequaquam excellentissimum  
 Christianæ sanctitatis effectum producere, fouere, & consummare posset. Per se enim  
 hæc producere non posset: Christiana enim vita (cum spiritualis sit penitus, in parteque  
 intellectiva consistat, à corporeis instrumentis nequaquam provenire potest. Quid enim ad  
 excolendum animum, aquæ ablutio, oleum, ac balsami delibutio, thuris fumigatio, panis ac  
 parum vini seu calicis oblatio: quid denique altaria, togæ, ac huiusmodi extrinseca spiri-  
 tuale conferrent, nisi superioris alicuius instrumenta essent. Nam si hæc humano commento  
 vel diabolica fraude ad superstitiosum ritum introducta essent, nunquam à tam prauis &  
 vanis illusionibus tam sancta vita proveniret. Dices forsitan, huius aut bonitatis in bonis,  
 aut malitiæ in peruersis, non cultum huiusmodi causam esse, sed virtutum exercitationem;  
 & hominum credulitatem, qua illum diuinum esse credunt. Hi enim cum vitia fuga-  
 re conentur, bonis assidue operibus incumbentes eiusmodi imaginatione ac exercitatio-  
 ne indies magis magisque proficiunt. Respondeas queso quisquis fueris: Quare nam  
 alii



alii probitatis & disciplina moralis studiosi, qui aut hæc sacramenta non colunt, aut ab eis per intervallum temporis abstinent, longe ab illa integritatis meta differuntur? Profecto si huiusmodi cultus inutilis aut falsus esset, quanto quis longius ab eius celebratione recederet, à se ipso illum abiiciens, tanto in virtutum exercitatione moralium proficeret magis. Sacerdotes quoque ex eius irrisione ac contemptu non deteriores, sed longe meliores efficerentur: cuius rei contrarium singulis diebus experimur. Quæ si addideris, DEum summam esse veritatem, quantoque eius luce quis magis perfunditur, tanto fit DEO propinquior: quanto autem mendaciis & erroribus magis impletur, tanto fit ab illo remotior. Scimus autem eos qui hæc mysteria pie ac religiose frequentant, diuino cultu vehementer oblectari, ut sepe etiam extra se positi perstent, attonitis membris immobiles. Horum etiam immutata facies radiis sanctitatis elucens, ipsos cunctis amabiles ac venerabiles reddit. Immo & feroces animos aliorum nonnunquam cum stupore, ac summa omnium demiratione deponit & mitigat. Patet in Attila Hunnorum rege potentissimo ac simul immanissimo, quem nulla arma, nullus exercitus, sed beati Leonis Pont. Max. oratio ab Italia ac hominum cæde abstinere fecit. Sic diuus Benedictus Totilam Gothorum Imp. sic Theodosium S. Ambrosius Mediolanensis sua sanctitate compescuit ac moderatos fecit. Vnde igitur hæc vis? unde hæc extasis? unde sedula & iocunda meditatio? unde feruor ille igniti spiritus? & calida suspiria dulcesque lacrimæ defluentes? atque in hymnis & canticis suauis sonantis Ecclesiæ ineffabilis inubilatio? Profecto nisi hic cultus à Deo esset, ac subinde verus, nusquam plura deliria ac mendacia reperirentur. Vir igitur præsertim sapiens & perspicacis ingenii, ex horum sacramentorum meditatione tam mirabiliter ad rerum diuinarum contemplationem non tolleretur, neque tot ac tantis cælestibus deliciis repleretur. Ex mendaciis enim (ut paulo ante diximus) incertior fit obtusiorque intellectus, & per ea à Deo semper amplius recedit. A contrario igitur effectu

Christianissimus fuit Cæsar  
Gen. 15.

Tunica domini.

Sanguis ex spina  
coronæ profudit 1518.

Paulus Apostolus  
Hab. 11.

Mortem Cæsaris  
continuo habuit pro oculis.

Christianam fidem nostram atque eius cultum extrinsecum dicimus verum esse. Fuit Christianus fidelis, atque totus crucifixi domini seruus, ut merito Christianissimi Cæsaris sit adeptus nomen: Et quia Deo credidit, reputatum est ei ad iustitiam & fidei seruo suo ostendit Dominus mirabilia sua. Maiora enim atque plura sub hoc Cæsare signa miranda, quibus hæc sancta fides est roborata Dominus ostendit, quam sub vlllo quouis Cæsare. Cruces, atque singula pene passionis Christi insignia M. D. III. è coelo in vestes ac hominum corpora visibiliter ac in prospectu cecidere. Tunica Domini inconfutis per hunc Cæsarem in ciuitate Treuerensi, cum illic conuentum ageret principum, cum innumeris Sanctorum reliquiis anno salutis M. D. XII. reperta est. In oppido Werd sex miliaribus Germanicis ab Augusta distante, spina coronæ Domini, quæ per Cæsarem magna deuotione illic in cœnobium S. Crucis ordinis diui Benedicti fuisset deportata, in die Veneris sancti, anno penultimo ætatis suæ in præsentia plurium fide dignorum per Cæsarem ad hoc quam diligentissime deputatorum, Balthasar vi. p. 417 delictet Wolff præfecti in Werd, Abbatis S. Crucis, Erhardi Almauer facellani Cæs. Prioris atque conuentus dicti cœnobii (qui & id literis atque sigillis suis, quas penes me iussu Cæsaris conseruo, testati sunt: taceo plures alios vtriusque sexus, qui id ipsum suis viderunt oculis) sanguinem sudauit. Et si omnia enumerare voluero, prolixior ero quam mei sit instituti. Sed hæc sat sint testimonii, quod Dominus seruum suum, qui sibi toto corde crederet, grandem atque magnum effecit: Fide enim tanquam alter Moyses grandis est effectus.

Quod vero præ oculis habuerit mortem Cæsar noster, post hac dicturi sumus: neque proferemus in medium, nisi quæ certo certius constant. Anno quinto priusquam diem obierit vltimum, quantumuis in magnis versaretur, & Imperii & regnorum negotiis, essentque sibi tum Gallus tum Veneti quam molestissimi, sarcophagum cum omni ea suppellectili, quæ mortuo ad sepeliendum foret necessaria, per se quam diligentissime ordinauit. Eo enim tempore in Insprugk regio oppido Tirolis, cum palatium amplissimum ac plane Cæsare dignum fabricaret, nescioque quid erroris artifices commisissent,



misissent, ad Matthæum (quem seniore appellat) qui primus esset inter eos qui cubiculo præsunt, secretius in aurem susurrans dixit: *Nihil hi faciunt quod gratum sit. Ego vero domum mihi construam, quæ placeat, eaque die sarcophagum cum ea qua diximus, suppellectili fieri iussit.* Et clanculo quidem, ne ad hominum ostentationem id fecisse videretur. Secretissime apud se quinque illis annis, ubicunque locorum esset, etiam dum Mediolanum contra Gallos proficisceretur, quam diligentissime singulis noctibus semper conseruauit ac reponi iussit. Arbitrabantur quidem homines, etiam quibus rerum magnarum demandata esset cura, thesaurum aliquem illic detineri ac conseruari? alii nonnihil librorum, quibus historiæ veteres continerentur, alii aliud magni quidpiam eo deferri. Cæsar vero sibi conscius, in quem secum deferret vsum, ut semper hilaris erat, subridendo *in rei cuiusdam sibi omnium charissimæ vsum id secum deferri dicebat.* Quis obsecro simile inter priuatos, ne dicam Reges & Imperatores vnquam fecit? Quis tam sedulo ac frequens mortem ante oculos reposuit, ut neque dies neque noctes sepulchrum sibi abesse voluerit. Vnicus quem ego meminerim, Saladinus Ægypti atque Syriæ rex, & is quidem Sarracenus, cum morti proximus esset, mandauit in sui funeris pompa quatenus interior lineus amictus, quo indui solebat, hastæ prælongæ impositus per castra portaretur; & is qui eum deferret, magna voce diceret omnibus; *Saladinum Asia domitorem ex tantis opibus quantas pepererat, vnum hunc lineum amictum secum in morte deferre.* Sapienter quidem, sed fero, humanæ miseriæ commonitus. At Cæsar noster non semel tantum, ut Saladinus, sed iugiter; non morti proximus, sed quinque annis priusquam diem obierit, mortis suppellectilem (ut dixi) diligentissime parari fecit. Tam bene, tamque Christiane mortuus est, ut si ex fine sit metienda vita reliqua, bona fuerit ne an mala. Non dubium quin ex hoc mortis genere facile Cæsaris vitam fuisse optimam ac sane Christianissimam diiudicabimus. Dii boni, quanta patientia, quanto ordine, quam prouide mortuus est Cæsar. Posteaquam enim in anno salutis M. D. XVIII. circa initium anni insignem conuentum celebrasset prouincialium, cui in oppido regio Tirolis Insprugk adessent ex hæreditariis singulis Austriae terris nobiles ac senatores, multaue illic futura, quæ se mortuo pro pace ac conseruatione patriæ atque prouinciarum Austriae necessaria forent, iam disposuisset, Augustam Vindelicorum petiit, illic principes electores, cæterique Germaniæ principes, primates, Episcopi, prælati, respublicæ ac innumeri nobiles conuenerant. Aderant quoque Pont. Max. Leonis X. legatus Cardinalis: Regum item Hispaniarum, Franciæ, Hungariæ, Poloniæ, atque Bohemiæ Oratores. Celebrauit dietam omnium celeberrimam, multa rebus imperii præuidens, ac de futuro Romanorum rege deligendo cum electoribus consultans. Adeo hercle ut ex his duabus dietis pene coniecturari liceat, Cæsarem nostrum mortem suam iamdudum præsciuisse, tam enixe circa ea instet, quæ se mortuo Imperio atque prouinciis necessaria forent. De bello quoque in Turcas assumendo, deque bellorum apparatu, atque (ut dicunt) bellorum neruo multa per Cæsar. & principes, in primisque per legatum sanctissimi D. N. Cardinalem S. Sixti tractata fuerunt. Augusta (posteaquam conuentus ille principum esset dissolutus) discedens Insprugk reuersus, demum oppidum Kopffstain petiit: illic per aliquot moratus dies cum magistratu, qui prouinciæ Tirolis præest, nonnulla commentatus. Adit illico eum magnæ apud se fidei cocus peculiaris, qui à cibis decoquendis pro Cæsare esset primarius, cuiusque fidem per annos amplius quam XXXVIII. inconcussam semper fuisset expertus: veniam à Cæsare petiit, quo sibi vxorem ac liberos qui essent in Insprugk inuisere liceat:

p. 418 Jam enim se eis abfuisse diebus quamplurimis: si vero Maiestati suæ ita visum esset, se ad curiam quantotius reuersurum. Cui tum Cæsar respondit. *Nec tu sane domum hoc tempore ascendes, sed mecum potius perges, sepultura me traditurus.* Abhorrente viro dictum, longeque aliter imprecante: *Quin tu optime Cæsar, inquit, per longos atque multos nobis viuas annos.* Ita erit ut dixi, respondit Cæsar,

Sarcophagum  
apud se conser-  
uauit.

Saladinus mo-  
riturus.

Bene & Chri-  
stiane mortuus  
Cæsar.

Prædixit mor-  
tem suam Cæs.



Gregorius  
Reisch.

Medici Con-  
uentus prouin-  
cialium.

Oratores ex  
Croatia. Con-  
fessus Caesar.

Eucharistie  
sacramentum  
sumpsit.  
Testamentum  
confecit.

Abbas de  
Kremsminster.

Valedicit omni-  
bus Caesar mo-  
riturus.

Extases pa-  
tiuntur.

*tu mecum descendes, meque sepultura trades, nam breui moriturus sum.* Affue-  
runt multi, cum hæc diceret Cæsar, qui hæc ex ore Cæsaris audierunt. Is  
quoque idem, cui magister Joannes nomen est, publice ac coram magnatibus  
multis, & mihi quidem lachrimis multis, sæpe sæpius testatus est. Per Heni  
itaque fluuium nauigio Cæsar descendens, ad Wels oppidum Austriæ peruenit:  
illic aut aucta, aut certe coepta infirmitas. Per dies aliquot dum adhuc in Au-  
gusta esset Cæsar, priusquam aduersa valetudine laboraret, vocauerat ad se Car-  
thusiensem, ex Friburgo Brisgaudiæ, dominum Gregorium Reisch, magnæ  
famæ ac doctrinæ hominem, quo se in oppido Wels conueniret: illuc cum  
venisset, staretque coram Cæsare perhumane ab eo susceptus; *Bono, inquit, pa-  
ter venisti omine atque tempore, qui mihi auxilio aderis quo cælos petam.* Reguli  
vero nonnulli, qui tum forte Cæsari astarent, subriperunt, nihilminus quam  
Cæsaris mortem fore propinquam credentes. At Cæsar constantissime affirmavit,  
*breui se moriturum.* Somnus inde sibi per dies ac noctes ademptus, valetudo-  
que aduersa indies aucta. Adhibiti medici doctissimi, domestici primo, dein-  
de etiam exteri ex Vienna Pannoniæ. Qui licet omnem suam operam quam  
diligentissime apponerent, nihil tamen profecerunt. Conuentum tum prouin-  
cialibus Austriæ è nouo indixit, vt si quid imperfectum anno altero in Insprugk  
esset relictum, illic ad finem deduceretur. Sed indies valetudine crescente ni-  
hil actum. Nec tamen etiam lecto decumbens à publicis curis abstinuit, ma-  
xime autem quæ concernerent bellum aduersus Turcas assumendum. Aduene-  
rant ex Croatia oratores viri magni contra Turcas, qui ceruicibus suis immine-  
rent, subsidia atque auxilia subnixæ postulantes. Quibus perbenigne responde-  
bat, se eis non defuturum, pecunias subministrans, spe plenos ac bono animo  
absoluit. Quo se Christianum verum atque deuotum ostenderet, semel atque  
iterum peccata sua Christiano ritu ac more confessus est. Die enim XXVIII.  
Mens. Decembr. Ex monasterio Gleinck ord. Benedicti fratrem ad se accersiri  
fecit, cui & magna humilitate ac summa peccatorum suorum contritione deuo-  
te confessus est. Demum infirmitate iam plane plurimum aucta, Die VIII. Ja-  
nuarii, secundo est confessus. Sequenti vero luce, quæ erat. IX. dies Januar.  
corporis ac sanguinis Christi sacramentum tanta suscepit deuotione, tantis la-  
chrimis ac reuerentia, vt ex circumstantibus affuerit nemo (aderant autem quam-  
plurimi, nam voluit suos adesse omnes) qui non collacrimans cum magna de-  
uotione discesserit. Testamentum non obstante graui qua laboraret infirmitate,  
per se confecit atque perfecit, adhibitis viris DEum timentibus, ac plarisque nobi-  
libus qui id exequi curarent. Multa illic (vt audio) ordinauit, quæ si (vt sane spe-  
ro) dabuntur executioni, DEO Opt. Max. laus, hominibus vero (maxime au-  
tem pauperibus) vtilitas ingens inde sequetur. XI. die Jan. summo etiam dilucu-  
lo, vti Christianus ac optimus Catholicus, extremæ vnctionis sacramentum  
per sese deuotissime expetiit atque postulauit. Quo deuotissime sumpto coram  
se, per religiosum virum Abbatem monasterii Kremsminster, qui tum semper  
Cæsari adhæreret, diuinis celebratis, Christi sacramentum maxima, qua præ  
infirmitate potuit, reuerentia deuotissime inuisit: Crucis per se signo facto,  
omnibus qui tum aderant valedixit. Cumque à lachrimis nemo astantium se  
continere posset (quis enim tam ferret animi durique cordis, qui tali ac tanto  
principe tam grauitè decumbente, sibi que tam paterne valedicante se à fletu  
contineret.) Aderant ex magnatibus suis plarique, qui cum & ipsi irremedia-  
biles emitterent lachrimas, eosque Cæsar coram vidisset ipsos alloquitur: *Quid  
me ploratis, inquit, cum sim mortalis, moriturum hominem? Ite potius, virorum  
officia peragite: lachrima enim huiusce mulierculas decent, non tales quales vos estis  
viros.* O vocem principe dignam, ô generosum magnanimum, fortemque  
animum. Neque inter mortis angustias quid viros deceat oblitum. Extases  
deinde plures passus, vt ab his qui astarent, nonnunquam pro mortuo iam ha-  
beretur. Accensam interim iuxta Christianum morem candelam, sibi que vti  
morituro



morituro allatam, ad se reuersus, sua sponte manu prahendit. Clericis qui tum aderant, sibiue momentis singulis astarent, vt se Deo, Virgini gloriosæ, diuo Georgio yti patrono vnice à se amato commendaret, exhortantibus: contraque inuisibiles hostes fortiter dimicaret, quemadmodum dum licuisset contra visibiles suos hostes sæpius fecisse, resumptis viribus, clare (quantum poterat) respondit; *Id toto corde ac animo & desidero & depono.* Post pauxillum temporis ad circumstantes clericos subiunxit: *Singula ne perfeci, quæ Christianum hominem moriturum decent, an quidpiam adhuc restat vt faciam?* O Christianum hominem. O vere religiosam mentem. Respondentibus his qui astabant: *Omnia plene per Maiestatem vestram sunt peracta.* Statim extento brachio candelam, quam hactenus in manu referuauerat benedictam, astantibus restituit. Hora inde eius diei septima orationes publice vt postulauerat coram se habitæ. Voluit autem vt Psalmi (quos dicunt poenitentiales) Orationes item diuæ Brigittæ tum alta voce legerentur. Mortem ac passionem Domini Jesu Christi, iuxta id quod Euangelistæ describunt, fecit coram se continuo recitari; nec voluit vt ea lectio vnquam intermitteretur. Aderant tum Maiestati suæ quamplures: maxime autem ex clero, Abbas de Kremsminster, Carthusiensis, Friburgensis, Sacellani quoque domestici pene omnes; præcipui vero dominus Thomas Krieger, atque dominus Wilhelmus Waldner, qui passionem & Christi mortem crebro coram eo recitabant. Hora octaua infirmitas plurimum aucta, vt vires iam pene deficerent. Ad Georgium Vogel, qui à cubiculo esset, Cæsar tum dixit: *Pergam ego sane pauco ab hinc tempore.* Et quo perget Maiestas vestra? Georgio respondente; *Ad DEum optimum, Dominum meum Jesum Christum pergam,* respondit: *Nam ad id iter (Dei munere ac gratia) plene ac perfecte sum paratus.* O sincerum animum. O fiduciam ingentem quam in DEum reposuisti, Cæsar Christianissime. Obdormiuit deinde paulisper, qualis iamiam moriturus potest adesse somnus, hora tertia post noctis medium, cum Christi passio alte coram se recitaretur, deuentumque esset ad id, vt Joannes Euangelista dicat Christum inclinato capite spiritum emisisse, Cæsar Deo altissimo animam deuotissime commendans, post pauxillum temporis & ipse spiritum emisit. Patientiæ tantæ in omni ea infirmitate fuit, vt nedum verbo, sed nec gestu, aut nutu quicquam impatientiæ ostenderit. Discretionis tam enixæ vt vsque in vltimum tempus vitæ omnes agnosceret, perciperetque plane quæcunque sibi a circumstantibus dicerentur. In vltima quoque mortis hora dum ex clero multi sibi astarent, signo admonuit ne circa se starent, sed sederent potius. Nam ea, dum viueret, semper sibi consuetudo erat, vt nullum ex sacerdotibus coram se stare, sed semper præ modestia sibi assidere fecerit. Deuotione vero tanta mortus est, vt à nemine facile vnquam exprimi posse crediderim. Pudicitia talis ac tam ingenuæ, vt & in hora mortis vltimique agonis, illius non fuerit oblitus, panneolo quem manibus tum forte moriens gestaret, pudenda (ne à quoquam se mortuo videri possent) obtexit. Deo, matri genitrici, sanctisque suis patronis, S. Georgio ac diuo Andreæ, frequentissime simul ac deuotissime plurimum sese moriens commendauit. Mortuus est infra tertiam & quartam horas die XII. mensis Januarii, Anno salutis M. D. XIX. Posteaquam vixisset annos LIX. mens. IX. dies vero XIX. Regnassetque annis XXXIII. Tali quidem moriendi genere, vt Christiano homini vltra id ad bene ac Christiane moriendum non facile quidpiam addi posset. Sepulturæ locum delegit in ciuitate Noua Austriæ, in capella sumptuosissime à Federico tertio parte illic in castro amplissimo constructa. Credo, ob id illic eum delegisse sepulturæ locum, quod in eo Castro sit genitus, in ea capella per sacramentum baptismi regeneratus. Mater quoque Leonora Imp. Aug. quam vnice dilexit, in ea etiam ciuitate sepulta. Inhibuit autem (dum adhuc viueret) ne præter communem hominum sepeliendi modum sibi pompa adhiberetur. Balsamo noluit condi, cum tamen principibus Germaniæ, maxime autem Austriæ, id sit consuetum atque

*Qui assuerint  
tum Cæsari.*

*Vox spei plena.*

*Patientia  
magna.*

*Modeste.*

*Mortuus die  
12. Jan. An-  
no 1519.*

*Sepulturæ lo-  
cus.*



commune. Neque voluit ob pudicitiam illam innatam (crediderim ego) exentari, sed iussit, ut corpus mortuum calce repleretur. Sacco quintuplici & diuerso est inuolutus, subque signo crucis quod militares fratres S. Georgii deferunt, sepulturæ traditus. Corpus mortuum biduo cunctis cuiuscunque ac quantumuis infimæ fortis hominibus passim (priusquam sacco obtegeretur) palam ut conspiceretur permissum. Ita enim iusserat viuens, quatenus homines vel suo exemplo viderent, cogitarentque, cuiuscunque status essent se mortales fore, quamque nec diademata, nec opes, nec regna, aut imperia, à morte præseruare hominem queant.

Et si omnia quæ in Cæsaris morte ac vita plane sint miranda, id tamen præ cæteris admirandum magis, quod cum Cæsar noster natus sit Anno M. CCCC. LIX. vixerit quoque LIX. annis, mens. IX. diebus XIX. Obieritque anno Christi M. D. XIX. Regnauerit vero 33. annis, quod omnes scil. numeri huius Cæsaris in nouenarium, qui in se ter reductus ternarium causat, qui omnium est perfectissimus, terminentur. Hoc enim numero (ternario scil.) inquit Aristot. sacrificamus Diis. Habet certo certius is numerus annorum, mensium, atque dierum Cæsaris aliquid in se diuini. Quid vero illud sit, Deo manifestum, nobis vero absconditum, nisi his forte quibus DEus reuelare dignatus. Id tamen plane speramus, quod ex huius Cæsaris familia, salus atque protectio cum incremento sanctæ fidei Catholicæ, ac sanctæ eius Ecclesiæ salute, sit futura. Quod Deo relinquimus, cuius altitudinem diuitiarum sapientiæ & scientiæ comprehendere nemo potest. Ut vero tandem orationis nostræ finem faciamus, dicimus Cæsarem nostrum gloriosissimum Maximilianum ut mortuum non esse desendum, sed potius tanquam viuo maximopere congratulandum, viuunt etenim virtutes Cæsaris clarissimæ, viuetque per eas Cæsar perpetuo. Nullum enim sæculum est futurum, quod non admirabitur vitam innocentissimam, atque Christianissimam mortem huius Diui Cæsaris. Quid prudentiam, fortitudinem, magnificentiam, liberalitatem, iustitiam, temperantiam, modestiam, religionem maiestatemve commemorem? Putabunt tum felices sese principes, cum Maximiliani facta, gesta, atque virtutes eximias poterunt imitari. Viuunt insuper nepotes Maximiliani, neptesque clarissimi, & quidem tam gloriose, ut nesciam si gloriosius vllum viuendi detur genus. Europam pene vniuersam repleuit sobole sua Cæsar: Regna etenim Castellæ, Arragoniæ, Legionis, Granatæ, Nauarræ, Siciliæ, Neapolis: Principatus item amplissimos, Sardinia, Valentia, Cathelonia, Tholetæ. Inferioris Germaniæ pene totius, superioris vero tertiæ partis hæreditario iure, Carolus nepos Catholicus ac potentiss. Rex potentissime possidet illisque plane dominatur. Quid quod Romanum Imperium ipsum expectat? Vbi Europa, Affrica, atque ipsa Asia, depulso Turca immanissimo ipsum præstolatur futurum sui dominum. Ferdinandus quoque inæstimabilis ingenii ac indolis Hispaniarum princeps num non viuit? Elizabetha quoque quæ Regi Daciæ potentissimo est nupta: Maria Hungariæ Regi Ludouico desponsata: Leonora Portugaliæ Regi copulata: Caterina vero (quæ omnium ætate minor est) adhuc potentissimo cuidam reseruaturs principi. Quis igitur diceret Cæsarem non viuere, qui tot tantæque & regnorum & virtutum suarum incomparabilium præclarissima atque charissima post se pignora reliquit? Viuat igitur Cæsar Maximilianus nobis Germanis perpetuo nullaque sit ætas, quæ Maximiliani nomen non celebret, veneretur atque excolat. Viuant apud Assyrios Semiramis, Ninus, Ascades, quod si cupiant, & suus Sardanapalus. Habeant & Latini Janum, Saturnum, Ænæam, Ascanium, Albani, Siluium atque Numitorem. Apud Hebræos quoque viuant David, Salomon, Josias, Ezechias, atque Oseas. Venerentur Medi Astyagem suum, Cyaxarem & Arsacem. Viuant Romanis Romulus, Numa Pompilius, Tarquinius, Scipiones atque Fabii sui. Excolant Persæ suos Darios, Xerxes, Cambyses, cum Arthaxerse. Afficiant honore perpetuo Macedones, Antigonos,

*Quid sperandum ex Cæs. familia.*

*Nepotes ac neptes.*

*Ferdinandus.*



tigonos, Demetrios, Philippos, & Alexandros. Habeant & Græci Themistoclem, Epaminundam, Cimonem. Glorientur Galli ut solent in Clodoveis, Ludouicis, Pipinis & Carolis suis. Placeant & Saxonibus Vitikindus atque Othones sui. Admirantur Sueui Federicos, atque suum Philippum, vnicus tamen Maximilianus Cæsar nobis Germanis immo Christianis perpetuo viuatur, sitque vnus pro decem millibus. Cuius beneficio quoad vixit, pie, ac singulari quadam beneuolentia & humanitate gubernabamur. At mortuus tales nobis post se reliquit filios hæredes, ut non tam ipsius videamur destituti solatio, quam perpetuam per potentissimum Carolum Regem Hispaniarum principem atque Ferdinandum affuturam speremus nobis consolationem, quietem ac diuturnam pacem. DIXI.

P.421 AD AUGUSTOS PRINCIPES, CAROLUM, IMP. ROMANORUM ELECTUM, ET FERDINANDUM GERMANUM, POST MAXIMILIANI CÆSARIS OBITUM

ORATIO

GEORGII SAUROMANI.

Ad Lectorem.

Magnus Haldenberger Lantsperga.

*Perlege, quid cessas? Oratio culta placebit.*

*Et sua Germano palma reposita Joui.*

GEORGIUS SAUROMANUS OPTIMIS AC ILLUSTRISSIMIS PRINCIPIBUS, FRANCISCO SFORTIÆ BARRI DUCI, ET BERNARDO GLESSIO, EPI. SCOPO TRIDENTINO  
S. P. D.

POSTQUAM Diis ita visum est, ut Cæsari, cui iampridem Italia triumphos, plausus, & letos honores meditabatur, præter omnium expectationem & voluntatem parentandum fuerit: non alienum & à temporum & ab amicorum rationibus duxi, tanti luminis occasum atque tam graue orbis terrarum desiderium quoquomodo testari. Quod quidem cum nullis honestioribus lachrymis, quam his ipsis quæ penitus ex animo viua voce emanant, neque vnquam exarescunt, fieri posse existimarem, subito mecum orationis suscipiendæ consilium, fortasse haud quaquam improbandum iniui, si quid modo consilii aut bonæ mentis in tanta communis doloris magnitudine esse potuit, quæ vel summi ingenii vires debilitare & facile obruere potuisset. Vt cumque Cæsaris manibus, more veterum misimus inferias, & hac oratione parentauimus, qua demortui res gestas, quæ iam ab omni inuidia & adulationis suspitione abesse debent, modicis quidem sed longe verissimis & iustissimis laudibus perstrinximus, ne posthac vlla de eo suspicio vel tenuissima in eorum animis relinquatur, qui sepe (quæ horum temporum est maleuolentia) fortunam in culpam conuertere solent. Auxit susceptam orationem constans adhuc illius in Augustæ conuentu electionis fama, ad cuius spem Italia atque omnes Cæsariani tantis studiis conflagrarunt, ut prope id prius votis declararint quam quicquam promulgatum fuerit. Quorum & hic nunc nonnulli orationem mæsto dolore & recenti lætitia ac desiderio redundantem, atque simul vniuersæ Italiæ vicem apud Reges suos lugentem mihi pene inuito extorserunt. Hanc ego vobis



vobis, Principes ornatissimi inscripsi, qui superioribus annis hac Romam transeuntes me tum huius urbis gymnasiarcham, nulla non amoris & benevolentia significatione coram complexi estis, ne ea nunc me vobis absentibus usquam interim ex animo effluere patiatur. Atque ut splendore vestro illustrata, eius rationem facilius tantorum Regum iudiciis probemus, quorum Augustissimum conspectum cum vestra opera forte subierit, si cetera non admodum probanda videbuntur, certe studium & pietas non omnino improbabitur. Valete Bononiæ Kal. Februar. M. D. XIX.

## O R A T I O.

*Cesar alieno  
tempore vita  
functus.*

*Cesaris ani-  
mus in Turcas.*

*Mors boni  
principis haud  
agenda.*

SI quando antea in rebus humanis animaduersum est, Mortales vno eodemque tempore, & summo dolore, & pariter gaudio affici, atque eorum animos diuersis ac prorsus repugnantibus sensibus fluctuare conflictarique, id potissimum hoc tempore videri debet, quo vos Augusti Principes, in celsissimam fortunæ & honoris sedem, tot gentium votis atque populorum adclamationibus sublatis, & ad imperii orbisque terrarum gubernacula tractanda moderandaque nuper rite lecti, atque designati estis; Et rursus, quo Maximilianum Cæs. auum vestrum, quo sol vno neminem vnquam principem meliorem vidit, neminem pietate præstantiorem, importunis paulo ante fati nobis ereptum desideramus. Non quia aut Resp. Christiana eodem funere elata sit, aut nobis eam orbatam & penitus gubernatore spoliata reliquerit: verum quoniam alienissimo tempore à nobis digredi visus est. Etenim quo cum maxime egentibus & forte laborantibus rebus, sapientia & officio subuenire potuisset, tum quod facile nunc tandem [omnis] antea vitæ suæ fructus, non tam per seipsum quam per vos nepotes suos percipere debuisset. Quos haud dubie eo vberiores tulisset, quo iam pridem in præclaram atque diuinam illam contra Turcas expeditionem ardentiori studio incubuerat. Quid enim (Dii boni) ille recusabat, quod ad id pertinere videretur, ut id non summis laboribus ac etiam vitæ dimicationibus experiretur? atque nuper adeo quid ei antiquius erat, quam ea de re ad orbis terrarum principes in consilio referre, Reges ipsos ad communem concordiam omnibus rationibus cohortari, finitimas sollicitare nationes, populorum animos vndique præhensare, exercitus cogere, arma expedire, & quacunque terrarum obuolitare, omniaque per se obire. Itaque non iam illum vel in extremo spiritu vis hyemis, non itinerum difficultas, non ætas, non denique morbus ipse ingrauescens, atque illa ipsa, quæ ei perspicue interitum maturasse videntur, retardarunt, quominus omnibus cogitationibus, omnibus & corporis & animi neruis contenderet, ut tandem aliquando, quemadmodum iam antea plæraque è deuictis maximis & fortissimis nationibus ac ferocissimis gentibus immortalia trophæa constituisset, sic postremo vndique cæsis fuscisque immanibus Christiani nominis hostibus atque abunde ultus sanguinem maiorum nostrorum, clarissimos triumphos in oculis Italiæ, in ipso illo celeberrimo orbis terrarum theatro duceret. Verum inuidit hoc nobis quædam fatalis & nimis crudelis necessitas, atque animos interim nostros ad optimam spem erectos improuisa & indignissima clade funestauit, ac subito miserabilem in modum prostrauit. Quamobrem si cuiusquam antea principis funus mœrore & luctu publico prosequendum fuit, quantum nunc nobis in tanto Reip. vulnere lachrymarum profundendum esset, quantum in eo mœroris exhauriendum; qui se nunquam satis de imperio Christiano bene meritum putasset, nisi etiam tum cum ei in tranquillo & periucundo ocio adquiescendum erat, tantaque foelicitate & gloria floreret, omniumque regum & heroum fauore circumfunderetur, ut vel nutu cuncta regere posset, vltimum spiritum in communi omnium salute, in complexu Reip. exhalasset. Sed cum nemo vnquam sapiens mortem fortis & boni principis lugendam existimauerit, quantopere nobis cauendum est, ne commitamus, ut aut parum grati erga eum fuisse, aut minus fortiter eiusmodi casum tulisse



tulisse videamur, Non quod æquo animo à quoquam ferendus sit; sed  
 (quod optimum quenque consolari debet) illi nihil acerbitatis per mortem  
 accidisse; immo potius illius animum recti & æqui conscientia, lubenter &  
 ultro é custodia vinculisque corporis, ad illud diuinorum animorum conci-  
 lium coetumque euolasse, præsertim cum id fati agentis necessitate, &  
 potius DEorum immortalium ad meliora vocantium voluntate, quam casus  
 alicuius, aut fortunæ violentia euenisse sciamus. nihilque iam per vos nepo-  
 tes eius relictum sit, quod nobis incommodo, detrimentoque nostro admo-  
 dum dolendum putemus, siquidem quicquid & in eo mali erat, vestra suc-  
 cessione mitigatum, & abunde compensatum est. Proinde feramus vtcunque,  
 quod nobis amplius reuocare integrum non est, & plane sic animati simus,  
 ac ipse si adesset, qui nulli vnquam fortunæ succubuit, qui in nulla calamitate  
 ne animum quidem demisit: neque eius manes squalenti mœrore & tristibus  
 lachrimis, sed potius exquisitissimis quibusuis honoribus, monumentis, gra-  
 taque memoria, in qua mortuorum vita posita esse solet, prosequamur. Ac  
 in ea parte Reipublicæ Christianæ in primis gratulemur, quod ille non solum  
 effecerit, vt se viuente nobiscum feliciter ageretur, sed etiam per vos posteri-  
 tati prospexerit, vt quam diutissime bonis & optimis principibus nobis per-  
 frui liceret. Quapropter mihi in præsentia hæc qualiscunque non tam pub-  
 lico, quam meo priuato nomine suscepta est oratio. Cur enim & nobis  
 non liceat, quod adeo tacitis iudiciis probamus, clara etiam aliquando vo-  
 ce testari? Quandoquidem omnes eam sententiam tenere debemus, vt in  
 Imperii vestri salute ac felicitate, salutem quisque suam & vitæ tranquilli-  
 tatem contineri, atque inde pendere arbitretur: Vel si id ad communem  
 tantum salutem pertinet, non quauis etiam præcipue chariorem æstimare,  
 nemo (credite mihi) hoc tempore aut à rebus publicis ita animo abhorret,  
 aut suas priuatas ita negligit, qui dum intelligit, (quis autem iam non in-  
 telligit) quam præclarum de omni republica in illa sapienti electione ad bene-  
 sperandum signum sublatum sit, quamque salutare rebus humanis tandem  
 ex imperii vestri fastigio sydus affulserit; qui non protinus omnem dolorem  
 à se excludat, cui non lachrymæ ultro exarescant, quiue non penitus ex ani-  
 mo recreetur, factumque illud subinde gratulatione & plausu prosequatur.  
 Cuius rei vel ego vobis maxime locuples testis videri possum, qui & si ne-  
 scio fortunæ an facundiæ tenuioris sim, nequaquam tamen facere potui,  
 quin hoc iuuenili ardore succensus, meam, & aliorum quoque sententiam,  
 ac simul spem, quam toto pectore concepimus, oratione simplici quidem,  
 p.423 sed (nisi fallor) ingenua & plane sincera recudere statuerim. Verum ante-  
 quam eo prolatur oratio, ostendendum mihi prius videtur, electionem il-  
 lam Maximiliani Cæsaris meritis esse debitam; tum communi omnium saluti  
 necessariam fuisse, tum fructuosam futuram, si eius instituti, & supremæ vo-  
 luntatis rationem habendam quamprimum duxeritis. Vnde quod proprium hu-  
 ius orationis esse debet, vtrique per se ultro existet. Nam commemoratione  
 rerum ab eo gestarum vos facile solabimur, omnesque lachrymas recenti ad-  
 huc dolore profluentes abstergemus; & simul animos vestros iam sua sponte  
 ad eius imitationem nitentes excitabimus. Neque enim vereor vos Principes  
 humanissimos eo æmulandi studio, quo olim Alexandrum Macedonem, ex-  
 arsurus, quem veteres paternas laudes parum æquo animo admisisse comme-  
 morant: sed multo eas lubentius quam vestras proprias agnituros. Et quia  
 uitæ ac cum vestris communes sunt, & quod ultro iure quodam hæ-  
 reditario in vos redundare videantur; nec aliunde vobis exemplar, ad  
 cuius imaginem viuendi rationem instituatis, & omnes vitæ vestræ actio-  
 nes formetis, petendum sit. Atque vtinam mihi esset ea felicitas ingenii,  
 tantaque dicendi vis & copia, vt res eius gestas si non admodum verborum &  
 orationis insignibus exornare, saltem pro dignitate abunde enarrare possim.

Proposio.

Electio quibus  
ex causis fru-  
ctuosâ sit.Alexander  
Macedo.



*Narratio.**Maximil. laus  
à fortune con-  
temtu atque vi-  
ctoria.**Fortuna ceca.**Per Maximilianum fortune  
virtus superior.*

Nihil equidem in votis optatius haberem, quam me eo totum conferre, & quicquid studii ac industriæ esset, in tam Augusto & perenni fonte consumere. Nunc vero quando virtutibus illis nulla oratio par inueniri potest, riuulos tantummodo aliquos ab ipso capite & fonte ducere, atque eos summis (vt dicitur) labellis delibare mihi in animo est. E quibus elucescat, res eius gestas, nusquam cum fortunæ artibus, quo nihil in Imperatore præstabilius fieri potest, coniunctas fuisse. Fecerat enim (vt iam inde exorsus orationis meæ proficiscatur) Virtus tandem Maximiliani Cæsaris & diuina illa in rebus gerendis animi moderatio, vt mortales, qui antea longe maximam vim in Fortuna esse vel secundas ad res vel aduersas arbitrabantur, quique nihil tam in Imperatoribus requirendum quam fortunæ erga eos propensum fauorem perpetuamque blandientis quasi matris indulgentiam statuebant; nunc sane multorum conspiratione atque tacito quodam consensu eius auctoritatem labefactari & dignitatem obsolescere paterentur. Porro quam paulo ante rerum humanarum reginam diuinis prope honoribus coluissent, iam eandem villo vsquam in numero putarent, plerique vix virtutis ministram aut pedissequam quanquam agnoscerent: Alii, si optio daretur, iratam atque plane aduersantem quam secundam experiri gloriosius ducerent. Quanquam ea multa sæpe ingentiaque cum virtute, penes quam nam foret rerum summa, certamina edidisse visa est, & plerumque victoria post veteres illos & optimos quosque Romanos seu Græcos siue Germanos Imperatores, à fortunâ stetit, qui nullas omnino res arduas fortunæ auspiciis, sed solo virtutis ductu gerendas putarunt: quæ nunc ea inprimis de causâ aquæ vos viuunt, semperque quotienscunque fortium virorum mentio orietur, æterna in laude versabuntur. Nam quotus deinde quisque non auersatus virtutem, solum arridentis fortunæ ipsius insidiis res magnas aggredi ausus est? Quos tantum abest cum illis conferam, equidem vt vix in laude aliqua ponendos existimauerim: Quid enim indignius videri potest, quam eam quæ etiam cæca ab vniuersa antiquitate fingitur, ducem rerum gerendarum extitisse, in ipsos Imperatores imperium habuisse, atque vltro in tantarum laudum communicationem venisse? Eam (inquam) quæ fere semper obscurorum, ignauorum & (quod præcipue detestandum) improborum hominum impensius quam bonorum votis fauit & eorum gloriam aluit. Cuius præterea cum illecebras insidiosas, successus fallaces, tum quoque constantiam laudis commendatione nonnunquam caruisse animaduertimus. Quippe plerosque magnos Imperatores, & alioqui omni posteritate dignos, quorum fortuna ob diuturnam, & nimiam erga eos facilitatem veluti dormientium rete trahere visa est, non aliunde verum illum solidæ laudis fructum percipere nequiuisse, nisi quod nunquam alteram & vertentem experti è vita decesserint, in qua nimirum fortes & iuxta sapientes ab imbellibus & temerariis tanquam in aliqua gladiatorum arena non obscure dignosci solent. At virtutis cum semper alia ratio fuerit, quod nullis vnquam aut ignavis, aut improbis ad eam aditus patuit, quodque bonos solum bonis cumulare, honoribus complecti, immortalitatisque gloria fouere solet; non socordiæ, temeritati, corruptioni, fauori, largitionibus, popularibusue auris obnoxia, pauci admodum mortalium ad eam cursum tenuerunt: Ita vt iampridem ab omnibus pene rursus destituta & neglecta, haud multum abfuisse videatur, quin fortunæ penitus concedere & victas manus dare coacta sit, si non ocyus per Maximilianum August. dignitatem suam recuperare atque pristinum omnem splendorem recipere coepisset. Nihil certe (vt omnium iam fert sententia) post hac Virtuti à Fortuna reliqui factum esset. Cum enim consilia, res, rationesque illius, ab ineunte ætate animo & cogitatione paulo altius complectimur, non solum nihil vnquam ab eo domi militiæque susceptum institutumque intelligimus, in quod fortuna meram illam potestatem suam



suam ostentare potuerit, quin id antea animo prouiderit, seque aut ad fortiter excipiendum, aut sapienter declinandum præparauerit: verum etiam videtur in præliis ipsis (vbi illa eximia auctoritate pollere creditur) semper simul vna eademque victoria & hostes & fortunam superasse. Quæ quidem non tam à fortitudine & rei militaris scientia, quam ex interioribus animi & sapientiæ fontibus nascatur, indeque omnis principium & originem ducat necesse est, eius sola vere & proprie victoria vocari poterit, aliorum casus & euentus fortuitus. Cuius quod illustrius (ne superiorum temporum memoriam repetamus) argumentum sumi potest, quam quod ætate hac nostra, qua ille rerum gubernacula felicissime moderatus est, viderimus interim tot Reges & principes fortuntiores quam prudentiores, temere demum in pericula perlatos, aut amissis exercitibus in hostium venisse potestatem aut in acie turpiter cecidisse, alios tumultu & seditione militari oppressos, alios suorum ciuium foeda conspiratione propriis & auris regnis exclusos, alios insidiis exceptos & crudelem in modum è medio sublatos. Quoniam ipse iam inde vsque à teneris (vt aiunt) vnguiculis, non vt illi ad magnum fortunæ splendorem, sed verum virtutis cultum educatus & quasi in ipsis cunis, formatus fuerit; atque pubertatis annos egressus (in quo flexu ætatis, natura profundere solet omnes adolescentiæ cupiditates, præfertim in eo fastigio vbi facile licet quod libet, ipsæque ob potentiam & omnium rerum affluentiam minus compressæ constrictæque esse consueuerunt) tum multi vndeque ad deprauandam parati obrepere, qui splendore falsi honoris obiecto, sæpenumero aciem bonæ indolis perstringunt, & plerunque flebilem adhuc ætatem illam, iam fortunæ blandimentis inescatam, iam adulationibus obrutam, variis voluptatum illecebris à recto deuocant, generosumque illum principis animum, aliorum quam oportet ducunt ac violenter deflectunt; eos ille tanquam scopulos aliquos in illo annorum decursu præteruectus, semper in bonorum & fortium consuetudine adquiescere contenderit, deditus optumis disciplinis, iisque artibus quibus principes ad vsum rerum publicarum, ad capeffendum imperium, ad honorem, gloriam, dignitatem instruuntur. Quamobrem quam primum paulum roboris animi eius ornamentis accessit, tantum de se subito, apud omnes populos adultæ iam virtutis specimen præbuit, vt eorum principum, quorum ea potestas est iudicio, quo nihil fieri potest rectius aut exactius, ac non modo omnium amplissimorum imperii ordinum consensu, sed miro totius orbis terrarum adplausu, viuente adhuc patre & id minime ambiente, imo potius (quæ illius erat modestia & animi candor) repugnante, Imperator renunciari meruerit, ne tum fortassis quod aliquando fortunæ arbitrio subiacere videbatur, eos diutius spe dubia torqueret. Voluerunt scilicet principes prudentissimi, in ea parte Fortunæ varietatem & petulantiam, sapientia & certa inuenta ratione antenerere. Maximilianum tempore ab eius procacitate vindicare, atque vniuerso humano generi mature consulere. Imperator itaque declaratus, quod tempus pueritiæ extremum, principium habuit bellorum atque imperiorum maximorum, in quibus virtutes quoque eius Imperatoriæ longe lateque in omnium gentium ora sese diffudere. Adolescens enim, nec dum integra ætate, patrem Fredericum tertium iam annis grauem omni Imperii & curarum mole alleuans, statim famam indolis eius expectatio, expectationem omnium de se susceptam virtus admiratioque vicit. Quin (quod mirum auditu) solus iam tum eos gloriæ fructus percepit, qui antea vix aliis Imperatoribus prope acta decursaque ætate obtigerunt. Proinde nouem continenter annis nusquam è castris ne quidem pedem digrediens, bella illa grauissima cum Gallis, Eburonibus, Sicambis, Batauis, atque Morinis, nationibus accerrimis, quæ olim toties Romanorum arma fatigarunt, totque finitimorum Regum opes attriuerunt, eius tum prima militiæ rudimenta videri poterant, non solum non profligauit, sed ita confecit, vt gentes illæ quamuis effera nunc

Regibus fortunatis quæ aciderint.

Max. educatio.

Electio, Imp.

Max. electus, Imp.

Max. quando bellum gerere cepit.

Bellum cum Gallis, &c.



pacatae omnes conquiescant, & illius victoria Imperioque vestro latentur. At quibus in bellis quemadmodum praeque illustra eius facta non modo ante aliorum res gestas eximie lucent, sed inter se etiam mirifice certant, sic non facile est constituere plus ne pietatis aut admirationis apud posteritatem sint habitura. Atque adeo ante alia, an quod Carolo Belgarum Rege rebus gestis quidem florentissimo, sed tum nescio quo misero funestoque fato à Leucis & Heluetiis oppresso, infelix qui sibi paulo ante illud fortasse animo praefagiens unicam <sup>p.425</sup> filiam Maximiliano uxorem destinauerat, prius patriae eius se vindicem quam generum praestiterit, dotaleque regnum iam antea à Gallis occupatum parua subito manu, at magnis animis ingentique spiritu irruens victis & fuis innumerabilibus hostium copiis liberauerit, ac regias nurus indignissima fortuna prostratas, è squalore, lachrymis, & crudeli seruitute subleuauerit? An quod Frisios populos illos bellicosissimos armis adortus post tam multa egregia & plane immortalia à se edita facinora, eos Imperio vestro, qui antea nihil nisi effrenatam libertatem & arma fremebant, adiecerit? Vel quod Morinos finitimorum scelerata coniuratione excitos, & ei iam ingentibus viribus rebellantes tanta virtute, assiduitate, consilio, post longam tandem & memorabilem obsidionem fregerit, eosque aeternis non tam armorum quam clementiae vinculis astrinxerit? In quo vno quoque illo bello nondum facile liquet, vtrum ei honorificentius fuerit, num quod populos ferocissimos atque vrbes munitissimas in deditionem receperit, an quod praeter omnium expectationem sibi à cade <sup>Adolescens à</sup> <sup>Morinis captus.</sup> temperauerit, illisque qui eum adolescentem patri ciuili conspiratione ademerant, & rursus qui ab eius amplexibus filium unicum patris pignus aliquandiu diuellere non dubitauerant, ignouerit. Vnde adhuc in omnium memoria & admiratione extat praecleara illa & sane regia vox, qua rogantibus plarisque: *Cur male de se meritos non ocyus male deperderet, respondisse ferunt: Quin parcendum esse, ut rursus victis saepius ignoscere sibi integrum esset.* Sed ne omnium eorum bellorum seriem retexere videamur, quibus laudibus posteriora illa bella redundarunt, traducto fere eodem tempore protinus in Pannonias exercitu, quo multarum gentium difficillimis praeliis victor, tot pene victoriis, quot passibus itinera illa virorum fortium virtute & dextera vndique obuallata, tantisque armorum studiis passim flagrantia, peruasit, atque citerioris Pannoniae autum patriumque principatum, patri eius per suorum insidias à gentium illo <sup>Bellum in Pannonias transfert.</sup> terrore Matthia rege ademptum, maiori gloria, quam alii possederant recuperavit. Et rursus ne virtus militaris, quam ipse plane ad pristinum decus tam diuturna exercitatione excitauerat, ocio elangueret, atque eius militibus vsquam ab armis respirandi locus foret. Non tum Caesar Fortunam ipsam aperte prouocasse videtur, dum bellum cum Heluetiis longe omnium atrocissimum, quod nemo vnquam ante eum ausus est, tanto studio suscepit, ut ad eorum fedes, qui antea ob loci naturam, & alpium quaedam quasi claustra, & rupium repagula auii, inaccessi, & ex omni aditu clausi credebantur, penetrauerit, victricesque Imperii aquilas eo vnde toties Romanae quondam rerum dominae repressae fugataeque fuerant, intulerit. Quod quidem bellum quamuis diu magnis vltro citroque luctibus funeribusque redundauit, ei tamen haud dubie immortalitatis gloriam summopere augebit, quid id non solum tanta animi magnitudine tam constanter, in alienissimo loco, inter alpium angustias, niuium oppositus, torrentium & rapacissimorum fluuiorum veluti obices, rem prope contra rerum naturam gesserit: verum quod populos & nationem plane factam & natam ad libertatis propugnationem, reique bellicae scientissimam, quam alii Imperatores refutandam potius bello, quam laceffendam putauerunt, domuerit, eique pacis & perpetui foederis condiciones dixerit, imperioque parere assuefecerit. At ne tum quoque post tot grauissimos exhaustos Martis labores & ærumnas, fessa Virtus Fortunae cedere, & veluti in cursu lampada tradere videretur, eique aliquando parta quies esset, an non (quæso) bellum etiam illud, bellum



bellum exemplo grauius exceperit, quod cum principe Palatino Rhēni ipsius tyranno opibus & armis instructissimo, eo prope inuito gerendum fuit. Inuito, dico: semper enim pro natura sua, quantum nemo alius princeps, à ciuili sanguine abhorruit. Sed quando id ita casus tulerat, & hominis præpotentis im-  
 portunitas & insolentia indies magis ac magis progrediretur; Fortunæ & tem-  
 pori seruiendum fuit: opinor, ut inde quoque nomini eius aliquid claritudinis accederet. Nam breui eum non minus insigni industriæ eius fama, quam ar-  
 morum laude, ad poenitentiam compulit, ad officium reduxit. Quis vero ignorat, quanta id temporis in imperio procella excitata, quam facile eius pru-  
 dentia & vigilantia confederit: quandoquidem bellum (ut sæpe solet) ex bello  
 natum maximum: quia ille stipendiorum largitate, & ingentium præmiorum  
 spe, & profusione, finitimas gentes vndique in eum exciuerat, atque postremo  
 virtute & disciplina militari florentissimum Boemorum exercitum conflauerat,  
 qui cum nisi Cæsar commisso acerrimo prælio memorabile admodum edidisset  
 documentum, quanti exteris in fines Germanos arma ferre constaret, salus &  
 fortunæ nonnullorum sæpe non in leue discrimen adductæ essent. Verum ipse  
 tantum ex eo bello laudis ductando exercitum, instruendo acies, pro primis  
 p.426 signis nescio melior dux imperando, an miles pugnando reportauit, quantum  
 vix alii ex longissimis quibusque bellis non solum non sperare, sed ne quidem  
 optare ausi fuissent. Mittam interea quoties influentes in Italiæ fines Turcas re-  
 presserit: quoties sociis & foederatis urbibus opem laturus cum capitis dimica-  
 tione aduolauerit: quoties ad Sequanos per ferrum & ignem, totque confer-  
 tissimas hostium telorumque acies penetrauerit. Et rursus quanta celeritate  
 quam infesto agmine Pannonias repetiuerit, cum Rex Vladislaus (quo nemo  
 natus erat melior, iustior, aut sanctior princeps) sine hærede regnum relictu-  
 rus videretur; & eum tanquam disceptatorem & simul successorem accersiuisset,  
 quia plerosque regni proceres ad id largitione & perniciosis factionibus anhela-  
 re compertum esset. In qua expeditione præter militarem laudem, animi eius  
 quoque æquitas insigniter enituit. Nato enim regi in ipso rerum motu præter  
 omnium spem diuinitus filio Ludouico (cuius nunc adolescentis virtus tantum  
 superare coepit ætatem, ut breui vnus & idem eius annorum & imperiorum pro-  
 gressus futurus videatur) eum ipsum inquam Cæsar primum hanc lucem aspicien-  
 tem, coram regni hæredem ultro agnouit, summa pietate pronunciauit, au-  
 ditoritate armata constituit, confirmauit, atque (quod pauci admodum fecis-  
 sent) pedem non dubitanter ex tot regnorum quasi possessione retulit, simul  
 omnem exercitum prouinciæ innoxium reduxit. Etenim Cæsar bella illa, non  
 facile dixerim difficiliora an iustiora, ita semper suscepit, non ut regnandi cu-  
 piditate ea inuasurus videretur; sed quia prouocatus recusare non liceret, non  
 prædæ studio, non quæstus aut præmiorum aliqua spe, non ut finibus eius ali-  
 quid accresceret, nec quia humanum sanguinem ut plerique iam principes siti-  
 ret, latrocinia (me hercle) non bella molientes, quos posteri non immerito  
 piratarum aut nefariorum prædonum nomine, ex causis bellorum, & eorum  
 rebus gestis, potius quam iustos & æquos bellatores censebunt. Præclari enim  
 isti Imperatores, præterquam quod semper ab initio iniustas bellorum causas  
 prætexunt, aut nonnunquam ne quidem de more bello indicto, tanta impie-  
 tate & furore, in Italiam (utpote quæ ante alias maxime prouincias finitimorum  
 incursionibus patet) aut in suorum agros feruntur, ut non tam cum mortalibus  
 quam tectis, aruis, & rebus prorsus inanimis, ferro & flammis digladiari videan-  
 tur; quaquā versum populabundi, nulla sociorum populorum habita ratione,  
 incendentes, perinde ac si rerum natura tum quoque abolenda esset. Jam quo-  
 ties ab illis legatos, foeciales, & Regum caduceatores (quorum sanctitas apud  
 veteres etiam nec verbis aut vultu lædebatur) non tantum contra ius gentium  
 violari, sed etiam per contumeliam plane enecari vidimus? Quinetiam quot  
 icta subinde rumpi foedera, ut noua grassandi causa oriretur? quoties dediti-

*Bellum cum  
 Palatino.  
 Vide Austriad.  
 Ricard. Barto-  
 lini.*

*Turcae.*

*Sequani.*

*Panno.  
 Vladislaus.*

*Italorum ty-  
 ranni.*



Max. obser-  
uantiss. legum.

Max. mundi  
arbitr.

Cæsar Dei  
imago.

Initium belli  
Veneti.

Veneti.

Julius pont.  
max.

Lud. Gallorum  
Rex.

Helvetii.

Henr. Angl.

tios post datam acceptamque fidem aut protinus crudeliter obtruncari, aut assidu-  
dus exactionibus, omnibus fortunis, quæ plerumque spiritum & sanguinem  
ipsum nobis suppeditare videntur, exhauriri: Atque in eum modum quot mi-  
feros, antequam periissent, perire iam vidimus. Quid inquam vidimus. An  
non quotidie his oculis videmus, & multa truculentiora? ut iam non abs re  
miremur superos tam diu in tantis hominum sceleribus conuiuere, & præsen-  
tium fraudum poenas in diem reseruare. Ipse quidem Cæsar etsi sacrarum le-  
gum, quarum conditor erat, catenis solutus esset, voluit tamen ultro legibus  
viuere, & semper se arctissime earum religioni obstrictum videri: ac præcipue  
in eo cæteris principibus exemplo esse, non minus iura belli sancta ac inuio-  
lata custodiri quam pacis oportere. Vnde arma illa semper plena officii, plena  
quocunque penetrarunt pietatis, eo potissimum spectarunt, ut suorum contu-  
meliam propulsarent. Ratus haud minus princeps esse à suis quam à se ipso in-  
iurias arcere, superbos deprimere, subleuare calamitosos, lapsos erigere, le-  
nire iratorum animos, & iusta imperia detrectantium ad officium reuocare.  
Quippe qui communis vniuersorum disceptator, constituendarumque mundi  
rerum diuinitus arbiter, quos officiis inter se conciliare nequiret, armorum vi  
compelleret, omnia dissidentia membra incongruentis spiritus cogeret, concor-  
dia orbem terrarum colligaret. Nam quis vnquam Imperatorum, Dei illius  
Opt. Max. cuius in terris imaginem & personam gerebat, verius dignitatem &  
decus sustinere, quam ipse nuper visus est? Cum omnia ita bellis turbari, &  
armis fremere, non solum hinc apud Gallos, Britannos, illinc apud Heluetios,  
Insabres, istinc apud Hispanos, Lusitanos, Germanos & Sarmatas, coeperant.  
Sed in arce ipsa orbis terrarum Italia, in religionis nostræ sacrario, in Christia-  
næ Reip. visceribus & medullis, tantum incendium conflare alique, ut breui  
omnia collidi, & machina ipsa mundi in antiquum ac confusum chaos mox la-  
befactari, atque omnibus compagibus dissolui videretur. An non quemadmo-  
dum DEus rerum princeps & architectus, elementis quibus hæc omnia confi-  
sunt temperiem, motum, & suum cuique cursum, inæquabili quodam p.427  
firmamento contulit, atque ea quamuis natura diuersa commiscuit, & æternis  
vinculis conglutinavit; sic ipse Cæsar in tanta rerum disiunctione ac perturba-  
tione, vndique fluitantibus & laborantibus rebus humanis subuenit, omnibus  
æquabilitatem restituit, & Reges qui tanquam elementa inter se concurrere con-  
fundique videbantur, partim auctoritate & armis ad concordiam reduxit, par-  
tim comitate & beneuolentia in mutuam gratiam & amorem reposuit. Primum  
quidem Venetos, qui nimia potentia ad sociorum exitium intemperantius ab-  
utebantur, & veluti agitata procellis maria ultra littora in proxima quæque ef-  
feruescebant, erumpebant, cunctaque miserabili finitimorum strage inundabant,  
icto cum Pont. Max. Julio II. foedere eos repressit, & in notos Adriæ sinus com-  
pulsit. Jam vero & Pontifice magnitudine & mole Imperii laborante, mox ei  
absens quidem & tanquam aliud agens, temperamentum circa omne Christianæ  
Reipublicæ detrimentum attulit. Ludouico quoque Gallorum Rege interim,  
qui belli socius fuerat, grauius atque insolentius in Italiæ cervicibus debachante,  
Hispanis atterendum, tum deinde Heluetiis debellandum tradidit, & incre-  
dibili ac pene diuino artificio Italiæ libertatem architectatus est. Quo pulso,  
rursus Heluetios nimio rerum successu ferocientes, suarum alpium finibus cir-  
circumscripsit. Donec tandem (ut id aliquando dicam, quod omnes boni sen-  
tiunt) Cæsar suarum rerum iactura, Italiæ iam latus danti naufragium amoli-  
tus, pacem gentium atque rerum constituit. O clementiam & virtutem admi-  
rabilem atque omnium linguis, literis, monumentisque decorandam. Quis  
verius vnquam salutem hominum quæsiisse videri debet, ipse Gallum ut com-  
muni seruiret tranquillitati, à communium hostium iugulis auertit. Eundem  
multis ei bellorum offensionibus obnoxium, Henrico Britannorum Regi iamiam  
illius regno & populis excidium intentanti conciliauit, eiusque in gratiam po-  
suit.



fuit. Vsque adeo iniuriarum oblitus, ut hostes nouis officiis demereri cogitaret, illis salutem daret, quibus sua inuisa fuisset.

An non cum ad extremum ventum esset, & Julius Pont. iam vtrunque deploratis rebus alio cogitaret vtramuis ad partem adhæsisset, sibi victoriam, aliis exitium attulisset? An non nisi ocyus Gallum è medio victoriae cursu retraxisset, omnia inclinabant, procumbebant? Quotus quæso quisque se continuisset, & non hanc suam occasionem omnia turbandi aduersariorumque vires labefactandi ratus, aut labentis in præcipitum propulisset, aut saltem eam mortalium cladem lætis & conuiuentibus oculis aspexisset, quo minori deinde negotio inimicos & iuxta amicos oppressisset omnesque demum in potestatem suam rede-gisset? Sed noluit clementissimus Imperator tantum illorum temporum indignationem, & inuidens alicuius Nemesis furorem, & grauissimam, ut si quando antea, in res humanas iram progredi. Commodum subuenit, eam repres-sit, Italiam præcipientem excepit, corrumpere non fuit, fulsit, sustinuit, hodieque per vos sustinet. Atque omne incendium sapientia potius extingue-re, quam armis & ferro rem in discrimen adducere maluit. Quas igitur victo-rias, cum illo eius tam diuino facto conferam? suas ne illas superiores, præ-claras quidem, sed saltem vni aut alteri fructiferas prouinciæ. Huius salutes *Max. incom-*  
fructus ad omnes pertinuerunt, omnes saluos præstiterunt. An veterum illo- *parabilis.*  
rum Imperatorum & Cæsarum; à quibus hoc nomen Imperii & decus ad vos demigravit, triumphos aut trophæa, fæde ciuili sanguine madentia, compa-rem? Absit à nobis, quicquam ei præter militare studium cum illis commune existimem: & si magna quidem plæraque (ut re vera magna sunt) longe tamen alia factorum suorum ratio est. Nam illorum bona pars largitionibus, vi, ar-mis, factionibus, insidiis, & nonnunquam per scelus & flagitium ad principatum sibi aditum aperuerunt: ipse nobis cælitus datus princeps, & omnium morta-lium liberis suffragiis Deo inspirante constitutus erat. Illi hominum cædibus regna fundabant, suorum ciuium sanguine firmabant, metu & formidine mu-niebant: Ipse firmissimum semper principum munimentum hominum erga eos beneuolentiam existimans, quantum fines regnorum suorum, tantum & mor-talium in se amorem propagauerat. Ut sane nunc in dubium veniat, vtrum eum plus sui amarint, an exteri, an victi suspexerint, cum quibus eorum etiam confessione felicius iam agitur quam si eos nunquam vicisset. Veterum præter-ea illorum virtutes in plærisque æquabant vitia, & in multis (ut eorum testan-tur monumenta) eminebant, superabant. Denique quicquid aggrediebantur, fortunæ quodam flatu ad ea ferebantur, quæ si secunda cadebant, protinus men-tis impotes voluptatibus diffuebant: si aduersa, penitus animo frangebantur, & plerumque (quod plurimorum exitus nobis documento fuerint) Fortunæ pror-pus impares aut se Imperii abdicabant, aut è propriis regnis profugi, sibi ma-nus desperanter afferebant, sibi que ipsis vitam ferro aut veneno exhauriebant, & omnem tandem vitæ splendorem alicuius facinoris turpitudine commacula-bant. Ipse vero omnes virtutes sine labe, sincere & puriter complexus, in fortuna secunda temperatus, in aduersa erectus, nusquam de statu suo decli-nauit, nunquam ne transuersum quidem vnguem loco cessit: imo quo illa in eum grauior & infestior incubuit, tanto præsentiori animo eam tulit, aut ma-iori impetu repulit. Nempe illa quod de eo periculum non fecit? Patri eius *Freder. 3.*  
Frederico paternum principatum ademerat, ut ei armis rursus, qui aliis ex te-stamento obuenire solet, redimendus esset. Eum Brugis adolescentulum im-piorum ciuium sceleri obiecerat, ut & à suis aliquando vinciri & contra hosti-bus victis ignoscere disceret. Jam vero florenti ætate, & animum paulum læ-tioribus adiicienti, ei nouam nuptam & simul regnum dotale auferens, in ho-stium detulerat potestatem, ut quod aliis vltro dotis nomine cedere solet, ei per tot rerum discrimina petendum esset. Scilicet ut pro genialibus gaudiis, pro lasciuis puellarum choreis cruenta Martis prælia confererentur, ut classica *Brugis.*  
*Sponsa ad*  
*empta.*  
eius



*Philippus.**In Fortunam  
amuehitur.**\* Paria.**Redit ad Adax.**Bellum Vene-  
rum plenum per-  
fida. Quibus  
auspicis bellum  
hoc gestum fue-  
rit.*

eius hymeneum canerent, ut loco nuptialis pompæ fulgentes ære acies, ordines militares & passim triumphum ducerentur, nec prius sponsum, quam victorem inclytum ageret. Probanda certe si usquam alibi in ea parte, quod omnia ea ad eius laudem pertinere visa sunt, si non mox deinde sibi nimium de eo permisisset, omnemque inuidiam in unico illo eius filio Philippo, quem honoris amplitudinisque gratia nomino, patre vestro exprimere voluisset. Sinite hoc loco, Principes optimi, me aliquantisper cum immiti atque implacabili nouerca illa expostulare, & facti illius acerbiter vicissim apud vos, quoquomodo illius diei recordatione in inuidiam vocare, quo equidem credo Solem ipsum maestissimum & sane inuitum mortalibus luxisse, neque antea quicquam vidisse vnquam in terris aut grauius aut indignius. Quis enim tum fuit tam inhumanus, quis tam agresti aut duro pectore? qui non ex florentissimi illius adolescentis tam immaturo interitu acerbissimum hauserit dolorem; cum è sinu, è complexu eius paterno abstraheretur, qui ea indolis præstantia, ea morum suauitate, illis diuinis corporis & animi dotibus, ad imperium non natus sed plane de cælo demissus videbatur. Cum terris eriperetur indignissime à sæuienti fortuna, in quem prius ipsa tot ornamenta contulerat, ut iam ei addi nihil possit atque extra omnem eius aleam crederetur. In quem præterea omnes boni non dubias spes collocauerant, fore, ut per eum cum immortalitatem quandam adipisceremur, tum nobis propediem prorsus aurea illa sæcula restituerentur. Ignari illius liberalitatem non alio spectare, nisi ut tandem quale nunquam antea, impotentia suæ ederet exemplum. Ergo & tuum illud Fortuna fuit facinus, tuum scelus? Quis tibi deinceps mortalium fidem habere velit? Hæc sunt ludibria tua. Siccine iuuat in rebus humanis lasciuire? Quæ (malum) ista maleuolentia, optumis quibusque grauissime inuidere, & subito data exprobrare ac repetere munera? At vtinam tua solum tuo iure repetisses, nobisque illo, omnibus tuis insignibus nudato, & veluti exautorato, frui diutius permisisses. Et non simul fatales illas, quas antiqui haud iam falso fingunt sorores, \* ad tam acerbum ac flebile funus concitasses. Cui certe illachrymarunt omnes exteri populi, quod etiam fleuerunt hostes, quo indolere certatim prouincias, & totus denique orbis terrarum graui pressus desiderio, vix sibi adhuc à lachrymis temperaret, nisi pauloante (quæ eius vicissitudo est) omnes in spem vocasset, breui tantam patris iacturam per vos Principes clarissimos, liberos eius, restitutum iri. Sed ne forte veteris doloris cicatrices recenti renouare & hac commemoratione refricare videar, quis itaque tanto animo filii mortem, & eius filii qui magis in funere è luctu puer, quam alii in longæua vita claruit, tulit? Quid Cæsare magis exercitum dici aut fingi potest? Cui vnquam fuerunt in tanto fastigio eiusmodi bella cum Fortuna pugnanda, qui se non ei postremo summiserit, qui se non supplicem ad eius pedes abiecerit? quam ipse demum solus tumultuantem posse comprimi, & quantumvis volucrum & inconstantem, quasi vinculis necere docuit. Quippe bellum hoc recens Venetum, cuius classica adhuc in auribus atque eorum clangor in intimis hominum sensibus hæret, tametsi hætenus difficile diiudicatu fuerit, quod eo nullum post hominum memoriam, æque inexecrabile, totque regum ac principum (dicam enim libere quod sentio, & quod mecum sentiunt omnes) non tam armis quam perfidia implicitum à quoquam gestum est; nihil tamen ex eo sibi casus aliquis fortuitus decerpit, nusquam fortuna in istius societate gloriæ se offert. Ei quicquid id est cedit, suam esse fatetur hanc diu quidem virentem lauream: sed quo serius adolescentem, eo gloriæ fertiliorem futuram. Gessit nimirum hoc bellum, ut suo iure, sic sua propria virtute, suis armis & opibus, non regis, non Cæsaris nomine, sed ut principis priuati: si quid modo priuati in principibus fingi aut cogitari potest. Sed noua quadam belli gerendi ratione, ut hostium vires citra aliorum quantum fieri possit, offensionem affligeret, & eorum opes subinde cunctatione attenuaret: veruntamen simul vellet nollet



nollet, & Cæsaris dignitatem, & innocentium salutem ex omni parte tueri videretur. Cum enim in hoc bello tam diuturno, tam longe lateque diuiso, & disperso, nullo non aperto prælio victor extiterit, parta victoria uti noluerit, quin etiam nonnunquam eam ultro è manibus dimiserit, abiecerit, fugientes sæpe hostes aut persequi noluerit, aut pulsos & septis inclusos, iamque deditio- nem facturos obsidionem soluerit, ac etiam ut sæpe solent generosi leones, for- tasse imbellem & ignobilem prædam perosus victor, ultro Italia excefferit, & ita excefferit, ut sine vlllo mortalium & agrorum incommodo iter faceret, tan- taque innocentia exercitus duceret, ut ne arbor, ne viticula pene vsquam de- sideraretur: quid aliud voluisse videri debet, quam Italiæ salutem & bonorum incolumitatem. Porro illorum tyrannis cum multorum iamdudum fortunis coniuncta, & penitus cohærens, qui fieri potuisset, quin tanta ruina vno eo- demque casu bonam partem Italiæ secum in eandem traxisset calamitatem? No- luit committere vsquam illud, quod iam adeo multi probarunt, ipse quoque probasse videretur. *Pereant amici, dum vna inimici intereant.* Qua voce ni- hil fieri potest (ut ille inquit) inhumanius, nihil principe homine indignius. Ne- que vnquam putauit lauream illam magnis florentem periculis, longo tempo- ris intervallo, viriditatem amittere, modo hostes seorsum à bonorum calami- tate, quoquo modo mularet. Quamquam erat quodam tempore tanta ho- minum animis offusa caligo, ut eius instituti rationem & mansuetudinem non- nulli non intelligerent, alii dissimularent aut non agnoscerent. Fuit enim, fuit iamdudum huius sæculi labes quædam & macula, Virtutis fructus fortibus at- que bonis inuidere, eorumque gloriæ florem carpere, & impiis obtrectioni- bus infringere. Quin etiam multorum adhuc tanta est inuidia, ut non desint qui ea, quæ in priscis laudibus prosequantur, eadem in nostri temporis homi- nibus nonnunquam multo illustriora aspernentur, ac in finitima quæcunque vir- tutum vitia maligne detorqueant, aut eis omnino lucem adimant. Etenim ipse *Que vitio da- ta Max.* (ita me Dii ament) quoties his auribus hausi, eos qui cum aperte virtutibus ob- trectarent, iam liberalitatem Cæsaris nobis vitio vertere, iam clementiam pro- bro dare, iam iustitiæ æquabilitatem, mali consulere & detestari non vereren- tur. At illi nescii tum fortasse Jouem sero quidem diphthæram, illam quam antiqui omnia hominum facta continere crediderunt, sed aliquando non sine magno mortalium malo intueri, non sine fulminibus maleuolorum nomina ex- cutere. Nunc vtinam reuiuiscerent veteres, illi ipsi Fabricii, Maximi, Pauli, Marcelli, Scipiones. Equidem credo (absit inuidia verbo) alios potius quam *Romani non Roman.* plerosque ciues suos verum genus & Romanum sanguinem agnituros. Vide- rent enim quo imperii sui dignitas & gloria commigrasset: quibus gentibus *Germanorum laws.* splendor ille luceret, atque ea de re æquiori forte animo occasum imperii sui tolerarent. Dicerent dolenter quidem, sed paulo incorruptius sententiam, vtra gens plus à maiorum moribus degenerauisset, vtra remotius à veterum & eorum institutis recessisset, apud quosnam esset minus deprauata virtutis, inte- grior fides, viuendi consuetudo syncerior, religio sanctior, apud quos disci- plina ipsa militaris cultior. Puderet fortasse Alexandros & Cæsares plerosque fortunæ suæ, quam olim tantopere admirabantur, & tanquam vnicam filiulam exosculabantur; si eam virtutis non comitem amplius, sed ministram & man- cipium quoddam intuerentur: atque (nisi fallor) summum acciperent dolorem, quod eis hoc temporis vestro imperio, quando æquo pulchrum vinci ac vince- re fuisset, nasci non contigisset. Enimvero illi faterentur, hac ætate non so- lum sui similes esse, sed quos etiam libenter imitari non ob fortunæ artes at virtutis verum decus, velint & iure optimo possint, quin reor interim non tam obstupescerent ad nonnullorum ingentia facta & præclara inuenta, quam animo perhorrescerent ad tam infractum robur, & tantam adhuc in eis qui suarum le- gionum quondam toties firmamentum fuerant, laborum tolerantiam, vitæ



contemptum. Fidem non quandoque in vno aut altero vsque ad aras, sed omnium ad perspicuam mortem, ad apertissimum interitum, promptam ac paratam; audientes insuper machinas & tormenta bellica Iouis fulmina imitantia, à quibus primum excogitata, solum eorum virtuti & animo, præ omnibus gentibus inferiora. Pigeret haud dubie eorum pluresque Imperatores, in tanta vicissitudine rerum, tot olim labores in vestibulo Alpium incassum recidisse, tantum Romani sanguinis nequicquam ac Rheni ripas exhaustum esse. At esto, hæc iam plerique dissimulauerint, mirabitur ea tanto magis aliquando posteritas. Non enim erit hæc inter eos qui nascuntur, sicut inter nos est, dissensio atque tanta animorum distractio. Nempe<sup>p.430</sup> iudicabunt sine odio, sine inuidia, & cupiditate. Nemo in Cæsare iracundiam, nemo implacabilitatem aut crudelitatem requirit. Omnes vno ore animi eius moderationem, consultam cunctationem, in summa potestate rerum omnium modum. certatim laudibus ad cælum efferent. Atque eum, vt in aliis bellis Imperatorum fortissimum, sic in isto vno, in quo multorum scelus & furorem cedendo quam resistendo (ne omnibus sine discrimine obesset) frangere maluit, certe omnium sapientissimum prædicabunt. Vulgo iam quidem apud omnes bonos eum Fabium Maximum, ob hanc insignem belli administrationem, celebrari audimus: cuius quondam cunctatio & prudentia, Hannibalis iuueniliter exultantis emolliuit audaciam insolentiamque fregit, & qui nunquam vanis rumoribus salutem ciuium suorum præuertit. Quid si eius facta diligentius expendere, & huius tenebrosissimi belli latebras atque inextricabiles nodos discutere & penitus eruere vellemus: quantum se vndique sapientiæ eius lumen offunderet? quæ consiliorum exactissimæ rationes oborirentur? quam longo interuallo Fabium illum à se post terga omnium iudicio, relinquere videretur? Non enim temerarium iuuenem, magis generosos quam viles spiritus præ se ferentem, eum vicisse animaduertemus, sed eos hostes vectigales fecisse, qui antea vix naturam & conditionem vt vinci possent habere videbantur.

Proinde quod omnium quidem sententia admirabilius, quæ & quanta interim dum hoc ipsum bellum administravit, gesserit; quod difficillima itinera, tam corpore, quam animo indefessus, summa celeritate (quando & id ad præstantem pertinet Imperatorem) confecerit: quot sæpe aduentu suo iam labanteis Resp. erexerit, vacillantes populos in officio retinuerit, quoties fessis rebus succurrerit: quot seditiones apud Heduos, & Pannonos atque in ipsa sua Germania restrinxerit. Dederunt enim non pauci, inflammati inuidia operam, quæ nimirum (vt Solis radii) altissima quæque ardentissime ferire solet, vt ei per suorum aut finitimorum clandestinas factiones, aliquando parum felicia tempora inciderent. Quæ semper ab eo sapienter præuisa, summa constantia sustentata, incredibili virtute depulsa, non modo non imminuerunt clarissimam eius gloriæ existimationem, sed etiam honestarunt atque cumularunt. Age vero ad hæc non inter postremas laudes connumerandum, quod nemo eo interea sapius de Reipubl. Christianæ salute & commodo ad orbis terrarum principes in concilio retulerit, nemo eo crebris Regum congressibus clarior extiterit. Non solum enim ad eum, vt olim ad Augustum Cæsarem ferunt, omnes fere principes terræ munera & legatos misisse, verum ipsi Reges, principes, tetrarchæ, dynastæ, ad eum ab vltimis Britannis, è Pannoniis, & penitissima Scythia summo studio contenderunt, vt coram Augusto eius conspectu colloquioque fruerentur, vt eum communem omnium patrem certatim consalutarent: quos ipse non solum liberalibus inuicem officiis deuinciendos, sed perpetuis propinquitatis & necessitudinum vinculis obstringendos, gentique suæ arctissime copulandos censuit. Gnarus ea tandem esse iusta, diuturna, certa-que & firma Imperia, quorum in possessionem vi sanguinis & iure quodam hæreditario inducimur.

Cætera



Cætera quemadmodum violenta, sic lubrica, fluxa atque odiosa. Hæc itaque cum quis audit, nullum eum interea bellum gessisse; si bellorum molem ac seriem reuoluit, nullam earum rerum curam potuisse habere existimat. Magni hoc certe fuit hominis, tot undique circumfremantibus fluctibus atque procellis armorum, nunquam de sana mente deturbatum esse, non animo concidisse ac semper rectum in omnia & inconniuentem vultum tenuisse: verum in hoc ancipiti bello Veneto animum vicisse, iracundiam cohibuisse, victoriæ ferocitatem temperasse, id non summi herois, sed potius DEI alicuius iudicandum est. Quapropter hic mihi dicenti splendor ex improviso eius numinis oboritur, & quasi luminibus aciem animi perstringit, quo minus me plura dicere parantem, sperem tantam gloriæ altitudinem verbis aut oratione posse consequi. Mittam itaque in præsentia has tantas, incredibilesque virtutes, atque eo lubentius, quod quasi maioribus theatris omnibus propositæ sunt, & per se nitent. Tum cætera quoque studia illa regia tacite existimanda relinquam, tot exquisitissimarum artium ornamenta, etiam illarum quæ in vmbra sine summo ocio non facile discuntur; tam diuersarum linguarum scientiam, vt omnibus populis sine interprete iura dixerit & responderit, tamque propensum erga bonas & liberales literas amorem. Quas ipse vicissim non minus regio splendore illustrauit, quam eum ipsum ornarunt, semperque quoad in hominum usu erunt, ornabunt, cui certe tantum debent, quantum vel omnis posteritas eo celebrando promereri vnquam poterit. Nam quando natura ita comparatum est, vt omnes maxime velint suos imitari principes talesque videri, quales ipsi sint; atque ob id sæpe à magis hominibus obseruatum sit, qualescunque summi ciuitatum viri fuerint, tales & ciuitates fuisse, quam facile sui imitatione factum est, vt Germania, quæ antea nihil nisi horrentia Martis studia colebat, nihil nisi arma tractabat, nuper in ea non aliter rectæ ingenuarum literarum disciplinæ efflorescere, eximiaque ingenia excitari cæperint, quam vt fruges aeris temperie liquidioreque cœlo vberius prouenire solent. Vnde iam illud audimus crebris vbique, quod olim de Alexandro Magno, usurpari sermonibus, *excellētis ingenii & virtutis viros non tam sub Maximiliani tempora quam propter Maximilianum extitisse*. mittam & peculiare & quasdam quasi domesticas ac proprias eius virtutes, vitæ innocentiam, in omnibus rebus temperantiam, pudorem, voluptatum abstinentiam: & miram quandam morum suauitate temperatam bonitatem, atque erga omnes liberalitatem, iam Regibus ac præpotentibus viris inusitatam. Quarum virtutum optimi testes sunt plerique Christianæ Reipublic. senatores & viri patritii, qui Cæsari longa & intima consuetudine deuincti, tandem eius intercessione in sacrosanctum patrum senatum cooptati sunt. Sunt etiam testes tot exulum millia, quos Italia aut vndecunque terrarum profugos liberalissime in regia sua alebat, fouebat, spe simul & re sustentabat atque locupletabat. Quocirca non cum paucis eorum plerumque præclarius actum est, quam si nunquam exulauissent; illudque Themistoclis vere & ex animo dicere possint: *Perieramus nisi periissemus*. Relinquam denique quod primus Germaniæ veterem rei militaris disciplinam, quantum temporum ratio passa est, restituerit: primus Imperatorum eam vndeque latrociniiis purgauerit. Nec iam attingam religionis nostræ dignitatem per eum toties amplificatam, novosque & amplissimos ordines orthodoxæ fidei contra Turcas propugnatores fundatos atque institutos. Hoc solum nos in præsentia contenderimus, per Maximilianum Augustum, qui quantum nemo alius Rex temporum bellorumque motibus iactatus est, tandem perfectum esse, vt mortales Fortunam sine Virtute parum aut nihil, Virtutem vero sine Fortuna plurimum posse intelligant. Laudarint alii Reges, quod in perpetua rerum felicitate nunquam cum aduersa fortuna sint conflictati. Hunc à laboribus, ab ærumnis, à fortunæ & inuidiæ telis commendabimus, & ei non prius de deuictis hostibus quam de vtraque fortuna

Germani domi-  
ni Max. benefi-  
cio.

Peculiare  
Max. virtutes.

Ordines.



fortuna acriter sustentata quam de inuidia fortiter profligata, denique quam de seipso, de victoria illa pulcherrima, qua toties seipsum vincere voluit, æterna trophæa erigemus, atque hunc vnum esse semper clara voce ipso orbe terrarum exaudiente prædicabimus, à quo in summo rerum fastigio, nihil vnquam nec temere nec crudeliter factum sit. Quæ cum ita se habeant, atque omnes eius ætatis gradus iis & propriis ornamentis redundauerint, solusque omneis boni & perfecti Imperatoris numeros per labores plusquam (vt aiunt) Herculeos, tam pacis quam belli artibus absoluerit, quid dubitandum, quin ei maius atque augustius ipsa Fortuna præsens semper numen affuerit, & nuper manifesto & claro lumine in frequentissimo illo orbis terrarum conuentu, inter mortales cætus versatum sit, in quo de expeditione in Turcas suscipienda diuinum consilium initum est, & quo simul ipse & Principes electores, vos in Imperii societatem admittere, tam certis animis, tamque consentientibus sensibus destinauerunt, vt prius prope id ab omnibus, quam fama ipsa ea de re ad nos aduolauerit, intellectum sit. Quid vero iam quæso vsquam aliud spei in tanto tamque communi Reipublicæ periculo, quod vndequaque à sæuissimo Turcarum tyranno imminabat, nobis reliquum erat, nisi vt illi amplissimi consilii Principes electores, penes quos est summa istic rerum potestas, quorumque maxime interest, Rempubl. saluam esse in tempore more veterum de Romanorum Rege, tanquam de dictatore, in rebus dubiis decernendo cogitarent, non tam consilium quam præsentissimum rebus humanis remedium afferentes. Debebat id quidem iam dudum diuinis & immortalibus Cæsaris meritis, atque omnes principes iam pridem nihil antiquius habebant, quam vt eam bene merendi rationem, qua sola ei soluendo videri poterant, non tam dignam gratiam & mercedem, quam sempiternam virtutum suarum testificationem tandem admitteret. Verum ille ab omni ambitione alienus, & omnium datorum beneficiorum immemor tergiuersari, atque vt solent beneuoli & liberales creditores, vltro statum diem iamque cedentem rursus diffundere, & creditum proferre solebat; vel quia adhuc officia cumulare officiis cogitaret, vel qui nullam aliam virtutis mercedem præter illam laudis & gloriæ desideraret. Ad intellectum hoc est ab optimis gratissimis principibus, qui quamprimum fieri potuit, ad eum de consilii sententia inuitum, & moras subinde ex mora nectentem, pla. p. 432 neque subterfugientem de vobis principibus Imp. deligendis retulerunt, DEI certe non tantum occulto instinctu, sed aperto & violento iussu atque impulsu. Nam quid fieri potuisset opportunius, quid optatius, quid omnium saluti salubrius? Verebamus antea, ne DEus nobis iratus grauius aliquid, & nuper sane de humani generis exitio statuisset. Siquidem non obscure agnoscebamus adesse tandem deam illam vlticem scelerum nostrorum, quibus iam eos facile æquaremus, quos antea ea de causa Deo magis, quam nos inuisos sperabamus, vel pleraque etiam vitia nostra quam apud ipsos Turcas grauiora & atrociora. Etenim æque iam dudum apud nos, vt illos conspiciebamus nullum amplius mortalibus Dei metum aut reuerentiam, nullum religionis cultum, aut fidei sanctitatem; iam iuxta sacra ac prophana tractari, templa cum diuis dilapidari & tanquam sub hasta passim venundari; mortales impune & ferro, & fanore contrucidari, aliena aperte rapi, virgines & pueros certatim pro libidine cuiusque ex parentum amplexibus ad opprobrium diuelli; ipsos sacrorum antistites cupiditate, ambitione, libidine longe ante alios flagrare: nihil integri, nihil vsquam sancti esse; bonos mores vbiuis locorum, quauis gentium, sed maxime apud eos, quos nobis æqui rectique imaginem præbere par esset, exoleuisse. Quamobrem quid non metuendum erat? vix bella domestica atque inter nos plusquam ciuilia conquierant, & tempestatum illarum turbines remiserant. Nec dum recentium vulnerum cicatrices obduruerant, aut aliqua in parte obductæ erant. Ecce iam rursus vndique arma prorumpere, & veluti rebus humanis iudicium in-

dictum



dictum esset, omnia silere, cuncta trepidare, atque ob oculos obseruari, communium fortunarum nostrarum direptiones, raptus coniugum, cædes liberorum, incendia, vastitas, ruinæ. Nullum nobis belli auertendi aut quoquomodo sustinendi consilium erat, nulla vsquam declinandi ratio, nulli suscipiendi duces. Reges, & principes mutuo ardentes odio, partim cupiditate & inuidia, partim ambitione & discordia distrahebantur. Plena itaque omnia erant desperationis, plena terroris, iamque vincebat timorem dolor. Quid inquam faciundum erat? ad superiorum auxilium, ut sit in rebus perditis, ad DEorum immortalium templa supplices confugiebamus: sed non erat per quos DEum placari, aut quorum intercessione tantum malum amoliri posse speraremus. Latbras procul circumspiciebamus, fugam quærebat quæ ipsa exitum non habebat. Dandæ dandæ nimirum ceruices erant crudelitati nefariæ. Quis ergo vobis tum Principes electores, quis tibi Maximiliane Cæsar hanc mentem dedit? quis tandem labanti Reip. Christianæ obtulit diuinos adolescentes? quis nobis hæc duo fulmina Imperii? DEus, qui cum omnia ad interitum nostrum immani illi tyranno paterent, non vsque adeo genus Christianum exosum habuit, ut tantum vellet diuo sui nominis hosti de nobis licere. Nos subito respexit, placati signa animi dedit, & hac vna vtriusque ad commune Imperium vocatione testatus est & omnibus declarauit, quid furori illius opponendum, quæ ratio nobis belli propulsandi ineunda esset. Jam quidem antea homines non dubiis DEorum immortalium significationibus, non more veterum ex alitis volatu, non sinistro oscinis cantu, aut solistimis tripudiis, sed fertis syderum decretis, vos sceptro auito & folio destinatos esse, animis præsumpserant, & ut id quam primum felix faustumque fieret certatim vota nuncupabant, volebantque vos omnino Imperii insignibus exornari. Quod volebant, id proculdubio DEus instinxerat: nunc ut fieret, eo tempore perfecit, quo nobis id maxime optandum erat, & vtrique nobis non prius dedit, quam te Carole tot pulcherrimorum Hispaniæ regnorum, te vero Ferdinande tot florentissimorum populorum accessione, ornatos, auctos, cumulos tales haberemus, qui iunctis viribus hostium effrænato furori, non solum resistere, sed supplicia, cruciatus, probra, seruitutes, & omnia dedecora, quæ illi in nos iamdudum male cogitabant atque subinde crudeliter meditabantur, in eorum capita retorquere facile possitis. Quis enim ignorat, aut tuam Carole, aut tuam Ferdinande potentiam? vterque opulentus, populosus, vterque Diis charus, vterque imperat iis populis, \* qui olim etsi à Romanis rerum dominis triumphati, nunquam tamen debellati sunt; atque à quibus cruenta quidem insignia victoriæ, nunquam vero victoriam retulerunt, verum qui eis plurimum semper præter alias nationes negotii exhibuerunt, antequam illos foederatorum aut sociorum nomine agnoscerent. Vterque earum nationum legitimus Rex est, quibus nunc ætate nostra in re bellica, terra mariue res gerenda sit, omnium iudicio longe primæ deferuntur. Altera naualibus bellis, altera terrestribus ac statariis pugnis exercitissima, vtraque ad vtrunque, vbi res poscit, promptissima. Cuius vtinam iam tot fortia in sanguine Christiano documenta non dedissent. Sed quando id non eorum, sed hostium culpa accidit, quæramus & ex nostris malis contra communem hostem gloriæ & virtutis, existimationem; quandoquidem vehementer ad bella administranda pertinere obseruatum est, quid hostes de aliis sentiant, intelligent illi aliquando rem sibi futuram, non cum mollibus Phrygibus & Asiaticis, non cum fugacibus Persis, aut Arabe vnguents delibuto; sed qui vel fortiter vincere vel pulchra per vulnera mortem oppetere velint. Atque imprimis Reip. Christianæ gratulemur, quod Maximilianus Cæsar, cui etiam postquam vita excessit, quotidie tam multipliciter obligamur, duas fortissimas nationes quæ feræ vniuersam Europam secum trahent, ad tam arduam expeditionem suscipiendam coniunxerit, quarum alterutra fortasse non dubiam victo-

*Digressio ad  
Carol. & Fer-  
dinand.*

*\* Germanis,  
Belgis, Hispanis.*



riam fecisset. Nunc quando cum industria opibus, dexteritate Hispanorum,  
 Germana fides, virtus, atque robur coiuit, & quasi in vnum corpus conspira-  
 uit, Diis bene iuuantibus & vobis principibus vigilantibus, certissima futura  
 est. Sed vt tandem eo vnde iamdudum nostra defluxit oratio redeat, atque in  
 eo finiat; cum tot ac tanta aui vestri in omneis sint merita, eique vitam ipsam  
 quam viuimus, spiritum quem ducimus, quemque DEorum benignitate & Im-  
 perii vestri praesidio, in posterum ducemus, acceptum feramus; atque adeo  
 etiam illud, quod sapientes de mundi (vt sic dixerim) infantia sensisse animad-  
 uertimus, quodam tempore rerum naturam tulisse, anteaquam terra nondum  
 concretis inter se corporibus coaluisset, nec iustum pondus ac magnitudinem  
 in se concepisset, vt rerum omnium moles, veluti aestu diu multumque iacta-  
 retur, tandem post longos errores, vim æquabilem nacta, tanquam ancho-  
 ram iaceret & ceteris quoque rebus firmamentum & fixam sedem præberet; sic  
 prope modum quod aui vestri opera factum sit, vt orbis & ipsa moles Imperii  
 huc illuc diu iactata, postremo & maiorum & eius potissimum virtute coale-  
 scens, atque ex omni parte iam suis viribus nitens, se in familiam vestram con-  
 tulerit, & ad immortalem Austriae domum adhæserit, idque ipse vobis tanquam  
 pulcherrimam hæreditatem, cum tam illustribus titulis, & ipso Augusti nomi-  
 ne testamento reliquerit, quantopere nobis considerandum est, ei meritam  
 gratiam debitamque referamus, quod à nobis omnibus honoribus, qui post  
 mortem, vita honeste glorioseque functis tribui possunt; ac perpetua & perho-  
 norifica virtutum suarum semper recordatione, tum à vobis Principes ornatissi-  
 mi, summa pietatis commendatione fiet, si eius (vt facitis) vltimæ voluntati  
 & supremo instituto, quo nihil post hanc lucem illi gratius aut acceptius esse  
 potest, animum quam primum adieceritis. Quod autem institutum ei fuisse  
 antiquius omnium iudicio videri debet, quam vt recepta Italia & libertati resti-  
 tuta in Turcas bellum susceperet. Hoc certe volebat, hoc vt ei aliquando li-  
 ceret, omnibus votis expetebat: hoc vobis non testamento, sed omnium ho-  
 minum tacitis iudiciis scriptum, omniumque animis sculptum reliquit, quod  
 etiam tot sæpe magnis & difficillimis in Italiam expeditionibus, & nunc maxi-  
 me his vltimis conatibus, clara quodammodo voce testari visus est. Neque  
 enim credendum, eum nobis quidquam aliud recenti & salutari illa electione  
 innuisse, quam quos Italiae Reges creasset, eos vellet & aliquando esse. Intel-  
 ligebat nimirum prudentissimus Imperator, expeditionem in Turcas, nisi simul  
 Italiam recuperasset, & tandem à grauissimo tyrannidis iugo vendicasset, plane  
 inutilem & forsitan multis perniciosam futuram. Nam præterquam quod ea diu-  
 tius non sine multorum existimationis labecula à sacrosancto Imperio diuulsa es-  
 se possit, videbatur etiam id suscepti in Turcas belli ratio postulare; quoniam  
 ea maxime ante alias prouincias illorum excursionibus exposita & vndequaque  
 obuia esset, atque nulla non in parte factionibus & discordia intestina laboraret.  
 Quamobrem hostis facile in eam irrumperet, & prima quauis impressione ita ad  
 eam adhærescere possit, vt eius deinceps non facilis nec incruenta foret recupe-  
 ratio: quin inde tanquam ex munitissima arce adiacentes finitimorum fortunas  
 assiduis eruptionibus esset labefactus & concussurus. Tenebat porro memo-  
 ria, quotienscunque ea labes quotam Italiae partem contigisset, quanto deinde  
 rursus labore & quam multo nostrorum sanguine, inde depulsa fuisset. Et cre-  
 bro (opinor) ea de causa, ei maiorum in mentem veniebat, quorum virtutum  
 imagines subinde ob oculos occurrere solebant, Othonum illorum, Henrici,  
 aut Conradi, atque ipsius Caroli magni, qui quondam vestri Imperii author  
 fuit, cuius nunc vt alter vestrum nomen refert, si virtutem vterque breui præ-  
 stabit, quod eorum Imperatorum nemo in Affricam, in Asiam transmisisset,  
 nemo in Parthos, aut ipsos Turcas, nisi prius in Italia rerum potitus mouisset.  
 Non quia eam tam Imperii perpetuum decus & firmamentum, quam extero-  
 rum

*Regressus.*

*Comparatio.*

*Austriae do-  
mus.*

*Vltima volun-  
tas Marci.*

*Italia ab Im-  
perio diuisa fa-  
ctionibus tumet.*

*Othones,  
Henrici,  
Conradi,  
Carolus.*



rum bellorum propugnaculum quoddam existimarent ; vnde frumentaria subsidia , vnde supplementa , atque vbi opus foret , bellorum nerui subministrarentur. Italia quæ tametsi semper (nescio quo suo infelici fato) rebus nouis p434 studens sæpenumero se exterarum gentium & factionum studiis , ab Imperio disiunxerit , & caput iustis sceptris subduxerit ; rediit tamen superiorum Imperatorum officiis, subsidio, crebro & armis ad officium , atque quantum per finitimum ei incursiones licuit , in Imperio vestro lubentius , quam in cuiusuis alterius acquiescere voluit. Nunc vero tam domesticorum , quam exterorum tyrannorum immani dominatu ita oppressa iacet , vt nullo non in membro debilitata , nullo non articulo luxata , propediem nisi per vos subuentum fuerit , ingenti gemitu atque ruina collapsura videatur. Maxima quidem eius paulo ante mortalium pars , quibus nondum penitus dulce quondam Imperii nomen ex animo excidit , & quibus adhuc iusta Imperii cordi sunt , spes suas in auum vestrum omnes defixerant , certumque habebant breui fore , vt eis tandem per eum tam diu desiderata libertas redderetur. Quod iam cum vident , in tanto temporum motu , atque rerum conuersione , crudeli quodam fato interceptum esse , & se vndique nouis calamitatibus circumueniri , examinati & veluti doloris fluctibus obruti , animis passim conciderunt. Itaque nunc vniuersa in Italia, vna vbiq; voce , quoniam eis nec libere dicere nec lugere licet , gemitur. Audiretis vtinam clementissimi Principes , eorum occultas querimonias , & gra- *Italia condicio.* uia suspiria. Aspiceretis vtinam tot bonorum lachrymas , tot innocentium vulnera , tot diras Cæsarianorum proscriptiones , tot nobilissimarum familiarum distractiones , tot denique principes auito principatu deiectos , fortunis , & liberis omnibus multatos , quibus ne quidem exilii iam locus in Italia vsquam relictus est. Verum quidquid iis in rebus , tam egenis adhuc spei superest , id omne paulo ante in vos collocarunt ; in vos omnes animorum oculorumque contuitus contulerunt ; vos Augustos appellant , implorant , & deprecantur calamitatem suam ; vos libertatem Italiæ vno ore flagitant ; vos duo lumina in tantis rerum tenebris cæcisque nubibus & procellis , tanquam in medio mari naufragantes illa gemina & salutaria periclitantibus sydera adorant : vobis vota concipiunt , vos absentes Reges suos saluant , & qui Maximilianum vultu, ore, moribus , animo, institutisque refertis , certatim animis requirunt. Quapropter cum prudentiæ , fidei , pietatisque vestræ sit , Augusti Principes , omnibus gentibus declarare , quam memores , quamque grati sitis , insistite per DEos immortales auitis vestigiis , subleuate eos , quorum calamitas ab Imperio vestro seiuncta esse non potest , prohibete à scelere , à contumelia , à seruitute, morte ipsa , tantum nobilissimorum exulum numerum , qui vltro Cæsaris partes secuti , extorres se chara patria , coniugibus , dulcibusque liberis priuarunt : & incumbite toto animo & studio omni in eam rationem , qua non solum salus & libertas Italiæ , Reip. Christianæ auctoritas , sacrosancti nomen Imperii , & vtriusque nationis honor & dignitas , eorum etiam omnium securitas defendetur. Nunquam enim amplius Scytharum , Parthorum , immaniissimarumque gentium illarum colluui in Italiam cogitabit , neque insidias in Christianos meditabitur , si Italiam factionibus & discordia intestina liberatam , vestræ potestatis intellexerit. Absoluite telam , quam auus vester & pater Philippus iamdudum contexendam exorsi sunt : atque providete vestri consilii prudentia , ne hostes quibus cum Cæsar tot ab hinc annis grauissima bella gessit , pacis & induciarum nomine bellum inuolutum tegant. Bella siquidem illa affecta , & pene confecta sunt , si extrema persequi volueritis : sin minus , verendum , verendum inquam est , ne aliquando instauratas maximi belli reliquias ac renouatas audiat. Etenim quotiens iam res hostium abscissas , se efferre & ad renouanda bella reuirescere vidimus : quos nunc attritos & tot cladibus pene exangues , perfacile esset sine illorum incommodo & periculo , ad quos hactenus

Cæsar



Cæsar respectum habuit, in potestatem vestram redigere, ac penitus comprimere. Magnus est vobis, Principes fortissimi, vbique campus, magnus vbique cursus ad laudem apertus, præsertim qui id ætatis tanto animi impetu, vincendi cupiditate, atque mentis ardore ad gloriam exarsistis, ut iam tanquam in herbis, incredibili omnium admiratione significetis, quæ virtutis vestræ maturitas, & quantæ fruges industriæ sint futura.

Nullus vero (credite) vobis vsquam amplior aut gloriosior patet, quam in Italia, quam in hac luce hominum, in oculis ipsis orbis terrarum, quam in hac arce regum ac nationum exterarum, in qua olim Imperii maiestas primum adoleuit, eius splendor, primum eluxit; qui fortasse nunquam tam late radios sparsisset, nisi ei in ea, diuino quodam ab initio consilio, domicilium obtigisset, vnde commode omnibus gentibus & populis iura dici cunctaque regi possint. In Italia inquam, in qua denique semper maxime maiorum vestrorum virtus & decus, tanquam in theatro totius orbis terræ plausu floruit, atque vbi post hoc breue & plenum sudoris & ærumnarum vitæ curriculum, in quo nos tot vndique fata circumstant, immortalitatem consecuti sunt. Qui nunc vbique in æterna illa domo, beatorum conspectu & consuetudine fruuntur, p.435 non modicam certe & ex eo voluptatem percipiunt, quod iam antea (qui eorum est diuinus animi sensus) intelligant, Imperii dignitatem, quæ iamdudum ipsorum in terris studiis late propagari, & radices agere cepit, iam tandem vberimos ex nepotibus ad communem omnium salutem immortalis gloriæ fructus sit prolatura.

**JACOBUS SPIEGEL, JOANNI LUÆ VIRO NOBILI, AC OPTIME MERITO, S. D.**

**V**Nus & alter intercessit dies, quo tu enixe cupis, si quæ in pium pii Maximiliani obitum epicedia apud me forent, tu horum esses particeps. Laboravi magis ac magis, ut desiderio tuo aliqua ex parte satisfaciam. Inter cætera vidi multa, quæ & si bono consilio à viris grauib. scripta sint ac exscribenda, chalcographis minime videbantur. Verum ne tu plane repulsam videre pati, *deprecatum* siue lamentationem Petri Ægidii Delphi, viri etiam primis adscribendi, ac diui Cæs. Maximiliani Aug. laudum præconis vocalissimi, nuper, inter funeralia eius præponere effusam, ad te mitto. Philippi item Brettani \* orationem funebrem, quæ luculenta satis, & affectum ut mouet penitissime, ita & gloriæ famæque Maxil. est buccina. Ea omnia tu fronte læta suscipies, tibi quæ vera seruabis funeralia. Ægidii carmen viuendam venam in promptu habet, ac lamentationem integre mouet. Accessit D.D. Jo. Geyler Keyferspergii, olim à sacris huius urbis nobilissimi, epistola ad Auunculum meum, quam inter chartaceam meam suppellectilem (iam aulicis leuatus molestiis) inter legendum forte reperi, qua viuentem adhuc Cæsarem indicat. Quam ego suppressere nolui.

\* Melanchthonis. Hæc de- sideratur.

D. Keyferspergii.

Onidius.

*Scilicet ultima semper  
Expectanda dies homini est, dicique beatus  
Ante obitum nemo, supremæque funera debet.*

Alias huius enchiridii apendices tu in triumphatorem felicem, patrem patriæ Cæs. Maximil. eodem vultu lege, lecta spero placitum iri. Pauxillum scholiorum adiunxit, ut carmen id lucernam olens, tibi elucidatius redderetur: quum tibi Græca non admodum sit lingua familiaris, neque nisi meliore sydere natis placeat. Vale, & D. Jacobo Villingeri (dum fuerit integrum) me commendes. Ex Argentorato, Calendis Maij, Anno Christiano M. D. XIX.

PETRUS



PETRUS ÆGIDIUS D. JACOBO TUTORI, JURECON.  
AC INSIGNIS ANTVERPIEN. OPPIDI ADVOCATO,  
PRÆCEPTORI VNICE OBSERVANDO  
S. D.

QVAM grauem & acerbam plagam, ex diui Maximiliani Cæs. interitu animo acceperis, Tutor amicissime, nemo est mortalium qui expertius nouit, quam ego. Præsertim quem sic viuum veneratus sis, vt credam hoc vno nihil tibi post DEum Optimum Maximum fuisse charius. Equidem quum nihil sit Deo similis, bono principe, quisnam ex tot principibus nostro Imperatori, tum bonitate, tum mansuetudine conferendus? qui omnium fuit & optimus & clementissimus, & (si fas sit dicere) Deo similis. Impiæ sane ingrataque mentis existimo, si talem nobis heroem ademptum non lugeamus, tam sapientem, tam iustum, tam omnium virtutum generibus expositum. Itaque quum nuper post tot funereos Regum honores, tot lugubres ciuitatum apparatus, tot exequiarum pompas, gratissima omnium Antuerpia iusta illi magnificentissime persolueret, scripsi Threnodiam sub persona Genii maiestatis Imperatoris, cum præficus D. Maximilian. mortem lachrymantis, additis aliquot Epitaphiis, quæ tibi tametsi non bona, tamen hoc nomine placere debent, quod in gratiam Imperatoris quantum in nobis fuit, effusa sunt, à quo non mirum, si tu sæpenumero humanissime acceptus, non indonatus discessisti, quum fuerit in omnes tam beneuolus, tam mitis, tam benignus, vt neminem vnquam tristem vel anxium à se dimiserit, quemadmodum tute non minus festiuiter quam diserte narrare solebas, quamquam ille orbem vniuersum morte sua tristissimum, afflictissimumque reliquit. Verum excutiendum est istud animi vulnus, quod ex nimio dolore nobis incussum est. Meminisse enim debemus, hanc esse conditionis humanæ sortem, quæ quo magis omnibus æqualis, eo fortiore animo perferenda est. Nam quem nos ex hoc carcere p.436 ploramus ereptum; is nunc pro summa, qua præditus erat pietate, renatus apud superos, in diuorum numerum relatus est. Bene vale suauissime Tutor, & me quod semper fecisti, amare perge. Antuerpiæ. VI. Calendis Aprileis. Anno Christi M. D. XIX.

Petri Ægidii *ἑρμηνεία*, siue lamentatio, qua Genius diui Maximiliani Cæs. inter præficas in pompa funerali, mortem eius deplorat.

*Primi treis versus sunt Choriambici Asclepiadei tetrametri.  
Quartus trimeter Gliconicus.*

GENIUS.

O me, me miserum, quis lachrymas meas,  
Quis planctus, gemitus? quisue ululamina  
Sedabit mea? vab, fluminis in modum  
Exundant oculi graueis.  
Quo me proripiam, ter miserum & quater?  
Ecquo? quo fugiam? vab, mea lumina  
Me fallunt, perii, lux tenebrae mibi,  
Et vox atra dies mibi.



En me destituunt organa sensuum,  
Vires deficiunt, mens alacris cadit,  
Et gressus titubant, cor tremit, algidus  
Sudor corpore profluit.

Clausis spiritibus viscera congelant,  
Vena non saliant, angitur halitus,  
Et vox aridulis languida faucibus  
Hærens guttura deserit.

Ab tecum moriar, maxime Cæsarum,  
Et te ad sydereos usque polos sequar.  
Postquam te Lachesis sustulit improba,  
Ultra vivere non licet.

Dictum est, interii, nunc ubi maximus  
Ille? ille Æmilianus sacer occidit.  
Heu me, mille (Proh dolor, ô nefas)

Mors hæc una mihi parat.

O qualem miseri perdidimus virum:  
Orbati patriæ heu patre nos sumus  
Quod terris potuit noxa vel Eumenis  
Inferre omen acerbius?

Et quis non doleat, non grauitè ferat,  
Damnosum capitis tam venerabilis  
Occasum? cecidit gloria principum,  
Et flos nobilium simul.

Nam quis splendidior, quisue benignior,  
Et quisnam integrior, quis melior fuit,  
Ecquis tam superis equiparabilis,  
Cæsar quam fuerat meus?

O quis tam vigilans, tam bene perspicax?  
Quis tam munificus, dapifilis, & pius,  
Aut quis tam patiens? quis tolerantius  
Sortem pertulit asperam?

Cui tam larga fuit promptaque dextera?  
Quis sic pauperibus fauit & indigis?  
Quis tot distribuit munera egentibus,  
Quis plureis alimonias?

Quis feruentius & religiosus  
Ex tot Christigenis regibus aureis,  
Sic quondam coluit numina? deditus  
Nostra quis fidei magis?

Quid? quod barbarica pressa tyrannide  
Tot regna, & populos reddere liberos  
Enisus, rabidis bella parauerat  
Christi nominis hostibus.

Sed mors inuidiæ filia lurida,  
Tam sanctum vetuit propositum exequi,  
Conantem imperium tollere Turcicum,  
Mors hunc è medio rapit.

Orbis quadrifidi lux fuit & caput,  
Vrbis Romulea perpetuum decus,  
Et princeps hominum, vidit ab igneo  
Nil sol clarius æthere.



Ut mittam proavos, ut sileam genus,  
 Ut ceras, titulos, stemmata, imagines,  
 Augustus fuerat, magnus & inclutus,  
 Regum & magnanimum parens.  
 Quid nunc commemorem munera corporis?  
 Vultus perplacidos? membra decentia?  
 Quid corpus solitum, mobile, strenuum,  
 Nec torpore iacens pigro?  
 Nil natura potens, finxit amœnius,  
 Nil perfectius, & nil speciosius.  
 Quid plura? absoluit dotibus omnibus  
 Nil unquam cumulatus.  
 Maestate fuit persimilis Jovi,  
 Titanique coma par fuit aurea:  
 Aspectu nitidum vicit & Hesperon,  
 Cœlestemque Cupidinem,  
 Linguam Atlantiades mellis suam dedit,  
 Qua dulcem poterat vincere Nestorem  
 In labris habitans Suada corallinis  
 Prompsit flexanimos sonos.  
 Et Pallas validum sensibus imbuit  
 Pectus mirificis, addidit indolem  
 Virtus eximiam, vos Etbeocliides  
 Risum, lumina, gratias.  
 Marti consimilis robore bellico,  
 Sed clementior & sanguinis abstinens.  
 Nulli unquam nocuit, profuit omnibus,  
 Vindex haud fuit, aut ferox.  
 Sanctis fœderibus, concilio & fide,  
 Bellona rabiem saepe cohercuit.  
 Hosteis saepe feros, & sine cœdibus,  
 Et vicit sine stragibus.  
 Olim & Castalio fonte Aganippides  
 Rores Ambrosios in pueri osculum  
 Stillarunt, amor hic fluxerat in viros  
 Lauru & carmine nobileis.  
 Mecum o vos igitur turba biuerticis  
 Parnassi, miseras fundite nenas:  
 Promant luctifonas plectra monodias,  
 Et cantus miserabileis.  
 At vos ante alios quis manibus sacris  
 Caesar contribuit ferta virentia.  
 Nunc tristes elegos, nunc epicedia  
 Vos (inquam) edere condecet.  
 Quis tam marmoreus, tamue adamantinus,  
 Qui mecum haud lacrimet, lugeat, & fleat?  
 Nimirum columen, præsidium, & salus  
 Sacri concidit Imperii.  
 O iactura grauis, naufragium nocens.  
 Qui tranquillus erat sospite Cesare  
 Mundus, nunc rapidis fluctibus æstuans,  
 Turbat singula funditus.

P438



*Quantum Parca furens, quantum erat obsecro  
Paulo serius, ut stamina Caesaris  
Truncasses? nimirum es, heu nimis inuida,  
Et mortalibus emula.*

*Jam pacatus erat mundus, & aurea  
Hoc sub pacifico Cesare secula  
Florebant, sophia dogmata, litteræ  
Cristas extulerant bonæ.*

*Pessum nunc abeunt pax, simul ocium,  
Et tranquilla quies, Mars gladios atrox  
Strictos exacuit, cladibus omnia  
Commiscent furia truces.*

*Ate virus edax livida nunc vomit,  
Ate contemserat barbara litteras,  
Ate iniusta bonos opprimit, impii  
Assistunt cacodæmones.*

*Sed quo progrediar? mens abijt, occidit  
Heu vos exanimem tollite præfica,  
Sub terras miserum condite, mortuo  
Sum cum Cesare mortuus.*

### SCHOLA SPIEGELLIANA.

*Vos Etheocles.)* Gratia, quæ græcis Charites dicuntur. Etheocles, quia statuerit eis primum templum Etheocles rex Orchemeniorum. Gratias tres posuit Hesiodus, referente Seneca lib. de beneficiis, Aglaen, Euphrosinen, & Thaliæ. Finguntur se complecti arctissimo nexu: Pinguntur & hilares, quoniam dantes accipientesque hilares esse debeant. Virgines, quoniam dandum est sine spe munerationis. Juvenes præterea, quia beneficiorum memoria apud gratos nunquam confenescat.

*Monodias, )* μονοδία, brevis est laus defuncti, quæ apud veteres in defunctorum funeribus ad tibiam cantari solebat à præfica.

*Stabius. Resch. Spiesheymer.* *Cæsar contribuit ferta virentia, )* Vt præteream Joannem Stabium, Stirianum, Thomam Velocianum Austriacum, Joannem Cuspinianum Francum orientalem, ac complures alios eruditos, sat erit hos recensuisse: qui sub id temporis quo ego in aulicum munus adscitus fui, in venerandum cætum immortalium vatum, Maximiliano calculo probati discessere.

Vlricus de Hutten, eques Germanus.

Richardus Bartholinus Perusinus.

Joachimus Vadianus Helveticus.

Caspar Vrsinus Slesita.

Richardus Sbrulius Foroiulianus.

Joannes Dantiscus Polonus.

Joannes Pinicianus.

Urbanus Regius Germanus.

Alexander Brassicanus Suevus.

*Epicedia, )* ἐπιχθόνιον, carmen funebre, quod & Servius in Bucolicis epicedium vocat: & habetur cadauere nondum humato. Epitaphium vero ipsi sepulchro inscribitur.

*Qui tranquillus erat sospite Cesare mundus.*

Quando



p.439

Quando enim vnquam Germania fuit pacatior, quam sub Maximiliano esse vidimus? Quoties sub Carolis (vt Philippus ille Brettanus tam eloquenter quam vere dixit) vniuersa commota & labefactata est seditionibus intestinis? Dabimus ali-<sup>Philippus Brettanus.</sup> quid Othonum felicitati, & gentilitie laudi: semper enim Saxonia pacis amans fuit. Certe Francorum Henricos tragica etiam mala affixerunt, quum aliquandiu pars Germanorum filio, pars patri studeret: vt reliqua praterream. Ab eo vero tempore quo imperauerunt Sueni, quæso quid fuit in Sigismundum vsque lati in vniuersa Europa, nedum Germania? Prudenter Fridericus primus, qui belli molem in Italiam, ac deinde Asiam vertit. Qui hunc secuti sunt, omnia infelicitate, regnum pariter vindicarunt, Philippus Sueuus, Otho Saxo, deinde Adolphus Nassaensis, & Albertus Austrius, post hos Ludonicus Bauarus, & Fridericus Austrius. In hæc, ne quid esset mali, quot pontifices urbis Romæ dissidia, quot item Germaniæ deuotiones inciderunt, quibus semper aduersa fuit huius regni tranquillitas, ne sua in Italia tyrannis minueretur? Nam præter id quod aliquoties vniuersa Germania diras pontificias pertulit, non raro priuatim quoque vrbes ac ditiones aliquot desecratae sunt, ita nunquam non bellorum semina ministrabant pontifices Germanis: quæ hoc imperante nulla fuerunt. Nunquam Germania vniuersa commota est, nunquam labefactata hoc imperante religio: quæ nisi admirabilis quedam sapientia, & plane cælestis, integra & salua conseruare non potuit. Et hunc principem ereptum terris non dolent Germania? Hæc ille.

*Literæ cristas extulerant bonæ.)*

Quæ multis ab hinc annis mortuæ iacebant, orbe prope vniuerso bellico furore occupato. Nihil enim æque contrarium est studiis, quam Mars. Vnde non abs re cum Pallade acerbis odiis pugnat apud Homerum. Quare vel hoc diuum munere, Maximiliane tempora maxime felicia censenda sunt, quibus tot literarum thesauri, iam tempestate multa abditi, in lucem prodire beneficio Roterodami, Capnionis, Birckheymeri, Zassii, Budei, Copi, Vadiani, aliorumque, quos recensere alterius fuerit operis. Quod autem Cæsar & fouerit literas, cumque doctis frequenter differuerit, quum de eo tota aliorum extent testimonia, meum vero ceu mutuum addere, esset absurdum forte & obscurum.

*Pessum nunc abeunt.)* Huic subscripsit sententiæ ille in vniuerso literario orbe nobilis Peutingerus in epistola ad me recens scripta: Audio apud vos pestem grassari. O misera Germania, quæ Maximiliano viuente, pace atque tranquillitate fruebaris, tota nunc tumultuaria. Erat pax ubi Cæsar, ibi bellum & dira lues.

*Ate virus edax liuida nunc vomit.)*

Homerus Aten deam facit (vt magnus ille Erasmus adnotatum reliquit in Chiliadum opere sane aureo) quæ noxias ac turbas solet immittere rebus mortalium, atque ipsam quidem acerbis oculis ac præuolocibus pedibus. Cæterum post eam multo interuallo consequi Litas deas, quæ quod Aten turbauerit sarcire moliantur. Has & strabis oculis fingit, & pedibus claudis, illud nimirum innuens, offensas esse citas, reconciliationes vero tardas. Propterea, quod iniuriæ meminisse solent homines. Quod (vt Auunculus meus in adolescentia adnotauit) vulgo trite iactatur versiculo:

*Pulvere qui lædit scribit, sed marmore læsus.*

INVICTISSIMI IMP. CÆS. DIVI MAXIMILIANI AUGUSTI, EPITAPHIA, PER EUNDEM PETRUM ÆGIDIUM.

*Austrius hic iaceo Cæsar Maximilianus,  
Qui genitore satius Friderico Cæsare, matre  
Lusitana olim, quam dixerunt Leonoram  
Vxores geminas duxi, quarum altera Carli*

*\*Wimpeling.*

Ddd dd 3

Vnica



*Vnica Burgundi Maria est, iuuenilibus annis  
 Filis ducta mihi, primo qua enixa Philippum,  
 Et mox Margaritam, Franciscum deinde tenellum  
 Magna mihi fuerat soboles ventura, sed ô sors  
 Inuida, fecundam rapuit mors saua parentem.  
 Inde, velut turtur viduatus coniuge, vidi  
 Bella, simultates, rixas, populique tumultus.  
 Post ducis Anguigeri Maria altera iuncta cubili  
 Filia Blanca meo, quam postquam fata tulissent,  
 Celebs postrema deduxi tempora vite.  
 Quantus eram bello, quantus victricibus armis,  
 Non referam, quantus fuerim virtute, togaque,  
 Talia commemorent quibus est laus nulla superstes,  
 De me posteritas, & viuax fama loquatur.*

P.440

Aliud epitaphium, Jambico trimetro.

*Hoc ossa nobili cubant sub marmore  
 Maximiliani Caesaris clarissimi.  
 Nil sanctius, nil clarius, nil dignius  
 Hoc vidit orbis vniuersus principe.  
 Quid seculi attinet prioris Caesares  
 Referre? solus iste vicit singulos  
 Benignitate, comitate, gratia,  
 Ac ceteris heroicis virtutibus  
 Quid plura lector postulas? nempe omnium  
 Hic maximus Caesar quiescit Caesarum.*

Aliud de eodem Caesare epitaphium.

*En pacis bellique potens, ter maximus hic est  
 Caesar, & ingenio clarus & eloquio,  
 Eximia pietate nitens, virtute refulgens,  
 Quo nil possedit mundus amabilius.  
 Qui imberbis dextro nudatis Marte lacertis  
 Exigua fudit Gallica castra manu.  
 Vt taceam Heluetios, Morinos, forteisque Boemos:  
 Semper enim caeso victor ab hoste redit.  
 Qui iam pacatis tot bellis, totque subactis  
 Gentibus, in Turcas verterat arma truces,  
 Sed pax despiciens caelo sublimis ab alto  
 Bella futura, virum sustulit ad superos.*

JO. GETLER DE KETSPERSPERG, ECCLESIAE ARGENTINENSIS A CONCIONIBUS SACRIS, D. JACOBO WIMPHELINGO THEOLOGO.  
 S. P. D.

IN Constantia dies XI. mansi, vt recepto nuncio à Regia Maestate, intelligere possem quo ad eam diuertere deberem. Interea Argentinam nuncium miserat cum quinquaginta florenis, qui me non reperit: mihi autem significauit, vt mox à Constantia in fauces alpium Iuliarum, quod nostra lingua *Fieschen* appellatur, me reciperem: Quo dum venissem feria secunda ante Magdalenæ, die ipsa Magdalenæ Rex in ecclesia S. Magni, vbi diuina audierat, me acclama-



uit ubi essem. Ego autem in cella eius monasterii, delitescbam. Vocatus ergo ante fores ecclesiæ, me salutauit, & excepit, & ut patientiam haberem voluit. Itaque crastina Magdalenæ, dominica scilicet, post prandium me vocauit, & ita familiariter confidenterque mihi soli cum solo cor suum aperuit, ita ut ipse mirarer quod homini ignoto, cum quo nullos vnquam sermones, neque familiaritatem miscuerat, tantum confideret. Plane omnem maiestatem seposuit. Et quum aliquando byrretum de capite ob refrigerium, quia æstus erat, ponerem; putans id per me sibi in reuerentiam fieri, operire caput cogebar. Duo subfellia in sacratissimo loco æqualia poni iussit: ibi confedimus: & locutus est, quæ mihi plane loqui non licet. Neque temere me vocauit: voluit autem ut nemini patefacere, sed quasi sub secreto confessionis retinerem. Finito itaque colloquio, sed & dialogo inter nos scriptis incepto, S. R. maiestas scripto sententiam suam posuit, & ut ego e regione responderem voluit. Quo facto, alterum diem statuit, ut in id ipsum rediremus. Latinus bonus, sed scripto melior quam verbo. Inter loquendum quum fieret de suis æmulis sermo, inquit: *Dudum putridus si hæc & hæc*, &c. Interea prædico omni die festiuo in eodem loco, ubi dicunt Regiam Maiestatem iam aperte, iam occulte interesse. Scripsit autem & mihi D. meus Augustensis, & instanter rogauit, ne redeam Argentinam, nisi prius eum propter causas quas patefecit, inuiferim. Hoc efficiet, ne tempestiue sicut paraueram, redire possim. Vale & Deum pro me ora. Ex Fieffen secunda Augusti. Anno Christi M. D. III.

P. 441 IACOBVS WIMPHELINGVS THEOLOGVS, IACO-  
BO SPIEGEL, NEPOTI, IURECONS. S. D.

SI non ex animo dolerem, Iacobe nepos charissime; vicem patriæ nostræ, totiusque Germaniæ, ob casum Cæsaris, fibra (ut aiunt) sane cornea merito iudicaretur: quum nemo Romanum Imperium clementius & iustius mihi gubernasse videatur. Quam pie vero & christiane viuis excesserit, nedum ex teipso qui præsentissimus aderas, sed & clarissimis summæ auctoritatis & fidei magnatibus intellexi. In primis ex generoso D. Ioanne Bartholomæo de Titonibus comite Deciane, cuius eloquentiam magis admirer quam humanitatem & sapientiam prorsus ignoro, cuius magnificentia supra quatuor lustra fertur Cæsareæ maiestati inseruiuisse. Cum vero multorum præstantissimorum testimonio, nulla virtutum Maximiliano defuerit, nihilominus fuere (ut iis auribus audiui) qui censebant in aula sua, doctos & prudentes fuisse desiderandos. Tanquam Cæsaria sua Maiestas solos cantores, aucupes, venatores, tibicines sibi haberit familiares. An non summa prudentia & eloquentia præditus est generosus ille comes de Titonibus? An non eloquentissimus fuit Ludouicus Brunus, mihi familiarissimus? Petrum Bonum episcopum Tergestinum, scripta produnt sua. Collaurum Jureconf. fama superstes, ut Spernatium eruditi commendant. Ioanem Stabium doctorum schola celebrat. Peutingerum, studiorum studiosorumque omnium cultorem præcipuum, vniuersa literaria resp. iam pridem recepit. Nonne Matthæus Langius Cardinalis, doctrinam cum facundia coniunxit, doctosque in precio habet & fouet? Quis legum notitia, & omni dicendi genere, morumque suauitate, & fide integra præstantior fuit Con. Sturtzelo, epistolarum magistro, meo præceptore atque patrono? Quis in omni philosophia, & in diuinis literis acutior Gregorio Riefchio Carthusiano? quo nedum alioqui consultore usus est, sed & ut animæ suæ mederetur, dudum priusquam eam exhalaret, desiderantissime longo viarum intervallo accersuit. An vero Cæsareæ maiestati in suis Viennens. & Friburgiano gymnasiis, inque Oeniponto & Ensisheimio iureconfulti defuere? Quamuis Imperator in consultando nullis obnoxius sit legibus, sed eas interpretandi atque moderandi

Jo. Barth.  
Titonius Co-  
mes.

Brunus.  
Bonum. Col-  
laturus.

Sperantius.  
Stabius. Pen-  
tingerus.  
Cardin. Gnr-  
conf.

Sturtzelus.  
Riefchius.



P. Mota nunc  
Episcopus Pa-  
ensis.  
Bannissius.

di summam ac plenam habeat auctoritatem. Vt interim taceam, pio Cæsari nostro Maximiliano tam mirificam, nec de Mithridate minorem linguarum peritiam fuisse. Regum legatis, oratoribusque suo cuique patrio sermone, imo etiam Cardinalibus à Roma missis, latino per sese respondere potuit. Quis vero in sacris literis eruditior Petro de Mota? Quis vel sapientia, vel integritate vnquam excelluit Jacobum de Bannissis? Moerorem vero meum temperat, quod Cæsar hanc vitam cum illa perpetua & beata commutarit: tantoque minus lugeo, quod firmiter confido & spero, sicut apud superos beatitudinem, ita & in terris summam ei gloriæ & famæ dignitatem perpetuo mansuram, vt obstruatur os loquentium iniqua, & ponant custodiam ori suo, si qui detrahare consueuerunt: quos (ni destiterint) iudicabit DEus iustus iudex. Hæc, mi fili, pro qualicunque consolatione tua legere velis, tumultuarie & obiter à me conscripta. Vale, ex communi patria nostra, quæ iusta Cæsari fideliter persoluit, sicut & istam urbem Argentinam gloriosissime illi inferias soluisse intellexi. Iterum vale, & Passerenum ac Gebuilerum nostros, nomine meo resaluta.

## ORATIO GERMANIÆ.

SUMME DEus, vosque summi terræ meæ Principes, ad Romanum & meum aspirare fertur imperium, qui à moribus meis dissidet, quem natura editis montibus à me disiunxit: cuius maiores nedum meipsam, sed & meos principes, & ipsam aquilam per ludos scænicos sæpe ludibrio habuere: qui terras meas iampridem vastarunt; multosque tum apud meam Basilæam meos Heluetios neci dederunt: quorum superbiam ac libidinem magnanimi Siculi amplius ferre nequeunt, nullo sexus habito discrimine, ipsos vna hora trucidarunt: qui iustitiam ac fidem nonnunquam frigide seruant. Nam in primum meum chalcographum, qui libros in eorum terris vendidit, precio apud se vi detento, tyrannidem exercuerunt. Qui in Cæsarem meum pium & iustum, orationem spurcissimam, gloriæque suæ & famæ detractricem (cuius caput est, *Insolentis dimissique animi*) ex summo liuore, cum sua ipsorum ignominia disseminarunt. Quorum vnus Friderico pacifico Cæsari, sponsam Leonoram præripere & abstrahere molitus est: quorum alter pii Maximiliani filiam, sese dignam appetiit, & pro constantia a maiorum abiecit: eiusdemque sponsam ex Britannia per terras suas ad me proficiscentem rupta fide publica pellexit, præripuit, p.442 abduxit. Dii prohibere nefas, prohibete & vos supremi Antistites & duces mei, ne de hac gente, & ex tali massa quispiam regno meo potiatur: quum extent de meo, hoc est, Germanico sanguine, qui mihi & meis non superbe & contumeliose dominari, sed sancte & modeste absque tyrannide præesse non possint; quique à populis meis malint amari quam timeri.

## Dialogus Maximiliani Cæsar. &amp; Cardinalis

Gurcensis.

CARD. O lux, ô nostra Germanæ gloria gentis,  
Quo fugis, & quo nos destituis miseros?

MAX. Quæ mihi tam mollem rumpunt lamenta soporem?  
Parce precor lachrymas fundere, quisquis ades.

CARD. O qui fortuna fueras pars maxima nostra,  
Cæsar perpetuo tu mihi flendus eris.

MAX. Tunc ibi es Matthæe, mea solatia vita &  
Agnosco vocem, candide Lange tuam.

CARD.



CARD. O Cæsar, felix genitor, quo vivis in orbe?

*Sentio in hoc sacrum numen adesse loco.*

MAX. Magnus eram mundo, risus fuit, optima nunc me

*Regna poli clemens iussit habere DEUS.*

CARD. Ergo colis superum sine sollicitudine campos:

*Diue pater, sed nos anxia cura premit.*

MAX. Pone graues curas, senior prope deseret auras,

*Et tibi rex cæli regna superba dabit.*

CARD. Nunc etiam cura tibi sum? sit gratia Christo,

*Sit tibi: cœlicolas Maxime Cæsar adi.*

Dialogus Maximiliani Cæs. & Vatum.

MAX. Qui gemitus? & quæ lachryma? namque audio ab imo

*Et mea sunt fletu vusta rigata pio.*

VATES. Adsumus ô Cæsar, vates tua cura, dolentes.

*Vivis adhuc: an te tristior umbra tenet?*

MAX. Vivo equidem, nec me cruciant loca tetra baratri,

*Æthereæ sedis regna beata colo.*

VAT. Ergo vales, requie optata, fatisque benignis,

*Anxia nec te ultra prælia sollicitant?*

MAX. Vani hominum sunt conatus, res pendet ab astris,

*Vnica consilium dispulit hora meum.*

VAT. O felix anima superis inuecta choreis,

*Quem chorus Aonidum debet habere patrem?*

MAX. Successor regni superest, mea magna voluptas,

*Carolus, à vobis ille canendus erit.*

*Vivite, sed memores nostri, memoresque futuri*

*Judicii vates. Jamque Valet, abeo.*

VAT. I decus eximium, cæli nova stella, resurge,

*Atque ferant populi vota, precesque tibi.*

*Sit requies cineri, tumulo violaria crescant.*

*Perpetuum spiret ver tibi, Cæsar aue.*

Epitaphium eiusdem Max. Cæs.

*Maximiliane iaces? te ne hæc monumenta recondunt?*

*Ab tantum licuit mors truculenta tibi?*

*Non sat erat natum nobis rapuisse Philippum*

*Te ni etiam magnus concideret genitor.*

*Pax tecum, tecum arma ruunt, ô maxime Cæsar,*

*Fracta est imperii pulchra corona tui.*

*Non tamen extincta est virtus atque inclyta fama,*

*Qua celebrat toto nomen in orbe tuum.*

Jo. Pinicianus.



## VDALRICI ZASII ORATIO, FRIBURGI IN FUNERE MAXIMILIANI

IMP. AUG. HABITA, ANNO M. D. XIX.

VII. IDUS FEBR.

Fuerat sane in primis dignum, generosi, nobiles, egregii, prudentes, & præstantissimi Viri, ut acerbum & lamentabilem istum occasum illustrissimi & inuictissimi Cæsaris & Principis nostri MAXIMILIANI, quem omnes, ut par est, dolentissime ferimus, funebri oratione summi oratores, differendique arte clarissimi viri prosequerentur; quando tanta sit rerum dicendarum copia, quæ non nisi a summis ingeniis tractari pro dignitate poterat, ut sic seni mihi mediocris alioqui doctrinæ homini vacare non iniuria licuisset. Sed quando id à me muneris, non tam postulatum, quam iniunctum est, (quamuis parum felici euentu ea res cesserit, ut qui superioribus annis serenissimæ reginæ Blancæ Mariæ, nunc illustrissimo nostro principi eius marito funebria iusta persolvere sim coactus) obstrepere tamen nec potui, nec debebam, patrum enim iussis quomodo refragarer? Itaque compresso paulisper dolore, in publicum lugubris tamen & mœstus prodeo, onus impositum vel qualicunque sermone obiturus. Nec enim id ago, ut quas ter maximus princeps laudes meritus est, assequi pergam, adeo tota mea oratio capita certe & veluti fastigia rerum complectetur, quæ dum breuibus absoluero (nec enim angustia temporis, & vel maxime doloris acerbitas prolixum esse sinent) precor & obsecro, benignas sitis & aures & mentes adhibitori. Sed quo me vertam? quid primum vel dicam, vel præteriero? luctu omnia complere dolor iubet, e diuerso dicendi series ordinem postulat. Sed quis infumi ordo possit in ea re, in qua omnia sunt acerbæ, tristia, confusa, contorta, fletu, luctu, lamentis, lacrymis referta? an ignoramus, affectam mentem, sicuti sibi ipsi non confitit, ita variare omnia, alternare, miscere consueuisse? Cæterum ut priores partes diuo nostro Principi tribuamus, partim amor, partim qualiscunque ordo efflagitat. Qua in re non videbor absurde facturus, si generis nobilitatem præmiserò, quæ profecto, si ullis unquam summis viris splendida fuit, diuo nostro Principi splendidissima iure censi debet. Nemo enim est qui nesciat, ab illustrissimis Austriæ Archi-Ducibus diuum nostrum Cæsarem esse progenitum, quæ præcellsa domus, siue in Herculem, ut nonnulli, siue in Priamum, ut alii volunt, sanguinis lineam referas, vetustissima est heroum profata origine; quæ & ab ipso heroico seculo per plurimas ætatum successiones, integerrimos, iustissimos, & omnino optimos principes, quod laudatissimum puto, produxerit: qui pro fide Christi asserenda, sanguinem admirabili constantia effuderint, id quod pulcherrima eorum arma demonstrant; qui sanctitate vitæ in diuos relati sunt, & qui suorum saluti & commodis ita consuluerunt, ut beatum se quisque existimarit, qui sub saluberrimas tantorum principum alas confugere, eorumque vel manu subiici, vel foedere iungi potuisset. Ab iis principibus, a selectissimis illis virtutum cultoribus, diui nostri MAXIMILIANI natales processisse, non potest non esse amplissimo præconio dignum. Quid enim præclarius fuerit, quam summa generis nobilitas, summis coniuncta virtutibus? Jam mirari cessabimus, quæ fieri potuerit, ut tot innumera virtutum dotes in nostro principe reluxerint, quæ enim in nobilissimis maioribus suis ornamenta per partes diffulserunt, ea collecta, & quadam generosi sanguinis propagata serie, in diuum nostrum Principem se tota infuderunt, ut ita princeps genuina illa virtutum semina propria illustrare animi rectitudine, insignibus factis proficere quodam naturæ impulsu contenderit. Hinc eximia illa in Christi religionem Principis nostri deuotio & pietas, cuius rei summa semper oratio, summa



summa autoritas fuit, quam & intentissimo ardore proferre desiderabat, incessata vigilantia conabatur. Erat in Christianæ fidei augmentum ita feruidus, ut per omnes vitæ suæ dies, nihil tam mente versaret, quam quo pacto pacatis inter se principum simultatibus inimici Christi Turcæ profligarentur, suoque ecclesiæ ornatui restitueretur. Quapropter diuina in laudatissimum principem clementia euenisse non dubitatur, quod sub eo, in eius præsentia, sacrosancta Saluatoris nostri toga, quæ trecentis & amplius annis Treueri latuit, reperia potius quam inuenta fuerit, ut sic non hominis industriæ sed diuinæ dignationi hoc grande donum acceptum referatur. Denique qua in S. sedem Apostolicam veneratione diuus Princeps noster fuerit, ex eo non obscure comprobatur, quod summus Pontifex non solum præ cæteris, tanquam verum Ecclesiæ assertorem vnice obseruauit, sed insuper coronam Imperii, quod nullis ante Imperatoribus contigit, Augustam, quo loco celeberrimus erat principum conuentus, honestissima legatione demisit, pompaque ceremoniarum exquisitissima Imperatorem coronauit. Quod si de Iustitia dicere perrexero, iam in immensum nostra se oratio effundet. Ea enim virtus cum vltro late pateat, & præsertim diui Cæsaris actus omnifariam sit amplexa, necesse fuerit, ut qui eam recensere velit, omnem quoque Cæsaris vitam percenseat, quod cum non sit nostri instituti, multa præclara transeunda mihi esse video. Vno tamen hoc argumento iustissimum fuisse liquido apparebit. Cum enim vniuersi esset Orbis Princeps, atque ita solutus legibus, tanti tamen constitit ei esse iusto, ut ad exemplum optimi Principis Theodosii, & legibus ipse se subiiceret, ut contra legis æquitatem nihil vnquam sciens indulgeret. Vidimus nos ipsi, cum nonnulli ex principalibus rescriptis aduersus se extortis grauari sese ac premi quererentur, diuum Principem, vel contra propria diplomata accuratis etiam cautionibus munita, iustitiam administrari iussisse, qua dexteritate ne in Traiano quidem, quamlibet laudato principe, quicquam prædicari possit illustrius. Doctrina porro diuus noster Princeps eminenti ornabatur, ut qui ingenio esset acutissimo, ad omnemque scientiam prompto. Memoria erat incredibili, nam & historias probatiores in numero habebat, & per Juris Ciuilis capita, si quando necesse erat, erudite decurrebat: cum doctis viris varia certabat eruditione, proponebat quæstiones, & tam scite philosophabatur, siue moralia, siue naturalia occurrissent, ut in nullo non literarum genere versatum esse faterere. Hinc egregius ille in literatos fauor emerfit, hinc præstantia in viros doctos collata præmia, quos tanti fecit, ut eos etiam quibus vel umbra vel opinio doctrinæ fuerat, manu adiuuaret. Quæ res non mediocrem causam dedisse existimatur: ut in nostra Germania explosa barbarie, quæ ducentis & amplius annis foeda tyrannide patriam inuaserat & opprimerat, disciplinæ cultiores prope omnes pulchre introducerentur, feliciterque crescerent, & magnum in modum amplificarentur. Non hic dico variarum linguarum peritiam, quas Princeps noster ita habuit cognitatas, ut aduenientibus plurimarum nationum, complurium regnorum legatis, siue Latine agerent, siue Gallice, Hispanè, vel Italice, suam cuiusque linguam, quod in Mithridate admiratur antiquitas, intelligeret, & sine interprete responderet. Quid dicam, qua integritate, qua prudentia, quo indefecto vigore vastam illam Romani Imperii molem sustinuerit? Ad hoc omnis sua intentio dirigebatur, ut publice & priuatim omnibus prodesset, omnium commodis intenderet, oppressos subleuaret, coerceret rebelles, bonos iuuaret, omnibusque sua iura & æquaret & æquo libramine distribueret. Erat tamen ad omnem moderationem ita compositus, ut nec a rectitudinis scopo decurreret, nec culpata seueritate efferuesceret, sed omnia suauitatem quadam comitate temperaret, ut adeo non imperator, non Dominus, sed patronus, sed Pater Patriæ per latos Imperii fines nominaretur. In suos vero provinciales Domui Austriæ subiectos, qua fuerit clemen-



tia, qua benignitate, qua mansuetudine, qua fide, fletu magis quam verbis vllis prædicari conueniet. Quod enim officii genus humanissimus princeps nobis non impertiuit? quod non maximum nostri amore præstitisset? Vestram o nobiles dignitatem quo studio defenderit, protulerit, auxerit fortunata illa vestri ordinis conditio pronunciat. Vos autem, vos o Viri Friburgenses, qua memorabili beneficentia, quo sincero fauore profecutus fuerit, nemo quam vos ipsi prædicare vel possit verius, vel cupidius velit. Ciues suos fidelissimos nominare solebat, quoties de vobis loqueretur, & si quam male forte fauentes aquam subfundere frigidam, mentem ipsius auertere aggredierentur, constanti gravitate compescuit: vt interim præteream amplissimos Romani Imperii conuentus, quos pro euidenti vestra vtilitate, pro vestra immortali fama in hac ciuitate celebrauit: vt obmittam ciuilia vestra statuta ad reipublicæ augmentum non sine labore meo composita, qua animi promptitudine instaurari, suppleri, erigi & confirmari curauerit. Nec minori affectu famigeratam nostram Vniuersitatem fauentissimus Princeps fouendam suscepit, quam & singulari semper gratia affecit liberalique munificentia honestauit. Sic omnes suarum prouinciarum subditos ingenti beneuolentia, solidissima fide, & paterna omnino dilectione complexus est, eorum profectibus, commodis, quieti, & omnibus omnino fortunis vigilantissimè prospexit, operosissime consuluit, omnem prouinciarum statum ita composuit, vt & optimatum dignitatem non minueret, & populares a potentum violentis concussionibus tueretur, omnemque eis securitatem compararet, id quod non solum homines, sed ipsa etiam oppida & terræ, ipsa etiam pax placidissima protefteretur. Hinc factum est, vt quoties in hæc nostra, aliaue prouinciarum loca, desideratissimus Princeps aduenire nuntiaretur, effusi omnis sexus, omnis ætas, paruuli, iuuenes, senes, pendere ex domibus, ex pergulis, ex protectis, ex suggrundis, vias, compita, diuerticula complere, vt benignissimum Principem conspicerent, communemque omnium parentem vel gestu vel nutu salutarerent. Erat omnium patlatitia, quando iucundissimo suo aduentu omnium salus aduenerat. Et hæc in Toga. In bellicis vero rebus quantus fuerit, hic superfedemus, quando ea res modica concludi oratione non potest, sed iustum videtur opus exigere. Tametsi nemo ignorare possit, rei militaris peritia, castrensium laborum tolerantia, amore in milites, robore, fortitudine, audentia, interrito in hostes congressu, gloriosis victoriis insignem fuisse, & ita insignem vt vix vllos dare vel fortissimos principes possis, quos Cæsar noster vel non anteierit, vel æquarit certe. Has prærogatas, has illustres aliasque immensas Principis nostri doctes qui memoria repetent, quomodo non fatebitur honestissimum fuisse, vt in extremam usque senectam vir tantus Christiano Orbi præfuisset? Sed o diram factorum seriem, o inexorabiles Parcas, o immitem mortalium sortem, moritur virtutum decus, illa lucerna recti, quæ optimis semper exemplis præluserat, extinguitur, discessit è viuis prouinciarum defensor, vnicum Romani Imperii columen concidit. Heu nos miseros, heu nos infelices, te viuente, diue MAXIMILIANE, in altissima sedimus tranquillitate, a te pependimus, a te constitimus, tu propugnator noster, tu asylum nostrum, tu vnus eras nostræ salutis seruator, nunc lamentabili tuo occasu in dubium statum, in incertam, in calamitosam conditionem omnia abuertuntur. Nunc vt emortuum corpus, quod sanguine, quod spiritu, quod anima orbatum est, proiecti iacemus inimicorumque nostrorum insidiis, insultibus prædis incursionibusque exponimur. Quis a planctu se temperet? quis a fletu, a lachrymis & veris & spirantibus abstinere possit? Amisimus Principem fidelissimum, Principem quem olim posteritas admiratura potius sit, quam alium vnquam similem habitura. Sed video præstantissimi Viri esse quo respiremus, quo animum colligamus: nec enim videmur tam desolati, quin meliora sperare liceat, quando

illustrissi.



illustrissimus noster Princeps non totus abierit, sed bonam sui partem, ornatissimos duos nepotes CAROLUM post se & FERDINANDUM, duo virtutum decora reliquerit, utrosque potentissimos reges, in quorum fidem & synceritatem spes, fata, successus nostros collocare tuto & possumus & debemus. Denique si meminerimus, communem naturæ legem quæ nobis iniuncta est, siquidem necesse sit vniuersa, quæ orta sunt, rursus occidere, & ita necesse, ut pro Senecæ sententia is qui moritur nullo a nobis differat, nisi quod eò processit, quo nos sequi oporteat, quando suus cuique terminus est defixus, quem transire, quem egredi nemo possit, si præterea hanc qua volumur mortalem vitam expenderimus, quæ misera est, quæ caduca, quæ fragilis est, quæ vel momento durat, quæ pluribus est casibus obnoxia, ut quæ nihil sit aliud quam libertatis carcer, tentationum sentina, alitrix cupiditatum, carnificina honesti, officina agritudinum, omnisque infortunii diuersorium. Quæ si reuoluamus, credo a luctu abstinerebimus, scientes frustra deplangi, quod reparari non potest, & simul existimantes, non infeliciter agi cum his qui virtutibus ornati, bonis referti operibus, mortem obierint, utpote quod calamitosam hanc vitam effugerint, & spe bonæ operationis aliti finem optatum attigerint. Diuus noster MAXIMILIANUS sexaginta iam annos & amplius multa cum laude vixit. Iuuentam honestam exercuit laboribus, virilem ætatem illustribus factis adornauit, senium optimis muniuit consiliis, filios & filias pulcherrimam sobolem sustulit, quos & amplissimis illustres regnis vidit: vicissim aduersa compluria passus est: nouit quibus ærumnis vita mortalis ageretur: & ita vtramque fortunam expertus, pari animi magnitudine vtramque sub iugum misit: nam nec periculis hic ullis cessit, nec succubuit, nec vlla felicitate intumuit. Hoc felici progressu laudatissimus Princeps ad constitutam omnibus metam decurrit: & cum gliscente iam valetudine corporis viribus destitueretur, infracto tamen animi vigore perstitit, inminentemque sibi mortem interritus expectauit, quam & diuino, ut creditur, oraculo præmonitus, prædixit: testamento omnia quæ prouidenda fuerant, deliberate cauit: sacrosancta ecclesiæ sacramenta, salutis nostræ viaticum deuotissime suscepit, religiosus aliisque honestæ vitæ conspicuis viris septus, cum omnem sæculi curam abieciisset, de contemnenda morte, de vitæ miseria, de æterna beatitudine, de DEI beneficiis pulchre differuit, sicque vitam sanctissime finiuit: & ut in vita fuerat omni modestia placidus, ita in mortis pugna, summa decedentis tranquillitas cernebatur. Si igitur virtus animi, si obseruatio recti, religionis, iusti, æquitatis cultus, si fides, si integritas, si quæ cum pietate aguntur, beatam prætiosamque mortem efficiunt, nihil est quod dubitemus, quin selecta illa anima, corporis nexum feliciter reliquerit, & ad coelestes sedes, sempiternis fruitura gaudiis, recta euolauerit. Cohibeamus igitur Viri præstantissimi, cohibeamus lachrymas, cessamus a gemitu, mentem a luctu abstinemus, quin & felici animæ congratulemur, ne vel nostra doluisse causa vel eius felicitati inuidisse videamur. Dulcissimus noster princeps etsi fato ad momentum occubuerit, viuit tamen, viuit in coelis æterna DEI visione beatus, viuetque apud posteros, rerum gestarum gloria. Siquidem præclarissimarum virtutum memoria, nullo vnquam tempore intermoritura celebrabitur.

DIXI.



VDALRICI ZASII ORATIO FUNE-  
BRIS, IN FUNERE ILLUSTRISSIMÆ  
BLANCÆ Mariæ CONJUGIS  
CÆSARÆ.

SI præsentem hanc opinionem, Viri præstantissimi, mea sponte ingrederer, iure a vobis me accusari posse non negarem, ut qui mediocri sum eruditione tenuis, & pro ea quæ nunc est, prouecta ætate, nec ingenii satis viribus valeam, nec succurrat memoria. At porro quando non ultro, sed superiorum iussis parendi necessitate hanc dicendi prouinciam suscepi, est quo mihi sit danda venia, siquidem cum obedientia meam inertiam, quam cum renixu contumaciam exhibere malui. Rogo itaque & obsecro, hoc, quodcumque sit orationiuncula, æqui & boni faciatis, & si quid incultum impolitumque dixerim, partim exiguitati meæ, partim temporum angustia & breuitati acceptum feratis. Sed ad rem ipsam accedamus. Quamuis non ignorem maiorum nostrorum moribus receptum, ut Viri duntaxat, non etiam foeminae pro concione laudarentur, at quando mulieres in Romanorum necessitatibus, detractis a corpore suo aureis ornamentis reipublicæ subuenerunt, parem cum viris, ut ipsæ quoque posthuma ornarentur oratione, honorem meruerunt. Quem morem cum mulierum virtus introduxerit, in serenissimæ Imperatoris nostræ obitu cur non seruauerimus? Cuius siue generis splendorem, siue admirabiles diuinasque virtutes memoria complectamur, copia dicendi non potest non exhiberi uberrima. Natalium suorum splendorem ex hoc colligimus, quod nobilissima ipsam ducalique Sfortiadum familia descendisse constat. Magnum illum & rerum gestarum gloria decoratissimum principem Franciscum Sfortiam Mediolanensium ducem avum habuit. Habuit & patrem virum optimum Galeatium, qui & ipse eius domini dux erat. Matre porro, quam re & affectu Bonam nominauerunt, admodum illustri ornabatur, quæ & ipsos Francorum reges sanguinis necessitudine contingebat. Quid fratrem nominauero, summæ spei adolescentem, & qui, nisi fata ei vitam inuidissent, nulli maiorum suorum inferior futurus sperabatur? Quid patruos? quorum alter Ascanius Romanæ sedis purpuratis insertus, Cardineo præfulgebat honore; alter Ludouicus & ipse princeps, qui nisi se fortuna vertisset, felicissimus & inter Italiæ regulos primus iudicari potuit. Taceo ceteros præclaros viros, qui tanquam ex equo Troiano illustres Græci, ita ex hac generosissima familia emerferunt. His tam præcellentibus stemmatis, sua quoque pulchritudinis dona natura adiecit; insigni enim formæ venustate princeps nostra totiusque & corporis & membrorum elegantia mirifice enituit, ut sicut nomine, ita & veritate rei Blanca Maria, id est pulchra diceretur, quæ insignes & generis & naturæ doctes nimirum meruere, ut ipsa orbis terrarum Domino, Diuo Maximiliano principi inuicissimum, matrimonii nexu iungi digna haberetur: quo excelsiorem illustrioremque maritum non solum sperare, sed ne optare quidem potuit: maritum inquam qui & pace & bello nulli clarissimorum prisca ætate Imperatorum concesserit. In pace quippe Romanum Imperium admirabili sua prudentia, iustitia solertissima, vigiliis indefessis ita gubernat, ut nec ulli labori parcat, & ne somno, quieti, cibo, aut ulli voluptati indulgeat, dum in publicum proficit. Bello vero tanta gerit se animi acrimonia, tanta rerum militarium experientia, tam inuicto robore, ut quoties manu conferendum fuerit, hostes ipsos infestissimos profligarit, ingentes fuderit exercitus, atque ita plurimis victoriis incomparabilem famam, gloriam immortalem sit consecutus. Huius tanti Imperatoris tam præclarum connubium quamuis nostram principem felicissimam redderet, diuina tamen illa virago, hoc illustri culmine



ne non contenta, suis etiam se fecit virtutibus monstrabilem. In DEum enim, in sanctos, in nostram Christianam religionem impensissime ferebatur. Inter suos vero quamuis comitate, mansuetudine, modestia, perquam humanam se præstaret, hoc tamen institutum quadam velut clementi grauitate ita temperabat, vt & mansuetudinem colerent & maiestatem in ea venerarentur. Castitatis denique & continentiae, omnisque matronalis verecundiae tam tenax erat custos, vt verbum impudicum coram ea ne nutu quidem significari, nedum proloqui fas esset, vt quæ cum ea conuenissent nobiles puellæ, non tam in regali gynæceo, quam in schola pudicitiae versari dicerentur. Et vt semel finiam, nihil non fecit, nihil non omisit, quod fieri vel omitti a laudatissima foemina reuerendissimæque matrona potuerit, vt iuste illud Prophetæ ad Cæsarem nostrum accommodari possit: Astitisse reginam a dextris suis in vestitu deaurato circumdatam varietate. Hanc tantam principem cum is ipse diuus Cæsar, quoniam multis Imperii & bellis & negotiis implicitus diu non viderat, inuisere destinasset, ecce tibi tristis adfertur nuncius, luce defunctam naturam soluisse. O duram fatorum acerbiter. O inexorabilem Parcarum seriem. Siccine fatalia abrumpi fila debuerunt, vt in medio velut progressu floris detruncaretur amoenitas, & optimus maximus Cæsar sua thalami consorte, quo minime tempore expectauit, priuaretur? Profecto, si flendum est cum flentibus, si Lazarum Saluator noster fleuisse legitur, si quoque duodecim tabularum leges funebrem luctum recipiunt, meritissimo fieri existimarem, pro eo qui integerrimus in amantissimum nostrum principem nobis amor est, vt & nos vehementer lugeremus, & lachrymas vbertim profunderemus. Sed quando meminisse possumus, ea nos lege natos esse, vt aliquando moriamur, pallida enim mors æquo pulsât pede pauperum tabernas regumque turres: vt & nobis quoque dura ista, sed tamen terenda via sit, operæ erit pretium si luctum morabimur. Nouimus enim quam fallax, incerta, vana & instabilis nostra sit vita mortalis, quæ instar rapidissimi fluminis, instar amentati jaculi, & sicut sagittæ ex manu potentis, ita ad mortem, decurrit, impellitur, excutitur. Quod adeo verum est, vt pro Euripidis sententia, nemo viuens de crastino sit securus. Hoc est, quod vitam nostram Sophocles, simulachro, pulveri, & vmbra comparauit. Hoc denique est, quod Varro Vir doctissimus eleganter (vt omnia) hominem bullam nominare consuevit. Sicut enim in aquis agitatæ bullulae & velut tubercula erumpunt, sed mox euanescent, ita, quo momento nascimur, mortis casibus sumus expositi: vt merito Augustinus dubitarit, hoc quod viuimus æuum, mortalemne vitam, an vitalem mortem appellaret. Et Plinius, hominem aut non nasci, optimum esse dixerit, aut natum quam ocysime aboleri. Adeo natura non tam parentem, quam seueram se nobis nouercam exhibuit. Accedit ad hæc incommoda, incerta qua volumus rerum conditio. Aut enim ægri viuimus, aut sani. Ægros imperiosa, ne dicam periculosa medicorum iussa constringunt, sub quorum manu (vt Plato voluit) viuere miserrimum est. Caterum sanos mille vincula circumueniunt, hunc superciliosæ superbiae fastus, alios cretata ambitio, quosdam inuidiae liuor, impura Venus multos necit & colligat, & in summa, quot sensuum affectionibus, quas passionibus vocant, homo comprimitur, tot laqueis misere catenatur. Atque adeo vndique nobis angustiae sunt, & vt cum Propheta loquar, tot nos laquei prauenerunt, in medio tot laqueorum ingredimur, vt Diuus Antonius mundum totum plenum laqueis esse quondam exclamauerit. Grandis error mortaliū, qui ementitam lenocinantis vitæ felicitatem mirantur, & velut seruos, vel mancipia, tot grauibz se vinculis obiciunt: cum tamen nescire non possint, sicut libertas est res inestimabilis, ita seruitutem esse miserrimam. Plebs olim Romana ære alieno oppressa, cum a creditoribus graui nexu stringeretur, in montem sacrum pro consequenda libertate confugit. Nos ad quem fugimus



mus montem, ut tot vinculis, tot laqueis liberemur? nempe ad montem Domini pinguem atque coagulatum, cuius tamen conscendendi nulla nobis patebit facultas, nisi ingrediamur sine macula, operemur iustitiae, & aliquando a grauiissimo vinculorum catenarumque pondere colla excutiamus. Id quod in hac pura anima, cuius hodie funebreis pompas celebramus, euenisse sperandum est. Neque enim mala mors esse potest, quam bona vita praecessit: ut iam non solum a luctu cessandum, sed etiam ei gaudendum sit, quam tot liberatam malis, hoc glorioso monte potiri, gestire letitia, & suo creatori gratificari pie credimus, quod ipsa erepta sit de laqueo venantium. Quod si in via adhuc & carcere pressa detineatur, non quidem luctu moereamus, non situ deficiamus, sed redemptorem humani generis DEum, pro eius salute,

precibus, eleemosynis, aliisque piis operibus.

deuote comprecemur,

DIXI.



BIBLIOTHECA  
VNI. AC. CELL.  
GRACOVENSIS



D. Vítava. Farsl. 546. 548.

Biblioteka Jagiellońska



stdr0027729



